


ሃዕሮ ወላድ መጻፈ.



Alaba-K'abeena: ሃዕሮ ወላድ መጻፈ. (New Testament)

ሃዕር ወኣድ መጻፈ
Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025
740fd658-7c09-56dd-a374-995d21c2d66d

Contents

ማቶሴ እንጂሊ 1
ማርቆሴ እንጂሊ 42
ሉቃስ እንጂሊ 69
ያህይ እንጂሊ 112
ሶቀማኖ ሆጉተ 142
ሮሜ 181
ዎኔ ቆሮንቶስ 199
ለንክ ቆሮንቶስ 216
ገሊትይ 227
ኤፌሶን 233
ፍልጵስዩስ 239
ቆላሰያስ 244
ዎኔ ተሰሎንቄ 248
ለንክ ተሰሎንቄ 252
ዎኔ ጠሞትዎሴ 255
ለንክ ጠሞትዎሴ 260
ቲቶ 264
ፍልሞኒሃ 267
አብራውያን 269
ያቁብ 283
ዎኔ ጴጥሮሴ 288
ለንክ ጴጥሮሴ 293
ዎኔ ያህይ 296
ለንክ ያህይ 301
ሰቅ ያህይ 302
ይሁደ 303
ያህይ ለዕዮ መናመተ 305

ማቶሴ ከተቦሃ ቀርቼኔ መሰህ ኢስ እንጂሊ ኣጉሱ

ማቶሴ እንጂሊ ኢስ ኦሜት ተብሳሃ ሄጭ ኩለሞ ጡምሳንቹ እሁሰለክ መገኑ ኑባቾ ጉዲን መኒሃስ ኢሱ ተብሱ ላገተ ዊንሺእንኩ እሱን እሁሰ ኩለኖ ተሸት ላገተ እርእሃን። ኩ ተሸት ላገት ኢስ በለሰ አለሞ ነጹ ጠለዕል ኣይሁዲሃ እሁዕነ ጉዕማንከ ኣዲንያ አል መኒሃት።

ማቶሴ እንጂሊ ጡመገ ኣገዕሪን ተቃጠቦሃ መጻፈ፤ ኢስ አለሞሀኒቹ ኪሽ ጠመቀሙሰለክ ፊተነሰተኔሃ ጠወዕዮቻ ኤተሮን ገሊላን ኦሶዮ አዋጁሰ ተማርሱሰለክ ጥዞርመተ ፈይሰ ክድመተ ሆንጠህሰኖ። ህከኒቹ ኤተሮን ኢስ ገሊላቻ ዩሩሳሌመ ኦርዕዮገለክ ከን ኣዲንያ አሉን ሄዕዮ ዘማን ጎፍሜ ሳምንታን እኩ ጠወ ኩለኖ። ኩ ጠወንኩ ሰቀለሙሰ ሬሁሰለክ ሬሆቻ ኬኤሰ ጉዕመንከ ጠወአኖ።

ኩ እንጂሊ ኢስ መገን ሕገ ፈሰሪሃ ሹምነቱ ዮሲሃለክ መገን ዋምነትተኔሃ ተማርሰኖ ሎረ እስተማርቹ እሁሰ እኩገ አዕይ ሆንጠህሰኖ ትምርቲቻሰ በተአኖሰ ኦዱ ጠረኘ ሃሊን ነንቱ ቤቹ ቤሀሞእሃን፡-

1. መገን ዋምነቱ ወረሰ መን ሀል መብተተ ግዳጅለክ መጨረሽ ወጢ ደግሲሰኖ ቆተ አል ትምርተ (ፎሎ. 5-7)
2. ቶነ ለሙንኩ ኣሳበት እንጂሊ ዱዱብሰቶተ ሶሃንቶ ወክት ኣሰሞሰ አዎኑ ሀሰሰኖሰ ጠወ (ፎሎ. 10)
3. መገን ዋምነትተኔሃ ሆንጠኩ አደደ ሞሳልተ (ፎሎ. 13)
4. ኢስ አዎንተኔሃ ለሊሰኖ ትምርተ (ፎሎ. 18)
5. ከን ዘማን ጎፍሞንለክ መገን ዋምነቱ አሜቱሰ ኩለኖ ትምርተ (ፎሎ. 24-25)

መጻፈሰ አፎሃ

መሰህ ኢስ እለንሸሰ ደቡተለክ አለሙሰ (1፡1—2፡23)

ጠመቃንቾ ያህይ ክድመተ (3፡1-12)

ኢስ ጠመቀሙሰለክ ፊተነሙሰ (3፡13—4፡11)

ኢስ ዊመ ሆጉሰ ገሊላን ጀመሩሰ (4፡12—18፡35)

ገሊላቻ ዩሩሳሌመ (19፡1—20፡34)

መጨረሽ ሳምንተ ዩሩሳሌማንለክ ኣዝጋገኑከሰ (21፡1—27፡66)

ቀርቼኔ ኬኤሰለክ ልግብ ወክት ለሉሰ (28፡1-20)

ኢስ አለሞ አበኖናተኔሃ

(ሉቃ. 3፡23-38)

1 መሰህ ኢስ ደወዳለክ አብራሃም ደቦቻ ክለቀሙሰ ህት ከተበሞኡ።

2 አብራሃም አሳቀ አሎ፤ አሳቅ ያቁብ አሎ፤ ያቁብ ይሁደለክ እመሰ ኦሱተ አሎ፤

3 ይሁድ ትማራቻ ፋሬሰለክ ዛረ አሎ፤ ፋሬሰ ሄሰሮን አሎ፤ ሄሰሮንን አራሜ አሎ፤

4 አራሞ አሞናደብ አሎ፤ አሞናደብ ነአሳን አሎ፤ ነአሳንን ሱልማን አሎ፤

5 ሰልሞን ራኣቤቻ ቦኤዛ አሎ፤ ቦኤዛ ሩቲቻ ኢዮቤደ አሎ፤ ኢዮቤድን እሴዬ አሎ፤

6 እሴይን ዋመ ደወዳ አሎ፤ ደወድን ኦርዮ ጫቻ ሱላይማን አሎ፤

7 ሱላይማንን ሮብአመ አሎ፤ ሮብአምን አብዮ አሎ፤ አብዮን አሳደ አሎ፤

8 አሳፍን ኢዮሳፌጠ አሎ፤ ኢዮሳፌጠን ኢዮራመ አሎ፤ ኢዮራምን ኦዝዮ አሎ፤

9 ኦዝዮን ኢዮኣታመ አሎ፤ ኢዮኣታምን ኣዝዛ አሎ፤ ኣዝዛን ሕዝቅያሰ አሎ፤

10 ሕዝቅያሰን ሞናሴ አሎ፤ ሞናሴን አሞጶ አሎ፤ አሞጶን ኢዮሰያሰ አሎ፤

11 ኢዮሰያሰ አሰራኤል ኤመቱ ባብሎን ኣገንት መርቶ ወክት እኩንያኔለክ እመሰ ኦሱተ አሎ።

12 ባብሎናን ኣገንት መርቶቻ ኤተሮን እኩንያን ሰላቴለ አሎ፤ ሰላቴልን ዘሩባቤሌ አሎ፤

13 ዘሩባቤልን አብዮደ አሎ፤ አብዮድን ኤልያቁመ አሎ፤ ኤልያቁመን ኣዘረ አሎ፤

14 ኣዘርን ሳደቀ አሎ፤ ሳደቅን ኣከመ አሎ፤ ኣከመን ኤልያደ አሎ፤

15 ኤልያድን ኣልዓዛረ አሎ፤ ኣልዓዛርን ማታን አሎ፤ ማታንን ያቁብ አሎ፤

16 ያቁብን ዩሱፈ አሎ፤ ዩሱፍን «መሰህ» * ዬኖ ኢስ አልቶ መርዮመ ምኒ እን እኩ።

17 ህዝን እኩቤቹሃ አብራሃሚቻ ደወዳ ኢሊ ቶነ ሾሎ እለንሸ፤ ህትን ደወዳቻ ባብሎን ኣግተአ መርቶአሃ ኢሊ ቶነ ሾሎ እለንሸ እኩ፤ ህትን ባብሎን ኣግቶቻ መሰህ ኢሊ ቶነ ሾሎ እለንሸ።

1:1 መዞ. 132፣11፤ ኢሳ. 11፣1። 1:11 2 ሃገ. 24፣14-15፤ 2 ዱዱ. 36፣10፤ ኤር. 27፣20። * 1:16 መሰህ፡- ዩ ቡረሞሃ ሃሃን።

መሲህ ኢስ አለሞገ

(ሉቃ. 2፡1-7)

18 መሲህ ኢስ አለንሹ ህትጎታን፤ አመሰ መርየመ የሱፍሃ አሰንት የሃሄን ደቀንቱዕናን ጠሊሊ አያን ወልቃን ላደተ አካን መኑ ጉዕሙንኩ ደን።

19 ጠዕሜ የሱፍ ፈየ መንቹ አኮቤቹሃ መናን ፍሹዕን ጠወሰ አጉሮተ ሰውዬ።

20 ህካን ሰውየንን ቀርቻ መላይኪቹ ሀቄን ለልሰ «የሱፋ ደወዴ ቤቶ! ኣሴመሄ መርየመ ላደተ አኮኢሁ ጠሊሊ አያን አኮቤቹሃ አሴተ ኣአቶተ ዋጅቶት።

21 እሴን ለቤ ጨል አልታኢ፤ እሰን ኡመትሰ ጨቤቶሰ ጡምሰናቤቹሃ ሱዕመሰ «ኢሰ» ይታጎት» ዬሰ።

22 ሁኩን ጉዕሙንኩ አኮሁ ቀርቹ ነብዬቾን

23 «ሀፍቱት ላደተ አክ ለበ ጨል አልታኢ፤ ህትን ሱዕመሰ «አማኑኤሊ ይት ገአታኢ» አማኑኤሊ ዩ «መገኑ ኒንት» ዩሃን።

24 ህካን አኮቤቹሃ የሱፍ ግሰኛቻ በቅዬ ወክት ቀርቻ መላይኪቹ አዘዠገን መርየመ ኣኤሴ።

25 ጠወ አኮጎሪ መርየመ ዎኔቤ ጨል አልቶተ ኢሊ እሴን ደቀሞበአ † አቅ፤ የሱፍን አለሞ ጨል «ኢሰ» ይ ሱዕመ ፋሼሰ።

2

ሸርቂን አሜቶ ቤዜተ ዎለኣ ኤንኪዕናወተ

1 ሄሮድስ ዎመ አኮ ዘማን ኢሰ ይሁድ ባዶን ቤተሌም ከተማን አለሞ ወክት ቤዜተ ዎለኣ ኤንኪዕናወተ መኑ ሸርቂቻ ዬሩሳሌም አሜቶኤ።

2 እሰን «አይሁድ ዎመ አሁና ጨሉ አለሞሁ ሀከንቤቻንት? ሸርቂን ቤዜተ ለዕን እሲሃ ሰገንዶተ አሚንቶም» ይት ጠዕሞቶኤ።

3 ዎሙ ሄሮድስ ህካን ሞጮጩ ወክት አበ ህልቆ፤ ህትን ዬሩሳሌም መኑ ጉዕሙንኩ ህልቆኤ።

4 እሰን ኡመትሰ ቁሰ አዎንሳኑተለከ ሕግ አሰተማረተ ጉዕመንከ ጭምአዕይ «ቡረሞ መሲህ አለመኖሁ ሀከቤቹ» አሁሰ ጠዕሚሰ።

5 እሰን «ይሁድ ባዶን ቤተሌም ከተማን አለመኖ፤ መሰንትሰ ነብዬቹ

6 «ቤተሌም ከተመ!

አት ይሁድ ባድ አዎንሳናቻ ጉዕሚቹን ሆፈአንትበኢ፤

ህካን አኮቤቹሃ ኪቻ ኢ መን እሰራኤሊ አገረኖለከ አዎንሰናሁ አለመኖ ይ ከተቦኤ» ይቶኤ።

7 ሀከቺ ኤተሮን ሄሮድስ ህከ ኤንኪዕናወተ መን ማጭ ገአ ጠወሰ ፎፎቻ ቤዜት ለልቶ ወክት ጠዕም ደጎ።

8 እሰን እሰንተ «መርቲን ህከን ጨልተኔሃ ጡመገ አጥረመቹ፤ ደገንተጎሪ አሜቲን ኩልቲነንተኤ፤ አኒህ ሰገዶተ መራም» ይ ቤተሌመ ሶኮ።

9-10 እሰን ሄሮድሴቻ ሞጮጭት ፋልቶ ወክት ሸርቂን ለኦ ቤዜት አዎንሰተንሰ ለኦ ወክት አበ መንደኦኤ፤ ሁኩ ሸርቃን ለኦ ቤዜንት ጨሉ ዮ ምኒ ቡዕላን ኡርታኢሃ ኢሊ አዎንሰቶሰ።

11 እሰን ህከ ምኒ አጎ ወክት ጨሉ አማንተሰ መርየማን ሚጡቡ የኢሃ ለኦ ብሬሰ ጉሉጵት ሰገዶኤ፤ ህከኒቻ ኤተሮን ሳጥን ፈንት ዎርቀ፣ ህጣነለከ ከርቤተ ዬኖ ህጣነ ፋሽት ኣቶኤ።

12 ሁኩ ኤንኪዕናወተ መኑ ሄሮድሴበ ፈንቀልት መርታበአገ መገኑ ሀቄን ኩላን ዎሎ ዎቄን ባዶሰ ፈንቀልቶኤ።

የሱፍ ጨለንለከ አማን ግብጸ ሁቾገ

13 እሰን መርቶቻ ኤተሮን ቀርቻ መላይኪቹ ሀቄን የሱፊሃ ለልሰ «ሄሮድስ ጨል ሾተ ሀሰናቤቹሃ ጨልለከ አመተ ኣአት ግብጽ ባዶ ሁን፤ አን ኩሎሂተ ኢሊ ህከኔ አፋዕል» ዬሰ።

14 የሱፍ ሀንከዕሪን ኬዕይ ጨልለከ አመተ ኣአ ግብጽ ባዶ ኦርዕዮ።

15 ህከኔን ሄሮድስ ሬሆተ ኢሊ አፋዕላኢ፤ ሁኩን አኮሁ ቀርቹ ነብዬቾን «ቤቱኤ ግብጺቻ ገኤም» ዩ ላገት ዊንቶታት አቅ።

ሄሮድስ ኦሱተ ሸሲሾገ

16 ሄሮድስ ቤዜተ ለኦ መኑ ጣንሱሰ ደጎ ወክት አበ ኡሙዕሪኢ፤ ቤተሌማንለከ ህከን አዶን ጉዕማንን ዮ ለሞ ዘማንለከ ለሞ ዘማንኒቻ ዎሮን ዮ ለቤ ኦሱተ ጉዕመንከ ሾኖተ አዘዠ፤ ህከ ወክትንከ ደጎሁ ኤንኪዕናወተ መኑ ኩልቶሰጋት አቅ።

17 ሁኩን አኮሁ ነብዬቹ ኤርሞያሰ

1:18 ሉቃ. 1፡27። 1:21 ሉቃ. 1፡31። 1:23 አሳ. 7፡14። † 1:25 ደቀሞበአ፡- ዮ ምኒ አገገለከ ምን ማንቸገ አከ ኦሰበአገ ዩሃን። 1:25 ሉቃ. 2፡21። 2:2 ኤር. 23፡5፤ ዘካ. 9፡9፤ ዘካ. 24፡17። 2:6 ሚኪ. 5፡2። 2:15 ሆሴ. 11፡1።

- 18 «ራሄል እላተሴ ኦኒን
ያርተለክ ጨንጨነት ራማ ዬናቤቸን ሞጮጨንቶኤ፤ እለሴ ሬቶቤቸሃ ሰብር አቶበእ» ዬአሁ ዊሞታት።
- የሱፍ ጨለንለክ አማን ግብጺኛ ፈንቀሉስ
- 19 ሄሮድስ ሬቶኛ ኤተሮን ግብጽ ባዶን ቀርኝ መላይኪቹ የሱፍበ ሀቄን አሜኝ
- 20 «ጨል ሽቶተ ሀሶ ሙኑ ሬቶቤቸሃ ኪእ አት ጨልልክ አመተ ኣእት እስራኤል ባዱ ፈንቀል» ይኩሎ።
- 21 ህከ ወክት የሱፍ ጨልልክ አመተ ኣእ እስራኤል ባዱ ፈንቀሎ።
- 22 ይሁድ ባዶን አርኪላዎስ ኢነስ ሄሮድሴ ቤቸን ሞመ እክ ሄዕዮገ የሱፍ ሞጮጭ ይሁድ ባዱ ኦርኤ ዋጂእ፤ መገኑ የሱፍሃ ሀቄን ኩላንስ ገለል ባዱ ኦርዕዮ።
- 23 ህከቤቸንክ ኢሌ ወክት ናዝሬት ከተማን ሄዕዮ፤ ሁኩን እኩሁ ነብያኖን « ናዝሬት መንቹ» ዬን ገሌኖ» ዬማሁ ዊሞታት።

3

ጠመቃንቸ ያህይ አዋጀ
(ማር. 1፡1-8፤ ሉቃ. 3፡1-18፤ ያህ. 1፡19-28)

- 1 ህከ ወክት ጠመቃንቸ ያህይ ይሁድ ባድ ኡድማን አዋጀን አሜኝ።
- 2 «ሁኩዕኑን! ሰሜ ምዘንቱ ሆንጠኮቤቸሃ ጨብክዕኔ ቶበቲን ፈንቀሌ» የኖ አቅ።
- 3 ነብዬቹ እስያስ «መቄ መንቹ ኤላ ኡድማን ቀርቸ ሀገናቤቹ ብዝ አዕዬ ህትን ምቃስ ጌጥ አዕዬ» ይያርተን ሄኑ ላገተ» ዬአሁ ያህይተኔሃት።
- 4 ያህይ ኦድኑት ጋሜል ኦርዛኛ ደደመተ አቅ፤ ረመዙስ ጠፍሪን ቆዕሪኖ አቅ፤ ህትን ዳመ መለቡለክ ከንቸፈሩሃ አተኖ አቅ።
- 5 ህከ ወክት ዬሩሳሌም ከተሚኛ፥ ይሁድ ባዲኛ ጉዕሚኛለክ የርዳኖስ ዊኣዳን የ ባዲኛ ጉዕሚኛን ሙኑ ያህይበ አሜተኖ አቅ።
- 6 ጨብሰ ቶበተን የርዳኖስ ዛዘፍ ዊን ያህይ ጠመቀኖሳት አቅ።
- 7 ያህይ ልግቡ ፈርሳዊትለክ ሰዱቃውት እስበ ጠመቀንቶተ አሜተን ለዕዮ ወክት እስንተ «አዕኑ ምሪኛ አለት! መገኒኛ አሜታ ኡሙዕራኛ ጡምቶኖተ ኩሎህዕኔሁ አይት?»
- 8 ቲሱንገ ጨብክዕኔ ቶበቲን ፈንቀሉክዕኔ ለሊሳ ጡሙ ሆንተ አዕዬ።
- 9 ህትን ነኤ ለብራሂምተ እሌ ይቲን ጡምቲንጋሃ አጉዲንከህዕኔ፤ መገኑ ከን ክኒኛ ለብራሂም አለተ አዕይ ኪሶተ አታላኖገ እን ኩላንክዕኔ።
- 10 ከልቱ ሀቅ ፎቃን አፋዕልዮኡ፤ ጡሙ ላልቹ ላልበ ሀቀ ጉዕመንከ ሙራን ገራን ምሪኖ።
- 11 ጨብክዕኔ ቶበቲን ፈንቀሉክዕኔ ለልሰሃ ዊን ጠመቃንክዕኔ፤ እኮጎሬ ኩ ኢኛ ኤተሮን አሜተኖሁ ጠሊላ አያንጎለክ ገራን ጠመቀኖህዕኔ፤ እስ ኢኛ አበ ሎሪሃን፤ እን ጫዕመስ እጆተ በቀዕዮምበእሃን።
- 12 ህካን እኮቤቸሃ እስ ኦዱ መክሶተለክ አቶተ ጋቢኛ አደ አአተ ቤሉ ዮስ፤ አደ አዕዮኛ ኤተሮን ጠለሼ አቶተ ጭምአዕይ ጎተራን ምሪኖ፤ ጠዉ እኮጎሬ ጋበስ ጠዕታበእ ገራን ቡስኖ» ዬእ።

ኢስ ጠመቀሙስ
(ማር. 1፡9-11፤ ሉቃ. 3፡21-22)

- 13 ህከ ወክት ኢስ ገለላኛ ያህይበ የርዳኖስ ዛዘፍ ዊን ጠመቀሞተ አሜኝ።
- 14 እኮጎሬ ያህይ «እን ኪን ጠመቀሙ ሀስሰኖኤ ቤሉ አት ህት ኢቤቹ ጠመቀንቶተ አሜቶንት?» ይከሞተ ሀሹ።
- 15 ኢስን «ነኤ መገኑ ሀስሰኖቹ ጉዕመንከ ዊንሹ ሀስሰኖኤቤቸሃ ቲሱ ከንቶቲኤ» ዬ ወክት ያህይ ጠዋንከስ አተቀም ኢስ ጠመቆስ።
- 16 ኢስን ጠመቀም ዊ ኣዚኛ ደዕል ፋሎ፤ ህከኒኛ ኤተሮን ሰም ፊልተዕይ ፈንተዕያን መገን አያኑ ሀንደዕሬገ እክ ድር ኢስ አሌን አፋዕለን ለዕዮ።
- 17 ህከ ወክት «እን ሙንደአምለክ ኢታም ቤቲኤ ክኒት» ይታ ላገት ሰሜኛ አሜቶኡ።

4

ኢስ ፌተንሙስ
(ማር. 1፡12-13፤ ሉቃ. 4፡1-13)

1 ህክኒች ኤተሮን ኢስ አልብሲን ፊተነሞተ መገን እያኑ ኡላ ኡድመ መሴሰ።

2 ህክኒን ሸይሉ በርለክ ሸይሉ ህንከዕርተ ሰመቾች ኤተሮን ኢስ ጎሩ አደሰ።

3 ህከ ወክት አልብሱ ኢስ ፊተኖተ አሜች «አት መገን ቤቱ እኮንትጎሬ ህንዴ ከ ክነተ እቸተ አእ» ይሰ።

4 ጠዉ እኮጎሬ ኢስ ፈንቀሽ « .መኑ መገን አፊች ፋልታ ላጋኒት ቤሉ ጠለዕል እቻን ሄአኖበኑ» የመሞ ከተበሞኤ» ይሰ።

5 ህክኒች ኤተሮን አልብሱ ኢስ ጠሊላ ዬሩሳሌም ከተመ መሴሰ፤ ህክኒን ዱእ ምኒ አሌ አል ፋሽ ኡርሾ

6 ጠሊላ መጻፋን

« ሎከክ ክኖን ቆዕልታበእገ ኪሳሃ አገርት ኪስ አደተ መገኑ መላይከስ አዘዘኖ፣ የመሞ ጠሊላ መጻፋን ከተበሞኤ፤

ህካን እኮቤቺሃ አት መገን ቤቱ እኮንትጎሬ ህንዴ ዋር ዋልት ኡብ» ይሰ።

7 ጠዉ እኮጎሬ ኢስ ፈንቀሽ « ቀርቼ መገኑክ ፊተንቶት፣ የመሞ ወዕናንከ ከተበሞኤ» ይእ።

8 ህክኒች ኤተሮን አልብሱ ኢስ ሎረ ቆተ አል ፋሽ ኣዱንያ አል ዋመተ ጉዕመንከ ሎርመሰ ለሊሽ

9 «ኤሳሃ ሙግይት ሰገደንቴኤ ጎር ካን ጉዕመንከ ኣሳንኬ» ይእ።

10 ኢስ ፈንቀሽ «አት ሸይጣኑ ኢች ቁዕር፤ ጠሊላ መጻፋን ቀርቻ .መገኒሃክ ሰገድ፤ ጠለዕል አሲሃ ጠገሞ፣ የመሞ ከተበሞኤ» ይእ።

11 ህከ ወክትንከ አልብሱ ኢስ አጉሮ፤ ህትን መላይከንት አሜት ካደንቶሰ።

ኢስ ገሊላን ተማርሱ ጀመሩስ

(ማር. 1፥14-15፤ ሉቃ. 4፥14-15)

12 ኢስ ያህይ ኡሱረሞገ ሞጮጬ ወክት ገሊላተ ኦርዕዮ፤

13 ጠዉ እኮጎሬ ናዘሬት ከተመ አጉር ዛብሎጎለከ ንፍታሌም ባደን ሎረ ባር መዴንዮ «ቅፍርናሆመ» ይኖ ከተማን ሄዕዮ።

14 ሁኩን እኮሁ ነብዬቹ እስያሰ

15 «ገሊላ ባር አደ መሰኖ ዋቁ አዲን

ዮርዳኖስ ዛዘኖ ዊዉድ አዲን ለለኖ

ዛብሎን ባድ መኑ፣ ንፍታሌም ባድ መኑለከ

አይሁድ እኮባእ ገሊላ መኑ

16 ሁኩ ቱንሰቾን ሄአኖ ኡመቱ አበ ኑር ለዕዮ፤

ህትን ሬሆ ሀሌ ኣዜንዮ መኒሃ ኑሩ ፋሎሰ»

ጠወዕዮ ራግ ላገት ዊንቶታት።

17 ህከን ወክቲች ኪሽ ኢስ «ሰሜ ዋምነቱ ሆንጠኮቤቺሃ እዕኑ ጨብቻክዕኔ ፈንቀሌ» የን ተማርሱ ጀመሩ።

ኢስ ሾሉ ቁርጩሜተ ወሻዳረ ገኡስ

(ማር. 1፥16-20፤ ሉቃ. 5፥1-11)

18 ኢስ ገሊላ ባር መዴን ሃመን ለምተ አመኑሱተ ለዕዮ፤ እስን «ጴጥሮሴ» ይኖ ሰሞኔትለከ አመሰቤቱ እንድራሴት እቅ፤ ቁርጩሜተ ወሻዳረ እኮቤቺሃ ወሻዳሰ ሎረ ባራን ኡቺተን ለዕዮ።

19 እስን «አሜ ኤሳሃ አዎኔኔ፤ እን ክዕኔተ ቁርጩሜተ ወሻዳንተገን መን መገን አደ ኤቤነንተረ አኣንክዕኔ» ይሰ።

20 እስን ህከ ወክት ወሻደሰ አጉርት ኢስ አዎንቶኤ።

21 ህከንቤቺቻ ቀዉተ ህጎገን ዘብዴዎሴ አለተ እኮአሩ ዋልት ለምተ አመኑሱት ያቀብለከ ያህይ አኒነክሰን ሜጡብ እክ ጀልብ ኣዜን ቁርጩሜ ወሻደ ጎበን ለዕይ ኢስ ገኡ።

22 እስን ህከ ወክት አነሰለከ ጀልብሰ ጌኣአት ኢስ አዎንቶኤ።

ኢስ ልግብ መን ተማርሱሰለከ ፈይሱስ

(ሉቃ. 6፥17-19)

23 ኢስ ጭምትስ ሞናን ተማርሰንለከ መገን ዋምነት ተሸት ላገተ አዋጀን ገሊላ ባዱ ጉዕመንከ ሃመኖት እቅ፤ አደደ ጥዘነተለከ ጎግ ጥዘነተ ፈይሰኖት እቅ።

4:1 እብ. 2፤18፤ 4፤15። 4:2 ፋል. 34፤28፤ 1 ጎገ. 19፤8። 4:4 ዘዳ. 8፤3። 4:5 ነህ. 11፤1፤ ዳን. 9፤24። 4:6 መዝ. 91፤11-12። 4:7 ዘዳ. 6፤16። 4:10 ዘዳ. 6፤13። 4:12 ማቶ. 14፤3፤ ማር. 6፤17፤ ሉቃ. 3፤19-20። 4:13 ያህ. 2፤12። 4:16 እሳ. 9፤1-2። 4:17 ማቶ. 3፤2።

24 ሁኩ ዲዲቡ ሰርይ ባደን ጉዕማንን ሞጮጨሞቤቹን ሙኑ እደደ ጥዘናን ጥዝ ኦርጨቀንተ መነ እስበ ኤቦኡ፤ ጥዘናመ በላን ዶርረኖ ዲሩ እፎ ሙኑሁ፥ ጮቱ እፎ ሙኑለክ ናፋ ሙኑ ሄዕኖ እቅ፤ ጠዉ እኮጎሬ ኢስ ጉዕመንከሰ ፈይሾ።
 25 ገለላችላክ «ቶኑ ከተመ»* ዬድ ባዲቺ፥ ዬሩሳሌሚቺ፥ ይሁዲችላከ ዮርዳኖስ ዛዘኖ ዊ ዉድ እዲች አሜቶ ኤመቱ ኢስ አዎንቶኡ።

5

ኢስ ቆተ አሌን ተማርሱስ
 (ፎሎጬት 5—7)

- 1 ኢስ ልግብ ኤመት ለዕይ ቆተ አል ፋል ህክኔ አፋዕሌ ወክት አሳበሰ እስቤቹ ሆንጠኮኡ።
- 2 እሰንተ ተማርሱ ጀመሮ።

ሀንቅ በረከተ ደዕተ መነ
 (ሉቃ. 6፥20-23)

- 3 ኢስ «ገዉስ ሆኖስ መገኖን ድክአእሩ ሰሜ ዎምነቱ እሳሃ እኮቤቹን ማሰእንቶአረ።
- 4 ሻዛሩ መገኑ ሰብር እሰኖሰቤቹን ማሰእንቶአረ።
- 5 መረርሰጭታአሩ ኡለተ ረገእቤቹን ማሰእንቶአረ።
- 6 መገን ፈይመተ ጎራይታሩለከ ሰገባእሩ መገኑ ዲሰኖሰቤቹን ማሰእንቶአረ።
- 7 አሙዛእሩ መገኑ አሙዘኖሰቤቹን ማሰእንቶአረ።
- 8 ነጡ ቀልቡ ዮሰሩ መገኑ ለእቤቹን ማሰእንቶአረ።
- 9 ሀራርሰታአሩለከ ወገሬት አታአሩ መገን አለተ የመንታቤቹን ማሰእንቶአረ።
- 10 መገኒሃ አዘዘንቶቤቹን ያየንታሩ ሰሜ ዎምነቱ እሳሃ አሀሮቤቹን ማሰእንቶአረ።
- 11 «ኢ መሳን ሙኑ ቦርረንክዕኔለከ ሸረንክዕኔ ክዘቢን ሱዕመክዕኔ ቤሲነኒሁ ተሸ ዩንክዕኔ።
- 12 ህካን እኮቤቹን ሰማን ሎረ ዋገ አእቴነተቤቹን ሙንደዕዬ፤ ተሸ ዩንክዕኔ፤ ክዕኔች ብርተ ሄኦ ነብያኑት ህትን ኦርጨቀንቶኡ» ዬእ።

መጥኔለክ ኑር ሞሳልተ
 (ማር. 9፥50፤ ሉቃ. 14፥34-35)

- 13 ኢስን «እዕኑ ዲንየ አልሃ መጥኔተ፤ ጠዉ እኮጎሬ መጥንት ጤኡ ሆጋረ ሀት አኤን ጤኣገ እኤኖሴ? ህት መጥንት መቶርቺሃ ደግለልታበእቤቹን ቶሩናንሴ ሙኑ ሎካን ከደኖሴ ቤሉ መቶርቺሃ ደግለልታበእ።
- 14 አዕኑ ኣዲንያ አሊሃ ጉዕሚንከ ኑርሃ፤ ቆተ አሌን ዮ ከተሙ ማጠሞተ አታለኖበእ።
- 15 አዪሁ ኩራዘ ለሊሸ ምኒ ኣዜን ዮ መኒሃ ጉዕሚንከ ለለኖ ቤቾን አፋሸኖ ቤሉ ሎንቆች ዎሮን አፋሸኖበእ።
- 16 ህትን ሙኑ ክዕኔ ጡሙ ሆጉክዕኔ ለእ ሰማን ዮ አነክዕኔ ገለትጭቶተ ክዕኔ ኑሩሁ መኒሃ ለሌን» ዬእ።

ሕግ ትምህርትተኔሃ

- 17 ህትን ኢስ «መገኑ ሙሲሃ ኣሴ ሕገለክ ነብያኑት ተማርሰቶኢሃ ድጅተ አሜቾሚሃ አጉዲንከሀዕኔ፤ እን እስ ተማርሰቶኢሃ አቶኖተ አሜቾሞ ቤሉ ድጅተ አሜቾሞበእ።
- 18 ሀንቅንከ ያንክዕኔ፤ ኡለትለክ ሰሞሁ ህጎተ ኢሉ ኩ ሕኑ ጉዕሙንኩ ዊመኖ ቤሉ ሕጊች መት አልቲ በእበእ።
- 19 ህካን እኮቤቹን አዪሁ ሕጊች ቀውሃሲ አዘዘሞበጎሬለከ ሙኑ አዘዘመኖበእገ ተማርሴጎሬ እሰ ሰሜ ዎምነቱን ጉዕሚቶን ቀዉ አሀኖ፤ ጠዉ እኮጎሬ ሕገ ቶገኖሁለክ ዎሉ ሙኑ ሕገ ቶጋገ ተማርሰኖሁ ሰሜ ዎምነቱን ሎረ አሀኖ።

* 4:25 ቶኑ ከተሙ፡ የኖህ ግሪክ እፎ ጠዉእእ አይሁድ እኮበእ ሙኑ ሜጡብ ሂእ ቤቶ ቶኑ ከተመ ዬኖ፤ ኩ ከተሙ ልግቡስ ሂእአሁ ገሊላ ባር ሸርቀንለክ ቅልብ ሸርቅ እዲንት። 5:4 እሳ. 61፥2። 5:5 መዝ. 37፥11። 5:6 እሳ. 55፥1-2። 5:8 መዝ. 24፥3-4። 5:10 1 ጴጥ. 3፥14። 5:11 1 ጴጥ. 4፥14። 5:12 2 ዱዱ. 36፥16፤ ሰቀ. 7፥52። 5:13 ማቶ. 9፥50፤ ሉቃ. 14፥34-35። 5:14 ያህ. 8፥12፤ 9፥5። 5:15 ማር. 4፥21፤ ሉቃ. 8፥16፤ 11፥33። 5:16 1 ጴጥ. 2፥12። 5:18 ሉቃ. 16፥17።

20 ህዳን እኩቤቸሃ ክዕኔ ፈይመት ሕግ አስተማራችላክ ፈርሳዌ ፈይማች በተለባች ሆሮ ሰሜ ምምነቱ ኣኔነንተበእገ ኩላንክዕኔ።

ኡሙዕራተኔሃ ተማርሱገ

- 21 «ዎዕኔ ዘማን መኒሃ ለመነ ሸቶት፤ መነ ሼ እን ኣሉን ፈረደመኖሰ፤ የመሞሃ ሞጮጭቴንታኣ።
- 22 እኮጎሬ እን ያማሁ ከኒት፤ እመሰ ሴቲን ኡሙዕሪኖህን፤ ፈረደመኖሰ፤ እመሰቤቱ ቦረረኖሁ ኣገት ዳኛኖ ሆንጠሀሆኖ፤ ህትን ስኩ ደግላልልትባሁ። ይ መነ ቦረረኖሁ ሆሮን ጠእትበ ጌራን ፍርደ ኣእኖ።
- 23 መገኒሃ ክትማኖ ጠረጴዛ ኣሉን ክትመ ሆንጠሀሆንት ወክት ኪን ኡሙዕራሄሃ ሰውዶቶንትጎሬ
- 24 ክትመ ሆንጠሀሆንት ጠረጴዛ ኣሉን ህከኔ ጌኣኣት ኣመክቤትበ መርት ሀራዕሪም፤ ህከኒች ኤተሮን ኣማት ክትመ ሆንጠሀሆን።
- 25 ባለጋሩክ ከሰሻንኬ ፍርድ ሞኔን ኡርታንትሀኒች ሄጭት ባለጋርንከክ ሀራዕሪም፤ ህዳን ኣትበጎሬ ባለጋሩክ ዳኒሃ ሀግሽ ኣሰኖሄ፤ ዳኙንኩ ኡሱር ሞኒ ኣግሰኖሄ።
- 26 ሀንቅንከ ያንኩ፤ ኣሌክ ኖ ኤዳሃ ሹልት ባቱዕነ ኡሱር ሞኒች ሆሮ ፋልታንትበእ» ይእ።

ዝነት ሂላ እሁስ ተማርሱገ

- 27 ኣሰ « ዝነተ ኣቶኖቼ፤ የመሞሃ ሞጮጭቴንታኣ።
- 28 እኮጎሬ ቴሱ እን ኩላንክዕኔ፤ መንቹተ ለዕይ ቀልቤሰ ሄዕላኛ መንቹ ዝነተ ኣዕዮህንገ ሞለኣመኖ።
- 29 መኬክ ኣልት ጅሰሚኛክ መቱተ ሉሰሰ ጎሬ እሴተ ፋሸት ኡጅ፤ መሰንትሰ የወሙ ጅሰመክ ኣዛቤን ቡብኖህኒች ጅሰሚኛክ መትተ ኣልተ ሆንጎቲሁ ቆሀኖ።
- 30 መኬክ እንገክ ሉሰሰሄ ጎሬ ሙርት ኡጅ፤ መሰንትሰ ጅሰመክ ጉዕሙንኩ ኣዛቤን ኣገኖህኒች ጅሰሚኛክ መኬክ እንገተ ሆንጎቲሁ ቆሀኖ» ይእ።

ጫተ ገፈርተኔሃ ተማርሱሰ

(ማቶ. 19፥9፤ ማር. 10፥11-12፤ ሉቃ. 16፥18)

- 31 ህትን «ጫሰ ገፍረኖሁ ጉዕሙንኩ ገፈር ፋርመ ኣሱንሴ» የመሞኡ።
- 32 እኮጎሬ ቴሱ እን ኩላንክዕኔ፤ ዝነተ ኣቱዕነ መንቹሰ ገፈረኖሁ ጉዕሙንኩ ዝነተ ኣታገ ኣእኖሴ፤ ህተ ገፈር መንቹተ ኣእኖሁ ጉዕሙንኩ ዝነተ ኣዕዮሃ እሆኖ።

ጤሌዕልተኔሃ ኣሰሞ ትምርት

- 33 ህትን « ከኒች ብርተ ሄኦ መኒሃ ለመገኒሃ ኣጎንት ወኣድ ላገተ ዊንሸ ቤሉ ድጅቶት» የመሞሃ ሞጮጭቴንታኣ።
- 34 እኮጎሬ እን ቴሱ ኩላንክዕኔ፤ ሰማን ሆሮ ጤሌዕልቶኖቼ፤ መሰንትሰ ሰሞሁ መገን ጃንትተ ቦርጭመ።
- 35 ኡላን እኮ እቃ ጤሌዕልቶኖቼ፤ ኡለት መገን ሎክት ፎሎጭታሃ ቤቹ፤ ህትን ዬሩሳሌማኒ ጤሌዕልቶኖቼ፤ ዬሩሳሌሙ ሎሪ ምሞየ ከተመ፤ ህዳን እኩቤቸሃ ሆሮ ጤሌዕልቶኖቼ።
- 36 ሙሚኛክ መትተ ሞጂተ ህከረንገ ገንበለ ኣቶተ ኣታልታንትበእቤቸሃ ጤሌዕልቶት።
- 37 ህዳን እኩቤቸሃ ጠወኤንታሁ እሆሆ እሆሆ እሆሆ እሆሆ ህሰሰኖ፤ ከኒች ኣደ ኣካ ላገት ጉዕሙንኩ ሸይጣንቹት» ይእ።

ገዱተ ኣፋ ሀሰሲባሃ እሁስ

(ሉቃ. 6፥29-30)

- 38 እሰን « ለልተ ፋሼህኒሃ ኣልሰ ፋሸ፤ እንኩተ ብጮህኒሃ እንኩሰ ቢጥ» የመሞሃ ሞጮጭቴንታኣ።
- 39 እኮጎሬ ቴሱ ኩላንክዕኔህ ኣዕኑ ኣይሃ ገዱተ ፈንቀሸቶኖቹ፤ እይሁ መኬክ መጫለ ሞቀረኖህኒሃ ጉረ ኣድ መጫለ ሞቀረተ ኣሰ።
- 40 ሙቱ መንቹ ሸሚዘክ ኣኣተ ሀሽ ከሰሻሂ ጎሬ ኮቴክ በርግት ኣሰ።
- 41 መቱ መንቹ ቀጫ ጌሰ ህርሲሴኤ ዬጎሬ ኣት ለሙ ኣፎ በርግት ህርሲሰሰ።
- 42 ኡጫኖሄህኒሃ ኣሰ፤ ህትን ለቄጮተ ሀሰኖህኒሃ ለቄሰሰ» ይእ።

ዲነ ኢትተኔሃ

(ሉቃ. 6፥27-36)

- 43 ኣሰን « ጃለክ ኢት! ዲነክ ግብ ዬማሃ ሞጮጭቴንታኣ።
- 44 እኮጎሬ እን ኩላንክዕኔ፤ ዲነክዕኔ ኢትዬ፤ ሸርታህዕኔህኩኡተ ዱኣ ኣዕዬ ያንክዕኔ።

5:21 ፋል. 20፥13፤ ዘዳ. 5፥17፤ 16፥18። 5:29 ማቶ. 18፥9፤ ማር. 9፥47። 5:30 ማቶ. 18፥8፤ ማር. 9፥43። 5:31 ዘዳ. 24፥1-4፤ ማቶ. 19፥7፤ ማር. 10፥4። 5:32 ማቶ. 19፥9፤ ማር. 10፥11-12፤ ሉቃ. 16፥18፤ 1 ቆሮ. 7፥10-11። 5:33 ለዌ 19፥12፤ ዘኁ. 30፥2፤ ዘዳ. 23፥21። 5:34 ያዌ. 5፥12፤ ኢሳ. 66፥1፤ ማቶ. 23፥22። 5:35 ኢሳ. 66፥1፤ መዝ. 48፥2። 5:37 ለዌ 19፥12፤ ዘኁ. 30፥2፤ ዘዳ. 23፥21። 5:38 ፋል. 21፥24፤ ለዌ 24፥20፤ ዘዳ. 19፥21። 5:42 ዘዳ. 15፥8፤ ሞሳ. 24፥29። 5:43 ለዌ 19፥18። 5:44 ሞሳ. 25፥21-22።

- 45 ህዳን አቴንተጎሬ ሰማን አረሃክዕኔ አለተ እኩነንተ፤ መሰንትሰ እሰ ሂላኖተለከ ጡመ መረሃ አሩ ቆሸኖ፤ ህትን ፈየ መረሃለከ ጨበኛኖተ ጤን አሰኖ።
- 46 ኢተኖህዕኔሃ ኢትቴንተ ጎር መ ዋጉ ዮህዕኔ? ህዳን ጨበኛኑንት አታእሃበእንደ?
- 47 ጠለዕል አሉክዕኔ ወገሬትሴንተ ጎሬ ዋሎ መረኚች መ ቆኪነን? ህዳን አይሁደ እኮበእ ሙኑሁ አታእ።
- 48 ህዳን እኮቤቼሃ ሰማን ዮ እኑክዕኔ ኩሌኖሰሁ ዮበእሃ እኮገን አዕኑሁ ኩሌኖህዕኔርቼ ዮበእረ እኩ» ዬእ።

6

ሰደቀተ አሰተኔሃ

- 1 ኢሰን «ጡመተ ሆጉተ አቴንተገ መኑ ለዕይ ገለትጨን ይቴን መን ብሬን እኢች አገዕርዬ፤ ህዳን አቴንተጎር ሰማን ሄዕዮ መገረኝ መቴርቼሃ ደአቴንተበእ።
- 2 ህዳን እኮቤቼሃ ቡጥቻኖተ ሰደቀተ አቴንተ ወክት መኑ ለአሰተ አታ መኑ ዱእ እኤኖ ምናን አታሀገገ መኑ ለእኔ ይቴን አቶኖቼ፤ ሀንቅንከ ያንክዕኔ፤ እሰ ሆጎሰ ወጥ አእቶኡ።
- 3 እኮጎሬ አት ቡጥቻኖተ ሰደቀተ አታንት ወክት እዩሁ ደጉዕጎ ማጥ አሰ።
- 4 መሰንትሰ ማጥ ሰደቀተ እሱክ ደገኖ መገኑ ጡመ ሆጎክ ወጥ አሰኖሄ» ዬእ።

ዱእ አእተኔሃ

(ሉቃ 11፡2-4)

- 5 ኢሰን «ዱእ አቴንተ ወክት መኑ ለአሰተ ዱእ እኤኖ ምናንለከ ዋቄ ገበላን ኡርት አታ መንገ አቶኖቼ፤ ሀንቅንከ ያንክዕኔ፤ እሰ ሆጎሰ ወጥ አእቶኡ።
- 6 ዱእ አቴንተ ወክት ምንክ ኣግ ጡፈ ጡፍ ማጠም ዮ እንክ ቤቼ ዱእ እእ፤ ማጤን እኤማሃ ለአኖ መገኑክ ጡመ ሆጎክ ዋገ ባተኖሄ።
- 7 ዱእ አታንት ወክት እይሁደ እኮበእ መንገ ፈንቀላንሰቴንን ዱእ አቶኖቼ፤ ሁኩ መኑ ፈንቀላንሰት ዱእ አቶቤቼሃ መገኑ ሞጭጨኖሳሃ አት ቁራርሰት ዱእ አታእ።
- 8 አዕኑ እሰገ እኮኖቼ፤ እሰን ክዕኔ እኑ ሀሰሰኖህዕኔሃ ጠዕምቶኑዕን ሃጭ ደገኖ።
- 9 «ህዳን እኮቤቼሃ
« ሰማን ዮንቲ ኒ እኑ!
ጠለሉ ሱዕመክ ሎዕሩን፤
- 10 ዋምንቲክ አሜቲን፤
ሃሽእቲክ ሰማን እኮገን
ህትን ኣዱንያ አሉን እኩን።
- 11 ከበሬተ እካኔ እቸተ አሰኔ።
- 12 ነኡ ዋሎ መረ ቤሱ አጉርናምገን
ኒ ቤሱሃ አጉርኔ።
- 13 ሂላርቼች ጡምሰኔ ቤሉ
ፌተናን ኣግሶትኔ፤
አሚዕን ይቴንን ዱእ አዕዬ።
- 14 «መን ቤሱ አጉርቴንተ ጎሬ ሰማን ዮ እኑክዕኔ ክዕኔ ቤሱሃ አጉርኖህዕኔ።
- 15 ጠዉ እኮጎሬ መን ቤሱ አጉርንሰ ይቴንገች ሰማን ዮ እኑክዕኔ ክዕኔ ቤሱሃ አጉርኖህዕኔበእ» ዬእ።

ሶመንተኔሃ ተማርሱሰ

- 16 ኢሰ «ሶመንተኔንተ ወክት መኑ ለአሰተ አታ መንገ ሻዞኖቼ፤ እሰ ሶመኑሰ መኑ ለአተ ይት ሚንሰ ቤሳእ፤ ሀንቅንከ ያንክዕኔ፤ እሰ ሆጎሰ ወጥ አእቶኡ።
- 17 ጠው እኮጎሬ አት ሶመንተኔንት ወክት ሚንተ ኣዕልት ቡዕለክ ቡዕር።
- 18 ህዳን አቶንትጎሬ ማጭ ለአኖ እኒክ ቤሉ ዋሎ አይሁ ለአኖበእ፤ ማጭ ለአኖ እኑክ ሆጎክ ወጥ አሰኖሄ» ዬእ።

ዱንያተ ጭም እኡ ገበእባሃ እሁሰ

(ሉቃ 12፡33-34)

- 19 ኢሰ «ሞጋኑት ኣግ ቢጥ ሞግታቤቸኒ፥ ብሉት እታቤቸንለከ ቡሃይ በአኖቤቸን ዱንያክዕኔ ኣዱንያ እሉን ጭምአቶኖቼ።

20 ጠዉ እኮጎሬ ብሉት እታበእቤቸኒ፤ ቡሃይ በአናበእቤቸንለከ ሞጋኑት ቢጥ ኣግ ሞግታበእቤቸን ሰማን ዲንያክዕኔ ጭም አእዩ።

21 ህካን እኮቤቸኑ ዲንያክ ዮቤቸን ቀልቡክ ህከኔ ሄአና» ዩእ።

ጅሰም ኑር
(ሉቃ. 11፡34-36)

22 ኢሰን «አልክ ጅሰምህክ ኑርሃን፤ አልክ ፈየተ እኮጎሬ ጅሰሙክ ጉዕሙንኩ ኑር እክ ለለና።

23 አልክ ፈየተ እክበጎሬ ጅሰሙክ ጉዕሙንኩ ቱንሰቹ አሀና፤ ህካን እኮቤቸኑ ኬሳን ዮ ኑሩ ቱንሰቹ እኮጎሬ ቱንሰቹሰ ሄንከ በተአናሃ አሀና?» ዩእ።

ሂአተኔሃ ጨነቀሙ ገበእባሃ እሁሰ
(ሉቃ. 16፡13፤ 12፡22-31)

24 ህትን ኢሰ «መቱ መንቹ ለሞ ቀርቹሃ ጠገሞተ እታለናበእ፤ መቱሰ አተና፤ ዋሉሰንገ ግበና፤ ህከረንገ መቱሰ ሎርሰና፤ ዋሉሰንገ ህንቀና፤ ህትን መገኒሃለክ ብሪሃ ጠገሚሃ ኣታልቲንተበእ።

25 ህካን እኮቤቸኑ እን ኩላንክዕኔ መ እንታም? መ እንጋም? መ ኦደዕናም?» ይቲን ሄአክዕኔተኔሃ ሻዞናቹ፤ እቲቹ ሄኡ ኦድናቹ ጅሰሙ በተአናበእንደ?

26 ህንዴ ሰማን ብርይታ ጨኤተ ለዕዩ፤ እሰ ሙጣበእ፤ ሞዳበእ፤ ቀፎኒ ዋርታበእ፤ ጠዉ እኮጎሬ ሰሜ እኩክዕኔ እትሰሰ፤ ህከረ እዕኑ ጨኤቶ በተኤንተበእንደ?

27 ክዕኔኤቶ ጨነቀሞ ኤሙሬንከሰ መቱ በር * በርጎተ እታለሁ አዩት?

28 ህትን ሚሃ ኦድናተ ሻዞንነታት? ህንዴ ኡብሉን ዮ ቦብሉት ነጵታገ ለዕዩ፤ እሰ ገይሀሰ ሆጎን ሆጋበእ ህከረንገ ደዳበእ።

29 እን ኩላንክዕኔ፤ ሆር ዋሙ ሱላይማን ህከን ጉዕሙንከ ሎርማንተሰ ከን ቦብሎቶ መትሴገ ኦደዕዮበእ።

30 መገኑ ከበር ለልት ጋቲተ ጊራን ቡባ ህጤተ ህት ኦደኣገ አአናሃ እኮቶ እዕኑ አመዕነቱ ሆረዕዮህዕኔሩ ክዕኔተ ቆህሽ ኦዲሰናህዕኔ።

31 ህካን እኮቶ መ እንታም? መ እንጋም? መ ኦደዕናም?» ይቲን ሻዞናቹ።

32 ህካን አይሁደ እኮበእ መኑሁ ሀሳኢ፤ ክዕኔሃ ህኩ ጉዕሙንኩ ሀሰሰና ሀዕኔገ ሰሜ እኩክዕኔ ደገና።

33 እዕኑ እኮጎሬ ሄጭቲን መገን ዋምነቲሰለከ ፈይመሰ ሀሼ፤ ህኩ ጉዕሙንኩ ጠዉ በርገመናህዕኔ።

34 ህትን ጋቲተክዕኔ ይቲን ሻዞናቹ፤ ጋት ገዬተሴ ሻዞኢ፤ በሪሃሰ በሪሰ ጭንቀት እካእ» ዩእ።

7

መን አሌን ፈረዱ ገበእባሃ እሁሰ
(ሉቃ. 6፡37-42)

1 ኢሰን «ፈረደመናህዕኔበእገ ፈረድናቹ።

2 መሰንትሰ እዕኑ ፈረዱንተገን ፈረደመናህዕኔ፤ ህትን ብክቲንተህኔን ብከመናህዕኔ።

3 ኪ አሌን ዮ ሎረ ሁረ ለኡዕናን ህት ኪ እመክ ቤት አሌ ኣዘን ዮ ሁረ ለኣንቲት?

4 ህትን ኪ አሌን ዮ ሎረ ሁረ ከንቲዕን ኪ እመክቤቱ ህንዴ አሌክ ዮ ሁረ ፋሻም ይቶተ ህት ኣታልተን?

5 እት እን ሎረሃን ይታንቲሁ፤ ሄጭት አሌክ ዮ ሎረ ሁረ ፋሻ፤ ህከኒቶ ኤተሮን እመክ ቤት አሌን ዮ ሁረ ፋሻቶተ አጥረመት ለኣንት።

6 መገኒሃ አደ እኮርቹ ማሻተ ኣቶናቹ፤ ህትን ሎካንከሰ ከድ ቤሳበእገ ዋርቀ ቦኬ ብራን ኤጅቶናቹ፤ ማሻንት ፈንቀልት ገዕምታህዕኔ» ዩእ።

ዱእ አሌን ደአተኔሃ
(ሉቃ. 11፡9-13)

7 ህትን ኢሰ «ኤጭዬ ኣእቲንተ፤ ሀሼ ደአቲንተ፤ ህትን ኡሩተ ቆጭዬ ፈንመናህዕኔ።

8 ህካን እኮቤቸኑ አደሁ ኡጨናህ ቶገና፤ አደሁ ሆሽ ጎሬ ደአና፤ ህትን አደሁ ኡሩተ ቆጭጎሬ ፈንተአናሰ።

9 ክዕኔኤቶ አደሁ ቤቲሰ ዳቡተ ኡጨጎሬ ክኑ ኣሰናህ አዩት?

10 ህትን ቁርጩሜተ ኡጨጎሬ ዋርቹ ኣሰናንደ?

11 እዕኑ ሂላኑተ እኩንገ አላተክዕኔ ጡመርቹ ኣሱ ደገንታቶ ሰማን ዮ እኩክዕኔ ኡጭታህኑኡተ ጡመርቹ በትሽ ኣሰናበእንደ?

* 6:27 ኡሙርስ ዘማኔን መቱ በር- የሩህ መት መቶ ፈሰረመ መጻፋን «ኡርሽሰ አሌን መት ብኩተ» የሩህ ሄአና። 6:27 መዝ. 39፡5-7። 6:29 1 ገገ. 10፡4-7፤ 2 ዱዱ. 9፡3-6። 7:2 ማር. 4፡24።

12 ህዳን እኩቤቸሃ መኑ አሰህዕኔተ ኢትቴንታሃ ጉዕመንክ አዕኑ እሳሃ ህትን አዕዬ፤ መሰንገትሰ መገን ሕጋን ዬማሁለክ ነብያኑት ኩልቶኢሁ ሀከኒት» ዬአ።

ሩካሽ ኡርተኔሃ

(ሉቃ. 13፥24)

13 ኢሰ «ሩካሽ ኡርን ኣጌ፤ መሰንገትሰ በእቤቹ መሰታ ኡሩት አልባላሎታን፤ ህትን ዎቆሲ ሎረሃን፤ ሀከን ዎቃን ሃመኖ መኑ ልግብያ።

14 እኮግሬ ሂእቤቹ አዎንሰታ ኡሩት ሩካሽታን፤ ህትን ዎቆሲ ኦርሰኖሃን፤ ህዳን እኩቤቸሃ ሀከ ዎቃሃ ደአኖ መኑ ቀዎሃን» ዬአ።

ሀቁ ላልቺንከሰ ደገመኖ

(ሉቃ. 6፥43-44)

15 ኢሰ «አዕኑ ክዘብ ነብያኖች አገዕርዬ፤ እሰ ክዕኔቤቹ ሆለተ አጉድ አሜታኣ፤ ጠወ እኮግሬ ወልቅሽ እተኖ ኦሌገ ኖአረ።

16 እሰንተ ደጌነንተሳሁ ላልቺንከሳት፤ ኡት ሀቁች ወይን ዬኖ ላልቹ ህትን ቃልቃልች ኦድ ላልቹ መቤኖበእ።

17 ህትን ጡሙ ሀቁ ጡሙ ላልቹ ላለኖ፤ ጠወ እኮግሬ ሂሉ ሀቁ ሂላ ላልቹንክ ላለኖ።

18 ጡሙ ሀቁ ሂላ ላልቹ ላሎተ ህትን ሂሉ ሀቁ ጡሙ ላልቹ ላሎተ አታለኖበእ።

19 ጡሙ ላልቹ ላለኖበእ ሀቁ ጉዕመንከ ሙሬን ጊራን ቡሴኖ።

20 ህዳን እኩቤቸሃ ክዘብ ነብያኑት ሆጎሰ ላልቺን ደጌነንተሰ» ዬአ።

ኢሰ «እን ደጋንክዕኔበእ» ዩሰ

(ሉቃ. 13፥25-27)

21 ኢሰ «ሰማን ሂኣኖ ኢ እን ሃሽኣቱተ ዊንሸኖህን ቤሉ ቀርቾ! ቀርቾ! የኖኤሁ ጉዕሙንኩ ሰማ ዎምንቱ ሆር አገኖበእ።

22 ፍርድ በር ልግቡ መኑ ቀርቾ! ቀርቾ! ሱዕሚንከክ ራገ ጠወዕንበእንደ? ሱዕሚንከክ ሩሃንያ ፋሽንበእንደ? ህትን ሱዕሚንከክ ልግብ አጀብሲሰኖ ጠወ አዕንበእንደ?» ይታእ።

23 ሀከ ወክት ሕን ሆር ደጋንክዕኔበእ፤ አዕኑ መገን ትዛዝ ቶገንቡሩ ኢች ካጸ ሸቄ ያም» ዬአ።

ክኖንለክ ሸፋር አሌን እጃረንቶ ምንተ

(ሉቃ. 6፥47-49)

24 ኢሰ «ሀከ ኢ ላገተ ሞጮጭ አገረኖ መንቹ ምንሰ ክን አሌን ጠረኝሽ እጃር ኤንኬዕናሙ መንቹ አጉደኖ።

25 ምንሰ አሌን ጠረኛ ጤኑ ኡቦ፤ ድርሱንኩ አሜቹ፤ ህትን ቦብሩ ሀንበሎሰ፤ ጠወ እኮግሬ ምኑ ክን አሌን እጃረሞቤቸሃ ኡቦበእ።

26 ጠወ እኮግሬ ኢ ላገተ ሞጮጭ አገርቡ መንቹ ምንሰ ሸፋር አሌን እጃር ገወ መንቹ አጉደኖ።

27 ምንሰ አሌን ጤኑ ኡቦ፤ ድርሱንኩ አሜቹ፤ ህትን ቦብሩ አበ ሀንበላንሰ ምኑሰ ሸፋር አሌን እጃረሞቤቸሃ ወክትንከሰ ኡቦ፤ ሁኩ ሞኑንኩ ሂለገ ኡቦ» ይ ተማርሴእ።

28 ኢሰ ህዳን ተማርሰ ሹሎ ወክት እሰ ተማርሴ ትምርታን ኡመቱ አበ አጀብሲጤኦእ።

29 መሰንገትሰ አሰተ ተማርሴኢሁ ሹምንቱ ኖሰ መንጋት ቤሉ ሕግ አሰተማረጋበእ።

8

ኢሰ ጎግ ጥዘነት አፎሰ መንቹ ፈይሱሰ

(ማር. 1፥40-45፤ ሉቃ. 5፥12-16)

1 ኢሰ ቆታች ድሬ ወክት ልግቡ ኡመቱ አዎንቶሰ።

2 ሀከ ወክት አሌን ፋልታ ጎግ ጥዘነት* አፎሰ መቱ መንቹ ኢሰበ አሜቹ፤ እሰን ብሬሰ ጉሉጵ «ቀርቾ! ኢትቶንትጎር ነጠ አቶኤተ አታልታንት» ዬአ።

3 ኢሰን እንገሰ ሂር ሀከ መንቹ አፍ «ፈቃጆም ነጠ እህ» ዬአ፤ ሀከ ወክት ሁኩ ጎግ ጥዘነት አጉርቶሰ።

4 ሀከ መንቹ ኢሰ «ከ ጠወ አይሃ ጠወኑት፤ ጠወ እኮግሬ ቴሱ መርት ነጠ እሁክ ቁሰቸሃ ለልሰ፤ ህትን መኒሃ ጉዕሚንከ ሞሰክር እሆተ ሙሰ አዘኩገን መገኒሃ ክትሞ ሆንጠህሰ» ዬአ።

ኢሰ ጥቤ ሀለቅች ካዲንቹ ፈይሱሰ

(ሉቃ. 7፥1-10)

7:12 ሉቃ. 6፥31። 7:14 ኤር. 21፥8፤ ዘዳ. 30፥19። 7:15 ሕዝ. 22፥27። 7:19 ማቶ. 3፥10፤ ሉቃ. 3፥9። 7:19 ማቶ. 12፥33። 7:23 መዝ. 6፥8። 7:29 ማር. 1፥22፤ ሉቃ. 4፥32። * 8:2 ጎግ ጥዘነት- የኖሁ ጠለሉ መዳፋ የኖሁ ጎግ አሌን ፋልታ አደደ ጥዘነተ ጉዕመንካት። 8:4

5 ኢስ ቅፍርናሆም ከተመ አጎ ወክት መቱ ጥቤ ሀለቁ ኢስበ አሜኛ

6 «ቀርቾ! ካዲንቹኤ ናፈ እክ እበ ኦርጨቀመን ምኔን ኦሰዕዮኡ» ይሉ።

7 ኢስን «እን መር ፈይሳንስ» ይሰ።

8 ጠዉ እኩጎሬ ጥቤ ሀለቁ «ቀርቾ! እት ኢ ምኒ ኣጎተ እን በቀዕባ መንቹ፤ ጠዉ እኩጎሬ ጠለዕልመት ላገተ ጠወእ፤ ካድንቹኤ ፈዮ።

9 እን ገዉንኩእ ኢኛ አሊን ዮ ዳጊሃ እዘዘማም፤ ህትን ኢኛ ዋሮን እን እዘዘም ዋታደሩ ዮኤ፤ መቱስ ሓጻ ኦርኤ ይም ጎሬ ኦርኤ፤ ዋሉን ስበ አም ይም ጎሬ አሜተ፤ ኢ ካድንቹንኩ ሓን እኤ ይም ጎሬ አእኖ» ይ ፈንቀሺእ።

10 ኢስ ካን ሞጫጩ ወክት አጀብሰጭ አዎንተን ሄኦ መሂሃ «ሀንቅካክ ያንክዕኔ፤ ህትኔ አመዕነቱ እሰራኤላን ደጎምበእ።

11 ከ ጠወ አጥራመቹ፤ ልገቡ መኑ ሸርቂቶለክ ገርቢኛ አሜት ሰሜ ዎምነቴን አብራሂሚን፤ አሳቂንለክ ያቀቤን ሜጡበ እክ ማዳን አፋዕልት አታኦ።

12 ሰሜ ዎምነት አለት አብሊ ቱንሰቸን ኡጂናንሰ ህከኔ አልፋቴተለክ እንኩተ አጡ አሀሮ» ይሰ።

13 ህከኒኛ ኤተሮን ኢስ ጥቤ ሀለቁቹ «ኦርኤ፤ አመዕንቶንትገን አሀን» ይሰ፤ ካድንቹሰ ህከ ወክት ፈይላ።

ኢስ ልገብ ጥዘናመተ ፈይሱስ

(ማር. 1፡29-34፤ ሉቃ. 4፡38-41)

14 ኢስ ጴጥሮሴ ምኒ አገኖ ወክት ጴጥሮሴ በሉት ፋረ ደሙሜን አበ ጥዣንሴ ኦሰእን ለዕዮ።

15 እስ እንገሴ ኡሎ ወክት ፋረት ኦጉርቶሴ፤ እሴን ኬእ እሰንተ ካደንቶኤ።

16 ሀዎሬ ወክት ልገቡ መኑ ሩሃንዩ አሮስ መነ ኢስበ ኤሶኤ፤ እሰን ላጋንተሰ ልገብ ዶሮረኖ ዱር ፉሸእ፤ ህትን ጥዘናመተ ጉዕመንከ ፈይሾ።

17 ሀካን አዕዮሁ ነብዬኛ እስያሴን «እስ ጥዘነኔ ኣኤእ፤ ጥዘነኔ እጄእ» ይሉሁ ዊሞታት እቅ።

ኢስ አሳባተ አልታሰ ኦርሸተ

(ሉቃ. 9፡57-62)

18 ኢስ ልገቡ ኤመቱ እስ መዴን ጭምዬሊሃ ለዕዮ ወክት «ከን ባርኛ ዉድ አደ ቶሌ» ይ አሳበሰ አዘዘ።

19 ህከኒኛ ኤተሮን ሕግ አሰተማራኛ መቱ ኢስበ አሜኛ «አሰተማርቾ! እት መርታንትቤቹ ጉዕመንከ አዎናንኬ» ይሰ።

20 ኢስ «ዋለንጌሃ ኤሎ ዮሰ፤ ሰሜ ጨኣንተ ጎዕምት ዮሰ፤ ጠዉ እኩጎሬ መንኛ ቤቲሃ ገዉስ ፎሎሲሰና ቤቹ ዮሰበኤ» ይ ፈንቀሺእ።

21 ህትን አሳባኛሰ መቱ «ቀርቾ! ሃጭ መር እነኔ ሞጎተ ተ ፈቀደኤ» ይሰ።

22 ጠዉ እኩጎሬ ኢስ «ሬዮ መነ ሬዮ መካንኩ ሞጉን፤ እት ኤሳሃ አዎኔኤ» ይሰ።

ኢስ ዊሁላ ጨለ አዕዮገ

(ማር. 4፡35-41፤ ሉቃ. 8፡22-25)

23 ህከኒኛ ኤተሮን ኢስ ጀልባን ኣጎ ወክት አሳባንት ሜጡበ ኣጎኤ።

24 ጠረኛ ቦብሩ ባር አሉን ኬዕያን ዊሁሉ ጀልባ ጥምብሰተ እኮ፤ ጠዉ እኩጎሬ ኢስ ግሾ እቅ።

25 አሳባንት ኢስበ ሆንጠክ «ቀርቾ! በዕናሚት፤ ጡምሰኔ» ይተ ግሰኛኛ ኬሶኤ።

26 ኢስን «አዕኑ አመዕነቱ ሆፈዕዮህዕዕኔ፤ ሚሃቱ ዎጅቴንገሁ?» ይሰ፤ ህከኒኛ ኤተሮን ኢስ ኬዕይ ቦብረሊክ ባረንከ አጉረረኖገ ሻቃን ጨለ ይሉ።

27 መኑ አበ አጀብሰጭ «ቦብሩሊክ ባሩ እዘዘመናሲሁ ኩን ህትናሙወ መንቹ» ይቶኤ።

ኢስ ዱሪን አፈንቶ ለሙ መነ ፈይሱስ

(ማር. 5፡1-20፤ ሉቃ. 8፡26-39)

28 ኢስ ገሊላ ባረ ቶል ጌርጌሶን ባዱ አሜኛ፤ ህከኒን ሩሃንዩ አሮስ ለሙ መኑ ሎድ ኣዚኛ ፋልት ደቀንቶሰ፤ እስ መነ ሞርታእረ እኮቤቸሃ እዩሁ ህከን ዎቄን ህጎተ አታለናበ እቅ።

29 እሰን ያርተን «መገን ቤቶ! ኔሳለከ ኬሳሃ ሚ ደቅንሹ ዮኔ? ወክቱ እሉዕነ ኦርሶኔተ አሜቶንትገድ?» ይተን ያርቶኤ።

30 አሳኛ ቀዉንተ ህግ ቦኬ መሰረት ዘግ ይቶ እቅ።

31 ዶሮረኖ ዱሩ «ፉሸታንትኔ ጎሬ ህከን ቦኬ መሰራን ኣጎጋምገ እኤኔ» ይተ ኡጭቶኤ።

32 ኢስን «መሬ» ይሰ፤ ህከን መሂኛ ፋልት መርት ቦኬን ኣጎኤ፤ ሁኩ ቦኬ መሰረት ጉዕሙንኩ ቆተ መዲኛ ደጉደን ባራን ጥንብሰንት ሬቶኤ።

33 ህክን ሶኬ ዜማኑት ሁንት ከተመ አግ ጉዕመንከ ጠወለከ ሩንገዩ አፎ ለሞንከ መናን እኮ ጠወ መኒሃ ጠወኑኡ።
 34 ህከኒች ኤተሮን ህክን ከተም መኑ ጉዕመንኩ ኢሰ ለአተ መርቶኡ፤ ለእ ወክት ባዱስ ገፈር ኦርአናገ ኡጭቶሰ።

9

ኢሰ እንገተ ሩፈ መንቹ ፈይሱሰ
 (ማር. 2፡1-12፤ ሉቃ. 5፡17-26)

1 ኢሰ ጀልባን አግ ባረ ቶል ገይሰ ከተመ አሜቾ።
 2 ህከቢቹንከ መቱ ሩፈ መንቹ ዳሰን እጅት ኤሶኡ፤ ኢሰን አመዕነቱሰ ለዕይ «ኢ ቤቶ! ዋጅቶት፤ ጨቡክ ፈቁን የመሞኡ» ዬኢ።
 3 ህከ ወክት ሕግ አሰተማራች መት-መቱ ገገወንኩሰን «ኩ መንቹ መገን አሌን ቦርር ላገተ ጠወአናት» ይት ቀልቤንከሰ ሰውይቶኡ።
 4 ጠወ እኮጎሬ ኢሰ ቀልብሰ ጠወ ደግ «አዕኑ ሚሃት ሂላ ጠወ ቀልቤንከክዕኔ ሰውይቱንገታሁ?
 5 ጨቡክ ፈቁን የመሞኡ ዪቶለክ «ኬእ ኡርት ሃም ዪቶ ህኩንሰ ቆሀና?
 6 ጠወ እኮጎሬ መንቹ ቤቱ አዲንያ አሌን ጨብ ፈቁን የተ ወልቀት የሲሃ እሁሰ ደጌ» ይ ሩፈ መንቹ «ኬእ ዳሰክ እጅት ምንክ ኦርአ» ዬሰ።
 7 መንቹንኩ ኬዕይ ምንሰ ኦርዕዮ።
 8 ኡመቱንኩ ህካን ለእ ወክት ዋጅት ህትኔ ዎልቀተ መኒሃ አሴ መገኑ ገለትጭቶኡ።

ኢሰ ማቶሴ ዬመ ሊዌ ገኡሰ
 (ማር. 2፡13-17፤ ሉቃ. 5፡27-32)

9 ኢሰ ህከንቢቹች ኬዕይ ኦርአን «ማቶሴ» ዬኖ ቀረጠ ሙረኖሃ ቀረጠ ሙረኖ ቤቻን አፋዕሌኢሃ ለዕይ «አወኔኤ» ዬሰ፤ እሰን ኬዕይ አዎኛሰ።
 10 ህከኒቹ ኤተሮን ኢሰ ማቶሴ ምኒን ማዳን አፋዕሌሀኒን ልገቡ ቀረጠ ሙርታአሩለክ ጨብኛኑት ህከ ቤቹ አሜት እሰንለክ አሳባንን ማዳን አፋዕልቶኡ።
 11 ህካን ፈርሳውት ለእ አሳበሰ «አሰተማርቹክዕኔ ጨብኛኖንለክ ቀረጠ ሙርታህኑኡን ሜጡብ እተናሁ ሚሃት?» ይቶኡ።
 12 ጠወ እኮጎሬ ኢሰ ህካን ሞጭጭ «ህኪሙ ሀሰሰናሁ ጥዘናማታት ቤሉ ፈየ መኒሃትበኢ።
 13 ኦርዕዬ ሕን ኢታሚሁ ማርቱታት ቤሉ ክትሞሃትበኢ» የመሞ ከተበሞሃ መሃኅር አጥራመቱን ደጌ፤ እን አሜቾሚሁ ጨብኛኑት ጨብቻሰ ፈንቀልታገ ገኑታት ቤሉ ፈየ መን ገኑታበኢ» ይ ፈንቀሺሰ።

ሶመንተኔሃ ሆንጠኮ ጠዕምቱተ
 (ማር. 2፡18-22፤ ሉቃ. 5፡33-39)

14 ህከ ወክት ያህይ አዎኛኑት ኢሰበ አሜት «ነኡለክ ፈርሳውት ሶመን እንፈን ኪ አሳበት ሶመንታበኢሁ ሚሃት?» ይት ጠዕምቶኡ።
 15 ኢሰን «እዜቹ እሳን ሜጡብ ሄኒን ጃለት ሻዛእንደ? ጠው እኮጎሬ እዜቹ እሳች አደ እሀና ወክቱ አሜተኖ፤ ህከ ወክት ሶመንታኡ።
 16 አዪሁ ኑባጵቶ ኦድኖን ሃዕር ቃፈተ ቃፈኖሁ የበኢ፤ ቃፈጎሬ ኦድኑሰ ፊልተኣኢ፤ ፊልተኡንኩሰ ወዕኔች ባሰ እሀኖ።
 17 ህትን ሃዕር ጠጀ ኑባጵ ሆቆማደን ዎረኖበኢ፤ ህካን አኤመ ጎሬ ሃዕር ጠጀ ኑባጵ ሆቆማደ ፊለኖ፤ ጠጀሲ ዲንተአኖ፤ ጠው እኮጎሬ ሃዕር ጠጀ ሃዕር ሆቆማደን ዎረኖገ ጠጀሲ ዲንተአኖበኢ፤ ህትን ሆቆማደንኩ ፊልተአኖበኢ» ይ ፈንቀሺኦ።

ኢዖርሴ ጨልተለክ ኢሰ ኦድኑተ ኡልቶ መንቹተ
 (ማር. 5፡21-43፤ ሉቃ. 8፡40-56)

18 ኢሰ ህካን ጠወእንን መቱ ሹሙ ኢሰበ አሜቶ ብሬሰ ጉሉጵ «ጨልኤ ቴሴ ሬቶኡ፤ ጠወ እኮጎሬ አት አሜት እንገክ እሴ አሌን አቶንት ጎር ፈይታኦ» ዬኢ።
 19 ኢሰ ኬዕይ አሳባተሰን ሜጡብ ህከ መንቹ አዎኛ።
 20 እሰን ሃንተን ሄኒንን ቶነ ለሙ ዘማን ጅሰምቶሴ ቄጉ ዲንተአን ኦርጨቀቀንተን ሄኒ መት መንቹት አሜት ኤተርሰ አዲን ኢሰ ኦድኖሰ ሰኑተ እንገንተሴ ኡልቶኡ።
 21 ህካን አቶኢሁ ቀልቤንከሴ «ኦድኖሰ ሰኑተ ኡሎም ጎሬ ፈያም» ይቲት እቆ።
 22 ኢሰን ፈንቀል እሴንተ ለዕይ «ኢ ጨሌ! ዋጅቶት፤ አመዕነቱክ ፈይሾኔ» ዬሰ፤ ህከ ወክትንከ እሴ ፈይቶኡ።

- 23 ህኪኒች ኤተሮጥን ኢሰ ሹሞ ምኒ ኢሌ ወክት አልፋቴተ ጡሩንበ ቡሰን ምኒ ኣዛኪ ኦሎና መነ ለዕዮ።
- 24 «ጉዕሙንኩክዕኔ ከን ምኒች ፋሌ! ሀፍቱት ግሶ ቤሉ ሬቶብእ» ዬእ፤ ጠዉ እኩጎሬ እሰ አሰዕልቶኡ።
- 25 ሙኑ ፋሎች ኤተሮጥን ኢሰ ሀፍቶ ጀናዘት ዮ ቤቹ ኣግ እንገሴ አፎ ወክት ኬኦኡ።
- 26 ሁኩ ጠዉ ጉዕሙንኩ ህከን ባደን ሞጮጪሞ።

ኢሰ ለሙ አልተ ቆቆ መነ ፈይሱሰ

27 ኢሰ ህከንቤቸች ከዕይ ኦሮእን ሄዕዮገን ለሙ ቆቆ መኑ «ደዉዳ ቤቶ! ሀዕይ አሙካኔ» ይተን አዎንቶሰ።

28 ሁኩ ምኒ ኣግ ወክት እሰ መድ ሆንጠክ «አን ካን አኣምገ አመዕንቴነንዶ?» ዬሰ፤ እሰን «ኤ ቀርቸ!» ይት ፈንቀሽቶኡ።

29 ህኪኒች ኤተሮጥን ኢሰ እንጋንተሰ አልሰ አፍ «አመዕንቴነተገን እህነክዕኔ» ዬሰ።

30 አልሰ ፈንተኦኡ፤ ኢሰን «ከ ጠዉ አይሃ ጠወኦናቹ» ይ ጠረኝሽ አዘኩሰ።

31 ጠዉ እኩጎሬ እሰ መርት ህከን ባደን ጉዕማንን ኢሰተኔሃ ኩልቶኡ።

ኢሰ መቱ ዱደ መንቹ ፈይሱሰ

32 ሁኩ አልሰ ፈንተኦን ለኦ መኑ መርቶገን ምሉ መኑ ዶሮረኖ ዱሩ አሮሰ ዱደ መንቹ ኢሰበ ኤቡኡ።

33 ዶሮረኖ ዱሩ ፋሎች ኤተሮጥን ሁኩ መንቹ ጠወኡ ጀመር፤ መኑ «ህትናሙ ጠወ አሰራሌላን ሆሮ ለዕናምበእ» ይት አጀብሰጭቶኡ።

34 ጠዉ እኩጎሬ ፈርሳውት «እሰ ሩሃንዮ ፋሽኖሁ ሩሃንይ ሞም ወልቃኒት» ይቶሰ።

ኢሰ መኒሃ አሙዙሰ

35 ኢሰ ዱኣ አኤና ሞናን ተማርሰን፤ መገን ሞምነት ተሸት ላገተ አዎጀንለከ መነ ጥዘናች ጉዕሚችን ፈይሰን ከተመለከ ቀዕዮተ ጉዕመንከ ሃመን ተማርሰና አቅ።

36 እሰ መኑ ዜሞ ዮበእ ሆለገ እክ ብን ይት ኦርጨቀንተን ለዕዮሰ ወክት አሙዙሰ።

37 ህካን እኩቤቸሃ ኣሳባተሰ «አኤናሰ ሆጉት ልግብያን፤ ጠዉ እኩጎሬ ሆጉተ አኣና መኑ ቀዎሃን።

38 ህካን እኩቤቸሃ ሆጎሰ አኑ ሆጎቤቹ መነ ሲሆተ ኤጭዬ» ዬሰ።

10

ቶነ ለሞንከ ኣሳበተኔሃ

(ማር. 3፣13-19፤ ሉቃ. 6፣12-16)

1 ኢሰ ቶነ ለሙንከ ኣሳበተ እሰበ ገእ ዶሮረኖ ኣያን ፋሽቶተለከ መነ አደደ ጥዘናች ጉዕሚችን ፈይሰ ወልቀተ ኣሴሰ።

2 ቶነ ለሞንከ ኣሳበ * ሱዕሙ ከኒች ሞሮን ከተበሞኡ፤ እሰን «ዱጥሮሴ» ዬና ሰሞኔት፤ አመሰቤቱ እንድራሴት፤ ዘብደሴ ኦሱት ያቁባት፤ ያህይት፤

3 ፍልጶሴት፤ ባርቱለሞሴት፤ ቶማሴት፤ ቀረጠ ሙረኖ ማቶሴት፤ አልፎሴ ቤቱ ያቁባት፤ ታድሴት፤

4 ባደሴሰ ኢተኖሁ ፊ ይሁዳት አቅ።

ቶነ ለሙንኩ ኣሳበተ ተማርሲሃ ሶሀሙሰ

(ማር. 6፣7-13፤ ሉቃ. 9፣1-6)

5 ኢሰ ህከ ቶነ ለሙንከ ኣሳበተ «አይሁድ እኩበእ መንቤቹ መርቶናቹ፤ ህትን ሰመር ከተመ ኣጎናቹ።

6 ሆለገ እክ በኦ እሰራኤል መንቤቹ ኦርዕዬ

7 ሰሚ ሞምነቱ ሆንጠኩ፤ ይቴነን ተማርሰዬ።

8 ጥዘናመተ ፈይሼ፤ ሬዮ መነ ሬሆች ኬሼ፤ ጎግ አሌን ፋልታ ሂለ ጥዘነት ዮ መነ ነጠ አዕዬ፤ ሩሃንዮ ፋሽዬ፤ ጠለዕላን ኣኢቴንታሃ ጠለዕላንን ኣሰዬ።

9 ክሳንከክዕኔ ሳንትበተ አሮናቹ።

10 ሞቄሃክዕኔ ከረጥትተ ህከረንገ ለሙ ቀንቢሰ ህከረንገ ጫዕመተ ህከረንገ በርተ አሮናቹ፤ መሰንትሰ ሆጉተ አኣና መንቹሃ እተኖሁ ሀሰሰናሰ።

11 አዕኑ ኣጌነንተ ከተማን ህከረንገ ቀኤን ክዕኔተ ቶጎተ ሙንደኣና መንቹ አጥራመቴን ደጌ፤ ህከ ቤቹ እኩርቱን መርቶኖተ ኢሰ እሰን ሚጡብ አገሬ።

12 መን ሞኒ ኣጌነንተ ወክት ለገሬትሼ።

9:34 ማቶ. 10፣25፤ 12፣34፤ ማር. 3፣22፤ ሉቃ. 11፣15። 9:35 ማቶ. 4፣23፤ ማር. 1፣39፤ ሉቃ. 4፣44። 9:36 ዘኑ. 27፣17፤ 1 ጎ. 22፣17፤ 2 ዱዱ. 18፣16፤ ሕዝ. 34፣5፤ ዘሃ. 10፣2፤ ማር. 6፣34። 9:38 ሉቃ. 10፣2። * 10:2 ኣሳበተ- የኖሁ መንቤች ሰህተቶረ ዩሃን። † 10:4 እስቆቶ- የኖሁ ከን ላገ ኣሌን ለሙ ሰሙቱ ዮኤ፤ መቱ ሰሙቱ ባደን ህከረንገ ቤቹን ሜጡ እእን ምሉሰ ሰሙቱ ይሁዳ ክዘገግ ህከረንገ ጣንሳንቹ ዬን ሰርሬና ለምቄያ ሱዕሙ። 10:7 ሉቃ. 10፣4-12። 10:10 1 ቆር. 9፣14፤ 1 ጠዋ. 5፣18።

13 ምን ሆኖ መኑ ወገሬትክዕኔ ቶሳ ጎሬ ወገሬቱክዕኔ እሰ አሊን አሁን፤ ጠዉ እኮጎሬ ወገሬትክዕኔ ቶጉ ግጥጎሬ ወገሬቱክዕኔ ክዕኔ አደንከ ፈንቀሉን።

14 አዪሁ ቶጉ ግጥጎሬቱ ወክት ህከረንገ ጠዉኤንጉተ ጠዉ ሞጮጮ ግጥጎሬቱ ወክት ህከ ምኒ ህከረንገ ህከ ከተመ አኩርቱን ፋልቲን ሎክክዕኔ ትብ ግግሽቲን ፋሌ።

15 እን ህንቅንከ ያንክዕኔ፤ ፍርድ ባር ህከን ከተሚች በትሽ ሶዶምለከ ጎሞር ከተሞ መኒሃ ቅጣቱስ ቆሀፍ» ይ አዘኹ ሶኮ።

ቀርቼ እሚቲች ብርተ ኦርሸት እካገ

(ማር. 13፡3-13፤ ሉቃ. 21፡12-17)

16 ኢሰን «ህትን ፋሽ ሆለገ ኦሌ በላን ሶሃንክዕኔ፤ ህካን እኮቤቼሃ ምሪቶን ኤንኬዕናመተ ህንደዕሬገ ጎደበ ላፋኑተ እኩ።

17 ጠዉ እኮጎሬ ፍርድ ኦገት ዳኛኖበ ህግሴን ኣሴፍህዕኔ፤ ዱኣ አኤፍ ምናን ሀለንገን ኦሌፍህዕኔ፤ ህካን እኮቤቼሃ መኒች አገዕርዬ።

18 አተኔሃ ባድ ዳኛኖቤቼሃ ምዎ ብርተ መሴፍህዕኔ፤ አዕኑ አሳሃለከ አይሁደ እህበ መኒሃ መሰከርቲንጉ።

19 መኑ ፍርድቤቼ ሆንጠህሰፍህዕኔ ወክት ጠዉኤንጉተ ጠዉ ህከ ወክትንከ ኣሰመፍህዕኔቤቼሃ ህት፤ ህከረንገ ጠዉ ጠወሰናም» ይቲን ሻዘኖቼ።

20 መሰንትሰ ክዕኔ ኣዜን ጠወአፍሁ ሰሚ እንክዕኔሃ እያን ቤሉ ጠወኤንጉታሁ አዕናበአ።

21 መኑ ገይሰ አመቤቱ ሬሆተ ህግሽ ኣሰኖ፤ ህትን እኑ ገይሰ ቤቱ ሬሆተ ህግሽ ኣሰኖ፤ አለት እነሰ ህከረንገ አመሰ ዲንሰት ሬሆተ ህግሰ ኣታኦ።

22 ጉዕመንኩ መኑ ኢ ሱዕምተኔሃ ግጥጎሬቱ፤ ጠዉ እኮጎሬ መጨረሽ ኢሊ ጠረኝ ኡረፍሁ ፈቀፍ።

23 መቶ ከተማን ኦርሸት በተኣ ወክት ምሉ ከተመ ሁኜ፤ እን ህንቅንከ ያንክዕኔ፤ መንች ቤቱ ፈንቀል አሜቶተ ኢሊ አሰራኤል ከተመ ጉዕመንከ ኢልቲንጉተአ።

24 ተማረፍሁ ተማርሰፍሁህኒች ህትን ካድንቼ ቀርቼች በተአናበአ።

25 ህካን እኮቤቼሃ ተማረፍሁ ተማርሰፍሁህን ህትን ካድንቼ ቀርቻሰገ እኮች አህናሰ፤ ጠዉ እኮጎሬ ምንሰ እነ ቤዔልዜቡል ዬን ገኤመ ጎሬ ምንሰ አበርሰ ህከኒች ባሰ ሂለ ሱዕሚን ገኤናበአንድ?» ዬአ።

አዬ ሞጁ ሀሰሰኖ ጎሬ

(ሉቃ. 12፡4-7)

26 ኢሰ «መን ሞጅቶኖቼ፤ መሰንትሰ እፍሰሞሁ ፈንተኡን ህትን ማጠሞርቼ ለሉዕነ ፈቀናበአ።

27 እን ቱንሰቾን ኩላንክዕኔሃ አዕኑ በራን ኩሌ፤ ህትን ማጤን ኩሌንን ሞጮጭቲንጉተ ጠዉ በነቻን ፋልቲን ጠወዕዬ።

28 ማለ ሽታረ እኮጎሬ ፎል ሽቶተ አታልታበአረ ሞጅቶኖቼ፤ ጠዉ እኮጎሬ ማለለከ ነብሳሃ ጠእትበ ገራን ኡጅተ አታላፍ መገኑ ሞጅዬ።

29 ለምተ ጭኦት መቶ በከናን ህረንታአበአንድ? ጠዉ እኮጎሬ ሰሚ እክዕኔ ይበጎሬ ኢች ሆር መት ጭኦቲ ኡለ ኡብ ፈቀናበአ።

30 ክዕኔ ሙሙክዕኔ ፈቀዕነ ምለአሞእሃን።

31 ህካን እኮቤቼሃ ሞጅቶኖቼ፤ አዕኑ ልግብ ጭኦች በተኤንጉተ።

32 «መን ብረን ኢተኔሃ መሰከረፍህኒሃ ጉዕሚንከ እን ሰማን ሆ አኒኤ ብረን መሰከራንሰ።

33 ጠዉ እኮጎሬ መን ብረን ለገአፍኤሃ አዬሁ እን ሰማን ሆ አኒኤ ብረን ለገአንሰ» ዬአ።

34 ኢሰ «እን ኣዲንዩ አሊን ወገሬት ኤቦተ አሜቾሚሃ አጉዲንከህዕኔ፤ እን አሜቾሚሁ በገዙ ኤቦታት ቤሉ ወገሬት ኤቦታበአ።

35 መሰንትሰ ቤቱ አኒን ህትን ቤቱተ አማንተሴ ቤቲተ በሎንተሴ ብተንሶተ አሜቾም።

36 መኒ ባለገረ ገይሰ ምኒ መን አህና።

37 አዪሁ አነሰለከ አመሰ ኢች በትሽ ኢቲ ጎሬ ኤሳሃ አሆተ ሀሰሰኖበአ፤ ህትን አዪሁ ቤቱሰ ህከረንገ ቤቱተ ኢች በትሽ ኢተፍሁ ኤሳሃ አሆተ ሀሰሰኖበአ።

38 ገይሰ መሰቀለ አጅ አምንበኤሁ አዪሁ ኤሳሃ አሆተ ሀሰሰኖበአ።

39 ፎልሰ ፊሶተ ኢተፍሁ አዪሁ ቤሰኖ፤ ጠዉ እኮጎሬ ፎልሰ ኢተኔሃ ቤሰፍሁ አዪሁ ፈቀፍ።

40 ክዕኔተ ቶገፍሁ አዪሁ ኤሳሃ ቶገፍ፤ ኤሳሃ ቶገፍሁ አዪሁ ኤሳሃ ሶኮሃ ቶገፍ።

10:14 ሰቀ. 13፡51። 10:15 ማቶ. 11፡24፤ ክል. 19፡24-28። 10:16 ሉቃ. 10፡3። 10:17 ማር. 13፡9-11፤ ሉቃ. 12፡11-12፤ 21፡12-15። 10:20 ማር. 13፡12፤ ሉቃ. 21፡16። 10:22 ማቶ. 24፡9፤ 13፡፱ ማር. 13፡13፤ ሉቃ. 21፡17። 10:24 ሉቃ. 6፡40፤ ያህ. 13፡16፤ 15፡20። 10:25 ማቶ. 9፡34፤ 12፡24፤ ማር. 3፡2፤ ሉቃ. 11፡15። 10:26 ማር. 4፡22፤ ሉቃ. 8፡17። 10:33 2 ጠዎ. 2፡12። 10:36 ሚክ. 7፡6። 10:38 ማቶ. 16፡24፤ ማር. 8፡34፤ ሉቃ. 9፡23። 10:39 ማቶ. 16፡25፤ ማር. 8፡35፤ ሉቃ. 9፡24፤ 17፡33፤ ያህ. 12፡25። 10:40 ማር. 9፡37፤ ሉቃ. 9፡48፤ 10፡16፤ ያህ. 13፡20።

41 ነብዬች ነብዬች ሱዕሚን ቶገኖህ ነብዬች ዋጋ ደአኖ፤ ፈየ መንቸ ፈደ ሱዕሚን ቶገኖህ ፈደ ዋጋ ደአኖ።
 42 ሀንቅንክ ያንክዕኔ፤ ኢ ኦሳቤቼ እኮቤቼሃ ከን ማዕናኖች መትሀሰ መቱ ቡርጨቆ ዋሀ ኦሳኖሁ አደሁ ዋገሰ ደኡዕነ ፈቀኖበአ» ይሉ።

11

1 ኢሰ ቶነ ለሙንከ ኦሳቤሰ አዋንታገ አዘኹ ሹሎች ኤተርን ህከ ቤቹ ጌኝ አዕይ ግደኖን ዮ ከተመ ዱዱብሶተለከ ተመርሶተ ኦርዕዮ።

ጠወቃንቸ ያህዪች ኢሰበ ሶሀንቶ ሶቀማኑተ
 (ሉቃ. 7፥18-35)

2 ህከ ወክት ጠወቃንቸ ያህይ ኡሱር ምኔን ሄዕዮገ መሲህ ኢሰተነሃ ሞጮጭ
 3 « ሕሚተኖ ዬመ መሲህ ኢሰ አቴትንደ? ህከረንገ ዋሉ አገርኑ» ይ አዋናኑስ ኢሰበ ሶኮ።
 4 ኢሰ «መርቴን ለእንታሃለከ ሞጮጭቴንታሃ ያህዪሃ ኩሉ።
 5 ሁኩዕኑን ቆቃኑት ለእኢት፤ ሎከተ ናፉ መኑ ገጥ ይ ሃመኖት፤ ጎግ አሌን ፋልታ ሂለ ጥዘነት አፎሰ መኑ ነጠ አካኢት፤ ደንቁ መኑ ሞጮጬኖት፤ ሬዮ መኑ ሬሆች ኬአኖት፤ ቡጥቻኖተ እንጂሉ ዱዱብሰመኖት።
 6 ኢተነሃ ሸክባሁ ማሰአዋእሃ» ይሉ።
 7 ያህይ አዋናኑት መርቶች ኤተርን ኢሰ ህከኔ ጭምዬ መኒሃ ያህይተነሃ ጠወኢን «መ ለኢሃት ኡለ ኡድመ ፋልቴንታሁ? ቡብሩ ለንቁቅሰኖ ሸምቦቁተ ለኢሃትንደ?
 8 መ ለኦኖተ ፋልቴን? ጡመተ ኦድኑተ ኦደዕዮ መነ ለኢሃትንደ? ጡመተ ኦድኑተ ኦደዕዮ መኑ ሄአኖህ ዋመ ሞናኒት።

9 ህከረ መ ለኦኖተ ፋልቴን? ነብዬቼ ለኦኖተንደ? ኤ! እን ያንክዕኔ፤ ነብዬቼች በተአኖሃ ለኢሃት።
 10 ሁኩዕኑን ዋቃክ ብዘ አአኖ ሶቀማንቸኤ ብሬክ ሶሃም? የመዋ አሰተነሃ ከተበሞሁ ከኒት።
 11 ሀንቅንክ ያንክዕኔ፤ ከን ኦዱንዎ አሌን ከለቀሞ መኒች ጉዕሚችን ጠወቃንቸ ያህዪች በተአኖሁ ዮበአ፤ ጠወ አኮሳሬ ሰሚ ዋምነቴን ጉዕሚችን ሆፈአኖሁ እሲች ሎዕረኖ።
 12 ጠወቃንቸ ያህይ ዘማኒች ኬሸ ከበሬ ኢሰ ሰሚ ዋምነቱ ወልቃን ኣጎተ አበ አጸንታኢት። *
 13 «ነብያኑትለከ ሙስ አንጋን ኣሰሞ ሕጉሁ ጠወቃንቸ ያህይ ወክት ኢሰ ራገ ጠወኑኤ።
 14 ቴሱ ቶጎኖተ ሀሲንተ ጎሬ ሕሚተኖ ዬመ እልያሰ ከኒት።
 15 ሞጮጭታ መጨት ዮሲሁ ዮ ጎሬ ሞጮጬን።
 16 «ጠወ አኮሳሬ ከን ዘማን መነ ሚን አጉጣቀንሳም? እሰ ገገን አፋዕልት መት-መቱሰ ገአተን
 17 ሁሉሉተ ቡንሳንክዕኔረ ቦለቸ ከደንታበአ፤ ህትን ኦዕናምረ ቶንታኔበኤ» ይተን አለጽታ አለተ አጉዳእ።
 18 መሰንትሰ ያህይ አቴዕነለከ አጉዕና አሚቸ ወክት ጳርረኖ ዱሩ አፎሱ ይቶሰ።
 19 መንቸ ቤቱ እተንለከ አገን አሚተናረ ስኩ መንቸ እቱሃ አጉሃ ኢተኖ፤ ህትን ቀረጠ ሙረኖ መኒሃለከ ጨበኛኖተ ጅላኔ ዬመሰከ፤ አኮሳሬ ሀይቹ ሆሳንተሰ ለላኖ» ይሉ።

እመዕኑ ሆግንከሰ ዋቀሰንቶ ከተመተ
 (ሉቃ. 10፥13-15)

20 ኢሰ ልግብ አጀብሲሲኖ ጠወ አዕዮ ከተም መኑ ጨብቸሰ ፈንቀሉ ግቦቤቹሃ ዋቀሱ ጀመር።
 21 «ኣዬ ኮራዜ! ኣዬ ቤተ ሳይዳ! ክዕኔን እኮ አጀብሲሲኖ ጠወ ጢርሰለከ ሲደን ከተሚሃ አሰሞ አቃን ሁኩ መኑ ሄጭተ ጥጅ ኦድኑተ ኦደአ ጠበሩ አሌሰ እት ጨብቸሰ ፈንቀሉሰ ለላሰ አቆ።
 22 ጠወ አኮሳሬ እን ያንክዕኔ፤ ፍርድ በር ክዕኔቸ አበ ጢርሰለከ ሲደን ከተም ፍርዱሰ ቢላኖ።
 23 እት ቅፍርናሆም ከተንቸት! ሰማሃ ኢሰ ጎት ጎት ይቶንትንደ? ኣዛቢን ድርታንት፤ ከን አሰሞ አጀብሲሲኖ ጠወ ሶድም ከተማን አሰሞ አቃኑተ ሁኩ ከተሙ ከበሬ ኢሰ በኡዕነ ኢልታ አቆ።
 24 እን ሀንቅንክ ያንክዕኔ፤ ፍርድ በር ኪች በትሸ ሶድም ከተም ፍርዱ ቆሀኖ» ይሉ።

መሲህ ኢሳን ፎሎጬ ደኢ
 (ሉቃ. 10፥21-22)

25 ህከ ወክት ኢሰ «ሰሚለክ ኡለ ቀርቹ እኮንት ኢ እነ! ካን ሀይቻኖችለከ ደጋህኡች ማጥ ቀልቡሰ አሶገ ቶገኖ መኒሃ ለሊሶንትቤቹሃ ገለትጫንኬ።

11:5 ኢሳ. 35፥5-6፤ 61፥1። 11:10 ሚል. 3፥1። * 11:12 እጸንታኡ- ሀንበዕለሙለክ እጸንቹ ለሊሰኖህ ሰሚ ጄትን ኣኒሃ ጉዕመንኩ መኑ እአኖሃ እጸንቹ። 11:13 ሉቃ. 16፥16። 11:14 ሚል. 4፥5፤ ማቶ. 17፥10-13፤ ማር. 9፥11-13። 11:21 ኢሳ. 23፥1-18፤ ሕዝ. 26፥1-28፤ 26፤ ኢዩ. 3፥4-8፤ አሞጽ 1፥9-10፤ ዘካ. 9፥2-4። 11:23 ኢሳ. 14፥13-15፤ ከል. 19፥24-28። 11:24 ማቶ. 10፥15፤ ሉቃ. 10፥12።

- 26 ኤ ኢ እነ! ከ ጡሙ ሰውቱ ህትናሙሃን።
- 27 እኩኤ ጉዕመርቸንክ እሰዮኤ፤ እኒ ቤሉ ቤቱ ደገኖሁ እዩሁ ዮበእ፤ ህትን ቤትለከ ቤቱ ለሊሶተ መጠር መንኛ ቤሉ እነ ደገኖሁ ዮበእ።
- 28 «እሳዕኑ እጅነት ኬዕምታንክዕኔ ሆገንተ መኑ ጉዕሙንኩ ኢቤቼ እሜ፤ እን ፎሎሲሳንክዕኔ።
- 29 ኢ እንገቸተ እጅዬ፤ እኛን ትምርት ኣእዬ፤ እን ጎደበ ላፋለከ መረርሲጫሚሃን፤ ፎልሃክዕኔ ፎሎጩ ደዕቲንገተ።
- 30 እንገቸእ ኬዕምታበእታን፤ እጅነኤን ኬዕምታበእ» ዬእ።

12

አበ በሬተ ሆንጠኮ ጠዕምቱተ
(ማር. 2፥23-28፤ ሉቃ. 6፥1-5)

- 1 ህከ ወክት ኢሰለክ ኣሳበሰ አበ በሬን አለሰ ኣዚን ህጋኢት እቅ፤ ኣሳበሰ ጎሩ ኣፎሰቤቹሃ ህማሙተ ተንቅሶ ቀስት እቱ ጀመርቶኡ።
- 2 ፈርሳሳት ህካን ለኦ ወክት ኢሰ «ኣሳበክ አበ በሬን እኡ ገበእበ ጠወ ኣታኢሃ ለእ» ይቶኡ።
- 3 ኢሰን ፈንቀሽ «ዳዉደለከ እሲን ሜጡበ ሄዕዮ መኑሁ ጎሩ ኣፎሰ ወክት ዳዉደ አዕዮሃ ኣነበቤንታበእንደ? »
- 4 ዳ.ኢ ምኒ ኣግ ቂሰ ቤሉ እሰ ህከረንገ እሲን ሜጡበ ሄኦ መኑ እቶተ ፈቀደምበእ መገኒሃ አደ እኮ ዳቡተ እቶኡ።
- 5 ህትን ቂሰት አበ በሬን መገን ምኒን እተን ፎሎጭ በሬ ሕገ ድጅታ ወክት ቤሉ አህኖሰበእገ ሙሰ መሳን ኣሰሞ ሕጋን ከተበሞሃ ኣነበቤንታበእንደ? »
- 6 ጠዉ እኮጎሬ መገን ምኒኛ በተኣኖሁ ከበ ዮኡ።
- 7 እን ክትሚኛ አበ አመተ ኢታም ዩ መ ዩሃ ጎሬ አጥራመቲንታእቃን ቤሾበእ መን ኣሌን ፈረዳነንተበ እቅ።
- 8 እኮጎሬ መንኛ ቤቱ አበ በሬተ ቀርቸሃን» ዬእ።

ኢሰ እንገተ ናፈ መንቹ ፈይሱሰ
(ማር. 3፥1-6፤ ሉቃ. 6፥6-11)

- 9 ኢሰ ህከንቤቹኛ ኬዕይ ጭምትሰ ምኒ ኦርዕዮ።
- 10 ህከንቤቹንን መቱ እንገተ ናፈ መንቹ ሄዕዮ እቅ፤ እሰን ከሰሶሰተ ህሰ «አበ በሬን ጥዘናሙ ፈይሱ ፈቀደምእንደ?» ይት ኢሰ ጠዕምቶኡ።
- 11 ኢሰን ፈንቀሽ «ክዕኔኤኛ መት ሆልቹት ዮሲሁ አበ በሬን በዋን ኡጎጎሬ በዋቹ ፉሽባሁ እዬት? »
- 12 ህካን እኮኛ መንቹ ሆልቹኛ አበ በተኣኖበእንደ? ህካን እኮቤቹሃ አበ በሬን ጡመ ጠወ እኡ ህሰሰኖሃን» ዬእ።
- 13 ህከኒኛ ኤተርን ኢሰ እንገተ ናፈ መንቹ «እንገክ ሂር» ዬእ፤ መንቹንኩ እንገሰ ሂር ወክት ዎሌ እንገሰገን ፈየተ እንገተ እኮኡ።
- 14 እኮጎሬ ፈርሳውት ህከንቤቹኛ ፋልት ኢሰ ህት ኣት ሽታሰጎሬ አማዕላንቶኡ።

መገኑ መጠር ካዲንኛተኔሃ

- 15 ኢሰ እሰ አማዕላሙሰ ደግ ህከንቤቹኛ ገበጭ ዬእ፤ ህትን ልግቡ መኑ አምንቶሰ፤ እሰን ጉዕመንክሰ ፈይሾ።
- 16 እሰን አሰተኔሃ እዬሃ ጠወኣበእገ እዘከሰ።
- 17 ሁኩን እኮሁ መገኑ ነብዬኛ እሰያሴን
- 18 «ሁኩዕኑን! እን መጠርም ካዲንቹኤ፤ እሰ እን ኢታሚሃለከ ሙንደኣምሃን፤ እሰ አሌንገ ጠሊለ እያንኤ እኣም፤ እሰን ሀንቅ ፍርደ አይሁደ አህበ ኡመተሃ አዋጀኛ።
- 19 እሰን ኦደኖበእ ህከረንገ ያረኖበእ፤ ዎቁ አሌን ጉዕማንን ሳገሰ ሞጮጨኖሁ ዮበእ።
- 20 እሰን ሀንቅ ፍርደ አኦተ ኢለ ቀጠቀጠንቶ ሾምቦቁተ ቢጠኖበእ፤ ህከረንገ ወሊሊኖ ኩራዝ ፈትለ ኡፍ አዕይ ጠእሰኖበእ፤
- 21 ህትን መገኑ ደግቡ መኑ ሰዕማንክሰ ተብሳሃ አእኖ» ዬ ጠወ ዊሞታት።

ኢስሊክ ብዔልዜቡለ
(ማር. 3፡20-30፤ ሉቃ. 11፡14-23)

22 ህክኒች ኤተሮገን መኑ መቱ ድርረኖ ዱሩ ክሮስ ቆቀለከ ዱደ መንቹ ኢስብ ኤቦኤ፤ ኢስን ህከ መንቹ ጠወኤኖ ገለከ ለአኖገ አዕይ ፈይሾ።

23 ህካን እኩቤቹን መኑ ጉዕሙንኩ አጀብሲጭ «ኩን ደወዴየ ቤቱንደ?» ይቶኡ።

24 እኩጎሬ ፈርሳውት ህካን ሞጮጭቶ ወክት «ኩ መንቹ ሩሃንየ ፋሽኖሁ «ብዔልዜቡል» ይኖ ሩሃንይ ሀለቅቶ ያልቃኒት» ይቶኡ።

25 ኢስ እስ ቀልብ ጠወ ደግ «መቱ ዋሙ አደ እክ ገገይንከሰ ብተመሃሃ እኩች ሁኩ ዋሙ ኡብኖ፤ ህትን መቱ ከተሙ ህከረግገ መቶ ምኔን ሃእኖ መኑ ገገይንከሰ አደ እኩች ጠረኝ ሃኦተ አታለኖበአ።

26 ሸይጣን ሸይጣኑ ፋሽኖሃ እኩች ገገይንተሰ አደ እኩ የሃን፤ ህካን እኩች መንግሰቱሰ ሀት እክ ጠረኝ ሃኦተ አታለኖ?

27 እን ብዔልዜቡሉ ያልቃን ሩሃንየ ፋሻሚሃ እኩች ክዕኔ መኑ እዬ ያልቃን ፋሽታአ? ህካን እኩቤቹሃ መኑክዕኔ ክዕኔ አሌን ፈረዳአረ እካአ።

28 እን ሩሃንየ ፋሻሚህ መገን አያኒን እኩች ቴሱ መገን ዋምንቱ ክዕኔቤቹ አሜተኖ።

29 ህትን መቱ መንቹ መቱ ጠረኝ መንቹ ኡሱርሳች ምንሰ ቤጭ ኣግ ዱንያሰ ዘረፎተ ሀት እክ አታለኖ? አኩጎሬ ህከ ጠረኝ መንቹ ኡሱርች ኤተሮገ ዱንያሰ ዘረፎተ አታለኖ።

30 አዩሁ አን ሜጡ እህባሁ አን ህንበሰለመኖ፤ ህትን አን ጭምእኡ ጉዕሙንኩ ብንአአኖ።

31 ህካን እኩቤቹሃ እን ኩላንክዕኔ፤ መኑ አዕዮ ጨቡ ጉዕሙንኩ፣ ቦርር ላገቱ ፈቅን የመንታአ፤ እኩጎሬ ጠሊላ አያን አሌን ጠወኤኖ ቦርር ላገት ጉዕሙንኩ ማረመኖሰበአ።

32 መንቹ ቤት አሌን ቦርር ላገተ ጠወኤኖአን ቤሱ ማረመኖሰ፤ ጠወ እኩጎሬ ጠሊላ አያን አሌን ቦርር ላገተ ጠወኤኖአን ቤሱ ከን ዘማኔንሊከ አሜተኖ ዘማኔን ማረመኖሰበአ» ይኡ።

ጡሙ ሀቄ ላልቺንከሰ ደገመኖ
(ሉቃ. 6፡43-45)

33 ኢስ «ሀቄ ጉዕሙንኩ ላልቺንከሰ ደገመኖቤቹሃ ጡሙ ላልቹ ሃኡንክዕኔ፤ ላልቹሰ ጡሙ እኩጎሬ ሀቄሰ ጡሙሃን፤ ላልቹሰ ሂላ እኩጎሬ ሀቄሰ ሂላ የሃን።

34 ቀልቤን ዊዋሀኒች አይሁ ጠወኤኖቤቹሃ አዕኑ ኩ ያሪች አለት! ሃላኑተ እኩኔን ሀት እኩኔን ጡሙ ጠወ ጠወኤኖተ አታልቲኑን?

35 «ጡሙ መንቹ ጡሙ ጠወ ማጮ ጡሙ ቤቺች ጠወኤኖ፤ ሃላ መንቹ ሃላ ጠወ ማጮ ሃላ ቤቺች ጠወኤኖ።

36 እን ህንቅንከ ያንክዕኔ፤ ሀኩ መንቹሁ ህትን ጠወኤኖ ሀሰሰበ ጠዊሃ ጉዕሚንከ ፍርድ በር ጠዕመመኖ።

37 መሰንትሰ ጠወኤኖት ላጋን ነጠ እካንት፤ ህትን ሃላ ጠወኤኖት ላጋንን ፈረደመኖሃ» ይኡ።

እጀብሲሰኖ ጠወ ለአሃ ሆንጠኩ ጠዕምቱተ
(ማር. 8፡11-12፤ ሉቃ. 11፡29-32)

38 መት-መቱ ሕግ አስተማረትለከ ፈርሳውት ኢስ «አስተማርኝ! አት መላተ አተን ለዕኖተ ሀንሳም» ይቶኡ።

39 እሰን ፈንቀሽ «ከን ዘማን ሃሉለከ እመዕንቡ ክልቀቱ መላተ ለአተ ሀሰኖ፤ ጠወ እኩጎሬ ነብዬኝ ዩኑሰ መላ ቤሉ ያልት መላት አሰመኖሰበአ።

40 ዩኑሰ ሎረ ቁርጩሜ ጎደግን ሰሱ በራለከ ሰሰ ሀዋሩተ ዱንኪህገን መንቹ ቤቱሁ ኡለ ኣዜን ሰሱ በራለከ ሰሰ ሀዋሩተ ዱንከኖ።

41 ናኖቄ ከተም መኑ ፍርድ በር ከን ዘማን መኒን ሜጡብ እክ እሰ አሌን ፈረዳአ፤ መሰንትሰ ናኖቄ መኑ ዩኑሰ ዱዱብሴኢሃ ሞጮጭቶ ወክት ጨብቻሰ ቶበት ፈንቀልቶኡ፤ ሁኩዕኑን ዩኑሲች በተአኖሁ ከበ ዮኡ።

42 ካአጽ ዋመት ሱለይማን ሀይመተ ሞጮጭቶተ ኡለ ገበሊች አሜቶቤቹሃ ፍርድ በር ከን ዘማን መኒን ሜጡብ እሰ አሌን ፈረዳአ፤ ሁኩዕኑን ሱለይማኒች በተአኖሁ ከበ ዮኡ» ይኡ።

ድርርኖ ዱሩ መን ኣዝ ፈንቀሉሰ
(ሉቃ. 11፡24-26)

43 ኢስ «ድርርኖ ዱሩ መንቺች ፋሎ ወክት ፎሎጨኖ ቤቹ ሀሰን ዉሁ ዮበአቤቾን ጉዕማንን ዘሀኖ፤ እኩጎሬ ደአኖበአ።

12:30 ማር. 9፡40። 12:32 ሉቃ. 12፡10። 12:33 ማቶ. 7፡20፤ ሉቃ. 6፡44። 12:34 ማቶ. 3፡7፤ 23፡33፤ 15፡18፤ ሉቃ. 3፡7፤ 6፡45። 12:38 ማቶ. 16፡1፤ ማር. 8፡1፤ ሉቃ. 11፡16። 12:39 ማቶ. 16፡4፤ ማር. 8፡12። 12:40 ዩኑ. 1፡17። 12:41 ዩኑ. 3፡5። 12:42 1 ነገ. 10፡1-10፤ 2 ዱዱ. 9፡1-12።

44 ህዓን እኩቤቸሃ ፋሎም ምኒ ፈንቀል ኦርኣም። የኖ፤ እሰን ፈንቀል አሜተኖረ ምኑስ ኮነ እከ ሀጣወም ተቃጠብያን ደገኖ።

45 ህከኒች ኤተርን ኦርዕይ እሲች ሂላኑተ ሞሉ ለመላ ሩሃንየ ኤበኖ፤ እሰን ህከን መንቸን ኣግ ሂኣእ፤ ህዓን እኩቤቸሃ ህከን መንቸ ሂኡ ምኔች ኤተርሲሁ በትሸ ሂላ አህኖ፤ ከን ዘማን ሂላ መን አሌን ሀትኔ ጠዉ አህኖ» ይእ።

እሲ አመተለከ አመሰ ኦሱተ
(ማር. 3፡31-35፤ ሉቃ. 8፡19-21)

46 እሲ ኡመቲሃ ጠወእንን አመሰለከ አመሰኦሱት ደቀንቶሰተ ሀሰ አብሌን ኡርቶ እቅ። [

47 መቼ መንቸ እሲ «አመክለከ አመክ ኦሱት ደቀንቶሂተ ሀሰ አብሌን ኡርቶኡ» ይሰ።]*

48 እኮጎሬ እሲ ህከን መንቸሃ ፈንቀሽ «አመኢለከ አመኤ ኦሱቲ አይኤታን?» ይእ።

49 ህከኒች ኤተርን ኣገሰሰ አሳበሰ አደ ለሰሰን «አመኢለከ አመኤ ኦሱቲ ከኦኤታን።

50 መሰንትሰ ከማን ዮ ኣንኤ ሃሽኣቲተ ዊንሸኖሁ ጉዕመንኩ አመኤየ ቤቲ፤ አመኤተ ቤቱለከ አመተኤ» ይእ።

13

ዜሬተ ውጠኖ መንቸ ምሳልተ
(ማር. 4፡9፤ ሉቃ. 8፡4-8)

1 ህከ በር እሲ ምኒች ፋል ባር መደን አፋዕሊእ።

2 ልግቡ ኡመቲ አሰበ አሜቶ ጭምዬቤቸሃ እሲ ጀልባን ኣግ አፋዕሊእ፤ ኡመቲ ጉዕመንኩ ባር መደን ኡርኖ እቅ።

3 ህከኒች ኤተርን እሲ ልግብ ጠወ ማቆን ኩሊን «ሁኩዕኑን! መቼ መንቸ ዜሬተ ዉጠተ ፋሎ።

4 ዉጠንን መት-መቲስ ምቄ ገበላን ኡባን ጨኡት አሜት እቶኡ።

5 ሞሉ ዜሬቱ ልግቡ ትቡ የበእቤቸን ክኑ ዮ ኡላን ኡቦ፤ ልግቡ ትቡ የበእቤቸሃ ደዕል ሙቾ፤

6 ጠዉ እኮጎሬ አሩ ፋሎ ወክት ቆር፤ ጠጹ ዮሰበእቤቸሃ ሞሎ።

7 ሞሉስ ዜሬቱ ኡት ኣዜን ኡቦ፤ ኡቱ ነጽ ሙተ አጉዕሚእ።

8 ሞሉ ዜሬቱ ጡመ ኡላን ኡብ ሙቾ መቲስ ጥብተ፤ መቲስ ሊሃወ፤ መቲስ ሰጁ እቶቾ

9 ሞጮጭታ መጨት ዮሲሁ ሞጮጩን» ይእ።

እሲ ማቆን ሚሃ ጠወዕዮ ጎሬ
(ማር. 4፡10-12፤ ሉቃ. 8፡9-10)

10 ህከኒች ኤተርን ኣሳበሰ እሲስ አሜት «መኒሃ ማቆን ጠወኣንቲሁ ሚሃት?» ይቶኤ።

11 እሲን ፈንቀሽ «ሰሜ ምምነት ምሰጥረ ደጉ ኣሰሞሀዕኔ፤ ጠዉ እኮጎሬ ህዓን ደጉ እሳሃ ኣሰሞሰእ።

12 መሰንትሰ ዮሰ መንቸሃ ኣሰመኖሰ፤ አበንከ በተአኖሰ፤ ዮሰበእህኒች ሁኩ ዮሲንኩ ኣአመኖሰ።

13 እን እሳሃ ማቆን ኩሊንሳሃ ለእን ለአበረ፤ ሞጮጭተን ሞጮጭትበረ፤ አጥራመትቡረ እኩቤቸሃት።

14 ህዓን እኩቤቸሃ ነብዬቾ አሰያሲን

« ሞጮጩ ሞጮጭቲንተ፤ ጠዉ እኮጎሬ አጥራመቲንተበእ፤

ለኡስ ለኤነንተ ጠዉ እኮጎሬ ሆርን ቀልብ አቲንተበእ።

15 መሰንትሰ ከን መን ቀልቡ ዱጆኤ፤
መጨንትሰ እኖሰንቶኤ፤ እልንትሰ ቆቆኤ፤

ህት እኮበእቀ፤ አሌንከሰ ለእ፤

መጫንከሰ ሞጮጭት፤

ቀልብንከሰ አጥረመት፤

ኢ አደ ፈንቀልቶ እቃን ፈይሳንሰ እቅ። »

የመሞ ጠዉ አሌሰ ዊመኖ።

16 «እኮጎሬ ክዕኔ አልት ለአቤቸሃ፤ መጨክዕኔን ሞጮጭታቤቸሃ ማሰአንቶአራን።

17 እን ህንቅ ያንክዕኔ፤ ከ አዕኑ ለኤነንታሃ ልግቡ ነብያኑትለከ ልግቡ ጠሊላኑት ለኦተ አበ ሃዕላቶ እቅ፤ ጠዉ እኮጎሬ ለኦበእ፤ ሀትን ከ አዕኑ ሞጮጭቲንታሃ ሞጮጭቶተ ሃዕላቶ እቅ፤ እኮጎሬ ሞጮጭቶብእ» ይእ።

* 12:47 መቼ መንቸ እሲ «አመክለከ አመክ ኦሱት ደቀንቶሂተ ሀሰ አብሌን ኡርቶኡ» ይሰ። መት-መቲ ሉህ ከታበት ሞልሽ 47 ዮሰበእ። 13:2 ሉቃ. 5፡1-3። 13:12 ማቶ. 25፡29፤ ማር. 4፡25፤ ሉቃ. 8፡18፤ 19፡26። 13:15 እሳ. 6፡9-10። 13:17 ሉቃ. 10፡23-24።

ዜሬተ ዉጣንች ሞሳሌ ፍሳረተ
(ማር. 4፣13-20፤ ሉቃ. 8፣11-15)

18 እሲ «ቴ አዕኑ ከን ዜሬተ ዉጣንች ሞሳሌ ፍሳረተ ሞጮጭዬ።

19 እዩሁ መገን ምምነት ላገተ ሞጮጭ አጥራመትቡ ሞቁ አሌን ኡቦ ዜሬተ አጉደና፤ ሸይጣኑ እሚች ዉጠንቶ ላገተ ቀልቤችሰ ኣእ ከመኖ።

20 ልግቡ ትቡዮ የበእቤቾን ክኑ ዮ ኡላን ኡቦ ዜሬቱ ላገሰ ሞጮጭ ደዕል ሙንዲናን ቶገኖ መንችተ ሞሳል።

21 እኮጎሬ ጠጹ ዮሰበእቤቹሃ ቀዉ ወክት ዲንከና፤ ህከን ላገ መሳን ኦርሸት ህከረንገ ያየሙ ኬእዮእቃን ወክትንከሰ ደዕልን እመዕነቲችሰ ኡብኖ።

22 ሁኩ ኡት ኣዜን ኡቦ ዜሬቱ ላገሰ ሞጮጩኖ መንችተ ሞሳል፤ እኮጎሬ ከን ኣዲንያ አሌን ሃእ ጠወ ሰውደለከ ቀጣጣን ናጠቀሙ ቀልቤሰ ኣግ ሞጮጩ ላገተ አቶቱ ዮበእሃ ፊሰኖ።

23 ጡመ ኡላን ዉጠሞ ዜሬቱ ላገሰ ሞጮጭ ቀልቤሰ ቶግ እኤ መንችተ ሞሳል፤ እሰን መቱ ጥብተ መቱ ለሃዉ መቱ ሰጂ አቶተኖ» ዩእ።

ቅንጩ ሞሳልተ

24 ህትን እሲ ሞሳሊን «ሰሚ ምምነቱ ኡላንከሰ ጡመ ዜሬተ ዉጮ መንቹን አጉጣቀመኖ።

25 ጠዉ እኮጎሬ መኑ ግሾ ወክት ዲኑሰ እሚች አለሰ ኣዜን ቅንጭተ ዉጮ ኦርዕዮ።

26 ህካን እኮቤቹሃ አለሱ ነጽ አቶቾ ወክት ቅንጭንትሰ ህከ ወክት ለልቶእ።

27 ካዲመሰ ኡለሰ እንቤቹ አሚት ቀርቾ! እቡራንክክ ጡመ ዜሬተ ዉጣንት እቅበእንደ? ህከረ ቅንጭተ ህከን አዲች አሚቶእ? ይቶእ።

28 እሰን ፈንቀሽ ህካን አዕዮሁ ዲና ዩእ፤ ካዲመንት ፈንቀሽት ህከረ መርን ቅንጭተ ቡቱንክ ከሞተ ሀሰንንደ? ይት ጠዕምቶእ።

29 እሰን ፈንቀሽ ሕሆኖበእ! መሰንትሰ ቅንጭተ ቡቱኪንጎተ ወክት አለሱ ሚጡቡ ቡቱኪንጎተ።

30 ህካን እኮቤቹሃ ምዳኖ ወክቱ ኢሎተ ኢላ አለሱ ቅንጩን ሚጡቡ ነጹን፤ ምዳኖ ወክት ምዳሁኡተ ሃጭቱን ቅንጭተ ቡቱኪን ገረ ቡቡተ ኡሱሬ፤ እኮጎሬ አለሱሰ ጭምእቱን ጎተራንከኤ ዎሬ ያም ዩእ» ይ ኩሎሰ።

ምንጌ አሌ ዜሬት ሞሳልተ

(ማር. 4፣30-32፤ ሉቃ. 13፣18-19)

31 እሲ «ሰሚ ምምነቱ መቱ መንቹ ጋር ኣዜን ዉጮ ምንጌ አሌ ዜሬተ አጉዳእ።

32 እሲን ዜሬት አሌች ጉዕሚችን ቀዉተ፤ እኮጎሬ ነጽቶ ወክት ጋርን ካሴኖ አታክልቲች በተአእ፤ ሎረ እካን ሰሚ ጨኡት አሚት ሀማንከሴ ምኒ እጃርታእ» ይ ሞሉ ሞሳልተ ኩሎሰ።

ራጭት ሞሳልተ

(ሉቃ. 13፣20-21)

33 እሲን ሞሳሊን «ሰሚ ምምነቱ መት መንቹት ጉዕሙንኩሰ ሁፍዮተ ሰሶ ኮርቦቦ ቀማን ሚጡቡ ቁፍሶ ራጭተ አጉዳእ» ይ ኩሎሰ።

እሰ ሞሳሊን ሚሃ ተማርሴጎሬ

(ማር. 4፣33-34)

34 እሲ ከ ጉዕመንክ ጠወ ልግብየ ኡመቲ ሞሳሊን ጠወዕዮ፤ ሞሳልት ዮበእሃ መቱርቹሃ ጠወዕዮሰበእ።

35 እሰን ነብዬቾን

«ጠወኤ ሞሳሊን ኩላም፤

ኣዲንያት ከለቀንቶች ኬሽ ደጽ ዩ ጠወ ጠወኣም» የመሞሁ ዊሞታት።

እሰ ቅንጩ ሞሳልተ ጠወኡሰ

36 እሲ ልግብ ኡመት አጉር ምኒ ኣጎ ወክት አሳበሰ እሰበ አሚት «አለሲን ሚጡቡ ነጹ ቅንጩ ሞሳልተ መሃጎር ኩልኔ» ይት ጠዕምቶእ።

37 እሲን ፈንቀሽ «ጡመ ዜሬተ ዉጮሁ መንቹየ ቤቱ።

38 እኮረሰ ከን ኣዲንያሃ አል፤ ጡሙ ዜሬቱ መገን ምምነትት እለ፤ ቅንጭንት ሸይጣንት እለ።

39 ቅንጭተ ዉጮ ባለጋሩ አልቤሰሃን፤ ምዳኖሰ ወክቱ ኣዲንያሃ መጨረሽ፤ ምዳእሩ መገንተ መላይከ።

40 ህትን ቅንጭተ ጭምእኤን ገራን ቡሴኖህንገን ዘማን ጎፍሞኒ ህት አሆኖ።

41 መንች ቤቱ መላይከሰ ሶክ መኑ ጨብ እአኖገ አታረለክ ሃለ ሆጉተ አቶረ እሰ ምምነቲችሰ መጥ ፋሽታእ።

42 እስንተ ጠረኘ ጊራን ኡጁናን ኦኡለክ የቡሩ ገዕሙ እሆኖ።

43 እኮጎሬ ሙጨሬራት ኣንስ ዎምነቲን ኣሪገ ለሊሳኣ፤ ዋጮጭታ መጨት የሲሁ ሄዕየ ጎሬ ዋጮጮን» ይእ።

ማጠንቶ ቀባጦ ምሳልተ

44 ኢስ «ሰሜ ዎምነቱ መቲ ኣቡረ ኣዚን ማጠንቶ ቀባጡተ ኣጉዳኣ፤ መቲ መንቹ ህከ ቀባጡተ ደኤ ወክት ፈንቀሽ ማጭ ሙንደኣን ኦሪዕዮች ኤተሮን የሲሃ ጉዕመንከ ህር ህከ ኡላተ ህዕሬኡ።»

ጤኣተ እኮ ክን ምሳልተ

45 ህትን ኢስ «ሰሜ ዎምነቱ ኣበ ጤኣተ እኮ ክኑ ህዕሮተ ህሰኖ ነጋዴተ ኣጉዳኣ።

46 እስን ዎጉስ ኣበ ጤኣተ እኮ ክኑ ደኤ ወክት ምንስ ኦሪዕይ የሲሃ ጉዕመንከ ህር ህከ ኣበ ጤኣተ እኮ ክኑ ህዕሬኡ» ይእ።

ዋሻድ ምሳልተ

47 ህትን ኢስ «ሰሜ ዎምነቱ ባራን ኡጁናን ኣደደ ቁርጨሚተ ጭምኣኣኖ ዋሻድ ኣጉዳኣ።

48 ዋሻድስ ዊዋ ወክት መኮ ገበላ ፉሽ ጡመስ መጠር ኦዳንከስ ዋር ሂሊስ ቶሪኖ።

49 ዘማን ጎፍሞን ህት እሆኖ፤ መገን መላይካት ኣሚት ጨብኛኑተ ፈየ መኒች ኣደ ኣታኦ።

50 ጨብኛኑስ ጠኣትበ ጊራን ቶሪናን ኦኡለክ የቡሩ ገዕሙ እሆኖስ» ይእ።

51 ኢስ ኣሳባተስ «ህካን ጉዕመንከ ኣጥራሙጭንታኣንደ?» ይ ጠዕሚስ ወክት «ኤ» ይቶኦ።

52 ኢስን «ህከረ ሰሜ ዎምነት ምስጥር ተማረኖ ሕግ ኣስተማርቹ ማጮ ቀባጡተ ምኒችስ ኑባቹለከ ሃዕር ኦዳተ ፉሽኖ መንቹ ኣጉዳኖ» ይእ።

ናዘሬት መኑ ኢስ ቶጉ ግባገ

(ማር. 6፣1-6፤ ሉቃ. 4፣16-30)

53 ኢስ ህከ ምሳልተ ሹሎች ኤተሮን ህከንቤቹች ኦሪዕዮ።

54 ገይስ ባዱ ኣሚች ህከኔ ጭምትስ ምናን ተማርሰኖሳት ኣቅ፤ ኣስን ኣበ ኣጀብሲጭት «ኩ መንቹ ከ ህይመተለክ ከ ኣጀብሲስኖ ጠወ ህከን ኣዲች ኤቦ?

55 ኩን ኣናጤችየ ቤቱበኣንደ? ኣመስ ማይረመ ይኖተበኣንደ? ኣመስ ኦሱንት ያቁባቲ፤ ዩሱፋቲ፤ ሰሞኔተለክ ይሁደበኣንደ?

56 ህትን ሚኣኖ ኣመስ ኦሱንት ጉዕመንኩ ከኔ ነን ሄኣኣበኣንደ? ህካን እኮጎሬ ኩ መንቹ ከ ጠወ ጉዕመንከ ህከን ኣዲች ደኣኣ?» ይቶኦ።

57 እስን ኢስ ሙንደኣ ቶጎበኣ፤ ኢስን ኣሳንከ «ነብዬቹ ኬዕምሴኖስበኢሁ ባደንከስለክ ጠለዕል ገይስ ምኔንት» ይእ

58 ኣመዕነቱ የሰበኣቤቹሃ ኢስ ህከን ቤቹን ልግብ ኣጀብሲስኖ ጠወሃ ኣዕየበኣ።

14

ጠመቃንቾ ያህይ ሬሁተ

(ማር. 6፣14-29፤ ሉቃ. 9፣7-9)

1 ህከ ወክት ገሊሊ ባዱ ገሸኖ ሄሮድስ ኢስ ዱዱቡ ዋጮጮኦ።

2 ህካን እኮቤቹሃ ሄሮድስ ካዲመስ «ኩን ጠመቃንቾ ያህይቲ፤ ከ ኣጀብሲስኖ ጠወ ኣኣናቲሁ ሬሆች ኬዕየቤቹሃት» ይሰ።

3-4 መሰንትስ ሄሮድስ «ፍልጶስ» ይኖ ኣመስ ቤት ጫተ «ሄሮዳድ» ይኖተ ኣኤቤቹሃ ያህይ «ሄሮዳድ ኣኤ ሀሰስኖሄበኣ» ይሰቤቹሃ ሄሮድስ ያህይ ኡሱርስሾ ኣቅ።

5 ህካን እኮቤቹሃ ሄሮድስ ያህይ ሾተ ሀሰኖ ኣቅ፤ ጠወ እኮጎሬ ኡመቱ ያህይ ነብዬችገ ኣዕይ ለኣኖስቤቹሃ ዋጂኣ።

6 ሄሮድስ ኣለሞ በር ከበጃኖ በሬን ሄሮዳድ ቤቱት ኣሚት ኣሱለክ ኣስ ኮህ ቦሎቹ ኣለጵተን ሙንዲሲሱኦ።

7 ህካን እኮቤቹሃ ሄሮድስ «ኢትታንት ጠወ ጉዕመንከ ኣሳንኬ» ይ ጤሌዕለኣ።

8 ኣሴን ኣመሴ ሸዛንሴ «ጠመቃንቾ ያህይ ቡዕለ ከን ሳናን ኣት ቴሱ ኣሲኤ» ይቶኦ።

9 ምዑ ህከን ጠዋን ኣበ ሻኮ፤ እኮጎሬ ላገተ ኣጎቤቹሃ ማዳን ኣፋዕልቶ ኮህ ማሊተ ይ ያህይ ቡዕለ ኣሴኖሴገ ኣዘኮ።

10 ህካን እኮቤቹሃ መቱ መንቹ ሶክ ያህይ ቡዕለ ኡሱር ምኔን ሙርሲሾ።

11 ኣስ ቡዕለንከ ሳናን ዎሬን ኣሴናንሴ ኣማተሴ መስት ኣቶኦ።

12 ያህይ ኣዋናት ኣሚት ጀናዘስ መስት ሞጎች ኤተሮን ጠወስ ኢስሃ ኩልቶኦ።

ኢስ ኦንቶ ኩሜ መኒሃ እትሾገ
(ማር. 6፥30-44፤ ሉቃ. 9፥10-17፤ ያህ. 6፥1-14)

- 13 ኢስ ያህይ ሬሁተ ጦጭጭ ወክት ጀልባን ኣግ ኡላ ኡድመ ሜጢሀስ ኦርዕዮ፤ ኡመቱንኩ ህካን ጦጭጭቶ ወክት ከተሚኛ ፋልት ሎካን እምንቶስ።
- 14 ኢስ ጀልብኛ ፋል ልግብ ኡመት ለዕዮ ወክት ኡመኩብስ፤ ጥዘናመሰን ፈይሾ።
- 15 ኡለት ሀምርቶ ወክት ኣሳበት ኢስበ ኣሜት «ኩ ቤቹ ኡላሃ ኡድመ፤ ወክቱንኩ ሀምርኦኡ፤ ህካን እኮቤቹሃ ኩ መኮ ገደኖን ዮ ቀእተ መርት ኣታኢሃ ህዕርቶተ ህርሲሰሰ» ይቶኡ።
- 16 ኢስን «ኣስ ኣታኢሃ ኣዕኑ ኣስዬ ቤሉ ኣስ ህትን ኣቱዕን ኦርኡ ሀሰሰናበኡ» ይሰ።
- 17 ኣሳበትን «ኣንቱ ጣብተለከ ለሚ ቁርጩሜ ቤሉ መቱርቹህ ዮኔበኢ» ይቶኡ።
- 18 ኢስን «ኢቤቹ ኤቤ» ይእ።
- 19 ህከኒኛ ኤተሮን መኮ ኡላን ኣፋዕሎተ ኣዘዢ፤ ኦንቱ ጣቢተለከ ለምተ ቁርጩሜተ ኣፍ ሰማ ለኣን መገኑ ገለትጭ ጣቢተ ቤጭ ኣሳባተሰ ኣሴእ፤ ኣሰን መኒሃ ኣቶኡ።
- 20 ጉዕመንኩ መኮ እትን ዲባን ፈቆ ፋርፋሩ ኣሳበሰ ቶን ለም መሰቦ ዊመ ኬሶኡ።
- 21 ህካን እኛ መን ምላንሹ ሜንቴሁ፥ ኦሱቲ ፈቀን ጎኑ ኦንቶ ኩሜ መን ጌሰ እሀኖ እቅ።

ኢስ ባር ኣሌን ሃመን ኦርዕዮገ
(ማር. 6፥45-52፤ ያህ. 6፥15-21)

- 22 ኢስ ኡመት ህርሲሰን ኣሳበሰ ጀልባን ኣግ እሱ ሄጭት ዊኛ ዉድ ኣደ ቶልታገ ኣዘዢ።
- 23 ኢመት ህርሲሰኛ ኤተሮን ዱእ ኣኣተ ሜጥሀሰ መቶ ቆተ ኣል ፋሎ፤ ኡለት ሀምርቶ ወክት ኢስ ማጢሀስ ህከኔ ሄዕዮ እቅ።
- 24 ህከ ወክት ጀልቡ ኡላኛ ቁዕር ዮሀኔን ሞሎ ኣዲን ቡብረሩ ቡብሪን ህንበለመን ዊ ሁሉ ከበሃ ካጸ ኣእን ጨነቀኖሳት እቅ።
- 25 ህንከዕሬ ቶኖ ሰኣት ጌሳን ኢስ ባር ኣሌን ሃመን ኣሳበሰበ ኣሜኛ።
- 26 ኣሳበሰ ባር ኣሌን ሃመን ለኦ ወክት ኣበ ህልቅ «ኩን ሀብዙላትሃ» ይት ዋጅት ያርቶኡ።
- 27 ኢስ ህከ ወክት ኣሳበሰ «ኣደብ ኣዕዬ! ዋጅቶኖቹ ኣኔት» ይ ጠወዕዮሰ።
- 28 ህከ ወክት ጴጥሮስ «ቀርኛ! ኣቱትጎሬ ዊ ኣሌን ሃመን ኪበ ኣሜቶተ ኣዘዢኤ» ይእ።
- 29 ኢስን «ኣም» ይእ፤ ጴጥሮስን ጀልብ ኣዚኛ ፋል ዊ ኣሌን ሃመን ኢስበ ኦርዕዮ።
- 30 ጠዉ እኮጎሬ ጠረጎ ቡብረ ለዕዮ ወክት ዋጅእ፤ ዊ ኣዘ ዋል ኣእሞተ እኮ ወክት «ቀርኛ! ፌሴኤ» ይ ያር።
- 31 ኢስን ወክትንከሰ ኣገገሰ ሶክ ኣፍ «ኩ ኣመዕነቱ ሆፈዕዮኤህ! ሚሃት ሸክቶንቲህ?» ይእ።
- 32 ኢስለከ ጴጥሮስ ጀልባን ኣግ ወክት ቡብሩ ጨላ ይእ።
- 33 ህካን እኮቤቹሃ ጀልባን ሄኦ ኣሳበት «ህንቅንክ ኣት መገንሃ ቤቱ» ይት ኢሲሃ ሰገዶኡ።

ኢስ ጌንሴሬጣን ጥዘናመተ ፈይሱሰ
(ማር. 6፥53-56)

- 34 ኢስለከ ኣሳበሰ ባር ቶልት «ጌንሴሬጠ» ይኖ ባዱ ኢልቶኡ።
- 35 ህከን ባዶን ሄዕዮ መኮ ኢስ እሁሰ ደጎ ወክት ህከን ኣደን ሄዕዮ ባዱ ጉዕመንከ ሶካን ጥዘናመተ ጉዕመንክ ኣሰበ ኤቦኡ።
- 36 ሁኩ ጥዘናመት ጠለዕል ኦድኖሰ ሰኑተ ኡልቶተ ኡጭቶሰ፤ ኦድኖሰ ኡልቶእሩ ጉዕመንኩ ጥዘናኛሰ ፈይቶኡ።

15

ኣናኖ ምገ
(ማር. 7፥1-13)

- 1 ፈርሳውትለክ ሕግ ኣሰተማረት ዩሩሳሌሚኛ ኢስበ ኣሜት
- 2 «ሚሃት ኣሳበክ ባልቅ ምገ ድጅታኢህ? መሰንትሰ ኣንገተ ኣዕልቱዕናን ኣታኢህ ሚሃት?» ይት ጠዕምቶኡ።
- 3 ኢስ ፈንቀሽ «ኣዕኑ ሚሃት ምገህክዕኔ ይቴነ መገን ትዛዘ ድጅቱነገታት?
- 4 መሰንትሰ መገኑ «ኣነክለክ ኣመክ ኬዕምሱ ህትን «ኣንሰለክ ኣመሰ ኣሌን ቦርሮ ላገተ ጠወኣኖሁ ሬሆን ቀጠኣሙን» ይ ኣዘዢኡ።
- 5 ኣኮጎሬ ኣዕኑ «መቱ መንኛ ኣነሰለክ ኣመሰ ኢኛ ደኣቴነገታሃ ኣን መገኒሃ ኣሰዮም» ይጎሬ
- 6 ሓኩ መንኛ ኣነሰ * ኬዕምሱ ሀሰሰናበኡ ይቴነገተ፤ ህካን እኮቤቹሃ ኣዕኑ ገይክዕኔ ምገሃ ይቴነ መገን ሕገ ድጅቱነገታት።

15:4 ፋል. 20፥12፤ 21፥17፤ ዘዱ. 5፥16፤ ሉቄ 20፥9። * 15:6 ኣነሰ፡- የኖሁ መት. መቱ ሉሀ ክታበት ኣነሰ ህከረገገ ኣመሰ ይታኡ።

- 7 እዕጥ ኩ ሙኑ ለእህዕኔተ ይቴን አቴነንተሩ፤ ነብዬቹ እስያስ ክዕኔተኔሃ
- 8 « ኩ ሙኑ አፊንከስ ኪዕምሰኖኤ፤ አኮጎሬ ቀልቡስ ኢቶ ቁዕርኖኤ፤
- 9 እስ መን ወገለከ ሴረ ሕግገ እት ተማርሰተን ኤሳሃ ሰገዱስ ተሰ ዮንከስ ሀንቅ ራጎኡ» ይእ።

መን ንጃሰሰኖ ጠወ
(ማር. 7፡14-23)

- 10 እሰ ኡመት እሰቤቹ ገእ «ሞጮጭዬ! አጥራመቼ!
- 11 መን ንጃሰሰኖሁ አፊቶ ፋላኑወ ቤሉ አፎንከስ አገኖሃበእ» ይእ።
- 12 ለከኒቶ ኤተሮን አሳበሰ እሰበ አሜት «ፈርሳውት ከ ጠወ ሞጮጭቶ ወክት ኡሙዕርቶገ ደጎንትንደ?» ይት ጠዕምቶኡ።
- 13 እሰን ፈንቀሽ «ሰማን ዮ እኑኤ ካሰቡ ሀቁ ጉዕሙንኩ ቡቴክመና።
- 14 እስ ቆቃትለከ ቆቃት ከዋንስታረ እኮቤቹሃ ጌኝ እዕዬስ፤ ቆቁ ቆቀ አዋንሴ ጎር ለመንኩ ኤሎን ኡባኤ» ይእ።
- 15 ጴጥሮስ እሰ «ከን ማቆ ፍሳረተ ኩልኔ» ይሰ።
- 16 እሰ ፈንቀሽ «አዕኑ ቴሰ እሰ አጥራመቴንታበእንደ?
- 17 አፎን አጎርቹ ጉዕሙንኩ ጎደባን አግ ሹመተ እክ ፋላናገ ደጌንተበእንደ?
- 18 እኮጎሬ አፊቶ ፋላኖሁ ቀልቤን ዮሀኒቶት፤ መን ንጃሰሰኖሁ ሀከኒት።
- 19 መሰንትስ ሂለ ሰውዩሁ፤ መን ሹሁ፤ ዝነት፤ ሞጉሁ፤ ክዘብ መሰከሩሁ፤ መን ሱዕመ ቤሱሁ ሁኩን ጉዕሙንኩ መን ቀልቤቶ ፋላኖሃን።
- 20 መን ንጃሰሰኖሁ ሀከኒት ቤሉ አንገተ አዕሎኑዕነ እቱ ሆሮ ንጃሰሰኖበእ» ይእ።

መቲ መንቾ አመዕነቱ
(ማር. 7፡24-30)

- 21 እሰ ሀከንቤቹቶ ኬዕይ ጠሮሰለክ ሲደነ ዬኖ ባዱ ኦርዕዮ።
- 22 ሀከን ባደን ሂኣ መት ከነአናውቹት መንቹት እሰበ አሜት «ደወዴ ቤቶ ቀርቾ! ቤቱኤ ደሮረኖ እያኑ አፋንሴ አበ ኦርጨቀንታኢት፤ ሀዕይ አሙዜኤ» ይት ኡጭቶሰ።
- 23 እኮጎሬ እሰ መት ላገታ ፈንቀሽዮበእ፤ ሀካን እኮቤቹሃ አሳበሰ እሰበ አመንቹት ኔሳሃ አዋንተን ጨንጭታቤቹሃ ሀዕይ መርታገ አእሰ» ይት ኡጭቶሰ።
- 24 እሰን «አን ሰህሞሚሁ እሰራኤል ምኒቶ በኦ ሆላታት ቤሉ ወሊሃ ሰህሞሞበእ» ይ ፈንቀሼእ።
- 25 እኮጎሬ ህት መንቹት «ሀዕይ ቀርቾ ሀዕሌኤ» ይት ሎከሰ ኡቦኡ።
- 26 እሰ «ኦሱት እታ እቸተ ወሻተ ቶሩ ሀሰሰኖበእ» ይእ።
- 27 እሰን «ቀርቾ ሁኩን ሀንቅሃን፤ ጠወ እኮጎሬ ወሸት ሞኒ መን ማዲቶ ፈቆ ቆርፋሩ አታኦ» ይቶኡ።
- 28 ሀከ ወክት እሰ «እት አቡ አመዕነቱ ዮሂተ መንቹ፤ ሀካን እኮቤቹሃ እት ኢትቶንትገን አሆሄ» ይሴ፤ ሀከ ወክትንከ ቤቱሴ ፈይቶኡ።

እሰ ልግብ ጥዘናመተ ፈይሱሰ

- 29 እሰ ሀከንቤቹቶ ኬዕይ ገሊሊ ባር መዲን ህግ ቆተ አል ፋል ሀከኔ አፋዕሌእ።
- 30 ልግቡ ኡመቱ ሎከተ ድናኑታ፤ ቆቃኑታ፤ ናፎ መነሃ፤ ዱዲነታለከ ዋልት ጥዘናመታ ኣእት እሰበ አሜት ሎከሰ መዲን አፋሽቶኡ፤ እሰን ፈይሾሰ።
- 31 ሀካን እኮቤቹሃ ኡመቱ ዱዲነት ጠወአን፤ ናፋኑት ፈይተን፤ ድናኑት ጌጥ ይት ሃንተን፤ ቆቃኑት ለእን ለኦ ወክት አጀብሲጭት እሰራኤል መገኑ ገለትጭቶኡ።

እሰ ሾሌ ኩሜ መን አትሱሰ
(ማር. 8፡1-10)

- 32 እሰ አሳበሰ እሰበ ገእ «ኩ ኡመቱ እን ሜጡቡ ሰሱ በር ዲንክቶኤ፤ እታኢሁ መቱርቹሁ ዮሰበአቤቹሃ አሙዛንሰ፤ ሞቃን ሆጋቤቹሃ ጎሪንከሰ መርቶተ ገፈራንሰበእ» ይእ።
- 33 አሳበሰ «ሀከረ ከን ጉዕማንከ መኒሃ እካ እቸተ ከን ኤሉ ኡድማን ሀከንቤቹቶ ኤምባም?» ይቶኡ።
- 34 እሰ «ሂንኩ ጣቢቱ ዮሀዕኔ?» ይ ጠዕሜሰ፤ እሰን «ለመሉ ጣቢቱለከ ቀወንኩ ቀቀዋኑት ቀርጨሜት ዮኔ» ይቶኡ።
- 35 ሀከኒቶ ኤተሮን እሰ ኡመቱ ኡላን አፋዕላኖገ አዕዮ።
- 36 ህት አዕይ ለመላ ጣቢተለከ ቀርጨሜት አፍ መገኑ ገለትጭ ቢጭ አሳባተሰ እሰያን አሳበሰ መኒሃ አቶኡ።

- 37 ጉዕሙንኩስ እት ዱባን ፈቆ ፋርፋሩ አሳበሰ ለመለ መሶበ ዌመ ኬሶኡ።
- 38 እኛ ሙኑ ሚንቱለከ ኦሱተ ወለእንቱዕናን ሾሌ ኩሚ ጎነ እቅ።
- 39 ኢስ ኡሙት ሀርሲሾች ኤተሮን ጀልባን አግ «መጌዶነ» ዬድ ባዱ ኦሮዕዮ።

16

መላተ ለኢሃ ሆንጠኮ ጠዕምቱተ
(ማር. 8፡11-13፤ ሉቃ. 12፡54-56)

- 1 ፈርሳውትለከ ሰዱቃውት እሚት ኢስ ፊተንቶተ «ህንዴ ሰሜች መላተ ለሊሲኔ» ይት ጠዕምቶሱ።
- 2 ኢስ ፈንቀሽ «ኡለት ሀዋርቶ ወክት ሰሞሁ ቢሸዕዮኡ፤ [ጋተ ኡለት ብረተ እካኤ ይቲነንተ።
- 3 ህትን ገስመ ሰሞሁ ጎመተ እኮኡ፤ ከበር ጠረኝ ጤኑ ኡበድ ይቲነንተ፤ ሰማሃ ለኤን አደ ኡቲን ደጌነንታት፤ ህከረ ሚሃት ዘማንሰ መላተ አደ ኡቲን ደጌነንተበኢሁ?)*
- 4 አመዕነቱ ዮበእ ሂሉ ከን ዘማን ሙኑ መላተ ለኦተ ሀሰኖ፤ እኮጎሬ ዩኑስ መላ ቤሉ ዋልት መላት አሰንታሰበእ» ዬሰ፤ ህከኒች ኤተሮን ኢስ እሰተ ኡኩር ዋሉቤቹ ኦሮዕዮ።

ፈርሳዌለከ ሰዱቃዌ ራጭትተነሃ
(ማር. 8፡14-21)

- 5 ኢስ አሳበት ባረ ቶልቶ ወክት እቸተ አፋዕነ ሀቦ እቅ።
- 6 ኢስ «ፈርሳዌለከ ሰዱቃዌ ራጭቲች ጠረኝቲን አገዕርዬ» ዬሰ።
- 7 እሰን «እቸተ እንፍበቤቸሃትጎር?» ይት ገገዉንኩስ ጠወኦኡ።
- 8 እኮጎሬ ኢስ ህካን ደግ «ኩ አመዕነቱ ሆፈዕዮሀዕኔ ሙኑ! እቸተ እንፍበቤቸሃት ይቲነን ሚሃት ገገዌንከክዕኔ ጠወኡንንታት?
- 9 ቲዕሃ ኢሉ አጥራመቲንገረንደ? ኦንቱ ጣቢተ ኦንቶ ኩሚ ሙኑ እቻን ፈቆ ፋርፋሩ ሄንከ መሶበ ኬሴንተጎሬ ሰውይቲነንተበእንደ?
- 10 ህትን ለመለ ጣቢተ ሾሌ ኩሚ ሙኑ እተን ፈቆ ፋርፋሩ ኬሴንታሁ ሄንካጎሬ ሰውይቲነንተበእንደ?
- 11 እን ጠወዕዮሚሁ እቸተነሃ አሁ ሆጉሰ ህት አጥረመቲነንተበእ? ፈርሳዌለከ ሰዱቃዌ ራጭቲች አገዕርዬ» ዬሰ።
- 12 አሳበሰ ኢስ «አገዕርዬ» ዬሳሁ ፈርሳዌለከ ሰዱቃዌ ትምርቲች ቤሉ ጣብት ራጭቲች አሁ ሆጉሰ አጥረመቶኡ።

ኢስ ቡረሞሃ እሁስ ጴጥሮስ መሰከሩስ
(ማር. 8፡27-30፤ ሉቃ. 9፡18-21)

- 13 ኢስ «ፍልጶስ ቂሳረ» ዬድ ባዱ እሚኛ ወክት አሳበሰ «ሙኑ መንኛ ቤቱ አዬት ይታኢት?» ይ ጠዕሚሰ።
- 14 እሰን «መት-መቱ .ጠመቃንኛ ያህዩት ዋሉስ አልያሴት ዋሉስንገ ሕርምያሴት ህከረንገ ነብያኖች መቶሃሰ ይታኢት» ይቶኡ።
- 15 ኢስ «እዕኑ ኤሳሃ አዬት ይቲነንተኤት?» ዬሰ።
- 16 ሰሞን ጴጥሮስ «እት ሄአኖ መገኒዮ ቤቱ መሲህት» ዬእ።
- 17 ኢስን «ዮነ ቤቱ ሰሞኔ! ኦት ማሰእንቶንትሃን፤ መሰንትሰ ካን ለሊሾሄሁ ሰማን ዮ አናኤ ቤሉ መናበእ።
- 18 እን ኩላንኬ፤ ኪ ሱዕሙ ጴጥሮሴት፤ ጠረኛ ክኔ፤ ከን ከን አሊን ጭምት ደኢ ሞኒ እጃራም፤ ህካንን ሬሆ ዋልቀት ቁልታበእ።
- 19 እን ኬሳሃ ሰሚ ዋምነት ቁልፋከተ ኣሳንኬ፤ ኡላን ኡሱርቶንቲሁ ሰማን ኡሱረሞሃ እሀኖ፤ ህትን ኡላን ሂርቶንቲሁ ሰማን ሂረሞሃ እሀኖ» ዬእ።
- 20 ህከኒች ኤተሮን አሳበሰ እሰ መሲህ እሁስ አዬሃ ኩልታበእገ ጠረኝሽ አዘኮሰ።

ኢስ ሬሁሰለከ አልታሰ ኦርሸተ ጠወኡስ
(ማር. 8፡31-33፤ ሉቃ. 9፡22-27)

- 21 ህከን ወክቲች ከሽ ኢስ አሳበሰ «ዬሩሳሌመ ኦርኣም፤ ህከኔን ባድ ባልቃች፤ ሎርሎረ ቂሳችለከ ሕግ እሰተማራች ኦርሸተ ኢልታኤ፤ ሽታኤ፤ እኮጎሬ ሰቅ በር ሬሆች ኬኣም» ዩ ጀመሮ።

16:1 ማቶ. 12፡38፤ ሉቃ. 11፡16። * 16:3 መት-መቱ ሉህ ከታበት ዋሊሽ ለሞንገላከ ሰሶን ዮኢሃ ኢስ ጠወኣኖሃ በርግታበእ።
 16:4 ማቶ. 12፡39፤ ሉቃ. 11፡29። 16:6 ሉቃ. 12፡1። 16:9 ማቶ. 14፡17-21። 16:10 ማቶ. 15፡34-38።
 16:14 ማቶ. 14፡1-2፤ ማር. 6፡14-15፤ ሉቃ. 9፡7-8። 16:16 ያህ. 6፡66-69። 16:19 ማቶ. 18፡18፤ ያህ. 20፡23።

22 ህዳን እኩቤቸሃ ጴጥሮስ ኢስ መድ ዋሽ «ቀርቾ! ሆሮ እሆናበእ፤ ኩ። ጠወ ሆሮን እለላሂበእ» የን ሻቁ ጀመሮ።

23 እኩጎሬ ኢስ ጴጥሮሴ አደ ፈንቀል «ኩ ሻይጣንቹ መዲቶኤ ሸቅ! አት መኒሃ ቤሉ መገን መኑ ሰውየኖ ሃለን ሰውይታንትበእቤቸሃ ቆፋተ እኩንቴኤ» ይእ።

መሲህ አዎኑ ዋጋ ባትሲሰኖሃ እሁስ
(ማር. 8፡34—9፡1፤ ሉቃ. 9፡23-27)

24 ህከኒቶ ኤተሮን ኢስ አሳበሰ «እዪሁ ኤሳሃ አዎኖተ ሀሰኖሁ ገዉስ ለገኤን፤ ህትን መሰቀለስ እጅ ኤሳሃ አዎኑን።

25 እዪሁ ፎልስ ፊሶተ ሀሾ ጎሬ ቤሰኖ፤ ህትን እዪሁ አትኔሃ ፎልስ ቤሰኖሁ ደአኖ።

26 መቱ መንቹ ኣዲንያ አሊን የኢሃ ጉዕመንከ ደአ ፎልስ ቤሾ ጎሬ መ ደግለለኖሰ? ህከረንገ መቱ መንቹ ፎልስ ወጥ መ ባቶተ አታለኖ?

27 መንቹ ቤቱ እንስ ኬዕምኚን ገይሰ መላይካን ሜጡብ አሜተኖ፤ ህከ ወክት እስን አነኒንከ ሆጎስ ወጥ ባተኖ።

28 ህንቅንከ ያንክዕኔ፤ መንቹ ቤቱ ጄነቴንከስ አሜተን ለአተ ኢሊ ከኔ ኡርቶህኑኡቶ ሬታበአሩ የኡ» ይእ።

17

ኢስ ደኑ ዶረሙስ
(ማቶ. 19፡2-13፤ ሉቃ. 9፡28-36)

1 ለሆ በሬቶ ኤተሮን ኢስ ጴጥሮሴ፡ ያቁበለከ ያቁብ አመቤቱ ጠለዕል ያህይ አዎንስ መቱ ቆተ አል ፋሎ።

2 ኢስ ደኑንኩ ብሬስ ዶረሞ፤ ሚንሰን አርገ ኑር እኩኤ፤ ኦድኑስን ዋቅይት ዋጀእ ኑርገ በለቆኤ።

3 ህከኔን ሙሲለክ እልያስ ኢሲን ጠወእን ለኦኤ።

4 ህከ ወክት ጴጥሮስ ኢስ «ቀርቾ! ከንቤቾን ሄኤ ኔሳሃ ጡመሃን፤ ሀሶንት ጎሬ ሰሱ ዳስ ዳሳም፤ መቱስ ኬሳሃ፤ መቱስ ሙሲሃ መቱስ እልያሴሃ» ይእ።

5 ጴጥሮስ ህዳን ጠወንንገ በለቃ ጎመት ቴልቶሰ፤ ህከን ጎመ ኣዜን «አሲን ተሸ የኖኤ ኢታም ቤቱኤ ከኒቶ፤ እሱ ሞጮጮዬ» ይታ ላገት አሜቶኤ።

6 አሳበሰ ህከ ላገተ ሞጮጮቶ ወክት አበ ዋጅት ኡለ ኡቦኤ።

7 እኩጎሬ ኢስ አሰበ አሜቶ አንጋንከስ አፍ «ኬዕዬ፤ ዋጅቶኖቼ» ይእ።

8 እስን ኬእ ለእ ወክት ኢስ ቤሉ ዎሉ አዬሃ ለኦበእ።

9 እስን ቆታቶ ዶርተን ኢስ «መንቹ ቤቱ ሬሆቶ ኬአኖ ኢሊ ከ ለኤንታሃ አዬሃ ኩልቶኖቼ» ይ አዘዞሰ።

10 አሳበሰ «ህከረ ሚሃ ሕግ አሰተማረት ሄጭ እልያስ አሜቱ ሀሰሰኖሰ፤ ይታኢት?» ይተን ኢስ ጠዕምቶሰ።

11 ህትን ኢስ «እልያሰዕኑ ሄጭ አሜቶ ጉዕመርቹንከ ቅጥአአኖ።

12 እን ኩላንክህዕኔ፤ እልያሰ ሄጭ አሜቶኤ፤ እኩጎሬ መኑ እሱ ነብዬቹ አዕይ ቶጎሰበእ፤ ህዳን እኩቤቸሃ እሱሃ ሀሶን አቶሰ፤ ህትን መንቹ ቤቱ እሳቶ ኦሪሸተ ቶገኖ» ይ ፈንቀሼእ።

13 ህከ ወክት አሳበሰ ኢስ ጠወዕኖሁ ጠመቃንቾ ያህይተኔሃ እሁስ አጥራመቶኤ።

ኢስ ዱሩ አፎስ ጩል ፈይሶስ
(ማር. 9፡14-29፤ ሉቃ. 9፡37-43)

14 እስን ኡመት ቤቹ አሜቶ ወክት መቱ መንቹ ኢሰበ አሜቶ ብሬስ ጉሉጵ

15 «ቀርቾ! ጮት ዱሩ አፍ ልገብ ወክት ገራንለክ ዋን ኡጀንስ አበ ኦርሰኖሰቤቸሃ ቤቱኤ መረርሰጮሰ።

16 አሳበክቤቹ ኤቦም ወክት ፈይሶተ አታልቶበእ» ይእ።

17 ኢሰን «አዕኑ ኩ አመዕንቴንቡለክ ሸኩ ከን ዘማን መኑ! ህከ በር ኢሊ ክዕኔን ሄኣም? ህከ በር ኢሊ ክዕኔተ አታላም? ህንዳ ጩልስ ከበ ኤቤ» ይእ።

18 ኢሰን ዱር ሻቃን ህከን ጩሊቶ ፋሎ፤ ጩሉንኩ ህከ ወክት ፈይእ።

19 ህከኒቶ ኤተሮን አሳበሰ ኢሰበ አደደ እክ አሜት «ነኡ ካን ፋሽኖተ አታልንባሁ ሚሃት?» ይት ጠዕምቶኤ።

16:24 ማቶ. 10፡38፤ ሉቃ. 14፡27። 16:25 ማቶ. 10፡39፤ ሉቃ. 17፡33፤ ያህ. 12፡25። 16:27 ማቶ. 25፡31፤ መዘ. 62፡12፤ ሮሜ 2፡6። 17:1 2 ጴጥ. 1፡17-18። 17:5 ክል. 22፡2፤ ዘዳ. 18፡15፤ መዘ. 2፡7፤ ኢሳ. 42፡1፤ ማቶ. 3፡17፤ 12፡8፤ ማር. 1፡11፤ ሉቃ. 3፡22። 17:10 ሚል. 4፡5። 17:12 ማቶ. 11፡14።

20 እሱ «አመዕነቱ ሆጊዕዮህዕኔቤቸሃት፤ ሀንቅንከ ያንክዕኔ፤ ዋንጌ ኦሌ ጌሱ አመዕነቱ ሄዕዮህዕኔ እቃን ከ ቆተተ ፡ከንቤቸኙ ኬእ ካጸ ኦርእ» ይቴንተገራ ኦርታእ፤ ዋልቅሰኖህዕኔርቹ መቱርቹህ ሄእኖበእ።

21 [እኩገራ ሀትኔ ዱሩ ዱዲንለከ ሶመኒን እህባኙ ሆሮ ፋለኖበእ]*

እሱ ሬሀሰለከ ኬኡሰ ለንኪሃ ጠወዕዮገ
(ማር. 9፡30-32፤ ሉቃ. 9፡43-45)

22 አሳባሰ ገሊላን ሄኦህኔን እሱ «መንኙ ቤቱ መን አንጋን ህግሴን ኣሲኖ፤

23 እሱን ሽታሰ፤ እኩገራ እሱ ሰቅ በር ሬሆኙ ኬእኖ» ዬሰ፤ ህካን እኩቤቸሃ እሱ አበ ሻዞኦ።

መገን ምኒሃ ግብረ ባትተኒሃ

24 እሱለከ አሳባሰ ቅፍርናሆም ከተመ ኢልቶ ወክት ዱእ ምኒ ግብረ ጭምኦታ መኑ ጴጥርሴቤቸ አሚት «አሰተማርቹክዕኔ መገን ምኒ ግብረ ባተኖበእንደ?» ይት ጠዕምቶኦ።

25 ጴጥርሱ «ኤ ባተኖ» ይ ምኒ አጎ ወክት እሱ ሄጭ «ሰም፤ ኪሳሃ መ ኦተደኖሄት? ከን ኣዱንያ አል መንግስታክት ቀረጠለክ ግብር ቶጋኢሁ ኦላኙሳትንደ ዋሎ መኒቸት?» ይ ጠዕሜእ።

26 ጴጥርሱን «ዋሎ መኒቸት» ዬእ፤ እሱ «ህከረ ኦሱሰ ግብር ባትበረንደ?

27 እኩገራ እሱ ቆዕልታበእገ ባር ኦሊን ዋሻደ ኦጅት ሄጭት ፋልቶ ቁርጩማተ አፍ አፎሴ ፈንቶንት ወክት ባታንት ጌሱ ብረ ደጋንት፤ ህካን ምስት ኢለ ኪ ወጥ ባት» ዬእ።

18

ጉዕሚኙን በተአኖሁ አዬት?

(ማር. 9፡33-37፤ ሉቃ. 9፡46-48)

1 ሀከ ወክት አሳባት ኢሰበ አሚት «ሰሜ ዋምነቴን ጉዕሚኙን በተአኖሁ አዬት?» ይት ጠዕምቶኦ።

2 ህካን እኩቤቸሃ እሱ መቱ ጩል ገእ በላንከሰ ኦርሽ

3 «እን ሀንቅንከ ያንክዕኔ፤ ሰቱቱክዕኔ ጡመ እህባኙለከ ኦሶገ አኬንባኙ ሰሜ ዋምነቱ ሆሮ አኢንተበእ።

4 ሰሜ ዋምነቴን ሎሩ ከን ጩልገ ገዉሰ ሆፍሰኖሃን።

5 ከን ጩልገ ዮኢሃ ኢ ሱዕሚን ቶገኖሁ አዬሁ ኤሳሃ ቶገኖ።

መን ቆዕለኖገ እኢኙ አገዕሩ

(ማር. 9፡42-48፤ ሉቃ. 17፡1-2)

6 «እን አመዕንቶ ከን ማዕናኖች መቱሰ ሉሲሰኖ መንቹ ሎረ ሪትም ክኑ ጎበሰ ኡሱሬን ጥዕላሽ ባራን ቶረሞ እአምአቀ ቆሀኖሰ» ዬእ።

7 እሱ «ሉሲሰኖርቹ አሚተኖቤቸሃ ከን ኣዱንያ አል መኒሃ ኣዬ! መሰንትሰ ሉሲሰኖርቹ አሚቱዕነ ሆሮ ፈቀኖበእ፤ ሉሲሰኖርቹ እሱ መሳን አሚተኖ መንቸሃ ኣዬ!

8 ህካን እኩቤቸሃ አንገክ ህከረንገ ሎከክ ሉሲሳሂትገራ መርት ኦጅ፤ መሰንትሰ ለምተ አንገት ህከረንገ ለምተ ሎከት ሄኣንኬ ዘላለሚሃ ሆሮ ጠእትበ ጌራን ኣጋንትሀኒኙ ድኡለከ አንገት መረሞሃ እክ ሄእቤቹ ኣት ቆሀኖሃ።

9 ህትን አልክ ሉሲሳሂትገራ ፋሽት ቶር፤ መሰንትሰ ለሚ ኦሊን ሄእ አዛብ ጌራን ኣጋንትሀኒኙ መትአልቹ እክ ሄእቤቹ ኣት ቆሀኖሃ።

10 ከን ማዕናኖች መቱሰ ህንቁንገተበእገ አገዕርዬ፤ እን ኩላንክዕኔ፤ ሰማን ዮ እሱ መላይክት ጉዕመ ወክት ሰማን ዮ እንኬ ብሬን ለልታኦ። [

11 መሰንትሰ መንኙ ቤቱንኩ አሚቸሁ በዕዮሃ ጡምሲሃት»]*

በዕይ ደገሞ ሆልኙ ሞሳልተ

(ሉቃ. 15፡3-7)

12 እሱ «ህንደ መ ኦተደኖህዕኔ፤ መቶ መንቸሃ ጥቤ ሆለት ዮሰሀኒኙ መትሴ በእሰገራ ሆንሳይ፤ ሆንሰንከ ቆተ ኦሊን አንር በዕዮሲሃ ሀሶተ ኦርአኖበእንደ?

13 ሀንቅንከ ያንክዕኔ፤ ሀሽ ደጎ ወክት በኡዕነ ፈቆ ሆንሳይ፤ ሆንሳ ሆላኙ በትሽ በዕያን ደጎ ሆልቸሃ መንደእኖ።

17:20 ማቶ. 21፡21፤ ማር. 11፡23፤ 1 ቆር. 13፡2። * 17:21 መት-መቱ ሉሀ ክታበት ዋሊሽ 21 ዮኢሃ በርግታበእ፤ ላገንትሰ ማር. 9፡29 ዮኢሃ አጉደኖ። 17:24 ፋል. 30፤13፤ 38፡26። 18:1 ሉቃ. 22፡24። 18:3 ማር. 10፤15፤ ሉቃ. 18፡17።

18:8 ማቶ. 5፡30። 18:9 ማቶ. 5፡29። * 18:11 መት-መቱ ሉሀ ክታበት ዋሊሽ 11 ዮኢሃ በርግታበእ፤ ላገንትሰ ሉቃ. 10 ዮኢሃ አጉደኖ። 18:11 ሉቃ. 19፡10።

14 ህትን ሰማን ዮ አኑክዕኔ ከን ማዕናኖች መቱሰ በኦተ ኢተናበእ» ዬሌ።

ቤሾ መንቺሃ መ አኑ ሀሰሰኖ ጎሬ

15 ኢሰ «አመክቤቱ ቤሾሃ ጎሬ መርት ቤሱሰ ገዪንከሰን ኩል፤ እሰን ቤሱሰ አመዕኔሃጎሬ አመክቤቱ አቶንትሰ ዩሃን።

16 ሞጮጩ ግቦሃጎሬ ጠዉ ጉዕሙንኩ ለሞ ህከረንገ ሰሶ ሞሰክር ላጋን ዊመኖቤቺሃ መቱ ህከረንገ ለሙ መንቹ አፍ እሰቤቹ መር።

17 እሰ ይታኢሃ ሞጮጩ ግቦናረ ዱእ ምኒ መኒሃ ኩል፤ ዱእ ምኒ መኒሃ ሞጮጩ ግቦናረ መገኑ አመዕንበ መንቹ ገለከ ሰጭ ፈንቀልበ ጨበኝገ ያለእ።

18 «ሀንቅንከ ያንክዕኔ፤ ኡላ ኡሱርቴንታሁ ሰማን ኡሱረሞሃ እሀኖ፤ ኡላን ሂርቴንታሁ ሰማኒ ሂረሞሃ እሀኖ።

19 ህትን እን በርግ ኩላንክዕኔ፤ ክዕኔ በለች ለሙ መንቹ መ ጠወሃ ኢተቀንት ዱእ አቶጎሬ ሰማን ዮ አኑኤ ህከ ጠወ አእኖሰ።

20 መሰንትሰ ለሙ ህከረንገ ሰሶ መንቹ ሱዕሚንከኤ ጭምይቶቤቸን እን በላንከሰ እሃሞቤቺሃት» ዬሌ።

አጉርተኔሃ

21 ህከኒች ኤተሮን ጴጥሮስ ኢሰቤቺ ሆንጠክ «ቀርቻ! አመኤቤቱ በደሎኦጎሬ ሜኤ ወክት አጉሩሰ? ለመላ ወክት አጉሩሰንደ?» ዬሌ።

22 ኢሰን «ለመላዩ ወክት ለመላ ቤሉ ጠለዕል ለመላ ወክት ያንኬበእ» ዬሰ።

23 ሀካን አኮቤቺሃ «ኢሰ ሰሜ ዎምነቱ ካዲሚንከሰ ሜጡብ ሆንተሰ ሀሰሰኖ ህሳብ አማዕለመኖ ዎመ አጉዳእ።

24 እሰን ሰሉት አኤ ጀመርቶ ወክት ቶኖ ኩሚ መክለት ተ ኤዶሁ ዮሰ መቱ ካዲንቹ አፍ እሰበ ኤቦኤ።

25 ሁኩ ካዲንቹ ኤዳሰ ባቱ ሆንቤቺሃ ገዕሲ፣ መንቹሰለከ እለሰ ዮሰርቹ ጉዕመንከ ህሬን ኤዳሰ ባተመኖገ ቀርቻሰ አዘኸ።

26 ሀካን አኮቤቺሃ ካዲንቹሰ ቀርቻሰ ሎካን ኡብ ሒ ቀርቻ! ሀዕይ ቀዉ ጌሰ አገሬኤ፤ ጉዕመንከሰ ባጋም ይ ኤጩሰ።

27 ቀርቹንኩሰ አሙኸሰቤቺሃ ገፈርሰ፤ ኤዳሰ ጉዕመንከ አጉርሰ።

28 «ጠዉ እኮጎሬ ሁኩ ካዲንቹ ህከንቤቺች ፋል ኦርእን ጥቤ ዲናረ ሌቄሾ ሆንሰ ጃለ ደግ ለቄሾንኪሃ ባቱኤ» ይ ቆኤሰ ለንግ አፎ።

29 ጃሉንኩሰ ሎከሰ እላኒ ኡብ ሀዕይ ቀዉ ጌሰ አገሬኤ፤ ባጋንኩ» ይ ኤጩሰ።

30 እኮጎሬ መንቹሰ ግብ ኤዳሰ ባቶተ ኢላ ኡሱርሲሾሰ።

31 ሆንሰ ጃለት ሀካን ለኦ ወክት አበ ሻዝ እኮ ጠወ ጉዕመንከ ቀርቹሃንሰ መርት ኩልቶኤ።

32 ቀርቹንኩ ህከ ካዲንቹ ገእሲሽ ሐኩ ሂሉ ካዲንቹ፤ ኡጭቶንቴኤረ ህከ ኤዳክ ጉዕመንከ አጉርበሂንደ?

33 እን አሙኸኪገን አቲሁ ጃልሀክ አሙካንትሰበእንደ?» ይ

34 ቀርቹሰ ኡሙዕር ኤዳሰ ጉዕመንከ ባች ሹሎተ ኢላ ኡሱር ምኒ ሀለቅቺሃ ህግሽ አሴእ።

35 «ህትን አዕኑሁ አመክዕኔቤት ብድል ቀልቢን ሹልቴን አጉርቴንበጎሬ ሰማን ዮ አኑኤ ህትን አእናሀዕኔ ዬሰ።»

19

ሚንቱ ገፈርተኔሃ ኢሰ ጠዕሚመገ

(ማር. 10፣1-2)

1 ኢሰ ህከ ጠወ ጠወዕይ ሹሎች ኤተሮን ገሊላች ከዕይ ዮርዳኖስ ዛዘና ዊ ዉድ አዲን ሄዕዮ ይሁድ ባዱ ኦርዕዮ።

2 ልግቡ ኡመቱ አዎኞሰ፤ እሰን ህከኔ ፈይሾሰ።

3 ህከ ወክት ፈርሳሙት ኢሰበ አሜት ሉሲሶተ «መቱ መንቹ ጫሰ እኮሰ መሳን ሸሩ ፈቀደመኖሰንደ?» ይት ጠዕምቶኤ።

4 እሰን ፈንቀሽ «ካልቁስ ዎዕናንከ ሐሳሃ አዕይ ከለቆሰ ያመሞሃ አንበቤንታበእንደ?

5 ህትን ሐመንቹ አንሰለከ አመሰ አጉር ጫንከሰ ሚጡ እሀኖ፤ ለሙንኩ መቱ ጅሰመ» አካኤ።

6 ሀካን አኮቤቺሃ እሰ ከኒች ኤተሮን መቶሃ ጅሰመ ቤሉ ለሞሃበእ፤ መገኑ ሚጡ አዕይ በርጌኢሃ መኑ አደ አእንከ» ዬሰ።

18:15 ሉቃ. 17፡3። 18:16 ዘዳ. 19፡15። 18:18 ማቶ. 16፡19፤ ያህ. 20፡23። 18:21 ሉቃ. 17፡3-4። 18:22 ክል. 4፡24። † 18:24 መክለተ- መቱ መክለቱ ህከ ወክት ቶነ ኦንቶ ዘማን በሬ ሆንተ እእና መንቺሃ ባተመኖ ደሞዝቸሰ በተከናሃን እቅ። 19:4 ክል. 1፡27፤ 5፡2። 19:5 ክል. 2፡24።

7 እሰን «ሀከረ ሙሰ ሚሃት ሞኒ እኑ መንቸተሰ ንክሴ ሂር ገፈሮተ እዘዦ?» ይት ጠዕምቶሰ።

8 ኢሰ «ሙሰዕት ሚንቱክዕኔ ገፈርቶሮተ ፈቀጅሁ ቀልቡክዕኔ ዲጆቤቺሃት፤ እኮጎሬ ዎዕሩሃ ህትጎተበእ።

9 «እን ያንክዕኔ፤ ዝነተ እቱዕነ ጫሰ ገፈር ዎልተ ጫተ አእሮሁ ጉዕሙንኩ ዝነተ አእሮሃን» ይሰ።

10 አሳበሰ «ለቤለከ ሚእ ደኑ ካን እኮቻ ኣኡ ሆጉ ቆሀኛ» ይቶሰ።

11 ጠዉ እኮጎሬ ኢሰ «ኣሰሞሰሁኡ ቤሉ ኩ ጠዉ ጉዕሙ መኒሃ አታልሲበሃን።

12 መሰንትሰ እሰንተን ለቤንቱ ዮሰበእሩ ዮኡ፤ ህትን መኑ ቃርሰሩ ዮኡ፤ ህትን ሰሜ ዎምነቲሃ ይት ሞኒሃ እሁ ግቦእሩ ዮኡ፤ ህካን ቶጎተ አታለሮሁ ዮ ጎሬ ቶጉን» ይሰ።

ኢሰ ኦሱተ ማሰዕዮገ

(ማር. 10፣13-16፤ ሉቃ. 18፣15-17)

13 ህከ ወክት አንገሰ አሌሰ አዕይ ዱአ አሉተ መኑ ኦሱተ ኢሰቤቼ ኤቦኡ፤ አሳበሰ ኤቦ መነ ኤሙዕርቶሰ።

14 እኮጎሬ ኢሰ «ሰሜ ዎምነቱ ከኑኡገ ዮሁኑኡተ እኮቤቺሃ እጉሬሰ፤ ኦሱት ኢቤቹ አሜቶተ ከንቶኖቹሰ» ይ

15 አንገሰ አሌሰ አዕዮች ኤተሮን ዎሉ አደ ኦርዕዮ።

አዲንያ ቀባጡተለክ ሰሜ ዎምነትነሃ

(ማር. 10፣17-31፤ ሉቃ. 18፣18-30)

16 መቱ በር መቱ መንቹ ኢሰበ አሜቹ «አሰተማርቾ! ዘላለሚሃ ሄአኖ ሄኡ ደኣተ መ ጡሙ ጠወሃ አኡ?» ይእ።

17 ኢሰን «ጡሙ ጠወተነሃ ሚሃ ጠዕምታንቴኤት? ጡሙ ሚጥቾሃ መገኑ፤ ሄአቤቹ ኣጎተ ሀሶንት ጎሬ ትዛዝ አገር» ይእ።

18 መንቹንኩ «ሀከ ትዛዝዪት?» ይእ።

ኢሰን «ሽቶት፣ ዝነተ አቶት፣ ሞግቶት፣ ጨብ መሰከርቶት፤

19 እነክለክ አመክ ኬዕምሰ፤ ዎሉ መነ ገይክገ አት ኢት» ይሰ።

20 ህከን ኢሰ «ከ ትዛዝ ጉዕመንክ አዕዮም፤ ዎሉ ፈቆኤሁ መርቹሃን?» ይእ።

21 ኢሰን «ዊመ እኮተ ሀሶንት ጎሬ መርት ዮሄ ዲንያተ ጉዕመንክ ህርት ቡጥቺሃ ኣሰ፤ ሰማን ዲንያት ሃአሄ፤ ሀከኒቻ ኤተሮን አሜት አዎኔኤ» ይሰ።

22 ሁኩ ዎደልቼ ህካን ሞጮጮ ወክት አቡ ዲንያት ዮሰቤቺሃ ሻዘን ኦርዕዮ።

23 ሀከኒቻ ኤተሮን ኢሰ አሳበሰ «ሀንቅንክ ያንክዕኔ፤ ቀባጣዎ መንቹሃ ሰሜ ዎምነቱ ኣጉ አበ ኦርሰኖሃን።

24 ለንኪሃ ያንክዕኔ፤ ቀባጣሙ መንቹ መገን ዎምነቱ ኣገናሀኒቻ ጋሚሉ መርፌ ጠላዕላን ሕጉ ቆሀኛ» ይሰ።

25 አሳበሰ ህካን ሞጮጭቶ ወክት አበ አጀብሲጭት «ሀከረ አይ ጡሞተ አታለኖ?» ይቶእ።

26 ጠዉ እኮጎሬ ኢሰ አሰተ ለእን «ኩ ጠዉ መኒሃ አታለምበሃን፤ እኮጎሬ መገኒሃ ጉዕሙርቹንኩ አታለመኖሰ» ይሰ።

27 ህከ ወክት ጴጥርሰ ፈንቀሽ «ሁኩዕኑን ነኡ ጉዕመርቹንክ አጉርን አዎኖንኬ፤ ሀከረ ደአናሚሁ መርቹሃን» ይእ።

28 ኢሰን «ሀንቅንክ ያንክዕኔ፤ አዕኑ ኤሳሃ አዎንቴንተሩ መንቻ ቤቱ ጉዕሙርቹንኩ ሃዕር እሀኖ ዘማኔን ኬዕምኛ ቦርጭማን አፋዕለኖ ወክት አዕኑ ቶነ ለሞ ቦርጭማን አፋዕልቴን ቶነ ለሞሃንክ እሰራኤል ደቦ አሌን ፈረዲንተ።

29 ህትን ኢ ሱዕምተነሃ ሞነተ ሀከረንገ አመሰ ኦሱተ ሀከረንገ እነ ሀከረንገ አመተ ሀከረንገ እሌሰ ሀከረንገ ኡለሰ አጉርሃ ጉዕሙንኩ ጥቤ አፎሃ ኣአኖ፤ ህትን ዘላለሚሃ ሄአኖ ሄኡ ደአኖ።

30 ጠዉ እኮጎሬ ልግቡ ብርት ሄኣእሩ ኤተራጉተ ኤተራኑንት ብርተ ሄኣእረ አካእ» ይእ።

20

ጡሙ ሆጉተ አሲሰኖ መንቻ ሞሳልተ

1 ኢሰ «ሰሜ ዎምነቱ ዎይነሰ አሲሲሰተ ሆጉተ አታ መነ ቀጠሮተ ገሰመ ሱጵተ ፋሎ ኡለ እነ አጉዳኖ።

2 ኢሰን መት-መትሀሰ በሬን መት-መቱ ዲኖረ ባቶተ ኢተቀም ሆጉተ አታ መነ ዎይነ መክሴኖ ላልቻ አዘ ሶኮ።

3 ኡለሰ አኑንኩ ሰር ሰኣት ጌሳን ፋል ሆጉተ ሆግ በነቻን ኡርቶ ዎሉ መነ ለዕዮ።

19:7 ዘዳ. 24፣1-4፤ ማቶ. 5፣31። 19:9 ማቶ. 5፣32፤ 1 ቆር. 7፣10-11። 19:18 ፋል. 20፣13-16፤ ዘዳ. 5፣17-20። 19:19 ፋል. 20፣12፤ ዘዳ. 5፣16፤ ለጭ 19፣18። 19:28 ማቶ. 25፣31፤ ሉቃ. 22፣30። 19:30 ማቶ. 20፣16፤ ሉቃ. 13፣30።

4 እሳንከ ሐዕኑ ዋይን ላልቶ ኣዛ መርቴን ሆጉተ አዕዬ፤ ሀሰሰኛ ጌሰ ባታንክዕኔ» ዬሰ።

5 እሰን ዋይን ላልቶ ቤቹ መርቶኡ፤ ሀትን ሊሆ ሰኣተለክ ሆንሶ ሰኣት ጌሳን ፋል ሀትን አዕዮ።

6 ሀትን ቶን መቶ ሰኣት ጌሳን ፋል ዋሉ ኡርቶ መነሃ ደግ ሐኔ ዊመ በር ሆጉት ዮበኢሃ ኡርቴን ሚሃ ሆሰንታኦ?» ዬሰ።

7 እሰን ቀጠረኛ መንቹ ሆንጊት ይቶሰ፤ እሰን ሐዕኑ ዋይን ላልቶ ኣዛ መርቴን ሆጉተ አዕዬ» ዬሰ።

8 «ኡለት ሀዋርቶ ወክት ዋይን ላልቶ እኑ ሆንሰ ሀላፊቹ ሆጉተ አታእረ ገእት መጨረሻን ቀጠረንቶሁኡቶ ኩስ ዋዕናሃ ቀጠረንቶእረ ኢላ ሆጉተ አቶ ዲናረ ባት» ዬሰ።

9 ሀከ ወክት ቶን መቶ ሳኣቴን ቀጠረንቶእረ ሆንጠክ መት-መት መት-መቶ ዲናረ እለቶኡ።

10 ሀትን ዋዕና ቀጠረንቶእረ ሆንጠኩ ወክት በትሰ እላታኢሃ አጉጆሰ እቅ፤ ጠዉ እኮጎሬ እሳ መት-መቶ ዲናረ እለቶኡ።

11-12 እሰ ዲናረ እለተን ሐኩ ኒች ኤተሮን ቀጠረንቶእረ ሆጉተ አቶኢሀ መቶሃ ሰኣት፤ ዊመ በረ አሮን በኩሰ አዕንን ሆንሶም ኒን ቅጠኩ ባቶንት» ይት ኡለሰ ኢንን ቁንቁንቶኡ።

13 ኡለሰ እኑንኩ ሀከን ሆጉተ አታ መኒች መቶሰ ሒ ጆላ እን መቶርቹሃ ቤሾምበእ፤ አት ኢን መቶ በሬተ መቶ ዲናረ ባቶሄተ አተቀምዎበእንደ?

14 ሀካን እኩቤቹሃ ወጥክ ኣኢት ኦርእ፤ እን ኬሳሃ ኣሴምሀንገን መጨረሻን እሚቾ መኒቹሃ ኣሶተ አትዮም።

15 ገይኤሃ ኢቴምገ እለተ አታላምበእንደ? ሀከረንገ እን ጠ-መ እኮምቤቹሃ ምቀኝቶንትንደ?» ይ ፈንቀሺኢ።

16 ሀካን እኩቤቹሃ ኢሰ «ኤተሩ ሄኦእሩ ብርተ እካኢ ሀትን ብርተ ሄኦእሩ ኤተሩ እካኢ» ዬላ።

ኢሰ ሬሆሰተኔሃ ሰቅ ወክት ጠዉኡሰ
(ማር. 10፡32-34፤ ሉቃ. 18፡31-34)

17 ሀከኒች ኤተሮን ኢሰ ዬሩሳሌም ከተመ አሌ ዋል ኦርእን ቶን ለሙንኩ አሳበተ አደ አዕይ እሰበ መሰ

18 «ሁኩዕኑን ነኡ ዬሩሳሌመ መርናሚት፤ ሀከኔን መንቾ ቤቱ ቂሰ አዋናተለክ ሕግ እሰተማራታ ሀገሴን ኣሴናን እሰን አሌሰ ሬሆ ፍርደ ፈረዳኢ።

19 ሀትን እሰ ቀለጆንሰለክ አበ ገርፈንሰ ሰቀልቶተ አይሁደ እኮበእ መኒሃ ኣታሰ፤ ሀትን ሰቅ በር ሬሆቾ ኬእኖ» ዬሰ።

ዜብደሴ ኦሶ እመ ኡጨቱተ
(ማር. 10፡35-45)

20 ዜብደሴ ኦሶ እመት ኦሶሴ ኣእት ኢሰበ እሚት ብሬሰ ጉሉጵት መቶ ጠዉ እለተ ኡጭቶኡ።

21 ኢሰን «መ ሀሶንት?» ዬሴ፤ እሴን «ዋምነቴንከክ ለሚ እላቶኤ መቶሰ መኬ ኢዲን መቶሰ ጉረ ኢዲን አፋዕልታገ እኢ» ይቶሰ።

22 ጠዉ እኮጎሬ ኢሰ «ኡጭቴንታሃ ደጌንተበእ፤ እን ግደኖ በሬን ኣጋም ኦርሸ ጠበቱሃ አሳናተ አታልቴንንደ?» ዬላ፤ እሰን «ኤ አታልናም» ይቶሰ።

23 ኢሰን «ኦርሻኤ ጠበትተ አሳናተ አታልቴንተ፤ ጠዉ እኮጎሬ ጉረኤ እዲንለክ መኬኤ እዲን እኣሚሁ እኔበእ፤ ሁኩ ቤቹ ኣሰመኖሁ እኑኤ ቅጥእዕዮ መኒሃት» ዬላ።

24 ፈቆ ቶንኩኩ አሳበት ሀከ ጠዉ ሞጮጭቶ ወክት ለምንከ እመኦሶ ኣሊን ኡሙዕርቶኡ።

25 እኮጎሬ ኢሰ ጉዕመንከሰ እሰበ ገእ «ኣዲንያ አል መን ሀለቀት መነሰ ገሽታኡሬን፤ እምንሳኩሰን እሰ አሊን ሹምነቱ ዮሰገ ደጌንተ።

26 ክዕኔ በላን ሀት እሆንከ፤ ጠዉ እኮጎሬ አዪሁ ክዕኔ በሊች ሎረ እሆተ አተኖሁ ሄዕዮ ጎሬ ክዕኔ ካድንቹ እሆን።

27 ሀትን እዪሁ ክዕኔ በሊች ጉዕሚቻን ሎረ እሆተ አተኖሁ ሄዕዮ ጎሬ ክዕኔ ካድንቹ እሆን።

28 ሀትን መንቾ ቤቱ ፎልሰ ልግብ መኒሃ ምክትተ አዕይ ኣሶተ እሚቾ ቤሉ ካደሞኖሰተ እሚቾበእ» ዬሰ።

ለሙ ቆቀ መነ ኢሰ ፈይሱሰ
(ማር. 10፡46-52፤ ሉቃ. 18፡35-43)

29 ሀከኒች ኤተሮን ኢሰለክ አሳበሰ ኢያርኩ ከተሚቾ ፋልት መርተን ልግቡ ኡመቱ እዋቺሰ።

30 ዋቁ ገበላን አፋዕልቶ ለሙ ቆቀ መኑ ኢሰ ሀከን ኢዲን ሀገን ሞጮጭቶ ወክት ላገሰ ጎት አት «ቀርቾ ዳዉዴ ቤቶ፤ መረርሰጭኔ» ይተን ያርቶኡ።

31 ሁኩ ኡመቱ «ጨሊ ዩዬ» ይት ሻቆሰ፤ ጠዉ እኮጎሬ እሰን ዋዕኔት በትሰ «ቀርቾ ዳዉዴ ቤቶ፤ ሀዕይ እመክኔ» ይት አበ ያርቶኡ።

- 32 ኢሰን ኡር እስበ ገእ «መ እኦሀዕኔተ ሀሴነን?» ዬሰ።
- 33 እሰን «ቀርቾ! እልኔ ፈንተአገ አእኔ» ይቶሰ።
- 34 ኢሰን አሙኾ ያልሰ አነጋን አፎ ወክት አጀብሲሰኖ ሃሊን ያልሰ ፈንተአን አዎንቶሰ።

21

ኢሰ ኬዕምኝን ዬሩሳሌም ከተመ እጉሰ
(ማር. 11፥1-11፤ ሉቃ. 19፥28-40፤ ያህ. 12፥12-19)

- 1 ኢሰለክ አሳበሰ ዬሩሳሌም ከተመ ሆንጠኮ ወክት ዘይት ሀቁ ነጻኖ ቆተ አሌን ኖ «ቤተ ፋጌ» ዬኖ ቀአተ ኢልቶኡ፤ ሀከ ወክት ኢሰ አሳባኝሰ ለሙ።
- 2 «ብሬክዕኔ ኖ ቀአተ መሬ፤ ሀከኔን መት ሀሩቹተ ዎተሪንከሰን ኡሱሬማሃ ደጌነንተ፤ እሰንተ ሂርቴን ኤቤ።
- 3 እዬሀ መቱርቹ ይሀዕኔጎሬ ቀርቹ ሀሾቤቹሃት፤ ይዬ፤ እሰን ወክትንከሰ ሰሀኖ» ይ ሶኮ።
- 4 ሁኩን እኮሁ ነብዬቾን
- 5 «ጽኖን ቤቶ*
 - 1 ሁኩዕኑን! ዎሙክ ገዉሰ ሆኖሽ ሀሩቾንለከ
 - 2 ሀሩቾ ዎተሪን ቆጽ ከቤቹ አሚተኖ!፤ ይቴን ኩሌሰ» የመዎ ጠወአዎሁ ዊዎታት።
 - 6 አሳበንት መርት ኢሰ ዬሰገን አቶኡ።
 - 7 እሰን ሀሩቹተ ዎተሪንከሰን ኤብ ኦድኑሰ ሀሩቾ ጉጆን አታን ኢሰ ቆጶ።
 - 8 ሀከን መነኛ ልግቡሰ ኦድኑሰ ዎቃን ዌሶኤ፤ ዎሉሰንገ ሀቅ ሀበረ ተንቅሰን ዎቃን ዌሳኢት እቅ።
 - 9 ልግቡ ሙት ብሬ አድንለክ ኤተር አድን ላገሰ ጎት እት «ሆሳና!† ጡዎሳንቹሃን ደዉዴ ቤቴሃን ቀርቾ ሱዕሚን አሚተኖሁ ማሰአዎአሃን፤ ሆሳና! አሌ ሰማን» ይታኢት እቅ።
 - 10 ኢሰ ዬሩሳሌም ከተመ አጎ ወክት «ኩን አዬት?» ይተን ከተዎ መኑ ጉዕሙንኩ ረበሾኡ።
 - 11 ሁኩ ኡመቹ «ኩን ገሊሊ ባደን ኖ ኖርዘሬት ከተሚኛ አሚቾሃ ነብዬቾ ኢሳት» ይቶኡ።

ኢሰ ዱእ እኤኖ ዎናን ጌባ አታአረ ሸሩሰ
(ማር. 11፥15-19፤ ሉቃ. 19፥45-48፤ ያህ. 2፥13-22)

- 12 ኢሰ ዱእ ምኒ ኣግ ዱእ ምኒ ኣዘን ሀርታአረለክ ሀዕርታአረ ሸር ፋሺእ፤ ብረ ዶርታ ጠረጴዘተለክ ሀንደዕርት ሀርታ መን ቦርጭመተ ኮሎንኮዕልሾ።
- 13 እሰን « ምኑኤ ዱእ እኤኖ ምኒ ዬን ገኤኖ፤ የመዎ ከተበሞኡ፤ እኮጎሬ አዕኑ ሸፍጡ አፋዕላኖ ሻንቀ አቴንት» ዬሰ።
- 14 ኢሰ መገን ምኔን የሀኔን ቆቃኑትለክ ድናኑት እሰበ አሚታን ፈይሾሰ።
- 15 ጠወ እኮጎሬ ቂሰ አዎንሳኑትለክ ሕግ አሰተማረት ኢሰ አዕኖ አጀብሲሰኖ ጠወ መገን ምኔን «ሆሳና! ደዉዴ ቤቴሃን» ይተን ጨንጭቶቤቹሃ ኡሙዕርቶኡ።
- 16 እሰን «ኩ ኦሱተ ይታኢሃ ሞጮጭታንቴትንዶ?» ይቶሰ፤ ኢሰን «ኤ! ኦሱትለክ ቀንታሁኑኡ አፊኛ ገለት ቅዮ አቶንት፤ ይታ ላገተ ሆር አነበቤንታበአንዶ?» ዬሰ።
- 17 ኢሰን አሳኛ አደ እክ ዬሩሳሌም ከተሚኛ ፋል «ቢታን» ዬኖ ቀአተ ኦርዕይ ሀከኔ ገሎ።

ኢሰ ቦርሮ ኦድ ሀቁቹተ
(ማር. 11፥12—14፤20-24)

- 18 ኢሰ ለንክ በር ገሰመ ሱጵተ ዬሩሳሌም ከተመ ፈንቀል ኦርኢን ጎሩ አፎሰ።
- 19 እሰን ዎቁ ገበላን ኖ መት ኦድ ሀቁቹተ ለዕይ እሲቤቹ ኦርዕኖ፤ እኮጎሬ ሀበር ቤሉ መቱ ላልቹሃ ደጎሲበእ፤ ሀከ ኦድ ሀቁቹተ «ለንኪሃ ኪሳሃ ሆር ላልቹ ሄኡንከሃ» ዬሴ፤ ኦድ ሀቁቹንት ሀከ ወክት ዎልቶኡ።
- 20 አሳበሰ ሀካን ለኦ ወክት አጀብሲጭት «ሀት ት ኦድ ሀቁቹት ሚጠረን ዎልቶኡ?» ይቶኡ።
- 21 ኢሰን ፈንቀሽ «ሀንቅንከ ያንክዕኔ፤ አመዕነቱ ሄዕኖሀዕኔጎሬ፤ ሸክቴንበረ ከን ኦድ ሀቁቹን እኮ ጠወ ጠላዕል አቴንተበእ፤ ጠወ እኮጎሬ ተ ቆተተ ስንቤቹኛ ቡቱክንት ባረን ኡቡ ይቴንተጎሬ አሀኖሀዕኔ።
- 22 አመዕነቱ ሄዕኖሀዕኔጎሬ ኡጭቴንተርቹ ጉዕመንከ ደአቴንተ» ዬሰ።

ኢሰ መ ሹምነቱን እአኖት ጎሬ ጠዕሚመገ
(ማር. 11፥27-33፤ ሉቃ. 20፥1-8)

* 21:5 ጽኖን ቤቶ የመዎሁ፡- ሲነፋ አሀን ፍሳረሰ ዬሩሳሌም መነ የሃን። 21:5 ዘካ. 9፡9። † 21:9 ሆሳና፡- ዩ ዕብራይስጥ አፈን ጡሙ የሃን፤ እት ጡዎሳኔ የሃን። 21:9 መዝ. 118፥25-26። 21:13 ኢሊ. 56፥7፤ ኤር. 7፡11። 21:16 መዝ. 8፡2። 21:21 ማቶ. 17፡20፤ 1 ቆር. 13፡2።

23 እሰ ዱላ ምኒ አግ ተማርሰን ቁስ አዎንሳኑትለከ ባድ ባልቀት እሰበ አሜት «ከ ጠወ ጉዕመንከ ከታንጉቲህ መ ዋልቃኔት? ህትን ከ ዋልቃተ አሲሃሁ አዩት?» ይቶሰ።

24 እሰን ፈንቀሽ «መቱርቹ ጠዕማንክዕኔ፤ እዕኑ ህካን ፈንቀሽቴንተጎሬ አኒሁ ካን መ ዋልቃን አአሚት ጎሬ ኩላንክዕኔ።

25 ያህይ ጥምቀቱ ሀከን አዲች አሜቸ? መገን አዲችትንደ መን አዲችት?» ይሰ፤ ገገወንኩሰን « መገንኚችት ይኖሞጎሬ ህከረ ሚሃ ያህይን አመዕንቴንታበአ?» የኖረ።

26 ጠወ እኮጎሬ «መንኚችት» ይኖሞጎሬ መኑ ጉዕመንኩ ያህይ ሳብዬቹወ ይ አመዕኔቤቹሃ መን ዋጅኖሞ» የቀንቶኡ።

27 ህካን እኮቤቹሃ እሰን አሲሃ «ደንጋሞበአ» ይት ፈንቀሽቶኡ፤ እሰን «አኒሁ ካን ጉዕመንከ መ ዋልቃን አአምትጎሬ ኩላንክዕኔበአ» ይሰ።

ለሜ ኦሶ ሞሳልተ

28 እሰ «መ አኑደኖህዕኔት? መቶ መንቺሃ ለምተ ኦሱት ሄኑሰ አቅ፤ እሰን መትሰቤቹ ሆንጠክ ከበር ዋይን አዝ መርት ሆጉተ አአ» ይለ።

29 ቤቱንኩሰ «መራሞበአ» ይ ፈንቀሽአ፤ እኮጎሬ ኤተርን ሸጭ ሆጉተ አአተ መር።

30 ህትን ለምቅሰ ቤት ቤቹ መር ዋዕኔህንገን ይሰረ ሌኩ አ አነ መራሞ» ይለ፤ ጠወ እኮጎሬ መሩዕነ ፈቆ።

31 ሀከን ለሜ ኦሶች አኒህሰ አዘዘሞሁ ሀከኒት?» ይለ፤ እሰን «ዋኔሰየ» ይቶኡ፤ እሰን «ሀንቅንከ ያንክዕኔ፤ ቀረጠ ሙርታአሩለከ ዝነተ አታአሩ ክዕኔተ ሄጭት መገን ዋሞንቱ አጋለ።

32 መሰንትሰ ያህይ መገንን ሄኤኖ ዋቃሃ ለሊሶህዕኔተ አሜቸ ጎሬ አመዕንቴንታሰበአ፤ ጠወ እኮጎሬ ቀረጠ ሙርታሩለከ ዝነተ አታአሩ አመዕንቴሰ፤ እዕኑ ኤተርን ህካን ለኤኒ ቶበቴን አመዕንቴንታሰበአ» ይለ።

ዋይን ላልች ሆጉተ አታ መን ሞሳልተ

(ማር. 12፣1-12፤ ሉቃ. 20፣9-19)

33 እሰ «ዋልት ሞሳልተ ሞጮጭዬ፤ ኡላንከሰ ዋይን ላልቹ ዮሰ መቱ መንቹ ሄዕዮ አቅ፤ እሰን ዋይነሰ ኦች ላልቹሰ ጨንሼኖ ኡላተ አም አገርታ መኒሃ ሀንሸሩ እጃር ቀባኖተ እሰ ዋሉ ባዱ ኦርዕዮ።

34 ዋይኑሰ ላለኖ ወክቱ አካን ላልቹችሰ ኤበተ ካዲመሰ ቀባኖቤቹ ሶኮ።

35 ሁኩ ቀባኑት ካዲማች መቱሰ ኦልቶኡ፤ መቱንገ ሸቶኡ፤ ዋሉሰንገ ክኒን ቀሶኡ።

36 ለንኪሃ ኡለሰ እኑ ዋኔህኑኦች በተላ ካዲመተ ሶኮረ ሁኩ ቀባኑት ዋኔረ አቶገን አቶኡ።

37 ሀከኒች ኤተርን «ቤቱኤ ከበጅታህ» ይ ቤቱሰ ሶኮ።

38 ጠወ እኮጎሬ ሁኩ ቀባኑት ቤቱሰ ለኦ ወክት መት-መትህሰ ረገአኖሁ ከኒት፤ አሜ እሱ ሸን ዮሰርቹ ጉዕመንከ ረገዕኖሞ የቀንቶኡ።

39 እሰን እሱ አፍ ዋይን አዚች አብል ፋሽት ሸቶኡ።

40 «ኡለሰ እኑ አሜቸ ወክት ህከ ቀባኑተ መ አአኖሰ?» ይሰ።

41 እሰን «ህከ ሂላ መን ሂላገ አዕይ ሸ ዋይን ላልቹ ወክቲን አታ ዋሉ ቀባኖተ አሰኖ» ይቶሰ።

42 እሰን

« ግንበኛኑት ህንቆ ክኑ

እሰ መረበ ቡዕል ክኑ እኮ፤

ሁኩንን ቀርችተ ሆጉ፤ እሉን ለአሃ አጀብሲሰኖሃን» የመሞ መጻፋን ከተበሞሃ ሆሮ እነበቤንታበእንደ?

43 «ህካን እኮቤቹሃ እን ኩላንክዕኔ፤ መገን ዋሞንቱ ክዕኔች ከሜን ላልቹ ላለኖ ኡመቲሃ አሲኖ።

44 [ሀከን ክን አሌን ኡበኖሁ ቁሽቁሽ የኖ፤ ሁኩ ክኑ አዬ አሌኒ ኡሶጎሬ ፍጭርቀኖሰ» ይሰ።]፤

45 ቁስ አዎንሳኑትለከ ፈርሳሞት እሰ ጠወዕዮ ሞሳልተ ሞጮጭት ወክት እሰተኔሃ ጠወኡሰ አጥራመቶኡ።

46 ህካን እኮቤቹሃ እሰ አፎሰተ ሀሶኡ፤ ጠወ እኮጎሬ ኡመቱ እሰ ነብዬችገ ለአኖሰቤቹሃ መን ዋጅቶኡ።

22

ቦለች ድግስ ሞሳሉተኔሃ

(ሉቃ. 14፣15-24)

1 እሰን ለንኪሃ ሞሳሌን

2 «ለሜ ዋሞንቱ ቤተህሰ ቦለች ድግስ ቅጥአዕዮ ዋመ አኑደኖ።

21:32 ሉቃ. 3፣12፤ 7፣29-30። 21:33 እሲ. 5፣1-2። 21:42 መዝ. 118፣22-23። † 21:44 መት-መቱ ሉህ ክታበት ዋሊንሽ 44 በርግታበኢ፤ ላገንጎት ሉቃ. 20፣18 ዮአሃ አኑደኖ።

- 3 ዋሙንኩ ቦለቺሃ ገሌመ መነ ገለቶተ ካዲመስ ሶኮ፤ ጠዉ እኩጎሬ ገሌመ መኑ አሜቱ ግቦሌ።
- 4 «ለንከሃ ዋሙንኩ ዋልተ ካዲመስ ሁኩዕኑን ድግሰኤ ቅጥ አዕዮም፤ ቦረኤለከ ምሶ ደርገቤተ ጎርጮም፤ ጉዕሙርቸንኩ ቅጥ ይዮኤ፤ ድግሰቤቹ አሜ ይቱን ገሌመሀኑኤሃ ኩሌ» ይ ሶኮ።
- 5 ኢስን ጠወስ ህንቅ መቱ አቡረ ቤቹ ዋሉሰንገ ህትን ግግድቤቹ መርቶኤ።
- 6 ፈቆሩ ህትን ካዲመስ አፍ ዋቀርት ሸቶኤ።
- 7 ዋሙንኩ ኡሙዕር ዋታደረሰ ሶክ ህከ ሸቶ መነ ሸሲሾ፤ ህከ ከተመንከ ቡሴኤ።
- 8 ህከ ወክት ካዲማተስ «ድግሰኤ ቅጥ ይዮኤ፤ እኩጎሬ ገሌመ መኑ ድግሰህስ ገበአበረ አኮኤ።
- 9 ህካን እኮቤቺሃ ዋቃሃ ፋልቲ ደንገተ መነ ጉዕመንከ ድግሰሃ ገሌሃ ይሰ።
- 10 ካዲመንትስ ጎዳነ ፋልቲ ደንገኤ ጉዕመንከ ሂለለከ ጡሙ ጭምእታን ቦለች ምኒ መኑ ዊሞ።
- 11 «ዋሙ ህከ መነ ለኦተ ምኒ ኣጎ ወክት ቦለች ኦድኑተ ኦደአበ መንቸ ለዕይ
- 12 ኢ ጃለ! ቦለች ኦድኑተ ኦደኤዕነ ህት ከበ ኣጎንት?» ይሰ፤ ሁኩ መንቸንኩ ጨለ ይለ።
- 13 ህከኒች ኤተሮን ዋሙ ካዲማተስ «እንገሰለከ ሎክስ ኡቡርቲን አብሌ ቱንሸቸን ኤጀዬ፤ ህከን ቤቸን ኦኡለከ የቡሩ ገዕሙ አህኖ ይለ።
- 14 መሰንትስ ገእንቶአሩ ልግብየ፤ እኩጎሬ መጠረንቶአሩ ቀዋሃን» ይለ።

ግብር ባቲሃ ኢስ ጠዕሚመገ
 (ማር. 12፣13-17፤ ሉቃ. 20፣20-26)

- 15 ህከኒች ኤተሮን ፈርሳውት መርት ኢስ ጠወአኖ ጠዊን ሉሲሶተ አማዕለንቶኤ።
- 16-17 እስን «አስተማርቸ! ኣት ህንቅኝ እሁክለከ መገን ዋቃሃ ህንቁን ተማርስታንቲሃ እሁከ ህትን መን አልተ ለእ ፈረሩዮሃ እሁከ ደንጋም፤ ህንዴ ኩልኔ መ ኣጉደኖሄት? ሮም ዋሚሃ ግብር ባቲ ፈቀደሞሃንዶ ፈቀደሞበአሃን?» ይቶተ አዋናኑሰለከ ሄርድሴ አድ መነ ሶኮኤ።
- 18 ኢስን ሂልመስ ደግ «አዕኑ ኩ መኑ ለኦህዕኔተ ይቱን ኣቲካንተሩ፤ ሚሃት ፊተንቲካንተኤሁ?
- 19 ህንዴ ግብር ባቲኖ ዲናረ ለልሼኤ» ይሰ፤ እስን መቱ ዲናረ ኤብ ኣቶስ።
- 20 ኢስን «ከን ዲናር ኣለን ከተበሞሀለከ ፎቱስ አዬሃን?» ይሰ።
- 21 እስን «ሮም ዋሞሃን!» ይቶኤ፤ ኢስን «ህካን እኮች ቁሳሬሃ ቁሳሬንከ መገኒሃ መገኒንከ ኣሰዬ» ይሰ።

22 እስን ህካን ሞጮጭቶ ወክት አጀብሲጭት አጉርት መርቶኤ።

ሬሆች ኬአተኔሃ ኢስ ጠዕሚመገ
 (ማር. 12፣18-27፤ ሉቃ. 20፣27-40)

- 23 ህከ በር «ሬዮ መኑ ኬአኖበኤ» ይታ ሳዲቃውት ኢስበ አሜት
- 24 «አስተማርቸ! መሱ ሰመቱ መንቸ አለተ አሉዕነ ሬዮ ጎሬ አመስቤቱ ጫስ ረገዕይ ሬዮ አመስቤቲህስ አለተ አሉኑ» ይለ።
- 25 ለሞሉ አመኦሱት ኒ ኢዮን ሄኦ እቅ፤ ህንገፋሰ ጫተ ኤብ አለተ አሉዕነ ሬዮን ማዕኑ አመስቤቱ ጫስ ረገዕዮ።
- 26 ህትን ለንክሁ፣ ሰቂሁ ለመልቂሃ ኢለ ረገአ አለተ አልቱዕነ ሬቶኤ።
- 27 ጉዕሚቸሰን ኤተሮን ህት ጫቲ ሬቶኤ።
- 28 ጉዕሙንኩሰ ኣእቶሲቤቺሃ ሬሆች ኬኤኖ ወክት ህት ጫት ህከን ለመለ አመኦሶች ህከንስ ጫተ አካኣ?» ይት ጠዕምቶሰ።
- 29 ጠዉ እኩጎሬ ኢስ ፈንቀሽ «መጻፈለከ መገን ዋልቀተ ደንገነተበአቤቺሃ ሉሴነንታት።
- 30 መሰንትስ ሬሆች ኬኤኖ ወክት ኢስ ሰሚ መላይክገ እካ ቤሉ ኣእታበኢ፤ መአሲሰንታበኢ።
- 31 ሬሆች ኬአተኔሃ እኩጎሬ መገኑ ክዕኔኤሃ
- 32 ኣን እብራሂምሃ መገኑ፣ ኢሳቂሃ መገኑለከ ያቁብሃ መገኑ» ይኤሃ ኣነበቤንታበኢንዶ? እስ ሄኦ መኒሃ መገኑ ቤሉ ሬዮ መኒሃ መገኑበኢ» ይሰ።
- 33 ሁኩ ኡመቱ ህካን ሞጮጭቶ ወክት ኢስ ትምርታን አበ አጀብሲጭቶኤ።

ጉዕሚቸን በተአኖ ትዛዝ
 (ማር. 12፣28-34፤ ሉቃ. 10፣25-28)

- 34 ኢስ ሰዲቃውተ መሰለ ከሞሰገ ፈርሳውት ሞጮጭቶ ወክት ሚጡቡ እክ ኢስበ አሜቶኤ።
- 35 እሳቸን መቱ ሕገ ደገኖ መንቸ ፊተኖሰተ
- 36 «አስተማርቸ! ሕግ ኣዜን ዮ ትዛዚች ሁኩን በተአኖ?» ይ ጠዕሚሰ።
- 37 ኢስን ፈንቀሽ «ቀርቹ መገኑክ ዊመ ቀልብንከኑ፣ ዊመ ነብሴንከክለከ ዊመ ሰውቲንከክ ኢት።
- 38 ከን ጉዕሚቸን በተአኖሃለከ ዋኔሃ ትዛዝ።
- 39 ህካን አጉደኖ ለንክ ትዛዝ ሞሉ መነ ገይክገ ኢት» የኖሃን።

40 ሕጉለክ ነብያት ይቶኢሃ ኩ ለሙ ትዛዙ ሜጡቦ አዕይ አፈኛ» ይለ።

መሲህተኔሃ ሆንጠኮ ጠዕምቲት
(ማር. 12፡35-37፤ ሉቃ. 20፡41-44)

41 ፈርሳውት ሜጡቦ እክ ጭምዶቶ ወክት ኢሰ

42 «መሲህተኔሃ መ ሰውይትነን? እሰ አይሃ ቤቱ?» ይ ጠዕሚሰ፤ እሰን «ደዉዴኖ ቤቱ» ይቶኡ።

43 እሰን «ህካን አኮቾ ደዉድ ጠሊሊ አያረን እክ ሀት ቀርቾ ይ ገእኖሰ?»

44 « ቀርቾ መገኑ ኢ ቀርቼሃ

ባለገረክ ሎካቾክ ምር አዲን አላሚሃ ኢሊ

መኬኤ አዲን አፋዕል» ይለ።

45 ደዉድ ገዉንኩሰ ቀርቾ ይ ገኤኢቶ ሀት እክ ቤቱሰ እሆተ አታለኖ?» ይሰ።

46 ህካን አኮቤቼሃ ጸይሁ መት ላገታ ፈንቀሾተ አታሎብአ፤ ህካን ባሬቾ ኬሰ እሰ መቲርቼሃ ጠዕምቶተ መለልቶብአ።

23

ሕግ አስተማረተለክ ፈርሳዌ ሂልመተኔሃ
(ማር. 12፡38-39፤ ሉቃ. 11፡43-46፤ 20፡45-46)

1 ህክኒቶ ኤተርን ኢሰ ኡመትሀለክ አሳባተሰ

2 «ሕግ አስተማረትለክ ፈርሳውት ሙሰ ቦርጭማን አፋዕልቶኡ።

3 ህካን አኮቤቼሃ እሰ አታኢሃ እሁዕን ኩልታህዕኔሃ ጉዕመነክ አዕይሁ፥ አገሬሁ፤ መሰንትሰ እሰ ኩልታ ጠወ ሆንን ሆሲባበአረን።

4 እሰ አይሁ አታልቡለክ ኬዕምተ እጅነተ ኡሱርት መን ገነኖን እጅሲሳአረን፤ እኮጎሬ ገዉሰ ዙሩዕሚሰ ሰኖጊ ኡልቶተ ሀሳብአረን።

5 ሆጉተ አታኢሁ መኒሃ ለሊሶታት፤ መሰንትሰ መገን ላጋቾ መት-መቲ ከተቤን ጎቤመ * ክታቦ አልባሽት ሚኔሰ ኡሱርታኢሁ፥ እንገሰለክ ገነኖንከሰ ኦደኢ ኦድኖሰ ሰኑተ ቁራርሰታኢ።

6 ድግሰ ምናን ኬዕምኝ ቤቾን አፋዕሉለክ ጭምት ምናን ጡመ ቦርጭማን አፋዕሉ አትታኢ።

7 ሀትን በቻን ጠብሲሶኖሰተለክ መኑ ሕሰተማርቾ፤ ይ ገኡሰተ ኢትታኢ።

8 ጠዉ እኮጎሬ ጠሊዕል መቲ አስተማርቼ ኖህዕኔቤቼሃ፥ አዕኑ ጉዕመንኩክዕኔ አመኡሱተ አከንተቤቼሃ ሕሰተማርቾ፤ የመንቴን ገእንቶቶቼ።

9 ሀትን ሰማን ኖ አኑክዕኔ መጡ አኮቤቼሃ አይሁ ከን ኢዲንያ አሉን ፈላ ከነ፤ ይቲን ገእቶቶቼ።

10 ህትን አምንሳንቹክዕኔ ሚጡ መሲህ አኮቤቼሃ ሕምንሳንቹ፤ የመንቴን ገእንቶቶቼ።

11 ክዕኔኤ በሊቾ ጉዕሚቶን ሎሩሰ ካዲንቹክዕኔ እሁን።

12 ገዉሰ ሎርሰኖሁ ሆፈእኖ፤ ሀትን ገዉሰ ሆፍሰኖሁ ሎዕሪኛ» ይለ።

ሕግ አስተማረተለክ ፈርሳውት ምቀሴመሰገ
(ማር. 12፡40፤ ሉቃ. 11፡39-42፤44፤52፤ 20፡47)

13 ኢሰ «መኑ ሰሚ ምምነቱ አገኛበእገ ጡፊን ከንቲነገተ ሕግ አስተማረተለክ ፈርሳዌሃ ክዕኔኢ ከን መኑ ለኑህዕኔተ ይቲን አቲነገተሁኔኢሃ ኣይ! አዕኑ ገዉክዕኔ ኣኒነገተብአ፤ ኣጎተ ሀሳእሩ ኣጋበእገ ከንቲነገታት።

14 «ለኣዕኔ ይቲን ሆንጠህሴነገተ ቁራዕሩ ዱኦ መሰተ አቲን ምንሰ አኑ ሬኖ ሚንገቲ ኖሰርቼ ቾልቲነገተ አዕኑ ሕግ አስተማረትለክ ፈሪሳውያትቶ ቆህኖህዕኔ! ህካን አኮቤቼሃ ክዕኔሃ ባሱ ፍርዱ ኣለክዕኔ አሜተኖ።»†

15 «አዕኑ ኩ መኑ ለኑህዕኔተ ይቲን አቲነገተ ሕግ አስተማረትለክ ፈርሳውት መቲ መንቹ ክዕኔኢ አመዕነቶን ፈንቀሽቶተ ባርሊክ ኡሊ አሉን ዘህቲነገተ፤ እሰን ፈንቀሎ ወክት ክዕኔኢቶ ለሙ አርሃ በተአ ዘላለሚሃ ጠእትቡ ጊራን ቅጠምኢሃ አቲነገተቤቼሃ ክዕኔኢሃ ቆህኖህዕኔ!

16 «አዕኑ ቆቆ አምንሳት! ሕመቲ መንቹ መገን ምኔን ጤሊዕሊጎሬ መቲርቼሃ ደግለለኖሰብአ፤ እኮጎሬ መገን ምኔን ኖ ምርቃን ጤሊዕሊጎሬ ጤሊዕልክከሰ አፈመኖ» ይቲነገተቤቼሃ ክዕኔኢሃ ቆህኖህዕኔ!

17 አዕኑ ኩ ቆቃኑትለክ ገምኑት! ምርቀሰ ጠሊሊ እአኖ መገን ምኑንጾ ምርቀሰ በተአኖ?

22:44 መዝ. 110፡1። * 23:5 መገን ላጋቾ መት-መቲ ከተቤን ጎቤመ መጻፋ- እይሁር ሃይማኖት አምንሳት ለአኖሰተ ይት ሚኔሰ፥ እንገኝሰለክ ገነሰ፡ ደኢ አታ ወክት ኦደኢ ኦድኖ ሰኖን ቁራርሰት ኦደኢላሃን 23:5 ማቶ. 6፡፤ ዘጎ. 15፡38፤ ዘዱ. 6፡፤ 23:11 ማቶ. 20፡26-27፤ ማር. 9፡35፤ 10፡43-44፤ ሉቃ. 22፡26። 23:12 ሉቃ. 14፡1፤ 18፡14። † 23:14 መት-መቲ ለህ ክታቦት ምላሽ 14 በርግታብአ፤ ላገንትሰ ማር. 12፡40 ኖኢሃ እኑደኖ።

18 ህትን ሙቱ መንቹ መገኒሃ ክትመ ሆንጠህሴኖ ጠረጴዛ ቤቾን ጤሌዕሌሳጌ መቱርቹሃ ደግገለላኖሰበእ፤ እኮጎሬ ክትሜኖ ቤቾን ክትሚሃ ሆንጠህሴኖርቾን ጤሌዕሌሳጌ ጤሌዕልንከሰ አፈመኖ፣ ይቴነንተ።

19 እዕኑ ኩ ቆቃኑት! ክትመ ጠሊሊ አእኖ መገኒሃ ክትም ሆንጠህሴኖ ጠረጴዙንዶ ክትሙሰ በተአኖ?

20 ህካን እኮቤቹሃ መገኒሃ ክትም ቆ ሆንጠህሴኖ ጠረጴዛን ጤሌዕሌሊሁ መገኒሃ ክትም ሆንጠህሴኖ ጠረጴዛለክ ዮርቾን ጉዕማንን ጤሌዕላኖ።

21 ህትን መገን ሞን፤ ጤሌዕሌሊሁ መገን ሞን፤ እኮንከሰ ሄእኖ መገኖን ጤሌዕላኖ።

22 ህትን ሰማን ጤሌዕላኖህ መገን ጄነት ቦርጭማን፤ እኮንከሰ ጄነት ቦርጭማን አፋዕላኖህን ጤሌዕላኖ።

23 «እዕኑ ኩ መኑ ለእህዕኔተ ይቴነ አቴነንተ ሕግ አሰተማረትለክ ፈርሳውት፤ መንዞቹ፣ ሞሰማሚቹ፣ አደደ ጠጎቹ ቶኒቶ መቱ ፋሽቴን ሕግ እዘን ዮ ሎረሰ ጠው ሀንቅ ፍርደሃ፣ አሙተለክ አመዕነሙ አጉርቱነንተቤቹሃ ክዕኔኤሃ ቆሆኖህዕኔ! ሞሊሰ አጉርቶትዕነ ካን አኤ ሀሰሰኖህዕኔ አቅ።

24 እዕኑ ቆቆ አሞንሳኑት! አገነንተህኒቶ ጉዕሚቶን ቢንቢገ ቀቅቶ እኮሃ ጠሊሸቴንን ኡጅቴንንተ፤ እኮጎሬ ጋሚልገ ዮ ሎረሰ አጉዕምቱነንታት።

25 «እዕኑ ኩ መኑ ለእህዕኔተ ይቴነ አቴነንተ ሕግ አሰተማረትለክ ፈርሳውት ቡርጩቆለክ ሳህን አብል አደ ሙጩርሰቴነንታት፤ እኮጎሬ እዙክዕኔ አደደ ገደንለክ ጎራምማን ዊሞቤቹሃ ክዕኔኤሃ ቆሆኖህዕኔ!

26 እዕኑ ኩ ቆቃኑት ፈርሳውት! ኤተርሰ አዱ ሙጩርሰ ሄጭቱን ቡርጩቆለክ ሳህን አዘሰ ሙጩሩ አዕዬ።

27 «እዕኑ ኩ መኑ ለእህዕኔተ ይቴነ አቴነንተ ሕግ አሰተማረትለክ ፈርሳውት፤ እዜሰ ሬዮ መን ሞቁለክ ንጃሮርቹ ጉዕሙንኩ ዊማንሰ እኮጎሬ አብል አዱን ጡሙ ተሸ ዮኖ ራሪን መክሴሙ ሎደ አጉዳነንተቤቹሃ ክዕኔኤሃ ቆሆኖህዕኔ!

28 ሀከንገን እዕኑ መኒሃ ፈየ አጉዳን ለልቴንን እዜንከክዕኔ መኑ ለእህዕኔተ ይቴነን እኤለክ እዘዘሙ ግቡ ዊሞህዕኔ።

29 «እዕኑ ኩ መኑ ለእህዕኔተ ይቴነ አቴነንተ ሕግ አሰተማረትለክ ፈርሳውት፤ ነብያኖ ሎደ ግምብቴንገለክ ፈየ መን ሎዳን ሐውልተ መክሴኒን

30 ሐናኔ ዘማኔን ሄዕኖም እቃ አናኔ ነብያኖ ቄጉ ዲንተን ነኤ ሜጡብ እንካምበእ እቅ ይቴነንተቤቹሃ ክዕኔኤሃ ቆሆኖህዕኔ!

31 ሀከኒን ነብያኑተ ሸቶ መን አለተ እሁክህዕኔ ገዉንኩክዕኔ መሰከርቱነንታት።

32 ህካን እኮቶ እዕኑ አናኔክዕኔ አቶተ ጀመርቶ ሃላ ሆንተ ሹሌ።

33 እዕኑ ኩ ደህቻለክ ሞሪቶ አለት አዛብ ፍርዲቶ ሀት እከን ፈቄነን?

34 ህካን እኮቤቹሃ ሁኩዕኑን እን ነብያኑተ፣ ሀይቻኑተ፣ አሰተማረተ ክዕኔቤቹ ሶሃም፤ እሳቶን መት-መቱሰ ሸቴነንተ፤ መት-መቱሰ ሰቀልቴነንተ፤ ህትን መት-መቱሰ ጭምትክዕኔ ሞን፤ አብዱዳን አልቴነንተ፤ መቶ ከተሚቶ ሞላ ከተመ ሸርቱነንተሰ።

35 ህካን እኮቤቹሃ ጠሊሊ አቤሌ ቄጊቶ ጀመር መገን ሞን፤ እኮንከሰ መገኒሃ ክትም ክትሜኖ ጠረጴዛ በላን ሸቴነንተ በራክዮ ቤቱ ዘከርያ ቄጉ ኢሊ ኡላ አሊን ዲንተዕኖ ጠሊላኖ ቄጊሃ ጉዕሚንከ እዕኑ ጠዕመንቴነንተ።

36 ሀንቅንከ ያንክዕኔ፤ ኩ ቄግ ቅጣቱ ጉዕሙንኩ ከን ዘማን መን አሊን ኢላኖ።»

ኢሰ ዩሩሳሌሚሃ ኦዕዮገ (ሉቃ. 13፥34-35)

37 «ዩሩሳሌሚ! ዩሩሳሌሚ! ነብያኑተ ሸታንቲት! ኪቤቹ ሶህንቶአረ ክኒን ቀሰ ሸታንቲት! ሆንጠቤቹት ጨጭረሴ ጎኔሴ እዜን ሀንቀፋገን አኒሁ ኪ አለተ ጭምእኦተ ሀሾሚሁ ሄንከ ወክትሃት? እኮጎሬ እዕኑ ሀሰኒንታኤበእ።

38 ሁኩዕኑን ሞኑክዕኔ እን እህኖ።

39 መሰንትሰ እን ኩላንክዕኔ፤ «ቀርቶ ሱዕሚን አሜተኖህ ማሰአሞእሃን፤ ይቶኖተ ኢሊ ለንኪሃ ለኤንተኤበእ» ዩሴ።

24

ዱእ ሞኒ ድጀምተኔሃ ኢሰ ራጎገ (ማር. 13፥1-2፤ ሉቃ. 21፥5-6)

‡ 23:20 ክትም- ዩ መኑ መገኒሃ ሆንጠህሴኖርቾ ጉዕሙንኩ ክትም የመመኖ። 23:27 ሶቀ. 23፥3። 23:33 ማቶ. 3፥7፤ 12፥34፤ ሉቃ. 3፥7። 23:35 ክል. 4፥8፤ 2 ዱዱ. 24፥20-21። 23:38 ኤር. 22፥5። 23:39 መዘ. 118፥26።

1 ኢስ መገን ምኒች ፋል ኦርአን ኦሳበስ ዲኦ ምኒ ግምቦ ለሊሶስተ ሆንጠኮኤ።

2 እኩጎሬ እስ «ከ ጉዕመንከ ለኤነንታትንዶ? ሆንቅንክ ያንክዕኔ፤ ክኑ ክን ኦሊን እኩጎን መቱ ክኑሀ ከንቡቸን ፈቆዕነ ድጀመሮ» ይለ።

ቀርቼ አሜቱዕናን ብርተ እካ ኦርሸተ
(ማር. 13፥3-13፤ ሉቃ. 21፥8-19)

3 ኢስ ዘይት ሀቁ ነጻኖ ቆተ አል ፋል አፋዕሶሀኔን ጠለዕል ኦሳበስ እስቦ ሆንጠከ «ከ አሜቱለከ ቁያመት ቢጠም መላት መሃን? ህትን ኩ ጉዕሙንኩ ጠወ አሀኖሁ መ ወክትዪት?» ይት ጠዕምቶሰ።

4 ኢስን ፈንቀሽ «አዪሁ ሉሲሶኖሀዕኔበእገ አገዕርዬ።

5 መሰንትሰ ልግቡ መኑ ሕን መሲህት!» ይተን ሱዕሚንከኤ አሜት ልግብ መነ ሉሲሳኦ።

6 በገዙለከ በገዝ ትምርት ሞጮጭቲንተ፤ ሁኩን ጉዕሙንኩ አሁዕነ ፈቀኖበአቤቹሃ ህልቆኖቹ፤ እኩጎሬ መጨረሹሰ ኢልኖበአ።

7 መኑ መን አሊን ሞሙ ሞም አሊን በገዙ ኬሰኖ፤ ጎሩለከ አደደ ቤቸን ኡለ ሊንቁቁ አሀኖ።

8 ሁኩን ጉዕሙንኩ ኒጠኛ ጭንቃተ ሞኒሲሃ አሀኖ።

9 ህከ ወክት ኦርሻተ ህግሴን አሴኖሀዕኔ፤ ህትን ሺኖሀዕኔ፤ ክዕኔተ ኢ ሱዕምተኔሃ ጉዕማንከ መንቢቸን ግቢኖሀዕኔ።

10 ህትን ልግቡ መኑ ህከ ወክት ሀይማኖተሰ ካደአ፤ ህትን መቱ መቱሰ ህግሽ አሰኖ፤ መኑ ገገይንከሰ ብተመኖ።

11 ልግቡ ክዘብ ነብያት ኬአ ልግብ መነ ሉሲሳኦ።

12 ሂሉ ጠወ በተዕኖቤቹሃ ልግብያ መን አተት በአኦ።

13 ጠወ እኩጎሬ መጨረሽ ኢለ ጠረኘኖሁ ጡመኖ።

14 መን ጉዕሚንከ ሞስክር አሀተ ኩ መገን ሞምነት ተሸት ላገት ኣዲንያ አሊን ጉዕማንከ ዲዲብሰንታኦ፤ ህከ ወክት ቅያመት ሆንጠካኦ» ይለ።

አበ ኦርሸተኔሃ
(ማር. 13፥14-23፤ ሉቃ. 21፥20-24)

15 አነበበኖሁ ካን አጥራመቱን፤ ነብዬቹ ዳኔል ጠወዕኖገን ኮፍኖኖ ንጃሾርቹ ማሰአም ቤቸን አካን ለኤነንተ ወክት

16 ይሁድ ባዶን ሄላአሩ ቆተ አል ሀንቱን።

17 ሞኒ አሊ ኦሊን ኖ መንቹ ምኒሰ ኖርቹ ኣኦተ ድሩንከ።

18 ህትን አቡረ ቤቸን ኖ መንቹ ኦድኑሰ ኣኦተ ሞንሰ ፈንቀሉንከ።

19 ህከ ወክት ቀንሰተሀኑኡተለከ ላፈ ሚንቲሃ ኣዪ።

20 ህጎቲንተ ወክቱ ከርሚን ህከረንገ አበ በር አሀኖበእገ ዲኦ አዕዬ።

21 ህከ ወክት ኣዲንያ አሉ ከለቀሞቹ ጀመር እኩበኢሁለከ ብርተ ሞሽ ሆሮን አሀኖበአ አቡ ኦሪሸት አሜታኦ።

22 ሁኩ ኦሪሸ ወክቱ ገባጥኖበእቃን መቱ መንቹሁ ጡሞተ አታለኖበአ እቅ፤ ጠወ እኩጎሬ መጠረንቶ መንተኔሃ ሁኩ ወክቱ ገበንቹ አሀኖ።

23 ህከ ወክት አዪሁ «መሲህ ከበ ኖኦ!» ህከረንገ «ካጳ ኖኦ!» ይህዕኔነጎሬ አመዕንቶኖቹ።

24 መሰንትሰ ክዘብ መሲህት ይታእሩለከ ነብያት ኬኢሃ አታልቶ እቃን መጠረንቶ መነሃ ፈቆዕናን ሉሲሶተ አበ መላተለከ አጀብሲሰኖ ጠወሃ ለሊሳቤቹሃት።

25 ሁኩዕነን አን ጉዕመርቹንከ ሄጭ ኩሉኸንዕኔ።

26 ህካን እኩቤቹሃ «ሁኩዕነን!» ኡድማን ኖኦ» ይመሀዕኔነጎሬ ፋልቶኖቹ፤ ህትን «ሁኩዕነን!» ማጠሞ ቤቸን ኖኦ» ይመሀዕኔነጎሬ አመዕንቶኖቹ።

27 መሰንትሰ ጉገኛት ጉጋ ወክት ሸርቂቻ ኬሽ ገርቦ ኢለ ለለኖሀንገን መንቻ ቤት አሜቱሁ ህትን አሀኖ።

28 ሬሹ ኡባቤቹ ዙብሩ ጭምኖኖ ይለ።

መንቻ ቤቱ ለንኪሃ አሜቱሰ
(ማር. 13፥24-27፤ ሉቃ. 21፥25-28)

29 ኢስ «ህከን ኦርሻቻ ኤተሮን ወክትንከሰ አሩ ቱንሰኖ፤ አገንቹንኩ ለሊሲኖበአ፤ ቤዜት ሰሜቻ ኡባኦ፤ ሰማንኖርቹ ጉዕሙንኩ ሊንቁቁኖ።

24:9 ማቶ. 10፡22። 24:13 ማቶ. 10፡22። 24:15 ዳን. 9፡27፤ 11፡31፤ 12፡11። 24:17 ሉቃ. 17፡31። 24:24 ዳን. 12፡1፤ መር. 7፡14። 24:26 ሉቃ. 17፡23-24። 24:28 ሉቃ. 17፡37። 24:29 ኢሳ. 13፡10፤ 34፡4፤ ሕዝ. 32፡7፤ እዪ. 2፡10-31፤ 3፡15፤ መር. 6፡12-13፤ ዳን. 7፡13፤ ዘካ. 12፡10-14፤ መር. 1፡7።

30 ህዝ ወክት መንች ቤት መላት ሰማን ለልታኢ፤ ኣዲንያ ኣሌን ዮ መኑ ጉዕመንኩ ኣበ ኣእኖ፤ መንች ቤቱንኩ ዋልቃን ለከ ሎረ ኬዕምኚን ሰሜ ጎማን ኣሚተን ለኣኣ።

31 ጡሩምበ ሎረ ላጋን ቡሳ መላይከተ ሰህሮ፤ እስን ሾሎንከ ሰሜ ዳንጊች ኣሲህ መጠረንቶኣረ ጭምኣታኣ» ይእ።

እድ ሀቁቾ ሞሳሌተኔህ
(ማር. 13፣28-31፤ ሉቃ. 21፣29-33)

32 ኢስ «እድ ሀቁቾ ሞሳሌቶ ተማሬ፤ ሀሙሴ ለተን ለከ ሀበሩሴ ገምበለዕያን ለኣንተ ወክት ሀጎ * ሆንጠሁስ ደጌንነት።

33 ህትን ኣዕኑ ኩ ጠጫ ጉዕመንኩ እህን ለኣንተ ወክት ጠወኣንቶ ላጌኤ ዊንታ ወክቱ ኣሊገ ደጌ።

34 ሀንቅንከ ያንክዕኔ፤ ኩን ጉዕመንኩ ዊሞተ ኢሊ ከን ዘማን መኑ ሀገኖበኣ።

35 ሰሞሁ ለከ ኡላት ህጋኤ፤ ጠጫ እኩጎሬ ላጌኤ ሆሮ ህጋበኣ» ይእ።

መንች ቤቱ ኣሜቱስ ኣዪሁ ደገኖበኣ
(ማር. 13፣32-37፤ ሉቃ. 17፣26-30፤ 34-36።)

36 ኢስን «ህዝ በርላከ ህዝ ሳኣት ኣነ መገን ቤሉ ሰሜ መላይክት እኮኣቃን ቤቱህ ኣቃን ኣዪሁ ደጎተ ኣታላኖበኣ።

37 ኑህ ዘማን እኩገን መንች ቤቱ ኣሜቱህ ህትን እህሮ።

38 ህዝ ዘማን ቤስኖ ዊች ሄጭ ኑህ መርከባን ኣገኖ በር ኢሊ መኑ እተኖቲ፣ ኣገኖቲ፣ ኣእኖት ለከ መዕሲሰኖት ኣቅ።

39 በስኖ ውሁ ኣሜች ጉዕመንክስ ሀጣው መሶተ ኢሊ ደጎበኣህንገን መንች ቤቱ ኣሜቱህ ህትን እህሮ።

40 ለሙ መኑ ኣቡርታቤቺች መቱስ መሴናን መቱስ ፈቀኖ።

41 ለሙ ሜንቱ ሪትማን ሪታ ቤቺች መትሴ መሴናን መትሴ ፈቃኤ።

42 ህካን እኩቤቺህ ቀርቼክዕኔ ኣሜተኖ በር ደጌንነተበኣቤቺህ ጠረኝቲን ኣገዕርዬ።

43 ጠጫ እኩጎሬ ካን ደጌ፤ መቶ ሞኒ ኣኑ ሞጋንቺ ህንከዕሬን ህዝ ወክት ኣሜተኖጎሬ ደጎኣቃን ሞንሰ ኣሞኖተ ሰዕምኖበኣ ኣቅ።

44 ህካን እኩቤቺህ መንች ቤቱ ሰውይቲንገበ ወክቲን ኣሜተኖቤቺህ ኣዕኑ ተቃጠቤን ኣገሬ» ይእ።

እመዕነሞሃለከ እመዕነሞበኣ ካዲንች ሞሳልተ
(ሉቃ. 12፣41-48)

45 ኢስ «ሞንሰ ኣበርሲህ ኣቸተ ወክቲን ኣሶተ ቀርቼስ ኣበርሰስ ኣሌን ዳኛ ኣእኖስ ኣመዕነሞላከ ኤንኬዕናመ ካዲንቺ ኣይት?

46 ቀርቼስ ኣሜቾ ወክት እስ ዩገን ኣእን ደገመኖ ካዲንቺ ማሰኣምኣሃን።

47 ኣን ህንቅንከ ያንክዕኔ፤ ህዝ ካዲንቺ ቀርቼስ ዮስ ዲንያ ኣሌን ጉዕማንን ሹመ ኣእኖስ።

48 እኩጎሬ ሂሉ ካዲንቺ ቀርቼኤ ቲሱ ኣሜተኖበኤ ይ ሰውዬጎሬ

49 ሆሳስ ጃለተ ኦላን ሰካራሚን ሜጡበ ኣቲለከ ኣኑ ጀመሮጎሬ

50 ህከን ካዲንች ቀርቼ ኣገርበኣ በሬን ለከ ሳኣቲን ኣሜች

51 ህዝ ካዲንቺ ቀጠኣኖስ፤ ህትን መኑ ለኣስተ ይት ኣታ መኒን ሜጡበ ኣዕያንሰ ህከኔ ኦኡለከ የቡሩ ገዕሙ እህሮስ» ይእ።

25

ቶኖ ሚኣኖ ሞሳልተ

1 ኢስን ሰሜ ሞምነቱ ኩረዘ ኣፍ እዜቹ ቶጎተ ፋልቶ ቶን ሜኣኑተ ኣኑዳኣ።

2 ኣጎችን ኦንቱስ ገሞኑተ፣ ኣንቱስ ኤንኬዕናመተ ኣቅ።

3 ገሞኑስ ኩረዘ ኣፍ ኣቅ፤ እኩጎሬ ጋዘ ኣፍበኣ።

4 ኤንኬዕናመት ኩረዘለከ ዋሊ ኦዲን ጋዘ ኣፍ ኣቅ።

5 እዜቹ ኣሜቱዕን ዲንኬ ወክት ጉዕመንክስ ግሰኛት ቁልታንሰ ኦስኦኡ።

6 እኩጎሬ ሀሮ በላን «ሁኩዕነን! እዜቹ ኣሜቶኡ፤ ፋልቲን ቶኑ!» ይኖ ጨንጨንት እኩኡ።

7 ህዝ ወክት ጉዕመንኩ ሚኣኑት ኬእ ኩረዘስ ቅጥኣቶኡ።

8 ገሞኑት ኤንኬዕናመተ ኩረዘኔ ጠኣታት፤ ህካን እኩቤቺህ ጋዘቶክዕኔ ኣሰዬኔ ይት ኡጭቶኡ።

9 ኤንኬዕናመት ፈንቀሸት፣ ክዕኔኤሃለከ ኔሳሃ እህሮ ጋዙ ዮኔበኣ፤ ሱቀ መርቲን ክዕኔ እህሮህዕኔ ጋዘ ሀዕርዬ ይት ፈንቀሸቶኡ።

* 24:32 ህጎ፡ ኩን ለሊሰኖሁ እስ ባዳን ሀቀ ቀንሰኖሁለከ ሀበሩ ለተኖህ ህጎ ሆንጠካኒት። 24:37 ክል. 6፣5-8። 24:39 ክል. 7፣6-24። 24:44 ሉቃ. 12፣39-40። 25:1 ሉቃ. 12፣35።

10 ሁኩ ገዋኑን ጋዘ ህዕርቶት መርቶ ገሳን እዜቹ አሜቹ፤ ተቃጠብ አገርቶ ሜኣኑት እዜቹን ሜጡብ ሶሊቶ ድግሰቤቹ አጋን ኡሩት ጡፈንቶኡ።

11 «ሁኩ ገዋኑት ኡሩት ጡፈጫቶ ኤተሮን አሜት ቀርቶ! ቀርቶ! ህዕይ ኡሩተ ፈንኔ ይቶኡ።

12 እኩጎሬ እስ ፈንቀሽ ለንቅንክ ያንክዕኔ፤ እን ደጋንክዕኔበኤ ይሰ።

13 ህካን እኩቤቼ ሃ በርሰለክ ሰእትሰ ደገንተብእቤቼ ሃ ጠረኝቴን አገዕርዬ» ይለ።

ኤገተ ኣሴመ ሰሶ ካዲመ ሞሳልተ (ሉቃ. 19፡11-27)

14 እሰ «ሰሜ ዎምንቴ ዎሉ ባዱ ሃዎተ ካዲመሰ ገእ ዮሰ ዲንያተ ኣሴ መንቹ አጉደና።

15 መት-መትህሰ ዎልቀሰ ገሰ ቤህን መቲህሰ ኦንቴ መክለተ * ሁኩ መክለቱ መኬኢሁ ጠገር ብርቹት። መቲህሰ ለሙ መክለተ ህትን ዎልህሰ መቱ መክለተ ኣሰ ዎሉ ባዱ ኦርዕዮ።

16 ኦንቴ መክለተ ኣኤኢሁ ወክትንከሰ ኦርዕይ ነገጅ ዎሉ ኦንቴ መክለተ ተረፍሾ።

17 ህትን ለሙ መክለተ ኣኤኢሁ ነገጅ ዎሉ ለሙ መክለተ ተረፍሾ።

18 እኩጎሬ መቱ መክለተ ኣኤኢሁ ኦርዕይ ኤለተ አም ቀርቶስ መክለተ ሞጎ።

19 «ልግብያ ወክቲቶ ኤተሮን ህከን ካዲመ ቀርቹ ኦርዕዮ ቤቹቶ አሜቶ ካዲሚንከሰን መክለተ እሰቡ ጀመር።

20 ኦንቴ መክለተ ቶጎ ካዲንቹ ዎሉ ኦንቴ መክለተ አፍ ቀርቶቤቹ አሜቶ ቀርቶ! ኦንቴ መክለተ ኣቶንቴኤ እቅ፤ ሁኩዕኑን ዎሉ ኦንቴ መክለተ ተረፍሾም ይለ።

21 ቀርቹንኩ ፈንቀሽ (ጡሙ አቶንት፤ ኩ ጡሙለክ አመዕነንቶንት ካዲንቹ! ከን ዎቀርቶን አመዕነንቶንቤቼ ሎረርቶን ሹመ አእንኩ፤ አም! ቀርቶክ መንዲናቤቹ አግ! ይሰ።

22 ህትን ለሙ መክለተ ቶጎ ካዲንቹ አሜቶ ቀርቶ! ለሙ መክለተ ኣቶንቴኤ፤ ሁኩዕኑን አን ዎሉ ለሙ መክለተ ተረፍሾም ይለ።

23 ቀርቹንኩ (ጡሙ አቶንት፤ እት ኩ ጡሙለክ አመዕነንቶንት ካዲንቹ! ከን ዎቀርቶን አመዕነንቶንቤቼ ሎረርቶን ሹመ አእንኩ፤ አም! ቀርቶክ መንዲናቤቹ አግ! ይሰ።

24 መቱ መክለተ ቶጎ ካዲንቹ አሜቶ ቀርቶ! እት ዉጥብቤቹቶ ሞዲንቲሃለክ ፍንጭትብቤቹቶ ጭምአጎጎቲ አሙዝብ ዎቹን አሁክ ደጎም።

25 ህካን እኩቤቼ ሃ ዎጅ መክለተክ ኤለ ኣዜን ሞጎም፤ ሁኩዕኑን መክለቱክ ይሰ።

26 ቀርቹንኩ እት ኩ ሂሉ ደግላልተቡ ካዲንቹ! እን ዉጭምበእቤቹቶ ሞዲምገለክ ፍንጭብቤቹቶ ጭምአምገ ደገንንዶ?

27 ህካን እኩቶ እን አሜቶ መክለተክ ትርፊንከሰን ኣኣተ ተረፍሰኖ መኒ ሃ ኣሱ ሀሰሰኖኤ እቅ።

28 ህካን እኩቤቼ ሃ መቱ መክለተ ኣኣቲን ቶኑ መክለቱ ዮሰ መንቹ ሃ ሰሜ።

29 መሰንትሰ ዮሰ መንቹ ሃ ኣሰመኖሲሁ፤ በተአኖሲሁ፤ እኩጎሬ ዮሰበእህኒቶ ሁኩ ዮሲንኩ ኣአመኖሰ።

30 ህክ ደግላልቡ ካዲንቹ አብሉ ዮ ቱንሰቸን ፋሽቴን ኤጅዬ፤ ህከኑን ኦሎለክ የቡሩ ገዕሙ እሀኖሲ ይሰ። ይለ።

ዘማን ጎሬን እሀኖ ፍርድተኔሃ

31 እሰ «መንቶ ቤቱ ጉዕመንክ መላይካንተሰ እጀበም አሜቶ ወክት ኬዕምኣሰ ጄንት ቦርጭማን እፋዕለኖ።

32 መኑ ጉዕመንኩ ብሬሰ ጭምየኖ፤ እሰን ዜማንቹ ሆለተ ፊዕላኢቶ አደ አአኖህንገ መቱ-መቲቶ አደ አአኖ።

33 ህትን ሆለተ መኬሰ አዲን ፊዕላኤ ጉረሰ አዲን ኡርሰኖ።

34 ህክ ወክት ዎሙ መኬሰ አዲን ዮሁኑኡተ ሐዕኑ አኑኤ ማሰለዮህዕይሩ አሜ! ኣዲንያት ከለቀንቶቶ ኬሽ ቅጠምህኔ ዎምንቴ ረገዕዬ።

35 መሰንትሰ ጎሩ አፋዕኔ አትሰንታኤ፤ ሰገባዕኔ አገሰንታኤ፤ ኮህቹ አክ አሜቻን ቶገንታኤ።

36 ኦድኑተ ሆጋን ኦድሴንታኤ፤ ጥዣዕኔ ጠዕምቲንታኤ፤ ኡሱረማን ለኤንታኤ የኖሰ።

37 ህክ ወክት ጠለላኑት ቀርቶ! ጎሩ አፋንኬ ለዕን ሀከረ አትንሶንኬ ህከረንገ ሰገብት አፋንኬ ለዕን ሀከረ አግሰንኬ?

38 ህትን ኮህቹ አክ አሜታን ሀከረ ቶንጎንኬ? ኦድኑተ ሆጋን ለዕን ሀከረ ኦዲንሶንኬ?

39 ህትን ሀከረ ጥዣን ሀከረንገ ኡሱረንታን ለዕኖንኬ? ይት ፈንቀሽታ።

40 ዎሙንኩ ለንቅንክ ያንክዕኔ፤ ከን አመኤኦሶቶ መቶ ቀይህሰ አቴንታሁ ጉዕመንኩ ኤሳሃ አቴንተሀንጋት ይ ፈንቀሽኖሰ።

25:12 ሉቃ. 13፡25። 25:14 ሉቃ. 19፡11-27። * 25:15 መክለተ- መቱ መክለቱ መቶ በሬ ሆጉተ እአኖ መንቹ ሃ ቶን ጎቶ ዘማኒያ ደሞዝ 25:29 ማቶ. 13፡12፤ ማር. 4፡25፤ ሉቃ. 8፡18። 25:30 ማቶ. 8፡12፤ 22፡13፤ ሉቃ. 13፡28። 25:31 ማቶ. 16፡27፤ 19፡28።

- 41 ህትን ጉረ አዲን ሄኔሀኑኡተ ላዕኑ ቦሮረንቴንታእሩ! ኢች ቁዕርዬ! አልቢሰሀለክ አዎንታሰ መላይክተ ቅጥይቶ ዘላለሚሃ ጠእትቡ ጊራ ኣዝ ኦርዕዬ።
- 42 መሰንትሰ ጎሩ አፋዕኔ እትሴንታኤበእ፤ ሰገባን አግሲንታኤበእ።
- 43 ኮህቹ እካን ቶንገንታኤበእ፤ ኦድኑተ ሆጋን ኦዲሴንታኤበእ፤ ጥዣን ሀከረንገ ኡሱረሚን ጠዕምቴንታኤበእ። የኖሰ።
- 44 እሰን ፈንቀሽት ቀርቻ! ጎሩ አፋንኬ ለዕን ሀከረንገ ሰገባን ሀከረንገ ኮህቹ እካን ሀከረንገ ኦድኑተ ሆጋን ሀከረንገ ጥዣን ሀከረንገ ኡሱረንታን ሀከረ ለዕን ሀዕልኑዕን አጥርኖንኬ? ይታሰ።
- 45 ዋሙንኩ ለሀንቅንክ ያንክዕኔ፤ ከን ቀቀዋኖች መቲሀሰ አቴንባች ኤሳሃ አቴንበኤሀንጋኑ የኖሰ።
- 46 ህካን እኮቤቹሃ ጨቦኛኑት ዘላለሚሃ ቀጠእንታኤበቹ መርታኔ፤ እኮጎሬ ፈያኑት ዘላለሚሃ ሄአኖ ሄአቤቹ መርታኔ» ዬእ።

26

ኢሰ ሸቶተ አማዕላንቶገ

(ማር. 14፤ 1-2፤ ሉቃ. 22፤ 1-2፤ ያህ. 11፤ 45-53)

- 1 ኢሰ ካን ጉዕመንክ ተማርሰ ሹሎች ኤተሮን አሳባተሰ
- 2 «ለሞ በሬች ኤተሮን ሻሽግ ከበጀት ከበጃኖሃ ደጌንንተ፤ ህትን መንች ቤቱ ሰቀሊሃ ህግሴን ኣሴኖ» ዬእ።
- 3 ህከ ወክት ቂሰ አዎንሳኑትለክ ባድ ባልቀት «ቀያፈ» ዬኖ ሎረ ቂሰች ግቤን ጭምይቶኤ።
- 4 እሰ ኢሰ ተንኮን አፍ ሸቶተ አማዕላንቶኤ።
- 5 ጠዉ እኮጎሬ እሰ «መን በላን ብተት ኬኣቤቹሃ ከበጀት በሬን እሀንከ» ይቶኤ።

መትት መንቹት ኢሳን ሸቶተ ቡርቶገ

(ማር. 14፤ 3-9፤ ያህ. 12፤ 1-8)

- 6 ጎግ አሌን ፋልታ ጥዘነት የሰ ሰምኔ ምኔን «ቢታኔ» ዬኖቤቻን ኢሰ የሀኔን
- 7 መት መንቹት ሞጉሴ አበ ጤአተ እኮ ሸቶተ ዊንቶኦ «አልቃጠ ጥርሰ» * ዬኖ ብልቃጠ አፍ ኢሰቤቹ አሚቶኤ፤ እሰን ማዳን አፋዕሌቤቻን ቡዕለሰ ሸቶተ ዲንቶኤ።
- 8 እኮጎሬ አሳበሰ ለእ ኡሙዕርት «ኩ ሸቶተ ሚሃ ተሰ በኣኣ?»
- 9 ከ ሸቶተ አበ ብረ ሀሬን ቡጥቻኖተ ኣሴመ እቃን ጡመ እቅ» ይቶኤ።
- 10 ጠዉ እኮጎሬ ኢሰ እሰ ይታኢሃ ደግ «ት መንቹት ኤሳሃ ጡመርቹ አቶኤ፤ ሚሃ ኦርሴንንተሴት?»
- 11 መሰንትሰ ቡጥቻኑት ጉዕመ ወክት ክዕኔን ሄኣእረ፤ ጠዉ እኮጎሬ እን ጉዕመ ወክት ክዕኔን ሚጡብ ሄኣምበእ።
- 12 እሴ ከ ሸቶተ አሌኤ ዲንቶኢሀ ሞጎኖኤተ ቅጥ አቶታት።
- 13 ሀንቅንከ ያንክዕኔ፤ ኩ ተሸት ላገት ኣዲንያ አሌን ዲዱብሰመኖቤቻን ጉዕማንን ት መንቹት አቶ ጠዉ እሴተ ሰውዬኖቤገ አእኖ» ዬእ።

ኢሰ ይሁድ ህግሽ ኣሶተ አማዕላግገ

(ማር. 14፤ 10-11፤ ሉቃ. 22፤ 3-6)

- 14 ቶን ለሞንከ አሳባች መቱሰ እስቆርቶ ይሁድ ቂሰ አዎንሳኖቤቹ መር
- 15 «እን ኢሰ ህግሽ ኣሴንክዕኔጎሬ መ ኣቴንዕኔ?» ዬእ፤ እሰን ሰጂ ጠገር ብረ ኣቶሰ።
- 16 እሰን ህከን ወክቲች ጀመር ኢሰ ህግሽ ኣሶተ መከኖ ወክት ሀሰኖት እቅ።

ኢሰ ሻሽግ ሁርባት አሳባንተሰን አቴሰ

(ማር. 14፤ 12-21፤ ሉቃ. 22፤ 7-14፤ 21፤ 23፤ ያህ. 13፤ 21-30)

- 17 ጦርሹ እቴነን ከበጃኖ ከበጀት ዎኔ በር ኣሳባት ኢሰበ ሆንጠክ «ሻሽግ ሁርባት ሀከንቤቻን ቅጥኣኖሄተ ሀሰንት?» ይት ጠዕምቶሰ።
- 18 ኢሰን «ከተመ መርቲን ለሰተማርቹ ወክቱእ ኢሌቤቹሃ አሳባንተኤን ሻሽግ ከበጀት ሁርባት አታሚሁ ኪ ምኔንት የኖት?» ይቴን ኩሌሰ» ይ መቶ መንችቤቹ ሶኩ።
- 19 አሳባሰን ኢሰ አዘኮገገን ሻሽግ ሁርባት ቅጥኣቶኤ።
- 20 ኡለት ሀምርቶ ወክት ኢሰ አሳባንተሰን ማዳን አፋዕሌኤ።
- 21 እተንን «ሀንቅንከ ያንክዕኔ፤ ክዕኔች መቱ ኤሳሃ ህግሽ ኣሰኖ» ዬእ።
- 22 አሳባሰን ህከን ጠውን አበ ሻዝ «ቀርቻ! ኤሳህትጎዶ?» ይተን መት-መቱሰ ጠዕምቶኤ።
- 23 ኢሰን ፈንቀሽ «ቴሱ ኢን ሚጡብ እንገሰ ብጥራን ወረኖሁ ኤሳሃ ህግሽ ኣሰኖኤ።

25:46 ዳን. 12፡2። 26:2 ፋል. 12፡1-27። * 26:7 አልባስጥርሰ- ኬዕምኣ ኦዳተ መክሴኖ ዋጂዉ ማዕድንየ ክኩ።
 26:7 ሉቃ. 7፡37-38። 26:11 ዘዳ. 15፡11። 26:15 ዘካ. 11፡12። 26:23 መዝ. 41፡9።

24 መንች ቤቱ እስተኔሃ ከተበሞገን ረሀር፤ ጠዉ እኮጎሬ መንች ቤቱ ህግሽ አሰኖ መንቸሃ ቆሀርሰ! ሁኩ መንቸ እለሞበእቃን ቆሀርሰ እቅ» ዬአ።

25 ህግሽ አሰኖ ይሁድን ፈንቀሽ «እስተማርቸ! ኤሳህትንድ?» ዬአ፤ ኢሰን ፈንቀሽ «አት ይቶንትገት» ዬሰ።

ቀርች ሁርባት ሴረ

(ማር. 14፥22-26፤ ሉቃ. 22፥15-20፤ 1 ቆር. 11፥23-25)

26 እስ እኩንን ኢሰ ዳቡተ ኬሽ ማሰዕይ ቤጭ አሳባተሰ «ኩን ማላኤ፤ እእቲን እቸ» ይ አሴሰ።

27 ጠበቲሃ ኬሽ መገኑ ገለትጭ ዱእ አዕዮች ኤተሮን «ጉዕሙንኩክዕኔ ህከን ጠበቲች አጌ።

28 ልገብያ መን ጨቡ ፈቆተ ሃዕር ጉዲሃ ዲንተአናሃ ቁጉሃኤ።

29 ሃዕር ወይን እንኤ ምዎነቴን ክዕኔን ሜጡብ አጋም በሩ ኢለ ከን ወይን ላልቺን ዋሬማሃ ሆሮን አጋምበኤ» ዬሰ።

30 ህከኒች ኤተሮን መዝሙረ ዘመርት ቆተ አል ፋልቶኤ።

ኢስ ጴጥሮስ ለገእናሰገ ሄጭ ኩሉሰ

(ማር. 14፥27-31፤ ሉቃ. 22፥31-34፤ ያህ. 13፥36-38)

31 ህከ ወክት ኢስ «ከበሬ ህንከዕርተ ጉዕሙንኩክዕኔ ኤሳሃ ለገእነንተኤ፤ መሰንትሰ ዜማንቸ ምቀራም፤ ዜሜ ሆለንት ብን ይታኤ» የመም ከተበሞኤ።

32 ጠዉ እኮጎሬ ሬሆች ኬዕዮሚች ኤተሮን ክዕኔተ ሄጭ ገለሊተ ኦርኦም» ዬአ።

33 ጴጥሮስ ፈንቀሽ «ዋሉ ጉዕሙንኩ ለገዕዮሄ ጎሬ እን ሆሮን ለገእንኬበኤ» ዬአ።

34 ኢሰን «ሀንቅንከ ያንኬ፤ ከበሬ ህንከዕርተ ሀንጠቦ ምድዕነ ሄጭት ኤሳሃ ሰሶረ ለገእንቴኤ» ይ ፈንቀሹኤ።

35 እኮጎሬ ጴጥሮስ ፈንቀሽ «ሆሮ ከን ሜጡብ ሬሃምያ ጎሬ እን ሆሮን ኬሳሃ ለገእንኬበኤ» ዬአ፤ ፈቆ አሳበንት ህትን ይቶኤ።

ኢስ «ጌተሰማኔ» ዬናቤቾን ዱእ አዕዮገ

(ማር. 14፥32-42፤ ሉቃ. 22፥39-46)

36 ህከኒች ኤተሮን ኢስ አሳባንከሰን ሜጡብ «ጌተሰማኔ» ዬና እቡረ ቤቹ ኦርዕዮ፤ እሳንከ «እን ካጳ ኦርዕይ ዱእ አኦተ ኢለ አዕኑ ከኔ አገሬ» ዬሰ።

37 እሰን ጴጥሮሴለከ ዘብደሴ ኦሱተ ኣእ ኦርዕይ አበ ሻቾ ጨነቀመኖት እቅ።

38 ህትን «ሩሆቹኤ ፋልቶተ ኢለ አበ ሻኮም፤ አዕኑ ከኔ አገሬ፤ እን ሜጡብ ጠረኝዬ» ዬሰ።

39 አሳች መቱ ጌሰ ቁዕር ኦርዕዮች ኤተሮን ኤለ ኡብ ዱእ አእን «ኢ አነ! አታለመኖሄ ጎሬ ከ ኦርሽ ጠበትተ ኢች ሀገሰ፤ ጠዉ እኮጎሬ እን ሆሽምገ አሁዕነ አት ሀሰንትገ አሁን» ዬአ።

40 ህከኒች ኤተሮን ሰሶንከ አሳበቤቹ ፈንቀል አሜተኖ ወክት ግሶኢሃ ለዕይ ጴጥሮሴ «እን ሜጡብ መቶ ሳኣት ጌሰ አታሉ ሆጌንታእንድ?

41 ፊተናን ኣጌነንተበእገ ጠረኝቴን ዱእ አዕዬ፤ መገን አያኑ ቅጥ ይዮኡ፤ ጠዉ እኮጎሬ ማሉ ላፈሃን» ዬአ።

42 ህትን ኢስ ለንክ ወክት ቀዉንከ ቁዕር ኦርዕይ «ኢ አነ! ኩ ኦርሽ ጠበትተ እን አጉዕናን ህገናበኢሃ እኮጎሬ አት ይቶንትገ አሁን» ይ ዱእ አዕዮ።

43 ህትን እሰ ፈንቀል ኣሜተኖ ወክት አልሰ ግሰኛት ኬዕምታን ትርክም ይታኤት እቅ።

44 ህትን እሰንተ አጉር ኦርዕይ ሰቅ ወክት ምዕኔገን ይ ዱእ አዕዮ።

45 ህከኒች ኤተሮን አሳበሰቤቹ አሜች «ቴሴ ግሴን ፎሎጭቴንታእትንድ? ሁኩዕን! መንች ቤቱ ጨበኛኖ እንጋን ህግሴን ኣሴኖ ወክቱ ኢልዮኡ።

46 ኬዕዬ ኦርዕዮ፤ ሁኩዕኑን ህግሽ አሰኖኤሁ ሆንጠኮኤ» ዬሰ።

ኢስ አፌመገ

(ማር. 14፥43-50፤ ሉቃ. 22፥47-53፤ ያህ. 18፥3-12)

47 ኢስ ጠወእንን ቶን ለምንከ አሳባች መቱ «ይሁድ» ዬናሁ አሜቸ፤ እሰን ሜጡብ ቂስ አምንሳኖችለከ ባድ ባልቃች ሶሄመ ልግቡ መኑ ሲፈለከ በርተ አኖ አሜቶኤ።

48 ኢሰ ህግሽ አሰኖ ይሁድን እሰን ሜጡብ አሜተኖ መኒሃ «አዕኑ እን ሱንቃንሲሃ እሱ አፌ» ይ መላተ ኩሎሰ እቅ።

49 እሰን ህከ ወክት ኢሰበ ሆንጠክ «እስተማርቸ! ወገሬቲ!» ይ ሰንቁሰ።

50 ኢሰን «ኢ ጆለ! አሜቶንት ሰውትክ ዊንሽ» ዬሰ፤ ህከኒች ኤተሮን መኑ ኢሰበ ሆንጠክ አፎሰ።

51 ህከ ወክት ኢሰን ሜጡብ ዮሀኑኤች መቱሰ ሲፋ ፋሽ ቂስ አምንሳኖች ካዲንች መጨተ ሙሮ።

52 ኢሰን «ብሰክ ኮቦን ምር፤ ብሰ ኬሳሩ ጉዕሙንኩ ብሰን በኣኤ።

53 እን እነኚ ኡጭያን እሰ ቶን ለሞ ጎሳት ተ መላይካተ ሶሆተ አታልባሃ እጉደኖሃንደ?

54 ህካን እኮች ከ ጠወ ጉዕመንከ ቶጉ ሀሰሰኖ የኖ መጻፋን ከተቤመ ላገት ሀት እክ ዊንቶተ አታልታእ?» ይእ።

55 ሀከ ወክት ኢሰ ሀከኔ ሄዕዮ ኡመቲሃ «ሸፍጠ አፊንጎተሀንገ ብሰለከ በርተ አፊን አፎኖኤተ አሜቴንደ? ጉዕመ ወክት መገን ሞኔን አፋዕል ተማርሰን አፊንታኤበእ እቅ።

56 ጠወ እኮጎሬ ሁኩን ጉዕሙንኩ እኮሁ ነብያኖ መጻፋን የመሞ ጠወ ዊሞታት» ይእ። ሀከ ወክት አሳሰበ ጉዕሙንኩ ጌኝአት ሆንቶኡ።

ኢሰ ፍርድ ዳኛኖበ መሴመሰገ

(ማር. 14፥53-65፤ ሉቃ. 22፥54-55፤ ያህ. 18፥13-14፤ 19፥24)

57 ሀከኒች ኤተርን ኢሰ አፎ መኑ ሕግ አስተማረትለከ ባድ ባልቁ ጭምይታቤቹ እእት ሎረ ቂሰች ቀያፍቦ መሰቶኡ።

58 ጠወ እኮጎሬ ጴጥሮስ ሎረ ቂሰች ግቤ ኣዝ ኢላ ቂዕራሻን አሞናት እቅ፤ ጠወሰ መጨረሻ ኢላ ለኦተ ግቤ ኣዘን ካዲማንን ሜጡብ አፋዕሌኡ።

59 ቂሰ አሞንሳኑትለከ እይሁድ ኦገት ዳኛኑት ጉዕሙንኩ ኢሰ ሸሲሶተ ክዝብ ጠወ አሌሰ ሀሳኢት እቅ።

60 ሄንከሃ ክዝብ ሞሰክሩ ሆንጠሁን ቤሉ ሬሁተ ፈረድሲሰኖ ጠወሃ ደጎሰበእ፤ ጠወ እኮጎሬ መጨረሻ ለሙ ክዝብ ሞሰክሩ ሆንጠክ

61 «ከ መንቹ ሕን ዱእ ሞኒ ድጅ ሰሰ በሬን እጃራም ይዮኡ» ይቶኡ።

62 ሎሩ ቂሰቹ ከዕይ «ኩ መኑ አሌክ መሰከር ጠዊሃ ፈንቀሽታንትሁ መቱርቹሁ የሂበእንደ?» ይሰ።

63 ጠወ እኮጎሬ ኢሰ መቱርቹሃ ይዮበእ፤ ሎሩ ቂሰቹ ኢሰ «መሲህ፤ መገን ቤቱ እኮንትጎሬ ሄእኖ መገን መገኝዮንኬ ኩልኔ» ይእ።

64 ኢሰን ሎረ ቂሰቹ «አት ይቶንትጋንት፤ እን ኩሎንክዕኔ መንች ቤቱ መገን መኬ እዲን አፋዕልሃን ለኤንጎት፤ ህትን ሰሜ ጎማን አሜተን ለኤንጎተ» ይእ።

65 ሀከ ወክት ቂሰ አሞንሳኑት ኦድኑሰ ፊል «መገኑ ቦሮኤ፤ ከኒች ኤተርን ሞ ሞሰክሩ ሀሰሰኖ? መገኑ ቦሮሩስ አዕኑ ሞጮጭቴንታኡ።

66 ቴሱ አጉደኖህዕኔት?» ይእ፤ እሰን «ሬሁት ገበእሰ» ይት ፈንቀሽቶኡ።

67 ሀከ ወክት ኢሰ አሌን እንጅ ቱይቶኡ፤ ጡንጤንን ሞቀርቶኡ፤ ህትን መጨላ ሞቀርተን፤

68 «መሲህ! ህንዳ ዳይ ሞቀሮሄ ጎሬ ራገ ጠወእ» ይታሰ እቅ።

ጴጥሮስ ኢሰ ለገዕዮገ

(ማር. 14፥66-72፤ ሉቃ. 22፥56-62፤ ያህ. 18፥15-18፤25-27።)

69 ጴጥሮስ ሎረ ቂሰች ሞኒች አብሌን ግቤ ኣዘን አፋዕሌሁን መት ገረድቹት እሰበ ሆንጠክ «አት ገሊሊ ኢሰን ሜጡብ ሄእንት» ይቶኡ።

70 ጠወ እኮጎሬ እሰ «አት ይታንቲሁ እዩት ጎሬ ደጋምበእ» ይ ጉዕምሰ ብሬንጎ ለገዕዮ።

71 ጴጥሮስ ፋሎተ ብትምቤቹ ሆንጠኮሁንጎ ገረድቹት ለእ ሀከኔ ሄዕዮ መኒሃ «ኩ መንቹ ናዝሬት ኢሰን ሜጡብ ሄዕዮሃን» ይቶኡ።

72 ጴጥሮስ ለንኪሃ ጤሌዕላን «አት ይታንት መንቹ ደጋምበእ» ይ ለገዕዮ።

73 ቀሞ ወክቲች ኤተርን ሀከኔ ኡርቶ መኑ እሰበ ሆንጠክ «ጠወኣንትጉ ለሊሲኖት፤ ሀንቅንከ አት አሳች መቶሃሰ» ይቶኡ።

74 ጴጥሮስን «አን ከ መንቹ ደጋምበእ» የን ገወሰ ቦሮዕሩሃ ጤሌዕሌሃ ጀመሮ፤ ወክትንከሰ ሆንጠቦ ቀጅ።

75 ጴጥሮስን ኢሰ «ሆንጠቦ ሞዴዕነ ሰሶረ ለገኣንቴኤ» ይ ላገተ ሰውይ አብል ፋል ቡብ ኦዕዮ።

27

ኢሰ ጽላጦሴቦ መሴመገ

(ማር. 15፥1፤ ሉቃ. 23፥1-2፤ ያህ. 18፥28-32)

1 ኡለት ሶዞ ወክት ቂሰ አሞንሳኑትለከ ኡመት ባልቁ ጉዕሙንኩ ኢሰ ሸቶተ አማዕሊንቶኡ።

2 ሀከኒች ኤተርን ኢሰ ኡሱርት መሰት ሮም ባድ ገሻንች ጽላጦሴቹ ህግሰ ኣቶኡ።

3 ሀከ ወክት ኢሰ ህግሻ ኣሴ ይሁድ ኢሰ አሌን ሬሆ ፍርደ ፈረዴማሃ ለዕዮ ወክት አበ ሰጭ ሰጂ ጠገር ብረ ቂሰ አሞንሳኖተለከ ባድ ባልቃተ ፈንቀሽ ኡብ ኣሴኢ።

† 26:53 ጎሳተ፡- ዮ ሮም መንግስት ወክት መቱ ጎሳቱ ሊሆ ኩሜ ሞታደር ጌሰ እሆኖ። 26:55 ሉቃ. 19፥47፤ 21፥37። 26:61 ያህ. 2፥19። ‡ 26:63 መሲህ፡- የ ግሪክ አፎን ቡረሞሃ የ እህን እይሁድ መኑ አሜተኖ ደተን አገርታሰሃን። 26:64 ዳ.ን. 7፥13። 26:66 ሉቃ 24፥16።

4 «ፈጣሪ መንጃ ሪሆተ ህግሽ ኢሴምቤቸሃ እን ቤሾም» ይዘ፤ ጠዉ እኮጎሬ «ጌሳሃ ሞ ኮርሾኔ፤ እት ገዉክ ሹል» ይቶኡ።

5 ይሁድን ሰጂ ብረንከ መገን ምንን ብንእዕይ ፋል ለንገቅ ሬዮ።

6 እኮጎሬ ቁስ አምንሳት ብረሰ ኬሰ «ኩ ብሩ ቁግ ብረ እኮቤቸሃ ዱእ ምኒ ብራን ሜጡብ እኡ ሀሰሰናበእ» ይቶኡ።

7 ህካን አማሰላንቶች ኤተሮን ኮሀ እክ አሜች ሬዮ መን ሞገተ ፋግቺች ኡለተ ሀዕርቶኡ።

8 ህካን እኮቤቸሃ ህተ ኡለተ ከበሬ ኢለ «ቁግ ኡለተ» ይንገ ገኤዮ።

9 ህካን ሃለን «እሰራኤል ኦሱት ሂንከ ፋሸኖ» ይት ገመቶ ሞገ እጅ ጠገር ብረ እኡቶኡ፤

10 ቀርቺ እዘኮኤገን ፋግቺች ኡለተ ሀዕሪመ» የመሞ ነብዬቸ ኤርምያሴን ጠወአሞ ራጉ ዊሞ።

ጵላጦስ ኢስ ጠዕማገ

(ማር. 15፡2-5፤ ሉቃ. 23፡3-5፤ ያህ. 18፡33-38)

11 ህከ ወክት ኢስ ገሻንቻ ቤቹ ኤቤመ፤ ገሻንቹንኩ «እት አይሁድየ ምዕንዶ?» ይ ጠዕማእ፤ ኢሰን «እት ይቶንጋት» ይ ፈንቀሼእ።

12 ጠዉ እኮጎሬ ቁስ አምንሳትለክ ባድ ባልቁ ኦዶስ ወክት መቱ ጠወሃ ፈንቀሸዮበእ።

13 ህከኒቶ ኤተሮን ጵላጦስ «ኩ መኑ ኬንከ ኦዶሄ ጠወ ሞጭጭጋትበእንዶ?» ይሰ።

14 እኮጎሬ ኢስ ገሻንቹ እበ እጅብሲጮተ ኢለ መቱ መሰለሃ ፈንቀሸዮበእ።

ኢስ አሌን ሪሆ ፍርደ ፈረዴመገ

(ማር. 15፡6-15፤ ሉቃ. 23፡13-25፤ ያህ. 18፡39-40፤ 19፡1-16)

15 ሻሽግ ከበጃት ወክት መኑ መጠር መቱ መንቹ ኡሱርቶ ሂር ገፈረሮ ሮሽት ገሻንቹ ጵላጦሴሃ ሂኦስ እቅ።

16 ህከ ወክት «ባርባኔ» * ዩኖ ለልዮኢሁ ኡሱር ምንን ሂዕዮ እቅ።

17 መኑ ጭምዬ ወክት ጵላጦስ «አዬ ሂርሀዕኔተ ሀሴንን? ባርባኔይትንዶ መሲህ የመሞሃ ኢሰ?» ይ ጠዕማሰ።

18 ጵላጦስ ህካን ዮተ አታሎሁ ኢስ ጠቁን ህግስ ኣቶገ ደገኖቤቸሃት እቅ።

19 ጵላጦስ ፍርድ ቦርጭማን አፋዕሊሁን ጫሰ «ከን ነጠ መንቻ አሌን መቱርቸሃ አቶት፤ እን እስ መሳን ሀንከዕርተ ሀቁንተኤ እበ ጨነቀመን ገሎምንተገ» ይት ሶኮኡ።

20 ህከ ወክት ቁስ አምንሳትለክ ባድ ባልቀት መኑ ጵላጦሴ ባርባኔ ሂር ኢስ ሾን ይተን ኡጭጋገ አቶኡ።

21 ገሻንቹንኩ «ከን ለምንከ መንቹች ሀካንሰ ሂርሀዕኔተ ሀሴንን?» ይ ጠዕማሰ፤ እሰን «ባርባኔ ሂርኔ» ይት ፈንቀሸቶኡ።

22 ጵላጦሰን «መሲህ የመሞ ኢስ መ አኡ?» ይሰ፤ ጉዕመንኩሰ «ሰቀሎን» ይቶኡ።

23 ገሻንቹንኩ «ሚሃት? እስ አዕዮ ሂራ ጠዉ መርቸሃን?» ይዘ፤ እሰን «ሰቀሎመን» ይት በትሰ ጨንጭቶኡ።

24 ጵላጦሰን ኩ ጠዉ ብተተ ኬሰ ቤሌ መቱርቸሃ ደግለለኖበእገ ለዕዮ ወክት ጉዕማንከ ኡመት ብረን ሞሃ ኡብሲሽ አንገሰ አዕለን «አን ከን መንቻ ቁገች ነጠሃን፤ አዕኑን ሹዕልዬ» ይዘ።

25 ኡመቱ ጉዕመንኩ «ቁጉስ ኒለክ አለኔ አሌን አሁን» ይቶኡ።

26 ህከ ወክት ጵላጦስ ባርባኔ ሂር ገፈረ፤ እኮጎሬ ኢስ ኦልሲሾች ኤተሮን ሰቀሎኖተ ህግሽ ኣሴእ።

ዎታደሩ ኢስ አሌን ቀለደገ

(ማር. 15፡16-20፤ ያህ. 19፡2-3)

27 ሮም ዎታደሩ ኢስ ጵላጦሴ ግብተ መሰቶኡ፤ ህትን ዎታደረ ጉዕመንከ ኢስ መዴን ጭምአቶኡ።

28 ኦድኑስ ኣእት ብሽ ኦድኑተ ኦድሶኡ።

29 ኡት አክሊሊ መክሰ ቡዕለሰ ሦርት መኬሰ አንገን ሾምባቁተ አፍሲሶሰች ኤተሮን ብሬሰ ሰገደን «አይሁድ ምዕ! ወገሬቱ ኬሳሃ አሁን!» ይተን ቀለደሲት እቅ።

30 አሌስ አንጅ ቱይተን አንጋችሰ ሾምባቁተ ኣእት ቡዕለሰ ምቀርታእት እቅ።

31 ቀለደሲች ኤተሮን ብሽ ኦድኑተ ፋሽት ገይሰ ኦድኑተ ኦድሰ ሰቀልቶተ ኣእት መርቶኡ።

ኢስ ሰቀሊመገ

(ማር. 15፡21-32፤ ሉቃ. 23፡26-43፤ ያህ. 19፡17-27)

32 ገሻንቹ ግቤች ፋልተን «ሰሞኔ» ዩኖ ቀሬን ባድ መንቹን ደቀንት ኢስ መሰቀሊ ግዳን እጅሲሶኡ።

33 እሰን «ጎልጎተ» ዩኖቤቹ ኢልቶኡ፤ «ጎልጎተ» ዩ «ቡዕል ቁሊ ቤቹ» ዩሃን።

34 ህከኔን ደምብቹ ልቃለቀሞ ሞይን ጠጀ አጎተ ኢሲሃ ኣቶኡ፤ እኮጎሬ እሰ ቀመሽ ለዕይ አጉ ግቦ።

27:8 ሰቀ. 1፡18-19። 27:10 ዘካ. 11፡12-13፤ ኤር. 32፡6-15። * 27:16 ልግቡ ክታባት ባርባኔ የኖሃ፡- ኢስ ባርባሲት ይታኦ። 27:24 ዘዳ. 21፡6-9። 27:34 መዝ. 69፡21።

- 35 ኢስ ሰቀልቶች ኤተሮግ ኦድኑስ እጠ ኤጅት ቤቀንቶኤ።
- 36 እስን ህክኔ አፋዕልት አገርታሲት እቅ።
- 37 «ኩን አይሁድዮ ዋመ ኢሳት» ዬኖ ከሰሶ ጠወ ከተብ ቡዕልስ አሌ አዲን አፋሽቶኤ።
- 38 ኢሲን ሜጡብ ለሙ ወንበድት ሙቴስ ሙኬ አዲን ሙቴስ ጉረ አዲን ሰቀለንቶ እቅ።
- 39 መዲንከስ ህጋ ሙኑ ህንቅ ቡዕላስ ሌንቀቅሰን
- 40 «አት ዲእ ሞኒ ድጅት ሰቅ በር እጃርታንቲሁ ህንዳ ገወክ ጡምሰ፤ መገን ቤቱ እኩንትጎሪ ህንዳ መሰቀሊች ድር» ይተን ቀለዲሲት እቅ።
- 41 ህትን ቂስ አዋንሳኑት፣ ሕግ አሰተማረትለከ ባድ ባልቀት ቀለደን
- 42 «ዋሉ ሙን ፊሾ፤ ጠወ እኩጎሪ ገወሰ ጡምሶተ አታሎበእ፤ እስ እሰራኤል ዋመ እኩጎሪ ህንዳ መሰቀሊች ድሩን፤ ነኩሁ አመዕንና።
- 43 ሕን መገንዮ ቤቱ» ይ መገናን አመዕንዮኡ፤ ህካን እኩቤቹዮ መገኑ እሱ እትዮሰጎሪ ህንዳ ቴሱ ፊሱንሰ» ይቶኤ።
- 44 ህትን እሲን ሜጡብ ሰቀለንቶ ዋንበድት ህትን ይተን ቦሮርታሲት እቅ።

ኢስ ሬዮገ

(ማር. 15፥33-41፤ ሉቃ. 23፥44-49፤ ያህ. 19፥28-30)

- 45 ሊሆ ሰኣቲች ኬሽ ሆንሱ ሰኣት ኢሊ ኤለት ቱንሰቹ እኩኤ።
- 46 ሆንሱ ሰኣት ጌሳን ኢስ ሎረ ላጋን «ኤሎሄ! ኤሎሄ! ላማ ሰበቅታኒ?» ይ ያር፤ ህት ዩ «ኢ መገና! ኢ መገና! ሚሃ አጉርቴኤ?» ዩን።
- 47 ህክኔ ኡርቶ መኒች ሙት.ሙቱ ሙኑ ህካን ሞጮጭት «ኩ መንቹ አልያሴ ገእናት» ይቶኤ።
- 48 ህከ ወክት አሳች ሙቱ ደጉጅ ሆሊጮ ወይን ጥጢን ጨፍ ሾሞቦቆን አዕይ ኢስ አጎተ አፊሰበ ሸቅ አዕዮ።
- 49 ዋሉስ «አገር ህንዳ እልያሰ አሜች ፊሰናሰ ጎሪ ለዕናም» ይቶኤ።
- 50 ኢስ ለንኪሃ ሎረ ላጋን ያር ነብሳሰ ህግሽ ኣሴእ።
- 51 መገን ምኒን ሰቀሊሙ መጋረጂ አሊች ኡለተ ኢሊ ለሙ አደ እክ ፊልተዕዮ፤ ኡለት ሌንቀቅቶኤ፤ ክኩንኩ ጦጭ ፊልተዕዮ።
- 52 ህትን ሎዲ ፈንተዕያን ዋዕነ ሬቶ ጠሊሊ መኒች ልገቡስ ሬሆች ኬኤኤ።
- 53 እስን ሎዲች ፋልት ኢስ ሬሆች ኬዕዮች ኤተሮግ ዬሩሳሌም ከተመ ኣግ ልግብዮ መኒሃ ለልቶኤ።
- 54 ጥቤ ሀለቁለከ እሲን ሜጡብ ኢስ አገርተን ሄኑ ሙኑ ኡለት ሌንቀቁለከ እኩስ ጠወ ጉዕመንከ ለኦ ወክት አበ ዋጅት «ህንቅንከ ኩን መገንያ ቤቱ እቅ» ይቶኤ።
- 55 ህክኔን ልገቡ ሜንቱ ቁዕራሻን ኡርት ለኣኢት እቅ፤ እስን ገሊላች ጀመርት ኢስ ሀዕልተን አዋንተን ሄኑአረ።
- 56 ህከን ሜንቲን ሜጡብ መግደል ከተሞ መርዮሙ፣ ያቁብለከ ዩሱፍ አመት መርዮመለከ ዘብደሲ ኦሶ አመት ሄኑ እቅ።

ኢስ ሞገሙሰ

(ማር. 15፥42-47፤ ሉቃ. 23፥50-56፤ ያህ. 19፥38-42)

- 57 ኡለት ሀዋርቶ ወክት አርማትይ ከተሞ «ዩሱፈ» ዬኖ ሙቱ ቀባጣሙ መንቹ ህከ ቤቹ አሜኛ፤ እስን ኢሰዮ አሳቤቹ እቅ።
- 58 ሁኩ መንቹ ኢስ ጀናዘተ ኣሶሰተ ጵላጦሴ ኡጩሃን ኣሶናሰተ አዘዘ።
- 59 ዩሱፍ ኢስ ጀናዘተ ኣእ ነጠ ጥጥ ጋቤን ከፈኝ
- 60 ገይሃስ ክኒች መክሾ ሃዕር ሎድ ኣዘን ኢስ ጀናዘተ አፋሽ ሎድስ አፎን ሎረ ክኑ ኮሎንኮዕልሽ ጡፎች ኤተሮግ ኦርዕዮ።
- 61 ህከኔን መግደል ከተሞ መርዮመለከ ዋልት መርዮሙ ሎድ ብራን አፋዕልቶ እቅ።
- 62 ህከ ለንክ ፎሎጭ በር ቂስ አዋንሳኑትለከ ፈርሳውት ሜጡብ ጵላጦሴቤቹ መርት
- 63 «ቀርኛ! ሁኩ ሉሲሰሮሁ ሬሁዕናን ሄጭ ሰሶ በራች ኤተሮግ ሬሆች ኬኣም ዬ ጠዉ ቃገሞኤ።
- 64 ህካን እኩቤቹሃ ኢስ አሳበት መርት ሞገታበእገ ሬሆች ኬዕዮኡ ይት መኒሃ ኩልታበእገ ሎደሰ ሰቅ በር ኢሊ አገርታገ አዘዘ፤ ህካን እህባች ወኔሰ ሉጩንሺች ኤተርሰ ሉጩንሹ ባሾሃ እህሮ» ይቶኤ።
- 65 ጵላጦሰ «አገርታ ዋታደሩ ዮህዕኔ፤ መርቴን ደጌንጎተ ሃሌን አገርሲሼ» ዬሰ።
- 66 ህካን እኩቤቹሃ እስ ሎድስ መርት ሎድ አፎን ዮ ክኖን ማተቢን አሸግ ዋታደራን አገርሲሶኤ።

28

ኢስ ሬሆች ኬዕዮገ

(ማር. 16፥1-10፤ ሉቃ. 24፥1-12፤ ያህ. 20፥1-10)

1 አበ በሩ * ህጎች ኤተሮን ሳምንትሰ ዎኔ በሬን ኡለት ሶዘን መግደል ከተሞ መርየመለከ ዎልት መርየመ ሎደ ለአተ መርቶኡ።

2 ህከ ወክት እቡ ኡለ ለንቁቁ እኮ፤ ቀርች መላይኬቹ ሰሜች አሜች ሎድ ኡሩተ ጡፊመ ክኑ ፈኝ ጎንብሽ አሌሰ አፋዕሌኦ።

3 መላይኬቹስ ክልቀቱ ጉገኛገ ዮአሃ እቅ፤ ኦድኑሰ በረድገ ዎጁተ እቅ።

4 አገርታሩንኩ መላይኬቹ ዎጅት ሁጦኡ፤ ሬዮ መንገን እኮኡ።

5 ጠዉ እኮጎሬ መላይኬቹ ማንቱ «አዕኑ ሰቀሌመ ኢስ ሀሴንተገ ደጋሞቤቹሃ ዎጅቶኖቹ።

6 እስ ወዕና ዬገን ሬሆች ኬዕዮኡ፤ ከንቤቸን ዮበኢ፤ ጀናዘሰ አፋሺመ ቤቹ አሚ ለዕዬ።

7 ቴሱ ደዕልቲን መርቴን አሳባተሰ «ኢስ ሬሆች ኬዕዮኡ፤ ክዕኔተ ሃጭ ገሊሊተ ኦርእኖ፤ ህከኔ እሱ ለኤንተ» ይቲን ኩሌሰ፤ ሁኩዕኑን ኩሎንክዕኔ» ዬሰ።

8 ሀከኒቺች ኤተሮን እሰ ዎጅተንለከ አበ ሙንዲኖን አሳባተሰ ኩልቶተ ሎድቢች ደዕልት ደጉድ መርቶኡ።

9 ኢስ አሳን ደቀሞ «ወገሬቱ ክዕኔሃ እሁን!» ዬሰ፤ እሰን እሰበ ሆንጠክ ሎክሰ ኡብ ሰገዶኡ።

10 ህከ ወክት ኢስ «ዎጅቶኖቹ! መርቴን አመኤ ኦሱት ገሊሊተ ህጋገ ኩሊ፤ ኤሳሃ ህከኔ ለአኤ» ዬሰ።

11 ማንቱንኩ መርተን ሄኦገን ሁኩዕኑን! ዘበኛኖች መት-መቱ ዎታደሩ ከተመ መርት እኮ ጠወ ጉዕመንከ ቂሰ አዎንሳኖተ ኩልቶኡ።

12 ቂሰ አዎንሳኑት ባድ ባልቂን ጭምይት አማዕለንት ዎታደሪሃ ልግብ ብረ አት

13 «መኒሃ ሳኤ ግንሰምእኔን ሀንከዕሬን አዎናኑሰ አሜት ሞግት መሰቶኡ» ይቲን ኩሊ።

14 ከ ጠወ ባድ ገሻንቹ ሞጮጭ ጎሬ ክዕኔ አሌን ኦርሸት አሚታበአገ ነኤ ጠወሰ ብዝ አዕን ኩልናንሰ» ይቶኡ።

15 ህካን እኮቤቹሃ ዎታደሩ ብረሰ ቶግ ይቶሰገን አቶኡ፤ ሁኩ ጠወ ከበሬ ኢላ አይሁድ በላን ጠወአመኖት።

ኢስ አሳባተሰ ለሉሰ

(ማር. 16፥14-18፤ ሉቃ. 24፥36-49፤ ያህ. 20፥19-23፤ ሶቀ. 1፥6-8፤ 1 ቆር. 15፥3-8)

16 ቶን መቱንኩ አሳበት ኢስ መርቶተ አዘኮገን ገሊሊ ባድን ዮ ቆተቤቹ መርቶኡ።

17 እሰን ለኦሰ ወክት ሰገደሰ፤ እኮጎሬ መት-መቱሰ ሸክቶኡ።

18 ኢሰን እሰበ ሆንጠክ «ዎልቀት ጉዕመንኩ ሰማንለከ ኡላን ኤሳሃ አሰንቶኡ።

19 ቴሱ መንቤቹ ጉዕመንከ መርቴን እንኤ ሱዕሚኒ፤ ቤት ሱዕሚኒለከ ጠሊሊ አያን ሱዕሚኒ ጠመቁንን አዎናኑኤ አዕዬ።

20 አዘኮገንክዕኔሃ ጉዕመንከ አገርታገ ተማርሰዬ፤ እን ዘማን መጨረሽ ኢላ ጉዕመንከ ወክት ክዕኔን ሚጡብ አሃሞ» ዬሰ።

* 28:1 ፎሎጭ በሩ- የኖሁ ከንቤቸን ፎሎጭ በር የመሞሁ ሆኖቹታት። 28:19 ሶቀ. 1፥8።

ማርቆስ ከተባሃ ቀርቶ መሲህ ኢስ እንጂሊ ኣኑስ

ማርቆስ እንጂሊ «ከን መገን ቤተ መሲህ ኢስ ተሸት ላገ ዎኔሃን» የን ጀመረኛ፤ ከን እንጂሊ ኣዜን ኢስ ሆሳለክ ሹምነቱ የሰ መንቹ እክ ሆንጠኮኤ፤ ሹምነቱስ ትምርቲንከሲ ሩሃንይ አሌን የሰ ዎልቃንለከ መን ጨብ ፈቅን የንከስ ለልዮኡ። ኢስ «መን ጨብ ርስማች ነጠ ፋሾተ ነብሳኤ ህግሽ አሶተ አሜቾም መንቶሃ ቤቱ» ይ ገዉንኩስ ጠወዕዮኡ።

ማርቆስ ኢስ ሄሱተ ሆንጠህሾሁ ጌጥዬለክ ዎልቀተ ዊሞ ዎቁን አህን ጠረኝሾንኩ ኢስ ላጋንለከ ትምርቲንከስ አሁዕን አዕዮ አጀብሲሰኛ ጠዊንት እቅ። ጠመቃንቾ ያህይ ሄሱተ ኢስ ጠመቀሙሰለክ ፊተነሙስ ገበንቹ ኣኑ አዕዮች ኤተሮን ከተቦሁ ኢስ ተማርሰለክ ፈይሰ ክድመተ ሂር ኩለኛ። ወክቲቶ ኤተሮን ኢስ አሳባት ኢስ ዎዕኔቶ አበ ደገን መርቶ ቁድሬን ኢስ ግባእሩ በትስ ግበንሰ መርቶኡ። ጎፍሜ ፎሎጭ አሌን ኢስ ጎፍሜ ሳምንት ኣዜን እኮ ጠውተኔሃ ባትሽ ሰቀለሙሰለክ ኬኡስ ኩልታአራን። እንጂሊ ጎፍሞን ቀቦን ለልቶ ለሙ ክፍሉ መት-መቶ ከተበንቶ መጻፋን ጠለዕል ሄኣእራን።

መጻፍስ አፎሃ

- እንጂሊስ ዎኔሃ (1፡1-13)
- ኢስ ክድመስ ገሊላን ጀመሩስ (1፡14—9፡50)
- ዬሩሳሌማን ካደሙስ (10፡1-52)
- ዬሩሳሌማንለክ አዘጋገኸከስ ጎፍሜ ሳምንተ (11፡1—15፡47)
- ቀርቹ ሬሆች ኬኡስ (16፡1-8)
- ሬሆች ኬዕዮ ቀርቹ ለሉሰለክ ሰማ ኦርኡስ (16፡9-20)

ጠመቃንቹ ያህይ አዋጄገ
(ማቶ. 3፡1-12፤ ሉቃ. 3፡1-18፤ ያህ. 1፡19-28)

- 1 ከን መገን ቤቲ * መሲህ ኢስ እንጂሊሃ ዎኔሃን።
- 2 ነብዬቾ አስያሲን

«መገቲ አን ወዕቃክ ቅጥአእኛ
ሰቀማንቹኤ ብሬንከክ ሄጭ ሶሃም» ዬአ።

- 3 ሁኩንን፡-
- ቀርቶ ወቃሃ ቅጥአዕዬ፤
- ጭርቲን ጌጥ አዕዬ» የን
- ኡሊ ኡድማን ላገሰ ጎት አዕይ ያረኛ መንቶ ላገተ»

የመሞ ከተበሞጋት።
4 ህካን እኮቤቹሃ ጠመቃንቹ ያህይ «ጨብክዕኔ ፈቅን የመሞተ ቶብቲን ጠመቀሜ» የን አዋጀን ኡሊ ኡድመ አሜቾ።

5 ይሁድ ባዶንለክ ዬሩሳሌም ከተማን ሄዕዮ መኑ ጉዕሙንኩ አሜት ጨብሰ ቶብተን የርዳዳሰ ዛዘኛ ዋን ጠመቀኛት እቅ።

6 ህካን ያህይ ጋሜል ኦርዛች ደዴማ ኦድኑተ ኦደዕይ ረመዞንከስ ጠፍራ ቆዕረኛ እቅ፤ እስን ከንቸፈሩሃ፡ ኡድም ዳመ መለቡሃ አተኛ እቅ።

- 7 እስን «አን ሙግይ ጫዕመስ ወደሩ ሂሮተ በቀዕባሁ ኢች በተአኖሁ ኢች ኤተሪን አሜተኛ፤
- 8 ህትን እን ዊን ጠመቆንክዕኔ፤ ጠዉ እኮጎሬ አስ ጠሊሊ አያኒን ጠመቀኖህዕኔ» የን አዋጀኛ እቅ።

ኢስ ጠመቀሙሰለክ ፊተነሙስ
(ማቶ. 3፡13-17፤ 4፡1-11፤ ሉቃ. 3፡21-22፤ 4፡1-13)

9 ህከ ወክት ኢስ ገሊል ባዶን ሄዕዮ ናዝሬት ከተሚች አሜቻን ያህይ የርዳዳሰ ዛዘኛ ዋን ጠመቆስ።

10 ወክትንከስ ኢስ ዊች ፋሎ ወክት ሰሞ ፊልተዕይ ፈንተዕያን ጠሊሉ አያኑ ህንደዕሬገ እክ አስ አሊን ድረንሰ ለዕዮ።

- 11 ህከ ወክት «ኢታንኬ ቤቱኤ እቲት ኪን ተሽ የኖኤ» ይታ ላገት ሰሜች አሜቶኡ።
- 12 ወክትንከስ መገን አያኑ ኢስ ኡሊ ኡድመ ኦርአኖገ አዕዮስ።

* 1:1 መት-መቱ ከታበት «መገን ቤቱ» ይታ ላገተ በርግታበኡ። 1:2 ሚኪ. 3፡1። 1:3 አሊ. 40፡3። 1:6 2 ሃገ. 1፡8። 1:11 ክል. 22፡2፤ መዝ. 2፡7፤ አሊ. 2፡1፤ ማቶ. 3፡17፤ 12፡18፤ ማር. 9፡7፤ ሉቃ. 3፡22።

13 ህከን ኡላ ኡድማን ሸይጣኑ ኢስ ፊተኖተ አጸመን ሸይሉ በር ኢስ ኡብል ቡሳዊን ሜጡብ ዱንኬእ፤ ሰሜ መላይከንት ካደንቶስ።

ኢስ ተማርሰ ሆጉተ ገሊላን ጀመሩስ
(ማቶ. 4፡14-17፤ ሉቃ. 4፡14-15)

14 ያህይ ኡሴሬማች ኤተርን ኢስ መገን ተሸት ላገተ አዋጀን ገሊላተ አሜቸ።

15 እስን «ዘማኑ ጎፎእ፤ መገን ዋምነቱ ሆንጠኮቤቺሃ ጨብቶክዕኔ ፈንቀልቴን ተሸት ላገን አመዕንዬ» የኖት አቅ።

ኢስ ቁርጨጫተ ዋሻዳ ሾሉ መን ገኡስ
(ማቶ. 4፡18-22፤ ሉቃ. 5፡1-11)

16 እስን «ገሊላ» ዬኖ ባር መዳን ህገን ሰሞንለከ አመሰቤቱ እንድርያሴን ቁርጨጫተ ዋሻዳእራ እኮቤቺሃ ዋሻዳሳ ባር ኢሊን ኡጅተን ለዕዮስ።

17 እስንተ ኢስ «ኤሳሃ አዎኝ፤ አዕኑ ቁርጨጫተ ዋሻዳንተገን መን መገን አደ ኤቤነንተረ ኣሳንክዕኔ» ዬሰ።

18 ወክትንከሰ ወሻደሰ ኡጅት አዎንቶስ።

19 ኢስ ህከንቤቺቻ ቀውተ ህጎን ዘብዳዎሴ ኦሱት ያቀቢለከ ያህይ ጀልብስ ኢሊን አፋዕልት ወሻደሰ መክሰን ለዕዮ።

20 እስን ወክትንከሰ ገኤስ፤ እስን ያቀብ ያህይ አነሰ ዘብድዎሴለከ አኒሃሰ ሆጉተ አእኖ መነሃ ጀልብ አዘን አጉርት ኢስ አዎንቶስ።

ዱሩ እፎስ መንቼ ፈዩስ
(ሉቃ. 4፡31-37)

21 ኢስ አሳባንተሰን «ቅፍርናሆመ» ዬኖ ከተመ አሜች አበ በረን ጭምት ምኒ ተማርሱ ጀመር።

22 ኢስ ሕገ ተማርሰታህኑኡገ እሁዕን ሎሩ ሹምነቱ ዮሰ መንቻገ ተማርሰኖሃ ለእ ህከኔ ሄዕዮ መኑ ሞጮጭት ትምርቴንከሰ አበ አጀብሰጭቶኡ።

23-24 ጭምትሰ ምናንን መቱ ዶርረኖ እያኑ እፎስ መንቼ ሄዕዮ እቅ፤ እስን «ናዘሬት ኢስ! ኔሳለከ ኬሳሃ ም ደቀተሹ ዮኔ? ቤሶኔተ አሜትንደ? አት እዬት ጎሬ አን ደጋንኬ፤ አት መገንያ ጠሊሊ» የን ሎረ ላገን ያር።

25 ጠዉ እኮጎሬ ኢስን «ጨለይት እሲች ፋል» ይ ሻቆስ።

26 ሁኩ ዶርረኖ እያኑ ህከ መንቼ መቱ ጌሰ ከጣቀንሴሲች ኤተርን ሎረ ላገን ያረን እሲችን ፋሎ።

27 ህከኔ ሄዕዮ መኑ ጉዕሙንኩ «ኩን መርቻሃን? ዶርርታ ዱራከተ ሹምነቱንከሰ ተማርሰሃን አዘዘንታሰ» ይተን አጀብሰጭት መቱ መቱስ ጠዕምቶኡ።

28 ህከ ወክትንከ ዱዱቡስ ገሊላ ባደን ጉዕማንን ሞጮጬሞ።

ኢስ ልግብ ጥዘናመተ ፈይሱስ
(ማቶ. 8፡14-17፤ ሉቃ. 4፡38-41)

29 ህከኒች ኤተርን ኢስ ያቀብንለከ ያህይን ሜጡብ ጭምት ምኒች ፋል ሲሞኔለከ እንድርያሴ ምኒ አጎ።

30 ህከኔን ሰሞኔ በሉት ፋረ ደሙሜን አበ ጥዘ አሰኑ እቅ፤ እሴ ጥዘገ ወክትንከሰ ኢሲሃ ኩለሞስ።

31 ኢስን እንገሴ አፍ ኬሻንሴ ፋረ ደሙሜ ጥዘናችሴ ፈይቶኡ፤ እሴን ኬእ አሰንተ ካደንቶስ።

32 ህከ በር አሩ አገን ሀዋርዮ ወክቴን መኑ ጥዘናመተለከ ሩሃንዬን አፈንቶረ ጉዕመንከ ኢስበ ኤባኢት አቅ።

33 ከተሞሰ መኑ ጉዕሙንኩ ህከን ኡርን ጭምይቶኡ።

34 ኢስን ልግብ መን አደደ ጥዘናች ፈይሾ፤ ልግብ ሩሃንዮንከ 4ሾእ፤ ልግቡ ሩሃንዮንኩ ኢስ እዬት ጎር ደጎሰቤቺሃ ኢስ ጠወኑት ፈቀጀሰበ አቅ።

ኢስ ገሊላን ተማርሱስ
(ሉቃ. 4፡42-44)

35 ኢስ ሶዘተ ሆንጠኮ ወክቴን ኬዕይ መኑ ዮብእቤቹ መር ህከን ቤቻን ዱእ አዕዮ።

36 ጠዉ እኮጎሬ ሰሞንለከ እሲን ሜጡብ ሂኦኦሩ ኢስ ሀሶተ ፋልቶኡ።

37 እስን ደጎሰ ወክት «መኑ ጉዕሙንኩ ኬሳሃ ሀሰኖሄት» ይቶሰ።

38 ኢስን «ወዕናንከ አሜቻሚሁ ተማርሰተ እኮቤቺሃ ግደኖ ዮ ቀኒተ መርን ህከኔ ተማርሰኖ» ዬሰ።

39 ህካን እኮቤቺሃ ጭምትሰ ምናን ዱዱብሰንለከ ሩሃንዮ 4ሾን ገሊላ ባደን ዮ ጉዕሙ ቤቹንከ ፈንቀላመኖ አቅ።

ኢስ ጎግ አል ጥዘነተ ፈይሱስ
(ማቶ. 8፡1-4፤ ሉቃ. 5፡12-17)

40 ጎግ አል ጥዘነተ ጥዦ መንቹ ኢስበ አሜች ሎከስ አሌን ኡብ «ኢትቶንቴኤ ጎሬ ፈይሶኤተ አታልታንት» ይ ኤጩቡ።

41 ኢስን አበ መረርሰጭ እንገስ አሌስ አዕይ «ፈቀጃም ፈይ» ይኡ።

42 ወክትንከስ ጎግ አል ጥዘነት ገፈርታንስ ፈይኡ።

43-44 ኢስን ህከ መንቹ «ከ ጠወሃ አይሃ ጠወኢንትበአገ አገዕር፤ ጠወ እኮጎሬ ሎረ ቂስኝበ መርት ጅሰመክ ለሊሰ፤ መሰንትስ ኦት ነጠ እክ ፈይቶንትገ መኑ ደጎተ ሙስ አዘዦገን መገኒሃ ክትም ሆንጠህሰ» ይ አዘዦ።

45 ጠወ እኮጎሬ ሁኩ መንቹ ጠወስ ወክትንከስ መኒሃ ጠወኤ ጀመር፤ ህከን መንቹ መሳን ኢስ ከተማን ለል ፈንቀላምተ አታሉ ሆጎቤቹሃ ከተሚች ኡብሊን መኑ ዮበአቤቾን ሄአና እቅ፤ ህካን እኮቤቹሃ መኑ እሰዮቤቹ ጉዕመ ቤቹኝን አሜተኖ እቅ።

2

ኢስ ናፈ መንቹ ፈይሱስ
(ማቶ. 9፡1-8፤ ሉቃ. 5፡17-26)

1 ቀዎ በሬች ኤተርን ኢስ ቅፍርናሆም ከተመ ፈንቀል አሜቹ፤ ህከን ቤቾን «ኢስ ምኔን ዮኤ» ይኖ ዲዲቡ ሞጮጩ።

2 ህከ ወክት ልግቡ መኑ ኢስ ዮ ሞኒ ኡሩት ሩክታኢሃ ኢሊ ጭምዬእ፤ ህከኔን ኢስ መገን ላገተ ተማርሰኖሳት እቅ።

3 ህከ ወክት መቱ ናፈ መንቹ ሾሉ መኑ እጅት ኤቦኤ።

4 ጠወ እኮጎሬ መኑ በተዕዮቤቹሃ ህከ ናፈ መንቹ ኢስበ ሆንጠህሰተ ቤቹ ሩከሰቤቹሃ ኢስ ዮ አዲን ሞኒ እልተ ፈንት ናፈ ኦስዕዮ ዳሰንከሰን ደርሶኤ።

5 ኢስን አመዕነቱስ ለዕይ ናፈ መንቹ «ኢ ጩሌ ጩቡክ ፈቀን የማምሄ» ይሰ።

6-7 ህከኔ አፋዕልቶ ሕግ አስተማራች መት-መቱስ ቀልቤንከስ «ኩ መንቹ ሚሃት ህትኔ ቦርሮ ላገተ መገን አሊን ጠወአኖሁ? ሚጡወ መገን ቤሉ ጩብ አጉርተ አታለኖሁ አይት?» ይት ሰውይቶኤ።

8 ወክትንከስ ኢስ ቀልብስ ጠወ አያኒንከስ ደግ «ሚሃት ቀልቤንከስከዕኔ ካን ሰውይቱንገታሁ?»

9 ናፈ መንቹ «ጩቡክ አጉረሞሄ» ይቹለከ ሕኤ ዳሰክ እጅት ኦርኤ» ይቹ ህከንስ ቆሆኖ?

10 ጠው እኮጎሬ መንቹ ቤቱ ኡሊ አሊን ጩብ ፈቀን ዮተ ሹምገቱ ዮሲሃ አሁስ ደጌ» ይ ናፈ መንቹ

11 «ከኢ ዳሰክ እጅት ሞንክ ኦርኤ ያንኩ» ይሰ።

12 ናፋንኩ ወክትንከስ ዳሰ እጅ መን ብሬን ፋሎ፤ ህካን እኮቤቹሃ መኑ ጉዕመንኩ እጀብሲጭ «ህትኔ ጠወ ሆርን ለዕኖምበእ» ይት መገኑ ገለትጭቶኤ።

ኢስ ማቶሴ ይኖ ሊዌ ገኡስ
(ማቶ. 9፡9-13፤ ሉቃ. 5፡27-32)

13 ኢስ ፈንቀል ገሊሊ ባር መድ ኦርዕዮ፤ ልግቡ መኑ እስበ አሜታን ተማርሴስ።

14 ህከን አዲን ህገን አሊፍዮሴ ቤቱ ሌው ቀረጠ ሙረን ለዕይ «አምኤኤ» ይሰ፤ እስን ኬዕይ አዎኛሰ።

15 ህከ ወክት ኢስ አዎኛ መኒች ልግቡስ ቀረጠ ሙርታሁኤንገለክ ጩበኛኖን ጉዕመንኩ ኢስንገለክ አሳባን ሚጡብ እክ ሊዌ ምኔን እቸተ አታኢት እቅ።

16 ፈሪሳዌ አዲች ሕግ አስተማረት ኢስ ቀረጠ ሙርታሁኤንገለክ ጩበኛኖን ሚጡብ እተን ለእ «ጩበኛኖለክ ቀረጠ ሙርታሁኤን እተኖሁ ሚሃት» ይት አሳበሰ ጠዕምቶስ።

17 ኢስን ህካን ሞጮጭ «ህከሙ ሀሰሰኖሁ ጥዘናማታት ቤሉ ፈዮ መኒሃበክ፤ እን አሜቻሚሁ ጠሊላትተ እሁዕነ ጩበኛኖተ ገኡታት» ይሰ።

ሶመንትኔሃ ኢስ ጠዕሚመገ
(ማቶ. 9፡14-17፤ ሉቃ. 5፡33-39)

18 ጠመቃንቹ ያህይ አዎንታአሩለክ ፈርሳውት ሶመንታ እቅ፤ ህካን እኮቤቹሃ መቱ-መቱ መኑ ኢስበ አሜት «ጠመቃንቹ ያህይለክ ፈርሳዊተ አዎንታአሩ ሶመንታ፤ ጠወ እኮጎሬ ኪ አሳበት ሶመንታበኢሁ ሚሃት?» ይት ጠዕምቶኤ።

19 ህከ ወክት ኢስን እዜቹ አሳን ሚጡብ ሄኒን ጀለሰ ሶመንቶተ ሀሰሰኖሰንዶ? ሀሰሰኖሰበክ፤ እዜቹ አሳን ሚጡብ ሄዕዮጎ ሶመንታበክ።

20 ጠወ እኮጎሬ «እዜቹ አሳች ኣኤኖ በሩ አሜተኖ፤ እስን ህከ ወክት ሶመንታኤ።

21 «ኑባጵቶ ኦድኖን ሃዕሮ ቃፈተ ቃፈኖሁ ዮበክ፤ ጠወ እኮጎሬ ህካን አዕዮ ጎሬ ሃዕሮ ቃፈት ኑባጵቶ ኦድኖተ ሁዙዝ ፍልታክ፤ ሁኩ ፍልተዕዮ ቤቹንኩ ወዕኔች ባሰ አህኖ።

22 ህትን ኑባቻ ሆቆማዶን ሃዕሮ ቃርቡተ ፋሽኖሁ ዮበአ፤ ህካን እኤመ ጎራ ቃርቡት ሆቆማዶ ፊልታኢ፤ ህትን ቃርቡንት ዱንተኣእ፤ ሆቆማዶንኩ ፊልተኣኖ፤ ጠዉ እኩጎራ ሃዕሮ ቃርቡተ ሃዕሮ ሆቆማዶን ዎሩ ሀሲሰኖ» ዬሰ።

እበ በሬተኔሃ ሆንጠኮ ጠዕምቱተ
(ማቶ. 12፡1-8፤ ሉቃ. 6፡1-5)

23 እበ በሬን ኢስ አዎንታኣሩ አለሰ ዉጠ በሊን ህገን አዎንታኣሩ አለሰ ሀማሙተ ተንቅሱ ጀመርቶኡ።

24 ህከ ወክት ፈርሳውት ኢስ «ከ ለእ! ከሳሃ አዎንታኣሩ እበ በሬን እኡ ፈቀደንባሃ ማሃት አታኢሁ?» ይት ጠዕምቶኡ።

25-26 ኢስን « ኣብያተሬ» ዬኖ መንቹ ሎረ ቂሰቹ እከ ሄዕዮ ወክት ደዉድለከ ደዉዴን ሜጡበ ሄኦ ሙኑ ጎሩ አፋንሰ ኦርጨቀንቶ ወክት ደዉድ ዱአ ሞኒ ኣጎ ሎረ ቂሰ ቤሉ ዎሉ ሙኑ አቱ ፈቀደሞበእ መገን የመንቶ ዱቡተ እቸገለከ እሲን ሜጡበ ዮ መኒሃ ኣሴጋ ኣነበቤንታበእንዶ?

27 ህትን እበ በሩ መኒሃ ከለቀሞ ቤሉ ሙኑ እበ በሬተ ከለቀሞበእ።

28 ህካን እኮቤቹሃ መንቹ ቤቱ እበ በሬተ ቀርቾሃ» ዬእ።

3

ኢስ እንገተ ናፈ መንቹ ፈይሱስ
(ማቶ. 12፡9-14፤ ሉቃ. 6፡6-11)

1 ለንኪሃ ኢስ ጭምት ሞኒ ኣጎ፤ ህከኔን እንገተ ናፋ መንቹ ሄዕዮ እቅ።

2 ጠዉ እኩጎራ ኢስ ከሰሶተ ሀሶ ሙኑ «እበ በሬን ፈይሰኖ ጎራ ለዕናም» ይት አገርታኢት እቅ።

3 ኢስን ህከ እንገተ ናፈ መንቹ «አም ከን በላን ኡር» ዬሰ።

4 ህከኒቶ ኤተሮን ኢስ «እበ በሬን ጡመ ህከረንገ ሂለ እኡ ፈቀደሞኡ? ፎል ጡምሱንዶ ህከረንገ ፎል ቤሱ?» ይ ጠዕሜሰ፤ ጠዉ እኩጎራ ኢስ ጨለ ይቶኡ።

5 ኢስን ቀልብሰ ዱድሙተ ለዕይ እበ ሻቸዮ መዴሰ ዮ መን ኡሙዕሬን ለዕይ ህከ እንገተ ናፈ መንቹ «እንገክ ሂር» ዬሰ፤ እሰን እንገተ ሂር ወክት እንገሰ ፈይቶኡ።

6 ወክትንከሰ ፈርሳውት ጭምት ሞኒቶ ፋልት ኢስ ሀት አት ሸቶተ አታልታ ጎራ ሄርድሴን ሜጡበ ዮ መኒን አማዕለንቶኡ።

እሙቱ ባር መዴን ኢስበ ጭምይቶን

7-8 ኢስ አሳባንተሰን ሜጡበ ገሊሊ ባርበ ኦርዕዮ፤ ኢስ አዕዮ አጀብሲሰኖ ጠወ ሞጭጭቶ ወክት ልግቡ ሙኑ አዎቹሰ፤ አዎንቶሩንኩ ገሊል ባዲቶ፤ ይሁድ ባዲቶ፤ ኤዶምየ ባዲቶ፤ ዮርዳኖስ ዉድ እዲን ዮ ባዲቶ፤ ህትን ዬሩሰለም ከተሚቶ፤ ጢሮስ ከተሚቶለከ ሰዶን ከተሚቶ አሜቶዕረ እቅ።

9 ሙኑ በተዕዮቤቹሃ ህንበዕለመን ሃሙ ከመኖሰበእገ ጀልበ ቅጥኣቶተ አዎናኑስ ኣዘኩ።

10 ልግብ መን ጥዘናቶ ፈይሾቤቹሃ ጥዘናን ኦርጨቀንታሩ ጉዕሙንኩ እንጋን አፎሰተ ህንበዕለንታ እቅ።

11 ዶሮርታ ኣያናከት እሱ ለኦ ወክት ብሬሰ ኡብ «አት መገንያ ቤቱ» ይተን ያርታ እቅ።

12 ጠዉ እኩጎራ ኢስ ገዉሰ እዬት ጎራ ኩልታበእገ ጠረኣሽ ኣዘኩሰ።

ኢስ ቶን ለሙ አሳበተ መጠሩስ
(ማቶ. 10፡1-4፤ ሉቃ. 6፡12-16)

13 ኢስ ቆተ አል ፋሎ ወክት እሰ ሀሾሰረ እሰበ ገኤእ፤ እሰን እሰበ አሜቶኡ።

14-15 እሰን እሰን ሜጡበ ሄኦታ፤ ተሸት ላገተ ተማርሰቶተ ሶህሰተለከ ሩሃንዮ ፋሽታ ሹምነቱ ኣሶተ ቶና ለሙንከሰ መጠር አሳበተ ይ ሱዕምሾሰ።

16 እሰን መጠሮስ ቶን ለሙንኩ አሳበት ከኵኡታን «ጴጥርሴ» ይ ሱዕመ ፋሼ ሰሞኒ፤

17 «ጦኣርኔኔስ» ህከረንገ «ጉገኛ ኦሱተ» ይ ሱዕምሾሰ ዘብዳዎሴ ኦሱት ያቀባትለከ ያህይት፤

18 እንድርያሴት፤ ፍልጶሴት፤ ባርቶሎሞሴት፤ ማቶሴት፤ ቶማሴት፤ አልፍዮሴ ቤቱ ያቀባት፤ ታዶሴት፤ ባዲስ ኢተኖ ሰሞኔት።

19 ኢስ ህግሽ ኣሴ አስቆርቶ ይሁዲቲ እቅ።

ኢስለከ ብዔልዘቡለ
(ማቶ. 12፡22-32፤ ሉቃ. 11፡14-23፤ 12፡10)

20 ኢስ ሞኒ ኦርዕያን ልግቡ ሙኑ ለንኪሃ ጭምይት አሜቶኡ፤ ህካን እኮቤቹሃ ኢስለከ አሳበት አቸተ አታ ወክቱ ዮሰበእ እቅ።

- 21 «ኢሰ በርገሳኤ» ዩኖሃ እሉሰ ሞጮጭቶ ወክት እሱ አሮተ አሜቶኤ።
- 22 ዩሩሳሌሚች አሜቶ ሕግ አስተማሪት «እሱ ብዔልዘቡል አፎሰ፤ እሰ ሩሃንዮ ፋሸኖሁ ህከን ሩሃንይ ሞሞ ብዔልዘቡል ወልቃኒት» ይታ አቅ።
- 23 ኢሰን አሰንተ እሰበ ገእ ሞሳሌን «ሼይጣኑ ሀት አዕይ ሼይጣን ፋሸተ አታለኖ?
- 24 መቱ ሞሙ ገሸኖ መኑ ገጣዊንኩሰን አደ እክ ብተመኖሃ እኮች ሁኩ ሞሙ ሀት እክ ጠረኝ ኡርተ አታለኖ?
- 25 ሀትን መቶ ሞኔን ሄአኖ መኑ ብተንት ሀት እክ ጠረኝት ሄተ አታልታኑ?
- 26 ህካን እኮች ሼይጣኑ ገጣዊ አደ እክ ብተመኖሃ እኮች በአኖ ቤሉ ጠረኝ ሄተ አታለኖበኤ።
- 27 «ሀትን መቶ ጠረኝ መንች ሞኒ ኣጌን ቦሳኖተ ሄጩን ህከ ጠረኝ መንች ኡሱሮኑዕን ሞንሰ ኣጌን ቦሳኖተ አታለኖበኤ።
- 28 ሀንቅንከ ያንክዕኔ፤ ኡመቱ አታ ጨቡለከ ጠወኣ ቦሮር ላገት ጉዕሙንኩ ፈቁን የመመኖሰ።
- 29 ሀንቅ እኮሳሬ ጠሊሊ ኣያን ኣሌን ቦሮር ላገተ ጠወኣኖህን ኣሌን ጉዕማንን ዘላለሚሃ መገን ኡሙዕርት ኣሌሰ እካ ቤሉ ጨቡሰ ማረመኖሰበኤ» ዩሰ።
- 30 ኢሰ ህካን ጠወዕኖሁ «ዱሩ አፎሰ» ይቶ መሳኒት አቅ።

ኢሰ አመተለከ አመሰ ኦሱተ
(ማቶ. 12፥46-50፤ ሉቃ. 8፥19-21)

- 31 ኢሰ አመተለከ አመሰኦሱት አሜት ኡብሌን ኡርት እሰበ መን ቦክ ገእሲሶሰ፤
- 32 ኢሰ መዴን ልግቡ መኑ አፋዕልኖ እቅ፤ እሰን «አመክለከ አመክ ኦሱት ኡብሌን ኡርት ኬሳሃ ሀሳሃት» ይት ኩልቶሰ።
- 33 እሰን «አመኡለከ አመኤ ኦሱት አዩኤታን?» ይ መሰለ ፈንቀሼሰ።
- 34 ኢሰን መዴሰ አፋዕልኖሁ አደ ለእን «አመኡለከ አመኤ ኦሱት ከኑኤታን።
- 35 መገን ሰውት አአኖ እዩሁ እኮጎር ኤሳሃ አመዕያ ቤቱ፤ አመኤተ ቤቱለከ አመተኤ» ዩእ።

4

ዉጣንች ሞሳልተ
(ማቶ. 13፥10-17፤ ሉቃ. 8፥4-8)

- 1 ኢሰ ለንኪሃ ገሊሊ ባር መዴን ተማርሱ ጀመሮ፤ ልግቡ መኑ እሰቤቾን ጭምይታን እሰ ባር ኣሌን ዮ ጀልባን ኣግ አፋዕሌእ፤ ሀትን ልግቡ መኑ ባር መዴን ሄዕኖ እቅ፤
- 2 ህከኔን ኢሰ ሞሳሌን ልግብርቹ ተማርሰኖት እቅ፤ ተማርሰንን
- 3 «ሞጮጭዬ! መቱ እቡራንቹ ዜሬተ አፍ ዉጦተ ፋሎ።
- 4 ዜሬተ ዉጠንን መት-መቱሰ ሞቄ ኣሌን ኡባን ጨኤት አሜት እቶኤ።
- 5 ሀትን ሞሉ ዜሬቱ ልግቡ ትቡ ዮበእቤቾን ክን ኣሌን ኡብ ደዕልን ሙቾ፤ መሰንትሰ ቤቾንከሰ ኣዝ አሊ ልግቡ ትቡ ዮበእ እቅ።
- 6 ሁኩንን አሩ ፋል ቀሾረ ቆር፤ ሀትን ሙቾንኩ ጠጰ ዮሰበእቤቹሃ ሞሎ።
- 7 ሞሉሰ ዜሬቱ ኡቱ ጭምዬ በላን ኡቦ፤ ኡቱንኩ ነጵ ለንግ አፎሰቤቹሃ አቶተ አቶቱዕን ፈቆ።
- 8 ሀትን ሞሉሰ ዜሬቱ ጡመ ኡላን ኡብ ሙቾ፤ ሙቾንኩ ነጵ አቶተ አቶቾ፤ ሁኩንን መቱሰ ሰጂ ሞሉሰንገ ሌሃዉ ፈቆሲሁ ጥብተ አቶቾ» ዩእ።
- 9 ኢሰን «ሞጮጭታ መጨት ዮሲሁ ሞጮጩን!» ዩእ።

ኢሰ ሞሳሌን ሚሃ ጠወዕኖ ጎር
(ማቶ. 13፥10-17፤ ሉቃ. 8፥9-10)

- 10 ኢሰ ሚጥህሰ ሄዕኖ ወክት መዴንከሰ ሄኦ መኑለከ ቶኖ ለሙንኩ ኣሳበት ሚጡብ ሞሳሌሰ ፍሳረተ ጠዕምቶሰ።
- 11 እሰን «ክዕኔሃ መገን ሞምነትሰ ሞሰጥር ደጎኖተ ኣሰሞህዕኔ፤ ጠዉ እኮሳሬ ኣብሌን ዮሁኤተ ጉዕሙ ጠዉንኩ ሞሳሌን ኩለመኖሰ።
- 12 ህካን እኮቤቹሃ
- « ኣሰ መገን አደ ፈንቀልቶ እቃ መገኑ ጨብሰ እኩረኖሰ እቅ፤
- ጠው እኮሳሬ እሰን ለእን ለኣኣሃ ደጋበእ፤ ሀትን ሞጮጭተን ሰዉ ይት ኣአታበኤ » ዩሰ።

ዉጣንች ሞሳሌ ፍሳረተ
(ማቶ. 13፥18-23፤ ሉቃ. 8፥11-15)

13 ኢሰን «ክዕኔሃ ት ሞሳልት ኣጎሀሀይበእንደ? ህከረ ዋልት ሞሳልተ ሀት ኦቲን ኦጥራመቶናተ ኦታልቲንን?

14 ዉጠኖሁ መገን ላገተ ኩለኖሃን።

15 ሁኩ ዎቄ ገበላን ኡቦ ዜሬቱ ለሊሰኖሁ ላገሰ ሞጮጬኑሃ መነ፤ እሰን ሞጮጭቶ መገን ላገተ ሹይጣኑ ኣሚኛ ቀልብኛሰ መጭ መሰኖ።

16 ህትን ሁኩ ክን ኣሌን ኡቦ ዜሬቱ መገን ላገተ ኩለንታ ወክት ተሸቲን ደዕል ቶገኖ መነ ኣጉደኖ።

17 ጠዉ እኩጎሬ እሰን ወክትሃሲት ቤሉ ጠጹ ዮሰበእቤቺሃ ጠረኝት ኡርታበኣ፤ ህከን ላገ መሳን መት ኦሪሸት ህከረንገ ቶቶሙ ኣሚኛ ወክት ደዕልት ቆዕልት ኡባኣ።

18 ህትን ሞሉንገ ጭምዬ ኡት በላን ኡቦ ዜሬትጋት፤ እሰን ላገሰ ሞጮጭታእሃ መነ፤

19 ጠዉ እኩጎሬ ከን ኣዲንያ ኣል ሻዘነት፣ ዲንያተ ኢቱሁ ዎሉ ልግብርቺ ሃዕላቱ ቀልብሰ ኣዘ ኣግ ህከ መገን ላገተ ለንግ ኣፋን ኣቶቲዕነ ፈቆኤ።

20 ጠዉ እኩጎሬ ጡሙ ኡላን ዉጠሞ ዜሬቱ ለሊሰኖሁ መገን ላገተ ሞጮጭት ቶጋእሃ መነ፤ ሁኩ መኑንኩ መቱሰ ሰጂ መቱንገ ሌሃዉ ሞሉንገ ጥብተ ኣቶተኖ» ዩኣ።

መብራቱ ለሊሰኖሁ ኑር ኣሲሃ እሁሰ

(ሉቃ. 8፡16-18)

21 ለንኪሃ ኢሰ ፈንቀሽ «መኑ ኩራዘ ኣፍሲሽ ሰቀሌኖ ቤኛን ኣፋሹ ኣጉር ዛሌ ኣዜን ህከረንገ ሀንሸሪኛ ዎሮን ኣፋሸኖንደ?

22 ህትን ህኩ ማጠሞርቺ ለሉዕነ ህትን ኣፍሰሞርቺ ፈንተኡዕናን ፈቀኖበኣ።

23 ሞጮጭታ መጨት ዮሲሁ ዮጎሬ ሞጮጬን» ዩሰ።

24 ኢሰን «ሞጮጭቲንጋታ ጉዕመንከ ኣገዕርዬ፤ ኣዕኑ ዎሉ መናን ፈረዴንተገን ክዕኔ ኣሌን ፈረደመኖ፤ በትሽን በርገመኖህዕኔ።

25 ዮሲህኒሃ ኣሰመኖሰ፤ ጠዉ እኩጎሬ ዮሰበእህኒኛ ሁኩ ዮሲንኩ ኣእመኖሰ» ዩኣ።

ዜሬት ነጽ ሞሳልተ

26 ህከኒኛ ኤተሮን ኢሰ «መገን ዎምነቱ ኡለ ኣሌን ዜሬተ ዉጠተ ፉሎ መንቺ ኣጉደኖ።

27 ሁኩ ዜሬተ ዉጮ መንቺንኩ ሀንከዕርተ ኦሰኣኖ፤ ሶዦ ወክት ኦሶኛ ከኣኖ፤ ሁኩ ዉጠሞ ዜሬቱ ሀት ኣሀኖጎሬ ዲንኑዕናን ሙኛ ነጻኖ።

28 ኡለት ገይንትሴ ህከ ሙተ ነሰታኣ፤ ህከኒኛ ኤተሮን ሀበረ ኤበኖገ ኣታኣ፤ ህከ ሀበረ ነሰቶኛ ኤተሮን ኣቶተ ኣቶተኖገ ኣታኣ።

29 ዉጠት ኢልቶ ወክት ወክቱሰ ዉጠተ ጭም ኣኤኖ ወክት እኮቤቺሃ መንቺሰ ዘዘረተ ቅጥ ኣዕይ ሞደኖ» ዩኣ።

ዎንጌ ዜሬት ሞሳልተ

(ማቶ. 13፡31-34፤ ሉቃ. 13፡18-19)

30 ኢሰን «መገን ዎምነቱ መርቺን ቅጥ ኣዕናም? ህትን መ ሞሳሊን ሂርን ጠወዕናም?

31 መገን ጃንቱ ዎንጌ ኣልተ ኣጉዳኣ፤ እሰን ዉጠንጋ ወክት ኡለ ኣሌን ዮ ዜሬቲኛ ጉዕሚኛን በትሰ ቀዎታን።

32 ጠዉ እኩጎሬ ሁኩ ዜሬቲንኩ ዉጠሞኛ ኤተሮን ነጽ ጋሮን ካሴመሀኒኛ ጉዕሚኛን በተኣኖሃ ኣሀኖ፤ ቅራዕሩ ሀመ ነሰኖ፤ ህካን እኮቤቺሃ ሰሜ ጨኤት ምኒ መክሰ እሰ ኣሌን ሂኣኣ» ዩሰ።

33 ኢሰን መኑ ሰውዩ ኣታልታገ ካን ኣጉዳ ልግቤ ሞሳሊን ላገሰ ኩለኖሳት ኣቅ።

34 እሰን ሞሳልተ ዮበኢሃ መቱርቺሃ ጠወዕኖሰበኣ፤ ጠዉ እኩጎሬ እሰን ኣሳባን ሀለኛሰ ሂኦ ወክቲን ጉዕመርቺንከ ሂር ኩለኖሰ ኣቅ።

ኢሰ ዊ ሁለ ጨለ ኣኡሰ

(ማቶ. 8፡23-27፤ ሉቃ. 8፡22-25)

35 ህከ በር ሀዎራ ወክት ኢሰ ኣሳበሰ «ከን ሎሪ ዊኛ ዉድ ኣደ ቶልኖ» ዩሰ።

36 እሰን ህከኔ ዮ መነ ኣጉርት ኢሰ ዮ ጀልባን ኣግ ኢሰ ኣኣት መርቶኡ፤ ህከ ወክትንከ ዎሉ ጀልቡ ኣሳን ሜጡብ ሃዕዮ ኣቅ።

37 ድንገቲን ጠረኛ ቡብሩ ዊ ኣሌን ኬዕዮ፤ ዊ ሁሉንኩ ጀልብ ካጸለከ ከበ ሀንበላን ዊ ጀልብ ኣዜን ዊሞተ ኣኮ።

38 ህከ ወክትንከ ኢሰ ጀልብ ኣዜን ኤተር ኣዲን ቦርከዕይ ግሾ ኣቅ፤ ኣሳበሰ ኣሉ ግሰኛኛ በቅኣት «ኣሰተማርኛ! ነኡ በዕንን ኣት ሀት ጨለ ይቶንት?» ይቶሰ።

39 እሰን ኬዕይ ቡብረንከ ሻቆ፤ ዊ ሁለንከ «ጨለይ» ዩኣ፤ ቡብረንኩ ኣጉር፤ ኣበንከ ጨለ ዩኣ።

40 ኢሰን «ሚሃት ዋጅ-ቴነንታሁ? ቴሁ አመዕነቱ የህዕኔበእንደ?» ይሰ።

41 እሰን አበ ዋጅት መት-መቴሰ «ጠረኙ ቦ-ብሩለከ ዊ ሁሉ እዘዘመናሲሁ ኩን ሀትናሙ-ወ መንቸ?» የቀንቶኦ።

5

ኢሰ ዱሪን አፈንቶ ለሙ መነ ፈይሱሰ
(ግጥ. 8፡28-34፤ ሉቃ. 8፡26-39)

1 ሀከኒች ኤተሮን ኢሰ አሳባንተሰን ገሊ.ለ ባረ ቶልት «ጌርጌሴናን» ይኖ ባዱ ኢልቶኦ።

2 ኢሰ ጀልባን ፋሎገን ደርረኛ አያኑ አፋንሰ ሎደቤቸን ሄኦና መንቸ ወክትንከሰ ሀከን አዲች ፋል ደቀሞሰ።

3 ሁኩ መንቸንኩ ሎደ እዘን ሄኦና እቅ፤ ሀከ ወክት አይሁ እሱ ሰንሰለተን ኡሱሮተ አታለናበአ እቅ።

4 ልግብ ወክት እንገሰለከ ሎከሰ ኡሱሪኛ ወክት እሰ ሀከን ጉዕመንከሰ ሙረንሰና እቅ፤ ሀከን አኮቤቸሃ አይሁ እሱ እፍ ኡሱሮተ አታለናበአ።

5 ሀትን እሰ ጉዕመ ወክት ሀዋሩተለከ በራሃ ሎዱለከ ቆተቲ የቤቸን ዘሀን አልሰ ክኒን ሀንፈጠን ያረኛ እቅ።

6 እሰን ኢሰ ቁዕራሻን ለዕዮ ወክት ደጉጅ አሜች ብረሰ ጉልጽ ሰገጅ።

7 ሀትን ሎረ ላጋን ያረን «አት ጉዕሚችን ሎረ መገን ቤቶ ኢሰ! ኤሳለከ ኬሳሃ ሞ ደቀንሹ የኔ? እን ከች መገናን መገኛየንኬ ቤሶቴኤ» ይእ።

8 ሀት የተ አታሎንኩ ኢሰ «ኩ ደርርታንት ዱሩ ከን መንቸች ፋል» ይ እዘተቤቸሃት እቅ።

9 ኢሰን ሱዕሙክ አይት? ይ ጠዕሜሰ፤ እሰን «ናኑ ልግብ እንኮሞቤቸሃ ሱዕሙኤ ሌጌዎኔት»* ይ ፈንቀሼእ።

10 እሰን ሀከን ባዲች ፋሽ ሸረኛሰበእገ ኢሰ ጠረኝሽ ኤጩሰ።

11 ሀከን ቆሮ መዳን ልግቡ ቦኬ መሰረት ዘግ ይት አታኢት እቅ።

12 ሁኩ ደርረኛ አያኑንኩ «ሀዕይ ሀከን ቦኬ መሰረን አንጋሞገ አእኔ» ይት ኢሰ ኡሞቶሰ።

13 ኢሰ «መርቴን እኔ» ይሰ፤ ሁኩ ደርረኛ አያኑ ሀከን መንቸች ፋልት ቦኬ መሰረን አጎኤ፤ ሀከኒች ኤተሮን ለሞተ ኩሞተ እካ ቦኬ መሰረት ቆሮ መዲች ደጉደን ሎረ ባራን አእንቶኦ።

14 ሀከን ቦኬ ዘሚግት ሁንት ከተማንለከ ሀከን ባደን ሄኦና መኒሃ ጠዕሰ ኩልቶኦ፤ መኑንኩ እኮ ጠወ ለኦት አሜቶኦ።

15 እሰን ኢሰበ አሜት ደርረኛ አያኑ እረሰሃ፤ ለጌዎንን ሄዕዮሰ መንቸ ፈይ ኦድኑተ ኦደዕይ አፋዕልያን ለኦ ወክት ጉዕሙንኩሰ ዋጅቶኦ።

16 ኢሰ ደርረኛ አያኑ ሀከን መንቸች ፋሽንለከ ደርረኛ አያኑንኩ ቦከን አገን ወዕና ሀከን ቤቸን ሄኦ ለኦሩ እኮ ጠወ ጉዕሙንከ መኒሃ ኩልቶኦ።

17 ሀከን አኮቤቸሃ ሀከን ባድ መኑ ኢሰ ሀከን ባዲች ፋል ኦርአናገ ኡሞቶሰ።

18 ኢሰ ጀልባን አገን ሩሃንዩ አፋንሰ ፈዬ መንቸ ኢሰ «አን ከን ሜጡብ ኦርአም» ይ ኡጩሰ።

19 ጠወ እኮጎሪ ኢሰ «አን ሜጡብ መርታንትበእ፤ ሞንክ መርት ቀርቸ ሄንከ ሎረ ጠወ አዕዮሄ ጎሪ ሀትን ሀት አዕይ ፈይሾሃጎሪ ሞንክ መኒሃለከ አልሀክ ጠወእ» ይሰ።

20 ሁኩ መንቸ ኢሰ አዕዮሰ ጠወ «ቶኑ ከተመ» ይኖ ባደን ጉዕማንን አዋጁ ጃመር፤ ጠወሰ ሞጮጭቶ መኑ ጉዕሙንኩ እጅብሲጭቶኦ።

ኢያኢሮሴ ጨልተለከ ኢሰ ኦድኑተ ኡልቶ መንቸተ
(ግጥ. 9፡18-26፤ ሉቃ. 8፡40-56)

21 ኢሰ ጀልባን ኣግ ባር ዉድ አደ ፈንቀል ቶሎገን ልግቡ መኑ እሰ መዳን ጭምዬእ፤ ሀከ ወክት ኢሰ ባር መዳን ሄዕዮ እቅ።

22 ሀከኔ ጭምት ሞኒ ገሽታሁኑኦች መቼሰ «ኢያኢሮሴ» ይኖ መንቸ አሜች ኢሰ ለዕዮ ወክት ሎከሰ አሌን ኡብ

23 «ኢ ቀዉት ጨልኤ አበ ጥዞኤ፤ አት አሜት ጡምቶተለከ ፎልን ሄኑተ እሴ አሌን አንገክ አእ» ይ ኢሰ ጠረኝሽ ኡጩእ።

24 ኢሰን እሰን ሜጡብ ኦርዕዮ፤ ሀከ ወክት ልግቡ መኑ ኢሰ አዎንን ከን አዲንለከ ካጽ አዲን ሀንበዕላንተን ሃሙ ከንት ጨነቃሲት እቅ።

25 ሀከን መን በላን ቶን ለሞ ዘማን ጌሰ ቁጉ ዲንተአንሴ ኦርጨቀንተን ሄኦ መት መንቸት ሄኦ እቅ።

26 እሰን ሐኪሚች ሐኪመ ልግብ ወክት ፈንቀላንት ዱንያሴ ጉዕመንከ ሹልቶ እቅ፤ ጠወ እኮጎሪ ባሾሴ ቤሉ መቱርቸሃ ደግለሎሴበአ እቅ።

* 5:9 ለጌዎኔት- የ ጎተ ሀከረንገ ልግብ የሃን።

27-28 እሴን ሙኑ ኢሰተኔሃ ጠወአኖ ዱዱቤ ሞጮጭቶቤቺሃ ሀንበሰለመኖ መን በሊን ኤተር አዲን አሜት ኦድኑስ ኦልቶኡ፤ ሀካን አቶኢሁ ቀልቤንከሴ «እን እስ ኦድኑተ ኡሎም አቃ ፈያም» ይታ አመዕነቱ ሃዕዮሴ አቅ።

29 ሀከ ወክትንከ ቁጉ ዱንተኡ አጉርሴ፤ እሴን ጥዘናችሁ ፈዩሴ ጅስሚንከሴ ደገኡ።

30 ኢሰን ወልቀት አሲች ፋልቶገ ደገሴቺሃ መን አደ ዘሀ ለዕይ «አይት ኦድኑአ ኡሎሁ?» ይ ጠዕሜሰ።

31 አሳበሰ «አት ኪንኩ ሙኑ ሀንበሰለመን አዎንኖሄ ለአን ሀት ላይት ኡሎኤሁ» ይተን» ይቶሰ።

32 ጠወ አኮገሬ ኢሰ ሀካን አዕዮሁ አይት ጎሬ ለአተ ዘሀ ለዕዮ።

33 ህት መንቸት አኮ ጠወ ደገሴቺሃ ዋጅት ሁጠን ሎከሰ ኡብ ክዘቡዕነ ሀንቅ አኮ ጠወ ጉዕመንከ ኩልቶኡ።

34 ኢሰን አሴተ «ኢ ቤቶ አመዕነቱክ ፋይሾሄ ወገሬቲን መር፤ ጥዘናችክ ፈይ» ይሴ።

35 ኢሰ ሀካን ጠወአን ሃዕዮገን ጭምት ምኒ ሀለቅቶ ምኒ ሶቀንት አሜቶ መናከት ጭምት ምኒ ሀለቅቸ «ጨልክ ሬቶኡ፤ ቴሱ አስተማርቸ ሚሃት ኦርሳንትሲሁ?» ይቶሰ።

36 ጠወ አኮገሬ ኢሰ እሰ ይታ ጠወ ሞጮጭ ጭምት ምኒ ሀለቅቸ «አመዕን ቤሉ ዋጅቶት» ይሴ።

37 ህትን ኢሰ ጴጥርሴቸለከ ያቁበች፤ ያቁብ አመቤቱ ያህይ ቤሉ አይሁ አዎኖስተ ፈቀጀበአ።

38 ኢሰን ጭምት ምኒ ሀለቅቶ ኢያኢርሴ ምኒ ኢሊ ወክት ሀከን ምኒን ሙኑ ያረንለከ ኦኦን ጨንጭተን ለዕዮ።

39 ኢሰን ምኒ አግ «ሚሃት ያርቴንገታሁለከ ኦኤንገታሁ? ጨልት ግሶ ቤሉ ሬቶበአ» ይሴ።

40 እሰን እሰን አበ ኦስዕልቶኡ፤ ጠወ አኮገሬ እሰንተ ኡብል ፋሽ ጨሌ አነለከ አመተ አሲን ሜጡበ ሄኦአጅ አዎንሰ ጨልት ዮ ቤቸ አገ።

41 ኢሰን ሀተን ጨሌ አንገተ አፍ «ጣሊታ ቀሚ!» ይሴ፤ ፍሳረሰ «ቴ ጨሌ ኪአ» ይሃን።

42 ጨልንት ቶን ለሞ ዘማገተ ጨል አቅ፤ ወክትንከሰ ኡርት ከበለከ ካጸ አከን ፈንቀላንቶኡ፤ ሀከኔ ሄኦ ሙኑ ከ ጠወ ለኦ ወክት አጀብሲጭቶኡ።

43 ሀከ ወክት ኢሰ ከ ጠወ አይሃ ጠወአበአገ ጠረኝሽ ኩል «ጨሌተ አታኢሃ ኣሰዬ» ይሴ።

6

ናዘሬት ሙኑ ኢሰ ቶጉ ግቡሰ

(ማቶ. 13፡53-58፤ ሉቃ. 4፡16-30)

1 ኢሰ ሀከንቤቺች ፋል ገይሰ ባዱ አሳባንተሰን ሚጡብ አሚቸ።

2 ሀከኔን ኢሰ አበ በሬን ጭምት ምኒን ተማርሱ ጀመር፤ ሀከኔ እሰ ተማርሰኖሃ ሞጮጭቶ ኢመቱ አበ አጀብሲጭት ገጣሃኩሰን «ኩ መንቸ ከ ጠወሃ ጉዕመንከ ሀከኔ ደኤአ? ህትኔ ሀይመት ኣሰንቶሰ? ህትኔ አጀብሲሰኖ ጠወ አእኖሁ ህትጎታን?» ይተን አጀብሲጭታ አቅ።

3 ሀከኒች ኤተርን «እሰ ማሪሪመ ቤቱ አነጤቸሃበአንደ? ያቁቤሃ፡ ዮሳ፡ ይሁዲለከ ሰምዕኔሃ አመ ቤቱበአንደ? ሜኣ አመሰ ኦሱንት ከኔ ኒን ሚጡብ ዮአገርበአንደ?» ይተን ህንቅ ቶጉዕናንሰ ፈቆኡ።

4 አኮገሬ ኢሰ አሰንተ «ነቢዬቸ ዎሎ ባደን ኬዕምሴናሰ፤ ጠወ አኮገሬ ገይሰ ባድ ሙኑሁ፡ ገይሰ አሉለክ ገይሰ ምኒ ሙኑ ህንቀኖሰ» ይኢ።

5 ሀከኔ ሄኦ ቀዎ ጥዘናመ አሉን አንገተ አዕይ ፈይሰቤሉ ዎሎ አጀብሲሰኖ ጠወሃ አአተ አታሎበአ፤

6 ጠወ አኮገሬ ኤመቱ አመዕነቱዕነ ፈቆቤቺሃ አበ ቦርረንቶኡ፤ ሀከኒች ኤተርን ኢሰ ቀኤች ቀአተ ዘሀን ተማርሰኖ አቅ።

ቶና ለሙንኩ አሳበት ተማርሲሃ ሶሀሙሰ

(ማቶ. 10፡5-15፤ ሉቃ. 9፡1-6)

7 እሰን ቶን ለሙንኩ አሳበት እሰበ ገአ ለሙ ለሙ አዕይ ዶርረኖ ዱር ፋሽታ ሹምነቱ ኣሰ ሶኩሰ።

8 እሰን እሰንተ «ዎቃ ሃንተን በርት ቤሉ አቴኖሃ አኮ ኢቶንከሰ ብረሊከ ከረጥተት አፋበአገ አዘኮሰ።

9 ሎካንከክዕኔ ጫዕመተ ወዕርዬ ቤሉ ለሙ ዎልት ኦድኑተ ኦደኦኖቼ» ይሴ።

10 ህትን እሰ «አዕኑ መርቴንገተ ቤቸን መቱ ምኒ ኣኒንገተ ወክት ሀከ ቤቸ አጉርቴን ፋልቶኖተ ኢሊ ሀከን ምኒን አገሬ።

11 መርቴንተ ቤቸን ጉዕማንን ሀበይ ወገሬቲን አሚቱን ዩን ቶጉለከ ሞጮጭ ግቤመሀዕነጎሬ አዕኑ ሎከክዕኔ ትበ ሀከኔ ግግሽቲን አጉርቴን ፋሌ፤ ሁኩ ትቡንኩ አሳሃ አማን አሀኖ» ይ ኩሎሰ። *

12 እሰን መርት ሙኑ ጨብቶሰ ፈንቀልት ቶበታገ ዱዱብሰቶኡ።

6:4 ያሁ. 4፡44። 6:8 ሉቃ. 10፡4-11። * 6:11 ግዕዝ ሃዕር ወኣድ ላገት 1947 ማርቶ ዘማንኒ ከተበሞህ አሚረኝ ጠሊሉ መጻፋ ከኒች ዎር ኢዲን ከተበሞሃ በርገኖ። «ሀንቅንከ ያንክዕኔ፤ ሀከን ከተም ፍርዲቶ ሶዳምለከ ጎሞር ከተሚሃ ፍርድ በር ቆህናሰ።» ጠወ አኮገሬ ኩ ሰውቱ እኩስ ገሪክ መጻፍ ኣዚኒ ደገመናበኢ።

13 ሆኑን እስን ልግብ ሩሃንና ፉሽቶኤ፤ ጥዘናመ አሉን ዘይተ ቡርተን ልግብ ጥዘናመተ ፈይሶኤ።

ጠመቃንቹ ያህይ ሺመሰገ
(ማቶ. 14፡1-12፤ ሉቃ. 9፡7-9)

14 እሷ ሱዕሙ ጉዕሙ ባደንን ደገሞቤቸውን ዋሙ ሄሮድስ እስተኔሃ ሞጮጩኤ፤ ሆኑን መት-መቱ መኑ «ጠመቃንቹ ያህይ ሬሆች ኬዕዮኡ፤ ሆኑን እኮቤቸውን ከ አጀብሲሰና ጠወ አኦና ወልቀተ ደኤኤ» ይታ አቅ።

15 ዋሉ መኑ «አልያሴት» ይታአት እቅ፤ ሆኑን ፈቆ መኑ «ሄጭት ሄኑ ነቢያናች መትሰጋት» ይታ አቅ።

16 ጠወ እኮጎሬ ሄሮድስ ሆኑን ጉዕመንከ ሞጮጭ «አን ጎበሰ ሙርሲሾም ጠመቃንቹ ያህይ ሬሆች ኬዕዮኤ» ይሉ።

17-18 ሄሮድስ አመሰ ቤት ፍልጻሴ ጫተ ሄሮድያደ አኤቤቸውን ያህይ «አመክ ቤት ጫተ አኤ ኬሳሃ ፈቀደሞሃበእ!» ይ ጠወዕዮቤቸውን ሄሮድስ ሶክ አፍሲሾ ያህይ ኡሱርሲሾ አቅ።

19 ሆኑን እኮቤቸውን ሄሮድያደ ያህይን ገዱተ እፍ ሽሲሶሰተ ሀሳኤት እቅ፤ ጠወ እኮጎሬ ሽሲሶሰተ አታልቶበእ።

20 መሰንትሰ ያህይ ፈየ መንቹለከ ጠሊሊ መገን መንቹ አሁሰ ሄሮድስ ደገናቤቸውን ዋጅ አገረኖሰ እቅ፤ ሆኑን እስን ያህይ ጠወአና ጠወ ሞጮጩ ወክት ባበና እቅ፤ ጠወ እኮጎሬ ሙጎደዕይ ሞጮጩኖሰ እቅ።

21 ሄሮድስን አለሞ በሬ ከበጃት ከበጃሃ ባድ ገሻትተለከ ገሊሊ ሎርሎረ መነ ጉዕመንከ ድግሰ ድግሽ ገኤእ፤ ሆኑ በሩ ሄሮድያደ ያህይ ሽሲሶሰተ መኩተ እኮሴ።

22 ሆኑ በርጎክ ሄሮድያደ ቤቱት መኑ ጭምዬ ምኒ አግ ሶሎቸ ከደን ሄሮድሴለከ እሲን ሜጡብ ሄዕዮ ኮሀ ሙንዲሲሶኤ፤ ሆኑን እኮቤቸውን ዋሙ ሀተ ጨልተ «አት ኢትጎትጎት ጉዕመንከ ጠዕሜኤ፤ ኣሳንኬ» ይሉ።

23 «ሆር ዋሞንትኤ ደሩ እኮጎሬ አት ይቶንቲሃ ጉዕመንከ ኣሳንኬ» ይ ጤሌዕሌእ።

24 እሴን አመሴቤቹ መርት «መ ኣሴኤ ዩ?» ይት አመሴ ጠዕምቶ ወክት «ጠመቃንቹ ያህይ ቡዕላ ኣሴኤ» ይ ይቶሴ።

25 ጨልጎት ደዕልት ወምባ አግ «ጠመቃንቹ ያህይ ቡዕላ ሳናን እኤን ቴሱ ኣሶናኤተ ሀሳም» ይቶኤ።

26 ዋሙ ሆኑን ጠሞን አበ ሻኩ፤ አሁን ቤሉ ጤሌዕሌቤቸውን እሲን ሜጡብ ሄኑ ኮሀተኔሃ ጠዕምቶኢሀ ከሞተ ሆሾበእ።

27 ሆኑን እኮቤቸውን ሆኑ ወክት ዋሙ ወታደሪች መቱ ያህይ ቡዕላ ሙር ኤበኖገ ኡሱር ምኒ ሶኮ፤ ወታደሮቹንኩ ኡሱር ምኒ መር ያህይ ቡዕላ ሙር።

28 ሙር ኤቦ ቡዕላንከ ጨሌተ ሳናን አዕይ ኣሴሴ። ጨልጎት መሰት አማተሴ ኣቶኤ።

29 ያህይ አምንታእሩ ሆኑን ሞጮጭት ኡሱር ምኒ አሜት ጀናዘሰ መሰት ሞጎኤ።

ኢሰ ኦንቶ ኩሜ መኒሃ እትሱሰ
(ማቶ. 14፡13-21፤ ሉቃ. 9፡10-17፤ ያህ. 6፡1-14)

30 ሶቀማኑት ሶሀንቶ አዲች ፈንቀልት ኢሰ ብሬን ጭምዶቶኤ፤ ተማርሰቶኢሃለከ አቶኢሃ ጉዕመንከ እሲሃ ኩልቶኤ።

31 ኢሰን እስንተ «አዕት ሜጥሃክዕኔ መርቲን መኑ ዮበእቤቸውን ቀዉ ጌሰ ፎሎጭ ይሰ» ሆኑን ይኢሁ እሰበ አሜተኖሀለከ መረኖሁ ልግብ እኮቤቸውን እቸተ አታ ወክቱ ዮሰበእቤቸውን እቅ።

32 ሆኑን እኮቤቸውን እሰ ሜጥሀሰ ጀልባን አግ መኑ ዮበእቤቹ መርቶኤ።

33 ጠወ እኮጎሬ እሰ መርተንን ልግቡ መኑ ለዕይ እስተ አሁሰ ደግ ከተሚች ጉዕሚችን ደዕልት ፋልት ሎካን ደጉደን ሄጭት ቤቹሰ ኢልቶኤ።

34 ሆኑን ቤቸን ኢሰ ጀልቤች ድረን ልግብ መነ ለዕዮ፤ መኑንኩ ዜማንቹ ዮሰበእ ሆለገ እካን ለዕይ አበ መረርሲጩሰ፤ ሆኑን ልግብ ጠወ ተማርሱ ጀመር።

35 ሆኑን ኡለት ሀሞቶቤቸውን ኣሳበሰ እሰበ ሆንጠክ «ዮም ቤቹ ኡድመሃን፤ ወክቱሰ ሀሞርዮኤ፤

36 ሆኑን እኮቤቸውን አታኢሁ ዮሰበእቤቸውን ከን ቀኤን ዮ ገጠረለከ ኡሎሃ መርት እቸተ ገይሃሰ ሀዕርጎገ ከ መነ ሀርሲሰ» ይቶኤ።

37 ጠወ እኮጎሬ ኢሰ እሰንተ «ኩ መኑ አታኢሃ አዕት ኣሰዬሰ» ይሰ፤ እሰን «ሆኑን እኮች አታኢሃ ለሚ ጥቤ ዲናሪን ተ ሀዕርን ኣሰናሰንደ?» ይቶኤ።

38 ኢሰን ፈንቀሽ «ሆንዳ ሄንኩ ጣብቱ ዮሀዕኔጎሬ መርቲን ለእዬ» ይሰ፤ እሰን መርት ለእ «አንቱ ጣብቱለከ ለምት ቁርጩሜት ዮኔ» ይቶኤ።

39 ኢሰን ኣሳበሰ መነ ለቶ ሀጤ አሉን ቤቸን ቤቸን እፋሽጎታ እዘኩሰ።

40 ሆኑን እኮቤቸውን መኑሰ መት መቶ ቤቸን ጥብተ ጥብተ ሆኑን መት-መቶ ቤቸን ኦንታሁ ኦንታሁ እክ እፋዕልቶኤ።

41 ኢስን ኦገቱ ጣብታለክ ለም ቁርጩሜተ ኣእ ሰማ ዋሽ ለዕይ መገኑ ገለትጩእ፤ ህከኒች ኤተሮን ጣብተንከ ቤጭ መኒሃ ሆንጠሀሆተ ኣዋንታሀኡተ ኣሴእ፤ ህትን ለም ቁርጩሜተ መኒሃ ጉዕሚንከ ቤኮ።

42 መኑ ጉዕሙንኩ እች ዱሶ።

43 ኣሳበንት መን ብሬች ፈቆ ፋርፋሩለክ ቁርጩሜች ፈቆሃ ቶን ለሙ ሳጠራ ዊሞሃ ኬሶኡ።

44 እቸተ እች ጎን ዋሊንሹ ኦንቶ ኩሜ መን እቅ።

ኢስ ባር ኣሌን ሃሙስ
(ማቶ. 14፥22-33፤ ያህ. 6፥15-21)

45 ህከ ወክት ኢስ መን ሀርሲሰን ኣሳበሰ ጀልባን ኣግ ዉድ ኣደ «ቤተ ሳይዳ» ዬናቤቹ እሱ ሃጭት መርቶተ ኣዘዦሰ።

46 እስ መን ሀርሲሾች ኤተሮን ዱኣ ኣተ ቆተ ኣል ፋሎ።

47 ኡለት ሀዋርቶ ወክት ጀልባንኩ ባር በላን ሃዕዮ እቅ፤ ጠዉ እኮጎሬ ኢስ ሜጥሀሰ ኡለ ኣሌን ሃዕዮ እቅ።

48 ኣሳበሰ ብሬን ዊ ኣሌን ጠረኝ ቦብሩ ኬዕይ ጀልባ ብሬ ኣደ ዋሽ ሃሙ ከማን ኦርጩቀንተንን ኢስ ለዕዮሰ፤ ሁኩንን ሆንሲች ቶና ለም ሳኣት ጌሳን ባር ኣሌን ሃሙን እስ ኣድን ኣሜች ኣጉር ህጎታት እቅ።

49 ጠዉ እኮጎሬ እስ ባር ኣሌን ሃሙን ለእ ሀብተላት ኣጉጃንሰ ያርቶኡ።

50 ጉዕሙንኩ ለኦስ ወክት ህልቆኡ፤

ህከ ወክት ኢስ «ጠረኝዬ! ኣኔት! ዋጅቶኖቹ!» ዬሰ።

51 እስን ጀልባ ኣዝ እስበ ኣጎ ወክት ቦብሩንኩ ኣጉር፤ ኣሳበሰ ህከን ጠዋን ኣበ ኣጀብሰጭቶኡ።

52 እስ ቀልቡንኩ ዱጀሁ ወዕና ኢስ ኦንቶ ኩሜ መኒሃ ኦንቱ ጣብተ ኣትሾ ጠወ ሰውዬ ሆጎቤቹሃት እቅ።

ኢስ ጌንሴሬጣን ጥዘናመተ ፈይሱስ
(ማቶ. 14፥34-36)

53 ባሪች ቶልት «ጌንሴሬጠ» ዬኖ ባዱ ኢልቶኡ፤ ጀልባንከ ዊ ኣለች ኡለ መድ ሆንጠሀሰ ኡሱርቶኡ።

54 እስ ጀልቢች ፋልቶንን ኢስ እሀሰ መኑ ደጎ።

55 ህካን እኮቤቹሃ መኑ ህከን ቀኢን ሃዕዮ ኦሎ ጉዕመንከ ደጉደን መርት ኢስ ዮኡ ዬመ ቤቹ ጥዘናመተ ዳሲን እጅት ኤባኢት እቅ።

56 ኢስ ኦርዕዮ ቤቹ ጉዕመንከ ቀኤች፡ ከተሚችለክ ገጠሪች ጥዘናመተ ጉዕመንከ በነቻን ኢስ መድ ሆንጠሀሰን ኦድኖስ ሰኑተ ኡልቶተ ኡጭታኢት እቅ፤ ህትን ኢስ ኦድኖ ሰኑተ ኡልቶኡ ጉዕመንኩ ጥዘናችሰ ፈይታኢት እቅ።

7

ኣናኖ ዋገ
(ማቶ. 15፥1-9)

1 መት-መቱ ፈርሳውትለክ ዬሩሳሌሚች ኣሜቶ ሕግ እስተሚረት ኢስበ ኣሜት ጭምይቶኡ።

2 እርን ኢስ ኣሳበት መት-መቱስ ኣንገሰ ነጠ ኣቱዕነ ዩ ኣዕልቱዕነ ጣብተ እተን ለኦኡ።

3 ፈርሳውትለክ ኣይሁዱ ጉዕሙንኩ ባልቅ ዋገ ኣገርቶተ ኣንገሰ ኣዕልቱዕናን ኣታበኡ።

4 ህትን ጌቤች ፈንቀልት ኣሜታ ወክት ሃጭት ኣዕልቱዕናን ኣታበኡ፤ ኩባላክ ጀከ፡ ናስ ምዳኑተለክ መዕነተ፡ ልግብ ህትኔ ዋገ ኣገርታኣ እቅ።

5 ህካን እኮቤቹሃ ፈርሳውትለክ ሕግ ኣስተሚረት ኢስ «ኣሳበክ ባልቅ ዋገ ኣገር ግብ ኣንገሰ ኣዕልቱዕናን ጣብተ ኣታኢሁ ሚሃት?» ይት ጠዕምቶሰ።

6 ጠዉ እኮጎሬ ኢስ ኣሳንከ ፈንቀሽ «ክዕኔተኔሃ ራገን ኣዕኑ ኩ ለዕዬኔ ይጭንተህኡተ ነቢዬቹ እሰያሰ ጠወዕዮገን

« ኩ መኑ ኣፎንከሰ ኬዕምሰኖኤት ቤላ

ቀልቡስ ኢች ኣበ ቁዕርዮእሃን!

7 መሰንትሰ መን ትዛዝ ተማርሰተን ኤሳሃ ህትን ሰገዳኤት።

የመም ከተበሞ ራጉ ህንቅሃን።

8 ኣዕኑ መገን ትዛዝ ኣጉርቴን መን ዋገ ጠረኝሴን ኣገርቴንታኣ» ዬሰ።

9 ህትን ኢስ ኣሰንተ «ኣዕኑ ክዕኔ ዋገ ኣገርቶኖተ መገን ትዛዝ ኣጉርቴንታኣ።

10 መሰ ሕንክለክ ኣመክ ከበጅ፤ ህትን ኣዪሁ ኣንሰ ህከረንገ ኣመሰ ኣሌን ሂለ ጠወ ጠወኣኖኡሁ ሬሁን ይ ኣዘዦ።

- 11 ጠዉ እኩጎሬ እዕኑ ሙቱ መንቹ እነሰ ህከረንገ ኦመሰ ሕኒሃሰለክ ኦምተሰ እኡ ሀሰሰኖ ጠዉ ጉዕመንክ መገኒሃ ኣሰዮም። ዩህዕኔጎሬ
- 12 እነሰ ህከረንገ ኦመሰ ደግለሎበኦ ዩን ጠዕሚኖሰበኦ።
- 13 ከን ሃሌን ገይክዕኔ ዋገ ኣገርቶኖተ መገን ላገተ ድጅቴነጎታት፤ ህትን እዕኑ ህትኔ ልግብ ጠዉ ኦቴነጎታት» ዩሰ።

መነ ንጃሰሰኖ ጠዉ
(ማቶ. 15፥10-20)

- 14 ኢሰ ለንኪሃ ኡመትሰ እሰበ ገእ «እዕኑ ጉዕመንኩክዕኔ እን ጠዉእንክዕኔ ጠዉ ኣጥራመቴን ቶጊ።
- 15 መንቹ ንጃሰሰኖሁ ኣዚኛ ፋለኖሃ ጠዉ ቤሉ ኣብሊኛ ኣዝ ኣገናሁ መነ ንጃሰሰኖበኦ»
- 16 [ሞጮጭታ መጨት ዮሲሁ ኣዪሁ ሞጮጩን] ዩኦ። *
- 17 ኢሰ ኡመት ኣጉር ምኒ ኣጎ ወክት ኣሳበሰ እሰ ተማርሴ ሞሳሌተኔሃ ሂር ኩሎሰተ ጠዕምቶሰ።
- 18 ኢሰ እሰንተ «እዕኑ ቴሁ ካን ኣጥራመቴን ቶጊነንተበኦንዶ? ኣብሊኛ መነ ጎደባን ኣገናሁ ንጃሰሰኖበኦን ደጊነንተበኦንዶ?
- 19 መሰንትሰ ኦፊኛ ጎደባን ኣጎ ሹመተ እክ ፋለኖህን ቤሉ ቀልብብ ኦርኣኖበኦ» ዩሰ፤ ኢሰ ህካን ዩሰ ኦቶት ጉዕመንኩ ነጠ ዮሃንሰ።
- 20 ለንኪሃ ኢሰ «መነ ንጃሰሰኖሁ መነ ቀልቢኛ ፋለኖሃን።
- 21 ሁኩንን ሂሊ ሰውቴ፣ ሞጉ፣ ዝነት፣ መነ ሹ፣
- 22 ጎራመት፣ ሂለተ ሆጉተ ኦኡ፣ ጣንሱሁ፣ ሀሰገ እሁ፣ ሞቀቛመት፣ ሃምት፣ ቦኑለክ ዋንክዕሉሁ
- 23 ከን ጉዕመንኩ ሂሊ ጠዉ መነ ቀልቢኛ ፋለኖ፤ እሰን መነ ንጃሰሰኖሃን» ዩኦ።

መቴ መንቹ ኣመዕነቴ
(ማቶ. 15፥21-28)

- 24 ኢሰ ህከንቤኛኛ ኬዕይ ህከ ጢርሰ ባዱ ኦርዕዮ፤ ህከኔን ሙቱ ምኒ ኣጎ ህከኔ ሂኦሰ ኣዪሁ ሞጮጩኖበኦን ሀሹ፤ ጠዉ እኩጎሬ ህከኔ ማጠሞተ ኣታሎበኦ።
- 25 ዶሮረኖ ኣያኑ ኣፋንሴ ጥዞ ጨልተ ዮሴ መንቹት ኢሰ ዱዱቡ ሞጮጭቶ ወክት እሰበ ኦሚት ሎከሰ ኡቡኦ።
- 26 መንቹንት ሲር ባደን ፊንቃዌ ኣዲኛ ከለቀንቶኣተ ግርካዊኛተ እቅ፤ እሰን ጨሌኛሴ ዶሮረኖ ዱር ፋሾተ ኢሰ ኡጭቶሰ።
- 27 ጠዉ እኩጎሬ ኢሰ ህተን መንቹተ «ኦሶ ኣቸተ ዉሻተ ኣሱ ሀሰሰኖበኦ፤ ሃጭት ኦሱት እት ዱቡ ሀሰሰኖ» ዩሰ።
- 28 ህት መንቹት ፈንቀሸት «ቀርኛ ሁኩን ሀንቅሃን፤ ጠዉ እኩጎሬ ዉሸት ኦሱት እቶ ቁኒኛ ኡቦ ፋርፋሩ ኣታኦ» ይቶሰ።
- 29 ህካን እኩቤኛሃ ኢሰ «ካን ጠወኦንተክ ጨሌኛክ ዶሮረኖ ኣያኑ ፋሎኡ፤ ቴሱ ሞንክ መር» ዩሰ።
- 30 እሰን ሞንሴ ፈንቀልተ መርቶ ወክት ጨሌኛሴ ዶሮረኖ ኣያኑ ፋላን መዕነ ኣሌን ኦሰኦን ደጎሴ።

ኢሰ ደንቀለክ ዱደ መንቹ ፈይሱሰ

- 31 ህትን ጢርሰ ባዲኛ ፋል ሰደን ኦዲን «ቶኑ ከተመ» ዩኖ ባደን ህግ ገሊሊ ባርብ ኦሚኛ።
- 32 ህከኔን መኑ ሙቱ ደንቀለክ ደንቀ ኦኩ መንቹ ኢሰበ ኡቡኦ፤ እሰን ኢሰ ህከን መንቹ ኦሌን ኣንገሰ ኣኦተ ኡጭቶሰ።
- 33 ኢሰ ህከ መንቹ መኒኛ ኣደ ኣዕይ ሚጥሀሰ እሱ መሰ ዙሩዕማሰ ህከን መንቹ መጫን ኣገሾ፤ ህትን ኢሰ ኣንጀሰ ቱይ ህከን መንቹ ኣረብተ ኣንጋንከሰ ሀጣዌኦ።
- 34 ኢሰ ሰማ ዋሽ ኦሎሽ ቀልቤሰ ሻኻሪ ህከ መንቹ «ኤፍታህ!» ዩሰ፤ ፍሳረንትሰ «ሂርተኦ» ዩሃን።
- 35 ህከ ወክትንክ መጨሰ ፈንተኦኡ፤ ህትን ኣረብሰ ሂርተኦን ጠለሽ ጠወዕዮ።
- 36 ኢሰን መኑ ህከ ጠዉ ኦዪሃ ኩልታበኦን ኣዘኻሰ፤ እሁን ቤሉ ጠወኣበኦን ኩሎሰ ጌሰንክ ልግቤ መኒሃ ኩልቶኦ።
- 37 እሰን ኣበ ኣጀብሰጭት «ጉዕመንከ ጠዉ ጡመገ ኣዕዮ፤ ደንቃኑት ሞጮጭታገለክ ዱዲኑት ጠወኣገ ኣኣኖ» ይቶኦ።

8

ኢሰ ሾሌ ኩሚ መኒሃ ኣትሱሰ
(ማቶ. 15፥32-39)

* 7:16 ህትን ሞጮጭታ መጨት ዮሲሁ ዮ ጎሬ ኣዪሁ ሞጮጩን፣ ዮኖ ከ ዋልጎሽ መኑ-ሙቱ ሉሀ ክታብት ወላንሽ 16 ብርግተበኦ፤ ላገሰ 4፥23 ዮኢሃ ኣኩደኖ

1 ህካን ታቦን ልግቡ መኑ ጭምዬይ፤ ህካን መኒሃ እታኢሁ ዮሰበአ እቅ፤ ህካን እኩቤቺሃ ኢሰ አሳበሰ አሰበ ገአ

2 «ኩ መኑ ኢን ማጡቡ ሰሱ በር አገርቶኤ፤ አሳንከ እታኢሁ ዮሰበአቤቺሃ እን አበ መርርሲጫንሰ።

3 ህት ጎራይቶገን ምንሰ መርታገ አዕዮንሰ ጎሬ ዋቃን አበ ሆጋእ፤ ህትን አሳኝን መት-መቱሰ ቁዕራቪች አሜቶአረን» ይሰ።

4 አሳበሰ ፈንቀሽት «ህከረ ከን ኡሉ ኡድማን ከንከ መኒሃ እታኢሃ አይ ኣሶተ እታለዮ?» ይቶሰ።

5 ኢሰ አሳበሰ ፈንቀሽ «ሂንኩ ጣብቱ ዮሀዕኔ?» ይ ጠዕሚሰ፤

አሰን ፈንቀሽት «ለመሉ ጣብቱ ዮኔ» ይቶሰ።

6 ህከ ወክት ኢሰ መኑ ኡሉ አሌን አፋዕለኛገ አዘዣ፤ ለመለንከ ጣብተ ኣእ መገኑ ገለትጭ ቢጥ መኒሃ ሆንጠህሶተ አሳባተሰ ኣሴእ፤ እሰን መኒሃ ሆንጠህሶኡ።

7 ህትን ቀወት ቁርጨ፣ሜት ዮሰ እቅ፤ እሴንተ ኪሸ ኣእ መገኑ ገለትጭ አሳበሰ መኒሃ ሆንጠህሶተ ኣሴእ።

8 መኑንኩ እት ዱባን ፈቆሃ አሳበሰ ለመለ መሶበ ዊመ ፋርፋሩ ኪሶኡ።

9 ህካን እኛ መን ዋሊንሹ ሾሌ ኩሜሃ ጌሰ እቅ፤ እሰንተ ኢሰ ህርሰሾሰ።

10 ህከ መን ህርሲሾች ኤተሮን ኢሰ አሳባንን ማጡቡ እክ ጀልባን ኣግ «ደልማኑተ» ይዮ ባዱ ኦርዕዮ።

አጀብሲሰኖ ጠወ ለኢሃ ሆንጠኩ ጠዕምቱተ

(ማቶ. 16፡1-4)

11 ፈርሳውት ኢሰበ አሜት ሎሲሶተ «ሰሜች አጀብሲሰኖ ጠወ ለሊሰኔ» ይት ኦዱ ጀመርቶኡ።

12 ህከ ወክት ኢሰ ቀልቤሰ ሻዥ «ከን ዘማን መኑ አጀብሲሰኖ ጠወ ሚሃ ሀሰናት? ሀንቅንከ ያንክዕኔ፤ ከን ክልቀቲሃ አጀብሲሰኖ ጠወ ኣሰመኖሰበእ» ይሰ።

13 እሰንተ አጉር ጀልባን ኣግ ዉድ አደ ቶሎ።

ፈርሳዊለክ ሄሮድሴ ራጭተ

(ማቶ. 16፡5-12)

14 አሳበት አህናሰ ጌሰ ጣብተ አፋዕናን ሀብ መቱ ጣብታ አፍ ጀልብ ኣዘን ሄኦ እቅ።

15 ኢሰን እሰንተ «ፈርሳዊለክ ሄሮድሴ ራጭቲች ጠረኝቲን አገዕርዬ» ይ አዘዣሰ።

16 ህከ ወክት ገገዉንኩሰን «ህት ዩሰ እቴናሃ እንፋዕናን አሚንቶምቤኻሃት» ይት ገገዉንኩሰን ጠወኦኡ።

17 ኢሰን ሰውትሰ ደግ «እቴናሁ ዮኔበአቤቺሃሃት» ይቲን ሚሃት ሰውይቲንታት? ቲሶ ኢሊ መቱርቺሃ ደገንተብዕንዮ? ህከረንገ ኣገኖ ሀዕኔበዕንዮ? ህትን ቀልቡክዕኔ ቲሶ ኢሊ ዱጀዕትንዮ?

18 እልት ሄኦ ሀዕኔንገ ለኤንተብእንዮ? ህትን መጨት ዮሀዕኔንገ ሞጮጭ-ቲንተብእንዮ? ህት ሆርን ሰውይቲንተብእ?

19 እን ኦንቶ ኩሜ መኒሃ ኦንቱ ጣብተ ቢጭ ኣሰን ፈቆ ፋርፋሩ ሄንከ መሶበ ኪሴን?» ይሰ፤ እሰን «ቶን ለሞ መሶበ ዊመ» ይት ፈንቀሽቶኡ።

20 ህትን ኢሰ «ለመለ ጣብተ ሾሌ ኩሜ መኒሃ ቢጭ ኣሴምሀኒች ፈቆ ፋርፋሩ ሄንከ መሶበ ኪሴን?» ይሰ፤ እሰን «ለመለ መሶበ ዊመ» ይቶኡ።

21 ህካን እኩቤቺሃ ኢሰ ፈንቀሽ እሰንተ «ቲሁ አጥራ-መቲንተብእንዮ?» ይ ጠዕሚሰ።

ኢሰ ቤተ ሳይዳን ቆቀ መንቹ ፈይሰሰ

22 ኢሰ አሳበት «ቤተ ሰይዳ» ይዮቤቹ አልቶ ወክት መኑ መቱ ቆቀ መንቹ ኢሰበ ኤብ አንገሰ አሌሰ አኦተ ኡጭቶሰ።

23 እሰን ህከ ቆቀ መንቹ አንገሰ አፍ አምንሰ ቀኤች አብል ፋሼሰ፤ ኢሰን ህከን መንቹ እሌን እንጀ ቱይ አልሰ አንጋን ሀጣው «ለአንትርቹ ዮዕንደ» ይ ጠዕሚሰ።

24 ሁኩ ቆቀንኩ ጌጥ ይ «ኤ! መን ለኣሚት፤ ጠወ እኩጎሬ ሃመኖ ሀቀ አጉደኖኤት» ይእ።

25 ለንኪሃ ኢሰ ህከን መንቹ እሌን አንገሰ አዕዮ፤ ህከ ወክት መንቹሰ አጥራመች ለዕዮ፤ ህትን ፈይ ጉዕመርቹንከ አጥራመች ለኡ ጀመር።

26 ህከኒች ኤተሮን ህከ መንቹ ኢሰ «ከ ቀለት ኣጎት * እዩሃ ከ ጠወ ጠወኦት» ይሰ።

ኢሰ ቡረሞሃ እሁሰ ጴጥርሰ ጠወኡሰ

(ማቶ. 16፡13-20፤ ሉቃ. 9፡18-21)

27 ኢሰለከ አሳበሰ «ፍልጾሰ ቁሳር» ይዮ ባደን ዮ ቀለተ መርታኢት እቅ፤ ዋቁ እሌን ሄኦንገ ኢሰ አሳበሰ «መኑ ኤሳሃ አዩት ዮኖኤሁ?» ይ ጠዕሚሰ።

8:11 ማቶ. 12፡38፤ ሉቃ. 11፡16። 8:12 12፡39፤ ሉቃ. 11፡29። 8:15 ሉቃ. 12፡1። 8:18 ኤር. 5፡21፤ ሕዝ. 12፡2፤ ማር. 4፡12። * 8:26 ከ ቀለት ኣጎት፡- ዮናሃ ከ ጠወ እዩሃ ጠወኦት ዮና።

28 አሳባሰ ፈንቀሽት «መት-መቱ መት ጠመቃንቸ ያህዪት» የኖሃት፤ ሞሉሰንገ ስብዌቹዎ እልያሴት፤ የኖሃት፤ ህትን ሞሉ መት ስብያኖች መተሃሰ፤ የኖሃት» ይቶሰ።

29 ኢስ ፈንቀሽ «አዕኑ ኤሳሃ አዬት ይቴነጎታት?» ይ ጠዕሜሰ፤ ዴጥሮሰን «አት መሲሂት» ዬሰ።

30 ህከ ወክት ኢስ አሰንተ «አዕኑ አተኔሃ አዬሃ ጠወኦኖቹ» ይ ጠረኻሽ እዘዦሰ።

ኢስ ሬሁሰለከ ኬኤሰ ሄጭ ጠወኤሰ
(ማቶ. 16፡21-28፤ ሉቃ. 9፡22-27)

31 ኢስ አሳባተሰ «መንች ቤቱ ልግብ ኦርሸተ ቶጉ ሀሰሰኖሰ፤ ህትን ባድ ባልቀት፤ ቄሳክ አዎንሳትለከ ሕግ አሰተማረት ቶጉ ግብ ሽታሰ፤ ጠዉ እኮጎሬ አሰ ሰቅ በሬን ሬሆች ኬአኖ» የንተማርሱ ጀመር።

32 ኢስ ህከ ጠወ አገኖሰገ ኩሎሰ፤ ህከ ወክት ዴጥሮሰ ኢስ መድ ዋሽ ኤሙዕሬሰ።

33 ጠዉ እኮጎሬ ኢስ ኤተሩ ፈንቀል አሳባሰ ለአን ዴጥሮሴ «አት ሸይጣንቹ ኢች ካጻ ቄዕር፤ አት መን ሰዉት ቤሉ መገን ሰዉት ደጋንትበአ» ይ ሻቆሰ።

መሰህ አዎኑ ዋጋ ባትሲሰኖሃ እሁሰ
(ማቶ. 10፡38-39፤ 16፡24-28፤ ሉቃ. 9፡23-27፤ 14፡25-27)

34 ህከኒች ኤተሮን ኢስ ልግብ መን አሳባንተሰን ሜጡቡ እሰበ ገአ «ኤሳሃ አዎኖተ አተኖህ የ ጎሬ ገይሰተኔሃ ሰውዩ አጉር መሰቀለሰ እጅ አዎኑዕኔ።

35 ነብሳሰ ጡምሶተ ሀሰኖሁ ጉዕመንኩ ነብሳሰ ቤሰኖ፤ አተኔሃለከ ተሸት ላገተኔሃ ነብሳሰ ህግሽ አሰኖሁ ነብሳሰ ጡምሰኖ።

36 አዬሁ ኣዱንያ አሌን የኢሃ ጉዕመንከ ደአ ነብሳሰ ቤሾ ጎሬ መ ደግለለኖሰ?

37 ህትን መንቹ ነብሴሰ ወጥ መ ባቶተ አታለኖ።

38 ከን ጨበኛኖግለከ ለገአኖ ክልቀት ብሬን እንለከ ኢ ላጋን ሙሉኖ መንች ቤቱ አንሰ ኬዕምኚን ጠሊላኖ መላይካን ሜጡቡ አሜተኖ ወክት አሲን ሙሉኖ» ዬሰ።

9

ኢስ ደኑ ደረሙሰ
(ማቶ. 17፡1-13፤ ሉቃ. 9፡28-36)

1 ህከኒች ኤተሮን ኢስ «ህንቅንከ ያንክዕኔ፤ ቴሱ ከኔ ኤርቶ መን በሊች መት-መቱሰ መገን ዎምነቱ ሎረ ወልቃን ገሸኖ ወክት ለአተ ኢሊ ሬታበአሩ የኤ» ዬሰ።

2 ሊሆ በሬች ኤተሮን ኢስ ዴጥሮሴ፤ ያቀበለከ ያህይ ሰሱንከሰ እአ ሎረ ቆተ አል ፋሎ፤ ህከኔን ኢሰ ደኑ ብሬሰን ደረሞ።

3 ኢስ ኦድኑት ኣዱንያ አሌን አዬሁ ሜጭ ዋቅ አዕይ ዎጁ እአኖበአ ጌሰ ዋቅይት በለቆኤ።

4 ህከ ወክት እልያሰለከ ሙሰ አሜት ኢሲን ሜጡቡ ጠወአንን ሰሱንኩ አሳባት ለኤሰ።

5 ዴጥሮሰ ኢስ «አሰተማርቸ! ከኔ ሄኤ ኔሳሃ አበ ጡመሃን፤ ህካን እኮቤቺሃ መቱ ኬሳሃ፤ መቱ ሙሲሃለከ መቱንገ እልያሴሃ ዳሰ አጅርኖ» ዬአ።

6 ህከ ወክት ሰሱንኩ አሳባት አበ ዎጅቶቤቺሃ ዴጥሮሰ ጠወአኖሃ ደገኖበአ እቅ።

7 ጎመንት አሜት ቴልታን ጎማች ኣዘን «ኢታም ቤቱኤ ከኒት፤ እሱንከ ሞጭጭዬ» ይታ ላገተ ሞጭጩሽቶኤ።

8 ወክትንከሰ ሰሱንኩ አሳባት አደሰ ዘህት ለአ ወክት አሳን ሜጡቡ ኢስ ቤሉ አዬሁ የበአ እቅ።

9 ቆተ አሊች ድርተን ኢስ «መንች ቤቱ ሬሆች ኬኦተ ኢሊ ከ ለኤንተ ጠወ አዬሃ ጠወኦኖቹ» ይ እዘዦሰ።

10 እሰን ዬሰ ጠወ ቀልቤሰ አፍ «ኩ ሬሆች ኬኤ» ዩ መ ዩህን» ይት ጠዕምቶኤ።

11 እሰን ኢስ «ሕግ አሰተማረት ሄጭ አሜቱ ሀሰሰኖሲሁ እልያሴት» ይታኢሁ ሚሃት?» ይት ጠዕምቶሰ።

12 እሰን «ሁኩን ህንቅሃን፤ እልያሰ ሄጭ አሜት ጉዕመርቹንከ መክሰኖ፤ ጠዉ እኮጎሬ መንች ቤቱ አበ ኦርሸተ ቶገኖገለከ ህንቅመኖሃ እሁሰ ጠሊሊ መጻፋን ከተበሞሁ ህትጎታን?

13 ጠዉ እኮጎሬ እን ያንክዕኔ፤ እልያሰ ሄጭ አሜቶኤ፤ አሰተኔንከ ጠሊሊ መጻፋን ከተበሞገን መኑ ሀሰገ አቶሰ» ዬሰ።

ዱሩ አፎሰ ጨል ኢስ ፈይሱሰ
(ማቶ. 17፡14-21፤ ሉቃ. 9፡37-43)

14 ኢስላክ እሲን ሜጡብ ሂኑ ሰሱንኩ አሳበሰ ፈንቀልት አሜቶ ወክት ልግቡ ሙኑ ፈቆ አሳባን ጭምይሃን ህከኒን መት-መቱ ሕግ አሰተማረት ኢሰ አሳባን ኦዲአት እቅ።

15 ሙኑ ጉዕሙንኩ ኢሰ ለኦ ወክት አበ አጀብሰጭቶኡ፤ ህትን አሰበ ደጉድ መርት ዝያርቶሰ።

16 ኢሰን አሳበሰ «መ ጠዋኒት ኦዲንጋታ?» ይ ጠዕሜሰ።

17 ህከን ልግብያ ኦሙቲቶ መቱ መንቹ «አስተማርቻ! ዱሩ አፍ ጠወኡ ከሞ ጨልኤ ኪቤቹ ኤቦም።

18 ሁኩ ዱሩ ኪዕዮሰ ወክት ኦጀኖሰ፤ ህትን አፈን ሀንብ ኩፍ እእን እንኩተ እጥሲሰኖ፤ አልሰ ክቺቻ አዕይ ሞሽኖሰ፤ ህከን እኩቤቹሃ ህከ ዶርረኖ እያን ፋሽቶተ አሳበክ ጠዕምዮም እቅ፤ ጠወ እኮጎሬ አሰ ፋሽቶተ አጋልቶበኤ» ይኤ።

19 ኢሰ አሰንተ «አዕኑ አመዕነቱ የሀሀዕኔበኤ ሙኑ፤ ሂንከ በር ኢላ ክዕኔን ሜጡብ ሂኤም? ህከ በር ኢላ አጋላንክዕኔ? ህንዴ ጨል ኢብ ኤቤ» ይሰ።

20 እሲን ጨል አሰበ ኤቦኡ፤ ሁኩ ዶርረኖ ዱሩ ኢሰ ለዕዮ ወክት ጨል ኡላ አላን ኦጀ ከጣቀንሲሰ፤ ጨልንኩ ኡላ አላን ኮሎንኮሰላን አፎንከሰ ሁንብ ኩፍ እኡ ጀመር።

21 ኢሲን ህከን ጨል እነ «ኩ ጥክነት አፎሲቶ ሂንከ ዘማን እኮሰ?» ይ ጠዕሜሰ፤ እሲን ፈንቀሽ «አሰማቶሰ ኪሸት።

22 ኩ ዶርረኖ ዱሩ ሾተ ሀሽ ልግብ ወክት ገራንላከ ዋን ኦጀኖሰ፤ ጠወ እኮጎሬ መቱርቹ እኡ አጋልጋንት ጎር መረርሲጭኔ! ሀዕልኔህ» ይኤ።

23 ኢሲን «ህት አጋልጋንት ጎሬ ይጋንቱኤት? አመዕነቱህሂ ጉዕሙርቹንኩ አጋለመኖሰ» ይሰ።

24 ህከ ወክት ጨል እኑ ኢሰ «አመዕኑ አመዕናም፤ ጠወ እኮጎሬ አመዕኑ ሆጋም ጠዋሃ ጉዕሚንከሰ ቲሁ አት ሀዕሌኤ!» የን ያር።

25 ኢሲን ሙኑ ደጉደን አሜተኖጎ ለዕዮ ወክት ህከ ዶርረኖ ዱር «አት ዱዱላክ ደንቁ ዱሩ ከን ጨሊቶ ፋልት ለንኪ አሰበ ፈንቀልት አሜጋንትበእጎ አዘኮንኪ» ይ ሻቆሰ።

26 ሁኩ ዶርረኖ ዱሩ ሎረ ላጋን ያር ጨል መቱ ጌሰ ኦጀ ከጣቀንሲሰቶ ኤተሮን ፋሎ፤ ህከ ወክት ጨሉሰ ደሜቤቹሃ ሙኑ «ሬዮ» ይ ሰሙዬእ።

27 ጠወ እኮጎሬ ኢሰ ጨል አንገተ አፍ ኪሻንሰ ኪዕይ ኡሬእ።

28 ኢሰ ምኒ ኣጎ ወክት አሳበሰ «ጎኡ ከ ዶርረኖ ዱር ፋሽኖተ አጋልናምበኢሁ ሚሃት?» ይት ሜጡሰ ጠዕምቶኤ።

29 ኢሲን አሰንተ «ህትናሙርቹ ዱዲንላከ ሶመኒን እህባቶ ሞሎርቹን ሆሮን ፋሎተ አጋለኖበኤ» ይ ፈንቀሺሰ።

ኢሰ ሬሀሰላክ ሬሆች ኪኤሰ ለንኪሃ ጠወኤሰ

(ማቶ. 17፡22-23፤ ሉቃ. 9፡43-45)

30 ኢስላክ አሳበሰ ህከ ቤቹ ጌኝአት ገሊላ ኦዲን ህንኤ፤ ኢሰ የቤቹንከ አዪሁ ደጎተ ሀሾበ እቅ፤

31 ሁኩን እኮሁ ኢሰ አሳበሰ «መንቹ ቤቱ መን አንጋን ህግሴን ኣሲኖሰ፤ እሲን ሽጋሰ፤ ጠወ እኮጎሬ ሬሆች ሰቅ በር ኪኤኖ» የን ተማርሲሰ።

32 አሳበሰ ኩ ጠወ አሳሰበኤ፤ ጠወ እኮጎሬ ጠዕምቶሰተ ዋጅቶኤ።

ጉዕሚቶን በተአኖሁ አዬት?

(ማቶ. 18፡1-5፤ ሉቃ. 9፡46-48)

33 ኢስላክ አሳበሰ ቅርናሆም ከተመ አሜቶኡ፤ ኢሰ ምኒ ኣጎቶ ኤተሮን አሳበሰ «ዋቃን ሄኤንተ ወክት ኦዲንተ ጠወ መርቹሃን?» ይ ጠዕሜሰ።

34 ጠወ እኮጎሬ አሰ ዋቃን «ጉዕሚቶኔ በተአኖሁ አዬት?» የቀንቶቤቹሃ መሰላ ኣቶሰበኤ።

35 እሲን አፋዕሌአቶ ኤተሮን ቶን ለሙንከ አሳበሰ አሰበ ገእ «ዋኔሃ እሆተ ሀዕኖሁ ጉዕሙንኩ ጉዕሚንከ ካድመላክ ጉዕሚቶን ቀወ እሁ ሀሰሰኖሰ» ይሰ።

36 መቱ ቀድ ጨል ኤብ በላንከሰ ኡርሾ፤ ህከ ጨልንከ ሀንቀፍ

37 «ከን ጨልገ የኤሃ ሱዕሚንከኤ ቶገኖሁ ኤሳሃ ቶገኖኤ፤ ኤሳሃ ቶገኖሁ ጉዕሙንኩ ጠለዕል ኤሳሃ ቶጉ እሆዕነ ኤሳሃ ሶኮንከ ሜጡብ ቶገኖ» ይሰ።

ግብበኔሁ ጉዕሙንኩ ኒንት።

(ሉቃ. 9፡49-50)

38 ጠወ እኮጎሬ ያህይን ኢሲሃ ፈንቀሽ «አስተማርቻ መቱ መንቹ ሱዕሚንከክ ሩሃንየ ፋሽን ለዕን ኒን ሜጡብ እክ አዎንበኔቤቹሃ ከሞንሰ» ይሰ።

39 ጠወ እኮጎሬ ኢሰ «ሱዕሚንከኤ አጀብሲሰኖ ጠወ እእን ወክትንከሰ ኢ ኤላን ሂላርቹ ጠወአኖሁ ዮበኢቤቹሃ አኑሬ፤ ከንቶኖቹሰ።

40 መሰንትሰ ኒን ሀንበዕለምባሁ ጉዕሙንኩ ኒንት።

41 ሀንቅንከ ያንክዕኔ፤ መሰህሃ እኬንተቤቺሃ ሱዕሚንክኤ መቶ ቡርጨቆ ዋሃ አጎተ ኣሰኖሁ እዪሁ ወጥሰ ደአኖ» ዬሰ።

መነ ሉሰሲች ገዉ አገዕሩ

(ማቶ. 18፥6-9፤ ሉቃ. 17፥1-2)

42 ኢሰ «እን አመዕንቶ ከን ማዕናናች መቱሰ ሉሲሰኖ መንቹ ሎረ ሪትም ክኑ ጎባንከሰ ኡሱሬን ባራን ቶረሙስ ቆሀኖ።

43 ሀካን እኮቤቺሃ አንገክ ሉሲሳሄትጎሬ ሙርት ኡጅ፤ መሰንትሰ ለምት አንገት ሄአንኬ አዛቤን ዘላለሚሃ ጠዕትበ ጊራን ኣጊች አንገክ ሙርተኣን ነብሴን ሄኢን ሄኡ ደኡ ቆሀኖ።

44 ሀከን ቤቾን እሰተ እታ ዘቡዕሉት ሬታበእ፤ ህትን ገረሲ ሆሮ ጠእታበእ። *

45 ህትን ሎከክ ሉሲሳሄትጎሬ ሙርት ኡጅ፤ ለም ሎከት ሄአንኬ አዛቤን ዘላለሚሃ ጠዕትበ ጊራን ቶራኖሄሀሊኒች ድኑ እክ ነብሴን ሄኡ ደኡ ቆሀኖ።

46 ሀከን ቤቾን እሰተ እታ ዘቡዕሉት ሬታበእ፤ ህትን ገረሲ ሆሮ ጠእታበእ።

47 ህትን አልክ ሉሲሳሄትጎሬ ፋሽት ኡጅ፤ መሰንትሰ ለም አልት ሄአንኬ ዘላለሚሃ ጠእትቡ ጊራን ቶራኖሄሀሊኒች መት እላሙ እክ መገን ዋምነቱን ሄኡ ቆሀኖ።

48 ሀከን አዛቤን እሰተ እታ ዘቡዕሉት ሆሮን ሬታበእ፤ ህትን ገረንት ሆሮን ጠእታበእ።

49 «ክትሙ መጥኒን ነጠ እሆኖ ስ ሀንገን

50 መጥንት ጡመተ፤ እህን ቤሉ መጥንት እሁሴ ጤአባች ህት አቲን ጤአጎ አቲን? ክዕኔንከ መጥኔ ጤዕንሹ ሄአንክዕኔ፤ ገገዉንኩክዕኔ ኢተቀንቱን ወገሬተን ሄዕዬ» ዬሰ።

10

ኢሰ ጎጃሃ እህተኔሃ ተማርሱሰ

(ማቶ. 19፥1-12፤ ሉቃ. 16፥18)

1 ኢሰ ሀከንቤቺች ኬዕይ ይሁድ ህግ ዮርዳኖስ ዛዘኖ ዊች ገርብ አዲን ቶል ኦሮዕዮ፤ ልግቡ መኑ ለንኪሃ እሰበ ጭምይታን ወዕና ሮሾገን ተማርሰኖሳት እቅ።

2 ፈርሳዊች መት-መቱሰ ኢሰ ሉሲሰተ ሀሰ አሜት «መቱ መንቹ ጫሰ ገፈርተ ሕግን ፈቀደመኖሰንደ?» ይት ጠዕምቶሰ።

3 ኢሰን ፈንቀሽ «ሙሰ ከን ጠዊሃ መ አዘገባህዕኔ?» ዬሰ።

4 ኢሰን «ሙሰ ሕሴንከ ንከሴ ሂር ሸሩን» ይ አዘገባኔ» ይቶኡ።

5 እኮጎሬ ኢሰ እሳሃ ፈንቀሽ «ሙሰዕት ከ ትዛዝ ከተቦተ አታሎሁ ቀልቡክዕኔ ዲጃን ሞጭጭቱንተበእቤቺሃት ዬሰ።

6 ጠዉ እኮጎሬ መገኑ ወዕና ክልቀት ከለቆ ወክት ለባለክ ሚአተ አዕይ ከለቆ።

7 ሀካን እኮቤቺሃ መኑ አነሰለከ አመሰ አኑረኖ ምንሰ አማን ሚጡ አሀኖ።

8 ህትን ለሙንኩሰ ሚጡ ጅሰመ እካኣ፤ ሀከኒች ኤተሮን እሰ ሚጡ ጅሰመ እካ ቤሉ ለሙ ጅሰመ አካበእ።

9 ሀካን እኮቤቺሃ መገኑ ሚጡ አዕዮሃ መኑ መለሉንከሰ» ዬእ።

10 እሰን ምኒ ፈንቀልት አሚቶ ወክት አሳበሰ ሀከን ጠውተኔሃ ፈንቀልት ኢሰ ጠዕምቶሰ።

11 እሰን «ጫሰ ገፈር ዋሉ ሚንቱ ኣአኖሁ ጉዕሙንኩ እሴ አሉን ዝነተ አዕዮኡ።

12 ህትን ምንሴ መንቺች ፋልት ዋሉ ጎነ ኣግሶ ጎሬ እሴሁ ዝነተ አቶኡ ዩሃን» ዬእ።

ኢሰ ኦሱተ ማሰዕዮገ

(ማቶ. 19፥13-15፤ ሉቃ. 18፥15-17)

13 መት-መቱ መኑ አለሰ አሉን አንገተ አዕይ ማሰኦሰተ ኢሰበ ኤቦኤ፤ ጠዉ እኮጎሬ አሳበሰ ሀከ ኦሱተ ኤቦ መን ሻቆኡ።

14 ኢሰን ሀካን ለዕዮ ወክት አሳበሰ ኡሙዕር «መገን ዋምነቱ ከኑኦገ ዮሁኑኡተ እኮቤቺሃ ኦሱተ ኢበ እሚቱን ከንቶኖቼ» ዬሰ።

15 ኢሰ «ሀንቅንከ ያንክኔ፤ መገን ዋምነቱ ኦሶገ እክ ቶግባሁ መገን ዋምነቱ ኣጎተ ሆሮ አታለኖበእ» ዬእ።

9:40 ማቶ. 12፥30፤ ሉቃ. 11፥23። 9:41 ማቶ. 10፥42። * 9:44 እዛቡ ዘቡዕሉት ሬታበእሁለክ ገረሰ ጠዕታበእሃ ቤቹ- መት-መቱ ለሀ ክታበት ዋላንሽ 44 ዮላሃ በርግታበእ። ላገንትሰ ዋላንሽ 48 ዮላሃ አጉዳእ 9:44 ማቶ. 5፥30። 9:47 ማቶ. 5፥29። 9:48 እሴ. 66፥24። † 9:49 መጥንትላክ ገረት ሁት እክ ነጠ እካጎ- ለሞ 2፥13 ፊል. 3፥2-3 ፊል. 3፥17 ዮላሃ ላኤ ሀሰሰኖ። 9:50 ማቶ. 5፥13፤ ሉቃ. 14፥34-35። 10:4 ዘዳ. 24፥1-4፤ ማቶ. 5፥31። 10:6 ክል. 1፥27፤ 5፥2። 10:8 ክል. 2፥24። 10:11 ማቶ. 5፥32፤ 1 ቆሮ. 7፥10-11። 10:15 ማቶ. 18፥3።

16 ህኪኛ ኤተርን ኦሱተ ሀንቀፍ አንገሰ አሌሰ አዕይ ማሰዕዮሰ።

ዲንያ አል ቀባጡተለከ መገን ምምነቱ
(ማቶ. 19፡16-30፤ ሉቃ. 18፡18-30)

17 ኢሰ ህከን አዲኛ ፋል ሃመን ሄዕዮገን መቱ መንቹ እሰበ ደጉደን አሜኝ ብሬሰ ጉሉጵ «መረርሲጭታገት እሰተማርኛ! ጉዕመ ዘማን ሄኔ ደኦተ መ እኔ ሀሰሰናኤ?» ይ ጠዕሜሰ።

18 ኢሰን ፈንቀሽ «ሚሃት መረርሲጭንቶ ይታገቱኤሁ? ማጦ መገን ቤሉ መረርሲጭንቹ እዩሁ ዮበእ።

19 ትዛዝ ደጋጎት፤ ትዛዘንኩ ሸቶት፤ ዘነተ አቶት፤ ሞገቶት፤ ጨብ መሰከርቶት፤ ጣንሰቶት፤ እነክለከ አመክ ከበጅ የኖሃን» ይሰ።

20 ሁኩ መንቹንኩ ፈንቀሽ «አሰተማርኛ! እን ከ ትዛዝ ጉዕመንከ ኦሰማኝኤ ኬሽ አገርም» ይእ።

21 ኢሰን ህከ መንቹ ለዕይ እሱንከ ኢቲሰ፤ «መቱ ጠዉ ጠለዕሉ ፈቆሄ፤ እሰን መርት ዮሄ ዲንያክ ጉዕመንከ ሀርት ብረሰ ቡጥቻኖተ እሰ፤ አት ሰማን ጭምዶ ዲንያተ ደአታጎት፤ ህኪኛ ኤተርን አሜት ኤሳሃ አዋንት ኤኝ ተማር» ይሰ።

22 መንቹንኩ ከ ጠወ ሞጮጩ ወክት ልገቡ ዲንያት ዮሰቤቹሃ ሚንተ በዕይ ሻዘን ኦርዕዮ።

23 ህከ ወክት ኢሰ አሳበሰ ዘሀ ለዕይ «ቀጣጣሙ መኑ መገን ምምነቱ ኣጉ ሀትኔታ ኦርሽ» ይሰ።

24 አሳበሰ ላጋንተሰ አጀብሲጭቶኡ። ኢሰን ፈንቀሽ «ኢ ኦሰ መገን ምምነቱ ኣጉ ሀት ኦርሰኖሃን?

25 ቀጣጣሙ መገን ምምነቱ ኣገኖ ዪኝ ጋሜሉ መርፌ ጠላዕላን ህገኖ ዩ ቆሀሆ» ይሰ።

26 ህከን ጠዋን አሳበሰ እበ አጀብሲጭት ገገዉንኩሰን «ከን ሃሌን አይ ጡሞተ አታሊኖ?» የቀንቶኡ።

27 ኢሰን እሰ አይ ለዕይ «መኒሃ አታሊሞቡ መገኒሃ አታሊመኖ፤ መሰንትሰ መገኒሃ ጉዕመርቹንኩ አታለመኖሰ» ይሰ።

28 ዪጥርሰን «ነኡ ጉዕመርቹንከ አጉርን አዋኖንኬ» ይእ።

29 ኢሰን «ሀንቅንከ ያንክዕኔ፤ እተኔሃለከ እንጂ ልተኔሃ ምንሰለከ አመሰ ኦሱተ፤ ላባኑተለከ ሜኣኑተ፤ አመሰለከ እነሰ፤ አለሰለከ ኡለሰ አጉረኖሁ በትሽ አበ ደአኖ።

30 ከን ዘማኔን ሆሮ ምንሰለከ አመሰ ኦሱታ፤ አማኑሰለከ አለሰ፤ ኡለሰ አመዕነትተኔሃ ያዋም ኦርጨቀሞጎሬ ጥቤ ለሙ አይ ደአኖ፤ ህትን አሜተኖ ኣኬሩ ዘማኔን ጉዕማን ጎፍበ ሄኔ ደአኖ።

31 ጠዉ እኩጎሬ ልገቡ ብሬሩ ኤተርረ ህትን ልገቡ ኤተርሩ ብሬረ እካኣ» ይሰ።

ኢሰ ሬሆሰተኔሃ ሰቅ ወክት ጠወኡሰ
(ማቶ. 20፡17-19፤ ሉቃ. 18፡31-34)

32 ኢሰለከ አሳበሰ ዩሩሳሌሙ መሰኖ ምቃን ሚጡቡ ሄኔገን ኢሰ እሰ ብሬን ሃመኖ አቅ፤ አሳበሰ አጀብሲጭቶኡ፤ ህትን ኤተርሰ አዲን አዋንተን ሄኔ መኑ ሞጅቶ አቅ፤ ኢሰ ቶን ለመንከ አሳበሰ ለንኪሃ እሰበ ሆንጠህሽ ኢልታሰ ኦርሸተ ኩሎሰ።

33 ኢሰን አሰንተ «ሁኩዕኔን! ቲሱ ዩሩሳሌሙ መርናሚት፤ ህከንቤቹንን መንቹ ቤቱ ቁሰ አዋንሳኖተለከ ሕግ አሰተማረተ ህግሴን ኣሲኖሰ፤ እሰን ሬሆ ፍርድ ፈረድ አይሁድ እህበ መኒሃ ህግሰ አታእ።

34 እሰን ቀሊዳሰ፤ እንጀ ቱ ይታሰ፤ ኦልታሰ፤ ሽታሰ፤ ጠዉ እኩጎሬ እሰ ሰቅ በር ሬሆኝ ኬአኖ» ይሰ።

ያቁብለከ ያህይ ኡጭተተ
(ማቶ. 20፡20-28)

35 ዜብዴዎሴ ኦሱተ ያቁብለከ ያህይ ኢሰበ ሆንጠክ «አሰተማርኛ! ኡጭናንኬ ጉዕመርቹንከ አቶኔተ ህጎሳም» ይቶኡ።

36 ኢሰን «መ እኡህዕኔተ ኢትቴነን?» ይሰ።

37 እሰን «ኬዕምኝክ ምምነቱን መቱ፤ መኬ አዲን መቱ፤ ጉረ አዲን አፋዕልናምገ አእኔ» ይቶኡ።

38 ጠዉ እኩጎሬ ኢሰ እሰንተ «ኡጭቴነንታሃ ደገነንተበእ፤ እን ቶጋም ኦርሽ ጠበትተ ቶጎኖተ አታልቴነንዶ? ህትን እን ጠመቀም ጥምቀት ጠመቀሙ አታልቴነንዶ?» ይሰ።

39 እሰን ፈንቀሽት «ኤ አታልናም» ይቶኡ፤ ህትን ኢሰ ፈንቀሽ «እን ቶጋም ኦርሽ ጠበቱሃ ኦሱት ቶጎኖተ አታልቴነንተ፤ ህትን እን ጠመቀም ጥምቀት ጠመቀንቴነንተ።

40 እኩጎሬ ኢ መኬ አዲንለከ ጉረ አዲን አፋዕሌኖገ አኣሚሁ ኣኔበእ፤ ጠዉ እኩጎሬ ሁኩ ቤቹ መገኑ ቅጥ አዕዮሰሁኑኣሃ ኣሰመኖሃን» ይሰ።

41 ፈቆ ቶኑንኩ አሳበት ህካን ሞጮጭቶ ወክት ያቁብለከ ያህይ ኡሙዕርቶኡ።

42 ህከ ወክት ኢሰ እሰንተ እሰበ ገእ «አይሁድ እህበ ኡሙቴሃ ዬን ገኤኖሰገለከ አዋንሳኑሰን እሰ አሌን ሹምነቱ ዮሳሃ እሁሰ ደገነንተ።

43 ጠዉ እኩጎሬ ክዕኔቤቸን ህት እሁ ሀሰሰኖበእ፤ እዪሁ ክዕኔ በላን ሎረ እሆተ ኢተኖሁ ሄዕዮ ጎሬ ክዕኔንከ ካዲንቹ እሁ ሀሰሰኖሱ።
 44 ህትን ክዕኔ በላን ዎኔሃ እሆተ ሀሰሰኖሁ ጉዕሚንከክዕኔ ርሰቹ እሆን።
 45 ህትን መንቹ ቤቱ ካደሞተለክ ነብሳሰ ልግብያ መኒሃ ዎቸዮ አሳተ አሜቹ ቤሉ እሰ ካደሞኖሰተ አሜቸበእ» ዬሱ።

እሰ እልተ ቆቀ በርጤሞሴ ፈይሱሰ
 (ማቶ. 20፥29-34፤ ሉቃ. 18፥35-43)

46 ህከኒች ኤተሮን እሰን ኢያርኮ ከተመ አሜቶኤ፤ እሰ አሳበሰ ልግብያ መኒን ሜጡበ ኢያርኮ ከተሚች ፋለንን ጤሞሴ ቤቱ «በርጤሞሴ» ዬኖ ቆቀ ዎቄ መዲን አፋዕል ኡጨኖት እቅ።
 47 ህከን አዲን ህገኖሁ ነዝሬት እሰ እሁሰ ሞጮጮ ወክት «ደዉዴ ቤቶ እሰ! ሀዕይ መረርሲጤኤ» ዮን ያሩ ጀመር።
 48 እሰ አዎንተን ሄኔ መኑ «ጨለይ» ይት ኡሙዕርቶሰ፤ ጠዉ እኩጎሬ እሰ «ደዉዴ ቤቶ ሀዕይ መረርሲጤኤ» ዮን ወዕኔች በትሽ ያር።
 49 እሰን ኡር «ገእዩሰ» ዬእ፤ እሰን ህከ ቆቀ መንቹ «ቴ ጠረኝ ከኤ፤ እሰ ገእኖሄት» ይት ገእቶሰ።
 50 እሰን ኦደዕዮ ኦድኑሰ ኡጅ ኡር ኮርጀን ከዕይ እሰበ አሜቹ።
 51 እሰን «መ አኦሂተ ሀሰን?» ይ ጠዕሚሰ።
 ሁኩ ቆቀንኩ መንቹ «አሰተማርቸ! ሀዕይ እልኤ ለካገ እኤኤ» ዬሰ።
 52 እሰን «ቴ ኦርእ፤ አመዕነቱክ ፈይሾሂ» ዬሰ፤
 ወክትንከሰ እልሰ ፈንተኣን ለዕይ እሰ አዎቹ።

11

እሰ ሎረ ኬዕምኒን ዬሩሳሌመ ኣጉሰ
 (ማቶ. 21፥1-11፤ ሉቃ. 19፥28-40፤ ያህ. 12፥12-19)

1 እሰለከ አሳበሰ ዬሩሳሌመ ሆንጠኮ ወክት ቤተ ፋኒላከ ቢታን ከተም አዲን ዘይት ሀቁ ነጻኛ ቆተበ ኢልቶኤ፤ ህከንቤቹች እሰ አሳባቹ ለሙሰ
 2 «ኡሬ አዲን ዮ ቀዕየተ መሬ፤ ህከ ቤቹ አልቴንተ ወክት እዪሁ ሆሮን ቆጶበእ ወተረ ኡሱረረሞሃ ደገነንተ፤ እሰንከ ሂርቲን ኤቤኤ።
 3 አይደጎ እዪሁ ሳካ ሚሃ አቴነታት?» ዬሀዕኔጎሬ ቀርቹ ሆሾቤቺሃት፤ እሰን ደዕል ፈንቀሽ ሶሆሀዕኔ ይዬ» ይ ሶኮሰ።
 4 እሰን መርት ዎተሩሰ ዎቄ መዲን ኡር ቀፈቲን እሱረረሞሃ ደግ ሀርቶኤ።
 5 ህከ ወክት ህከኔ ኡሬ መኒች መት-መቲሰ «ከ ዎተረ ሂርቲንታሁ ሚሃት?» ይት ጠዕምቶሰ።
 6 እሰን እሰ አሳሃ ዬገን ይት ኩልቶኤ፤ ሁኩ መኑንኩ «መሰዬ» ይቶኤ።
 7 አሳበሰ ዎተረ እሰበ ኤብ ኦድኑሰ ዎተር ጉጅ አሌን ኢታን እሰ ቆጶ።
 8 ልግቡ መኑ ኦድኑሰ ዎቃን ዌሳኢት እቅ፤ ዎሉሰንገ ቆጠች ሀቅ ሀበረ ተንቅሰን ዌሳኢት እቅ።
 9 ብሬ አዲን ሃንተን ሄኔእሩለከ ኤተር አዲን አዎንተን ሄኔ ጉዕሙንኩ «መገኒሃ ኬዕምኖ እሆን! ቀርቹ ሱዕሚን አሚተኖሁ ማሰአሞሃን።
 10 አሚተኖ አንኔ ደዉዴ ዎምነቱ ማሰአሞሃን፤ መገኒሃ ኬዕምኖ አሉ ሰማን እሆን» ይተን ሎረ ላጋን ገለትጭታእት እቅ።
 11 እሰ ዬሩሳሌመ ኢሊ ወክት ዱእ አኤኖ ምኒ ኣጎ፤ እሰን ህከኔ ዮ ጉዕመርቹንከ ለዕዮ፤ ጠዉ እኩጎሬ ኡለት ሀዎርቶቤቺሃ ቶን ለሞንከ አሳባን ቢታን ከተመ ኦርዕዮ።

እሰ ቦርሮ ኦዳቹተ
 (ማቶ. 21፥18-19)

12 ለንክ በር ቢታን ከተሚች አሚተንን እሰ ጎሩ አፎሰ።
 13 እሰን ሀበረ ለቶ ኦዳ፤ ሀቄቹተ ዌዕራሻን ለዕይ «አይደጎ ላልቹ ዮሴ ጎሬ» ይ እሴበ ኦርዕዮ፤ ጠዉ እኩጎሬ ህከ ኦዳ፤ ሀቄቹበ ሆንጠኮ ወክት ኦዳ ላለኖ ወክቱ ኢልኖበእቤቺሃ ሀበር ቤሉ ላልቹ ዮሴበ እቅ።
 14 ሀካን እኮቤቺሃ እሰ ኦዳ፤ ሀቄቹተ «እዪሁ ከኒች ኤተሮን ኪች ላልቹ አቴንከ» ዬሴ። ሀካን ጠዉእንን አሳበንት ሞጮጭቶኤ።

እሰ ዱእ አኤኖ ምኖን ጌባ አታእረ ፋሹሰ
 (ማቶ. 21፥12-17፤ ሉቃ. 19፥45-48፤ ያህ. 2፥13-22)

- 15 እሱን ዩሩሳሌም ኢልቶ ወክት ኢሰ ዱኦ ኦሎና ምኒ ኣግ ምንሰ ኣዜን ህርታኦሪላክ ህዕርታኦሪ ፋሺኦ፤ ብረ ዶርተ መን ጠረጴዛተላክ ህንደዕርተ ህርታ መን ቦርጭመተ ገለበጮ።
- 16 ኢሰ ኣዪሁ ዱኦ ኦሎና ምኒ ግቤ ኣዜን መቲርቶሃ እጅ ህገኖበእገ ኣዘዡ።
- 17 ህትን ኢሰ እሳሃ « ምኡኡ ኡመቲ ጉዕሙንኩ መገኑ ኡጨኡወ ምኒ» የመም ጠሊሊ መጻፉን ከተበሞበእንደ? እኩጎሬ ኦዕኑ ሸፍጥ ቆጠ ኣቴንታኦ» ይተማርሴሰ።
- 18 ቁሰ ህለቀትላክ ሕግ ኢሰተማረት ህካን የን ሞጮጭቶ ወክት እሱ ሸታ ዎቃሃ ሀሶኡ፤ እኩጎሬ ኢሰ ተማርሰን መኑ ጉዕሙንኩ ትምርቴንከሰ ኣጅብሲጨቤቲሃ ዋጅቶኡ።
- 19 ኢሰላክ ኣሳበሰ ኡለት ሀዋርቶ ወክት ከተሚኛ ኣብል ፋልቶኡ።

ኦድ ሀቁኞች ደገሞ ትምርት
(ማቶ. 21፥20-22)

- 20 እሱን ለንክ በር ሱጵተ ዎቁን ህገን ኦድ ሀቁኞት ጠጸሴ ኢሊ ሞልቶኢሃ ለኦኡ።
- 21 ጴጥሮሰን ጠወሰ ሰውይ ኢሰ «ኢሰተማርኞ ከለእ! ኢት ቦርርቶንትሴ ኦድ ሀቁኞት ሞልቶኡ» ዩኡ።
- 22 ኢሰን ኢሰንተ «መገኖን ኣመዕንዩ።
- 23 ህንቅንከ ያንክዕኔ፤ እዪሁ ቀልቤንከሰ ሸኩዕናን ዩኢሁ ጉዕሙንኩ ኣህናገ ኣመዕን ከ ቆተተ <ከንቢኹ ኬእ ባራን ኡብ- ዩጎሬ ኣህናሰ።
- 24 ህካን እኩቤቲሃ እን ኩላንክዕኔ፤ ኦዕኑ መገኑ ኡጭቴንተርቶ ጉዕሙንኩ ክዕኔሃ ኣሰመኖህዕኔገ ኣመዕንቴንተጎሬ ክዕኔሃ ኣሰመኖህዕኔ።
- 25 ኦዕኑ ዱኦ እኢሃ ኡርቴንተ ወክት ኣዩ ኣሌኒ ኣፊንተ ገዱተ ኣጉሬ፤ ህካን እኩቤቲሃ ሰማን ዮ ኣኑክዕኔ ጨብክዕኔ ኣጉረኖህዕኔ።
- 26 ጠዉ እኩጎሬ ኦዕኑ መኑ በደሎህዕኔሃ ኣጉርቴንበጎሬ ሰማን ዮ ኣኑክዕኔ ክዕኔብድልሃ ኣጉረኖበኦ» ዩሰ። *

ኢሰ መ ሹምነቲን እእኖጎሬ ጠዕሜመገ
(ማቶ. 21፥23-27፤ ሉቃ. 20፤1-8)

- 27 ኢሰላክ ኣሳበሰ ለንኪሃ ዩሩሳሌም መርቶኡ፤ ህከኔ ኢሰ ዱኦ ኦሎና ምኒን ፈንቀላመን ቁሰ ኣምንሳኑት፡ ሕግ ኢሰተማረትላክ ባድ ባልቀት ኢሰበ ኣሚት
- 28 «ከ ጠወ ኣታንቲሁ መ ሹምነቲንት? ህከረንገ ካን ኣታንት ወልቀተ ኣሴሂሁ ኣዬት?» ይት ጠዕምቶሰ።
- 29 ኢሰን ኣሳንከ ፈንቀሽ «እን መቱ ጠወ ጠዕማንክዕኔ፤ ኦዕኑ እን ጠዕምቶርቶ ፈንቀሽቴንተጎሬ እን መ ወልቃን ከ ጠወ ኣኣሚት ጎሬ ኩላንክዕኔ።
- 30 ህንዳ ኩሌኡ፤ ያህይ ጠመቀኖ ጥምቀቱ መገኒኹትንደ ህከረንገ መኒኹት?» ዩሰ።
- 31 ህከ ወክትንከ ኢሰን «መ ይኑ?» ይት ገገዉንኩሰን ኣምዕላንት « መገኒኹት» ይኖምጎሬ ረሚሃ ያህይን ኣመዕንቴንተበኦ?» የኖኔ።
- 32 «መኒኹት» ይኑንደ?» ይቶኡ፤ ህካን ይታበእገ ኡመቲ ጉዕሙንኩ ያህይ «እብዬቹወ» የኖቤቲሃ መን ዋጅቶኡ።
- 33 ህካን እኩቤቲሃ ኢሰን ኢሰሃ «ነኡ ደንጋምበኦ» ይት ፈንቀሽቶኡ፤ ኢሰን ኢሰንተ «እን ካን መ ወልቃን ኣኣሚት ጎሬ ኩላንክዕኔበኦ» ዩሰ።

12

ወይን ላሉተ ኣገርታ መንተኔሃ
(ማቶ. 21፥33-46፤ ሉቃ. 20፥9-19)

- 1 ኢሰ ኣሳንከ ማቆን መቱ ወክት መቱ መንቹ ወይን ዩኖ ላልቹ ካሾ፤ ህከቤቹንከ ዘህሽ ኦኹ ላልቹሰ ጨንሹኖ ኡሎ ኣም ወይን ኣገረኖህኒሃ ህንሸሩ እጃር መክሾ፤ ህከኒኹ ኡተርን ሁኩ መንቹ ወይንሰ ቀባኖተ ኣሰ ቁዕራሽ ባዱ ኦርዕዮ።
- 2 ወይኑሰ ላለኖ ወክት ካድንቹሰ መር ላልቹኹሰ ኤቦተ ቀባኖበ ሶኮ።
- 3 እሱን ህከ ሶሃመ ካድንቹ እኖ ኦልት መቲርቶሃ ኣቱዕናን ኦንሰ ሸርቶኡ።
- 4 ለንኪሃ ወይንሰ እኑ ዋሉ ካድንቹ ሶኮ፤ ቀባኑሰ ህከ ካድንቹ ቡዕላሰ ፍልት ጠቱላይሰ ሆፍሰሰ ሸርቶኡ።
- 5 ህትን ወይንሰ እኑ ዋሉሰ ሶኮረ ሸቶኡ፤ ህትን ልግብ መን ሶኮረ መት-መቱሰ ዎቃርቶኡ፤ ዋሉሰንገ ሸቶኡ።

11:17 ኢሳ. 56፥7፤ ኤር. 7፥11። 11:23 ማቶ. 17፥20፤ 1 ቆር. 13፥2። 11:25 ማቶ. 6፥14-15። * 11:26 መት-መት ለሀ ክታቦት ዋላንሽ 26 ዮኢሃ በርግታበእ፤ ላገሰ ማቶ. 6፥15 ዮኢሃ ኣጉደኖ።

6 ቲሁ መንቸህስ ፈቆህ አተኖ ቤቱስ ሶጊን፤ ህካን እኮቤቸሃ «ኢ ቤቱ ከበጀታህ» ይ ሰውይ ኤተሮን ቤቱስ ቀባሪሰ ሶኮ።

7 ጠዉ እኮጎሬ ሁኩ ቀባኑት ገገዉንኩሰን «ከለዕዬ! ኡለሰ ረገኦህ ከኒት፤ ህካን እኮቤቸሃ አሜ እሱ ሸኖ፤ ነኡ ኡለሰ ረገዕናሞ» የቀንቶኡ።

8 እሰን እሱ አፍ ሸት ወይን አቡረ ኣዚች ኣብል ፋሸት ቶርቶኡ።

9 ህካን እኮቤቸሃ ሁኩ ወይንሰ እኑ መ አእኖ? አሜኝ ህከ ቀባኑሰ ሸ ወይንሰ ዎሎ መኒሃ አሰኖ።

10 ጠሊሊ መጻፋን
«ግንበኛኑት ህንቆ ክኑ
እሰ መረበ ቡዕል ክኑ እኩ።

11 ሁኩንን ቀርኝተ ሆጉ፤
ሁኩ ሆጉንት አሌቲኔ አጀብሲሳኦታን
የመሞ ከተበሞሃ ኣነበቤንታበእንዶ?» ዩኡ።

12 አይሁድ ሀለቀት ኢሰ ጠወዕኖ ሞሳልተ እሰንተ ለአኖሃ አሁሰ ደሳቤቸሃ አፎተ ሀሶ እቅ፤ ጠዉ እኮጎሬ ኡመት ዎጅቶቤቸሃ እኩርት መርቶኡ።

ግብር ባቲሃ ኢሰ ጠዕሜመገ
(ማቶ. 22፥15-22፤ ሉቃ. 20፥20-26)

13 ጠወአኖ ጠዉን ሉሲሶተ መት-መቱ ፈርሳውትለከ ሄርድሴሃ አሉ እሀኖ መነ ኢሰበ ሶኮኡ።

14 እሰን እሰበ አሜት «አሰተማርኛ! መቱ አደ ጎልቱዕናን ህንቅ መገን ዎቃሃ ተማርሲታንትሃን፤ አት ህንቅ አታንቲሃ አሁክ ደንጋሞ፤ ሮሞ ዎሚሃ ግብር ባቲ ገበአኑሃንዶ ገበአበሃን? ግብር ባንቲንዶ ሀከረንገ ባንቲንክ?» ይቶኡ።

15 ኢሰን እሰ ሂለ ጠወ ደገ «ሚሃ ሉሰሶኖኤተ ሀሴነንታት? ህንዴ ዲናረ ኤቤ ለኣሞ» ዩሰ።

16 እሰን መቱ ዲናረ ኤቦኤ፤ እሰን እሰንተ «ከን ዲናረ አሌን ኖ ፎቲትለከ ከተበሞ ሱዕመሁ አዬሃን?» ዩሰ፤

እሰን «ቁሳርዮ» ይቶኡ።

17 ኢሰን ፈንቀሸ «ህካን እኮች ዎሚሃ ዎሚንከ ህትን መገኒሃ መገኒንከ ኣሰዬ» ዩሰ፤ እሰን ጠዎንከሰ አጀብሲጭቶኡ።

ሬዮ መኑ ኬእሃሰ ሆንጠኮ ጠዕምቲተ
(ማቶ. 22፥23-33፤ ሉቃ. 20፥27-40)

18 «ሬዮ መኑ ሬሆኝ ኬእኖበኢ» ይታ ሰዲቃውት ኢሰበ አሜት፤

19 «አሰተማርኛ! መኑሰ መቱ መንቸ አለተ አሉዕናን ሬዮ ጎሬ ህከን ሬዮ መንቸ አመሰቤቱ ጫሰ ረገዕይ ህከን ሬዮ መንቸሃ አለተ አሉን» ይ ከተቦኒ።

20 መቱ ወክት ለመሉ አመኦሱት ሄኑ እቅ፤ እሳችን ህንገፋሰ ጫተ ኤብ አለተ አሉዕናን ሬዮ።

21 ህትን ለንክሁ ህተ ጫተ ረገዕይ አሉዕነ ሬዮ፤ ሰቂሁ ህትን እኩ።

22 ከን ሃሌን ለመሉንኩ ህተ ጫተ ረገእ አልቲዕናን ሬቶኡ፤ ህከኒች ኤተሮን ጫንትሰ ሬቶኡ።

23 ህካን እኮቤቸሃ ለመሉንኩ አመኦሱት ተሪን ተሪን ረገኡቤቸሃ ሬዮ መኑ ሬሆኝ ኬእኖ በር ህት ጫት አዬተ እካእ?» ይት ጠዕምቶኡ።

24 ኢሰን እሳንከ ፈንቀሸ «አዕኑ ህት ሉሴነንታሁ ጠሊሊ መጻፈተለከ መገን ዎልቀተ ደጉ ሆንተቤቸሃትበእንዶ?

25 ሁኩ ሬቶ መኑ ሬሆኝ ኬእ ወክት መላይክገ እካ ቤሉ ኣኢታበእሁ፤ ኣአቀንታበእሁ።

26 ጠዉ እኮጎሬ ሬቶሁኡተ ኬአትኔሃ መገኑ ቡበኖ ሸፎ ኣዜን መኑሰ ሉን አብራሃሂሂሃ፤ አሳቅለከ ያቁብሃ መገኑ» የኖሃ ጠሊሊ መጻፈኛ አነበቤንታበእንዶ?

27 ህካን እኮቤቸሃ መገኑ ፎሉ ኖ መኒሃ መገኑዎ ቤሉ ሬዮ መኒሃ መገኑሃበእ፤ ጠዉ እኮጎሬ አዕኑ ሉሴነንታት» ዩኡ።

ጉዕሚችን በተአኖ ትዛዝ
(ማቶ. 22፥34-40፤ ሉቃ. 10፥25-28)

28 ህከን ቤቸን ሕግ አሰተማራኝ መቱ ኦደንታኢሃ ሞጮጬኖት እቅ፤ እሰን ኢሰ ሁኩ ሬዮ መኑ ኬእኖበኢ ይታ ሰዲቃውት ጡመገ ፈንቀሸገ ለዕይ ኢሰበ ሆንጠክ «ትዛዚች ጉዕሚችን በተአኖ ሎረሃን?» ይ ጠዕሚኢ።

29 ኢሰን እሲሃ ፈንቀሸ «ጉዕሚችን በተአኖ ትዛዝ አሰራኤል መኑ ሞጮጭቤ! ቀርቸ መገንኔ ሚጦሃ ቀርቸ።

30 እቲሁ ቀርቼ መገኘክ ወመ ቀልብንከክ፡ ወመ ነብሴንከክ፡ ወመ ሰውቲንከክለከ ወመ ወልቃንከከ ኢት የኖሃን።

31 ህትን ካን አጉደኖ ለንክ ትዛዙ ሆሎ መን ገይክገ አት ኢት የኖሃን፤ ከን ለሞ ትዛዚች በተአኖ ዎሎ ትዛዙ ኖብእ» ይ መሰለ ፈንቀሺእ።

32 ሁኩ ሕግ አስተማርቼንኩ «አስተማርቼ! ጡመሃን! ለመገኘት ማጥቼሃን፤ እሰ ቤሎ ዎሎ መገኘት ኖብእ» ይት ጠወኢንቲሁ ሀንቅሃን።

33 ህካን እቡቤቼሃን መኑ ወመ ቀልብንከሰ፡ ወመ ሰውትንከሰ፡ ወመ ወልቃንከሰ መገኘት ኢቱ ሀሰሰኖሰ፤ ህትን ዎሎ መን ገይሰገ ኢቱ ሀሰሰኖሰ፤ ጭንጭ ክትመለከ ዎሎ ክትመ ጉዕመንከ መገንሂ ኣሲቹ ከ ለሙ ትዛዝ አገዕሩ በተአኖ» ይእ።

34 ኢሰን ሁኩ ሕግ አስተማርቼ ሀይማንከሰ ፈንቀሺገ ለዕይ «አት መገን ዎምንቲቶ ቁዕርትብሃን» ይሰ፤ ህከኒቶ ኤተሮን ኢሰ ጠዕሞተ መለሎሁ አጼሁ ኖብእ።

መሲህተኔሃ ሆንጠኮ ጠዕምቱተ
(ማቶ. 22:41-46፤ ሉቃ. 20:41-46)

35 ኢሰ ዱእ ሞኔን ተማርሰን «ሕግ አስተማረት ልዕሃንቼ መሲህ ደዉዳሃ ቤቱ ሞሀ ይታኦ? ይ ጠዕሚሰ።

36 ዳዉድ ገዉንኩሰ መሲህተኔሃ መገን ጠሊሎ እያኑ አዎንሴሃንሰ
« መገኘት ኢ ቀርቼሃ

እን ባለጋራክ ሎካቾክ ዎሮን አኦሄተ ኢለሬተ
መኪኤ አዲን አፋዕል ይእ» ይኖሰ።

37 ዳዉድ ገዉንኩሰ ቀርቾ» ይ ገኤሲቾ መሲህ ሀት እክ ደዉዳ ቤቱ እሆኖ?» ህከኔን ልግቡ መኑ ኢሰ ጠወኢኖሃ ተሸቲን ሞጭጭታኢት እቆ።

ሕግ አስተማረተለክ ፈርሳውያኑት ዎቀሰንቶገ
(ማቶ. 23:1-36፤ ሉቃ. 20:45-47)

38 ኢሰ ተማርሰን አሰንተ «ሕግ አስተማራች አገዕርዬ፤ እሰ ቅራዕሩ ኦድኑተ ኦድእ ሃንተን ጌቤ ኣዜን ኬዕምኚን ጠዉሲሰኖሰተ ኢትታኦ።

39 እሰን ጭምቶ ሞኔን ኬዕምኝ ቦርጭማን አፋዕሎለክ ድግሳኒን ኬዕምኝ ቤቾን አፋዕሎ ኢትታኦ።

40 አመሰልት ቅራርሰት ዱእ ኦተን ሞንሰ አኑ ሬዮ ማንቱ ጣንሰተን እታኦ፤ ህካን እቡቤቼሃ አሳሃ በተአኖ ፍርዱ አሌሰ እሆኖ» ይእ።

ምንሴ አኑ ሬዮ መንቾ ኣሰቱተ
(ሉቃ. 21:1-4)

41 ኢሰ ዱእ እኤኖ ሞኔን ሰደቀ ብረ ዎሪኖ ቀዎ ሳጥን መዳን አፋዕል ኡመቱ ብረ አሰኖሃ ለአኖት እቅ፤ ህከኔን ልግቡ ቀባጣሙ መኑ ልግብ ብረ ኣሰኖት እቅ።

42 ህከ ወክት መት ቡጥቹት ሞንሴ አኑ ሬዮ መንቾት አሜት ለሙ ሳንትብ እሆኖ ናሰ ብረ ኣቶኡ።

43 ኢሰ አሳበሰ እሰበ ገእ «ሀንቅንከ ያንክዕኔ፤ ከን ሳጥን ኣዜን ብረ ዎርቶሀኑኡች ጉዕሚችን ሞንሴ አኑ ሬዮ ቡጥቹት መንቾት በትሰ ኣቶኡ።

44 መሰንትሰ ዎሎ ጉዕመንኩ ኣቶኢሁ ኖሰ ቀባጦች ፈቆሰሃን፤ ጠዉ እኩጎሬ ት ቡጥቹት መቱርቼሃ ፌሱዕናን ኖሴሃ ጉዕመንከ ኣቶኡ» ይሰ።

13

ዱእ ሞኑ ድጀመሮን ኢሰ ራጎገ
(ማቶ. 24:1-44፤ ሉቃ. 21:5-33)

1 ኢሰ ዱእ ሞኒቶ ፋለንን አሳባቶ መቱ «አስተማርቼ! ከ አጀብሲሰኖ ዱእ ሞኒ ክኑለከ ግምብ ሞንታ ለእ» ይእ።

2 ኢሰ «ከ ሎረ ሞኒ ለኣንቲትንዶ? ኩ ክኑ ድጀሙዕናን መቱ ክኑ መቶ ክን ኢሉን ግምብሞ ገ ፈቀኖበእ» ይ ፈንቀሺኦ።

እኬሩ ዘማን መላተ
(ማቶ. 24:3-14፤ ሉቃ. 21:7-19)

3 ኢሰ ዱእ እኤኖ ሞኒቶ ብሬ አዲን ዘይት ሀቁ ነጸኖ ቆተ ኢሉን አፋዕልዮህኒን ጴጥሮሰ፤ ያቀቤ፤ ያህይለከ እንድራሰ ሜጡብ ኢሰበ መርት

4 «ኩን እሆኖህ መ ወክትዱት? ህትን ሁኩ ጠዉ ጉዕሙንኩ እሆተ ሆንጠኩ ወክት መላሰ መሃኅር ኩልኔ» ይት ጠዕምቶሱ።

5 ኢሰ እሰንተ «አዪሁ ሉሰሰኖህዕኔበእገ አገዕርዬ።

6 ልግቡ መኑ ሕን መሲህት፤ ይተን ኢ ሱዕሚን አሜት ልግብ መነ ሉሲሳኣ።

7 አዕኑ በገዝ ዱዱቡለክ በገዙሃ ሞጭጭቴንተ ወክት ህልቆኖቼ፤ ሁኩን ሆሮ እሁዕነ ፈቀኖበኣ፤ ጠዉ እኩጎሬ ሁኩንን ኣዱንያ ጎሬሃ መጨረሽሰበኣ።

8 ህካን እኩቤቺሃ መኑ መን ኢሉን ምጭ ምጭ እሉን ኬአኖ፤ ህትን አደደ ቤቾን ኡሉ ሌንቁቁለክ ጎሩ እሆኖ፤ እኩጎሬ ሁኩንን ኒጠና ኦርሻተ ወኔሃን።

9 «መኑ አፍ ዳኛኖተ ኣሰኖህዕኔ፤ ህትን ጭምት ምኔን ምቀርታህዕኔ፤ ህካን እኩቤቺሃ አዕኑ ገዉክዕኔ አገዕርዬ፤ ኢ ሱዕምተኔሃ ምሰክር እኩኖተ ሹመለክ ምጭ ብሬን ፍርዲሃ ኡርቴንተ።

10 ሃጭ ተሸት ላገት ኡመቲሃ ጉዕሚንክ ዱዱብሰሙ ህሰሰኖ።

11 መኑ አፍ ዳኛኖበ ሆንጠህሰኖህዕኔ ወክት ሙ ይኖም?። ህከረንገ መ ጠወዕኖም?» ይቴንገ ጨነቀንቶኖቼ፤ እኩጎሬ ህከ ወክት ኣሰንታህዕኔ ላገተ ጠወዕኖ፤ መሰንትሰ ህከ ወክት ጠወአኖሁ ጠሊሊ አያነ ቤሉ አዕኖበኣ።

12 ህከ ወክት እመቤቱ እመሰቤቱ፤ እኑሁ ቤቱሰ ሾኖተ ህግሽ ኣሰኖ፤ ህትን ኦሱት ኣንለክ አመ ኣሉን ዲኖማን ከአ ሽታሱ።

13 ኢ ሱዕምተኔሃ ጉዕሙንኩ መኑ ግበኖህዕኔ፤ ጠዉ እኩጎሬ መጨረሽ ኢሉ አደቢን አታዕላኖሁ በኩመኖ።

ጨነቃ ኦርሻተ
(ግጥ. 24፣15-28፤ ሉቃ. 21፣20-24)

14 ኮፍየኖ ሂሉርቹ እሁ ገበአበቤቾን እሆኖሃ ለኤነንተ፤ ህከ ወክት ህካን ኣነበበኖሁ ሰውዩን፤ * ህካን እኩቤቺሃ ይሁድ ባደን ዮ መኑ ቆተተ ሁንቱን።

15 ምኒ አሉ አሉን ዮ መንቹ ምኒቻ መቱርቹ ኣአም የን ድረን ወክት ቤሰንከ።

16 ህትን አቡረ ቤቾን ዮአሁ ኦድኑሰ ኣኣተ ኤተሩ ዋል ምንሰ ፈንቀሉንከ።

17 ህከ ወክት ላፈ ሜንቲሃለክ ቀንሰታ ሜንቲሃ ኦርሻት በተኣሰ።

18 ሁኩን ጉዕሙንኩ ከርሚን እሆኖበዕገ ዱአ አዕኖ።

19 ህከ ወክት መንኩ ክልቀት ከልቆች ከበሬ ኢሉ እኩበኣ ኦርሻት እካኣ፤ ህትን ህትኔ ጭንቀት ከ ኤተሩ እካበኣ።

20 ቀርቹ ህከ በራከተ ገቡትሾበዕቃኔተ መኑ ጉዕሙንኩ ጡመኖበኣ እቅ፤ ጠዉ እኩጎሬ እሰ መጠር መንተኔሃ በራከሰ ገበንቹ አኣኖ።

21 ህከ ወክት አዪሁ «መሲህ ሁኩዕኑን ከበ ዮኡ» ህከረንገ «ሁኩዕኑን ካጻ ዮኡ» ይህዕኔጎሬ አመዕንቶኖቼ።

22 ክዘብ መሲሁለክ ክዘብ ነብያኑት አሜታኣ፤ እሰን አታለሞሰ ጎሬ መንኩ መጠር መነ ሉሲሶተ አጀብሲሰኖ ጠወ አታኣ።

23 እኩጎሬ ኩ ጠዉ እሆተ ሃጭ ጉዕመርቹንከ ኩሎንክዕኔቤቺሃ አገዕርዬ።

መሲህ ፈንቀል አሜቱሰ
(ግጥ. 24፣29-31፤ ሉቃ. 21፣25-28)

24 ህከ ወክት ኦርሻች ኤተሮን እርቹት ቱንሰቹ እካኣ፤ ህትን አገንቹ ለሊሰኖበኣ።

25 ቤዜት ሰሜች ኡባኣ፤ ህትን ሰማን ዮ ዋልቀት ጉዕሙርቹንኩ ሌንቁቁኖ።

26 ህከኒች ኤተሮን እሰን መንች ቤቱ ሎረ ወልቃንለክ ኬዕምኣን ጎመ ኣዘን አሜተን ለኣኣ።

27 ህከኒች ኤተሮን እሰ መላይከተ ሶክ ሾሎንክ አዲን ሰሜች ምርን ኡሉ ዳንጊች ዳንገ ኢሉ መንኩ መጠር መነ ጭምአኣኖ።

ቀርቹ አሜተኖገ ለሊሰ ኦድ ሀቁቾ ምሳልተ
(ግጥ. 24፣32-35፤ ሉቃ. 21፣29-33)

28 ኦድ ሀቁቾ ምሳልተ ተማርሰቱንክዕኔ፤ ህመንኩሴ ቀንሰንለክ ሀበረ ኡብ ለተኖ ወክት ሀገ ሆንጠሁሰ ደኔነንተ።

29 ህትን አዕኑ ሁኩ ጉዕሙንኩ ጠዉ እሆን ለኤንተ ወክት ኡርን ሆንጠኩሃ እሁሰ ደኔ።

30 ሀንቅንከ ያንክዕኔ፤ ከን ዘማን መኑ ኩ ጠዉ እሁዕነ ሃጭ ህገኖበኣ።

31 ሰሞሁለክ ኡለት ህጋኣ፤ ጠዉ እኩጎሬ ላገኤ ሆሮን ህጋበኣ።

13:9 ግጥ. 10፣17-20። 13:13 ግጥ. 10፣22። * 13:14 ኣነበበኖሁ ሰውዩን፤ ዩሌሁ ኢሰ እሁዕነ ግርጭሴህት። 13:14 ዳን. 9፣27፤ 11፣31፤ 12፣11። 13:15 ሉቃ. 17፣31። 13:19 ዳን. 12፣1፤ መድ. 7፣14። 13:25 ኣሊ. 34፣4፤ እዩ. 2፣10፤ መድ. 6፣13። 13:26 ዳን. 7፣13፤ መድ. 1፣7።

ቀርቼ አሜተኖ በር አዪሁ ደገናበአ
(ማቶ. 24፥36-44)

32 ህክ በርሊክ ህክ ወክት መገን ቤሉ አዪሁ ደገተ አታለናበአ፤ ህትን ሆሮን ሰሜ መላይከትለከ ቤቱህ ደገናበአ።

33 እዕኑ ወክቱሰ መ ወክት አህናገሬ ደገነንተበአቤቹሃ ጠረኝቲን አገሪርዬ።

34 ሁኩንን መቱ ዎቃ ሃመኖ መንቹ አጉደኖ፤ እሰን ምንሰ አጉር ሃመን ካዲመሰ እሰን እክ ሆጉተ አገግ መት-መትሃሰ ሆጉተ ኣሴአ፤ ህትን አገራንቹንከ ጠረኝት አገር ይ አዘዙ።

35 ህካን እኮቤቹሃ ምንሰ እኑ መ ወክት አሜተኖገሬ ደገነንተበአቤቹሃ ጠረኝቲን አገሪርዬ፤ መሰንትሰ እሰ ሀዎጶተ ህከረገገ ሀንከዕሬ በላን ህከረገገ ሀንጠሶ ወደን ህከረገገ ሱጵተ አሜቱሰ ደገነንተበአ።

36 ህካን እኮቤቹሃ ድንገቱን ኦሳኤናን አሜተኖበዕገ ጠረኝቲን አገርዕዬ።

37 «ክዕኔሃ ኩሎምገን ዎሎ መኒሃ ጉዕሚንከ ጠረኝቲን አገሪርዬ! ያም» ይ ተማርሴአ።

14

ኢሰ እሴን አድመ አኤመገ

(ማቶ. 26፥1-5፤ 22፥1-2፤ ያህ. 11፥45-53)

1 ሻሽገሊክ ራጭቱ ዮበኢሃ ጨልሰሞ እቸተ እቲን ከበጃኖ ከበጀ በሪሃ ለሙ በሩ ፈቆሰ እቅ፤ ቂሰ አዎንሳኑትለከ ሕግ አሰተማረት ኢሰ መኑ ደጉዕን እፍ ሸቶተ አሳሃ ቆሀኖ ዎቃሃ ሀሳኢት እቅ።

2 ጠወ እኮገሬ እሰን «ከን ከበጀ በሪን አፎኑንከ፤ መሰንትሰ መኑ ብተተ ኬሰኖ» ይቶኤ።

ኢሲሃ ሸቱተ ቡርቶ መንቹተ

(ማቶ. 26፥6-13፤ ያህ. 12፥1-8)

3 ጎግ አሴን ፋልታ ጥዘነት አፎሰ «ሰሞኔ» ዬኖ መንቹ ምኔን ብታን ከተማን ኢሰ ማዳን አፋዕልኖ እቅ፤ ህከ ወክት መት መንቹት «አልባሰጥርሰ» ዬኖ ክኒቶ መክሴመ ብልቃጣን «ናርዶሰ» ዬኖ ሸቱት ዊንትኢሃ እፍ አሜቶኤ፤ ሸቱሰን አበ ቤአተ እቅ፤ እሴን ብልቃጥ አፈ ብጥ ሸቱሰ ኢሰ ቡዕላን ዲንቶኤ።

4 ሀከኔ ሄዕኖ መኒቶ መት-መቱሰ ኡሙዕርት «ኩ ሸቱት ተሳን በአኢሁ ሚሃት?

5 ኩ ሸቱት ሰሴ ጥቤ ዲናረ ሀሪን ብረሰ ቡጥቻኖተ ኣሴመ እቃን ጡመሃበአንደ?» ይተን መንቹተ ቀንጦሴ።

6 ጠው እኮገሬ ኢሰን «እሴተ ሚሃት ኦርሴንገተሴሁ? አጉሬሴ፤ እሴ ኤሳሃ ጡመርቹ አቶኤ።

7 ቡጥቻኑት ጉዕመ ወክትንከ ክዕኔን ሚጡብ ሄአቤቹሃ ሀሴንተ ወክት ሀዕልቶናሰተ አታልቲንገተ፤ ጠወ እኮገሬ እን ክዕኔን ጉዕመ ወክት ከኔ ሄአምበአ።

8 እሴ አቶተ አታልቶኢሃ አቶኤ፤ እን ሞገሙዕናን ሄጭት አሴንከኤ ሸቱተ ቡርቶኤ።

9 ሀንቅንከ ያንክዕኔ፤ ኡላ አሴን ተሸት ላገተ ዲዲብሴኖ ቤቾን ጉዕማንን እሴ አቶርቹ እሴተ ቃንኖተ ኩለመኖሴ» ዬሰ።

ይሁድ ኢሰ ህግሽ ኣሶተ አማዕለሙሰ

(ማቶ. 26፥14-16፤ ሉቃ. 22፥3-6)

10 ህከኒቶ ኤተሮን ቶን ለምንከ አሳባቾ መቱሰ አሰቆርንቶ ይሁድ ኢሰ ህግሽ ኣሶተ ቂሰ አዎንሳኖቤቹ ኦርዕኖ።

11 እሰን ህካን ሞጮጭቶ ወክት መንደእ እሲሃ ብረ ኣቶተ ላገተ ኣጎኤ፤ ይሁድን ህከን ወክቲቾ ኬሽ ኢሰ ህግሽ ኣሶተተ ጡመ ወክት ሀሰኖተ እቅ።

ኢሰ ሻሽግ ሁርባት አሳባንተሰን እቲሰ

(ማቶ. 26፥17-25፤ ሉቃ. 22፥7-14፤ 21፥23፤ ያህ. 13፥21-30)

12 ሻሽግ ሆልቹ ጎራጤን ጦርሹ እቲን ከበጃኖ ከበጀ ዎኔ በሪን አሳባሰሰ ኢሰሰ አሜት «ሻሽግ ሁርባት እቶተ ህከቤቹ መርን ቅጥ አዕኖሂተ ሀሰን?» ይት ጠዕምቶሰ።

13 እሰን አሳባቾሰ ለሙሰ «ከተመ መርቲን ዊ ኮሩ እጃ መንቹን ደቀንቲንሰ ህከ መንቹንከ አዎኜ።

14 እሰ አገኖ ምኒ መርቲን ምንሰ እን «አሰተማርቹ አሳባንን ሻሽግ ሁርባት አታም ኮህ ምኑ ሀከንቤቾንት? የኖት» ይዬ ደ ሶኮ።

15 እሰን ሎረ አልባዕሎ ፋቅ ምኔን ሀሰሰኖ ሀዕኔርቹ ጉዕሙንኩ ቅጠሞኢሃ ለሊሰኖህ፤ ህከን ቤቾን ቅጥአዕዬ» ዬሰ።

16 ለሙንኩ እሳባንት ህከንቤቸች ፋልት ከተመ መርቶኤ፤ እሳንከ ኢሰ ዩገን ጉዕሙርቸንኩ እኩ፤ ህካን እኩቤቸሃ እሰን ሻሽግ ሁርባት ህከን ቤቸን ቅጥአቶኤ።

17 ኡለት ሀዋርቶ ወክት ኢሰ ቶና ለሞንከ እሳባን ሚጡብ አሜቸ።

18 ህከን ቤቸን ጉዕሙንኩስ ማዳን አፋዕልት እተንን ኢሰ «ሀንቅንከ ያንክዕኔ፤ ክዕኔች መቱ ኢን ከኔ ቱሱ ሁርባት እተናሁ ኤሳሃ ህግሽ ኣሰና» ዩሰ።

19 እሰን ህከ ወክት አበ ሻዝ ተሪን ተሪን ኢሰ «አኔትንዶ?» ይተን ጠዕምቶኤ።

20 ኢሰን ፈንቀሽ «ህካን እአናሁ ቶን ለሚችክዕኔ መቱሃሰ፤ እሰን ኢን ሚጡብ ብጥራን አንገተ ወር እተናሃን።

21 መንች ቤቱዕኔ እሰተኔሃ ከተበሞገን ሬሁዕናን ፈቀኖበኣ፤ ጠው እኩጎሬ መንች ቤቱ ህግሽ ኣሰናህኒሃ ቆሀኖሰ፤ ሁኩ መንቸ ሄጭ ከለቀሞበኣቀ ቆሀኖሰ እቅ» ዩኣ።

ጠሊላ ቁርባን ሴራ

(ማቶ. 26፡26-30፤ ሉቃ. 22፡14-20፤ 1 ቆር. 11፡23-25)

22 እሰን ሚጡብ እተንን ኢሰ ጦርሹ ኪሽ ዱኣ አዕይ ብጭ አሳባተ «ሂዕዬ፤ ኩን ማላኤ» ይ ኣሴሰ።

23 ጠባቱሃ ኪሽ ዱኣ አዕይ አሳባተሰ ኣሴኣ፤ ጉዕሙንኩስ ህከን ጠባቱች አጎኤ።

24 ህትን ኢሰን እሳሃ «ኩን ልግብያ መኒሃ ዱንተአኖሃ ወኣድ ቁንኣኤ።

25 ሀንቅንከ ያንክዕኔ፤ መገን ምሞንቴን ሃዕር ሃሌን አጋሚሃ ኢላ ከን ወይን ላልቸች ጨንሸሞሃ ለንኪሃ አጋምበኣ» ዩሰ።

26 ህከኒች ኤተሮን መዝሙረ ዘመርት ዘይት ሀቁ ነጻኖ ቆተተ ፋልቶኤ።

ጴጥሮስ ለገአኖሰገ ኢሰ ሄጭ ጠወኡሰ

(ማቶ. 26፡31-35፤ ሉቃ. 22፡31-34፤ ያህ. 13፡36-38)

27 ኢሰን አሳባሰ « ዜማንቸ ሞቀር ሻም፤ ሆለንትሰ ብን ይታኤ የመም ከተበሞቤቸሃ ጉዕሙንኩክዕኔ ኤሳሃ ለገኤን አጉርቲን ሆንቴንተ።

28 ጠወ እኩጎሬ ሬሆች ኬዕዮሚች ኤተሮን ገሊለተ ክዕኔተ ሄጭ መራም» ዩሰ።

29 ህከ ወክት ጴጥሮስ ፈንቀሽ «ሞሉ መኑ ጉዕሙንኩ ለገዕዮሄ ጎሬ እን ሆሮን ለገአንኬበኣ» ዩኣ።

30 ኢሰን ጴጥሮስ ፈንቀሽ «ሀንቅንከ ያንኬ፤ ከበሬ ሀንክዕርተ ሀንጠቦ ለሞረ ወዱዕናን ሄጭት ሰሶረ ለገአንቴኤ» ዩኣ።

31 ጠው እኩጎሬ ጴጥሮስ «እን ከን ሚጡብ ሬሀም ጎሬሁ ለገአንኬበኣ» የን ጠረኝሽ ጠወዕዮ፤

ፈቆ አሳባንት ጉዕሙንኩ ህትን ይቶኤ።

ኢሰ ጌቴሴማንን ዱኣ እኤሰ

(ማቶ. 26፡36-46፤ ሉቃ. 22፡39-46)

32 ህከኒች ኤተሮን «ጌቴሴማኔ» ዩኖቤቸ መርቶኤ፤ ህከን ቤቸን ኢሰ አሳባንተሰን «እን ዱኣ እኤተ ኢላ ከንቤቸን አገሬ» ዩሰ።

33 እሰን ጴጥሮስ፤ ያቀበለከ ያህይ አምንሰ ኦርዕዮ፤ ህከን ቤቸን እሰን አበ ሻዝን ጨነቀሙ ጀመር።

34 እሳንከ «ነብሴቸኤ ሪቶተ ኢላ አበ ሻዞኤ፤ አዕኔ ከኔ ግሶኑዕናን አገሬ» ዩሰ።

35 እሳቸን ቀው ቁዕር ኦርዕዮ፤ ሚኔንከሰ ኡላን ጎምብሰም ኡብ አታለመኖሄ ጎሬ ሁኩ ኦርሸ ወክቱ እሰች ህጎተ ዱኣ አዕዮ።

36 እሰን «ኢ ኣነ! ጉዕሙርቸንኩ አታለመኖሄ፤ ከ ኦርሸ ጠባቱሃ ኢች መሰ፤ ጠወ እኩጎሬ እን ዩምገ እሁዕን እት እትቶንትገ እህን?» ይ ዱኣ አዕዮ።

37 ህከኒች ኤተሮን ሰሶንከ እሳባሰሰ ፈንቀል አሜተኖ ወክት እሰን ግሶ እቅ፤ ህካን እኩቤቸሃ ጴጥሮስ «ሰምኑ! ግሶንትዶ? ሆሮን መቱ ሳኣቲሃ በቅ ይት አገሩ አታልቶንትበዕንዶ?» ዩሰ።

38 ህትን «ፊተናን ኣኔንተበአገ ጠራኝቴን ዱኣ አዕዮ፤ እያኑ ቅጥ ይዮኡ፤ ጠወ እኩጎሬ ማሉ ላፈሃን» ዩኣ።

39 ለንኪሃ ኦርዕይ ወዕና ጠወዕዮ ላገንተ ጠወእን ዱኣ አዕዮ።

40 ህከኒች ኤተሮን እሳባሰሰ ፈንቀል አሜተኖ ወክት ግሰኛት ኬዕምታንሰ ግሶ እቅ፤ ጠዕመኖ ወክትንከ ፈንቀሽቶተ አታልቶበኣ እቅ።

41 ለንኪሃ እሰሰ ፈንቀል አሜቸ «ቲህ ግሴንተገለከ ፎሎጭቴንተገን የንተንዶ? ቲሱ እሀኖ፤ ወክቱ ኢልዮኡ፤ መንች ቤቱ ጨበኛኖ አንጋን ህግሴን ኣሴኖ።

42 ቲሱ ኬዕይ መርኖ፤ ኤሳሃ ህግሽ ኣሰናኤሁ ሁኩዕኔ ሆንጠኩኤ» ዩኣ።

ኢሰ ህግሴን እሴመገለከ አፌጠገ

(ማቶ. 26፡47-56፤ ሉቃ. 22፡47-53፤ ያህ. 18፡3-12)

43 ወክትንከሰ ኢሰ ካን ጠወአን ሃዕዮገን ቶን ለምችሰ መቱሰ «ይሁደ» ዬዮሁ አሜቸ፤ እሲን ሜጡብ በርተላክ ብሰ ኦሮ ልግቡ ሙኑ ሃዕዮ አቅ፤ እሲን ቂሰ አምንሳኑትለክ ሕግ አሰተማረት ባድ ባልቃች ስህንቶአረ አቅ።

44 ህግሽ ኣሰድ ይሁድን እሰንተ አዕኑ «አን ሱንቃንሲሃ ጠረኝሴን አፊን መሰዬ» ይ መላተ ኩሎሰ አቅ።

45 ወክትንከሰ ይሁድ ደዕል አሜች ኢሰበ ሆንጠክ «አሰተማርቸ!» ይ ሱንቂሰ።

46 ህከኒች ኤተርን ሁኩ ሙኑ ኢሰ አሮኤ።

47 መዳንከሰ ኡርቶሁኤች መቱሰ ብሰ ኩብ ኣዚች ፋሽ ሎረ ቂሰች ካዲንቸ መጨሰ ሙር።

48 ህከ ወክት ኢሰ «ብሰለክ በርተ አፊን አሜቲንታሁ ሽፍጥገ አሮኖኤታትንድ?

49 ጉዕመንከ በር ዱእ ምንን ተማርሰን ክዕኔን ሜጡብ ሃኔን አፊንታኤብ አቅ፤ ጠዉ እኩጎሬ ኩን እኩሁ ጠሊሊ መጻፋን ከተባሞሁ ዋሞታት» ዬሰ።

50 አሳበሰ ጉዕሙንኩ እሱ አጉርት ሁንቶኤ።

51 ነጠላ ኦደዕዮ ሙቱ ዋደልቼ አምነሶሲት አቅ፤ እሱንከ ሁኩ ሙኑ አሮኤ።

52 አሮሰ ወክት ነጠላሰ ኡጅ ከልሰ ሁኝ ፋሽኤእ።

ኢሰ ይሁድ ፍርድ ኣገትብ መሴመሰገ

(ማቶ. 26፥57-68፤ ሉቃ. 22፥54-55፤ 63-71፤ ያህ. 18፥13-14፤19-24)

53 ህትን ኢሰ ሎረ ቂሰች ምኒ መሰቶሰ፤ ህከን ቤቸን ቂሰ አምንሳኑት፥ ባድ ባልቀትለክ ሕግ አሰተማረት ጉዕሙንኩ ጭምይቶኤ አቅ።

54 ጴጥሮሰን ኢሰ ቂሰ አምንሳንች ምኒ ኡር ብትም ኣዛ ኢሊ ቄዕራሻን አምነሶሲት አቅ፤ ህከኔን እሰ ዘበኝን ሜጡብ ጊረተ ኢብጨኖት።

55 ቂሰ አምንሳኑትለክ ኣገት ደኛኑት ጉዕሙንኩ ኢሰ ሽሲሶተ ምስክር ሀሳኢት አቅ፤ ጠዉ እኩጎሬ መቱርቸሃ ደጎበእ።

56 መሰንትሰ ልግቡ ክዘብ ምስክሩ ልግብ ጠወ አሌሰ መስከርቶ አቅ፤ እኩጎሬ አሌሰ መስከርቶ ላገት አደደ እኩኤ።

57-58 መቱ-መቱ መኑ ከኤ « አን ከን መን አንጋን እጅረሞ ዱእ ምኒ ድጅ ዋሉ መን አንጋን እጅረሞበኢሃ ሰሶ በሬች ኤተርን እጅራም» የን ሞጮጭኖም» ይተን ክዘብ ኢሰ አሌን መስከርቶኤ።

59 ህት ይቶ ጎሬሁ ምስክሩ ጠወዕዮ ላገት ሜጡ እኩበእ።

60 ሎሩ ቂሰቸንኩ ብሬንከሰ ኡር ኢሰ «ጠወአንትርቸ ዮበእንደ? ኩ ሙኑ ኪ አሌን መስከርታኢሁ መርቸሃን?» ይ ጠዕሜእ።

61 ጠዉ እኩጎሬ ኢሰ መቱርቸሃ ጠወኡናን ጨላ ዬእ፤ ሎሩ ቂሰቸንኩ ኢሰ ፈንቀሽ «ማሰአሞ መገን ቤቱ መሴሁ አቱትንድ?» ይ ጠዕሜሰ።

62 ኢሰን «ኤ አኔት፤ መገች ቤቱ ጉዕመንከ አታለኖ መገን መኪ አዲን አፋዕል ሰሜ ጎማን አሜተን ለኤንገተ» ዬእ።

63 ሎሩ ቂሰቸንኩ ኦድኑሰ ፊል «ዋሉ ምስክሩ ሚሃ ሀሰሰኖኔ?»

64 አዕኑ አሰ ቦርር ላገተ መገን አሌን ጠወአን ሞጮጭቲንታኤ፤ ህካን እኩቤቸሃ ኩ ጠዉ ክዕኔሃ ሙ አጉደኖህዕኔ?» ዬእ፤ ህከ ወክት እሰ ጉዕሙንኩሰ መቱ ላጋን «ሬሁት ገበአሰ» ይት ፈረደኤ።

65 መት-መቱ መኑ አሌሰ አንጀቱ ዮ ጀመርቶኤ፤ እልሰ ኦድኖን ድብ ኡሱርት መጨላ ዋቀርተን «ህንዴ እዬት ዋቀርሄሁ? ደግ! ራገ ጠወእ» ይታሲት አቅ፤ ህትን አገርታሩንኩ ኦልተን መሰቶሰ።

ጴጥሮሰ ኢሰ ለገኤሰ

(ማቶ. 26፥69-75፤ ሉቃ. 22፥56-62፤ ያህ. 18፥15-18-25-27)

66 ጴጥሮሰን ቂሰ አምንሳንች ምኒ ዋር አዲን ግቤ ኣዚን ሃዕዮገን ቂሰ አምንሳንች መት ገረድቸት አሜቶኤ።

67 እሴን ጴጥሮሰ ጊረተ ኢብጨን ቱክ ይት ለእ እሱ «አት ነዘሬት ኢሰን ሜጡብ ሃኔንት አቅ» ይቶሰ።

68 ጠዉ እኩጎሬ ጴጥሮሰ «አን ደጋንሰበኤ፤ አት ይታንትንኩ ኣጎኤበኤ» ይ ለገዕዮ፤ ህካን ይ ኣብል ፋሎገን ህንጠሶ ዎጀ።

69 ህት ገረዴቸንት ጴጥሮሴ ለእ ህከኔ ኡሬ መኒሃ «ኩን አሳች መቱሃሰ» ይቶኤ።

70 ጠዉ እኩጎሬ እሰ ቱሁ ለገዕዮ፤ ህትን ቀዉ ጌሰ አገርት ህከኔ ኡርቶ ሙኑ «አት ገሊሊ መንቸ እኩንትቤቸሃ ህንቅንከ አት አሳች መቱሃሰ» ይቶሰ።

71 ጠዉ እኩጎሬ ጴጥሮሰ «አዕኑ ከ ይቱንገተ መንቸ ደጋንሰበኤ» የን ገውሰ ቦርሩለክ ጤሌዕሉ ጀመር።

72 ህክ ወክት ሀንጠሶ ለንኪሃ ዎጅ፤ ጴጥሮስን «ሀንጠሶ ለሞረ ወዲሳን አት ኤሳሃ ሰሶራ ለገአንት» ዬ ኢስ ጠወዕዮ ጠወ ሰዉ ይ ቡብ ኦዕዮ።

15

ኢስ ጵላጦሴቦ መሴመገ

(ግዮቶ. 27፡1-2፤11-14፤ ሉቃ. 23፡1-5፤ ያህ. 18፡28-38)

1 ገሰመ ሱጵተ ቁስ አዎንሳኑት፤ ባድ ባልቀትለከ ሕግ እስተማረት ኦገት ደኛኖን ሜጡቡ ጉዕሙንኩ ደቀንት አማዕለንቶኡ፤ ህከኒች ኤተሮን ኢስ ኡሱርት መሰት ገሻንቾ ጵላጦሴሃ ህግስ ኣቶሰ።

2 ጵላጦሰን ኢስ «አት አይሁድያ ዎመንዶ?» ይ ጠዕሜስ።

ኢስን ፈንቀሽ «አት ይቶንትጋንት» ዬስ።

3 ህትን ቁስ አዎንሳኑት ኢስ አቦ ጠዊን ኦዲሲት አቅ።

4 ጠዉ እኮጎሬ ጵላጦሰ ኢስ «ሄንከ ጠዊን ኦዲሄት ከ ለእ! ከን መኒሃ መቱርቼሃ ፈንቀሽጋንትቦዕንዶ?» ይ ለንኪሃ ጠዕሜስ።

5 ጵላጦሰ አቦ አጀብሲጮተ ኢላ ኢስ መቱርቼሃ ፈንቀሽዮባእ።

ኢስ አሌን ሬሆ ፍርድ ፈረደመሰገ

(ግዮቶ. 27፡15-26፤ ሉቃ. 23፡13-25፤ ያህ. 18፡39-40፤ 19፡1-16)

6 ጵላጦሰ ዘማን ዘማኔ አይሁድ ሻሽግ ከበጀ ወክት ሂሮኖተ መኑ ሀሶኢሃ ኡሱሬመ መኒች መቱ መንቼ ሂረኖ አቅ።

7 ህክ ወክት ዎምነቱክ ግብ መነሻት ኡሱረንቶ መን ቦለች «ባርባኔ» ዬኖ መንቼ ሄዕዮ አቅ።

8 መኑንኩ ጵላጦሴቦ አሜት ሮሽገን መቱ መንቼ ሂረተ ጠዕምቶሰ።

9 አሰን «አይሁድ ዎመ ሂሮህዕኔተ አትቲነንንዶ?» ይ ጠዕሜስ።

10 ህካን ዬኢሁ ቁስ አዎንሳኑት ኢስ ህግስ ኣቶኢሁ ጠቁን አሁስ ደጎቤቼሃንት አቅ።

11 ጠዉ እኮጎሬ ቁስ አዎንሳኑት «ባርባን ሂረመኔ ቤሉ ኢስ ሂረመንከ» ይት መኑ ጵላጦሴ ጠዕመኖግ መነ ኬሰንስቶኡ።

12 ጵላጦሰ ለንኪሃ ፈንቀሽ «ህካን እኮች ከ አዕኑ አይሁድ ዎመ ይቲነንታሃ መ አኡ?» ይ ጠዕሜእ።

13 አሰን «ሰቀል» ይተን ላገሰ ጎት አት ጨነጭቶኡ።

14 ጵላጦሰን «ሚሃት? እስ አዕዮ ሂሉርቼ መርቼሃን?» ዬስ፤

ጠዉ እኮጎሬ አሰን «ሰቀል» ይተን ወዕኔች በትስ ጨነጭቶኡ።

15 ጵላጦሰ መነ መንዲሲሶተ ይ ባርባኔ ሂረ ገፈሮ፤ ህከኒች ኤተሮን ኢስ ገርፍ ሰቀልቶተ ህግሽ ኣሴእ።

ወታደሩ ኢሳን ቀለዲስ

(ግዮቶ. 27፡27-31፤ ያህ. 19፡2-3)

16 ሮም ዎታደሩ ኢስ ጵላጦሴ ግብተ መሰቶኡ፤ ፈቆ ወታደረ ጉዕመንከ ገለቶኡ።

17 ሰመ አኑደኖ ብሽ ኦድኑተ ኢሲሃ ኦዲስ ኡት አክሊለ መክሰ ቡዕለሰ አቶኡ።

18 ህካን አቶች ኤተሮን «አይሁድ ዎመ! ወገሬቱ ኬሳሃ አሆሂ!» ይተን ቀለዲሲት አቅ።

19 እሰን ሾምቦቆን ቡዕለሰ ዎቀርተን አንጀ አሌሰ ቱ ይታኢት አቅ፤ ህትን አሰን ቀለዲን ብሬስ ጉሉጵት ሰገደሰ።

20 እሰን እሰን ቀለዲች ኤተሮን ህከ ሰመ አኑደኖ ቢሽ ኦድኑተ ፋሽት ገይሰ ኦድኑተ ኦድሰ ሰቀልቶሰተ ኣእት መርቶኡ።

ኢስ ሰቀለሙሰ

(ግዮቶ. 27፡32-44፤ ሉቃ. 23፡26-43፤ ያህ. 19፡17-27)

21 መርተንን እስክንድርለከ ሩፎሴ እኑ ቀሬን ባድ «ሰሞኔ» ዬኖ መንቼ ገጠሪች ከተመ አሜተን ደቀንት ኢስ መሰቀለ አጅተ ግዳጅሶስ።

22 እሰን ኢስ «ጎልጎተ» ዬኖቤቼ መሰቶሰ፤ «ጎልጎተ» ዩ ቡዕል ቁላሃ ዩሃን።

23 እሰን ኢሲሃ «ከርቤተ» ዬኖ ዘቢን ልቀለቀሞ ወይን ጠጀ አጎተ ኣቶሰ፤ ጠው እኮጎሬ ኢስ አጎባእ።

24 ህከኒች ኤተሮን እሱ ሰቀልቶኡ፤ ህትን ህኩንስ አዬሃ ኢሊኖ ጎሬ ደጎተ ኦድኑስ እጠ ኡጅተ ቤቀንቶኡ።

25 እሰን ኢስ ሰቀልቶ ወክቱ ገሰሜ ሰሶሃ ሳኣት አቅ።

26 ህትን ወንጀልሰ ለልሶተ «አይሁድ ዎመ» ዮኖ ከተበሞ አቅ።

27 እሰን ኢሲን ሜጡቡ ለሙ ሸፍጠ መቱ መኬ አዲን መቱሰ ጉረ አዲን ሰቀልቶኡ።

28 [ከን ሃሌን «ሾከ መኒን ዋለአሞ» የመሞ ራግ ላገት ዋንቶኡ።]*

29 እስ መዲን ሀገኖ መኑ እሱ ህንቅ ቡዕለስ ሌንቄቅስን «ለዕዩስ፤ አት ዱእ ምኒ ድጅት ሰሶ በሬን እጃርታንተሁ!

30 ህንዴ ቱሱ መስቀሊች ድርት ገውክ ፊስ። ይታሰት እቅ።

31 ህትን ቁስ አዋንሳኑትለከ ሕግ አስተማረት ገገዉንኩሰን «እስ ዋሉ መን ፌሾኡ፤ እኮጎሬ ገውስ ፊሶተ አታሎበእ።

32 እስ ፊሳንቹ መሲሁ እስራኤል ዋመ እኮጎሬ ህንዴ ቱሱ ከን መስቀሊች ድሩን፤ ነኡን ለዕን አመዕንናም» ይተን ህንቃሲት እቅ፤

ህትን እሲን ሰቀለንቶአሩ ህትን ይተን ቦርርታሲት እቅ።

ኢስ ሬሁሰ

(ማቶ. 27:45-56፤ ሉቃ. 23:44-49፤ ያህ. 19:28-30)

33 ህከ በር ሌሆ ሳቲች ኬሽ ሆንሱ ሳት ኢላ ኡለ ኢሌን ጉዕማንን ቱንሰቹ እኮ።

34 ሆንሱ ሳት እኮ ወክት ኢስ «ኤሎሄ! ኤሎሄ! ላማ ሰበቅታኒ» ይ ሎረ ላጋን ያሮ፤ ፍሳረንትሰ «ኢ መገኖ! ኢ መገኖ! ማሃ አጉርቴኤ» ዩሃን።

35 ህከኔ ኡርቶ መኒች መት-መቱሰ እስ ያረናሃ ሞጮጭት «እልያሴ ገአናት» ይቶኡ፤

36 አሳቶን መቱሰ ደገጅ መር ሆለጮ ወይን ጠጀ ሰፍንገ ተዩሳህኒን ዋንሽ ጨፍ ሾንቦቆ ሰናን አዕይ ኢሲሃ እስ «ህንዴ አገሬ፤ እልያሰ አሜች ድርሰኖሰ ጎር ለዕናም» ዩእ።

37 ህከኒች ኤተሮን ኢስ ሎረ ላጋን ያር ሬኖ።

38 ህከ ወክት ዱእ ምኒ መጋረጃ አሌች ወሮ ኢላ ለሙበ እክ ፊልተዕኖ።

39 ኢስ ሰቀለሞ መስቀል ብሬን ኡርኖ መቱ ጥቤ ሀለቅቹ ኢስ እክ ሬኖገ ለዕይ «ሀንቅንከ ኩን መገንያ ቤቱ እቅ» ዩእ።

ጎልጎታን ሄኔ ሜንቱ

(ማቶ. 27:55-56፤ ያህ. 19:25-27)

40 ቄዕራሻን ኡርት ለአን ሄኔ መት-መቱ ሜንቱ ህከኔ ሄኔ እቅ፤ እስ በላን መግደል ከተም መርየማ፣ ማዕን ያቆቤለከ ኖሲ አመት መርየማ፣ ሰሎሚ ሄኔ እቅ።

41 እስን ኢስ ገለላን ሄዕኖ ወክት አዋንተን ካደንታሰረ እቅ፤ ህትን ኢሲን ሜጡብ የሩሳሌመ አሜቶ ልግቡ ሜንቱ ሄኔ እቅ።

ኢስ ሞገመሰ

(ማቶ. 27:57-61፤ ሉቃ. 23:50-56፤ ያህ. 19:38-42)

42 በሩስ ተቃጠቤኖ በር እኮቤቺሃ ሀዋሬ ወክት ፎሎጭ በሬች ብርተ እኮ።

43 እይሁድ ኦገት ደኛኖች መቱ ጡመገ ኤንኬዕንሞ አርማትያስ ከተም የሱፍ መገን ዋምንቱ ተቢሲን አገዕረኛሁ ጽላጡሲበ መር መለል ኢስ ጀናዘተ ኣሶኖሰተ ኡጨእ።

44 ጠው እኮጎሬ ጽላጡስ «ሀት ደዕል ሬኖ?» ይ አጀብሲጭ ጥቤ ሀለቅቹ ገእ «ሀንቅንከ ሬኖች ዱንክዮአንዶ?» ይ ጠዕሚእ።

45 እስን ኢስ ሬሁሰ ጥቤ ሀለቅቹ ሞጮጮች ኤተሮን ጀናዘስ የሱፍ መሰኖገ ፈቀጀሰ።

46 የሱፍን ሃዕር ከፈን ኦድኑተ ህዕር ኢስ ጀናዘተ መስቀል አሊች ድሪሽ ከፈች፤ ህከኒች ኤተሮን ክኒች ሽሃን መክሴመ ሎድ ኣዜን አፋሼእ፤ ሎረ ክኑ ኮሎንኮዕልሽ ኡብ ሎድሰ ኡሩተ ጡፎ።

47 መግደል ከተም መርየመለከ የሳ አመት መርየማ ኢስ ጀናዘተ ህከኔ አፋሼኖ ጎሬ ለአኢት እቅ።

16

ኢስ ሬሆች ኬኤሰ

(ማቶ. 28:1-8፤ ሉቃ. 24:1-12፤ ያህ. 20:1-10)

1 ፎሎጭ በሩ ህጎች ኤተሮን መግደል ከተም መርየማ፣ ያቁብ አመት መርየመለከ ሰሎሚ ኢስ ጀናዘን ቡርቶተ ሸቱተ ህዕርቶኡ።

2 አበ በር ገሰመ ሱጵን አሩ ፋላንን ሎድበ መርቶኡ።

3 ገገዉንኩስ «አይ ሎድ ኡርች ክኑ ኮሎንኮዕልሽ ፈንኖኔ?» ይተን ጠወአን ሃንታኢት እቅ።

4 ህካን ይቶኢንኩ ክኑስ ሎረ እኮቤቺሃት፤ እሰን ሀት ይተን ሎድበ ኦሎሰ ለእ ወክት ክኑስ ሎድ ኡርች መቱ አይ ዋል ኮሎንኮዕልኖ እቅ።

15:28 እሳ. 53፣12። * 15:28 መት-መቱ ሉሀ ክታብት ወላጊሽ 28 በርግታበእ፤ ላገንትሰ ሉቃስ 22፣37 የኣሃ እኮደኖ።
15:29 መዝ. 22፣7፤ 109፣25፤ ማር. 14፣58፤ ያህ. 2፣19። 15:34 መዝ. 22፣1። † 15:36 ሰፍንገ- ዩ ኣስ እኮደኖርቹ እከ ባር ኣዜን ሙተኖ ሙተ፣ ዋሙ ኣሉስ እልት የሲሃለከ ዋሃ ሙጭ አፈሃሃ ባር ኣንጉዳይተ እኮደኖሃን። 15:36 መዝ. 69፣21።
15:38 ፋል. 26፣1-33። 15:41 ሉቃ. 8፣2-3።

5 ህትን ሎድ አዝ አጎ ወክት ዋጂ ኦድኑተ ኦደዕዮ ወደልቹ መኬ ኦዲን አፋዕሌኢሃ ለኦቤቹሃ ህልቆኦ።

6 ጠው እኮጎሬ እሰ እሰንተ «ህልቆኖቹ፤ አዕኑ ሀሴነንታሁ ሰቀሌመ ናዝሬት ኢሰ እሁሰ አን ደጋሞ፤ እሰ ሬሆች ኬዕዮኡ፤ ከንቤቹን ሮበኢ፤ ከለዕዬ! እሱ ሞገማ ቤቹንኩ ኩዕን።

7 ቴሱ መርቴን አሳባተለክ ጴጥሮሴሃ «ከኒች ብርተ እሰ ዩሀዕኔንገ ክዕኔንተ ሃጭ ገሊሊ መረኖ፤ ሀከኔን ለኤነንተሱ ይቴን ኩሌ» ዩሰ።

8 ሁኩ ሜንቱንኩ ዋጅት ሁጠን ሎድቢች ፋልት ሁንቶኡ፤ እሰን አበ ዋጅቶቤቹሃ መቲርቹሃ መቶ መንቹሃ ጠወኦበ እቅ። *

እሰ መግደል ከተሞ መርኖማሃ ለሉሰ
(ማቶ. 28፡9-10፤ ያህ. 20፡11-18)†

[
9 እሰ አበ በር ገሰመ ሱጵተ ሬሆች ኬዕዮች ኤተሮን ወዕና ለመሉ ሩሃንዩ ፋሎሴ መግደል መርኖማን ሃጭ ደቀሞ።

10 እሰን መርት ሻዘናንለክ አልፋቴን ሄኦ አሳባተሰ ኩልቶኡ።

11 እሰን «እሰ ሬሆች ኬዕዮኡ እሰን ፎሊን ሮኡ፤ አንን አሌንከኤ ለዕዮም» ይት ኩልቶሰ፤ ጠወ እኮጎሬ እሰ ጠወሰ አመዕንቶበኦ።

እሰ ለሞ አሳባተሰ ለሉሰ
(ማቶ. 28፡16-20፤ ሉቃ. 24፡13-35)

12 ሀከኒች ኤተሮን እሰ ከተሚች ገጠረ መርተን ሄኦ ለሞንከ አሳባንተ ዎሎ ደኒን ለሌኦ።

13 እሰን ፈንቀልት መርት ፈቆ አሳባተ ኩልቶኡ፤ ጠወ እኮጎሬ እሰንተ አመዕንቶበኦ።

እሰ ቶነ መቶንከ አሳባተሰ ለሉሰ
(ማቶ. 28፡16-20፤ ሉቃ. 24፡36-49፤ ያህ. 20፡19-23፤ ሶቀ. 1፡6-8)

14 ሀከኒች ኤተሮን ቶነ መቶንከ አሳባተሰ ማድ አሌን እተን ሄኦገን ኢሰ ለሌሰ፤ እሰን «እሰ ሬሆች ኬዕይ ፎልን ሮኡ፤ ነኢን ለዕኖም» ይቶ ጠወ ቀልቡሰ ዱጃን አመዕኑ ሆጎቤቹሃ ዎቀሾሰ።

15 እሰን «ጉዕማንከ ኦዲንያ አል ባዱ መሬ፤ መኒሃ ጉዕሚንከ ተሸት ላገተ ተማርሰዬ፤

16 አመዕን ጠመቀሞሁ ፈቀኖ፤ እኮጎሬ አመዕንበሀኒሃ ፈረደመኖሰ።

17 እን አመዕንቶሁኡተ ጉዕሚንከ አጀብሲሰኖ ጠወ አታ ወልቀት አሰንታሰ፤ ኢ ሱዕሚን ሩሃንዩ ፋሽታኢ፤ ህትን ወዕና ጠወአበ ሃዕሮ ላጋን ጠወኦኦ።

18 ወሪቹንከ አፎአቀ ሀከረንገ ሸኖ ዘቡ አጎአቀ ሞረኖሰበኦ፤ እሰን ጥዘናመ አሌን አንገተ አቶአቃ ጥዘናችሰ ፈይታኦ» ዩኦ።

እሰ ሰማሃ ኦርኡሰ
(ሉቃ. 24፡50-53፤ ሶቀ. 1፡9-11)

19 ህካን ቀርቹ እሰ ጠወዕይ ሹሎች ኤተሮን መገኑ ሰማሃ መሴሃንሰ መገን መኬ ኦዲን አፋዕሌኦ።

20 አሳባንት ጉዕመ ቤቹንከ መርት ተሸት ላገተ ተማርሰቶኡ፤ ቀርቹንኩ አሳን ሜጠብ አእኖት እቅ፤ አጀብሲሰኖ ጠወ አታ ወልቀተ ኦሲን ተማርሰታ ጠወ ሀንቅ እሁሰ ሆጎን ለሊሰኖት እቅ።]

16:7 ማቶ. 26፡32፤ ማር. 14፡28። * 16:8 መት-መቶ ሃጭት ሄኦ መጻፋን ከን ፎሎጮን ዎሊንሽ ሄዘት እሊን ዮ ላገት በርገንቶኡ።- ሚንቱ ጴጥሮሴለክ ጃለሰበ መርት መላይኪቹ ኩሎሰ ጠወ ጉዕመንከ ጠወኦኡ፤ ሀከኒች ኤተሮን እሰ ገወንኩሰ ዘላላሚሃ ጡሙ እኮ ደረሞበኦ ጠሊሊ እንጂሊ ሸርቆች ኬሽ ገርበ ኢሊ አዎንታህሁኦ መሳን ሶኩ። † 16:8 ሃጭት ሄኦ መት-መቶ ሉሀ ክታበት ዎሊንሽ 9-20 ኢሊ ዮኤሃ በርገታበኦ። 16:15 ሶቀ. 1፡8። 16:19 ሶቀ. 1፡9-11።

ሉቃስ ከተባሃ ቀርቶኔ መሲህ ኢስ እንጂሊ ኣጉስ

ሉቃስ እንጂሊ ኢስ ሆንጠህሰኖሁ ሃጭ አሜተኖ የመም ነቢያካን ጠወአሞሁ አበ ዘማኒሃ ተቢሴ እነ እኮ እስራኤል ኡመቱ አገረን ሃዕዮ «ቡረሞ መሲህ ኢስ» ህትን መን ዘሬተ ጉዕሚንከ «ጡሞሳንቹ» እሁስ ለሊሲት። ሉቃስ ኢስ «ቡጥቻኖተ እንጂሊ ዲዲብሶተ» እነቶስ ሶህሞሃ እሁስለከ ኩ እንጂሊ ሙኑ ዮስ መት-መቶ ኦሪሻተ ደግገለላኖሃ እሁስ ሂር ኩላኖ። ሉቃስ እንጂሊ ኣዜን በትሸን ኢስ አሜቱ ኩልታ ዎዕኔ ፎሎጮንለከ ህትን ኢስ ሰማሃ ኦርኡስ ኩልታ መጨረሽ ፎሎጮን ለሊ ጠወአሞእሁ ሙንዲኖተኔሃት። ኢስ ሰማሃ ኦርዕዮቶ ኤተሮን አመዕነቱ ህት እክ ለንኪሃ አልባዕሎስ ኩላኖ ሄሱት ሶቀማኖ ሆን መጻፍ ኣዜን ካን ከተቦ መንቹን ኩለሞኡ።

መላይከ መዝሙረ ኢስ አለሞ ወክት ዜማኑት ለኦስገ ኩልታ ሄሱት ኢስ ኦስማንከስ ዲአ ሞኒ መሩስ ጎደቦ ላፈ ሳሞራውችለከ በዕይ ደገሞ ጨል ሄሱት ጠለዕል ሉቃስ እንጂሊን ሂኣእራገ። እንጂሊ ኣዜን ገበሊች ገበሊ ኢላ አበ ሰው የመሞእሁ ዲአ አእተኔሃ። ጠሊላ እያንተኔሃለከ ሚንቱ ኢስ ክድመ ኣዜን ሄኡ ሀስሰኖስ ቤቹለከ መገኑ ጨብ ፈቁን ዩሲት።

መጻፍሱ አደሃ

ኣጉስ (1፡1-4)

ጠመቃንቹ ያህይለከ ኢስ አለሙስ (1፡5—2፡52)

ጠመቃንቹ ያህይ ክድመተ (3፡1-20)

ኢስ ጠመቀሙስለከ ፊተንሙስ (3፡21—4፡13)

ኢስ ክድመስ ለሊሽ ገሊላን ጀመሩስ (4፡14—9፡50)

ገሊላች ዩሩሳሌመ (9፡51—19፡27)

መጨረሽ ሳሞንተ ዩሩሳሌማንለከ ኦሎንከሴ (19፡28—23፡56)

ቀርቹ ሬሆች ኬኤስ፡ ለሉስለከ ሰማሃ ኦርኡስ (24፡1-53)

- 1 ከበጀንቶንት ቴዎፍሎሴ! ኒ በላን እኮ ጠውተኔሃ ልግቡ ሙኑ ማቁስ ከኒቶ ዎሶሃ ስተቦኡ።
- 2 ህከ ሶህተ ኔሳሃ ህግሶአሩ ወዕኔቶን ኪስ ኦሎንከስ ለኦእረለከ ሳገስ ካዲመተ እኮአሃ መን።
- 3 ህትን እን ወዕኔቶን ኬሽ ጉዕመ ጠወንከ ጠረኝሽ ኣጥራመቸሚቶ ኤተሮን ጠወስ ቅልቢን ከተቦ ጡመ አጉጅ ለሊኡ።
- 4 ካን እኡኤ ተማርቶንት ትምህርቱ ሀንቅ እሁስ ጡመገ ደጎተ ይዩት።

ጠመቃንቹ ያህይ አለሞኖገ መላይኬቹ ጠውኡስ

5 ይሁድ ባድ ዎመ ሂርድሴ ዘማኔን «አብዩ» ዬኖ ቂሶመ ክድመ አዲሁ «ዘከርዩ» ዬኖ መቱ ቂሰቹ ሃዕዮ አቅ፤ እስን ሀሩን ዘሬቶ እኮኣት «ኤልሳቤጤ» ዬኖ መንቹት ሂኦስ እቅ።

6 ህትን ለሙንኩ ቀርቶ ትዛዝለከ ሴሪ ጉዕመንከ ሂላሮቹ ዮበኢሃ አገርተን መገን ብሬን ፈዮ መን እቅ።

- 7 ኤልሳቤጥን እልትባተ እኮቤቹሃ እለት ዮሰበአረ፤ ህትን ለሙንኩ ባልቆአረ እቅ።
- 8 ህከ ወክት ዘከርዩ አዲሃ ሆን ተሩ ኢልሃን መገን ብሬን ቂሶመ ሆጉተ እኣንገ
- 9 ቂሰ ሴር ሃሊን ዲአ ሞኒ ኣግ ህጣን አጨሶተ አጡ ኢሊስ።
- 10 ህከ ህጣን አጨሶኖ ወክት ኡመቱ ጉዕመንኩ አብሊን ኦር ዲአ ኣታኣት እቅ።
- 11 ቀርቶ መላይኬቹ ህጣን አጨሶኖ ጠረጴዝ መኪ ኦዲን ኦርኬዕይ ዘከርይሃ ለሊኡ።
- 12 ዘከርይን መላይኬቹ ለዕዮ ወክት ህልቆ፤ አበ ዋጂኡ።
- 13 ጠው እኮጎሬ መላይኬቹ «ዘከርዩ! ዲኡክ ሞጮጨሞቤቹሃ ዋጅቶት፤ መንቹክ ለባ ጨል አልታሂ፤ ሱዕመስ ሪህይ» ይት ገእታንት።
- 14 ኪሳሃ አቡ ሙንዲኑት አካሂ፤ ጨሎ አለሞቤቹሃ ልግቡ ሙኑ ሙንደአኖ።
- 15 መሰንትስ እስ መገን ብሬን ሎሪ አህኖ፤ ህትን ወይኒን ቦበጤማህለከ ዎሎ ሰከርሰኖ ኣኔኖርቹ ሆሮን አገናበኡ፤ ህትን አመስ ጎደባን ሃዕዮ ሰኣተቶ ኬሽ ጠሊላ እያኒን ዊሞሃ አህኖ።
- 16 እስን እስራኤል ኡመቱቶ ልግብስ ቀርቶሃ መገን አደ ፈንቀሸኖ።
- 17 ህትን ቅጥይቶ መን ቀርቶሃ ቅጥ እኦታ፡ አናኑተለከ እለተ ሀራርሰ ሜጡብ አኑተለከ ኣዘዘንታበእ መን ቀልብ ጠሊላኖ ደጉ ፈንቀሾታ፡ እልያሴ እያኒንለከ ወልቃን ቀርቶ ብሬን ሃመኖ» ዬሴ።

18 ዘከርየን ህክ መላይኬቼ «እን ባልቆም፤ ጫንትኤ ባልቆኤ፤ ኩ ጠው ህንቅ እሁሰ ማን ደጎተ አታላም?» ይሉ።

19 መላይኬቼንኩ ፈንቀሽ «እን መገን ብሬን ኡራም ጅብርላት፤ ከ ተሸት ኩሎሂተ ሶቀም እሚሾም አቅ።

20 እኮጎሬ ወክቱንከሰ እካ ላገኤ አመዕንትብቤቸሃ ኩ ጠው እሆተ ኢሊ ዱደ እካንት፤ ጠውኡንከ አታልታንትበእ» ይሰ።

21 ህክ ወክት ሙኤ ዘከርየ አገረኖት እቅ፤ እሰን ዱእ ምኒ ኣዘን ዱንኬቤቸሃ እጅብሰጭቶኤ።

22 ዘከርየን ዱእ ምኒቶ ፋሎ ወክት መንገ ጠውኦተ አታሎበእ፤ ህካን እኮቤቸሃ ዱእ ምኒን መቱርቹ ለሌሰገ ደጎኤ፤ መሰንትሰ አንጋን ቀቀሰን ኩለኖሳት እቅ፤ እሰን ዱደ አኮ።

23 ክድመ ወክቱንኩ ጎፋን ምንሰ ኦርዕዮ።
24 ቀወ ወክቲቶ ኤተርግ ጫሰ ኤልሳቤጥ ላፈተ እኮኤ፤
25 «ቀርቹ ከ ጠቡርቹ አዕዮኤ፤ መን በላን ዮኤ ህንቀሙ ከሞኤ» ይተ ኦንቱ አገን መኒች ማጠንቶኤ።

ኢሰ አለመኖገ መላይኬቹ ጠውኡሰ

26 ኤልሳቤጥ ላፈተ እኮ ለህቅ አገናን መላይኬቹ ገሊሊ ባዶን ሄዕዮ «ናዝሬተ» ይኖ ከተማን ሄአ መቱ ህፍቶበ መገን አዲን ሶህሞ።

27 እሴን ዳወዳ ዘሬች እኮ «ዩሱፈ» ይኖ መንቺሃ ኣሰንቶአተ እቅ፤ ህፍቶሰ ሱዕሙ «መርየመ» ይኖተ አቅ።

28 ሁኩ መላይኬቼንኩ እሴቤቹ አሜች «መገን ኣሰቱት ዊሞሂት፤ ወገሬቱ ኬሳሃ እሁን፤ መገኑ ኪን ዮኤ፤ አት ሜንቲቶ ጉዕሚቶን ማሰአንቶንትተ» ይሴ።

29 ጠዉ እኮጎሬ እሴን ህክ መላይኬቹ ለኦ ወክት ጠዊንከሰ አበ ህልቅ «ኩን ህትናሙሃ ወገሬት?» ይተ ሰውይቶኤ።

30 ሁኩ መላይኬቼንኩ እሴንተ «ቱ መርየማ! መገን እያኑ ዮሄሴቸሃ ዋጅቶት።
31 ሁኩዕቲ! አት ላፈተ እካንት፤ ለባ ጨልንከ አልታንት፤ ሱዕመሰ «ኢሴ» ይተ ገአታንት።
32 እሰን ሎረ እሁኖ፤ ጉዕሚቶን ሎረ መገን ቤቱ የመመኖ፤ ህትን ቀርቹ መገኑ ኣነሰ ደዉዳ ሎረ ከዕምኝ ቦርጭመተ ኣሰናሰ።

33 ያቁብ አለ አሌን ዘላለሚሃ ዎመ እሁኖ፤ ወሞምተሰ ዳንጉ ዮሰበእ» ይሴ።
34 መርየመ ህክ መላይኬቹ «እን ህፍቱተ እኮምቤቸሃ ኩ ጠዉ ህት እሆተ አታላኖ?» ይቶሰ።
35 መላይኬቼንኩ ፈንቀሽ «መገን ጠሊሉ እያኑ ኪ አሌን አሚተኖ፤ ጉዕሚቶን ሎረ መገን ወልቀት ኪ አሌን እካእ፤ ህካን እኮቤቸሃ ኪቶ አለመኖ ጠሊሊ ጨል መገን ቤቱ ይን ገኤኖሰ።

36 ህንዴ ለእ! አልቹክ ኤልሳቤጥ ባልቅማንተሴ ለባ ጨል ላፈታን፤ እሴን ሕልትባታኮ ይንገሴ ሄአ እሴ ላፈተ እኮኤች ኩን ለህቅያ አገን።

37 መሰንትሰ መገኑ ቁለኖሰ መቱርቹሁ ዮበእ» ይሴ።
38 መርየማን «ሁኩዕትን አን መገንተ ርሰቹ፤ ኤሳንከ አት ይቶንትገ አሁዕኔ» ይቶኤ፤ መላይኬቼንኩ እሴች አደ እክ ኦርዕዮ።

መርየመ ኤልሳቤጤ ለአተ መሩሴ

39 ህክ ወክትንከ መርየመ ቆተ ባዶን ሄዕዮ ይሁድ ከተመ ደዕልት መርቶኤ።
40 እሴን ዘከርየ ምኒ ኣግ ኤልሳቤጤ ወገሬትሶኤ።
41 ኤልሳቤጥን መርየመ ወገሬትሶ ላገተ ሞጮጭቶ ወክት ጎደባንከሴ ዮ ጨሉ አለጴእ፤ ኤልሳቤጥን ጠሊሊ መገን እያንገን ዊንት

42 ላገሴ ጎት አት «አት ሜንቲቶ ጉዕሚቶን ማሰአንቶንትታን፤ ኪቶ አለመኖሁ ማሰአምእሃን።
43 ህትን ቀርቶኤ አመት ኢቤቹ አሚቱ ህትናሙሃ ሎረ ከዕምኝ?
44 መሰንትሰ ከለእ! ወገሬትክ ላገተ ሞጮጭቶ ወክት ጎደባንከሴ ዮ ጨሉ ተሸቲን አለጴእ።
45 ህትን ቀርቹ ኩሎሴ ጠዉ ዊመኖሃ እሁሰ አመዕንቶኤት እሴ ማሰአንቶአተ» ይቶኤ።

መርየመ መገኑ ገለትጨሴሴ

46 መርየመ
«ፎልቹኤ መገኑ ገለትጭታእ፤
47 ህትን ቀልቡኤ ፌሳንቶ መገኖን ሙንደአኖ።
48 መሰንትሰ መገኑ ርሰቶሰ ህንቀሙ ለዕዮኤ፤
ህትን ከበሬች ኪሸ ሙኑ ጉዕሙንኩ ማሰአንቶአተ» ይኖኤ።

49 ህትን ወልቃሙ መገኑ ኤሳሃ አበ ጠዉ አዕዮኤ።
ሱዕሙሰን ጠሊሊሃን።

- 50 ህትን እሱ ዋጅታ መኒሃ ጉዕሚንከ መገኑ
አላች አለ አለተ ኢላሬተ ማረኖሰ።
- 51 እንጋንተሰን ጠረኘ ሆጉተ አዕዮኡ፤
ቦንታ መንገከ ቀልብሰ ሰውጥንን ብን አዕዮ።
- 52 ህትን ሎራኑተ ሹምንቱ ዮሰረ ኬዕምኝ ቦርጭማችሰ ድርሾኤ፤
ጠው እኮጎሪ ገዉሰ ሆፍሳአረ ኬዕምሾሰ።
- 53 ህትን ጎሩ አፎሰራ ጡመ ጠዊን ዱሴሰ፤
እኮጎሪ ቀባጣመተ ኦነ እንገንተ መርታገ አዕዮሰ።
- 54-55 ህትን መገኑ አናኖተኔ ጠወዕዮገን
እብራሂሚሃለከ ዘራተሰ
ዘላለሚሃ አጉሩሰ ሰውይ
ርሰቹሰ እስራኤላ ሀዕልዮኡ» ይቶኡ።
56 መርዮመን ኤልሰቤጤን ሚጡቡ ሰሶ እገን ጌሰ አፋዕልቶች ኤተሮን ምንሴ ፈንቀልት መርቶኡ።
ጠመቃንቹ ያህይ አለሙሰ
57 ኤልሳቤጥ አልታ ወክቱ ኢልዮን ለቤ ጩልንከ አልቶኡ።
- 58 ህከኒሃ ኦሎሴለከ እሉሴ ጉዕሙንኩ መገኑ አበ አሙኩሰገ ጥጭጭት እሴንን ሚጡቡ
ሙንደኦኡ።
- 59 እሰን ህዘትቅ በሬን ጩል ጡርከንቶተ አሜት እንሰ ሱዕሚን «ዘከርዮ» ይት ገአቶተ ሀሶኡ።
- 60 ጠው እኮጎሪ አመሰ «ህትጎተበአ፤ ያህይ» የመም ገአመኖ» ይቶኡ።
- 61 ህካን እኮቤቺሃ እሰን «ከ ዘራች ከን ሱዕሚን ገአሞኢሁ ዮበእንደ።» ይቶሴ።
- 62 ህከኒች ኤተሮን እሰን ጩሉሰ አዩ የመም ገአሞተ ሀሰኖ ጎሪ ደጎተ እነሰ መላን ጠዕምቶኡ።
- 63 ዘከርዮን ከተቤኖሃ እሶኖሰተ ጠዕም «ሱዕሙሰ ያህይት» ይ ከተቦ፤ ህከን ጠዋንን ጉዕሙንኩሰ
አጀብሲጭቶኡ።
- 64 ህከ ወክት ዘከርዮ አፎሰ ፈንተዕያንለከ አረብሰ ሂርተኦን መገኑ ገለትጨን ጠወኤ ጀመር።
- 65 ህካን እኮቤቺሃ ቀዕዮ መኑ ጉዕሙንኩ ዋጅአ፤ ህትን ሁኩ ጠው ጉዕሙንኩ ቆተ ይሁድ ባደን
ጉዕማንን ጠወአሞ።
- 66 ህከ ጠወ ሞጭጭ መኑ ጉዕሙንኩ «ኩ ጩሉ ህትናሙ እሆታት?» ዮን ጠወሰ ቀልቤንከሰ አፎ፤
መሰንትሰ መገን ዋልቀት እሴን ሚጡቡ ሂኦቤቺሃት አቅ።

ዘከርይ ጠወዕዮ ራገ

- 67 ጩል አኑ ዘከርይ ጠሊላ ኢያኒን ዊም
- 68 «ኡመትሰ ለዕዮቤቺሃለከ ፊሾቤቺሃ
እስራኤል ቀርቹ መገኑ ማሰአሞሃ አሁን!
- 69 ካዲንቸ ደዉዳ ዘሪ ምኒች ጠረኘ ጡሞሳንቹ ኬሾኔ፤
- 70 ዎዕኔ ዘማኒች ከሸ ሂኦ ጠሊላኖ ነብያኖ አፎን ጠወዕዮገን፤
- 71 ዲኒችለከ ግብኖኔ መን አንጋች ፊሾኔ።
- 72 ህካን አዕዮንኩ አናካተኔ እኑሮተለከ
ጠወዕዮ ወኡድ ላገተ ዊንሾተ ሰው ይዪት።
- 73 ከ ወኡድ ላገንተ ጤሌዕል ኣሴኢሁ አኒህኔ እብራሂሚሃ
- 74 ዲን አንጋች ነጠ ፉልን
ዋጅኑዕናን ካደሞሲታት፤
- 75 ህትን ሂዕናም ዘማኔን ጉዕማንን
መገን ብሬን ጠሊልማንለከ ፈይማን ሂዕኖታት።
- 76 ህትን ኮ ጩሌ! ጠሊላ ሎረ መገን ነብዬቹ ዬኖሂ።
ወቃንከ ብዘ አቶተ ሂጭት ቀርች ብሬን መርታንት።
77 ቀርቹ ጩብሰ አጉሮ ይ
ጡም ኤንኬዕኑ ኣሰኖሰ።
- 78 መገኑኔ መረርሲጫንቹለከ ጎደበ ላፈ እኮቤቺሃ ፈቅ ኑሩ ሰሜች ለሎተ አኣኖ።
- 79 እሰን ቱንሰቸንለከ ሬሆ ሀላን አፋዕልቶ መኒሃ ጉዕሚንከ ለሊሰኖ፤
ሎከኔ ወጌራት ወቃሃ አሞንሰኖ» ይ ራገ ጠወዕዮ።
80 ሁኩ ጩሉንኩ ገዉሲ ነጽ ኢያኒን ጠረኘ እኩ፤ እስራኤል መኒሃ ለለኖ በሩ ኢሎተ ኢላ ኡላ
ኡድማን ሂዕዮ።

2

ኢስ አለሞግ

(ማቶ. 1፡18-25)

- 1 ህክ ወክት ሮም ገሸቶ አዘን ኖ መን ጉዕመንክ ወለአሃ ሮም ዎሚች አውግሰጦሴች ትዛዙ ፋሎ።
- 2 ህክ ወዕኔ ዎሊንሽ ወክት «ቈሬኔዎሰ» ዬኖ መንቹ ሶሪይ ባዱ ገሸኖ እቅ።
- 3 ህካን እኮቤቹሃ መኑ ጉዕመንኩ ሱዕመሰ ከተብሲሶት ገገዉንኩስ ገዢስ ከተመ መረኖት እቅ።
- 4-5 ዩሱፍን አለንሹሰ ደዉይ ምኒ ዘርተ እኮቤቹሃ እሲሃ ኣሲናንሰ ላደተ እኮ መርዮማን ሚጡብ ገሊላን ሄዕኖ ናዘሬት ከተሚች ኪዕይ ይሁድ ባዶን ሄዕኖ «ቤተሌመ» ዬኖ ደዉይ ከተመ ኦርዕኖ።
- 6 ለሙንኩሰ ህኪኔ ሄኑገን መርዮመ አልታ ወክቱ ኢሊኦ።
- 7 ህክንቤቶንን ህንገሬ ጨል አልቶኤ፤ ኮሁ ገሊኖ ምኔን ቤቹ ኖሰበአቤቹሃ ኦድኖን ጣጥ ጋድር ብሬን ለሉ ህጥተ አተኖ ገቡት አዘን ኣሲሶሰ።

ዜማኑተለክ መላይክተ

- 8 ህክን ቀኤን ባዶን ሆለ ዜምሃ አገርተን አብሊ ገልታ ዜማኑት ሄኑ እቅ፤
- 9 እሳንክ ቀርቶ መላይኪቹ ለሊሰ፤ ህትን ቀርቶ ኪዕምኝ ኑሩ አዳንከሰ በለቆ፤ እሰን አበ ዋጅቶኤ።
- 10 ጠዉ እኮጎሬ መላይኪቹንኩ እሰንተ «መኒሃ ጉዕሚንክ አበ መንዲኡተ እፍ ክዕኔበ አሚቶምቤቹሃ ዋጅቶኖቹ።
- 11 ከበር ደዉይ ከተማን ጡምሳንቹ ቀርቹ መሲሁ አለሞህዕኔ።
- 12 ሰብዬቹ ሆጮን ጣቤን ለሉ ህጥተ አተኖ ገበታን ኦሰሲናን ደገኑንተ፤ ሁኩን መላተ አህኖህዕኔ» ዬሰ።
- 13 ድንገቴን ልግቡ ሰሜ መላይክ ጎጎቱ ህክን መላይኪቹን ሚጡብ ለልቶኤ፤ እሰን መገኑ ገለትጭተን
- 14 «ሎርመት አሊ ሰማን መገኒሃ እሁን፤ መገኑ መረርሲጨኖሰ መኒሃ ኡለ አሊን ወገሬቱ እሁን» ይታኢት እቅ።
- 15 ሁኩ መላይኪንት እሳች አደ እክ ሰማ መርቶ ወክት ዜማኑት ገገዉንኩሰን «ቴሁ ኬዕዬ! ቤተልሂመ ኢለ መርን ቀርቹ ኩሎኔ ከ እኮ ጠወሃ ለዕኖ» የቀንቶኤ።
- 16 እሰን ደዕልት መርት መርኖመለክ ዩሱፈ ህትን ለሉ ህጥተ አተኖ ገበታን ኦሰዕኖ ጨል ደጎኤ።
- 17 ህትን ሰብዬቹ ጨል ለኦ ወክት ህክን ሰብዬቹትኒሃ ኩለሞሰርቹ ጠወኑኤ።
- 18 ህካን ሞጮጭቶአሩ ዜማኑት ኩልቶሰ ጠዋን አጀብሲጭቶኤ።
- 19 ጠው እኮጎሬ መርዮመ ህክ ጠወ ጉዕመንክ ቀልቤንከሴ እፍ ሰውይታኢት እቅ።
- 20 ዜማኑት ኩለሞሰንን ሞጮጭቶሁኒሃለክ ለኦህኒሃ ጉዕሚንክ መገኑ ሎርሰተንለክ ሹክር ኣተን ፈንቀልት መርቶኤ።

ጨል ኢስ ዲእ ምኒ መሴመገ

- 21 ህዚትቅ በር ጨልሰ ጡርክሚኖ ወክት ሱዕመሰ «ኢሰ» ዬን ገኤመ፤ ሁኩንን አመሰ ጎደባን አፋዕሎዕናን ሄጭ መላይኪቹ ፋሽኖሰኖ ሱዕመ እቅ።
- 22-23 መሰሰ ሕጋን የመሞገን እሰን ነጠ እካ ወክቱ ሆንጠካን መገን ሴራን «ዎዕን አለመኖ ለቤ ቤቱ ጉዕመንክ መገኒሃ ኣሲናን አደ እሁን» የመም ከተበሞገን ጨልሰ ቀርቶ ብርተ ሆንጠህሲሃ ዬሩሳሌመ መሰቶኤ።
- 24 ህትን መርቶኢሁ ቀርቶ ሕጋን «ለሙ ህንደዕርተ ህከረንገ ለሙ ዱብህንደዕሬ ጭጮራ ሆንጠህሱን» የመሞገን ክትመ ሆንጠህሲሃት እቅ።
- 25 ህክ ወክት ዬሩሳሌም ከተማን «ሰምኔ» ዬኖ ገዉሰ መገኒሃ ኣሴ ፈዩ መንቹ ሄዕኖ እቅ፤ እሰን አሰራኤል ጡም ተቢሳሃ አገረኖት እቅ፤ ጠሊሉ እያኑ እሰ አሊን ሄዕኖ እቅ፤
- 26 እሰን መገኑ እቴሰ ቀርቹ መሲሁ ለኦዕናን ሄጭ ሬህበገ መገን እያኑ ለሊሾሰ እቅ።
- 27 ሰምን ጠሊሉ እያኑ ቃግሻንሰ ዱእ ምኒ ኦርዕኖ፤ ዩሱፍለክ መርዮመ ሴራን ርሰሞገን አቶተ ጨል ኢስ ዲእ ምኒ እፍ ኣጎኤ።
- 28 ህክ ወክት ሰምን ጨል ቶግ ህንቀፍ መገኑ ገለትጨን
- 29 «ቀርቹ! ቴሱ ካድንቹክ ጠወኑንት ላገክገን ወገሬቲን ህርሰሴኤ፤
- 30 ጡምሱክ እሊንከእ ለዕኖም፤
- 31 እሰን መገኑ አመዕንኖበእ መኒሃ ፈኝ ለሊሰኖ ኑር አህኖ፤
- 32 እሰን መገኑ አመዕንኖበእ መኒሃ ፈኝ ለሊሰኖ ኑር አህኖ፤ ህትን አሰራኤል ኡመቲሃ ኪዕምኝያ» ዬእ።
- 33 አመሰለክ አኑስ ጨልተኔሃ ዬን ጠወኤመ ጠዋን አጀብሲጭቶ እቅ።

34-35 ሰሞንን እሰንተ ማሰዕዮሰ፤ ህትን ጨልሰ እመት መርየመ «ኩ ጨሉ አበ መን ቀልብ ሰውቱ ደገሞተ እሰራኤል አዘን ሄዕዮ ልግብያ መኒሃ ኡቢሃለከ ኬኤሃ መገኑ ኤቦሰ፤ ህከ መላተ ልገቡ መኑ ግቦሰ፤ ኪ ቀልብ ሻዙት ሲፍገ ሙርታኦ» ዬሴ።

36 ህትን እሰር ደቦች ፋኑኤሌ ቤቱት «ሃነ» ዬኖ ራጋንቹት ሄኑ እቅ፤ እሴን ገልቶች ኤተሮን ጨይንከሴ ሜጡብ ለመላ ዘማን ሄኑአተ እቅ፤ ህትን አበ ባልቆ እቅ።

37 እሴን ምንሴ ኦት የብኤሃ ህዚታይኔ ሾሉ ዘማን ሄኑ እቅ፤ እሴን ሀንከዕርተለከ በራሃ ዱእ ምኒች ሆሮ አደ እኩዕናን ሶመንተንለከ ዱእ አተን መገኑ ካደንታ እቅ።

38 ህከ ወክትንከ እሴ እሜት መገኑ ገለትጭተን ዩሩሳሌም ጡሙ ተቢሴን አገርታ መኒሃ ጉዕሚንከ እሰተኔሃ ኩልቶኡ።

ናዝሬተ ፈንቀሉሰ

39 ዩሱፍለከ መርየመ ጉዕመርቹንከ ቀርች ሕጋን የመሞገን አቶች ኤተሮን ገሊላን ሄዕዮ ከተመ ናዝሬተ ፈንቀልት መርቶኡ።

40 ጨሉንኩ ነጵ ጠራኔእ፤ ህትን ሀይቹ እኩ፤ ህትን መገን ኣሰቱት እሴን ሜጡብ ሄኑ እቅ።

ጨሉ ኢሰ መገን ምኒን እሁሰ

41 እኩሰለከ እመሰ ዘማን ዘማኔን ሻሸግ ከበጃት ከበጅቶተ ዩሩሳሌም ከተመ መርታ እቅ።

42 ኢሰንከ ቶን ለሙ ዘማን እኩሰ ወክት ዎሶን ሮሰሞገን ከበጃት ከበጂሃ ዩሩሴሊመ መርቶኡ።

43 በሩሰ ጎሮች ኤተሮን እሰን ምኒ ፈንቀልታን ጨሉ ኢሰ ዩሩሳሌማን ፈቆ እቅ፤ ህካን እኩሰለከ እመሰ ደጎበእ።

44 ሀራቲን ሜጡብ አሜተኖሃ አጉጃንሰ መቶ በሬ ዎቃ ሃንተን ሆሶኤ፤ ህከኒች ኤተሮን እሉሰ የቤቹለከ ደጋ መንቤቾን ሀሶሰ።

45 ሀሰ ሆጎ ወክት እሱ ሀሰን ዩሩሳሌመ ፈንቀልት መርቶኡ።

46 እሰን ተማርሲሰ መን በላን አፋዕል ዋጮጨንለከ ጠዕምቱተ ጠዕመን ሰሶ በሬች ኤተሮን መገን ምኒን ደጎሰ።

47 ዋጮጭቶ መኑ ጉዕመንኩ አጥራመች ቶጊንከሰለከ መሰለንከሰ አጀብሲጭቶኡ።

48 ዩሱፍለከ መርየመ ለኑ ወክት አበ አጀብሲጭቶኡ፤ እመሰን «ኢ ጨሉ! ሚሃት ህት አቶንትኔሀ? ህትን እኩኪ እን ጨነቀመን ሀንሳንኬት እቅ» ይቶሰ።

49 እሰን «ሚሃ ሃሴነዕኔ? አኒሀኤ ዮርቾን አሁ ሀሰሰናኤሀ አሁሰ ደጌንተበእንደ?» ዬሰ።

50 እሰን ጠወዕዮሰ ጠወሃ አጥራመቶበእ።

51 ህከኒች ኤተሮን እሳኒን ሜጡብ ናዝሬተ እሜቾ፤ እሳንከ እዘዘመኖሰ እቅ፤ እመሰ ህከ ጠወሃ ጉዕመንከ ቀልቤንከሴ አፋ እቅ።

52 ኢሰ መገንለከ መን ብሬን አያኒን ዊም ሀይማንለከ ጉባን ነጻን መረኖት እቅ።

3

ጠመቃንቹ ያህይ ተማርሱሰ

(ማቶ. 3፣1-12፤ ማር. 1፣1-8፤ ያህ. 1፣19-28)

1 ሮም ዋሙ ጢባርዮሰ ዋመ እኩ ቶና ኦንትቅ ዘማን ጴንጠናዊ ጵላጠሰን ይሁዳ ገሸና እቅ፤ ህትን ሄሮድስን ገሊላ ባዱ ሄሮድሴ እመቤቱ ፊልጶስን «ኢጡርያስለከ ጥራኮኒደሰ» ዬኖ ባዱ ሊሳንዮሰ ህትን «አቢሌኔ» ዬኖ ባዱ ገሸታኦር እቅ።

2 ህትን ሐናኒለከ ቀያፊ መገን ምኒን ሎርሎራፍ ቂስተ አዎንሰና እቅ፤ ህከ ወክት መገን ላገት ዘከርይ ጨልቤቹ ያህይበ ኡላ ኡድማን እሜቶኡ።

3 ህካን እኮቤቹሃ ያህይ ዮርዳኖስ ዊ አዝጋገን ጉዕማንን ዘሀን «ጨብሀክዕኔ ጡሙ ደአቶናተ ቶብቲን ጠመቀሜ» የን ተማርሰና እቅ።

4 ህካን እኮሁ ነቢዬቹ እሰያሰ ያህይተኔሃ ሄጭ «ሁኩዕኑን! ኩን ኡላ ኡድማን ህት የን ያረኖ መንቾተ ላገ፤ መገን ዎቃሃ ቅጥእዕዬ! ህገኖ ቤቹንከ ብዝ እዕዬ!

5 በዕዮቤቹ ጉዕመንኩ ዊሙን! ቆተትለከ ቆሩት ጉዕመንኩ ራሰተ እኩን! ሾኩ ዎቆንኩ ጌጥ ዩን!

ሂሉ ዎቆንኩ ብዝ ዩን!

6 መኑ ጉዕመንኩ መገን ጡምሱ ለኡን!»

የመሞ ከተበሞጋት።

7 ህዝብን እኩቤቸኚ ጠመቆስተ አሜቶ ልግብ መነ ያህይ «አዕኑ ኩ አዳዌ አለት! አሜታ ኡሙዕሬኛ ሁንቶኖተ አይ ኩሎህዕኔ?»

8 ቱሱ ቶበቱክዕኔ ለለላ ሆጉተ አዕዬ ቤሉ ነኡ ሐብራሂሞተ አለ። ይቴነን ቀልብክዕኔ ጠዊን ድከኦኖቹ፤ መሰንትሰ መገኑ ከን ክኒቶ አብራሂሞሂ አለተ አዕይ ኬሶተ አታላኖገ ኩላንክዕኔ።

9 ቱሱ ክልቱ ሀቅ ፍቃን አፋዕልዮኡ፤ ህዝብን እኩቤቸኚ ጡመ ላልቹ ላልቡ ሀቁ ጉዕሙንኩ ሙርተዕይ ገራን አገኛ» ዬእ።

10 ሁኩ መኑንኩ ያህይ «ቱሱ መ አዕኑ?» ይት ጠዕምቶስ።

11 እሰን ፈንቀሽ «ለሙ ኦድኑት ዮሴሁ ዮሰበአህኒሂ ኣሱን፤ እቴናሁ ዮሴሁ እቴናሁ ዮሰበአህኒሂ ቤሀን» ዬእ።

12 ህትን ቀረጠ ሙርታእሩ ጠመቀንቶተ አሜት «አስተማርኛ! ነኡ መ አዕኑ?» ይት ጠዕምቶ ወክት

13 «ሕገን ፈቀደሞሀዕኔህኒቶ በትሴን ኣእቶኖቹ» ዬስ።

14 ህትን ወታደሩንኩ «ነኡ መ አዕኑ?» ይት ጠዕምቶ ወክት «መቶ ማንቺቶ ወልቃን ዘረፎኖቹ፤ መቱ ማንቺኖ ክዘቢን ከሰሶኖቹ፤ ገይክዕኔ ደሞዙ አሁንክዕኔ» ዬስ።

15 መኑ ተብሴን አገረናቤቸኚ ጉዕሙንኩ መኑ ቀልቤንከሰ ያህይ «ኩን መሲህትንደ?» ይት ሰውይታ አቅ።

16 ያህይን «አን ዊን ጠመቃንክዕኔ፤ ጠወ እኩጎሬ እን ጫዕማሰ ወደሩ ሂረተ አታልቡ ኢቶ ጠረኛ አሜተኖ፤ እሰን ጠሊሊ መገን አያኒንለከ ገራን ጠመቀኖህዕኔ፤

17 እሰን ኦድ አሊን ወጠተ ጋቢቶ አደ አኑተ ቤላ አንጋንከሰ አፎኤ፤ ጠወ እኩጎሬ ጋበሰ አደ አዕዮቶ ኤተሮን ወጠተ ቀፎን ወረኖ፤ ጋበንከ ጠእትበ ገራን ቡሰኖ» ዬስ።

18 ህትን መነ አበ ሸዘነተ ሸዘን ተሸት ላገተ ዱዱብሰኖ አቅ።

19 ጠወ እኩጎሬ ገሊላ ዓድ ገሻንቹ ሂረድሰ አመሰ ቤት ፊልጶሴ ጫተ ሂረድያደ ኣኤቤቸኚሃለከ ዎሉ አዕዮ ተንኮተ ጉዕሚንከ ያህይ ሻቆስ።

20 ሂረድሰ ተንኮ አሊን ተንኮተ አዕይ ያህይ ኡሱር ምኒ አገሾስ።

ኢሰ ጠመቀሙሰ

(ማቶ. 3፡13-17፤ ማር. 1፡9-11)

21 መኑ ጉዕሙንኩ ጠመቀሞቶ ኤተሮን ኢሰ ጠመቀሞ፤ እሰን ዱኤ አእንን ሰሞ ፈንተዕያን

22 ጠሊሉ እያኑ ሀንደዕሬገ እክ አሊሰ ድሬእ፤ ህከ ወክትንከ «ኢታም ቤቱኤ አቴት ኪን ተሽ የኖኤ» ይታ ላገት ሰሜቶ አሜቶኡ።

ኢሰ አለሞ አበኖኖተኔሃ

(ማቶ. 1፡1-17)

23 ኢሰ ሆጉተ ጀመረኖ ወክት ሰጂ ዘማን ጌሰ እኩሰ አቅ፤ መኑ እሱ ዩሱፍያ ቤቱ ይ ሰውሃኖ አቅ፤ ዩሱፍ ኤልያ ቤቱ አቅ።

24 ኤል ማቴያ ቤቱ፣ ማት ሌዊያ ቤቱ፣ ሌዊ ሚልክያ ቤቱ፣ ሚልኪ ዮና ቤቱ፣ ዮና ዩሱፍያ ቤቱ።

25 ዩሱፍ ማታትዩያ ቤቱ፣ ማታትዩ አሞጽያ ቤቱ፣ አሞጽ ናሆምያ ቤቱ፣ ናሆም ኤሰልምያ ቤቱ፣ ኤሰልም ናጌያ ቤቱ።

26 ናጌ ማኣትያ ቤቱ፣ ማኣት ማታትዩያ ቤቱ፣ ማታትዩ ሴሜይያ ቤቱ፣ ሴሜይ ዩሱፍያ ቤቱ፣ ዩሱፍ ዮዳያ ቤቱ።

27 ዮዳ ዮናንያ ቤቱ፣ ዮናን ሬሰያ ቤቱ፣ ሬሰ ዘሩባቤልያ ቤቱ፣ ዘሩባቤል ሰላትያልያ ቤቱ፣ ሰላትያል ኔርያ ቤቱ።

28 ኔር ምልክያ ቤቱ፣ ሚልኪ ሐድያ ቤቱ፣ ሐዲ ቆሳምያ ቤቱ፣ ቆሳም ኤልሞዳምያ ቤቱ፣ ኤልሞዳም ዔርያ ቤቱ።

29 ዔር ዮሴዕያ ቤቱ፣ ዮሴዕ ኤልዔዛርያ ቤቱ፣ ኤልዔዛር ዮራምያ ቤቱ፣ ዮራም ማጣትያ ቤቱ፣ ማጣት ሌዊያ ቤቱ።

30 ሌዊ ሰሞንያ ቤቱ፣ ሰሞን ይሁድያ ቤቱ፣ ይሁድ ዩሱፍያ ቤቱ፣ ዩሱፍ ዮናንያ ቤቱ፣ ዮናን ኤልያቅያ ቤቱ።

31 ኤልያቅ ሜልያ ቤቱ፣ ሜልያ ማይናንያ ቤቱ፣ ማይናን ማጣትያ ቤቱ፣ ማጣት ናታንያ ቤቱ፣ ናታን ዳዉድኖ ቤቱ።

32 ዳዉድ እሴይያ ቤቱ፣ እሴይ ኢዮቤድያ ቤቱ፣ ኢዮቤድ ቦኤዝያ ቤቱ፣ ቦኤዝ ሰልሞንያ ቤቱ፣ ሰልሞን ነአሶንያ ቤቱ።

- 33 ነገሱን አምናደብያ ቤቱ፣ አምናደብ አድምንየ ቤቱ፣ አድሚን አርኒያ ቤቱ፣ አርኒ ሔጽርምያ ቤቱ፣ ሔጽርም ፋሬሰያ ቤቱ፣ ፋሬሰ ይሁድያ ቤቱ፣ ይሁድ ያቁብያ ቤቱ።
- 34 ያቁብ አሳቅያ ቤቱ፣ አሳቅ አብራሂምያ ቤቱ፣ አብራሂም ታራሃ ቤቱ፣ ታራ ናኮርያ ቤቱ።
- 35 ናኮር ሰሩጊያ ቤቱ፣ ሰሩጊ ረኤያ ቤቱ፣ ረኤ ደ ፈሊቅያ ቤቱ፣ ፋሊቅ አቤርያ ቤቱ፣ አቤር ሳላሃ ቤቱ።
- 36 ሳላ ቃይንያ ቤቱ፣ ቃይን አርፋክሰድያ ቤቱ፣ አርፋክሰድ ሴምያ ቤቱ፣ ሴም ኑህያ ቤቱ፣ ኑህ ላሚህያ ቤቱ።
- 37 ላሚህ ማቴሳልያ ቤቱ፣ ማቴሳል ሔኖክያ ቤቱ፣ ሄኖክ ያሬድያ ቤቱ፣ ያሬድ መላልኤልያ ቤቱ፣ መላልኤል ቃይናምያ ቤቱ።
- 38 ቃይናም ሄኖሰያ ቤቱ፣ ሄኖሰ ሢትያ ቤቱ፣ ሢት አደምያ ቤቱ፣ አደም መገንያ ቤቱ ይታ አቅ።

4

ኢስ ፊተንሙስ

(ማቶ. 4፣1-11፤ ማር. 1፣12-13)

- 1-2 ኢስ ጠሊሉ እያኑ ዋማንስ የኮርዳናስ ዋች ፈንቀል አሜቺ፤ ህከኒች ኤተርን ጠሊሉ እያኑ ኢስ ኡላ ኡድመ ኦርእኖን እዕየሰ፤ ህከኒን ሸይሉ በር አልብሱ ፊተኞሰ፤ ህከን በራካንን መቱርቾሃ እቱ ሆጎቤቼሃ በሩሰ ጎሮ ወክት ጎር አፎሰ።
- 3 ህከ ወክት ሸይጣኑ ኢስ «ህንዳ አት መገን ቤቱ እኮንትጎሪ ከ ክኑ ዳቡተ እሁን ይት አዘዘ» ይሰ።
- 4 ጠዉ እኮጎሪ ኢስ « መኑ ጠለዕል አቱኖርቺን ሄአኖበኤ የመም ከተበሞኤ» ይ ፈንቀሼእ።
- 5 ህከኒች ኤተርን አልብሱ ኢስ ቆሮ አል ፋሽ ኣዲንያ አል ዋመተ ጉዕመንከ ገለብቴንን ለሊሸስ ኬዕይ
- 6 «ከ ገሽ ወልቀተለከ ሎርማስ ጉዕመንከ ኣሳንኬ፤ ኩ ኬዕምኙ ኤሳሃ ኣሰሞኤቤቼሃ ኣን ሀሾምሀሂሃ አዩሃ ኣሶተ አታላም።
- 7 ህካን እኮቤቼሃ እት ኤሳሃ ሰገድንቴኤ ጎሪ ኩን ጉዕመንኩ ኬሳሃ እሀኖሄ» ይሰ።
- 8 ኢስን « ቀርቾሃ መገኒሃክ ሰገድ፤ ጠለዕል እሰንከ እባደተ እኤ የመም ከተበሞኤ» ይ ፈንቀሼእ።

- 9 ህከኒች ኤተርን አልቤሱ ኢስ ዬሩሳሌመ መሰሰ ዱእ ምኒ አሌ አሌን ኡርሸ «አት መገን ቤቱ እኮንትጎሪ ህንዳ ገዉክ ዋሮ ዋልት ኡብ፤
- 10 ኬሳሃ አገርቶተ መገኑ መላይከተ አዘዘኖ፤
- 11 ህትን ሎክክ ክኖን ቆዕልታበአገ እንጋንከስ ኬስ አፋሄ የመም ከተበሞኤ» ይሰ።
- 12 ኢስን « ቀርቾ መገኑክ ፊተንቶት የመም ከተበሞኤ» ይ ፈንቀሼሰ።
- 13 አልቤሱ ኢስ ፈተኝ ሹሎኞ ኤተርን ወክተሃስ አኑር ኦሮዕኖ።

ኢስ ሆጉስ ገለላን ጀመሩስ

(ማቶ. 4፣12-17፤ ማር. 1፣14-15)

- 14 ህከኒች ኤተርን ኢስ ጠሊላ እያን ዋልቃን ዋም ገለለተ ፈንቀሎ፤ እስ ዱዱቡንኩ ህከን አዳን የ ባደን ጉዕማንን ሞጭጨም።
- 15 ኢስን ጭምት ምኔን ተማርሰኖ ወክት መኑ ጉዕመንኩ ገለትጨኖስ እቅ።

ናዘሬት ከተማን ኢስ ግቤመገ

(ማቶ. 13፣53-58፤ ማር. 6፣1-6)

- 16 ህከኒች ኤተርን ኢስ ነጹ ባዱ ናዘሬተ አሜች ሮሾገን አይሁድ አበ በሬን ዱእ አኤኖ ምኒ ኣግ እነበሶተ ኬዕየ።
- 17 ህከ ወክት ነብዬኝ እስያሴ መጻፈ ኣስቶሰ፤ ህከ ጣጠሞ መጻፈ ፈኞ ወክት
- 18 «ቀርቶ እያኑ ኢ አሌኒት፤ ተሸት ላገተ ቡባቻኖተ ዱዱብሶተ ሹመ አዕይ ቡሮኤ፤ ኡሱረንትአሩ ሂረንቶተ፤ ቆቁ መኑ ለአገ አዋጀተ፤ ጭንፈንቶራ ሰዋልድማን ፋሾተለከ
- 19 ህትን ቀርቾ ሙንዲሲሰኖ ወክቱ አሌገ አዋጀተ ሶኮኤ» የመም ከተበሞቤቼ ደጎ።
- 20 ኢስን መጻፈ ጣጭ አሰናደኖህሂሃ ኣስ አፋዕሌእ፤ ጭምት ምኔን ሄዕየ መኑ ጉዕመንኩ ቱክ ይት ለኣስት እቅ።
- 21 ኢስን «ከበር ከን መጻፍ ላገት እዕኑ ሞጭጭቴንን ዊንቶኤ» ይሰ።

22 ጉዕሙንኩ ሙኑ እስተኔሃ ጡመ ጠወ ጠወአኖት እቅ፤ ህትን ጠወአኖ ኣሳቶ ላጋን አጀብሲጭት «ኩን ዩሱፍሃ ቤቱበእንደ?» ይቶሰ።

23 ኢሰን « ኣት ህከንቹ! ህንጃ ወክ ፈይሱ ይታ ተሞሳልተ ሸክት ዮበኢሃ ኤሳሃ ይቲንተገ ደጋሞ፤ ህትን ቅፍርናሆሞ ከተማን ኣቶንተሃ ነኡ ሞጮጭኖሚሃ ከን ገይክ ባደን አኦ ይቲንተኦ» ይሰ።

24 ህንቅንከ ያንክዕኔ ነብዬቹ ገይሰ ባደን ሆሮን ኬዕሞሲኖበኦ።

25 «ህንቅንከ ያንክዕኔ አልያሴ ዘማን ሰሱ ዘማንለከ ልሁ አገን ጤኑ ኡቡ ሆጎቤቹሃ ባደን ጉዕማንን ጎሩ እኮ ወክት እስራኤል ባደን ሞንሰ ኣኑ ራዮ ልግቡ ሚንቱ ሄኦ እቅ።

26 ጠወ እኩጎሬ አልያሰ ሲደን ዬኖ ባደን ሃዕዮ ሰረጽተ ዬኖ ቀዕያን ሄኦ ሞኒ ኣኑ ዮሴበኦ መንቻ ቤሉ ወልሀሰ እዬሃ እስራኤላን ሄኦ ሞንሰ ኣኑ ራዮ ሚንትቤቹ ሶህሞበኦ።

27 ህትን ነብዬቹ አልሳኤ ዘማን እስራኤላን ጎግ አል ጥዘንት አፎሰ ልግቡ ሙኑ ሃዕዮ እቅ፤ ጠወ እኩጎሬ ሶርዮ ዬኖ ባደን ጎዕማኔ ዬኖ መንቻ ቤሉ ሞሉሰ ፈይትበኦ» ይሰ።

28 ህከን ጭምት ሞኔን ሃዕዮ ሙኑ ጉዕሙንኩ ህከን ሞጮጭቶ ወክት ኡሙዕርቶኦ።

29 ጉዕሙንኩስ ከተሚቶ ኡብል ፉሸቶሲቶ ኤተሮን ሞር ዋሽት ኡጅቶተ ሀሰ ከተሙስ እጃራሞ ቆር ገርደብ መድ መሰቶሰ።

30 ጠወ እኩጎሬ እሰን በእንከሰ ፉል ኦርዕዮ።

ዶረረኖ ዱሩ አፎሰ መንቹ ፈይሰ
(ማቶ. 1፡21-28)

31 ኢሰን ገሊላን ሃዕዮ ቅፍርናሆሞ ከተመ ሞር ዋል ኦርዕዮ፤ ህከኔን አይሁድ አበ በሬን ጉዕመረን ተማርሰኖሳት እቅ።

32 ጠወስ ደገን እኩቤቹሃ እሰ ተማርሰኖ ትምርቱን ጉዕሙንኩ አጀብሲጭታ እቅ።

33 ህከኔን ዱእ ሞኔን ዶረረኖ ዱሩ አፎሰ መንቹ ሃዕዮ እቅ፤ እሰን ሎረ ላጋን

34 «ናዝሬት ኢሰ! ኔሳሃለክ ኬሳሃ ሞ ደቀንሹ ዮኔ? ቤሶኔተ አሜትንዶ? ኣት አይት ጎሬ ደንጋንኬ፤ ኣት መገንዮ ጠሊሊ» ይ ያሮ።

35 ጠወ እኩጎሬ ኢሰ «ጨለይት እሲቶ ፉል!» ይ ሻቆሰ፤ ህከን እኩቤቹሃ ዶረረኖ ዱሩ ህከ መንቹ መን በላን ኡጅ ሙቱርቹሃ ሞሩዕኖንሰ እሲቶ ፉሎ።

36 ጉዕሙንኩ አጀብሲጭት ገገወንኩሰን «ኩን ህኑኑታ ላገ? ወልቃንለከ ዳቕማን ዶረረኖ ዱር አዘዘኖ ወክት እሰን አዘዘንት ፉልታኢት» የቀንቶኦ።

37 ኢሰ ዱዱቡንኩ ህከን አዘጋገቤን ሃዕዮ ባደን ጉዕማንን ሞጮጬሞ።

ኢሰ ልግብ ጥዘናመተ ፈይሱሰ
(ማቶ. 8፡14-17፤ ማር. 1፡29-34)

38 ኢሰ ዱእ ሞኒቶ ፉል ሰሞኔ ሞኒ ኣጎ፤ ህከኔን ሰሞኔ በሉት ፉረ ደሙሚን ጥዘ እቅ፤ እሰን እሴንተ ፈይሶተ ኢሰ ኡጭቶሰ።

39 እሰን እሴ መድ ሆንጠክ ኡርኬዕይ ሁኩ ፉረ ደሙሞት ገፈርቶተ አዘዣን ኣኑርሴ፤ ህከ ወክት ኬእ እሰንተ ካደሙ ጀመርቶኦ።

40 አሩ ኣጎ ወክት ሙኑ አደደ ጥዘናን ጥዘ ጥዘናመተ ጉዕመንከ ኢሰበ ኤቦኦ፤ እሰን መት-መትሰ አሊን እንገሰ አሊሰ አዕይ ጉዕመንከሰ ፈይሾ።

41 ህትን ሩሃንዩንኩ ልግብያ መኒቶ «ኣት መገንዮ ቤቱ» የን ያረን ፉሎ፤ ጠው እኩጎሬ ኢሰ ሻቆሰ፤ ህትን ዶረረኖ ዱሩ እሰ መሲህ እሁሰ ደንቤቹሃ እሰን ጠውኦተ ፈቀጀሰበኦ።

ኢሰ ገሊላን ተማርሱሰ
(ማቶ. 4፡23-25፤ ማር. 1፡35-39)

42 ኡለት ሶዞ ወክት ኢሰ ህከንቤቹቶ ኬዕይ ሙኑ ዮበኦቤቹ ኦርዕዮ፤ ጠው እኩጎሬ ሙኑ እሱ ሀሰን አሜት እሰንተ አኑር ኦርአኖበኦ ኡጭቶሰ።

43 እሰን «ሞሎ ከተሚሃ መገን ዎሞነት ተሸት ላገተ ዱዱብሱ ሀሰሰኖኤ፤ መሰንትሰ እን ሶህሞሚሁ ተን ሆንታት» ይሰ።

44 ህከን እኩቤቹሃ ይሁድ ባድ ጭምት ሞናን ፈንቀላመን ተማርሰኖ እቅ።

5

ኢሰ ዎዕኔ አሳበተ ገኡሰ
(ማቶ. 4፡18-22፤ ማር. 1፡16-20)

1 መቱ በር ኢሰ «ገንሱሬጠ» ዬኖ ባር መዴን ኡርዮሃኔን ልግቡ ሙኑ እሰበ ሆንጠክ መገን ላገተ ሞጮጭቶተ ሀንበዕላንተን

2 ኢስ ባር ገበላን ኡርት ሄኦ ለሙ፣ ጀልበ ለዕዮ፣ ቁርጨሜተ ወሻዳሩ ጀልብ ኢዚኹ ፋልት ወሻደሰ ኣንሸታኢት እቅ።

3 ኢስን ህኪን ጀልቢቶ መቶንከሰ ሰምኔህኔን ኣግ ሎረ ባርበ ሸቅ ኣኦተ ሰምኔ ጠዕሜስ፤ ህኪን ጀልባን ኣፋዕል ኡመት ተማርሲእ።

4 ኢስ ጠወዕይ ሹሎቶ ኤተሮን ሰምኔ «ጥዕላሻ ኣደ ዋሽቲን ቁርጨሜተ ወሻዳሩተ ወሻዳክኔ ኡጅዬ» ዩሰ።

5 ሰምንን ፈንቀሽ «ቀርቾ! ዊመ ሀዋሩተ ኣጸመን ገልን መቱርቹሃ ኣነሮምበእ፤ ጠዉ እኮጎሬ ኣት ይቶንቴኤቶ ወሻዳኤ ኡጅዬ» ዩእ።

6 እስ ዩገን ኣቶ ወክት ልግብ ቁርጨሜተ ኣፋን ወሻዳሰ ፊልተኤ ጀመሮ።

7 እስን ዎሎ ጀልባን ሄኦ ጀልሰ ኣሜት ሀዕልቶሰተ ቀቀሶሳ፤ ጀልሰን ኣሜት ለሞ ጀልባን ቁርጨሜተ ዊንሸታን ጀልቡሰ ዊን ኣእሞተ እኮ።

8 ሰምን ጴጥርሰ ህኪን ለዕዮ ወክት ኢስ ሎከ ኣሌን ኡብ «ቀርቾ! ኣን ጨበኘን እኮምቤቹሃ ኢ መድ ሆንጠኮት» ዩእ።

9 እስ ህኪን ዩ መሰት ኣፎ ቁርጨሜተሰ እሰለከ እሲን ሜጡብ ሄኦአሩ ጉዕመንኩ ኣበ ኣጀብሰጭቶቤቹሃት እቅ።

10 ህትን ሰምኔ ጀላት ዘብደዎሴ ኦሱት ያቁብለከ ያህይ ኣጀብሰጭቶኡ፤ ጠዉ እኮጎሬ ኢስ ሰምኔ «ዋጅቶት ከኒቶ ኤተሪሃ መን ወሻዳንቲሃ እካንት» ዩሰ።

11 እስን ጀልበሰ ኡለ ኣደ ሸቅ ኣቶቶ ኤተሮን ጉዕመርቹንከሰ ኣጉርት ኢስ ኣምንቶኡ።

ኢስ ጎግ ኣል ጥዘነተ ፈይሱስ

(ማቶ. 8፡1-4፤ ማር. 1፡40-45)

12 መቱ በር ኢስ መቶ ከተማን ሄዕዮገን ጎግ ኣል ጥዘናን * ጥኮ መቱ መንቹ ኣሜኝ ኢስ ለዕዮ ወክት ብሬንከሰ ኡብ «ቀርቾ! ተሸዬሃ ጎሬ ፈይሶኤተ ኣታልታንት» ይ ኡጩሰ።

13 ኢስን ኣንጋንከሰ ኣልሰ ሀጣዊ «ኤ ፈይ!» ዩሰ፤ ህኪ ወክትንከ ሁኩ ጎግ ኣል ጥዘነት ገፈርቶሰ።

14 ህትን ኢስ መንቹሰ «ከ ጠወ መቶ መንቹሃ ጠወኦት፤ ጠዉ እኮጎሬ መርት ገወክ ቁሰቹሃ ለሊሰ፤ እሲንከ ኣማኘን እሆተ ሙሰ ኡዘጥገን ፈይቶንትቤቹሃ ክትመ ሆንጠሀሰ» ዩሰ።

15 ጠዉ እኮጎሬ ኢስ ዲዲቡ ጉዕመ ወክቲቶን በትሽ ሞጮጨሞ፤ ልግቡ መኔ እሲቶ ሞጮጭቶተለከ ጥዘናኝሰ ፈይቶተ ጭም ይታኢት እቅ።

16 ህኪን ቤሉ እስ ኡለ ኡድመ መር ሚጠኮንኩሰ ዲኦ ኣእዮ እቅ።

ኢስ ናፈ መንቹ ፈይሱስ

(ማቶ. 9፡1-8፤ ማር. 2፡1-12)

17 መቱ በር ኢስ ተማርሰን ገሊላን ይሁድ ባደን ዮ ኦሌቶ ጉዕመኝለከ ዩሩሳሌም ከተሚኝ ኣሜቶ ፈርሳውያኑትለከ ሕግ ኣስተማረት መዳንከሰ ኣፋዕልቶ እቅ፤ ኢስንከ ጥዘናመተ ፈይሶና ቀርቶ ዎልቀት እሊሰ ሄኦ እቅ።

18 ህኪ ወክት መቱ ሎከተ ናፈ መንቹ ዳሲን ኣጅት ኤቦኡ፤ እሱንከ ሞኒ ኣግሰ ኢስ ብሬን ኣፋሸቶተ ዎቃ ሀሳኢት እቅ።

19 ጠዉ እኮጎሬ መኔ በተዕዮቤቹሃ ሎከተ ናፈ መንቹ ሞኒ ኣግሳ ዎቃሃ ሆንኡ፤ ህኪን እኮቤቹሃ ሞኒ እሊ ኣል ፋልት እሊሰ ብሎኬቲኝ መቱ ጌሰ ፈንት ህኪ ናፈ መንቹ ዳሲንከሰን ኢስ ብሬን ድርሶኡ። †

20 ኢስን ኣመዕነቱሰ ለዕይ «ኮ መንቹ! ጨቡክ ኣጉረሞሄ» ዩሰ።

21 ህኪን እኮቤቹሃ ሕግ ኣስተማረትለከ ፈርሳውት «ኩ መገን ኣሌን ቦሮር ላገተ ጠወኣኖሁ ኣዬት? ማርቶኝ ማገን ቤሉ ጨብ ፈቁን ዮተ ኣታላኖሁ ኣዬት?» ይተን ሰውዩ ጀመርቶኡ።

22 ኢስ ሰውትሰ ደግ «ካን ቀልቤንከክዕኔ ሚሃት ሰውዩቲካንታህ?

23 ጨቡክ ፈቁን» ዩቶለከ «ኬዕ ሃም» ዩቶ ሀኩንሰ ቆሀኖ?

24 ጠዉ እኮጎሬ ከን ኣዲንያ ኣሌን መንቹ ቤቲሃ ጨብ ፈቁን ዮኖ ሹምነቱ ሄኦሰ ለሊሳንክዕኔ» ይ ፈንቀሽ ናፈ መንቹንከ «ኣን ኪሳሃ ያንኪ፤ ኪኦ ዳሰክ ኣጅት ምንክ ኦርእ» ዩሰ።

25 ህኪ ወክትንከ ብሬሰ ኪዕይ ኦሰዕዮ ዳሲ ኣጅ መገኑ ገለትጨን ምንሰ ኦርዕዮ።

26 ህኪን እኮቤቹሃ ጉዕመንከ መን ኣጀብሰሻን መገኑ ገለትጭተን «ከበር ኣጀብሰሰና ጠወ ለዕናም» ይት ኣበ ዋጅቶኡ።

5:3 ማቶ. 13፡1-2፤ ማር. 3፡9-10፤ 4፡1። 5:5 ያህ. 21፡3። 5:6 ያህ. 21፡6። * 5:12 ጎግ ኣል ጥዘነተ- ዮሁ-ጠሊሊ መጻፍ ፍሳረገ መን ኣሌን ለላኖ ኣደደ እኮ ህጋ ጎግ ጥዘነተ ለሊሰና (ዘሌ 13 ዮኤሃ ለእ)። 5:14 ለዊ 14፡1-32። † 5:19 ኣይሁድ ምን ኣልት ከበር ኣጅድፍ ፋቅ ምንገ ኣጅረገቶእን፤ ሁኩንከ ጠፈሞሁ ብሎኬቲን መከሰመ ኣፈኒት፤ ህኪ ብሎኬት ኣፈ ፈንት ህኪ ናፈ መንቹ ዳሲንከሰን ኣግሱሰ ለሊሰና።

ኢስ ማቶሴ ዬድ ሌዌ ገኡስ
(ማቶ. 9፡9-13፤ ማር. 2፡13-17)

27 ህዝቲች ኤተሮን ኢስ ህዝን አዲች ፋል «ሌዌ» ዬድ ቀረጠ ሙረኖሃ ቀረጤኖቤቸን አፋዕሌአሃ ለዕይ «አወኔኤ» ዬስ።

28 እስን ጉዕመርቸንክ አጉር ከዕይ አዎቻሰ።

29 ሌዌን ኢስሃ ምንክስ አበ ድግስ ቅጥ አዕያን ልግቡ ቀረጠ ሙርታኦሩላክ ዎሉ መኑሁ አሳን ሜጡብ ማዳን አፋዕልቶ አቅ።

30 ፈርሳዊያኑትለክ ሕግ አስተማረት ኢስ አሳበተ «ቀረጠ ሙርታሁኑኡንለክ ጨበኛኖን ማጡብ አቴንገታሁለክ አጌንገታሁ ማሃት» ይት ቁንቁቶኤ።

31 ኢስን «ሀኪሙ ሀሰሰኖሁ ጥዘኖማታት ቤሉ ፈይሃበኤ።

32 እን አሜቸሚሁ ፈያኑተ ገኑተ እሁዕን ጨበኛኑት ጨብቸሰ ቶበት ፈንቀልታገ አኦታት» ይ ፈንቀሼኤ።

ሶመንተኔሃ ሆንጠኮ ጠዕምቱተ
(ማቶ. 9፡14-17፤ ማር. 2፡18-22)

33 ህዝቲች ኤተሮን መት-መት መናከት ኢስ «ያህይ አዎናኑትለክ ፈርሳዊያኖ አዎናኑት ልግብ ወክት ሶመንተን ዱኦ አታኦ፤ ጠዉ እኮጎሬ ኪ አሳበት አታኢሁለክ አጋኢሁ ማሃት?» ይት ጠዕምቶሰ።

34 ኢስን «አዜቹ አሳን ሜጡብ ሂዕኖ ገን ቦሎቸ ገኤመ ኮሃ ሶመንታገ አቶኖተ አታልቴንንደ?»

35 ጠዉ እኮጎሬ እዜቹንክ አሳች አደ አኤን መሴኖ ወክቱ አሜተኖ፤ ህዝ ወክት ሶመንታኤ» ዬስ።

36 ኢስን መት ሞሳልተ «አዪሁ ሃዕር ኦድኖች ቃፈተ ፊል ኑባጵቶ ኦድኖን ቃፈኖሁ የበኤ፤ ህዣን አዕኖ ጎሬ ሃዕር እሱ ፊላኖ ቤሉ ሃዕር ቃፈት ኑባጵቶ ኦድኖን መክታበኤ።

37 ህትን አዪሁ ሃዕር ወይን ቦበጤማሃ ኑባቸ ሆቆማዳን አፋሽኖበኤ፤ ህዣን አዕኖ ጎሬ ሃዕር ወይን ቦበጤማሁ ሆቆማዳንክ ፊላንስ እስን ዱንተአኖ፤ ሆቆማዳንኩ በአኖ።

38 ህዣን እኮቤቸሃ ሃዕር ወይን ቦበጤማሃ ሃዕር ሆቆማዳን አፋሹ ሀሰሰኖ።

39 ህትን አዪሁ ዱንኬኢሁ ቆሀኖ፤ የኖቤቸሃ ዱንኬ ወይን ቦበጤማሃ አጎች ኤተሮን ሃዕር እሱ ሀሰሰኖ ሆበኤ» ይ ኩሎሰ።

6

አበ በሬተኔ ሆንጠኮ ጠዕምቱተ
(ማቶ. 12፡1-8፤ ማር. 2፡23-28)

1 ኢስ አበ በሬን ውጠ በሊን ህገን አሳበሰ ሀማሙተ ተንቅሰ አንጋንከሰ ቁሰተን አታኦት አቅ።

2 ህዣን እኮቤቸሃ ፈርሳዊያኖች መት-መቱሰ «አበ በሬን አኡ ገበአባሃ አዕኑ ማሃት አቴንገታት?» ይቶኤ።

3 ጠው እኮጎሬ ኢስ «ደዉዳለክ እሲን ሜጡብ ሂኦ መኑ ጎሩ አፎሰ ወክት አዕኖህ

4 ሁኩንን እሰ ዱኦ ምኒ እግ ቁሰ ቤሉ ዎሉ መኑ አቱ ፈቀደሞበኤ ክትም ዱቡተ ኬሽ አቴሰለክ እሲን ሜጡብ ሂኦ መኑሃ ኣሲን አነበቤንታበኤን?» ይ ፈንቀሼኤ።

5 ህትን እሰ «መንች ቤቱ አበ በሬተ ቀርቸሃን» ዬስ።

አንገተ ናፈ መንቹ ኢስ ፈይሱሰ
(ማቶ. 12፡9-14፤ ማር. 3፡1-6)

6 ዎሎ አበ በሬን ኢስ ጭምት ምኒ እግ ተማርሰኖት አቅ፤ ህክንቤቸንን መኬሰ አንገተ ናፈ መንቹ ሃዕኖ አቅ።

7 ሕግ አስተማረትለክ ፈርሳዊያኑት ኢስ ከሰሶተ ወንጀል ደጎተ አበ በሬን ፈይሰኖ ጎሬ ለዕናም ይት አገርታ አቅ።

8 ጠዉ እኮጎሬ ኢስ ቀልብሰ ጠዉ ደግ አንገተ ናፈ መንቹ «ኬአ መን በላን ኡር» ዬስ፤ ኬዕይን ኡሬኤ።

9 ኢስን «ህንዳ መት ጠዕምቱተ ጠዕማንክዕኔ፤ አበ በሬን ጡመ ጠዉ አኡሃንደ ሂላ ጠዉ አኡሃን ፈቀደመኖሁ? ነብሳሃ ጡምሱሃንደ ህክረንገ ቤሱሃን?» ዬስ።

10 እስን ጉዕመንከሰ ዘህ ለዕኖች ኤተሮን አንገተ ናፈ መንቹ «አንገክ ሂር» ዬስ፤ ሁኩ መንቹንኩ አንገሰ ሂር ወክት አንገንትሰ ፈየተ እኮኤ።

11 ጠዉ እኮጎሬ ሕግ አስተማረትለክ ፈርሳዊያኑ እስን ኡሙዕርት «ከ ኢስ መ አዕኑ?» ይት አማዕለንቶኤ።

ኢስ ቶን ለሙ አሳበተ መጠሩሰ
(ማቶ. 10፡1-4፤ ማር. 3፡13-19)

12 ህዝ ወክት ኢሰ ዱኣ ኦተ ቆተ ኣል ፉል ኬዕይ ዊመ ህንከዕርተ ዱኣ ኣእን ገሎ።
13 ኦሉት ሶዞ ወክት ኣሳበሰ ኣሰበ ገእ ኣሳኝን ቶና ለሙ መጠር «ኣሳበተ» ይ ሱዕምኾሰ።

14 ኣሰን «ጴጥርሴ» ይ ሱዕምኾ ሰምኔት፥ ሰምኔ ኣመቤቱ ኣንድርያሴት፥ ያቁባት፥ ያህይት፥
ፍልጻሴት፥ ቤርቶሎሜዮሴት፥

15 ማቶሴት፥ ቶማሴት፥ ኣልፍዮሴ ቤቱ ያቁባት፥ ባዱስ ኢተኖ ሰምኔት፥
16 ያቁብ ቤቱ ይሁዳትለክ ኢሰ ህግሽ ኣሴ ኣሰቆሮንቶ ይሁዳት ኣቅ።

ኢሰ ልግብ ኡመት ተማርሱሰለክ ፈይሱሰ
(ማቶ. 4፥23-25)

17 ኢሰ ኣሳባንን ሜጡብ ቆታች ድር ባዳን ልግቤ ኡመቲን ኡሬኣ፤ ሁኩ ኡመቲንኩ ሞጮጭቶተለክ ጥዘናችሰ ፈይቶተ ይሁድ ባዱች ጉዕሚች ዬሩሳሌም ከተሚችለክ ባር መዳን ሄዕዮ ጢርሰለክ ሰዶን ከተሚች ኣሚቶኣራ ኣቅ።

18 ዶሮረኖ ኣያኑ ኣፋንሰ ኦርጨቆንተን ሄኦኣሩ ፈይቶኡ።

19 ኢሴችን ወልቀት ፉልታን ጉዕመንከ ፈይሰናቢቹሃ መኑ ጉዕመንኩ ኣሱ ኡሎተ ሀሰኖት ኣቅ።

ሙጎዲኖላክ ሻዘነ መላተ
(ማቶ. 5፥1-12)

20 ኢሰን ኣሳበሰ ለእን «መገን ሞምነቱ» ክዕኔሃ ኣኮቤቹሃ ኣዕኑ ቡጥቻኑት ማሰኣንቴንታኣራን።

21 ኣዕኑ ቴሱ ጎሩ ኣድሀዕኔሩ ዱቤንተቤቹሃ ማሰኣንቴንታኣራን፤ ህትን ኣዕኑ ቴሱ ኦኢነንተሩ ኦሰዕልቴንተቤቹሃ ማሰኣንቴንታኣራን።

22 መንች ቤት መሳን መኑ ግቦህዕኔ ጎሬ፥ ያዬመሀዕኔ ጎሬ፥ ህንቁመሀዕኔ ጎሬ፥ ሱዕመክዕኔ ሂልማን ኣፈመሀዕኔ ጎሬ ማሰኣንቴንታኣራን።

23 ዋጉክዕኔ ሰማን ሎረ ኣኮቤቹሃ ሁኩን ኢሊኖሀዕኔ ወክት ሙጎዲኖን ተሸ ዩንክዕኔ፤ ኣናኑሰን ከኒች ብርንተ ነብያኑተ ህት ኣቶኣራን።

24 ጠዉ ኣኮጎሬ «ኣዕኑ ቀባጣመት» መከኖሀዕኔርቹ ጉዕመንክ ደኣቴንተቤቹሃ ቆሃኖሀዕኔ!

25 ህትን «ኣዕኑ ቴሱ ዱቤንተሩ»
ጎሩ ኣፈኖሀዕኔቤቹሃ ክዕኔሃ ቆሃኖሀዕኔ!

ህትን «ኣዕኑ ቴሱ ኦሰዕልቴንተሩ»
ሻዘነንተቤቹሃለክ ኦኢነንተቤቹሃ ክዕኔሃ ቆሃኖሀዕኔ!

26 መኑ ጉዕመንኩ ጡመ ዱዱቡ ክዕኔተኔሃ ዱዱብሴህዕኔጎሬ ቆሃኖሀዕኔ! ኣናኑሰን ክዘበኛኑተ ነብያኑተ ህት ኣቶኣራን ዬኣ።

ዲን ኢቱ
(ማቶ. 5፥38-48፤ 7፥12)

27 ኢሰ «ኣን ክዕኔሃ ሞጮጭቴንተኤህኡተ ያንክዕኔ፤ ዲንክዕኔ ኢትዬ፤ ግባህዕኔህኡኣሃ ጡመ ኣዕዬ፤

28 ቦርርታሀዕኔረ ማሰዕዬ፤ ቤሶሀዕኔህኡተ ዱኣ ኣዕዬ፤

29 መጫለክ ዋቀረኖህሂሃ ለንክ ኣሱ ኣሰሰ፤ ነጠለክ ኣኣኖህሂሃ ሹራብክ በርግት ኣሰ፤

30 ኡጨኖህህሂሃ ጉዕሚንክ ኣሰ፤ ኪች ዱንያተ ኣኤ መንቹ ፈንቀሾሂተ ጠዕምቶትሰ።

31 መኑ ክዕኔሃ ኣኣተ ሀሴንንታሃ ኣዕኑሁ ህትን ኣዕዬ» ያንክዕኔ።

32 ኢትታሀዕኔረ ኢትቴንተ ጎሬ መ ደግለሊኖሀዕኔ? መሰንትሰ ጨበኛኑት ኢትታሰረ ኢትታኣ።

33 ህትን ጡመ ኢትሀዕኔህኡተ ጡመ ኣቴንተጎሬ መ ደግለሊኖሀዕኔ? ጨበኛኑቲ ህካን ኢትኣ።

34 ፈንቀሾቴን ኣኣቶኖተ ተቢሳ ኣቴንተሁኡተ ሌቁሴንተ ጎሬ ም ገለቱኖሀዕኔ? ሌቁቶ ብከ ፈንቀሾት ኣኣቶተ ጨበኛኑቲ ጨበኛኖተ ሌቁሳኣ።

35 ጠዉ ኣኮጎሬ ገለትጭትበሁኡተ ገዉሰ ኢትታህኡተ መገኑ መረርሰጫንቹ ኣኮቤቹሃ ዲንክኔ ኢትዬ፤ ጡመ ኣዕዬ፤ መቱርቹሃ ፈንቀሾቴን ኣኣቶኖተ ተቢሳ ኣቶኑሰ ሌቁሾ፤ ህከሂሃ ኣጅሩክዕኔ ሎረ ኣሀኖ፤ ጉዕሚችን ሎረ መገን ኣለተ ኣኪነንተ።

36 ሰሜ ኣኑክዕኔ መረርሰጫንቹ ኣኮገን ኣዕኑሁ መረርሰጫኑተ ኣኪ ዬኣ።

ዎሎ መን ኣሊን ፈረዱ ገበኣብሃ ኣሁሰ
(ማቶ. 7፥1-5)

37 ኢሰ «ፈረዶኖቹ ፈረደመኖሀዕኔበኣ፤ ዎሎ መን ዋሃኦኖቹ ዋሃኣንቴንተበኣ፤ ማርንሰ ይዬ ኣኑርመኖሀዕኔ።

38 እስዬ እስመኖህዕን፤ ጡመ ብካንኝን ጢቤን ቱጉሜን ብከናን በተዕይ ደፈኖ ይዮኢሁ እስመኖህዕን፤ መሰንትሰ ብክቱንት ኦዳኒን ብከመኖህዕን፤ ይእ።

39 እስ ሞሳሌኒን «ቆቆ መንቸ ቆቆ መንቸ አዎንሶት አታለናንደ? ህካን እዕዮ ጎሬ ለሙንኩሰ ኤሎን ኡባባዕንደ?

40 ተማረኖህ ተማርሰናህኒች በተአናበእ፤ ጠዉ እኮጎሬ አይሁ ጠረኝ ተማር ጎሬ አስተማርኝሰንን አሀኖ።

41 «ገይክ አሌን ሎሩ ሁሩ ሃዕዮገን ጃልክ አሌን ዮ ሁረ ሚሃ ለአን?

42 አት ገይክ አሌን ዮ ሎረ ሁረ ለኡዕናን ሀት ጃልሃክ ሲ ጃል አሌክ ዮ ሁረ ፋሻሞ ይቶተ ሀት አታልተን? ኩ ገዉክ ሎርሰታንቲሁ! ሃጭት ገይክ አሌች ሁረ ፋሽ፤ ህከኒች ኤተርን ጃልክ አሌች ሁረ ፋሽቶተ አጥረመት ለኦተ አታልታንት» ይሰ።

ሀቄ ላልቸንከሰ ደገመኖ
(ማቶ. 7:16-20፤ 12:33-35)

43 እስ «ጡሙ ሀቄ ሃለ ላልቸ ህከረንገ ሃሉ ሀቄ ጡሙ ላልቸ ሆሮ ላለኖበእ።

44 ህካን እኮቤቸሃ ሀቄ ጉዕሙንኩ ላልቸንከሰ ደገመኖ፤ ኦዴኛ ላልቸ ኡቲቻ መጦኖተለከ ወይን ላልቸ ኡታሞ ሀቄች መጦኖተ አታሉኖበእ።

45 ሙኑ ቀልቤንከሰ ዊሞ በተዕዮሃ አፌን ጠዉአናቤቸሃ ጡሙ መንቸ ጡሙ ቀልቤችሰ ጡሙ ጠወ ፋሸኖ፤ ህትን ሃሉ መንቸ ሃለ ቀልቤችሰ ሃለ ጠወ ፋሸኖ» ይሰ።

ክናገለከ ሸፋር አሌን እጃረንቶ ምንተ
(ማቶ. 7:24-27)

46 እስ «አን ኩላንክዕንሃ ኦቲንተበእ፤ ሚሃት ቀርኝ! ቀርኝ!» ይቲን ገአቲንተኤሀ?

47 ኢ ቤቼ አሜተኖህ ጉዕሙንኩ ላገኤ ሞጮጭ አአኖሁ አይሁ መ አጉደኖ ጎሬ ለለሳንክዕን።

48 ሀኩ መንቸ ምኒ እጃሮተ ጠረኝሽ ቀበበ አም ክን አሌን ምኒ ኤሎ እመኖ መንቸ አጉደኖ፤ ድርሱ አሜቻ ወክት ህከ ምን ሀንበሎ፤ ጠዉ እኮጎሬ ክን አሌን እጃረሞቤቸሃ ለንቁቅሶተ አታሎበእ።

49 ላገኤ ሞጮጭ አአቡ መንቸ ምኒሀሰ ቀበብ ኤሎሃ እመኖሰን ኡለ አሌን ምኒ እጃሮ መንቸ አጉደኖ፤ ህከ ምኒ ድርሱ ሀንበላን ወክትንከሰ ኡቦ፤ ህከን ምኒ ኡቦንኩ ሃለ አኮ» ይ ኩሎስ።

7

እስ ጥቤ ሀለቅች ካድንቸ ፈይሱሰ
(ማቶ. 8:5-13)

1 እስ ሙኑ ሞጮጩን ጠወዕይ ሹሎች ኤተርን ቅርርናሆሞ ከተመ ኦርዕዮ።

2 ህከኔ መቱ ጥቤ ሀለቅንኩ ሃዕዮ እቅ፤ እስንከ አበ ደግለለኖስ ካድንቸ ጥኹ ሬሆተ ሆንጠኩ እቅ።

3 ጥቤ ሀለቅንኩ እሰተሃሃ ሞጮጩ ወክት አይሁድ ባልቃተ እስ አሜቻ ካድንቸኤ ፈይሶተ መርቲን ኡጭዬ ይ ሶኮሰ።

4 እሰን እሰበ አሜቶ ወክት «ከ ጠወ አቶተ ሀሰሰኖሃ መንቸ።

5 መሰንትሰ ኩ መንቸ መነኔ ኢተኖሃን፤ ህትን ጭምት ምኒ እጃርኔ» ይት ጠራኝሰ ኡጭቶሰ።

6 ህካን እኮቤቸሃ እሰን እሳን ሚጡብ ኦርዕዮ፤ ጠው እኮጎሬ ምንሰ ሆንጠኩ ወክት ጥቤ ሀለቅ ጃለሰ «ቀርኝ! አት ኢ ምኒ ኦተ አን ገበአበ መንቸ እኮምቤቸሃ ኢቤቼ አሜቶተ ተርበ ይቶት።

7 ህካን እኮቤቸሃ አን ኪበ አሜቶተ ገበአበሃን፤ ጠዉ እኮጎሬ አት ላገክ ጠወኡንት ጎር ካድንቸኤ ፈየኖ።

8 አን እች በተአ ህለቃተኤ አዘዘመን እች ዋሮን አዘዛንሰ ወታደሩ ዮኤ፤ ህከኩኡችን መቼሰ «መር» ይሞ ጎሬ መረኖ፤ ዋሎሰንገ ሐም» ይሞ ጎሬ አሜተኖ፤ ህትን ካድንቸኤ ላካን አኤ ይሞ ጎሬ አአኖ» ይ ኢስቤቼ ሶኮ።

9 እስ ህካን ሞጮጩ ወክት እሰን አበ እጃብሰጭ አዎን ሃዕዮ ልገብያ መንቤቹ ፈንቀል «አን ኩላንክዕን፤ እሰራኤላን ህትኔ አመዕነቱ ሆሮን ለዕዮምበእ» ይሰ።

10 ሁኩ ሶሀንቶአሩ ምኒ ፈንቀልተ አሜታ ወክት ካድንቸሰ ፈይሃን ለኦኤ።

ምንሴ አኑ ሪኖ መንቸ ጨል

11 እስ ለንክ በር አሳባንገለከ ልግቤ መነን ሚጡብ «ናይነ» ይኖ ከተመ ኦርዕዮ።

12 እሰን ከተመ አኒኖ ኡሩተ ሆንጠኩ ወክት ጀናዘተ እጅቶ ሙኑ ከተሚች እጅት ፋልታኢት እቅ፤ እሰን አማተሰ ሚጥቸሃ ቤቱ እቅ፤ አመሰን ምኒ አኑ ዮሴበአተ መንቸ እቅ፤ ህከን ከተም መነኔ ልግቤ ሙኑ እሰን ሚጡብ ሃኦ እቅ።

13 ቀርቸንኩ ለዕዮሴ ወክት መረርሰጭሴ «ኦኦት» ይሴ።

14 ኢሰን ሆንጠክ ዳሰስ ኡሎ ወክት እጅቶአሩንኩ ኡርቶኤ፤ እሰን «ወደልቸ! እን ኬሳሃ ያንኬ፤ ከክ!» ይእ።

15 ህከ ወክት ሁኩ ሬዮ ጨሉንኩ ጎበሰ ኪሸ አፋዕል ጠወኡንከ ጀመር፤ ኢሰን ህከ ወደልቸንከ አማተሰ ኣሲእ።

16 ህካን እኮቤቺሃ ጉዕመንከሰ ባበነት ኣፋንሰ «ጠረኙ ነብዬቹ በላንከኔ ኬዕዮኤ፤ ህትን መገኑ መን ጡምሶተ አሜቶኤ» ይተን መገኑ ገለትጭቶኤ።

17 እሰ ዲዲቡንኩ ይሁዲንለከ ህከን አዘጋጌን ዮ ባደን ጉዕማንን ሞጮጨሞ።

ጠመቃንቸ ያህዪቶ ኢሰበ ሶህንቶ ሶቀማኑተ (ማቶ. 11፡2-19)

18 ያህይ አምናኑት ህካን ጉዕመንከ ዲዲብሰቶሰ። ህካን እኮቤቺሃ ያህይ አምናኖቶሰ ለሙ አሰቤቸ ገእ

19 «ሁኩ አሚተኖ ዬኖ መሲሁ አቴትንደ ህከረንገ ሞሉ አገርኑ?» ይ ኢሰቤቸ ሶኮሰ።

20 እሰን ኢሰቤቸ መርት «ጠመቃንቸ ያህይ አሚታንት ዬኖ መሲሁ አቴትንደ ህከረንገ ሞሉ አገርኑ?» ይ ኪቤቸ ሶኮኔ። ይቶኤ።

21 ህከ ወክት ኢሰ ልግብ መን አደደ ጥዘናኝ ፈይቾ፤ ህትን ደርረሮ ዲርሃ ፋሼእ፤ ልግብ ቆቆ መን ለአገ አዕዮ።

22 ኢሰን ሶህንት አሚቶአረ «መርቴን ያህይሃ ለኢንታሃለከ ሞጮጭቴንታሃ ሁኩንን «ቆቆ መኑ ለአኖት፤ ድኑ መኑ ሃመኖት፤ ጎግ አል ጥዘነት አሮሰሩ ፈይታኢት፤ ደንቁ መኑ ሞጮጨኖት፤ ሬቶአረ ሬሆቻ ኬኣኢት፤ ቡጥቻኖተ ተሸት ላገት ተማርሲኖት።

23 እን ቆዕልባሁ ማሰአሞአሃን» ይቴን ኩሌሰ። ይ ፈንቀሺሰ።

24 ያህይ አምናኑት መርቶ ወክት ኢሰ ህከን ልግቤ መኒሃ ያህይተኔሃ ጠወኤ ጀመር፤ እሰን «መ ለአኖት ኡለ ኤድመ መርቴንታሁ? ቡብሩ ሌንቁቅሰኖ ሾምባቁተ ለአኖታትንደ?

25 ህከረንገ መ ለአኖተ ፋልቴን? ጡመ ኦድኑተ ኦደዕዮ መንቸ ለአኖታትንደ? ህትጎተበእ፤ ጡመ ኦድኑተ ኦደኣአሩ መኪሃንሰ ሂኣኢሁ ሞመ ሞናኒት።

26 ህከረንገ መ ለአኖተ መርቴን? ነብዬቹ ለአኖታትንደ? ህትጎተበእ! እን ኩላንክዕኔ፤ ነብዬቺቸ በተአኖሃ ለኣህት።

27 ስለእ! ሃጭ ብርክ ሃመን ወቃክ ቅጥአኦ ሶቀማንቸኤ ሶሃም፣ የመሞ አሰተኔሃ ከተበሞሁ ከኒት።

28 እን ኩላንክዕኔ፤ ማንቲቸ አለንቶሁኑኤ በላን ያህዪቶ በተአኖሁ አዪሁ ዮበእ፤ ጠወ እኮጎሬ መገን ሞክነቲን ጉዕሚቶን ሆፈአኖሁ ጉዕሚቶን በተአኖ» ይእ።

29 ጉዕመንኩ መኑለከ ቀረጠ መርታለሩ ህካን ሞጮጭቶ ወክት ያህዪን ጠመቀንቶአረ እኮቤቺሃ መገን ሆጉት ሀንቅ አሁሰ ደጎኣ።

30 ጠወ እኮጎሬ ፈርሳዊያኑትለከ ሕግ አሰተማረት ያህዪን ጠመቀሙ ሆጎቤቺሃ መገን ሰውት ግቦኤ።

31 ኢሰ «ከን ዘማን መን ሚን አጉጣቀንሳንሰ? እሰንገ መ አጉዳእ?

32 ኩ መኑ ጌባን አፋዕልት መት-መቲሰ ገአተን ሁሉሉተ ቡንሶንክዕኔ፤ አዕኑንገ አለጽቴንታበእ፤ ህትን ኦአሲንሳሞ ወክት ኦኤ ግቤንታኤ ይተን መት-መቲንከሰ ገአቀንታ ኦሱተ አጉዳእ።

33 ጠመቃንቸ ያህይ አቸተ አቴዕለከ ወይን ባበጠማሃ አጉዕነ አሜቸ ራድረሮ ዲሩ ዮሴ ይቴንታኤ።

34 መንቸ ቤቱ አተንለከ እገን አሜቸ አቃን «ቆኤቻማተ፣ ሰከርታሁኑኤሃ፣ ቀረጠ መርታሁኑትለከ ጨበኛኖተ ጆሌ ይቴንት።

35 ጠወ እኮጎሬ መገን ሀይመት ሀንቅ አሁሰ ደገመኖሁ እሰ ሀይመተ አምንታሁኑኤሃት» ይሰ።

መትት መንቸት ኢሰ ሎካን ሸቱተ ቡሩሴ

36 ፈርሳውያኖቶ መቼ መንቸ ኢሰ ምኔሰ እቶተ ገኤሃን ህከን ፈርሳውቶ ምኒ ኣግ ዛበዕይ ማዳን አፋዕሌኣ።

37 ህከን ከተማን መትት ጨበኛት ጫት ኢሰ ፈርሳውቶ ምኔን ማዳን ዛበዕይ አፋዕሌኣሃ ደጎ ወክት ሸቱት ዊንቶ «አልባሰጥርሰ» ይኖ ክኒቸ መክሲመ ብልቃጠ አፍ አሜቶኤ።

38 እሴን ኤተርሰ አዲን ሎከሰ መዳን ኡርት ኦኣን እንጂጃሴ ሎከሰ አሌን ዲንተንለከ ሙሚንከሴ ሎከሰ ሸንሸተንለከ ሱንቅተን ሎከሰ አሌን ሸቱተ ቡርቶኤ።

39 ህከ ወክት ኢሰ ገኤ ፈርሳውቸ ህካን ለዕዮ ወክት «ኩ መንቸ ነብዬቹ እኮ አቃን ካን አታሰ ጫት ጨበኛተ እኮቤቺሃ ሃትኖሜተ ጫ ጎሬ ደገኖ አቅ» ይ ቀልቤንከሰ ሰውዬእ።

40 ኢሰን «ሰሞኔ! ጠወኣንኪ ጠወ ዮኤ» ይሰ፤

እሰን «እሰተማርቸ! መርቸሃን?» ይ ፈንቀሺሰ።

41 ኢሰን «መቶ መንቸች ብረ ሊቁጭቶ ለሙ መኑ ሄኑ እቅ፤ ህክኑኡችን መቱሰ ኦንቲ ጥቤ ዲናረ ሞሌንገ ኦንታሁ ዲናረ ሊቁጭቶ እቅ።

42 እሰን ሊቁጭቶአሃ ባቱ ሆን ወክት ሊቁሾ መንቸ ለሞሰ ኤዳሃ ጌኝ አዕይ አጉሮ፤ ሊቁጭቶሁኑኡች ህክንሰ በትሽ ኢተኖሰ?» ይእ።

43 ሰሞንን «አብ ሊቃሃ አጉሬመሲሃ አጉደኖኤ» ይ ፈንቀሼእ፤ ኢሰን «ሀንቅንክ ፈረደንት» ይ ሰሞኔሃ ጠወዕዮሰ።

44 ሀከኒች ኤተሮን ኢሰ ህተን ጫ አደ ፈንቀል ሰሞኔ «ተ ጫተ ለአንተትንደ? አን ሞንክ አጎሞ ወክት እት ሎካተኤ ሞሃ አቶንቴኤበእ፤ ጠዉ እኮጎሬ እሴ እንጂ ጃንከሴ ሎከኤ ቆፍሰ ሙሚንከሴ ሺንሸቶኤ።

45 ህትን እት ሱንቅቶንቴኤበእ፤ ጠዉ እኮጎሬ እሴ ሞንክ አጎሞሀኒች ኬሽ ሎከኤ ሱንቅ አጉሮቶበእ።

46 እት ቡዕላንከኤ ሆሮ ዘህተሃ ቡሮቶንቴኤበእ፤ ጠዉ እኮጎሬ እሴ ሎካንከኤ ሸቱተ ቡሮቶኤ።

47 ህካን እኮቤቺሃ አን ያንኬ፤ በትሰ ኢትቶቤቺሃ ልግቡ ጨቡሴ አጉረሞሴ፤ ጠዉ እኮጎሬ ቀው አጉረመኖሲህ ቀው ኢተኖ» ይሰ፤

48 ኢሰ ህተ ጫተ «ጨቡክ አጉረሞሄ» ይሰ።

49 እሰን ሚጡብ ማዳን ሄኦእሩ «ኩ ጨብ ፈቅን የተ አጉሰኖህ አይት?» ዩ ጀመርቶኤ።

50 ጠዉ እኮጎሬ ኢሰ ህተ ጫተ «እመዕነቱክ ፈይሾሄ፤ ወገሬቲን ኦሮእ» ይሰ።

8

ኢሰ አሳበተለክ ካደንተን ሄኦ ሜንቲ

1 ሀከኒች ኤተሮን ኢሰ መገን ምዎነት ተሸት ዲዲብሰን ከተማንለክ ኦሎን ጠወእን ህገኖ እቅ፤ ቶና ለሙንኩ አምንተን ሄኦእሩ እሰን ሚጡብ ሄኦ እቅ።

2 ህትን ዶሮረኖ እያኑ ገፈርሰሩለክ አደደ ጥዞናች ፈይቶ መት-መቱ ሜንቲ አምንተሰት እቅ፤ እሰን ለመለ ሩሃንየንከ ፋሼመ «መግደል» መርየማት።

3 ሄሮድሴ ሞኔን እዘዘን ሄዕየ «ኩዘ» ይኖ መንች ጫት የሃናቲ፤ «ሶስ» ይኖተንለክ ሞሉ ልግቡ ሜንቲ ሄኦ እቅ፤ እሰን ዲንያንከሰ ኢሰለክ አምንተሰት ካደንታ እቅ።

ዉጣንች ማቁተ

(ማቶ. 13፡1-9፤ ማር. 4፡1-9)

4 ልግቡ መኑ ከተሚች ጉዕሚችን አሚች ጭምዬ ወክት ኢሰ

5 «መቱ ዉጣንቺ ዜሬተ ዉጡተ ፋሎ፤ ዉጠንን መት-መቱ ሞቁ ገበላን ኡብ ሎካን ከደሞ፤ ህትን ሰሚ ጨኡት እቶሰ።

6 ሞሉንገ ክን አሌን ኡብ ሙቸ፤ እኮጎሬ ቤቹሰ ሙጥመት የሰበእቤቺሃ ሞሎ።

7 ህትን መት-መቱሰ ኡት ኣዜን ኡብ፤ ኡቲንኩ እሰን ሚጡብ ነጻ ለንግ አሴሰ።

8 ህትን መት-መቱ ጡመ ኡላን ኡብ ሙቸ፤ ነጹ ወክት ጥብተ ጥቤን አቶች» ይ ማቆን ኩሎሰ፤ ህካን ጠወዕይ ከዕይ ላገሰ ጎት አዕይ «ሞጮጭታ መጨት የሲሁ አይሁ ሞጮጬን!» ይእ።

ኢሰ ሞሳሊን ጠወዕዮ መሰት

(ማቶ. 13፡10-17፤ ማር. 4፡10-12)

9 እሳበሰ ኢሰ «ከን ሞሳሊ ፍሳረሰ መርቺሃን?» ይት ጠዕምቶ ወክት

10 «ክዕኔሃ መገን ምዎነት ሞሰጥር ደጉ አሳሞህዕኔ፤ እኮጎሬ ሞሉ መኑ ለእን ቀልብ አትበገለክ ሞጮጭተን አጥራመትበገ ኩለመኖሳሁ ሞሳሊኒት» ይእ።

ዉጣንች ሞሳሊ ፍሳረተ

(ማቶ. 13፡18-23፤ ማር. 4፡13-20)

11 ኢሰ «ሞሳሊሰ ፍሳረተ ከኒት፤ ዜሬቱ መገንተ ላገ።

12 ህትን ወቁ ገበላን ኡብ ዜሬቱ ለሊሰኖሁ መገን ላገተ ወክቲህሰ ሞጮጬኖ መነሃት፤ ጠዉ እኮጎሬ አመዕንት ፈቅበገ አልቤሱ እሚች ሞጮጭቶ ላገተ ቀልብቸሰ መሰና።

13 ክን አሌን ኡብ ዜሬቱ ለሊሰኖሁ መገን ላገተ ሞጮጭታ ወክት ተሸትን ቶጋእሬን፤ እኮጎሬ እሰ አመዕንቶአሁ ወክቲሃሰት፤ ጠጹ የሰበእቤቺሃ ኦሪሽ ወክት ላገእኤ።

14 ህትን ኡት ኣዜን ኡብ ዜሬቱ ለሊሰኖሁ መገን ላገተ ሞጮጬኖ መነሃት፤ እኮጎሬ ከ ኣዲንያ ጠወ ሰውዬ፤ ቀባጡትለክ ናጠቀሙ ለንግሃንሰ አቶቲዕናን ቆሽ አካኤ።

15 ህትን ጡመ ኡላን ኡብ ዜሬቱ ለሊሰኖሁ ጡመ መክዮ ቀልቤን መገን ላገተ ሞጮጭት ጠረኝት አገርታእረ፤ እሰን አጉዕላን አቶተ አቶታኤ» ይእ።

ዛሌ ኣዜን ዮ ኩራዝተኔሃ

(ማር. 4፡21-25)

16 እሲ «አይሁ ኩራዘ ቀሾች ኤተርን ኦዲን እፍሽ አፋሾኖሁ ህከረንገ መቃጢች ዋርን አፋሾኖሁ ዮበእ፤ ጠዉ እኮጎሬ ምኒ አገኖህኒሃ ጉዕሚንከ ለሎተ ጎትዬ ቤቶን አፋሾኖ።

17 «መሰገንትሰ ቴዕሊርቹ ደገሙዕነ ማጠዋርቹንኩ ለሎተናን ፈቀሮበእ።

18 «ህካን እኮቤቹሃ ሀት እኪን ሞጭጭቴንገተ ጎሬ አገዕርዬ፤ መሰገንትሰ ዮሰህኒሃ በርገሞ አሰመሮሰ፤ እኮጎሬ ዮሰበአህኒች ሁኩ ዮኤ ይ ሰውዮኖንኩ አእመሮሰ» ዬእ።

እሲ አመትለከ አመሰኦሱት
(ማቶ. 12፡46-50፤ ማር. 3፡31-35)

19 ህከኒች ኤተርን እሲ አመትለከ አመሰኦሱት እሰቤቹ አሜቶኤ፤ እኮጎሬ ሙኑ በተዕዮቤቹሃ እሲን ደቀንቶተ አታልቶበእ።

20 ህካን እኮቤቹሃ «አመክለከ አመክ ኦሱት ደቀንቶሄተ ሀሰ ኡርን ኡርቶኤ» ዬን ኩሉመሰ።

21 ጠው እኮጎሬ እሰ «መገን ላገተ ሞጭጭት አዘዘንታእሩ ጉዕሙንኩ አመተኤለከ አመኤተ ኦሱ» ዬሰ።

እሲ ዊ ሁለ ኡርሱሰ
(ማቶ. 8፡23-27፤ ማር. 4፡35-41)

22 መቱ በር እሲ አሳባንከሰን ሜጡቦ ጀልባን ኣግ «ከን ባርች ዉድ አደ ቶልኖ» ዬሰ ወክት እሰን መርቶተ ኬኦኤ።

23 መርተን ሄኦገን እሲ ግሾ፤ ዊ ሁሉንኩ ህከን ባር አሉን ኬዕይ ዉሁ ህከን ጀልባን ኣግ ዊሞተ እኮቤቹሃ ጨነቀንታኢት እቅ።

24 እሰን እሰቤቹ መርት ግሰኛች ኬሰ «ቀርቶ! ቀርቶ! ጎንፎታት» ይቶኤ፤ እሰን ኬዕይ ቦብረለከ ዊ ሁለ ሻቆ ወክት ኡሬእ፤ አበንከ ጨለ ዬእ።

25 እሰን «አመዕነቱክዕይ ህንዴ?» ዬሰ፤ እሰን አበ አጀብሰጭትለከ ዋጅት መት-መቱሰ «ኩ ቦብረለከ ዋሃ አዘዘኖሁ ሁትን እሰን አዘዘንታሲሁ ሁትናሙሃ ሁትን?» የቀንቶኤ።

እሲ ዱሪን አፈንቶ መን ፈይሱሰ
(ማቶ. 8፡28-34፤ ማር. 5፡1-20)

26 ህከኒች ኤተርን ገሊለ ዉድ አዲን ሄዕዮ «ጌርጌሴኖ» ዬኖ ባዲ ኢልቶኤ።

27 እሲ ጀልቢች ኡለተ ድሬገን ሩሃንዮ አፎሰ መንቹ ከተሚች ፋል ህከኒ ደቀሞሰ፤ እሰን ልግብያ ወክቲች ኬሰ ኦድኑተ ኦደኤ እኩር እቅ፤ ህትን እሰ ሄኦኖሁ ሞኔን አሁዕነ ሎድ አዜኒት እቅ።

28 እሰን እሲ ለዕዮ ወክት ብሬንከሰ ያር ኡብ ሎረ ላጋን «ጉዕሚችን ሎረ መገን ቤቶ እሲ! ኤሳለከ ኬሳሃ ሞ ደቀንሾ ዮኔ? ሀዕይ ኤገተክ ኦሪሶቴኤ» ዬእ።

29 ህካን ዬኤሁ ሁኩ ዶርረኖ ዱሩ ህከን መንቹች ፋሎተ እሲ ሻቆሰቤቹሃት፤ መሰገንትሰ ከኒች ብርተ ልግብ ወክት አፎሰቤቹሃ ሰንሰለቲንለከ ሎከ ብረቲን ኡሱሬን አገሬኖሰ እቅ፤ ጠዉ እኮጎሬ ሰንሰለተ ተንቅሽ ሎከ ብረቲንከ ቢጭ ዶርረኖ ዱሩ አምንሰንሰ ኡለ ኡድመ መሰሮሰ እቅ።

30 እሲን «ሱዕሙክ አይት?» ይ ጠዕሚሰ፤ እሰን ልግቡ ሩሃንዮ አሉሰ ጭምቤቹሃ ሱዕሙኤ «ጎጎተሃን» * ይ ፈንቀሼሰ።

31 ሁኩ ዶርረኖ ዱሩ «ሀዕይ ጥዕላሽ በዋን አንጋምገ አቶትኔ» ይት ኡጭቶሰ።

32 ህከን ቤቶን ቆተ መዳን ልግቡ ቦኬ መሰረት ዘግ ይቶ እቅ፤ ሁኩ ዶርረኖ ዱሩናንኩ «ህከን ቦኬ መሰረትን አንጋምገ አእኔ» ይት እሲ ኡጭቶሰ፤ እሰን ኣጎተ ፈቀጀሰ።

33 ህከኒች ኤተርን ሩሃንዮንኩ ህከ መንቹ ገፈር ቦኬን ኣጎ ወክት ቦኬ መሰረትን ሂለ ብከ ደጉደን ገርደብ አለች ጨነቀንተን ድርት ባራን ኣእንቶኤ።

34 ቦኬ ዘማኑት እኮ ጠወ ለኦ ወክት ሁንት መርቶች ኤተርን ከተማንለከ ገጠራን ጠወሰ ዱዱብሰቶሰ።

35 መኑንኩ እኮ ጠወ ለኦተ ሞኒች እሰቤቹ አሜቶኤ፤ ሩሃንዮ ፋሎሰ መንቹ ቀልቡሰ ፈንቀላን ኦድኑተ ኦደዕይ እሲ ሎከሰ ብሬን አፋዕሌኢሃ ለኦ ወክት ዋጅቶኤ።

36 ወክትሰ ሄኦ ሙኑ ሩሃንዮ አፎሰ መንቹ ሁት እክ ፈይ ጎሬ ዱዱብሰቶሰ።

37 ህከኒች ኤተርን «ጌርጌሴኖ» ዬኖ ቀኤን ሄዕዮ ሙኑ ጉዕሙንኩ አበ ዋጅቶቤቹሃ እሲ እሰ ባዲች ኦርኦተ ኡጭቶሰ፤ ህካን እኮቤቹሃ እሲ ጀልባን ኣግ ወዕና አሜቶ ባዲ ፈንቀል ኦርዕዮ።

38 ሩሃንዮ ፋሎሰ መንቹ እሲ አምናንኬ ይ ኡጭሰ፤ እኮጎሬ እሲ ሀርሲሽሰ

39 «ምንክ ፈንቀልት መርት መገኑ አዕዮሄ ጠወ ጉዕመንከ ጠወእ» ዬሰ፤ ሁኩ መንቹንኩ እሲ አዕዮሰ ጠወ ከተማን ጉዕማንን ጠወኣን ኦርዕዮ።

8:16 ማቶ. 5፡15፤ ሉቃ. 11፡33። 8:17 ማቶ. 10፡26፤ ሉቃ. 12፡2። 8:18 ማቶ. 25፡29፤ ሉቃ. 19፡26። * 8:30 ጎጎተ- የ ልግብ የሃን።

ኢያርሴ ቤቱለክ ኢስ ኦድኑተ ኡልቶ መንቸተ (ማቶ. 9፡18-26፤ ማር. 5፡21-43)

40 ኢስ ፈንቀል አሜኛ ወክት ልግቡ መኑ አገርቶሰቢቹሃ ሙንዲኖን ቶጎሰ።

41 ህከቤቹንከ ጭምት ምኒ ገሻንቸ «ኢያርሴ» ዬኖ መቱ መንቸ አሜኛ ኢስ ሎከ አሌን ኡብ «ምኒኤ አም» ይ ኡጩሰ።

42 ህካን ዬኢሁ ቶና ለሙ ዘማን እኮሴ መት ቤቱሰ ጥካ ሬቶተ ሆንጠኮቤቹሃት እቅ። ኢስን አሳን ሜጡብ መረን ሄዕዮገን አምንተን ሄኡ መኑ ከን አዲንለክ ካጽ አዲን ረብ አፎሰ እቅ።

43 ቶና ለሙ ዘማን ጉዕመንከ ቁጉ ዲንተአን ኦርጨቀንተን ሄኡ መት መንቸት ሄኡ እቅ፤ እሴን ዲንያሴ ጉዕመንከ ህከማን ሹልት አዪሁ ፈይሶሲት አታሎብአ።

44 እሴን ኢሰቤቹ ኤተርሰ አዲን ሆንጠክ ኦድኖሰ ሰትተ ኡልቶኤ፤ ህከ ወክትንከ ቁግሴ ቡቁት ኡርቶኤ።

45 ኢስን «አዬት ኡሎኤሁ?» ይ ጠዕሜሰ። ጉዕመንኩ መኑ «ኡልኖኬብአ» ዬ ወክት ጴጥሮሰለክ እሴን ሜጡብ ሄኡአሩ «አሰተማርኛ! ኪንኩ መኑ ጉዕመንኩ ሀንበዕለመን አምንኪ ለእን ላኤት ኡሎኤሁ» ይተንንዶ?» ይቶኤ።

46 ጠወ እኮጎሬ ኢስን «ወልቀት ኢኛ ፋልቶገ ደጎምቤቹሃ መቱ መንቸ ኡሎኤ» ዬአ።

47 ህት መንቸንት ማጠሙ ሆጉሴ ደጎ ወክት ሁጠን ኢሰቤቹ አሜት ሎከሰ አሌን ኡብ ጉዕመንከ መን ሙዲን ሚሃ ኡልቶሰጎሬለክ ህከ ወክት ሀት እክ ፈይቶጎሬ ኩልቶኤ።

48 ኢስን «ኢ ቤቶ፤ አመዕነቱክ ፈይሾሂ ወገሬቲን ኦርአ» ዬሴ።

49 ኢስ ህካን ጠወእን ሄዕዮገን መቱ መንቸ ጭምት ምኒ ገሻንኛ ምኒኛ አሜኛ «ጨልክ ሬቶኤ፤ ህካን እኮቤቹሃ አሰተማርኛ ጠለዕላን ሆግሶትሰ» ዬአ።

50 ጠወ እኮጎሬ ኢስ ህካን ሞጮጭ «ዋጅቶት፤ አመዕን ቤሉ፤ ጨልክ ፈይታኤ» ዬሰ።

51 ኢስ ኢያርሴ ምኒ ኢሌ ወክት ጴጥሮሴኛ፤ ያህይኛ፤ ያቀቢኛ፤ ጨሌ እንለክ አመ ቤሉ ሞሉ ማጡሁ እሴን ሜጡብ ምኒ አጎተ ፈቀጀሰ እቅ።

52 ህከኔ ሄዕዮ መኑ ጉዕመንኩ ጨሌተኔሃ «አዬ! አዬ!» ይተን ኦኣአት እቅ፤ ጠወ እኮጎሬ ኢስ «ኦኣኖቹ፤ ጨልት ግሶ ቤሉ ሬቶብአ» ዬሰ።

53 እሴን ጨልት ራሁሴ ደጎቤቹሃ ጉዕመንኩ ቀለደን ኦሰዕልቶሰ።

54 ጠወ እኮጎሬ ኢስ ጨሌ እንገተ አፍ «ቴ ጨሌ ኪእ!» ዬሴ።

55 እሴን ሩሁሴ ፈንቀሎቤቹሃ ወክትንከሰ ሾት ይት ኪኦኤ፤ ኢስን «አታኢሃ አሰዬሴ» ዬአ።

56 ጨሌ አመትለክ አት አጀብሰጭቶኤ፤ ጠወ እኮጎሬ እኮ ጠወ ሚጢሃ ጠወኦኖቹ ይ ኢስ አዘኮሰ።

9

ቶን ለሙንኩ አሳበት ተማርሲሃ ሶሀሙሰ (ማቶ. 10፡5-15፤ ማር. 6፡7-13)

1 ኢስ ቶና ለሙንከ አሳበተ ሚጡብ ገአ ሩሃንዩ ፋሽቶተ፤ ጥካነተ ጉዕመንከ ፈይሳ ወልቀተለክ ሹምነቱ አሴሰ።

2 ህት አዕይ መገን ሞምነቱ አሜቱሰ መኒሃ ጉዕሚንከ ጠወኦተለክ ጥካናመተ ፈይሶተ ሶኮሰ።

3 ህትን ዋቁሀክዕኔ «በርተሃ እኮ እቃ ከረጥትታ እኮ እቃ ሽንቅታ እኮ እቃ ብረሃ እኮ እቃ ደዕርቶኖተ ኦድኑታ እኮ እቃ አፎኖቹ።

4 ህትን ኮሀ እኪን ኣገኘተ ምኒኛ ፋልቲን መርቶኖተ ኢላ ህከን ምኔን አገሬ።

5 ሀበይ ወገሬቲን አሜቲኔ» ይ መኑ ቶግብሀዕኔጎሬ ህከ ከተመ እኮርቲኔን ፋልቲንተ ወክት አሳንከ አማኛ አሆተ ሎክክዕኔ ትብ ግግሽቲኔን ኦርዕዬ» ዬሰ።

6 ህካን እኮቤቹሃ አሳበት ህከን አዲኛ ፋልት ተሸት ላገተ ተማርሰተንለክ ጉዕመ ቤቸንን ጥካናመተ ፈይሶን ቀዕያን ጉዕማንን ህጋ እቅ።

ኢስ ዲዲቡ ሄሮድሰ ሞጮጩሰ

7 ገሊላ ባድ ገሻንቸ ሄሮድሰ ኢስ አዕዮ ጠወ ሞጮጩ ወክት ዲዲቅ ዬሰ፤ ህካን እኮሁ መት-መቱ መኑ «ጠመቃንቹ ያህይ ሬሆኛ ኬዕዮኡ»

8 ህትን መት-መቱ መኑ «አልያሰ ፈንቀል አሜኛኤ» ይተን ሞሉሰንገ «ሄጭት ሄኡ ነቢያኖኛ መቱ ኬዕዮኡ» ይታቤቹሃት እቅ።

9 ሄሮድሰን «ያህይ ቡዕለ ሙርሲሾም እቅ፤ ጠወ እኮጎሬ እሰተኔሃ ህትኔ ጠወ ሞጮጫሚሁ ከን አዬት?» ዬአ፤ ለኦሰተ ሀሰኖት እቁ።

ኢስ ኦንቶ ኩሜ መኒሃ እትሱስ

(ማቶ. 14፥1-2፤ ማር. 6፥30-44፤ ያህ. 6፥1-14)

10 አሳበሰ ሶሃመ አዲች ፈንቀልት አሜት አቶ ጠው ጉዕመንከ ኢሲሃ ኩልቶኤ፤ እሰን «ቤተ ሳይዳ» ዩፍ ከተማን ገበጭ ዩቤቼ ሜጥሃሳ እኣ ኦርዕዮ።

11 ጠዉ እኩጎሬ ልግቡ መኑ ህካን ሞጭጭ ወክት አዎኛሰ፤ እሰን መነሰ ቶግ መገን ዎምነትተኔሃ ተማርሴሰ፤ ጥዘርች ፈይቶተ አሜቶኦሬ ፈይሾሰ።

12 ኡለት ሀዎርቶተ ሆንጠኮ ወክት ቶና ለሙንኩ አሳበሰ ኢሰቤቼ ሆንጠክ «ኩ ነኡ ዮም ቤቹ ኡድመ እኮቤቹሃ ከን ቀኤን ዮ ከተመለከ ገጠረ መርት ገልቶተለከ አታኢሃ ሀሶተ ከ መነ ህርሲሰ» ይቶሰ።

13 ጠዉ እኩጎሬ ኢሰን «አታኢሃ እዕኑ ገዉንኩክዕኔ እሰዬ» ዩ ወክት «ኔሳሃ ዮኔህ ኦንቱሃ ጣብተለከ ጠለዕል ለሜተ ቁርጩሜ፤ መርን ከን ኡመቲሃ ጉዕሚንከ እካ እቸተ ህዕርን ኤምቦተ ሀሰንንዶ?» ይቶኡ።

14 ንኩስ ኦንቶ ኩሜ ጌሰ እሀኖ እቅ። ኢሰን አሳበሰ «ኦንታሁ ኦንታሁ መት-መቶ ቤቸን እክ አፋዕለኖገ እዕዬ» ዩሰ።

15 እሰን እሰ እዕዬ ዩገ እት መኑ አፋዕለኖገ አቶኡ።

16 ህከኒች ኤተሮን ኢሰ ኦንቱ ጣብተለከ ለም ቁርጩሜተ አፍ ሰማ ዋሽ ለዕይ ማሰዕይ ቢጭ መኒሃ እሰናዶተ አሳባተሰ እሰኣ።

17 ጉዕመንኩ እት ዱቦኤ፤ መኑ እተን ፈቆ ፋርፋሩ ቶና ለሙ መሶብ ዊመ አሳበሰ ኬሶኡ።

ኢስ መሲህ እሁስ ጴጥሮስ ጠወዕዮገ

(ማቶ. 16፥13-19፤ ማር. 8፥27-29)

18 መቱ በር ኢስ ሜጥሀሰ ዱኣ አኣን አሳበሰ እሲን ሜጡብ ሄኦ እቅ፤ እሰን «መኑ ኤሳሃ አዬት ዮኖኤሁ?» ዩ ጠዕሚሰ።

19 እሰን ፈንቀሽት «መት መቱ መኑ ጠመቃንቸ ያህዪት ዎሉሰንገ ሕልያሴት» ህትን ዎሉሰ ሄጭት ሄኦ ነቢያካች መቱሰ ኬዕዮኡ» ይታኢት» ይቶኡ።

20 እሰን እዕኩንገ «ኤሳሃ አዬት ይቴነንታት?» ዩ ጠዕሚሰ፤ ጴጥሮሰን «አት መገኑ መጠሮሄ መሲህ አሳት» ዩኣ።

21 ኢሰን ከ ጠው አዩሃ ጠወኣበእገ ጠረኝሽ ኩሎሰ።

ኢስ አዎንተኔሃ

(ማቶ. 10፥38-39፤ 16፥24-28፤ ማር. 8፥34-38፤ ሉቃ. 14፥25-27)

22 ኢሰን «መንች ቤቱ ልግብ ኦሪሽተ ቶጎተ ባልቃን፣ ቂስ አዎንሳሃለከ ሕግ አሰተማራን ግበሞተ፣ ሬሆተለክ ሰቅ በራን ሬሆች ኬአኖ» ዩ ጠረኝሽ አዘዠሰ።

23 ኢሰን ጉዕሚንከሰ «አዪሁ ኤሰ አዎኖተ ሀሰኖኤሁ ገዉሰ ለገዕይ በራን በራን መሰቀለሰ እጅ አዎኑዕኔ።

24 ነብሳሰ ፌሶተ ሀሰኖህ ጉዕመንኩ ነብሳሰ ቤሰኖ፤ ጠው እኩጎሬ ኢተኔሃ ነብሳሰ ቤሰኖህ ጉዕመንኩ ነብሳሰ ጡምሰኖ።

25 መቱ መንቹ ከን ኣዱንያ ቀባጡተ ጉዕመንከ ደኣ ነብሳሰ ቤሾ ጎሬ መ ደግለለኖሰ?

26 ህትን አዪሁ ኤሳንለክ ኢ ላጋን ሙሌ ጎሬ መንች ቤቱ ገይሰ ኬዕምኚን፣ አንሰ ኬዕምኚንለክ ጠለላኖ መላይክ ኬዕምኚን አሜተኖ ወክት ህከኒን ሙላኖ።

27 ጠው እኩጎሬ ህንቅሰ ኩሳክዕኔ፤ ከኔ ኡርቶህኩኦች መት-መቱ መገን ዎምነቱ ለኡዕናን ሄጭት ሬትበሩ ዮኡ» ዩሰ።

ኢስ ደኑ ዶራሙሰ

(ማቶ. 17፥1-8፤ ማር. 9፥2-8)

28 ኢስ ህከ ጠው ጠወዕዮ ህዜቱ በር እኮች ኤተሮን ጴጥሮሴ፣ ያህይለከ ያቁብ ሚጡብ አዕይ ዱኣ አኣተ መቱ ቆተ አል ፋሎ።

29 ዱኣ አኣንን ሚኔሰ ደኑ ዶራሞ፤ ህትን ኦድኑሰ ዋጀእ በለቆኡ።

30 ህከ ወክት ለሙ መኑ አሜት እሲን ጠወኣኢት እቅ፤ እሰን ሙሳትለክ አልያሴት እቅ።

31 ኬዕምኝን ለሊት ጠወእን ሄኦ ጠወእንኩ ኢሰ ዩሩሳሌም ከተማን መገን ሃሽኣቱተ ሬሆንከሰ ዊንሸኖ ወቄሃት እቅ።

32 ጠው እኩጎሬ ጴጥሮሴለክ እሲን ሚጡብ ሄኦአራ ግሰኛት ቁልቶሰ እቅ፤ እሰን ግሰኛች ኬኦ ወክት ኢሰ ኬዕምኝለክ እሲን ሚጡብ ኡርቶ ለም መናከተ ለኣኡ።

33 ለም መናከንት ኢሲች አደ እክ መርተንን ጴጥሮስ ኢስ «አስተማርኛ! ከኔ እሁ ኔሳሃ ጡመ እኩቤቸሃ ሰሱ ዳስ መቱ ኬሳሃ መቱ ሙሲሃ መቱ ንገ እልያሴሃ እጅርና» ይህ፤ ጠው እኩጎሬ ጠው አናርቸ መሃጎሬ ደጎብ እቅ።

34 ጴጥሮስ ከ ጠው ጠውእን ጎመት አሜት ቴልቶኤ፤ ጎመት ቴልቶስ ወክት ዋጅቶኤ።

35 ህትን ህከን ጎመ አዚች «መጠሮም ቤቱኤ ከኒት፤ እሱ ሞጮጭዬ!»፤ ይታ ላገት አሜቶኤ።

36 ህት ላገት ጠውእንቶህኒች ኤተሮን ኢስ ሜጥሀስ እክ ደገሞ፤ ህትን እስ ለኦ ጠዊች መቱርቸሃ ህከን ወክቱን አይሃ ጠውኡሶናን ጨለ ይቶኤ።

እስ ደርረና ዱሩ አፎ ጨል ፈይሱስ

(ማቶ. 17፡14-18፤ ማር. 9፡14-27)

37 ለንክስ በር እስ ቆታች ድርቶ ወክት ልግቡ መኑ ኢስን ደቀንቶኤ።

38 ህከን መኒች መቱስ «አስተማርኛ! እስ ኤሳሃ ሜጥቸ ጨልኤ እኩቤቸሃ ፈይሶኤተ ኡጮንኪ።

39 እሱንከ ደርረና ዱሩ አፎ ድንገቱን ያርሲሰናሰ፤ ህትን ሁንብ ኩፍ አእንስ ከጣቀንሰናሰ፤ ጅስመስ ቁስ ፍትፍት አዕይ ጨነቅ ገፈረሰ።

40 ህከ ደርረና ዱር ፋሽቶተ አምንታሃረ ኡጮዮም እቅ፤ እኩጎሬ እስ አታልቶበአ» ይ ያሮ።

41 ኢስን «ኩ ሂሉለክ አመዕነቱ ዮሀዕኔበአ ከን ዘማን መኑ ሄንከ በር ኢለ ክዕኔን ሜጡብ ሄአም? ህትን መ በር ኢለ አታላንክዕኔ? ህንዳ ቤቱክ ከበ ኡብ» ይእ።

42 ጨሉንኩስ አሜተንን ሁኩ ደርረና ዱሩ ኤጅ ከጣቀንሰሴ፤ ጠው እኩጎሬ ኢስ ህከ ደርረና ዱር ሻቅ ጨልንከስ ፈይሽ እኒሀስ አሴእ።

43 ህከን እኩቤቸሃ ኡመቱ ጉዕሙንኩ መገን ሎረ ወልቀተ ለኦቤቸሃ አጀብሲጭቶኤ፤ ጉዕሙንኩ ኢስ አዕዮ ጠዋን አጀብሲጩን ሄዕዮገን እስን አሳበሰ

44 «መንች ቤቱ መን እንገን ህግሰም አስመናቤቸሃ ከ ላገተ ሰውይቱን ሞጮጭዬ» ይሰ።

45 ጠው እኩጎሬ ጠውስ አግበሰገ ቴለሞሰቤቸሃ ህከ ጠው ደጎብአ እቅ፤ ህትን ህከን ጠዊንከ ጠዕምቶሰተ ዋጅቶኤ።

ጉዕሚችኔ በተአናሁ እይት?

(ማቶ. 18፡1-5፤ ማር. 9፡3-37)

46 አሳበሰ በላን «ኒች ጉዕሚችኔ በተአናሁ እይት?» ይታ አደት ኬኦኤ።

47 ጠው እኩጎሬ ኢስ ቀልብሰ ጠው ደግ መቱ ጨል ኡብ መደንከስ ኦርሽ

48 «ከ ጨል ሱዕሚንከኤ ቶገናሁ ጉዕሙንኩ ኤሳሃ ቶገና፤ ህትን ኤሳሃ ቶገናሁ ጉዕሙንኩ ኤሳ ሶኩኤሃ ቶገና፤ መሰንትሰ በላንከክዕኔ ጉዕሚችን ሆፈአናሁ እስ ጉዕሚችክዕኔን ሎረሃን» ይሰ።

49 ህከኒች ኤተሮን ያህይ «ቀርኛ! መቱ መንቸ ሱዕሚንከክ ሩሃንዮ ፋሽን ለዕናም፤ እኩጎሬ እስ ኒን ሜጡብ አምንበሄሃ እኩቤቸሃ ከሞንሰ» ይእ።

50 ጠው እኩጎሬ ኢስን «ኦደምበሀዕኔሁ ጉዕሙንኩ ክዕኔሃ እኩቤቸሃ ከንቶናቸሰ» ይእ።

ሰማር ባድ መኑ ኢስ ቶጉ ግቡስ

51 ኢስ ሰማ ኦርአና ወክቱ ሆንጠካን ዬሩሳሌመ ኦርኦተ ሙርሲጭ ኬዕዮ።

52 እሲች ሄጭት መርታ አሳበተ ሶካን እስን ጉዕመርቸንከ ቅጥእቶተ «ሰማርያ» ይዮ ባድን ዮ መት ቀዕየተ መርቶኤ።

53 ጠው እኩጎሬ ህከን ቀዕዮ መኑ ኢስ ህከኒን ህግ ዬሩሳሌመ መረናገ ደጎቤቸሃ ቶጎሰተ ሀሰበአ።

54 አሳበሰ ያቁብለከ ያህይ ህካን ለኦ ወክት «ቀርኛ! ሰሜች ገረት ድርት ከ መን ቡሰቶተ * እዘንዞተ ሀሰንንዶ?» ይቶሰ።

55 እሰን ኤተሩ ፈንቀል ሻቆሰ።

56 ህከኒች ኤተሮን ዋልተ ቀዕየተ መርቶኤ። †

እስ አሳበ አሌን ኢልታሰ ኦርሸተ

(ማቶ. 8፡19-22)

57 ኢስለከ አሳበሰ ምቃን ሀንተንን መቱ መንቸ ኢስ «መርታንትቤቹ ጉዕመንከ አሞናንኪ» ይሰ ወክት

58 ኢስን «ወለንጌሃ ኤሎ ዮሰ፤ ህትን ሰሜ ጭኦተ ጎዕምት ዮሰ፤ ጠው እኩጎሬ መንች ቤቱሃ ገዉስ አግሽ ፎሎሲሰና ቤቹ ዮሰበአ» ይሰ።

59 ኢስ ሞሉ መንቸሃ «አምኑኤ» ይእ፤ ጠው እኩጎሬ መንቸሰ «ቀርኛ! ሄጭ አነኤ ሞጎተ ፈቀዳኤ» ይሰ ወክት

9:35 እሲ. 42፡1፤ ማቶ. 3፡17፤ 12፡18፤ ማር. 1፡11፤ ሉቃ. 3፡22። 9:46 ሉቃ. 22፡24። 9:48 ማቶ. 10፡40፤ ሉቃ. 10፡16፤ ያህ. 13፡20። * 9:54 ሰሜች ገረት አሜት ቡሰቶተ- ዮሃና «ኤልያስ አዕዮገን ሰሜች ገረት አሜት ቡሰተ» ይታ ላገተ በሮግታኤ። 9:54 2 ሃገ. 1፡9-16። † 9:56 መት-መቶ ከታላን እዕኑ ህትናም እያኒች እከንተ ጎር ደገነንተበአ፤ ጠው እኩጎሬ «መንች ቤቱ መን ነብሳሃ ፈረትት ቤሱ ቤሶተ አሜቸበአ» ዮሃና መት-መቶ መጻፋን ዮበአ።

60 ኢስ «ሬቶላሩ ሸሽሰ ሞጎተ አጉርሰ፤ ጠው እኩጎሬ አት መርት መገን ምግንትተኔሃ ጠወእ» ይሰ።

61 ህትን ሞሉ መንቹ «ቀርኙ! እን እምናንኬ፤ ጠው እኩጎሬ ሃጭ መር አበርሰኤ .ወገሬቲን ሃዕዬ» ዮተ ፈቀዴኤ» ይሰ።

62 ኢስን «አቡርተ ከደ ወኛተ እንጋንከሰ እፍ ኤተሩ ለእኛ መኑ ጉዕመንኩ መገን ምግንቲሃ በቀለበሃን» ይሰ።

10

ኢስ ለመላይኔ ለሙ አሳበተ ሶሁስ

1 ህከኒች ኤተሮን ቀርቼ ኢስ ለመላይኔ ለሙ* አሳበተ መጠር እሰ መሮተ ሰውዬ ከተመለከ ጉዕመ ቤቹንከ ለም ለሙ አዕይ ሃጭት መርታገ ሶኩሰ።

2 እሰን «እዘመሩስ ልግብሃን፤ እኩጎሬ ሆጉተ አታእሩ ቀዋሃን፤ ህካን እኩቤቹሃ ሆጎሰ እኑ ሆጉተ እእኛ መን ሶሆተ ኤጭዬ።

3 ቲ መሬ! ሁኩዕኑን እን ሆለገ ኦሌ በላን ሶሃንክዕኔ።

4 ወቄሀክዕኔ ቦርሰ ህከረንገ ከረጢትተ ህከረንገ ጫዕመተ እፎኖቹ፤ ህትን እዬኒ ምቃን ጠውሲጨንቲን ወክት ቤሶኖቹ።

5 ህከ ምኒሃ ኣጌንተ ወክት ሃጭቲን .ወገሬቲ ከን ምኒሃ እሁን» ይዬ።

6 ህከንቤቸንን ወገሬት መንቹ ሃዕዮ ጎሬ ወገሬቱክዕኔ ህከን መንቸን እሆኖ፤ ዮበእ ጎሬ ወገሬቱክኔ ክዕኔቤቹ ፈንቀለኖ።

7 ሆጉተ እእኛ መንቹሃ ደሞዙ ሀሰሰኖስ፤ ከን ሀሌንን አዕኑሁ ኣጌንተ ምኔን ሆንጠህሴመህዕኔሃ እቴንገለከ ኣጌንገ ህከን ምኔን እገሬ ቤሉ መቶ ምኒች መቱ ምኒ ፈንቀላንቶኖቹ።

8 ህትን ኣጌንተ ከተማን ጉዕማንን ቶጌመሀዕኔች ሆንጠህሴመህዕኔሃ እቹ።

9 ህከን ከተማን ዮ ጥዘናመተ ፈይሼ፤ ህትን .መገን ምግንቱ ክዕኔቤቹ ሆንጠኩኤ» ይዬሰ።

10 ጠወ እኩጎሬ ህከ ከተመሃ ኣጌንተ ወክት መኑ ቶግበህዕኔጎሬ ከተም በነቻን ፋፈቲን

11 ህኩዕኑን ጡር እሆህኔተ ሎከኔ አሌን ዮ ከተምክዕኔ ትበ ግግሽናክዕኔ፤ እኩጎሬ መገን ምግንቱ ክዕኔቤቹ ሆንጠሁሰ ደጌ» ይዬ።

12 እን ኩላንክዕኔ፤ ፍርድ በር ህከን ከተሚች በትሽ ሰዶም ከተሚሃ እኩ ጠወ ቢለኖ» ይሰ።

አመዕኑ ሆግንከሰ ምቀስንቶ ከተመተ

(ማቶ. 11፣20-24)

13 ኢስ «ቆሆኖሃ አት ኩራዝ ከተንኙ! ቆሆኖሃ አት ቤተ ሰይደ! ክዕኔቤቸን እሰም እጀብሲሰኖርቹ ጢርሰለከ ስዶን ከተማን እሰም እቃን እሰን ጥጅ ኦድኑተ ኦደእ ጠበርን እፋዕልተ አበ ወክቲች ብርተ ጨብሰ አጉርኔ ይታ እቃ።

14 ጠወ እኩጎሬ ፍርድ በር ክዕኔች በትሽ ጢርሰለከ ስዶን ከተሚሃ ቅጣቱሰ ቢለኖሰ።

15 ህትን ቲ ቅፍርናሆም ከተንኙ! ሰማሃ ኢላ ጎት ጎት ይቶተ ሀሰንዶ? አዛቤን ድርታጎት» ይሰ።

16 ህትን አሳበሰ «ክዕኔተ ሞጭጨኖሁ ኤሳንከ ሞጭጨኖሃን፤ ህትን ክዕኔተ ቶግባሁ ኤሳንከ ቶግባሃን፤ ህትን ኤሳሃ ቶግባሁ ኤሰ ሶኩኤንከ ቶግባሃን» ይሰ።

ለመላይኔ ለሙንኩ አሳበተ ሶህንቶቤቹች ፈንቀሉስ

17 ለመላይኔ ለሙንኩ አሳበተ ሶህንቶ ኦዲች አበ ሙንዲኖን ፈንቀልት «ቀርኙ! ኪ ሱዕሚን ሩሃንዩ እዘዘሞኔ!» ይቶኤ።

18 ኢስን «ሻይጣንቹ ጉገኛገ እክ ሰሜች ኡባን ለዕዮንስ።

19 ሁኩዕኑን እን ሞቹለከ ግንጠ» ይኖ መርዙ ዮሰ ምርቹ ከድኖተለከ ዲን ምቀተ ጉዕመንከ አታፈቲንገተ ሹምቱ አሰዮንክዕኔ፤ ሚረኖሀዕኔሁ መቱርቹሁ ዮበእ።

20 ሩሃንዩ እዘዘሞሀዕኔ ቤቹሃ ተሽ ዩንከሀዕኔ፤ ጠወ እኩጎሬ ሱዕመክዕኔ ሰማን ከተበሞቤቹሃ ሙንደዕዬ» ይሰ።

ኢስ ሙንደዕዮገ

(ማቶ. 11፣25-27፤ 13፣16-17)

9:61 1 ጎገ. 19፣20። * 10:1 ለመላይኔ ለሙ- ዩኖሃ መት.መቱ ሉህ ክታበት «ለመላዩ» ይታእ። 10:2 ማቶ. 9፣37-38። 10:3 ማቶ. 10፣16። 10:4 ማቶ. 10፣7-14፤ ማር. 6፣8-11፤ ሉቃ. 9፣3-5። 10:7 1 ቆር. 9፣14፤ 1 ጠዋ. 5፣18። 10:11 ሶቀ. 13፣51። 10:12 ከላ. 19፣24-28፤ ማቶ. 11፣24፤ ጠዋ. 10፣15። 10:13 ኢላ. 23፣1-8፤ ሸዝ. 26፣1-18፤ እዩ. 3፣4-8፤ እዋ. 1፣9-10፤ ዘካ. 9፣2-4። 10:15 ኢላ. 14፣13-15። 10:16 ማቶ. 10፣40፤ ማር. 9፣37፤ ሉቃ. 9፣48፤ ያህ. 13፣20። 10:19 መዝ. 91፣13።

21 ህክ ወክት ጠሊሉ እያኑ ኢሰ ተሸቲን ዌንሸሰ «ሰማለክ ኡሉ ቀርቼ እኮንት ኢ እነ! ከ ጠወ ሀይቻኖች ለክ ደጋሀኑኦች ማጥ ኦሶተ ደግሰሶንትቤቼን ገለትጫንኬ፤ ኤ ኢ እነ! መሰንትሰ ኪ ጡሙ ሰውቱ ህትናሙሃን።

22 «ኑዕሙርቹንኩ እነኚኤ ኣሰምኤ፤ ቤቱ እዩት ጎሬ እን ቤሉ እዩሁ ደገናበእ፤ ህትን እኑ እዩት ጎሬ ቤተችለክ ቤቱ ለሊሶሰተ መጠር መንች ቤሉ እዩሁ ደገናበእ» ዩኢ።

23 ህከኒች ኤተሮን ኣሳበ እደ ፈንቀል ኬዕይ ጠለዕል እሳሃ «እዕኑ ለኤንገታሃ ለኣእሩ ማሰእንቶአራን።

24 እን ኩላንክዕኔ፤ መሰንትሰ ልገቡ ገብያከትለክ ዎመት ኣዕኑ ለኤንገታሃ ለኣተ ሃዕላቶ እቅ፤ እኮጎሬ ለኣበእ፤ ህትን ኣዕኑ ሞጮጭቱንገታሃ ሞጮጭቶተ ሃዕላቶ እቅ፤ እኮጎሬ ሞጮጭቶበእ» ዩሰ።

ጎሬበ ላፈ ሰምራሞቹ

25 መገን ሕገ ደገኖ መቱ መንቹ እሌ ዋል ኡርኬዕይ ኢሰ ፊተኖሰተ «ኣሰተማርቻ! ዘላለም ሄኡ ደኣተ መ ኣኡ?» ዩኢ።

26 ኢሰን «ሕጋን ከተበሞሁ መርቻሃን? ህትን ህካን ሀት እነበባንቲት?» ዩሰ።

27 ሁኩ መንቹንኩ « ቀርቹ መገኑክ ዌመ ቀልቢንከክ፣ ዌመ ፎልኒከክ፣ ዌመ ወልቃንተክለክ ዌመ ሰውቲንከክ ኢት፤ ህትን ዎሉ መን ገይክገ ኢት» ዩኖ» ዩሰ።

28 ኢሰን «ሀንቅንከ ይቶንት፤ ካን ኣእ፤ ዘላለም ሄኡ ደእታንት» ዩሰ።

29 ሁኩ መገን ሕገ ደገኖ መንቹንኩ ገወሰ ፈየ እኦተ ሀሽ ኬዕይ ኢሰ «ኦሌቹ ኣዩት?» ይ ጠዕማሰ።

30 ኢሰን ፈንቀሽ «መቱ መንቹ ዩሩሰለም ከተሚች ኢያርኩ ከተመ ህገኖት እቅ፤ ህከ መንቹንከ ሸፍጡ እፍ ኦድኑሰ ቃርት ኦልቶች ኤተሮን ራሆተ ሆንጠካን ሂላ ፎልሰ ኣጉርት መርቶኡ።

31 ህትን ህከን ዎቄን መቱ ቂሰቹ ህገኖት እቅ፤ እሰን ህከ መንቹ ገምባትንከ ለዕዮ ወክት ኣጉር መዲንከሰ ኦርዕዮ።

32 ህትን መቱ ሊውቹ ህከን ቤቹን ህገን ህከ መንቹ ለዕይ ዎሎ ኣዲን ኣጉር ኦርዕዮ።

33 ጠዉ እኮጎሬ መቱ ሰማር ባድ መንቹ ህከን ኣዲን ኦርእን ሁኩ መንቹ ዮ ቤቹን ኣሜቻ፤ እሰን ለዕዮሰ ወክትንከ ኣሙኩሰ፤

34 እሰበ ሆንጠክ ዘይተለክ ወይን ቦበጤማሃ ጡላንከሰ ዎር ጡላሰ ኡሱር፤ ህት ኣዕይ ገይሰ ገምባን ቆጵሲሽ ኮሁ ገለኖቤቹ መሰ ጥሰሾሰ።

35 እሰን ለንክ በር ገሰማን ኦርእን ኮሁ ገለኖ ኣኒሃ ለሙ ዲናር ፋሽ ኣሰ «ከ መንቹ ጡመገ ኣት ጥሰሰሰ፤ ከኒች በተኣኖ ዲናር ፋሽቶንት ጎሬ ፈንቀል ኣሚታም ወክት ባታንኩ» ዩሰ።

36 ቲሱ ህከን ሰሶንከ መንቹች ሸፍጡ ኦልታንሰ ኡቦ መንቹሃ ጃላ እሁሰ ለሊሾሁ ህከን ኣሶት?» ዩኢ።

37 መገን ሕገ ደገኖ መንቹንኩ «እሙቸኩ ሀዕሌሰሃን» ዩኢ፤ ኢሰን «ኣቲሁ መርት ህትን ኣእ» ዩሰ።

ኢሰ ማርተለክ መርየመ ምኒ መሩሰ

38 ኢሰ ኣሳባንተሰን ዎቃሃ ሃመን መት ቀዕተ ኣጎ፤ ህከኔን «ማርተ» ዩኖ መት መንቹት ምኒንከሴ ቶጎሰ።

39 እሴንከ «መርየመ» ዩኖ ኣመቤቲት ሄኡሴ እቅ፤ እሴን ኢሰ ሎካች ዎር ኣዲን ኣፋዕልት ተማርሰኖሃ ሞጮጭታኢት እቅ።

40 ጠዉ እኮጎሬ ማርተ ሆጉት በተኣንሴ መቱምማተሴ ኢሰቤቹ መርት «ቀርቻ! ኣመኤ ቤቲት ሆጉተ ኣእን ኦርጨቀሞተ ኤሳሃ ሚጥሃኤ ኣጉርቶኤጉ ሻከሰኖሄበእንደ? ቲሱ ሀዕልቶኤተ ኩልሴ» ይቶሰ።

41 ጠዉ እኮጎሬ ኢሰ ፈንቀሽ «ማርታ! ማርታ! ኣት ኣበ ጠዌን ጨነቀንታንቲትለክ ኦርጨነታንቲት።

42 እኮጎሬ ሀሰሰኖሁ ጠለዕል መቶ ጠው፤ ህከን እኮቤቼን እሴን እዩሁ ኣኣተ ኣጎላኖበ፤ ቆሀኖሲሃ መጠርቶኡ» ዩኢ።

11

ዱኣ ኣእተኔሃ

(ማቶ. 6፣9-13፤ 7፣7-11)

1 መቱ በር ኢሰ መቶ ቤቹን ዱኣ ኣእኖት እቅ፤ ዱኣ ኣዕይ ኬዕዮ ወክት ኣሳባችሰ መቱ «ቀርቻ! ያህይ ኣዎናኑሰ ዱኣ ኣታገ ተማርሰገን ኣቲሁ ዱኣ ኣዕናምገ ተማርሰኔ» ዩሰ።

2 ኢሰን ዱኣ ኣቲንጎተ ወክት

«ሰማን ዮንቲሁ ኒ ኣት!

ጠሊሉ ሱዕሙክ ማሰእምሃ እሁን፤

ዎምነቲክ ኣሜቱን!

3 በሪሃ ሀሰሳ እቸተ በሬን በሬን ኣሰኔ!

4 ነኤ በደልቶኔረ ፈቁን ይን ኣጉርናምሀንገን፤

ብድልኔ ፈቁን ይኔ፤

ፌተናን ኣግሶትኔ ይዬ» ይእ።

5-6 እሰን ኣሳበሰ «ክዕኔኹ ኣዩሁ ጆሎ ዮሴሁ ሀዋር በላን ጆልሰቤቹ መር ኢ ጆላ! ሰሱ ጣብተ ሌቁሴኤ፤ መቱ ጆሎኤ ቁዕራብ ባዲኹ ኢ ሞኒ ኣሚኛኡ፤ እሲንኩ ሆንጠሀሳም መቱርቹሁ ዮኤበኤ ዬሰ ጎር

7 «ምኒ ኣዚን ዮኢሁ ሕርሶቴኤ! ኡሩት ጡፈንቶኤ፤ ኣለኤ ኣን ሜጡብ መዕናን ኦሰኦኤ፤ ህኩን እኩቤቹን ኬዕይ መቱርቹን ኣሶሃተ ኣታላምበኤ ዮናንዶ?

8 እን ያንክዕኔ፤ ጆላሰ እኩቤቹን ኬዕይ ኣሲሃ ሀሰበ ጎሬ ዋርዋቶሰቤቹን ኬዕይ ሀሰናርቹ ጉዕመንከ ኣሰናሰ።

9 «እኒሁ ያንክዕኔ፤ ኡጭዬ ኣሰመኖህዕኔ፤ ሀሼ ደኣቴንገተ፤ ኡሩተ ቆጭዬ ፈንተኣኖህዕኔ።

10 መሰንትሰ ኡጨኖህ ጉዕመንኩ ኣኣኖ፤ ሀሰናንኩ ደኣኖ፤ ህትን ኡሩተ ቆጭኖህሂሃ ፈንተኣኖህ።

11 «ክዕኔኹ ቤቱክዕኔ ቁርጩሚተ ኣሴኤ» ይ ኡጨጎሬ ዋርቹ ኣሰቴንገዶ?

12 ህከረንገ ቡጳ ኣሴኤ ይ ኡጨጎሬ ግንጡ ዬኖ መርዙ ዮሰ ዋርቹ ኣቴንገሰንዶ?

13 እዕኑ ሂላኑተ እኬንገ ኣላተክዕኔ ጡመርቹ ኣኡ ደገነታኹ ሰማን ሄኣኖ ኣኑክዕኔ ኡጭታህኑተ ጠሊሊ ኣያን ህት በትሽ ኣሰናሰበኣ!» ይሰ።

ኢሰለክ ብዔልዜቡላ

(ማቶ. 12፡22-30፤ ማር. 3፡20-27)

14 መቱ በር ኢሰ መቶ መንቹኹ ዶርረኖ ዱር ፋሽኖት ኣቅ፤ ዶርረኖ ዱሩንኩ ፋሎ ወክት ዱዲንኩ ጠወዕዮ፤ መኑንኩ ህከን ጠዋን ኣበ ኣጀብሲጨኦ።

15 ጠዉ እኩጎሬ ህከን መኒኹ መት-መቱሰ «እሰ ሩሃንዮ ፋሽኖት ሩሃንይ ብዔልዜቡላ ወልቃኒት» ይቶኡ።

16 ህትን ዋሎ መኑ ፌተንቶሰተ ሀሰ ሰሜኹ መላተ ለሊሶሰተ ጠዕምቶሰ።

17 ጠዉ እኩጎሬ ኢሰ ቀልብሰ ጠወ ደግ «መቶ ዋም ኣዜን ሃዕዮ መኑ ገገዉንኩሰን ኣደደ እኩጎሬ ሁኩ ዋሙ ድጀመኖ፤ ህትን መቶ ሞኔን ሄኣኖ መኑ ኣደደ እክ ገገዉንኩሰ ብተሞ ጎሬ ብን ዮኖ።

18 ህትን እዕኑ ኤሳሃ ሕሰ ፋሽኖት ብዔልዜቡላ ወልቃኒት ይቴንገኑቤቹን ሻይጣን ዋሙ ገገዉንኩሰ ብተሞ ብን ዮኖሃ እኩጎሬ ህት እክ ጠረኝ ኡርተ ኣታላኖ?

19 እን ሩሃንዮ ፋሻሚሁ ብዔልዜቡላ ወልቃን እኩጎሬ ኣለክዕኔ ኣዬ ሱዕሚን ፋሽታኦ? ህካን እኩቤቹን ገይክዕኔ ኣለተ ክዕኔ ኣሊን ፈረዳኣረ ኣካኦ።

20 ጠዉ እኩጎሬ እን ሩሃንዮ ፋሻሚሁ መገን ወልቃን እኩኹ መገን ዋምንቱ ክዕኔቤቹ ኣሚተኖት።

21 ህትን መቱ ጀቡ መንቹ ጌሬንጌሩለክ በገዙ ኣፍ ሞንሰ ኣገረኖረ ዮሰ ዱንያሰ ጡመገ ኣገረንታኦ።

22 ጠዉ እኩጎሬ ኣሲኹ ጀቡ መንቹ ኣሚኛት ብተሞ ቁሎ ወክት ወዕና ኣመዕን ሃዕዮ እቅ በገዝ ኦዶተ ኣእ ከም ዘረፎ ኦዶተ መኒሀሰ ቤሀኖ።

23 «እን ሜጡብ ኣህቡ ጉዕመንኩ ኢን ህንበሰለመኖ፤ ህትን ኢን ሜጡብ ጭምኣኣቡ ጉዕመንኩ ብንኣዕይ ከመኖ» ይሰ።

ዶርረኖ ዱሩ መን ኣክ ፈንቀሎሰ

(ማቶ. 12፡43-45)

24 ህከኒኹ ኤተርን ኢሰ «ዶርረኖ ዱሩ መንቹኹ ፋል ኦርዕዮ ወክት ፎሎጨኖ ቤቹ ሀሰን ዉሁ ዮበኣቤቹን ሃመን ዘሀሆ፤ ፎሎጨኖ ቤቹ ሆጎ ወክት ወዕና ፋሎም ሞኒኤ ፈንቀል ኦርኣም» ዮኖ።

25 ፈንቀል ኣሚተኖ ወክት ሞኑሰ መክ ሀጠወማን ደገኖ።

26 ህከኒኹ ኤተርን መር ኣሲኹ ባሰ ሂላኑተ ለመላ ዋሎ ሩሃንዮ ኤበኖ፤ እሰን ኣግ ህከኔ ሄኣኦ፤ ህከን መንቹ ኤተሩሰ ወዕኔኹሰ በትሽ ሻክሰኖሃ ኣሀኖ» ይእ።

ሀንቅ ማሰተ

27 ኢሰ ህካን ጠወኣን ሃዕዮገን ልግቤ መን በላን መት መንቹት ላገሴ ጎት እት ኢሰ «ኬሳሃ ኣልቶ መንቹት ማሰኣንቶኣታን» ይቶሰ።

28 ጠዉ እኩጎሬ ኣሰ «ማሰኣንቶኣሩት መገን ላገተ ኣገርታኣረ» ይሰ።

ዮኑሰ መላተ ኣሁሰ

(ማቶ. 12፡38-42)

29 ልግቡ መኑ ጭምዬ ወክት ኢሰ «ከን ዘማኒ መኑ ሂላሃን፤ መላተ ለኦተ ሀሰኖ፤ እኩጎሬ ዩኑሰ መላ ቤሎ ዋልት መላት ሆሮን ኣሰንታሰበኣ።

30 መሰንትሰ ዩኑስ ናናዌ ከተሞ መኒ መላተ እኩገን ህትን መንኛ ቤቱህ ከን ዘማን መኒሃ መላተ ለሆኖ።

31 ካብ ባድ ዳኘት ሳብ ዩኖት ሱላይማኔ ሀይመተ ሞጮጮቶተ ኡሉ ዳንጊኙ አሜቶቤኙሃ ፍርድ ቦር ከን ዘማን መኒሃ ማጡብ ኪእ እስተ ዋቀሳእ፤ ከለዕዬ! ሱልማኒኙ በተአኖህ ከበ ዮኡ።

32 ህትን ናናዌ ከተሞ መኔ ዩኑስ ዲዲብሰያንሰ ጨብሰ ቶበቶቤኙሃ ፍርድ ቦር ከን ዘማን መኒሃ ማጡብ ሬሆኙ ኪእ እስተ ዋቀሳእ፤ ከለዕዬ! ዩኑሲኙ በተአኖህ ከበ ዮኡ» ዩእ።

ጅሰሞ ኑርተኔሃ

(ማቶ. 5፡15፤ 6፡22-23)

33 ኢሰን «አይሁ ኩራዘ ቀሽ ምኒ ኣገኖ መኔ ኑር ለኢሃ አታለኖቤኝን ኩራዘ ሱተኖ ቤሉ ማጭ ሰፈ እፍሰኖህ ዮበእ።

34 ህትን እልክ ጅሰሞሃክ ኑርየ፤ እልክ ፈየተ እኩ ወክት ጅሰሙክ ጉዕሙንኩ ኑርን ዊሞሃ ለሆኖ፤ ህትን እልክ ፈየተ እክበ ወክት ጅሰሙክ ጉዕሙንኩ ቱንሰኹ ለሆኖ።

35 ህካን እኩቤኹሃ ኪን ዮ ኑሩ ቱንሰኹ ለሆኖበእ ኣገዕር።

36 ጅሰሙክ ማጡ ቤቹህ ቱንሰኹ ሄኡዕናንሰ ጠለዕል ኑር እኩገሬ ኩራዘ ኑሩ ኣበ ለሊሰኖ ጌሰ ጅሰሙክ ጉዕሙንኩ ኑር ለሆኖ» ዩእ።

ፈርሳዊያኑትለክ ሕግ እስተማረት ዋቀሰሙሰ

(ማቶ. 23፡1-36፤ ማር. 12፡38-40)

37 ኢሰ ህካን ጠወእንን መቱ ፈርሳውቹ ምኔንከሰ ዛበዕይ ሆሹ ኣቶተ ኡጩሰ፤ ህካን እኩቤኹሃ ኢሰ ምኒ ኣግ ሆሹ ኣቶተ ኣፋዕሌእ።

38 ኢሰ ሆሹ እቱዕነ ሄጭ ኣገንተ ኣዕሉ ሆጉሰ ሁኩ ፈርሳውቹ ለዕዮ ወክት ኣበ ኣጀብሲጩእ።

39 ህካን እኩቤኹሃ ጭቹ ህክ ፈርሳውቹ «እዕኑ ፈርሳውያኑት! ኩብየለክ ሳነ ኣብልሰ ኣንሽቴንጉተ፤ ጠወ እኩገሬ ኣዘንከክዕኔ ወልቅሴን ኣኡለክ ሂሉ ጠወ ዊሞህዕኔ።

40 ኩ ገሞት! ኤተርሰ እደ ከለቆህ ኣዝሰ እደ ከለቆበእንደ?

41 ህክን ኣዘን ዮኢሃ ቡባቻኖተ ዘከተ ኣሰዩ፤ ጉዕሙርቹንኩ ሙጩሩ ለሆኖህዕኔ።

42 «ጠው እኩገሬ ቀርቶ ህክ ፈርሳውያኑት ገንበለ ጠጉተ። ጫርቱታለክ ጋር ጠጉኝ ጉዕሚኝን ዘከተ ፉሽቴን ህንቅ ፍርደለክ መገኑ ኢቱ ህንቁንተቤኹሃ ክዕኔሃ ቆሆኖህዕኔ! እኩገሬ ዋሉሲንገ ኣጉርቶኑዕናን ከ ጠወ ኣኡ ሀሰሰኖህዕኔ ኣቅ።

43 ህትን «ጭምት ምናን ኪዕምኝ ቦርጭማን ኣፋዕሉለክ ጌቦ ዮቤኝን ጠውሲሰኖህዕኔተ ሀሲንተቤኹሃ ክዕኔ ፈሪሳውያኖተ ቆሆኖህዕኔ!

44 መኔ ደጉዕነ ኣሌሰ ሃመኖ ለልቡ ሎደ ኣጉዳንተቤኹሃ ክዕኔሃ ቆሆኖህዕኔ!» ዩሰ።

45 መገን ሕገ ደጋህኡኡኙ መቱሰ ፈንቀሽ «እስተማርኙ! ካን ዩክ ህትን ኔሳሃ ቦርሩሃክበዕንደ!» ዩሰ።

46 ኢሰን ፈንቀሽ «እዕኑ ኪዕምተ እጅንተ መናን እጅሲሴን እጅንሰ እዕኑ ዙሩዕሚንከክዕኔ ኡልቴንተበእቤኹሃ መገን ሕገ ደጌንተ ክዕኔሃ ቆሆኖህዕኔ!

47 ህትን ኣናከክዕኔ ሽቶ ነቢያክ ሎደሰ ምልካንሰቴን መክሲንተረ ኣኪንተቤኹሃ ክዕኔሃ ቆሆኖህዕኔ!» ዩእ።

48 ህካን እኩቤኹሃ እዕኑ ምስክረተለክ ኣናከክዕኔ ሂሉ ሆንን ኣተቀንቴንታረ፤ መሰንትሰ ኣናከክዕኔ ሽቶኡ፤ እዕኑንገ ሎደሰ መክሲንጉት።

49 ህካን እኩቤኹሃ መገን ሀይመተ ኣን እሰቤቹ ነቢያከተለክ ሶቀማኑተ ሶሃም፤ እሳኝን መት-መቱሰ ሽታእ፤ ፈቆረ ሸርታእ ይቶኡ።

50 ሁኩን እኩህ ኣዲንያት ከለቀንቶኙ ኪሸ ነብያካኙ ዲንተዕዮ ቁገሃ ከን ዘማን መኔ ጠዕመመኖ።

51 ሁኩንን ኣቤሌ ቁጊኙ ኪሸ መገን ክትም ሆንጠሀሲኖ ጠረጴዳካለክ ዲኡ ምኒ በላን ሬዮ ዘከርያሴ ቁጉ ኣለት፤ ኤ! ኣን ያንክዕኔ፤ ህክን ቁገሃ ከን ዘማን መኔ ጠዕመመኖ።

52 እዕኑ «ሕገ ደጌንተሩ ቆሆኖህዕኔ! ደግ ቁልፈ ፈኔኖሃ ህንቅ ቁልፈ ኣፈንታኔ፤ ጠወ እኩገሬ እዕኑ ገዉንኩክዕኔ ኣገንታበእ፤ ኣጉ ሀሳኡ ኣጋበእ ከንቴንታኡ።»

53-54 ኢሰ ኦርኣን ሕግ እስተማረትለክ ፈርሳዊያኑት መት ሉሰተ ኣፈኛሰ ደግ ኣፎተ ሀሰ ኣበ ጥቅሰ ጢቁን ልግብ ጠዕምቱተ ጠዕምቶሰተ ኡለንሰታሲት ኣቅ።

12

ኢሰ «ገዉ ሎርሲኙ ኣገዕርዩ» ዩሰ
(ማቶ. 10፡26-27)

1 ህክ ወክት ልግቡ ኩሚ መኑ ጭምይ ኪዕይ ገገጣንኩሰን ሀንበዕለንተን ከጣቀንታእት እቅ፤ ኢሰን ሃጭ አሳባተሰ «ፈርሳዊ ራጭተች አገርዕዬ፤ እሰን ለዕዬኤ ዩሃን።

2 ጠው እኮጎሬ እፍሰሞርቹ ፈንተኡዕነለክ ማጠሞንኩ ለሉዕነ ፈቀናበእ።

3 ህካን እኮቤቹሃ ቱንሰቸን ጠወኤንተርቹ ጉዕሙንኩ ኑሬን ሞጮጨመና፤ ሀትን ጡፈንቶ ጎጆን ኩሸኩሸይቲን ጠወኤንታሃ በነቻን አዋጃና» ዩእ።

እዬ ዋጁ ሀሰሰኛኔ?
(ማቶ. 10፡28-31)

4 ኢሰ «ክዕኔተ ኢ ጆላ ያንክዕኔ፤ ጅሰመ ሸቶተ አታልታእረ ዋሉ መቱርቹሃ አቶተ አታልትበረ ዋጅቶኖቹ።

5 ጠወ እኮጎሬ እዬ ዋጁ ሀሰሰኛኔ ጎሬ ጠረኝሽ ኩላንክዕኔ፤ ሸች ኤተርን ዘማኒሃ ጉዕሚንከ ጠእትበ ጊራን ዋረና ወልቀት ዮሰ መገኑ ዋጅዬ፤ ኤ! እን ያንክዕኔ፤ እሱ ዋጅዬ።

6 «እንት ጭኡት መቱ ሳንትበ ህረንታእበእንደ? ሆርን እሳች መቱሰ መገን ብሬን ሀበንታበእ።

7 ክዕኔህ ሆር ቡዕልክዕኔ ሙሙሁ ጉዕሙንኩ ዋለአሞእሃን፤ ህካን እኮቤቹሃ እዕኑ ልግቤ ጭኡች በትሴን ደግለልቲንተቤቹሃ ዋጅቶኖቹ» ዩሰ።

8 ኢሰ እን ኩላንክዕኔ፤ መን ብሬን መሰከረኤህህን ጉዕሚንከ መንች ቤቱ መገን መላይካ ብሬን መሰከረኛሰ።

9 ህትን መን ብሬን ለገእኖኤህህን እኒህ መገን መላይክ ብሬን ለገእኒሰ።

10 ህትን መንች ቤት እሌን ቦርር ላገተ ጠወእኖህህን ጉዕሚንከ ጨቡሰ ማረመኛሰ፤ ጠወ እኮጎሬ ጠሊለ እያን እሌን ቦርር ላገተ ጠወእኖህህን ጨቡሰ ሆርን ማረመኛሰበእ።

11 «መኑ ጭምት ሞንቤቹ፣ ገሻኖ ብርተለክ ዳኛኖ ብርተ ፍርድ ሆንጠህሰኖህዕኔ ወክት ሀት ፈንቀሸናሞ? ህከረንገ መ ጠወዕናሞ?» ይቲን ጨነቀንቶኖቹ።

12 መሰንትሰ ጠወኡ ሀሰሰኖህዕኔሃ ህክ ወክትንከ ጠሊሉ እያን ኩለኖህዕኔ» ዩእ።

ቀጣጣዎ መንች ገውሙተ

13 ህከን ልግብያ መን በሊች መቱ መንቹ «እሰተማርቸ እንኤ ወጥ ኤሳሃ ቤሆተ አመኤ ቤቲሃ ኩል» ዩሰ።

14 ጠወ እኮጎሬ ኢሰ «ኮ መንቹ! ክዕኔ እሌን ዳኛለክ ወጥ ቤሃንቹ አዕዮኤህ እዬት?» ዩሰ።

15 እሰን ጉዕማንከ መኒሃ «መን ሄኡ ቀጣጦሰ በትኜን እህበቤቹሃ ሄዕላቻች ጉዕሚችን ጠረኝቲን አገርዕዬ» ዩሰ።

16 ኢሰን መኒሃ «መቶ ቀጣጣዎ መንች ኤለት አበ አቶተ አቶቶኤ።

17 ሁኩ መንቹንኩ ቀልቤንከሰ ለቶተእ ጭም አእም ቤቹ ዮኤበእቤቹሃ መ አዕዮምጎሬ ቆሀኖኤ?» ይ ሰውዩእ።

18 እሰን ሕአሚህ ከኒት፤ ጎተረኤ ጉዕመንከ ድጅ አልባዕሉ ጎተረ እጃራሞ፤ ህት አዕዮሚች ኤተርን አቶተ ጉዕመንከ ጭምሰዕይ አፋሻሞ።

19 እንን ነብሰያኤ ኢ ነብሴቸ! ልግቤ ዘማኒሃ እካ ቀጣጡት ዮሄ፤ ህካን እኮቤቹሃ ፎሎጭ! እት! አግ! ሙንደእ! ያንሴ» ዩእ።

20 ጠወ እኮጎሬ መገኑ «ኩ ገዛ! ከበሬ ሀንከዕሬን ነብሳክ ኪች ሀሳሞ፤ ኩ ጭም አቶንት ዲንያት ጉዕሙንኩ እዬሃ እካእ?» ዩሰ።

21 «ገይህሰ ዲንያተ ጭም አእን መገንህኔን ቀጣጣሙ እህቡ ጉዕሙንኩ ህትናሙሃን» ይ መት ማቀተ ኩሎሰ።

መገኖን አመዕኑ
(ማቶ. 6፡25-34)

22 ኢሰ አሳበሰ «እን ያንክዕኔ፤ ነብሴሃክዕኔ እቲንተህኒሃለክ አሊሀክዕኔ ኦደኤንተህኒሃ ኦርጨቀንቶኖቹ።

23 መሰንትሰ እቲንተህኒሃ ነብሶህ ኦድኖችን ጅሰሙ በተአኖ።

24 ህንዳ ቁረኤተ ለዕዬሰ፤ ወጣበእ፤ ሞደበእ፤ ህትን ጭምአታ ሞኑ ህከረንገ ጎተሩ ዮሰበእ፤ እህን ቤሉ አታኢሃ መገኑ አሰና፤ እዕኑ ጭኡች በተኤንተበእንደ?

25 ህትን ክዕኔች ጨነቀም ኤሙርሰ ዘማኒን መቱ በር በርጎተ አታለኖህ አዬት?

26 ከ ቀዉ ጠወ እኢሃ አታልቲንቡረ እኬነን ዎሎ ጠዋሃ ሚሃ ሻዜነን?

27 ህትን ቡብሉት ሀት እክ ነጹታ ጎሬ ለዕዬ፤ እሰን ሆጎን ሆጋበእ፤ ደዳበእ፤ እኮጎሬ ዎሉሰ ፈቅ ሱላይማን ህከን ጉዕማንከ ሎርማንከሰ ህከን ቡብሎች መትሴን ኦደዕዮበእ።

28 ጠዉ እኩጎሬ መገኑ ከበር ለልት ጋቲተ ገረ ኡጂኖ ኡብል ህጥተ ሃንከ ኑርሰኖ እኩች እዕኑ አመዕነቱ ሆፈዕየህዕኔ፤ ክዕኔት ሃንከ ኑርሰኖህዕኔ እቅ!

29 «ህካን እኩቤቺሃ ሮመ እንታሞ? መ እንጋሞ?» ይቲነን ጉዕመ ወክት ሻዞኖቹ።

30 ህካን ጉዕመንከ ኡዲንያ አሊን ሮ መኑ ጉዕመንኩ ሀሰኖ፤ እኩጎሬ ሀሲሰኖህዕኔሃ ክዕኔ አኑንኩክዕኔ ደገኖ።

31 እዕኑ መገን ምግነቱ ሀሺ፤ ሀሲነንታሁ ጉዕመንኩ አሰመኖህዕኔ» ዬለ።

ዲንያተ ጭም እኡ ገበእባሃ አሁሰ
(ማቶ. 6:19-21)

32 እዕኑ ቀዉ መሰረት! ሰሜ እኑክዕኔ ምግነቱ ኣሶህዕኔተ ኢቲቤቺሃ ሞጅቶኖቹ።

33 ህካን እኩቤቺሃ ሮህዕኔሃ ጉዕመንከ ሀርቲን ቡጥቻኖተ ኣሰዬ፤ ጎፍብ ከረጥትተ መክሰን ጎፍብ ዲንያተ ኣዜሰ ኣቲን ሞጋንቹ ኣእበቤቻንለክ ብሉት እትበቤቻን ሰማን አፋሽዬ።

34 መሰንትሰ ዲንያክዕኔ ሃእቤቻን ህከኔ ቀልቡክዕኔ ሃእኖ።

ጠረኻ ካዲንቹ

35 ኢሰ «ረመዙክዕኔ ኡሱርቲን ኑሩክዕኔ ለሌኢሃ እህን።

36 ህትን ቀርቹሰ አሜች ኡሩተ ቆጩ ወክት ፈንቶተ ቦሊች ምኒች ፈንቀል አሜቶተ ኢሊ ጠረኻ አገረኖ መነ እኩ።

37 ቀርቹሰ አሜች ወክት ተቃጠብ አገርተን ደገኖሰ ካዲመት ማሰአንቶአረ፤ ሀንቅንከ ያንክዕኔ፤ እሰን ረመዙሰ ኡሱር ማዲን አፋሽ ካደመን እትሰኖሰ።

38 አይደጎ ቀርቹሰ ህንከዕሬ ቦላን ህከረንገ ህንከዕሬ ቦሊች ኤተሮን አሜች ወክት ጠረኻት አገርተን ደገኖ ካዲመት ማሰአንቶአረ።

39 ጠዉ እኩጎሬ ካን ደጌ፤ መቱ መንቹ ምንሰ ሞጋንቹ መ ወክት አሜተኖጎሬ ደጎአቀ ምንሰ አሞተ ሰዕምይ አጉረኖብ እቅ።

40 ህትን መንች ቤቱ ሰውይቲንበ ወክት አሜተኖቤቺሃ እዕኑሁ ተቃጠቤን አገሬ» ዬሰ።

ጡመ ካዲንችለክ ሂለ ካዲንች ምሳልተ
(ማቶ. 24:45-51)

41 ጴጥሮሰን «ቀርቹ! ከ ምሳልተ ጠወእንቲሁ ኒሳህትንደ? ህከረንገ ጉዕሚሃንት?» ዬለ።

42 ቀርቹንኩ ፈንቀሽ «ህካን እኩች በሬ ብሬተ እታኢሃ ወክቲን አሰሰተ ቀርቹ ካዲመሰ አሊን ዳኛ አእኖ አመዕነሞ ቀልባሙ መንቹ አይቶ?

43 ቀርቹሰ አሜች ዬሰገ እእን ደገኖሰ ሁኩ ካዲንቹ ማሰአሞእሃን።

44 ሀንቅንከ ያንክዕኔ፤ ቀርቹሰ ህከ ካዲንቹ ሮሰ ዲንያንተሰ ጉዕማንን ዳኛ አእኖሰ።

45 ጠዉ እኩጎሬ ሁኩ ካዲንቹ ቀልቤንከሰ ቀርቹኤ አሜቶሪኖን ዲንከኖ፤ ይሜንትለክ ጎን ካዲመተ ኦለን እቱ። አጉለክ ሰከሩ ጀመሮረ

46 ህከን ካዲንች ቀርቹ አሜተኖ፤ ይ አገርብ በሬንለክ ደጎበእ ሰኣቲን ድንገቲን አሜች ቀጠዕይ አመዕነሞበእ መነን ሜጡብ አእኖሰ።

47 «ቀርች ሰውት ደገን ተቃጠብቡለክ ቀርቹሰ ሀሾ ሃሊን አእቡ ካዲንቹ አበ ገረፈመኖ።

48 እኩጎሬ ቀርችሰ ሰውት ደጉዕኖን ቀጠአመኖ ሆጉተ አእኖ ካዲንቹ ቀዉ ገረፈመኖ፤ መሰንትሰ ልግብ ጠወ ኣሴመሰ መንቹቹ ልግብንከ ሀሴኖ፤ ህትን ልግብ ኤገተ ኣሴመ መንቹቹ ልግብንከ ኣኦኖተ ሀሴኖሰ» ዬለ።

ጉዕመርቹ አጉሬን ኢሰ አዎኑ
(ማቶ. 10:34-36)

49 ኢሰ «አን ኣዲንያ አሊን ገረተ አፍሲሶተ አሜቻሞ፤ ህካን እኩቤቺሃ ደዕልት አጵቶ እቃ ሃንከ ኢታም እቅ።

50 ጠዉ እኩጎሬ መቱ ጠመቀማም ኦርሸ ጥምቀቱ ዮኤ፤ እሰን አሆተ ኢሊ ጨነቀምም።

51 እን ወገሬት ኤቦተ ኣዲንያ አሊሃ አሜቻሚሃ አጉደኖህዕኔንደ? ህትጎተበእ፤ ሀንቅሰ ጠወእንክዕኔ፤ እን አሜቻሚሁ አይደመተ ኤቦታት።

52 ከበሬቹ ኬሽ መቶ ምኔን ሃእ ኦንቶ መኒች ሰሱሰ ለም አሊን ህትን ለሙሰ ሰሰ አሊን ኬእ ብተንታኢ።

53 ህትን እኑ ቤትሰ አሊን፤ ቤቱንኩ እንሰ አሊን፤ አመንት ቤቶሴ አሊን፤ ቤቱንት አመሴ አሊን፤ በሉት ቤት ጫ አሊን፤ ቤት ጫንት በሎሴ አሊን ኬእ አይደ እካእ» ዬለ።

ወክትሰ ጠወ ደጉ

(ማቶ. 16:2-3)

54 ኢስ ኡመቲሃ «ገመት ገርብ አዲን ኬእን ለእንተ ወክት ከበር <ጠነ ኡቦታት> ይቲነንተ፤ ይቲነንተገን አሆና።

55 ህትን ከአጽ አዲን ቡብርሰን ለእንተ ወክት ሕበ ፋረተ አሆታት፤ ይቲነንተ፤ እሰን ይቲነንተገን አሆና።

56 እዕኑ ኩ ለዕዩይ! ለዕዩይ! ይቲነንተሩ ሰሜሊክ ኡላ ጠወ ለእን አደደ አቲን ደጌነንተ፤ ጠወ እኮጎሬ ሚሃት ከን ዘማኔን አሆና ጠወ አደ አቲን ደጌነንተበአሁ?» ዩሰ።

ዲን ኢቱ

(ማቶ. 5:25-26)

57 ኢስ «እዕኑ ገዛክዕይ ሚሃት ህንቅ እኩ ጠወ ፈረዲነንተበአ?»

58 ባለጋርገከክ ሜጡብ ዳኝቤቹ መርታንት ወክት ዎቃን ሀራዕሪም፤ ህካን አህባች ባላጋሩክ ዳኝበ መሲሃን ዳኝንኩ ወታደሪሃ ህገሽ አሰናሄ፤ ህትን ወታደሩንኩ ኡሱር ምኒ ኣግሰናሄ።

59 ሀንቅንከ ያንኬ፤ መቱርቹሁ ፈቁዕን ባቱዕናን ህካን ኡሱር ምኒቶ ሆሮ ፋልታንትበአ» ዩእ።

13

ጨብሰ ቶበትባሁ በአኖሃ አሁሰ

1 ህከ ወክት መኑ አሚች «ገሊሊ ባደ መነ ክትመ ሆንጠህሰን ጸሊጦስ ሸኬዕይ ቄጉሰ ክትምንከሰ ሜጡብ ሊቃልቆ» ይት ኢሲን ኩልቶኦ።

2 ኢስን ፈንቀሽ «ገሊል ባደ መኑ ህትኔ በኡ አሊሰቤቹሃ ገሊሊ ባደን ዮ ዎሎ መኒች ጉዕሚችን አበ ጨበኛኑት አጉዳህዕይትንደ?»

3 እን ኩላንከዕይ፤ ህትጎተበእ፤ ጠወ እኮጎሬ ቶበቲንባላች እዕኑ ጉዕሚንኩክዕይ ህትን በኤነንተ።

4 ህትን <ሰልሆመ> ዩናቤቶን ሎሩ ግንቡ አሊሰ ኡብ ሼ ቶን ህዜቱ መንቹ ዩሩሰሌማን ሄኣ ዎሎ መኒች ጉዕሚችን በትሰ ጨበኛኑት አጉዳህዕይትንደ?»

5 እን ኩላንክዕይ፤ ህትጎተበእ፤ ጠወ እኮጎሬ ቶበቲንባላች እዕኑ ጉዕሚንኩክዕይ ህትን በኤነንተ» ዩሰ።

ላልቹ ላልትበ ኦድ ሀቁቾ ምሳልተ

6 ኢስ «መቶ መንች ጋርሰ አዜን ሄኦ ሀቅ በላን መት ኦድ ሀቁቹት ሄኦ እቅ፤ እሰን ላልቹ ሀሽ እሴቤቹ አሚቾ ወክት መቱርቹሃ ደጎበእ።

7 ህካን እኮቤቹሃ እሰን ህከን ሆጉተ አእኖ መንቹሃ ከለእ! ከን ሰሶ ዘማኔን ተን ኦድ ሀቁቾች ላልቹ ሀሽ መቱርቹሃ ደጎምበእ፤ ሙርት ከም፤ ሚሃ ኡለተ ቤሳአ?» ዩሰ።

8 ሆጉተ አእኖንኩ ቀርቾ! ፎቀሴ ሀረሞተለከ መዳበራ ዎርተ ጠለዕል ከዘማኔተ አጉር።

9 አሚተኖ ዘማን ላልቹ ላልቶሬ ጡመሃን፤ ጠወ እኮጎሬ ላልትበ ጎሬ መርቶት አታልታንት ይ ፈንቀሼሰ» ይኬዕይ ተምሳልተ ኩሎሰ።

ጉብራይቶ መንቹተ ኢስ ፈይሱሰ

10 ኢስ አበ በሬን ጭምት ምናች መቶንከሰ ተማርሰኖት እቅ።

11 ህከኔን ቶን ህዜቱ ዘማን ደርረኖ ዱሩ ጉብራይሾሴ መት መንቹት ሄኦ እቅ፤ እሴን ጌጥ ይት ኡርቶተ ሆርን አታልታበ እቅ።

12 ኢስን ለዕዮሴ ወክት እሰቤቹ ገእ «መንች! ሆግሳሄ ጥዞናች ፈይቶንት» ይ

13 እንገሰ አሊንከሴ እዕዮ፤ ህከ ወክቲንከ ጌጥ ይት ኡርት መገኑ ገለትጭቶኦ።

14 ጠወ እኮጎሬ ኢስ አበ በሬን ፈይሾሴቤቹሃ ህከን ጭምት ምኒ ገሻንቹ ኡሙዕር መኒህሰ «ሳምታን ሆጉተ አእኖ ሊሁ በሩ ዮኡ፤ ህከን በሬን አሚቲን ፈይይ ቤላ አበ በሬን አታልሲሰናበእ» ዩሰ።

15 ህከኒች ኤተርን ኢስ ፈንቀሽ «ኩ ለዕዩይ ለዕዩይ ይቲነንተሩ! ክዕይች መት-መትቹክዕይ አበ በሬን ቦረሰ ጋድሬች ህከረንገ ሀርሰ ጎሊች ሂር ዋሃ አግሶተ መሰናበእንደ?»

16 ት ጫት ቶን ህዜቱ ዘማን ሸይጣኑ ኡሱራንሴ ሄኦ እብራሂምተ ቤቱ፤ እሴን አበ በሬን ኡሱርቻሴ ሂርተኡ ሀሰሰናሴበእንደ?» ዩሰ።

17 ኢስ ህካን ጠወአንን እሰን ሀንበዕለንተ መኑ ጉዕሚንኩ ሙልቶኡ፤ ህትን መኑ ጉዕሚንኩ ኢስ አዕዮ እጀብሲሰና ጠዋን ጉዕማንን አበ ሙንደኦኡ።

ዎንጌ እሊ ዜሬት ምሳልተ

(ማቶ. 13:31-32፤ ማር. 4:30-32)

18 ህከኒች ኤተርን ኢስ «መገን ዎምነቱ መ አጉደኖ? ህትን እን ሚን አጉጣቀንሳንሰ?»

19 መገን ዎምነቱ መቱ መንቼ ጋርስ ዉጮ ወንጌ እልተ አጉደኖ፤ እሴን ነጽት ሀቅ ጌሰ እካእ፤ ሰሚ ጨኤት ሀማንከሰ ምኒ እጃርታእ» ዬእ።

ራጭት ሞሳልተ

(ማቶ. 13፡33)

20 ለንኪሃ ኢስ «መገን ዎምነቱ ሚን አጉጣቀንሳም?

21 መገን ዎምነቱ መት መንቹት ስሶ ኮርቦሪ ዊሙ ቀሙ ሁፍ ዮተ ቀማንከሰ ቁሰቶ ራጭተ አጉደኖ» ዬእ።

ሩካሽ ዎቁተኔሃ

(ማቶ. 7፡13-14፤ 21—23)

22 ኢስ ዬሩሳሌመ መረን ከተማንለከ ገጠራን ጉዕማንን ተማርሰን ህገኖት እቅ።

23 ህከ ወክት መቱ መንቹ «ቀርቾ! ጡምታእሩ ቀዉሃ መንንደ?» ይ ጠዕሜሰ፤ ኢስን

24 «ሩካሽ ኤሮን ኣጎኖተ ሄጮቀሚ፤ መሰንትስ ልግቡ መት ህከን ኤሮን ኣጎተ ሀሰ አታልታበእከ ኩላንክዕ።።

25 ሞንሰ እኑ ኪዕይ ኡሩሰ ጡፍ ከሞኝ ኤተሮን አዕኑ አብልን ኡርቴን ኡሩተ ቆጭቴን ቀርቾ! ፈንኔ፤ ይቴነጎተ፤ እስን ፈንቀሽ ህከን አዲኝ አሜቴንተጎር ደጋንክዕኔበእ» የኖሀዕ።።

26 ህከ ወክት አዕኑ «ብሬክ እንቶም፤ እንጎም፤ ህትን በንቻንቴን ተማርሰቶንቴኔ» ይቴነጎተ።

27 ጠዉ እኩጎሬ እስ «እን ያንክዕኔ፤ ህከን አዲኝ አሜቴንተጎር ደጋንክዕኔበእ፤ አዕኑ ሂላ ጠዉ አቴነጎተሩ ጉዕሙንኩክዕኔ ኢ መዲኝ ሸቄ» የኖሀዕ።።

28 አዕኑ አብራሂሙ፤ አጎቀለከ ያቁበ ጉዕሙንከ ነብያከተ መገን ዎምነቱን ለኤን አዕኑ አብሌን ፈቀክዕኔ ደገነተ ወክት ህከኔን ኦኤለከ እንኩተ አጡ እሀኖሀዕ።።

29 ህትን ልግቡ መት ሸርቂኝ፤ ገርቢኝ፤ ቅልቢኝለከ ከአጽ አዲኝ አሜት መገን ዎምነት ማዳን አፋዕልታእ።።

30 ህካን እኮቤቺሃ ኤተራኑት ብራኑተ ህትን ብራኑት ኤተራኑተ እካእሩ ዮኡ» ዬሰ።።

ኢስ ዬሩሳሌሚሃ ኦኤሰ

(ማቶ. 23፡37-39)

31 ህከ ወክት ፈርሳዌኝ መት-መቱ መት አሜት ኢስ «ሄርድስ ሾተ ሀሰኖቤቺሃ ከንቤቺኝ ፋልት ኦርእ» ይቶሰ።።

32 እስን «ህከን ወለንገቺሃ መርቴን .ከበርለከ ጋታ ሩሃንዮ ፋሻም፤ ጥዞናመንተ ፈይሳም፤ ሰቅ በር ሆጉእ ሹዕላም» የኖት ይቴን ኩሌስ።።

33 ጠዉ እኩጎሬ ነብዬኝ ዬሩሳሌም ቤሉ ሬሁ ገበእበሰቤቺሃ ከበር ጋተለከ ጋቶሽ ዬሩሳሌመ ኦርኦተ ዎቁ ኦሌን እሁ ሀሰሰኖኤ።።

34 «ዬሩሳሌማ! ዬሩሳሌማ! ነብያከተ ሽታንቲት! ኪሰ ሶሃንቶአረ ክኒን ቀሳንቲት! ሀንጠቤቹት ጭጭረሴ ጎኔንተሴ ጭም አታገን እን እለክ ጭምእኦተ ሀሾሚሁ ሄንከ ወክትዬት? ጠዉ እኩጎሬ አዕኑ ህካን ሀሴንታበእ።።

35 ህካን እኮቤቺሃ ምኑክዕኔ እን እሀኖ፤ እን ኩላንክዕኔ፤ ቀርኝ ሱዕሚን አሜተኖሁ ማሰአምኢሃን» ይቶኖተ ኢላ ከኒኝ ኤተሮን ለኤንተኤበእ» ዬሰ።።

14

ኢስ ለንኪሃ አበ በሬን ፈይሱሰ

1 መቶ አበ በሬን ኢስ ፈርሳዌ አምጎሳኖኝ መትሰ ምንካ ሆሹ እቶተ ኣጎ እቅ፤ እሰን መ እእኖ ጎር ለኦተ አገርታኢት እቅ።።

2 ህከኔን አሉሰ ደርሸኖ መቱ መንቹ ብሬሰ ሄዕኖ እቅ።።

3 ኢስን መገን ሕገ ደጋረለከ ፈርሳሙተ «አበ በሬን ፈይሱ ሀሰሰኖንደ ሀሰሰኖበእ?» ይ ጠዕሜእ።።

4 ጠዉ እኩጎሬ እስ ጨለ ይቶኤ፤ ህከኒኝ ኤተሮን ኢስ ህከ ጥዞናመን አፍ ፈዩሽ ሀርሲሾሰ።።

5 ኢስን «ክዕኔኝ ቤቱሰ ህከረንገ ሶሩሰ አበ በሬን ኤሎን ኡሶጎሬ ህከ ወክት ኤሌኝ ፋሽኖበኢሁ አዬት?» ዬሰ።።

6 እሰ ህከን ጠዉሃ መቱርቺሃ ፈንቀሽቶተ አታልቶበእ።።

ገዉ ሆፍሰተኔሃ

7 ገኤመ መት ኪዕምኝ ቤኝን አፋዕልቶተ መጠርተን ኢስ ለዕይ

13:27 መዝ. 6፡8። 13:28 ማቶ. 22፡13፤ 25፡30። 13:29 ማቶ. 8፡11-12። 13:30 ማቶ. 19፡30፤ 20፡16፤ ማር. 10፡31። 13:35 መዝ. 118፡26፤ ኤር. 22፡5። 14:5 ማቶ. 12፡11።

8 «እዪሁ ቦላቸ ገሌሄ ወክት ኬዕምኝ ቤቾን አፋዕልቶት፤ መሰንትሰ አይደን ኪቾ ሎዕረኖ መንቹ ገሌማሃ እሀኖ፤

9 ለመንክክዕኔ ገሌ መንቹ ኪቤቹ አሜቻ ሐቤቹ ከን መንቹሃ ኣሱ የኖሄ፤ ህከ ወክት ሙልት ቀዎ ቤቾን አፋዕልታንት።

10 ጠዉ እኩጎሪ ቦላቸ ገሌሙሄ ወክት ቀዎ ቤቾን አፋዕል፤ ገሌሄ መንቹ ኪቤቹ አሜቻ ሌ ጃለ! ኬዕምኝ ቤቾን አፋዕል የኖሄ፤ ህከ ወክት ኪን ሜጡቡ ማዳን አፋዕሌ መን ብሪን ኬዕምኝ ደአታንት።

11 መሰንትሰ ገዉስ ሎርሰኖሁ ጉዕመንኩ ሆፈአኖ፤ እኩጎሪ ገዉስ ሆኖሰኖሁ ኬዕምኝ ደአኖ» ይ መት ሞሳልት ኩሎስ።

12 ህትን ኢሰ እሱ ገሌ መንቹ «ሆሹ ህከረንገ ሁርባት ተቃጠቦንት ወክት እሰ አይደን ፈንቀሽት ገእት ሌቃ ባትባገ ጃላክ ህከረንገ አመክ ኦሱተ ህከረንገ እሉክ ህከረንገ ቀባጣሙ ቀኤክ መን ገእቶት።

13 ጠዉ እኩጎሪ ድግሰ ድግሳንት ወክት ቡጥቻኑተ፣ አንገተ ሎከተ ሙርተኦአረ፣ ናፋኑተለከ ቆቃኑተ ገእ።

14 ህካን አቶንትጎር አቶንቲሃ ባቶተ አታልታበእቤቹሃ ማሰእንቶንቲሃ እካንት፤ ህትን ፈፀ መኑ ሬሆቻ ኬአ ወክት መገኑ ባተኖሄ» ይሰ።

አበ ድግሰ ሞሳልት
(ማቶ. 22፣1-10)

15 ኢሰን ሜጡቡ ማዳን አፋልቶህኑኡቻ መቱ ህካን ሞጭጩ ወክት «መገን ሞምነቲን ማዳን እተኖህ ህት ማሰእሞአሃን!» ይሰ።

16 ጠዉ እኩጎሪ ኢሰ ፈንቀሽ «መቱ ወክት መቱ መንቹ ሁርባት ድግሰ ቅጥ አዕይ ልግብ መን ገእኤ።

17 ሁርባት እቴፍ ወክቱ እካን ተቴሱ ጉዕመርቹንኩ ቅጥቤቹሃ አሜ የተ ካድንቹሰ ገእመ መንቤቹ ሶኮሰ።

18 ጠዉ እኩጎሪ ገእመ መኑ ጉዕመንኩ መቲን መቲን ድግሰሰ ፈቆተ ሄዕላት መሰተ ኩሉ ጀመርቶኤ፤ መቱሰ ሕሉተ ህዕሪሞቤቹሃ መር ለኤ ሀሰሰኖኤ፤ ህካን እኩቤቹሃ ኤገተክ መርረሲጩኤ» ይሰ።

19 ህትን ሞሉሰ ሕንቶ ጥንድ ቦረተ ህዕሪሞቤቹሃ አቡርታገ ለአተ መራሚት፤ ህካን እኩቤቹሃ ኤገተክ መርረሲጩኤ» ይሰ።

20 ህትን ሞሉሰ «ጫተ ኡብ እዚቹ እኩምቤቹሃ አሜቶተ አታላምበኤ» ይሰ።

21 «ሁኩ ካድንቹንኩ አሜቻ ህካን ጉዕመንከ ቀርቹሃሰ ኩሎ፤ ህከ ወክት ሞንሰ መንቹ ኡሙዕር ካድንቹንከሰ ፈዕልት ከተሞ ምቃህ፣ በል ምቃህ መርት ቡጥቻኑተ፣ አንገተ ሎከተ ሙርተኦአረ፣ ቆቃኑተለከ ናፋኑተ ኡብ አግሰ» ይሰ።

22 ካድንቹንኩ ቀርቻ! አዘዘንቴኤገን አዕዮም፤ እኩጎሪ ቲሁ ፈቆ ቤቹ የኡ» ይሰ።

23 ቀርቹንኩ ካድንቹሀሰ ጎጠር ምቃለከ በል ምቃሃ መርት ሞኑኤ ዊሞተ ኢሊ መኑ አሜተኖገ አእ።

24 መሰንትሰ እን ያንክዕ፤ ህከን ገእሞ መኒቻ መቱሁ ሁርባቲቻኤ ቀመሰኖበኤ ይሰ።

ኢሰ እምኑ ሞገ ባትሲሰኖ እሁሰ
(ማቶ. 10፣37-38)

25 ልግቡ መኑ ኢሰን ሜጡቡ ሃመኖት እቅ፤ እሰን መን አደ ፈንቀል

26 «ኢቤቹ አሜተኖሁ ጉዕመንኩ አነሰ፣ አመሰ፣ ጫሰ፣ አለሰ፣ አመሰ ኦሱተለከ ሞሉ ፈቅ ገይሰ ፎሉ ፈቀዕነ ለገአበጎር አሞኖኤተ አታለኖበኤ።

27 ህትን እዪሁ መሰቀለሰ እጅ አምንበኤሁ አሞናንቹኤ እሆተ አታለኖበኤ።

28 «ክዕኔቻ ግንባ እጅርተ ሆሹ መንቹ ወዕና አፋዕል እጅር ሹልሲሰኖ ብሩ የ ጎሪ ይ ሰው ይባህ አዪት?

29 ህካን እህባቻ ቀበቢ ጀመር ሹል እጅሩ አታልባቻ ለዕዮሁ ጉዕመንኩ

30 ኩ መንቹ እጅርተ ጀመር ሹሉ ሆኑ ይተን ቀለዳሰ።

31 ህትን «ቶኖ ኩሜ ወታደሩ የሰ ሞሙ ለሞድመ ኩሜ ወታደረ አፍ አሜተኖ ሞሚን ኦለሞተ አታለኖንድ? ኦልሃ መሩዕነ ሄጭ አፋዕል አማዕለመኖበእንደ?

32 ህካን እህባቻ ኦሊሃ አሜተኖ ወሙ ቄዕራሻን ሄዕዮገን ወገሬት ሶቀማኑተ ሶክ ሀራዕረሞተ ኡጩኖ።

33 ህትን የሲሃ ጉዕመንከ አጉርባሁ እዪሁ አሞናንቹኤ እሆተ አታለኖበኤ» ይሰ።

ደግለልትበ መጥኔተኔሃ
(ማቶ. 5፣13፤ ማር. 9፣50)

34 ቲሁ ኢሰ «መጥንት ጡመታን፤ ጠዉ እኩጎሪ መጥንት ጤዕበ ጎሪ ጤኣገ ሚን እኦተ አታለኖ?

35 ህትናምት መጥንት ኡላተ መደበረ እክ ደግለልታበእቤቹሃ ፉሼን ኡብሊን ኡጁናሰ፤ ሞጮጭታ መጨት ዮሲሁ ሞጮጬን» ዬሰ።

15

በዕይ ደገሞ ሆልኝ ሞሳልተ (ማቶ. 18፥12-14)

- 1 መቼ ወክት ቀረጠ ሙርታአሩለክ ጨበኛኑት ጉዕሙንኩ ኢሲኝ ሞጮጭቶተ ሆንጠካኢት እቅ።
- 2 ጠዉ እኮጎሬ ፈርሳውትለክ ሕግ አስተማረት «ኩ መንቹ ጨበኛኑተ ቶግ እሳን ሚጡቡበ እተኖት» ይት ቁንቁቶኡ።
- 3 ህካን እኮቤቹሃ ኢሰ አሰንተ
- 4 «ክዕኔኝ ጥቤ ሆለት ዮሲሁ ህከን ሆላኝ መትሴ በኡጎር ሆንሳይይ ሆንሰተ ሆለተ ኡላ ኡድማን አኩር በኦ ሆልቹተ ደጎተ ኢላ ሀሶተ መርገሀ አዬት?
- 5 ደጎሴ ወክት ሙንደዕይ ቆዕሊስ እጅ አሜተኖ።
- 6 ሞንጎ ኢሊ ወክት ጃላስለክ ኦሌሰ መን ሚጡቡበ ገእ ብዕዮ ሆልቹኤ ደኤምቤቹሃ ኢን ሚጡቡበ ሙንደዕዬ ዮኖሰ።
- 7 እን ኩላንክዕኔ፤ ህከንገን ጨብሰ ቶበቱ ሀሰሰኖሰበእ ሆንሳይይ ሆንሶ ጡመ መኒኝ አበ ጨብሰ ቶበተኖ መቶሃ ጨበኚሃ ሰማን አቡ ሙንዲኑት አካእ» ይ ኩሎሰ።
- 8 ህትን «ቶኑ ሸልጎኑ ዮሴሀኒኝ መቱሰ ሸልጎኑ በዕዮሴራ ኩራዘ ለሊሰ ሞንሴ ሀጣውት ደጎተ ኢላ ኩት እት ሀሰባት አዬት?
- 9 ደጎ ወክት ጃላከሴለክ ኦሌሴ መን ሚጡቡበ ገእት ብዕዮኤ ሸልጎግ * ደኤምቤቹሃ ኢን ሚጡቡበ ሙንደዕዬ ይታሰ።
- 10 እን ኩላንክዕኔ፤ ህካን እኮጎን ጨብሰ ቶበተኖ መቶሃ ጨበኚሃ መገን መላይክ ብሬን ሙንዲኑት አካእ» ይታ ሞሳልተ ኩሎሰ።

በዕይ ደገሞ ጨልተኔሃ

- 11 ኢሰ «መቶ መንቹሃ ለም ኦሱት ሄኦስ እቅ።
- 12 ህከኡኤኝ ማዕኑስ አነሰ ሕ አነ! ዮሄ ዲንያኝክ አለኖኤ ወጥ አሴኤ» ዬአ፤ አኑስ ዮሰ ዲንያኝ ለማንከሰ ቤኩ።
- 13 ቀም በሬኝ ኤተሮን ማዕኑ ጨሉ ዮሰ ዲንያተ ጉዕመንክ አፍ ቁዕራሽ ባዱ ኦርዕዮ፤ ህከኔን ዲንያሰ ጉዕመንክ ገውማን ደግለልበርኝን ብን አይ ቤሾ።
- 14 ዮሰርቹ ጉዕመንክ ሹሎኝ ኤተሮን ህከን ባደን ጠረኝ ጎሩ እካን ሁኩ ጨሉ ኦርጨቀም።
- 15 ህካን እኮቤቹሃ ህከን ባደ መኒኝ መቶ መንቹን ኤገተ ኣጎ፤ ሁኩ መንቹኩ ቦኔ ዜማንቹ አዕዮሰ።
- 16 ሁኩ ጨሉንኩ ቦክት አታ ሀርቁተ እቶተ ሄዕላተኖ እቅ፤ እኮጎሬ መቱርቹሃ አሰናሲሁ ዮበእ።
- 17 ኤተሮን ቀልቡስ ፈንቀላን ለንኤ ምን፤ ሄኣ ካዲመት ጉዕመንኩ ጣብተ እት ዲባን ፈቀኖሳት፤ እኮጎሬ እን ከኔ ጎሮን ራሃማት።
- 18 ህካን እኮቤቹሃ ከንቢኝ ኬዕይ አንኤቤቹ መር ኢ አነ! መገኒሃለክ ኬሳሃ ቤሾም።
- 19 ከኒኝ ኤተሮን ቤቱክ የመም ገእሙ ሀሰሰኖኤበእ፤ ህካን እኮቤቹሃ ቀጠረንት አታ ካዲማኝክ መትሰጎ ወለኤኤ ያንሰ፤ ይ ሰውዬእ።
- 20 ህከንቤቹኝን ኬዕይ አንሰቤቹ አሜኝ፤ «እሰን ቁዕራሻን ሄዕዮገን እኑሰ ለዕይ ሻኸር ደጉጅ መር ጎበሰ ሀንቀፍ ሰንቁሰ።
- 21 በቱንኩሰ ሕ አነ! መገኒሃለክ ኬሳሃ ቤሾም፤ ከኒኝ ኤተሮን ቤቱክ የመም ገእሙ ሀሰሰኖኤበእ ዬሰ።
- 22 ጠዉ እኮጎሬ እኑስ ካዲመሰ ገእ ፈዕልቱን አበ ጡመ ኡድኑተ ኤቤን ኡድሼሰ፤ ህትን አንገሰ ጨንባረ ሎክሰን ጫዕመተ ምሬሰ።
- 23 ህትን ሞሾ ደርገጌሽ ኤቤን ጎራጩ፤ ነኤ አንቶሁ፤ ሙንደዕዮሁ።
- 24 መሰንትሰ ኩ በቱኤ ሬዮ እቅ፤ ሁኩዕኑን ቴ ፎሊን ዮኤ፤ ህትን በዕዮ እቅ፤ ቴ ደገሞኤ ዬ ወክት ሙንደኤ ጀመርቶኡ።
- 25 «ህከ ወክት ሀንገፋ ቤቱ አቡረ ቤኝን አቡረኖት እቅ፤ ፈንቀል አሜተን ሞንቤቹ ሆንጠኩ ወክት ከረቡተ ሞቀራንን ቦለቸ ከዳኖሃ ሞጮጬእ።
- 26 እሰን ካዲማኝ መቱሰ ገእ ስኩን መርቹሃንን ይ ጠዕሚሰ።
- 27 ሁኩ ካዲንቹንኩ ለመክቤቱ አሜኝኤ፤ በዕዮ ቤቱሰ ደገሞቤቹሃ እኑክ ሞሾ ደርገጌሽ ጎራጮኤ» ዬሰ።
- 28 ጠዉ እኮጎሬ «ሀንገፋ ቤቱ ኡሙዕር ምኒ ኣኩ ግቦ፤ እኑስ ምኒኝ ፋል ምኒ ኣጎተ ኡጨፍሰ።

15:2 ሉቃ. 5፥29-30። * 15:9 ሸልጎግ ዬኖሁ- መቱ ሸልጎግ መቶ በሬ ሆንተ እአኖ መንቹሃ መቶ በሬተ ባቴኖሳሃ ደሞዘ።

29 እስን እኒህሰ ፈንቀሽ ሁኩዕነን! ልግብ ዘማን ካደሞንኬ፤ እዘዘንቴኤንከ ሆሮ ግጦምበእ፤ ህካን እኩቤቸሃ ደረሮንተእ ማጡብ ሙንደኦተ መቱ ኮርቤሸሃ ኣቶንቴኤበእ።

30 ጠዉ እኩጎሬ ኩ ቤቱክ ዲንያክ ጉዕመንከ ዝነተ ኣታ መኒን ማጡብ ሹል ኣሚቻን ሞሾ ደርገጌሽ ጎርጦንትሱ ዬእ።

31 ኣኑንኩ ሒ ቤቶ! ኣት ጉዕመ ወክትንክ ኢን ማጡብ ዮንት፤ ኤሰ ዮኤርቻ፤ ጉዕሙንኩ ኪሃን።

32 ጠዉ እኩጎሬ ኩ እመክቤቱ ሬዮ እቅ፤ ቴሱ ፎልን ዮኤ፤ ህትን በዕዮ እቅ፤ ቴሱ ደገሞኤ፤ ህካን እኩቤቸሃ ኣበ ሙንደኤ ሀሰሰኖኔ ዬሰ። ዬእ።

16

እመዕነሞበእ ሹመ

1 ኢሰ ኣሳበሰ «መቱ ወክት መቱ ቀባጣሙ መንቹ ሄዕዮ እቅ፤ እሲንከ ምንሰ እዘዘኖ መቱ ሀላፊቹ ሄዕዮሰ እቅ፤ ህከን ቀባጣሞ መንቹሃ ምንክ ገሻንቹ ዮሄ ዲንያክ ብንጎሰፊ ቤሰኖት። ዬን ኩሉሙሰ።

2 ሁኩ ቀባጣሙ መንቹንኩ ምንሰ ሀላፊቹ ገእሲሽ ሐጉ ሞጫጫም ጠዉ መርቻሃን? ከኒቻ ኤተሮን ምንእ ገሻቶተ ኣታልታንትበእቤቸሃ ኣቶንት ምልቀክ ጌሰ ኩሉኤ ዬሰ።

3 ሁኩ ሀላፊቹንኩ ቀልቤንከሰ ቴሱ ሀለቁኤ ኣሴኤ ሆንቶ ሸርኤታት፤ ህካን እኩቤቸሃ መ ኣኡ? ኣቡር ኣታላምበእ፤ ጦላብ እቱ ሙልሰኖኤ።

4 ገሸኤ ሆንቶ ሸሪመኤ ወክት መኑ ምናንከሰ ኤሳሃ ቶጎተ ኣእም ጠዉ ደጎም ዬእ።

5 «ህካን እኩቤቸሃ ቀርቻ ኤዳ መን ጉዕመንከ መቲን መቲን ገእ ዎዕኔሰ መንቹ ሒ ቀርቻሃ ባታንት ሄንኩ ኤዳ ዮሄ?» ዬሰ።

6 መንቹሰ ሓቤ ምዳኖ ዘይት ኤዳ ዮሄ ዬእ፤ ሀላፊቹንኩ ኤዳክ ከተበሞ ወረቀተ ኣእት ኣፋዕልት ኣንታሁ ሞዳኦተ ይት ደዕልት ከተብ። ዬሰ።

7 ህከኒቻ ኤተሮን ለንክ መንቹሃ ሄንኩ ሌቆ ዮሄ?» ዬሰ፤ መንቹንኩ ሓቤ ሆቆማድ * ኣለሰ ሌቆሁ ዮኤ ዬእ፤ ሀላፊቹንኩ ኤዳክ ከተበሞ ወረቀተ ኣእት ህዚታሁ ሆቆማድ ይት ከተብ። ዬሰ።

8 ሀለቁንኩ እመዕነሞበእ ሀላፊቹንክ ኣት ብላታሞሃን!» ዬሰ፤ መሰንትሰ ከን ሂለ ኣዲንያ ኣል መኑ ገገዉሰ ሀዕሊሃ ኑሬን ሄኣ መገን መኒቻ በትሰ ኤንኬዕናመተ ኣሁሰ ለሊሰኖ።

ዲንያተ ቤቸን ደግለሸቀሙ

9 ኣን ኩላንክዕኔ፤ ከን ኣዲንያ ኣል ተንኩተ ኣቲን ደኣቴንተ ቀባጣንክክዕኔ ገይሀክዕኔ ጃለተ መክሲንተ፤ ሁኩ ቀባጡክዕኔ ጎሮ ወክት ጃለክዕኔ ዘላላሚሃ ሄኣ ምኔንከሰ ቶጋህዕኔ።

10 ቀዋርቻን እመዕነሞሁ ሎረርቻን እመዕነሞላሃን፤ ጠዉ እኩጎሬ ቀዋን ጡመርቹ ኣእቡ መንቹ ኣበ ጠዋን ጡመርቹ ኣኣኖበእ።

11 ቴሱ ተንኩተ ኣኤን ደኤመ ቀባጣን እመዕነንቴንተረ እኪንባች ህንቅ ቀባጦተ ኣይ ኤገተ ኣሰኖህዕኔ?

12 ህትን ሞሎ መን ቀባጣን እመዕነንቴንተረ እኪንባች ገይሀክዕኔ ኣካ ቀባጡተ ኣይ ኣሰኖህዕኔ?

13 «ለሙ ቀርቹ ካደመኖ ካዲንቹ ዮበእ፤ ህካን እኩቤቸሃ መቱሰ ግብ መቱሰ ኢተኖ፤ መቱሰ ኬዕምሸ መቱሰ ሆኖሰኖ፤ ህትን መገኒሃለክ ዲንያሃ ጠገንቶኖተ ኣታልቴንንተበእ» ዬእ።

14 ዲንያተ ኢትታ ፈርሳውት ኢሰ ጠወዕዮሃ ጉዕመንከ ሞጫጫት ቀለደሰ።

15 ጠዉ እኩጎሬ ኢሰ «እዕኑ መን መዴን ገዉክዕኔ ፈየ ኣቲንንተፍ፤ እኩጎሬ መገኑ ቀልብክዕኔ ደገኖ፤ መሰንትሰ መንቤቸን ሎረ ኣክ ለለኖርቹ መገንህኔን ህንቀሞላሃን» ዬእ።

መገን ሕገለክ ጎጃሃ ኣህተኔሃ

(ማቶ. 11፡12-13፤ 5፡31-32፤ ማር. 10፡11-12)

16 ኢሰ «መገን ሕገለክ ነባያከት ጠወኣኢሁ ጠመቃንቻ ያህይ ወክቱ ኢሎተ ኢላ ሹምንቱ ሄዕዮሰ እቅ፤ ህከን ወክቱቻ ኪሸ መገን ምምነት ተሸት ላገት ማጡብ ተማርሲኖት፤ መኑ ገገዉንኩሰ ህከ ምምነቱ ወልቃን ኣጎተ ሄጫቀመኖት።

17 ጠዉ እኩጎሬ መገን ሕግ ላጋች ቀቅቹት በኣህኒች ሰሞለክ ኤለት ህጋ ዩ ቆሀሮ።

18 «ጫሰ ገፈር ሞልተ ጫተ ኤበኖሁ ጉዕሙንኩ ዝነተ ኣኣኖት፤ ህትን ጨይቻሴ ፋልቶ ጫተ ኣኣኖሁ ጉዕሙንኩ ዝነተ ኣኣኖት» ዬእ።

ቀባጣሙ መንቹለክ ቡጥቹ ኣልዓዛሪ

19 ኢሰ ሰመ ኣኩደኖ ብሸተ ኣድኑተለክ ጡመገ መክሲን ደዳመ ኣድኑተ ኦደኣኖ መቱ ቀባጣሙ መንቹ ሄዕዮ እቅ፤ እሰን በሪን በሪን መክያንሰ ተሰቄንጭ ሙንዲኖን ሄኣኖ እቅ።

* 16:7 ሆቆማድ፡- ዩ መቱ ሆቆማድ ሰሰ ጥብተ ህዚታሁ ሌትር ዊ ጌሰ ኣፈኖ፤ ሁኩንን ኣንቱ ጥቤ ኪሎ ጫ ጌሰ ኣፈኖ። 16:13 ማቶ. 6፡24። 16:16 ማቶ. 11፡12-13። 16:17 ማቶ. 5፡18። 16:18 ማቶ. 5፡32፤ 1 ቆር. 7፡10-11።

20 ህትን እሉስ ጡሌን ጡሉ እኮ አልዓዛሬ ዬኖ መቱ ቡጥቹ መንቹ ህከን ቀባጣም መንች ግቤስ ብትም መደን ኦስዕዮ እቅ።

21 ሁኩ ቡጥቹንኩ ቀባጣም መንች ማዲች ኡቦ ፋርፋሩ እቶተ ሄዕላተኖ እቅ፤ ዉሸት አሜት ጡላስ ላጠ እቅ።

22 ሁኩ ቡጥቹ መንቹ ሬዮች መላደክት እብራሂም መድ መስቶስ፤ ህትን ሁኩ ቀባጣም መንቹንኩ ሬይ ሞገሞ።

23 ሁኩ ቀባጣም መንቹ አዛቤን ኦርጨቀመን ቄዕራሻን እልስ ኬሽ እብራሂመላከ ጋለስ አፋዕሌ አልዓዛሬ ለዕዮ።

24 እስን ኢ እነ እብራሂም! ሀዕይ ኤሳሃ እሙዜኤ፤ እን ከኔ ጌራ ለባነ ኣዜን ኦርጨቀመምቤቹሃ ዙዕሩሜስ ዋን ጨፍ አራብኤ ቅዝሶተ አልዓዛሬ ሶሂኤ ይ ገኤእ።

25 ጠዉ እኮጎሬ እብራሂም ኢ ቤቶ! ፎሊን ሄኑንት ወክት ናጂን ሄኑንትገ ሰውይ፤ ህትን አልዓዛሬ ኦርጨቀሞገ ሰውይ፤ ህካን እኮቤቹሃ እሲሃ ቱሱ ከኔ መከሰ፤ እት ኦርጨቀንታገት።

26 ህትን ህከኒች ጉዕሚችን በትሸ ከን አዲች ክዕኔ አደ ህጎተ ህጎአሩ አታልታበአገለከ ህካክ አዲች አዪሁ ኒ አደ ቶላኖበአገ ኒለክ ክዕኔ በላን እቡ በዉ ዮኡ ዬስ።

27 ሁኩ ቀባጣም መንቹንኩ ኢ እነ! ህካን እኮች አልእዛሬ እንኤ ምኒ ሶሆተ ኡጫንኩ።

28 መንትሰ ህከኔ ኦንቱ አመኤ ኦሱት ዮኤ፤ እስን ከ ኦርሸ ቤቹ አሜታበአገ እስን መር ጠረኛሽ ኩሉን ዬእ።

29 ጠዉ እኮጎሬ እብራሂም «እሳንከ ሙሲለክ ነብያኖ ክታበት ዮስ፤ ህካን ሞጮጭቱን ዬ ወክት

30 ሁኩ ቀባጣም መንቹ ፈንቀሽ ሕ እነ እብራሂም! ህትጎተበእ፤ ሬዮ መኒች መቱ መንቹ ኬዕይ መር ጎሬ ጨብስ ቶበታኤ» ዬእ።

31 እብራሂምን «ሙሲለክ ነብያኑት ከተቦ ክታበት ይታኢሃ ሞጮጭታበኢሃ እኮች ሬዮ መኒች መቱ መንቹ ኬዕይ ኩሎስ ጎሬሁ አመዕንታበኤ» ዬእ።

17

መነ ሉሲሰች አገዕሩ
(ማቶ. 18፡6-7፤ 21—22፤ ማር. 9፡42)

1 ኢስ አሳበስ «መነ ሉሲሰኖርቹ አሜቱዕነ ሆር ፈቀኖበእ፤ ጠዉ እኮጎሬ ህከ ሉሲሰኖርቹ ኤበኖ መንቹሃ ቆሀኖስ!

2 ሁኩ መንቹ ከን ቀቅቻኖች መቱሰ ሉሲሰኖህኒች ርትም ክኑ ጎበስ ኡሱሬን ባራን ቶሬናንስ ቆሀኖስ እቅ።

3 ህካን እኮቤቹሃ ገይህክዕኔ አገዕርዬ፤ አመክቤቱ ቤሾሂ ጎሬ ሻቅስ፤ እስን ሰጭ ፈንቀሎ ጎሬ አኑርስ።

4 መቶ በሬን ለመላ ወክት ቤሾ ጎር ለመላ ወክትንከ ሰጭ ፈንቀሎም፤ ዮን ኪቤቹ ፈንቀሎ ጎሬ አኑሩ ሀሰስኖሂ» ዬእ።

5 አሳበንት ቀርቹ ኢስ «ሀዕይ አመዕነቱ በርግኔ» ይቶሰ።

6 ቀርቹንኩ ፈንቀሽ «ጣፌ እሌ ጌሱ አመዕነቱ ሄዕዮሀዕኔ እቃን ከ ኦድ ሀቀ ሕንቤቹች ቡቱከንት ባራን ካሰም፤ ይቱነንተረ አዘዘመዕኔ» ዬስ።

7 ህትን «አኩረኖ ሀከረንገ ሆላተ አላለኖ ካዲንቹ ዮሲሁ ካዲሙሰ አኩራች ፈንቀሎ ወክት ደዕልት አፋዕልት እት፤ ዮኖሁ ክዕኔች አዬት?

8 ህካን ዮኖ ወጥ «ቴሱ ሀርባት እቶተለክ አጎተ ኢላ ረመዙክ ቆዕርት ካደሚኤ፤ ሀከኒች ኤተርን እት አታጎትለክ አገንት፤ ዮኖስበእንደ?

9 ህትን እስ አዘዘኖርቹ እዕዮሀኒሃ ህከ ካዲንቹ ገለትጨኖሰንደ?

10 ህትን አዕኑሁ አዘዘንቱንተርቹ ጉዕመንከ አቴንተ ወክት ሳኡ ገለት ሀንሰበረ፤ እኡ ሀሰሰኖ ጠወ ጠለዕል አዕኖም» ይዬ። ዬስ።

እስ ቶኑ ጎግ አል ጥዘናመተ ፈይሱስ

11 ኢስ ዬሩሳሌም ከተመ መረን ሰመርለክ ገሊፈ በሊን ሀገኖት እቅ።

12 መት ቀዕተ ኣጎ ወክት ጎግ አል ጥዘነት አፎስ ቶኑ መኑ ቄዕራሻን ኡርቶሁኑኡን ደቀሞ።

13 እስን ላገሰ ጎት እት «ቀርቹ ኢስ! ሀዕይ አሙዝኔ!» ይቶኤ።

14 ኢስን አስተ ለዕይ «መሬ አልክዕኔ ቄሲሃ ለሊሹ» ዬስ፤ እስን መርተንን ጎግ አሌን ፋልቶ ጥዘናች ፈይቶኤ።

15 እሳችን መቱሰ ፈይስ ለዕዮ ወክት ሎረ ላጋን መገኑ ገለትጨን ፈንቀል አሜቹ።

16 እስን ሚኔንከስ ሙግይ ኢስ ሎከ አሊን ኡብ ገለትጨሰ፤ መንቹንኩስ ሰመር ባድዮ እቅ።

- 17 ኢስን «ፈይቶሩ ቶኑሃ እቅበእንደ? ሆንሱሰ ሀከበ ዩኡ?
- 18 ከን ዋሎ ባድ መንኛ ቤሉ መገኙ ገለትጮተ ፈንቀል አሜቾሁ ዮእንደ?» ይኬዕይ
- 19 ህከ መንቹ «እመዕነቱክ ፈይቾሂ፤ ኬአ ኦርእ» ዩሱ።

መገን ዋምነቱ አሜተኖገ
(ማቶ. 24፣23-28፤ 37-41)

- 20 ፈርሳውት ኢስ «መገን ዋምነቱ መ ወክት አሜተኖ?» ይት ጠዕምቶሰ ወክት «መገን ዋምነቱ አሜተኖሁ መኑ አገረኛ ሃልጋበእ። *
- 21 ህትን ሁኩዕኑን ከበ ዮኡ። ህከረንገ ላዳ ዮኡ። ዩኖሴበእ፤ መሰንትሰ መገን ዋምነቱ ዮኢሁ ክዕኔ በላንት»† ዩሱ።
- 22 ህከኒኛ ኤተሮን ኢስ አሳበሰ «መንኛ ቤት በሬኛ መቱ በር ለኦተ ሃዕላቲነት ወክቱ አሜተኖ፤ እኮጎሬ ለኢነተበእ።
- 23 ህትን መኑ ሁኩዕኑን ከበ ዮኡ። ህከረንገ ሁኩዕኑን ካጸ ዮኡ። ዮኖሀዕይ፤ ጠዉ እኮጎሬ እሰተ አዎንቱን መርቶኖቹ» ዩሱ።
- 24 መሰንትሰ ሰማን ጉገኛት በለቅ ከን አድ ገበሊኛ ካጽ አዲ ገበሊ ኢሎተ ኢሊ ለሊሰኖገን መንኛ ቤቱ አሜተኖ ወክት ህትን አሀኖ።
- 25 ጠዉ እኮጎሬ ህከኒኛ ሄጭ መንኛ ቤቱ ልግብ ኦርሸተ ቶተለክ ከን ዘማን መኒን አበ ግበሞተ ሀሰሰኖሰ።
- 26 ህትን ኑህ ዘማን እኮገን መንኛ ቤት ዘማኔን ህትን አሀኖ።
- 27 ሁኩንን ኑህ መርከባን አገኖ በሩ ኢሎተ ኢሊ መኑ እተኖት፣ አገኖት፣ ኤበቀኖትለክ መአሲሰኖት እቅ፤ ቤሰኖ ውሁ አሜኛ ጉዕመንክ ቤሾ።
- 28 ህትን ሉጥ ዘማንገን አሀኖ፤ ህከ ወክት መኑ እተኖት፣ አገኖት፣ ሀረኖት፣ ሀዕረኖት፣ ካሰኖትለክ እጃረኖት እቅ።
- 29 እኮጎሬ ሉጥ ሶዶም ከተሚኛ ፋሎ ወክት ገረትለክ ዲን ሰሚኛ ጤንገ ኡብ ጉዕመንክ ቤሾ።
- 30 መንኛ ቤቱ ለላኖ በርሃ ህትን አሀኖ።
- 31 ህከ በርንክ ምኒ እንት አሉን ሄዕዮ መንቹ ምኔሰ ዮ ኦደተ አአተ ድሩንከ፤ ህትን አቡረ ቤቾን ዮእንኩ ኤተሩ ዋል ፈንቀሱንከ።
- 32 ህትን ሉጤ ጫንተ ሰውይዩ።
- 33 ፎልሰ ፈሶተ ሀሰኖሁ ጉዕመንኩ ፎልሰ ቤሰኖ፤ ህትን ፎልሰ ሆገኖሁ ጉዕመንኩ ፎልሰ ደአኖ።
- 34 እን ኩላንክዕይ፤ ህከ ሀዋሮን ለሙ መንቹ መቶ መዕናን ኦሰአእ፤ ህከኑኡኛን መቱሰ መሴናን መቱሰ ፈቀኖ።
- 35 ህትን ለሙ ሚንቱ ሚጠብ ሪታኦ፤ ህከኑኡኛን መትሴ መሴናን መትሴ ፈቃእ።
- 36 [ህትን ለሙ መኑ መቶ ቤቾን አቡርታኦ፤ እሳኛን መቱሰ መሴናን ሰመቱሰ ፈቀኖ።]‡
- 37 ህካን እኮቤቹሃ አሳበሰ ኢስ «ቀርኝ! ህከበዪት?» ይት ጠዕምቶሰ፤ እስን «ሬሾ ዮቤቾን ዘብሩ ጭምዮኖ» ዩሱ።

18

ጨዉሴ ሬዮ መንቹተለክ ሂሊ ዳኛ

- 1 ህከኒኛ ኤተሮን ኢስ መኒሃ ሆጉዕናን ጉዕመ ወክትንከ ዱአ አኡ ሀሰሰኖሃ አሁሰ ተማርሶተ መት ሞሳልተ ኩሎሰ።
- 2 እስን «መቶ ከተማን መገኑ ዋጅቡለክ መነ ከበጅቡ መቱ ዳኛ ሄዕዮ እቅ።
- 3 ህከን ከተማንን መት ጨዉሴ ሬዮ መንቹት ሂኦ እቅ፤ እስን ህከን ዳኛቤቹ ጉዕመ ወክት አሜተን ሳላጋርንከኤ ኦዳም ጠዉ ፈረዴኤ» ይታሰት እቅ።
- 4 እስን ልግብ ወክት ፈረዱ ግቦሴ፤ ጠዉ እኮጎሬ ኤተሮን ቀልቤንከሰ ለመሃ መገኑ ዋጅብጎሬ መነ ከበጅብጎሬ
- 5 ት ጨዉሴ ሬዮ ጫት ኦርሳኤቤቹሃ ፈረደንሴ፤ ህካን አሀባኛ ጉዕመ ወክትንከ አሜተን ኦርሱንከኤ» ይ ሰውዩእ» ዩሱ።
- 6 ቀርቹ ኢስን «ሁኩ ሀንቅ ፈረድቡ ዳኛ ዩ ጠዉ ሞጮጭዩ።
- 7 መገኑ ሀንከዕርተለክ በራሃ እሰቤቹ ዋርታ መጠረንቶሁኑኤሃ ፈረደኖሰበእንደ? ህትን ፈረዱዕናን ልግብ ወክት ዱንከኖንደ?

* 17:20 መገን ጃነቱ አሜተኖሁ መኑ አገረኛ ሃልጋበእ ዮኖሁ- መኑ ለአኖ ሃልጋበእ ዮን። † 17:21 መገን ጃነቱ ዮኢሁ ክዕኔ በላኒት- ዮኖሁ ክዕኔ እዛኒት ዮን። 17:26 ክል. 6፣5-8። 17:27 ክል. 7፣6-24። 17:29 ክል. 18፣20፤ 19፣25። 17:31 ማቶ. 24፣17-18፤ ማር. 13፣15-16። 17:32 ክል. 19፣26። 17:33 ማቶ. 10፣39፤ 16፣25፤ 18፣35፤ ሉቃ. 9፣24፤ ያሀ. 12፣25። ‡ 17:36 መት-መቶ መጻፋን ዋላንሽ 36 ዮኢሃ በርግታበእ፤- ሁኩንን ማቶ 24፣40 ዮኢሃ አኩደኖ።

8 እን ኩላንክዕኔ፤ ደዕል ፈረደኖሰ፤ ጠዉ እኩጎሬ መንቻ ቤቱ አሜተና ወክት ኣዲንያ አሌን አመዕነቱ ደገናንዶ?» ይሉ።

ፈርሳውችለክ ቀረጠ ሙረና መንቻ ሞሳልተ

9 ኢሰ «ነኡ ፈያኖታን» ይተን ገምንከሰ ድኸአህኑኡተለክ ሞሎ መነ ህንቃ መኒሃ ከ ሞሳልተ ኩሎሰ።
10 ሁኩንን ለም መናከት ዱኡ አቶተ ዱኡ ሞኒ መርቶኡ፤ ህከኑኡችን መቱሰ ፈርሳውቹሃ፤ ህትን ለንክሰሁ ቀረጠ ሙረኒሃን አቅ።

11 ፈርሳውቹሰ ሜጥሀሰ ኡር ቀልቤንከሰ መገና! ሞሎ መንገ ሁኩንን ወልቅሰ አኦታ መንገ፣ ሾከ መንገለክ ዝነተ አእና መንገ ባሰንከሰ ከን ቀረጠ ሙረና መንቻን አህበቤቹን ገለትጫንኪ።

12 እንን ሳምንታን ለሞረ ሶመናሚት፤ ህትን ደአምሀኒች ጉዕሚችን ቶኒች መቱ ዘከተ ፈሻሚት ይ ዱኡ አዕዮ።

13 ጠዉ እኩጎሬ «ቀረጠ ሙረናሁ ቁዕራሻን ኡርኬዕይ አልሰ አሌ ሞሽ ሰማ ለኦተ መለሎበኦ አቅ፤ እኩጎሬ ወዘነሰ ሞቀረን ለመገና! ኤሰ ጨበጽ መረርሲጨኤኤ!» የኖት አቅ።

14 እን ኩላንክዕኔ፤ ፈርሳውቹች አበ ቀረጠ ሙረናሁ ፈየ አክ ሞንሰ ፈንቀሎ፤ መሰንትሰ ገዉሰ ሎርሳናሁ ጉዕሙንኩ ሙግ የኖ፤ እኩጎሬ ገዉሰ ሙግ አእናሁ ሎረና» ይሰ።

ኢሰ ኦሱተ ማሰዕዮገ
(ማቶ. 19፡13-15፤ ማር. 10፡13-16)

15 መኑ ቀቀዋኑ ኦሱተ ኢሰ አንገሰ አሌሰ አኦተ አሰቤቹ ኤቦኤ፤ ኢሰ አሳበት ህካን ለኦ ወክት ህከ መነ ሻቆኤ።

16 ጠዉ እኩጎሬ ኢሰ ኦሱተ ገእ «መገን ምምነቱ ህትናማተ እኩቤቹሃ ኦሱት ኢቤቹ አሜቱን፤ ከንቶኖቹሰ።

17 ህንቅንክ ያንክዕኔ፤ መገን ምምነቱ ኦሰገ እክ ቶግባሁ አዪሁ መገን ጃነት ሆር ኣገናበኦ» ይሉ።

ኣዲንያ ቀባጡተለክ ሰሜ ምምነቱ
(ማቶ. 19፡16-30፤ ማር. 10፡17-31)

18 መቱ ገሻንቹ ኢሰ «ጡመ አሰተማርቾ! ዘላለሚሃ ጎፍበ ሄኡ ደኦተ መ አኡ?» ይ ጠዕሚኦ።

19 ኢሰን «ሚሃ ጡመ» ይት ገአታንቴኤት? መገን ቤሉ ጡሙ አዪሁ ዮበኦ።

20 ህትን ትዛዝ ጉዕመንክ ደጋንት፤ ትዛዘንኩሰ ለዘነተ አቶት፤ ሽቶት፤ ሞግቶት፤ ክዘብ መሰከርቶት፤ አነክለክ አመክ ከበጅ» የኖሃን» ይሰ።

21 መንቹንኩሰ «ካን ጉዕመንክ ኦሰማችኤ ኬሽ አገርም» ይሉ።

22 ኢሰን ህካን ሞጮጩ ወክት «መቱ ጠዉ ፈቆሄ፤ ሁኩንን ዮሄርቹ ጉዕመንክ ሀርት ቡጥቻኖተ ኣሰ፤ ሰማን ጭምይቶ ዲንያተ ደአታንት፤ ህት እክ አሜት አዎኔኤ» ይሰ።

23 ጠው እኩጎሬ መንቹሰ አበ ቀባጣሙ እኩቤቹሃ ህካን ሞጮጩ ወክት ህለብክ ሻኸ።

24 ኢሰን ሁኩ መንቹ ሂለ ብክ ሻኸገ ለዕይ «ቀባጣመት መገን ምምነቱ ኣት ሄንከ ኬዕመናሃን!

25 ህትን ቀባጣሙ መንቹ መገን ምምነቱ ኣገናሀኒች ጋሚሉ መርፌ ጠላዕላን ሕት ቆሀና» ይሉ።

26 ህካን ሞጮጭቶ መኑ «ህካን እኮች አይ ጡሞተ አታለኖ?» ይቶኤ።

27 ጠው እኩጎሬ ኢሰ «መኒሃ አታለምቡ መገኒሃ አታለመኖ» ይሉ።

28 ጴጥሮሰን «ሁኩዕኑ ነኡ ጉዕመርቹንክ አጉርን አዎኖንኪ» ይሰ።

29 ኢሰን «ህንቅንክ ያንክዕኔ፤ መገን ምምነትቴሃ ሞንሰ ህከረንገ ጫሰ ህከረንገ አመሰ ኦሱተ ህከረንገ አነሰ ህከረንገ አመሰለክ አለሰ አጉር

30 ከን ዘማኔን ልግብ ወክቲሃ አበ አፎ አእቡ ህትን አሜተና ዘማኔን ዘላለሚሃ ጎፍቡ ሄኡ ደኡዕነ ፈቀና መንቹ ዮበኦ» ይሰ።

ኢሰ ሬሆሰተኔሃ ሰቅ ወክት ጠዉኤሰ
(ማቶ. 20፡17-19፤ ማር. 10፡32-34)

31 ኢሰ ቶና ለሙንክ አሳበሰ መድሰ ሸቅ ሰዕይ «ሁኩዕኑን! ነኡ ዬሩሳሌም ከተመ መርናሚት፤ ህትን መንቻ ቤትቴሃ ነብያክት ከተቦ ጠዉ ጉዕመንኩ ዊመኖ።

32 አሱንክ አይሁዶ አህቡ መኒሃ ህግሱን ኣእናን ቀነጣሰ፣ ቦርርታሰለክ አሌሰ አንጀ ቱ ይታሰ።

33 ኦልቶሲች ኤተርን ሸታሰ፤ ጠዉ እኩጎሬ እሰን ሰቅ በር ሬሆች ከኤኖ» ይሰ።

34 ጠዉ እኩጎሬ አሳበሰ ህከን ጠውች መቱርቹሃ አጥራሙቶበኦ፤ ህትን ጠውኑ ጠዉንኩ ለሉ ሆሳሰቤቹሃ ጠዉአም ጠወሃ ደሳበኦ።

ኢሰ ቆቀ መንቹ ፈይሱሰ
(ማቶ. 20፡29-34፤ ማር. 10፡46-52)

- 35 ኢስ ኢያርኮ ከተመ ሆንጠኮ ወክት መቱ ቆቁ መንቹ ሰደቀተ ኡጨን ዎቄ ገበላን ኦፋዕልዮ እቅ።
- 36 ልግቡ መንጎኩ መዲንከሰ ህገን ሞጮጭ «ኩን መርቹሃን?» ይ ጠዕሜሰ።
- 37 መንጎኩ «ናዘሬት ኢስ ከን ኦዲን ህገናት» ይት ኩልቶሰ።
- 38 ሁኩ ቆቁንኩ «ዳዉዴ ቤቶ ኢስ! ሀዕይ ኦሙዚኤ» የን ያሮ።
- 39 ብሬን ሃንተን ሄኑ መኑ «ጨለይ!» ይት ሻቆሰ፤ ጠዉ እኮጎሬ ሁኩ ቆቁንኩ «ዳዉዴ ቤቶ! ሀዕይ ኦሙዚኤ» የን ላገሰ ጎት አዕይ ያሮ።
- 40 ኢስን ኡር አሰቤቹ ኤባገ አዘዮ፤ ሁኩ ቆቁንኩ አሰቤቹ ሆንጠኮ ወክት
- 41 ኢስ «መ አኦሃተ ሀሰን?» ይ ጠዕሜሰ፤ እስን «ቀርቾ! ለኢሃ ሀሳም!» ይለ።
- 42 ኢስን «ለእ! አመዕነቱክ ፈይሾሄ» ይለ።
- 43 ሁኩ ቆቁ ህከ ወክትንከ ለዕዮ፤ እስን መገኑ ገለትጨን ኢስ አዎቾ፤ ህትን ኡመቱ ጉዕሙንኩ ህካን ለኦ ወክት መገኑ ገለትጭቶኤ።

19

ኢሰላስ ዘክዮሴ

- 1 ኢስ ኢያርኮ ከተመ አግ ህከን ኦዲን ህገናት እቅ።
- 2 ሀከኔን «ዘክዮሴ» ይዮ መንቹ ሄዕዮ እቅ፤ እስን ቀረጠ ሙርታሁኑተ አዛዛለከ ቀባጣሙሃ መንቹ እቅ።
- 3 ሁኩ መንቹንኩ ኢስ አይት ጎር ለኦተ ሀሰኖ እቅ፤ ጠዉ እኮጎሬ እስ ገበንቹ እኮቤቹሃለከ መኑስ ልግብ እኮቤቹሃ ለኦተ አታሎበኤ።
- 4 ኢስ ህከን ዎቁን ህገናቤቹሃ ዘክዮሴ ብሬን ደጉደን ህግ ኢስ ለኦተ መቶ ኦድ ሀቃን ቆጶ።
- 5 ኢስን ህከ ቤቹ ኢሊ ወክት አሊ ዋል ለዕይ «ዘክዮሴ! ከበር ኪ ሞኔን ሆሱ ሀሰሰናቤቹሃ ደዕልት ድር» ይለ።
- 6 ህካን እኮቤቹሃ ዘክዮሴ ደዕል ድር ሙንዲኖን ቶጎሰ።
- 7 መንጎኩ ህካን ለዕዮ ወክት «ጨበኛ መንቹ ሞኒ ኦቶት ኦጎ» ይት ጉዕሙንኩሰ ቁንቁቶኤ።
- 8 ጠዉ እኮጎሬ ዘክዮሴ ኡር ኢስ «ቀርቾ! ዮኤ ዲንያች ጉዕሚችን ደደሰ ቡጥቻኖተ ኦሳም፤ ህትን አይሁ ጣንሰ ኦኤም ጎር ሾሎ አፎሰ እሰንከ ፈንቀሽ ኦሳም» ይለ።
- 9 ኢስን «ኩ መንቹ አብራሂም ቤቱ እኮቤቹሃ ከበር ጡሙ ከን ሞኒሃ እኮኤ።
- 10 መሰንትሰ መንቹ ቤቱ በዕዮሃ ሀሰተለከ ጡምሶተ አሜቸኤ» ይለ።

ቶኖ ካዲመ ሞሳልተ (ማቶ. 25፣14-30)

- 11 መኑ ህካን ሞጮጨንን ኢስ መት ሞሳልተ በርግ ኩሎሰ፤ መሰንትሰ ኢስ ይሩሳሌመ ኢሎተ ሆንጠኮቤቹሃትለከ መገን ሞምነቱ ደዕል ለለኖሃ አጉጆሰቤቹሃት እቅ።
- 12 ህካን እኮቤቹሃ ኢስ መቱ ጡመ ደቦች አለሞ ሎሩ መንቹ ዎመ እክ ፈንቀሎተ ቄዕራሽ ባዱ ኦርዕዮ።
- 13 ህካን እኮቤቹሃ ካዲማችሰ ቶኑስ ገእ መት-መትሀሰ ቶኑ ቶኑ ምናን * ኦሰ ፈንቀል አሜቶተ ኢሊ ከንን ገገጃ ይለ።
- 14 ባድሰ መኑ ግቦሰቤቹሃ ኩ መንቹ ኒ ኦሊን ዎመ እሆተ ህንሳምበኤ ይት እስ ኦርዕዮች ኤተሮን ሶቀማንቹ ሶኮኤ።
- 15 ሁኩ መንቹንኩ ዎመ እክ ፈንቀሎ ወክት ሞናን ኦሴስ ካዲመት ነገድ ሄንከ ተረፍሰ ጎር ደጎተ እሰቤቹ ገእቶተ አዘዮ።
- 16 ወዕኔሰ ካዲንቹ እሰቤቹ ሆንጠክ ቀርቾ! መቱ ምናን ቶኑ ምናን ተረፎኤ» ይለ።
- 17 ሀለቅቹንኩ «ጡመገ አቶንት! እት ጡሙ ካዲንቹ ቀዎ ጠዋን አመዕነንቶንትቤቹሃ ቶኖ ከተም ሹመ እህ» ይለ።
- 18 ህትን ለንክሰንኩ አሜች ቀርቾ! መቱ ምናን ኦኑቱ ምናን ተረፎኤ» ይለ።
- 19 ሀለቅቹንኩስ እሲሃ «አት ኦንቶ ከተሚሃ ሹመ እህ» ይለ።
- 20 ህትን «ዎሎሰ አሜች ቀርቾ! ሆጮን ጣጭ ማጮም መቱ ምናን ሁኩዕኑን።
- 21 መሰንትሰ እት አፋሽቱዕናን ኦኤታንቲሀለከ ዉጡዕነን ጭም አታንት ኦዲዲንቹ መንቹ እሁክ ደግ ዎጃምቤቹሃት» ይለ።
- 22 ሀለቅቹንኩ «ኩ ሂሎ ካዲንቹ! ገዉክ ጠዉኦንት ጠዋን ፈረዲንኩ፤ እን ኦፋሽባንከ ቶጋሚሃለከ ዉጥባንከ ጭምኦአም እድዲንቹ መንቹ እሁኤ ደጎንት!
- 23 ህካን እኮች ምናንኤ ሚሃት ባንካን ኦፋሽቶንትበኤሁ? እንን አሜች ትርፊንከሰን ኦኤም እቅ» ይለ።

19:10 ማቶ. 18፣11። 19:11 ማቶ. 25፣14-30። * 19:13 ምናን፡- ኪሎተ ብከኖሃን፤ ህትን ብረሃን፤ መቱ ምናን መቶ በሬ ሆንተ አእኖ መንቹሃ ሰሶ እገን ደሞዝየ ገሰ።

24 ሀከሊች ኤተሮን ሀለቅቸንኩ ሀከኔ ኡርቶ መነ ምናነስ ቶጌን ቶኑ ምናኑ ዮሰሀሂሃ ኣሰዬ» ይሰ።

25 እሰን ቀርቻ! እሲሃ ቶኑ ምናኑ ዮሰኑ ይቶሰ።

26 ሀለቅቸንኩ ሕን ኩላንክዕኔ፤ ዮሰሀሂሃ ጉዕሚንከ በርጌን ኣሴኖሰ፤ እኩጎሬ ዮሰበአሀሂች ሁኩ ዮሰንኩ ኣአመኖሰ።

27 ጠዉ እኩጎሬ እን ሞመ እሆተ እትትበ ሀከ ዲነኤ ኢቤቹ ኤቤን አልኤ ለእን ሸዬ» ይሰ። ይሰ።

28 ኢሰ ከ ምሳልተ ጠወዕዮች ኤተሮን ዬሩሳሌመ ኦርእን ብርተ ዋል ሃመኖት እቅ።

ኢሰ ሎረ ኬዕምኒን ዬሩሳሌመ ኣጉሰ

(ማቶ. 21፥1-11፤ ማር. 11፥1-11፤ ያህ. 12፥12-19)

29 እሰን «ዘይት ሀቁ ነጻኖ ቆተተ» ይኖቤቸን ሃዕዮ «ቤተ ፋጌላከ ቢታነ» ይኖቤቹ ሆንጠኮ ወክት አሳባች ለሙሰ

30 «ብሬክዕኔ ዮ ቀአተ መሬ፤ ሀከቤቸንከ ኢልቴንተ ወክት አዪሁ ሆሮን ቆጶበአ ሀሩች ዋተረ ኡሱረሞሃ ደጌንተ፤ ሀካን ሃርቴን ከቤቹ ኢቤ።

31 አዪሁ ሚሃት ሃርቴንታሁ?» ይ ጠዕሚህዕኔ ጎር ቀርቹ ሀሾቤቹሃት ይዬ» ይ ሶኮሰ።

32 አሳበንት መርቶ ወክት ጉዕሙርቸንኩ ኢሰ ኩሎሰንን እካን ደንኡ።

33 እሰ ዋተረ ሃርተን ዋተርሰ እናከት «ዋተረ ሚሃት ሃርቴንታሁ?» ይቶሰ።

34 እሰን «ቀርቹ ሀሾቤቹሃት» ይት ፈንቀሾቶኡ።

35 ሀከሊች ኤተሮን ምተራሰ ኢሰቤቹ ኤብ ኦድኑሰ ዋተር አሌን እት ኢሰ ቆጶሲሶኡ።

36 ኢሰን ቆጶሃመን ምት ኦድኑሰ ዋቃን ዌሳኢት እቅ።

37 ኢሰን ዘይት ሀቁ ነጻኖ ቆተ አዲን መሰኖ ዋቂን ዬሩሳሌመ ኢሎተ ሆንጠኮ ወክት አዋንን ሃዕዮ ልግቡ መኑ ሃጭት ለኦ እጀብሲሰኖ ጠወ ጉዕሙንከ ሙንደእን ላገተ ጎት እት መገኑ ገለትጩ ጀመርቶኡ።

38 እሰን «ቀርች ሱዕሚን አሚተኖ ዋሙ ማሰአሞእሃን፤ ወገሬቱ ሰማንለከ ኬዕምኙ መገሂሃ እሁን» ይታኢት እቅ።

39 እኩጎሬ ሀከን ኡመት በላን ሄኑ ፈርሳዌች መት-መቱሰ «እሰተማርኛ! ኬሳሃ አዋንታ መነ ጨለ ይታገ ሻቅ!» ይቶኡ።

40 ኢሰን «እን ኩላንክዕኔ፤ እሰ ጨለ ይቶጎሬ ኩ ክኑ ያረኖ» ይ ፈንቀሼኤ።

ኢሰ ዬሩሳሌም ከተሚሃ ኦኩሰ

41 ኢሰን ዬሩሳሌም ከተመ ሆንጠክ ለዕዮ ወክት ከተንኛተሰ ኦዕዮ።

42 «ወገሬት ኣሰኖ ጠወ ከበር ደጋንተሃ እኮ እቃ ጡመሃን፤ ጠዉ እኩጎሬ ቴሱ እሌችክ ደጽይዮኡ።

43 ዲኑክ ጉዕመ አዲን ድችረ ድችር ከን አዲንለከ ካጽ አዲን ረብ ፋሉ ከንታሂ ወክቱ አሚተኖ።

44 ህትን መገኑ ጡምሶሃተ አሚኛ ወክት አጥራመትበቤቹሃ ዲኑክ ኬሳላከ እለክ ድጅታኢ፤ ህትን ኣዜንከከ መቱ ክኑሁ መት ክን አሌን ፈቀኖበኡ» ይ ኦዕዮ።

ኢሰ ዲኢ ምናች ጌባ አታእረ ፋሾሰ

(ማቶ. 21፥12-17፤ ማር. 11፥15-19፤ ያህ. 2፥13-22)

45 ሀከሊች ኤተሮን ኢሰ ዲኢ ምኒ ኣግ ነገደኖ መነ አብል ሸረኤ።

46 ህትን እሰንተ « ምኑኤ ዲኢ እኤኖሃ ምኒ» የመም ከተበሞኡ፤ እኩጎሬ እዕኑ ሸፍጡ ማጠንታ ሻንቀ አቴንታኤ» ይሰ።

47 እሰን ጉዕመ በርንከ መገን ምኔን ተማርሰኖት እቅ፤ ቂሰ አወንሳኑት፤ ሕግ እሰተማረትለከ መነ አዋንሰታእሩ ኢሰ ሸቶተ ሀሳኢት እቅ።

48 ጠዉ እኩጎሬ መኑ ጉዕሙንኩ ኢሰ ጠወአኖ ጠወ ቀልቢን ሞጮጭታቤቹሃ እሰ መ አታጎር ደጎበኤ።

20

ኢሰ መ ሹምነቲን እአኖጎሬ ጠዕሚመገ

(ማቶ. 12፥23-27፤ ማር. 11፥27-33)

1 መቱ በር ኢሰ ዲኢ እኤኖ ምኔን መነ ተማርሰንለከ ተሸት ላገተ ዲዱብሰን ቂሰ አዋንሳኑት፤ ሕግ አሰተማረትለከ ባድ ባልቀት ሚጡብ አሚት

2 «ህንዳ ኩልኔ፤ ካን አታንቲሁ መ ዋልቃኒት? ሀከረንገ ካን አታንት ዋልቀተ ኣሴሄሁ አዬት?» ይት ጠዕምቶሰ።

3 ኢሰን «እን መቱ ጠወ ጠዕማንክዕኔ፤ ህንዳ ቴሱ ኩሌኤ፤

4 ያህይ ጠመቀኛ ያልቀተ ደኤኢሁ መገን አዲሲትንዶ መን አዲሲት?» ይለ።

5 ህክ ወክት ገገዉንኩስን « መገን አዲሲት» ይኖሞ ጎር ሚሃት ያህዪን እመዕንቴንገብእን። የኖኒ፤

6 ጠዉ እኮጎሬ መን አዲሲት» ይኖሞ ጎር መኑ ጉዕመንኩ ያህይ ነብዌቼ እሁስ እመዕነናቤቼሃ ክኒን ቀሳኔ» ይት ጠወኑኤ።

7 ህካን እኮቤቼሃ «ሀከን አዲሲት ጎር ደንጎሞበእ» ይት ፈንቀሸቶኤ።

8 ኢስን እስንተ «እን ካን አይ ወልቃን አኣም ጎር ኩላንክዕኔበእ» ይለ።

ወይን ላሉተ ካሶ እቡራኖ ሞሳልተ

(ማቶ. 21፥33-46፤ ማር. 12፥1-12)

9 ህከኒች ኤተሮን ኢስ መኒሃ «መቱ መንቹ ወይን ላሉተ ካሾ፤ ወይነስ ቀባንቼሃ እስ ዎሉ ባዱ ኦርዕይ ልግብ ወክት ዲንኬእ።

10 እስን ወይኑስ ላለኖ ወክቱ አሌ ውክት ወይን ላልቺቻ እሲሃ ኢለኖ ወጥ ኣቶተ መቱ ካዲንቹ ቀባናቤቼ ሶኮ፤ ጠዉ እኮጎሬ ቀባኑስ ሶህሞ ካዲንቹ ኦልት መቱርቼሃ ኣቱዕነ ሸርቶኤ።

11 ለንክ ወክት ዎሉ ካዲንቹ ሶኮ፤ ህትን እስን ህከ ካዲንቹ ኦልትለከ ሙልስ መቱርቼሃ ኣቱዕነ ሸርቶኤ።

12 ህትን ሰቂሃ ሶኮ ወክት እሱንከ ኦልት ጡላይስ አብል ዋሸት ኤጅቶስ።

13 ህከኒች ኤተሮን ወይንስ እኑ «መ አኤ? ኢታም ቤቱኤ ሶሃም፤ አይደን እሱ ከበጅታኢሃ እሀኖ» ይለ።

14 ጠዉ እኮጎሬ ቀባኑንት እሱ ለኑ ወክት መት-መቱንከስ ረገአኖሁ ከኒት፤ ኖስርቼ ኒሀ እሆተ እሱ ሸኖ የቀንቶኤ።

15 እስን እሱ ወይን ኣዚች አብል ፋሽት ሸቶኤ፤ ቴሱ ወይንስ እኑ ህከ ቀባኑተ መ አኤኖ?

16 ወይንስ እኑ አሜቻ ህከ ቀባኑተ ሸ ኬዕይ ወይንስ ዎሉ መኒሃ እስኖ» ይታ ሞሳልተ ኩሎስ። እስን ህካን ሞጮጭቶ ወክት «ህትኔርቼ መገኑ ኤቡንከኔ» ይቶኤ።

17 ጠዉ እኮጎሬ ኢስ እስንተ ለዕይ «ህካን እኮች ግንበኛኑት ህንቆ ክኑ እስ ሙረበ ቡዕል ክኑ እሀኖ» የምም ከተበሞሁ መ ለሊሰኖ?

18 ህከን ክኖን ኡቦ አዪሁ ቁሸቁሸ የኖ፤ ጠዉ እኮጎሬ ሁኩ ክኑ አይ አሌኒ ኡቦጎሬ ፍጭርቀሰ» ይለ።

ግብር ባቲሃ ኢስ ጠዕሜመገ

(ማቶ. 22፥15-22፤ ማር. 12፥13-17)

19 ሕግ አስተማርትለከ ቂስ አምጎሳኑት ኢስ ህከን ሞሳሌን እሳሃ ጠወኤስ ደግህ ህከ ወክትንከ አሮስተ ሀሶኤ፤ ጠዉ እኮጎሬ መን ዋጅቶኤ።

20 ህትን ገሽ ወልቀትለከ ሹምነቱ ኖስ ገሻንቼሃ ህግስ ኣቶተ መከኖ ወክት ሀሳኢት እቅ፤ ህካን እኮቤቼሃ ፈየ መነ አጉደን ጠውንከስ ትርቲባ መነ ሶኮኤ።

21 እስን ኢስ «አስተማርቻ! ህንቅ ጠወኣንትገለከ ህንቅ ተማርስታንትገ መን እልተ ለእ ጎልቱዕነ ህንቅ መገን ዎቃሃ ተማርስታንትገ ደንጋም።

22 ሮም ዎሚሃ ግብር ባቱ ፈቀደሞእሃንዶ ፈቀደሞበእሃን?» ይት ጠዕምቶኤ።

23 ጠው እኮጎሬ ኢስ ተንኩስ ለዕይ

24 «መቱ ዲናረ ለሊሸኤ፤ ከን ዲናር አሌን ኖ ፎቱትለከ ሱዕሙ አይሃን?» ይሰ፤ እስን ቂሳርያ ይቶኤ።

25 እስን «ህካን እኮች ዎሚሃ ዎሚንከ ህትን መገኒሃ መገኒንከ እስዬ» ይሰ።

26 ህካን እኮቤቼሃ እስን እስ ጠወዕኖ ጠዋን መን ብሬን ትርቲቦስተ አታልቶበእ፤ እኮጎሬ እስ ፈንቀሸ ጠዋን አጀብሲጭት ጨለ ይቶኤ።

ሬሆች ኬአተኔሃ

(ማቶ. 22፥23-33፤ ማር. 12፥18-27)

27 ህከኒች ኤተሮን «ሬኖ መኑ ሬሆች ኬአኖበእ» ይት ተማርስተ «ስዲቃውተ» ይኖ መኒች መት-መቱ ኢስቤቼ አሜት

28 «አስተማርቻ! መሱ መቱ መንቹ ጫተ ኤብ አለተ አሉዕነ ሬኖጎር መንቻስ አመቤቱ ሬያን ጫስ ረገዕይ አመስ ቤቲሀ አለተ አሉኑ» ይ ሴራን ከተቦኔ።

29 መቱ ወክት ለመሉ አመኡሱት ሄኦ እቅ፤ አሳቻን ሀንገፋስ ጫተ ኤብ አለተ አሉዕነ ሬኖ።

30 ህትን አሌስ አለሞ አመስቤቱ ጫስ ረገዕዮ፤

31 አሌስ አለሞ ሰቅ ማዕኑንኩ ረገዕዮ፤ ከን ሃሌን ለመሉንኩ አመኡሱት ረገአ አለተ አልቱዕነ ሬቶኤ።

32 ጉዕሚቻስ ኤተሮን ህት ጫቲ ሬቶኤ።

33 ህካን እኮቤቼሃ ለመሉንኩ እኣቶሴቤቼሃ ሬቶሩ ሬሆች ኬአ ወክት ህት ጫት ሀከኒሀስ እካአ?» ይት ጠዕምቶስ።

34 ኢሰን እሳንከ «ከን አዲንያ እሌን ሄአኖ መኑ ኤባኢሁ። መእሲ ሳኢሁ።

35 ጠዉ እኩጎሬ ሬሆች ኬእሀለከ አሜተኖ ዘማኒን ሄኦተ ሀሰሰኖሰ። ኤበቅታበኢሁ። መእሲ ሳበኢሁ።

36 እሰን ሰሜ መላይከገ እካቤቼሃ ለንኪሃ ሬታበኢ፤ ህትን እሰን ሬሆች ኬኤቤቼሃ መገንገተ ኦሱ።

37 ህትን መሰ ቡባ ሸፎተኔሃ ከተሆኔን ቀርቼ ለብራሂሃሞ መገኑ። ኢሳቅሃ መገኑ ለከ ያቁብሃ መገኑ።

ይ ገእ ሬቶሩ ኬኢገ ለሊሾኤ።

38 ህካን እኩች መገኑ ፎልን ሄዕኖ መኒሃ መገኑ ቤሉ ሬኖ መኒሃ መገኑ በኢ፤ መሰንትሰ እሲን

ጉዕሙንኩ ፎሊን ሄኦቤቼሃት» ይ ፈንቀሺኦ።

39 ህትን ሕግ አሰተማራች መት-መቱ ፈንቀሽት «አሰተማርቸ! ጡመገ ጠወኦንት» ይቶኦ።

40 ህከኒች ኤተሮን እሰን ኢሰ መቱርቼሃ ጠዕሞቶተ መለልተበኦ።

እሰ ገይሰተኔሃ ጠዕሜመገ

(ማቶ. 22፡41-46፤ ማር. 12፡35-37)

41 ጠዉ እኩጎሬ ኢሰ «አሰንተ መሲሁ ደዉዳሃ ቤቱ ዪ አታልቶኢሁ ሀትዪት?

42-43 መሰንትሰ ዳዉድ ገዉንኩሰ መዝሙር መጻፋን

« ቀርቼ ቀርቼሃኤ

እን ዲኒክ ሎከክ ኣዘን ኣኣተ ኢላ

መኬኤ አዲን አፋዕል» ይሰ ዮኖ።

44 ዳዉድ ቀርቾ ይ ገኤሲች መሲሁ ሀት እክ ቤቱሰ እሆኖ?» ይሰ።

እሰ ሕግ አሰተማራች አገርታገ ጠወኦሰ

(ማቶ. 23፡1-36፤ ማር. 12፡38-40)

45 ህትን መኑ ጉዕሙንኩ ሞጮጬን ኢሰ እሳበሰ

46 «ቅራዕሩ ኦድኑተ ኦደእ ሃሙ። በነቻን ኬዕሞኚን ጠዉሲሰኖሰተ። ጭምት ምናን ኬዕሚኣ ቦርጭማን አፋዕሉለከ ድግሰ ድግሴመ ቤቸን ኬዕሚኣ ቤቹ ኢትታ ሕግ አሰተማራች አገርዕዬ።

47 እሰን አመሰልት መኑ ለኦሰተ ቅራርሰት ዲኦ አተን ምንሰ እኑ ሬኖ ሜንቱ ጣገሰተን አታኦ፤ ህካን አኮቤቼሃ እሳሃ አበ ፍርድ እሆኖሰ» ይኦ።

21

ምንሴ እኑ ሬኖ መንቹት ኣቶ ኣሰቱተ

(ማር. 12፡41-44)

1 ኢሰ ሰደቀተ ቶጌኖ ሳጥናን ቀባጣመት ብረ ዋርተን እልሰ አሌ ዋሽ ለአኖት እቅ።

2 ህትን ምንሴ እኑ ሬኖ ቡጥቹት መንቹት ለም ቀቅቻኑተ ሳንትበተ ወርተን ለዕኖ።

3 እሰን «ሀንቅንከ ያንክዕኔ፤ ት ምንሴ እኑ ሬኖ ቡጥቹት መንቹት ጉዕሚችሰን አበ ኣቶኦ።

4 መሰንትሰ እሰ ጉዕሙንኩሰ ኣቶኢሁ ዮሰ ዲንያች በተዕኖሳሃት፤ ጠዉ እኩጎሬ እሴ ቡጥማንከሴ ሄኦተ ደግለለኖሴሃ ዮሴሃ ጉዕመንከ ኣቶኦ» ይኦ።

ዲኦ ሞኑ ድጀመናገ ኢሰ ራጎገ

(ማቶ. 24፡1-2፤ ማር. 13፡1-2)

5 መት-መቱ መኑ መገን ምኑ ተሸ ዮኖ ክኒንለከ መገኒሃ ኣሴመ ኣሰቶን መክሴናን ተሸ ዮኖሃ ኢሁሰ ጠወኣኢት እቅ።

6 ኢሰን «ኩ ለኤንገተ ክኑ መቶ ክን ኢሌን እክ ፈቁዕን ድረሸመኖ በሩ አሜተኖ» ይኦ።

7 ህከኒች ኤተሮን እሰን «አሰተማርቸ! ኩ ጠዉ እሆኖሁ መ በርሃት? ህትን ኩ ጠዉ እሆተ ሆንጠሁሰ ደንጋም መላሰ መርቹሃን?» ይት ጠዕሞቶሰ።

ቀርቼ አሜቱዕናን ሄጭ እካ ኦርሸተ

(ማቶ. 24፡3-14፤ ማር. 13፡3-13)

8 ኢሰን «አዪሁ ሉሰሰኖህዕኔበኢገ አገርዕዬ፤ መሰንትሰ ልግቡ መኑ ሕን መሲሁት ይተንለከ ወክቱ ኢልኖኦ» ይተን ሱዕሚንከኤ አሜታኦ፤ እኩጎሬ እሰንተ አዋንቶኖቼ።

9 ህትን ኦለለከ ተንበከሰ ሞጮጭቴገተ ወክት ህልቆኖቼ፤ መሰንትሰ ሁኩን ሃጭ እሁ ሀሰሰኖሰ፤ ጠዉ እኩጎሬ መጨረሻ ደዕል እሆኖበኦ» ይኦ።

10 ህከኒች ኤተሮን ኢሰ እሳሃ «ኡመቱ ኡመት ኣሌን ዋሙ ዋሞ ኣሌን ከኢኖ።

11 ህትን አቡ ኡለ ሌንቁቁ። ቤቸን ቤቸን ጎሩለከ ዌረሩ እሆኖ፤ ህትን ዋጅሲሰኖርቹለከ አቡ መላት ሰማን ለልታኦ።

12 ጠዉ እኩጎሬ ህከን ጠዋች ጉዕሚችን ሄጭ ክዕኔተ መኑ አፈኖለከ ሸረኖ፤ ህትን ጭምት ምኒላከ ኡሱር ምኒ ህግሰ ኣሰታህዕኔ፤ ህትን ሱዕሞኤተኔሃ ዳኛኖለከ ገሻኖ ብርተ ኤባህዕኔ።

- 13 ህዝ ወክትንከ እዕኑ እሳሃ መሰከርቶኖተ መከኖ ወክት እሀኖሀዕኔ።
- 14 ሄጭቲንገ ሙ ይን ፈንቀሽኖም ይቲን ጠቁሀሀ ቀልቤክዕኔ ሸዘኖቹ።
- 15 መሰንትሰ እን ዲንቕክዕኔ እዪሁ አታሎተ ህከረንገ ሀምበዕለሞተ አታልበ ላገተለከ ሀይመተ አሳንክዕኔ።
- 16 ሆሮን እናከክዕኔ፣ እመክዕኔ ኦሱት፣ እሉክዕኔለከ ጃለክዕኔ ፈቀዕነ ሀግሰ እሰታሀዕኔ፤ ህትን እሰን ክዕኔቶ መቱ-መቱክዕኔ ሸታአ።
- 17 ህትን ሱዕምኤተሄ ጉዕማንከ መንቤቶን ግበንቴንታእረ እኬነንተ።
- 18 ጠው እኩገሬ ቡዕልክዕኔ ሙሚቶ ሚጥት በኣበአ።
- 19 ህካን አታዕለን ፎልክዕኔ ጡምሴነንተ» ዩአ።

እሰ ዩሩሳሌም ከተሙ በእኖገ ሄጭ ጠወኤሰ
(ማቶ. 24፣15-21፤ ማር. 13፣14-19)

- 20 እሰ «ዩሩሳሌመ ወታደሩ ረብ አፋን ለኢንተ ወክት በእሃ ሆንጠሁሰ ደገ።
- 21 ህዝ ወክት ይሁድ ባደን ሄዕዮ መኑ ቆተተ ዋል ዙህን፤ ህትን ዩሩሳሌም ከተሞ ኣዜን ሄኦአሩ ህከን አዲቶ ፋልቲን፤ ህትን ከተሚቶ አብል ባደን ሄኦአሩ ከተሞ ኣዝ ኣንነከ።
- 22 መሰንትሰ ከተበሞርቶ ጉዕሙንኩ ዋሞተ ኩን ገዴተ ፋልሃ ወክት።
- 23 ህዝ ወክት ላፈ ሚንተሀለከ ቀንሰታ ሚንተሃ ቆሀኖሀዕኔ፤ መሰንትሰ እቡ ኦርሸት ኣዲንያ አለን እካእ፤ ህትን መገን ኡሙዕርት ከን ኡመት አለን እሚታአ።
- 24 አሳቕን መት-መቱሰ ሲፊን ጎረጠንታእ፤ ህትን ዋሉሰ አገንት ኡመት ቤቹ ጉዕሙንከ መርታአ፤ ህትን አይሁዳ እሀበ መኑ ወክቱሰ ኢሎተ ኢላ ዩሩሳሌማን ተንበከሳእ» ዩአ።

እሰ ለንኪሃ ፈንቀል አሚቱሰ
(ማቶ. 24፣29-31፤ ማር. 13፣24-27)

- 25 እሰ «እርን፣ አገንቸንለከ ቤዜን መላት ለልታእ፤ ህትን ኣዲንያ አለን ሄዕዮ መኑ ባርለከ ዊ ሁል ዋጅሲሰኖ ላገቶ ኬዕዮህን፤ ዋጅት ጨነቀንታአ።
- 26 ስማንዮርቹ ለንቁቀኖ ቤቹሃ መኑ ዋጅት ኣዲንያ አል እሚተኖርቹ አገርርተን ቀልብሰ ሉሳእ።
- 27 ህዝ ወክት እሰን መንቶ ቤቱ ወልቃንለከ ሎረ ኪዕሚኚን ጎመ ኣዜን እሚተን ለኣእ።
- 28 ኩ ጠው ጉዕሙንኩ እሆተ ጀመር ወክት ጡሙኔ ሆንጠቡቤቹሃ አለ ዋሽቲን ለዕዬ» ዩአ።

ቀርቹ እሚተኖገ ለሊሰ ኦድ ሀቁቾ ሞሳልተ
(ማቶ. 24፣32-35፤ ማር. 13፣28-31)

- 29 ህከኒቶ ኤተርን እሰ መት ሞሳልተ አሳንከ «ኦድ ሀቁቹተለከ ዋሉ ጉዕሙንከ ሀቀ ቀልቢን ለዕዬ።
- 30 ሁኩ ሀቁንኩ ለቸገ ለኢነንተ ወክት ሀን ሆንጠሁሰ ገውንኩክዕኔ ደገነንተ።
- 31 ህትን ኩ ጉዕሙንኩ ጠወ እሀን ለኢንተ ወክት መገን ዋሞነቲ ሆንጠሁሰ ደገ።
- 32 «ሀንቅንከ ያንክዕኔ፤ ኩ ጉዕሙንኩ ጠው እሆተ ኢላ ከን ዘማን መኑ ህገኖበአ።
- 33 ሰሞለከ ኡለት ህገእ፤ ጠው እኩገሬ ላገኤ ሆሮን ህገበአ።»

ጠረኚን አገዕሩ

- 34 ወክተሀሰ «ደግለልበርቹ እቲን፣ ሰከሪንለከ ከን ኣዲንያ አል ጠው ሻዞን ቀልቡክዕኔ ሆግበገ ሁኩ በሩ ድንገቲን ወሻድገ አሉክዕኔ አሚቶ አፍበሀዕኔገ ገወክዕኔ አገርዕዬ።
- 35 መሰንትሰ ሁኩ በሩ ኣዲንያ አለን ጉዕሙንከ ሄኦኖ መንቤቹ አሚተኖ።
- 36 ህካን እኩቤቹሃ ከን እሚተኖ ጠቁቶ ጉዕሚቶን ጡምቴነንተ ዋልቀተ ደኣቶተለከ መንቶ ቤት ብረን ኡሩ አታልቶኖተ ዱኢ እቲነን ጉዕመ ወክትንከ ጠረኝዬ» ይ ኩሎ።
- 37 እሰን መገን ሞኔን ጉዕመ በርንከ ተማርሰን ኡለት ሀዋርታ ወክት ዘይት ሀቁ ነጻኖ ቆተተ ፋለን ገለኖ እቅ።
- 38 ህትን መኑ ጉዕሙንኩ መገን ሞኔን እሲቶ ሞጮጮተ ገሰመ ሱጵተ እሰቤቹ እሚተኖ እቅ።

22

እሰ ሸኖተ አማዕለሚመገ
(ማቶ. 26፣1-5፤ ማር. 14፣1-2፤ ያህ. 11፣45-53)

- 1 ራጭቱ ዮበኢሃ ጨሊሰሞ ጦርሹ እቲነን ከበጃኖ ከበጃቱ ሆንጠኩ እቅ።
- 2 ህዝ ወክት ቁሰ አዎንሳኑትለከ ሕግ እሰተማረት መነ ዋጅቶቤቹሃ እሰ ሀት ኣት ሸታጎር ዎቃ ሀሳኢት እቅ።

ይሁድ ኢሰ ህግሽ አሶተ አማዕለሙሰ
(ማቶ. 26፥14-16፤ ማር. 14፥10-11)

- 3 ህኪኞች ኤተሮን ቶና ለሞንከ አሳባች መቶንከሰ «አስቆሮንቶ» ዬኖ ይሁዳን ሺይጣኑ አጎ።
- 4 እስን ኦርዕይ ቁስ አዎንሳናገለከ ዱእ ምኒ አገርታ ወታደር አዛዣን ኢሰ አሳንከ ህግሽ አሳና ዎቃሃ አማዕለሞ።
- 5 እስን ሙንደእ ብረ አቶተ ወለ ኡርሶኡ።
- 6 ህካን እኮቤቺሃ እስን ዉላጎከሰ አማዕለሞ መኑ ዮበእቤቾን ኢሰ አሳሃ ህግሽ አሶተ መከና ወክት ሀሰናት እቅ።

ኢሰ ሻሽግ ሁርባት አሳባንተሰን እቱስ
(ማቶ. 26፥17-25፤ ማር. 14፥12-21፤ ያህ. 13፥21-30)

- 7 ህኪኞች ኤተሮን ሻሽግ ሆልቼ ዱሌን ራጭቱ ዮበእሃ ጨሊሰሞ ጦሮሹ እቱነን ከበጃና ከበጀ በሩ ሆንጠኮ።
- 8 ህካን እኮቤቺሃ ኢሰ ጴጥሮሴለከ ያህይ «መርቴን ሻሽግ ሁርባት እንቶተ ተቃጠቤ» ይ ሶኮ።
- 9 እስን «ህካን ህከንቤቾን ተቃጠንቦሂተ ሀሰን?» ይቶሰ።
- 10 እስን «ከተመ ኣገነተ ወክት ዋ ሞዳኑተ እጅ መንቺን ደቀንቴንተ፤ እስን ኣገና ምኒ አዎንቴን መርቴን
- 11 ሞንሰ እኒንከ ሐሰተማርቼ አሳባንን ሻሽግ ሁርባት እታም ኮሁ ገለናቤቼ ህከንቤቾንት? ዮናሄት። ይቴን ኩሌሰ።
- 12 እስን ሀሰሰናርቼ ጉዕሙንኩ ተቃጠቦ ፉቅ ምኔን አልባዕሉ ቤቼ ለሊሰናህዕኔ፤ ህከን ቤቾን ቅጥአዕዬ» ይሰ።
- 13 እስን መርት ጉዕሙርቾንኩ ኢሰ ጠወዕዮሰገን እካን ህከን ቤቾን ሻሽግ ሁርባት ቅጥአቶኡ።

ጠሊላ ቁርባን ሴረ
(ማቶ. 26፥26-30፤ ማር. 14፥22-26፤ 1 ቆሮ. 11፥23-25)

- 14 ሁርባት ወክቱ አሌሃን ኢሰ አሳባንን ሜጡበ ማዳን አፋዕሊኡ።
- 15 እስን አሳሃ «ኦርጨቀማምሀኒች ሄጭ ከ ሻሽግ ሁርባት ክዕኔእን ሜጡበ እቶተ አበ ሄዕላቾም አቅ።
- 16 መሰንትሰ መገን ዎምነቴን ሻሽግ ሁርባት ለልዮበእ ምሰጥሩ ለሎተ ኢላ እን ከ ሻሽግ ሁርባት ሆሮን እታምበእን ኩላንክዕኔ» ይሰ።
- 17 ህትን ኢሰ ኩባያ ኬሽ መገኑ ገለትጭ «ከን ጠበቴን ዮኢሀ አእቲን ቤቀሜ።
- 18 እን ከን ወክቲች ኬሽ መገን ዎምነቱ አሜቶተ ኢላ ወይን ላልቺች ጨንሺማሃ ሆሮን አጋምበእን ኩላንክዕኔ» ይሰ።
- 19 ህኪኞች ኤተሮን ኢሰ ዳቡተ ኬሽ መገኑ ገለትጨኦ፤ ህካንን ቢጭ አሳንከ ኣሰ «ኩን ክዕኔሃ አሰሞሃ ማላእ፤ ካን ኤሳሃ ቃጎናተ አዕዬ» ይእ።
- 20 ህትን ሁርባቲች ኤተሮን ጠበቴሃ ኬሽ አሌ ዋሽ «ኩ ጠበቴህ ክዕኔእሃ ዱንተአና ቁገንከኤ እሆና ሃዕሮሃ ወአድ።
- 21 «ጠዉ እኮጎሬ ከለዕዬ፤ ኤሳሃ ህግሽ አሰናኤሀን እንገሰ ኢን ሜጡበ ማዳን ዮኡ።
- 22 መንቺ ቤቱ እስተኔሃ ሄጭ ቀደሮሰገን ሬሆና፤ እኮጎሬ ህግሽ አሰና መንቺሃ ቆሆናሰ!» ይእ።
- 23 ህካን ገጠግኩሰን «ካን እአናሁ ኒ በላን አዬት?» ይተን መት-መቱስ ጠዕሙ ጀመርቶኡ።

ጉዕሚችን በተአናሁ አዬት?

- 24 ህትን አሳበሰ «ኒ በላን ጉዕሚችኔን ሎሩ አዬት?» ይተን ኦደተ ጀመርቶኡ።
- 25 ህካን እኮቤቺሃ ኢሰ እሰተ «ኡመት ዎመት መነሰ ገዘኣእ፤ ህከ ገዘኣ ዎመንተ ብጡመ ጠወ አቶኡ» ይን ገኤኖሰ።
- 26 እኮጎሬ አዕኑ ህት እኮናቼ፤ ህከን ወጥ ክዕኔ በላን ሎረ እኮሁ ቀዉ እሁን፤ ህትን አዎንሳንቼ እኮሁ ካዲንቼ እሁን።
- 27 ማዳን አፋዕል እተናህኒቸለከ ኡር ካደመናህኒች በተአናሁ አዬት? በተአናሲሁ ማዳን አፋዕሊሃበእንደ? ጠዉ እኮጎሬ እን በላንከከኔ ካዲንቸጋት።
- 28 ህትን አዕኑ ኢን ሜጡበ ኦርሸኤ ወክት ጉዕመንከ ሄእኑታአራን።
- 29 ህካን እኮቤቺሃ እኑኤ ኤሳሃ ዳኛ አዕዮኤገን እኒሁ ክዕኔተ ዳኛኑተ አዕይ ሾማንክዕኔ።
- 30 ጅንቴንከኤ ኢ ማዲች አቶተለከ አጎናተ ህትን ቶና ለሞንከ እስራኤል ደቦን ፈረዶናተ ዎመ ቦርጭማን አፋዕልቴንተ ዳኝነቱ አሳንክዕኔ» ይሰ።

ጴጥሮስ ለገእኖስገ ኢስ ሄጭ ጠወኤስ

(ማቶ. 26፥31-35፤ ማር. 14፥27-31፤ ያህ. 13፥36-38)

31 ኢስን «ሰሞኔ! ሰሞኔ! ገበሬቹ አለሱ ጋቢች አደ አዕይ ጠለሸኖህንን ሺይጣኑ ክዕኔተ ጠለሸህንንን ጠረኝሽ ሆኑ።

32 እኩጎሬ እን አመዕነቱክ በእበገ ኬሳሃ ዱኤ አአም፤ ህካን እኩቤቺሃ አት ቶበት ፈንቀልቶንት ወክት አመክ ኦሱተ ጠረኝሰ» ይእ።

33 እሰን ኢስ «ቀርቾ! ከን ሜጡብ ኡሱረሞተለክ ሪሆተ ተቃጠሎም» ይእ።

34 ኢስን «ጴጥሮስ! እን ያንኬ፤ ከበር ህንጠሎ ምድተ ኢሊ «ደጋንሰበኤ» ይት ሰሰረ ለገእንቴኤ» ይእ።

35 ህከኒች ኤተሮን ኢስ አሳበሰ «ከረጢትት፥ ሆቆማዱለክ ጫዕመት ሄኤዕነ ሶኮንክዕኔ ወክት ሆፈዮዕኔ፥ ሄዕዮአቅንድ?» ይሰ።

እሰን «መቱርቹህ ሆፈዕዮኔበኤ» ይቶኡ።

36 እሰን «ቴሱ ከረጢትትለክ ሆቆማዱ ዮሲሁ አፋን፤ ህትን ብሱ ዮሰበኢሁ ኦድኑስ ህር መቱ ብሰ ህዕረን።

37 ህካን እኩቤቺሃ ሂሊ መነን ወለአሞ የመም ከተበሞህ ኢ አሉን ዊሙ ሀሰሰኖ አሁስ ኩላንክዕኔ፤ መሰንትሰ አተኔ ከተበሞ ጠዉ ጉዕሙንኩ ዊመኖቤቺሃት» ይእ።

38 ህትን አሳበሰ «ቀርቾ! ከለኤ፤ ለሙ ብሱ ከበ ዮኤ» ይቶኤ፤

እሰን «ለሆኖ» ይእ።

ኢስ ዘይት ሀቁ ነጻኖ ቆታን ዱኤ አኤስ

(ማቶ. 26፥36-46፤ ማር. 14፥32-42)

39 ኢስ ከተሚች ፋል ወዕና ሮሻገን ዘይት ሀቁ ነጻኖ ቆተተ ኦርዕዮ፤ ህትን አሳበሰ እሱ አምንቶኤ።

40 እሰን ቤቹሰ ኢሌ ወክት አሳንከ «ፊተናን ኣገነበገ ዱኤ አዕዬ» ይሰ።

41 ህከኒች ኤተሮን ክኑ ቶሬን አልሴኖ ቤች ጌሰ አሳች ቄዕር ጉሉሉ።

42 «ኢ እነ! አት ሀሰንት ጎሬ ከ ኦርሸ ጠበቴሃ ኢች ቄርሰ፤ ጠዉ እኩጎሬ እን ሀሳምገ እሁዕነ አት ሀሳንትገ ለሀን» ይ ዱኤ አዕዮ።

43 ኢስን ኣዜሰ አበ ሻቸ፣ ጠረኝ ዱኤ አዕዮ፤

44 ህንኩ ቁግገ ኡላን ዛዘኖት እቅ፤ ህከ ወክት መገን መላይኩቹ ሰሜች አሜች አሉ፤ ጠረኝሰን ህከን ቤቾን እሰሃ ለሌሰ።

45 ህትን ዱኤ አአኖቤቺች ኬዕይ አሳበሰበ አሜቾ ወክት አበ ሻዘቤቺሃ ግሳን ደጎሰ።

46 እሰን እሰንተ «ሚሃት ግሴነንታሁ? ፊተናን ኣገነንተበእገ ኬኤን ዱኤ አዕዬ» ይሰ።

ኢስ አፈሙስ

(ማቶ. 26፥47-56፤ ማር. 14፥43-50፤ ያህ. 18፥3-11)

47 ኢስ ጠወኡን ሄዕዮገን ቶና ለምንከ አሳባች መቱሰ «ይሁደ» ይኖሁ አምንሴሃን ልግቡ መኑ ህከ ቤቹ አሜቶኤ፤ ይሁድን ሱንቆተ ኢስቤቺቻ ሆንጠኩ።

48 ጠዉ እኩጎሬ ኢስ «ይሁደ! መንች ቤቱ ሱንቅት ህግሰ አተንንድ?» ይሰ።

49 እሰ አሳበት አሆኖ ጠዉ ለኦ ወክት «ቀርቾ! ብሰን ዋቀርኑስንድ?» ይቶኤ።

50 ህትን አሳችን መቱሰ ቁሰ አምንሳንች ካዲንቹ ዋቀር መኬ አድ መጨተ ሙር።

51 ጠዉ እኩጎሬ ኢስ «ካን አቶት!» ይ መንችሰ መጨተ አኖ ፈይሾሰ።

52 ህከኒች ኤተሮን ኢስ ህከ አሮስተ አሜቶ ቁሰ አምንሳኑተ፥ ዱኤ ምኒ አገርታ ገሻኑተለክ ባድ ባልቀተ «ቆሞ ሸፍጠ አፊኖህንገ ብሰለክ በርተ አፊን አሜቴንንድ?

53 እን መገን ምኔን ጉዕሙ በርንከ ክዕኔን ሜጡብ ሄዕዮም ወክት አፊንታኤበኤ እቅ፤ ጠዉ እኩጎሬ ኩ ወክቱ ክዕኔሃለክ ቱንሰች ሹምነቱ ዮሰሀንሃን» ይሰ።

ጴጥሮስ ኢስ ለገኡስ

(ማቶ. 26፥57-58፤ 69-75፤ ማር. 14፥53-54፤ 66-72፤ ያህ. 18፥12-18፤ 25-27)

54 ህከኒች ኤተሮን ሁኩ መኑ ኢስ አፍ ቁሰ አምንሳኖ ምኒ አምንሰት ኤሶኤ፤ ጴጥሮስን ቄዕራሻን ሃመን አምነኖት እቅ።

55 ህትን እሰን ግቤ በላን ገረተ ቡሰተን ሜጡብ አፋዕልቶ ወክት ጴጥሮስ አሜች በለሰ አፋዕሌኤ።

56 እሰን ለለኖ አዲን አፋልዮህን መት ገረድቹት ቱክ ይት ለእ «ኩ መንቹ ኢሲን ሜጡብ ሄዕዮ እቅ» ይቶኤ።

57 ጠዉ እኩጎሬ ጴጥሮስ «ቴ መንቾ! እን እሱ ደጋምበኤ» ይ ለገዕዮ።

58 ህትን ቀዉ ጌሰ አገር ዋሉ መንቹ እሱ ለዕይ «አት አሳች መቶሃሰ» ይእ፤ ጠዉ እኩጎሬ ጴጥሮስ «ኮ መንቾ አኔበኤ!» ይእ።

59 ህትን መቶ ሳኦት ጌሰ አገሮች ኤተሮን ዎሉ መንቹ «ኩ መንቹ ገሊ.ል ባድ መንቹ እኩቤቸሃ ሀንቅንክ እሰን ሜጡብ ሃዕዮ እቅ» ይ ጠራኝሽ ጠወዕዮ።

60 ጠው እኮኅሬ ጴጥሮስ «ኮ መንቹ ኦት ይታንቲሃ እን ደጋንሰበእ» ዩእ፤ ህከ ወክት እሰ ጠወእንን ሀንጠቦ ዎጆ።

61 ኢሰን ኤተሩ ፈንቀል ጴጥሮሴ ለዕዮ፤ ጴጥሮሰን «ከበር ሀንጠቦ ዎደተ ኢ.ላ ሰሶራ ለገእንቴኤ» ዩሴ ቀርቶ ላገተ ሰውዩእ።

62 ህኅን እኮቤቸሃ ኦብል ፋል ቡብ ኦዕዮ።

63 ህከ ወክት ኢሰ ኢፎ ሙኑ ሀንቃሲትለከ ዎቀርታሲት እቅ።

64 ህትን ኦልሰ ጉንጉሽት ዎቀርተን «ዎቀርሄሁ እዩት? ሀንዴ ደግ» ይተን ጠዕምታሲት እቅ።

65 እሰን ዎሉ ልግብ ጠወ ጠወእን ሶርርታሲት እቅ።

ኢሰ ፍርድ ባልቀቤቹ መሴመሰገ

(ማቶ. 26፡59-66፤ ማር. 14፡55-64፤ ያህ. 18፡19-24)

66 ኤለት ሶዞ ወክት ባድ ባልቁ፣ ቂሰ ኦዎንሳኑትለከ ሕግ እሰተማረት ጭምይት ኢሰ ኦገትሰቤቹ መሰቶኤ።

67 እሰን «ኦት መሲህ እኮንትኅሬ ኩልኔ» ይቶኤ፤ ጠው እኮኅሬ እሰ «ኩሎንክዕኔ ኅሬ ኦመዕንቴንጎተኤበእ።

68 ህትን እን ጠዕሚንክዕኔ ኅሬ ፈንቀሽቴንጎተበእ።

69 ጠው እኮኅሬ ቴሶች ጀመር መንቹ ቤቱ ዎልቀት ዮሲ መገን መኬ ኦደን ኦፋዕለፍ» ዩሰ።

70 እሰን ጉዕመንከሰ «ህኅን እኮች ኦት መገንዮ ቤቱንዶ?» ይቶኤ፤ እሰን «ኤ ኦዕት ይቴንጎተጋንት» ዩሰ።

71 ህኅን እኮቤቸሃ እሰን «ነኤ ገዉንኩኔ ገይሰ ኦፊች ሞጮጭኖምቤቸሃ ዎሉ ሞስክር ሚሃት ሀንሳሚሁ» ይቶኤ።

23

ኢሰ ጽላጦሴቤቹ መሴመሰገ

(ማቶ. 27፡1-23/11-14፤ ማር. 15፡1-5፤ ያህ. 18፡28-38)

1 ሀከኒች ኤተሮን ሁኩ ኦገቻ ሙኑ ጉዕመንኩ ሜጡብ እክ ኢሰ ጽላጦሴቤቹ ኤቦኤ።

2 እሰን «ኩ መንቹ መንኔ ሉሲሰን፣ ሮም ዎሚሃ ግብር ባታብእገ ከመንለከ ሕን ዎመ መሲህት» ዮን ደንጎንሰ» ይተን ኦደሙ ጀመርቶሰ።

3 ጽላጦሰን «ኦት ይሁድሃ ዎመንዶ?» ይ ጠዕሚሰ፤ ኢሰን «ኦት ይቶንትጋንት» ይ ፈንቀሼእ።

4 ሀከኒች ኤተሮን ጽላጦሰ ቂሰ ኦዎንሳኖተለከ ህከን ልግቤ መኒሃ «ከን መንቹን መቱ ቤሱሃ ደጎምበእ» ዩእ።

5 ጠው እኮኅሬ እሰን «ገሊላች ኬሽ ከኦጳ ኢላ ይሁድ ባድን ጉዕማንን ተማርሰን ጨንጨነተ ኬሰኖት» ይተን ጠረኝሰ ጠወኦኤ።

ጽላጦሰ ኢሰ ሄርድሴቤቹ ሶኮገ

6 ጽላጦሰን «ገሊ.ላተ» ይተን ሞጮጬ ወክት «ገሊ.ላ ባድሃ መንቹንዶ?» ይ ጠዕሚእ።

7 እሰን ኢሰ ሄርድሰ ገሽኖ ባዲሃ እሁሰ ደን ወክት ኢሰ ሄርድሴቤቹ ሶኮ፤ ሄርድሰ ህከ ወክት ዩሩሳሌማን ሃዕዮ እቅ።

8 ሄርድሰን ኢሰ ለዕዮ ወክት እበ ሙንደዕዮ፤ መሰንትሰ እሰተኔ ልግብ ጠወ ሞጮጭ ለኦስተ ልግብ ወክት ሄዕላተኖት እቅ፤ ህትን ኦጀብሲሰኖ ጠወ እእን ለኦተ ተብሳሃ ኦእኖት እቅ።

9 ህኅን እኮቤቸሃ ሄርድሰ ኢሰ ልግብ ጠወ ጠዕሚሰ፤ እኮኅሬ ኢሰ መቱርቸሃ ፈንቀሽኖበእ።

10 ህትን ቂሰ ኢዎንሳኑትለከ ሕግ እሰተማረት ህከኔ ኡርት ጠረኝሰ ኦዳሲት እቅ።

11 ህትን ሄርድሰ ወታደሪንከሰን ሜጡብ ህንቆስ፤ ህከኒች ኤተሮን ቀለደን በለቃ ኦድኑተ ኦዲሽ ጽላጦሴቤቹ ፈንቀሽ ሶኮ።

12 ህከ በር ጽላጦሰለከ ሄርድሰ ጀለተ እኮኤ፤ ህከኒች ብርተ ለሙንኩሰ ብታን ሄኦ እቅ።

ኢሰ ኦሊን ሬሆ ፍርድ ፈረዴመገ

(ማቶ. 27፡15-26፤ ማር. 15፡6-15፤ ያህ. 18፡39-40፤ 19፡1-16)

13 ሀከኒች ኤተሮን ጽላጦሰ ቂሰ ኢዎንሳኑተ፣ ደኛኑተለከ ኡመት ሜጡብ ገኤእ

14 « ኦመት ኦሊን ብተተ ኬሰኖ፣ ይቴን ከ መንቹ ኢቤቹ ኤቤንታኦ፤ እንን ህትን ኦዕት ለኤንን መረመርሰ ሆንጠህሴንተ ክሲች ጉዕሚቸን ከን መንቹ ኦሊን መቱ ቤሱሃ ደጎምበእ።

15 ህትን ሄርድሰ መቱ ብድልሃ ደጉ ሆንቤቸሃ ኒቤቹ ፈንቀሽ ሶኮ፤ ከለዕዮ ሬሆተ ኢልሰኖሰ መቱርቸሃ ኦዕዮበእ።

16 ህኅን እኮቤቸሃ እን ኦሶ ገረፍ ገፈራም» ዩሰ።

17 [ዘማን ዘማኔን ጽላጦስ ኡሱረኚኛ መቼ መንቹ ሂር ገፈሩ ግዳሰ እቅ።]*

18 ጠዉ እኩጎሬ እስ ጉዕሙንኩስ ሜጡብ እክ «ከ መንቹ ሽ! ባርባኔ ሂር!» ይተን ጨንጭቶኡ።

19 ባርባኔን ከተም ሄዜን ጨንጨንተ ኬሰንለከ መን ሸን ኡሱር ሞኔን ኡሱረረሞላን መንቹ እቅ።

20 ጽላጦስን ኢሰ ሂር ገፈረሰተ ሀሽ ለንኪሃ መኒሃ ጠወዕዮ።

21 ጠዉ እኩጎሬ እስን «እሱ ሰቀል! እሱ ሰቀል!» ይተን ጨንጭቶኡ።

22 ሰቅ ወክት ጽላጦስ «ኩ መንቹ ሆሮን አዕዮ ጠዉ መርቹሃን? እን ሬሆተ ኢልሰሰርቹ ደጎምበእ፤ ህዛን እኩቤቹሃ ገረፍ ገፈረንሰ» ይሰ።

23 ጠዉ እኩጎሬ እስ ላገሰ ጎት እት ሰቀል! ይተን ያርቶኡ፤ ኡመቲሁለከ ቂስ አዎንሳኖ ላገንት በተኦኡ።

24 ህከን መሳን ጠዕምቶ ጠዉ እሆሰተ ጽላጦስ ፈረጅ።

25 እስን እስ ጠዕምቶን ህከ ርብሸተ እስለከ መን ሺ ኡሱር ሞኔን ኡሱረረሞ መንቹ ሂር ገፈረ፤ ጠዉ እኩጎሬ ኢሰ ተሽ የኖሰገ አቶተ ሀግሽ አሴሰ።

ኢሰ ሰቀሌመገ

(ማቶ. 27፡32-44፤ ማር. 15፡21-32፤ ያህ. 19፡17-27)

26 ሀከኒኛ ኢተሮን እስን ኢሰ መስተን ሄኑገን ገጠሪኛ ከተመ አሜተኖት እቅ፤ «ሰሞኔ» ይኖ ቀሬን ባድ መንቹ እንገሰ እፍ መስቀለ እጅሲስ ኢሰ አዎንኖገ አቶኡ።

27 ልግቡ ኡመቱ «አዬ! አዬ!» ይተን እስ በላንን ወዘነሰ ዎቀርተን እኣ ሜንቱ ኢሰ አዎንታሲት እቅ።

28 ጠዉ እኩጎሬ ኢሰ እስ አድ ፈንቀል «ዬሩሳሌም ሜንቶ! ኤሳሃ ኦኦኖቹ፤ እኩጎሬ ክዕኔሃ ገይህክዕኔለክ አላተክዕኔ አዕዬ።

29 መሰንትሰ ስልትብሩ፣ አልበ ገደቡለከ ቀንሰበ ኡኑኑ ማሰለሞአሃ ይኖ ወክቱ አሜተኖት።

30 ህከ ወክት መኑ ቆተተ ሕሊኔ ኡቤ፤ ህትን ቆሩንተ ማጩኔ የኖ።

31 እስን መጠ ሀቅ ኦሊን ህዛን አኤማሃ እኩኛ ሞሎ ሀቅ ኦሊን መ አኤሃሃ አሆታት?» ይእ።

32 ህትን ጨብ እኦቶ ሞሎ ለም መናከተ ኢሰን ማጡብ ሽቶተ መሰቶኡ።

33 እስን «ቡዕል ቁላ» ይኖቤቹ ኢልቶ ወክት ህከን ቤቸን ኢሰ ሰቀልቶኡ፤ ህትን ጨብ አዕዮሃ መቱስ መኪ ኦዲን ሞሎሰ ጉረስ ኦዲን ሰቀልቶኡ።

34 ኢሰን «ኢ ካነ! እስ አታርቹ ደጋበእቤቹሃ መረርሰጭሰ» ይእ፤ እስን ኦድኑስ እጠ ኡጅት ቤቀንቶኡ።

35 ህትን ኡመቱ ኡር ለአኖት እቅ፤ ጠዉ እኩጎሬ ዳኛኑት «ሞሎ መን ልጆኡ፤ መጠረሞ መገን መሲህ እኩጎሬ ህንጾ ገዉስ ፊሱን!» ይተን ቀለዳሲት እቅ።

36 ህትን ዎታደሩ እስቤቹ ሆንጠክ ሆለጮ ዎይን ቦበጤማሃ ኣትሰ

37 «አት አይሁድ ሞመ እኩንትጎሬ ገዉክ ፊሰ!» ይተን ቀለዳሲት እቅ።

38 ህትን «ኩን አይሁድያ ሞመ» ይን ከተቤማሁ ቡዕልስ አሌ ኦዲን ሄዕዮ እቅ።

39 ሂሊርቹ እታን ሰቀሌመሀኡኦች መቱሰ «አት መሲህ በእንደ? ህንጾ ገዉክለክ ኔሳሃ ፊሰ» የን ቦርሮሰ።

40 ጠዉ እኩጎሬ ሞሎሰ «አትሁ መቱ ሪሆ ፍርድ ኣዜን ሄኑንትገን መገኑ ዎጅታንትበእንደ?

41 ነኡዕኑ ሆንኔተኔሃ ሀሰሰኖኔ ፍርድ ኣእናምቤቹሃ ኒሁ ህንቅሃ ፍርድ፤ እኩጎሬ ኩ መንቹ መቱ ሂሊርቹ አዕዮበእ» ይ ኡሙዕሪሰ።

42 ህትን «ኢሰ! አሜትክ ወክት ኪ ሞምነቴን ቃጌኤ» ይእ።

43 ኢሰን «ሀንቅንከ ያንኬ፤ ከበር ኢን ሜጡብ ጃነቴን እኣንት» ይሰ።

ኢሰ ሬዮገ

(ማቶ. 27፡45-56፤ ማር. 15፡33-41፤ ያህ. 19፡28-30)

44 ሊሆ ሰኣት ጌስ እኩኛ አሩ ቱንሰሻን ኡለ አሊን ጉዕማንን ሆንሱ ሰኣት ኢለ ቱንሰቹ እኩ፤

45 ህከ ወክት ዱእ ሞኒ መጋረጃ ቅጡ ለሙ ቤቹ እክ ፊልተዕዮ።

46 ኢሰ ሎረ ላጋን ያር «ኢ ካነ! ነብሴቹኤ እንጋተክ እገተ ኣሳሞ!» ይእ፤ ህዛን ይኖ ኤተሮን ሬዮ።

47 ጥቤ ሀለቅቹ ህከ እኩ ጠወ ለዕዮ ወክት «ሀንቅንከ ኩ መንቹ ፈየሃ አቅ» ይ መገኑ ሎርሲኦ።

48 ህዛን ለኦተ ጭምደቶ መኑ ጉዕሙንኩ እኩ ጠወ ለኦ ወክት ሻዝ ዎዘነሰ ዎቀርተን ምነሰ ፈንቀልቶኡ።

49 ጠዉ እኩጎሬ ኢሰን ኤንኬዕነንተ መኑ ጉዕሙንኩ፣ ገሊላኛ እሱ አዎንታሲት እቅ፤ ሜንቱሁ ቁዕራሻን ኡርት ህከ ጠወ ለኣኢት እቅ።

ኢሰ ሞገሙሰ

(ማቶ. 27፡57-61፤ ማር. 15፡42-47፤ ያህ. 19፡38-42)

* 23:17 መት.መቱ ላህ ከታበት ዎላንሽ 17 የኣሃ በርግታበእ፤ ላገሰ ማር. 15፡6 የኣሃ እኩደኖ። 23:30 ሆሲ. 10፡8፤ መና. 6፡16። 23:34 መዝ. 22፡18። 23:35 መዝ. 22፡7። 23:36 መዝ. 69፡21። 23:45 ፋል. 26፡31-33። 23:46 መዝ. 31፡5። 23:49 ሉቃ. 8፡2-3።

- 50 «እርማትዮ» ዬዮ አይሁድ ከተማን ሄለኖ «ዩሱፈ» ዬዮ መንቸ ሄዕዮ እቅ፤ እሱን ፈያለከ ጡመሃ መንቸ እቅ፤ ህትን እሱን አገት ዳኛኖች መቶሃሰ እቅ።
- 51 እኩጎሬ አማሌንከሰለከ ሆጎንከሰ ኢተቀሞበእ እቅ፤ ህትን መገን ምዋነቱ ተብሴን አገረኛሃ መንቸ እቅ።
- 52 ሁኩ መንቸንኩ ጵላጦሴቤቹ መርኬዕይ ኢሰ ጀርዘተ አሶኖሰተ ፍቃድ ጠዕሜእ።
- 53 ህከኒች ኤተሮን ጀርዘተ ጡመ ጥጥ ኦድኖን ከፈኛ፤ ህት አዕይ እዪሁ ሞገሞበእ ክኑ ሸሃን መክሴመ ሎዲን አፋሼእ።
- 54 ሁኩንን ፎሎጭ በሩ ኣጎተ ሆንጠካን ተቃጠቤኖ ጀዕማቴተ ሀሆሩ እቅ።
- 55 ገሊላች ኢሱን ሜጡብ አዋንተን እሜቶ ማንቱ ሆንጠክ ሎደሰለከ ጀርዘሰ አፋሼመገ ለኦኦ።
- 56 እሱን ምንሰ ፈንቀልት እንጀርባቸለከ ሸቴተ ቅጥአቶኦ፤ ሕጎሰጊን ፎሎጭ በርንከ እዘዘሞገን ፎሎጭቶኦ።

24

ኢሰ ሬሆች ኬኤሰ
 (ማቶ. 28፥1-10፤ ማር. 16፥1-8፤ ያህ. 20፥1-10)

- 1 ሁኩ ማንቱ ሳሞንት ምኔ በር ገሰመ ሱጵተ ቅጥአቶ ሸቴተ አፍ ሎድቤቹ መርቶኦ።
- 2 እሱን ክኑ ሎድ አፈች ኮሎንኮዕልሃን ለኦኦ።
- 3 ጠዉ እኩጎሬ ሎድሰ ኣዘ ኣጎ ወክት ቀርቾ ኢሰ ጀርዘተ ደገበእ።
- 4 እሱን ህከን ጠዋን አበ እጀብሲጭተን በለቃ ኦድኑተ ደደኔ ለሙ መኑ ድንገቴን መዴንከሰ ኦርቶኦ።
- 5 ማንቱንኩ አበ ዋጅት ሙግይት ለእን ለሙንኩ መንቸ «ፎሊን ዮኢሃ ሬቶሁኑኦ በላን ሚሃ ሀሴነንታት?»
- 6-7 እሰ ከበ ዮበእ፤ ኬዕዮኦ፤ ገሊሊን ሄዕዮ ወክት መንቸ ቤቱ ጨበኛኖ እንጋን ህግሰን ኣሱ፤ ሰቀለሙለከ ሰቅ በር ሬሆች ኬኤ ሀሰሰኖሰ፤ ይ ኩሎህዕንገ ሰውይዬ» ይቶሰ።
- 8-9 ማንቱንኩ ኢሰ ጠወ ሰውይት ሎድቤች ፈንቀልት ህከ ጠወ ጉዕመንከ ቶናሃንከ ኣሳባተለከ ፈቆሁኦት ጉዕሚንከ ኩልቶኦ።
- 10 ህከ ጠወ ኣሳባተ ጠወኣአሩ መግደል ከተሞ መርዮማት፣ ዮሃናት፣ ያቁብ አመት መርዮማትለከ ኣሳንን ሚጡብ ሄኦ ዋሎሃ ማንቱ እቅ።
- 11 ጠዉ እኩጎሬ ማንቱ ጠወኦ ጠዉ ህንቅ አጉጃሰበእቤቹሃ ኣሳባት አመዕንቶሰበእ።
- 12 ጴጥሮስ ኬዕይ ሎድቤቹ ደጉጀ፤ ህከን ቤቾን ሙግይ ከፈኔመ ጥጥ ኦድኑት ሄኦኢሃ ለዕይ ጠዋንኩን እጀብሲጨን ምጊ ፈንቀሎ።

ኢሰ ለሞ ኣሳባተ ለሉሰ
 (ማር. 16፥12-13)

- 13 ህከ በርንከ ኢሰ ኣሳባች ለሙ «ኤማሁሰ» ዬዮ ቀአተ መርታኢት እቅ፤ ሁኩቤቹንኩ ዬሩሳሌሚች ለሞ ሰኣት ጌሰ መሰኖሃ ምቃ እቅ።
- 14 ህትን ገገዉንኩሰ ህከ እኩ ጉዕመንከ ጠውተኔሃ ሀሳውታኢት እቅ።
- 15 ጠራኝሰ ሀሳውተንን ኢሰ ገዉንኩሰ ሆንጠክ ኣሳን ሚጡብ ሃመኖት እቅ።
- 16 ጠዉ እኩጎሬ እሱ ደግበገ እሊንከሰ ለእንን አጥራመቶበእ እቅ።
- 17 እሱን «ሃንቱንን ገገዉክዕኔን ጠዉኤን ሃኤኒተ ጠዉ መርቸሃን?» ዬሰ፤ እሰን ሻዘ ጨለይት ኦርቶኦ።
- 18 ህከኒች ኤተሮን ኣሳችን መቱሰ «ቀላዮጳ» ዬዮሁ «ከን ሳሞንታን ህከኔ እኩ ጠወ ደግባሁ ዬሩሳሌም ከተማን ጠለዕል አት ኮህቹሃንደ?» ይ ፈንቀሼሰ።
- 19 እሱን «መ ጠወ?» ዬሰ፤ እሰን «ሆጎንለከ ጠወኢን መንገለከ መገን ብሬን ጠረኘን ነቢዬች ናዝሬት ኢሰተኔሃት።
- 20 ቁሰ አምንሳኑትለከ ዳኛኑት ሬሆ ፍርዲሃ ህግሰ ኣቶች ኤተሮን ሰቀልቶሰ።
- 21 እኩጎሬ ነኦ እሰራኤለ ፌሰኖሁ እሶት፤ ይን ተቢሳሃ ኣዕኖም እቅ፤ ህትን ህከን ጉዕመንከ ጠው አሊንን ኩ ጠዉ እኩች ከበር ሰቅዮ በር።
- 22 ዋሉንገ ህትን ጊ በሊች ሱጵተ ፋልት ሎድቤቹ መርቶ መት-መቱ ማንቱ እጀብሲሶኔ።
- 23 ጠዉ እኩጎሬ እሱን ጀርዘሰ ደጎተ አታልቶበእ፤ ህትን «እሰ ፎሊን ዮኦ» ይታ መላይከተ ለዕኖም ይተን ፈንቀልት እሜቶኦ።
- 24 ህትን ኒን ሚጡብ ሄኦሁኦኦች መት-መቱ መኑ ሎድቤቹ መርቶ ሁኩ ማንቱ ይቶገን እኮሃ ደጎኦ፤ እኩጎሬ እሱ ለኦሰበእ» ይቶሰ።

25 ኢሰን «እዕጉ ኩ ገዋኑት፤ ነቢያኑት ጠወኑ ጠወ ጉዕመንከ ቀልቡክዕኔ ደዕል አመዕንዮበእሩ።

26 መሰሊሁ ከ ኦርሸተ ጉዕመንከ ቶንተለከ ኪዕምኚን ኣጎተ ሀሰሰኖሰበእንደ?» ይሰ።

27 ህትን ሙሲቶሉከ ጉዕመንከ ነቢያኖች ኬሽ መጻፉን ጉዕመንከ እስተኔሃ ከተበሞ ጉዕመንከ ቤቹች ቢቹች ኩሎሰ።

28 ህከኒቶ ኤተሮን እሰን መርታ ቀለተ ሆንጠካን እሰ ቁዕራሻን ሃመኖህን እኩ።

29 እሰን «ኡለት ሀዋርቶኤ፤ አሩ ኣጎተ እኩቤቹሃ ኒን ገል» ይት ጠራኝሰ ኡጭቶሰ፤ ህካን እኩቤቹሃ እሳንን ሜጡብ ገሎተ ኣጎ።

30 እሰን እሳን ሜጡብ ማደን እፋዕሊ ወክት ጦሮሹ እእ ዱእ አዕይ ቢጭ እሳሃ ኣሴእ።

31 ህከ ወክት እልሰ ፈንተኣን እሱ ደጎኤ፤ እሰን ብረቶሰ ገበጭ ይእ።

32 እሰን መት-መትሀሰ «ዎቃን ኒን ጠወኣን መጻፈተ ሂር ኩሎኔ ወክት ቀልቡኔ ሙንዲኖን ተሽይበኔንደ?» ዮቀንቶኤ።

33 እሰን ህከ ሰኣትንከ ኬእ ዬሩሳሌመ ፈንቀልት አሜት ቶና መቱንኩ ኣሳበትለከ ዎሎ መኒን ጭምይት

34 «ቀርቹ ኢሰ ሀንቅንከ ሬሆች ኪዕዮኤ፤ ሰሞኔንከ ለልዮኤ» ይተን ደጎኤ።

35 ለሙንኩ ህትን ዎቃን እኩ ጠውተኔሃ ጦሮሹ ቢጭ ወክት እሱ አጥራመቶሰ ጉልቶሰ።

ኢሰ እሳባተሰ ለሉሰ

(ማፍ. 28፥16-20፤ ማር. 16፥14-18፤ ያህ. 20፥19-23፤ ሶቀ. 1፥6-8)

36 ህካን ጠወኣንን ኢሰ ገዉንኩሰ በላንከሰ ኡር «መገሬቱ ክዕኔሃ አሀን» ይሰ።

37 ጠወ እኩገሬ እሰን እያን ለኣኢሃ አጉጃንሰ ህልቅ ዋጅቶኤ።

38 እሰን «ሚሃት ህልቁንጎታሁ? ህትን ሚሃት ቀልቤንከክዕኔ ሸክቱንጎታቲህ?

39 ኤሳሃ ገዉእ እሁእ ኣንገእለከ ሎከእ ለእዬ፤ ህትን ለኤንተኤገን ኤሳሃ ዮ ማሎ፣ ሞቁለከ እያኑ ዮሰበእቤቹሃ ኤሳሃ አፌን ለዕዬ» ይሰ።

40 ህካን ይኬይ ኣንገሰለከ ሎከሰ ለሊሾሰ።

41 እሰን አበ ሙንደእ አጀብሲጭቶቤቹሃ ጠወሰ አመዕንቶበእ እቅ፤ ኢሰን እሰተ «አቴኖርቹ ዮሀዕኔንደ?» ይሰ።

42 እሰን ሬዕዮ ቀውተ ቁርጩሚተ ኣቶሰ።

43 እሰን ኣእ ኬዕይ ብሬንከሰ እኛ።

44 ህከኒቶ ኤተሮን ኢሰ «ክዕኔኤን ሜጡብ ሄዕዮም ወክት ሙሲ ሕጋን፣ ነቢያኖለከ መዝሙር መጻፉን እተኔሃ ከተበሞሁ ጉዕመንኩ እሁ ሀሰሰኖሰ» ይ ኩሎንክዕኔ ላገት ተኒት» ይሰ።

45 ህከ ወክት ጠሊሉ መጻፉ ዮኖሃ ሰውይታገ ቀልብሰ ፈቶ።

46 ህትን «መሲሁ ኦርሸተ ኣእኖ፤ ሰቅ በርንከ ሬሆች ኬእኖ፤

47 ህትን ቶበቱለከ ጩብ አጉሩ ዬሩሳሌሚቶ ኬሽ ጉዕመንከ ኡመት በላን እሰ ሱዕሚን ኩለመኖ፣ ዮም ከተበሞኤ።

48 እዕጉ ከን ጉዕመንከ ጠዋሃ ምሰክረታን።

49 እን እኑኤ ኣሴ ተብሳሃ ሶሃንክዕኔ፤ ጠወ እኩገሬ አሊች ዎልቀት ኣሰንቶሀዕኔተ ኢሊ ዬሩሳሌም ከተማን አገሬ» ይሰ።

ኢሰ ሰማ ኦሮኤሰ

(ማር. 16፥19-20፤ ሶቀ. 1፥9-11)

50 ህከኒቶ ኤተሮን ኢሰ ኣሳባሰ ዬሩሳሌም ከተሚቶ ፋሽ «ቢታን» ይኖ ከተመ መሴሰ፤ ህከኔን ኣንገሰ ሂር ማሰዕዮሰ።

51 ማሰኣንን እሳች አደ እክ ሰማ ኦሮዕዮ።

52 እሰን እሲሃ ሰገድ ኬእ አበ ሙንዲኖን ዬሩሳሌም ከተመ ፈንቀልት

53 መገን ምኔን ጉዕመ ወክትንከ መገኑ ገለትጭተን ሄኣኢት እቅ።

ያህይ ከተቦሃ ቀርችኔ መሲህ ኢስ እንጂሊ ኣጉስ

ያህይ እንጂሊ ኢስ ሆንጠህሰኖሁ መንቹ እክ መን በላን ደገንት ሄኣ መገን ላገተ እሁስ ለሊሶታት፤ መጻፉ ገዉንኩስ ለሊሰኖሁ ኩ እንጂሊ ከተቦሞሁ እነበባእሩ ኢስ ጡምሳንቹ እክ አሜተኖ የመሞሁ መገን ቤቱ እሁስ አመዕንቶተለክ እሲን አመዕንሰ መሳን ዘላለም ሄኣ ሄኣኖስገ ደጋጋት (20፥31)

እንጂሊስ ዋኔ ክፍሉ ጉዕመ ዘላለሚሃ ሄኣ መገን ላገትለክ ኢስ ሜጡ እሁስ ኣግ ደኒን ሆንጠህሰኖች ኤተሮን ኢስ ጡምሳንቹ እክ አሜተኖ የመሞሁ መገን ቤቱ እሁስ ለሊሳ መት-መቱ አጀብሲስኖ ጠወ ሆንጠህሰኖ፤ ሁኩ አጀብሲስኖ ጠወ መሃሳር ሂርት ኩልታ ሄሱት አምንታኣ፤ ኩ መጻፉ ኩለኖሁ መት-መት መኖከት ኣሳን አመዕንት እስ ካዲመተ እሁስለክ ዋሉስንገ ህት ግርሰንጎሪሁ እሲን አመዕንኖጠኣ ይቶጋት፤ ፎሎጭ 13-17 ኢስ ኣፈም ህንከዕርተ ኣሳባን ኣቡ ደቀንሹ ሄኣስለክ ሰቀሌኖስህኒች ሄጭ ተቃጠቤን ጠረኚኖ ላገተ ኩሎስገ ኩልታኣ። ጎፍሚ በር ኢስ ኣፈሙሲ፤ ፍርዲሃ ሆንጠህሰ፤ ሰቀሌኖስለክ ኬኤስ ህትን ኬዕኖች ኤተሮን ኣሳባተስ ለሉስ ኩልታእራን።

ያህይ ጠረኛሰኖሁ ዘላለም ሄኣ ኣስቱት ደገንታኢሁ ኢስን እሁስት። ኩ ኣስቱት ጉሶች ኬሽ ኢስ ዋቃሃ፤ ህንቅለክ ሄኣ ኣት ቶጋህኩታት። ያህይ እንጂሊ ኣደ ኣኣኖሲሁ መገን ኣያን ህንቅ ደግሲሶተ ርሲመለክ በር ጉዕመ ደግለሸኖምዋ ዋገ፤ ጣብትገ፤ ኑርገ፤ ዜምንቹ፤ ሆለተ፤ ዋይን ሀቁቹተለክ ዋይን ላልቹ ኣጉደኖ ምሳሊን ሆንጠህሰኖህ።

መጻፉስ ኣኖሃ

ኣጉስ (1፥1-18)

ጠመቃንቹ ያህያለክ ኢስ ዋኔ ኣሳበተ (1፥19-51)

ኢስ ክድመስ ጀመሩስ (2፥1—12፥50)

ዬሩሳሌማንለክ ኣዘጋገቤንከስ ጎፍማ በር (13፥1—19፥42)

ቀርች ኬኤስለክ ለሉስ (20፥1-31)

ገሊላን ለንኪሃ ኣምንታህኩተ ለሉስ (21፥1-25)

ሄኣ ላገተኔሃ

1 ዋዕናሃ ላገተ ሄኣ እቅ፤ ላገንትስ መገንህኔን ሄኣ እቅ፤ ህት ላገንት መገንኑወ እቅ።

2 ኣስን ዋዕኔችን ኬሽ መገንህኔን ሄዕኖ እቅ።

3 ጉዕመርቹንኩ እሲን አሜቶ፤ እስ ኖበኢሃ መቱርቹሁ አሜቶበኣ።

4 ሁኩ አሜቶንኩ እሲን ኖእሃ ሄኣ፤ ሁኩ ሄኡንኩ መን ኣላተ ኑርሃን።

5 ሁኩ ኑሩንኩ ቱንሰችን ለለኖ፤ ቱንሰችንኩ ሆሮን ቁለኖስበኣ።

6 መቱ «ያህይ» ዬኖ መንቹ ሄዕኖ፤ እሲን መገን ሶኩሰኖ መንቹ እቅ።

7 እስ ኑርተኔሃ መስከሮተ አሜቶ፤ ህከን እስ መስከሮህኔን ጉዕመንኩ መኑ አመዕንታኣ።

8 እስ ኑርተኔሃ መስከሮተ አሜቶኡ ቤሉ እስ ገዉስ ኑርሃበኣ።

9 ሁኩ ህንቅ ኑሩ ከ ኣዲንያ ኣል አሜቶ መኒሃ ጉዕመንከ ኑር ለሊሰኖ እቅ።

10 እሲን ከን ኣዲንያ ኣሌን ሄዕኖ እቅ፤ ኩ ኣዲንያንት እሲን አሜቶጎሪሁ ከን ኣዲንያ ኣል መኑ እሱ ደጎሰበ እቅ።

11 እሲን ገይስ መንቤቹ አሜቶ፤ እኮጎሪ ገይስ መኑ ቶጎሰበ እቅ።

12 ጠወ እኮጎሪ ቶጎሰረለክ ሱዕሚንከስ አመዕንቶእረ መገን ኣለተ እካ ሹምንቱ ኣሲስ።

13 እሲን መገኒች ኣለንቶኡ ቤሉ ቁጊች ህከረንገ ማል ሄዕላቶን መን ሃሽኣቶን ኣለንቶበኣ።

14 ላገንት መንቹ እኮኤ፤ እሲን ኒን ሄዕኖ፤ ነኡ እስ ኬዕምኣ ለዕናም፤ ሁኩ ኬዕምኡንኩ ማጠ ኣኒች ኣለሞእሃን፤ እሲን ኣስቶጎለክ ህንቁን ዊሞእሃን።

15 ያህይን « ኣኢች ኤተሮን አሜተኖሁ ኢች በተኣኑሃን፤ መስንትስ እስ ኢች ሄጭ ሄዕኖ» ይ ኩሎንክዕኔህ ከኒት» ይ እስተኔሃ ላገሰ ጎት ኣስዕይ ጠወዕኖ።

16 ነኡ ጉዕመንኩኤ እስ ኣሰቶ ዊሞማች ኣሰቶ ኣሌን ኣስቱተ ደዕናም።

17 መገን ሕጉ ሙስ ኣዲን ኣሰሞ፤ እኮጎሪ ኣስቱትለክ ህንቁ መሲህ ኣዲን አሜቶ።

18 መገን ለዕኖሁ ኣዬሁ ኖበኢ፤ እሁን ቤሉ መገንህኔን ኖ ሜጥቹስ ቤቱ ኔሳሃ ለሊሾኔ።

ጠመቃንቹ ያህይ መስከሩስ

(ማቶ. 3፥1-12፤ ማር. 1፥1-8፤ ሉቃ. 3፥1-18)

- 19 ኩን ያህይህ ምስክርነቱ፤ እይሁድ አዎንሳት፣ ዬሩሳሌም ቁስተለክ ሊዋውያት ያህይህ ሶክ «አት አዬት?» ይት ጠዕምሲሶስ ወክት
- 20 ያህይ «አን መሰህበክ» ይ መስከሮ ቤሉ ካጀበክ።
- 21 አሰን «ሀካን እኩች አት አዬት? እልያሴትንደ?» ይት ጠዕምቶሰ፤ አሰን «አን እሶበክ» ዬሰ።
- አሰን «አሜተኖ ዬመ ነቢዬቹሃንደ?» ይቶሰ።
- አሰን «አሶበክ» ዬሰ።
- 22 አሰን «አት አዬት? ሶኩኔ መኒሃ ኩልኖተ ገይክተኔሃ መ ይተን?» ይቶሰ።
- 23 አሰን ነቢዬቹ አሰያሰ ጠወዕዮ ገን
- እን « ቀርች ዎቃሃ ጌጥ አዕዬ» የን
- ኡለ ኡድማን ያረኖ መንችተ ላገ» ዬለ።
- 24 ሁኩ መኑንኩ ፈርሳዌ አዲች ሶሀንቶአረ አቅ።
- 25 አሰን «አት መሲህ ህከረንገ እልያሴ ህከረንገ ነቢዬቹ እክባች ሚሃት ጠመቃንቲት?» ይት ጠዕምቶሰ።
- 26 ያህይን ፈንቀሽ «አን ዊን ጠመቃንክዕኔ፤ ጠወ እኩጎሬ አዕኑ ደገነቡ በላንከክዕኔ ዮኡ።
- 27 እስ ኢች ኤተሮን አሚተኖ፤ ዎሉ ፈቅ አን እስ ሎከሰ ጫዕመስ ወደሩ ህርተ በቀዕበሃን» ዬለ።
- 28 ኩ ጉዕሙንኩ ጠወ እኩህ ያህይ መን ጠመቀኖ ዮርዳኖስ ዊች አሩ ፋላዮ አዲን ሄዕዮ «ቢታንያ» ዬዮ ከተማኒት አቅ።

መገን ሆልቹ

- 29 ለንክ በር ያህይ አሰ አሰቤቹ አሚተን ለዕይ «አዲንያ አል መኒች ጉዕሚችን ጨብ ከመኖ መገን ሆልቹ ሁኩዕኑን ከለዕዮ!
- 30 ኢች በተአኖ መንቹ ኢች ኤተሮን አሚተኖ፤ መሰንትስ እስ ኢች ሄጭ ሄዕዮ» ዬሚሁ ሁኩዕኑን።
- 31 እን ገወንኩአ እሱ ደጋንሰበ አቅ፤ ጠወ እኩጎሬ እስራኤል መኑ እሱ ደጋገ እን ዊን ጠመቀን አሚቾም» ዬለ።
- 32 ለንኪሃ ያህይ «ጠሊሉ እያኑ ሀንደዕሬገ እክ ሰሚች ድር አሌስ አፋዕላን ለዕዮም።
- 33 ህትን እን ገወንኩአ ደጋንሰበአ አቅ፤ ጠወ እኩጎሬ አን ዊን ጠመቆተ ሶኩኤሁ «ጠሊሉ እያኑ ድረንለክ አሌስ አፋዕላን ለአንቲሁ ጠሊሉ እያኒን ጠመቀኖሁ እሶት» ይ ኩሎኤ።
- 34 እንን ሀካን ለዕዮም፤ እስ መገን ቤቱ እሁስ መስከራም» ይ መስከሮ።

ኢስ አዎንቶ ዎዕኔ አሳበተ

- 35 ህትን ለንክ በር ያህይ ለዎንክ አሳባን ሚጡብ ኡርዮ አቅ።
- 36 ያህይን ኢስ ህከን ቤቹን ህገን ለዕይ «መገን ሆልቹ!» ዬለ።
- 37 ያህይ ሀካን የን ሞጮጭት ለሙንኩ አዎንታሰሩ ኢስ አዎንቶኤ።
- 38 ኢስን ህክ አዎንታረ ፈንቀል ለዕይ «መ ሀሴንታት?» ዬሰ፤ አሰን «ረቢ! ህከንቤችን ሄኣንቲት?» ይት ጠዕምቶሰ። *
- 39 አሰን «አሚቱን ሄኣም ቤቹ ለዕዮ» ዬሰ፤ አሰን አሚት ሄአኖ ቤቹ ለኦኤ፤ ህክ በር አሲን ሚጡብ ሆሶኤ፤ ሁኩ ወክቱንኩ በራ ቶኖ ሰአትዮ ጌሰ አቅ።
- 40 ህክ ያህይ ጠወ ሞጮጭት አዎንቶሁኤች መቱስ ሰሞን ጴጥሮሴ አመቤቱ እንድራሴት አቅ።
- 41 አሰን ሄጭ አመስ ቤቱን ሰሞኔን ደቀም «መሲህ ደንጎም» ዬሰ፤ (መሲህ ዩ ቡረሞሃ ዩሃን)
- 42 እንድርያሰን ሰሞኔ ኢሰቤቹ አኖ አሚቾ፤ አሰን እሰንከ ለዕይ «አት ዮነሃ ቤቱ ሰሞኔት፤ አትን «ኬፈ የመንታት» ዬለ፤ (ኬፈ ዩ ጠረኝ ክኑ ዩሃን) ሁኩንን «ጠረኝ መንቹ» ዩሃን።

ኢስ ፍልጶሴለክ ናትናኤላ ገኤገ

- 43 ለንክ በር ኢስ ገሊለተ መርተ ሆሾ፤ አሰን ፍልጶሴን ደቀም «አዎኤኤ» ዬሰ።
- 44 ፍልጶሴን እንድርያሰለክ ጴጥሮሴ ሄኣ «ቤተ ሳይዳ» ዬዮ ከተምዮ መንቹ።
- 45 ፍልጶሴን ናትናኤሌን ደቀም «ሙሲ ሕጋን ህትን ነቢያክት እሰተኔሃ ከተሶ ዩሱፍ ቤቱ ናዝሬት ኢስ ደንጎም» ዬሰ።
- 46 ናትናኤልን «ናዝሬት ከተማን ጡሙርቹ ደገመኖንደ?» ዬለ፤ ፍልጶሴን «አሚት ለአ» ዬሰ።
- 47 ኢስን ናትናኤል እሰቤቹ አሚተን ለዕይ «ተንኩት ዮሰበአ ሀንቅ እሰራኤል መንቹ ከለዕዮ» ዬለ፤
- 48 ናትናኤልን ኢስ «ሀከኔ ደገዕኔ?» ዬሰ፤ ኢስን ፈንቀሽ «ፍልጶሴ ገኤዕናንኬ ሄጭ ኦድ ሀቀቾ ሮቃን ሄኣንት ወክተንከ ደገንኬ» ዬሰ።
- 49 ህክ ወክት ናትናኤል ፈንቀሽ «አሰተማርቾ! አት መገንደ ቤቱ፤ ህትን አት እሰራኤልየ ዎመ» ዬሰ።

50 ህትን ኢሰ «እድ ሀቀኛ ፎቃን ለዕዮንኬ ይምቤቺሃ አመዕንቴኢንደ? ከኒች በተአኖርቼ ለእንት።

51 ሀንቅንክ ያንክዕኔ፤ ሰሞሁ ፈንተዕያን መገን መላይክት መንች ቤትበ አሜተንለክ መርተን ለኢነንተ» ይእ።

2

ኢሰ ቦላች ቀኔን ሞሃ ዎይን ጠጃን ደሩሰ

1 ሰቅሰ በሬን ገሊሊ ቃናን ቦላቹ ሄዕዮ እቅ፤ ሀከን ቤቸን ኢሰ አመት መርየመ ሄኦ እቅ።

2 ህትን ኢሰ አሳባንከሰን ሀከን ቦላቹሃ ገአሞ እቅ።

3 ዎይን ጠጃንኩ ሀከን ቦላች ምኔን ጎፎ ወክት ኢሰሃ አመሰ «ዎይን ጠጃ ጎፎሰ» ይቶሰ።

4 ኢሰን «ኪን ሞ ዮኤ፤ ወክቱኤ እልዮበእ» ይሴ።

5 ሀከ ወክት አመሰ ሀከን ቤቸን ሄኦ ካዲማተ «እሰ የኖሀዕኔሃ ጉዕመንክ አዕዬ» ይቶኦ።

6 ሀከንቤቸንን አይሁድ ሴር ሃሊን ነጠ እኮተ አዕልታ ሞሃ ዎሬኖ ሌሁ ክን ዛላት ሄኦ እቅ፤ እሰን መት-መቱሰ ለሙ-ለሙ ሀከረንገ ሰ-ሰሱ ኮሬ ጌሰ አፋዕረ እቅ።

7 ኢሰን ሀከኔ አታ ካዲማተ «ከን ሌሆንክ ዛላን ሞሃ ዋንሸዬ» ይሴ፤ እሰን ሀከን ዛላን አፎሰ ኢሊ ሞሃ ዋንሸቶኦ።

8 ሀከኒች ኤተርን ኢሰ «ከኒች እንኪልቴን ከን ድግሰ አሰናዳንቺሃ አሰዬ» ይሴ፤ እሰን መሰት አቶኦ።

9 ሁኩ መንቸንኩ ዎይን ጠጀ እክ ደራሞ ሞሃ ፊጭ ይ ለዕዮ ወክት ሀከንቤቸ አሜቸ ጎፎ ደጎበእ፤ ጠው እኮጎሬ ዋሰ እንኪልት ዛሌን ወርቶ ካዲመት ሀከንቤቸችት ጎሬ ደጎ እቅ፤ ሀከን እኮቤቸሃ ሁኩ አሰናዳንቺ እዜቼ ገእ

10 «መኑ ጉዕሙንኩ ዎዕና ጡመ ወይን ጠጀ አሰኖ፤ ህትን መኑሰ ሰከርቻ ኤተርን ሃላሰ አሰኖ፤ ጠው እኮጎሬ እት ከ ወክት ኢሊ ጡመሰ ወይን ጠጀ ማጡንት» ይሴ።

11 ኢሰ ከ ዎኔሰ እጅ-ብሲሰኖ ጠው ገሊሊ ባደጎ ዮ «ቃ» ይኖቤቸን አዕዮ፤ ህት አዕይ ኢሰ ኬዕምኛሰ ለልሾ፤ ህትን አሳበንት እሰን አመዕንቶኦ።

12 ሀከኒች ኤተርን ኢሰ አማንተሲ፤ አመሰ ኦሶንለክ አሳባን ሜጡብ «ቅፍርናሆመ» ይኖ ከተመ መር ሀከኔ ቀው በር አገር።

ኢሰ መገን ምኔን ነገዳረ ሸሩሰ

(ማቶ. 21፥12-13፤ ማር. 11፥15-17፤ ሉቃ. 19፥45-46)

13 ሸሽግ ከበጀት በሩ ሆንጠኮቤቸሃ ኢሰ ይሩሰሊመ ኦርዕዮ፤

14 መገን ምኔን ቦተተ፤ ሆለተለክ ሀንደዕርተ ህርታ መነለክ ህትን አፋዕልት ብረ ደርታእረ ደጎ።

15 ሀከ ወክት ሰተሮ፤ ጭርቁት ደጅ ጉዕመንክ መነ ሆላንተሰለክ ቦታንከሰ መገን ምኒች ሸር ፋሼእ፤ ብረ ደርታህኦኦ ብረ ብንአዕይ ጠራጺክ ገሊበጭ።

16 ሀንደዕርተ ህርታእረ «ካን ከንቤቸች ከሜ፤ እንኤ ምኒ ንግድ ምኒ አቶኖቼ» ይሴ።

17 ሀከ ወክት አሳበት «ምኒሀክ ዮኤ ኢትት ጊረገ ቡሰቶኤ» የመሞ ከተበሞሃ ሰውይቶኦ።

18 ሀከን እኮቤቸሃ አይሁድ አሞጎሳኑት «እት ካን አታንት ዎልቀት ዮሄጎሬ ደንጎተ መ መላተ ለሊሰኔ?» ይቶኦ።

19 ኢሰን ፈንቀሽ «ከ ዱኦ ምኒ ድጅዬ፤ እን ሰሶ በሬን ፈንቀሽ እጅራም» ይሴ።

20 እሰን ፈንቀሽት «ኩ መገን ምኑ ሸይልኔ ሌሆ ዘማኔን እጅረም ጎፎኤ፤ እት ሀከን ሰሶ በሬን እጀርጎደ?» ይቶሰ።

21 ጠው እኮጎሬ ኢሰ «ዱእ ምኒ» ይእሁ ገይሰ ጅሰመሲት እቅ።

22 ሀከን እኮቤቸሃ ኢሰ ሬሆች ኬዕዮች ኤተርን አሳበሰ ከ ጠው ሰውይት ኢሰ ጠወዕዮሃለክ ጠሊሊ መጻፋን ከተበሞሃ አመዕንቶኦ።

23 ኢሰ ሸሽግ ከበጀ ወክቱን ይሩሳሌማን አዕዮ እጀ-ብሲሰኖ ጠውተኔሃ ልግቡ መኑ እሰ ሱዕማን አመዕንቶኦ።

24 ጠው እኮጎሬ ኢሰ ጉዕመንክ መነ ደገኖቤቸሃ ጎደበ አሰኖሰበእ እቅ።

25 እሰን መን ቀልቤን ዮኢሃ ጉዕመንክ ደገኖቤቸሃ መንተኔሃ አይሁ እሲሃ ኩሉተ ሀሰሾሰበእ እቅ።

3

ኢሰ ንቆድሞሴ ተማርሲን

1 «ንቆድሞሴ» ይኖ መቱ መንቸ ሄዕዮ እቅ፤ እሰን ፈርሳዌ አዲች አይሁድ መኒሃ ሀለቀ እቅ።

2 ሁኩ መንቸ ኢሰቤቼ ሆሮን አሜች «ረቢ! እት መገን አዲች አሜቶንት አስተማርቼ እሁክ ደንጎም! መገኑ እሲን ሜጡብ ሄዕዮ መንቸ ቤሉ እት አታገት አጀብሲሰኛ ጠወ እኦተ አታለኛሁ እዪሁ ዮብእ» ዩእ::

3 ኢሲን ፈንቀሽ «ሆንቅንክ ያንኬ፤ መኑ ለንኪሃ * አለምባች መገን ምግነቱ ለአተ አታለኛብእ» ዩሰ::

4 ንቆድሞሰን «መኑ ባለቆች ኤተሮን ሆት እክ አለሞተ አታለኛ? ለንኪሃ አመሰ ጎደቦ ፈንቀል አግ አለሞተ አታለኛንዶ?» ይ ጠዕሜእ::

5 ሆትን ኢሰ ፈንቀሽ «ሆንቅንክ ያንኬ፤ መኑ ዌቸላክ ጠሊሊ አያኒች አለምባች መገን ምግነቱ ኣጎተ አታለኛብእ::

6 መኒች አለመኖሁ መንቸሃን፤ አያኒች አለመኖሁ አያን::

7 ለንኪሃ አለመ፡ ሀሰሰኛህዕኔ» ይምሀህን አጀብሲሰኞቶት::

8 ቦብሩ ሆሽ አደ ዋል ቦብሮሰኛ፤ እትን ላገሰ ሞጮጭታጎት ቤሉ ሀከን አዲች አሜች ሀከ አደ መረኖጎሪ ደጋገትብእ፤ አያኒች አለሞሁ ሆትዪጎት» ዩእ::

9 ንቆድሞሰን ፈንቀሽ «ኩን ሆት እክ አሆተ አታለኛ?» ዩእ::

10 ኢሲን ንቆድሞሴ «እት አሰረኤል አስተማርቼ እክ ከ ጠወ ደጋገትብእንዶ?»

11 ሆንቅንክ ያንኬ፤ ደጋጋሚሃ ጠወዕናም፤ ሆትን ለዕናሚሃ መሰከርናም፤ ጠወ እኩጎሪ መሰከርናሚሃ ቶጌንጎተብእ::

12 እን ከን ኣዲንያ አል ጠወ ኩላን አመዕንቴንባሩ ሰሜ ጠወ ኩሎንክዕኔ ጎሪ ሆት እኪን አመዕንቴንጎ?

13 ሰሜች አሜቸሀህች ሁኩንን መንቸ ቤት ቤሉ ሰማ አሌ ዋል ኦሮዕዮሁ እዪሁ ዮብእ:: †

14 «መሱ ኡለ ኡድማን ምሪቹ አሌ ዋሽ ኬሽገን ሆትን መንቸ ቤቱሁ አሌ ዋል ኪኤ ሀሰሰኛሰ::

15 ሁኩንን እሲን አመዕናሁ ጉዕሙንኩ ጉዕሙ ዘማኒሃ ሄአኖ ሄኤ ደታታት::

16 «ቤቶንከሰ አመዕናህህሂ ጉዕሚንኩ ዘላለሚሃ ሄአኖ ሄኤ ሄኤሰታት ቤሉ በአናበእገ መገኑ ሚጥቼሰ ቤቱ ኣሰተ ኢሊ ከን ኣዲንያ አል ሆትን ኢቲእ::

17 መገኑ ቤቱሰ ከ ኣዲንያ አል ሶኮሁ ኩ ኣዲንያት አሰ አዲን ጡምቶታት ቤሉ ፈረደታብእ::

18 «እሱን አመዕናህህሂ ፈረደመኖሰብእ፤ ጠው እኩጎሪ እሲን አመዕንበህሂ መገን ሚጥቸ ቤቶንከሰ አመዕኒበቤቹሃ ምዕናንከ ፈረደሞሰ::

19 «ዳርዲንኩሰ ከኒት፤ ኑሩ ከ ኣዲንያ አል አሜቸ፤ ጠው እኩጎሪ መኑ ሆጉሰ ሂሊ እኩቤቹሃ ኑሪች በትሽ ቱንሰቹ ኢቲእ::

20 ሂሊርቹ እአኖሁ ጉዕሙንኩ ኑር ግባኖ፤ ሂሊ ሆጉሰ ለልታብእገ ኑርቤቹ አሜተኖብእ::

21 ጠው እኩጎሪ አሰ አዕዮ ጡመ ሆጉት መገኒች እኮኢተ እሁሴ ደጎኖተ ሀንቅ ጠወ እአኖሁ ጉዕሙንኩ ለለኖ ቤቹ አሜተኖ» ዩእ::

ጠመቃንቹ ያህይ ኢሰተሄ መሰከሩሰ

22 ሀከኒች ኤተሮን ኢሰ አሳባጎተሰን ሜጡብ ይሁድ ባዱ ኦሮዕዮ፤ ሀከን ቤቸን ጠመቀን እሳንን ሜጡብ ቀው ጌሰ ዲንኪኤ::

23 ሀከ ወክት ያህይ ልገቡ ውሁ ሄዕዮ «ሳሌመ» ዩኖ ቤች መዴን «ሄኖን» ዩኖቤቸን ጠመቀኖት እቅ፤ ሀከ ቤቹ መኑ አሚተን ጠመቀመኖት እቅ::

24 ያህይ ሀከ ወክት ኡሱር ምኒ ኣጎበእ እቅ::

25 ያህይ አምናላከ መቶ አይሁድ ቶ መንቸ በላን ሴርሰ ሃሊን ነጠ እህተሄሃ ኦደት ኪኤእ::

26 ያህይ አምናት ሆንጠክ «አስተማርቸ! ዮርዳኖስ ዌ ዉድ አዲን ኪን ሜጡብ ሄዕዮአቂሁ እት አስተሄሃ መሰከርቶንቲሁ ጠመቀኖት፤ ሆትን መኑ ጉዕሙንኩ እሰሰ መረኖት» ይት ኩልቶሰ::

27 ያህይን «ሰሜች ኣሰምባች ሀኩ መንቸሁ መቲርቹሃ ኣኦተ አታለኛብእ::

28 ሕን እሲች ሄጭ ሰህሞም ቤሉ እን መሲህበእ» ይ ኩሎንክዕኔን አዕኑ ገዉንኩክዕኔን ምሰክርሃን::

29 እዚቹት ዮሲሁ እዚቹሃን፤ ጠወ እኩጎሪ እዜች ጆሉ እዜች መዴን ኡር ላገሰ ሞጮጪን መንደአኖ፤ ሆትን እን ቴሱ ዌመ መንዲኦተ ደአኖም::

30 እን እሲች ሆፈእን እሰን ኢች በተአን መሩ ሀሰሰኛሰ» ዩእ::

31 አሊች አሜተኖሁ እሰ ጉዕሚቸን ሎረሃን፤ ከን ኡላች እህኖሁ ጉዕሙንኩ ኡላሃን፤ ከን ኡለ አል ጠወ ጠወአኖ፤ ሰሜች አሜተኖሁ እሰ ጉዕሚቸን ሎረሃን::

32 እሰ ለዕናሃለክ ሞጮጪኤሂ መሰከረኖ፤ ጠወ እኩጎሪ አሰ መሰከርሃ አዪሁ ቶጎኖብእ::

33 እሰ መሰከርሃ ቶጎኖሁ መገኑ ሆንቅ እሁሰ ደገን ቶጎእሃን::

* 3:3 ከን ምልጎን «ለንኪሃ» ይታ ላገት- ግርክ መን እፎን «አሊች» ይታ ለንክ ፍሳሪት ዮሴ:: † 3:13 ሰሜች አሜቸ መንቸ ቤት ቤሉ ሰማ ዋል ኦሮዕዮሁ እዪሁ ዮብእ- የኖሁ «ሰማን ሄአኖ መንቸ ቤት ቤሉ» ይታ መት-መቱ ለሀ ክታብት ዮሴ:: 3:14 ዘኑ. 21:9:: 3:24 ማቶ. 14:3፤ ማር. 6:17፤ ሉቃ. 3:19-20:: ‡ 3:25 አይሁድ- የኖሁ መት-መቱ ለሀ ክታብት «ቀዎ አይሁዲን» ይታእ:: 3:28 ያህ. 1:20::

- 34 መሰንትሰ መገኘ ሶኮሲሁ መገን ላገተ ጠወአኖቤቺሃ ጠሊሊ አያነሰ በትሸ አሰኛሰ።
- 35 እኑ ቤቱስ አተኖቤቺሃ ጉዕመርቹንከ አንገሰ ሀግሽ አሰኛሰ።
- 36 መገን ቤቶን አመዕነኖሁ ጉዕመ-ጎኩ ዘላለሚሃ ሄአኖ ሄኡ ደአኖ፤ መገን ቤቶን አመዕንበሀን አሉን መገን ኡሙዕርት እካ ቤሉ ዘላለሚሃ ሄአኖ ሄኡ ደአኖበአ።

4

ኢሰለክ ሰማር ባድ መንቹተ

- 1-3 ህከ ወክት ኢሳ አሳበሰ ያህይ አዎኖኖች በተኦገለከ ልግብ መነ ኢሰ ጠመቀኖግ ፈርሳውት ሞጮጩስ ኢሰ ደጎ ወክት ይሁድ ባድ አጉር ለንኪሃ ገሊላተ ኦርዕዮ፤ ጠው እኩጎሬ ኢሰ አሳበት ጠመቃኦት ቤሉ ኢሰ ገጧሰ ጠመቆበአ።
- 4 ህከ ቤቹ መረን ሰማር ባድን ህጉ ሀሰሾሰ እቅ።
- 5 ህካን እኩቤቺሃ ያቁብ ቤትሀሰ ዩሱፊሃ አሴ ኡላ መዴን ሰማር ባድን ሃዕዮ «ሲካረ» ዬኖ ሰማር ከተመ አሚኛ።
- 6 ህከን ቤቶን ያቁብ ዊ ኤሎሁ ሃዕዮ እቅ፤ ኢሰ ዋቀሃ ሃም ሆኅቤቺሃ ህከን ኤላ መዴን አፋዕሌእ፤ ወክቱሰን ለሁ ሳት እኩ እቅ።
- 7 ህከ ወክት መት ሰማር ባድ መንቹተ ሞሃ እንኪልቶተ አሚቶኤ፤ ኢሰን ህተ መንቹተ «ዊች አግሴኤ» ዬሴ።
- 8 አሳበሰ እቸተ ህዕርቶተ ከተመ መርቶ እቅ።
- 9 ህት መንቹንት ፈንቀሽት «አት አይሁድቹ እክ ኤሳሃ ሰማር ባድተ ሀት «ዊች አግሴኤ» ይት ጠዕምታንቴኤት?» ይቶሰ፤ ህት ይቶኤንኩ አይሁድ መኑ ሰማር መኒን ቶቀንታበአቤቺሃት።
- 10 ኢሰን «መገን አስቱተለከ «ዊች አግሴኤ» ያኖሄሁ አይት ጎሬ ደኅንት እቀ እት እሱ ኡጭታንትሰ እቅ፤ አሰንገ ህትን ሄአ ሞሃ አሰኖሄ እቅ» ዬሴ።
- 11 መንቹንት ፈንቀሽት «ቀርቾ! ኩሳሃ እንኪልታንቴንኩ ዮሄበእ፤ ህትን ኤሎንኩሰ ሂላ ጌሰ ጥዕላሸሃን፤ ከ ሄአ ሞሃ ሀከንቤቺቹ ኤበን?»
- 12 ሀንቅንከ እት ከ ዊ ኤሎ አሴኤ አረኝኤ ያቁቢች በተአንንድ? እሰ፡ ኦሱሰለከ ግዙሰ ከን ኤላ ዊች አጎኤ» ይቶኤ።
- 13 ህትን ኢሰ «ከን ዊች አገኖሁ ጉዕመንኩ ለንኪሃ ሰገበኛሰ።
- 14 ጠው እኩጎሬ እን አሳም ዊች አገኖሁ ጉዕመንኩ ሆርን ሰገበኛበእ፤ መሰንትሰ አሳም ውሁ እሰ አዘን ዘላለም ሄአኖ ሄኡ ቡቃ ዊ ቡቁተ አሀኖ» ዬሴ።
- 15 መንቹንት «ቀርቾ! ከኒች ኤተሪሃ ሰገብበኤገለከ ህትን ከቤቹንከ ሞሃ እንኪሎተ አሚትበገ ህከ ሞሃ አሴኤ» ይቶኤ።
- 16 ኢሰን መንቹተ «መርት ሞንክ እነ አፍ ከቤቹ አም» ዬሴ።
- 17 እሴን «ምኒ እኑ ዮኤበአ» እሰን «ምኒ እኑ ዮኤበአ ይቶንቴሁ ሀንቅሃን።
- 18 ጠዉ እኩጎሬ ኦንቴ ሞኒ እኑ ሃዕዮሄ እቅ፤ ህትን ቴሁ ኪን ዮኤሁ ሞኒክሃ መንቹበእ፤ ህካን እኩቤቺሃ ሀንቅ ጠወኦንት» ዬሴ።
- 19 መንቹንት «ቀርቾ! እት ራጎንቹ እኩንትገ ቴ ደጎም።
- 20 አናክክዕኔ ተን ቆታን ሰገዳኤ፤ ጠው እኩጎሬ አዕት አይሁድ «መኑ መገኒሃ ሰገዱ ሀሰሰኖሁ ዬሩሳሌማኒት» ይቱነንተ» ይቶኤ።
- 21 ህትን ኢሰ «ቴ መንቹ! እነ መገኒሃ ሰገዳነንተ ተን ቆተ አሉን ህከረንገ ዬሩሳሌማን አሀኖበእ ወክቱ አሚተኖገ አመዕኔኤ።
- 22 አዕት ሰማር ባድ መኑ ደገንበሀኒሃ ሰገዳነንተ፤ ጠዉ እኩጎሬ ነኡ ጡሙ አሚተኖሁ አይሁዲች እኩቤቺሃ ደጎም መገኒሃ ሰገንዳም።
- 23 ህትን ሀንቁን ሰገዳኤ እነ መገኒሃ ዊመ አያኒንለከ ሀንቁን ሰገዱ ወክቱ አሚተኖ፤ ወክቱንኩሰ ከኒት፤ እኑ መገኑንኩ ሀሰሰኖሁ ህት ሰገዳኤራት።
- 24 መገኑ አያነሃን፤ ሰገዳኤ እያኒንለከ ሀንቁን ሰገዱ ሀሰሰኖሰ» ዬሴ።
- 25 መንቹንት « መሰህ» የመመኖሁ አሚተኖገ ደጎም፤ እሰ አሚኞ ወክት ጉዕመርቹንከ ኩለኖኔ» ይቶኤ።
- 26 ኢሰ «ቴሱ ጠወእንኪሁ እን እሶት» ዬሴ።
- 27 ህከ ወክት አሳበሰ መርቶ አዲች አሚቶኤ፤ እሰን ኢሰ መንቹን ጠወእን ለእ አበ አጀብሰጭቶኤ፤ ጠዉ እኩጎሬ «መ ሀሶንት? ህከረንገ እሴን ሚሃ ጠወእንቴት?» ይ ጠዕሚሲሁ አይሁ ዮሰበ።
- 28 ህከ ወክት መንቹተ ዊ ኮሩ ህከን ቤቶን አጉርት ከተመ መርት መኒሃ

29 «እሜ! እን አዕዮም ጠወ ጉዕመንከ ኩሎኤ መንቸ ለዕዬ፤ አይደጎ እሰ መሰህት ጎር?» ይት ኩልቶኡ።

30 መንኩኩ ከተሚች ፋል እሰበ መረረኛት እቅ።

31 ህከ ወክትንከ አሳ «እሰበሰ አሰተማርቸ! እቸተ እት» ይት ኡጭቶሰ።

32 ጠወ እኩጎሬ ኢሰ አሳሃ «እት ደገብሱ እን አጎም እቸት ዮኤ» ዬሰ።

33 አሳበሰ ገገወንኩሰን «መኑ እቸተ ኤሶሰጎሬ?» የቀንቶኡ።

34 ኢሰን ፈንቀሽ «ኢ እቸት ሶኩኤህን ቀልብሰ ጠወ ዊንሾሃለከ ሆጉሰ ሹል አኤሃን።

35 እት ምዳና ወክቱ ኢሎተ ሹሉ አገኑ ፈቆኤ» ይቱነጎታበእንደ? እኩጎሬ እን እልክዕኔ አሌ ዋሽቱን ውጠተ ምዳና ሆንጠሁሰ ለእዬ ያንክዕኔ።

36 ምደናሁ ሆንሰ ሁንክ አእና፤ ዘላላሚሃ ሄኡ እሀና ላልቹ ጭምእእና፤ ህካን እኩቤቺሃ ዉጠናሁለከ ምደናሁ ሜጡቦ መጎደእእ።

37 መቱ ውጠና፤ ዋሉሰንጎ ምደና፤ የመሞሁ ሀንቅ እሀና።

38 እን አዕኑ ኦርጨቀንቴንታበእሃ ምደናተ ሶኩንክዕኔ፤ ዋሉ መኑ ህከን ሆንጎ አበ ሆንኤ፤ እሰ ሁንኪን አዕኑ ደግለሸቀንቴንታኦ» ዬሰ።

39 ህት መንቸንት «አዕዮም ጠወ ጉዕመንከ ኩሎኤ» ይት መስከቆቶ ጠወ ሞጮጭቶ ህከን ከተማን ሄኤ ልግቡ ሰማር ባደ። መኑ እሰን አመዕንቶኡ።

40 ሁኩ መንኩኩ ኢሰበ አሜቶ ወክት እሰቤቸን አፋዕሎተ ኡጭቶሰ፤ እሰን ለሙ በር ህከን ቤቸን አገር።

41 እሰ ጠወዕዮ ጠወተኔሃ ዋሉ ልግቡ መኑሁ እሰን አመዕንቶኡ።

42 እሰን መንቸተ «ነኡ ቱሱ እሱ አመዕንናሚሁ አት ኩልቶንትኔቤቺሃ እሁዕን ነኡ ገውንኩኔ እሰኙ ሞጮጭናሞቤቺሃትለከ እሰ ሀንቅንከ ከን አዲንያ አሊሃ ጡምሳንቸ እሁሰ ደንጎምቤቺሃት» ይቶኡ።

ኢሰ ሹም ቤቱ ፈይሱሰ

43 ኢሰ ሰማር ባደን ለሙ በር ዲንኬኢች ኤተርን ገሊላ ባዲ ኦርዕዮ።

44 ኢሰ «ነብዬቹ ገይሰ ባደን ከበጀመናበእ» ይ ጠወዕዮ እቅ።

45 ጠወ እኩጎሬ እሰ ገሊላ ባዲ አሚቸ ወክት መኑ ጡመሃሊን ቶሳሰ፤ መሰንትሰ እሰን ሻሸግ ከበጀተ ከበጀቶተ ዩሩሳሌመ መርቶ ወክት እሰ ህንጹ አዕዮ ጠወ ጉዕመንከ ለኦ እቅ።

46 ህከኒች ኤተርን ኢሰ ሞሃ ያይን ጠጀ አዕዮ ገሊላ ባደን ሄዕዮ «ቃነ» ዬናቤቹ ለንኪሃ መር፤ ህከ ወክት ቅፍርናሆማን ቤቱሰ ጥዦ መቱ ምዎ ምኒ ሹሙ ሄዕዮ እቅ።

47 እሰን ኢሰ ይሁድ ባዲች ገሊላ ባዲ አሚቱሰ ሞጮጭ ኢሰበ ኦርዕዮ፤ ሬሀና ጌሰ ጥዦ ቤቱሰ ቅፍርናሆመ መር ፈይሱሰተ ኢሰ ኡጨሱ።

48 ኢሰን «እት መሳተለከ እጀብሲሰናርቸ ለኤንባች አመዕንቴንጎተበእ» ዬሰ።

49 ሁኩ ሹሙንኩ «ቀርቸ! ቤቱእ ሬሁዕናን እንጎ ደዕልት ኪእ» ዬእ።

50 ኢሰን «ምንክ ኦርእ፤ ቤቱክ ፈየና» ዬሰ፤ መንቸንኩ ኢሰ ዩኤሃ አመዕን ምንሰ ኦርዕዮ።

51 እሰን ምንሰ መረጎ ሞቄ አሌን ሄዕዮ ገን ካዲመሰ ደቀንት «ቤቱክ ፈይዮኡ» ይቶኡ።

52 መንቸንኩ ቤቱሰ ፈይኢሁ ሄንከ ሳኦቱን እኩጎር ጠዕሚሰ፤ እሰን «ደሙምት አጉርቶሲሁ ቤራተ ለመላ ሳኦቱኒት» ይቶኡ።

53 ጨልሰ እኩንኩ ኢሰ «ቤቱክ ፈየና» ዬ ወክቱን እሁሰ ደጎ፤ ህካን እኩቤቺሃ ሁኩ መንቸለከ ምንሰ አበርሱ እሳን አመዕንቶኡ።

54 ሁኩ እጀብሲሰና ጠወ ኢሰ ይሁድ ባዲች ገሊላ ባዲ አሚቸ ወክት አዕዮ ለንኪሃ እጀብሲሰናሃ ጠወ።

5

ኢሰ መቱ ናፈ መንቸ ፈይሱሰ

1 ህከኒች ኤተርን አይሁድ ከበጀት ከበጀና ወክቱ ኢሊቤቺሃ ኢሰ ዩሩሳሌመ ኦርዕዮ።

2 ዩሩሳሌማን ሆላ ኡር መዴን እብራጫ መን አፎን «ቤተ ሳይዳ» ዬናቤቹን መት ቡቁት ሄኤ እቅ፤ ህከኔን ንጌና ኦንት ጎልጌ ኡሩት ሄኤ እቅ።

3 ህከንቤቸንን ልግቡ ጥዘናመተ፣ ቆቃኑተ፣ ድናኑተለከ ናፋኑተ ህከን ሀጌና ኦንቱ ጎልጌ ኡርን ኦሰእ ውሁ ሊንቄቀናጎ አገርታኢት እቅ።

4 መት-መቱ ወክት ቀርች መላይኪቹ ድር ህከ ሞሃ ሊንቄቅሰና እቅ፤ ሁኩን ሊንቄቄኢች ኤተርን ሄጭ ህከ ዊ አዝ አሳ መንቸ ዮሰ ጥዘናች ፈየና እቅ። *

4:44 ማቶ. 13፣57፤ ማር. 6፣4፤ ሉቃ. 4፣24። 4:45 ያህ. 2፣23። 4:46 ያህ. 2፣11-11። * 5:4 መት-መቱ ወክት ቀርች መላይኪቹ ድር ህከ ሞሃ ሊንቄቅሰና እቅ፤ ሁኩን ሊንቄቄች ኤተርን ሄጭ ህከ ዊ አዝ አሳ መንቸ ጥዘናችሰ ፈየና። የኖሃ ብርተ ሄኤ ሉሀ ኪታበት ዋሊሽ 4 ዮኤሃ በርጎታበእ።

5 ህክንቤቸንን ሰጅኔ ህዜቱ ዘማን ጥጥ ጥዘናው ሄዕዮ እቅ።

6 ኢሰን ሁኩ መንቸ ህክኔ ኦሰዕዮሃ ለዕይ ልግብያ ዘማኒኛ ኬሽ ጥጥ እሁሰ ደግ «ፈይቶተ ሀሰንንደን?» ይ ጠዕሚሰ።

7 ሁኩ ጥዘናውንኩ «ቀርቸ! ውሁ ሊንቁቁ ወክት ኤሳሃ መሰ ህክን ሞን ኣግሰናኤ መኑ ዮኤበአ፤ እን መርተ እሀንን ሞሉ መኑ ኤሳሃ ሄጭ ኣገና» ይእ።

8 ኢሰን «ኬእ! ኦሰኦንት ዳሰክ እጅት ኦርእ» ይሰ።

9 ሁኩ መንቸ ወክትንከሰ ፈይ ዳሰሰ እጅት ኦርዕዮ፤ ሁኩንን እኮሁ ፎሎጭ በሬኔት እቅ።

10 ህክን እኮቤቸሃ እይሁድ እምንሳኑት ህክን ጥዘናኛ ፈይ መንቸን ደቀንት «ከበር ፎሎጭኖ በር እኮቤቸሃ ኦሰኦንት ዳሰ እጅ ሕጉ ፈቀደኖሃበእ» ይቶሰ።

11 ጠው እኮጎሬ እሰ «ኤሳሃ ፈይሾ መንቸ «ዳሰክ እጅት ኦርእ» ይእ» ይ ፈንቀሼሰ።

12 እሰን «ዳሰክ እጅት ኦርእ ይሄ መንቸ እዩት?» ይት ጠዕምቶሰ።

13 ህክን ቤቸን መኑ በተዕዮቤቸሃለከ ኢሰ ህክንቤቸኛ ሞሉቤቸ ኦርዮቤቸሃ ሁኩ መንቸ ፈይሾሲሁ አይት ጎር ደግበእ እቅ።

14 ህከኒኛ ኤተርን ኢሰ ህክን መንቸን መገን ምኔን ደቀም «ቴሱ ፈይቶንት፤ ከኒኛ ኤተርን ባሰናርቸ እፈኖሃበእገ ጨብ እቶት» ይሰ።

15 ሁኩ መንቸንኩ ፈይሾሲሁ ኢሰ እሁሰ መር እይሁድ ሹማተ ኩሎሰ።

16 ህትኔ ጠው እሰ በሬን ኦሰዮቤቸሃ እይሁድ ሹመት ኢሰ ሂላ ጠዋን ሆቻታሲት እቅ።

17 ጠው እኮጎሬ እሰ «እኑኤ ጉዕመርን እአኖት፤ ህትን እኒሁ እአሚት» ይ ፈንቀሼሰ።

18 ኢሰ ህት ዩሰ እይሁድ እምንሳኑት እኩ ሽቶተ እሰ ኬሰንሴሰ፤ መሰንትሰ እሰ እሰ በሬን ጠለዕል ሆጉተ እኑ እሁዕ፤ «መገኑ እናኤ» ዩን ገዉሰ መገኒን ቅጥ ኦሰዮቤቸሃት።

መገን ቤት ዳኝነቱ

19 ኢሰን ፈንቀሽ «ሀንቅከን ያንክዕኔ፤ እኑ እእን ለዕዮሃ እእ ቤሉ ቤቱ ገይንከሰ መቱርቸሃ እአናበእ፤ እኑ እአኖሃ ቤቱህ ህትን እሰገን እአኖ።

20 መሰንትሰ እኑ ቤቱሰ ኢተኖ፤ ህትን እአኖሃ ጉዕመንከ እሲሃ ለሊሰኖ፤ ኦዕኑን እጅብሲጭቶኖተ ከኒኛ በተአኖሃ ለሊሰኖሰ።

21 እኑ ሬሆኛ ኬሽ ሄኡ ኣሰናሰገን ቤቱህ ህትን ኣሶተ ሆሾ መኒሃ ሄኡ ኣሰኖ።

22 እኑ እዩ ኣሌሲ ፈረደኖበእ፤ ጠው እኮጎሬ ፈረደተ ኢታሊኖ ሞልቀተ ጉዕመንከ ቤቱሃ ኣሰኖሰ።

23 ካን ኦሰዮሁ መኑ ጉዕመንኩ እን ኬዕምሰኖገን ቤቱሃ ኬዕምሶታት፤ ቤቱ ኬዕምሰባሁ ሶኮሰ እነሃ ኬዕምሰኖበእ።

24 «ሀንቅከን ያንክዕኔ፤ ላገእ ሞጮጩኖሀሂሃለከ ሶኮኤሃ ኣመዕነኖሀሂሃ ዘላላሚሃ ሄአኖ ሄኡ ሄአኖሰ፤ እሰ ሬሆኛ ሄኡን ሀጎ ቤሉ ፈረደኖሰበእ።

25 ሀንቅከን ያንክዕኔ፤ ሬቶእሩ መገን ቤት ላገተ ሞጮጭታ ወክቱ እሚተኖ፤ ወክቱንኩሰ ከኒት፤ ሞጮጭታእሩ ፎልጎ ሄኣእ።

26 መሰንትሰ እኑ ሄእ ቡቁተ እኮገን ቤቱህ ሄእ ቡቁተ እሆኖጎ ኦሰዮሰ።

27 ህትን እኑ ዊመ ሞልቀተ ኣሴሰ ቤቱሰ እሰን መንቸ ቤቱ የመመኖሁ ፍርደ ፈረደተ ሹምነቱ ኣሰኖሰ።

28 ከኒን እጅብሲጭቶኖቹ፤ ሎድ ኣዜን ሄኣእሩ እሰ ላገተ ሞጮጭት ሎዲኛ ፋልታ ወክቱ እሚተኖ።

29 ጡመ ሆጉተ እቶእሩ ሬሆኛ ኬእ ፎልጎ ሄኣእ፤ ጠው እኮጎሬ ሂላ ሆጉተ እቶእሩ ሬሆኛ ኬእን ኣሌሰ ፈረደኖሰኖ» ይሰ።

30 ህትን ኢሰ «እን ገይእ ሞልቃን መቱርቸሃ እኡተ ኢታላምበእ፤ ጠው እኮጎሬ እኒኛኤ ሞጮጩሚሃ ፈረደም፤ ሶኮኤሀን ሃሽእቶ ቤሉ ገይኤ ሃሽእቱተ ዊንሻምበእቤቸሃ ፍርዱእ ሀንቅሃን።

ኢሰተኔ መሰከርቶ መነ

31 «እን ገይኤተኔ መሰከርቶም ጎሬ ምሰክሩሰ ሀንቅ እሁሰ ለላኖበእ።

32 ጠው እኮጎሬ ኢተኔሃ መሰከርቸሁ ሞሉ ዮኤ፤ እሰን ኢተኔሃ መሰከርቸሁ ምሰክሩ ሀንቅ እሁሰ ደጋም።

33 እዕኑ ያህይቤቸ ሶቀማኑተ ሶክንታእ እቅ፤ እሰን ሀንቅተኔሃ ኩሎሀዕኔ።

34 ኣን መን ሞሰበር ቶጉ ሀሰሰኖኤበእ እቅ፤ ጠው እኮጎሬ ኣዕኑ ጡሞቶኖተ ይ ከ ጠው ያም።

35 ያህይ ቡብኖለከ ለሊሰኖ ኩራዘገታት፤ ኣዕኑ ቀም ወክቱሃ እሰ ኑራን መንገደኤንጎተ።

36 ጠው እኮጎሬ ኤሳሃ ያህይኛ በተአኖ ምሰክሩ ኖኤ፤ ሁኩንን ሹል እኡተ እኑኤ ኣሰኖኤተ ሆጉ፤ ሁኩ እን እአም ሆጉት እኑኤ ኤሳሃ ሶሁሰ ለሊሳላተ።

37 ኤሳሃ ሶኮ እኑኤ ገዉንኩሰ ኢተኔሃ መሰከርቤ፤ እኮጎሬሁ ኣዕኑ ላገሰ ሞጮጭቱንታበእ፤ ህትን ገዉሰ ለኤንታበእ።

38 እሰ ሶኮሀሂን ኣመዕንቱንጎተበእቤቸሃ እሰ ላገተ ክዕኔቤቸን ሄኣበእ።

- 39 እዕኑ ዘላለሚ ሄኡ ጠሊሊ መጻፋች ደዕቲነጋሃ እጉጃንክዕኔ እስተ መረመርቲነጋታት፤ እሳሁ ኢቲኔ መሰከርታአረገ።
- 40 እኮጎሬሁ እዕኑ ሄኡ ደዕቶኖተ ኢቤቹ አሜቱ ግቤነጋታኡ።
- 41 «እን መኑ ኬዕምሶኤተ ሀሳምበኡ።
- 42 እኮጎሬሁ ክዕኔኤ ቀልቤን መገን ኢተት ዮበኢሃ እሁስ ደጎም።
- 43 እን እንኤ ሱዕሚን አሜቶምጎሬሁ ቶጌነጋኤበኡ፤ ጠዉ እኮጎሬ ዋሉስ ገይሰ ሱዕሚን አሜቶን ቶጌነጎተሰ።
- 44 እዕኑ መት-መቱክዕኔ ኬዕምሴንተረላከ ሜጡዋ መገኒች ኬዕምኝ ሀሴንበሩ ሀት እኩን እን አመዕንቶኖተ አታልቲነጎ?
- 45 እን እንኤ ብሪን ኦዳሚሃ እጉዲንከሀዕኔ፤ ኦደኖሀዕኔሁ እዕኑ ተቢሳ አቲነጎተ ሙሳት።
- 46 እዕኑ ሙሰ አመዕንቲነጎተ አቃ ኤሳሁ አመዕንቲነጎተ አቅ፤ መሰንትሰ እስ ኢቲኔሃ ከተሶኤ።
- 47 እስ ከተሶሃ አመዕንቲነጎቶች ኢ ላጋን ሀት እኩን አመዕንቶኖተ አታልቲነጎ?» ይሰ።

6

ኢስ ኦንቱ ኩሜ መነ እትሱስ
(ማቶ. 14፥13-21፤ ማር. 6፥30-44፤ ሉቃ. 9፥10-17)

- 1 ሀከኒች ኤተሮን ኢስ «ጥባርስ ሀከረገገ ገሊሊ» ይኖ ባር ዉድ አደ ቶሎ።
- 2 ኢስ ጥዘናመተ ፈይቫን አጀብሲስኖ ጠዉ ለኦ ልግቡ ሙኑ አምንቶስ።
- 3 ኢስ ቆተ አል ፋል አሳባንተሰን ሜጡበ አፋዕሌኡ።
- 4 አይሁድ ቫሽግ ከበጃቱ ሆንጠኮ እቅ።
- 5 ሀከ ወክት ኢስ ልግቡ ሙኑ እስበ አሜተን ለዕይ አልስ አሌ ዋሽ ፍልጶሴ «ካን ጉዕማንከ መኒሃ አታ አቸተ ሀከን አዲች ሀዕርኖተ አታልናም?» ይኡ።
- 6 ኢስ ሀት ዩሊሁ ፍልጶሰ የኖሃ ለኦታት ቤሉ እስ እኡ ሀስሰኖሲሃ ገዉንኩሰ ደገኖ እቅ።
- 7 ፍልጶሰን «መት-መትሀስ ቀዉ ቀዉ አልሲሃ ለሜ ጥቤ ዲናር * እቸቲ አካስበኡ» ይኡ።
- 8 አሳባች መቱ ሰሞን ጴጥሮሴ አመቤቱ እንድርያሰ
- 9 «ከኔ ኦንቶ ሶእ ጣብተለከ ለም ቁርጩሜተ አሮ መቱ ጩሉ ዮኤ፤ ጠው እኮጎሬ ኩን ከን ጉዕማንከ መኒሃ ሀት እክ አሀኖ?» ይኡ።
- 10 ኢስን «መኑ አፋዕላኖገ አዕዩ» ይሰ፤ ሀከን ቤቾን ልግቡ ሀጥት ሄኡ እቅ፤ ኦንቶ ኩሜ ጌሱ ጎኑ ሀከኔ አፋዕልዮ እቅ።
- 11 ሀከኒች ኤተሮን ጣብተ ኬሽ መገኑ ገለትጭ አፋዕሌ መኒሃ አሴእ፤ ሀትን ቁርጩሜተ ጉዕማንከሰ ሀስሰኖሰ ጌሰ አሴእ።
- 12 ጉዕሙንኩ እት ዱቦች ኤተሮን ኢስ አሳባተሰ «መቱርቹሁ ፈቁዕናን ፈቆ ፋርፋሩ መጤን ጭምአዕዩ» ይሰ።
- 13 እስን ኦንቶ ሶእ ጣብተች ሙኑ እች ዲባን ፈቆ ፋርፋሩ ቶን ለሙ መሶበ ዊመ ኬሶኤ።
- 14 መኑንኩ ኢስ እዕዮ አጀብሲስኖ ጠዉ ለኦ ወክት «ሀንቅንከ ኩን ኣዲንያ አል አሜተኖሃ ነቢዬቹ» ይቶኡ።
- 15 እኮጎሬ ሁኩ ሙኑ ዋመ አቶተ ሰውይቶገ ደግ ኢስ ሜጥሀስ ቆተ አል ዋል አሳች ገበጭ ይኡ።

ኢስ ባር አሌን ሃመን ኦርዕዮገ
(ማቶ. 14፥22-33፤ ማር. 6፥45-52)

- 16 ሀዋሬ ወክት አሳባሰ ገሊል ባር ቤቹ ድርቶኤ።
- 17 እስን ጀልባን ኣግ ቅፍርናሆመ መርቶተ ኬኦኤ፤ ሁኩ ወክቱ ኦለት ቱንሰቹሃ እቅ፤ ሀትን ኢስ እስበ አሜቶበኡ እቅ።
- 18 ቡብሩ አበ ቡብርሰኖቤቹሃ ባሩ ለንቁቀኖት እቅ።
- 19 አሳባንት ኦንቱ ሀከረገገ ሌሁ ኪሎ ሜትረ ባር አሌን ሃንቶኢች ኤተሮን ኢስ ባር አሌን ሃመን ሀከ ጀልብ ቤቹ ሆንጠኮ ወክት ለእ ዋጅቶኤ።
- 20 ጠዉ እኮጎሬ ኢስ «እኔት! ዋጅቶኖቼ» ይሰ።
- 21 እስን ሙንዲኖን ጀልብ ኣዝ ኣጎሶሰ፤ ጀልቡንኩ ወክትንከሰ እስ መርታቤቹ ኢልሾሰ።

ኢስ ሄእ አቸተ አሁስ

- 22 ለንክ በር ባር ዉድ ኦዲን ፈቆ ሙኑ ባር አሌን ጠለዕል መቱ ጀልቡ ፈቆገ ለኦ እቅ፤ ሀትን ሜጢሃሰ አሳባት መሩሰለከ ኢስ እሳን ሜጡበ መርከባን ኣጉዕን ፈቆስ ደጎ እቅ።

* 6:7 ዲናር፡- የ መቱ በር ዊመ እእኖ መንቹሃ መቶ በሪሃ ባቴኖ ብርሃ ጌሰ።

23 ጠዉ እኩጎሬ ዎሉ መርከቡ ጥባርሰ ከተሚች ከዕይ ኢሰ መገኑ ገለትጩለከ ኡመቱ ጣብተ እቶ ቤቹ መድሰ አሜቶኡ።

24 ሁኩ መኑንኩ ኢሰ ህከረንገ ለሰ አሳበት ህከን ቤቶን ሄኡ ሆጉሰ ለኦ ወክት ህከን መርከባን ኣገ ኢሰ ሀሶተ ቅፍርናሆመ መርቶኡ።

25 ባር ዉድ አዲን ደጎሰ ወክት «አሰተማርቻ! መ ወክት ከቤቹ አልተ?» ይቶሰ።

26 ኢሰን ፈንቀሽ «ሀንቅንከ ያንክዕን፤ እዕኑ ኤሳሃ ሀሲንገታሁ ጣብተ እትሾንክዕንቤቼሃትለከ ዲቤንተቤቼሃት ቤሉ እን ለሊሾንክዕን እጅብሲሰኖ ጠውሃበኡ።

27 መንች ቤቱ እሰኖህዕን ዘላላሚሃ ሄኣ ሄኣ እቻተ አዕዬ ቤሉ በኣ እቻተ አቶኖቹ፤ እሰን እኑ መገኑ ቤተሀሰ እዕኖ ሀንቅተ መላ። ይሰ።

28 ሁኩ መኑንኩ «መገን ሆጉተ አዕኖተ መ እኡ ሀሰሰኖ?» ይቶሰ።

29 ኢሰን ፈንቀሽ «መገን ሆጉት መገኑ ሶኮሀሲን አመዕኑሃን» ይሉ።

30 እሰን ፈንቀሽት «ነኡ ለእን ከን አመዕንኖተ መ መላተ አሰተን? ሀትን መ አተን?

31 «አቶተ ሰሚች እቸተ ኣሴኦ» የመሞ ከተበሞገን ኣናከኔ ኡለ ኡድማን «መና ዬኖ እቸተ አቶኡ» ይቶሰ።

32 ኢሰ «ሀንቅንከ ያንክዕን፤ ሰሚች እቸተ ኣሰኖሁ ሙሳበኡ፤ ጠዉ እኩጎሬ ሀንቅ እቸተ ሰሚች ኣሰኖህዕን፤ ኣናኤ።

33 መሰንትሰ መገኑ ኣሰኖ እቸተ ሰሚች ድርታአተለከ ኣዲንያ አሊሃ ሄኡ ኣሰታአታን» ይሰ።

34 እሰን «ቀርቻ! ከ እቸተ ጉዕመ ወክትንከ ኣሰን» ይቶሰ።

35 ኢሰን ፈንቀሽ «ሄኣ እቸት ኣኔት፤ ኢቤቹ አሚተኖሁ ሆሮን ጎሩ አፈኖሰበኡ፤ ኢን አመዕንኖሁ ሆሮን ሰገበኖበኡ።

36 ጠዉ እኩጎሬ «እዕኑ ኤሳሃ ለእን አመዕንቴንታበኡ ይንክዕን።

37 እኑኤ ኣሰኖኤሁ ጉዕመንኩ ኢቤቹ አሚተኖ፤ ኣንን ኢቤቹ አሚተኖሃ ጉዕመንከ ኣብል ዋሽ ቶቻንሰበኡ።

38 እን ሰሚች አሚቻሚሁ ሶኮኤሀን ሃሽኣቱተ ዊንሾታት ቤሉ ገይኤ ሃሽኣቱተ ዊንሾታበኡ።

39 ሶኮኤሀን ሃሽኣቱተ ኣሴኤ መሲች መቼሃ ቤሱዕኖን ቁያመ በር ሬሆች ኬሶታት።

40 እንኤ ሃሽኣቱት ቤቱሰ ለዕይ እሲን አመዕንኖሁ ጉዕመንኩ ዘላላሚሃ ሄኣኖ ሄኡ ደኦታት፤ ኣንን ቁያመ በር ሬሆች ኬሳንሰ» ይሉ።

41 ኢሰ «ሰሚች ድርቶ እቸት ኣኔት» ይቤቹሃ አይሁዱ እሰ አሊን ቁንቁቶኡ።

42 እሰን «ኩን ነኡ እነሰለከ አመሰ ደንጋሞ የሱፍሃ ቤቱ ኢሳበኡን? እሰ ሀት ሕን ሰሚች ድርኖሞሃን» የኖት?» ይቶኡ።

43 ኢሰን ፈንቀሽ «መት-መቱክዕን ቁንቁቶኖቹ።

44 ኤሳሃ ሶኮ እኑኤ ኢ አደ ኤሶሀን ቤሉ አዪሁ ኢቤቹ አሚቶተ አታለኖበኡ፤ ኢቤቹ አሚተኖሃ ኣንን ቁያመ በር ሬሆች ኬሳንሰ።

45 ነቢያካ መጻፉን ጉዕመንኩሰ መገኒች ተማርቶረ ኣካኤ» የመሞ ከተበሞኡ፤ ህካን እኮቤቹሃ መገኒች ሞጮጩኢሁለከ ተማርሁ ጉዕመንኩ ኢቤቹ አሚተኖ።

46 ጠዉ እኩጎሬ እን ለዕኖሁ አዪሁ ኖበኡ፤ መገን አዲች እኮሁ ጠለዕሉ እን ለዕኖሃን።

47 ሀንቅንከ ያንክዕን፤ ኢን አመዕንኖሀህን ዘላላሚሃ ጉዕሚንከ ሄኣኖ ሄኡ ኖሰ።

48 ሄኣ እቸት ኣኔት።

49 ኣናከክዕን ኡለ ኡድማን «መና ዬኖ እቸተ አቶኡ፤ እሰን ሬቶኡ።

50 ሰሚች ድርቶ እቸት ተኒት፤ ከኒች አተኖሁ አዪሁ ሆሮን ሬሆኖበኡ።

51 ሁኩ ሰሚች ድርቶ ሄኣ እቸት ኣኔት፤ አዪሁ ህከን እቻች እቻጎሬ ዘላላሚሃ ጉዕሚንከ ሄኣኖ፤ ኣንን ኣዲንያ አሊሃ ኣሳሞ እቸት ገግኤ ማላኤ» ይሉ።

52 ህከ ወክት አይሁዱ «ኩ መንቹ ማለሰ እንቶተ ኣሶተ ሀት አታለኖ?» ይተን መት-መትንከሰ አደቁንቶኡ።

53 ኢሰን «ሀንቅንከ ያንክዕን፤ መንች ቤት ማለ እቴገባችለከ ቁጉሰ ኣገንባች ክዕንሃ ሄኡ ኣዜክዕን ኖህዕንበኡ።

54 ኢ ማለ አተኖሀሃለከ ቁጉኦ ኣገኖሀህን ዘላላሚሃ ጉዕሚንከ ሄኣኖ ሄኡ ኖሰ፤ ኣንን ቁያመ በር ሬሆች ኬሳንሰ።

55 መሰንትሰ ማላኤ ሀንቅተ እቸ፤ ሀትን ቁጉንኩኤ ሀንቅሃ ኣገኖሃን።

56 ማላኤ አተኖሁለከ ቁጉኤ ኣገኖሁ ኢን ሄኣኖ፤ ኣንን እሲን ሚጡብ እሃሞ።

57 ሄኣኖ እኑኤ ሶኮኤቤቹሃን ኣን እሲን ሄኣሚሃ እኮሞገን ሀትን ማላኤ አተኖሁ ኢ አዲን ሄኣኖ።

58 ሰሚች ድርቶ እቸት ተኒት፤ ሁኩንን ኣናከክዕን እቶኤሃ ኣጉድበሃን፤ መሰንትሰ ህከ እቸተ አቶአሩ ሬቶኡ፤ ከ እቸተ አቶአሩ ዘላላሚሃ ጉዕሚንከ ሄኣኤ» ይሰ።

59 ኢሰ ህዝን ዩኤሁ ቅፍርና ሆሚን ሄዕዮ ጭምት ምንን ተማርሰኒት።

ዘላለሚ ሄኦ ላገተ

60 አሳባች ልግቡሰ ህዝን ሞጭጭቶ ወክት «ኩ ትምርቱ እበ ከዕመናሃን፤ ከ ትምርት አይ ቶጎተ አታለኛ?» ይቶኡ።

61 ጠዉ እኮጎሬ ኢሰ አሳባሰ ከን ትምርትተኔሃ ቀንቀቶን አያኒንከሰ ደግ «ኩን ሉሲሰና ህዕኔንዶ?»

62 መንች ቤቱ ወዕና ሄዕዮቤቹ ፈንቀል ፋላን ለኤንተገር መ ይቶታት?

63 ሄኡ አሰናሁ መገንገ አያን፤ ጠዉ እኮጎሬ ማሉ ሚጡራ ደግለላና በእ፤ እን ክዕኔሃ ጠወዕዮም ላገተ አያንለከ ሄኦሃን።

64 ጠዉ እኮጎሬ ክዕኔ በሊች አመዕንትቡሩ ዮኡ። ዩሰ፤ ኢሰ ካን ዩኤሁ ወዕኔችን ኬሽ አመዕንትቡሩ እዩኤታጎሬ ህትን ህግሽ አሰናሁ እዩት ጎሬ ደገናቤቹሃት እቅ።

65 ህትን ኢሰ « አኑኤ አሜተናገ አዕዮህን ቤሉ ዋሉ ኢ አደ አሜቶተ አታለና በእ፤ ዩሚሁ ከኒሃት» ዩሰ።

66 ህዝን እኮቤቹሃ አሳባች ልግቡ ፈንቀልት መርቶኡ፤ ህከኒች ኤተሮን ኢሰ አዎኑ አጉርቶኡ።

67 ህዝን እኮቤቹሃ ኢሰ ቶን ለሙንከክዕኔ መጠርበህዕኔንዶ? ክዕኔች መቱ አልበሰሃ» ዩሰ።

68 ሰምዖን ጴጥርሰን ፈንቀሽ «ቀርቾ ነኡ ህከቤቹ መርናም? ከሳሃ ዘላለሚሃ ጉዕሚንከ እካ ሄኦ ላገተ ዮሄ።

69 ነኡ አት መገን ጠሊሊ እሁክ አመዕንን ደንጎም» ዩኦ።

70 ህትን ኢሰ «እን ክዕኔት ቶን ለሙንከክዕኔ መጠርበህዕኔንዶ? ክዕኔች መቱ አልበሰሃ» ዩሰ።

71 ካን ዩኤሁ ሰሞኔ ቤት አሰቆርንቶ ይሁድተኔሃት፤ መሰንትሰ ይሁድ ቶን ለሞንከ አሳባች መቱሰ እኮጎሬሁ ኢሰ ህግሽ አሰናሁ እሱ እኮቤቹሃት።

7

ኢሰ ዳሰ ከበጀተሃ ዩሩሳሌመ መርተ ጠዕሚመሰገ

1 ህከኒች ኤተሮን ኢሰ ገሊሊ ባደን ሃመናት እቅ፤ መሰንትሰ አይሁድ አዎንሳኑት ሸቶተ ሀሰሰቤቹሃ ይሁድ ባደን ሃሞተ ሀሸበእ።

2 ህከ ወክት አይሁድ ዳሰ በአሉ ሆንጠኮ እቅ።

3 ህዝን እኮቤቹሃ አመሰኦሱት «አዎንታሄሩ አት አታጎት ሆጉተ ለአተ ከንቤቹች ኬኦ ይሁድ ባዱ አሮእ።

4 መሰንትሰ ለሎተ ሀሰና መንቹ ሆጉሰ ማጭ እአተ ሀሰና በእ፤ አት ካን ጉዕመንከ አተን ገዉክ መኒሃ ጉዕሚንከ ለሊሱ ሀሰሰናሄ» ይቶሰ።

5 ህዝን ይቶኢሁ ዋሉ ፈቅ አመሰ ኦሱት እሲን አመዕንትቡቤቹሃት እቅ።

6 ህዝን እኮቤቹሃ ኢሰ «ኢ ወክቱ ኢልዮበእ፤ ጠዉ እኮጎሬ ክዕኔሃ ጉዕመንኩ ወክቱ መክዮአሃን።

7 ኩ አዳንያ አሉ ክዕኔት ግርህዕኔት አታለና በእ፤ ጠዉ እኮጎሬ ኤሳሃ ግበና፤ መሰንትሰ እን ሆጉሰ ሂላ እሁሰ ኩላሞቤቹሃት።

8 አዕኑ ህከ ከበጀተ ከበጃናቤቹ አሉ ዋልቴን መሬ፤ ወክቱኦ ኢልበቤቹሃ እን ህከ ቤቹ መርተ አታላምበእ» ዩኦ።

9 ኢሰ ህዝን ይ ገሊሊን ፈቆ።

ኢሰ ዳሰ በኣሊን ደገመሰ

10 ጠዉ እኮጎሬ አመሰ ኦሱት ህከ ከበጀት ከበጃናቤቹ መርቶች ኤተሮን እሰ ህከ ቤቹ ለሉዕናን ማጠም ኦርዕዮ።

11 ህከን ከበጀ ቤቸን አይሁድ ሹመት «እሰ ህከበ ዮኡ?» ይተን ሀሳሲት እቅ።

12 አይሁድ ኡመቱ ህከን ቤቸን እሰተኔ ኩሸኩሸይተን መት-መቱሰ «እሰ ጡማ መንቹ» ይተን ዋሉሰንገ «ሁትጎተበእ እሰ መን ሉሲሰናሃን» ይታሲት እቅ።

13 ጠዉ እኮጎሬ አይሁድ ሹመት ዋጅቶቤቹሃ እዩሁ እሰተኔሃ ለሊሽ ጠወዕዮበእ።

14 ህከ ከበጀት ከበጀተን ደሩ እኮህኒን ኢሰ አሌ ዋል ዱኦ ምኒ መር ተማርሰኦ።

15 ህከንቤቸንን አይሁድ ሹመት «ኩ መንቹ ተማርባሃ ከ ጉዕመንከ ህት ደጎተ አታሎ?» ይተን እጀብሰጭታኢት እቅ።

16 ህዝን እኮቤቹሃ ኢሰ ፈንቀሽ «እን ተማርሳሚሁ ኢች እሁዕን ኤሳሃ ሶኮኤህኒቸት።

17 መገን ሃሸኣቱተ እአተ ሀሰናሁ እዩሁ ኩ ትምህርቱ መገኒች አሜቸሃ እሁሰ ህከረንገ እን ገይችኤ ጠወኣምጎሬ መለል ደገና።

18 ገይችሰ ጠወኣናሁ ገይህሰ ኬዕምኣ ሀሰና፤ ጠዉ እኮጎሬ ሶኮሰህን ኬዕምኣ ሀሰናሁ ሀንቅዮ መንቹ፤ ክዘቡንኩ እሲን ዮሰበእ።

19 ሙሴ ሕገ ኣሰዮህዕኔበእንደ? እኩጎሬ ክዕኔኤች መቱክዕኔህ ሕገ ኣገርቴንበረ፤ ሚሃት ሽቶኖኤተ ሀሲንንተኤሁ?» ዩሰ።

20 ኤመቱንኩ ፈንቀሽ «ኬሳሃ ዱሩ ኣፎሃ፤ ኬሳሃ ኣይ ሾሂተ ሆሾሂ?» ይቶሰ።

21 ህትን ኢሰ «እን መት ሆጉተ ኣዕዮም፤ ኣዕኑ ጉዕሙንኩ ሀከኒን ኣጀብሲጭቴንታእ።

22 ሙሴ ጡርከም ሴረ ኣሰዮህዕኔ፤ ሁኩንን ኣናካቺት ቤሉ ሙሴችበእ፤ ኣዕኑ ኣበ በሬን ጡርከንቴንታት።

23 ሙሴ ሕጉ ድጅምበገ መኑ ኣበ በሬን ጡርከመኖ እኩች ኣን ኣበ በሬን መንች ዊመንከሰ ጅሰመ ፈይሾምቤቺሃ ኢን ሚሃት ኤመዕርቴንታት?

24 ሀንቅ ፍርደ ፈረጃ ቤሉ መን ኣልተ ለኤን ፈረደኖቹ» ዩሰ።

መሲህተኔሃ ኬኦ ኦደተ

25 ዩሩሳሌም ከተማን ሄኦ መኒች መት-መቱሰ «ኩን ሽቶተ ሀሳሰዮ መንቹበእንደ?

26 ሁኩዕኑን ኣሰ ኣልሳሽ ጠወኣኖት፤ ኣሰን መቱርቹሃ ይቶሰበእ፤ ሹመት ኩ መንቹ መሲህ ኣሁሰ ሀንቅንከ ደግትንደ ጨለይቶኣሁ?

27 ጠወ እኩጎሬ ኩ መንቹ ኣሚቶቤቹ ነኤ ደንጋም፤ መሲሁ ኣሚተኖ ወክት ኣሰ ሀከን ኣዲች ኣሚቶንደ ኣዪሁ ደገኖበእ» ይቶኡ።

28 ህካን እኩቤቺሃ ኢሰ መገን ምኔን ተማርሰን ላገሰ ጎት ኣዕይ «ኣን ሀከን ኣዲች ኣሚቶምጎሬ ኤሳሃ ደገንተ፤ ጠወ እኩጎሬ ኣን ገይንከኤ ኣሚቶምበእ፤ ኤሳሃ ሶኮኢንኩ ሀንቅሃ፤ ኣዕኑ ደገንተሰበእ።

29 ኣን ኣሰ ኣዲች ኣሚቶምቤቺሃለከ ኣሰን ኤሳሃ ሶኮኤቤቺሃ ኣን ኣሱ ደጋም» ዩኣ።

30 ህካን እኩቤቺሃ ኣሰን ኣፎሰተ ሀሶኤ፤ እኩጎሬ ወክቱሰ ኢልበቤቺሃ ኣዪሁ ኣፎሰበእ።

31 እኩጎሬሁ ኤመተች ልግቡሰ ኣሲን ኣመዕንት «መሲሁ ኣሚቶረ ኩ መንቹ ኣዕዮ ኣጀብሲሲኖ ጠዊች በተኣኖሲሃ ኣኣኖሃንደ?» ይቶኡ።

ኢሰ ኣፎተ ወታደረ ሶሃመገ

32 ፈርሳውት መኑ ኢሰተኔሃ ኩሽኩሽ ይት ጠወኣን ሞጮጭቶኡ፤ ህካን እኩቤቺሃ ዊሰ ኣዎንሳኑትለከ ፈርሳውት ኢሰ ኣፍሲሶተ ወታደረ ሶኮኡ።

33 ኢሰን «ኣን ክዕኒን ሚጡብ ቀዉ ወክት ዱንካም፤ ህከኒች ኤተርን ሶኮኤሀኒቤቹ መሪም።

34 ኣዕኑ ኤሳሃ ሀሲንንተ፤ እኩጎሬሁ ደገንተኤበእ፤ ኣን ዮም ቤቹንከ ኣዕኑ ኣሚቶኖተ ኣታልቴንተበእ» ዩኣ።

35 ህካን እኩቤቺሃ ኣይሁዱ መት-መትሀሰ «ነኤ ደንግበሰገ ኩ መንቹ ሀከቤቹ መርታት? ህከረንገ ግሪክ መን በላን ሄኣ ኣይሁድቤቹ መር ግሪክ መን ተማርሶታትንደ?

36 ህትን ኤሳሃ ሀሲንተኤ ጎሬ ደገንተኤበእ፤ ኣን ዮም ቤቹ ኣሚቶኖተ ኣታልቴንተበእ ዩሰ መ ዩሃሰ?» ይቶኡ።

ሄኣ ዊ ቡቁተ

37 ህከ ከበጀት ከበጃን ሹሌኖ ጎፍሚሰ ሎረ በሬን ኢሰ ኡር ላገሰ ጎት ኣዕይ «ውሁ ሰገሶሲህ ዮ ጎሬ ኣቤቹ ኣሚች ኣገን።

38 ኣን ኣመዕነኖሀኒች ጠሊሊ መጻፋን የኖገን ሄኣ ዊ ቡቁት ኣዚችሰ ቡቃእ» ዩኣ።

39 ህት ይ ጠወዕኖንኩ ኣሲን ኣመዕንቶሩ ኣኣታ ጠሊሊ ኣያንተኔበእ ኣቅ፤ መሰንትሰ ኢሰ ኬዕምኝ ወክቱ ኣሉሶን ዮቤቺሃ ጠሊሉ ኣያኑ ኣሰምበኣ ኣቅ።

ኤመት በላን መለዕለንሹ ኣሁሰ

40 መኒች መት-መቱ ህከ ጠወ ሞጮጭቶ ወክት « ኣሚተኖ» የመሞ ነቢዬቹ ሀንቅንከ ከኒት» ይቶኡ።

41 ህትን ሞሉሰንገ «ኩን መሲህት» ይቶኡ፤ ጠወ እኩጎሬ መት-መቱሰ «መሲሁ ገሊሊ ባዲች ኣሚተኖንደ?

42 መሲሁ ደዉዳ ዘረች ኣለመኖገለከ ደዉዳ ኣለሞ ቤተልጡም ከተሚች ኣሚተኖገ ጠሊሊ መጻፋን ከተበሞበእንደ?» ይቶኡ።

43 ህካን እኩቤቺሃ መን በላን ኣሰ መሳን መለዕለንሹ እኩኡ።

44 ኣሳችን መት-መቱሰ እሱ ኣፎተ ሀሶ ኣቅ፤ እኩጎሬ ኣዪሁ ኣፎሰበእ።

ኣይሁድ ኣዎንሳኑት ኣመዕኑ ሆጉሰ

45 ህከኒች ኤተርን ወታደሩንኩ ዊሰ ኣዎንሳኖበለከ ፈርሳዊቤቹ ፈንቀልት መርቶኡ፤ ኣሰን «ኣሱ ሚሃት ኤቤንታበኣሁ?» ይቶኡ።

46 ወታደሩንኩ «ህከን መንችገ ኣዪሁ ጠወዕኖበእ» ይት ፈንቀሽቶኡ።

- 47 ጠዉ እኮጎሬ ፈርሳውት «ክዕኔታሁ ሉሰሾህዕኔንደ?»
- 48 ሹማች ህከረንገ ፈርሳዌች እሰን አመዕኔአሁ ዮጎር ደገኒታእንደ?
- 49 ጠዉ እኮጎሬ ኩ ሙሰ ሕገ ደግቡ ኡመቱ ቦሮረሞእሃን» ይቶኡ።
- 50 ህከን መኒችን መቱስ ከኒች ብርንተ ኢሰቤቹ መሮ «ጎቆድሞሴ» ዬና ፈርሳውቹ
- 51 «ሕግኔ ሃለን መቶ መንች ጠወ ሞጮጭዕነለከ መ እዕዮ ጎሬ ደጉዕነ ፈረዱ ሀሰሰናንደ?» ዬሰ።
- 52 እሰን «አቲቱ ገሊሊ ባዲችትንደ? ነቢዬቹ ገሊሊ ባደን ነጾተ አታለናበእገ መረመርት ለእ» ይቶሰ።
- 53 እሰን መት-መቲን ሞንሰ መርቶኡ።

8

ዝነተ አተን አፈመሴ መንቸተ

- 1 ህከኒች ኤተሮን ኢሰ ዘይት ሀቀ ነጻድ ቆተተ ኦሮዕዮ።
- 2 ለንክ በር ሱጵተ ዱእ ምሊ ፈንቀል እሚቹ፤ ኡመቱ ጉዕሙንኩ እሰበ እሚች ጭምዬሃን እሰ አፋዕል ተማርሱ ጀመሮ።
- 3 ሕገ ተማርሰታእሩለከ ፈርሳውት ዝነተ አተን አሮሴ መት መንቸተ ኡብ በላንከሰ ኡርሶኡ።
- 4 እሰን ኢሰ «አሰተማርቸ! ት መንቸት ዝነተ አተን አፈንቶለተ።
- 5 ህትኔ ጠወ አታሚንቱ ክኒን ቀሴን ሼናግ መሰሰ ሕገን አዘዞ፣ኔ፤ እትንገ እሴተኔሃ መ ይተን?» ይቶኡ።

- 6 እሰን ህት ይቶኢሁ እሱ ኦደ ጠወ ደግ ፊተንቶተ ሀሶቤቹሃት እቅ፤ ጠዉ እኮጎሬ ኢሰ ሙግይ ዙሩዕሚንከሰ ኡለ አሊን ከተቡ ጀመሮ።
- 7 ፈንቀላንሰት ጠዕምቶሰ ወክት ሙግ ዬቤቹች ጎበሰ ኬሽ «ክዕኔ በሊች ጩቡ ዮሰበእ መንቸ ሄጭ ክኒን ቀሴን» ዬሰ።
- 8 ህከኒች ኤተሮን ለንኪሃ ሙግይ ኡለ አሊን ከተቡ ጀመሮ።
- 9 እሰን ህካን ሞጮጭቶ ወክት ባሊቁች ኬሽ ሀርድ ኢሊ መት-መትን ፋልት መርቶኡ፤ ህካን እኩቤቹሃ ኢሰ ብሪሰ ኡርቶ መንቸን ሚጥሃሰ ፈቆ።
- 10 ህከኒች ኤተሮን ኢሰ ጎበሰ ኬሽ ለዕይ «ቲ መንቸ! ከሰሰናሄ ሙኑ ሀከበ ዮኡ? አሊክ ፈረጀሁ መቱሀ ዮበእንደ?» ዬሰ።
- 11 [እሰን «ቀርቸ! መቱሀ ዮበእ» ይቶኡ፤ ኢሰን ፈንቀሽ «አኒሁ ፈረዳንኬበእ ኦሮእ፤ ከኒች ኤተሪሃ ጩብ አቶት» ዬሰ።]*

ኢሰ ኣዱንደ አል ኦር እሁሰ

- 12 ለንኪሃ ኢሰ «እን ከን ኣዱንደ አልሃ ኦርሃን፤ ኤሳሃ አዎንዮሁ ጉዕሙንኩ ሄእ ኦር ደአድ ቤሉ ቱንሰቸን ሃመናበእ» ይ ጠወዕዮሰ።
- 13 ፈርሳውት «እት ገይክተኔሃ መሰከርታንተ፤ መሰከርቶንተሁ ሀንቅሃበእ» ይቶኡ።
- 14 ኢሰን «መቱርቸሃ እን ገይሁ መሰከርም ጎሬ እን ሀከን አዲች አሚቸም ጎሬ ህትን ሀከ አደ መራም ጎር ደገግቤቹሃ ሞሰክሩእ ሀንቅሃን፤ ጠዉ እኮጎሬ አዕኑ እን ሀከን አዲን አሚቸም ጎር ህትን ሀከ አደ መራም ጎር ደገኒንተበእ።
- 15 አዕኑ መኬሀዕኔገ ፈረዳንንተ፤ ጠዉ እኮጎሬ እን አዬ አሌሌ ፈረዳምበእ።
- 16 ፈረጀም ጎሬ ፍርዱእ ሀንቅሃን፤ መሰንትሰ ፈረንዳሚሁ አኔትለከ እናኤ ቤሉ እን ሚጣሃኤበእ።
- 17 ለሙ መንቸ መሰከርቶ ጠወሰ ሀንቅ እሁሰ ሕገንከክዕኔ ከተበሞኡ።
- 18 ህካን እኩቤቹሃ እን ገይኡተኔሃ መሰከርም፤ ህትን ኤሳሃ ሶኮኤ ኢ አኑሁ አተኔሃ መሰከረኖ» ይ ፈንቀሽኦ።
- 19 እሰን «አኑክ ሀከበ ዮኡ» ይት ጠዕምቶሰ፤ ኢሰን «ኤሳላከ እነኤ ደገኒንተበእ፤ ኤሳሃ ደገኒታ እቃን ኢ እነሃ ደገኒንተ እቅ» ይ ፈንቀሽኦ።
- 20 ኢሰን ህካን ጠወዕዮሁ መንገ ሞኔን ብረ ቶጌድ ሳጥን መደን አፋዕል ተማርሰኒት እቅ፤ እኮጎሬ ወክቱሰ ኢልበቤቹሃ አዬሁ አሮሰበእ።

አመዕነቱ ሆፈዕዮቤቹሃ እሴመ ሸዘነተ

- 21 ለንኪሃ ኢሰ «እን ኦርኣም፤ አዕኑ ኤሳሃ ሀሴንንተ፤ ጠዉ እኮጎሬ ጩቢንከክዕኔን ሬቴንንተ ቤሉ እን ኦርኣምቤቹ መርቶዮተ አታልቴንተበእ» ዬሰ።
- 22 አይሁድ አዎንሳኑት «እሰ ለን ኦርኣምቤቹ አዕኑ አሚቶናተ አታልቴንተበእ» ዩሰ ገዉሰ ሾታትንደ?» ዮቀንቶኡ።

7:50 ያህ. 3፣1-2። 8:5 ለዌ 20፣10፤ ዘዳ. 22፣22-24። * 8:11 ልግቡ ለህ ከታሰት ሃጭት ሄእ ፈረሰመ እኒን 7፣53—8፣11 ዮእሃ በርግታእ፤ መት-መቱ ያህ. 21፣24 ኡተር ኣግሳእ፤ ሞላሰንገ ሉቃ. 21፣38 ኡተር ኣግሳእ፤ መቱ ለሀ መጻፉ ያህ. 7፣36 ኡተርን ኣግሶኤ። 8:12 ማቶ. 5፣14፤ ያህ. 9፣5። 8:13 ያህ. 5፣31።

23 ሀኪኒች ኤተሮን ኢሰ «አዕኑ ወሮን ከን ኣዲንያ አሊቸት፤ እኮጎሬ እን አሊቸት ቤሉ ከን ኣዲንያ አሊቸብእ።

24 እን ክዕኔተ ጨቤቢንክክዕኔን ሬቲነንተ። ዩሚሁ ከኒሃት፤ መሰንትሰ እን ኤሳሃ አሁኤ ደገን አመዕንቲንባች ጨቤቢንክክዕኔን ሬቲነንተ» ዩሰ።

25 እሰን «አት አዩት?»። ይቶሰ፤ ኢሰን «እን ወዕኔችን ኪሸ ኩሎንክዕኔጋት።

26 እን ክዕኔትኔሃ ያምርቼለክ ፈረዳምርቼ ልግቡ ዮኤ፤ እኮጎሬ ሶኮኤሁ ሀንቅሃን፤ እን ኣዲንያ አሊሃ ጠወአሚሁ አሲች ሞጮጩሚሃት» ዩሰ።

27 እኮጎሬ እሰ እሰ አኒተኔሃ ጠወዕዮሰጎ ሰውይቶበእ እቅ።

28 ሀካን እኮቤቹሃ ኢሰ «መንች ቤቱ መሰቀላን አሊ ዋሽቲን አፋሽቲነንተ ወክት እን ኤሳሃ አሁኤ ደገንንተ፤ ህትን ጠለዕል እኑኤ ተማርሴኤሃ ጠወዕዮምጋት ቤሉ ገይኤ ዎልቃን መቱርቹሃ እአምበእ ረገንንተ።

29 ኤሳሃ ሶኮሁ ኢኒንት፤ እን ጉዕመ ወክትንክ እአም ጠወ እሱ ሙንዲሲሰኖቤቹሃ ኤሳሃ ሚጡኣ አጉሮኤበእ» ዩሰ።

30 ኢሰ ሀካን ጠወዕዮ ወክት ልግቡ ሙኑ እሲን አመዕንቶኡ።

ጨብ ርሰማች ሰዎልድማን ፋልተኔሃ

31 ኢሰ ሀኪን አመዕንቶ አይሁዲሃ «አዕኑ ላጋንታኤ ሄኤንተ ጎር ሀንቅንክ እዎንቲነንተኤር።

32 አዕኑ ሀንቅንክ ደገንንተ፤ ሀንቅንኩ ሰዎልድማን ፋሸኖሀዕኔ» ዩሰ።

33 ጠወ እኮጎሬ እሰ «ነኡ አብራሂምተ ዘር፤ ኪንከ ኢሊ አዩሁ ርሰ እንኩምበእ፤ አትንገ ሰዎልድማን ፋልቲነንተ። ይታንቲሁ ሚሃት?»። ይት ጠዕምቶኡ።

34 ኢሰን «ሀንቅንክ ያንክዕኔ፤ ጨብ አእኖሁ ጉዕሙንኩ ጨብሃ ርሰቹ።

35 ካዲንቹ ቀርቶሰ ምኔን ዘላላሚሃ ሄኤኖበእ፤ እኮጎሬ ቤቱ ዘላላሚሃ ምኔን ሄኤኖ።

36 ሀካን እኮቤቹሃ ቤቱ ሰዎልድማን ፋሸሀዕኔች ሀንቅንክ ሰዎልድማን ፋልቲነንተ።

37 አዕኑ አብራሂም ዘርተ አሁክዕኔ ደንጋም፤ ጠወ እኮጎሬ ኢ ላገተ ቶጌንበቤቹሃ ኤሳሃ ሸቶኖተ ሀሲነንታት።

38 እን እንኤቤቹን ለዕዮምርቹ ጠወአም፤ አዕኑ አኒችክዕኔ ሞጮጭቲነንታሃ አቲነንተ» ዩሉ።

39 እሰን «እኑኔ አብራሂምተ» ይቶኡ፤ ህትን ኢሰ «አብራሂም አለተ አኪንተ እቃን አብራሂም አዕዮሃ አቲነንተ እቅ።

40 ጠወ እኮጎሬ አዕኑ መገኒች ሞጮጩም ሀንቅ ኩሎንክዕኔሪ ሸቶኖኤተ ሀሲነንታት፤ አብራሂም ህት አዕዮበእ።

41 ህትን አዕኑ እንክዕኔገን አቲነንታት» ዩሰ፤ እሰን «ነኡ ሀንጨረበሃበእ፤ መቱ እኑ ዮኔ፤ እሰን መገንሃ» ይቶሰ።

42 ህትን ኢሰ «መገን እንክዕኔ እኮ እቃን ኤሳሃ ኢትቲነንተ እቅ፤ መሰንትሰ እን መገን አዲች አሚቶም፤ ኤሳሃ እሰ ሶኮኤ ቤሉ እን ገይንከእ አሚቶምበእ።

43 ሚሃት ጠወአ አጥራመቲነንተበኢሁ? ላገኤ ቶጎኖተ ሀሲንበቤቹሃበእንደ?

44 አዕኑ አልቢሰተ አለ፤ እንክዕኔ ሰውት አቶኖተ ሀሲነንተ፤ እሰ ዎዕኔችን ኪሸ መን ሸኖሃን፤ ሀንቅንኩ እሰን ዮሰበኢቤቹሃ ሀንቁን ኡርዮበእ፤ እሰ ክዝበሻለክ ክዝብ እን እኮቤቹሃ ክዝብ ጠወአኖሁ ገይቶሲት።

45 ጠወ እኮጎሬ ሀንቅ ጠወአምቤቹሃ አመዕንቲነንተኤበእ።

46 ክዕኔ በሊች ኤሳሃ ሕት ጨብኛ። ይ ጠወአኖሁ አዩት? እን ሀንቅ ጠወአሚሃ እኮች ሚ አመዕንቲነንተኤበእ?

47 መገን አዲች እኮሁ መገን ላገተ ሞጮጩ፤ አዕኑ መገን አድረ እኪንበቤቹሃ መገን ላገተ ሞጮጭቲነንተበእ» ዩሰ።

ኢሰ አብራሂሚች ሄጮ ሄኡሰ

48 አይሁዱ ፈንቀሸት «ነኡ ሕት ሰምራውቹሃን፤ ህትን አልብሱ አረኤሄ ዩኔ ሀንቅሃበእንደ?» ይቶሰ።

49 ሀካን እኮቤቹሃ ኢሰ «ኤሳሃ አልብሱ አረኤበእ፤ ጠወ እኮጎሬ እን እነኤ ኬዕምሳሚት፤ አዕኑ ኪዕምሴንታኤበእ።

50 እኮጎሬ እን ገይኤ ኬዕምኝ ሀሳምበእ፤ ኢ ኬዕምኝ ሀሰኖሁለክ ፈረደኖሁ ዎሉ ዮኡ።

51 ሀንቅንክ ያንክዕኔ፤ ላገኤ አገረኖሁ ዘላላሚሃ ሬሆኖበእ» ይ ፈንቀሸኦ።

52 አይሁዱ «ዱሩ አረኤሂገ ቲሱ ደንጎም፤ አብራሂምለክ ኪያከት ሬቶኡ፤ እኮጎሬ አት ላገኤ አገርታኡሩ ሆሮን ራታበእ» ይታንቲት።

53 ሀንቅንክ አት አናኔ አብራሂሚች በተአንንደ? አብራሂምለክ ኪያከት ሬቶኡ፤ እኮጎሬ አት ገዉክ አዩት ይቶታት?» ይቶሰ።

54 ህትን ኢስ ፈንቀሽ «እን ገወኤ ከበጃም ጎር መቱርቸሃ ደግለለኛበእ፤ ኤሳሃ ከበጀኖህ እኑኔ ለመገኘኑ» ይገነገሩ እናሉ።

55 ጠዉ እኩጎሬ አዕኑ እሱ ደገንታበእ፤ እን ደጋንሰ፤ እን ልሱ ደጋምበእ፤ ዬም ጎሬ ክዕኔንገ ክዘበኘ ለሃም፤ እኩጎሬ እን እሱ ደጋም፤ ላገሲ አገራም።

56 እንክዕኔ እብራሂም ሃሽእቱተ እን አሜታም በር ለዕይ ሙንደኦታት እቅ፤ እሰን ህካን ለዕይ ሙንደዕዮ» ዬሰ።

57 ህከ ወክት አይሁዱ «አት አለንቶንቲቸ ኦንታሁ ዘማን እኩሂበኢሁ ልብራሂመ ለዕዮም ይተንደ?» ይቶሰ።

58 ህትን ኢስ «ሀንቅንከ ያንክዕኔ፤ እብራሂም እለሙዕነ ዋዕናከ እን ዮምሃ» ይ ፈንቀሺሰ።

59 ህካን እኩቤቸሃ አይሁዱ ኢስ ቀሶተ ክኑ ኬሶኤ፤ ጠዉ እኩጎሬ ኢስ አሳቸ ገበጭ ይ መገን ምኒቻ ፋል ኦርዕዮ።

9

ኢስ ቆቀ መንቸ ፈይሱሰ

1 መቱ በር ኢስ ዋቃን ሃመን ቆቀ እክ አለሞ መንቸ ለዕዮ።

2 ህከንቤቸንን አሳበንት ኢስ «አሰተማርቸ! ኩ መንቸ ቆቀ እክ አለሞሁ አይ ለዕዮ ጨቢህት? ገወሰ ለዕዮ ጨቢህትንደ ኦኑስለከ አመሰ አቶ ጨቢህት?» ይት ጠዕምቶሰ።

3 ኢስን ፈንቀሽ «ኩ መንቸ ቆቀ እኩሁ ገወሰ ለዕዮ ህከረንገ እኑስለከ አመሰ አቶ ጨቢህበእ፤ ጠዉ እኩጎሬ መገን ሆጉት እሰ አሊን ለሊቶታት።

4 በሩ ዮ ጌሳን ሶጉኤ ሆጉተ እኤ ሀሰሰኖኤ፤ መሰንትሰ አይሁ አኦተ አታለኛበእ ሀንከዕርት አሜታኦ።

5 እን ከን አዲንያ አሊን ሂዕዮም ጌሳን ከን አዲንያ አሊሃ ኑርሃን» ዬእ።

6 ህካን ጠወዕዮቻ ኤተርን እንጀ ቱይ ትበ ቁፍሽ ጭቀሰ ህከን ቆቀ መንቸ አሊን ቡር

7 «መርት ሰልሆም ዋን አዕል» ዬሰ፤ «ሰልሆም» ዩ «ሶቀሞሃ» ዩሃን፤ ህካን እኩቤቸሃ መንቸንኩ ሙር አዕል ፈይ ለእን ፈንቀል አሜቸ።

8 ኦሊሰ መኑለከ ከኒቸ ብርተ አፋዕል ኡጨን ለዕዮ መኑ «ኩን አፋዕል ኡጨኖሃ መንቸበእንደ?» ይቶኤ።

9 መት-መቱሰ «ኤ እሶት» ይቶኤ፤ ዋሉሰንገ «እሱ አኑደኖት ቤሉ እሶበእ» ይቶኤ፤ ጠዉ እኩጎሬ ሁኩ መንቸንኩ «ኤ አኔት» ዬእ።

10 መኑንኩ «አልክ ሀት እክ ፈንተኑኤ?» ይቶሰ።

11 እሰን « ኡሲ» ዬኖ መንቸ ጭቀ ቁፍሽ አሊንከእ ቡር ብልሆም ዋን መርት አዕል ዬኤ፤ እንን ህከ ቤቹ ሙር አዕል ፈይም» ይ ፈንቀሺእ።

12 እሰን «መንቸሰ ህከበ ዮኑ?» ይቶሰ፤ እሰን «እን ደጎምበእ» ይ ፈንቀሺእ።

13 እሰን ህከ ቆቀ እክ አለሞ መንቸ ፈርሳዌቤቹ መሰቶኤ።

14 ኢስ ጭቀ ቁፍሽ መንቸ አልተ ፈይሾ በሩ ፎሎጭዮ በር እቅ።

15 ፈርሳውት ህከ መንቸ «ሀት እክ ለኦተ አታልት?» ይት ጠዕምቶሰ፤ እሰን «አሊንተአ ጭቀ ቡራን አዕል ለዕዮም» ዬሰ።

16 ህከ ወክት ፈርሳዌቹ መት-መቱ «ኩ መንቸ ፎሎጭ በር ከበጅበቤቸሃ መገንዮ መንቸበእ» ይቶኤ፤ እኩጎሬ ዋሉሰ መኑ «ጨቤቸ መንቸ ህትኔ አጀብሲሰኛ ጠወ ህት አኦተ አታለኛ?» ይቶኤ፤ ህከን መሳን በላንከሰ አደደመት እኩኤ።

17 ህካን እኩቤቸሃ ህከ ቆቀ መንቸ «ኩ መንቸ አልክ ፈይሾቻ አት አሰተኔሃ መ ይተን?» ይት ለንኪሃ ጠዕምቶሰ፤ እሰን «ነቢዬቸሃን» ዬሰ።

18 አይሁድ አምንሳኑት ሁኩ መንቸ ብርተ ቆቀ እኩሁ እሁሰ ቱንገ አልሰ ፈይት ፈንተኑገ እነሰለከ አመሰ ገእት ጠዕምቶተ ኢሉ አመዕንቶበእ እቅ።

19 ህካን እኩቤቸሃ እሰን « ቆቀ አለሞኤ» ይገነገሩ ቤቱክዕኔ ከንትንደ? ቱሱ ህት እክ ለኦተ አታሎ?» ይት እነሰለከ አመሰ ጠዕምቶኤ።

20 እኑስለከ አመሰ «ኩ መንቸ ቤቱኔ እሁሰለከ ቆቀ እክ አለሙሰ ደጋገም።

21 ጠዉ እኩጎሬ ቱሱ ህት እክ ለአኖት ጎራ፣ ህትን አይ አልሰ ፈይሾሰ ጎር ደጋገምበእ፤ እሰ ገወሰ ደጎ መንቸ እኩቤቸሃ ገወንከሰ ጠዕምቶሰ፤ እሰ ገይሰተኔሃ ኩሎተ አታለኛ» ይቶኤ።

22 እሰን ህት ይቶኢሁ አይሁድ ሹመተ ዋጅቶቤቸሃት፤ መሰንትሰ ኢስ «መሲህ» ይ መሰከረኖሁ ሂዕዮጎር ጭቀትሰ ምኒቻ ፋሽቶተ ከኒቸ ብርተ አይሁድ ሹመት አምዕለንቶቤቸሃት።

23 ህካን እኩቤቸሃ እኑስለከ አመሰ «እሰ ገወሰ ደጎ መንቸ እኩቤቸሃ እሰንከ ጠዕምቶሰ» ይቶኤ።

24 ህከን መሳን ቆቀ እክ አለሞ መንቸ ለንኪሃ ገእት «አት መገኒሃ ኬዕምኦ አሰ፤ ኩ መንቸ ጨቤቸ ለሁሰ ነኤ ደንጋም» ይቶኤ።

25 እሰን «ጨበኛ እሁሰ ደጋምበእ፤ እንደ ዋዕነ ቆቀ እሁለለከ ቴንገ ለአምገ ጠለዕል ህካን ደጋም» ይ ፈንቀሼእ።

26 እሰን «እሰ መ አዕዮሃ? እልክ ሀት አዕይ ፈይሾሃ?» ይቶሰ።

27 እሰን ፈንቀሽ «እን ዋዕናንከ ኩሎንክዕኔ እቅ፤ እኩጎሬ አዕኑ ሞጮጭቶናተ ሀሴንገታበእ፤ ቴንገ ማሃ ሞጮጪ ሀሴንገታት? አዕኑ እሱ አምንቴንገተረ እኩናተ ሀሴንገታትንደ?» ይሰ።

28 እሰን እሱ ቦርርተን «እሱ አምንገታገታቴ አቴት፤ እኩጎሬ ነኡ ሙሰ አምናምረ።

29 መገኑ ሙሲሃ ጠወዕዮገ ነኡ ደንጋም፤ ጠወ እኩጎሬ ኩ መንቹ ሀከንቤቹችት ጎር ደንጋምበእ» ይቶሰ።

30 ሁኩ መንቹ እሳሃ «ኩ መንቹ ሀከንቤቹችት ጎር አዕኑ ደጉ ሆጉክህኔ እበ እጀብሲሲናሃን! ጠወ እኩጎሬ እልኤ ፈይሾሁ እሱት።

31 መገኑ ጨበኛኑት ይታ ጠወ ሞጮጪናበእገ ደንጋም፤ ጠወ እኩጎሬ መገኑ ዋጀናሁለከ እሰ ሃሽአቴተ እአናሁ ሃዕዮጎር ሁከን የና ጠወ መገኑ ሞጮጪና።

32 ቆቀ እክ አለሞ መንቹ አልተ ፈይሾሁ ዮኡ» ይን ጠወኤን ከበሬ ኢሊ ሆር ሞጮጪሞበእ።

33 ኩ መንቹ መገኒች እህበእቃን መጥርቹሃ እኑተ አጋለናበ እቅ» ይ ፈንቀሼሰ።

34 እሰን «አት ጉዕሙርቹንኩክ ጨበን እለንቶንገታቴ ኔሳሃ ተማርሰተንገደ?» ይት ጭምት ምኒች ፋሽቶሰ።

ቀልብ ቆቅመተኔሃ

35 ህከ መንቹ አይሁዱ ጭምት ምኒች ፋሽቶሰገ ኢሰ ሞጮጪኤ እ፤ ኢሰ ህከ መንቹ ደግ «መንቹ ቤቶን እመዕንተንገደ?» ይሰ።

36 እሰን ፈንቀሽ «ቀርኝ! እን እሰን እመዕናተ እሰ አይት?» ይለ።

37 እሰን «አት እሱ ከኒች ዋዕናንከ ለእንት፤ ህትን ቴሁ ኪን ጠወአናንኩ እሱት» ይሰ።

38 እሰን «ቀርኝ! እመዕናም» ይሰገጃሰ።

39 እሰን «ለአበር ለተለከ ለአእሩ ቆቆተ እን ፈረደተ ከን ኣዱንያ አል አሜሾም» ይለ።

40 ህከ ወክት ኢሰ መዴን ሄኔ ፈርሳውት ህካን ሞጮጭት «ነኡ ቆቃናተንደ?» ይቶሰ።

41 ኢሰ እሳሃ «ቆቃተ ተክኒገተ እቃን ጨብ እሆሆዕኔበ እቅ፤ ጠወ እኩጎሬ ቴሱ ለዕናሚት ይቴንተቤቹሃ ጨብ እሆሆዕኔ» ይሰ።

10

ኢሰ ጡመ ዜማንቹ እሁሰ

1 ኢሰ «ሀንቅንከ ያንክዕኔ፤ ሆለ ጎረንች ኡርን እሁዕነ ዋሎ አዲን አገና መንቹ ሞጋንቹሃለከ ዘራፊተ።

2 ጠወ እኩጎሬ ኡርን አገናሁ ሆላተሰ ዜማንቹሃን።

3 እሲሃ ኡር አገራንቹ ኡሩተ ፈንናሰ፤ ሆለንት ላገሰ ሞጮጭታኤ፤ እሰን ገይሰ ሆለተ ሱዕሚንከሰ ገእን አምንሰ አብል ፋሽናሰ።

4 ገይሰረ ጉዕመንከ ገእ ፋሼች ኤተርን ብሬንከሰ ሃመን አምንሰና፤ ሆለንትሰ ላገሰ ደጋቤቹሃ አምንታሰ።

5 ጠወ እኩጎሬ ዋለች ሀንታ ቤሉ አምንታሰበእ፤ መሰንትሰ ዋል ላገተ ደጋበእቤቹሃት» ይለ።

6 ኢሰ ህከ ሞሳልተ ኩሎሰ፤ ጠወ እኩጎሬ እሰ ኩሎሳሁ መሃጎሬ አሞራመቶበእ።

7 ህካን እኩቤቹሃ ኢሰ ለንኪሃ «ሀንቅንከ ያንክዕኔ፤ እን ሆለት ኣጋታ ኡሩ።

8 ኤሳሃ ሄጭት አሜቶአሩ ጉዕሙንኩ ሞጋናተለከ ዘራፊታ፤ ጠወ እኩጎሬ ሆለት ሞጮጭቶሰበእ።

9 እን ኣጌና ኡሩተ እኩምቤቹሃ ኢ አዲን አገናሁ እዩሁ ጡሙና፤ አገናለከ ፋላና፤ ህትን ዜማ ቤቹ ደአና።

10 ሞጋንቹ ሞጎተ፤ ሾተለከ ቤሰተ አሜተና፤ እኩጎሬ እን አሜሾሚሁ ልግብ ሄኡ እሱታት።

11 «ጡሙ ዜማንቹ እኔት፤ ጡሙ ዜማንቹ ሆላተሰ ነብሳሰ ህግሽ አሰና።

12 ጠወ እኩጎሬ ሆለት ገይሰረ እኩዕነ ባቴናንሰ አገራና ዜማንቹ ሆልተ አሜተን ለዕና ወክት አጉር ሁነና፤ ሆልንት ሆለተ ብንአዕይ ደመቅሽ ኣአና።

13 ሁኩ ዜማንቹ ሁነናሁ ብረ ባቴናንሰ አገራናሃ እኩቤቹሃትለከ ሆላተሰ እሙዘበቤቹሃት።

14 ጡሙ ዜማንቹ እኔት፤ እን ሆለእ ደጋም፤ ሆለንትኤ ኤሳሃ ደጋእ።

15 እን እሰተ ደጋሚሁ እኔኤ ኤሳሃ ደገናኤገለከ እኒሁ እነኤ ደጋምሀንጋት፤ እን ሆላተኤ ነብሳሰ ህግሽ ኣሳም።

16 ከን ዜማ ኣዘን ዮበእ ዋልት ሆለት ዮኤ፤ እሰንተ ኤቡ ሀሰሰናኤ፤ ላገለ ሞጮጭታኤ፤ ህትን መቱ ዘሞሃ እካን ዜማንቹሰ መቱ እሆና።

17 «ሀካን እኩቤቹሃ እኔኤ ኤሳሃ አተና፤ መሰንትሰ እን ፈንቀሽ ኣኑተ ነብሳሰ ህግሽ ኣሳምቤቹሃት።

18 ነብሳላ እን ገይኤ ኢታን ህግሽ ኣሳም ቤሉ ኢች ከም እእኖሁ እይሁ ዮብእ፤ ነብሳላ ህግሽ ኣሳተለከ ፈንቀሽ ኣኣተ ዎልቀት ዮኤ፤ ከ ትዛዝ ኣኣሚሁ ኣኢችኡት» ይእ።

19 ህከን ጠዌች ከዕዮህንን እይሁድ በላን ለንኪሃ ኣደደመት እኮኡ።

20 ኣሳችን ልግቡሰ «እሱ ዱሩ ኣፎሰ፤ እሰን በርገኅኡ፤ እሰ ጠወእኖ ጠወ ሚሃት ሞጮጭቴንገታቲሁ?» ይቶኡ።

21 ህትን ሞሉሰንገ «ኩ ጠወ ዱሩ ኣፎሰ መንች ኣፌች ፉላኖ በእ፤ ዱሩ ቆቀ መንች ኣልተ ፈይሰኖንዶ?» ይቶኡ።

እይሁዱ ኣመዕኑ ሆጉሰ

22 ዩሩሳሌማን ዱእ ምኒ ሙጨሩ ኣኤኖ ከበጃት ከበጃኖ ወክቱ ኢልዮ እቅ፤ ወክቱንኩሰ ከርምሃ እቅ።

23 ኢሰን መገን ምኒን «ሱላይማን ሃመኖ ዎቃ» ዩኖቤቾን ሃመኖት እቅ።

24 ህከ ወክት እይሁዱ ኣዎንሳኑት ኢሰ ኣጀብ ኡርት «ሃንኩ በሩ ኢሎተ ኢላ ሸክኖምገ ኣተኔ? ኣት መሰህ ኣኩንትር ለሊሰ ቡል፤» ይቶኡ።

25 ኢሰ «ኣን ከኒች ብርገት ኩሎንክዕኔ፤ ኣኩጎሬ ኣዕት ኣመዕንቴንገተበእ፤ ኣንኤ ሱዕሚን ኣእም ሆጉት ኣተኔሃ መሰከርታኡ።

26 ጠወ እኩጎሬ ኣዕት ሆለኤ እኬንበቤቹሃ ኣመዕንቴንገተበእ።

27 ሆለኤ ላገኤ ደጋእ፤ ኣኒሁ እሰተ ደጋም፤ እሰን ኣዎንገታኡ።

28 ኣን ኣሳሃ ዘላለሚሃ ጉዕሚንከ ሃኣኖ ሃኡ ኣሳንሰ፤ ህካን እኩቤቹሃ ኣሰን ሆሮን በኣበእ፤ ህትን ኢ ኣንጋች ኣይሁ ዎልቅሽ መሰሩሰበእ።

29 ኣሰንተ ኤሳሃ ኣሴ ኣኑኤ ጉዕሚችን ሎረሃን፤ ኣንኤ ኣንጋች ኣሰተ ዎልቅሽ ኣኣተ ኣታለኖሁ እይሁ ዮብእ።

30 ኣንለክ ኣኑኤ ሚጡሃን» ይሰ።

31 ህከ ወክት እይሁዱ ለንኪሃ ኢሰ ቀሶተ ክኑ ኬሶኡ።

32 እኩጎሬ ኢሰ ፈንቀሽ «ኣን ልግብ ጡመ ሆጉተ ኣኒችኤ ለሊጅንክዕኔ፤ ህከረ ኣዕት ኤሳሃ ክኒን ቀሴንገታሁ ህከኑኡች ሆተን ሆንገታት?» ይሰ።

33 ኣሰን «ኣኑ ቀንሳንኪሁ መገን ኣሊን ቦርር ላገተ ጠወኣንትቤቹሃት ቤሉ ጡመ ሆጎተክበእ፤ ህትን ኣት መንቹ ኣከን ገዉክ መገኑ ኣቶንትቤቹሃት» ይት ፈንቀሽቶኡ።

34 ኢሰ «ሕጋንክክዕኔ ክዕኔተ ሸርኬተ ዩንክዕኔንዶ» ዮሆሁ ከተባጠባእንዶ?

35 መገን ላገት ህግሳሃ እኮኢችለክ ሁኩ መገን ላገት ኣሚቶሰረ ሸርክተ» ይ ገእኖ ሰርገ

36 ህካን እኮች ኣኑ መገኑ መጠሮሃለክ ከን ኣዱንያ ኣል ሶኮኤሃ ሕን መገንገፍቴ ምዖቤቹሃ መገን ኣሊን ቦርር ላገተ ጠወኣንት» ይቴንገንዶ?

37 ኣን ኣንኤ ሆጉተ ኣእባች ኣመዕንቶኖቹኡ።

38 ኣን ኣንኤ ሆጉተ ኣእሚሃ እኮች ኣን ኣመዕንቴንገ ጎር ሆጎንገትኤ ኣመዕንዬ፤ ህከኒን ኣኑኤ ኣን ሃኡሰለክ ኣን ኣኒንከኤ ሃኡኣ ደኒንገተለክ ኣጥራመቴንገተ» ይሰ።

39 ኣሰን ህከ ወክት ኣፎሰተ ሀሶኡ፤ እኩጎሬ ኣሰ ኣንጋችሰ ፉሸኣ ኦርዕዮ።

40 ኢሰ ለንኪሃ ዮርዳኖሰ ዋሃ ቶል ያህይ ዎሳን ጠመቀኖ ቤቹ ኣሚቶ፤ ህከኔን ዱንኪኤ።

41 ልግቡ መኑ ኣሰበ ኣሚት «ያህይ መቱ ኣጀብሰሰኖ ጠወሃ ኣዕዮብእ፤ ጠወ እኩጎሬ ያህይ ከን መንችተኔሃ ጠወዕዮ ጠወ ጉዕሙንኩ ህንቅሃን» ይቶኡ።

42 ህከንቤቾንን ልግቡ መኑ ኢሳን ኣመዕንቶኡ።

11

ኣልኣዛሬ ሬሁተ

1 መቱ በር «ቢታንያ» ዩኖቤቾን ሃኣኖ «ኣልዓዛሬ» ዩኖ መንቹ ጥኩ እቅ፤ ቢታንዩ መርገየመለክ ኣመሴ ቤቱት ማርታ ሃኣእተ ቀኣ እቅ።

2 ህት መርገየመ ቀርች ሎካን ሸቱተ ቡርት ሙሚንከሴ ሺንሸቶኣተ፤ ሁኩ ጥኩ ኣልዓዛር ኣመሴሃ ቤቱ።

3 ሁኩ ለመንኩ ኣመኢሱት ኢሰበ «ቀርቾ! ጃሉክ ጥኩኡ» ይት ሶኮኡ።

4 ኢሰን ህካን ሞጮጭ ወክት «ኩ ጥከት ሸትበተ፤ ጠወ እኩጎሬ መገን ኬዕምኙ ለሎተ መገን ቤቱንኩ ከን ጥከነ መሳን ኬዕምተ እኮኣሃን» ይእ።

5 ኢሰ ማርተለክ ኣመሴ ቤቱተ መርገየመ ህትን ኣመሰ ቤቱንክ ኣልዓዛሬ ኣተኖ እቅ።

6 እኩጎሬ ኣልዓዛር ጥኩገ ሞጮጭ ወክት ዮቤቾን ለሙ በር ዱንኪኤ።

7 ህከኒች ኤተሮን ኣሰበንተ «ለንኪሃ ይሁድ ባዱ መርኖ» ይሰ።

8 አሳባንት «አስተማርቻ! አይሁድ አዎንሳኑት ግደኖ በሬች ብርተ ኪሳሃ ክኒን ቀሶሄተ ሀሳሄት እቅ፤ ቴሱንገ ህከ ቤቹ ፈንቀልት መርተንገንደ?» ይቶሰ።

9 ኢሰን ፈንቀሽ «ሱሴች ኬሽ አሩ ኣጎተ ኢላ ቶነ ለሞሃ ሰኣትበአንደ? በሬን ሃመኖሁ ከን ኣዲንያ አል ኑር ለአኖቤቸሃ ቆዕላኖበአ።

10 ጠዉ እኩጎሬ ሀንከዕሬን ሃመኖሁ ኑሩ እሲን ዮበአቤቸሃ ቆዕላኖ» ይእ።

11 ኢሰ ሀካን ጠወዕዮች ኤተሮን «ጆሉኔ አልዓዛር ግሾኤ፤ እኩጎሬ ግሰኛች ኬሱስተ መሬም» ይሰ።

12 አሳባንት «ቀርቻ! ግሾ ጎር ቆሀኖሰ» ይቶሰ።

13 ኢሰ ሀካን ጠወዕዮሁ አልዓዛሬ ሬሆተኔሃት እቅ፤ ጠዉ እኩጎሬ ግሰኛተኔሃ ጠወዕዮሃ አጉጀሰ።

14 ሀካን እኮቤቸሃ ኢሰ አሳሃ ለሊሽ «አልዓዛር ሬዮ።

15 አዕኑ አመዕንቶሩተ አን ህከን ቤቸን ሄኡ ሆጉኤ ክዕኔተኔሃ ሙንዲሲሾኤ፤ እኩጎሬ ቴሱ ነኡ አስቤቹ መርኖ» ይሰ።

16 ህከ ወክት «ዲዲሞሰ» * ዩን ገኤኖ ቶማሰ ዎሎ አሳባን «ነኡ እሲንገን ሬኖተ መርኖ» ይሰ።

ኢሰ ሬሆች ኬሉለከ ሄኡ እሁሰ

17 ኢሰ ህከ ቤቹ አላኖ ወክት አልዓዛር ሞገሞች ሾሉ በር እኮሰ እቅ።

18 ቢጋንዩ ዩሩሳሌም ከተሚች ሰኣት ደሬ ጌሰ ሃምሲሰኖሃ እቅ።

19 ማርተለከ መርየመ አመሰ ቤቱ ሬዮቤቸሃ ሻዛበአገ ልግሎ አይሁዱ አልፋቴን አፋዕልቶተ አስቤቹ አሜቶኡ እቅ።

20 ማርተ ኢሰ አሜቸን ሞጮጭቶ ወክት ቶጎሰተ መርቶኤ፤ እኩጎሬ መርየመ ሞኔን ፈቆኡ እቅ።

21 ማርተ ኢሰ «ቀርቻ! አት ከንቤቸን ሄኣንት እቃን አመኤቤቱ ሬሀኖበአ እቅ።

22 ጠዉ እኩጎሬ ቴሁ አት ጠዕምቶንገት ጠወ ጉዕመንከ መገኑ ኣሰኖሃገ ደጋም» ይቶኡ።

23 ኢሰን «አመክቤቱ ሬሆች ኬኣኖ» ይሰ።

24 ማርተን «ቁያመ በር ሬሆች ኬኣኖ ወክት ከኣኖገ ደጋም» ይቶሰ።

25 ኢሰን «ሬሆች ኬሉለከ ሄኡ አኔት፤ ኢን አመዕነኖሁ ሬዮ ጎሬሁ ሄኣኖ።

26 ኢን ሄኣኖሁለከ አመዕነኖሁ አይሁሆርን ሬሀኖበአ፤ ሀካን እኮቤቸሃ አመዕንተንገንደ?» ይሰ።

27 ማርተን «ኤ ቀርቻ! አት ኣዲንያ አል አሜተኖ ዩመ መሰህ መገን ቤቱ እሁክ አመዕናም» ይቶሰ።

28 ማርተን ሀካን ጠወኦች ኤተሮን «መርየመ» ዩኖ አመሰ ቤቶቤቹ መርተ «አስተማርቻ አሜቶኤ፤ አሰን ኪሳሃ ገኣኖሄት» ይት ማጥ ኩልቶሰ።

29 እሲን ሀካን ሞጮጭቶ ወክት ደዕልተ ኬእ አስቤቹ መርቶኡ።

30 ኢሰ ህከ ቀኣተ ኣጉዕናን ማርተን ደቀንቶ ቤቸን ሄዕዮ እቅ።

31 መርየመ ሞኔን እሲን ማጠቡ በ አልፋቴን አፋዕልቶ አይሁዱ መርየመ ደዕልተ ኬእ መርተንገን ለኑ ወክት አልዓዛሬ ሎድብ መርተ ኦኣኣሃ አጉጀጎሰ እሲንተ አዎንቶሴ።

32 መርየማን ኢሰ ሄዕዮቤቹ ኢልተ ለኑ ወክት ሎከሰ ኡብ «ቀርቻ! አት ከንቤቸን ሄኣንት እቃን አመኤቤቱ ሬሀኖበአ እቅ። ይቶሰ።

33 እሲለከ እሲን ማጠቡ አሜቶ አይሁዱ ኦኣን ኢሰ ለዕይ አበ ሻዥን ጎደቡሰ ሊንቁቁእ።

34 አሰን «ሀከንቤቸንት ሞገጋሁ?» ይእ፤ ለሰን «ቀርቻ! አሜት ለእ» ይቶሰ።

35 ኢሰን እንጂጃት ፋሽ ኦዕዮ።

36 ሀካን እኮቤቸሃ «ሄንከ አተኖሰ ጎር ለዕዬ» የቀንቶኡ።

37 ጠዉ እኩጎሬ አሳች መቶ-መቶ «ኩን ቆቀ መን አልተ ፈቸሁ ከ መንቹ ሬሀበገ አኣተ አጋላኖበአንደ?» ይቶኡ።

ኢሰ አልዓዛሬ ሬሆች ኬሱሰ

38 ኢሰ ቀልቤንከሰ አበ ሻዘን ሎድቤቹ መር፤ ጃኖዘሰ አፋሼማንኩ ሎረ ክኒች ሽሄን መክሲመ ሎዲን ክኑ እፍሰሞ ሻንቃንት እቅ።

39 ህትን ኢሰ «ክኑ ኬሼ» ይእ፤ ሬዮ መንች አመቤቱት ማርተ «ቀርቻ! ሬዮች ሾሉ በር እኮሰቤቸሃ ከ ወክት ቦበኖ» ይቶሰ።

40 ኢሰን « አመዕንቶንትጎር መገን ኬዕምኝ ለኣንት፤ ይበሃንደ?» ይሰ።

41 መኑ ህከ ክኑ ኬሾ፤ ህከኒች ኤተሮን ኢሰ አሌ ዋሽ ለዕይ «ኢ አነ! ሞጮጭቶንቴኤቤቸሃ ገለትጫንኬ።

42 ጉዕመረን ሞጮጭታንቴኤገ ደጋም፤ ጠዉ እኩጎሬ ካን ዩሚሁ ከኔ ኡርቶ ኡመቱ አት ኤሳሃ ሰኩንትገ አመዕንታገ ይዩት» ይእ።

43 ኢሰ ሀካን ጠወዕዮች ኤተሮን «አልዓዛሬ! አም ፋል» ይ ላገሰ ጎት አዕይ ጠወዕዮ።

44 ሬዮ አልዓዛርን እንገሰለከ ሎከሰ ከፈኒን ጣጠሞገን ሎድ ኣዚች ፋሎ፤ ሚንሰ ከፈኒን ጣጠሞ እቅ፤ ኢሰ «ሂርቴን አጉሬሰ፤ ሃሙን» ይሰ።

* 11:16 ዲዲሞሰ፡- ዩ መልተተ የሃን።

ኢስ ሸኖተ አማዕለሚመገ

(ማቶ. 26፥1-5፤ ማር. 14፥1-2፤ ሉቃ. 22፥1-2)

45 መርየሞቤቹ አልፋቴን አፋዕልቶተ አሜቶ አይሁዲቶ ልግቡስ ኢስ አዕዮሃ ለእ አመዕንቶኡ።

46 ጠዉ እኩጎሬ አሳቶን መቱ-መቱስ ፈርሳዌቤቹ መርት ኢስ አዕዮ ጠዉ ኩልቶኡ።

47 ህካን እኩቤቹሃ ቂስ አዎንሳኑትለከ ፈርሳውት ነገት ባለቅ ገአት ጭምአት «ኩ መንቹ ልግለ እጅሰሲሰኖ ጠዉ አእናቤቹሃ መ አዕናም ጎር ቆሆና?

48 ህትን እአተ ሰዕም ይኖም ጎር መኑ ጉዕመ-ንኩ እሲን አመዕነኖ፤ ርም ባድ መኑንኩ አሜት ከ ቤቹለከ ኡመት ጉዕመንከ ቤሳእ» ይቶኡ።

49 ጠዉ እኩጎሬ አሳቶ መቱ ህከን ዘማን ሎሩ ቂሰቹ «ቀያፊ» ዬኖሁ «እዕኑ መቱርቹሃ ደገኑገብአ።

50 ኡመቱ በእናህኒቶ መቱ መንቹ መንተኔሃ ሬዮጎር ክዕኔሃ ቆሆናሃ እሁስ ሰውይቴንተበእንደ?» ዬአ።

51 እሰን ህካን ጠወዕዮሁ ገይሰ ቀልቢቹበአ፤ እኩጎሬ ህከ ወክት እስ ሎረ ቂሰቹ እኩቤቹሃ ኢስ መንተኔሃ ሬሆናግ ራገ ጠወዕዮ።

52 ጠዉ እኩጎሬ እስ ሬሆናሁ ጠለዕል ኡመቲሃ እሁዕነ ብንይቶ መገን አለተ ሚጡብ ጭም አኦታት እቅ።

53 ህካን እኩቤቹሃ እሰን ህከን በሬኝ ኪስ ኢስ ሸቶተ አማዕለንቶኡ።

54 ህከኒቶ ኤተሮን ኢስ አይሁድ መን በሳን አልባሽ ሃሞበአ፤ ጠዉ እኩጎሬ ህከንቤቹኝ ፋል ኡለ ኡድም መዴን ሄዕዮ «ኤፍሬመ» ዬኖ ከተመ ኦርዕዮ፤ ህከን ቤቹን አሳባን አፋዕለአ።

55 አይሁድ ሻሽግ ከበጀቱ ሆንጠኮ እቅ፤ ልግቡስ ሻሽግ ከበጀቱ ኢሊኖህኒቶ ሄጭት ገወሰ ነጠ አቶተ ሄኣ ቤቹኝ ጉዕሚቶን ኡሩሳሌም ከተመ መርቶኡ።

56 እሰን ዱእ ሞኒ ኣዜን ኡርት ኢስ ሀሰን «እሰ ከ ከበጀት ከበጃኖቤቹ ሆሮን አሜተኖበእንደ? መ ሰውይቴን?» የቀንተን መቱ-መቲንከስ ጠወአኢት እቅ።

57 ህትን ቂስ አዎንሳኑትለከ ፈርሳውት ኢስ አፎተ ሄኣኖ ቤቹ ደገኖ መንቹ ሄዕዮ ጎሬ ኢስ ለሊሲሰተ መን ጉዕመንከ አዘዘ እቅ።

12

ኢሳን ሸቱተ ቡርቶ መንቹተ

(ማቶ. 26፥6-13፤ ማር. 14፥3-9)

1 ሻሽግ ከበጀቲሃ ሊሁ ቡሩ ፈቆህኒን ኢስ ቢታንያ ኦርዕዮ፤ ሁኩ ቢታኑ ኢስ ሬሆኝ ኬሾስ አልዓዛር ሄኣኖተ ቀዕዮ እቅ።

2 እሰን ህከኒን እሲሃ ሁርባት ቅጥ አታን ማርተ ሆንጠህሳኢት እቅ፤ አልዓዛርን ኢሲን ሚጡብ ማዳን አፋዕልቶሁኡቶ መቶሃሰ እቅ።

3 ህከ ወክት መርየመ ዋጉስ እበ ጤአተ እኩ ነጠ «ናርዶስ» ዬኖ ሀቂቶ መክቶ መቶ ብልቃጥ ሸቱተ ኤባኤ፤ ህካንን ኢስ ሎካን ቡርት መ-ሚንከሴ ሺንሸቶኤ፤ ህከን ሸቶ ኣንጀነት ሞኒ ኣዘ ዊንቶኡ።

4 ጠዉ እኩጎሬ አሳባቶ መቱ ኢስ ህግሽ ኣሰኖ አስቆርንቶ ይሁድ።

5 «ከ ሸቱተ ሰሴ ጥቤ ዲናረ ህሬን ሚሃ ቡጥቻኖተ ኣሲኖበአ?» ዬአ።

6 እሰ ህካን ጠወዕዮሁ ቡጥቻኖተ ሻቸ እሁዕነ ሞጋንቹ እኩቤቹሃት፤ ህትን ብር ከረጢትተ አፈኖሃ እኩቤቹሃ ህከን ከረጢቲን ሃሬኖ ብሪኞ ኣኡ ርሾቤቹሃት።

7 ኢስ «ሞገማም በሬተ ተቃጠባቤቹሃ እኑሬሴ።

8 ቡጥቻኑት ጉዕመ ወክትንከ ክዕኔኢን ሚጡብ ሄኣኢ፤ ጠዉ እኩጎሬ ኣን ክዕኔኢን ጉዕመ ወክት ሄኣምበአ» ዬአ።

9 ህከ ወክት ልግቡ አይሁዱ ኢስ ቢታንያን ሄዕዮገ ደግ ህከ ቤቹ አሜቶኡ፤ እሰን ህከ ቤቹ አሜቶኡሁ ጠለዕል ኢስ ለኦት እሁዕነ ኢስ ሬሆኝ ኬሾ አልዓዛሬሁ ለኦታት እቅ።

10 ቂስ አዎንሳኑት አልዓዛሬ ሸቶተ አማዕለንቶኡ።

11 መሰንትስ ልግቡ አይሁዱ ሰውትስ ዶርተን አልዓዛሬ መሳን ኢሳን አመዕንቶቤቹሃት።

ኢስ ሎረ ኬዕምኝን ዬሩሳሌመ ኣጉሰ

(ማቶ. 21፥1-11፤ ማር. 11፥1-11፤ ሉቃ. 19፥28-40)

12 ህከኒቶ ኤተሮን ሻሽግ ከበጀት ከበጅቶተ አሜቶ ልግቡ መኑ ኢስ ዬሩሳሌመ አሜተኖገ ሞጮጭቶኡ።

13 ህካን እኩቤቹሃ እሰን ኢስ ቶሳተ ዘምባብ ሀበረ አፍ ላገስ ጎት አት «ሆሳና! ቀርኝ ሱዕሚን አሜተኖ እሰራኤል ሞሙ ማስአሞላሃን» ይቶኡ።

14 ኢስ ሀርኞ ሞተረ ደግ እሰን ቆጶ፤ ሁኩን እኩሁ።

15 «እት ጽዮን ከተሙ! ዋጅቶት፤ ሁኩዕኑን ዎሙክ ሀሩች ዎተራን ቆጵ አሜተናት» የሙሞ ከተበሞ ራጉ ዋሞታት።

16 ሁኩ ጠዉ ሃጭ አሳባተ አጎሰበአ እቅ፤ ጠዉ እኮጎሬ ኢሰ ኬዕምኒን አጎች ኤተሮን ኩ ጠዉ አሰተኔ ከተበሙሰለክ ጠወሰ እሲሃ እኤመገ ሰውይቶኡ።

17 ኢሰ አልዓዛሬ ሎዲች ገእ ሬሆች ኬሰን ኢሰን ሜጡብ ሄኑ ሙኑ እሲሃ መሰከርቶኡ።

18 ሁኩ ኡመቱ ኢሰ ቶጎተ ፋሎሁ እሰ ህክ አጀብሲሰኖ ጠወ አዕዮገ ሞጮጭቶቤቸሃት እቅ።

19 ህክ ወክት ፈርሳውት «ከለዕዬ እዲንያ አሉ ጉዕሙንኩ እሱ አሞኖት፤ ነኡ መቱርቹሃ አዕናተ አታልናምበእ» የቀንቶኡ።

ግሪክ መኑ ኢሰ ለኦተ ሀሰገ

20 ህከን ሻሽግ ከበጀ ወክቱን ሰገዶተ ዬሩሳሌመ አሜቾ መን በላን መት-መቱ ግሪክ መኑ ሄኑ እቅ።

21 እሰን ገሊሊ ሳዶን ሄዕዮ «ቤተ ሳይዳ» ዬሩ ከተሚች አሜቾ ፍልጸሴቤቹ መርት «ቀርቾ! ነኡ ኢሰ ለዕናተ ሀንሳም» ይቶኡ።

22 ፍልጸሰን መር እንድራሴሃ ኩሎ፤ እንድራሰለክ ፍልጸሰ መርት ኢሲሃ ኩልቶኡ።

23 ኢሰ ፈንቀሽ «መንች ቤቱ ኬዕምሲሰኖ ወክቱ ኢልዮኡ።

24 ሀንቅንከ ያንክዕኔ፤ እለሰ መትት አልት ኡላን ኡብ ሬትሳች ጠለዕለ ፈቃክ፤ እኮጎሬ ሬቶች ልግብ ላልቹ ላልታኡ።

25 ነብሳሰ ኢተኖህ ነብሳሰ ቤሰኖ፤ ጠዉ እኮጎሬ ከን እዲንያ አሉን ነብሳሰ ግብኖህ ዘላለሚሃ ጉዕሚንክ ጎፍብ ሄኡ አገዕሪኖ።

26 ኢሳሃ ካደሞተ ሀሰኖህ ዮ ጎሬ አዎኑዕኔ፤ እን ዮምቤቾን ካድንቹእ ህከን ቤቾን ሄአኖ፤ ኤሳሃ ካደመኖሃ አኑኤ ሎርሰኖሰ» ዬእ።

ኢሰ ኢልታሰ ኦርሸተለክ ሔሁሰ ጠወዕዮገ

27 ህትን ኢሰ «ነብሴቹእ ጨነቀንቶኡ፤ ቱንገ መ ዩ? ኢ እነ! ከን ወክቲች ጡምሴኤ ዩንዶ? ህት ይበገ እን አሜቾሚህ ከን ወክቲሃት።

28 ኢ እና! ሱዕመክ ሎርሰ» ዬእ፤

ሰሚቾን «ሱዕመኤ ሎርሰዮም፤ ህትን ቱሁ ሎርሳም» ይታ ላገት አሜቶኡ።

29 ህከን ቤቾን ኡሬ መኑ ህካን ሞጮጬ ወክት «ከን ጉገኖተ ላገ» ይቶኡ፤ ዎሉሰንገ «መላይኬቹ ጠወአኖሲት» ይቶኡ።

30 ኢሰ ፈንቀሽ «ኩ ላገት ክዕኔተኔሃ አሜቶኡ ቤሉ ኢተኔሃ አሜቶበእ።

31 ከን እዲንያ አሉን ፍርዱ እህሮህ ቲሶት፤ ህትን ከን እዲንያ አል ዳቾ ሼይጣንቹ አብል ፋል ኡብኖ ወክቱ ቲሶት።

32 እን ኡላ አሊች አሌ ዎሎም ወክት ጉዕመንከ መነ ኢ አደ አአም» ዬእ።

33 ኢሰ ህት ዩሰ ህት እክ ሪሆኖ ጎር ለሊሲታት እቅ።

34 ህትን ኡመቱ ፈንቀሽት «ሕግ ላገች ሞጮጭኖሚህ ለመሲህ ዘላለሚሃ ጉዕሚንክ ሄአኖ የኖሃ እቅ፤ እት ህት ለመንች ቤቱ አሌ ዎሉ ሀሰሰኖሴ ይታንትት? ኩ መንች ቤቱ እዬት ጎር?» ይቶሰ።

35 ኢሰን «ቀዎ ወክቲሃ ኑሩ ክዕኔን ሜጡብ ሄአኖ፤ ቱንሰቹ አፈኖሀዕኔበአገ ኑሩ ሄዕዮ ጌሳን ሃሚ፤ ቱንሰቾን ሃመኖህ ህከቤቹ መረኖጎር ደገኖበእ።

36 ኑር አለተ አኮኖተ ኑሩ ዮ ጌሳን አመዕንዬ» ዬሰ፤ ኢሰ ህካን ዬች ኤተሮን አሳች አደ እክ ገባጭ ዬእ።

አይሁዱ አመዕኑ ሆጉሰ

37 ኢሰ እብ መላተ ብሬንከሰ አዕዮ ጎሬሁ አይሁዱ እሲን አመዕንቶበእ።

38 ሁኩንን ነቢዬቹ እሰያሰ

«ቀርቾ! ኩልኖም ጠወ አይ አመዕንዮኔ?

ህትን መገን ዎቀልት እዬሃ ለልቶኡ?»

ይ ጠወዕዮ ላገት ዊንቶታት።

39 ህካን እኮቤቹሃ አመዕንቶተ አታልቶበእ፤ መሰንትሰ ነቢዬቹ እሰያሰ ለንኪሃ

40 «አሌንከሰ ለአገለገለክ

ቀልቤንከሰ ሰውይታበእገ

ኢ አደ ፈንቀልታን እን ፈይሳንሰበእገ

እለሰ ቆቀሾኤ፤

ህትን ቀልብንከሰ ዱድሾኤ» ዬቤቹሃት።

- 41 እስያስ ህዝብ ይኒሁ እስ ሄጭን መሲህ ኬዕምኝ ለዕዮቤቸሃት፣ ኢስተኔሃ ጠወዕዮቤቸሃት።
- 42 አይሁድ ሀለቃች ልግቡስ ኢሳን አመዕንቶገራህ ጭምትስ ምኒች ፋሽታስበእገ ፈርሳውተ ሞጅቶቤቸሃ አመዕኑስ ለሊሶበእ እቅ።
- 43 መስንትስ እስ መገኑ ኬዕምሰኛ ኬዕምሰኛ ለዕዮቤቸሃት።
- 44 ህትን ኢስ ላገስ ጎት አዕይ «እን አመዕነና ጠለዕል ኢን አሁዕን ኤሳሃ ሶኮኤህንን አመዕንዮአሃን።
- 45 ኤሳሃ ለአኖሁ ኤሳሃ ሶኮኤሃ ለአኖ፤
- 46 ኢን አመዕነናሁ ጉዕሙንኩ ቱንሰቸን ሄኔኖበእገ እን ኑር እክ ከ ኣዲንያ አል አሜቸም።
- 47 ላገኤ ሞጭጭ አገርበህን አሌን እን ፈረዳምበእ፤ መስንትስ እን አሜቸሚሁ ከን ኣዲንያ አል ጡምሶታት ቤሉ ፈረዳታበእ።
- 48 ኤሳሃ ግበኔኤሁለክ ላገኤ ቶግባኤሃ ፈረደናሁ ዮኤ፤ እን ጠወዕዮም ላገት ገይንትሴ ቂያመ በር ፈረዳሰ።
- 49 መስንትስ እን ገዪንከኤ ጠወዕዮምበእ፤ እን ያሚሃለከ ጠወኣሚሃ ኣሴኤሁ ኤሳሃ ሶኮኤ አናኤ ገምንከስ።
- 50 እስ ትዛዙ ዘላላሚሃ ጉዕሚንከ ሄኔኖ ሄኤ እሁስ ደጋም፤ ህዝብ እኮቤቸሃ እን ጠወኣሚሁ ኣኑኤ ኩሎኤሃት» ይእ።

13

ኢስ ኣሳበሰ ሎከተ ኣንሹሰ

- 1 ኢስ ሻሽግ ከበጃች ሄጭ ከን ኣዲንያ አሊች አኒሰ ቤቼ ኦርኦኖ ወክቱ ኢሊገ ደጎ፤ እሰን ከን ኣዲንያ አሊን ሄዕዮ ገይሰ መን ጉዕመንከ መጨረሽ ኢሊ ኢቲስ።
- 2 ኢስላክ ኣሳበሰ ሁርባት እታኢት እቅ፤ ሰሞኔ ቤቱ አሰቆርንቶ ይሁደ ቀልብስ አልብሱ ኢስ ህግሽ ኣሰኖገ አዕዮሰ።
- 3 እኑ ጉዕመርቸንከ ኣንጋንከስ ኣሴገለክ መገን ኣዲን አሜቸገ ህትን መገን አደ ፈንቀል ኦርኦኖገ ኢስ ደገኖ እቅ።
- 4 ህዝብ እኮቤቸሃ ማዲች ኬዕይ ኦድኑስ አፋሽ ፎጠ እእ ረመዘንተስ ቆዕሬእ።
- 5 ህከኒች ኤተሮን ኣዕሊኖ ኦዲን ዊች ዋር ኣሳበ ሎከተ ኣንሹን ረመዘንተስ ቆዕሬ ፎጠን ሞሼእ።
- 6 ኢስን ሰሞን ጴጥርሴቤቼ ኢሊ ወክት ሰሞን ጴጥርሴ «ቀርቸ! እት ኢ ሎከተ ኣንሹተንገደ?» ይሰ።
- 7 ኢስን ፈንቀሽ «እን ቲሱ ኣኣሚሃ እት ደጋንትበእ፤ ጠወ እኮጎሬ ኤተሮን ኣጥራመታንት» ይሰ።
- 8 ሰሞን ጴጥርሴ «እት ኢ ሎከተ ሆሮን ኣንሹታንትበእ» ይሰ፤ ኢስን ፈንቀሽ «እን ሎከተ ኣንሹበጎሬ ኢች ወጡ ዮሄበእ» ይሰ።
- 9 ሰሞን ጴጥርሴን ፈንቀሽ «ቀርቸ! ህት እኮች ጠለዕል ሎከኦ እሁዕን ኣንገእለከ ቡዕለእ ሜጡብ ኣንሹኤ» ይሰ።
- 10 ኢስን «አልስ ኣዕልህን ጉዕሙ ጅሰሙንኩስ ሙጨሩ እኮቤቸሃ ሎከስ ኣዕል ቤሉ ዎሉ ሀሰሰኖሰበእ፤ አዕኑ ሙጨራኖታን፤ ጠወ እኮጎሬ ጉዕሙንኩክዕኔ ሙጨራኖተበእ» ይሰ።
- 11 ኢስን «አዕኑ ጉዕሙንኩክዕኔ ሙጨራኖተበእ» ይኢሁ ህግሽ ኣሰኖሲሁ አዬት ጎር ደገኖቤቸሃት እቅ።
- 12 ኢስ ሎከተ ኣንሹ ሹሎቻ ኤተሮን ኦድኑስ ኦደዕይ ቤቸሰ ፈንቀል አፋዕል «እን ክዕኔሃ አዕዮሚሃ አጥራመቱንንገደ?»
- 13 አዕኑ ኤሳሃ «አስተማርቼ ቀርቼ ይቲንተኤ፤ እን አስተማርቼለክ ቀርቼ እኮምቤቸሃ ይቲንታሁ ሀንቅሃን።
- 14 ቲሱ እን ክዕኔሃ ቀርቼለክ አስተማርቼ እህን ሎከክዕኔ ኣንሹሚች አዕኑሁ መት-መትክዕኔ ሎከተ ኣንሹ ሀሰሰኖሀዕኔ።
- 15 እን ክዕኔሃ አዕዮምገን አዕኑሁ አቶኖተ ሞሳልተ ኣሰዮንክዕኔ።
- 16 ሀንቅንከ ያንክዕኔ፤ ካዲንቼ ቀርቼች ህትን ሰቀመኖሁ ሶኮሰህኒች በተአኖበእ።
- 17 ከ ጠወ ደገን ሆጎ ኢሊን ሆሰሴንተ ጎር ማሰእንቲንታእረ እኩነንተ።
- 18 እን ካን ያሚሁ ጉዕመንከክዕኔበእ፤ እን መጠርም መን እን ደጋም፤ ጠወ እኮጎሬ መጻፋን ልቸተ ኢን ሜጡብ እቸሁ ኤሳሃ ባለጋረ እኩ፤ የመምሁ ዊምታት።
- 19 እን ኩ ጠወ እሁዕናን ሄጭ ኩላንክዕኔሁ ኩ ጠወ እኮ ወክት አዕኑሁ እን ኤሳሃ እሁኤ ደገንተጋት።
- 20 ሀንቅንከ ያንክዕኔ፤ እን ሶሃሚሃ ቶገኖሁ ኤሳሃ ቶገኖ፤ ህትን ኤሳሃ ቶገኖሁ ኤሳሃ ሶኮኤሃ ቶገኖ» ይሰ።

እስ ህግሽ እስኖሲሁ እዩት ጎረ ሄጭ ጠወኤስ
(ማቶ. 26፥20-25፤ ማር. 14፥17-21፤ ሉቃ. 22፥21-23)

- 21 እስ ህዣን ጠወዕዮች ኤተሮን ቀልቤስ ሻዥ «ህንቅንከ ያንክዕኔ፤ ክዕኔች መቱ ኤሳሃ ህግሽ አሰኛ» ይ ጠወዕዮ።
- 22 አሳባችሁ እስ ከ ጠወ ጠወዕዮሁ እዩሃት ጎር ደግበቢቸሃ መት-መቱስ ለእኤ።
- 23 አሳባች እስ ኢተሮሁ እስ መድ ጠምበቅይ አፋዕልዮ እቅ።
- 24 ሰሞን ጴጥሮስ እሱ ቀቀሽ «አዩተኔሃ ጠወእኖት ጎር ጠዕምሰ» ይሰ።
- 25 ህዣን እኮቤቸሃ እስን ጎበስ እስቤቸ ሆንጠህሽ «ቀርቻ! ህግሽ እስኖሂሁ እዩት?» ይ ጠዕሚሰ።
- 26 እስን «ከ ጣቢተ ወጤን ቀሽ ዱሳንሰሃን» ይእ፤ ህዣን ጠወዕይ ጣቢተ ወጤን ቀሽ እስቆሮንቶ ሰሞኔ ቤተ ይሁዲሃ ዱቅሾሰ።
- 27 ይሁዲን ህዣን ዱቆች ኤተሮን ቀልቤንከስ ሼይጣኑ እጎ፤ እሱን ይሁደ «አቶተ ሰወይቶንቴሃ ደዕልተ እእ» ይሰ።
- 28 ሀከኔ ማዲን አፋዕሌ መኒች እዩሁ እስ ህዣን ሚሃ ዩጎር ደጎበእ።
- 29 ይሁድ ብረ እጅኖሃ እኮቤቸሃ አሳባች መት-መቱስ እስ ይሁደ «ሻሽግ ከበጀት ከበጀኖተ ሀሰሰኖ ብረ ህከረንገ ቡጥቻኖተ ሰደቀተ እሰ» ይዲሃ እጉጀሰ እቅ።
- 30 ይሁድን ዱቆች ኤተሮን ደዕለንሰ እጉር ኦሮዕዮ፤ ሁኩ ወክቱንኩ ህንከዕሬተ እቅ።

ሃዕር ትዛዝ

- 31 ይሁድ ህከንቤቸች ፋል ኦሮዕዮ ወክት እስ «ቴሱ መንች ቤቱ ኬዕምኝ ደዕዮኤ፤ መገኑንኩ እስ መሳን ኬዕምኝ ደእኖ።
- 32 መገኑ ቤቱ መሳን ኬዕምኝ ደኤእኝ መገኑ ገወንከስ ቤተሃሰ ኬዕምኝ ደዕልን አሰኛ።
- 33 ኢ ኦሶ! ክዕኔን ሚጡበ ቀወ ወክት ዱንካም፤ አዕኑ ሀሰነንተኤ፤ እይሁዲሃ እን ኦሮኣምቤቸ አዕኑ መርቶኖተ አታልቲንተበእ» ይምሀኒገን ቴሁ ክዕኔሃ ህት ያም።
- 34 ገገወንኩክዕኔ ኢተቀንቶኖተ ሃዕር ትዛዝ አሳንክዕኔ፤ እን ክዕኔተ ኢታምገ ገገወንኩክዕኔ መት-መቱክዕኔ ኢትዩ።
- 35 ገገወንኩዕኔ ኢተቀንቲንተ ጎር አዎንቲንተኤረ እሁክዕኔ መኑ ጉዕመንኩ ደገኖ» ይእ።

ጴጥሮስ ለገእኖሰገ እስ ሄጭ ጠወኤስ
(ማቶ. 26፥31-35፤ ማር. 14፥27-31፤ ሉቃ. 22፥31-34)

- 36 ሰሞን ጴጥሮስ እስ «ቀርቻ! ሀከቤቸ መርተን?» ይእ፤ እሱን «እን መራምቤቸ ቴሱ አዎንቶኤተ አታልታንትበእ፤ ኤተሮን አዎንታንቲኤ» ይ ፈንቀሼሰ።
- 37 ጴጥሮስን ፈንቀሽ «ቀርቻ! ሚሃት ቴሱ አዎኖሂተ አታላምበእሁ? እን ፎልኤ ከተኔሃ ህግሽ አሳም» ይእ።
- 38 እሱን «እት ፎልክ ኢተኔሃ ህግሰ አተንንድ? ህንቅንከ ያንኬ፤ ክበር ህንጠቦ ዎዶተ ኢሊ ሰሶረ ለገእንቲኤ» ይ ፈንቀሼሰ።

14

መገን ቤቹ መሰኖ ዎቆሁ እስ እሁሰ

- 1 እስ «ቀልቡክዕኔ ህልቁንከ፤ መገኖን አመዕንዩ፤ ህትን ኢን አመዕንዩ።
- 2 እንኤ ምኔን ልግቡ ቤቹ ዮኤ፤ ህዣን እኮበእቀ ቤቹ ቅጥ እኦህዕኔተ መራም, ያምበእ እቅ።
- 3 እን መር ቤቹ ቅጥ አዕዮንክዕኔ ወክት ፈንቀል አሜች እን ሄኣም ቤቸን አዕኑ ሄኦኖተ ኢቤቹ መሳንክዕኔ።
- 4 እን መራም ዎቃሃ ደገነንተ» ይሰ።
- 5 ቶማስን እስ «ቀርቻ! እት መርታንትቤቸ ደንጎምበእሃ ህት እንክ ዎቃሰ ደንጎተ አታልኖም?» ይእ።
- 6 እሱን ፈንቀሽ «እን ዎቃሃ፤ ሀንቁሃለከ ሄኦሃን፤ ኢ አዲን እህባች አዩሁ እን መገን ቤቹ መሮተ አታለኖበእ።
- 7 ኤሳሃ ደገነተ እቃን እነኤ ደገነንተ እቅ፤ እኮጎሪ ከ ኤተሩ ደገነንተሰ፤ ህትን ለኤንተሰ» ይሰ።
- 8 ፍልጶስን «ቀርቻ! እን መገኑ ለሊሰኔ፤ ሁኩን እሆኔ» ይሰ።
- 9 እሱን «ፍልጶስ! እን ኬንከ ዘማን ክዕኔኤን ሚጡበ ሄእን ኤሳሃ ደገነንቲኤበእንድ? ኤሳሃ ለዕዮሁ እን መገኑ ለዕዮሃን፤ ህዣን እኮች አት ህት ሕን መገኑ ለሊሰኔ» ይተን?
- 10 እን እን መገኖን ሄዕዮምገ ህትን እኑ መገኑሁ ኢን ሄኤስ አመዕንታንትበእንድ? እን ክዕኔሃ ጠወኣም ላገት ገይኤ ዎልቀኒበእ፤ ጠወ እኮጎሪ ኢን ሄኣኖ እኑ መገኑ ሆጉሰ እኣኖ።

- 11 እን እነ መገናን ሄዕዮምገን ህትን እኑ መገኑ እን ሄዕዮገ አመዕንዬ፤ ሁኩን ዮበእ ጎሬ ሆጎአተኔሃ አመዕንዬ።
- 12 ሆንቅንከ ያንክዕኔ፤ እን አመዕነኖሁ እን አአም ሆጉተ አአኖ፤ ህትን እን እነ መገን ቤቼ መራምቤቼሃ ህከኒች በተአኖሃ አአኖ።
- 13 እኑ መገኑ ቤተገኘሰ ከበጀምተ ሱዕሚንከኤ ኡጭቴንተ ጠወ ጉዕመንከ አአም።
- 14 እኩሰ ጠወሃ ሱዕሚንከኤ ኡጭቴንተ ጎር እን አአም» ዬእ።

ኢሰ ጠሊላ እያንተኔሃ ኣሴ ተቢሳሃ

- 15 ኢሰ «ኢትቴንተኦጎር ትዛዝኤ አገሬ።
- 16 እኑ መገኑ ዘላለሚሃ ክዕኔኤን ሜጡብ ሄአኖ ዎሉ ጠራኝሳንቹ ኣሶህዕኔተ እን እሱ ኡጭም።
- 17 እሱንከ ከን ኣዲንያ አል ሙኑ ቶሳሰበኤ፤ መሰንትሰ ለአበሰቤቼሃለከ ደጉሆጎሰቤቼሃት፤ እኩጎሬ እስ ክዕኔኤን ሜጡብ ሄአኖቼሃለከ ኣዜንከክዕኔ እሆኖቤቼሃ አዕኑ ደገኒነተሰ።
- 18 «ኣኑላከ አመት ዮበእ አለገ ህትን እጉራንክዕኔበኤ፤ ክዕኔቤቹ ፈንቀል አሚታም።
- 19 ቀዎ ወክቲች ኤተሮጎ ከን ኣዲንያ አል ሙኑ ሆሮን ለአኖኤበኤ፤ እኩጎሬ አዕኑ ለኤነንተኤ፤ እን ሄአምቤቼሃ አዕኑሁ ሄኤነንተ።
- 20 እን እኒንከኤ አዕኑ እን ህትን እን ክዕኔኤን ሄኤኤ ህከ በር ደገኒነተ።
- 21 «ትዛዙኤ እሰቤቾን ዮኢሁላከ ትዛዝኤ አገረኖሁ ኤሳሃ ኢተኖ፤ ኤሳሃ ኢተኖንከ እኑኤ ኢተኖሰ፤ ህትን እኒሁ ኢታንሰለከ ገዉእ እሲሃ ለሊሳንሰ» ዬእ።
- 22 አሰቆርጎቹ ይሁደ እሁዕነ ዎሉ ይሁድ ኢሰ «ቀርቾ! ገዉክ ከን ኣዲንያ አል መኒሃ እሁዕነ ኔሳሃ ለሊሳንተሁ ህትዪት?» ዬእ።
- 23 ኢሰ ፈንቀሽ «ኤሳሃ ኢተኖሁ ላገእ አገረኖ፤ እኑኤ ኢተኖሰ፤ ነኤን እሰቤቹ አሚንት እሰን ሜጡብ ሄዕናም።
- 24 ኤሳሃ ኢትባሁ ላገኤ አገረኖበኤ፤ ኩ ሞጮጭቴንተ ላገንት ኤሳሃ ሶኩኤ እኒኤተ ቤሉ ኢታበኤ።
- 25 «አን ቴሱ ክዕኔኤን ሜጡብ ሄአንን ከ ጠወ ኩሎንክዕኔ።
- 26 እኩጎሬ እኑኤ ኢ ሱዕሚን ሶሆኖ ጠራኝሳንቹ ጠሊሉ አያኑ ጉዕመርቹንከ ተማርሰኖህዕኔ፤ ህትን እን ኩሎንክዕኔ ጠወ ጉዕመንከ ሰውይቶኖተ አአኖህዕኔ።
- 27 «ወገሬቴኤ ክዕኔን ሄአኖ፤ እን ወገሬትኤ ኣሳንክዕኔ፤ እን ኣሳንክዕኔ ወገሬቴ ከን ኣዲንያ አሉ ኣሰኖ ወገሬትጋበኤ፤ ቀልቤክዕኔ ሻዞኖቹ፤ ህትን ዎጅቶኖቹ።
- 28 እን ሐርአም፤ ፈንቀል ክዕኔቤቹ አሚታም» ዬሚሃ ሞጮጭቴንታኤ፤ ኢትቴንተኤ እቃን እንኤቤቹ መሪሃኤ ሙጎደኤነንተ እቅ፤ መሰንትሰ እኑኤ ኢች ሎረሃን።
- 29 ከን እኩ ወክት አመዕንቶኖተ ቴሱ ሄጭን ጠዉሰ እሁዕነ ኩሎንክዕኔ።
- 30 ከኒች ኤተሮጎ ክዕኔኤን ልግላ ጠወአምበኤ፤ መሰንትሰ ከን ኣዲንያ አል ሸይጣኑ አሚተኖ፤ እኩጎሬ ኢ አሉን እሲሃ ሙት ዎልቀቲ ዮሰበኤ።
- 31 ጠዉ እኩጎሬ እን እነ ኢታምገ ከን ኣዲንያ አሉ ደጎተ እኑኤ እዘገኖኤገን አአም፤ ኬዕዬ ከንቤቼች መርኖ» ዬሰ።

15

ኢሰ ህንቅ ወይን ላልቹ እሁሰ

- 1 ኢሰ «ህንቅ ዎይን ላልቹ አኔት፤ ካሾኤንኩ አኖኤ።
- 2 ላልቹ ላልቡ ኢ አሉን ዮ ሀመ ጉዕመንከ እኑኤ ሙር ከመኖ፤ ላሊቹ ላሊኖሃ አበ ላሎተ ጠር መክሰኖ።
- 3 አዕኑ እን ኩሎንክዕኔ ላገ መሳን ነጠ እኩንታራጎ።
- 4 አዕኑ እን ሄዕዬ፤ እኒሁ ክዕኔኤን ሄአም፤ ሀሙ ዎይን ላልቹን ሄአበ ጎር ጠለዕል ገዉሰ ላሊቹ ላሎተ አታላኖበእን አዕኑሁ እን ሄኤንገባች ላሊቹ ላልቶኖተ አታልቴንተበኤ።
- 5 «አን ወይን ላልቹ፤ አዕኑንገ ሀመሃን፤ እን እሶን እሰንገ እን ዮኢሁ ልግላ ላልቹ ላሊኖ፤ መሰንትሰ እን ሄአሃ ሙቱርቹሃ አቶኖተ አታልቴንተበኤ።
- 6 እን ሄአቡ አዪሁ ሀምገ አብል ቶረም ሞላኖ፤ ህካንን ጭምእኤን ገራን ዎሬን ቡሴኖ።
- 7 አዕኑ እን ሄኤንተ ጎሬ ኢ ላገንት ክዕኔኤን ሄኑ ጎሬ ሀሴንተርቹ ጉዕመንከ ኡጭዬ፤ ኣሰመኖህዕኔ።
- 8 አዕኑ ልግላ ላልቹ ላልቴንተ ጎር እኑኤ ከበጀመኖ፤ ህትን አዕኑ ኤሳሃ አምንታረ እሁክዕኔ ለሊሴነንተ።
- 9 እኑኤ ኢቴኤገን እኒሁ ክዕኔተ ኢቴንክዕኔ፤ አተኤ ኣዜን ሄዕዬ።
- 10 እን እንኤ ትዛዝ አገር አተሰ ኣዜን ሄዕዮምገን አዕኑሁ ትዛዝኤ አገርቴን አተኤ ኣዜን ሄኤነንተ።
- 11 ካን ኩሎንክዕኔሁ ሙንዲኑኤ ክዕኔኤን እኩተለከ አበ ሙንደኦታት።

12 ኢ ትዛዙ እን ኢቴንክዕንገን እዕኑሁ መት-መቴክዕን ኢትቶናታት።

13 መንቹ ፎልሰ ጃልተሰ ሀግሽ ኣሲኛ በተኣ ኢተት ኖበእ።

14 እዕኑ እን ኢዘተንክዕንገን ኢታ ጃል።

15 ቀርቹ እእኖ ጠወ ካዲንያ ደገኖበእቤቹሃ እን ከ ኤተሩ ክዕንኤተ ካዲመኤ ያምበእ፤ ጠወ እኩጎሬ ኢኒኛኤ ሞጭጭሚሃ ጉዕመንከ ለሊሾንክዕንገን፤ ጃልኤ ዩንክዕን።

16 እን መጠርንክዕን ሴሉ ኣዕኑ መጠርቴንታኤበእ፤ እን ሶኩንክዕን፤ ልግብ ላልቹ ላሊቶናተለከ ላሊቹኹ ሄኣኖሃ ለሆተ መጠርንክዕን፤ ህካን እኩቤቹሃ እዕኑ ሱዕሚንከኤ ኡጭቴንተርቹ ጉዕመንከ ኢኑኤ ኣሰኖሀዕን።

17 እን ኢዘተንክዕን ትዛዙ መት-መትንክዕን ኢተቀንቶናታት» ዩ።

ኢሰ ኣዲንያ ኣሉ ግበኖሀዕንገ ጠወኡሰ

18 ኢሰ ኩ ኣዲንያ ኣሉ ግቦህንጎሬ ክዕንኤት ብርተ ኤሳሃ ግቦሃ ኢሁሰ ደገ።

19 እዕኑ ከን ኣዲንያ ኣሊኛ እከንተ ኣቃን ኩ ኣዲንያ ኣሉ ኢተኖሀዕን እቅ፤ ጠወ እኩጎሬ ኣዕኑ ከን ኣዲንያ ኣሊኛ እከንበቤቹሃለከ እን ከን ኣዲንያ ኣሊኛ ኣደ ኣዕፀ መጠርንክዕን፤ ስቴሃ ኩ ኣዲንያ ኣሉ ግበኖሀዕን።

20 እን ክዕንገ ካዲንቹ ቀርቹኛሰ በተኣኖበእ ይ ኩሎንክዕን ላገተ ሰውይዩ፤ ኤሳሃ ሸርቶኢኛ ክዕንታሁ ሸርታእ፤ ኢ ላገተ ኣገርቶ ኣቃን ክዕን ላገታ ኣገርታ እቅ።

21 እኩጎሬ ኤሳሃ ሶኩሃ ደግበቤቹሃ ኢ መሳን ከ ጉዕመንከ ጠወ ኣታሀዕን።

22 እን ኣሚኛ ኩሎንሰበእቃን ጩብ እህኖሰበ እቅ፤ ጠወ እኩጎሬ ቴሱ ጩቤሀሰ ደባቡርታርቹ ኖበእ።

23 ኤሳሃ ግበኖሀ ይኣኢ ግበኖ።

24 እዩሁ ኣእበ ሆጉተ እን እሰ በላን እዕኖምበ ኣቃን ጩብ እህኖሰበ እቅ፤ ጠወ እኩጎሬ ካን ጉዕመንከ ለእ ኤሳላከ ኢ እን ግቦኡ።

25 ከን እኩሁ እሰ ሕጋን ሀትን ግቦኤ የመም ከተበሞሁ ዊሞታት።

26 ጠወ እኩጎሬ «ኣኒኛኤ ኣሚተኖሁለከ ኣኒሁ ኣኒኛኤ ሶሃንክዕን ጠራኝሳንቹ ሀንቅ ኣያኑ ኣሚኛንር ኣሰ ኢተኔ መሰከረኖ።

27 ሀትን ኣዕኑ ዎዕንኛን ኢን ሜጡበ ሄኤንተቤቹሃ መሰከርቴንንተ» ዩ።

16

1 ኢሰ «እን ካን ጉዕመንከ ኩሎንክዕን፤ ኣመዕነተኛክዕን ኡቤንተበእገ ይዩት።

2 ጭምት ሞናኛ 4ብት ሸርታሀዕን፤ ሀንቅንከ ክዕንኤተ ሸኖሁ ጉዕመንኩ መገኒሃ እኣኖሃ ኣኩደኖ ወክቱ ኣሚተኖ።

3 እሰ ህካን ኣታኢሁ ኤሳላከ ኣኒኤ ደጋበእቤቹሃት።

4 ጠወ እኩጎሬ እን ካን ክዕንገ ኩሎንክዕን፤ ወክቱሰ ኢሊረ ከን ጠውተኔሃ መ ዩንክዕንጎር ቃንናታት፤ እን ካን ከኒኛ ብርተ ኩልበሀዕን፤ እን ክዕንኤን ሚጡበ ሄዕኖምቤቹሃት» ዩ።

ጠሊሊ ኣያን ሆንተኔሃ

5 ኢሰ «ጠወ እኩጎሬ ቴሱ ሶኩህሀንገበ ኦርኣም፤ እኩጎሬ ክዕንኛ እዩሁ ሀከቤቹ መርተን?» ይ ጠዕምኖኤበእ።

6 እኩጎሬ እን ካን ኩሎንክዕን፤ ቀልቤንክዕን ሻዙት ዊንቶኤ።

7 ኢሁን ቤሉ እን ሀንቅንከ ያንክዕን፤ ኢ ኦርኤ ክዕንኤሃ ደግለለኖሀዕን፤ መሰንትሰ እን ኦርኣባኛ ጠራኝሳንቹ ክዕንቤቹ ኣሚተኖበእ፤ እን ኦርዕኖሚኛ እሱ ክዕንቤቹ ሶሃም።

8 እሰ ኣሚኛ ወክት ከን ኣዲንያ ኣል መኒሃ ጩብሰ ኩሎኛ ኤተሮን ጩብተኔሃ፤ ጠሊልመተኔሃለከ ፍርድተኔሃ መሃንር ለሊሽ ኩለኖ።

9 ጩብተኔሃ ኩለኖሳሁ እን ኣመዕኑ ግቦቤቹሃት።

10 ፈይመተኔሃ ኩለኖሁ ኣንኤቤቹ ኦርኣምቤቹሃትለከ ከኒኛ ኤተሪሃ ለኣንተበእቤቹሃት።

11 ሀትን ፍርድተኔ ኩለኖሁ ከን ኣዲንያ ኣል ዳኝ ኣሉን ፈረደሞቤቹሃት።

12 «ዎሉ ኩላንክዕን ልግቡ ጠወ ዮኡ፤ እኩጎሬ ቴሱ ጠዕሰ ቀልቤክዕን ኣፈን ኣታልቴንተበእ።

13 ሀንቅ ኣያኑ ኣሚኛ ወክት ሀንቅ ጉዕመንከ ደኔንተገ እኣኖሀዕን፤ መሰንትሰ እሰ ጠወኣኖሁ ሞጭጭኢሃት ቤሉ ገዪኛሰ መቲርቹሃ ጠወኣኖበእ፤ እሰን ከ ኤተሩ ኣሚተኖ ጠወ ኩለኖሀዕን።

14 እሰ ኢኛ ኣእ ኩለኖሀዕን፤ ኤሳሃ ሎርሰኖ።

15 ኢ ኣኒሃ እኩሁ ጉዕመንኩ ኢሃን፤ ቡ ኢኛ ቶግ ክዕንገ ኩለኖሀዕን ዩሚሁ ከኒሃት።

ሻዙክዕን ሙንዲኖን ደረሙሰ

16 «ቀዎ ወክቲሃ ለኣንተኣበእ፤ ሀትን ቀዎ ወክቲኛ ኤተሮን ለኣንተኣበእ።» ዩ።

- 17 እሳባችሁ መት-መቱ «ኩ ቀዎ ወክተሃ ለእነንተኤበኤ ህትን ቀዎ ወክተች ኤተርን ለእነንተኤ፤ እንኤቤቼ ኦርአም የኖረህ መ የሃሰ?» የቀንቶኤ።
- 18 ህትን «ኩ ቀዎ ወክተች ኤተርን» የኖ ጠጪ መርቻሃን? መ የሃሰሳሬ ደንጎምበኤ። ይቶኤ።
- 19 ኢሰ እሰ ጠዕምቶሰተ ሀሱሰ ደገ «ገገጧንኩክዕኔ ቀዎ ወክተሃ ለእነንተኤበኤ ህትን ቀዎ ወክተች ኤተርን ለእነንተኤ» ይምቤቼሃትንደ መት-መቱክዕኔ ጠዕምቱነንታህ?
- 20 ሀንቅንከ ያንክዕኔ፤ እዕኑ ኦኤነንተ፤ ጠው እኩጎሬ ከን ኣዲንያ አል መኑ ሙንደኣኣ፤ እዕኑ ቫዜነንተ፤ እኩጎሬ ክዕኔ ቫዙት ሙንዲኖን ደረጎንታኤ።
- 21 መንቹንት አልታ ወክቱ ኢሊ ወክት ንዕጠን ቫዛኣ፤ እልት ከኤቶች ኤተርን ከን ኣዲንያ አሌን ጩሉ አለም ሙንዲኖን ሞኔ ኦርሸተ ሀባኤ።
- 22 ህትን እዕኑ ቴሱ ቫዜነንተ፤ ጠው እኩጎሬ እን ለንኪሃ ለኣንክዕኔ፤ ክዕኔ ቀልቡንኩ ሙንደኣኖ፤ ሙንዲኔክዕኔ ክዕኔቶ ኣኣኖሁ የበኤ።
- 23 «ሀከ በር እዕኑ መቱርቹሃ ጠዕምቱነንተኤበኤ፤ ሀንቅንከ ያንክዕኔ፤ እኑኤ ሱዕሚንከኤ ጠዕምቱነንተርቹ ጉዕመንከ ኣሰኖህዕኔ።
- 24 ቴሱ ኢሊ ሱዕሚንከኤ መቱርቹሃ ጠዕምቱነንታበኤ፤ ሙንዲኔክዕኔ ዊመ እኩተ ዱኣ እዕዬ፤ ደዕቱነንተ።
- 25 «ቴሱ ኢሊ ከ ጠወ ምሳሌን ኩሎንክዕኔ፤ ከ ኤተሩ ምሳሌን ኩላምበኣ ወክቱ አሜተኖ፤ ጠው እኩጎሬ እንኤተሃን ጉዕመርቹንከ ለሊሸ ኩላንክዕኔ።
- 26 ሀከ በር እዕኑ እነኤ ሱዕሚንከኤ ኡጭቱነንተ ቤሉ እን ክዕኔ ወጥ ኡጫምበኤ
- 27 መሰንትሰ እኑኤ ገገጧንኩሰ ኢተኖህዕኔቤቼሃት፤ እኑኤ ኢተኖህዕኔሁ ኤሳሃ ኢትቱንተኤቤቼሃትለከ እን መገን አዲች አሜቻምገ አመዕንቴንተቤቼሃት።
- 28 እን መገን አዲን ኣዲንያ አል አሜቻም፤ ቴሁ ፈንቀል ኣዲንያ አል አጉር እንኤቤቼ ኦርአም» ይሱ።
- 29 እሳባንት «ምሳሌን እሁዕን ለሊሰ ኩልቶንትኔ።
- 30 እት ጉዕመንከ ደጋንትገለከ አዪሁ ጠዕሙ ሀሰሰኖበኣ፤ ቴሱ ደንጎም፤ ህካን እኩቤቼሃት መገን አዲን አሜቶንትገ አመዕንኖም» ይቶሱ።
- 31 ኢሰ ፈንቀሽ «ቴሱ አመዕንቴንታንደ?»
- 32 ጉዕመንኩክዕኔ ኤሳሃ ማጢሃኣ አጉርቱን ብን ይቱነንተ ወክቱ አሜተኖት፤ ወክቱንኩሰ ቴሱ ኢልዮኡ፤ ጠጪ እኩጎሬ እኑኤ እን ማጠቡበ ሃዕየቤቼሃት እን ማጧጧቤበኤ።
- 33 ካን ክዕኔሃ ኩላሚሁ እን ማጠቡበ ሃኤንተ ወክት ወገሬቱ እሆህዕኔታት፤ ከን ኣዲንያ አሌን ሃኤንተ ወክት ኦርሸተ የኩ፤ ጠጪ እኩጎሬ ዋጅቶኖቹ፤ እን ከ ኣዲንያ አል ጭም» ይሱ።

17

ኢሰ ዱእ እዕዮገ

- 1 ኢሰ ህካን ጠወዕዮች ኤተርን ሰማ ዋሽ ለእን «ኢ እና! ወክቱ ኢልዮኡ፤ ቤቱክ ከዕምሶሃት እት እሱ ከዕምሶሰ።
- 2 ህካን እኩቤቼሃት እት ኣቶንትሰ መኒሃ ጉዕመንከ ዘላለሚሃ ሃኣኖ ሃኤ ኣሶተ ጉዕመንከ መን አሌን ሹምንቱ አቶንትሰቤቼሃት።
- 3 ዘላለሚሃ ሃኤኖ ሃኤ ዩ እት ማጥቹክ ሀንቅ መገኑ እኩንት ከሳለከ እት ሶኮንት መሲህ ኢሰ ደጉሃን።
- 4 እን እኦተ ኣቶንቱኤ ሆንተ ሹል ዕዕይ ኡሊ ኣሌን ከዕምሹንኩ።
- 5 ኢ እና! ኣዲንያ አሉ ከለቀሙዕን ሃጭ ኪቤቾን ሃዕዮኤ ከዕምኚን ቴሱ ብሬክ ከዕምሴኤ።
- 6 «ከን ኣዲንያ አሊች ኣቶንቱኤ መኒሃ ሱዕመክ ለሊሾም፤ እሰን ኪራጎን፤ እት እሰንተ ኤሳሃ ኣቶንቱኤ፤ እሰን ሳገክ አገርቶኤ።
- 7 እት ኤሳሃ ኣቶንትርቹ ጉዕመንኩ ኪቶ እኩገ እሰን ቴሱ ደጋኤ።
- 8 እት ኣቶንት ሳገተ ኣሰዮንሰ፤ እሰን ቶጎኤ፤ እን ኪ ኣዲች አሜቱኣ ሀንቅንከ ደጎኤ፤ እት ኤሳሃ ሶኮንትገን አመዕንቶኤ።
- 9 «እን ኡጫሚሁ እሰተኔሃት፤ ኩ ኣቶንቱኤሁ ኪሃ እኩቤቼሃት ኣሳንከ ዱኣ ኣኣም፤ ጠጪ እኩጎሬ ከን ኣዲንያ አል መኒሃ ዱኣ አኣምበኤ።
- 10 ኢሃ እኩ መኑ ጉዕመንኩ ኪረ፤ ህትን ኪሃ እኩ መኑ ጉዕመንኩ ኢሃን፤ እን እሳን ኬዕሚም።
- 11 እን ከኒች ኤተርን ከን ኣዲንያ አሌን ሃኣምበኤ፤ እኩጎሬ እሰ ዮኢሁ ከን ኣዲንያ አሌኒት፤ እን ከቤቹ አሜቶታት፤ ጠሊሊ ኢ እና! ንገን ማጠቡ እኩተ ኣቶንቱኤ ሱዕሚንከክ አገርሰ።*
 - 12 እን እሳን ማጠቡበ ሃዕዮም ወክት እት ኣቶንቱኤ ሱዕሚንከክ አገርንሰ፤ † ህካን እኩቤቼሃት መገን ሳገተ ዊንቶተ ህከን በኣ ጩል ቤሉ ሆርን እሳች አዪሁ ሰዕዮበኤ።

* 17:11 ኤሳሃ ኣቶንቱኤ ሱዕሚን አገርሰ- የኖሁ መት-መቱ ሉህ ክታበት «ኤሳሃ ኣቶንቱኤ ጉዕመንከ ሱዕሚንከክ አገርሰ» ይታኤ።
 † 17:12 ኣቶንቱኤ ሱዕሚን አገርንሰ- የኖሁ መት-መቱ ሉህ ክታበት «ኣቶንቱኤ ጉዕመንከ ሱዕሚንከክ አገርንሰ» ይታኤ። 17:12 መዝ. 41፡9፤ ያህ. 13፡18።

- 13 እኩጎሬ እን ቴሁ ኪቤቹ አሜቶታት፤ እን ከን ኣዲንያ ኣሌን ሃእን ከን ጠወዕዮሚ ሙንዲኦኦ ቀልቤንከኤ ዊንቶታት።
- 14 እን ላገክ ኣሳዮንሳ፤ እን ከን ኣዲንያ ኣሌች እህበገ እሰ ከን ኣዲንያ ኣሌች እኩበእቤቹሃ ከን ኣዲንያ ኣል ሙኑ ግቦሰ።
- 15 ሃረርቹች አገርቶታት ቤሉ ከን ኣዲንያ ኣሌች ዋሉ አደ መሰቶተ ኡጫንኬበአ።
- 16 እን ከን ኣዲንያ ኣሌች እህበሀንገን እሰ ከን ኣዲንያ ኣሌችብአ።
- 17 ሀንቅንከክ ጠሊላኑተ አእሰ፤ ላገክ ሀንቅሃን።
- 18 እት ኤሳሃ ኣዲንያ ኣል ሶኮንቴኤገን እኒሁ እሰተ ከ ኣዲንያ ኣል ሶኮንሰ።
- 19 እሰን ሀንቁን ጠሊላኑተ እኮተ እን ገጫ እሰተኔሃ ጠሊሊ አሆተ አደ አእም።
- 20 «እን ጠሊዕል እሰተ እሁዕን እሰ ላገተ ሞጮጭት እን አመዕንተሀኑኡተ ዲአ አእም።
- 21 ዲአ አእሚሁ ጉዕሙንኩሰ ሜጡ እኮተታት፤ ሀትን ኢ አና፤ አት እን እንን ኪን ሃዕዮምገን እሰ ኒን ሃእታት፤ እት ኤሳሃ ሶኮንቴኤገ ኣዲንያ አሉ አመዕናታት።
- 22 ነኡ ሜጡ እንኮምገን ሜጡ እኮተ ኤሳሃ ኣቶንቴኤ ኬዕምኛ ኣሴንሰ።
- 23 እን ኣሳን እት እን ሃእንትገን እሰ ሹልተ ሜጡ ኣካን ኣዲንያ አሉ እት ኤሳሃ ሶኮንትገለከ ኢትቶንት ጌሰ እሰንተ ኢትቶንትገ ደጋኢ።
- 24 «ኢ አና፤ ኣዲንያ አሉ ከለቀሙዕን ሃጭት ኢትቶንቴኤቤቹሃ ኣቶንቴኤ ኬዕምኛ ለእ ኩ እት ኣቶንቴኤሃ እን ሃዕዮም ቤቹን እን ሜጡብ ሃእተ ሀሳም።
- 25 ፈዮ ኢ አና፤ ኣዲንያ አሉ ደንሂበእ፤ ጠወ እኮጎሬ እን ደጋንኬ፤ ኩ ሙኑ ኤሳሃ ሶኮንቴኤገ ደንኤ።
- 26 እት ኤሳሃ ኢትቶንት ኢትት ኣሳን ሄኑተለከ እን ኣሳን አሆተ እሰን ሱዕመክ ደጋገ አዕዮም፤ ከ ኤተሩሃ ደጋገ አእም። ይ ዲአ አዕዮ።

18

ኢሰ አፌመገ
 (ማቶ. 26፥47-56፤ ማር. 14፥43-50፤ ሉቃ. 22፥47-53)

- 1 ኢሰ ሀካን ጠዕወዮች ኤተሮን ኣሳባንተሰን ሜጡብ «ቁድሮን» ዬዮ ሀጨሬች ዉድ አደ ኦርዕዮ፤ ሀከኒን ካሲመ ሀቅ ኣዛ ኣሳባንተሰን ሜጡብ ኣጎ።
- 2 ኢሰለከ ኣሳባት ሀከን ቤቹን ልግብ ወክት ጭም ይታቤቹሃ ሀግሽ ኣሰኖ ይሁድ ሀከ ቤቹ ደገኖ አቅ።
- 3 ሀካን እኮቤቹሃ ይሁድ ልግብ ወታደረ፣ ቁሰ አምንሳኖችለከ ፈርሳዌች ሶሀንቶ ዘበኛ ሀለቀተ አምንሰ ሀከ ቤቹ አሜቹ፤ እሰን ፋናሰ፣ ችቡተለከ በገዝ ኦደተ አኖ አሜቶኡ።
- 4 ኢሰ አሌሰ አሜተኖ ጉዕመንከ ጠወ ደግ እሰበ መር «አዬ ሀሴንጎታት?» ዬሰ።
- 5 እሰን «ነዘሬት ኢሰ ሀንሳሚት» ይት ፈንቀሽቶኤ፤ እሰን «አኔት» ዬሰ፤ ኢሰ ሀግሽ ኣሴ ይሁድ ኣሳን ሜጡብ ኡርዮ አቅ።
- 6 ኢሰ «አኔት» ዬሰ ወክት ኤተሩ ዋልት ኡላ አሌን ኡቦኡ።
- 7 ለንኪሃ ኢሰ «አዬ ሀሴንጎታት?» ዬሰ፤ እሰን «ናዘሬት ኢሰ ሀንሳሚት» ይቶሰ።
- 8 እሰን ፈንቀሽ «አኔት!» ይ ኩሎንክዕኔ፤ ሀሴንጎታሁ ኤሳሂት ጎር እሰ መርቱን» ዬሰ።
- 9 ሀካን እኮሁ ኢሰ «አት ኣቶንቴኤ መኒች መቱሃ ቤሸምበእ» ዬ ላገት ዊንቶታት።
- 10 ሰምን ጴጥሮሰን ብሰ አፎ አቶ፤ እሰን ብሰ ፋሽ ሎረ ቂሲች ካዲንች መኬ አድ መጨት ሙሮ፤ ሀከን ካዲንች ሱዕሙንኩ «ምልኮሴ» ዬኖሃ አቅ።
- 11 ኢሰ ጴጥሮሴ «ብሰክ ኮቦንተክ ዋር፤ እኑኤ ኣሴኤ ኦርሽ ጠበቱሃ ቶኑ ሀሰሰኖኤበእንደ?» ዬሰ።

ኢሰ ሃና ዬኖ ቂሲችበ መሴመሰገ

- 12 ሀከኒች ኤተሮን ዋታደረላከ እዛዘኖ አይሁድ ዘበኛ ሀለቀንት ኢሰ አኖ ኡሱርቶኡ።
- 13 እሰን ሃጭት ሃንቤቹ መሰቶሰ፤ ሃን ሀከ ዘማን ሎረ ቂሲቹ እክ ሃዕዮ ቀያፍና በሉ አቅ።
- 14 ቀያፍን «መቱ መንቹ መንተኔሃ ራዮጎር ጡመሃን» ይ አይሁድ መኒሃ ሸኩሃ መንቹ አቅ።

ጴጥሮሰ ኢሰ ለገኡሰ
 (ማቶ. 26፥69-70፤ ማር. 14፥66-68፤ ሉቃ. 22፥55-57)

- 15 ሰምዖን ጴጥሮሰለከ መቱ ዋሉ ኣሳባንት ኢሰ አምንቶኤ፤ ሀከ ዋሉ ኣሳቤቹንከ ሎረ ቂሲቹ ደገኖሰ አቅ፤ ሀካን እኮቤቹሃ እሰ ኢሰንን ሜጡብ ሎረ ቂሲች ግቤ ኣዛ ኣጎ።
- 16 ጠወ እኮጎሬ ጴጥሮሰ ብትም ኤተር ኣዲን ኡርዮ አቅ፤ ሁኩ ሎረ ቂሲቹ ደገኖሰ ኣሳቤቹ ፈንቀል ፋል ብትመ አገርታ ሀፍቶን ኩል ጴጥሮሴ ኣዛ ኣገሾ፤
- 17 ሀት ብትመ አገርታ ሀፍቱት ጴጥሮሴ «አት ከ መንች ኣሳባች መቶሃሰበእንደ?» ይቶሰ፤

እኩሳሬ እሰ «እን እሳባችበእ» ዬእ።

18 ወክቱሰ ቂዘኖ ቤቹሃ ካዲመትለክ ዘበኙ ከሰል ገረተ ቡሰት ኡርት ኢብጭታኢት እቅ፤ ጴጥሮሰን እሳን ሚጡብ ኡር ኢብጫኖት እቅ።

ሎረ ቂሰቸች ኢሲሃ ሆንጠኮ ጠዕምቱተ (ማቶ. 26፥59-66፤ ማር. 14፥55-64፤ ሉቃ. 22፥66-71)

19 ሎረ ቂሰቸኅኩ ኢሰ እሳበተኔሃለክ ተማርሲኖ ትምርትተኔሃ ጠዕሚሰ።

20 ኢሰ «እን ጉዕማንከ መን ብሬን ጠወዕኖም፤ አይሁድ መኑ ጉዕሙንኩ ጭምይታ ቤቸን ጭምትሰ ምኔንለክ መገን ምኔን ተማርሲኖ፤ እን ገበጭ አዕይ ጠዕወኖም መቱ ጠዉሁ ኖበእ።

21 ኤሳሃ ሚሃ ጠዕምተን? እን ጠወእን ሞጮጭቶረ ጠዕም፤ እን ጠወዕኖሚሃ እሰ ደጋእ» ይ ፈንቀሺሰ።

22 ኢሰ ህካን ጠወዕኖ ወክት ህከኔ ኡርቶ ዘበኚች መቱ «ሎረ ቂሰቸሃ ፈንቀሽገንቲሁ ሁትተንደ?» ይ ኢሰ መጫለ ዋቀሮ።

23 ኢሰ ፈንቀሽ «ሂለ ላገተ ጠወዕኖም ጎር ሂለ ላገተ ጠወዕኖምገ መሰከር፤ እኩሳሬ ጡመ ጠወዕኖሚሁ ሀንቅ እህን ሚሃ ዋቀርተዕኔ?» ዬእ።

24 ህከኒች ኡተሮን ሃነ ኢሰ ኡሱረሞገን ሎረ ቂሰች ቀያፍቤቹ ሱኮ።

ጴጥሮሰ ኢሰ ለንኪሃ ለገኡሰ (ማቶ. 26፥7-75፤ ማር. 14፥69-72፤ ሉቃ. 22፥58-62)

25 ህከኒን ሰምን ጴጥሮሰ ኡር ገረተ ኢብጫኖት እቅ፤ ህከኔ ሄዕኖ መኑንኩ ጴጥሮሴ «አት ህከ መንች አሰባች መቶሃሰበእንደ?» ይቶሰ፤ እሰን «እን እሳባችበእ» ይ ለገዕኖ።

26 ጴጥሮሰ መጫሰ ሙሮ መንች አሉ እህሮሁ ሎረ ቂሰች ካዲማች መቱሰ «ህከን ሀቅ አዜን እሰን ሚጡብ ለዕኖንኬበእንደ?» ዬሰ።

27 ጴጥሮሰ ለንኪሃ ለገዕኖ፤ ህከ ወክትንከ ሀንጠሮ ዋጀ።

ኢሰ ጵላጦሴበ መሲመሰሰ (ማቶ. 27፥1-2፤ 11-14፤ ማር. 15፥1-5፤ ሉቃ. 23፥1-5)

28 ህከኒች ኡተሮን ኢሰ ቀያፍ ምኒች ሮም ባድ ገሻንች ግብተ መሰቶሰ፤ ወክቱሰ ገሰመ ሱጵተ እቅ፤ አይሁዱ ሻሽግ ከበጃተ ጎረጤኖ ሆልቹ አታቤቸሃ ንጆሳበእገ ይት ባድ ገሻንች ግቤ አዝ አጎበእ።

29 ህካን እኮቤቸሃ ጲላጦሰ እሰበ ፋል «ከን መንች አሉን ክሰ ሆንጠህበሴንታሁ መርቸሃን?» ይ ጠዕሚሰ።

30 እሰን «ኩ መንቸ ሂለ ጠወ አዕኖበእቀ ኬሳሃ ሀግንሰ አሰናምበ እቅ» ይት ፈንቀሽቶኡ።

31 ጵላጦሰን «አዕኑ መሰኑን ሕግንከክዕኔ ፈረጄ» ዬሰ፤

እሰን «ነኡ መን ሸናም ዳኝነቱ አሰሞኔበእ» ይቶሰ።

32 ካን እኮሁ ኢሰ ሁትኔ ሬሁተ ሬሀኖ ጎር ጠወዕኖ ላገት ዊንቶታት እቅ።

33 ጵላጦሰን ፈንቀል ምንሰ ኣግ ኢሰ ገእ «አት አይሁድኖ የመንደ?» ይ ጠዕሚሰ።

34 ኢሰን «አት ካን ይታንቲሁ ገይችክትንደ ህከረንገ ሞሉ መኑ አተኔሃ ኩሎሃ?» ይ ጠዕሚእ።

35 ጵላጦሰ ፈንቀሽ «እን አይሁድቸሃንደ? ኬሳሃ ኤሳሃ ሀግሰ አቶሄሩ ዘራተክለክ ቂሰተ አምንሳኑ፤ አት መ አቶንት?» ይ ጠዕሚእ።

36 ኢሰ «ኢ ሞምነቱ ከን አዲንያ አሊችበእ፤ ሞምነቱኤ ከን አዲንያ አሊች እኮ እቃ አይሁድ አንጋን አጋምበእገ ካዲመኤ ኦለንተ እቅ፤ እኮሳሬ ሞምነቱኤ ከን አዲንያ አሊችበእ» ይ ፈንቀሺእ።

37 ጵላጦሰን «ህከረ እት ሞምንደ?» ዬእ፤ ኢሰ «ሞመ እሁኤ እት ይቶንቲኤ፤ እን ከለቀሞሚሁለክ ከ አዲንያ አል አሚቸሚሁ ሀንቅተኔሃ መሰከርታት፤ ሀንቅ አዲን እኮሁ ጉዕሙንኩ ላገኤ ሞጮጫኖ» ይ ፈንቀሺእ።

38 ጵላጦሰን «ሀንቁ መርቸሃን?» ዬሰ፤ ህካን ጠወዕኖች ኡተሮን ጵላጦሰ ለንኪሃ ፋል «እን ከን መንቸን መቱ ቤሾርቸሃ ደጎምበእ።

39 ጠዉ እኮሳሬ ሻሽግ ከበጀ ወክት ኡሱራመ መኒች መቱ ሂራንክዕኔ ሴሩ ኖቤቸሃ አይሁድ ዋመ ሂረተ ሀሴንንደ?» ዬሰ።

40 እኮሳሬ እሰ «ገርቱ ሂረ ቤሉ እሱ ሂረቶት!» ይተን ሎረ ላጋን ጨንጭቶኡ፤ ባርባን ወንበዴቸሃ እቅ።

19

ዋታደሩ ኢሰ አሌን ቀለደገ (ማቶ. 27፥27-32፤ ማር. 15፥15-21)

1 ህክኒች ኤተሮን ጽላጦስ ኢስ መስ ኦልሲሾ።

2 ዎታደሩንኩ ኤት አክሊሊ መክሰ ኢስ ቡዕላን ዋርቶኤ፤ ህትን ሰመ እኑደኖ ቢሸተ ኦድኑተ ኦዲሶስ።
3 እሰን መድሰ ሆንጠክ «አይሁድ ዎመ! ወገራቱ ኬሳሃ አሁን!» ይተን መጫለሰ ዎቀርታኢት እቅ።

4 ጽላጦስ ምኒቶስ አብል ፋል «ሁኩዕኑን እን ከን መንቸን መቱ ቤሱሃ ደጉ ሆጉኤ ደንኖተ እሱ አብል ፋሻንክዕኔ» ይሰ።

5 ህካን እኩቤቹሃ ኢስ ኤት አክሊሊ ቡዕለስ አዕይ ሰመ እኑደኖ ቢሸ ኦድኑተ ኦደዕይ ፋሎ፤ ጽላጦስን «መንቸስ ሁኩዕኑን» ይእ።

6 ቂስ አዎንሳትለክ ዱእ ምኒ ዘበቹ ኢስ ለኦ ወክት «ስቀል! ስቀል!» ይተን ሎረ ላጋን ጨንጭቶኤ፤ ጽላጦስን «አዕኑ ገወክዕኔ መስቱን ሰቀላ፤ መስንትሰ እን እሰ አሉን መቱ ቤሱሃ ደንግጠኤ» ይሰ።

7 አይሁድንኩ እሲሃ ፈንቀሸት «ኔሳሃ ሕጉ ኮኔ፤ ኩ መንቸ ገወሰ መገን ቤቱ እዕዮቤቹሃ ህከን ሕግኔገ ሬሁ ሀሰሰኖስ» ይቶሰ።

8 ጽላጦስ ህክ ጠወ ሞጮጮ ወክት አበ ዋጆእ።

9 እሰን ምኒስ ፈንቀል ኣግ ኢስ «ኣት ህከንቤቸችት?» ይ ጠዕሚሰ፤

ጠወ እኩገራ ኢስ መቱርቹሃ ፈንቀሸኖበእ።

10 ህካን እኩቤቹሃ ጽላጦስ «መቱርቹሃ ጠወአንትበአንድ? ኬሳሃ ሂር ገፈርተለክ ሰቀሎተ ሹምነቱ ኮኔገ ደጋንትበአንድ?» ይሰ።

11 ኢስን ፈንቀሽ «መገን አዲቶ ሹምነቱ አሰሞሃበእቀ ኣት ኤሳሃ መቱርቹሃ አቶተ አታልታንትበእ እቅ፤ ህካን እኩቤቹሃ ኬሳሃ ህግሽ ኣሴህን ጨቡሰ በተአኖ» ይሰ።

ኢስ አሉን ሬሆ ፍርዱ ፈረደሙስ
(ማቶ. 27:15-31፤ ማር. 15:6-20፤ ሉቃ. 23:13-25)

12 ጽላጦስ ኢስ ህካን ጠወአን ሞጮጮ ወክት ሂር ገፈርተ ሀሾ እቅ፤ እኩገራ አይሁዱ «ከ መንቹ ገፈርቶንት ጎራ ኣት ሮም ዎሚሃ ጀለበእ፤ መስንትሰ ገወሰ ዎመ እአኖሁ ጉዕሙንኩ ሮም ዎሚሃ ዲነሃን!» ይተን ጨንጭቶኤ።

13 ጽላጦስን ህካን ሞጮጮ ወክት ኢስ አብል ፋሽ «ሻምባቀ ክኑ» የመሞ ቤቾን ፍርድ ቦርጭማን አፋዕሌእ፤ ሁኩ ቤቹ አብራጭ መን አፎን «ገበተ» የመመኖ።

14 ሁኩ በሩንኩ ሻሽግ ከበጃቲሃ ተቃጠቤኖሃ በር እቅ፤ ወክቱስ ሌሆ ሳኣትሃ ኌስ እቅ፤ ጽላጦስን አይሁዱሃ «ዎሙክዕኔ ሁኩዕኑን» ይሰ።

15 ጠወ እኩገራ እሰን «እሱ ከም! እሱ ከም! ሰቀል!» ይቶኤ፤ ጽላጦስን «ዎመክዕኔ ሰቀሎንድ?» ይሰ፤ ቂስ አዎንሳትኑት «ሮም ዎም ቤሉ ኔሳሃ ዎሉ ዎሙ ኮኔበእ» ይት ፈንቀሸቶሰ።

16 ህክ ወክት ኢስ ሰቀሎኖተ ጽላጦስ ህግሽ ኣሴእ፤ እሰን አፍ መስቶኤ።

ኢስ ሰቀለሙስ
(ማቶ. 27:32-44፤ ማር. 15:21-32፤ ሉቃ. 23:26-43)

17 ህከኒች ኤተሮን ኢስ ገይሰ መስቀለ እጅ «ቡዕል ቁላሃ» ይኖቤቹ ፋሎ፤ ሁኩ ቤቹ አብራጭ መን አፎን «ጎልጎተ» ይኖሃን።

18 ህከንቤቸንን እሱ ሰቀልቶኤ፤ ህትን ዎሉ ለሙ መንቹ መቱ መኬ አዲን መቱስ ጉራ አዲን ኣት ኢስ በለስ ሰቀልቶኤ።

19 ጽላጦስን «አይሁድ ዎመ፤ ናዘሬት ኢስ» የኖሃ ከተብ ሰቀለሞ መስቀል ቡዕል አዲን እኣኖተ አዘዠ።

20 ኢስ ሰቀለሞ ቤቹ ከተሚሃ ግድኑ እኩቤቹሃ ልግቡ አይሁዱ ከተበሞሲሃ እነበቦኤ፤ ሁኩንን አብራጭ መን አፎን፤ ላቲን አፎንለክ ግርክ አፎን ከተበሞእሃ እቅ።

21 አይሁድ ቂስ አዎንሳትኑት ጽላጦሴ « ሕን አይሁድያ ዎመ» ይገ ከተብ ቤሉ ሕይሁድ ዎመ» ይት ከተቦት» ይቶሰ።

22 ጽላጦስን «ከተቦሚንክ ከተቦም» ይ ፈንቀሼሰ።

23 ዎታደሩንኩ ኢስ ሰቀልቶች ኤተሮን ኦድኑስ መስት ቡዕለ ቡዕለስ መት-መቱ እሎስተ ቀምቢስስ ፊስ ሾሉ ቤቹ ቤኮእ፤ ጠወ እኩገራ ቀምቢሱስ አሉች ዎር ኢሊ ጎበሙዕን ሚጡቡ ደደሞእሃ እቅ።

24 ህካን እኩቤቹሃ ዎታደሩ «አይሃ እላኖ ጎራ ለዕኖተ እጠ ኤጅኖ ቤሉ ቀምቢስ ፊልኑን» ይቶኤ፤ ሁኩንን አኩሀ

«ኦድኑኤ ቤቀንቶኤ፤
ቀምቢስኤ እጠ አቶኤ»

ይታ ጠሊሊ መጻፍ ላገት ዊንቶታት፤ ዎተደሩንኩ ህትን አቶኤ።

25 ህክ ወክት ኢስ መስቀል መዴን አመስ፤ አመስ አመ ቤቱቲ፤ ቀሎጴ መንቹት መርየመለከ መግደል ከተም መርየመ ኡርቶ እቅ።

26 ኢስ አመሰለክ እስ ኢተኖስ አሳበሰ መዳንከሰ ኡርታን ለዕዮ ወክት አመሰ «ቴ መንቸ! ቤቱክ ሁኩዕነን» ይሱ።

27 ህትን አሳቤቸሃሰ «አመክ ትዕሲን» ይሱ፤ ህከን ወክቲቻ ኪሽ ሁኩ አሳቤቸ ኢስ አመተ ምንሰ መሲእ።

28 ህከኒቻ ኤተሮን ኢስ ጉዕሙርቸንኩ ዊሞገ ደጎ፤ መጻፋን ከተበንቶ ላገት ዊንቶተ «ሰገጦኤ» ይእ።

29 ህከኒን ሆሊጮ ዎይኑ ዊሞ ኦደት ሄኦ እቅ፤ ህካን እኩቤቸሃ ህከኒ ዮ መኑ ህከን ሆሊጮ ወይነ ጥጢን ጨፍ አገደ አኩደኖ ሀቂን እፌሰቤቸ ሆንጠሀሶኡ።

30 ኢስን ህከ ሆሊጮሃ ፊጭ ይቻ ኤተሮን «አበቀዕዮ!» ይእ፤ እስን ቡዕላሰ ሙግ አዕይ ሬዮ።

ኢስ ምዛሹሰ በገዢን ቀሴመገ

31 ህከኒቻ ኤተሮን አይሁዱ ሰቀላንቶ መን ጋለ ቢጤን ድሪሶኖተ ጽላጦሴ ኡጭቶኤ፤ መሰንትሰ አበተ ተቃጠቤኖ በር እኩቤቸሃለክ ሁኩ ፎሎጭ በኑ አበ ከበጄኖሃ እኩቤቸሃ ህከን አባን ራሹሰ መሰቀል አሉን አሀኖበእጋት እቅ።

32 ህካን እኩቤቸሃ ዎተደኗ መርት ኢሲን ሰቀላንቶ መን ጋለ ቢጦኤ።

33 ኢሰቤቸ አሜታ ወክት እስ ሬዮገ ለእ ጋለሰ ቢጦበእ።

34 ጠው እኩጎሬ ዎታደሪቻ መቱ ኢስ ምዛሹ በገዢን ቀሻን ህከ ወክትንከ ምዛሺቻሰ ቄጉለክ ውሁ ፋሎ።

35 ህካን ለዕዮሁ አዕኑ አመዕንቴነንተገ መሰከሮ፤ ምሰክሩንኩ ሀንቅሃን፤ እስ ጠወአኖሁ ሀንቅ እኩገ እሰን ደገኖ።

36 ሁኩን እኩሁ መጻፋን «አሲቻ መቱ ምቀሃ ቢጤኖበእ» የመሞ ጠሊሊ መጻፋን ከተበሞሁ ዊሞታት።

37 ህትን መጻፋን ሞሎ ቤቸን «አሰን ቀሶኢሃ አሌንከሰ ለእስ» የኖ።

ኢስ ሞገሙሰ

(ማቶ. 27፡57-61፤ ማር. 15፡42-47፤ ሉቃ. 23፡50-56)

38 አይሁድ ሹመተ ዋጄቤቸሃ ማጠሞ ኢስ አዎነኖ አርማት ከተም ዮሱፍ ኢስ ጀርዘተ ኣኦተ ጽላጦሴ ኡጮኤ፤ ጽላጦሰን «ኣእ» ይሃንሰ ዩሱፍ መር ጀርዘተ ድርሽ መሲእ።

39 ዎሴ ሀዋርን ኢሰበ ኦርዕዮ «ንቆድሞሴ» ይኖ መንቸ ሰጅኔ መት ክሉተ አሀኖ ሀንቀፍቱተ አኩደኖ ካርቤተለክ ቁዕሪንደ ልቀለቄማሃ እእ አሜቸ።

40 እስ ለሙንኩሰ ኢስ ጀርዘተ መሰት አይሁድ ሴርገ ሸቱተ ቡርት ጥጥ ኦድኖን ከፈንቶሰ።

41 ኢስ ሰቀለሞ መዳን ሀቀ ካሴኖ ቤቸ ሄዕዮ እቅ፤ ህከንቤቸንን እይሁ ሞገምቡ ሃዕር ሎዱ ሄዕዮ እቅ።

42 ሁኩንን አይሁዱ አባተ ተቃጠበ በር እኩቤቸሃለክ ህከን ሎድቤቸ ግይኑ እኩቤቸሃ እስ ኢስ ጀእዘተ ህከን ሎዳን ሞጎኡ።

20

ኢስ ሬሆቻ ኬኡሰ

(ማቶ. 28፡1-8፤ ማር. 16፡1-8፤ ሉቃ. 24፡1-12)

1 ሳምንት ወኔ በር ገሰመ ሱጽተ አኑ ፋሉዕነ መግደል መርየመ ኢስ ሎድቤቸ መርቶኤ፤ ህከ ቤቸ ኢልቶገን ሎዱሰ ጡፈሞ ክኑ ሎድ ኡሮቻ ፈንተዕዮሃ ለኦኡ።

2 ህካን እኩቤቸሃ እሴ ሰሞን ጴጥሮሴቸለክ ኢስ ኢተኖስ ሞሎ አሳቤቸ ደጉደን መርት «ቀርቸ ሎድቻ ፋሽት መሰቶሰ፤ ህከቤቸ መሰቶሰ ጎሬ ደንጎምበእ» ይቶሰ።

3 ህከ ወክት ጴጥሮሰለክ ሞሎ አሳባት ፋልት ሎድቤቸ መርቶኤ።

4 ለሙንኩሰ ሜጡብ ደጉደንን ሞሎ አሳባቸ አበ ደጉጅ ጴጥሮሴ ሄጭ ሎድቤቸ ኢሊእ።

5 ሙግይ ሎድ ኣዝ ለእኖ ወክት ከፈኔመ ከፈኑ ህከኔ ዮኢሃ ለዕዮ፤ ጠወ እኩጎሬ ኣዝ አጎበእ።

6 ሰሞን ጴጥሮሴ አዎኛስ አሜቸ ሎድ ኣዝ አጎ፤ እሰን ከፈኔመ አድኑት ህከኔ ዮኢሃ ለዕዮ፤

7 ህትን ኢስ ቡዕላን ጣጤማ ከፈኑ ሞሎ ከፈኒቻ አደ እክ ሞሎ ቤቸን ጣጠሞ ኡሞሃ ለዕዮ።

8 ህከኒቻ ኤተሮን ሁኩ ሄጭ ሎድቤቸ ኢሊ ዎኔ አሳቤቸ ሎድ ኣዝ አጎ ለዕይ አመዕኔእ።

9 መሰንትሰ እስ «ሬሆቻ ኬኡ ሀሰሰኖሰ» ይታ ጠሊሊ መጻፍ ላገተ አጥራመቶበእ እቅ።

10 ህከኒቻ ኤተሮን ለሙንኩ አሳበት ፈንቀልት ምንሰ መርቶኤ።

ኢስ መግደል ከተሞ መርየማሃ ለሉሰ

(ማቶ. 28፡9-10፤ ማር. 16፡9-11)

19:28 መዝ. 69፡21፤ 22፡15። 19:36 ፋል. 12፡46፤ ዘኵ. 9፡12፤ መዝ. 34፡20፤ 119፡37፤ ዘዝ. 12፡10፤ መና. 1፡7። 19:39 ያህ. 3፡1-2።

11 መግደል መርየመ እኒን ሎዲች አብል አዲን ኡርቶ እቅ፤ እኒን መግይት ሎድ አዝ ለኦኡ።

12 እሱን እሱ ጀርዘት ሄኑ ቤቸን ዋጅተ ኦድኑተ ኦድኑ ለሙ መላይካት መቼ ቡዕል እዲን መቱንገ ሎኮ እዲን አፋዕልቶአሃ ለኦኡ።

13 እሱን መርየመ «ቴ መንቸ! ሚሃት ኦኒንቴት?» ይቶሴ።

እሱን «ቀርቼኤ መሰቶሰ፤ መ አቶሰጎሬ ደጎምበኤ» ይቶኤ።

14 ህካን ይት ኤተር አደ ፈንቀልት እሱ ኡሬአሃ ለኦኡ፤ እሱ እሁሰ ደጎበኤ።

15 እሱን «ቴ መንቸ ሚሃት ኦኒንቴት፤ አይ ሀሳንቴት?» ይሴ።

እሱን ህከኔ ሆተተ እአኖ መንቸ አጉጃንሴ «ቀርቸ አት መሰቶንትሰ ጎሬ አፋሽቶንት ቤቹ ኩሌኤ፤ እን መሳንሰ» ይቶሴ።

16 እሱን «መርየመ!» ይሴ። እሱን እሰ አደ ዘህት ዕብራዌ መን አፎን «ረቡኒ» ይቶኤ፤ ፍሳረንትሰ «አሰተማርቸ» ይሃን።

17 እሱ «አንኤቤቹ መሩዕነ የምቤቹሃ ኡልቶቴኤ፤ ጠዉ እኮጎሬ አመኤ ኦሶቤቹ መርት ለን እንኤለከ እንከዕኔበ መገንኤለከ መገንከዕኔበ አሌ መራም ይሃኡ» ይት ኩልሰ» ይሴ።

18 ህካን እኮቤቹሃ መግደል መርየመ አሳበበ መርት ቀርቸ ለኦሴለከ እሱን መ ይሴ ጎሬ ኩልቶሰ።

እሱ አሳባተሰ ለሌሱ

(ማቶ. 28፥16-20፤ ማር. 16፥14-18፤ ሉቃ. 24፥36-49)

19 ህከን ሳምንት ዎኔ በሬን ሀምሮን አሳበት አይሁድ ዳኛኑተ ዋጅት ኡሩተ ጡፍ ምኒ አዚን ጭምይቶ እቅ፤ ኡሩት ጡፈንቶህን እሱ አሳበሰ ጭምይቶ ምኒ ኣጎ፤ በለሰ ኡር «ወገሬቱ ክዕኔአሃ እሁን» ይሴ።

20 ህካን ይ አንጎሰለከ ምዛሹሰ ለሊሾሰ፤ አሳበንትሰ ቀርቸ ለኦ ወክት መንገደኡ።

21 ህከኒች ኤተርን እሱ ለንኪሃ «ወገሬቱ ክዕኔሃ እሁን! እኦኤ ኤሳሃ ሶኮገን እኒሁ ክዕኔተ ሶሃም» ይሴ።

22 ህካን ይ እሰ አሌን ፎገልሰ ኡፍ አዕይን «ጠሊሊ አያን ቶጎኤ፤

23 አዕኑ ዎሎ መን ጨብ ፈቁን ይቴንጎጎሬ ክዕኔ ጨቡሁ ፈቁን የመመኖህዕኔ፤ ህትን አዕኑ ዎሎ መን ጨብ ፈቁን ይቴንባች ክዕኔ ጨቡሁ ፈቁን የመመኖህዕኔበኤ» ይሴ።

እሱለከ ቶማሴ

24 እሱ አሳበሰበ አማኛ ወክት ቶና ለሞ አሳባች መቼ ዲዲምሴ ይኖ ቶማሰ እሳን ሚጡብ ሄዕዮበ እቅ።

25 ህካን እኮቤቹሃ ዎሎ አሳበንት ቶማሴ «ቀርቸ ለዕኖንሰ» ይት ኩልቶሰ። እኮጎሬ እሰ «ሙሰማሪን ቀሴመ አንጎሰ ለአባችለከ ቤቸንከሰ ዙሩዕማኤ ኣጎሰባች ህትን እንገኤ ምዛሾንከሰ የ ጡላን ኣጎሰባች አመዕናምበኤ» ይሴ።

26 ሳምንቲች ኤተርን አሳበሰ ለንኪሃ ምኔን ሄኦህን ቶማሰ እሳን ሚጡብ ሄዕዮ እቅ፤ ኡሩት ጡፈንቶህን እሱ አማኛ በለሰ ኡር «ወገሬቱ ክዕኔሃ እሁን!» ይሴ።

27 ህከኒች ኤተርን ቶማሴ «ዙሩዕማክ ከቤቹ ኤብ አንገኤ ለኦ፤ አንገክን ኤብ ምዛሾንከኤ ኣጎሰ፤ አመዕን ቤሉ አመዕንባሃ እኮት» ይሴ።

28 ቶማሰን «ኢ ቀርቸ! ኢ መገኖ!» ይ ፈንቀሼኤ።

29 እሱን ቶማሴ «አት ለኦንቴኤቤቹሃ አመዕንቶንት፤ ለኡዕናን አመዕንታኡ ማሰአንቶአራን» ይሴ።

ከን መጻፍ ሰውት

30 እሱ ከን መጻፋን ከተባሞበኤ ልግብ እጅብሲሰኖ ጠዉ አሳበሰ ለአን አዕዮኡ፤

31 ጠዉ እኮጎሬ እሱ መሰህ መገን ቤቱ እሁሰ አመዕንቶናተለከ አመዕንቱን እሰ ሱዕሚን ሄኤ ደእቶናተ ኩን ከተባሞኡ።

21

እሱ ለመላንከ አሳባተ ለሌሱ

1 ህከኒች ኤተርን እሱ ጥብራዶሰ ባር መዴን አሳባተ ለንኪሃ ለሌኦ፤ ለሌኤሁ ህትዪት፤

2 ሰሞን ጴጥርሰ፡ «መልተተ» የመሞ ቶመሰ፡ ገሊል ባዶን ሄዕዮ «ቃን» ይኖ ቤቹ ናትናኤል፡ ዘብድኖሴ ኦሱትለከ ዎሎ ለሙ አሳበት ሚጡብ ሄኦ እቅ።

3 ሰሞን ጴጥርሰ «ቁርጨሜተ ዎሻደተ መርታት» ይሴ።

እሱን «ኪን ሚጡብ መርናም» ይት መርት ጀልባን ኣጎኡ፤ ጠዉ እኮጎሬ ህከ ሀንከዕርተ መት ቁርጨሜተ አፎበኤ።

4 ኡሉት ሶዘን እሱ ባር ገበላን ኡሬኦ፤ እኮጎሬ አሳበት እሱ እሁሰ ደጎበኤ።

5 እሱ «ኢ ኦሶ! ቁርጨሜት የህዕንዶ?» ይሴ፤ እሱን «መቱርቸሁ የኔበኤ» ይቶሴ።

6 እሰን እሰንን «ወሻደ ጀልብ መኪ ኢዳን ኡጅዬ፤ ደእቴነንት» ዬሰ፤ ህካን እኮቤቸሃ ወሻደ ባር አሌን ኡጅቶኡ፤ ልግብ ቁርጩሜት እርቤቸሃ ወሻደሰ ጎሾሽት አታልቶበኡ።

7 ህከ ወክት ኢሰ አተኖሰ አሳቤቼ ጴጥሮስ «ቀርቼሃን!» ዬሰ። ሰሞን ጴጥሮስ «ቀርቼሃ» ዬአሃ ሞጫጭ ወክት ሆጉት እኣተ ኦድኑስ ፋሺቤቸሃ ወክትንከሰ ኦድኑስ ኦደዕይ ባር አዝ ኮርጅ ኣጎ።

8 እኮጎሬ ዎሉስ አሳባት ኡላቶ ጠለዕል ጥቤ ሜትር ጌሰ ቂዕርቶቤቸሃ ቁርጩሜት ዊንቶ ወሻደ ጎሾሽትን ጀልባን አሜቶኡ።

9 እሰን ጀልቢቶ ጵርቶ ወክት ከሰል አሌን ዮ ቁርጩሜተለከ ጣቢተ ለኦኡ።

10 ኢሰን «ቴሱ አፊንተ ቁርጩሜቶ ኤቤ» ዬሰ።

11 ህካን እኮቤቸሃ ሰሞን ጴጥሮስ ጀልባን ኣግ ጥብተ ኦንታይኔ ሰሱ ሎርሎሩ ቁርጩሜት ዊሞ ወሻደ ጎሾሽ አብል ፋሺእ፤ ልግብ ቁርጩሜት እርጎሬሁ ወሻደሰ ፊልተዕዮበኡ።

12 ህከኒቶ ኤተሮን ኢሰ «አሜ አቼ» ዬሰ፤ እሰ ቀርቼ እሁሰ ጉዕሙንኩስ ደሳቤቸሃ አሳባቶ መቱሁ «አት አይት?» ይት ጠዕምቶተ መለልቶበኡ።

13 ህከኒቶ ኤተሮን ኢሰ አሜቶ ጣቢተለከ ቁርጩሜት ኬሽ ኣሴስ።

14 ኢሰ ሬሆቶ ኬዕዮቶ ኤተሮን አሳባተሰ ለሎተ ኩን ሰቅሃ ወክት አቅ።

ኢሰ ጴጥሮሴሃ ሆንጠሀሾ ጠዕምቱተ

15 አቸተ እቶኢቶ ኤተሮን ኢሰ ሰሞን ጴጥሮሴ «ዮን ቤቶ ሰሞኔ! እሰ ኢትታኤሀኒቶ በትሰ ኢትተዕኔንደ?» ዬሰ። እሰን «ኤ ቀርቹ! እን ኢታንኬገ አትን ደጋገት» ይ ፈንቀሼሰ።

16 ኢሰን «ዉዕላኑኤ አላል» ዬሰ። ለንኪሃ «ዮን ቤቶ ሰሞኔ! ኢትተዕኔንደ?» ዬሰ፤ እሰን «ኤ ቀርቹ! ኢታንኬገ አትን ደጋገት» ዬሰ፤ ኢሰን «ቆርባበኤ አገር» ዬሰ።

17 ሰቂሃ «ዮን ቤቶ ሰሞኔ! ኢትተዕኔንደ?» ዬረ ሰቅ ወክት «ኢትተዕኔንደ» ዬሰቤቸሃ ጴጥሮስ ሻቸ «ቀርቹ! አት ጉዕሙርቸንከ ደጋገት፤ ህትን እን ኢታንኬገ ደጋገት» ዬሰ፤ ኢሰን «ሆለኤ አላል።

18 ህንቅንከ ያንኬ፤ አት ዎደልማን ዮንት ወክት ቀበቱተ ገይክ እንጋን ቆዕርት ሀሰንትቤቹ መርታጎት እቅ፤ እኮጎሬ ባልቆንት ወክት አት እንገክ አሌ ዋሽት ኬሳን ዎሉ መኑ ቆርሰሴኖሄ፤ መርቶተ ሀሰበቤቹ መሰኖሄ» ዬሰ።

19 ህካን ዬአሁ ጴጥሮስ ህትኔ ሬሆን መገኑ ሎርሰኖገ ለሊሱታት፤ ህከኒቶ ኤተሮን ጴጥሮሴ «አዎኔኤ!» ዬሰ።

ኢሰለክ ዎሉ አሳቤቹ

20 ጴጥሮስ ኤተሩ ዋል ለአኖረ ኢሰ ኢተኖሰ አሳቤቹ አዎንኖሃ ለዕዮ፤ ሁኩ አሳቤቹ መጨረሽ ሁርባት ወክቱን ኢሰበ ሆንጠክ «ቀርቹ! ህግሽ ኣሰኖሄሁ አይት?» ይ ጠዕምዮሰሃ እቅ።

21 ጴጥሮስ እሱ ለዕዮ ወክት «ቀርቹ! ኩ መንቹ መ እሀኖ?» ይ ኢሰ ጠዕሜኡ።

22 ኢሰን «እን አሜቶተ ኢሰ ሄኦተ ሀሳምረዕኑ! ኬሳሃ ሞ ኦርሾሂ? አት አዎኔኤ» ዬሰ።

23 ህከን መሳን አመዕናኖ በላን «ኩ አሳቤቹ ሬሀርበኤ» ዬኖ ዱዱቡ ኢሌእ፤ ጠዉ እኮጎሬ ኢሰ «እን አሜቶተ ኢሰ ሄኦተ ሀሳምረዕኑ! ኬሳሃ ሞ ኦርሾሂ?» ዬ ቤሉ «ሬሀርበኤ» ይዮበኡ።

24 ከን ጠውተኔሃ ጉዕሙንከ መሰከርሁለከ ከ ጠዉ ከተሶሁ ህከን አሳቤቹ፤ እሰ መሰከርንኩ ህንቅ እሁሰ ደንጋም።

25 ጠዉ እኮጎሬ ኢሰ አዕዮ ልግቡ ዎሉ ጠዉ ዮኡ፤ ኤሳሃ አጉደኖኤሁ እሰ አዕዮ ጠዉ ጉዕሙንከ መት-መትን ከተቤሚ እቃን ከተቤሚ መጻፋተ ኣዲንያ አሉ እሀኖሰበኡ እቅ።

ሰቀማኖ ሆጉተ ኣጉሰ

ሰቀማኖ ሆጎ መጻፉ ሉቃስ እንጂሊች ኤተሪን የእሃን፤ መጻፍሰ ቡዕላ እኮ ጠወ ዋዕኔ ኢስ ኣሳባት መገን እያንን ኣምንት እስተኔሃ ጠወእኖ ተሸት ላገተ «ዩሩሳሌማን፣ ይሁድ ባደን ጉዕማን፣ ሰማርያን ለከ ኡላ ገበለ ኢላ» (1፡8) እንጂሊ ሀት ኣት ኣልሶጎሬ ኩሊሃት፤ መጻፉስ ኣመዕነቱ ኣይሁድ በላን ጀመር ጉዕመ ኣዲንያ ኣል ኡመት ኣመዕናኖ ሀይመኖተ እሆተ ኢላ ሀት እክ ኣልባዕሊንሬ ጠወኣኣት ሂሱ። ከተቦሲሁ ኣመዕናኑት ሮም ዋመ ግብ ኣዚን ሂላ ጠወ ኣታ መነ ኣሁ ሆጉተሰለክ ኣመዕናኖ ሀይመኖቱ ኣይሁድ ሀይማኖተ ዋመ ኣእኖሃ እሁስ ኩሎታት።

ሰቀማኖ ሆጉት ኢስተኔሃ ጠወኣ ተሸት ላገት ኢልታ ቤቹ ወክቲን ወክቲን ኣልባዕላን መሩሰለክ ኣመዕናኑት በተኣን መሩሰ ለሊሳኢሁ ስሱ ቡዕላ እኮ ጠዋኒት፡-

- 1. ኣመዕናኖ ኣመዕነቱ ኢስ ሰማሃ ኦርዕዮች ኤተሮን ዩሩሳሌማን ጀመሩሰ።
- 2. ኣመዕናኖ ኣመዕነቱ እስራኤል ባዱ ጉዕመንክ ኢሉሰ።
- 3. ኣመዕናኖ ኣመዕነቱ ሮም ባዱ በርግ ሜድቴራን ባር ኣዘገገን የ ባደን ኣልባዕሉሰ።

ሰቀማኖ ሆጎ መጻፍ ኣዚን ብዘይ ለለኖሁ ጠሊላ እያን ሆጉተ እህን ጸንጤቆስጤ በር ዩሩሳሌማን ሂኔ ኣመዕናኖ ኣሊን ወልቃን ድሩሰለክ ህትን መጻፍሰ ኣዚን ጠወኣም ጠወ ጉዕመንኩ ለሌ ጠሊላ እያንገ ኣመዕናኑተለክ ኣምንት ኣምንት ለከ ጠረኝሱስ በርገኖ። ዋዕኔ ዘማን ሆንጠጠኡ ኣቅ ኣመዕናኖ ኣመዕነት ሶህኑት ኣደደ ዱዱብስ ኣዚን ደግለለኖ ሃሊን ሆንጠጠኡ፤ ሰቀማኖ ሆጎ መጻፍ ኣዚን እኮ ጠው ሶህኑት ኣመዕናኖ ሂኔን ለከ ሜጡ ኣሆን ሂኔ ወልቀት ሂንከ ሎረ እሁስ ኩላኖ።

መጻፉስ ኣሮሃ

ምሰክርነትስ ተቃጠቡ (1፡1-26)

ኢስ መጨረሻን ኣሴ ትዛዘለክ ተብሳሃ (1፡1-14)

ይሁድ ቤቾን ኣሳ መንቹ (1፡15-26)

ዩሩሳሌማን ኢስተኔሃ ዱዱብሴመገ (2፡1—8፡3)

ይሁዳን ለከ ሰማርያን ዱዱብሴመገ (8፡4—12፡25)

ጳውሎሴ እንጂል ሰቀም ክድመተ (13፡1—28፡31)

ጳውሎሰ ወዕኔ ወክት እንጂሊ ዱዱብሶተ ሃሙስ (13፡1—14፡28)

ዩሩሳሌም ኣገት (15፡1-35)

ጳውሎስ ለምቅ ወክት እንጂሊ ዱዱብሶተ ሃሙስ (15፡36—18፡22)

ጳውሎስ ሰቅ ወክት እንጂሊ ዱዱብሶተ ሃሙስ (18፡23—21፡16)

ጳውሎስ ዩሩሳሌማን፣ ቁሳርያን ለከ ሮም ባደን ኡሱረሚሰ (21፡17—28፡31)

1 ቴዎፍሎሴ!

ዋኔኤ መጻፉን ኢስ ኣዕዮሀለክ ተማርሴኢሃ ጉዕመንክ ከተቦም። ከተቦሚንኩ ኢስ ሆጉስ ጀመር ወክቲች ኪሸ

2 ሰማሃ ኦርዕዮ በር ኢላ ኣዕዮሃት፤ ሰማሃ ኦርዕዮሁ መጠር ኣሳባተ ትዛዘስ ጠሊላ እያንን ኣሴሳች ኤተሮኒት፤

3 ልግብ ኦርሸተ ቶግ ሪዮች ኤተሮን ልግቤ ለልዮ ምሰክርን ፎሊን እክ ኣሳባተ ገዉስ ለሊሾስ፤ ሸይሉ በር ዋመ ለሊንስ መገን ዋምንትኔሃ ጠወዕዮሰ።

4 መቱ ወክት ኣሳን ሜጡብ እተን ለከ ኣገን ሄዕዮ ወክት ኢስ «እን ኩሎን ክዕኔ እኑኤ ኣሴ ላገተ ኣገሬ ቤሉ ዩሩሳሌሚች ፋልቶኖቹ፤

5 መሰንትሰ ያህይ ዊን ጠመቆ፤ እኩጎሬ ኣዕኑ ቀወ በሬች ኤተሮን ጠሊላ እያንን ጠመቀንቴንተ» ይ ኣዘዙሰ።

ኢስ ሰማ ኦርኡስ
(ማር. 16፡19-20፤ ሉቃ. 24፡50-53)

6 ኣሰን ሜጡብ ጭምይቶህን «ቀርቾ! ዋምንቱክ እስራኤሊሃ ፈንቀሸት ኣታንት ወክቱ ቴሶትንደን?» ይት ጠዕምቶሰ።

7 ኢስን ፈንቀሸ «እኑ መገን ገይስ ዋልቃን ዩ ወክት ለከ በር ኣዕኑ ደጎኖተ ኣታልቴንተብኣ።

8 ጠወ እኩጎሬ ጠሊሉ እያን ክዕኔ ኣሊን ድሬ ወክት ዋልቀተ ደኣቴንተ፤ ህከ ወክት ዩሩሳሌማን፣ ይሁድ ኡላን ጉዕማን፣ ሰማርያን ለከ ኡላ ዳንገ ኢላ ምሰክር እኪንተ» ዩኣ።

9 ህዳን ጠወዕዮች ኤተሮን እስን ለእንስ አሌ ዋል ሰማሃ ኦሮዕዮ፤ ጎመንት አሌችሱ ቴልቶቤቸሃ ለእስበአ።

10 እስን አሌ ዋል ኦሮኦን እስ ሰማሃ ቱክ ይት ለእንን ዋጂተ ኦድኑተ ኦደኦ ለም መናከት መዴሰ ኡርት።

11 «እዕኑ ገሊሊ መኑ ሚሃት ሰማ ዋሽቴን ለኤንን ኡርቴንታኦ? ኩ ሰማ ኦሮኦን ለኤንተሰ ኢሰ ሰማ ኦሮኦን ለኤንንስን ፈንቀል አሜተኖ» ይቶሱ።

ይሁድ ቤቸን ማትያስ መጠረሙስ (መዝ. 109፡8)

12 ህከኒች ኤተሮን እስ ደብረ ዘይተ ዬኖ ቆታች ዬሩሳሌም ከተመ ፈንቀልቶኤ፤ ሁኩንን ዬሩሳሌሚች አበ በሪን ሃሞኖተ አታሌኖ ዋቁሃ ጌሰ።

13 ዬሩሳሌመ አሜት ሄኦ ፋቅ ሞሪ አሌ ክፍል ፋልቶኤ፤ እስን «ደግሮርሴት፣ ያህዪት፣ ያቀባት፣ እንድራሴት፣ ፍልጾሴት፣ ቶሞሴት፣ በርቴሌሜዎሴት፣ ማቶሴት፣ እልፍዮሴሃ ቤቱ ያቀባት፣ ባዱስ አተኖ * ሰሞኔትለከ ያቀብሃ ቤቱ ይሁዳት።»

14 ሁኩ ጉዕሙንኩ ኢስ አማን መርዮማን፣ ለቤ አመሰ ኦሳንለከ ዋሎ ሚንቲን ሚጡብ መቶሃ ቀልቢን ኡርሱዕናን ዱኦ አ ታኢት እቅ።

15 ህከ ወክት ደግሮርሴ መት ጥብተ ለሞድም ጌሰ እህኖ አመዕናኖ ጭምት በላን ኡር

16 «አመኤ ኦሶ! ኢሰ አሮ መሪሃ አዎንሳንቸ አኮ ይሁድተኔሃ ጠሊሉ እያኑ ሄጭን ደወዴ አሮን ጠወአንቶ ጠሊሊ መጻፍ ላገት ዊሙ ሀስሰናሴ።

17 ይሁድ ከን ሆን ቢቀማንቸ እሆተ ኒንን ሚጡብ ዋለአሞኤ እቅ።

18 ጠዉ እኮጎሪ ሁኩ መንቸ ሂሊ ሆጎሰ ብሪን ኡለተ ሀዕሬኤ፤ እስን ብርተ ዋል ጎሞብሰም ኡባን ጎደቡስ ፍልተዕያን ሀሊስ ፋልቶኤ።

19 ሁኩ ጠዉንኩ ዬሩሳሌማን ሄኦአ መንቤቸን ጉዕማንን ለሌኦ፤ ህዳን እኮቤቸሃ ሁኩ ቤቸ እስ አሮን ሕኪልዳመ ዬን ገኤመ፤ ፍሳሪንትሰ ቁግ ኡለተ ዩሃን።

20 ሁኩን እኮንኩ «ደሙድ መጻፋን

«እስ ሄኦኖ ቤቸ ኦነ እሁን፤ ህከን ቤቸን አዪሁ ሄኡንከ። ህትን እስ ሹምንትሰ ሆጉተ ዋሉ መኑ ኦኡን» የመም ከተበሞኤ።

21 «ህዳን እኮቤቸሃ ቀርቸ ኢስ ኒ በላን ፈንቀላመን ሃዕዮ ዘማን ጉዕመንከ ኒን ሚጡብ ሄኦህኡኡች

22 ህትን ያህይ ጥምቀቲች ኪሽ ቀርቸ ኢስ ሰማሃ ኦሮዕዮ በር ኢሊ ኒን ሚጡብ ህከን መኒች መቱሰ ኒን ሚጡብ ኪአህሰ ሞስክር እሆተ ሀስሰና» ዬኡ።

23 «ኦድዮስሶሴ» ህከረንገ «በርሳባሴ» ዬኖ «ዩሱፈለከ» «ማትያሴ» ዬኖ ለሙ መንቸ ቅጥአቶኤ።

24-25 እስን ዱኦ አተን «መን ቀልብ ጉዕመንከ ደጋንት ቀርቸ! ከን ለምችሰ አዬሰ መጠርቶንት ጎር ይሁድ አጉር ሬዮ ክድመተለከ ሰቀም ሆጉተ ቶግ ቤቸሰ እህኖሃ ለሊሶኒታት» ይቶኡ።

26 አጠኤጃናን አጡ ማትያሴሃ አሌኤ፤ ህዳን እኮቤቸሃ እስን ቶና መቶንከ አሳባን ሚጡብ ዋለአሞ።

2

ጠሊሉ እያኑ አሳባሰ አሊን ድሩሰ

1 ጰንጤቆስጤ ከበጃት ዬን ከበጃኖ ከበጀ ወክቱ አሌ ወክት አሳባሰ ጉዕመንኩሰ መቶ ቤቸን ጭምይቶ እቅ።

2 ድንገቱን ጠረን ጦብርገ ዮ ላገት ሰሜች አሜት እስ አፋዕልቶ ሞኒ ዊሞ።

3 ህከንቤቸንን ገረ ለበነተ አኩደኖ መት-መት አረብተ ለልቶሰ፤ እስን ቤቀንት መት-መትሰ አሌን አፋዕልቶኤ።

4 ጉዕሙንኩሰ ጠሊሊ እያኒን ዊንቶኤ፤ እስን ጠሊሉ እያኑ አዕዮስገን ዋሎ አሮን ጠወኤ ጀመርቶኤ።

5 አዲንያ አሊን ዮ ኡመቲች ጉዕሚችን አሜቶ መገኑ ዋጅታ አይሁዱ ዬሩሳሌማን ሄኦኢት እቅ።

6 ህከ ላገተ ሞጮጭቶ ልግቡ መኑ ጭምይት አሜቶኤ፤ እስን መት-መቱሰ ገይሰ አሮን ጠወአን ሞጮጭት አጀብሰጭቶኤ።

7 ሁኩ መኑንኩ እበ አጀብሰጭት «ኩሩ ህት ጠወኦአረ ጉዕሙንኩ ገሊሊ መንበአንድ?

8 ንኡ ገዉኔ ከለቀሞም ባድ አፈን ጠወአን ሞጮጭናሚሁ ኩን መርቸሃን?

1:9 ማር. 16፤19፤ ሉቃ. 24፤50-51። * 1:13 ባዱስ አተኖ- ማር. ፎሎጭ 3 ዋላጊሽ 18 ዮኤሃ ለዕዮ። 1:13 ማቶ. 10፤2-4፤ ማር. 3፤16-19፤ ሉቃ. 6፤14-16። 1:18 ማቶ. 27፤3-8። 1:20 መዝ. 69፤25፤ 109፤8። 1:22 ማቶ. 3፤16፤ ማር. 1፤9፤ 16፤19፤ ሉቃ. 3፤21፤ 24፤51። 2:1 ሉቃ 23፤15-21፤ ዘዱ. 16፤9-11።

9 ነኤ ጳርቱ ባድ መኑሁ፣ ሜድ ባድ መኑሁ፣ ኤላሚ ባድ መኑሁ፣ መስጴጦም ባድ መኑሁ፣ ይሁድ ባድ መኑሁ፣ ቁጳዶቅ ባድ መኑሁ፣ ጳንጦስ ባድ መኑሁ፣ አስይ ባድ መኑሁ፣

10 ፍርግ ባድ መኑሁ፣ ጵንፍል ባድ መኑሁ፣ ግብጽ ባድ መኑሁ፣ ሊብይ ባድ መኑሁ፣ ቁሬን ከተም መዳን ሃዕናምሩ፣ ሮም ባድ መኑሁ፣ አሜንቶም አይሁዳሊክ አይሁዳ አዳ ደረሞምሩ ዮም።

11 ህትን ቀርቤስለከ አረብ ባድ መኑሁ መገን ሎረ ሆጉተ ገይኔ አፎን ጠወአን ሞጮጭናሚት» ይቶኡ።

12 ህካን እኮቤቺሃ ጉዕሙንኩ አጀብሲጭትለከ ይታኢሃ ሆግ መት-መቱስ «ኩ ጠወ መርቹሃን?» የቀንታኢት እቅ።

13 ጠወ እኮጎሬ ዎሉስ መኑ ቀለደን «ስከርሰኖ አጌናሃ አግ ሰከርቶኤ» ይቶኡ።

ጴጥሮስ ጠወዕዮገ

14 ህከ ወክት ጴጥሮስ ቶን መቶንከ አሳባን ሚጡብ ኡር ላገሰ ጎት አዕይ «አዕኑ አይሁድ መኑለከ ዩሩሳሌማን ሄኤንጎተሩ ጉዕሙንኩ ከ እኮ ጠወ ደጎኖተ ጠወአሚሃ ሞጮጭዬ።

15 ክዕኔሃ አመሰሎህዕኔ ቤሉ ኩ መኑ ሰከርበእ፤ መሰንትሰ ቱሱ ገሰሚ ሰሳሃ ሰኣት።

16 ጠወ እኮጎሬ ኩን ነብዬቾ እዮኤላን ህት ይ ጠወአም ጠወ ዊሞታት።

17 « አሰን መገኑ

መጨረሽ ዘመኔን ህት አሀኖ፤

መናን ጉዕማን፤

ጠሊሊ አያኒችኤ አሌሰ ዲናም፤

ጎኑለከ ሜኣ ኦሱክዕኔ ራገ ጠወኣኣ፤

ዎደለት መናመተ ለኣኣ፤

ባልቀንት ሀቂተ ሀቃቅታኣ።

18 ህትን ህከ ዘመን ለቤለከ ሜንት ካዲመኤ አሌን

ጠሊሊ አያኒችኤ አሌሰ ዲናም፤

አሰን ራገ ጠወኣኣ።

19 እን አጀብሲሰኖርቹ ሰሚ አሌን

መላተ ኡላ አሌን ለሊሳም፤

ቁጉ፣ ገረትለከ ወሊሌ ጎመት እካኣ።

20 ሎሩለከ አጀብሲሰኖ ቀርቾ በሩ አሜቱዕናን ሄጭ

አሩ ቱንሰቹ አሀኖ፤

አገንቹንኩ ቁጉ አጉደኖ።

21 ቀርቾ ሱዕመ ገእኖሁ እዳሁ ጡመኖ፤

22 «አሰራኤል መነ! ተ ላገተ ሞጮጭዬ፤ አዕኑ ገዉንኩክዕኔ ደጌንጎተገን ናዘሬት ኢሰ መገኑ በላንክክዕኔ እሰ ኦዲን አዕዮ ሎርሎረ ሆጎን፣ አጀብሲሰኖ ጠዊንለከ መላን መገን አዲን ክዕኔሃ ለልዮአሃ መንቹ እቅ።

23 አሰንከ መገኑ ሰውይ ቅጥአዕዮ ሰውቲንለከ ዎዕናንከ ዮሰ ኤንኬዕኒን ክዕኔሃ ህግሴን ኣሲመ፤ አዕኑን ሕጉ ዮበእ መን አንጋን ሰቀለመኖገለከ ሪሀኖገ አቱንተሰ።

24 ጠወ እኮጎሬ መገኑ ሪሀ ኦርሸተ ቤሽ ሪሀቾ ኬሾሰ፤ መሰንትሰ ሪሀት እሱ አፍ ፌሶተ አታልቶበኣ።

25 ደዉድ አሰተኔሃ

« ቀርቹኤ ጉዕመ ወክት ብሬንከኤ ለኣም፤

መሰንትሰ ጨነቀምበገ እሰ መከንተኤ እኮቤቺሃ

እን ሌንቁቃምበኣ።

26 ህካን እኮቤቺሃ ቀልቡኤ ሙንደዕዮ፤

አረብንትኤ ሙንደኣ ጠወኣኣ፤

ህትን ሪሀኖ ጅሰሙኤ ተብሰን ፎሎጨኖ።

27 መሰንትሰ ፎልኤ ሪዮ መን በላን ሎድ አዘን አጉርታንትበኣ፤

ህትን ጠሊሊ እኮሃ ሎዲን ሸም ፈቆተ አታንትበኣ።

28 ቱሱ ሄኣ ወቃሃ ለልሶንቱኤ፤

እን ሚጡ አሀንከክ ሙንዲኑኤ አበ እካኣ፤»

29 «አመኤ ኦሶ! ወዕኔ እን እኮ ደዉድ ሬዮገ፣ ሞገሞገለከ ሎዲንኩሰ ከበሬ ኢለሬተ ኒቤቾን ሄኤሰ ለሊሽ ኩላንክዕኔ።

30 ጠው እኩጎሬ ዳወድ ካን ጠወዕዮንኩ ነብዬቹ እኮቤቸሃ መገኑ ዛሬኝክ መቱሰ ኬዕምኝክ ቦርጭመ አሌን አፋሻም፣ ይ ጠሌላል እሱ ተብሎ ላገተ ደገናሃ እኮቤቸሃት እቅ።

31 ህከን መሳን መሲሁ ሬዮ መን በላን ፈቀኖ በአገለከ ማሎስ ሎዳን ሸም በአበገ ሃጭ ለዕይ መሲሁ ሬሆኝ ኬአተኒሃ ጠወዕዮ።

32 ህከ ኢሰንከ መገኑ ሬሆኝ ኬሾሰ፤ ህከን ጠዋሃ ነኡ ጉዕመንኩኬ ምስክረታን።

33 መገን መኪን አፋዕሎተ አሌ ዋል ጠሊላ አያን ተብሳሃ መገኒች ቶግ ከ ለኢነንተለክ ሞጮጭቴንተ ጠሊላ አያን ዲቹ።

34-35 ደዉድ ሰማሃ ኦርዕዮበእ፤ ጠዉ እኩጎሬ እሰ

« ቀርቼ ቀርቼሃኤ
ባለጋረክ ሎካችክ ዋሮን እአተ ኢላ
መኪንከኤ አፋዕል » ይ ጠወዕዮኡ።

36 «ቴሱ መገኑ ከ አዕኑ ሰቀልቴንተ ኢሰ ቀርቼለክ ቡረሞኢሃ አዕዮሰገ እሰራኤል አድ ኡመቱ ጉዕመንኩ ጠረኝሽ ደጉን » ይአ።

37 እሰን ህካን ሞጮጭቶ ወክት ቀልቡሰ ሻዘን ዊማን ጴጥርሴለክ ዋሎ ሶቀማኑተ «ኒ አመኡስ! መ አዕኑ?» ይት ጠዕምቶኡ።

38 ጴጥርሴን «ጨቡክዕኔ አጉረሞተ ጨብክዕኔ ቶበቴን መት-መቱክዕኔ መሲህ ኢሰ ሱዕሚን ጠመቀሜ፤ መገን አሰቱተ እኮ ጠሊላ አያን ቶጌነንተ።

39 ተብሴሰ ላገት ክዕኔሃትለክ እላተክዕኔት፤ ህትን መገኑ ቁዕራሺች ገኤሁኑኦታት» ይሰ።

40 ጴጥርሴን ዋሎ ልግብ ጠወ መስከረን «ከን ሾከ ክልቀቱች ገዉክዕኔ ጡምሺ» ዮን ሸዢሰ።

41 ህካን እኮቤቸሃ ላገሰ ቶጎአሩ ጠመቀንቶኡ፤ ህከ በር ሰሱ ኩምተ እካ መኑ አሳን ሚጡቡ እኮ።

42 እሰን ሶቀማኑት ተማርሰታኢሃ ሞጮጭተን ሚጡቡ ሃኢን እቸተ ሚጡቡ እተንለከ ዱኢ እተን ጠረኝታኢት እቅ።

አመዕናኑት ሚጡቡ ሃኢሰ

43 ህከ ወክት አሳበ አንጎን ልግቡ አጅብተለክ መላት እካቤቸሃ መኑ ጉዕመንኩ ሞጺኢ።

44 አመዕናኑት ጉዕመንኩ ዮሰርቹ ጉዕመንከ ሚጡቡ እት ሃኢኢት እቅ።

45 ህትን ኡለሰለክ ዮሳሃ ጉዕመንከ ህርተን ብረሰ መት-መትንከ ህሰሰኖሰ ጌሰ ቤካኢት እቅ።

46 ጉዕመንከ በር መቶ ቀልቢን መገን ምኔን ጭም ይተን መት-መትሰ ምናን እቴናሃ መንዲኖናገለከ ጡመ ቀልቢን ሚጡቡ እታኢት እቅ።

47 እሰን መገኑ ገለትጭታኢት እቅ፤ ህትን ጉዕመንኩ ከበጀኖሳት እቅ፤ ቀርቼንኩ በሬን በሬን አመዕንት ጡምታ መነሃ በርገኖሳት እቅ።

3

ናፋ መንቹ ፈጸሰ

1 መቱ በር ጴጥርሴለክ ያህይ ዱኢ አኤኖ ወክቴን ዱኢ ምኒ መርታኢት እቅ፤ ሁኩንን ሆንሶሃ ሰአት እቅ።

2 ህከኔ «ምልካምተ» ይኖ ዱኢ ምኒ ኡሮን መኑ እጅ ጉዕመንከ በር ኤበኖ መቱ መንቹ ሃዕዮ እቅ፤ እሰን አመሰ ጎደቦች ኬሸ ናፈ እኮቤቸሃ አፋሽኖሲሁ ዱኢ ምኒ አገኖ መኒች ሰደቀተ ኡጮታት እቅ።

3 እሰን ጴጥርሴለክ ያህይ ዱኢ ምኒ አጎተ አሜቱሰ ደጎ ወክት ሰደቀተ ኣቶሰተ ኡጨሰ።

4 ጴጥርሴን ያህይንን ሚጡቡ ህከ መንቹ ቱክ ይ ለዕይ «ኒ አደ ለእ» ይአ።

5 እሰን ሰደቀተ ኣታሲሃ እጉጃሰን እሰበ ለዕዮ።

6 ጠዉ እኩጎሬ ጴጥርሴን «ብሩለከ ዋርቀ ዮኤበእ፤ እኩጎሬ ኤሳሃ ዮኤሃ ኣሳንኬ፤ ሁኩንን ናዝሬት መሲህ ኢሰ ሱዕሚን ኬአ ሃም!» ይሰ።

7 እሰን መኪሰ አንገተ እፍ ኬሾሰ፤ ህከ ወክት ሎከሰለክ ሴዝ ሞቁሰ ጠረኝኢ።

8 ሾት ይ ኡሬአ፤ ህትን ሃመንከ ጀመር፤ ህትን ሃመን፣ ቱጵ-ቱጵ ዮንለከ መገኑ ገለትጨን አሳን ሚጡቡ ዱኢ ምኒ ኣጎ።

9 እሰን መገኒሃ ገለት ኣሰንለከ ሃመን መኑ ጉዕመንኩ ለዕዮሰ።

10 ህትን «ምልካምተ ኡሩተ» ይኖ ዱኢ ምኒ ኡሮን አፋዕል ሰደቀተ ኡጨኖሃ እሁሰ ደጎቤቸሃ እሰን እኮ ጠዋኛ ኬዕይ መኑ አበ አጀብሲጨኡ።

ጴጥርሴን መገን ምኔን ጠወዕዮን

11 ሁኩን ፈጭ መንቹንኩ ጴጥርሴቸለክ ያህይኝ መለዕለሙ ግብ አንገሰ እፍ ሃዕዮገን መኑ ጉዕመንኩ ሚጡቡ እክ አጅብሲጨን እሰቤቹ ደጉደን «ሱለይማን ሃመኖ ዋቃሃ» ይኖቤቹ አሜቶኡ።

- 12 ጴጥሮስ ህዓን ለዕይ መኒሃ «እስራኤል መነ! ከኒን ሚሃ እጅብሰጭቴንታት? ነኡ ህትን ገይኔ ዋልቃን ህከረንገ መገኑ ዋጅንከኔ ኩ መንቹ ሃመኖገ እዕናምሀንገ እቴን ሚሃት ቱክ ይቴን ለኤነንታት?
- 13 እብራሃም፣ ኢሳቅለከ ያቁብ እናከኔ ሰገዳ መገኑ እዕኑ ህግሴን እቴንተለከ ጽላጦስ ሂሮሰተ ሆሾ ወክት ጽላጦሴ ብረን ለገኤንተ ቤቱስ ኢስ ከበጄስ።
- 14 ጠዉ እኮጎሬ እዕኑ ጠሊሊለከ ፈየ እኮሃ ግቤን መነ ሹ መንቹ ሂረሞህዕኔተ ኡጭቴንተ።
- 15 ሄኤ እስኖሃ ሹቴንተ፤ እኮጎሬ እሱ መገኑ ሬሆች ኬሾሰ፤ ህከን ጠዋተኔሃ ነኡ ምስክርሃን።
- 16 ኩ ለኤነንተለከ ደገነንተ መንቹ ፈይ ጠረጴሁ ኢስ ሱዕሚን ደገሞ እመዕነተኒት፤ ኢስ ሱዕሚን እመዕነትከስ ጉዕሚክዕኔ ብረንገነ ዋመ ፈይመተ ደኤእ።
- 17 «ቴሁ እመኤ እሱ! እዕኑ ኢስ እሌን እቴንተ ጠዉ ሹመክዕኔገን ደጉ ሆገን እቴንተገ ደጋም።
- 18 ጠዉ እኮጎሬ መገኑ ሃጭ ነብያና እፎን ለመሲሁ ኦርሸተ ቶገና፣ ዬ ላገት ከን ሃለን ዊንታገ እዕና።
- 19-20 ቴሱ ቀርቺቹ ሃዕር ወገሬት ዘማኑ አሜቶተ ዋዕናንከ መጠር መሲሁ ሶሆተለከ ጨብክዕኔ መገኑ አጉሮተ ቶብቴን ፈንቀሌ።
- 21 መገኑ ወዕኔቶን ኪሸ ጠሊላኖ ነብያናስ እፎን ጠወዕዮገን ኣዲንያ አሉ ጉዕሙንኩ መኮተ ኢሊ ኢስ ሰማን ዲንኩ ሀሰሰኖስ።
- 22 ሙስ ቀርቺቹ መገኑ ኤሳሃ ኬሾህንገን እመክዕኔ እሶች ነብዬቹ ኬሰናህዕኔ፤ እስ ኩለኖህዕኔሃ ጉዕሙንከ ሞጮጭዬ።
- 23 ሁኩ ነብዬቹ የኖሃ ሞጮጩ ግብኖሁ ጉዕሙንኩ መኒች አደ እክ በእኖ ዬእ።
- 24 ህትን ሳሜሊች ኬሸ እሲች ኤተሮን አሜቶ ነብያኑት ጉዕሙንኩ ከን ወክትተኔሃ ጠወኦኦ።
- 25 እዕኑ ነብያናተ ረገኦኑታን፤ ህትን መገኑ እብራሃሚሃ ሕዲንያ አል ሙኑ ጉዕሙንኩ ኪ ዘሬን ማስእሚህ፣ ይ ወዕኔ እናካተክዕኔ ሚጡብ ኣጎ ወኢድ ላገተ ረገኤንተረ።
- 26 ህዓን እኮቤቺሃ መገኑ ቤቱስ ኬሸ ሶኮሁ ሃጭ ክዕኔሃት እቅ፣ ህዓን እዕናሁ መት-መቱክዕኔ ሂሊ ዋቂቹ ፈንቀልቴናን ማስኦህዕኔታት» ዬእ።

4

ጴጥሮስለከ ያህይ አይሁድ ኣገት ባሊቀብ ሆንጠሁስ

- 1 ጴጥሮስለከ ያህይ ኡመቲሃ ጠወኦንገን ቂስትለከ ዲኦ ምኒ ዘበኛኖ ሀለቅቹ ህትን ሰዱቃውት እስቤቹ አሜት*
- 2 ለሙንኩ አሳባት ኢስ ሬሆች ኬኡስ ኡመቲሃ ተማርሲንከስለከ ህከኒንገ ሬሆች ኬኡ ኩልቶቤቺሃ ኡሙዕርቶኡ።
- 3 ህዓን እኮቤቺሃ አኖስ ኡለት ሀዋርቶቤቺሃ ሶዛተ ኢሊ ኡሱር ምኒን አገርታገ አቶስ።
- 4 ጠዉ እኮጎሬ ላገስ ሞጮጭቶ መኒች ልግቡስ እመዕንቶኡ፤ እመዕንቶ ጎን ዋሊንሹ ኦንቶ ኩሜ ጌስ በተዕዮ።
- 5 ለንክስ በር ይሁድ ዳኛኑት፣ ባልቀትለከ ሕግ እስተማረት ዬሩሳሌም ከተማን ጭምይቶኡ።
- 6 ህከን ጭምይቶ መን በላን ሎሩ ቂስቺ ሃን፣ ቀያፍ፣ ያህይ፣ እስክንድሮስለከ ሎረ ቂስቺ አበርሱ ጉዕሙንኩስ ሂኦኡ።
- 7 እሰን ጴጥሮስለከ ያህይ በላንከስ ኡርስ «እዕኑ ከ ጠወ መ ወልቃን ህከረንገ አዬ ሱዕሚን እቴንታት?» ይት ጠዕምቶኡ።
- 8 ህከ ወክት ጴጥሮስ ጠሊሊ እያኒን ዊሞ «እዕኑ ኡመት ገሻኑትለከ ባልቀት ሞጮጭዬ።
- 9 ኔሳሃ ከበር ጠዕሜኔሁ መቶ ኖፎ መንቹሃ እኤመስ ጡመ ሆንተኔሃለከ ኩ መንቹ ህት እክ ፈይሰት።
- 10 ኩ መንቹ ፈይ ብረንከክዕኔ ኡሬኢሁ እዕኑ ሰቀልቴንተለከ መገኑንገ ሬሆች ኬሾ ናከሬት መሲህ ኢስ ሱዕሚን እሁስ ክዕኔሃ ጉዕሚንከክዕኔለከ እስራኤል ኡመቲሃ ጉዕሚንከ ደገሞሃ እሁን።
- 11 እዕኑ ግሞብ እጅርቴንተረ ህንቁን ኡጅቴንተ ክኑ ግምብስ ሙረብ ቡዕል ክኑ እኮ።
- 12 ህዓን እኮቤቺሃ ጡሙ ዋሎን እዩኒ ዮብእ፤ ጡምኖተ መን በላን ኡለ እሌን ጉዕሚንገን ዋሉ ኣስሞ ሱዕሙ ዮብእ» ይቶሰ።
- 13 ጴጥሮስለከ ያህይ መለልት ጠወኦገ ኣገት ሙኑ ለኦ ወክት ተማርቶበእ ገወ መነ እሁስ ደግ እጅብሰጭቶኡ፤ እስ ኢሲን ሚጡብ ሂኦኦረ እሁስ ደገኡ።
- 14 ኔሳሃ ፈዬ መንቹ እሳን ሚጡብ ኡሬኢሃ ለእ እስ እሌን ይታኢሃ ሆንኡ።
- 15 ጠዉ እኮጎሬ ህከን ኣገት በሊች ፋልታገ አት ገገዉንኩስገ
- 16 «ከ መነ መ እዕኑ? ሎረ መላት እስ ኣገንገን እስንታኢሃ ዬሩሳሌም መኑ ሄኦ ጉዕመ ቤቶንገን ደገሞቤቺሃ ካንደተ አታልናምበእ።

3:13 ፋሊ. 3:15። 3:14 ማቶ. 27:15-23፤ ማር. 15:6-14፤ ሉቃ. 23:13-23፤ ያህ. 19:12-15። 3:22 ዘዳ. 18:15፤ 18። 3:23 ዘዳ. 18:19። 3:25 ክል. 22:18። * 4:1 ቂስ- የኖሁ መት-መቱ ለህ ክታበት «ቂስ እዋንሳኑት» ይታኦ። 4:11 መዝ. 118:22።

17 ጠዉ እኩጎሬ ኡመት በላን አልባዕላን መረኖበእን ከኒች ኡተርን ከን ሱዕሚን እዬሃ ጠዉእበእን ጠረኝንሰ ዋጅሲንሱ» ይት አማዕላንቶኡ።

18 ህከኒች ኡተርን እስተ ገእት ኢሰ ሱዕሚን ሆርን ጠዉእበእንላከ ተማርሰታበእን እዘዘኡ።

19 ጠዉ እኩጎሬ ጴጥርሴለክ ሃህይ ፈንቀሽት «መገን ትዛዝ ቶጉ ህከረንገ ክዕኔ ትዛዝ ቶጉ መገን እኒን ቆህኖ እኩጎሬ ህንዴ ኦዕኔ ፈረጄ።

20 ነኡ ሞጮጭኖሚሃለክ ለዕዕሚሃ ጠዉኡ አጉሩ አታልናምበእ» ይቶሰ።

21 እሰን ጴጥርሴለክ ሃህይ ቀጠእሲሰኖ ጠዉ ኢሌሰ ሆጎቤቹሃ መን ዋጅት ለንኪሃ ዋጅሲሰ ገፈርቶሰ፤ መሰንትሰ መኑ ጉዕመንኩ እኮ ጠዉተኒሃ መገን ገለትጭታኢት እቅ።

22 ከን እጅብሲሰኖ ዋቄን ፈዬ መንቹ እለሞች ሸይሎ ዘማኒች በተዕዮሰ እቅ።

አሳበትለክ አመዕናኑት ሸረንቶ ወክት አቶ ዲእ

23 ጴጥርሴለክ ሃህይ ሂረንቶች ኡተርን ጃለሰቤቹ መርት ቂሰ አዎንሳኑትለክ ባልቁ ይቶሰ ጠዉ ጉዕመንከ ኩልቶሰ።

24 እሰን ህከ ጠዉ ሞጮጭቶ ወክት ቀልብሰ ሜጡ እት ላገሰ መገን ቤቹ ኬሰ «ሰማሃ፥ ኡለተ፥ ባረለክ እዜንከሰ ዮእረ ጉዕመንከ ከለቆንት ቀርቾ መገኖ!

25 ጠሊሊ እያኒን ካዲንቾንተክ እናኔ ደዉዴ አፎን

« መገኑ ደግቡ መኑ ሚሃ ኡሙዕሬእ?

መኑ ሚሃ ደግለልበ ጠዉ አቶተ ሰውይቶኡ?

26 ኡሊ አል ዋመት ኬእ

ህትን ገሻኑት ሜጡበ ጭምይት

ቀርቾለክ መሲህ አሌን ኬኦኡ» ይት ጠወኦንት መገኑ እቲት።

27 «ሀንቅንከ ዎሙ ሃረዲሲላክ ጸንጦሰ ባድ ጵላጦሰ፥ አይሁዳ እህበ መንገለክ እሰሬኤል መንገ ሜጡበ ከን ከተማን ጭምይት መሲህ አቶንት ጠሊሊ ካዲንቾንተክ ኢሰ አሌን ኬኦኡ።

28 ህት እኮሁ እት ሃጭት ገይክ ዋልቃንለክ ሃሸኦቶን ሰውይቶንተሃ አቶታት፤

29 ህትን ቀርቾ! ፎከሩሰ ለእኔ ካዲመክ ላገክ ዋጅቱዕናን መለልት ጠወኦን እእሰ፤

30 ጠሊሊ ቤትክ ኢሰ ሱዕሚን ጥዞኖመት ፈይቶተ፥ አጅበተለክ አጅብሲሰኖ ጠዉ እሰሞተ እንገክ ሂር» ይተን ዲእ አቶኡ።

31 እሰን ዲእ አቶች ኡተርን ጭምይቶ ቤቹ ሌንቄቄእ፤ ጉዕመንኩሰ መገን እያኒን ዊንቶኡ፤ መገን ላገተ ዋጅቱዕናን መለልት ጠወኦኡ።

ዎሳኔ አመዕናኖ ሂለተኒሃ

32 መገን መኑ ጉዕመንኩ መቶ ቀልብንለክ ሰውተን ሃኦኡ፤ እኮሰ መንቹሁ «ኩን ኢሃን» የኖርቹ ዮበኦ እቅ፤ በላንከሰ ጉዕመኖቹንኩ ቅጤሳሃ እቅ፤

33 አሳበት ቀርቹ ኢሰ ሬሆች ኬኡሰ ሎረ ወልቃን መሰከርታኢት እቅ፤ ጉዕምሰ አሌኒን ሎረ መገን እያኑ ሂዕዮ እቅ።

34 እሰ በላን ኦርጨቀሞሁ መቱሁ ዮበኦ፤ መሰንትሰ ኡለት ዮሲሁ ህከረንገ ሞኑ ዮሲሁ ጉዕመንኩ ህረን ብረ ኤበኖት እቅ።

35 ህከ ብረ ኤበን ሶቀማኖ ብሬን አፋሽተን እዬሁ ሀሰሰኖሰ ጌሰ ቤሃንን ኣሴኖሲት እቅ።

36 «ቆጵርሰ» ዬኖ ባድ መቱ መንቹ ሊቄ አዲሁ «የሱፈ» ዬኖሁ ሂዕዮ እቅ፤ እሱንከ ሶቀማኑት «በርናባሴ» ይት ገእታሰ እቅ። ህት ዩሁ «ቦረሸተ ከመኖሃ» ዩሃን።

37 ሁኩ መንቹንኩ ኡለሰ ህር ብረሰ ሶቀማኖተ ቶጎሰሾሰ።

5

ሀናንየለክ ሰጺረተኒሃ

1 መቱ «ሀናንየ» ዬኖ መንቹ «ሰጺረ» ዬኖ መንቹንከሰን ሜጡበ ኡለተ ህር።

2 ጠዉ እኩጎሬ ሞንሰ መንቹሰ ደገን ኡለሰ ህር ብረች መቱ ጌሰ ፊሽ ፈቆሰ ጌሰ ኡብ አሳባተ ቶጎሰሾሰ።

3 ጴጥርሰን «ሀናንየ! ጠሊሊ እያን አሌን ክዘቦተለክ ኡለተ ህርቶንት ብረች መቱ ጌሰ ፊሶተ ሸይጣኑ ቀልቤንከክ ሚሃ ኣን?

4 ህርቱዕነ ዎዕናሃ ኪሃበእንድ? ህርቶንቲች ኡተርኒሁ ብሩሰ ኪሃበእንድ? ከ ጠዉ ሚሃ ቀልቤንከክ ሰውይት? እት ክዘቦተህ መን እሁዕነ መገኑሃት» ዬሰ።

5-6 ሀናንየን ህከ ላገተ ሞጮጭ ወክት ኡብ ሬዮ፤ ዎደለት ኬእ ከፈንት እጅት ፋሽት ሞጎሰ፤ ህከ ጠዉ ሞጮጭቶእሩ ጉዕመንኩ እበ ዋጅቶኡ።

7 ስሱ ሰአት ለሆኖ ወክቲቹ ኤተርን ለኩ ጠወ ደጉዕነ መንቹስ አሜት ኣጎኡ።

8 ጴጥሮስን ለሲተ «ሆንደ ኩሌኤ! ኤለክዕኔ ሀርቴንታሁ ከን ጌሰ ብርሃትንደ?» ዩሴ፤ ለሲን «ኤ! ከን ጌሲሃንት ሀርኖሚሁ» ይቶኡ።

9 ጠወ እኩጎሬ ጴጥሮስ «ቀርቶ ጠሊሊ እያኒን ፊተንቶኖተ ሚሃ አማዕላንቴን? ምንክ መንቹ ሞሳ መኑ ኡርን ዮኡ፤ ኬሳህ ፋሽት ሞጋሃ» ዩሴ።

10 ወክትንከሰ ሎከሰ መዴን ኡብ ሬቶኡ፤ ዎደላት ኣጋ ወክት ሬቶኢሃ ለእ መሰት ምንሴ መንቹ ሎድ መዴን ሞጎሲ።

11 ህካን እኩቤቹሃ እመዕናኑት ጉዕሙንኩለክ ህከ ጠወ ሞጮጩ። መኑ ጉዕሙንኩ አበ ዋጆኢ።

እሳበት አቶ አጀብሲሰና ጠወለክ አጅበተ

12 እሳበት ልግብ አጅበተለክ አጀብሲሰና ጠወ መን በላን አታኢት እቅ፤ ጉዕሙንኩ መቶ ቀልቢን እክ «ሱላይማን ሃመኖ ዎቃሃ» ዩኖቤቹን ጭምይቶኡ።

13 ሞሉ እዩሁ እሳን በርገሞተ መለሎበእ፤ እኩጎሬ መኑ ከበጀኖሳት እቅ።

14 እሆን ቤሉ ቀርቶን እመዕንቶ ጎንለክ ሚንት ዎሊንሹብሬቶ አበ በተአን መረና እቅ።

15 እሳበት አቶሀኒቶ ኬዕምሀኒን ጴጥሮስ ህገን ዎሉ ፈቅ ሀሎስ መት-መቶ መን አሌን ኢሎተ መኑ ጥዘናመተ ዎቃ ፋሽን መዕነ አሊንለክ ዴስ አሊን ኦሲሳኢት እቅ።

16 ህትን ዩሩሳሌም አዘገገኒ ሄኦ ከተሚቶ ጥዘናመተለክ ዶርረኖ ዴሩ አፋንሰ ኦርጨቀንታአረ ኤቤናን ልገቡ መኑ ጭምየኖተ እቅ፤ እሰ ጉዕሙንኩሰ ፈይታኢት እቅ።

እሳበተ ሸሬመሰገ

17 ጠወ እኩጎሬ ሎሩ ቁስቸለክ እሲን ሚጡብ ሄኦ ሰዲቃዌ አድ መኑ ምቀኝት አሌሰ ኬኦኡ።

18 እሳበተ አፍ ኤመት ኡሱር ምኒ ኣግሶኡ።

19-20 ጠወ እኩጎሬ ቀርቶ መላይኬቹ ኡሱር ምኒ ኡሩተ ሀዎርን ፈኝ እሰተ አብል ፋሽ «መሬ፤ መገን ምኔን ኡርቴን ኡመቴሃ ከ ሄኦ ላገተ ሆርንተ ኩሌ» ዩሴ።

21 ህከ ላገተ ሞጮጭቶ ወክት ሶዘ ሱጵተ መገን ምኔን ኣግ ተማርሰታኢት እቅ፤ ጠወ እኩጎሬ ሎሩ ቁስቸለክ እሲን ሚጡብ ሄኦአሩ አሜት ኣገት መነለክ አይሁድ ባለቅ ጉዕመንክ ሚጡብ ጭምእት ኡሱረንቶአረ ኤቦተ ኡሱር ምኒ ሶኩኡ።

22 ሶሄመ ዘበቶ አሜት እሳበተ ኡሱር ምኔን ደጎሰበእ፤ እሰን ፈንቀልት አሜት

23 «ኡሱር ምኑ ጠረኝ ቆለፈሞቤቹሃ አገርታአሩ ኡር ብሬን ኡርቶኢሃ ደንጎም፤ ኡሱር ምኒ ኡሩተ ፈኖም ወክት ኣዘንከሰ አይሁ ደንጎምበእ» ይቶኡ።

24 ዴኢ ምኒ ዘብ ሀለቅቸለክ ቁስ አዎንሳኑት ህካን ሞጮጭቶ ወክት «ኩን መርቾሃን?» ይት ጉረተ ኣጎሰ።

25 ህከ ወክት መቶ መንቹ አሜቶ «ሁኩዕንን! እዕኑ ኡሱር ምኒ ኣግሴንተ መኑ መገን ምኔን ኡርት ኡመት ተማርሰታኢት» ይ ኩሎሰ።

26 ህከ ወክት ዴኢ ምኒ ዘበኝ ሀለቀለክ ካዲመሰ መርት ኤቦኡ፤ ኤቦሳንኩ ዎልቃንበእ፤ ህካን አቶአንኩ ኡመቱ ክኒን ቀሰኖሰበእገ ዎጅቲት።

27 ኤቦሳቶ ኤተርን ኣገት ብሬን ኡርሶሰ፤ ሎሩ ቁስቸንኩ

28 «ኢሰ ሱዕሚን ተማርሰቴንተበእገ ጠረኚንሰ አዘንዘበእንደ? ሁኩዕንን ዩሩሳሌም ከተመ ጉዕመንክ ትምርቴንክክዕኔ ዌንሸቴንታኢ፤ ህትን ከን መንቶ ቁገ ኒ አሌን ኤቦኖተ ሀሲንንታት» ዩሴ።

29 ጠወ እኩጎሬ ጴጥሮስለክ ዎሉ እሳበት ፈንቀሸት «መን ትዛዘ ቶገቶ መገን ትዛዘ ቶገ ሀሰሰኖኡ።

30 እሱቀስ መሰቀል አሊን ሰቀልቴን ሸቴንተ ኢሰ አናከኔ መገኑ ሬሆቶ ኬሾሰ።

31 እሱንከ መገኑ እሰራኤል መኑ ቶበታን ጨቡሰ አጉረሞተ ቡዕላለክ ጡምሳንቹ መኬሰ አዲን ኬዕምኚን አፋዕላኖገ አዕዮሰ።

32 ነኦ ከን ጠዋሃ ምሰክርሃን፤ መገኒሃ አዘዘንታሁኡተ ጉዕሚንክ ኣሴሰ ጠሊሉ እያኑ ምሰክርሃን» ይቶኡ።

33 እሰን ህካን ሞጮጭቶ ወክት አበ ኡሙዕረንት ሸቶሰተ ሀሶኡ።

34 ጠወ እኩጎሬ መኑ ጉዕሙንኩ ከበጀሞለክ መገን ሕገ ተማርሰኖ «ገማልያሌ» ዩኖ ፈርሳውቹ ኣገት በላን ኡር እሳበተ ቀዎ ወክቴሃ አብል ፋሽታሰገ እዘዞ።

35 እሰን «እሰራኤል መነ! ከን መን አሌን መ ኣቴንተጎሬ ገዛክዕኔ አገዕርዩ።

36 መሰንትሰ ከኒቶ ዎዕናሃ ቴዎዳዴ። ዩኖ መንቹ ሕን ሎረሃን? የን ኬዕዮ እቅ፤ ሾሊ ጥቤ ጌሱ መኑ እሲን ሚጡ እኩኡ፤ ጠወ እኩጎሬ እሱሃ ሸመሰ፤ ህትን እሱ አዎንቶአሩ ጉዕሙንኩ ብንት ተሰ እክ በኦኡ።

37 ህከኒቶ ኤተርን መነ ሞሊኤመ ዘማን ገሊላ ዩኖ ቤቶቶ ይሁደ ዩኖ መንቹ ኬዕዮ፤ ልገብ መነ ሸፍጠ አዕይ አዎንታሰገ አዕዮ፤ እሲሁ ሬዮ፤ አዎንታሰሩንኩ ብንይቶኡ።

38 ህካን እኩቤቹሃ ቴሁ ኣን ያንክዕኔሁ ከ መነ ኡልቶኖቹ፤ ኩ ሰውቱ ህከረንገ ኩ ሆጉት መኒቶ እኩጎሬ በኣኦ።

- 39 ጠዉ እኮጎሬ ኩ ጠዉ መገኒች እኮጎሬ ቤሶኖተ አታልቴነንተበእ፤ ህከኒችን በትሸ ኩ ጠዉ መገኒን ብተሙ እሆኖ ሀዕኔበእገ። ዬሰ፤ ህከን መንች ሸዘነተ ሞጮጭቶኡ።
- 40 አሳበንተ እስበ ገእት ገረፎሳች ኤተሮን ኢሰ ሱዕሚን ለንኪሃ ጠዉእበእገ አዘዘ ሂርቶሰ።
- 41 እሰን እሰ ሱዕሚን ህንቀሙ ሀሰሰኖሃ እኩቤቺሃ ኦገቲች ሙንደደንን ፋልቶኡ።
- 42 ህከን እኩቤቺሃ በሬን በሬን መገን ሞኔንለከ ሞኔንከሰ ኢሰ መሲሁ እሁሰ ተማርሱለከ ተሸት ላገተ ተማርሱ ሆሮ እጉርቶበእ እቅ።

6

ለመሉ ሆጉተ አታ ሙኑ መጠረሙሰ

- 1 ህከ ወክት አመዕናኖ ዋሊንሹ በተአን መረን ግሪክ አረሃ ጠዉእ አይሁዱ እሰ አድ ምንሰ አናከት ራቶ ሚንተሃ በሬን በሬን አሴኖሰ እቸተ ብዝ እኤን አሴማሰበእ ይት እብራይስጥ አፎ ጠዉእ አይሁድ እሴን ቁንቁቶኡ።
- 2 ህከን እኩቤቺሃ ቶነ ለሙንኩ አሳበት ጉዕመንከ አመዕናኑተ ጭምእት «እቴናሮቹ በንኩተ ይን መገን ላገተ ተማርሱ እጉሩ ሀሰሰኖበእ።
- 3 ህከን እኩቤቺሃ አመኤ ኦሶ! ሙኑ ብጉማናተ፤ የኖሰ ለመላ መነ ጠሊሉ እያንድ ዊምሰረ በሊችክዕኔ ሀይቹ መነ መጠሬ፤ ተን ሆጎንተ ሹምንቴ አሰናንሰ።
- 4 ጠዉ እኮጎሬ ነኩ ዱእ እኔንለከ ላገሰ ተማርሶን ጠረኝናም» ይቶኡ።
- 5 ሁኩ ጠዉንኩ ጉዕመንከሰ ሙንዲሲሹ፤ ህከኒች ኤተሮን አመዕነትንለከ ጠሊሉ እያንድ ዊም እሰጥፋኖሴ መጠርቶኤ፤ ህትን ፍልጾሴ፣ ጵርኮርሴ፣ ንቃሮነ፣ ጠዋን፣ ጳርሚንለከ አይሁድ አመዕነት ቶጎ እንጾክ ባድ መንቹ ኒቆላዎሴ መጠርቶኡ።
- 6 እሰንተ አሳበ ብሬን ኡርሶሰ፤ አሳበንት ዱእ አቶች ኤተሮን እንገሰ አሊሰ ኡጅቶኡ።
- 7 ከን ሃሊን መገን ላገት አልባዕልተን መርቶኡ፤ ህትን ዬሩሳሌማን አመዕናኖ ዋሊንሹ በተአን መሮ፤ አይሁድ ቁሳች መት-መቱሰ አሳን አመዕነት ትምርቲንከሰ ቶጎኡ።

እሰጥፋኖሴ እፌመሰገ

- 8 እሰጥፋኖሴን አሰቶንለከ ጠሊሉ እያንሰ ዋልቃን ዊም መን በላን አጀብሲሰኖ ጠዉለከ አጅበተ አእናተ እቅ።
- 9 ህከ ወክት «ሰዋልድማን ፋሎ መን ጭምት ምኒ» ዬኖ አይሁድ ጭምት ምኒ ሙኑ፣ ቂሬንለከ አለክሰንድር ከተም ሙኑ፣ ክልቅይለከ እሰይ ባድ ሙኑ እሰጥፋኖሴን ኦዳኢት እቅ።
- 10 ጠዉ እኮጎሬ እሰጥፋኖሴ ጠዉእን ሄዕዮ ሀይመተለከ ጠሊሉ እያን ኦድተ አታልቶበእ።
- 11 ህከ ወክት «ኩ መንቹ ሙሲንለከ መገን አሊን ቦሮር ላገተ ጠዉእን ሞጮጭኖም» ይታ መነ ማጥ ኬሶኡ።
- 12 ከን ሃሊን ኡመት፣ ባልቅለከ ሕግ አሰተማረተ ኬሶኡ፤ እሰጥፋኖሴቤቹ መርት እእት ኦገትቤቹ ሆንጠሀሶሰ።
- 13 እሰ አሊን ክዝብ መሰክርታ መት-መት መናከተ ኤቦኡ፤ ሁኩ መናከንት «ኩ መንቹ ከን መገኒሃ እደ እኮ ቤቸንለከ መገን ሕግ አሊን ቦሮር ላገተ ጠዉኡ ሆሮ እጉርበእ።
- 14 ብጉ ናዘሬት ኢሰ ከ ዱእ ምኒ ድጀኖ፤ ሙሰን አሴኔ ሴረ ዶረኖ፣ የን ሞጮጭኖም» ይታ ክዝብ ሞሰክር ኬሶኡ።
- 15 ህከ ወክት ኦገቲን አፋዕልቶእሩ ጉዕመንኩ እሰጥፋኖሴ ቱክ ይት ለእን ሚኔሰ አዱ መላይከ ሚንተ እጉጅ ለሌሰ።

7

እሰጥፋኖሴ ጠወዕዮገ

- 1 ሎሩ ቂሰቹ እሰጥፋኖሴ «ኩ የመሞ ጠዉ ሀንቅሃንዶ?» ይ ጠዕሚሰ።
- 2 እሰጥፋኖሴን «አመኤ ኦሶትለከ አናከኤ! እን ያሚሃ ሞጮጭዬ!፤ እኔኔ እብራሂም ካራን ባደን ሂኦተ መሩዕነ ብርተ መሰጸጦምያን ሂእን ኬዕምኝ መገኑ እሲሃ ለልኬዕይ
- 3 ባዲችክለከ እሊችክ እደ እክ ፋልት እን ለሊሳንኬ ባዱ ኦርኦ ዬሰ።
- 4 ህከ ወክት ከላድ ባዲች ፋል 'ካራኑ' ዬኖቤቸን አፋዕልኦ፤ እኑሰ ራዮች ኤተሮን ህከንቤቺች ከበር አዕት ሂኤነንተ ከ ባዱ መገኑ ኤቦሰ።
- 5 ከን ባደን መት ብኩታ እሆኖ ጌሰ ኡለት ርሰተ አዕይ አሰኖሰበእ፤ እብራሂምሃ እለት ሂእበሰጎሬ እሲሃለከ እሲች ኤተሮን ዘራተሰ ርሰተ አዕይ ኣሶተ ላገተ ኣጎ።

6 መገኘት እብራሂም ዘርት መን ባደን ቶቸንት ሄእን ርስ እኤን ሾሌ ጥቤ ዘማኒሃ እብዳዴናሰገ ኩሎስ።

7 ህትን መገኘት ህከ ዘርክ ርስ እት ጠቅታ ኡመት አሉን እን ፈረዳም፤ ህከኒች ኤተሮን ህከን ባዲች ሰዎልድማን ፋሽሃን ከንቤቸን ኤሳሃ ሰገዳኤ ይኤ።

8 ጡርከም ወእድ ሴረ መላተ እሆተ ኣሲስ፤ እብራሂም ኢሳቀ እሎ ህዜትቅ በር ጡርከሞስ፤ ህትን ኢሳቅን ጨልሰ ያቁበ ጡርከሞ፤ ያቁብን ደቦተ ወዕኔ እናከተ እኮ ቶን ለሙንከ እለሰ ጡርከም።

9 «ያቁብ ኦሱት አመሰ በቱ ዩሱፈ ምቀኝት ግብጽ ባደን ርስ እሆተ ህርቶስ፤ ጠወ እኮጎሬ መገኘት እሲን ሚጡብ ሃዕዮ እቅ።

10 ህከን እኮቤቸሃ ኦሪሻችሰ ጉዕሚችን ፋሽ ግብጽ ባድ ምዎ ፍራኦን ብሬን ኬዕምኝለከ ህይመተ ኣሲስ፤ ምውንኩ ግብጽ ባደንለከ ምኔንከሰ ሹምነቱ ኣሲስ።

11 ህከ ወክት ግብጽንለከ ከነእን ባደን እኮ ጎሩለከ ኦሪሻት እኮኤ፤ ወዕኔ እናከኔን እቸተ ደእቶተ አታልቶበእ።

12 ጠወ እኮጎሬ ያቁብ ግብጽ ባደን ዉጠት ሄኤሰ ሞጮጩ ወክት ወዕኔ ወክት እናከኔ ህከቤቹ ሶኮ።

13 ለንከሃ ፈንቀልት ግብጽ ባዲ መርቶ ወክት ዩሱፍ ገዉስ አመሰ ኦሶተ ለልሾ፤ አሉሰን ግብጽ ምዎቤችን ኤንኬዕነንቶኤ።

14 ህከኒች ኤተሮን ዩሱፍ አነሰ ያቁበለከ እሉሰ ጉዕመንከ እሰቤቹ ሶክ ኤብሲሾ፤ እሉሰ ጉዕመንኩ ለመላይኔ ኦንቶ መን እቅ።

15 ህከን እኮቤቸሃ ያቁብ ግብጽ ባዲ ኦርዕዮ፤ እሰለከ ወዕኔ እናከኔ ህከን ቤቸን ሬቶኤ።

16 ምቀስ ሴኪም ዩናቤቹ ፈንቀሽት መስት እብራሂም ሴኪም ከተማን ኤሞሬ ኦሶች ብሪንከሰ ህዕሬ ሎዳን ሞጎኤ።

17 «ጠወ እኮጎሬ መገኘት እብራሂሚሃ ኣሴ ተብሳሃ ዊንሸኖ ወክቱ ሆንጠካን ግብጽ ባደን ኡመትኔ ሞሊንሹ በተእን ኦርዕዮ።

18 ህከን እኮንኩ ዩሱፈ ደግቡ ምሉ ምው ግብጽ ባደን ኬኦተ አላት።

19 ሃዕር ምውንኩ ኡመተኔ አሉን ተንኮን ኬዕይ ወዕኔ እናከኔ አብዳዴ ጀመር፤ ሰብያተት አብል ፋሽን ቶቹናን ሪታገ ወዕኔ እናከኔ ግዳጅሾስ።

20 ህከ ወክት ሙሰ እለሞ፤ እሰን መገን ብሬን ምልካሙሃ ጨል እቅ፤ አነሰ ምንን ሰሱ አነ ነጻኤ።

21 ምኒች ፋሽት አብሉን ቶቶቶስ ወክት ፍራኦኔ ቤቱት ኬሰ ቤትሰገ እት ነሰቶስ።

22 ሙሰ ግብጽ ባድ ህይመተ ጉዕመንከ ተማር፤ እሰን ጠወእኖ ላጋንለከ ሆንጎተሰ ጠረኘ አኮ።

23 «ጠወ እኮጎሬ ሙሰ ሸይሉ ዘማን እኮሰ ወክት አመሰ ኦሱተ እሰራኤል መን ለኦተ ቀልቤንከሰ ሰውዬእ።

24 እሰ እሊች መቱሰ ግብጽ ባድ መንቹ ሚዕረንሰ ለዕይ ሀዕሌስ፤ ህከን ሚርተዕዮ መንቹሃ ሀዕል ግብጽ ባድ መንቹ ሞቀር ሸ ገዲተ ፋሎ።

25 ሙሲን አመሰ ኦሱንት መገኘት እሰ ኡዲን ሞቸኖ ፋሽናሰገ አጥራመታኢሃ እንጃስ እቅ፤ ጠወ እኮጎሬ እሰ ህከን አጥራመቶበእ።

26 ለንክ በር እሰራኤል ኦሶች ለሙ ብተንተን ለዕዮ፤ ሀራርሶተ ሃዕላች ተ መን! ኣዕኑ አመተ ኦሱ፤ ሚሃ መት-መተንከክዕኔ ብተንተንጎታት? ይሰ።

27 ሆኩ ጃለሰ ሞቀረን ሃዕዮ መንቹንኩ ሙሰ ካጻ ሀንበል ሲ አሉን ኬሳሃ ገሻንቹለከ ፈረዳንቹ እኮተ ዳኘን አዕዮሂሁ አዩት?

28 ቤሬተ ግብጽ ባድ መንቹ ሸቶንተን ኤሳሁ ሸቶኤተ ሃዕላቶንትንዶ? ይሰ።

29 ሙሰን ህከን ሞጮጩ ወክት ግብጽ ባዲች ሁኝ ሚድያም ባደን ሃዕዮ፤ ህከኔን ለም ለቤ አለተ አሎ።

30 «ህከኔን ሙሰ ሸይሉ ዘማን ሃዕዮች ኤተሮን መገን መላይኬቹ ሲና ዩኖ ቆተ ኡድማን ሀቅ ሸፎ በላን ገረ ለበን ኣዜን እሲሃ ለሊስ።

31 ሙሰን ህከን ለዕዮ ወክት ለዕዮርቸን እጀብሲጩእ፤ እሰን ለኦተ መድ ሆንጠኮ ወክት ቀርቸሃ መገን ላገት

32 ሕን ወዕኔ እናከክሃ መገን፤ አን እብራሂሚሃ፤ ኢሳቅለከ ያቁብሃ መገኘት ይተን ሞጮጩእ፤ ሙሰን አበ ሞጃኤ፤ ለኦንተ መለሞበእ።

33 ህትን ኣኦት ኡርቶንት ቤቹ ጠለለ እኮቤቹሃ ሎካችክ ጫዕመተ ፋሽ።

7:6 ክል. 15፣13-14። 7:7 ፋል. 3፣12። 7:8 ክል. 17፣10-14፣ 21፣2-4፣ 25፣26፣ 29፣31—35፣18። 7:9 ክል. 37፣11፤ 28፤ 39፣2፤ 21። 7:10 ክል. 41፣39-41። 7:13 ክል. 45፣1፤ 16። 7:14 ክል. 45፣9-10፤ 17፣18፤ 46፣27። 7:15 ክል. 46፣1-7፤ 49፣33። 7:16 ክል. 23፣3-16፤ 33፣19፤ 50፣7-13፤ ኢያ. 24፣32። 7:18 ፋል. 1፣7-8። 7:19 ፋል. 1፣10-11፤ 22። 7:20 ፋል. 2፣2። 7:21 ፋል. 2፣3-10። 7:23 ፋል. 2፣11-15። 7:29 ፋል. 18፣3-4።

34 ሆንቅንከ ግብጽ ባደን ሄኦ ኤመትኦ ኦርሸተ ለዕይ ያርታኢንከ ሞጮጭ ነጠ ፋሾ ህዕኔተ ኦሚኛሞ፤ ቲሁ አት ከቤቹ ኦም፤ እን ከሳሃ ግብጽ ባደ. ሶሃንኪ» ይታ መገን ላገት አሰቤቹ ኦሚቶኦ።

35 «እስራኤል ኦመቱ ሙሰ ገሻንቹለከ ፈረዳንቹሃ እኮተ ዳኘ አዕዮሄሁ አይቶ?» ይት ለገሰ ህከ ሙሰ ህከን ሸፎ ኦዘን ለሌሰ መላይኪኝ ኦደን መገኑ ገሻንቹለከ ፈሳንቹ አዕይ ሶኮሰ።

36 ሁኩ ሙሰ ግብጽ ባደንለከ ቢሸ ባራን ሸይሉ ዘማን ኦሉ ኦድማን ኦጅብተለከ እጅብሲሰኖ ጠወ አእን ግብጽ ባደኝ አምንሰ ፋሼሰ።

37 ቀርቹ መገኑክዕኔ ኤሳሃ ኪሾገን ህትን አመክዕኔ ኦሶ በሊኝ ነብዬቹ ኬሰኖህዕኔ ይ እስራኤል ኦሶተ ጠወዕዮሁ ህከን ሙሳንት።

38 ኦሉ ኦድማን ጭምዬ ኦመቲን ሜጡብ ሲና ቆተ አሌን ጠወዕዮ መላይኪቹንለከ ህትን ኦናካንተክዕኔ ሜጡብ ሄዕዮሁ አሶት፤ መገን ሄኦ ላገንተ ኦሳሃ ኦሲኒሁ ህከን ሙሳንት።

39 «ወዕኔ አናከኔ ግብሰ ቤሉ ትዛዘሰ ቶጎበኦ፤ ቀልቤንከሰን ግብጽ ባደ. ፈንቀልቶተ ሰውይቶኦ።

40 ሀሩንን ቡኩ ኦሳሃ ግብጽ ባደኝ አምንሰ ፋሼኔ ሙሲሃ ም ኦሌሰሳገሪ ደንገምበኦቹሃ ብሬን ሃንተን አምንሰታኔ ሸርክተ መክሰኔ ይቶሰ።

41 ህከ ወክት ወዕዮ እኩደኖ ሸርክተ መክሰ ክትም ሆንጠሀሶኦ፤ አንገሰ ሆጎንን ሙንደኦኦ።

42 ጠወ እኮጎሪ መገኑ ኦሳኝ ኦደ እኮ፤ ሰሜ ቤዜተ መገኑ ኦት ዱኦ ኦታገ ህግሸ ኦሲሰ፤ ሁኩንን ነብያካን

« አዕኑ እስራኤል መነ! ሸይሉ ዘማን ኦሉ ኦድማን ጎርቤመ ግዘለከ ክትም ሆንጠሀሴንተኤትንደ?

43 ሰገደኖሰተ መክሰንተ ምሰልለከ አሰን ሞሎከ ዬኖ መገንክዕኔ ዱካንለከ ሪፋን ዬኖ ቤዜ ክዘብ ሸርኬ ምሰለ

እጅቲን ሃንቲንተ፤ እን ባብሎን ዬኖ ባደኝ ካጵ አደ ቁርሳንክዕኔ» የመም ከተበሞቤቹሃት።

44 «ወዕኔ አናከኔ ኦሉ ኦድማን መገኑ ገወሰ ለሊሰኖ ዱካኑ ሄዕዮሰ እቅ፤ ሁኩ ዱካኑንኩ መገኑ ሙሲሃ ኩሎሰለከ ለሊሸሰ ሃሊን መክዮአሃ እቅ።

45 መገኑ ብሬኝሰ ሸር ፋሼ ኦይሁደ እክቡ መን ኦሉተ ኦላንት ረገኦ ወክት አናከኒን ተ ቶጎ ዱካንቹተ ኢያሱንን ሜጡብ ህከ ባደ. ኦግሶኤ፤ ደወዴ ዘማን ኦሉ ህከኔ ሄኦኦ።

46 ደወደን መገን ብሬን ኪዕምኝ ደኦ ያቁብ ዘሬ በላን መገኑ ገላኖ ምኒ እጅርተ ዱኦ አዕዮ።

47 ጠወ እኮጎሪ ዱኦ ምኒ እጅርተ ሱላይማኖት።

48 «ጠወ እኮጎሪ ሎሩ መገኑ መን ኦንገት እጅርቶ ምኒን ሄኦኖበኦ፤ ሁኩንን ነብዬቹ ጠወኦን

49 « ሰሞሁ ምምንትኤተ ቦርጭመ፤ ኦሉት ሎከኦ ርሎሲሳምሃ ቤቹ፤ ኤሳሃ ህትኔ ምኒ እጅርቲንን?

ህከረ እን ርሎጫም ቤቹ ህትናሙሃን? የኖ ቀርቹ።

50 ህካን ጉዕመንከ አንገኦ ኦቶሃበኦንደ?» የኖ መገኑ።

51 አዕኑ «ጢቃመት ቀልቡክዕኔ ዱጅእሩ! መጨክዕኔ ሞጮጭትቡሩ! አናከክዕኔ ጠሊሊ ኦያን ቶጉ ግብገን አዕኑሁ ቶጉ ግቤንጎታት።

52 ነብያካኝ ወዕኔ አናከኔ ያይትቡ ነብዬቹ አይቶ? አሰን ፈዩ አሚቲሰ ሄጭት ኩልቶእረ ሸቶኦ፤ ህትን ህከ ፈዩ ኢሰን ህግሴን ኦሰቲን ሸቲንታሰ።

53 ህትን መላይከ ኦደን መገን ሕገ ቶጌንታ እቅ፤ እኮጎሪ አገርቲንታበኦ» ዬሰ።

እስጥፋኖሴ ክኒን ቀሴን ሼመገ

54 ኦገት መኑ ህካን ሞጮጭቶ ወክት አበ ኦሙዕርት እስጥፋኖሴ አሊን አንኩተ አጠኦ።

55 ጠወ እኮጎሪ እስጥፋኖሴ ጠሊሊ ኦያኒን ዊም ሰማሃ ዋሽ ቱክ ይ ለአን መገን ኪዕምኝለከ መገን መኪ ኦደን ኦራ ኢሰ ለዕዮ፤

56 «ሁኩዕኑን ሰሞሁ ፈንተዕዕን መንኝ ቤቱ መገን መኪ አንገ ኦደን ኦራኢሃ ለአሚት» ዬኦ።

57 ጠወ እኮጎሪ አሰ ሎሩ ላጋን ያርተን መጨከ አናሰ ሚጡብ እክ አሰቤቹ ደጉደኦ።

58 ከተሚኝ አብል ፋሸት ክኒን ቀሴሰ፤ ምሰክር እኮእሩ ኦድኑሰ «ሳኦሌ» ዬኖ መቱ ወደልቹ አገርተ ሎከሰቤቶን አፋሽቶኦ።

7:34 ፋል. 2፡14። 7:36 ፋል. 7፡5፤ 14፡21፤ ዘኁ. 14፡33። 7:37 ዘዱ. 8፡15፤ 18። 7:38 ፋል. 19፡1-20፤ 17፤ ዘዱ. 5፡1-33። 7:40 ፋል. 32፡1። 7:41 ፋል. 32፡2-6። 7:43 አሞ. 5፡25-27። 7:44 ፋል. 25፡9፤ 40። 7:45 ኢያ. 3፡14-17። 7:46 2 ሳሙ. 7፡1-16፤ 1 ዱዱ. 3፡1-17። 7:47 1 ነገ. 6፡1-38፤ 2 ዱዱ. 3፡1-17። 7:49 ኢሰ. 66፡1-2። 7:51 ኢሰ. 63፡10።

- 59 እስን ክኒን ቀስንን እስጥፋኖስ «ቀርኞ ኢሳ፤ ሩህኤ ቶግ» ይ ላገሰ ጎት አዕይ ዱኦ አዕዮ።
- 60 እስን ጉሉጵ «ቀርኞ! ጨብስ አጉር» የን ሎረ ላጋን ያሮ፤ ህካን ይ ሬዮ።

8

ሳኑል አመዕናኑተ ያዩሰ

- 1 ሳኑል እስጥፋኖሴ ሺመ ወክት አማዕለሞ እቅ፤ ህከ በር ዩሩሳሌማን ሄኑ አመዕናኖ አሌን አቡ ያዩሞ እኮ፤ ህከ ወክት አሳባ ቤሉ አመዕናኑት ጉዕሙንኩ ይሁድ ባዱለክ ሰማር ባዱ ብንይቶኡ።
- 2 አመዕናኖን ጠረኝኛቶ መት-መቱ መኑ እስጥፋኖሴ ሞግ ላገሰ ጎት እት ቡብ ኦኦኡ።
- 3 ጠዉ እኮጎሬ ሳኑል አመዕናኑተ ቤሶተ አጸመኖት እቅ፤ ህትን ሞኒኞ ሞኒ እገን አመዕናኖ ማንጥቱለከ ጎን ጎሾሽ ፋሽን ኡሱር ሞኒ እግሰኖሳት እቅ።

ተሸት ላገት ሰማር ባደን ተማርሴመገ

- 4 ሁኩ ብንይቶ አመዕናኑት ተሸት ላገተ ዘህተን ተማርሰቶኡ።
- 5 ፍልጶስን ሰማር ከተመ ኦሮዕይ መሲህተኔሃ ተማርሰኖት እቅ።
- 6 መኑንኩ ፍልጶሴ ላገተ ሞጮጭትለክ አዕዮ አጅበተ ለኦ ወክት መቶ ሰውቲን ሞጮጭታኢት እቅ።
- 7 ዶሮረኖ ዱሩ አበ መኒኞ ሎረ ላጋን ያረን ፉለኖት እቅ፤ ህትን ልግቡ ናሬሩለክ ድናኑት ፈይቶኡ።
- 8 ህካን እኮቤቹሃ ህከን ከተማን አቡ ሙንዲኑት እኮኡ።
- 9 ጠዉ እኮጎሬ ህከን ከተማን ሄእኖ መቱ «ሰሞኔ» ዬኖ መንቹ ሄዕዮ እቅ፤ እስን «እን ሎረሃን» የን ሲረ እእን ሰማር ባድ ኡመት አጅብሲሰኖት እቅ።
- 10 ከተምሰ መኑ ሎረኞ ቀዉ ኢላ ህከ መንቹ «ኩ መንቹ ሎረ ዬን ገኤኖሲህ መገንተ ምልቀ» ይተን ጉዕሙንኩ ሞጮጭታሲት እቅ።

11 ልግቤ ዘማኒኞ ኪሸ ሲርንከሰ አጅብሲሾሰቤቹሃ የኖርቹ ሞጮጭታሲት እቅ።

12 ጠዉ እኮጎሬ ፍልጶስ መገን ምምንትተኔሃለከ መሲህ ኢሰ ሱዕምተኔሃ ዱዱብሴሰ ተሸት ላጋን አመዕናኖህኒኞ ኤተሮን ጎኑለክ ማንቱ ጠመቀንቶኡ።

13 ሰሞን ገዉንኩሰ አመዕን ጠመቀሞ፤ እስን ፍልጶሴን መለዕለሙ ግብ ሜጡብ እኮ፤ ህትን ፍልጶስ አእኖ መላተለክ አጅብሲሰኖ ጠዉ ለእን አጅብሲጨኖት እቅ።

14 ህከ ወክት ዩሩሳሌማን ሄኑ ሰቀማኑት ሰማር ባድ መኑ መገን ላገተ ቶጎገ ሞጮጭት ጴጥሮሲለክ ያህይ እስቢቹ ሶኮኡ።

15 ጴጥሮሲለክ ያህይ ህከ ቤቹ ኢልቶ ወክት ሁኩ መኑ ጠሊላ ኢያን ቶጎተ ዱኦ ኦቶስ።

16 መሰንትሰ ሰማር መኑ ጉዕሙንኩ ቀርኞ ኢሰ ሱዕሚን ጠለዕል ጠመቀንቶ ቤሉ አሳኝ መትሰ አሊኒ ጠሊሉ ኢያኑ ሜጦረ ሜጥሰ አሊን ድርዮሰበ እቅ።

17 ህካን እኮቤቹሃ ጴጥሮሲለክ ያህይ እስ አሊን አንገሰ አቶ ወክት ሁኩ መኑ ጠሊላ ኢያን ቶጎኡ።

18 አሳባት አንገሰ መን አሊን አተን ጠሊሉ ኢያን አሰመኖሰገ ሰሞን ለዕዮ ወክት ብረ አሳሃ ኤብ

19 «እኒሁ አንገኤ አሊሰ አኣሚሁ ጉዕሙንኩ ጠሊላ ኢያን ቶጎተ ኤሳሃ ከ ወልቀተ አሰዬ» ዬሰ።

20 ጠዉ እኮጎሬ ጴጥሮሰ «መገን አሰቱተ ብሪን ደዕቶተ ሰውይቶንቤቹሃ ብሩክ ኪን ሜጡብ በኡን።

21 ቀልቡክ መገን ብሬን ጌጥ ዬኣሃ እህበቤቹሃ ከን ጠዋን ኬሳሃ ቤቀንሹ ህከረገገ ወጡ ዮሃበኡ።

22 ቴሁ ከን ሃለ ሆጎተክ ሻከ ቶበት፤ አይደጎ ቀልብክ ሃለ ሰዉትክ አጉረኖሃጎሬ ቀርኞቤቹ ዱኦ እኡ።

23 መሰንትሰ እት አበ ሃለ ሞቀኝማንለክ ጨብ ኡሱሮን ሄኡክ ለለኖኤት» ዬሰ።

24 ሰሞን «ቴሁ ጠወኤንተህኒኞ መቱርቹህ አሊንከኤ ኢላኖበእ ለዕት ቀርኞቤቹ ዱኦ አዕዬ» ይ ፈንቀሼኢ።

25 ጴጥሮሲለክ ያህይ ቀርኞ ላገተ መሰከርትለክ ጠወኦኢኞ ኤተሮን ሰማር ባደን ዮ ልግቤ ኦሎን አንጂላ ተማርሰተን ዩሩሳሌመ ፈንቀልቶኡ።

ፊልጶስ መቱ እቶጵያውቹ ጠመቁሰ

26 መገን መላይኪቹ ፊልጶሴ «ኬኦ ዩሩሳሌሚኞ ጋዛ መሰና ምቁን ካኦጳ ሞልት ኦርኢ» ዬሰ፤ ሁኩ ምቆንኩ ኡላ ኡድማን ዮኦኦ እቅ።

27 እስን ህከንቤቹኞ ከዕይ ኦርዕዮ፤ «ሕንዲኬ» ዬኖ እቶጵዮ ባድ ምምን ዮሴ ዱንዮ አሊን ጉዕማንን ሹመለክ ገሽኖሃ እኮ መቱ ቃሬመሰ አቶጵያውቹ መንቹ መገኒሃ ሰገደተ ዩሩሳሌመ ኦርዕዮ።

28 እስን ፈንቀል ኦርኦን ኬዕምኝ ጋሪን * ኦፋዕል ነብዬኞ እሰያሴ መጻፈ አነበበኖት እቅ።

29 ህከ ወክት ጠሊሉ ኢያኑ ፍልጶሴ «መርት ህከ ኬዕምኝ ጋሪቤቹ ሆንጠክ ደቀም» ዬሰ።

30 ህካን እኮቤቹሃ ፍልጶስ ህከ ቤቹ ደጉጅ መርክና ኢቶጵያውቹ ነብዬኞ ኢሰያሴ መጻፈ አነበበኖሃ ሞጮጭ «አነበባገንት ፍሳረሰ ኦጋሃትንደ?» ዬሰ።

8:3 ሰቀ. 22፡4-5፤ 26፡9-11። * 8:28 ኬዕምኝ ጋርተ- ዩ ፋርሶ ጋርተ አኩደኖሃ እከ ጠረገለክ አሰራኤላውያኑት በገዚሃ ደግለሸቀንታእሃን።

- 31 ኢትዮጵያውኞቻንኩ «ርስሰናኤ መንቸ ዮበኢሃ ሀት እክ ኣጎኤተ ኣታለኛ» ይክነ ፍልጻሴ «ኬዕምኣ ጋሬ አል ቆጵ ኢን ሜጡብ አፋዕል» ይሰ።
- 32 እሱን ኣነበበን ሄዕዮ ጠሊሊ መጻፍ ቤቹ «እሱን ጎረጢሃ መሴኖ ሆልኹገ፤ ኦርዘስ ኣኢሃ ሆንጠኮ መን ብሬን ሰዕም የኖ ቆርባብገ እሰ ጠወኦተ ኣፎሰ ፈቕቦኦ።
- 33 እሱን ገዉሰ ሆኖ፤ ሀንቅ ፍርዱ ኣሰምሰበእ፤ ሄኡሰ ኡላ ኣሊኹ ኬዕዮቤቹሃ ደቦሰተኔሃ ኣይ ጠወኦተ ኣታለኛ?»
- 34 ሁኩ ቃሬመሲንኩ ፊልጶሴ «ነብዬቹ ካን ጠወዕዮሁ ኣይተኔሃት? ገይሰተኔሃትንደ ዎሎ መንተኔሃት? ሀዕይ ኩሊኤ» ይእ።
- 35 ፊልጶሱን ሀከን ጠሊሊ መጻፊኹ ኬሸ ኢሰተኔሃ ተሸት ላገተ ኩሎሰ።
- 36 ሀንተንን ዉሁ ዮ ቤቹ ኢልቶ ወክት ሁኩ ቃሬመሲሁ «ዉሁ ኩዕኑን፤ ኤሳሃ ጠመቀሙ ከመኖኤሁ መርቹሃን?» ይእ።
- 37 [ፊልጶስ «ዊመ ቀልብንከክ እመዕንቶንትጎር ጠመቀንቶተ ኣታልታንት» ይእ፤ ሁኩ ቃሬመሲንኩ «መሲህ ኢሰ መገን ቤቱ እሁሰ ኣመዕናም» ይእ።]ፊ
- 38 ሁኩ ቃሬመሲንኩ ኬዕምኣ ጋርተ ኡርሳገ ኣዘዘ፤ ለመንኩሰ ዊቤቹ መርታን ፊልጶስ ሀከ ቃሬመሲንከ ጠመቆስ።
- 39 ዋ ኣዚኹ ፋልቶኹ ኤተርን ቀርኹ ኣያኑ ፊልጶሴ መሴሰ፤ ሁኩ ቃሬመሲንኩ ለንኪሃ ፊልጶሴ ለዕዮሰበእ፤ እኩጎሬ መን፤ ደኣን ዎቃስ ኦርዕዮ።
- 40 ጠዉ እኩጎሬ ፊልጶስ «እሸደደ» ይኖ ከተማን ደገሞ፤ እሱን ቂሳር ከተመ ኢሎተ ኢሊ ከተማን ጉዕማንን ሃመን ተሸት ላገተ ዱዱብሰኖት እቅ። †

9

ሳኦል መሲሂን አመዕኔገ (ሶቀ. 22፥6-16፤ 26፥12-18)

- 1 ሀከ ወክት ሳኦል ቀርቾን አመዕንቶኣረ ሾተ ፎከር፤ ሎረ ቂሳርቤቹ ኦርዕይ
- 2 ቀርቾ ዎቃሃ አዎንታ ጎነለከ ሜንቱ ደገኖረ ጉዕመንከ ኡሎረን ዬሩሳሌሙ ኤቦተ ኣታልሲሰኛ ደብዳቤተ ደማሰቆን ሄኣ ጭምት ምናተ ከተብ ኣሶተ ጠዕሜእ።
- 3 ኦርአንን ደማሰቆ ኢሎተ ሆንጠኮ ወክቱን ድንገቱን እሰ ዮቤቹን ሰሜኹ ኦሩ በለቆ።
- 4 ሀከ ወክት ኡላን ኡብ፤ «ሳኦሌ! ሳኦሌ! ሚ ሸርታንቴኤት?» ይታ ላገተ ሞጮጮእ።
- 5 ሳኦልን * «ቀርቾ! ኣት ኣይት?» ይ ወክት «አን ኣት ሸርታንቴኤ ኢሳት፤ ቀሰና ብረት ሃንቶንት ጎሬ ሂላኖሂ ይሰ።
- 6 ቴሱ ኬእ ከተመ ኣግ፤ ሀከኔ መ ኣታንት ጎሬ ሀከጵ ኩሎኖሄ» ይሰ።
- 7 እሲን ሚጡብ ሃንተን ሄኦ መኑ ጠወአኖሲሁ ኣይት ጎሬ ለኡዕነ ጠለዕል ላገተ ሞጮጮተን ይታርቹ ሆግ ኡርቶ እቅ።
- 8 ሳኦል ኡብቤቹኹ ኬዕይ ለኣኖ ወክት ኣልሰ መቱርቹሃ ለኦተ ኣታልቶበእ፤ እሲን ሚጡብ ሄኦ መኑ ኣንገሰ ኣኖ መሰገን ደማሰቆ ከተመ መሰቶሰ።
- 9 ሀከኔን ኣልሰ ለኡዕነ፤ ኣቱዕነለከ ኣጉዕነ ሰሱ በር ዱንኪእ።
- 10 ደማሰቆን «ሀርንዮ» ይኖ መቱ ቀርቾ ኣሳቤቹ ሄዕዮ እቅ፤ ቀርቹንኩ እሱ መናማን «ሀርንዮ» ይሰ፤ እሱን «ቀርቾ! ኣን ከቤቹ ዮም» ይእ።
- 11 ቀርቹንኩ እሱ «ኪእ ጌጥዬ» ይኖ ዎቃሃ ኦርእ፤ ሀከኔን ይሁድ ምኔን ዮ «ሳኦሌ» ይኖ ጠርሲሰ ባድ መንቹን ደቀሞ፤ መሰንትሰ ሁኩዕኑን! እሰ ሀከጵ ዱኣ ኣኣኖት።
- 12 እሰን ለኡ ኣታሎተ ሀርንዮ ይኖ መንቹ ኣግ ኣሌሰ ኣንገተ ኣኣን መናማን ለዕዮ» ይሰ።
- 13 ጠዉ እኩጎሬ ሀርንዮ ፈንቀሸ «ቀርቾ! ኩ መንቹ ዬሩሳሌሙን ሄኣ አመዕናኖ ኣሌን ሄንከ ሂለ ሆጉተ ኣኣኖት ጎሬ ልግብያ መኒኹ ሞጮጮዮም።
- 14 ከንቤቹን ሱዕመክ ገኣታኣረ ጉዕመንከ ኡሱርተ ቂሰ ኣዎንሳኖኹ ዲቕመት ኣሰንቶሰ» ይሰ።
- 15 ጠዉ እኩጎሬ ቀርቹ ሀርንዮ «እሰ ሱዕመኤ መገኑ አመዕንበ መኒሂ፤ ዎማተለከ እሰራኤል ኦሶተ ደግሲሰኛ ኣን መጠርግሰ ኦዲተ እኩቤቹሃ ኣሰቤቹ ኦርእ።

8:33 ኢሊ. 53፥7-8። † 8:37 መት-መቱ ለሀ ክታብት ወልጎሽ 37 ዮኢሃ በርግታበእ፤ ‡ 8:40 እሸደደ የመመኖሁ፡- ኣዘጠሰ ይኖቤቹን ሜጡሃን። * 9:5 መት መቶ ፈረርንቶ ክታባን «እጻሸ ሲኖ ኣሌን ኡርቶንት ጎሬ ገዉክ ሞርታንት» ይታእ።- 9፥6 ሳኦል ሁጠን ዎጅ ገርምሲጩን «ቀርቾ! መ ኣኣተ ኣትተን?» ይሰ ይታኢሃ በርግታእ፤ ሁኩንን ፎሎጭ 22፥10—26፥14 ኢሊ ከተበሞኦ።

16 መሰንትሰ ሱዕምኤተኔሃ ሂንከ ኦርሸተ ቶጉ ሀሰሰኖሰገ እን እሲሃ ለሊሳንሰ» ይእ።

17 ህካን እኮቤቼሃ ሀናገዮ ኦርዕይ እሰ ሃዕዮ ምኒ ኣጎ፤ እንገሰ ሳኦሌ ኦሌን አዕይ «አመኤ ቤቶ ሳኦሌ! ሁኩ እሚተን ምቃን ለሌሄ ቀርቼ ኢሰ ለንኪሃ ፈንቀሸት ለኡ ኦጉልቶተለከ ጠሊሉ ኦያኑ ዊሞሂተ ሶኮኤ» ይእ።

18 ህከ ወክት እሊሰ እሊቶ ኦሞላ ኦጉደናርቹ ኡባን ወዕኔገን ለኦተ ኦጉሎ፤ ኬዕይን ጠመቀሞ።

19 እቸተ እቶ ጠረኛእ፤ ደማሰቆን ሄኣ ኣሳባን ሜጡብ ቀዉ በር ዲንኬእ።

ሳኦል ደማሰቆ ከተማን ተማርሱሰ

20 ወክትንከሰ ሳኦል ደማሰቆን «ኢሰ መገንዮ ቤቱ» ዮን አደደ አይሁድ ጭሞት ሞናን ተማርሱ ጀመር።

21 ሞጭጭቶሩ ጉዕሙንኩ «ኩ መንቹ ዩሩሳሌማን ከ ሱዕመ ገእታኦር ጉዕሙንከ ቤሰን ሃዕዮሃበዕንደ? ከ ቤቹንከ ኦሜቾሁ እሰተ ኡሱረን ቂሰ አዎንሳኖቤቹ መሶታበእንደ?» ይተን እጅብሰጭቶኤ።

22 ጠው እኮጎሬ ሳኦል ወዕኔኛ በትሽ ጠረኘን ኦርዕዮ፤ ኢሰ መሲሁ እሁሰ ደማሰቆን ሄኣ አይሁዲሃ መሰለ ከመኖሳት እቅ።

23 ልገብያ በሬቶ ኤተርን አይሁዲ ሳኦሌ ሽቶተ አማዕለንቶኤ።

24 ጠዉ እኮጎሬ ሳኦል ተንኮ ኦማልሰ ደጎ፤ እሰን ሳኦሌ ሽቶተ ከተሚኛ ህንከዕርተለከ በራሃ ፋላኖ ኡሩተ ጉዕመንከ አገሩ ጀመርቶኤ።

25 ጠዉ እኮጎሬ ኣሳባት እሱ ቀርጫታን ምርት ህንከዕሬን መሰት ግንብ ኦተ መሰኮቲን ኤተሩ ሞሸት ፋሽቶሰ።

ሳኦል ዩሩሳሌመ ኦርዕዮገ

26 ሳኦል ዩሩሳሌመ ኢሊ ወክት ህከኔ ሄኦ ኣሳባን ሜጡብ ሄኦተ ሀሾ፤ ጠዉ እኮጎሬ እሰ ጉዕሙንኩሰ እሰ ኣሳባቤቹ እሁሰ አመዕንትበቤቹሃ ሞጅቶሰ።

27 ጠዉ እኮጎሬ በርናባሰ ሳኦሌ ኣሳባቤቹ ኣእ መር ምቃን ቀርቹ ሀት እክ ለሌሰገለክ ጠወዕዮሰገ ሀትን ደማሰቆን ኢሰ ሱዕሚን ሀት መለል ተማርሴገ ኩሎሰ።

28 ህካን እኮቤቼሃ ሳኦል ኣሳን ሜጡብ እክ ዩሩሳሌማን ሃመኖት እቅ፤ ቀርቶ ሱዕሚን መለል ተማርሰኖት እቅ።

29 ግርክ አፎ ጠወኣ አይሁዲን ጠወኣን ኦደኖት እቅ፤ እኮጎሬ እሰ ሸቶሰተ ሀሶኤ።

30 ህካን አመዕናኑት ደጎ ወክት ቂሳር ከተመ መሰቶሰ፤ ህከንቤቹቶ ተርሴሰ ከተመ ኦርኣኖገ ኣቶሰ።

31 ይሁድ ባደን፣ ገሊለ ባደንለክ ሰማር ባደን ጉዕማንን አመዕናኑት ጠረኝት ወገራቲን ሄኦኡ፤ ሀትን መገኑ ሞጅተን ጠሊሉ ኦያኑ ጠረኝሰንሰ ሞሊንሺን በተኣን መርቶኤ።

ጴጥሮስ ልዳሊከ እዮጴ ከተመ ኦርዕዮገ

32 ጴጥሮስ ቤቹቶ ቤቹ ፈንቀላመን ልዳን ሄኣ አመዕናኖቤቹ ኦርዕዮ።

33 ህከኔን ህዜቱ ዘመን ዊመ መዕናን ኦሰዕዮ ኤኒያ ዩኖ ናፈ መንቹ ደጎ።

34 ጴጥሮስን «ኤኒያ! መሰህ ኢሰ ፈይሰኖሄ፤ ኬዕ መዕንክ ዌሰ!» ዩሰ፤ እሰን ወክቲንከሰ ኬዕዮ።

35 ልዳሊከ ሳርን ከተማን ሃዕዮ መኑ ጉዕሙንኩ እሱ ለእ ቀርቶ አደ ፈንቀልቶኤ።

36 እዮጴ ከተማን «ጠቢተ» ዩኖ መትት ኢሰ አዎንታኣት ሄኦ እቅ፤ እሰን ግርክ መን አፎን «ደርቃ» ዩኖ እቅ፤ ፍሳረሰ «ጉሚተ» ዩሃን፤ እሴ ጡመተ ሆጉተ ኦጉኦተለክ ቡጥቻኖተ ደግለልታኦተ መንቹ እቅ።

37 ህከ ወክት እሴ ጥዝ ሬቶኤ፤ እሰን ጀናዘሴ ኣንሸት ፋቅ ሞኔን ኣፋሸቶኤ።

38 ልደ ከተሙ እዮጴ ከተሚሃ ግደኑ እኮቤቹሃ እዮጴ ከተማን ዮ ኢሰ ኣሳባት ጴጥሮስ ልደ ከተማን ሄኦሰ ሞጭጭት እሰቤቹ ለሙ መጎ «ኒቤቹ ደዕልት አሞ» ይት ሶኮኤ።

39 ጴጥሮስን ህከን ሶቀንቶህኡኣን ሜጡብ አሚቾ፤ እሰን ኢሊ ወክት ፋቅ ሞኒ ፋሽቶሰ፤ ህከኔን ሞንሰ እኑ ሬዮ ሜንቱ ጉዕሙንኩ ብሬሰ ኡርት ደርቃ ኣሳን ሜጡብ ሄኦ ወክት ደደ ቀምብሰተለከ ኦድኑተ ቶገን ኦኦኤ።

40 ጠዉ እኮጎሬ ጴጥሮስ እሰተ ጉዕመንከ ኦብል ፋሽ ጉሉጵ ዲኦ ኣዕዮ፤ እሰን ጀናዘት ዮ አደ ፈንቀል «ጠብተ! ኬእ» ዩኦ፤ እሴን አልሴ ፈንት ጴጥሮሴ ለእ ኬእ ኣፋዕልቶኤ።

41 እሰን ኣንገሰ ሂር ኣፍሴ ኬሾ፤ ሞንሰ እኑ ሬዮ ሜንቱለከ ሞሉ አመዕናኑተ ገእ ሩሁሴ ፈንቀላን ኣሲሰ።

42 ሁኩ ጠዉ እዮጴ ከተማን ጉዕማንን ሞጭጫሞ፤ ልገቡ መንንኩ ቀርቾን አመዕኔእ።

43 ጴጥሮስን እዮጴ ከተማን ጎገ ዘገኖ «ሰሞኔ» ዩኖ መንቹን ሜጡብ ልግብ በር ኣፋዕለኤ።

10

ጴጥሮሴላክ ቆርኔሌዎስ

- 1 ቄሳር ከተማን ሄኦኖ «ቆርኔሌሴ» ዬኖ መቱ መንቹ ሄዕዮ እቅ፤ እሱን ርም በገዝ ጎሳት ኣዜን «ጣልያን ብርጌደ» ዬኖህነሃ ጥቤ ሀለቀ እቅ።
- 2 እሱን ምንሰ እበርሲን ሜጡብ መገነሃ ሰገደን መገኑ ዋጀኖ እቅ፤ ህትን ቡጥቻኖተ ሰደቀተ ኣሰኖ እቅ፤ መገን አደንከ ጉዕመ ወክት ዱኣ አእኖ እቅ።
- 3 መቱ በር ሆንሶ ስኣት ጌሳን መገን መላይኪቹ «ቆርኔሌሴ» የን እሱ ገእን መናማን ለሌሴ።
- 4 እሱን መላይኪቹ ቱክ ይ ለእን ዋጀ «ቀርኝ መርቼሃን?» ዬእ፤ መላይኪቹንኩ «ዱኡክለከ ቡጢቻኖተ ሰደቀ ሀዕልታንጥቲህ መገንህን ቃገንታንትገ አዕዮሄ።
- 5 ቲህ እዮጴ ከተማን ሄዕዮ ጴጥሮሴ ዬኖ ሰሞኔቤቹ መን ሶክ ገእሲሰ።
- 6 እሰ ቲሱ ምኑስ ባር መዳን ሄዕዮ ጎገ ዘገና ሰሞኔ ምኔን ኮሀነቱ አፋዕልዮኡ» ዬሰ።
- 7 እሱን ሜጡብ ጠወኣን ሄዕዮ መላይኪቹ እሲቹ አደ እክ ኦርዕዮቹ ኤተርን ቆርኔሌሴ እሰ ካዲማቹ ለሙሰለክ ጉዕመ ወክት እሱ አገርታህኑኡቹ መገኑ ዋጀኖ መቱ ወታደርቹ ገእ
- 8 ጉዕመንከ ጠወ ኩሎሳቹ ኤተርን እዮጴ ከተመ ሶኮሰ።
- 9 ለንክ በር ገሰመ እሰ መርት ከተመሰ ሆንጠኮ ወክት ልሆ ሰኣት ጌሰ ጴጥሮሴ ዱኣ አኣተ ህንሸርገ ዮ ቤቹ ፋሎ።
- 10 እሱን ጎሩ አፋንሰ አቸተ አቸተ ሀሾ እቅ፤ አቸተ ቅጥ እኤነሊን መናመተ ለዕዮ።
- 11 ህከ ወክት ሰሞሁ ፈንተዕዮን ሾሉ መረበሰ ኡሱረሞ መጋረጀ አጉደኖርቹ ሰሜቹ ኡላተ ድረን ለዕዮ።
- 12 ህከን ኣዜንን አደዱ ሾል ሎከት ዮሰ ቡሳዉ፣ ወዘንከሰ ሹርይታ ክልቀቱለከ ሰማን ብርይታ ጨኤት ሄኦ እቅ።
- 13 ህከ ወክት «ጴጥሮሴ! ኬእ ካን ጎረጥ እት» ይታ ላገተ ሞጮጩእ።
- 14 ጠዉ እኮጎሬ ጴጥሮሴ «ቀርኝ! እሆናበኣ፤ እን ህትኔ ንጃሾ ህከረንገ ነጠ እሆህ እቸም በሩ ዮበእ» ዮእ።
- 15 ህትን ለንኪሃ «መገኑ ሙጩሩ አዕዮሃ አት ንጃሰሶት» ይታ ላገት አሚቶኡ።
- 16 ሆኩን ሰሱ ወክት እኮቹ ኤተርን ሆኩ መጋረጀ አጉደኖርቹ ሰማ ዋል ኦርዕዮ።
- 17 ጴጥሮሴ መናመገ ለዕዮ ጠወ «ኩን እኮሁ ሚሃት?» የን ቀልቤንከሰ ጨነቀመን ቆርኔሌዎስ ሶኮ መኑ ሰሞኔ ምኒ መን ጠዕምት ደጎኢቹ ኤተርን ኡርን ኡርቶ እቅ።
- 18 እሱን ላገሰ ጎት አት «ሰሞኔ» ዬን ገኤኖ ጴጥሮሴ ከበ ዮእንደ?» ይት ጠዕምቶኡ።
- 19 ጴጥሮሴን ህከን መናማን ለዕዮ ጠውተኔሃ ሰውየን ሄዕዮገን ጠሊሉ ኣያን «ሆኩዕን ሰሰ መናከት ሀሳሂት።
- 20 እሱን ኣን ሶካንሰ አሚቶረ እኮቤቹሃ ኬእ ለሞሱዕናን ኣሳን ሜጡብ ኦርእ» ዮእ።
- 21 ጴጥሮሴን ህከን መንቤቹ ድር «እዕኑ ሀሴነጎተ መንቹ ኣኔት፤ አሚቱንታሁ መ መሳኒት?» ዮሰ።
- 22 እሱን «አይሁድ መኑ ሎርሰኖ መገኑ ዋጀኖ ህንቅ መንቹ ቆርኔሌዎሴ» ዮኖ ጥቤ ሀለቀ ሶካኔት፤ ኬሳሃ ምንሰ ገእሲሽ እት ይታንቲሃ ሞጮጮት ጠሊሉ መላይኪቹ ኩሎሰ» ዮቶኡ።
- 23 ጴጥሮሴን እሰተ ምኒ ኣገሽ ካደሞሰ፤ ለንክ በር ገሰመንከ ኣሳን ሜጡብ ኦርኦተ ፋሎ፤ እዮጴ ከተማን ዮ አመሰናኖቹ መት-መቱ እሱን ሜጡብ መርቶኡ።
- 24 ለንክ በር ገሰማን ቄሳር ከተመ ኢልታ ወክት ቆርኔሌሴ እሎሰለከ ሆንጠካሰ ጃለሰ ገእ ኣሳን ሜጡብ አገረኖት እቅ።
- 25 ጴጥሮሴን ህከ ቤቹ ኢል ምኒ ኣጎ ወክት ቆርኔሌሴ ጴጥሮሴን ደቀም ሎከሰ ኡብ ሰገጃሰ።
- 26 እኮጎሬ ጴጥሮሴ «ኬእ! ኣን ኪገን መንቹሃን» ይ ኬሾሰ።
- 27 ጴጥሮሴ እሱን ጠወኣንን ምኒ አገኖ ወክት ልግቡ መኑ ጭምዬኣሃ ለዕይ
- 28 «አይሁድ መንቹ አይሁድ እህባ ሞሎ ዘሬን ጭምዮ ህከረንገ ምኒ ኣጉ ሕጋን ፈቀደምባሃ እሁሰ አዕኑ ገዉክዕኔን ደጌነጎተ፤ እኮጎሬ ኤሳሃ አዬሁ ሳጠ እኮበእሃ ህከረንገ ንጃሾኣሃ» ዮ ህሰሰኖኤበእገ መገኑ ለሊሾኤ።
- 29 ህካን እኮቤቹሃት እቤቹ ሶኩንተ ወክት ግቡዕን አሚቶሚሁ፤ «ቴሱ ገእቲንተኤሁ ሚሃት?» ይ ጠዕማንክዕኔ» ዮሰ።
- 30 ቆርኔሌዎስ «ሾሎ በሬቹ ብርተ ህትኔ ወክቲን ሆንሶ ሳቲን ምኔንከኤ ዱኣ እእን አበ በለቀ ኦድኑተ ኦደዕዮ መቱ መንቹ ብሬንከእ ኦር
- 31 ቆርኔሌዎሴ! ዱኣክ መገኑ ሞጮጭዮኡ፤ ህትን ቡጢቻኖተ ኣቶንት ሰደቀተ መገኑ ቃጎኡ።
- 32 እዮጴ ከተመ መን ሶክ «ጴጥሮሴ» ዬን ገኤኖ ሰሞኔ ገእሲሰ፤ እሱን ጎገ ዘገና ሰሞኔ ምኔን ኮሀነቱ አፋዕልዮ፤ ሰሞኔ ምኑስ ባር መዳን ላር መዳን የእሃን ዮእ።
- 33 ህካን እኮቤቹሃ ህከ ወክትንከ ኪቤቹ ሶኮም፤ አት አሚቲንከክ ጡመ አቶንት፤ ቴሱ መገኑ አዘገሃርቹ ጉዕመንከ ሞጮጭኖተ ጉዕመንኩኔ ከንቤቹን መገን ብሬን ጭምደኖም» ዮእ።

ጴጥሮስ ጠወዕዮገ

34 ጴጥሮስን «መገኙ መነ መነች በትሽ ጎልባሃ እሁስ ሀንቅንከ ቴሱ ደጎም ዬጸ።

35 ጠወ እኩጎሬ ሀከን ደቦ ዘርተ እሁን መገኙ ከበጀኖ እኮች መገኙ ቶገኖሰ።

36 መገኙ እስራኤል ኡመቲሃ ላገሰ ሶኮ፤ ጉዕም ቀርቼ መሲህ ኢስ እስ አዲን አሜተኖ ወገሬት አዋጁሰ።

37 ያህይ ጥምቀትተኔሃ ተማርሰኢች ኤተሮን ገሊላ ባዲች ጀመር ይሁድ ባደን ጉዕማንን እኮ ጠወ አዕኑ ደገኒንተ።

38 «ህትን መገኙ ናዝሬት ኢስ ጠሊላ እያኒን ቡር ወልቀተ ኢሴስገ ደገኒንተ፤ መገኙንኩ እሴን ሜጡብ ሄዕዮቤቸሃ እስ ጡመ ጠወ እእንለከ እልቢሱ አፎሃ ጉዕመንከ ፈጆሰን ፈንቀላሞ።

39 «እሰን ይሁድ መን ባደንለከ ዩሩሳሌም ከተማን አዕዮ ጠዋሃ ነኡ ምስክርሃን፤ እሱ መስቀል አሊን ሰቀልተ ሸቶሰ።

40 ጠወ እኩጎሬ መገኙ ሰቅ በር ሬሆች ኬሽ ለለኖገ አዕዮሰ።

41 ሁኩ እሴን ለሌኢሁ ሄጭ መገኙ መጠር ምስክር እንኮም ኔሳዪት ቤሉ መኒሃ ጉዕሚሃበእ፤ እስ ሬሆች ኬዕዮች ኤተሮን እሰን ሚጡብ እንቶሚሁለከ እንጎሚሁ ነኑት።

42 ኢሰን ሬቶሁኑኡንለከ ፎሊን ሄኣሁኑኡ አሊን ፈረዶተ መገኙ አዕዮሁ እሱ እሁስ መስከርኖተለከ መኒሃ ጉዕሚንከ ተማርሰኖተ አዘዠኔ።

43 እሴን አመዕናሁ ጉዕመንኩ እስ ሱዕሚን ጨቡሰ ፈቀን የመሞተ ነብያከት ጉዕመንኩ መስከርቶሰ» ዬጸ።

መገኙ አመዕንትቡ ሙኔ ጠሊላ እያን ቶጉስ

44 ጴጥሮስ ህከ ጠወ ጠወእንን ላገሰ ሞጮጭቶ መን አሊን ጉዕማንን ጠሊሉ እያኑ ድሬኦ።

45 ጴጥሮሴን ሚጡብ አሜቶ ጡርከመንቶ አይሁድ አመዕናት አይሁድ አክበ መን አሊን ጠሊላ እያን ኢሴስገ ለኑ ወክት አጀብሲጭቶኦ።

46-47 አጀብሲጭቶኢሁ እስ ዋሎ ላጋን ጠወእንለከ መገኙ ሎርሰተን ሞጮጭቶቤቸሃት። ጴጥሮስን «ቴ ኒገን ጠሊላ እያን ቶጎ ሙኔ ዊን ጠመቀንታበእገ ከመኖሳሁ አዩት?» ዬጸ።

48 እሰን መሲህ ኢስ ሱዕሚን ጠመቀንታገ ጴጥሮስ አዘዠኖ፤ ህከኒች ኤተሮን ቀወ ጌሰ እሳን ሚጡብ አገርተ ኡጭቶሰ።

11

ጴጥሮስ አይሁድ እኮበእ መን ምኒ ኣጉሰ

1 እሳበትለከ ይሁድ ባደን ዮ መገኙ አመዕንቶ ሙኔሁ አይሁድ እሁቡ ሙኔሁ መገን ላገተ ቶጎገ ሞጮጭቶኦ።

2 ህካን እኮቤቸሃ ጴጥሮስ ዩሩሳሌም ፈንቀል መር ወክት ጡርከመንቶ አይሁድ አመዕናትት

3 «ጡርከመንቶበእ መን ምኒ ኣጎ እሳን ሚጡብ አቶንቲሁ ሚሃት?» ይት ዋቀሶኦ።

4 ጠወ እኩጎሬ ጴጥሮስ ወዕኔችን ጀመር እኮ ጠወ ጉዕመንከ ሮስሾ።

5 እሰን «እን እዮጴ ከተማን ዲኦ እእን ገወእ ዛጅምገ እእኖ ሰዉት አዘን ሄዕዮምገ መናማን ለሌኤ፤ ሁኩንን መጋረጃ አኑደኖሁ ሾሎ ሙረበሰ ኡሱሬማሁ ሰሜች ኢቤቹ አሜች።

6 ህካን ሆንጠክ ቱክ ይ ለእም ወክት መጋረጃ አሊን ሾል ሎከት ዮሰ ግዘ፤ ቆጥ ቡሳወ፤ ኡላ አሊን ወዘኒንከሰ ሾርይተን ሃንታ ክልቀቱለከ ሰማን ብርይታ ጨኡት ዮኢሃ ለዕዮም።

7 ህትን ጴጥሮሴ! ከኤ ካን ጎርጥ እት ይታ ላገተ ሞጮጭጭም።

8 ጠወ እኩጎሬ ኣን ቀርቻ! እህኖበእ፤ ነጠሀ እኮበእሃ ህከረገገ ንጃሰ እኮሃ ከበሬ ኢሎተ ኢላ አፎንከኤ አፎምበኦ ዬም።

9 ለንኩሃ መገኙ ነጠ አዕዮሃ እት ንጃሰሶት ይታ ላገተ ሰሜች አሚቶኦ።

10 ኩ ጠወ ሰሱ ወክት ህት እኮች ኤተሮን ሁኩ መጋረጃ አኑደኖቹ ሰማ ዋል ጣጠም።

11 ህከ ወክት ቁሳር ከተሚች ኢቤቹ ሶህንቶ ሰሰ መናከት እን ሄዕዮም ምኒ ኢልቶኦ።

12 ጠሊላ እያን ሸኩዕናን እሳን ሚጡብ ኦርኣምገ ኩሎኤ፤ ኩ ሌሁ ሙኔንኩ እን ሄኦኤ አቅ፤ እሳኒን ሚጡብ ቆርኔሌዎሴ ዬኖ መንች ምኒ እንጎም።

13 ቆርኔሎሰን መላይኩቹ ሞኔስ ኡር ለዕዮገለከ ልዮጴ ከተመ መን ሶክ ጴጥሮሴ ዬኖ ሰሞኔ ገለሲሰ፤

14 እትለከ ምንክ አበርሱ ጉዕመንኩ ጡምቲንተ ጠወ ኩለኖሄ ዩሰ ኩሎኤ።

15 ህከኔን እን ጠወኡ ጀመርም ወክት ጠሊሉ እያኑ ወዕና ኒ አሊን ድሬገን እስ አሊን ድሬኦ።

16 ህከ ወክት ያህይ ዊን ጠመቆ፤ እኩጎሬ አዕኑ ጠሊላ እያኒን ጠመቀንቲንተ ዬ ቀርቻ ላገተ ቃገንቶኦ።

17 ነኔ ቀርቻ መሲህ አሳን አመዕናኖም ወክት ኔሳሃ እሴ ህክ አሰቱተ እሳሃ አሲሳች መገኒን ሀንበዕለሞተ እን አዩት?» ይእ።

18 እሰን ህካን ሞጮጭቶ ወክት መሰለ ሆግ ጨለ ይቶኔ፤ ህትን «መገኑ አይሁደ እህበ መኒህ ነብሴህበ ቶበት ፈንቀልታገ እዕዮሰ» ይተን መገኑ ገለትጭቶኑ።

አመዕናኖት አንጸካን «መሲሂን አመዕንቶ መነ» ይማገ

19 እሰጥፋኖሴ ሼመች ኤተሮን ኬዕዮ ያህይ መሳን ብንይቶ አመዕናኖት ሞሎ መኒሃ እሁዕነ ጠለዕል አይሁድ መኒሃ መገን ላገተ ኩልተን ፍንቄ ባዱ፤ ዊን ረበንቶ «ቆጵሮሰ» ይኖ ባዱለክ አንጸክ ከተመ ኢለ ዘህተን ኩልታኢት እቅ።

20 ጠዉ እኮጎሬ እሳች መት-መቱ ዊን ረበንቶ «ቆጵሮሰ» ይኖ ባዱለክ ቀሪን ከተሞ መኑ አንጸክ መርቶ ወክት ቀርቻ ኢሰ ተሽት ላገተ ግርክ ባድ መኒሃ በርግት ኩልተን ተማርሰታኢት እቅ።

21 ቀርቻንኩ እሳንከ ደግለለን ሄዕዮቤቺሃ ልግቡ መኑ አመዕንት ቀርቻ አደ ፈንቀልቶኑ።

22 ህከን ጠው ዱዱቡንኩ ዩሩሳሌማን ሄኑ አመዕናኖተ ሞጮጭጭ፤ እሰን በርናባሴ አንጸክ ከተመ ሶኮኡ።

23 እሰን መር መገን አሰቱተ ለዕዮ ወክት አበ ሙንደዕዮ፤ ዊመ ቀልብንከሰ ቀርቻን ጠረኝት አመዕንቶረ እክ ሄኣገ ሰኩሰ።

24 መሰንትሰ እሰ ጠሊሉ አያኑለክ አመዕነቱሁ ዊሞሰቤቺሃ ጡመ መንቹ እቅ፤ ልግቡ መኑንኩ አመዕንት ቀርቻ አደ ፈንቀልቶኑ።

25 ህከኒች ኤተሮን በርናባሴ ሳኑሌ ሀሶተ ተርሴሰ ከተመ ኦርዕዮ።

26 እሰን ደጎሰ ወክት አንጸክ ከተመ እኦ ኦርዕዮ፤ ለሙንኩ ዊመ ዘማን ህከኔ ሄኑ አመዕናኖን ሜጡብ ልግብ መነ ተማርሰቶኔ፤ አሳበንት ሞኔሳንከ አንጸካን «ክርሰታኑ» ይን ገኤመሰ።

27 ህከ ወክት መት-መቱ ነብያኑት ዩሩሳሌሚች አንጸክ ከተመ መርቶኑ።

28 እሳችን መቱ «አገቦሴ» ይኖ መንቹ ኬዕይ ኡር ዱንዮ አሌን ጉዕማንጎ ጎሩ እህኖገ ጠሊሉ አያኑ ለሊሻጎሰ ኩሎ፤ ሁኩ ጎሩንኩ ሮም ባድ ሞም ቀላዉደሴ ዘማኔን እኮአሃ እቅ።

29 ህካን እኮቤቺሃ አንጸካን ሄኣ አመዕናኖት ገገዉንኩሰ ወልቀሰ ጌሰ ፋሽት ይሁድ ባደን ዮ አመዕናኖተ ሶኮተ ሙርሰጭቶኑ።

30 እሰን ብረ ጭምእት በርናባሴለክ ሳኑሌ አንገን ዱእ ሞነ ባልቀቤቹ ሶኮኡ።

12

አመዕናኖ አሊን እኮ አቡ ያየሙ

1 ህከ ዘማን ሞሙ ሄርድሰ መት-መቱ አመዕናኖተ ያዩ ጀመሮ።

2 እሰን ያህይ አመቤቱ ያቀበ ሲፊን ሸሲሾሰ።

3 ሁኩ ጠዉ አይሁድ ሙንደእሲሾግ ለዕዮ ወክት ጴጥሮሴ በርግ ኡሱርሲሾ፤ ሁኩን እኮሁ ጦሮሹ እቲን ከበጃኖ ከበጃን ዊመ ሳሞንት ኣዜን ዮ በሪኒት እቅ።

4 ሄርድሰ ጴጥሮሴ አፍ ኡሱር ምኒ ኣግሾሰ፤ እሰን ሻሽግ ከበጃቲች ኤተሮን መን ብርተ ፋሾተ ሰውይ ሾሉ-ሾሉ እክ ተሪን-ተሪን አገርታገ ቶነ ሌሆ ወታደሪሃ ህግሰ ኣቶኡ።

5 ህካን እኮቤቺሃ ጴጥሮሴ ኡሱር ሞኔን ጠረኜን አገሪኖት እቅ፤ ጠዉ እኮጎሬ አመዕናኖት ሜጡብ እክ አሰተኔሃ ጠረኝት ዱእ አታኢት።

መላይኪቹ ጴጥሮሴ ኡሱር ምኒች ፋሽገ

6 ሄርድሰ ጴጥሮሴ ኤመት ብርተ ገሰመ ሆንጠህሶተ ሰውዬ በሬን ሀንከዕርተ ጴጥሮሴ ለሞ ሰንሰለቲን ኡሱራናን ለሞ ሞታደር በላን ኦሰዕዮ እቅ፤ ሞሎ ሞታደሩ ኡሱር ምኒ ኡሮን ኡርት አገርታኢት እቅ።

7 ድንገገቲን ቀርቻ መላይኪቹ ለሊኔ፤ ሞንሰ እዙ አበ ዋቅ ይኣ፤ ጴጥሮሴ ሞዛሹሰ ኡል ኬሽ «ደዕልት ኬእ» ይሰ፤ ጴጥሮሴ አንገተ ኡሱራመ ሰንሰለቲ አንገችሰ ኡቦ።

8 መላይኪቹንኩ «ቀበቱክ ቆዕር! ጫዕመክ ሞዕር!» ይሰ፤ እሰን መላይኪቹ ይሰገ አዕዮ፤ መላይኪቹንኩ ቲሁ «ጋብክ ኦደእ አሞኔኤ» ይሰ።

9 ጴጥሮሰን አብል ፋል አሞቻሰ፤ ጠዉ እኮጎሬ ጴጥሮሰ መናመተ ለአኖ አጉደኖሲት ቤሎ መላይኪቹ እኦ፤ ጠዉ ሀንቅ አጉጃሰበእ።

10 ሞኔ አገሪኖቤቹለክ ለንክ አገሪኖቤቹ ህግ ከተመ ፋሽኖ ብረት ሳንቀ ዮ ቤቹ ኢልቶኔ፤ ሁኩ ብረት ሳንቀ ገዉንኩሰ ፈንተዕዮ፤ እሰን ፋልት መቶ ሩካሽ ሞቄን ህንኤ፤ ወክትንከሰ መላይኪቹ እሲች አደ እክ ኦርዕዮ።

11 ጴጥሮሰን ቀልቡሰ ፈንቀላን «ቀርቹ መላይኪቹሰ ሶክ ሄርድሴ አንገችለክ አይሁድ ኤመቱ አገርታ ጠዊች ጉዕሚችን ፊሾኤሃ እሁሰ ቲ ደጎሞ» ይእ።

12 እሰን ህከ ጠወ አጥራወኞች ኤተሮን ልግቡ ሙኑ ሜጡቡ ጭምይ ዱኣ አእኖ መርየማ ምን ኦሮዕዮ፤ እሰን «ማርቆሴ» ዬኖ ያህዪዩ አመተ እቅ።

13 ጴጥሮስ አብል ሳንቀ ቆጩ ወክት «ሮደ» ዬኖ ህከን ምን ገረዳቹት ለአተ ብትም ኡሩተ አሜቶኡ።
14 እሰን ጴጥሮሴ ላገተ እሁሰ ደጎ ወክት አበ ሙንደኦቤቹሃ ሳንቀ ልንቱዕናን ምን ደጉደን ኣግ ጴጥሮስ አብሌ ኡሩስ ኩልቶኡ።

15 እሰን እሲተ «በርገንጎት» ይቶሲ፤ ጠወ እኩጎሬ እሴ «ሀንቅንከ አሶት» ይተን ጠረኝሰ ኩልቶሰ፤ እሰን «ጴጥሮሴ አገረኖሃ መላይኪቹ» ይቶኡ።

16 ጠወ እኩጎሬ ጴጥሮስ ሳንቀ ሰዕምይ ቆጩእ፤ እሰን ልንት ለአሰ ወክት አበ ገረምሰጭቶኡ።
17 ጴጥሮስ እሰንተ አንጋን ቀቀሽ ጨለ ይገገ አዕይ መገኑ ኡሱር ምኒች ሀት አይ ፋቤሰ ጎር ኩሎሰ፤ እሰን «ከ ጠወ ያቀብለከ ፈቆ አመዕናናተ ኩሌ» ይኬዕይ እሳች አይ እክ ዎሎቤቹ ኦሮዕዮ።

18 ኡለት ሶዞ ወክት ዎገደሩ «ጴጥሮስ መ እኩ?» ይተን አበ ጨነቀንቶኡ።
19 ሃሮድሰን ጴጥሮሴ ሀሴግን አዕይ ሆጎች ኤተሮን ህከ ወክት አገርገገ ዎገደረ መረመር ሹል ሾኖተ አዘዙ፤ ህከኒች ኤተሮን ሃሮድሰ ይሁድ ባዲች ቁሳር ከተመ ኦሮዕይ ህከኔ አፋዕሌኡ።

ሃሮድሰ ሬዮገ

20 ሃሮድሰ ጠርሰለከ ሲደን ባድ መኒን ኡሙዕርዮ እቅ፤ ሁኩ መንጎኩ ሜጡቡ አሜት ዎም ምን ሀላፊቹ ብላሰጦሴ ዎሚን እተቀንሶተ ኡጭቶኡ፤ መሰንትሰ ባዲሰ እቸተ ደእኖ ህከን ዎም ባዲች አኩቤቹሃት።

21 ዝኔ በር ሃሮድሰ ዎም ኡድኑተ ኦደዕይ ኬዕምኝ ቦርጭማን አፋዕል ኡሙቲሃሰ ጠወአኖሳት እቅ።
22 ኡሙቱንኩ «ቲን መገንተ ላገ ቤሌ መንተ ላገበአ!» ይተን ጨነጭቶኡ።

23 ሃሮድሰ መገኒሃ ኬዕምኝ እሱ ሆገቤቹሃ ወክትንከሰ ቀርኙ መላይኪቹ ዳፋን አሉሰ ዘቡዕለዕይ ሬዮ።

24 ጠወ እኩጎሬ መገን ላገት ጉዕመ ወክት ነጽተንለከ አልባዕልተን መርገኡት እቅ።
25 ህከ ወክት በርናባሰለከ ሳኦሊ ሆገሱ ሹልት ዬሩሳሌሚች አንጾከ ዬኖቤቹ ልንቀልቶኡ፤ እሰ ልንቀልት አሜተን «ማርቆሴ» ዬኖ ያህዪዩ እሳንን ሜጡቡ እእት አሜቶኡ።

13

በርናባሴለከ ሳኦሊ ተማርቶተ ሶሃመገ

1 «አንጾከ» ዬኖ ከተማን አመዕናኖ አገት በላን ነብያኑትለከ እሰተማረት ሄኦ እቅ፤ እሰን በርናባሴ፤ «ገንበሌ» ዬኖ ሰሞን፤ ቀሬን ባድ ሉክዮስ፤ ባድሰ ሾልቅ አፎ ገሽኖ ሃሮድሴን ሜጡቡ ነጴ ምናሔትለከ ሳኦሊት እቅ።

2 እሰን ቀርቹ ካደንተንለከ ሶመንተን ዮሀኔን ጠሊሉ አያኑ «በርናባሴለከ ሳኦሊ አን መጠርም ሆጎተ አይ አዕዬ» ዬሰ።

3 ህከኒች ኤተሮን ሶመንትለከ ዱኣ አት አንገሰ አሌሰ አቶች ኤተሮን ሶሶሰ።

በርናባሴለከ ሳኦሊ ዊን ረበንቶ «ቆጵሮሰ» ኢልቶገ

4 በርናባሴለከ ሳኦሊ ጠሊሉ አያኒን ሶሀንት «ሴሌውቅያ» ዬኖ ከተመ ኢልቶኡ፤ ህከንቤቹች መርከባን ኣግ «ቆጵሮሰ» ዬኖ ባዲ ኢልቶኡ።

5 እሰን «ሰላሚሰ» ዬኖ ከተመ ኢልቶ ወክት አይሁድ ጭምት ምናን መገን ላገተ ተማርሰታኢት እቅ፤ ያህዪን እሳን ሜጡቡ እከ ሀዕለግሳት እቅ።

6 ህከ ዊን ረበንቶ ኤለተ ጉዕመንከሰ ዘህተን «ጳፋ» ዬኖ ከተመ ኢልቶ ወክት «ባርዮሱሰ» ዬኖ መቱ አይሁድቹ ኪላንቹ ደጎኡ፤ ሁኩ መንቹንኩ ክዝብየ ነብዬቹ እቅ።

7 እሰን «ሰርገዮስ ጳውሎሴ» ዬኖ ገሻንቹን ሜጡቡ ሄኦ እቅ፤ ሁኩ ገሻንቹንኩ መገን ላገተ ሞጮጮተ ሀሽ በርናባሴለከ ሳኦሊ እሰቤቹ ገእሲሾ።

8 ጠወ እኩጎሬ ግሪክ መን አሮን «ኤሊማሴ» ዬን ገኤኖ ኪላንቹ ባርዮሱሰ ሁኩ ገሻንቹ አመዕንበገ ሀሽ በርናባሴለከ ሰኦሊን ሀንበዕለሙ ጀመሮ።

9 እኩጎሬ «ጳውሎሴ» የመሞ ሳኦሊ ጠሊሉ አያኒን ዊም ህከ መንቹ ቱክ ይ ለአን
10 «አት ተንኩትለከ ሃሉ ጠወ ጉዕመንኩ ዊሞሃ አልቢሰ ቤቱ፤ ጡመርቹሃ ጉዕሚንከ ዱኒ፤ ቀርኙኔ ጌጥዬ ዎቀሃ ሾክሱ አጉርገገትበእንደ?»

11 ቴሱ ሁኩዕኑን ቀርኙ አንገት ዎቀርገሃ፤ ህካን እኩቤቹሃ ቆቀ እክ ቀዎ ወክቲሃ አርኑር ለአንትበኤ» ዬሰ።
ወክትንከሰ ጉንጃገለከ ቱንሰችገ ዮርቹ አልሰ እፍሾ፤ እሰን አንገሰ አፍ መሰገናሰ መን መዲሰ ሀሱ ጀመሮ።

12 ሁኩ ገሻንቹንኩ ቀርኙተኔሃ ተማርሰቶ ትምርቲን እጀብሲጩቤቹሃ ህከ ጠወ ለዕዮ ወክት መገናን አመዕኔኡ።

በርናባሰለክ ጳውሎስ ጲሲድያን ሄላ «አንጾክ» ኦርኤስ

13 ህከኒች ኤተሮን ጳውሎስለክ ጃለስ መርከባን ኣግ «ጳፎስ» ዬኖ ከተሚች «ጵንፍልየ» ዬኖ ባደን ሄላ «ጴርጌ» ከተመ መርቶኤ፤ ያህይ እሳች ኣይ እክ ዬሩሳሌም ፈንቀል ኦርዕዮ።

14 እኮኮግሬ እስ ህከን ጴርጌ ከተሚች «ጵሲድያ» ዬኖ ባደን ሄዕዮ ዎሉ «አንጾክ» ዬኖ ከተመ ኢልቶኤ፤ ሰምበት በሬን መቶ ኣይሁድ ጭምት ምኒ ኣግ እፋዕልቶኤ።*

15 ሕግለክ ነብያኖ መጻፈ ኣነበሮች ኤተሮን ጭምት ምኒ ገሽታኣሩ «አመኤ ኦሶ! መነ ሸዚንተ ጠዉ ዮሀዕኔ ጎር ኩሌ» ይት እስቤቼ ሶኮኤ።

16 ህካን እኮቤቼሃ ጳውሎስ ኬዕይ ኡር ኤመት ኣንጋንተሰ ቀቀሽ ጨለየኖን ኣዕይ «እዕት እስራኤል መኑለክ መገኑ ዋጅቴንተ ኡመቱ! ከበ ሞጮጭዬ!

17 ከን እስራኤል ኤመት መገኑ ዎኔ ኣናኑኔ መጠር ግብጽ ባደን ኮሀ እክ እፋዕልቶ ወክት ልግብ ኡመት ኣዕይ ሎረ ዎልቃንከሰ ህከንቤቹች ፋሺእ።

18 ሸይሉ ዘማን ኢላ ኡላ ኡድማን ኣታዕሊሰ። †

19 ህከኒች ኤተሮን ከነኣን ባደን ለመለ ደቦ ኤመት ቤሽ ኡለሰ እሳሃ ረገእሰሾ።

20 ህከኒች ኤተሮን ሾል ጥብተ ኦንታዮ ዘማን ጌሰ ነብዬች ሳሙኤሌ ወክቱ ኢሎተ ኢላ ዳኛኑት ገሽታገ ኣዕዮሰ።

21 «እሰን ህከኒች ኤተሮን ዎመ ኣሶስተ ጠዕምቶኤ፤ መገኑ ቢንያሜ ደቦች ቂሰ ቤቱ ሳኑሌ ሸይሉ ዘማን ዎመ ኣዕዮሰ።

22 ሳኑሌ ዎምነቲች ድረሾች ኤተሮን ዳዉዳ ዎመ ኣዕዮሰ፤ መገኑ ዳዉዳተኔሃ ገይኤ ቀልብገ ዮኣሃ ኣን ዬም ጠወ ጉዕመንከ ኣእኖ እሴዬ ቤቱ ደዉዳ ደኤም» ይ መሰከሮሰ።

23 ህከን መንች ዘራች መገኑ ተብሲሰ ላገ ሃሊን እስራኤል መኒሃ ጡምሳንቹ ኢሰ ኤቦሰ።

24 ኢሰ ኣሜቲዕነ ብርተ ጠመቃንቹ ያህይ እስራኤል መኒሃ ጉዕሚንከ ጨብ ቶበት ፈንቀልተ ጠመቃንታገ ተማርሰኖ ኣቅ።

25 ያህይ ሆጉሰ ሹሎች ኤተሮን «ኤሳሃ ኣይት ይቴን ሰውይቴንጎት? ኣን ኣሜተኖ ይቴን ኣገርቴንጎታሃበእ፤ ጠዉ እኮኮግሬ ኣን ጫመስ ወደሩ ሂሮተ በቀኣሳሃ ኢች ኤተሮን ኣሜተኖ ዬእ።

26 «እዕት ኣብረሂም ዘራች ከለቀንቴንታ ኣመኔ ኦሱትለክ መገኑ ዋጅቴንተ ኡመቱ! ጡም ሶህኑት ሶሃንቶኢሁ ኔሳህት።

27 ጠዉ እኮኮግሬ ዩሩሳሌማን ሄላእሩለክ ሀለቃስ ኢሰ ጡምሳንቹ እሁሰ ደጎበኣ፤ ሰምበት በሬን ኣነበቤኖ ነብያከ መጻፈተ ኣጥራመቲዕናን እሰ ኣሊን ፈረይ ወክት ራጉሰ ዊመኖገ ኣቶኤ።

28 ኢሰ ሪሆተ ኢልሰኖሰ መሰተ ደግባግሬሁ ገኻንቹ ጵላጦስ ሾሰተ ኡጭቶኤ።

29 እስተኔሃ ከተበሞሃ ጉዕመንከ ኣት ሹልቶች ኤተሮን ሰቀለም ሰቀለሊች ድሪሰ ሞሳኤ፤

30 ጠዉ እኮኮግሬ መገኑ እሱ ሪሆች ኬሾሰ።

31 ኢሰ እሰን ሚጡቦ ገሊሊች ዩሩሳሌም ኣሜቶህኤተ ልግብ በር ለሌሰ፤ እሰን ቴሱ ኤመት ብሬን ኣስተ ሞስክረ።

32 ኣኣን ኣሜንቶም ሃዕሮ ተሸት ላገት መገኑ ኣናካተኔ ኣጎ ተብሲሰ ላገት

33 ኢሰ ሪሆች ኬሲንከሰ ህከ ተብሳሃ ኒን ኦሶንተሰ ዊንሸዮኤ፤ ሁኩንን ደውድ መጻፋን ለንክ መዝሙራን

«ኣት ቤቱሃኤ፤ ኣን ከበር ኣሎንኬ!»

የመም ከተበሞጋት።

34 ህትን ሸሙዕነ መገኑ ሪሆች ኬሽ ለልሶተ

«ጠሊላ ኣመዕነንቶ በረከተ

ደዉዳ ኣሴሚሃ ኣሳንክዕኔ» ይ ጠወዕዮኤ።

35 ህትን ደውድ መጻፋን ዎሎ ቤቸን

«ከ ጠሊሉ ካዲንቹክ ሎድ ኣዘን ሸሞተ ሰዕም ይታንትበኤ» የኖ።

36 ጠዉ እኮኮግሬ ደዉድ ሄዕዮ ዘማኔን መገኑ ኢተኖገ ሆጉሰ ሹሎች ኤተሮን ሬይ ኣናካንተሰን ሞገም ሸሞኤ።

37 እኮኮግሬ መገኑ ሪሆች ኬሾሲሁ ሸሞበኣ።

38 ህካን እኮቤቼሃ ኣመኤ ኦሶ! ጨብ ኣጉረሙ ደገሞሁ ህከን ኢሲን እሁሰ ተማርሴማሀዕኔገ ደጌ።

* 13:14 ሰንበት በር- ዩኣይሁዳን ሆኖቹተ የሃን። 13:17 ፋል. 1፡7፤ 12፡51። † 13:18 ኣታዕሊሰ የኖሁ- መት-መቱ ሉሀ ከታበት «እገሰሰ» ይታኣ። 13:18 ዘኹ. 14፡34፤ ዘዳ. 1፡31። 13:19 ዘዳ. 7፡1፤ ኢያ. 14፡1። 13:20 መሳ. 2፡16፤ 1 ሳሙ. 3፡20። 13:21 1 ሳሙ. 8፡5፤ 10፡21። 13:22 1 ሳሙ. 13፡14፤ 16፡12፤ ጣዘ. 89፡20። 13:24 ማር. 1፡4፤ ሉቃ. 3፡3። 13:25 ማቶ. 3፡11፤ ማር. 1፡7፤ ሉቃ. 3፡16፤ ያህ. 1፡20፤ 27። 13:28 ማቶ. 27፡22-23፤ ማር. 15፡13-14፤ ሉቃ. 23፡21-23፤ ያህ. 19፡15። 13:29 ማቶ. 27፡57-61፤ ማር. 15፡42-47፤ ሉቃ. 23፡50-56፤ ያህ. 19፡38-42። 13:31 ሰቀ. 1፡3። 13:33 መዘ. 2፡7። 13:34 ኢሳ. 55፡3። 13:35 መዘ. 16፡10።

39 ህትን እሲን አመዕነኖሁ ጉዕሙንኩ ሙሲን እሲሞ ሕጊን ነጠ ፋሎተ አታልጠ ጨቢቶ ጉዕሚኝን ነጠ ፋላኖ።

40 ህካን እኮቤቹሃ ነብያኖን ህት የመሞ ጠወአሞሁ ኢላኖ ህዕኔበእገ አገዕርዬ፤

41 እሲን

እሳት ቀለዳንተሩ! ለዕዬ! ገረሞሲጭዬ! በዕዬሁ!

መሰንትሰ አይ ኩሎህዕኔገሬ

አመዕንቴንበ ሆጉተ

ዘማኔንከክዕኔ አአም» የኖ ዬእ።

42 ጳውሎስለከ በርናባሰ ጭምት ምኒኝ ፋልተን ከ ጠወ አሜተኖ ሰምበት በሬተ ፈንቀሽት ኩልታገ መኑ ኡጭቶሰ።

43 ጭምት ምኒ መኑ ፋሎ ወክት ልግቡ አይሁዱሁ አይሁድ እምነቴን ፈንቀልቶእሩ ጳውሎስለከ በርናባሴ እምንቶኤ፤ ጳውሎስለከ በርናባሰ ህክ መነ መገን እሲቶን ጠረኝት ሄኣገ ሸዞሰ።

44 ሳምንትሰ ሰንበት በር ከተማንከሰ ሄኣኖ መኒኝ ልግቡሰ ቀርኝ ላገተ ሞጮጮተ ጭምዬእ።

45 ጠወ እኮጎሬ አይሁዱ ኡመትሰ በትኝ ለኦ ወክት ጢቅሰ ጳውሎስ ጠወአኖ ጠወ ግብ ጳውሎስ ቦርርቶኤ።

46 እኮጎሬ ጳውሎስለከ በርናባሰ መለልት «መገን ላገተ ሄጩን ክዕኔሃ ጠወኡ ህሰሰኖ፤ ጠወ እኮጎሬ አዕት ቶጎምበኤ» ይቴን ዘላላሚሃ ጉዕሚንከ ሄኣኖ ሄኡ ገበአባሃ አቴን ገንከክዕኔ ፈረዳንተቤቹሃ ነኡ ገኝአዕን አይሁድ እህበ መንቤቹ መርናም።

47 መሰንትሰ ቀርቹ ኡለ ዳንገ ኢሎተ ኢለ ጡሙ ኤቦኖተ አይሁድ እህበ መኒሃ ኑሪ አዕኖንኬ» ይ አዘገኜ ይቶኤ።

48 አይሁድ እህበ መኑ ህካን ሞጮጭቶ ወክት ሙንደኦኤ፤ ቀርኝ ላገተት ሎርሰቶኤ፤ ዘላላሚሞ ሃኢሃ መጠረንቶእሩ ጉዕሙንኩ አመዕንቶኤ።

49 ቀርኝ ላገት ህከን ባዶን ጉዕማንን አልባዕልቶኤ።

50 አይሁድ እምንሳኑት አይሁድ አመዕነቴ ቶጎ መገኑ ዋጅታ ቀባጣሙ ሚንቴለከ ሎርሎሩ መኑ አደሚኖግ አት ጳውሎሴሃለከ በርናባሴሃ ኑርሸት ኢልታገ አት ህከን ባዶኝ ሸርት ፋሸቶኤ።

51 ጳውሎስለከ በርናባሰ ህከን መኒሃ ጡር አሆተ ሎከሰ ትበ ግገሸት አቆንኖም ከተመ መርቶኤ።

52 አመዕናኑት ሙንዲኖንለከ ጠለሊ አያኒን ዊንቶኤ።

14

ጳውሎስለከ በርናባሰ «አቆንኖን» ከተመ መርቶገ

1 ህከኒኝ ኤተሮን ወዕና ሮሶገን ጳውሎስለከ በርናባሰ አቆንኖን ኖ አይሁድ ጭምት ምኒ አጎኤ፤ ህከን ቤቸን ልግቡ አይሁዱለከ ግሪክ መኑ አመዕንቶተ ኢለ ተማርሰቶኤ።

2 ጠወ እኮጎሬ አመዕንትበ አይሁዱ አይሁድ እህበ መነ ኬሰ አመዕናኖ አሴን ብተተ ኬሶኤ።

3 ህካን እኮቤቹሃ ጳውሎስለከ በርናባሰ ቀርኝ ላገተ መለልት ጠወአን ልግብ ወክት ህከኔ አገርቶኤ፤ ቀርቹ አጀብተለከ አጀብሲሰኖ ጠወ አንጋንከሰ አታገ ወልቀተ አሰ አሰ አሰቶ ላገት ሀንቅ አሁሰ ለሊሰኖት አቅ።

4 ጠወ እኮጎሬ ከተማንከሰ ሄዕኖ መኑ ለሙ አደ እክ መቱሰ አዱ አይሁድ አደለከ ደሩሰ አዱ አሳበ አደ እኮኤ።

5 ጠወ እኮጎሬ አይሁዱለከ አይሁድ እህቡ ዎሉ መኑ ሀለቃንከሰ ሚጡበ እክ ጳውሎሴለከ በርናባሴ አበ ኑሪሶተለከ ክኒን ቀሶተ ሀሶኤ።

6 ጳውሎስለከ በርናባሰ ህክ ጠወ ሞጮጭቶ ወክት «ልሰጥረለከ ደርቤታ» ዬኖ ልቃኑን ባድ ከተመተለከ አዘጋገኘከሰ ኖ ባዱ ሁንት መርቶኤ።

7 ህከን ቤቸን ተሸት ላገተ ዱዱብሰቶኤ።

ጳውሎስለከ በርናባሰ ልሰጥራንለከ ደርቤ ከተማን ተማርሰቶገ

8 ልሰጥራን ሎከሰ ናሬ መቱ መንቹ ሄዕኖ እቅ፤ ኩ መንቹ አለሞኝ ኬሸ ናፈ አኮቤቹሃ ሎካንከሰ ሃም ደገኖበኤ።

9 ኩ መንቹ ጳውሎስ ጠወአኖሃ አፋዕል ሞጮጫኖት እቅ፤ ጳውሎስ ህከ መንቹ ቴክ ይ ለዕይ ጡሞተ አታልሲሰኖ አመዕነቴ ኖሰገ ለዕኖ ወክት

10 ሎረ ላጋን «ጌጥ ይት ሎካንከክ ኡር!» ዬ ወክት መንቹንኩ ኬዕይ ሃሙ ጀመር።

11 መኑ ጳውሎስ አዕኖ ጠወ ለዕኖ ወክት ልቃኑን እፎን «ሸርኬ መገናከት መነ አጉድ ኒቤቹ ድርቶኤ» ይት ሎረ ላጋን ጠወኦኤ።

12 እሱን በርናባሴ «ድያ»* ይቶኤ፤ ህትን ልግብ ወክት ጠወአኖሃ እኮቤቹሃ ጳጳሎሴ «ሄርሜን» ይቶሰ።

13 ከተሟች አብሌን ሄዕዮ ድያ ሰገዳኖስ ምኒ ቁስቹ ምርጃመተለክ ሸርገ መክሴመ ቡብሉተ ከተመ እኒዮ ኡርቤቹ ኡብ ኡመተን ማጡብ ጳጳሎሴሃለክ በርናባሴሃ ክትም ሆንጠህሶተ ሆሾ።

14 ጠወ እኮጎሬ ጳጳሎሴለክ በርናባሴ ህከ ጠወ ምጭጭቶ ወክት ህልቅ ኦድኑስ ፊልት ያርተን መንቤቹ ደጉደን መርት

15 «ኮ መነ! ከ ጠወ ሚሃ አቴነጎታት? ነኤ ክዕኔገን ዮምሃ መነ፤ ነኤ ከቤቹ አሚንቶሚህ አዕኑ ከን ተስ ጠወቹ ገበላ ሞልቴን ሰማ፣ ኡለተ፣ ባረለክ አዜንከሰ ዮርቹ ጉዕመንከ ከለቆለክ ሄአዮ ካለቅ አደ ፈንቀልቴነጎተ ጎሸት ላገተ ኩልኖህዕኔጎታት።

16 ህጎ ዘማኔን ኡመቱ ጉዕመኑከ ገይሰ ሃሽኦቶገ ሄኦተ መገኑ ገኝ አዕይ አጉርሰ።

17 እሁን ቤሉ እስ ጎደበ ላፈ መገኑ እሁስ መስከረኖ ጡመ ሆጉተ ኦኤ ኦጉርብእ፤ መስገትስ ሰሚች ጤን ኡበኖገ አዕዮህዕኔ፤ ጡመ አቶተ ኣሴህዕኔ፤ እቻንለክ መጎዳኖን ቀልብክዕኔ ሰገብተ ዊንሼእ» ይቶኤ።

18 አሳበት ኬንከ ጠወኦጎሪህ ኡመቱ አሳሃ ክትም ሆንጠህህሰእገ ከንቶኢህ አበ ኦርጨቆንቲት።

19 እኮጎሬ አይሁዱ እንጸክለክ እቆንዮን ከተሟች ህከ ቤቹ አሚት ኡመት ሂላ ኡድመተ አማልሲስ ጳጳሎሴ ክነጎ ቀስ ሬዮ እጉጃንስ ጎሽሸት ከተሟች አብል ፋሽቶኤ።

20 ጠወ እኮጎሬ አምነጎታሰሩ አሚት መዳስ ኡርቶ ወክት ከዕይ ከተመ ኣጎ፤ ለንክ በር በርናባሴንን ሚጡብ «ደርቤ» ይኖ ከተመ ኦርዕዮ።

ጳጳሎሴለክ በርናባሴ ሶርይ ባደን ዮ እንጸክ ከተመ ፈንቀልት መርቶገ

21 ጳጳሎሴለክ በርናባሴ «ደርቤተ» ይኖ ከተማን ጎሸት ላገተ ተማርሰ ልግብ መነ ኢስ አምነጎታረ አቶኤ፤ ህከኒች ኤተርን ልሰጥረለክ እቆንዮን ህግ «እንጸክ» ይኖ ከተመ ፈንቀልት መርቶኤ።

22 ህከን ከተማን ዮ አመዕናኖ ቀልብ ጠረኝሰን፣ አመዕነቶንከሰ ጠረኝት ሄእ ሸከንለክ «መገን ምምነቱ ኣጎኖተ ልግብ ኦርሸተ ቶጉ ሀሰሰኖ» ይተን ተማርሰታኢት እቀ።

23 እሱን ቤቹን ቤቹን ዮ አመዕናኖተ ባልቀ ሾንቶኤ፤ ሶመንቶችለክ ዱአ አቶች ኤተርን እሰ አመዕንቶ ቀርቹሃ ኤገተ ህግሰ አቶኤ።

24 እሱን «ጵሰድዮ» ይኖ ባዲን ህግ «ጵንፍልዩ» ይኖ ባዲ አሚቶኤ።

25 «ጴርገ» ይኖ ከተማን መገን ላገተ ተማርሰቶች ኤተርን «አጣልዩ» ይኖ ከተመ መርቶኤ።

26 ህከንቤቹች መርከባን ኣጎ ሶርያን ዮ እንጸክ ፈንቀልቶኤ፤ ሁኩ እንጸክ ከተመ፣ ቴሱ አት ሹልቶ ሆጎተ ፋልቶ ወክት መገን እሰቶተ ህግሰን ኤገተ ኣሴመሰሃ ቤቹ እቀ።

27 ህከ ቤቹ ኢልቶ ወክት አመዕናኖተ ጉዕመንከ ሚጡብ ጭምእት መገኑ አሳን ሚጡብ አዕዮ ጠወ ጉዕመንከለክ አይሁድ እህቡ ሙኑ መገኑ አመዕንቶተ ህት አዕይ ዎቃ ፈቛሰጎር ኩልቶኤ።

28 እሱን ህከኔ አመዕናኖን ሚጡብ ልግብ ወክት አፋዕልቶኤ።

15

ዩሩሳሌማን እኮ ኣገትተኔሃ

1 መት-መቱ መኑ ይሁድ ባዲች እንጸክ ከተመ መርት «ሙሰ ሕግገ ጡርከመንቴንበጎሬ ጡምቴነጎተበእ» ይት አመዕናኖተ ተማርሰ፣ ጀመርቶኤ።

2 ጳጳሎሴለክ በርናባሴ ህከን ጠውተኔሃ መኒንከሰ አበ ብተንት ኦደንቶቤቹሃ እሰለክ ህከን ባድ አመዕናኖች መት-መቱ ዩሩሳሌማን ዮ ሶቀማዮቤቹለክ ባልቀቤቹ መርታገ ወሰነም።

3 ህከን እኮቤቹሃ አሳንከ አመዕናኖት ዎቄሃሰ ሸንቀተ አት ሶካንሰ አይሁድ እህቡ መኑ ኢሰ አደ ፈንቀሉሰ ኩልተን ፍንቄጎለክ ሰማርይ ባዲን ህንኤ፤ ሁኩ ጠወ አመዕናኖተ ጉዕመንከ እበ መጎዳኒሲሾ።

4 እሱን ዩሩሳሌመ ኢልቶ ወክት አመዕናኖት፣ አሳበትለክ ባልቀት «ሀበይ ወገሬቲን አሚቴን» ይት ቶጎሰ፤ ህትን መገኑ አሳን ሚጡብ አዕዮ ጠወ ጉዕመንክ ዩሩሳሌማን ዮ መኒሃ ኩልቶኤ።

5 ጠወ እኮጎሬ ፈርሳቄ አዲች አመዕንቶ መኒች መት-መቱ ኬእ «ህከ አይሁድ እህበ መነ ጡርከመንታገለክ ሙሰ ሕገ አገርታገ ኦኤ ሀሰሰኖ» ይቶኤ።

6 አሳበትለክ ባልቀት ህከን ጠውተኔሃ አማዕለንቶተ ጭምይቶኤ።

7 አበ ኦደኢች ኤተርን ጴጥርሰ ኬዕይ «አመኤ ኦሶ! አይሁድ እህቡ ኡመቱ ኢ አፊች ተሸት ላገተ ሞጭጭት አመዕንቶተ መገኑ ሄጭ ኤሳሃ ክዕኔ በለች መጠሩሰ ደገነጎተ።

8 መን ቀልብ ደገኖ መገኑ ጠሊላ እያንጎ ኔሳሃ ኣሴ ሃለን አሳሃ ኣሲን መስከርኤ።

9 ቀልብሰ አመዕነቲን ነጠ አዕዮቤቹሃ እሰለክ ኒ በላን መት አደደመታ አዕዮበእ።

* 14:12 ዲያ፡ «ድያ» ዩሩህ ግሪክ መን እፎን ግሪክ ባደን ሄእ ልግብዩ ከላኖች ጉዕሚችሰን ሎረሃን፡ «ሄርሜን» ዩሩህ ግሪክ ባድ መን እፎን «ድያ» ዩሩህ ሎረ ከላንቹሃ ሰቀማዮሃ እቀ። 14:15 ፋል. 20፡11፤ መዝ. 146፡6። 15:1 ሉቄ 12፡3። 15:8 ሰቀ. 2፡5፤ 10፡44።

10 ህዛን እኮች እናከኔለከ ነኤ እጅኖተ አታልገበ እጅነተ አመዕናኖተ እጅሲሴን ማሃት መገኑ ፊተንቴነጎታት?

11 ጠዉ እኮጎሬ ነኤ ጡምናሚሁ እሰገን ቀርቾ ኢሰ እያኒን እሁሰ አመዕናኖም። ዬሰ።

12 ህከ ወክት ጭምዬ መኑ ጉዕሙንኩ ጨለ ዬአ፤ ህትን በርናባሰለከ ጳዉሎስ አይሁደ እኮበእ መን በላን እሰ አዲን መገኑ አዕኖ አጅበተለከ እጅብሲሰኖ ጠወ ጉዕመንከ ኩልተን ሞጮጭታኢት እቅ።

13 እሰን ጠወእ ሹልቶች ኤተሮን ያቀብ ፈንቀሽ «አመኤ ኦሶ! ህንዴ ሞጮጭዬ!

14 መገኑ አይሁደ እህበ መኒች ሱዕሚንከሰ ገእመኖ ኡመት በሊችሰ መጠር ወዕና ዳንዴሰገ ሰሞን ኩሎኡ።

15 ከን ሰውተን ነብያከ ላገት መቱ እክ ኣገንቀንታኢ፤ እሰን ህት የመም ከተባሞሃን፡-

16-17 «ከኒች ኤተሮን ፈቆ መኑለከ ሱዕሚንከኤ ገእንቶአሩ አይሁደ እኮበእሩ ኡመቱ ጉዕሙንኩ ኤሳሃ ህሳገ ፈንቀል አሚታም፤ ድጃሞ ደዉዴ ሞኒ እጅራም፤ ድጃሞሲንከ ለንኪሃ ፈንቀሽ ኡርሳም።

18 ወዕኔችን ጀመር ካን ጉዕመንከ ለሊሾም አን መገኑ ህት ያሚት።

19 «ህዛን እኮቤቺሃ ኢ ሰውቱ መገን አደ ፈንቀልቶ አይሁደ እህበ መን ኦርንሱንከ።

20 ህከን ወሞ ሸርኬተ ክትሚመ እቶተ እቶኖቼ፤ ዘነተ አኢች። ለገንቅ ሬዮ ለል ማለ እቲችለከ ቄጉ አገች አገዕርዬ» ይን ከተንባሰ።

21 መሰንትሰ ልግብያ ዘማኒች ኬሽ ሙሲ ሕጋን ሰምበት በር ጭምት ምናን አነበበመኖት እቅ፤ ከተማን ጉዕማንን ዲዲብሰመኖ» ዬአ።

አይሁደ እኮበእ አመዕናኖተ ሶሃመ ደብዳቤተ

22 ህከኒች ኤተሮን አሳበትለከ ባልቀት አመዕናኖን ጉዕሚንን ሚጡብ ጭምይት በሊችሰ ቀዉ መን መጠርት ጳዉሎሴንለከ በርናባሰን ሚጡብ አንጾክ ከተመ ሶኮተ አማዕለንቶኡ፤ ህዛን እኮቤቺሃ አመዕናኖ በሊች ጡመ እምንሳኖች «በርሳባሴ» ዬኖ ይሁደለከ ሲላሴ መጠርቶኡ።

23 ከተበንቶ ደብዳቤተ እሰ አገጋን ሶኮኡ፤ ደብዳቤሰን «ነኡ አመክዕኔ ኦሶተ አሳበትለከ ባልቁ፡ አንጾክ ከተማን፡ ሶርይለከ ክልቀይ ባደን ሄኤነንተ አይሁድ እህቡ መን አድረ እከንተ አመኔኦሱተ ወገሬቱ ይናንክዕኔ።

24 ኒ በሊች መት-መቱ መኑ ነኤ ሶንኩዕን ክዕኔቤቼ መርት ኩልቶህዕኔ ላጋን ኦርሶህዕኔንለከ ሻከሶህዕኔገ ሞጮጭኖም።

25 ህዛን እኮቤቺሃ ሚጡብ ጭምይኖሚች ኤተሮን መጠርን ኢተንቶ አመኔኦሶች በርናባሴለከ ጳዉሎሴ ሚጡብ ክዕኔቤቼ ሶንኮተ ኢተቀምም።

26 በርናባሰለከ ጳዉሎስ ቀርቼሃኔ መሲህ ኢሰ ሱዕምተኔሃ ገዉሰ ህግሰ አቶአረ።

27 ይሁድለከ ሰላሰ ነኡ ከተንቦሚን ገይሰ አፎን ኩልታህዕኔገ ሶንኮም።

28 ህዛን እኮቤቺሃ ከኒች ዎር ኦዲን ዮ ህሰሰኖ ጠወ ቤሉ ዎሉ ኬዕመኖ ጠወ እጅሲሳንክዕኔበእገ ጠሊሉ እያኮለከ ነኤ ኢተቀምም።

29 ሸርኬተ ክትሚመ ማለ እቶኖቼ፡ ዝናች፡ ለንገእ ሬዮ ለል ማለ እቲችለከ ቄጉ አገች አገዕርዬ፤ ካን ጉዕመንከ አገዕርቴንተገር ጡመሃን፤ ቴሱ ወገሬቲን ሃዕዬ» ይት ከተቦኡ።

30 ህከኒች ኤተሮን ሶሃመ መኑ ወገሬቲን ሃዕዬ ይት አንጾክ ከተመ መርቶኡ፤ እሰን አመዕናኖተ ጭምአት ደብዳቤተ አቶኡ።

31 አመዕናኖት ደብዳቤተ አነበበ ወክት ሶሃመ ሸዘናን አበ ሙንደኦኡ።

32 ህትን ይሁድለከ ሰላሰ ነብያከተ እኮቤቺሃ አመዕናኖተ ልግብየ ጠወን ሸከ ጠረኝሶኡ።

33 እሰን ህከኔ ዮ አመዕናኖን ቀዉ በር ሚጡብ አፋዕልቶች ኤተሮን «ወገሬቲን ሃዕዬ» ይት ሶኮ መንባሰቹ ፈንቀልት መርቶኡ። *

34 [ጠወ እኮጎሬ ሲላሰ ህከኔ ፈቆተ ሃዕላቸ።ፊ]

35 እኮጎሬ ጳዉሎስለከ በርናባሰ ቀዉ በር አንጾክ ከተማን ዲንክት ዎሎ ልግብየ አመዕናኖን ሚጡብ ቀርች ላገተ ተማርሰተን ተሸት ላገተ ዲዲብሰቶኡ።

ጳዉሎስለከ በርናባሰ አደ እሁሰ

36 ቀዎ በሬች ኤተሮን ጳዉሎስ በርናባሴ «አም ከኒች ብርተ ቀርች ላገተ ተማርሰኖም ከተማን ጉዕማንን ዮ አመዕናኖት ህት ዮ ጎሬ ዳንድኖ» ዬአ።

37 በርናባሰ ህትን «ማርቆሴ» ዬኖ ያህይ እሳን ሚጡብ መሮተ ኢቲኤ።

38 ጠወ እኮጎሬ ጳዉሎስ እሳን ሚጡብ መሮተ ሀሾበእ፤ መሰንትሰ እሰ «ጵንፍልያ» ዬኖቤቸን እሳች አደ እክ ሆንቤቼ መሩዕን ፈቆቤቺሃት እቅ።

15:18 እምጳ 9፡11-12። 15:20 ፋል. 34፡15-17፤ ሌዌ 17፡10-16፤ 18፡6-23። * 15:33 መት-መቱ ለህ ክታበት ዎላንሽ 33 ዮኢሀ በርግታበኡ። † 15:34 መት-መቱ ለህ ክታበት ዎላንሽ 34 ዮኢሀ በርግታበኡ። 15:38 ሶቀ. 13፡13።

39 ህከን ጠዋን አበ ኦዶኢች ኤተሮን መለዕለንቶኡ፤ ህከን እኩቤቸሃ በርናባሰ ማርቆሴ ኣእ መርከባን ኣግ ዋን ረበንቶ «ቆጵሮሰ» ዬኖ ባዱ መርቶኡ።

40 ጠወ እኩጎሬ ጳውሎስ ሰላሴ መጠር፤ አመዕናኑት ጳውሎሴ ቀርቶ ኣሰቶተ ኤገተ ኣቶኢች ኤተሮን ኦርዕዮ።

41 እሱን «ሶርየለከ ክልቅየ» ዬኖቤቸን ዮ አመዕናኑተ ጠረኝሰን ሃመኖ እቅ።

16

ጥማቶስ ጳውሎሴንላከ ሰላሴን ማጡብ አሁሰ

1 ጳውሎስ «ደርቤተለከ ልሰጥረ» ዬኖቤቹ አሜቶ፤ ህከኔን «ጥማቶሴ» ዬኖ አመዕናንቹ ሄዕዮ እቅ፤ አመስ አይሁድተ አመዕናንቹ እቅ፤ እኩጎሬ ኣኑስ ግርክቸሃ እቅ።

2 እሱን «ልሰጥረለከ እቆንዮን» ዬኖቤቸን ሄኣ አመዕናኖ እኔን ጡሙ ሱዕሙ ሄዕዮሰ እቅ።

3 ጳውሎስ ጥማቶሴ ኣእ ሃሞተ ሀሾቤቸሃ ጡርክሞስ፤ መሰንትሰ ህከን ቤቸን ሄኣ አይሁዱ ጉዕሙንኩ ጥማቶሴ እኑ ግርክቹ አሁሰ ደጋቤቸሃት እቅ።

4 ጳውሎስላከ ሲላስ ከተመ ዘህተን ዬሩሳሌም ከተማን ዮ አሳበትለከ ባልቀተ ጠወእ ኡርሰ ትዛዝ አመዕናኑት አገርታገ ሸዛኢት እቅ።

5 ህከን እኩቤቸሃ አመዕናኑት ጠረኝተን በሬን በሬን ወሊንሹሰ በተእን መረኖት እቅ።

ጳውሎስ መቄዶን ባዱ ኦርኦተ ገአሙሰ

6 ህትን እስ እስይ ባዶን መገን ላገተ ኩልታበእገ ጠሊሉ እያኑ ከማንሰ ፍርግይለከ ገለትይ ባዶን ሀገኡ።

7 «ሚሰየ» ዬኖ ባዱ ኢልቶ ወክት ቢታንየ ባዱ መርቶተ ሰውይቶኡ፤ ጠወ እኩጎሬ ኢስ እያኑ ህከበ መርታበእገ ከሞሰ።

8 ህከን እኩቤቸሃ እስ ሚሰይ ባዶን ህግ ጢርኣድ ከተመ መርቶኡ።

9 ህከን እኩቤቸሃ ሀንከዕርተ መቱ መቄዶን መገቹ ኡር «መቄዶን አሜት ሀዕልኔ» የን ኡጨኖሃ ጳውሎስ መናማን ለዕዮ።

10 ጳውሎስ መናማን ለዕዮች ኤተሮን ነኡ ህከ ወክትንከ መቄዶን መርኖተ ቅጥይኖም፤ መሰንትሰ ነኡ ህከኔ ዮ መኒሃ ተሸት ላገት ኩልኖተ መገኑ ገኡስ ደንጎምቤቸሃት እቅ።

«ሊድያ» ዬኖ መንቹት መሲሂን አመዕንቶገ

11 ጢርኣዱች መርከባን ኣንግ «ሳሞትራቄ» ዬኖቤቹ ኢልኖም፤ ለንከ በር «ናጹሌ» ዬኖቤቹ መርኖም።

12 ህከንቤቸች ኬዕን ፍልጵሰዩስ ከተመ ኢልኖም፤ ፍልጵሰዩሱ መቄዶን አወራጃሃ ሎረ ከተመለከ ሮም ባድ ሞ አንገን ጠገሞሃ እቅ፤ ነኡ ህከን ከተማን ቀወ በር ዱንክኖም።

13 ህትን ሰምበት በር ከተሚች አለል ዱኣ ኣቶተ ጭምይታቤቹ ዮኢሃ ኣኑጅኔቤቸሃ ፋልን ዛዘኖ ዋ መድ መርኖም፤ ህከኔ አፋዕልን ጭምይቶ ሚንቲሃ መገን ላገተ ተማርሰኖም።

14 ህከኔ ጭጭታ ሚንቲቸች መትትያጥርን ከተሚች አሜቶ ሰመ ኣኑድኖ ብሽ ኦድኑተንገዳ መገኒሃ ሰገዳ «ሊድያ» ዬኖ መንቹት እቅ፤ ጳውሎስ ጠወኣኖቹ ኣጥራመቶተ መገኑ ቀልብሴ ፈቼ።

15 እሱን ሞንሴ መኒን ጉዕሚንን ማጡብ ጠመቀንቶች ኤተሮን «ቀርቶ መገኖን አመዕኔሚሃ እኩሚች ሞኒኤ አሜቲን አፋዕልዬ» ይት ጠረኝሰ ኡጭቶኔቤቸሃ መርኖም።

ጳውሎስላከ ሲላስ ፍልጵሰዩስ ከተማን ኡሱረንቶገ

16 ነኡ መቱ በር ዱኣ ኣኤኖ ቤቹ መርኒን ኪልታገ ኣእኖ ደርረኖ ዱሩ ዮሴ መት ካዲንቹት ሀፍቱት ቀቃን ደቀንቶኔ፤ ህት ሀፍቱት ኪልተን ገሽታሴሁኑኤተ ልግብ ብረ ኤባእተ እቅ።

17 እሱን ጳውሎስላከ ኔሳሃ አሞንትን «ኩ መኑ ሎረ መገንተ ካዲመ፤ እስ ጡሜኖ ቀቃሃ ክዕኔሃ ኩልታሀዕኔረ» ይተን ያርታኢት እቅ።

18 ህከንን ልግብ በር ኣቶኡ፤ ጠወ እኩጎሬ ጳውሎስ ኡሙዕር ኤተሩ ፈንቀል ለዕይ ደርረኖ ዱሩ «መሲህ ኢስ ሱዕሚን እሴች ፋልቶተ ኣዘዛንኩ» ዬኡ፤ ህከ ወክትንከ ደርረኖ ዱሩ ፋሎ።

19 እኩጎሬ ገሻኑሴ ብረ ደዕተ ቆቃሁ ሙርተኡስ ደጎ ወክት ጳውሎስላከ ሲላሴ እፍ ጌቤበ ጎሾሽተን መስት ሹመ ቤቹ ሆንገጠሁሴ።

20 እሱን ሮም ዳኛኖ ብርተ ሆንገጠህሰ «ኩ መኑ አይሁድ መን እከን ከተማንከኔ ብተተ ኬሳኢት።

21 ነኡ ሮም ባድ መኑ ቶንጎተለከ አዕኖተ ሴሩኔ ኣዘዘባሃ ርስሳኔት» ይቶኡ።

22 ኡመቱ እስ ኣሊን ጭምይት ኬኦኡ፤ ዳኛኑት ጳውሎስላከ ሰላሴ ኦድኑተ ቃርቶሳች ኤተሮን በርቲን ዋቀርታገ ኣዘዘኡ።

23 እበ ዋቀርቶች ኤተሮን ኡሱር ሞኒ ኣግሰ ኡሱር ሞኒ ዘበኘ ጠረኝ አገረኖን ኣዘዘኡ።

24 ሁኩ ኡሱር ሞኒ ዘበኘ ቶንጎች ኤተሮን ኣዘ ክፍለ ኣግሽ ሎከስ ሀቃን ኡሱር።

25 ሀንከዕሬ በላን ጳውሎስለክ ስላሰ ዱኤ አተንለክ መዝሙር ዘመርተን መገኑ ገለትጭታኢሃ ዎሎ ኡሱሬመ መኑ ሞጮጨኖሳት እቅ።

26 ድንገቴን ኡሱር ምኒ ቀበቡ ለንቁቀኖ ኢላ አቡ ኡላ ለንቁቀ አኮ፤ ሀከ ወክት ኡሱር ምኒ ጡፋ ጉዕሙንኩ ሜጦረ ፈንተዕዮ፤ ህትን ጉዕምሰ ስንሰለቱ ሂርተዕዮ።

27 ኡሱር ምኒ ዘበኙ ግሰኛች በቅይ ኡሱር ምኒ ጡፋ ፈንተዕዮን ለዕዮ ወክት ኡሱረኛ ፋሽኢቶኢሃ አጉጃንሰ ገዉሰ ሾተ ብሰ ኪሾ።

28 ጠዉ እኮጎሬ ጳውሎስ «ጉዕሙኩኔ ከኔ ዮምቤቺሃ ገዉክ ሚርቶት» ይ ሎረ ላጋን ያር ከሞሰ።

29 ህትን እሰ መብረት አፍሰሽ ኣእ ኣዝ ጠጡተ ደጉጅ ኣግ ሁጠን ጳውሎስለክ ስላሴ ብሬን ኡቦ።

30 እሰንተ ኡብል ፋሽ «ቀርቻኑኤ! ኣን ጡሞተ መ እኤ ሀሰሰኖኤ?» ይ ጠዕሚሰ።

31 እሰን «ቀርቻ ኢሳን ኣመዕንቶንትጎር ኣትለክ ኪ ምኒ መኑሁ ጡምቴንተ» ይቶሰ።

32 ህትን እሰ ቀርቻ ላገተ እሲሃለክ ሞኔሰ ዮ ኣበርሲሀሰ ኩልቶኡ።

33 እሰ ሀከ ወክትንከ ሀንከዕሬን እሰተ መስኬዕይ ጡላሰ ኣንሽ ኣበርሰንከሰ ሚጡብ ጠመቀሞ።

34 ሀከኒቻ ኤተሮን ጳውሎስለክ ስላሴ ሞንሰ ኤብ እቸተ ሆንጠህሾ፤ ህትን እሰለክ ሞንሰ መኑ መገኖን ኣመዕንቶቤቺሃ ሙንደኑኤ።

35 ጠዉ እኮጎሬ ለንክ በሬ ሱጵተ ከተመሰ ገሽታሩ «ህከ መን መርቶተ ገፈሬ» ይት ፖሊሰተ ሶኮኤ።

36 ኡሱር ምኒ ዘበኝቹ «አዕኑ ገፈረንቶኖተ ዳኛኑት መን ሶኮኤ፤ ህካን እኮቤቺሃ አዕኑ ቴሱ ፋልቴን ወገሬቴን ኦርዕዬ» ይ ጳውሎሲሃ ኩሎ።

37 እኮጎሬ ጳውሎስ «ነኤ ሮሞ ባድ መን እንከን መቱርቹሃ ቤንሱዕን ፍርድ ቤሎ ኡመትብሬን ዎቀርት ኡሱር ምኒ ኣግሶኔ፤ ህትን ቴሱ ማጠሞ ፋልናምገ ኣታኔትንደ? ፋልናምበእ! እሰ ገዉሰ ኣሚት ፋሽቴኔ» ይሰ።

38 ፖሊሰት እሰ ይቶ ላገተ ዳኛኖተ ኩልታንሰ ዳኛኑት ጳውሎስለክ ስላሰ ሮሞ ባድ መን እሁሰ ሞጮጭቶ ወክት ዎጅቶኤ።

39 ህካን እኮቤቺሃ ዳኛኑት ኣሚት «ቤንሶም» ይት ኡሱር ምኒቻ ፋሽት ከተሚቻ ፋልት መርታገ ኡጭቶኤ።

40 ጳውሎስለክ ስላሰ ኡሱር ምኒቻ ፋልት ሊድያ ምኒ ኣጎኤ፤ ሀከኔን ኣመዕናኑተ ሽዝ ጠረኝሰ አጉርት መርቶኤ።

17

ተሰሎንቄን ኬኦተተ

1 ሀከኒቻ ኤተሮን እሰን «ኣንዕጸሊሰለክ ኣጾሎኖ» ይኖ ከተሚን ህግ ተሰሎንቄ ከተመ ኣሚቶኤ፤ ሀከኔን ኣይሁድ ጭምት ሞኑ ሃዕዮ እቅ።

2 ጳውሎስ ወዕና ሮሾገን ኣይሁድ ጭምት ምኒ ኣጎ፤ እሰን ኣሳንከ ሰሱ ፎሎጭ በር መገን ላገተ ጠሊሊ መጻፈ ኣዚቻ ኣነበበን ኣሳን ሚጡብ ኩለኖሳት እቅ።

3 ህትን መሲሁ ኦርሸተ ቶጉለክ ሬሆች ኬኤ ሀሰሰኖሰገ ሀንቅ እሁሰ ለሊሽ ኩለን «ኩን ኣን ኩላንክዕኔ ኢሰ መሲህት» ዮኖ እቅ።

4 ህካን እኮቤቺሃ ኣይሁዲቻ መት-መቱሰ ላገሰ ኣጋንሰ ኣመዕንት ጳውሎስንለክ ስላሴን ሚጡብ እኮኤ፤ ህትን መገኒሃ ሰገዳ ልገቡ ግሪክ ባድ መኑለክ ከተማንከሰ ለሊቶ ሚንቱ ላገሰ ሞጮጭት ኣሳን ሚጡብ እኮኤ።

5 ጠዉ እኮጎሬ ኣመዕንትቡ ኣይሁዱ ሞቀኝት ሆጉት ዮበእ መን ዎቄች ጉዕሚቻን ጭምእት ልግብ መን ሂላ ኣማልተ ኣማልሲሰ ከተማንከሰ ብተት ኬኣገ ኣቶኤ፤ ጳውሎስለክ ስላሴ ፋሽት ኡመቴሃ ኣቶተ ሀሰ «ኢያሶን» ይኖ መንቻ ምኒ ረቦኤ።

6 ጠዉ እኮጎሬ እሰተ ሀሰ ሆን ወክት ኢያሶኔለክ መት-መቱ ኣመዕናኑተ ከተም ሹማተ ሆንጠህሶተ ጎሾሽተን መስቶኤ፤ ህትን «ኩ መኑ ጉዕመንከ ባዱ ኦርሳኣረ፤ ህትን ቴሱ ኒ ከተመ ኣሚቶኤ።

7 ኢያሶንን ምኔንከሰ ቶሳሰ፤ ህትን «ኢሰ ይኖ ዎሎ ዎሙ ዮኔ» ይት ሮሞ ባድ ዎም ትዛዝ ግባኣረ» ይት ያርቶኤ።

8 ኡመቱለክ ከተም ሹመት ሀከ ጠወ ሞጮጭቶ ወክት ኣበ ጨነቀንቶኤ።

9 እሰን ኢያሶኔለክ ዎሎ መን ሩብት ገእሲሰ ገፈርቶሰ።

ጳውሎስለክ ስላሰ «ቤርዮ» ይኖ ከተማን ተማርሰቶገ

10 ሀከ ወክት ኣመዕናኑት ጳውሎስለክ ስላሴ ሀንከዕሬን «ቤርዮ» ይኖ ከተመ ህርሲሶኤ፤ እሰን ሀከ ቤቹ ኢልቶገን ኣይሁድ ጭምት ምኒ ኣጎኤ።

11 ሀከኔ ሂኦ ኣይሁድ ተሰሎንቄ ከተማን ሂኣ ኣይሁዲቻ በትሰ ጡሙ ቀልቡ ዮሰቤቺሃ ጳውሎስ ይጠዉ ሀንቅያ ጎሬ ደጎተ በሬን በሬን ጠሊሊ መጻፈ መረመርተን ላገሰ እሰ ሙንዲኖን ቶሳኤ።

12 ህካን እኮቤቺሃ ኣሳች ልግቡሰ ኣመዕንቶኤ፤ ልግቡ ግሪክ ቀባጣሙ ሚንቱለክ ልግቡ ግሪክ ጎኑ ኣመዕንቶኤ።

13 ጠዉ እኩጎሬ ተሰሎንቄ ከተማን ሄኑ አይሁዱ ጳዉሎስ ቤርይ ከተም መኒሃ መገን ላገተ ኩሎገ ሞጮጭቶ ወክት ህከ ቤቹ አሚት መን ሃለ አማልተ አማልሲስ ኡመቱ አሌሲ ከኤሮገ አቶኡ።

14 ህከ ወክትንከ አመዕናኑት ጳዉሎስ ደዕል ባር መድ ኑርኤሮገ አቶኡ፤ እኩጎሬ ሲላሰለከ ጥማቶስ ቤርያን ፈቆኡ።

15 ጳዉሎሴ ህርሲስ አቴን ከተመ ኢልሶ መኑ «ሰላሰለከ ጥማቶስ ደዕልት ኢቤቹ አሚቱን» ዩ ጳዉሎሴ ሶህኑተ ኣእት ቤርየ ፈንቀልቶኡ።

ጳዉሎስ አቴን ከተም መኒሃ ጠወዕዮገ

16 ጳዉሎስ አቴን ከተማን አፋዕል ሲላሰለከ ጥማቶሴ አገርን ከተማንከሰ ሸርኬተ ሰገዴናርቹ ዋሞሀ ለዕዮ ወክት ቀልቤንከሰ አበ ኡመዕሬኡ።

17 ህካን እኩቤቹሃ ጭምት ምኒን እይሁዲንለከ መገኒሃ ሰገዳ መኒን ጉዕመ በር ጌባን ደቀመና መኒን ጠወአናት አቅ።

18 «ኢፐርሰለከ አሰቶይኮ» ዬኖ ኤንኬዕናመት ጳዉሎሴቤቹ አሚተን ኦደንታኢት አቅ፤ መት-መቱሰ «ኩ ዛንቁሬንቹ መ ዮተ ሀሾኡ?» ይታኢት አቅ፤ ህትን ዋሉስ ፈንቀሸት «ደገሞበአ መገኒሃ ጠወአና ኣጉደናት» ይታኢት አቅ፤ ህካን ይቶ መሰት ጳዉሎስ ኢስ ሬሆኝ ኬአ ጡመ ዱዱቡ ኩሎስቤቹሃት አቅ።

19 እሰን ጳዉሎሴ ኣእት «አርዮስፋጎስ» ዬኖ ቆርን ሄአና ኦገትቤቹ ኡብ «ኩ አት ኩልታንትኔ ሃዕር ጠወ መርቹሃጎሬ ደንጎተ አታልናምንደ?»

20 ኩ አት መጫተኔ ሃዕር ጠወ ጠወአንቲሁ መሃጎሬ ደንጎተ ሀንሳምቤቹሃ መሃጎሬ ኩልኔ። ይቶኡ።

21 መሰንትሰ አቴን ከተም ጉዕመንኩ መኡለከ ህከን ቤቹን ሄኣ ዋሉ ባድ መኑ ሃዕር ጠወ ጠወአንለከ ሞጮጭተን ሆሰ ቤሉ ዋሉ መቲርቹሃ አታበአሬ አቅ።

22 ህካን እኩቤቹሃ ጳዉሎስ «አርዮስፋጎስ» ዬኖ ኦገት ብሬን ኡር «አቴን መን! ጉዕመንከ አዲን ሀይማኖቱ ዮህዕኔ መን እሁክኔ ደንም?»

23 ከተመክዕኔ ዘሀን አዕኑ ሰገዴንጎተ ቤቹ ለዕዮም ወክት ደገሞበአ መገኒሃ የመም ከተበሞሃ ክትም ጠረጴዛ ደጎም፤ ቴሱ ህከ ደጎኑዕናን ሰገዴንጎተሃ አን ኩላንክዕኔ።

24 «መገኑ ኡለተለከ ኡላ አሌን ዮኢሃ ጉዕመንከ ከልቆአሃን፤ እሰን ሰሚለከ ኡላ ቀርቹ እኩቤቹሃ መኑ አንጋን እጃር ምኒን ሄአናበኢ።

25 እሰን ነብላሰለከ ፎገል ዋሉርቹ ጉዕመንከ መኒሃ ኣሰናሃ እኩቤቹሃ መቲርቹሁ ሆፈዕዮሰህን መን አንገተ ሄዕላተኖበኢ።

26 እሰን ኣዱንያ አሌን ሄኣ አደደ ኡመት ጉዕመንከ መቶ መንቺኝ ከለቆ፤ ኡላ አሌን ጉዕመንን ሄኣጎ አዕዮኖ፤ እሳንከ ሄኣ ዘማንለከ ሄኣ ቤቹ መደቦሰ።

27 ህካን አዕዮንኩ መኑ መገኑ ሀሶተለከ መረመርት ሀሰ እሱ ደጋጋት፤ እሁን ቤሉ እሰ ኒኝ ጉዕሚኝኔን ቁዕራሻበኢ።

28 መሰንትሰ ሄኡ ደአናሚሁለከ ሌንቁቅናሚሁ ህትን ሄዕናሚንኩ እሲኒት ሁኩንን ክዕኔ መት-መቱ ሲንፋሩ ሳኡ ጉዕመንኩኔ እሰተ አሌ ይቶጋት።

29 ቴሱ ነኡ መገን ኦሱተ አንኮምጎሬ መገኑ መን ሀይማንለከ ሰውቲን ዋርቁን ህከረንገ ብሪን ህከረንገ ከኒን መክሴ መምሰለ አጉደኖ፤ ይን ሰውዩ ሀሰሰኖኔበኢ።

30 ህካን እኩቤቹሃ መኑ ወዕኔ ዘማን ደገ ሆገን አቶኢሃ መገኑ አጉርሰ፤ እኩጎሬ ቴሱ ባድን ጉዕማንን ዮ መኑ ጨቢኝ ቶበት ፈንቀልታገ አዘገኖኡ።

31 መሰንትሰ መገኑ መጠር መንቺኝ አዲን ጉዕማንከ መን አሌን ጌጥ አዕይ ፈረደኖ በር ወሰኛኡ፤ ህካን ሀንቅ እሁስ መን ጉዕሚንከ ለሊሾሁ ህከ እሰ መጠር መንቹ ሬሆኝ ኬሴንከሲት» ዬኢ።

32 እሰ «ሬሆኝ ኬኡ» ዬኖ ላገተ ሞጮጭቶ ወክት መት-መቱስ ቀለደኡ፤ መት-መቱስ «ከን ጠውተኔሃ ዋሉ ወክት ሞጮጭናም» ይቶኡ።

33 ህከኒኝ ኤተርን ጳዉሎስ ኦገቲኝሰ ኬዕይ ኦርዕዮ።

34 ጠወ እኩጎሬ መት-መቱ መኑ አመዕንት እሲን ሚጡብ እኮኡ፤ እሳንን ሚጡብ «አርዮስፋጎስ» ዬኖ ኦገት መኒኝ መቱ «ዲዮናሰዮስ» ዬኖ መንቹ፤ «ደማሪስ» ዬኖ መት መንቹትለከ ዋሉ ልገቡ መኑ ሄዕዮ አቅ።

18

ጳዉሎስ ቆርንቶስ ከተመ ኦርዕዮገ

1 ሀከኒኝ ኤተርን ጳዉሎስ «አቴና» ዬኖ ከተሚኝ ኬዕይ ቆርንቶስ ከተመ ኦርዕዮ።

2 ህክኔን ጳጳስ ሰቀማና ሆጉተን ይቀጥል። ይህ ስሜት ይህ ደብዳቤ ደገ፤ እሱን ቀጥቶ ወክተች ብርተ መንጃንከሰ ጽርስቅላን ማጠብ ጣለያን ከተማች አሜሾን እቅ፤ መሰንትሰ እይሁዱ ጉዕሙንኩ ከተማችሰ ፋልቶተ ርምባ ደሙ ሆሰላቁ ምው ቀላዉዳዎሰ እዘገቡቼሃት እቅ፤ ጳጳሎሰን እሰንተ ለኦተ ኦርዕዕ።

3 እሰ ሆጉተ እሰንት ዱካነ ጎቡ እኩቤቼሃት እሳንን ማጠብ ሃእን እሰሁ ዱካነ ጎቡ ጀመር።

4 እሰን ሰምቦት በር ጉዕሙንከ እይሁዱለከ ግሪክ መኒሃ ጭምት ምኔን ደገመርን ተማርሰን እመንሲሰኖሳት እቅ።

5 ህክኔች ኤተሮን ጥማቶሰለከ ሲላሰ መቄድን ባዲች አሜቶ ወክት ጳጳሎሰ ኢሰ መጠረሞ መሲሁ እሰሁ እይሁዱሃ ጉዕሙንከ ወክት ጠረኝሽ ኩለኖሳት እቅ።

6 ጠዉ እኩጎሪ እይሁዱ መኑ እሱ ግሰሰለከ ቦርሮቶሰ ወክት ኦድኖሰ ትቦ ግግሽ «ቴሱ ፈረደሞሀዕኔ ጎሪ ገይክዕኔ ቤሲን እኩቤቼሃት ኤሳሃ ከን ጠዉሃ ኣግሰኖኤበእ፤ ቴሱ እን እይሁዱ እሀበ መንቤቹ ኦርኣም» ይእ።

7 ህካን እኩቤቼሃት ጳጳሎሰ ህከንቤቼች ኬዕይ መገኒሃ ሰገደኖ «ቴቶሰ ኢኖሰሰሰ» ይኖ መንች ምኒ ኦርዕዕ፤ ምኑስ እይሁዱ ጭምት ምኒሃ መድ እቅ።

8 እይሁዱ ጭምት ምኒ ዳኛ «ቀረሰጳሰ» ይኖ መንቹ ምንሰ አበርሲን ማጠብ መገኑ እመዕኔእ፤ ህትን ልግቡ ቆርጉቶስ ከተም መኑ ጳጳሎሴች መገን ላገተ ሞጮጭት እመዕንት ጠመቀንቶኤ።

9 ቀርቼ መት ሀንከዕርተ መናማን ጳጳሎሴ «ዋጅቶት ሰዕምይት ጠወእ።

10 እን ከኒት፤ እይሁ ኬሳሃ ሚዕርሄተ ኦጉለኖበእ፤ መሰንትሰ ከን ከተማን ኤሳሃ ልግቡ መኑ ዮኤ» ይሰ።

11 ህከን ቤቶን ጳጳሎሰ መገን ላገተ ኤመቲሃ ተማርሰን መቱ ዘማን ደረን እሰቤቶን ዲንኬእ።

12 ጠዉ እኩጎሪ «ጋልዮሰ» ይኖ መንቹ አካይ ባድ ሹመ እኩ ወክት እይሁዱ መኑ ማጠብ እክ ጳጳሎሴን አለን ኬእ አኖ ፍርድ ምኒ መሰቶኤ።

13 ህከን ቤቶን «ኩ መንቹ ሕጉ እዘዘበ ሃሌን መኑ መገኒሃ ሰገደኖን አእኖት» ይቶኤ።

14 ጠዉ እኩጎሪ ጳጳሎሰ ህከን ጠውተኔሃ መሰለ ፈንቀሾተ ቅጥ ይኖህኔን ጋልዮሰ እይሁዱ «አዕት እይሁዱ መኑ! ክዕኔ አለን ከዕማሽ ጠወ ህከረንገ ሃለ እኤማሀዕኔ እቃን ክሰክዕኔ አደቢን ሞጮጭም እቅ።

15 ጠዉ እኩጎሪ ኩ ጠዉ ጠለዕል ላገተኔሃ፤ ሱዕምተኔሃለከ ገይክዕኔ ሕግተኔሃ ኦዲንጉሃ እኩጎሪ ኤሳሃ ኣግሰኖኤበ፤ እን ከን ጠው አለን ፈረዶተ ሀሳምበእ» ይእ።

16 እሰን ህት ይ ፍርድ ምኒች አብል ፋቤስ።

17 ህከኒች ኤተሮን እሰ ጉዕሙንኩ ጭምት ምኒ ዳኛ «ሶስቲንሴ» ይኖሃ አኖ ፍርድ ምኒ ኣገት ብራን ኦልቶሰ፤ እኩጎሪ ህኩ ጠዉ ጋልዮሴሃ መቱርቹሃ አጉጅሰበእ።

ጳጳሎሰ እንጾክ ከተመ ፈንቀሎሰ

18 ጳጳሎሰ ልግብ ወክት ቆርጉቶሰ ከተማን ዲንኬእች ኤተሮን እመዕናኑተ «ወገራቲን ሃእዬ» ይ ሶርይ ባዱ ኦርዕዕ፤ ህትን ጽርስቅልለከ አቂል እሰን ማጠብ ሃኔ እቅ፤ እኩጎሪ ሆንዱር ኣጎቤቼሃት ኦርኣኖህኒች ሃጭ ሙምሰ «ክንክሪያ» ይኖቤቶን ሚጅ።

19 እሰን ኤፌሶን ከተመ ኢልቶ ወክት እሰ ጽርስቅልለከ አቂል ህከኔ አጉር እይሁዱ ጭምት ምኒ ኣግ እይሁዱ መኒሃ ጠወእኖት እቅ።

20 ጳጳሎሰ ልግብ ወክት እሰቤቶን ዲንኩተ ኤጭቶሰ ወክት ቶጉ ግሰሰ።

21 ጠዉ እኩጎሪ «መገኑ ይጎሪ ዎሉ ወክት ክዕኔቤቹ ፈንቀል አሜታም»* ይ ኤፌሶሲች መርከባን ኣግ ኦርዕዕ።

22 እሰ «ቁሳርያ» ይኖ ከተመ ኢል ህከኒች ኤተሮን ይሩሳሌም ኦርዕይ እመዕናኑተ ወገራትሾች ኤተሮን ዘሀ እንጾክ ከተመ ኦርዕዕ።

23 እሰን ቀዉ ወክት እንጾክ ከተማን ዲንኬች ኤተሮን ህከንቤቼች ኬዕይ «ገለትየለክ ፍርግዩ» ይኖ ባድን ቤቹች ቤቹ ዘሀን እመዕናኑተ ጉዕሙንከ ጠረኝሰኖሳት እቅ።

እጵሎሰ ኤፌሶን ልክ ቆርጉቶሰ ከተማን ተማርሰህ

24 «እጵሎሴ» ይኖሁ አሌክሰንደር ከተማን አለሞ እይሁዱቹ ኤፌሶን ከተመ አሜቹ፤ እሰን ጡመገ ጠወእኖሃለከ ጠለላ መጻፈ አጥራመች ደገኖሃ እቅ።

25 እሰን ቀርቻ ዎቄተኔሃ ጡመገ ተማርሃለከ ህትን አበ ቡብ ኢሰ ሀንቅ ጠወ ጌጥ አዕይ ጠወእኖሃለከ ተማርሰኖ እቅ፤ እኩጎሪ እሰ ጠለዕል ያህይ ጠመቆ ጥምቀት ደገኖ እቅ።

26 ህትን እሰን መለል እይሁዱ ጭምት ምኒን ጠወእኖሃ ጽርስቅልለከ አቂል ሞጮጭቶ ወክት ምንሰ መሰት መገን ዎቃሃ ወዕኔች ባሰ ተማርሰቶስ።

18:18 ዘጉ. 6፣18። * 18:21 መገኑ ይጎሪ ዎሉ ወክት ክዕኔቤቹ ፈንቀል አሜታም፡- የኖሁ መቱ-መቱ ክታበት እሜተኖ ከበጀት ይሩሳሌማን ከበጀትም ይታ ላገተ በርግታእ።

27 ህትን እጽሎስ አካይ ባዱ መሮተ ሆሾ ወክት አመዕናኑት ጠረኝሶስ፤ እሰን አካይ ባዱን ሄኦ አመዕናኑት ቶንሰተ ደብዳቤተ ከተሶሰ፤ እሰን ህከ ቤቹ ኢሊ ወክት መገን እያንጊን አመዕንቶአረ አበ ሀዕለኖሳት አቅ።

28 ህካን እኮቤቹሃ ኢሰ ቡረሞሃ እሁሰ ጉዕማንከ መን ብሬን አይሁድ መኒሃ ጠሊሊ መጻፊኛ እነበበን ጠረኝ ኦደን ገረኖሳት አቅ።

19

ጳውሎስ ኤፌሶን ከተማን ተማርሱገ

1 እጽሎስ ቆሮንቶስ ከተማን ሃዕኖ ወክት ጳውሎስ አል ባዱን ህግ ኤፌሶን ከተመ አሜቹ፤ እሰን ህከን ቤቹን ቀዉ አመዕናኑተ ደግ

2 ጳውሎስ «አመዕንቴንተ ወክት ጠሊሊ እያን ቶጌንታአቅንደ?» ዬሰ፤ እሰን «ቶንጎሞበእ፤ ጠሊሊ እያን ሄኦስ ሆሮ ሞጮጭን ደንጋሞበእ» ይቶኡ።

3 ህትን ጳውሎስ «ህከረ ህትኔ ጥሞቀቲሃት ጠመቀንቴንታሁ?» ዬሰ፤ እሰን «ያህይ ጥሞቀትኒት ጠመቀሞሚሁ» ይቶኡ።

4 ጳውሎስን «ያህይ ሉመቲሃ ጨብክዕኔ ቶበቲን ፈንቀልቲን ኢኛ ኤተሮን አሜተኖ ኢሳን አመዕንቴን ጠመቀሜ ዬእ» ዬሰ።

5 እሰን ህካን ሞጮጭቶ ወክት ቀርቾሃ ኢሰ ሱዕሚን ጠመቀንቶኡ።

6 ህትን ጳውሎስ እንገሰ እሰ አሌን አዕኖ ወክት ጠሊሊ እያን እሰ አሌን አሜቻን አደደ አፎን ጠወኦኡ፤ ራገሃ ጠወኦ ጀመርቶኡ።

7 እሰ ጉዕሙንኩሰ ቶን ለሞ መንኖ ጌሰ አቅ።

8 ጳውሎስ አይሁድ ጭምት ምኒ መር ሰሶ አገን ጌሰ መገን ምምነትተኔሃ ኦደን መለል መኒሃ ተማርሰኖት አቅ።

9 ጠዉ እኮጎሬ መት-መቱ ጠቃመተ እኮቤቹሃ ኢሰ ምቃሃ ኤመት ብሬን ቦሮርተን አመዕኑ ግቦ ወክት እሰንተ ጌኝ አዕኖ፤ እሰን አመዕናኑተ አደ አዕይ እሰቤቹ መሰ «ጢራኖሴ» ዬኖ መንቹ ተማርሰኖ ቤቾን መኒሃ በሬን በሬን ተማርሰኖት አቅ።

10 እሰይ ባዱን ሄኦ አይሁዱለከ ግርክ መኑ ጉዕሙንኩ ቀርቾ ላገተ ሞጮጭት ቶጎተ ኢሊ ጳውሎስ ህከን ቤቹን ለሙ ዘማን ተማርሱእ።

መገኑ ጳውሎስ እንጋን አዕኖ አጅበተ

11 ህትን መገኑ ጳውሎስ እንጋን አበ አጅበተ አእኖት አቅ።

12 ህካን እኮቤቹሃ ጳውሎስ ጅሰመሰ ኡልቶ ኦድኑተለከ ማረቦ ኣኤን ጥዘናመ አሌን አኤኖ ወክት ጥዘናኛሰ ፈይታ አቅ፤ ደሮረኖ ዱሩንኩ ፋለኖት አቅ።

13 መኒኛ ሩሃንየንከ ፋሽተን ዘህታ አይሁዲኛ መት-መቱ ቀርቾሃ ኢሰ ሱዕመ ገአተን «ጳውሎስ ዱዱ ብሰኖ ቀርቾ ኢሰ ሱዕሚን ፋልቶኖት አዘንዛንክዕኔ» ይተን መኒኛ ሩሃንየ ፋሽቶተ እጸንታኢት አቅ።

14 አይሁድ ሎረ ቀሳኝ መቲሃሰ አሰቁሞ ዬኖህኒሃ ህት አታ ለመል ለቤ አለት ሄኦስ አቅ።

15 ጠዉ እኮጎሬ ደሮረኖ ዱሩ ፈንቀሽ «ኢሰ ደጋም! ህትን ጳውሎስተኔሃ ደጋም፤ ህከረ አዕኑ አዬኤታን?» ዬሰ።

16 ደሮረኖ ዱሩ አፎሰ መንቹንኩ እሰንተ ኬዕይ አለግሽ ጉዕመንከሰ ቁል ጡላይሽ ኦድኑሰ ፊላን ከልሰ ምኒኛ ሁንት ፋልቶኡ።

17 ሁኩ ጠዉ ኤፌሶን ከተማን ሄኦ አይሁድለከ ግርክ መኒሃ ጉዕሚንከ ሞጮጬም ወክት አበ ሞጅቶኡ፤ ህከንቤቾንን ቀርቾ ኢሰ ሱዕሙ ሎረ እኮ።

18 አመዕንቶ መኒኛ ልግቡሰ አሜት ሂሊ ሆጎኛሰ ቶበታኢት አቅ።

19 ህትን አሰማኦ አታሩ አሰማኦ መጻፈተ ጭምአት ጉዕማንከ ኤመት ብሬን ቡሰቶኡ፤ መጻፋሰ ሀሪማ እቃን ፋሽኖ ጌሰ ገመቴኖ ወክት አበ ጤኦተ እኮ ብረቲን መክሴመ ኦንታሁ ኩሚ ጠገር ብር ጌሰ እኮ።

20 ህካን እኮቤቹሃ ቀርቾ ላገተ አልባዕልተንለከ ነጽተን መርታኢት አቅ።

ኤፌሶን ከተማን ኬኦ ብተተኔሃ

21 ሁኩን ጉዕሙንኩ እኮኛ ኤተሮን ጳውሎስ ሚቄዶንለከ አካይ ባድ እዲን ህግ ዬሩሳሌም ከተመ መሮተ ጠሊሊ እያንጊ ሰውይከኦ «ህከ ቤቹ ኢሊምሀኒኛ ኤተሮን ህትን ሮም ከተመ መር ለኦ ሀሰሰኖኤ» ዬኡ።

22 ጳውሎስ ሀዕልታሁኦኦኛ ለሙ ጥምቶሴለከ ኤራሰጦሴ ሚቄዶን ባድ ሶክ እሰ ገዉሰ እሰይ ባዱን ቀዉ ጌሰ ዱንኬእ።

23 ህከ ወክት ኢሰ ሞቁተኔሃ ኤፌሶን ከተማን አቡ ብተት ኬኦኡ።

24 ህኪኔ ብረ ሸልሰ መክሰኛ «ድሜጥሮሰ» ዬኖ መቱ መንቹ «አርጤምሴ»^{*} ምኒሃ ምሰለ ብሪን አሲሰን መክሳህኑተ ልግብ ብረ ደአታገ አእኖት እቅ።

25 ህካን እኮቤቹሃ እሲን ህኪ ብረ አታ መነለከ ህትን ሆጉተ አታእረ ጭምእዕይ «ኮ መነ! ነኡ ብረ ደአናሚሁ ከን ሆጎን አሁሰ ደገነንተ።

26 ህትን ኩ ጳዔሎሰ መን አንገን መኪ ምሰለ ሸርኬተበኤ የን ጠለዕል ኤፌሶን ከተማን አሁሰን ቀዋ ባድ ቤሉ እስይ ባድን ጉዕማንን ልግቡ መኑ አመዕናገ እኡስለከ ሉሲሱሰ አዕኑን ገውንኩክዕኔ ለኤንታሃለከ ሞጮጭቲታሃን።

27 ህካን እኮቤቹሃ ጠለዕል ኒ ሆጉት ህንቀንቶኢተ እኩዕነ እስይ ባድ መኑ ጉዕሙንኩ ኢዲንያ አል መኑ ሰገደኖ ሎረ ሕርጤምሴ» ዬኖ ሜአ መገን ምኑ ኦነ አክ ፈቀኖ፤ ህትን እሴ ኬዕምኙሴ ቫረሞንከሰበእንደ?» ዬሰ።

28 እሰን ህካን ሞጮጭቶ ወክት አበ ኡሙዕርት «ኤፌሶን ከተም አርጤምሰ ሎረታን» ይተን ያርቶኡ።

29 ህካን እኮቤቹሃ ኤፌሶን ከተማን ልግቡ ብተት እካን መቁደን ባዲቶ አሜቶ ጳዔሎሴ ጃለተ ጋኖሲለክ አርሰጣርኮሴ እኛ ጎሾሸተን ኡመቱ ጭምየኖ ቤቹ ሚጡበ እክ ደጉደን አሚቶኡ።

30 ጳዔሎሰ ህኪን ጭምዬ መንቤቹ መርተ ሃዕላቸረ አሳበት ከንቶሰ።

31 እሰይ ባድ ገሻኖቶ ጳዔሎሴ ጃለተ እኮእሩ ጳዔሎሴቤቹ ሶክ መኑ ጭምዬ ቤቹ መረናበአገ ኡጭቶኡ።

32 ኡመትሰ በላን አበ ብተት እኮቤቹሃ መቱ መቱርቹንከ ህትን ሞሉንገ ሞሉርቹ የን ያረናት፤ እኩጎሬ ልግቡሰ ሚሃ ጭምዶቶ ጎሬ ደጎበእ እቅ።

33 መትመቱ አይሁድ አድሩ «አለክሰንድሬ» ዬኖ መንቹ ኡመት በሊቶ ህንበልተን መን ብርተ ፉሸቶኡ፤ ኡመት በሊቶ መት-መቱሰ ጡመገ ኦደሰተ ሸዞሰ፤ አለክሰንድርን ኡመቱ ጨላ የተ አንገሰ ቀቀሽ ኦደኖ ጠወ ጠወኦተ ቅጥዬእ።

34 ጠወ እኩጎሬ እሰክንድር አይሁድቹ አሁሰ አሰ ደጎ ወክት «ኤፌሶን ከተም አርጤምሰ ሎረታን» ይተን ለሙ ሳኑት አሁኖ ጌሰ ጉዕሙንኩሰ ሚጡበ እክ ያርቶኡ።

35 ህትን ኤፌሶን ከተም ሞኑ ከተባንቹ ኡመት ሰዕምየኖገ አዕይ «ኤፌሶን ከተም መነ! ኤፌሶን ከተም መኑ ሎረ ሕርጤምሴ» ሜአ ሸርኬተ ሰገደኖ ምኒለክ ሰሚቶ ድሬኢሃ ጠለላ ክኑ አገርታእረ አሁሰ ጉዕመ ቤቶንን ደገሞኡ።

36 ህካን እኮቤቹሃ ካን ለገአኖሁ ሃዕባሃ አሁሰ ደገንታቶ ሰዕምዬ ቤሉ መቱርቹሃ ደዕልቲን አቶኖቹ።

37 መሰንትሰ አዕኑ አርጥምሴ ምኒ ኦዳተ ሞግትበረላክ እሴተ ቦርርትበ መነ ኤፌን ከቤቹ አሚቲንታእ።

38 ህትን ዳሚጥሮሰለክ እሲን ሚጡበ ብረ ሸልሰ መክሰኛ መንቹ የ ጎሬ ኦዲን፤ ፈረዴኖ በሩለክ ኦዳገ አታ ዳኛኑት ህኪኔ የቤቹሃ ኦዲን።

39 እኩጎሬ ሞሉ ሀሴንንተ ጠወ የ ጎሬ ሕግ ኦገቲን ለእኖ።

40 ህካን አህበጎሬ ነኡ ሕበር እኮ ጠዋ ብተተ ኬሶአረ ዬን ኦዴኖኔበአገ ዋጅናም፤ መሰንትሰ ስኩ ብተት ኬኢኢሁ መርቹሃን ዬን ጠዕሚመኔ ጎሬ ይናምርቹ የበእ» ይቶኡ።

41 እሰ ህካን ጠወዕዮቶ ኤተሮን ኦገቶ መኑ ብንየኖገ አዕየ።

20

ጳዔሎሰ መቁደንለክ ግርክ ባዲ ኦርዕዮገ

1 ብተተ ኡርቶቶ ኤተሮን ጳዔሎሰ አመዕናኑተ ሚጡበ ገእ ሸቸየ «ወገሬቲን ሃዕዬ» ይ ሜቁደን ባዲ ኦርዕዮ።

2 እሰን ህኪን ባዲን ህገን አመዕናኑተ ልግቤ ሸዘናን ጠረኝሰን ግርክ ባዲ ኦርዕዮ።

3 ህኪንቤቶንን ጳዔሎሰ ሰሱ አገን ዲንኪቶ ኤተሮን መርከባን ሶርይ ባዲ መርተ ሰውዬእ፤ እኩጎሬ አይሁድ መኑ እሰ አሊን ተንኩተ አቶተ ሰውዬቶገ ደጎ ወክት ሚቁደን ባዲን ህጎተ ሰውዬእ።

4 እሲን ሚጡበ ሃኦእሩ ቤርይ ከተም ጵርሁሴ ቤቱ ሶጳጥሮሰ፤ ተሰለዮኖ ከተም መንቶ አርሰጥሮሰለክ ሰኩዲሰ፤ ደርቤ ከተሚቶ ጋይየሰ፤ እሰይ ባድ ቲኪቆሰለክ ጥሮፊምሰ ህትን ጠግቶሰ እሳን ሚጡበ ሃዕዮ እቅ።

5 እሰን ብርተ ህግ ጢርኢድ ከተማን አገርቶኡ።

6 ጠወ እኩጎሬ ነኡ ጦሮሹ እቲን ከበጄኖ ከበጀቲቶ ኤተሮን ፍልጵሰዬሰ ከተመ መርከባን ኦንግ ኦንትቅ በር ጢርኢድ ከተመ አሰቤቹ ኢዳኖም፤ ህኪን ቤቶን ለመለ በር ዲንክናም።

ጳዔሎሰ መጨረሻን ጥርኢድ ኦርዕዮገ

* 19:24 አርጤምሴ- የ ኤፌሶን ከተማን ሸርኬተ መገንቹ።

7 ሳምንት ወዕኔ በሬን * ጭምድናምህንን ጳውሎስ ለንክ በር ገሰመ ሆሎቤቹ መረናቤቹሃ ህክኔ ሃዕዮ መኒሃ ጠውኤ ጀመር፤ እስ ጠወሰ ጠወኦንን ህንከዕሬ ሜራራ እኮ።

8 ነኤ ጭምድናም ፋቅ ምንን ልግቡ መብራቱ ሃዕዮ እቅ።

9 ኢውጢኪስ ዩኖ ሙቱ ዋደልቹ መንቹ መሰከት ኦሊን እፋዕልዮ እቅ፤ ጳውሎስ ጠወ ቅራርሴሃን ሁኩ ዋደልቹ እብ ግሾቤቹሃ ሰቅ ፋቂቶ ዋር ዋል ኡቦ፤ ሙኮ ኬሰና ወክት ሬዮ እቅ።

10 ጠወ እኮጎሬ ጳውሎስ ድር ዋደልቹ ኦሊን ሙግይ አንገንከስ ሆንቀና «ሀልቆናቹ ፎሊን ዮኡ» ዩሰ።

11 ጳውሎስ ፋቅ አል ፈንቀል ፋል እሳንን እቸተ ሜጡብ እች ኡለት ሶዞተ ኢሊ ኩሎች ኤተሮን ኦርዕዮ።

12 ህትን እስ ፈዬ ዋደልቹ ምኒ ኦኦት መርት እብ ሙንደእ ሙት-ሙቱስ ጠረኝሶኡ።

ጳውሎስ ጢርኣዲች ሚሊጢተ ኦርዕዮግ

13 ጳውሎሴ ቶንግ ህርሲንሶተ ሃጭን መርከባን ኦንግ አሶስ መርኖም፤ መሰንትስ እስ ህክ ከተመ ሎከ መርተ ሆሽ ነኤ ህት እዕናተ እዘኩኖቤቹሃት።

14 ህትን ነኤ እሲን አሶስ ከተማን ደቀም እሱ ቶንግ መርከባን ኦንግን ሚጢሊኒ ከተመ መርኖም።

15 ነኤ ለንክ በር መርከባን ኦንግ ዊን ረቦንቶ «ኪዮሴ» ዩናቤቹ ኢልኖም፤ ህትን ለንክ በር «ሳምስ» መድን ህንግ ሰቅ በር ሚሊጢ ከተመ ኢልኖም።

16 ጳውሎስ እስይ ባደን ልግብ ወክት ዲንኩዕን ኤፊሶን ከተመ አጉር ህጎተ ሆሾ፤ መሰንትስ አታልሲሾሰጎሬ ጸንጠቆሰጤ ከበጀት ዩሩሳሌም ከተማን ከበጀተ ሆሾቤቹሃት እቅ።

ኤፊሶን ከተም አመዕናና ባልቃተ ጳውሎስ ጠወዕዮ መጨረሽ ጠውተኒሃ

17 ጳውሎስ ሚሊጢን ከተሚች መን ሶክ ኤፊሶን አመዕናና ባልቀተ ገእሲሾ።

18 እሲን አሰብ ኦሜቶ ወክት «እን እስይ ባደ መር አፋዕሌም በሬች ጀመር ጉዕመ ወክትንከ በላንከክዕኔ ህት እክ ሃዕዮምጎሬ አዕኑ ገወክዕኔ ደገነንተ።

19 ህትን ኢይሁድ ሂለ ሰውት መሳን ኦርጨቀምጎሬ ጉዕመንከ አታለን ገውእ ሙግ እዕይ እንጅጅእን ቀርቹ ካደማም እቅ።

20 አገትቤቸን እኮ ምኒች ምኒ ሃመን ተማርሳም ወክት ደግላለና ሀዕኔሃ ጉዕመንከ ኩሎንክዕኔ ቤሉ መቲርቹሃ ኩሎዕን ፈሾምበእ።

21 ኢይሁድ ሙኮለከ ግርክ ሙኮ ጨብችሰ ቶበት መገን አደ ፈንቀልት ቀርቾ ኢሳን አመዕንቶተ ኩሎንሰ።

22 ጠሊሊ አያንን እዘዘም ዩሩሳሌም ከተመ መሬሚት፤ ህከን ቤቸን መ እህም ጎሬ ደጎምበእ።

23 ጠወ እኮጎሬ ኡሶረረሙለከ ኦርሸት አልታኤገ ከተማን ጉዕማንን ጠሊሊ አያኑ ኩሎኤ እቅ።

24 እኮጎሬ እን ቀርቾ እሲች ቶሳም ሆጉተ ሹሎተ ኢሊ ገይኤ ፎሊሃ አመዛምበእ፤ እሲን መገን እስቱተ ተሸት ላገተ ኩሎሃን።

25 «ህትን ከበሬ ኢሎተ ኢሊ ክዕኔ ጉዕምክዕኔ በላን ፈንቀላመን መገን ምግንትተኔሃ ተማርሳንክዕኔ፤ ከኒች ኤተሮን ክዕኔ በሊች አይሁ ለአናኤበእገ ደጋም።

26 ህግን እኩቤቹሃ ክዕኔ በሊች ሙቱ መንቹ በዕዮ እቃ ሩበት እህንክዕኔበእገ ኩሎንክዕኔ።

27 መሰንትስ መገን ሰወት ጉዕመንከ ኩሎንክዕኔ ቤሉ ኩሎዕን ፈሾምርቹ መቲርቹህ ዮበእ።

28 መገን ገይሰ ቤት ቁገን ዋኩህዕኔ አመዕናና ጭምት አገርቶናተ ጠሊሊ አያንን ክዕኔተ ዜማንቹ አዕይ መጠሮህዕኔ መገን ሆላ ዜሜሃለከ ገይሃክዕኔ አገዕርዬ።

29 እን ኦርዕዮሚች ኤተሮን መገን ሆላ ዜሜሃ አሙዝቡ ሆላገ ጎደበ ጠረኛኑት ሃሉ ሙኮ ኦሜት ክዕኔ በሊ ኦጋገ ደጋም።

30 ህትን ሙት-ሙቱ ሙኮ ክዕኔ ገይክዕኔ በሊች ኬእ ሉሲሰና ትምርት ተማርሰተን ልግብ አመዕናተ እስ አደ ፈንቀሽታኦ።

31 ህግን እኩቤቹሃ እን ጉዕማንከ መኒሃ ህንከዕርተለከ በራሃ እንጅጅተ ዲንን ሰሱ ዘማን ሸኩንክዕኔገ ቃገንን አገዕርዬ።

32 «ህትን ቲሁ መገንሂላከ ጉዕመንከ ጠሊሊና በላን ጠረኝሰናህዕኔ መገን ርሰተ ኦሶተ አታለና እሰቶ ላጋተ ኤገተ ኦሰኖንክዕኔ።

33 እን እዩ ብረ ህከረንገ ዋርቀ ህከረንገ ኦድኑተ ሃዕላቸምበእ።

34 ኤሳሃለከ እን ሜጡብ ዮሁኤተ ሀሰሰናርቹ አንጋንከኤ እክን ደግላሎምግ አዕኑ ገወንኩክዕኔ ደገነንተ።

35 ኦኦናህኒች በትሽ ኦሰናሁ ማሰአምእሃን ዩ ገይሰ ቀርቾ ኢሰ ላገተ ቃገን አንጋንከኔ አዕን ሆንሁኑተ ደግላሉ ሀሰሰና ኢሁስ ልግብያ ዋቁን ለሊሾንክዕኔ» ዩሰ።

36 ጳውሎስ ህግን ጠወዕዮች ኤተሮን ጉዕሚንከስ ጉሉጵ ዲኦ አዕዮ።

* **20:7** እቸተ ሜጡብ እንቶተ- ዮና ግሪክ መጻፈጎ ጦርሹ ቢጡ ዮና፤ ፍሳሰ ቀርቻ ሀርባት ዩ እህተ አታለና። **20:24** 2 ጠዋ. 4፣7።

37 እሰ ጉዕሙንኩሰ ኦእን ጳወሎሴ ሀንቀፍ ሱንቅቶኡ።
 38 በትሰ እበ ቫዞ መሰት «ከኒች ኤተሮን ለንኪሃ እልኤ ለኦናተ ሆሮን አጋልቴገተበእ» ዩሰቤቺሃት አቅ፤ እሰን መርከቡ ዮ ቤቹ ኢሎተ ኢሊ ሀርሲሶስ።

21

ጳወሎሰ ዩሩሳሌመ ኦርዕዮገ

1 አሳች መለዕለምሚች ኤተሮን መርከባን ኣንግ ገጥይን «ቆሰ» ዩዮ ባዱ መርናም፤ ህትን ለንክሰ በር ዊን ረበንቶ «ሩደ» ኢልናም፤ ህከንቤቺቻ ኬዕን «ጳጥራ» ዩዮ ከተመ መርናም።

2 ህከን ቤቻን ፍንቁ ባዱ ኦርኦና መርከበ ደኣን እሰን ኣንግ መርናም።

3 ዊን ረበንቶ «ቆጵሮስ» ዩዮ ኡለተ ለኣን ጉረ ኦዲን አጉርን ሶርይ ባዱ መርን «ጥሮስ» ዩዮ ከተመ ኢልናም፤ ሁኩ ቤቹ መርከቢች ኦደተ ድሪሴሃን ቤቹ አቅ።

4 ህከን ቤቻን አመዕናኑተ ሀንሰ ደንጎም ወክት እሰቤቻን ለመለ በር ዱንክናም፤ እሳንከ ጠሊሉ እያኑ ለለቫንሰ «ጳወሎሴ! ዩሩሳሌም ከተመ መርቶት» ይት ኩልቶስ።

5 እኩጎረ ነኤ ህከን ቤቻን አገርናም ወክቱ ጎፋን ሃሞተ ኬዕናም፤ እሰ ጉዕሙንኩሰ ሚንቲንከሰለከ እላጎተሰ ሚጡበ ከተሚች ኦብል ኢሎተ ኢሊ ሀርሲሶኔ፤ ባር መዳን ጉሉጵን ዱኤ አዕናሚች ኤተሮን «ወገሬት ሂዕዬ» ይን አደ እንኩም።

6 ህከኒች ኤተሮን ነኤ መርከባን ኣንጎም፤ ህትን እሰን ምንሰ ፈንቀልት መርቶኡ።

7 ነኤ ጠርሲች ኬዕን «ጴጤሊማይሰ» ዩዮ ከተመ ኢልናም፤ ህከን ቤቻን አመዕናን ደቀም ወገሬትጨቀምሚች ኤተሮን እሳን መቼ በር አገርናም።

8 ለንክሰ በር አሳች መለዕለምሚች ኤተሮን ቁሳር ከተመ ኢልናም፤ ህከኔን መጠረጎቻ ለመላ ዱቆናች «ፍልጶሴ» ዩዮ መንች ምኒ ኣንግ እሰን ሚጡበ አፋዕልናም፤ ፍልጶሰን መገን ላገተ ተማርሰና አቅ።

9 እሰንከ ራገ ጠወኣ ሾልት ሀፍታኑት ሂኦሰ አቅ።

10 ህከን ቤቻን ልግብ በር አፋዕልናሚች ኤተሮን «አጋሶሴ» ዩዮ ነብዬቹ ይሁድ ባዱች እሚች።

11 ሁኩ ነብዬቹ ኒቤቹ እሚች ጳወሎሴ ኢቱተ ኣእ ገይሰ ሎከተለከ ገይሰ ኣንገተ ኡሱር «ጠሊሉ እያኑ ሕን ኢቶ መንቹ ዩሩሳሌማን ዮ አይሁዱ ህት ኡሱርት አይሁድ እህበ መን ኣንጋን ሆጎስ ኣታኤ ዮናት» ዩኡ።

12 ህከ ጠወ ሞጮጭናም ወክት ነኤለከ ህከኔ ሄኣ መኑሁ ጳወሎሴ «ዩሩሳሌመ መርቶት» ይን ኡጮናም።

13 እኩጎረ ጳወሎሰ «ህት ኦኤነን ኢ ቀልብ ሚ ዶርቴገንታት? ኣን ቀርቻ ኢሰተኔሃ ዩሩሳሌማን ኡሱርሙ አሁዕን ሬሆታ ቅጥ ይዮም» ይ ፈንቀሼኤ።

14 ጳወሎሰ ሸዘነኔ ቶጉ ግሶ ወክት «ቀርቹ ዩኢሁ እሁን» ይን አጉርናም።

15 ህከኒች ኤተሮን ነኤ ኦዳኔ ቅጥ አዕን ዩሩሳሌመ መርናም።

16 ህትን ቁሳር ከተማን ዮ አመዕናኑት መት-መቱ ኒን ሚጡበ እክ እሚቶኡ፤ እሰን ምናሶኔ ምኔን ፎሎጭናተ እሰ ምኒ መሰቶኔ፤ ሁኩ መንቹ ዊ በላን ዮ «ቆጵሮስ» ዩዮ ባደን ዱንክዮእሃ አመዕናንቹ አቅ።

ጳወሎሰ ያቁበ ለኦተ ዩሩሳሌመ ኦርዕዮገ

17 ነኤ ዩሩሳሌመ ኢልናም ወክት አመዕናኑት ሙንዲናን ቶጎኔ።

18 ለንክሰ በር ጳወሎሰ ኒን ሚጡበ እክ ያቁብቤቹ መርናም ወክት ጉዕሙንኩ ጭምት ምኒ ባልቁ ህከኔ ሄኡ አቅ።

19 ጳወሎሰ እሰንተ ወገሬትሾች ኤተሮን መገኑ አይሁድ እህበ መን በላን እሰ ክድማን አዕዮሃ መት-መቲን ኩሎስ።

20 ኢሰን ህካን ሞጮጭት መገኑ ገለትጭት «ኒ አመቤቶ ጳወሎሴ! አመዕንቶ ልግቡ ኩሚ መኑ አይሁድ በላን ሄኡሰለከ ጉዕሙንኩሰ ሕጊሃ አዘዘንታኢሃ እሁሰ አትን ደጋንት።

21 እሰን አት ሕይሁድ እህበ መን በላን ሄኡ አይሁዱ ጉዕሚንከ እለሰ ጡርከንትበገለከ ሴረ አገርትበገ ተማርሰተን ሙሰ ሕገ ቫርታገ አታንቲት ዩዮ ጠወ ሞጮጭቶኡ።

22 ህከረ ሙ አዕኑ? እሰ አት እሚቱክ ሀንቅንከ ሞጮጭታኡ።

23 ህካን አኮቤቺሃ ነኤ ይናሚሃ አእ፤ ኒ በላን ሁንዱር ኣጎ ሾሎ መኑ ዮኡ።

24 ከ መን እአት መርት እሳንን መገን ብሬን ገዉክ ነጠ አእ፤ እሰን ነጠ እኩተ ብረ አት ባትሰ፤ ህከኒች ኤተሮን ሙምሰ ሜዳኔ፤ ህካን አቶንትጎረ ኪተኔሃ ጠወኣም ጠወ ክዘብ እሁሰለከ አት ገዉክ ሕገ አገርተን ሄኣንትገ ጉዕሙንኩሰ ደጋኡ።

25 እኮጎሬ አይሁድ እህበ መን አዲኛ አመዕንቶአሩ ክትም ክትንጋን ንጆሾ እኾተ አጎጉትበአገ፤ ቁጉ አጎጉትበአገ፤ ለንገአ ሬዮ ለል ማላ እትበገለክ ዝነተ አትበገ አገገርቶተ ኢተቀምም ጠወሃ ደብዳቤን ከተንቦክዕ።» ይቶሱ።

26 ህከኒኛ ኤተርን ጳውሎስ ለንክ በር ህከ መን እኣ እሳንን ሜጡብ ነጠ እኩ፤ እሰን ሁኩ ሙኑ ሄንኩ ቡሩ ኢሎተ ኢላ ነጠ እክ አገርታጎሬ ህትን ገገዉስ ኣታ ሰደቀተ መ ወክት ኣታጎሬ ኤንኬዕንሶተ ዱእ ምኒ ኣጎ።

ጳውሎሴ መገን ምኒን አፌመገ

27 ለመሉ በሩ ጎፎተ እካን እስይ ባዲኛ አሜቶአሩ አይሁዱ ጳውሎሴ መገን ምኒን ለእ ኡመት ጉዕመንከ አድመተ እት አፎሰ።

28 እሰን «እስራኤል መነ! ሀዕልዬኔ! ከለዕዬ ኩ መንቹ ኡመትኔ፤ ሕንኤለክ ዱእ ምኒ ጥቅሽ ጉዕመንከ ቤቹ መረን ኡመት ተማርሰኖሃን፤ ሁኩንን ሆፊዕያንስ ግሪክ ባድ መነ ዱእ ምኒ ኣግሽ ፈየ እኩቤቹ ንጆሰሾአሃን» ይት ያርቶኡ።

29 እሰን ህካን ይቶኢሁ ሄጭት ጳውሎሴ ኤፌሶን ከተም ጥርፊሞሶንን ሜጡብ እክ ዬሩሳሌም ከተማን ዮኢሃ ለኦስቤቹሃ እሱ ዱእ ምኒ አፍ ኣጎሃ አጉጆሰቤቹሃት እቅ።

30 ከተሙሰ ጉዕመንኩ ለንቁቁእ፤ ህትን ሙኑ ጉዕመንኩ ሜጡብ እክ ደጉደን አሜት ጳውሎሴ ኣእት ጎሾሽተን ዱእ ምኒኛ አብል ፋሽቶሰ፤ ህከ ወክትንክ ዱእ ምኒ ኡሩት ጡፈንቶኡ።

31 ህትን እስ ጳውሎሴ ሽቶተ ሀሶ ወክት ሮም ባድ በገዝ ሀለቁሃ «ዬሩሳሌም ከተሙ ጉዕመንኩ ጨነቀንቶኡ» ዬኖ ዱዱቡ ሞጮጨሞ።

32 እሰን ህከ ወክት ወታደረለከ ጥቤ ሀለቁ ኣእ ደጉደን መንቤቹ ኢሊእ፤ ሁኩ ጳውሎሴ ኦልታአሩ በገዝ ሀለቀለክ ዋታደረ ለኦ ወክት ዋቀሩ አጉርቶኡ።

33 ህከ ወክትንከ ሀለቁ ኢል ኬዕይ ጳውሎሴ አፍሲሽ ለሞ ሰንሰለቲን ኡሱሬኖገ አዘኹ «ኩ መንቹ አይቶ? ህትን መርቹሃን አዕዮሁ» ይ ጠዕሜኡ።

34 መኒኛ ደሩስ መቱርቹ ደሩስ ህትን ዋሉርቹ ይተን ጨንጭቶቤቹሃ በገዝ ሀለቁ ሀንቅ እኩ ጠወ ደጎተ አታሉ ሆጎ ወክት ጳውሎሴ ምታደር ቀአተ መሰታጎገ አዘኹ።

35 ህከቤቹንከ መሴንን ጳውሎስ አል ፋሌኖ ቤቹ ኢሌ ወክት ኡመቱ አበ ኡሙዕር እስ አሌን አደገ ኢልሶተ ሀሶገ ደግ ዋታደሩ እሱ እጅት መሰቶሰ።

36 ሁኩ ልግቡ ኡመቱ «ሸዬ» ይተን ጨንጭተን ዘክሳሲት እቅ።

ጳውሎስ ኡመት ብሬን ገይሰተኔሃ ጠወዕዮገ

37 ጳውሎሴ ዋታደሩ ገልታቤቹ ኣግሶተ ሆንጠኮ ወክት ጳውሎስ በገዝ ሀለቁ «እን መቱርቹ ኩሎሃተ ፈቀደዕኔንደ?» ዬእ፤ ሁኩ በገዝ ሀለቁ «ግሪክ ባድ አፎሃ ደገንንደ?»

38 ግድን በሬን ብተተ ኬስለከ ሾሎ ኩሜ ሽብር ኬሶረ ኣእት ኡለ ኡድመ ሀንቶንቲ ግብጽ ባድ መንቹ አቴበአንደ?» ዬሰ።

39 ጳውሎስ በገዝ ሀለቁ « ኪልቅዬ ዬኖ ባድን ኤንኬዕንንቶ ጠርሴስ ከተማን አለሞምዮ አይሁድቹ፤ ሀዕይ ኡመቲሃ ጠወኦተ ወክት ኣሴኤ» ይ ኡጨሰ።

40 ህትን እስ ጠወኦተ ወክት ኣሰያንስ ጳውሎስ ጎትዬ ቤቹን ኡር ሙኑ ሰዕምዮተ ኣንጋንተሰ ቀቀሽ ሙኑ ጨለ ዬ ወክት አብራቆ መን አፎን መኒሃ ጠወኡ ጀመር።

22

1 ጳውሎስ «እመኤ ኡሱተለከ አናከኤ እን ኣሳንክዕኔ መሰለ ሞጮጭዬ» ዬእ።

2 እሰን እስ አብራቆ መን አፎን ጠወኣን ሞጮጭቶ ወክት ወዕኔኛን በትሰ ጨለ ይቶኡ፤

3 እሰን «እን ኪልቅይ ባድን ዮ ተርሴስ ከተማን አለሞምሃ አይሁድቹ፤ ተማርሚሁ ከን ዬሩሳሌም ከተማኒት፤ ተማርሴኤሁ ገማልያሌት፤ እሴኛ አናከኔ ሕገ ጠረኝሽ ተማርሚሁለክ ከበር አዕኑ ጉዕመንኩ ደንካንተገን መገኒሃ ቡብ ገዉእ እስ ካደማሚሃ መንቹ እቅ።

4 ኢስ ዋቃሃ አዋንታ መነ ጉዕመንከ ሪታኢሃ ኢላ ሽረን ጎንለክ ሜንቱ አፈን ኡሱር ምኒ ኣግሾምሃ እቅ።

5 ከን ሀንቅ አሁስ ቂስ አዋንሳኑትለክ አይሁድ ኦገት ባልቀት ጉዕመንኩ ኤሳሃ ሞሰክረተ፤ ደማሰቆ ከተማን ዮ ህከ መነ ኡሱር ዬሩሳሌመ ኤሶተለክ ቀጠአሲሶተ አታልሲሰኖኤ ደማሰቆን ዮ አይሁዲሃ ከተሰ ደብዳቤተ ቶጎሚሁ እሳኛት።

6 «እንን ደማሰቆ ከተመ መረን ኢሎተ ሆንጠኮምሀንከ መቱ በር ሌሆ ሰአት ጌሳን ድንገገቲን ሰሜኛ ሎሩ ኑሩ አዳንከኤ በለቆ።

7 ህትን ኡለ ኡብ ኤሳሃ ሳኦሌ! ሳኦሌ! ሚሃት ሸርታንቲኤት? ይታ ሳገት ሞጮጭም።

8 እንን ፈንቀሽ ቀርቶ እት አይቶ? ዬም፤ እሰን «አት ሸርታንቲኤ ናከሬት ኢሳት» ዬኤ።

9 እን ሜጡብ ሄኔአሩ ኑርሰ ለኦ ቤሉ አይ ጠወአኖኤት ጎሬ ላገሰ ሞጮጭቶብእ።

10 እንን ቀርቾ! መ አኤ? ዬም፤ ቀርቾንኩ ሕኤ ደማሰቆ ከተመ መር፤ አታንቲሁ ጉዕመንኩ ህከን ቤቾን ኩለመኖሃ ዬኤ።

11 ህከን ኑር በለቅ መሳን ለኦተ አታሉ ሆጎምቤቸሃ እን ሜጡብ ሄኔ መኑ አንገኤ አፍ መሰግ ደማሰቆ ከተመ ኢልሶኤ።

12 «ህከን ከተማን ህርንጌ ዬፍ መቱ መንቹ ሄዕዮ እቅ፤ ህከ መንቹንከ ደማሰቆ ከተማን ሄኔ አይሁዱ ጉዕመንኩ ገለትጭታሲሁ ሕገ ጡመገ አገረኖለከ አያኑ ዮሰዮ መንቹ እቅ።

13 እሰን ኢቤቹ አሜቻ መዳንከኤ ኡር ለመኤ ቤቶ ሳኦሉ! ቴሱ ለኤ ዬእ፤ እንን ህከ ወክትንከ ለኦተ አታሎም።

14 እሰን ሕናከኔ መገን ሰወት አት ደጎተ፤ ፈየ ለኦተለከ ላገሰ ሞጮጭቶተ ሄጭ መጠርሄ።

15 እሰን ለኦትለከ ሞጮጭቶንት ጠወ ጉዕመንከ መን ብሬን አሰተሄሃ ሞሰክር አኩታት።

16 ህከረ መ አገርታንቲት? ቴሱ ከኤ ሱዕመሰ ገእት ጠወቀም፤ ጩብኝክ ነጠ እህ ይ ኩሎኤ።

17 «ህከኒኝ ኤተሮን ህከ ዬሩሳሌመ ፈንቀል አሜቻሚቻ ኤተሮን መገን ሞኔን ዱኦ አእን መኖመተ ለዕዮም።

18 ቀርቾንኩ ኤላሃ ለልኤ ለት ኢተሄሃ ጠወኣንት ጠወሃ አሰ ቶጋበአቤቸሃ ዬሩሳሌሚቻ ደዕልት ፋል ዬኤ።

19 እንን ቀርቾ! ጭምት ምኒ ጉዕመንከ መረን ኪን አመዕኔ መነ ኦላምገለከ ኡሱራምገ አሰ ገወንኩሰ ደጋኤ።

20 ከላሃ ሞሰክር እክ ሄዕዮ አሰጥፋኖሴ ቄጉሰ ዱንቶ ወክት አን ጠዋንከሰ ኢተቀም ሸታ መን መዳን ኡር ኦድኑሰ አገራም እቅ ዬኤ።

21 ቀርቾንኩ ጭራሽ ዮ አይሁድ እህበ መንቤቹ ሶሃንኬቤቸሃ ከንቤቸኝ ከኤ ኦሮኤ ይ ኩሎኤ» ዬኤ።

ጳውሎስ ሮም ባድ መንቹ እሁስ ኩሎገ

22 እሰ ከ ጠወ ኩሎተ ኢላ ሞጮጭታሲት እቅ፤ እሰ ላገሰ ጎት አት «ህትናሙ መንቹ ፎሊን ሄኔ ሀሰሰኖሰበአቤቸሃ ዱንዮ አሊኝ ከም» ይት ያርቶኤ።

23 ህትን እሰን ያርተን ኦድኑሰ ኡጅተን ትበ ሰማ ዋሽት ብን አታኢት እቅ።

24 በገዛ ሀለቁንኩ ጳውሎሴ ወታደሩ ገልታቤቹ መሰታገ አዘዙ፤ ህትን እሰ አሊን መኑ ሚሃ ጨንጨኖገር ደጎተ «ኦልቴነን መረመሬ» ዬሰ።

25 ጠወ እኩጎሬ እሰ ጠፍሪን ጠረኝሰ ኡሱርቶ ወክት ጳውሎስ መዳንከሰ ዮ ጥቤ ሀለቅቹ «ሮም መንቹ ፍርዱ ዮበኢሃ ኦልቶኖተ ፈቀደሞሀዕኔንዶ?» ዬሰ።

26 ህከ ወክትንከ ጥቤ ሀለቁ ሞጮጭ በገዛ ሀለቅቤቹ መር «መ አቶታት? ኩ መንቹ ሮማውቸሃ» ዬኤ።

27 ሁኩ በገዛ ሀለቁንኩ ጳውሎሴቤቹ መር «ህንዴ ኩሎኤ! አት ሮማውቸሃ መንቹንዶ?» ይ ጠዕሜሰ፤ እሰን «ኤ! አን ሮማውቸሃ መንቹ» ዬኤ።

28 በገዛ ሀለቁንኩ ፈንቀሽ «አን ከ ሮማውቸ አሆተ ሀዕሬሚሁ አበ ብሪንት» ዬሰ ወክት ጳውሎስ ህትን «አን አለሞሚሁ ሮማውቸ እክት» ዬሰ።

29 ህካን እኩቤቸሃ ጳውሎሴ መረመርቶት ቅጥይቶሩ ህከ ወክትንከ እሲኝ አደ እኩኤ፤ በገዛ ሀለቁንኩ ጳውሎስ ሮም ባድ መንቹ እሁስ ደጎ ወክት ኡሱርሲሾሰቤቸሃ ዋጁእ።

ጳውሎስ አይሁድ ኦገት ብርተ ሆንጠኮገ

30 ለንከ በር ገሰመ በገዛ ሀለቁንኩ አይሁዱ ጳውሎሴ ከሰሰ መሰት መርቸሃንጎሬ ጠውሰ ህንቅ ደጎተ ሀሾቤቸሃ ቂስ አዎንሳኑትለከ ኦገት መነ ጉዕመንከ ጭምይታገ አዘዙ፤ እሰን ጳውሎሴኝ ሰንሰለተ ሂር ኡሱር ምኒኝ ኤቤኖገ አዕይ ብሬንከሰ ኡርሾ።

23

1 ህከኒኝ ኤተሮን ጳውሎስ አይሁድ ኦገት ባልቀተ ቱክ ይ ለዕይ «አመኤ ኦሶ! ከበሬ ኢሎተ ኢላ ጡመ ቀልቢን ጉዕሚንን መገን ብሬን ሄዕዮምሃን» ዬኤ።

2 ህትን ሎሩ ቂስቹ «ሀናንዮ» ዬኖሁ ጳውሎሴ መዳን ኡርቶአረ ጳውሎሴ አፎሰ ዋቀርታገ አዘዙ።

3 ህከ ወክትንከ ጳውሎስ ሀናንዮ «አት ለኤኖሄረ ጡመ አኑዳንቲሁ ቀልቡክ ሂሎ! ከላሃ መገኑ ዋቀረኖሄ፤ ሕገን ፈረዶተ አፋዕልት ሕጉ ዮበኢሃ ዋቀረኖኤተ አዘዘንዶ?» ዬሰ።

4 ህከኔ መዳንከሰ ኡርቶአረ ጳውሎሴ «መገን ሎረ ቂስቹ ቦርርተንንዶ?» ይቶሰ።

5 ህትን ጳውሎስ ፈንቀሽ «አመኤ ኦሶ! ሎረ ቂስቹ እሁስ ደጎምበኦ እቅ፤ መሰንትሰ ሕመትክ ገሽኖህን አሊን ሂላ ላገተ ጠወኦት» የመም ከተበሞኤ» ዬሰ።

6 ጠዉ እኩጎሬ ጳዉሎስ ህከን መኒች መት-መቱስ ሰዲቃውተ ህትን ሞሉስ ፈርሳውተ እሁስ ደግ «እመኤ ኦሶ! እን ፈርሳውቸሃን፤ እኑኤ ፈርሳውቸሃን፤ ቲሱ ፍርድቤቹ ሆንጠኮሚሁ ሬቶእሩ ሬሆች ኬእገ ተብሳሃ እዕዮምቤቸሃት» ይ ላገስ ጎት እዕይ ኦገት ባልቃተ ጠወዕዮ።

7 ጳዉሎስ ህካን ጠወዕዮ ወክት ፈርሳዌለከ ሰዲቃዌ በላን ብተት ኬእን ኦገቱስ ለሙ ቤቹ እኮ።
8 ሰዲቃውት «ሬዮ መኑ ሬሆች ኬእኖበእ፤ መላይከንት ዮበእ፤ እያኑንኩ ዮበእ» ይታእረ፤ ህትን ፈርሳውት «ሁኩን ጉዕሙንኩ ዮኡ» ይት አመዕንታእረ።

9 ህከ ወክት እበ ጨንጨንተ እኮ፤ ፈርሳዌ አዲች መገን ሕግ አስተማራች ኬእ «ነኡ ከን መንቸን ሂለ ጠወ መቱርቸሃ ደንጎምበእ፤ እያኑ ህከረንገ መላይከት ጠወኦሲሃ እሆኖ?» ይት ኦዶኤ።

10 ብተት በተእን መርቶ ወክት መኑ ጳዉሎስ ሀንፈጣሰበእገ በገዝ ሀለቁ ዋጅ ወታደረ «መርቱን ጳዉሎስ መን በለች ዋልቅሴን ዋታደሩ ገለኖቤቹ ኤቤ» ይ እዘኮ።

11 ለንክሰ በር ሀንከዕርተ ቀርቹ ጳዉሎስ መደን ኡር «ዬሩሳሌም ከተማን ኢተኔሃ መስከርቶንትገን ሮም ከተማኒ መስከሩ ሀሰሰኖቤቸሃ ዋጅቶት» ይሰ።

ጳዉሎስ ሺቶተ አማዕለሙስ

12 ለንክ በሬ ገሰመ አይሁዱ ጭምይት አማዕለንትኬእ «ጳዉሎስ ሸኖተ ኢለ እቸተ እንቱንከ፤ ሞሃ እንጉንከ» ይት ጤሌዕልቶኤ።

13 ህከን እድማን አማዕለንቶእሩ ሸይልቹ በተእኖሃ መነ እቅ።

14 ህትን እሰ ቂስ አምንሳኖበለከ ባልቀቤቹ መርትኬእ « ጳዉሎስ ሸኑዕናን መቱርቸሃ እንታምበኤ ይን ጤሌዕልኖም።

15 ህከኒሃ ቲሱ እዕኑ ኦገት ባልቃን ሚጡብ አማዕለንቱን መረመርኖም ጠዉ ዮኡ ይቲን ጳዉሎስ ኦል ሀለቁ ክዕኔቤቹ ኤቦተ ጠዕምዬ፤ እኩጎሬ ነኡ ክዕኔቤቹ ኢሉዕን ሂጭን ሸኖተ ቅጥይኖም» ይት ኩልቶሰ።

16 ጠዉ እኩጎሬ ጳዉሎስ አመቤቶ ቤቱ ህከ አማዕለንቶ ጠወ ሞጮጮ ወክት ዋታደሩ ገልታቤቹ መርኬዕይ ጳዉሎሲሃ ኩሎስ።

17 ህትን ጳዉሎስ ጥቤ ሀለቁ መቱ ገእ «ኩ ጨሉ በገዝ ሀለቂሃ ጠወእኖ ጠወ ዮሰቤቸሃ እሰቤቹ መስ» ይሰ።

18 ጥቤ ሀለቅቸንኩ ጨልሰ በገዝ ሀለቅቤቹ አኖ መር «ኩ ጨሉ ኩለኖ ጠዉ ዮሰቤቸሃ ኡሱር ሞኔን ዮ ጳዉሎስ ኤሳሃ ገእ ከ ጨል ኪቤቹ ኤቦተ ኡጭዮኤ» ይእ።

19 በገዝ ሀለቅንኩ ጨል እንገተ አኖ መድ ዋል «ኩልታንቲኤ ጠወ መርቸሃን?» ይ ገበለ ዋሽ ጠዕሚስ።

20 ሁኩ ጨሉንኩ «አይሁድ አምንሳኑት ጳዉሎስ ዋዕኔችን ባሳ ጠረኝስ መረመርቶተ ጋቲተ ኦገትቤቹ ሆንጠሀሰተ ኬሳሃ ጠዕምቶተ ኢተቀንቶኤ።

21 ጠዉ እኩጎሬ እት እሳሃ ኤኮ ይቶት፤ መስንትሰ እሰ ጳዉሎስ ሸቶተ ኢለ እቸተ እታበእገለከ ሞሃ አጋበእገ ጤሌዕልት ሸይልቹ በተእ መኑ ማጠንት አገርታኢት፤ ቲሱ እሰ አገርታኢሁ ጠለዕል ኪ መስለህት» ይእ።

22 በገዝ ሀለቅንኩ ህከ ጨል «ከ ጠወ ኤሳሃ ኩሉክ እዬሃ ጠወኑት» ይ ጨል ሀርሲቮ።

«ዕልክሴ» ዬኖ ባዱ ገሸኖ መንች ብርተ ጳዉሎስ ሆንጠሀሴመገ

23 ህከኒች ኤተሮን ኦል ሀለቅንኩ ጥቤ ሀለቃች ለሙ ገእ «ሀንከዕሬ ሰሶ ሳቲን ቂሳር ከተመ መርታ ለሚ ጥቤ ዋታደረ፤ ለመላዩ ፋሻንቸለከ ለሚ ጥቤ በገዝ መነ ቅጥእዕዬ።

24 ህትን ጳዉሎስ ቆጶኖ ገማሙ ቅጥ እቲን ባዱ ገሸኖ ፍልክሴበ ወገሬቲን ኢልሳሰገ እዕዬ» ይ እዘኮ።

25-26 ህትን እሰን «ቀላዶስ ሉሰዩሲች፤ እበ ከበጀንቶንት ባዱ ገሸታንት ዕልክሴ! ወገሬቲ ኬሳሃ እሁን!

27 ከ መንቸ አይሁዱ አኖ ሸቶተ እከንን እሰ ሮማውቹ እሁስ ደጎምቤቸሃ ዋታደርንከኤ መር ኢል ጡምሾንስ።

28 ህትን እሰን እሱ መ ወሳን ከሰሳሰጎሬ ደጎተ ኦገትሰቤቹ ሆንጠሀሸም እቅ።

29 እሰን እሱ ከሰሰኢሁ ገይሰ ሕግተኔሃ እሁስ ደጎም፤ ጠወ እኩጎሬ ሬሆተ ህከረንገ ኡሱረሚሃ ኢልሰኖ ጠወ መቱርቸሁ ዮበእ።

30 አይሁዱ ከ መንቸ ሸቶተ እድመተ እት አማዕለንቶገ ህከ ወክትንከ ሞጮጭ ኪቤቹ ሶኮም፤ ኦደን ሂኦ መኑንኩ ኪ ብሬን ኡደገ እዘኮም» ይ ሶኮ።

31 ህካን እኮቤቸሃ ዋታደሩ እዘዘንቶ ሃሌን ጳዉሎስ አኖ ሀንከዕሬን መስት «እንቲጳጥርሰ» ዬኖ ከተመ ኢልሶኤ።

32 ለንክ በሬ ገሰማ ጳውሎሴ ፋርሱተ ቆጶ መኒን ሜጡብ መረኖገ ኦት ወታደሩ አጉርት ገልታቤቹ ፈንቀልቶኦ::

33 ሁኩ ፋርሱተ ቆጶ መኒንኩ ቁሳር ከተመ ኢልሶ ወክት ደብዳቤተ ባዱ ገሸኖ ሀህነ ላት ጳውሎሴ ብሬንከሰ ኡርሶኦ::

34 ባዱ ገሸኖንኩ ደብዳቤተ አነበቦች ኤተሮን ጳውሎሴ «አት ሀከን ባድየ?» ይ ጠዕሜሰ፤ ኪልቅይ ባድ መንቹ እሁሰ ደጎ ወክት

35 «ከሰሳሄሩ አሜቶ ወክት ጠወክ ሞጭጫም» ዬሰ፤ ህትን ሄሮድሰ ግንብሲሾ ምም ግቤ ኣዜን አገርታሰገ አዕየ::

24

እይሁዱ ጳውሎሴ ፍልክሴ ብሬን ኦደገ

1 እንቶ በሬች ኤተሮን ሎሩ ቁሰቹ ሀሩንይ መት-መቶ ባልቃንለክ «ጠርጠሎሴ» ዬኖ ጠበቁን ሜጡብ ቁሳር ከተመ ኦርዕዮ፤ እሰ ጳውሎሴ ጠወ ባዱ ገሸኖ ፊልክሴ ብርተ ሆንጠህሰ ከሰሶኦ::

2-3 ህትን ጳውሎሴ ገኤን ኤቤመ ወክት ጠበቅቹ ጠርጠሎሴ «ከበጀንቶንት ፊልክሴ! ኪ መሳን ልግብ ወገሬት ደእኖም፤ ጡመገ ገሸንተክ ገይሃይ ሃዕር ጡመርቹ ደእኖም፤ ጡመ ሆጌኩ ጉዕመ ወክት ቶንጋሚህ አበ ገለትኒት::

4 ጠወ እኩጎሬ ወክትክ ቤሱዕናን ገበንቹን ኩላንኬ ጠወ መረርሰጭት ሞጭጭቶተ ኤጫንኬ::

5 ኩ መንቹ ኔሳሃ ሂላ ጥዘነተ እክ ዱንየ አሌን ጉዕማንን ዮ አይሁድ በላን ብተተ ኬሰን ሩዝራውያኑት ዬኖ ክዝብ ትምርት አምንሳኖች መቼሰ እሁሰ ደንጎም::

6 እሰን ዱአ ምኒ ንጃሲሶተ ሰውየን ደንጎ አንፍ [ሕግኔ ሃሊን ፈረንዶተ ሀንሶም አቅ::

7 ጠወ እኩጎሬ በገዝ ሀለቁ ሉሰዮሰ አሜች አንጋችኔ ምልቅሽ መሴኦ::

8 ከሰሳሩ ኪቤቹ አሜቶተ አዘዠገ ኩ ኒኤ ከሰንሶም ክሱ መርቹሃጎሬ አት ገወክ እሱ መረመርት ደጎተ አታልታንት» ዬእ::

9 እይሁዱ «ኩ ጠወ ጉዕመኅኩ ሀንቅሃን» ይት ክሳንከሰ ኢተቀንቶኦ::

ጳውሎሴ ፊልክሴ ብሬን ኦደገ

10 ገሻንቹ ፊልክሰ አንገሰ ቀቀሽ ጳውሎሴ ጠወአኖ ወክት ኣሴሃንሰ ጳውሎሴ «ልግቤ ዘማኒች ኪሸ ከን ኡመት አሊን ፍርድ ዳጅ እሁክ ደጎምቤቹሃ ኤሳሃ ከሰሶኦ ክሲሃ መከላከየ ኪቤቹ ሆንጠህሳም ወክት አበት መንዲትት ሞጭጫንታኦ::

11 እን ዬሩሰሌመ ሰገዶተ መርሚች ቶነ ለሞ በሬች በተአኖበእገ አት ገወንኩክ አጥራመቶተ አታልታንት::

12 እሰን ኤሳሃ መገን ምኔን ኦደንለክ ጭምት ምኔን ህከረንገ ከተማን ኡመት ጭምአዕይ ብተተ ኪሰን አፎኤበእ::

13 እኩጎሬ እሰ ኤሳሃ ኦደ ጠዋሃ ማሰረጀ ሆንጠህሶሄት አታልታበኦ::

14 ጠወ እኩጎሬ እን ካን ኩላንኬ፤ እሰ ክዝብየ ይታ አመዕነት ምቃሃ አኖኖኔ መገኒሃ ሰገዳም፤ ህትን ሕጋንለክ ነብያኖ መጻፉን ከተበሞሃ ጉዕመንክ አመዕናም::

15 እሰ ፊያኑትለክ ጨበኛኑት ሬሆች ኬኣአ ይት ተብሳሃ አታገን ኤሳሃ መገኖን ተብሶህ ዮኤ::

16 ህካን አኩቤቹሃ እን መገንለክ መን ብሬን ነጡ ሰውቱ ሄኦኦት ጉዕመ ወክት አጸማም::

17 ዬሩሳሌም ከተሚች ፋሎምች ልግብ ዘማን እኩች ኤተሮን ኢ ባድ መኒሃ ሀዕላም ብረለክ መገኒሃ ኣሰም ብረ አፍ ፈንቀል አሜቶም::

18 እን መገን ምኔን ነጠ አሄሩ ሴረ ሹሎሚሃ ለኦኤ ወክት ህከን ቤቸን እን ጭምዬ ኡመቱለክ ብተት ዮበኦ አቅ::

19 ጠወ እኩጎሬ እሰየ ዬኖ ባዲች አሜቶ እይሁዱ ህከን ቤቸን ሄኦኦ፤ እሰ ኤሳሃ ከሰሳ ጠወ ዮሰጎሬ ኪ ብርተ ሆንጠክ ጠወኡ አታልታኦ::

20 ህከረንጋ ኦገት ብርተ ሆንጠኩም ወክት አዕዮንሰ ጠወ ዮ ጎሬ ህንዴ ኩ መኑ ኩልቱን::

21 ህንቅክ በላንከሰ ኡር ሎረ ላጋን «ሬቶአሩ ሬሆች ኬኣአ ይ ጠወዕዮምህኒሃ ከበር ብርክዕኔ ሆንጠኩም» ይ ጠወዕዮምቤሉ ምሉ አዕዮም ጠወ መቱርቹሆ ዮበኦ::

22 ጠወ እኩጎሬ ፍልክሰ አመዕነት ምቀሃ ደገኖቤቹሃ «በገዝ ሀለቁ ሉሰዮሰ አሜች ወክት እን ጠወክዕኔ ሹላም» ይ ዝኝተ ህግሾ::

23 እሰ ጳውሎሴ አገረኖ ጥቤ ሀለቁ «አበ ጨነቀዕነ አሙዘን ጡመገ አገርሰ፤ ጀላሰ ሀሰሰኖሰርቹ ኤባሰ ወክት ከንቶትሰ» ዬእ::

ጳውሎሴ ፊልክሴለክ ድሩሲላ ብርተ ሆንጠሁሰ

24 ቀወ በሬች ኤተሮን ፊልክስ «ዲሩሲላ» ዬዮ አይሁድኛ መንቻንተሰን ሜጡብ እክ አሜኛ፤ እስ ጳውሎሴ ገእሲሸ መሲህ አሳን አመዕንተኔሃ ጠወእንን ሞጭጭእ።

25 ህትን ጳውሎስ ፈይመተኔሃ፣ ገዉ አገሰርተኔሃለክ አሜተኖ ፍርድተኔሃ ኩሉኖ ወክት ፍልክስ ዋጅ «ቴሶተስ አሆኖኤ፤ ቴሱ መር! ሆሽም ወክት ገእሲሳንኤ» ዬእ።

26 ህከ ወክት ፍልክስ ጳውሎሴች ጉቡተ ኣኦተ ተብሳሃ አእናት እቅ፤ ህካን እኮቤቹሃ ልግብ ወክት ጳውሎሴ እስቤቹ ገእሲሰን ጠወሲሰሰናስ እቅ።

27 እኮጎሬ ለሞ ዘማኒች ኤተሮን ጳርቅዮስ ፊሰጦስ ፍልክሴ ቤቾን ገሸኖሃ እኮ፤ ፍልክስ አይሁድ ሙንዲሲሶተ ሆሽቤቹሃ ጳውሎሴ ኡሱር ምኔን አኑርሰ።

25

ጳውሎስ «ሮሞ ባድ ዎመቤቾን ይግባኝ» ዩሰ

1 ፊሰጦስ ገይሰ አዉራጃ አሜኛ ሰሶ በሬች ኤተሮን ቁሳርይ ከተሚኛ ዬሩሳሌመ ኦርዕዮ።

2 ህከን ቤቾን ፊሰጦስ ብሬን ቂስ ሀለቀትለክ አይሁድ ምኒ ሎርሎሩ አዎንሳኑት ጳውሎሴ ከሰሳ ጠወ ሆንጠሀሶእ።

3 እሰን ፍሰጦስ ጳውሎሴ ዬሩሳሌመ ፈንቀሾተ ኡጭቶኤ፤ ህካን ይቶ መሰት ዎቃን አገርት ሸቶተ ሀሰቤቹሃት።

4 ፍሰጦስን «ጳውሎስ ቁሳርይ ኡሱር ምኔን ዮኡ፤ እን ገዉእ ህከ ቤቹ ፈንቀል ደዕል መሪሞ።

5 ሹመክዕኔ እን ሜጡብ ቁሳርይ መርቱን፤ ጳውሎስ አዕዮ ሂሉርቹ ዮሰጎሬ ህከን ቤቾን ከሰሱን» ዩሰ።

6 ፊሰጦስ ህዜቱ ህከረንገ ቶኑ በሩ ኢሎተ ኢለ እስቤቾን አገርች ኤተሮን ቁሳርይ ባዱ ኦርዕዮ፤ ህከ ቤቹ ኢለ ለንክ በር ፍርድ ቦርጭማን አፋዕል ጳውሎሴ ሆንጠሀሳገ አዘዠ።

7 ህትን ጳውሎሴ ሮሞ ባድ ዎመ ሀለቅቤቹ ሆንጠሀሴመ ወክት ዬሩሳሌሚኛ አሜቶ አይሁድ ረብ ኡርት ምስክር ደጎተ አጎልቶብ ልግብ ጠረኝ ክስ ሆንጠሀሶእ።

8 ጳውሎስን «እን አይሁድ ሕጋን፣ መገን ምኔንለክ ሮሞ ዎመ አሌን አዕዮም ሂሉ ጠወ መቱርቹሀ ዮኤበእ» ይ ጠዕሜእ።

9 እኮጎሬ ፊሰጦስ አይሁድ መን ሙንዲሲሶተ ሆሽ ጳውሎሴ «ዬሩሳሌመ መርት ከ ጠወ ኢ ብሬን ፍርድ አእቶተ ሀሰንንደ?» ይ ጠዕሜእ።

10 ጳውሎስ «እን ፍርድ አኦተ ሀሰሰኖኤ ሮሞ ዎመ ሀለቅ አሌን ፍርድ ቦርጭመ ብሬን ኡርዮም፤ እኮጎሬ እት ገዉክ ጡመገ ደጋንትን አይሁዲሃ አዕዮም ሂሉርቹ መቱርቹሀ ዮበእ።

11 ህትን እን ቤሾም ጠወ ዮጎሬ ህከረንገ ሬሆተ አልሰኖኤ ብድል አዕዮምጎሬ ሬሆች ጡሞ ያምበእ፤ ጠወ እኮጎሬ እስ ከሰሳኤ ጠወ ክዝብ እኮጎሬ አይሁ ኤሳሃ ህግሽ አሶኤተ አጎላኖበእ፤ ሮሞ ባድ ዎመ አሌን ይግባኝ ይዮም» ዬእ።

12 ህከ ወክት ፊሰጦስ እስ አማሌ መኒን አማዕለም «እት ሮሞ ባድ ዎመ አሌን ይግባኝ ይቶንት ጎሬ ህከ ሮሞ ዎመቤቹንከ መርጋንት» ዩሰ።

ጳውሎስ አገሪጽለክ በርኒቄ ብርተ ሆንጠኮገ

13 ቀዎ በሬች ኤተሮን ዎሙ አገርጽለክ በርኒቄ ፍሰጦሴ «በባይ ወገሬቲን አሜት» ይቶተ ቁሳርይ መርቶኤ።

14 እሰን ህከን ቤቾን ልግብ በር አፋዕልቶቤቹሃ ፍሰጦስ ጳውሎሴ ጠወ ዎመ አገርጸሃ ኩሉን «ፍልክስ ኡሱርሲሾ መቱ መንቹ ኡሱር ምኔን ዮኡ።

15 ህትን እን ዬሩሳሌመ ሄዕዮም ወክት ቂስ ሀለቀትለክ አይሁድ ባልቄ እስተኔሃ ኩልቶች ኤተሮን አሌንከስ ፈረዶተ ጠዕምቶኤ።

16 ጠወ እኮጎሬ እን ሐስሳሞ መንቹ ከሰሾ መን ብሬን ኡር ከሰሰም ጠወሃ መከላከይ መሰሉ እስሙዕነ ከሰሰም መንቹ ህግሴን ኣሱር ሮሞ ባድ መኒሃ ሲረበኤ» ይ ፈንቀሺም።

17 ህካን እኮቤቹሃ ከሰሰ መኑ ጭምይት ከቤቹ አሜቶ ወክት እን አገረዕነ ለንክ በር ፍርድ ቦርጭመ አሌን ፈረዶተ አፋዕል ጳውሎሴ ሆንጠሀሳገ አዘዠም።

18 ሁኩ ከሰሰእሩ መዳስ ኡርቶ ወክት እን ኩ መንቹ ቤሾ ይ ሰውዬም ጌሰ እሱ ክሲሃ ኢልሰኖ ጠወ መቱርቹሃ ሆንጠሀሶበእ።

19 ጠወ እኮጎሬ እስ እሲን ኦደን ሄኦ ጠወ ገይሰ አመዕነትሰተኔሃለክ እኮጎሬ ሬዮ እቅ ጳውሎስ ፎልን ዮኤ» ይ ኢስተኔሃት።

20 ህትናሙ ጠወ አዮራመኛ ደጉ ኤሳሃ ኦርሾኤቤቹሃ ጳውሎሴ ዬሩሳሌመ መርት ህከን ቤቾን ፍርደክ ለእኖተ ሀሰንንደ» ይ ጠዕሜእ።

21 እኮጎሬ ጳውሎስ ኦደን ሄዕዮ ጠወ ሮሞ ባድ ዎማን ለአሞተ ሆሽ ሮሞ ባድ ዎሚሃ ይግባኝ ዮንከስ ህካጸ ሶሆሰተ ኢለ ኡሱር ምኔን አገረኖገ አዘዠም» ዬእ።

22 ህትን አግርጽ «እን ገወእ ኩ መንቹ ኩለን ሞጮጮተ ሀሳም» ዬ ወክት ፍሰጦሰ «ጋተ ሞጮጭታጎት» ዬእ።

23 ለንክ በር ገሰመ አግርጽለክ ቤርኒቅ ኬዕምኝ ኦድኑተ ኦደእ በገዝ ሀለቃኖንለክ ከተሞ ሎርሎረ መንጎ ሜጡብ እክ ፍርድ ምኒ ኣጎኦ፤ ህከኒቶ ኤተሮን ፍሰጦሰ ጳወሎሴ ገእሲሽ አሜተኖጎ አዕዮ።

24 ፍሰጦሰን «ዎመ አግርጸ! እዕኑ ኒን ከንቤቶን ሜጡብ ዮንተ መኑ ጉዕመንኩ! እይሁዱ ስኩ መንቹ ከኒቶ ኤተሮን ፎለጎ ሄኡ ሀሰሰኖሰበኤ ይተን አለሰ ፈረዶተ ዬሩሳሌማንለክ ከኔ ቁሳርያን ኤሳሃ ጠዕምቶ መንቹ ከኒቶ።

25 እን ጳወሎሴ እለን ሬሆተ ኢልሰኖ ጠወ ደጎምበእ፤ እኩጎሬ አሰ ገወሰ ርም ዎመ አለቂሃ ይግባኙ ዬቤቹሃ ሶህተ ወሰቹዎ።

26 እሁን ቤሉ እሰተነሃ ዎሚሃኤ ከተባም አጥራመቸም ጠወ ዮበእ፤ ህካን እኩቤቹሃ መረመረሞቻ ኤተሮን ከተባም ጠወ ደኤም ጎሬ ይ ብሬንከክዕኔ በትሸን ዎመ አግርጸ! ብርክ ሆንጠሀሾሞ።

27 መሰንትሰ ኡሱረሞ መንቹዎ መ ሀለቅቤቹ ሶሃኖ ወክት መንቹሰ ኦደሞ ጠወ ከተቤን ኤንኬዕንሱ ሆጌተ ገወመተ አጉጅ ለልዮኤ» ዬእ።

26

ጳወሎሴ ዎመ አግርጽ ብሬን ጠወዕዮጎ

1 ዎመ አግርጽ ጳወሎሴ «ገይክ ጠወ ጠወኦተ ወክቱ ኣሰሞሄ» ዬሰ፤ ህካን እኩቤቹሃ ጳወሎሴ አንገሰ ሂር

2 «ዎመ አግርጸ! እይሁዱ ከሰሶኤ ጠቂ ጉዕሚንክ ከበር ኪ ብሬን መሰለ ኣሳም ወክት አበ ተሸ ዮኖኤ።

3 መሰንትሰ አት አደ ደይሁድ ወገለክ ኦደሰ ጉዕመንክ አጥራመት ደጋንት፤ ህካን እኩቤቹሃ ኢ ጠወ አደበን ሞጮጭታጎትኤገ ኡጫንኩ።

4 «ኦሰማቶኤ ኬሽ ሀት እክ ሄዕዮምጎሬ እይሁዱ ጉዕመንኩ ደጋእ፤ ወዕኔቶ ኬሽ ገይኤ ኡመት በላንለክ ዬሩሳሌማን ሀት እክ ሄዕዮምጎሬ ሄኡኤ ደጋእ።

5 ህትን አሰ ኢ ጠወ ኩልቶተ ሀሶ ጎሬ አመዕነትንከኔ ዎጎ አገሪን አበ ጠረኘ ኦኩ ፈርሳሞ አዲሃ እሁኤ ወዕኔቶን ኬሰ ደጋእ።

6 እን ቴሁ ከኔ አለንከኤ ፈረደሞኤተ ኡራሚሁ መገኑ ኒ አበኖናተ ኣሴ ላጎ ተብሴሃት።

7 ሀከ ተብሳሃ ደኤሃ አሰራኤል ቶን ለመንኩ ደቡኔ ሀንከዕርተለክ በራሃ መገኒሃ ጠረኝት ሰገዳኤት እቅ፤ ዎመ አግርጸ! እይሁዱ ኤሳሃ ከሰሳኤሁ ከን መሳኒት።

8 መገኑ ሬዮ መን ሬሆቶ ኬሰኖ እሁሰ ክዕኔሃ ሀት አመዕነቱ ሆጋዕዮሀዕ፤

9 «እን ገወእ ናዘሬት ኢሰ ሱዕመ አታሎም ጌሲን ቶጉ ግቡ ጡመሃን ይ ሰወያም እቅ።

10 እን ዬሩሳሌማን አዕዮሚሁ ከኒት፤ እሰን ቁሰ ሀለቃቶ ቶጎም ደቸማን አመዕንቶ ወገሬት መን ኡሱር ሞኒ አግሾሞ፤ ህትን አሰንተ ሸተን ሸታሁኡን ሜጡብ አማዕለሞም።

11 እን ልግብ ወክት ጉዕመንክ ጭምት ሞኒ መረን ኦሌኖሰገለክ ቀርቶ ሱዕመ ቦርርታጎ አዕዮም፤ ህትን አሰ አለን ኡመዕር ዎሎ ባድ ከተመ ኢሎተ ኢለ መረን ሸራንሳት እቅ።»

ጳወሎሴ መገን አደ ፈንቀሉሰ ጠወዕዮጎ

(ሰቀ. 9፥1-19፤ 22፥6-16)

12 ህካን እኩቤቹሃ «እን ቁሰ ሀለቃቶ ዊመ ሹምነቱለክ ትዛዝ ቶግ ደማሰቆ ከተመ ኦርዕዮም።

13 ዎመ! እን ዎቃን ሃመን ዙር ሰኣት እኩ ወክቱን አር ኑራቶ በተአኖ ኑር ለዕዮም፤ ሁኩ ኑሩንኩ ኢለ እን ሜጡብ ሃመን ሄዕዮ መን መዴን ሰሜቶ በለቆ።

14 ነኡ ጉዕመንኩኔ ኡለ አለን ኡኩሰ አብራሞ መን አፎን ሳኦሌ! ሳኦሌ! ሚሃ ሸርታንቴኤት? ቦረተ አቡሬኖ ሱጡ ብረተን * ቀሴነን ጌጥ ይት ሃንትበጎር ሞርተኣንት ይታ ላጎተ ሞጮጮም።

15 አኒን ቀርቶ! አት አዬት? ዬም፤ ህትን ቀርቹንኩ ሕን አት ሸርታንቴኤ አሳት።

16 እኩገሬ ቴሱ ኬእ ሎካንከክ ኡር፤ እን ኬሳሃ ለሉንኬሁ ካዲንቹ እኩተ ህትን ለኣንት ጠዊሃለክ ብርተ ዋሽት ለኣንት ጠዊሃ ምሰክር እኩተ ሾሞሂታት።

17 እን እይሁድ ኡመት አንጋቻለክ ህትን እን ሶሃንኬ እይሁድ እክበ መን አንጋቻ ጡምሳንኬ።

18 አልሰ ፈንቶተለክ ቱንሰቹቶ ኑርቤቹ ፋሽቶሰተ ሸይጣን ዎልቃቶ መገን አደ ፈንቀሽቶሰተ አኣንኬ፤ አሰን ጨቡሰ ፈቀን ዮመመኖሰ፤ ህትን እን አመዕንት ኢረ እኩ መን በለቶ አሰ ርሰት ቤቀንታኤ ዬእ።

ጳወሎሴ ሆጎሰተነሃ ጠወኡሰ

19 «ህካን እኩቤቹሃ ዎመ አግርጸ! ሰሜቶ ኣሰንቶኤ መናመተ ቶጉ ግቦምበእ።

26:5 ሰቀ. 23፥6፤ ፍልጹ. 3፥5። 26:9 ሰቀ. 8፥3፤ 22፥4-5። * 26:14 ሱጡ ብረተን- ኒ ሴሪን ቦረተ ጮርቁን ገረፈንጎ አቡሬኖህንገን አሰራኤል መኑ ቦረተ አቡርጋኤሁ ሱጡ ብረተን ቀሰኒት።

20 ጠዉ እኮጎሬ እን ሃጭ ደማሰቆ ከተማን ሃዕዮ መኒሃ፣ ህከኒች ኤተሮን ዬሩሳሌም ከተማንለከ ይሁድ ባደን ሃእእሩ ጉዕሙንኩ ህትን አይሁደ እህቡ ሙኑ ጨብሰሰ ቶበት መገን አደ ፈንቀልታገ ተማርሴንሰ፤ ህትን ጨብሰሰ ቶበት ፈንቀሉሰ ለሊሳ ሆጉተ አታገ ተማርሴንሰ።

21 ህከን መሳን አይሁድ ሙኑ ኤሳሃ መገን ምኒን ሃዕዮምህንን አፍ ሸቶኤተ ሀሰኤ።

22 ጠዉ እኮጎሬ ከበሬ ኢሊ መገን ሀዕላንቹ ኢች አደ እኮበእ፤ ህካን እኮቤቺሃ እን ሎሪሃለከ ቀዋሃ ተማርሴን ከንቤቻን ዮም፤ ሙሲለከ ነብያከት ሃጭት ህት እህኖ ይቶአሃ ጠወዕዮምህንቤሉ ዋሉ መቲርቺሃ ጠወዕዮምሰእ።

23 ህኩ እሰ ጠወኤኢሁ መሲሁ ኦርሸተ ቶገኖ፤ ህትን ሬሆች ኬኢን ዋኔሃ እክ ጡም ኑር አሰራኤል መኒሃለከ አይሁድ እህቡ መኒሃ ለሊሰኖ ይቲት » ዬኢ።

24 ጳዉሎሰ ህት ጠወእንን ፍሰጦሰ «ጳዉሎሰ! ቲዕኑ በርገንጎት፤ ልግብ ተማሩክ በርገሽ አዕዮሄ» ይ ላገሰ ጎት አዕይ ጠወዕዮ።

25 ጠዉ እኮጎሬ ጳዉሎሰ «ከበጀንቶንት ፍሰጦሰ! እን ሀንቅለከ ሀቅቀተ እኮ ጠወ ጠወአሚት ቤሉ በርገሳምሰእ።

26 እን ብሬሰ ለሊሽ ጠወዕዮሚሃ ዋሙ ህከ ጠወ ደገኖ፤ ሁኩንን ማጠም አሰምባሃ እኮቤቺሃ ዋሙ ደገኖገ ተሬገጮም።

27 ዋሙ አግሬጳ! ነብያኑተ አመዕንታንትበእንደ? አት አመዕንታንትገ ደጋም» ይ ፈንቀሺኢ።

28 አግርጵ ጳዉሎሰ «አት ኤሳሃ ቀዋ ጌሳን መሲህ ኢሳን አመዕናምገ አቶኤተ ሰውይቶንት» ዬሰ።

29 ህትን ጳዉሎሰ «ገበንቺ ወክቲን እሁን ቁራዕር ወክቲን ኬሳሃ ጠለዕል አሁዕነ ከበር ኩላሚሃ ዋሙጨኖህ ጉዕሙንኩ ከን ኡሱረምኤ ቤሉ ዋሎርቻን ጉዕማንን አገ እኮተ ዱኤ አእም» ዬእ።

30 ህከኒች ኤተሮን ዋሙ፣ ባድ ገሻንቺለከ ቤርኒቅ አሳንን ሚጡቡ አፋዕልቶአሩ ጉዕሙንኩ ኬኦኦ።

31 አሰን ህከንቤቻች ኬአ መርተን «ኩ መንቺ ሬሆተ ህከረንገ ኡሱረሞተ ኢልሰኖሰ ጠወ መቲርቺሃ አዕዮበእ» የቀንቶኦ።

32 ህትን አግርጵ ፍሰጦሰ «ኩ መንቺ ሮም ባድ ዋሙ ዋም አሌን ይግባኘ ይዮበእቃን ህትን ገፈረመኖ እቅ» ዬእ።

27

ጳዉሎሰ ሮም ከተመ መርተ ኬኦሰ

1 ህከኒች ኤተሮን ጣልያን ባድ መርከብን መርኖተ ወሰነዋ ወክት እሰ ጳዉሎሰለከ ዋሉ መት-መቲ ኡሱረንቶአረ በርግተ ሮም ወታደር ኦዚን ሃዕዮ ይልዮሴ ዬኖ ጥቤ ሀለቅቺሃ ህገሰ ኣቶሰ።

2 አሰይ ባር መደን ዮ ባደን ሃዕዮ መርከብት ኡርታ ቤቼ መረኖ አድራሚጥዮን መርከባን ኣንግ መርኖም፤ ተሰሎንቄን ሃእኖ መቁደን ባድ መንቺ አርሰጥርኮሰ ኒን ሚጡቡ ሃዕዮ እቅ።

3 ነኡ ለንክ በር ሲደን ከተመ ኢልኖም፤ ይልዮሰ ጳዉሎሰ አመኩሰቤቺሃ ጀለሰቤቼ መር አሳቻ ሀሰሰኖርቼ ኤሶተ አዕዮሰ።

4 ነኡ ለንክ በር ቦብሩ ጠረኝ ቦብርሰን ሃሙ ከሞኔቤቺሃ ዊን ረበንቶ «ቆጵሮሰ» ዬኖ ኡላን ቲዕልን ባር አሌን መርከባን ሃሙ ጀመርኖም።

5 ክልቅይለከ ጵንፍልየ መደን ሃዕዮ ባረ ቶልኖሚች ኤተሮን ሊቅየ ባደን ሃእኖ «ሙራ» ዬኖ ከተመ ኢልኖም።

6 ጥቤ ሀለቁ ጣልያን ባድ መረኖ አለክሰንደሪ ከተም መርከብ ደግ እሶን ኣግሾኔ።

7 ነኡ ልግብ በር ሎድ ይን መርከን አበ ኦርሻን ቀኒደሰ ከተም መድ ኢልኖም፤ ቦብሩ ብርተ ዋልን ሃሙ ከሞኔቤቺሃ «ሰልሞኖ» ዬኖቤቺን ህንግ ዊን ረበንቶ «ቀርጤሴ» ዬኖ ኡላን ማጠም ኦርዕኖም።

8 ነኡ አበ ኣርሻን ገበል ገበለ ሃሙን ህንግ «ላሰየ» ዬኖ ከተም መደን ሃእ ጡመተ ዬኖ መርከቡ ኡረኖ ቤቼ ኢልኖም።

9 ዋቄኔ አሌን ልግቡ ወክቲ በዕዮቤቺሃለከ ሶመን በሩ * ህጎቤቺሃ ህከን ወክቲን ባር አሌን ሃሙ አበ ኦርሰኖቤቺሃ

10 ጳዉሎሰ «ኮ መነ! ከኒች ኤተሮን ዮኔ ዋቃን አበ ኦርሸት ዮኤሃ እሁሰ ለለኖኤት፤ ሁኩንን ሆጎንለከ መርከባን ኢልታ ኦርሸተ ጠለዕል አሁዕናን ኒ ገይኔ ነብሳን አቡ ኦርሸት ኢልቶተ አታልታኦ» ይ ጠረኝሽ ጠወዕዮ።

11 ጠዉ እኮጎሬ ጥቤ ሀለቅቺ ጳዉሎሰ ጠረኝሽ ጠወዕዮ ጠዊቻ በትሽ መርከብሰ ኦተአኖህንለከ መርከብሰ እኑ የኖሃ ዋሙጨኖት እቅ።

26:20 ሶቀ. 9፡20፤ 28-29። 26:23 አሳ. 42፡6፤ 49፡6፤ 1 ቆር. 15፡20። * 27:9 ሶመን በሩ፡- አይሁድ ሶመን በሩ ከበጀመኖሁ ጥቅምት እገናኒት፤ ሚዳተሪንያን ባር አዘጋገንቅዘለከ ጠን ወክቲ ጀመረኖሁ ህከን እገናን እኮቤቺሃ ሁኩ ወክቲ መርከባን ሃሚሃ አበ ኦርሰኖ።

12 ሁኩ መርከቡ ኡረኖ ቤቹ ከርም ህክኔ ህግሲሃ ጡሙ እህበቤቼሃ መኒች ልግቡሰ «ሃሚሃ አታልሲሾ ጎሪ ቅልብ ገርብገለክ ክአጳ ገርብ ኡረኖ ነ ፊንቄ ዌዳ ዊን ረቦዎ ቀርጤሳን ሄአኖ መርከቡ ኡረኖ ቤቹ ኢልን ከርም ህክኔ ህግንሶ» ይት እማልሰ ሆንጠህሶኡ።

ባር አሌን ኡንጉሉሎ ቦብሩ ኬኤሰ

13 ከአጳ ኡዲን ቦብሩ ሎድ ይ ቦብርሰን ለኦ ወክት እሰ ሰውይቶ ሃሊን እህኖሃ አጉጃንሰ መልሕቀ ኬሰ ሃንቶተ ኬኤኤ፤ ሁኩ መርከቡ ኡረኖቤቼች ኬአ ቀርጤሰ ኡለ ለቸን ህገኡ። †

14 ጠዌ እኩጎሪ ቀዎ ወክቲቶ ኤተሮን ቅልቢን ሸርቆ ኡንጉሉሉተ ዌኖ ጠረኛ ቦብሩ ዊን ረቦንቶ ኡላች ኬዕይ እሰ ኖ ቤቹ አሜቶ።

15 መርከብ ቦብሩ ህምቡሎቤቹሃለክ ቦብረሰ አታሉ ሆንጎምቤቹሃ ጨለ ይን ቦብሩ ህንበለኔ መርኖም።

16 ቀዎ ዊን ረቦንቶ ቄዳ ዌኖ ኡለ መዲን ህንግ መርከብ ሀዕላኖ ጀልባ እብ ኦርሻን ኡሱርን ኡርንሶተ አታልኖም።

17 መርከብ ኣዚን አታ መኔ ጀልባሰ ኣዘ ኣግሰ መርከብሰ ዊደሪን ኡሱርቶኡ፤ ህትን መርከብሰ ሊብዩ ባዲች አል አዲን ሄአኖ ሱርቲሰ ዌኖ ሸፋሩ ኖቤቸን ኡባባእገ ዋጅት ሸረ ድሪሰ ቦብሩ ህምቡሰን መርቶኡ።

18 ኒ ኣሌን ኡንጉሉሎ ቦብሩ ጠረኛን መርቤቹሃ መርከባን ሆንጎንቶ ኡዳተ መት-መቲን ለንክሰ በር ድሪሰ ባር ኣዚን ኡጁ ጀመርቶኡ።

19 እሰን ሰቅ በር መርከቢሃ ደግለልታ ኦዳተ ባር ዊ አሌን ኡጅቶኡ።

20 ልግብ በር ጠረኛ ቦብሩ ኬዕይ አሩለክ ቤዜተ ለኡ ከሞኔቤቹሃ ጡምናምበኣ ይን ተብሳሃ መርኖም።

21 መኔ እቸተ እቲዕነ ልግብ በር ዲንኬቤቹሃ ጳዉሎሰ በለሰ ኡር «ኮ መነ! ከኒች ብርተ ሸኩንክዕኔ ሸከነተ ሞጭጭቴን ዊን ረቦንቶ ቀርጤሰ ዌኖ ቤቼች ኬኤንታብ እቃን ኩ ኦርሸተለክ በኡ ኢለኖህዕይበኣ እቅ።

22 ቲህ መርከቡሰ በአኖ ቤሉ ክዕይች መትክዕኔ ነብሶህ በአኖበኣ፤ ዋጅቶኖቹ ይ ሸከንክዕኔ።

23 መሰንትሰ ህጎ ህንከዕርተ እን እሲሃ ጠገም ሰገዳም መገኑ ሶኮሰ መላይኪቹ መዲንከኣ ኡር

24 ጳዉሎሴ ዋጅቶት! ሮም ባድ ዋም ብሪን ኡሩ ኖሄ፤ ህትን ኪን ሚጡብ እክ ሃንታ መነ ጉዕመንከ መገኑ ከተኔሃ ይ ፊሆች ጡምሰኖ ይ ኩሎኡ።

25 ህንጎ እኮቤቹሃ መነ ዋጅቶኖቹ፤ መገኑ ኤሳሃ ኩሎኤርቹ እአኖገ አመዕናም።

26 እኩጎሪ ቦብሩ ህንበል መት ዊን ረቦንቶ ኡለተ መሰኖኔ» ይለ።

27 ቶን ሾልቅ በሬ ህንከዕሪን አድርያ ባር † አሌን ቦብሩ ህምቡሰን ህንከዕሪ በላን መርከብ ኦተኣኣሩ ኡለተ ኢልቶኤሃ አጉጃሰ።

28 ህንጎ እኮቤቹሃ እሰ ህክን ቤቼ ጥዕላሸመተ ዋደሪን ክኔ ኡሱርት ኣዘ ዋሽት ብክታ ወክት ህዚታ ይ ብኩተ እኮ፤ ህትን ቀዎ ወክቲቶ ኤተሮን ለንኪሃ ብክቶ ወክት ለሃወ ብኩተ እኮ።

29 ህንጎ እኮቤቹሃ መርከቡ ባር መዲን ኖ ክኖን ዋቀዕርባገ ዋጅት መርከብ ኡተር አዲን ሾሎ «ማልሕቀ» ዌኖ ብረት ባር ኣዚን ኡርሶኡ፤ ህከኒች ኤተሮን ኡለት ሶዛገ ዱኣ እቶኡ።

30 መርከብ ኦተኣ መኔ መርከቢች ፋልት ህንቶተ ሄዕላት መርከብ ብሬ አዲን ኖ «መልሕቀ» ዌኖርቹ ኡጅታኤሃ አጉድ መርከብ አሌን ሄዕኖ ጀልባ ባር አሌን ኡጅቶኡ።

31 ጳዉሎሰ ህንጎ ለዕኖ ወክት ጥቤ ሀለቅቹሃለክ ዋታደሪሃ «ኩ መርከብ ኦተኣኣሩ መርከብ ኣዚን ረጀይት አፋዕልትባች አዕኔ ጡምቶኖተ አታልቲነጎተበኣ» ይሰ።

32 ህንጎ እኮቤቹሃ ዋታደሩ ጀልባ ኡሱሬመ ዋደሩ ሙርት ባር አሊን ሃንታገ አቶኡ።

33 ኡለት ሶዛተ ሆንጠካን ጳዉሎሰ ጉዕሙንኩሰ እቸተ እቶተ «አዕኔ መት-መቲክዕኔ አገርቲን እቸተ እቶትዕነ ዲንክቲንታች ከበር ቶን ሾልቅኖ በር።

34 ህንጎ እኮቤቹሃ አዕኔ እቸተ እቶኖተ ኡጫንክዕኔ፤ እቸተ እቲንታች ጡምቲነጎተ፤ ክዕይ አሌን መት ኦርሸተ እካህዕይበኣ» ይ ኡጩሶ።

35 እሰ ህንጎ ዌች ኡተሮን ጣቢተ ኣእ ጉዕምሰ ብሪን ዱኣ አዕይ ቢጭ እቲ ጀመር።

36 ህንኒች ኡተሮን ጉዕሙንኩሰ ነሻጥ እቸተ እቶኡ፤ ህትን እሰን ገይሰ አንጋን ጣቢተ ኣኣት እቶኡ።

37 መርከብ ኣዚን ሄዕኖምሩ ጉዕሙንኩኔ ለም ጥብተ ለመላይኔ ሊሆ መነ እቅ።

38 እሰን እት ዱቦች ኤተሮን መርከቢሃ ኬዕመኖበኣገ አለሱ ባሪን ቶርቶኡ።

መርከቡ ቢጠሙሰ

39 እሰን ኡለት ሶዛን ኢልቶ ቤቹ ደጎበኣ፤ ጠወ እኩጎሪ ባር መዲን ኖ ሸፋር ኡለተ ለኡኤ፤ አታልቶ አቃ መርከብ ህክ ቤቹ ሆንጎጠህሶተ ሰውይቶኡ።

† 27:13 መልሕቀ- ዌ መርከቡ ኡረኖ ወክት ኡላን ካሰም መርከቡሰ ሃምባገ እአኖ ሎረ ብረት። ‡ 27:27 አድርያ ባሩ- የኖህ ሚድትራን ባሪች መቲሃሰ አደ

40 ህዳን እኩቤቺሃ እሰ መርከበ ኡርሳ መልሔቅ ዌደሩ ሙርት ኡጅቶኡ፤ ህትን መርከበሰ ጉረለከ መኬ እደ አእሃ ሀዕለኖ ዌደሩ ሂርቶኡ፤ ሸረሰ አሌ ዋሽት ኡሱርታን ቦብሩ ብርተ ዋሽ ሃንሲሰን ባራች ገበለ ዋል ሃመኖገ አቶኡ።

41 ጠዉ እኩጎሬ መርከቡ ናረም ሸፋራን ቆዕል ብሬ አደን ኡላን ካሰሞቤቺሃ ለንቄቅበገ እኩ፤ ህትን ኡተር አደን ዌ ሁሉ እሰ ህምበለኖቤቺሃ ቢጠሙ ጀመር።

42 ኡሱረንቶህኑኡች እዪሁ ባረ ዘከዕይ ፋሽዕበገ ዎታደሩ ሸቶተ አማዕለንቶኡ።

43 ጠዉ እኩጎሬ ጥቤ ሀለቅቹ ጳዕሎሴ ጡምሶተ ሀሽቤቺሃ ሰውትሰ ቶገበእ፤ ህዳን እኩቤቺሃ ዘከኡ አታላኖሁ እዪሁ መርከቢች ኮርጅ ድር ዘከዕይ ገበለ ፋለኖገ አዘዣ።

44 ፈቆሀኑኡች መቱ ጌሱ መርከቢች ቢጠሞህኒን ህከረንገ ዎሎርች አሌን እክ ፋልቶተ አዘዣን ጉዕሙንኩሰ ወገሬቲን ገበለ ፋልቶኡ።

28

ጳዕሎሰ ዊን ረበንቶ «ማልተ» ኢሉሰ

1 ነኡ ዊን ረበንቶ ኡለቤቹ ወገሬቲን ኢልኖሚች ኡተርን ሁኩ ኡለት «ማልተ» ዬን ገኤኖሃ እሁሰ ደንጎም።

2 ህከ ወክት ጤን ኡባን ቂዘ እኩቤቺሃ ህከን ዊን ረበንቶ ኡላን ሄኦኖ መኑ ጉዕሙንኩ ገረተ ቡሰት ጡመገ እት ኮህሶኔ።

3 ጳዕሎሰ ሁረ ጭምአዕይ ጌራን ዎር፤ ህከን ፋራን ኬዕኖ እኔን መቱ ዎሪቹ ፋል ጳዕሎሴ አንገሰ ከር።

4 ጳዕተ ዬኖ ኡላን ሄኦ መኑ ዎሪቹ ጳዕሎሴ አንገተ ከሩሰ ለኦ ወክት ገገዉንኩሰን «ኩ መንቹ ሀንቅንከ መን ሸኖአሃን፤ ባራች ወገሬቲን ፋሎጎሬሁ ፍርዲች ጡም ፎሊን ሄኦተ አታሎበኦ» የቀንቶኡ።

5 ጠዉ እኩጎሬ አንጋችሰ ዎሪቹ ግግሽ ጌራን ኡጅ ምርተኡዕን ፈቆ።

6 እሰ «አንገላንገን አሉሰ ደርሸኖ ህከረንገ ወክትንከሰ ኡብ ሪህኖ» ይት አገርታኢት እቅ፤ ጠዉ እኩጎሬ እሰ ልግሰ ወክት አገርትከኦ ምርተኡ ሆጉሰ ለኦ ሰውትሰ ደርት «ኩን መገኑሃን» ይቶኡ።

7 ህከን ሄዕኖም ቤቸን መዴን ዊን ረበም ባዱ ገሸኖ «ፑፕልኖሴ» ዬኖ መንቺሃ ኡለት ሄኦሰ እቅ፤ እሰን ምንሰ መሰ ሰሱ በር ጡመገ አዕይ ቶጎኔ።

8 ህከ ወክት ፑፕልኖሴ እነ ፋረትለከ ጎደብ ኦተዕይ ጥዣንሰ ኦሰዕኖ እቅ፤ ህዳን እኩቤቺሃ ጳዕሎሰ እሰ ምኒ ኦርዕይ አንገሰ አሉሰ አዕይ ዱኦ አዕያን ፈዬኦ።

9 ሁኩን እኩች ኡተርን ህከን ዊን ረበንቶ ባደን ሄኦ መኒች ዎሉ ጥዘናመት አሜት ጥዘናችሰ ፈይቶኡ።

10 እሰ ኔሳሃ ልግሰ ሸልማት ኡቤኔ፤ ከበጂሰ ለሊሶኔ፤ ነኡ መርከባን ኣንግ መርኖተ ኬዕኖም ወክት ኔሳሃ ሀሰሰኖርቹ መርከባን ሆጎቦኔ።

ጳዕሎሰ ማልታች ሮም አርዕዮገ

11 ሰሱ አገነ ዊ በላን «ማልተ» አገርኖሚች ኡተርን ከርም ህከኔ ዊን ረበም ባደን ዲንኬ አሌክሰንደር ከተም መርከባን ኣንግ ሃምተ ኬዕኖም፤ መርከብሰ አሌን «ዲኖሰቆርሰ» ዬኖ መልተ ሸርኬሃ ለም መላት ሄኦሰ እቅ።

12 «ሰራኩሰ» ዬኖ ከተመ ኢልን ሰሱ በር አፋዕልኖም።

13 ህከንቤቺች ባር መዴን ዘህን «ሬጊዩም» ዬኖቤቹ ኢልኖም፤ መቶ በሬች ኡተርን ከአጵ አደን ቡብረኖ ቡብረ ቡብረኖቤቺሃ ለንክሰ በር «ፑቲኖሎሰ» ዬኖቤቹ አሚንቶም።

14 ህከኔ ሄኦ አመሰናኖን ደቀም አሳንን ሜጡብ ለመለ በር ዲንክኖተ ኡጭቶኔ፤ ህከኒች ኡተርን ሮም ከተመ መርኖም።

15 ሮም ባድ አመሰናኖት ኒተኔሃ ሞጮጭቶ ወክት «አፍኖሰ» ዬኖ ጌቤበለክ «ሰሱ ኮሁ ገለኖ ምንት» ዬኖቤቹ ኢሉ ኔሳሃ ቶጎተ አሜቶኡ፤ ህዳን እኩቤቺሃ ጳዕሎሰ እሰተ ለዕኖ ወክት መገኑ ገለትጭ ጠረኝኦ።

ጳዕሎሰ ሮም ከተመ ኢሊገ

16 ነኡ ሮም ከተመ ኣንጎም ወክት ጳዕሎሴ ፋሽእበገ አገረኖ መቱ ዎታደርቹ ኣሴናንሰ ሜጢህሰ ሄኦኖገ እኢመሰ።

17 ሰሶ በሬች ኡተርን ጳዕሎሰ ሮም ከተማን ሄኦ አይሁድ ሎርሎረ መን ገእሲሸ፤ መኑሰ ጭምይቶ ወክት «አመኤ ኦሶ! እሰራኤል ኡመት አሌንለክ አናከኔ ሴር አሌን አዕኖም ብድሉ ኖብኦ፤ እሁን ቤሉ ዬሩሳሌም ከተማን ኡሱረኖምቤቺች ሮም መኒሃ ህግሴን ኣሲመኡ።

18 ሮም ባድ መኑ መረመርቶች ኡተርን ህትን ገፈርቶኡ ሰውይቶኡ፤ መሰንትሰ ኡሳሃ ሬሆተ ኢልሰኖኤ ጠዉ ሆጎቤቺሃት።

19 ጠወ እኩጎሬ አይሁዱ እን ህትን ገፈረሙ ግባ ወክት ሮሞ ባድ ሞም አሉን ይግባኛ ዩ ሀሰሾኤ ቤሉ ኢ ኡመት ከሰሳም ጠወ ዮኤበአ።

20 ህካን እኮቤቹሃ እን ክዕኔተ ለኦተለክ ክዕኔን ሜጡብ ጠወኦተ ጠዕምዮም፤ መሰንትሰ እን ሰንሰለቲን ኡሱረሞሚሁ አሰራኤልሃ እሰሞ ተብሰህት» ዬሰ።

21 እሰ ጳዉሎሴ «ከተኔሃ ኔሳሃ ይሁድ ባዲች ደብዳቤት ኢልቶኔበአ፤ ህትን ከበ አሜቶ መኒች አዩሁ ኪ ሂለ ጠወ ኩሎሁለክ ጠወዕዮሁ ዮበአ።

22 እኩጎሬ ነኡ አት አዎንታንት አመዕነቱ አደደ ቤቸን ዮ ሙኑ ቶጉ ግበኖገ ደንጋም፤ ህካን እኮቤቹሃ ኪ ሰውቱ መሃጎሬ ሞጮጭኖተ ሀንሳም» ይቶሰ።

23 ህካን እኮቤቹሃ እሰ ዘኝተ አፎች ኤተሮን ልግቡ ሙኑ እሰ ገለኖ ምንቤቹ አሜቶኡ፤ ጳዉሎሰን ገሰሚች ሀዎሩተ ኢለ መገን ሞምነትተኔሃ ዮሰ ሰውት ጠወዕዮ፤ ሙሰ ሕገችለክ ነብያክ መጻፊች አሰተኔሃ ኩሎሰ።

24 ህከኒች ኤተሮን መት-መቱሰ እሰ ጠወዕዮሰ ላገተ አመዕንቶኡ፤ እኩጎሬ መት-መቱሰ አመዕንቶበአ።

25 ህካን እኮቤቹሃ ገገዉንኩሰን ኢተቀንቱዕን አደ እኮገ ጳዉሎሰ ለዕዮ ወክት «ጠሊሉ አያኑ ነብዬች አሰያሴን አናካተክዕኔ ጠወዕዮሁ ሀንቅሃን።

26 « ህክ ኡመት ቤቹ መርትኬአ ሞጮጭሰ ሞጮጭቲንተ

ሆሮን ቶጌነንተበአ። ለኡሰ ለኤንተ እኩጎሬ ሆሮን አጥራመቲንተበአ።

27 መሰንትሰ ከን ኡመት ቀልቡ ዱጆኡ፤ መጨሰ ደንቅቶኡ፤ አልሰን ቆቆኡ፤

ህት እኮበአ እቃን አሊንከሰ ለእ መጫንከሰ ሞጮጭት ቀልቤንከሰ ሰውይት

ኢቤቹ ፈንቀልቶ እቃን አንን ፈይሳንሰ እቅ»

ዬእ። 28 «ቴሁ መገን ጡምሰ ሶህኑት አይሁድ አህበ መኒሃ ሶህንቶአተ አሁሰ ደጌ፤ ህትን እሰ ሞጮጭታአ»

ዬእ። 29 [«ጳዉሎሰ ህካን ጠወዕዮች ኤተሮን አይሁዱ አበ ኦደን ህከንቤቹች አጉርት ፋልቶኡ»]*

30 ጳዉሎሰ ኪር ምኔን ለሙ ዘማን ዊመ አፋዕሊእ፤ እሰቤቹ አሜተኖ መን ጉዕመንክ ኮህኝተ ቶገኖ እቅ።

31 ጳዉሎሰ መገን ሞምነትተኔሃ ኩሉን ቀርቾ መሲህ ኢሰተኔሃ አዩሁ ከሞሰበኢሃ መለል ተማርሰኖት እቅ።

28:19 ሶቀ. 25፤11። * 28:29 ወዕኔ ሉህ መጻፋን ዋሊንሽ 29 ዮኤሃ በርግታበአ።

ጳውሎስ ሮሜ መሪሃ ከተሶ ሶህኑተ ኣጉስ

ሶቀማንቻ ጳውሎስ ሶህኑተ ሮሜ መሪሃ ከተሶሞሁ ጳውሎስ ሮሜን ሄኣ ዱኣ ምነተ ለኑተ ያጅቤቺሃ ተቃጠብ ኣገርታገ ኣኣታተ። ጳውሎስ ያደተ ሮሜን ሄኣ ኣመዕናኖን ሜጡብ ቀዉ ጌሰ ኣዕዮቻ ኤተሮን ኣስ ሀዕልታንሰ ሰፒን ዬኖቤቹ መርታት ኣቅ፤ መሲህ ኢሳን ኣመዕነትኑሃ ደጎሃለክ ኣመዕናኑት ሄኣነከሰ ሆንጎ ለሊሱ ሀሰሰኖስ መሲህ ኢሳን ኣመዕን ትምርት መት-መቲን ከተሶኤ፤ ጳውሎስ ሶህኑተ ዊም ደገመኖሁ ከን ሶህናኒት።

ጳውሎስ ሮሜን ደገንታ ኣመዕናኖተ ወገሬትስ ህገሾችላክ ዱኣ ኣኣስተ ተብሳሃ ኣሲሳች ኤተሮን ሶህናስ ቡዕለ ኣኮ ጠዉ (1፡17) «መገኒች ደገመኖ ፈየ ኣሄን ኣመዕነቲን፤ ኣመዕነቲሃ ኣኮገ ኣንጂሊን ለልዮኡ» ይታ ላገተ ኣሁስ ለሊሰኖ።

ከኒች ኤተሮን ጳውሎስ ከ ሰውት ኣልባሽ ከተበኖ፤ ኣይሁድ መኑሁ ኣይሁድ ኣህቡ ጉዕሙንኩ ጨቢሃ ጠገንቶኣረ ኣኮቤቺሃ መገኒን ሀራዕራሚ ሀሰሰኖስ፤ መኑ ማገኒን ሀራዕራሚተ ኣታላኖሁ መሲህ ኢሲን ኣመዕናኒት፤ ህከን መገኒን ሜጡብ ኣከ ሃዕር ሜጦመ ላሉት ሃዕር ሄኡ ኣሁስ ጳውሎስ ኣልባሽ ኩሎኡ። ኣመዕናንቹ መገኒን ሜጡብ ወገሬቱ ሄኣኖስ፤ መገን ጠሊሊ ኣያኒን ጨብችላክ ሪሆ ዋልቃች ነጠ ፉሸኖ፤ ፎሎጭ 5 ከሽ 8 ኣሊ ጳውሎስ መገን ሕጉላክ ኣመዕናኖ ሄኡ ኣኣኖ መገን ኣያን ዋልቃ ኣላመሰሰ መሃገሬ ለሊሰኖ፤ ህከኒች ኤተሮን ጳውሎስ «መገን መሪሃ ዮስ ኣለመ ኣዜን ኣይሁዱሁ ኣይሁድ ኣህቡ መኑሁ ሆት ኣከ ሜጡ ኣኮተ ኣታልታኣ?» ዮኖ ጠዕምቶተ መሰለ ኣሰኖ።

ለንኪሃ ጳውሎስ ጠወዕዮገን ኣይሁድ መኑ ኢስ ቶጉዕነ ፈቁስ መገንተ ያደ፤ ሁኩንን ኣኮሁ መሲህ ኢስ ኣደን መገኑ ለልሾ ጡም ኣሰቱተ ጉዕመ መን ዘርተ ህንቀኖ ኣፊሃት። ኣሁን ቤሉ ኣይሁድ መኑ ኢስ ቶገ ወክቱ ኣሚተኖገ ጳውሎስ ኣመዕናኖ፤ መጨረሻን ጳውሎስ መሲህ ኢስ ኣመዕነት ሆት ኣከ ሄኡ ሀሰሰኖስገሬ በትሽን ኣመዕናኑት ገገዉንከሰ ኢተ ዋቃሃ ኣዋኑ ሀሰሰኖስገ ኩለኖ፤ መገኑ ካደምተኔሃ፤ ኣመዕናኑት ባዲሃሰለክ ገይህሳ ዮስ ኤገተ፤ መት-መቶ ጠውን ኬኣ ጠዕምቱተ ሂር ኩለኖ።

መጻፉስ ኣድሃ

- መጻፉስ ኣዜን ኣፎ ቡዕለ ኣኮ ሰውት (1፡1-17)
- ጡሙ መሪሃ ጉዕሚንከ ሀሰሰኖሃ ኣሁስ (1፡18—3፡20)
- መገን ጡም ዋቃሃ (3፡21—4፡25)
- መሲህ ኢሲን ደገመኖ ሃዕር ሄኡ (5፡1—8፡39)
- ኣስራኤል መኑ መገን ያዳን (9፡1—11፡36)
- ኣመዕናኑት ሆት ኣከ ሄኡ ሀሰሰኖሃ ኣሁስ (12፡1—15፡13)
- መጨረሻስ ሰውትላክ ወገሬት (15፡14—16፡27)

- 1 መሲህ ኢስ ካዲንቹ ኣኮ ሶቀም ሆነተ ገኣም መገን ኣንጂሊ ተማርሶተ መጠረሞ ጳውሎስች ሶሃሞሃ።
- 2 ሁኩንን ኣንጂሊ መገኑ ነብያኖን ጠሊሊ መጻፉን ሄጭ ኣሴ ተብሲታ ላገ።
- 3 ኩ ኣንጂሊንኩ ደውዳ ዘሬች ኣለም መንቹ ኣኮ ቤትሰተኔሃ ጠወኣኖ።
- 4 መገኑ ገውንኩስ ጠሊሊ ኣያን ዋልቃን ቀርቹኔ መሲህ ኢስ ሪሆች ከሽ ቤቱ ኣሁስ ዊመ ዋልቃን ደገሲሾ።
- 5 መሲህ ሱዕምተኔሃ ኣይሁድ ኣክበሩ ጉዕሙንኩ ኣመዕነቶተለክ ኣዘዘንታገ ኣኣሃ ኣስ መሳን ሶቀሚሃ ኣበቀኣኔ ኣሰቱተ ቶንጎም።
- 6 ህከን መገኒን ሜጡብ ኣዕኑሁ መሲህ ኢስረ ኣኮኖተ ገኣንቲንታኣረን።
- 7 መገኑ ኢቲህዕኔለክ ጠሊላኑተ ኣኮኖተ ገኣንቲንተ ሮም ከተማን ሄኣኑንተሩ ጉዕሙንኩክዕኔ ኣናኔ መገኒችላክ ቀርቹሃኔ መሲህ ኢሲች ኣሰቱትለክ ወገሬቱሁ ክዕኔኣህ ኣሁን።

ገለት ዱኣ

- 8 ኣመዕነቱክዕኔ ባደን ጉዕማንን ሞጫጨሞቤቺሃ ጉዕምክዕኔተኔንከ ሄጭ መሲህ ኢስ መሳን ጉዕሚክዕኔተኔሃ ኢ ቀርቹ መገኑኤ ገለትጫም።
- 9 ጉዕመ ወክት ዱኣ ኣኣን ቃጋንክዕኔገ ቤትሰተኔሃ ጠወኣኖ ኣንጂሊ ተማርሲን ዊመ ቀልብንከኤ ካደማም መገኑኤ ሞስክርሃን።
- 10 ቱሱ ኣበ ዱንኩሚች ኤተሮን መጨረሻን መገኑ ዬጎሬ ክዕኔቤቹ ኣሚቶተ ዋቆኤ ብዝ ዮተ ጉዕመ ወክት ዱኣ ኣኣም።
- 11 ኣመዕነቲን ጠረኝቲንተገ ኣኣኖህዕኔ ኣያን በረከተ ቤሆህዕኔተ ይ ለኦህዕኔተ ሀሳም።

- 12 ህት ዩሚንኩ እን ክዕኔ አመዕነቲን ለከ እዕኑሁ ኢ አመዕነቲን ገገጠንኩኔ ጠረኝ ጨቀመታት።
- 13 አመኤ ኦሶ! አይሁድ እህበ ዎሎ መንቢቶን ልግብ አቶተ ደጎምገን ህትን ክዕኔ በላን አቶተ ደጎተ ሀሾም አቶ፤ ጠጫ እኩጎሬ ክዕኔ ስቦቹ አሜቶተ ልግብ ወክት ያጅ ክበሬ ኢሊ መኩ ሆኑ ስ ደጎናተ ሀሳም።
- 14 ግርክ መኒሊከ ግርክ እህበ መኒሃ፣ ኢንኬዕናማተለከ ገወ መኒሃ ግዳጂ ዮኤ።
- 15 ህካን እኩቤቶሃ ክዕኔንከ ሮም ከተማን ዮንተ መኒሃ ተሸት ላገተ ተማርሶተ ሃዕላታም።

እንጂል ላገት መገን ዎልቀተ እሁሰ

- 16 እን እንጂል ላገት ሙላምበእ፤ ተሸት ላገት አይሁዲሃለከ ግርክ መኒሃ አመዕንታ መኒሃ ጉዕሚንከ መገን ወልቀት ፈይሲሃት።
- 17 ፈዩ መንቹ አመዕነቲን ሃኡ ደእኖ የመም ከተበምገን መገን መን ፈዩ እሁሰ ወለአኖሁ ዎዕኔኛ ኤተሩ ኢሊ ጠለዕል አመዕነቲን እሁሰ ህከን ተሸት ላገት ለሌኤ።

መን ሂልመተኔሃ

- 18 መኑ ሂልማንተሰ ህንቁ ለላኖበእን አታኦ፤ መገኑ ዎጅተበቤቶሃለከ ፈይመት ዮሰበእቤቶሃ እሰ አሌን መገን ኡሙዕርት ሰሜኛ አሚታኦ።
- 19 መሰንትሰ መገን ተኔሃ ደገመ። ሀሰሰኖሃ ጉዕመንከ መገኑ ለልሾሰቤቶሃ እሳሃ ኑር እክ ለልዮአሃን።
- 20 ኣዲንዮ አሉ ከለቀዎ በሬኛ ኬሽ መኒሃ ለላኖበእ መገን ሃሉ ሁኩንን ዘላለሚሃ ሃኣ ወልቀሰለከ ቀርቼ እሁሰ እሰ ከለቆ ጠው መሳን ዊመ እክ ለሌቤቶሃ መኑ ቤሳ ቤሲሃ መሰት ዮሰበእ።
- 21 ህትን እሰ መገኑ ደገን መገኑ እህሃሰ ሀሰሰኖ ኬዕምኣለከ እሱ ገለትጨ ግሶኤ፤ ሰውቱንኩሰ ተሰ አኮ፤ አጥረመትቡ ቀልቡሰ ቱንሰቹ እኮ።
- 22 «ነኤ ሀይቻኑተ» ይተንን ገዋኑተ እኮኤ።
- 23 ሃኢኖ መገኑ ከበጅታ ወጥ ሃኢበ መን ምሰሊሃ፣ ጭኑተ፣ ሾል ሎኮት ዮሰ ግዚሃለከ ኡሊ አሌን ጎሾሽንትኣ ግዝ ደኒን መክሲመ ምሰሊሃ ኬዕምኣ ኣቶኤ።
- 24 ህካን እኩቤቶሃ ገገጠንኩሰ ገይሰ ጅሰም አሌን ሙልሰኖርቹ አቶተ መገኑ ንጃሱ ዊሞ ሂሊ ሃዕላቻተሰ ጠገንቶረ እካገ ህግሽ ኣሴሰ።
- 25 ሁኩን እኩሁ መገን ሀንቅ ክዘበን ደርቶቤቶሃቲ፣ ካላቅ ወጥ ከለቀሞህኒሃ ሰገደቤቶሃለከ ካደንቶቤቶሃት፤ እኩጎሬ መገኑ ዘማኒሃ ጉዕሚንከ ገለትጨሞሃ እሁን፤ አሚዕን።
- 26 መኑ ህካን አቶ መሳን መገኑ ገበእበ ሙልሰኖ ሃዕላቻተሰ ህግሽ ኣሴሰ፤ ሚንቱሰ ሆሮ ጎንን ኦሰኤ አኩርት ርሰሞበእ ሃሌን ደርቶኤ።
- 27 ህትን ጎኑ ርሰሞ ሃሌን ሚንቲን ኦሰኤ አኩርት ጎኑ ጎኒን ሚጡበ ሙልሰኖ ጠው አቶኤ፤ ሉጨንሸሰ መሳን ሀሰሰኖሰ ቅጣት ገይንከሰ ቶጋኦ።
- 28 መኑ መገኑ ደጎተ ሀሱሆጎቤቶሃ እኤ ገበእበ ጠው አቶተ መገኑ ሃሊ ሰውቲሃ ህግሽ ኣሴሰ።
- 29 ህካን እኩቤቶሃ ብድሊን፣ ሂልማን፣ አዲድማን፣ ተንኮን፣ ምቀኝማን፣ ነብሳሃ ሾን፣ ብታን፣ ጣንሶን፣ ሂሊ ሃዕላቻን ጉዕሚን ዊንቶአሩለከ ህትን ሃዕምታአራን።
- 30 መን ሱዕመ ቤሳእሩ፣ መገኑ ግሳእሩ፣ መን ሆፍሳእሩ፣ ቦንታእሩ፣ ገምንከሰ ድክአእሩ፣ ሂሊርቹ ሀሳእሩ፣ አኒሃለከ አመታ አዘዘንትበሩ።
- 31 ሰውይታበእሩ፣ ዉላ ድጅታሩ፣ ኢተት ዮሰበእሩ፣ ጎደበ ጠረኛኖታን።
- 32 «ህትኔ ጠው አታ መኑ ጉዕመንኩ ሬሁ ሀሰሰኖሰ» የኖ መገን ሕገ ደገን ህካን ጉዕመንከ አታኦ፤ ጠለዕል ህካን እኤ እሁዕነ ህት አታ መን ኬሰንሰታኦ።

2

መገን ፍርድተኔሃ

- 1 አት ዎሎ መን አሌን ፈረዳንት መንቹ! እዪሁ እኩንትጎሬ ደባቡርታንትርቹ ዮህበእ፤ መሰንትሰ አት ዎሎ መን አሌን ፈረዳንት ሁኩ ፍርዱ መኑ አእኖሃ አታንትቤቶሃ ዎሎ መን አሌን ፈረዳንት ወክት ገይክ አሌን ፈረዳንቲት።
- 2 ህትኔ ጠው አእኖ መን አሌን መገኑ ፈረደኖ ፍርዱ ህንቅ እሁሰ ደንጋም።
- 3 አት ህትኔ ጠው አእኖ መን ፈረደን እሰ አታርቹ አታንቲሃ እኩንትጎሬ መገን ፍርዱኛ ፈቃንቲሃ አኩደኖሃትንዶ?
- 4 ህከረገን መገን ጎደብ ላኖመታ፣ አጀቅሰለከ አታዕልሰ በትኝ ህንቃንቲትንዶ? መገኑ አኩሩሰ በትሾህሁ ኬሳሃ ጨብክ ቶበታንትገ እኣሃተ እሁሰ ደጋንትበእንዶ?
- 5 ጠጫ እኩጎሬ ጎደበ ጠረኝማተለከ ጨብክ ቶበቱ ግብ ቀልቢሃክ መገን ኡሙርትለከ ህንቅ ፍርዱ አሚተኖ በር ገይክ አሌን ኡሙዕርተ ጭምአታንቲት።
- 6 መሰንትሰ መገኑ መት-መቲሃሰ ሆጎሰገ ኣሰኖሰ።

7 ህትን አታዕለን ጡመ ሆኑት አኢን ገለትለክ ኬዕምኝ በእበ ሄኡ ሀሳሁኡተ መገኑ ዘላለም ሄኡ አሰኛሰ።

8 ገይሰ ጥቅም ኢትታሩ። ሀንቁሃ እዘዘመግብ ክዘብሃ እዘዘንታ መኒሃ መገን ኡሙዕርትለክ በለት አሉሰ እካኢ።

9 ወዕና አይሁዳን ህከኒቻ ኤተሮን ግርካን ሃለርቹ እእኛ መን አሉን ጉዕማንን ኦርሽትለክ ጨነቀሙ አሜተኛሰ።

10 ጠዉ እኮጎሬ አይሁዳሃ እኮ ግርክ መኒሃ ጡመ ጠወ እእኛ መኒሃ ጉዕማንክ ገለቱ። ኬዕምኙለክ ወገሬቱ አሰመኛሰ።

11 መሰንትሰ መገኑ መን ሚንተ ለዕይ ፈረደኛበኢ።

12 ሕኑ ዮበኢሃ ጨብ አዕዮ ሙኑ ጉዕሙንኩ ሕኑ ሄዕበሰጎሬ በእኢ፤ ህትን ሕኑ ሄኢንሰ ጨብ አታ መን አሉን ጉዕማንን ሕኒን ፈረደመኛሰ።

13 መሰንትሰ መገን ብሬን ፈያኑተ እካእሩ ሕገ አገርታእረ ቤሉ ሕገ ሞጮጭት ሆን አሉ ሆሲሰበሩ ፈያኑተ የመንት ዋለአንታበኢ።

14 ሙሰ ሕኑ ዮሰበኢ አይሁዳ እኮበኢ ኡመቱ ክልቀቲቾሰ ሕኒሃሰ እዘዘንታእኢ፤ ሁኩንን ለሊሰኛሁ መቱርቹሆ አሰ ሙሰ ሕኑ ዮሰበኢጎሬሁ ሕኑ የኖሃ እኡ ሀሰሰኛሳሃ አሁሰ ደኑሰ ለሊሰኛ።

15 ሁኩንን ሕኑ የኖሁ ጉዕሙንኩ ቀልቤንከሰ ከተበሞሃ አሁሰ ለሊሰኛ፤ ህትን ቀልቡሰ አሉሰ መሰከረኛ፤ መሰንትሰ ቀልቤሰ ከተበሞሁ መት-መቶረ ዋቀሰኛሰ፤ መት-መቶረንገ አሰንተ ሀዕለኛሰ።

16 ሁኩንን እሀኖሁ እን ዱዱብሳም እንጂል ላገ ሃሊን መገኑ መሲህ ኢሰ አዲን መኑ አዕዮ ማጠሞ ጠወ አሉን ፈረደኛ በርዱት።

አይሁዳለክ ሕገሰ

17 ጠዉ እኮጎሬ አት ገዉክ «እን አይሁድቹሃን» ይቶንት ጎሬ። ሕጋን ድከአንትጎሬ። መገኒሃ እሆንከክ ቦንቶንትጎሬ።

18 መገኑ አተኛርቹ ደጎንትጎሬ። ሕጊቻ ተማርቶንትቤቹሃ ጡመ ጠወ አጥራመት ደጎንትጎሬ።

19 አት «ቆቃኖተ እዋንጎንቹሃ ይቶንት ጎሬ፤ ቱንሰቾን የሁኑኢንተ ኑርሃን ይቶንት ጎሬ፤

20 ገዋኑተ ተማርሳምሃን ይቶንት ጎሬ። ኦኩተ ተማርሳም ይቶንት ጎሬ» ህትን «ሕግ ሀንቁን ዋሙ ደኑ ዮኤ» ይታንት።

21 አት ዋሉ መን ተማርሰታንቲሁ ገዉክ ተማርሰታንትበእንደ? ህትን «ሞግቶኛቹ» ይተን አት ገዉንኩክ ሞግተንንደ?

22 ዘነተ አቶኛቹ ይተን አት ገዉንኩክ ዘነተ አተንንደ? አት ሸርኩተ ሰገዱ እትታንትበኢ፤ ጠዉ እኮጎሬ ክዘብ መገናካተ ሰገዳኖሰ ምነተ ዘረፈንንደ?

23 አት መገን ሕጋን ድከአንት፤ ጠዉ እኮጎሬ መገን ሕገ ድጅተን መገኑ ቦርረሲሳንት።

24 ሁኩንን «ክዕኔ መሳን መገን ሱዕሙ አይሁዳ እህበ መን በላን ቦርረመኛ» የመም ከተበሞጋት።

25 ሕገ ዊንሸታንቲሃ እኮንትጎሬ ጡርከሙ ደግለላኛሄ፤ ጠዉ እኮጎሬ ሕገ ድጅታንቲሃ እኮንትጎሬ ኪ ጡርከመሙ ጡርከመንትበሀገገ ዋለአመኛ።

26 ህካን እኮቤቹሃ ጡርከመምቡ አይሁዳ እኮበኢ ሕግ ትዛዝ እእኛሃ እኮጎሬ ጡርከመሙ ሆኑሰ ጡርከመሞገ ዋለአመኛበእንደ?

27 ኬሳሃ ከተበሞ ሕኑ ሄኢንኬለክ ጡርከመንቶንቲሃ እክ ሕገ ድጅታንትረ ማለን ጡርከመሞበእህገን እክ ሕገ ዊንሸኖ አይሁዳ እኮበኢ መንቹ ኪ አሉን ፈረደኛ።

28 ሱዕሚን አይሁዳ እኮሁ ሀንቅሃ አይሁድቹሃበኢ፤ ህትን አብልን ለላኖ ማል ጡርከሙ ሀንቅሃ ጡርከሙበኢ።

29 ሀንቅ አይሁድቹ አዚን አይሁድቹ እኮሃን፤ ሀንቅ ጡርከሙንኩ መገን እያኒን እሀኖ ቀልቢሃ ጡርከመሙሃ ቤሉ ሕገን ከተበሞ ሃሊን ማልሃ ጡርከመሙበኢ፤ ህትኖሙ መንቹ ገለት ቶገኖሁ መገኒቻት ቤሉ መገኒቻበኢ።

3

አይሁድ መኑ አመዕኑ ሆኑሰ

1 ቱሱ አይሁድቹ እሁ ቆሀሁ ሚሃት? ህከረንገ ጡርከሙ መ ደግለላኛ?

2 አይሁድቹ እሁ አቡ ጥቅሙ ዮሰ፤ ወዕናንክ መገኑ ላገሰ ኤገተ አሴኢሁ አይሁዳሃት።

3 ህከረ እሳቻ መት-መቱ አመዕነሙ ሆጋረ አመዕነሙ ሆኑሰ መገኑ አመዕነም እሁሰ ፌሰኛንደ?

4 ሆሮ ፌሰኛበኢ!

«ጠወአንት ላጋቻ ኬዕዮሀኒን ሀንቅ መንቹ እካንት፤ ህትን ባለጋራክ ኦዳንት ወክት ገርታንት»

የመሞ ከተበሞሀንገን ሙኑ ጉዕሙንኩ ክዘበኸ እኩጎሬ መገኑ ሀንቀኛሃን።

5 በጠው እኩጎሬ ኒ ሀንቀኛ እሁ ሆጉ መገን ፈይመተ እሁሰ ለሊሰኖሃ እኮች መ ይናም? መገኑ ጨብኔትኔሃ ቀጠዕዕኔጎር ፈረደኖሁ ሀንቅያበእ ይናምንደ? ከንቢቸን በጠዕናሚሁ መን ሰውትጋት።

6 ሀካን መገኑ ኤቡንከ፤ ህት እኮች መገኑ ኣዲንያ ኣሌን ዮ መን ኣሌን ፈረደተ ሀት እክ ኣታለኖ?

7 በጠው እኩጎሬ ኣን ክዘበኸ እሁ መገን ሀንቀኛመተ ለሊሰኖሃለከ ኬዕምኝሰ በርኅኖሃ እኮች ቴሱ ኢሊ ጨበኛ መንችገ ኣሌኤ ፈረደመኖኤንንደ?

8 መት-መቱ ሙኑ «ጡመርቹ ደዕኖተ ሂሊርቹ ኣዕኖ» ይን በጠዕናምሀንገ ኣት ሄሜን ቦርርታኔት፤ እሰ ኣሌን ፈረደዳ ፍርዱ ሀንቅያ ፍርደ።

መኑ ጉዕሙንኩ ጨበኛ እሁሰ

9 ቴሱ መ በጠዕናም፤ ንኤ ኣይሁደ እኮበእ መኒች በትንሰ ደግለሸቀማምረንደ? ሆሮ ህትጎተበእ! ወዕናንከ ሙኑ ጉዕሙንኩ ኣይሁደ እኮ ኣይሁደ እኮበእሩ ጨብሃ በገንቶሩ እሁሰ ሄሜ ኩሎም።

10 መሰንትሰ

«መቱ መንቹሁ ፈዩ ዮበእ፤ መቱሁ ሆሮ ዮበእ፤

11 ኣጥራመተኖሁ መቱሁ ዮበእ፤

ህትን መቱ መንቹሁ መገኑ ሀሰኖሁ ዮበእ።

12 ጉዕሙንኩሰ ዎቃኤ ገፈርቶኤ፤

ህትን ደግለልታበእረ እኮኤ።

በጡመ ሆጉተ ኣኣኖሁ ዮበእ፤ መቱሁ ሆሮ ዮበእ።

13 መን ሞዕርታ ሂሊ ላገተ በጠዕኢሃ

ኣፎሰ ፈንተዕዮ ሎድጋት፤

ኣረቤንከሰ ጣንሰታኤ፤

የቡሮንከሰ ዎሪች መርዙ ዮሰራ።

14 ኣፎንከሰ ቦሮሩለከ ቁንቁቱ ዊሞሰ።

15 ሎክሰ መን ቁጉ ዱኒሃ ደዕልታኤ።

16 ዎቃንከሰ ቤሱለከ ኦርሸተ ዮኤ።

17 ወገሬት ዎቃሃ ደጋበእ።

18 መገኑ ሆሮ ዎቛታበእ» ህት የመሞ ከተበሞኤ።

19 ሙኑ ጉዕሙንኩ ኣፎሰ ኣፎተ ኣዲንያ ኣሌን ዮ ሙኑ ጉዕሙንኩ መገን ፍርድ ኣዘን እኮተ ሕጉ የኖሁ ጉዕመንከ ሕግ ኣዘን ዮ መኒሃ እሁሰ ደንጋም።

20 ሀካን እኮቤቹሃ ሙኑ ጉዕሙንኩ መገን ብሬን ሕገ ኣገራን ፈየ ኣሆተ ኣታለኖበእ፤ ሕጉ ጨቡ መሃጎሬ ለሊሰኖ።

ፈይመት ኣመዕነቲን እሁሰ

21 ቴሱ እኩጎሬ መገኑ መን ፈየ ኣኣና ዎቆሁ ሕገች ኣደደ ዎቁን እሁሰ ለልዮኤ፤ ሁኩንን ሙሰ ሕገንለከ ነብያኖን መሰከረሞኤ።

22 ሁኩንን ኣደደመት ዮበኢሃ ኣመዕንታህኡተ እኮ መሲህ ኢሰን ኣመዕነን ደገመኖ መገንተ ፈይመ።

23 ሙኑ ጉዕሙንኩ ጨብ ኣቶኤ፤ መገኑ ኣሴሰ ኬዕምኛ ጤዕይዮሰ።

24 ሀካን እኮቤቹሃ ሙኑ መሲህ ኢሰ ወዘኖ ኣዲን መገን ኣሰቶን ህትን ፈየ እኮኤ።

25 መገኑ መሲህ ኢሰ ክትመ ኣዕይ ኣሴኢሁ ኣሰን ኣመዕንታሩ ጉዕሙንኩ ቁገንከሰ ጨበኛ መረርሰጬ ኣመዕነቲን ደኣቶታት፤ መገኑ ካን ኣኡሰ ኣታዕሊንከሰ ወዕና ሄዕዮሰ ጨብ እኩሪን ገይሰ ሀንቅ ፍርደ ለሊሰታት።

26 ህትን መገኑ ሀካን ኣዕዮሁ ገዉሰ ፈየ እሁሰ ለሊሰኖሁ ኢሳን ኣመዕንታህኡተ ፈየ ኣኣኖሃ እሁሰ ከን ዘማኔን ለሊሰታት።

27 ቴሱ ገሞንተኔ ድከዕናምርቹ ዮበእ፤ መቶርቹን ድከዕናምበእ! ድከዕናምበእ መሰት መርቹሃን? ሕገ ኣገራንትንደ? ህትጎተበእ፤ በጠው እኩጎሬ ኣመዕነቲን።

28 ሀካን እኮቤቹሃ መገኑ መን ፈየ ኣኣኖሁ ሙኑ ሕግ ሆጉተ ኣኣን እሁሰን ኣመዕነቲን እሁሰ ደንጋም።

29 ህከረገገ መገኑ ኣይሁድያ ጠላዕል መገኑንደ? ኣይሁደ እኮበእ መኒሃ መገኑብበእንደ? ሀንቅንከ ኣይሁደ እኮበእ መኒሃ መገኑ።

30 መገኑ ሚጥቹሃን? በጡርከመንቶ ኣይሁደ እኮ በጡርከመንቶበእ ኣይሁደ እኮበኢሃ ፈየ ኣኣኖሁ ኣሶት።

31 ህከረ ኣመዕነት መሳን ሕገ ሻርናምንደ? ህትጎተበእ! ሕገ ጠረኝንሳም ቤሉ ሻርናምበእ።

3:4 መዝ. 51:4። 3:12 መዝ. 14:1-31 53:1-3። 3:14 መዝ. 10:7። 3:18 መዝ. 36:1። 3:20 መዝ. 36:1።
3:22 ገላ. 2:16። 3:30 ዘዱ. 26:4፤ ገላ. 3:20።

4

እብራሂም እመዕነቲን ፈየ እሁሰ

1 ማልን አበኑኔ እብራሂም «ደኤእ» ይናገር። መርቆሃን?

2 እብራሂም እዕዮ ሆጎን ፈየ እኮ እቃን ድክአናርቹ ሄኤኖስ እቅ። እሁን ቤሉ መገንሀኔን ድክአናርቹ ዮሰበእ።

3 መሰንትሰ ጠሊሊ መጻፋን መ ዮኖ? መጻፋን «እብራሂም መገኖን እመዕኔእ፤ እመዕነቱንኩሰ ፈየ እክ ዋለአሞሰ» የመሞ ከተባሞኤ።

4 ሆጎተ እእኖ መንቹሃ ደሞዙሰ እዕዮ ሆጎሰገ ዋለእመኖሰ ቤሉ ኣሰቶገ ዋለእመኖሰበእ።

5 መኑ ሆጎት ሄዕበሰጎሪ ጨበኛ ፈየ እእኖ መገኖን እመዕኔ ጎሪ እመዕነቱስ ፈየ እክ ዋለእመኖሰ።

6 ህትን መቱርቹሃ እኡዕነ ፈየ እኮሀንገ መገኑ ዋለእኖስ መንቹ ማሰአሞሃ እሁሰ ደዉድ ጠወእን

7 «ብድሉሰ እኩሪሞሰለከ
ጨቡሰ ፈቁን የመሞሰ መኑ
ማሰእንቶአረ!

8 ህትን ቀርቹ ጨብሰስ ዋለእኖበእ መንቹ
ማሰእሞእሃን!» ይዮኤ።

9 ህከረ ኩ ማሰት ጡርከመሞ መኒሃትንዶ ጡርከመሞበ መኒሃት? ነኤን « እብራሂም እመዕነቱ ፈየ እክ ዋለአሞሰ» የመሞኤ» ይኖሞ።

10 እብራሂም እመዕነቱ ፈየ እክ ዋለአሞሲሁ ህትጎጎን? ጡርከመሞኛ ኤተሮንትንዶ ጡርከመሞዕዕናንት? ጡርከመሞዕዕናን ብርታት ቤሉ ጡርከመሞኛ ኤተሮንበእ።

11 እብራሂም ጡርከመሞዕዕናን ብርተ ዮሰ እመዕነቲን ደኤ ፈይመ መላተ እሆተ ጡርከመሞ፤ ህካን እኮሁ እሰ ፈያኑተ እክ ዋለእንቶተ ጡርከመንቱዕዕናን እመዕነታ መኒ ጉዕሚንከ እነ እሆታት።

12 ህትን እብራሂም ጡርከመሞ መኒሃ ኣነሃን፤ ጠዉ እኮጎሪ ጡርከመሞ ጉዕሚሃሰ እሁዕነ ኣኑኔ እብራሂም ጡርከመሞዕዕናን ብርንተ ዮሰ እመዕነት ሞሳልተ አሞንታ መኒሃ እነ እሆታት።

እመዕነትተኔሃ ኣሰሞ ተብሳሃ

13 እብራሂሚሃለከ ዘራተሰ ኣዲንያ አል ረገእኖ ተብሶ አሚኛስ ሕገ አገሪን እሁዕናን እመዕነቲን ደገነታ ፈይሚኒት።

14 ተብሳሳ ረገኣሩ ሕገ አገርታ መነ እኮጎሪ እመዕነቱ ከልበ እሆና፤ ህትን ተብሶንኩ ሞጉ ዮበኤሃ እሆና።

15 መሰንትሰ ሕጉ መገን ኤሙርተ ኤበኖ፤ ጠዉ እኮጎሪ ሕጉ ዮበእቤኛን ሕገ ድጂ ሄኤኖበእ።

16 ተብሶሰ ጀመርሁ እመዕነት አሊንት፤ ሁኩ ተብሶሁ እብራሂም ዘራተ ጉዕሚንከ ህከ ተብሳሃ ረገኣኢሁ መገን ኣሰቶን ኣሰሞሃ እሁሰ ተሬገጠሞኤ፤ ሁኩንን ሕገ አሞንታ መኒሃ ጠለዕል እሁዕነ እብራሂምገ እመዕነቶሁኤተ ጉዕሚንካት፤ ከን ሃሊን እብራሂም ጉዕሚንከኔ ኣነሃን።

17 እብራሂምተኔ «ልግብያ ኡመቲሃ እነ አዕዮንኩ» የመሞ ከተባሞኤ፤ እሰ ሬቶአረ ሬሆኛ ኬሰኖሀንጎለከ ዮበኤሃ ሄኤኖገ ኣዕይ ገእኖ እመዕኔ መገን ብሬን ጉዕሚንከኔ ኣነሃን።

18 እብራሂም ዘርክ እበ ፈከንታእ የመሞ ከተባሞገን ልግብያ ኡመቲሃ እነ እሆናገ እመዕኔእሁለከ ተብሳሃ እዕዮሁ መቱርቹሃ ተብሳሃ እኤንበ ጠዋኒት።

19 እሰ ጥቤ ዘማን እኮሰቤቹሃ ጅሰሙሰ ሆግ እሎተ አታለኖበእገለከ ሳረ አልተባተለከ ባልቆኢተ እኮጎሪ እመዕነቲን ሆጎበእ።

20 እመዕነቲንከሰ ጠረኘ እክ መገኒሃ ኬዕሞኝ ኣሴ ቤሉ መገኑ ኣሴ ተብሶንን እመዕኑ ሆጎን ሆሮ ሸክዮበእ።

21 መገኑ ኣሴሰ ተብሳሃ እኡ አታለኖገ ዋመ ቀልበንከሰ እመዕነት እቅ።

22 ከኒኛ ኬዕዮሀንጎት እብራሂም እመዕነቱስ ፈየ እክ ዋለአሞሲሁ።

23 ጠዉ እኮጎሪ «ፈየ እክ ዋለአሞሰ» ይታ ላገት ከተባሞሁ ጠለዕል እብራሂሚሃበእ።

24 ጠለዕል እብራሂሚሃ እሁዕነ ኔሳሃ በርግይት፤ ቀርቹኔ ኢሰ ሬሆኛ ኬሶሰ መገኖን እመዕንናሞ ኔሳሃ እመዕነቱኔ ፈየ እክ ዋለእመኖኔ።

25 ኩ ቀርቹኔ ኢሰን ጨብተኔሃ ሬሆተ ሆጎሴን ኣሴመሲሁለከ ኔሳሃ መገን ብሬን ፈየ እኡኔተ ሬሆኛ ኬዕዮሃን።

5

እመዕነቲን ደገመኖ ወገሬትለከ ሙንዲኖተኔሃ

4:3 ከል. 15፣6፤ ገላ. 3፣6። 4:8 መዝ. 32፣1-2። 4:11 ከል. 17፣10። 4:13 ከል. 17፣4-6፤ 22፣17-18፤ ገላ. 3፣29። 4:16 ገላ. 3፣7። 4:17 ከል. 17፣5። 4:19 ከል. 17፣17። 4:25 ኢሳ. 53፣4-5።

1 ቴሱ ነኡ ፈይመተ ደእኖሚሁ አመዕነቲን እኮቤቺሃ ቀርቾንከኔ መሲህ ኢሰ አዲን መገነን ወገሬቱ ኖኒ።

2 መሲህ ኢሰ አዲን ቴሱ ኡርኖም መገን አሰቶበ አመዕነቲን አንጎሞ፤ ህትን ተብሲን መገን ኬዕምኛ ቤቀማምረ እንኮምቤቺሃ ሙንደዕናም።

3 ህከንን ጠለዕል አሁዕነ ኦርሸት አታዕለን ጠረኜን ኡሩ ደግሲሰኖሃ አሁሰ ደንጋምቤቺሃ ኦሪሻንከኔ ሙንደዕናም፤

4 አታዕሉ ጠረኛመተ ኤበኖህንገን ህትን ጠረኛመት ተብሳሃ ኤባገ ደንጋም።

5 መገኑ አሴኔ ጠሊላ ኢያን አዲን መገን አትት ቀልቤንተኔ አበ ዊንቶቤቺሃ ተብሶሰ ሙልሰኖኔበአ።

6 ነኡ ሳፋኑተ እንኮምገን መገኑ ዬ ወክቱ ኢሌ ወክት መሲህ ኢሰ ጩበኛኖተኔሃ ሬኖኡ።

7 ፈየ መንኛ ወጥ ሬሆኖ መንቺ ደጉ አበ ኦሪሰኖ፤ እኮጎሬ ጡመ መንኛ ወጥ ሬሆኖ መንቺ ደገሃ አታሊኖሃ አሁኖ።

8 ጠዉ እኮጎሬ ነኡ ጩበኛኑተ እንኮምገን መሲህ ኢሰ ኒ ወጥ ሬኖኡ፤ ሁኩንን መገኑ ሃንከ አተኖኔጎሬ ለሊሰኖ።

9 ቴሱ ነኡ ፈየ እንኮሚሁ መሲህ ኢሰ ቁገን እኮች በትንሰን መገን ኡመዕሬቻ ጡምናሚሁ ኢሲኒት።

10 መሰንትሰ ነኡ መገን ባለጋረተ እንኮምገን ቤትሰ ሬሆን መገኒን ሀራዕረሞም፤ ሀራዕረሞሚች ኤተርን አሲችን አበ ኢሰ ሄኔን ጡምናም።

11 ሆካን አሁዕነ ቴሁ መገኒን ሜጡበ ሀራሩተ ደእኖሚሁ ቀርቾንከኔ መሲህ ኢሰ አዲን መገኒን ሙንደዕናም።

እደመለከ መሲህ ኢሰተኔ

12 መቶ መንኛ መሳን ጩቡ ከ አዲንያ አል እሜኛ፤ ጩብ መሳንን ሬሁት እሜቶኡ፤ ህትን ሙኑ ጉዕመንኩ ጩብ አዕኖቤቺሃ ሬሁት ጉዕመ መን አሌን እሜቶኡ።

13 መሰንትሰ ሙስ ሕኑ አሰመኖህኒች ሄጭ ጩቡ ኡለ አሌን ሄዕኖ እቅ፤ ጠው እኮጎሬ ሕኑ ኖብአ ወክት ጩቡ ገዉንኩሰ ጩብገ ሞለአመኖበአ።

14 እሁን ቤሉ አደምገ ሕገ ድጅት ጩብ አቶበአ መን አሌን ሆኖ ፈቀዕነ ሬሁት አደሚች ኬሽ ሙሰ አሊ መን አሌን ጉዕመንን ሹምነቱ ደአቶኡ።

15 ጠዉ እኮጎሬ መገን አሰቶ ሽልማቱ መን ጩብጋበአ፤ መቶ መንኛ ጩብ መሳን ልግቡሰ ሬቶጎን መገን ነሰቶንለከ መቶ መንኛ መሲህ ኢሰ መን ደገሞ አሰቶ ሽልማቱ ልግቤ መኒሃ ትርፈ ትርፊን አሰሞ።

16 ህትን መገኑ ጠለዕላ አሴኔ ሽልማቱ ኤቦ አሰቱት መቶ መንኛ ጩቡ ኤቦ ላልቻጋበአ፤ መቶ መንኛ ጩብ መሳን አሰሞ ፍርዱ ቅጣት ኤቦ፤ ልግብያ ጩብ መሳን አሰሞ መገን ሽልማቱ ፈይመተ ኤቦ።

17 መቶ መንኛ ጩብተኔሃ ሬሁት ህከ መቶ መንኛ ኢዲን አሰንቶች ህከኒች አበ መገን አሰቱታ። ጠሊልመሰ አሰቱታ እአታ ሙኑ መቶ መሲህ ኢሰ አዲን ሄኔን ሄኔአ፤ መቶ መንኛ ጩብ መሳን ሬሁት መን አሌን ጉዕማን ሹምነቱ ደአቶኢች መገን ትርፈ ትርፊን እኮ አሰቱትለከ ፈይመ ሽልማት ቶጎሩ መቶ መንኛ መሲህ ኢሰ መሳን በተዕኖ ሄኔ ደአት ነገሳኢ።

18 ቴሱ መቶ መንኛ ኢደም ጩቡ ቅጣት ፍርደ መን አሌን ጉዕማን ኤቦገ ህትን መትሰ መሲህ ኢሰ ፈይመ ሆጉት ልግብ መን ቅጣቱች ነጠ አዕይ ሄኔ አሰኖሰ።

19 መሰንትሰ መቶ መንኛ እዘዘም ሆግ መሳን ልግቡ ሙኑ ጩበኛኑተ እኮጎን ህትን መቶ መንኛ እዘዘም መሳን ልግቡሰ ፈየ እኮኡ።

20 ጩቡ በተኦተ ሕኑ እሜኛ፤ ጠዉ እኮጎሬ ጩቡ በተዕኖ ቁፍራን መገን አሰቱት አበ በተኦኡ።

21 ኩን እኮሁ ጩቡ ሬሁት ኤቢን ነገሾገን መገን አሰቱት ፈይመተ ኤቢን ህትን ቀርቾ መሲህ ኢሰ አዲን ዘላላም ሄኡ ኤቢን ነገሶታት።

6

ጩቢች እደ እሃን መሲህ ኢሰን ሄኔ

1 ቴሱ መ ይናም? መገን አሰቱት በተኦተ ጩብ አዕንን ሄዕኑንድ?

2 ሆኖ ህትጎተበአ፤ ነኡ ጩብ እኢች ሬኖምሩ ሀት እንክ ጩብ አዕንን ሄዕናም?

3 መሲህ ኢሰን ሜጡበ እንኮተ ጠመቀሞምሩ ጉዕመንኩኔ ሬሁሰ ቤቀማምረ አሁኔ ጠመቀሞንከኔ ደገኔንተበአንድ?

4 ነኡሁ አሲን ሜጡበ ጠመቀሞም ወክት ሬሆንከሰ ሜጡበ እንኮተ አሲን ሜጡበ ሞገሞም፤ መገን አላመት መሲህ ኢሰን መገን ኬዕምኛ ሞልቃን ሬሆኛ ኬሾገን ነኡሁ ህትን ሃዕሮ ሄኡ ሄዕኖተ ኬዕናም።

5 ሬሆንከሰ አሲን ሜጡበ እንኮሚች ህትን ኬኦንከሰ አሲን ሜጡበ እንካም።

6 ከ ኤተሩ ጩብሃ ርሰተ እንካምበእገለከ ጩበኛሙ ጅሰሙኔ ኒች ሸቆተ ኑባጼ ጅሰሙኔ ኢሰን ሜጡቡ ሰቀለሞገ ደንጋም።

7 መሰንትሰ ራዮ መንቹ ጩቢሃ ጠገሚች ነጠሃን።

8 ጠዉ እኩጎሬ መሰህ ኢሰን ሜጡብ ራዮምጎሬ እሰን ሜጡብ ሩሃን ሃዕናምገ አመዕንናም።

9 መሰንትሰ መሰህ ሬሆች ኬዕዮቤቺሃ ለንኪሃ ሆሮ ሬሆናበእገለከ ሬሁት ከ ኤተሩ እሰ እሌን ሹምነቱ ዮሰበእገ ደንጋም።

10 እሰ ሬሆን ጩብ ሞልቀተ ቢጦተ ሜጦረን ሹል ሬዮኡ፤ ጠዉ እኩጎሬ ሩሃን ሄእን መገን ኬዕምኒሃ ሄእና።

11 ህትን አዕኑ ጩቢሃ ሬቴን መሰህ ኢሰን መገኒሃ ሩሃን ሄእንተገ ገውክዕኔ ሞለዕዬ።

12 ህካን እኩቤቺሃ ማል ሰውቴሃ ጠገንቴንተገ አኦተ ሬሆ ማላክዕኔ ጩቡ ሀላዕሉንከህዕኔ።

13 ጅሰሙክዕኔ ሂለ ሆገ ኦዳተ አቴን ጩቢሃ አቶናቺ፤ ጠዉ እኩጎሬ ሬሆች ሄእ አደ ህጎ መገን አቴን ገዉክዕኔ መገኒሃ አሰዬ፤ ህትን ጅሰመክዕኔ ጠሊላ ኦዳተ አቴን መገኒሃ አሰዬ።

14 ቴሱ አዕኑ ሄእንገታሁ መገን አሰቶ አዜን ዮንተቤቺሃ ሕጊች ሞሮን እህበቤቺሃ ጩቡ ጠቆተ ሀሰሰናበእ።

15 ህከረ መ ይናም? ነኡ ሕጊች ሞሮን እሁዕን መገን አሰቶች ሞሮን ዮምቤቺሃ ጩብ አዕኑንዶ? ሆሮ ህትጎተበእ።

16 ገዉክዕኔ መቶ መኒቺሃ ካድንችገ ጠገንቶናተ ሆንጠኪነተጎሬ ህከ ጠገንቴንተ መንቺሃ ካዲንቹ እሁክዕኔ ደኒነተበእንዶ? ጩቤ ካዲመተ እኪነተጎሬ ጩቡ ሬሁተ ኤበና፤ ህትን መገኒ ካዲመተ እኪነተጎሬ መገኑ ፈየ አእኖህዕኔ።

17 አዕኑ ወዕናንከ ጩብ ካዲመተ እኪነታ እቅ፤ ጠዉ እኩጎሬ ቴሱ ቶጌንተ ትምርቴሃ ቀልቢን እዘዘንቴንተቤቺሃ መገኒሃ ገለቱ እሆሰ።

18 ጩብ ርዕማች ነጠ ፉልቴን ፈይመ ካዲመተ እኪነታእ።

19 እን ህትን መኒሃ አገኖ አፈን ጠወአሚሁ ክዕኔሃ አገኖህዕኔገ ይጹት፤ አዕኑ ከኒች ብርተ ጅሰመክዕኔ ኒጃሰ ካዲመ አቴን ሆንጠህሰንተ እቅ፤ ሁኩንን ጠሊላ እኩበእ ሞቃሃ አምንሰና፤ ጠዉ እኩጎሬ ቴሱ ጅሰመክዕኔ ፈይመ ካዲመ አቴን ሆንጠህሰ፤ እሰን ጠሊላ መ አደ አምንሰናህዕኔ።

20 አዕኑ ጩብ ካዲመተ እኪነተ ወክት ፈይመ ሆጉተ አቴንተ ግዳጂ ሞጮጨመኖህዕኔበእ እቅ።

21 ህከን ጠዋች ደአቴንተርቹ ሞ ዮኡ? ህከን ጠዋች ኤተሩሰ ሬሁተ እኩቤቺሃ ቴሱ መልሰናህዕኔርች ቤሉ መቱርቹሃ ደአቴንተበእ።

22 እኩጎሬ ቴሱ ጩብ ርዕማች ፉልቴን መገን ርሰተ እኪነታእ፤ ህከን ወጥ ጠሊላመተ ደአቴንተ፤ መጨረሹሰ ዘላላሚሃ ሄኤኑሃ ሄኤ።

23 መሰንትሰ ጩብ ሞጉ ሬሁተ፤ ጠዉ እኩጎሬ መገን ሸልማቱ ቀርቹሃኔ መሰህ ኢሰ መሳን ዘላላሚሃ ሄኤኑሃ ሄኤ።

7

ሕጊች ነጠ ፉሉ

1 እመኤ ኦሶ! እን ሕገ ደጋ መኒሃ ጠወአሚት፤ ሕጉ መኔ ፎሊን ዮ ጌሳን ገዘአናሃ እሁሰ ደኒነተበእንዶ?

2 ሞሳሊተ ሞኒሃ እኮ መንቹት ሞንሴ እኑ ፎሊን ዮ ጌሳን ሞንሴ እኒን ሕገን ኡሱረንቶአተ፤ ጠዉ እኩጎሬ ሞንሴ እኑ ሬዮች ሞንሴ መንቹች ኡሱረንቶ ሕጊች ገፈረንቶአተ።

3 ህካን እኩቤቺሃ ሞንሴ እኑ ፎሊን ሄእን ሞሉ ጎናን ገልቶጎሬ ዝነተ አቶ ዬዮሴ፤ ጠዉ እኩጎሬ ሞንሴ እኑ ሬዮ ጎሬ ሞንሴ መንቹን ኡሱረንቶ ሕጊች ገፈረሰጭቶቤቺሃ ሞሉ ጎናን ገልቶጎሬ ዝነተ አቶ ዬዮሴበእ።

4 እመኤ ኦሶ! ህትን አዕኑ መሰህ ጅሰመ እኪነተቤቺሃ እሰ ሬሆን ሕገሃ ሬቴንታእ፤ ህካን እኩቤቺሃ ነኡ መገን ላልቹ ላልናተ አዕኑ ሞሉ መንቹረ ሁኩንን ሬሆች ኬዕዮ መሰህህረ ኤኪነታእ።

5 መሰንትሰ ነኡ ማል ሰውትገ ሃዕናም ወክት ሕግ መሳን ኬአና ሂለ ሃዕላቹኔ ሬሆ ላልቹ ላልናተ ጅሰምኔ አዜን ሆጉተ አእናተ እቅ።

6 እኩጎሬ ቴሱ ኡሱር አሮኔ ሕጊች ሬሆን መለዕላሜና ጌሰ ጠገሞም ሕጊች ሂረሞም፤ ህካን እኩቤቺሃ ከኒች ኤተሮን መገን እያኒን ሃዕሮ ሄእን ሃዕናም ቤሉ ኑባቹ ሕጉ ዮና ሃሌን ሃዕናምበእ።

ሕግለከ ጩብተኔሃ

7 ህከረ መ ይናም? ሕጉ ገዉሰ ጩብያንዶ? ሆሮ ህትጎተበእ፤ ጠዉ እኩጎሬ ሕጉ ሃዕዮበእቃን ጩቡ መሃጎሬ ደንጋምበእ እቅ፤ መሰንትሰ ሕጉ «ሂለርቹ ሃዕላቶት» ይዮበእቃን ሃዕላቱ መሃጎሬ ደንጋምበእ እቅ።

8 ጠዉ እኩጎሬ ሕጉ ዮበእ ጎሬ ጩቡ ሬዮሃ እኮቤቺሃ ጩቡ ትዛዝ አዲን እድለ ደእ ሂለ ሃዕላቸተ ጉዕመንክ ኣዜንከኤ ከለቆ።
 9 እን ዎሳነ ሕጉ ዮበእ ወክቲ ፎሊን ሂኣም እቅ፤ ጠዉ እኩጎሬ ሕግ ትዛዝ አሜቾ ወክቲ ጩቢሃ ፎሊ ሃዕዮሰ እቅ፤ እኩጎሬ እን ሬዮም።
 10 ሁኩ ፎል ኣሶተ ኣሰሞ ሕግ ትዛዝ ኢ አሌን ሬሁተ ኤቦ።
 11 መሰንትሰ ጩቡ ሕግ ትዛዝ አዲን እድለ ደእ ጣንሴኤ፤ ትዛዝ መሳንን ሺኤ።
 12 ህዛን እኮቤቺሃ ሕጉ ጠሊላሃን፤ እሲን ከተበሞ ትዛዘንኩ ጠሊለ፤ ሀንቅያለከ ጡመሃን።
 13 ህከረ ሁኩ ጡመ እኮ ጠዉ ኤሳሃ ሬሁተ ኤቦኤ ዩሃንዶ? ሆሮ ህትሳተበእ፤ ህከን ጡመ ጠው አዲን ሬሁተ ኤሳሃ ኤቦሁ ጩብየ፤ ሁኩን እኮሁ ጩቡ ጩብ እሁሰ ለሉታትለከ ጩቡ አበ ሂለ እሁሰ ትዛዝ አዲን ደገሞታት።

መን ኣዜን ዮ እጳንሸተኔሃ

14 ነኡ ሕጉ ጠሊለ አያኒሃ እሁሰ ደንጋም፤ ጠዉ እኩጎሬ እን ጠሊለ አያኒሃ እኮምበእ ጩብ ሮሶማተ ህረሞምያ መንቹ።
 15 እን አኦተ ኢታም ጠዉ እሁዕነ ግገሞ ጠዉ አእምቤቺሃ ገይኤ ሆንጉተ አጥረመታምበእ።
 16 ቴሱ እን ሀሰበርቹ እኣሚሃ እኮምጎሬ ሕጉ ጡመ እሁሰ ህከኒን ኢተቀማም።
 17 ህት እኮቾ ህዛን አእኖሁ ኣዜእ ዮአሃ ጩብ ቤሉ አኔበእ።
 18 ኢ ኣዜን ህከረንገ ጅሰማንከኤ ጡሙ ጠዉ መቱርቹሁ ሄእበገ ደጋም፤ መሰንትሰ ጡመ ጠዉ ሃዕላቸሞጎሬ አኦተ አታላምበእ።
 19 ህትን አኦተ ህሳም ጡመ ጠዉ እሁዕናን አኦተ ሀሰበ ሂለ ጠዉ አእሚት።
 20 ቴሱ እን ሀሾምበእ ሂለ ጠዉ አእሚሃ እኮቾ ህዛን አእኖሁ ኣዜንከኤ ዮአሃ ጩብ ቤሉ አኔበእ ዩሃን።
 21 ጡመ ጠዉ አኦተ ሀሰን ሂለ ጠዉ አእምገ አእኖኤ ዎሉ ሕጉ እእን ሃዕዮገ ደጋም።
 22 መሰንትሰ እን ኣዜንከኤ መገን ሕጊን ሙንደኣም።
 23 ጠው እኩጎሬ እን እኣም ጠው ጉዕሙንኩ ሁኩ ዎሉ ሕጉ እእን ዬገ ለኣም፤ ኩ ሕጉንኩ ቀልቤንከኤ ኣገቀመኖ መገን ሕግን ሜጡብ ኣገቀመኖበእ፤ ኩ ሕጉንኩ ኤሳሃ ጩብ ዎልቃተ ጠገማምገ አእኖኤሃ እሁን ህከን ሕግን መ አእምጎሬ ወሰነኖኤ።
 24 እን ሄንከ ሞርተዕዮምየ መንቹ! ከን ሬሀሮ ጅሰሚቶኤ አይ ጡምሰኖኤ?
 25 ቅርቹሃኔ መሰህ ኢሲን መገንሂ ገለቱ ኢሉሰ፤
 ቴሱ እን ቀልቤንከኤ መገን ሕጊሃ ጠገማም፤ እኩጎሬ ማሊንከኤ ጩብ ሕጊሃ ጠገማም።

8

ሂኡ ኣሰኖ ጠሊለ አያንተኔሃ

1 ህዛን እኮቤቺሃ መሰህ ኢሲን ሂኣኖ መን አሌን ቴሱ ፍርድ ፈረደመኖሰበእ።
 2 መሰንት መሰህ ኢሲን ዮ ሂኡ ኣሰኖ ጠሊለ አያን ሕጉ ጩቤቻለከ ሬሆ ሕጊቾ ሰዎልድማን ብሾዮሂ።
 3 ኒ ጩብኻ ሀል ዶርተ ሕጊሃ ወልቀት ዮሰበእ፤ ጠዉ እኩጎሬ ሕጉ አኦተ አታልሳሃ መገኑ ጩቡ ዮበእ ቤቱስ ጩብኻ እንኮም ኒን መን ማቆን መን አዕይ ሶክ ጩብ ሀል ፈረጅሰ።
 4 ኩን እኮሁ ማል ሰውትገ እሁዕነ ጠሊሉ ኣያኑ ሀሰኖጊን ሃዕናም ኒን ሕጉ ጠዕመኔሁ ፈይመት ዊንቶታት።
 5 መሰንትሰ ማል ሰውትገ ሂኣኖ ማል ጠወንከ ሰዉ ይታኣ፤ ጠሊለ አያኒ ሰውትገ ሂኣኣኖ ጠሊለ አያን ጠወንከ ሰውይታኣ።
 6 ማል ጠወ ሰውዩ ሬሁተ ኤበኖ፤ ጠሊለ አያን ጠወ ሰውዩ ሂኡለከ ወገሬት ኣሰኖ።
 7 መሰንትሰ ማል ጠወ ሰውዩ መንቹ መገን ሕጊሃ ኣዘዘመኖበእኤቺሃለከ ኣዘዘሙ አታለምበሰቤቺሃ መገንሂ መሰቹሃን።
 8 ማል ሰውትገ ሂኣኣኖ መገኑ ሙንዲሲሶተ አታልታበእ።
 9 ሀንቅንከ መገን አያኑ ኣዜንተክዕኔ ሃዕዮቻ አዕኑሁ ህትን ዮንታሁ ማሊን እሁዕነ ጠሊለ አያኒንት፤ መሰህ ኣያኑ ኣዜስ ዮሰበእሁ አዩሁ መሰህየበእ።
 10 ጠዉ እኩጎሬ መሰህ ኣዜንተክዕኔ ሃዕዮቻ መሃ ማሉክዕኔ ጩብ መሳን ሬሀሮጎሬሁ ፎሉክዕኔ ፈይማን ሂኣኖሃን።
 11 ህትን ኢሰ ሬሆቻ ኪቾሁ መገኑሃን፤ እሰ አያኑ ኣዜንከክዕኔ ሃዕዮ ጎሬ መሰህ ኢሰ ሬሆቻ ኪቾ መገኑ ኣዜንከክዕኔ ሂኣኖ ኣያንከስ ሬሀሮ ማልሃክዕኔ ሂኡ ኣሰኖ።
 12 አመኤ ኦሶ! ኤዶ ዮኔ፤ ጠዉ እኩጎሬ ሁኩ ኤዶሁ ማል ሃሸኣቶገ ሃዕናታበእ።

13 ህዳን እኩቤቼሃ ማል ሃሸኣቶገ ሄኡንተ ጎሬ ሬቴነንተ፤ ጠወ እኩጎሬ ጠሊሊ ኣያን ወልቃን ማል ሆጉተ ሸቴንተጎሬ ፎሊን ሄኡነንተ።

14 መገን ኣያን ኣዎንሰሰሩፈ ጉዕመጎኩ መገንተ ኣለ።

15 ህዳን እኩቤቼሃ ኣዕኑ «አበ! ኢ ኣና!» ይቴን ገእቶተን ኣታልሲሰሩህዕኔ መገን ኣለተ ኣእኖ ጠሊሊ ኣያን ቶጌንታ ቤሉ ዋጅቴን ሄኡኖተ ፈንቀሽ ኣጎሰኖ ርሰማ ቀልብ ቶጌንታበኣ።

16 መገን ኣያን ኒ ኣያነን ሜጡብ እክ ነኡ መገን ኣለተ ኣሁኔ ገይሃኔ መሰከረኖ።

17 ህትን መገን ኣለተ ኣነኩሚኛ መገንኛ ረገዕናም፤ ህትን መሲህ ኢሰን ሜጡብ ከዕምኛ ደዕናተ ኣሰን ኦርጨቀምጎሬ ኣሰን ሜጡብ ረገዕናምረ።

አሜተኖ ኬዕምኛ

18 ከን ወክት ኦርሸት ከ ኤተሩ ነሳሃ አሜተኖ ኬዕምኛን ሆሮ ቅጡ ኣሆተ ኣታላኖበኣን ኣዕይ ሰውያም።

19 ክልቀቱ ጉዕመጎኩ መገን ኣለተ ለልታ በር ሄዕላተን ኣገርታኦ።

20 ክልቀቱ ተሰ እኩ ጠዋሃ ህግሽ ኣሰምኡ፤ ሁኩንን ገይሰ ሄዕላታን ኣሁዕነ ህትን ኣሆተ መገኑ ፈቀጅቤቼሃት፤ እኩጎሬ መገኑ ተብሳሃ ኣሰኖኡ።

21 ተብሰሰ ክልቀቱ ገወንኩሰ በኣ ርሰማኛ ሰዋልድማን ፋልኬዕይ መገን ኣለ ኬዕምኛ ዎምነቲን ቤቀማንቹ ኣሆታት።

22 ክልቀቱ ጉዕመጎኩ ከበሬ ኣለ ኒጠኛጎ ዮ ኦርሸ ጨነቃን ሄኡሰ ደንጋም።

23 ጠወ እኩጎሬ ኒጠኛ ኣሌን ዮኢሁ ጠሊዕል ክልቀትያበኣ፤ መገኑ ዎሉ ኣሰቱተ ኣሰኖገን ኣጥራመተዋሃ እኩሃ ጠሊሊ ኣያን ወዕኔሃ ቶንጎም ነኡ መገኑ ኦሱሰ ኣሁኔ ለሊሶተለክ ሬሄን ሸሚኛ ነጠ ኣዕይ ፋሾኔተ ኢላ ኣክኔ ጅሰማን ኒንጠንለክ ኣገዕርጎን ደገማም።

24 ጡምኖሚሃ ኣነኩምጎሬ ጡሙኔ ዋመ ዋሚን ሀንቅ እክ ለሎተ ኢላ ተብሴን ሄዕናም፤ ነኡ ጡምኖሚህ ህከን ተብሴኔት፤ ጠወ እኩጎሬ ተብሳ ኣዕናምርቹ ለሊኖሃ እኩጎሬ ተብሳሃ ኣሁሰ ፈቀኖ፤ ለሊኖርቹ ኣይ ተብሳሃ ኣእኖ?

25 ለዕንበርቹ ተብሳ ኣዕናምጎሬ ኣታዕሊን ኣገዕርናም።

26 ህትን ህት መገኑ ኡጩ ሀሰሰኖኔ ጎሬ ደንጋምበኣቤቼሃ ጠሊሉ ኣያን ሆንጌንከኔ ሀዕሊኖኔ፤ ላጋን ኩሊን ኣታሊንበ ሃሊን ጠሊሉ ኣያን ዱኣ ኣእኖኔ።

27 መን ቀልብ መረመረኖ መገኑ ጠሊሊ ኣያን ሰውቱ መሃጎሬ ደገኖ፤ ጠሊሉ ኣያን መገንረ እኩሁኡተ ሸፈኣኖ መገን ፍቃድጋት።

28 መገኑ ኢትታሁኡተለክ ሰውትሰገ ገእንቶሁኡተ መገኑ ጉዕመርቹንከ ጡምማተ ኣእኖገ ደንጋም።

29 ኩን እኩ መሰት ሄጭ ደጎሳሃ ቤቴሰ ኣትዳገለክ ቤቴሰ ልግብያ ኣመሰ ኦሶ በሊኛ ሀንገፈ ኣሆናገ መገኑ ሄጭ ወሰኛቤቼሃት።

30 ወዕና ወሰኛሰረ ገኡሰ፤ ህትን ህከ ገኡሰረ ወሰኛ፤ ህከ ወሰኛሰረ ኬዕምሸሰ።

መገን ኢተተ

31 ህከረ ከ ጠዋሃ ወ ይናም? መገኑ ነሳሃ ሀዕሊኖኔሃ እኩኛ ሀንበዕሊመኖኔህ ኣይት?

32 መቱዋሰ ቤቲሃ ኣሙዙዕነ ጉዕሚንከኔ ህግሽ ኣሴ መገኑ ቤትንከሰ ሜጡብ ጉዕመርቹንከ ህትን ኣሰኖበኣን፤?

33 መገኑ መጠርሰሃ ኣይ ከሰሶተ ኣታላኖ? ፈየ ኣእኖሁ ገምንከሰ።

34 ኣሰ ኣሌን ፈረደኖ ኣይት? መሲህ ኢሰ ኣሰ ኣሌን ፈረደኖንዶ? ኣሰ ነሳሃ ሬዮሃ፣ ሬሆኛ ከዕዮሃ፣ መገን መኩ ኣዳን ኣፋዕልዮሃንለክ ነሳሃ ዱኣ ኣእኖሃን።

35 መሲህ ኢሰ ኢታኛ ኣደ ኣእኖኔህ ኣይት? ኦርሸተንዶ? ጭንቀተንዶ? ሸረመሃንዶ? ጎሩዋንዶ? ከልመተንዶ? ኣደጋንዶ? በገዙሃንዶ?

36 ኣሰን

«ኪተኔሃ ጉዕመ በርንከ ሸታኔ፤ ጎረጤኖ ሆለገ ዎለኣምም»

የመም ከተበዋጋት።

37 እኩጎሬ ህከን ጠዋን ጉዕማንን ነኡ ኢቲኔ ኣሲን ከ ጠወ ጉዕመንከ ድሉ ኣኢን ቁልታሁኡኛ በተዕናም።

38 መሰንትሰ ሬሆተጎሬ፣ ሄኡሃጎሬ፣ መላይከታጎሬ፣ ሹመተጎሬ፣ ቴሱ ዮ ጠወሃጎሬ፣ ኤተሮን ኣሜተኖሃ ጠወሃጎሬ፣ ህከን ዎልቃምሃጎሬ፣

39 ጎት ዩሃጎሬ፣ ሙግ ዩሃጎሬ ህኩ ክልቀቱሁ እኩጎሬ ቀርቾሃ መሲህ ኢሰን ደእኖም መገን ኢታኛ ኣደ ኣኡተ ኣታላኖ መቱርቹሁ ዮበኣሃ ኣሁሰ ሰታጎም።

9

መገኑ እስራኤል መነ መጠሩስ

- 1 መሲሂን ሀንቅ ጠወአም፤ ክዝባምበእ፤ ጠሊሊ ኢያሊን አምና ቀልቡኤ ክዝባምበእገ መስከረኖኤ።
- 2 ኢቡ ቫዙትላከ መርተአቡ ጨነቀሙ ቀልቤንከኤ ዮኤ።
- 3 መሲንትስ አሉኤ እኮ ወገኒሃኤ ይ እን መሲሂኛ አደ እክ ቦሮሩ አልዮኤ እቃን ኢታም እቅ።
- 4 እስ እስራኤላውያናታን፤ ህትን መገኑ እስንተ አለስ አዕዮስ፤ ኬዕምኛስ ለሊሾስ፤ ወኣድ ላገተ ኣገሰ፤ ሕገ ኣሴስ፤ ሀንቅ ሰገድ ሴሪ ለሊሾስ፤ ተብሴ ላገት ኣሴስ።
- 5 ህትን ወዕኔ አናናኛ አሜቶአራን፤ መሲሁ ማሊን አሚኛሁ እስ ደቦቹት፤ እስ ጉዕሚኛን ሎረሂን፤ መገኒሃ ዘላለሚሃ ሹኩሩ ኢሉሰ፤ ኣሚዕን!
- 6 ጠዉ እኮጎሬ መገን ላገት ቫረንቶኤ ዩሃበእ፤ መሰንትስ እስራኤላውያና ዘርት ዊመ ዊሚን ሀንቅ እስራኤላውያናተበእ።
- 7 ህትን እብራሂም ዘርተ እኮሁ ጉዕሙንኩ ሀንቅ እብራሂም ኦሶተ ዩሃበእ፤ ጠዉ እኮጎሬ «ዘርክ ገእነታኢሁ ኣሳቂንት» ይሰቤቹሃት እቅ።
- 8 ህካን እኮቤቹሃ ርሰባም ዋቁን ጠለዕል ማሊን አለንቶሩ መገንተ አለበእ፤ ጠዉ እኮጎሬ ዘርት እክ ዋለእነታሩ ጠለዕል ተብሴ ላገተ ኦሶ።
- 9 ተብሴ ላገንት «አሚተና ዘማን ከ ወክት ፈንቀል አሚታም፤ ሳሪ ለባ ጨል አልታኦ» ይታኣተ እቅ።
- 10 ህካን ጠለዕል እሁዕነ ርብቀ ሚጦ መንቹኛ ሁኩንን እነኔ እኮ ኣሳቂኛ መልተተ አልቶተ ላፈተ እኮ ወክት
- 11 መገኑ መጠረኖሁ ለሙንኩ እለት አለንቱዕናን ሂለ እኮ ጡሙ አቶዕነ ሂጭ
- 12 ሆሳን እሁዕነ እስ ገአና ሃሊን እሁስ ለልሲሃ መገኑ ርብቀ «ሀንገፋ ማዕኒሃስ ጠገመና» ይሴ።
- 13 ሁኩን እኮሁ «ያቀበ ኢትዮም፤ ጠዉ እኮጎሬ ኤሳ ግቦም» የመም ከተበሞጋት።
- 14 ቴሱ መ ጠወዕናም? መገን ኣዳን ሉጨንሹ ዮአንድ? ሆሮ ህትጎተበእ።
- 15 መሰንትስ መገኑ ሙስ «መረርሲጨ ሀሾምሀኒሃ መረርሲጨም፤ አሙዛንስሀኒንክ አሙዛም» ይዮሰ።
- 16 ህካን እኮቤቹሃ መገኑ መነ መጠረኖሁ ሙኑ ሀሾ ሃሊን ሀከረንገ መን ሆሳን እሁዕነ መገን መረርሲጨንት።
- 17 መሰንትስ መጻፋን ፉራኑኑኑኔሃ «ዋልቀኤ ኪን ለሊሶተለክ ሱዕሙኤን ኣዳንያ አሌን ጉዕማንን ደገሞተ ዋመ አዕዮንኤ» የመም ከተበሞኡ።
- 18 ህካን እኮቤቹሃ መገኑ ሀሾሃ አይሁ ማረኖስ፤ ህትን ሀሾህ አይሁ ቀልብስ ዱድሰኖ።
- 19 መገን ኤሙዕርሰተለክ ማርቱተ
- 10 ቴሱ «መገን ሰውት ከሞተ አታለኖሁ ዮበኢኛ ሚሃ ሉጨንሹሀኔ መገኑ ዋቀሰናኔት?» ይቴነንታሃ እሆኖ።
- 20 ጠዉ እኮጎሬ ኮ መንኛ! መገኒን ኦደሚሃ አታልታንቲሁ ኦት አይት? ትብ ኦዳት መክሾሲሃ «ህት ኦት መክሶንቲኤሁ ሚሃንት?» ዮተ አታለኖንደ?
- 21 ትብ ኦዳት መክሰናሴሁ መቶ ትቢኛ መት ኦዳተ ኬዕምኒሃ ህትን ዋልት ኦዳንተ ሂለርቹሃ መክሶተ ዋልቀት ዮሰበእንደ?
- 22 መገኑ ኤሙዕርሰ ለልሶተለክ ዋልቀስ ለሊሶተ ሀሽ በኢሃ ቅጥይቶ ኤሙዕሪ ኦዳተ ልገብ ወክት አታዕሊስ።
- 23 ህካን አዕዮንኩ ዋዕናንክ ኬዕምኒሃ ቅጥአዕዮ ማርቶ ኦዳ ኬዕምኛስ በትኛ ለሊሶታት።
- 24 ኔሳሃ መረርሲጨ ኦዳንተስ ጠለዕል አይሁዲኛ እሁዕነ አይሁደ እህበ መኒኛ ገአዮኔ።
- 25 ሁኩንን እኮሁ መገኑ ሆሴ መጻፋን
- «ኢ ኤመትኤ እክበረ ሉሙቲኤ» ይ ገአም፤
- አተሞበእ ኤመትንክ አን ኢታም ኤመት ይ ገአም፤
- 26 ህትን ሕዕት ኢሃ ኤመትበእ» ይመስ ቤቾን
- ሂኣኖ መገን አለተ የመንት ገእነታኦ» ዩሃን።
- 27 ህትን እስያስ እስራኤል ኦሶተኔሃ ላገሰ ጎት አዕይ «ሄንከሃ እስራኤል ኦሶ ዋሊንሹ ባር ኣዝ ሸፋር ጌስ እኮጎሬ ኣሳኛ ፈቆሁኤኛ ጠለዕል ቀዉስ ጡምታኦ።
- 28 መሰንትስ ቀርቹ ደዕል ኡል አለን ሹል ፈረደኖ» ይኦ።
- 29 ህትን እስያስ «ጎጎት ቀርቹ መገኑ መን ዘርተ ፌሾበእቃን ሶዶምለክ ጎሞር ከተምገ እንካም እቅ» ይ ዋዕናንክ ጠወዕዮ።

30 ቴሱ መ ይናም? ፈይመተ ሀሰቡ አይሁደ እህቡ ሙኑ ፈይመተ ደአቶኡ፤ ሁኩ ፈይመት አመዕነቲን ደገንታእታን።

31 ጠዉ እኮጎሬ እሰራኤል ሙኑ ሕገ አገሪን ደገንታ ፈይመት ሀሰን ሕገ አገሩ ሆጎቤቹሃ ፈይመተ ደአሃ አታልቶበኡ።

32 «ሚሃት ፍይመተ ደአቶበኡ?» ዩማእቃን እሰ ፈይመተ ሀሰእሁ አመዕነቲን እሁዕነ ሆጎን እኩቤቹሃት፤ ሀካን እኩቤቹሃ ቆለኖ ክኖን ቆዕልቶኡ።

33 ሁኩንን
«ሁኩዕነ መን ቆለኖ ክኑ ጽኦናን እፋሻም፤
ሁኩ ክኑ መን ቆለን ኡጀኖሃን፤

ሀከን ክኖን አመዕነኖሁ አይሁ ሙለኖበኡ» የመም ከተበሞገን ሀከን ክኖን ቆዕልቶኡ።

10

እሰራኤል ሙኑ መገን ምቃሃ አዎኑ ሆኑሰ

1 እመኤ ኦሰ! እሰራኤል ሙኑ ጡሞተ ቀልቤንተኤ አበ ሄዕላታምለክ ዱኤ እአም።

2 መሰንትሰ ሀንቅ ደገን እሁ ሆኑሃሰ ቤሉ እሰ መገኒሃ አዘዘንቶተ ጠረኝሰ ሀሳረ አሁሰ እን ገውንኩኤ መሰከራንሰ።

3 እሰ መገን ፈይመተ ደጉዕናን ገይሰ ፈይመተ አዎኑ ሀሰ መገን ፈይማተ አዘዘንቶበኡ።

4 ሀካን እኩቤቹሃ አመዕናኑት ጉዕሙንኩ ፈይቶተ መሰህ ሕገ ዊንሼኤ።

ጡሙ ጉዕሚንከ እሁሰ

5 ሙሰ «ሕገ አገሪን ደገንታ ፈይመተ እአኖ መንቹ ሁኩ ሕኑ የኖሃ እአኖ ጉዕሙንኩ ፎለን ሄአኖ» ይ ከተሰኡ።

6 ጠዉ እኮጎሬ አመዕነቲን ደጌኖ ፈይመተ «ቀልቤንከክ ሰማሃ አይ ፋለኖ?» ይቶት፤ ሁኩንን መሰህ ኡለተ ድርሲሃት።

7 ህትን ቀልቤንከክ «አዛቤን አይ ድረኖ?» ይቶት፤ ሁኩንን መሰህ ሪሆኝ ኡብሃት።

8 ጠዉ እኮጎሬ መ ይታ? «እፎንከክለክ ቀልቤንከክ እክ መገን ላገት ሆንጠኮኡ» ይታኡ፤ ህትን ነኡ ዱዱብሰናሚሁ አመዕነት ላገ።

9 አት ኢሰ ቀርቹ እሁሰ አፊንከክ መሰከርቶንትጎሬለክ መገኑ ሬሆኝ ኬሾሰገ ቀልቤንከክ አመዕንቶንትጎሬ ጡምታንት።

10 መሰንትሰ ሙኑ ቀልቤሰ አመዕን ፈየ እሀኖ፤ ህትን እፎንከሰ መሰከር ጡመኖ።

11 ጠሊሊ መጻፋን «እሰን አመዕነኖሁ አይሁ ሙለኖበኡ» የመም ከተበሞኡ።

12 መሰንትሰ መቱ ቀርቹ ኢሰ ጉዕሚንከ ቀርቹ እኩቤቹሃ አይሁደለክ አይሁደ እህበ መን በላን አደደመት የብእ፤ እሰን ኡጭታሰህኑኡተ ጉዕሚንከ በረከሰ በትሻ እሰሰሰ።

13 መሰንትሰ «ቀርኝ ሱዕመ ገአኖሁ ጉዕሙንኩ ጡመኖ» የመምኡ።

14 ጠዉ እኮጎሬ አመዕንቶዕናን ሀት አት ገአቶተ አታልታኡ? ህትን እሰተኔሃ ሞጮጭቱዕናን ሀት እክ አመዕንታኡ? ተማርሰኖ መንቹ የብእሃ ሀት እክ ሞጮጭቶተ አታልታኡ?

15 ተሸት ላገተ ዱዱብሰታሩ ሶህንቶዕናን ሀት እክ ላገሰ ዱዱብሰቶተ አታልታኡ? ሁኩንን «ጡሙ ዱዱቡ ኩልታሩ አሚቱሰ ሄንከ ተሸ የኖ?» የመም ከተበሞጋት።

16 ጠዉ እኮጎሬ እሰያሰ «ቀርኝ! ነኡ ጠዕዕኖም ጠወ አይ አመዕንኖኡ?» ይገን ጉዕሙንኩሰ ተሸት ላጋተ አዘዘንቶበኡ።

17 ሀካን እኩቤቹሃ አመዕነቱ አሚተኖሁ ሞጮጭኒት፤ ሞጮጬንኩ መሰህተኔሃ ኩለንታ ላጋቺት።

18 ህንዴ ጠዕሞሀዕኔ፤ እሰ ሞጮጬ ሆጎቤቹሃትንደ? ጠሊሊ መጻፋን

«ላገሰ ኣዲንያ አሊን ጉዕማንን ሞጮጬንቶኡ፤

ጠወኦርቹንኩ ኡለ ገበለ ኢልኖኡ»

የመም ከተበሞቤቹሃ ሀንቅንከ ሞጮጭቶኡ።

19 ቴሁ ጠዕሞሀዕኔ፤ እሰራኤላውያኑት ላገሰ ደጎበኤ የሃንደ? ሀካን ዩንበሰገ ሙሰ ሄጮ

«ኡመት እክበሀኑኡተ ሰጭቴንተገ አኣክዕኔ፤

አጎራመትብ ኡመት መሳን ኡሙዕርቴንተገ አኣክዕኔ» ዩኡ።

20 ህትን እሰያሰ

«ኤላሃ ሀሾበኤ መኒሃ ደገሞም፤

ኢተኔንከ ጠዕምትብ መኒንከ

ገዉእ ለሊሾም»

ይ መለል ጠወአዮኡ።

21 ጠወ እኮጎሬ እስራኤልተኔሃ «ሾከለከ አዘዘምበ መንበ በር ጉዕመንከ እንገኤ ሂርም» ይእ።

11

መገኑ እስራኤል መኒሃ አሙዙሰ

1 ህንዴ ጠዕማም፤ መገኑ ኡመትሰ ኡጅኖንዶ? ሆር ህትጎተበእ፤ መሰንትሰ እን ገወንኩአ እስራኤላውቸሃንለከ አብራሂም ዘሬች ቢንያም ደቦሃን።

2 መገኑ ዎሶን ሄጭ መረጮ ኡመት ኡጅኖሰበእ፤ እስራኤልተኔሃ አልሰሰ መገን ብሬን ኦጀገ መጻፉ የኖሃ ደገነንተበእንደ?

3 ህከን ወክቲን አልሰሰ «ቀርቾ! ነቢያከክ ሸቶኡ፤ ኬሳሃ ክትመ ሆንጠህሴኖሄ ጠረጴዛ ጉዕመንከ ድጅቶኡ፤ እን ሜጠንኩአ ፈቆም፤ እሰን ኤሳሃ ሸቶተ ሀሳኢት» ይእ።

4 ጠወ እኮጎሬ መገኑ መ ይ ፈንቀሼሰ? መገኑንኩ «እን ብኣሌ ዬኖ ሸርኬሃ ሰገድቡ ለመለ ኩሚ መን ገይሀአ ፌሾም» ይሰ።

5 ከን ዘማኔን መገን ኣሰቶን መጠረጎት ፈቆ ቀወ መኑ ዮኡ።

6 ምርጫስ ኣሰቶን እኮጎሬ ሆንጊበእ ዩሃን፤ ሆንን እኮጎሬ ኣሰቱት ኣሰቱተ እሁሰ ፈቆኖ።

7 እስራኤል መኑ ሀሶኢሃ ደዕቶበእ? እኮጎሬ መገኑ መረጮስሩ ደዕቶኡ፤ ፈቆሩ ቀልብሰ ዱድሶኡ።

8 ሁኩንን «መገኑ ቀልብሰ ጀልአዕዮሰ፤ ህከኒሃ ከበሬ ኢለሬተ እሌንተሰ ለኦበእ፤ መጫንተሰን ሞጮጭቶበእ» የመም ከተበሞጋት።

9 ህትን ደወድ

«ማዱሰ አፈኖ ዎሻደ

ኤጅኖ ኤሎሃ እክ ኦሪሱንሰ!

እቶ ሂሉርቸ ገይሰ አሌን አሁን!

10 አልሰ ለኣበእን ቱንሲሱን፤

ረመዙሰ ኦርሻን ጉዕመ ወክት ቁቸሃ አሁን» ይእ።

11 ህንዴ ቲሁ ጠዕማም፤ እስራኤል መኑ ሉሶኢሁ ኬእበ ኡቡ ኡቦጋትንደ? ሆር ህትጎተበእ፤ ህከን ወጥ እሰ ሰጭቶተ እስራኤል መኑ ጩብ እቶ መሳን አይሁደ እህቡ መኑ ጡሙ ደኢኡ።

12 ጠወ እኮጎሬ እስራኤል መን ሉጩንሾ ከን ኣዲንያ አል መኒሃ በረከተ ደግሰሾቸለከ እሰ ኡቡ አይሁደ እህበ መኒሃ በረከተ እኮች ጉዕሙንኩሰ ፈቆ እቃን ሄንኩ ልግቡ በረከት ደገንጋ እቆ።

አይሁደ እህቡ መኑ ጡሙሰ

13 ቴሱ ጠወአሚሁ ክዕኔሃ አይሁደ እከንበ መኒሃት፤ አይሁደ እከንበ መኒሃ ሶሀሞሚሃ እኮሞቤቸሃ ክድማተኤ እቡ ኬዕምኞ ዮኡ።

14 ካን እኡኤ ማል እሉኣ እኮአረ አይሁደ ሰጭታጋ አኢሃት፤ ከን ሃሌን አይደጎ እሳች መት-መቲሰ ጡምታገ አኦተ አታላሚሃ እሆተ አታለኖ።

15 መሰንትሰ አይሁድ ኡቡ ኣዲንያ አሌን ዮ መኒሃ መገኒን ሀራዕረሙ ኤቦች እሰ መገን አደ ፈንቀሉንገ ሀት አህኖ? ሁኩን ሬሆች ኬአተገ።

16 መቶ ደን ቡኮች ወዕኔ እሰ መገኒሃ ጠሊሎሃ እኮች ቡኮት ጉዕሙንኩ ጠሊሊ እካእ፤ ህትን መቶ ሀቅ ጠጹ ጠሊሊ እኮች ሀሙሰ ጠሊላኦተ እካእ።

17 አይሁድ ጋር ወርች ሀቅጋት፤ እሰ በሊች መቱ ጌሱ ሀሙ ሙርተዕይ ኡባንለከ አዕኑ ኡድም ወርች ሀሙ እከንታሩ እሰቤቸን እከን *ጠጹሰ ዲንያተለከ በረከተ ቤቀንቴንተረ እከንተ ጎር

18 ህከን ቢጠንት ኡቦ ሀማን ቦንቶት፤ እኮጎሬ ቦንቶትጎር ጠጹሰ ኬሳሃ እጅኖሄ ቤሉ ጠጹ እጅቶንቲሁ ኬሳሃ እሁ ሆንክ ደግ።

19 ጠወ እኮጎሬ «ሀማከት ቢጠንት ኡቦኢሁ እን እሰቤቸን እሆታት» ይቴንጎታሃ አህኖ።

20 ሁኩን ሀንቅሃን፤ እሰ ቢጠንቶኢሁ አመዕኑ ሆንቤቸሃት፤ አዕኑ አመዕነት መሳን እጻቀንቲን ኡርቲንታኢ፤ ህካን እኮቤቸሃ ዎጅፍ ቤሉ ቦንቶኖቹ።

21 መሰንትሰ መገኑ ዎሶናሃ ነጹ ሀሚሃ አሙዘባች ኬሳሃ አሙዘኖበእ።

22 ቴሱ መገን አሙዙሰለከ ዎጅሲሱሲ ለእ፤ ዎጅሲሱንኩሰ ለሊሰኖህ ኡቦ ሀዕኑኡአሌኒት፤ እኮጎሬ መገን አሙዘንከሰ ጠረኝት ሄንትጎሬ ኬሳሃት፤ ሁኩን ዮበእ ጎሬ አዕኑሁ ሙርተኢን ኡቤንጎተ።

23 እሰን አመዕኑ ሆንቲ ፈንቀልቶጎሬ ዎሶናሃ ሙርተኦ ቤቸን ፈንቀልት ኣጋኢ፤ መሰንትሰ መገኑ ወዕኔበቤቹ ፈንቀሽ ኣግሰሰተ አታለኖ።

10:20 እሳ. 65:1። 10:21 እሳ. 65:2። 11:1 ፍልጹ. 3:5። 11:3 1 ገን. 19:10፤ 14። 11:4 1 ገን. 19:18።
11:8 ዘዳ. 29:4፤ እሳ. 29:10። 11:10 መዘ. 69:22-23። * 11:17 እሰቤቸን እከን፡- ዩ ስራኡት መት-መቶረ ጡሙ ላልቹ ላለኖ ሀቅ ሀሙ ሙርት ጠረኝ ጠጹ ዮ ጌዴላን ፊልት እጉጣቀመኖ ሀቂቹ ጡሙ ላልቹ ላለኖ ሀሙ ሙርት ጡሙ ጠጹ ቦን ጌዴላን ካሴናን ህከ ካሰም ሀሙ ገይሰ ሀምጎ አዕይ ጡሙ ላልቹ ላለኖ ገ እእኖ።

24 እት ክልቀቲንከክ ኡድም ወርቹ ሀቀ እኮሀኒች ሙርተአ ክለቀንቶንትገ እሁዕነ ጡመ ወርቹን ኣጎንቲች በትሽን ሁኩ ክልቀቲንከሰ ዮሰ ሀሙ ገይሰ ወርቹ ኣሌን ሀት ኣጋበአ።

መገን ማርቲት ጉዕሚንከ እሁሰ

25 እመኤ ኦሶ! ቀልባመት እኪንታሃ ኣጉዲንከሀዕኔ፤ ህካን እኮቤቲሃ ማጠሞ ጠወ ደጎናተ ሀሳም፤ ኣይሁደ ኣክበሩ መሲህ ኣመዕንት መገኑ ሀሰኖ ወሊንሽ ኢልቶተ ኢሊ ዲድሰኖ ኣያኑ መት-መቶ እሰራኤላውያኖ ኣሌን እኮ።

26 ህትጎ

«ጡምሳንቹ ጽኑኒች ኣሜተኖ፤ ያቁብ ዘራች ጉዕሚችን ሂልመተ ከመኖ፤

27 ጨብሰ ፈቁን ዬም ወክት ክዕኔእን ኣጋም ወኣድ ላገት ከኒት» የመም ከተበሞገን እሰራኤል መኑ ጉዕመንኩ ጡምታእ።

28 እሰራኤላውያኑት ተሸት ላገተ ሞጫጩ ግቢንከሰ ክዕኔተኔሃ መገን ዲን እኮኤ፤ እኮጎሪ መጠረሚን ኣናናተኔሃ መገኑ ኢተኖሰራን።

29 መሰንትሰ መገን ኣሰቲትለክ መገን መጠሩ ዶረምበሃን።

30 እዕኑ ዋዕናሃ መገኒሃ ኣዘዘሙ ግቤንታእ፤ ቴሁ እኮጎሪ እሰራኤል መኑ ኣዘዘሙ ሆጊን ማርቲት ደዕቲንተገን

31 እዕኑ ደኣቲንተ ማርቲት እሳሁ ህከ ማርቲተ ደኣቶተ ቴሁ ኣዘዘንቶበአ።

32 መሰንትሰ መገኑ ጉዕማንከ መኒሃ ማርቲሰ ለሊሶተ ጉዕመንኩ መኑ ኣዘዘሞበገ ኣዕኖ።

መገኒሃ ሆንጠኩ ገለት

33 መገን ቀባጡትለክ ሀይመት ደጉ ሄንከ ጥዕላሸሃን? ፍርዲሰ መረመሪን ኣሌንቡሃን፤ ዋቆንኩሰ ለልበሃን።

34 «ቀርቶ ቀልብ ጠወ ደገኖህ ኣዬት? ኣሱሃ ሸዘኖሲሁ ኣዬት?

35 መገኒሃ ሊቁሰኖህ

ሊቁሸንከ ኣእኖሁ ኣዬት?»

36 መሰንትሰ ጉዕመርቹንኩ ኣሲች፡ ኣሲንትለክ ኣሲሃት፤ ኣሲንከ ዘላላሚሃ ኬዕምኖ ኣሲሃ እሁሰ! ኣሚዕን!

12

መገኑ ካደሚሃ ሀት ሄኡ ሀሰሰኖ ጎሪ

1 ጌህ ኣመኤ ኦሶ! ጅሰመክዕኔ መገኒሃ ኣደ እኮሃ ሙንዲሲሰኖለክ ሄኣኖ ክትመ ኣቲን ሆንጠህሶሶናተ መገን መረርሲጪን ኡጫንክዕኔ፤ ሁኩንን ኣዕኑ መገኒሃ ሆንጠህሶሶናተ ሀሰሰኖሃ ሀንቂን እኮ ሰገዲሞክዕኔ።

2 ህትን ጡመ ሙንዲሲሰኖለክ ነጅሱ ዮበአ መገን ሰውቱ መሃጎር ኣጥራመቲን ደጎናተ ቀልቡክዕኔ ሃዕር ኣክ ሄኡክዕኔ ዶረሚን ቤሉ ከን ኣዲንያ ኣል መነ ኣጉደኖቹ።

3 «ክዕኔ በላን መት-መቲንኩክዕኔ መገኑ ኣሲህዕኔ ኣመዕነት ጌሲን ጡምማን ሰውዩን ቤሉ ገይሰተኔሃ ሀሰሰኖህኒች በትሽ ሶኒን ሰውዩንከ» ይ መገኑ ኣሲኤ ኣሰቶን ሸዘንክዕኔ።

4 መቶ ጅሰማን ልግቡ ብሊቱ ዮኔህገለክ ህከን ብሊት ሆንት ጉዕመንት ኣደ እኮገን

5 ነኡ ሄንከ ልግብ ኣንኩምጎሪህ መሲሁ መቱሃ ጅሰመ፤ መቶ ጅሰም ብልት ኣንኩምቤቲሃ ገይንከኔ ማጡ ኣንኩም።

6 መገኒች ኣሰንቶኔ ኣሰቶገን ኣደዱ ኣሰቲት ዮኔ፤ ራገ ጠወኡ እኮጎሪ ኣመዕነትኔ ጌሲን ራገ ጠወዕኑን።

7 ካደመኖህ ክድማንከሰ ጠረኙን፤ ተማርሰናንኩ ተማርሶንከሰ ጠረኙን።

8 ህትን ሸዘኖህ ሸዘንከሰ ጠረኙን፤ ኣሰኖንኩ ቀልቢችሰ ኪሸ ኣሱን፤ ገሽኖንኩ ጠረኝ ገሽን፤ መረርሲጪኖንኩ ሙንዲኖን መረርሲጪኖን።

9 ሰንሰንት ዮበኢ ሀንቅ ኢተት ሄኡንክዕኔ፤ ሂላ ጠወ ግቤ፤ ጡመርቹ ኣሞኙ።

10 ህትን ገገጫክዕኔ ጠረኝቲን ኢተቀሜ፤ መት-መቲክዕኔ ኬዕምሹ።

11 ሃንክዕሉ ዮበኢሃ ጠረኝቲን ዊመ ቀልቢን ቀርቹ ካደሚ።

12 ተብሲን ሙንደዕዕዬ፤ ኦርሸተ ኣጀቅዬ፤ ጉዕመ ወክትንከ ዲኣ እዕዕዬ፤

13 ኣመዕንቶ ኣመኡሱተ ኦርሸተ ወክት ሀዕልዬ፤ ኮሀ ቶጌ።

14 ሸርታህዕኔረ ማሰዕዬ፤ ማሰዕዬሰ ቤሉ ቦርርቶኖቹሰ።

- 15 ህትን ሙንደአሁኑን ሜጡብ ሙንደዕዬ፤ ኦአሁኑን ሜጡብ ኦዕዬ።
- 16 ገገውንኩክዕኔ ኢታን ሄዕዬ፤ ገውክዕኔ ሎርሱ አጉርቴን ቡጥቻኖን ሜጡብ ሄዕዬ * «ኢ ቤሉ ዋሉ ደገኖሁ ዮብኦ» ይቶኖቹ።
- 17 ጉዕማንከ መን ብሬን ጡመ ጠወ አዕዬ ቤሉ አይሃዉ ሂሊ አዕዮ ወጥ ሂሊ ጠወ አቴን ፈንቀሽቶኖቹ።
- 18 ህትን አታልሲሾህዕኔ ጎሬ መንጎ ጉዕሚንጎ ወገሬቲን ሄዕዬ።
- 19 ኢ ጃላ፥ «ቀርቹኔ መገኑ ገደቲ ፉሉ ኢሃን፤ እን ገደቲ ፉሉጥ። ዩእ» የመም ከተበሞቤቹሃ መገን ኡሙዕሬተ ቤቹ አሰዬ ቤሉ አዕኑ ገዉክዕኔ ገደቲ ፉልቶኖቹ።
- 20 ህከን ወጥ ባለጋሩክ ጎራዬጎሬ አትሰሰ፤ ሰገቦሰጎሬ አግሰ፤ ህከን አኦንከክ ሙልሳንት።
- 21 ህከን እኮቤቹሃ ሂሊ ጠወ ጡመ ጠወ አኢን ቄል ቤሉ ሂሊ ጠዊን ቄላንቶት።

13

ሹማተ አዘዘሙ ሀሰሰኖሃ አሁሰ

- 1 ዳኝነቱ ጉዕሙንኩ አሰመኖሁ መገኒች እኮቤቹሃለከ ቴሱ ዮ ዳኝኑት መገኑ ዳኝ አዕዮሰረ እኮቤቹሃ መኑ ጉዕሙንኩ ገሽታ ሹማተ አዘዘሙ ሀሰሰኖሰ።
- 2 ህከን እኮቤቹሃ ዳኝኖን ሂልማን ኬአኖሁ ጉዕሙንኩ መገን ትዛዝ ቶገኖበእ፤ አዘዘምባሁ ጉዕሙንኩ ገይሰ አሉን ፍርደ ኤብኖ።
- 3 ሹመት ሂሊርቹ አታ መን ቤሉ ጡመርቹ አታ መን ዋጅሲሳብእ፤ ሹሙ ዋጅሲሰኖሄበዕገ ሀሰንንዶን ጡመርቹ እእ፤ እሰን ገለትጨኖሄ።
- 4 መሰንትሰ እሰ ሂሊ አታረ ቀጠእኖ መገንጎ ካድመ፤ ጠዉ እኮጎሬ ሹሙ ብሰ ቆዕረኖሁ ጠለዕላን አሀበቤቹሃ ሂሊርቹ አቶንትጎሬ ሹሙ ዋጅ፤ ህትን እሰን ሂሊርቹ አሰታእረ ቀጠእን መገን ኡሙዕርተ ለሊሰኖሃ መገንጎ ካዳንቹ።
- 5 ህከን እኮቤቹሃ ሹማተ አዘዘሙ ሀሰሰኖ፤ ሁኩንን ኡሙዕርተ ዋጅን ጠለዕላ አሁዕነ ቀልቡክዕኔ ቀነጠኖህዕኔቤቹሃት።
- 6 አዕኑ ግብር ባቴንታሁ ሹማተ አዘዘሙ ሀሰሰኖህዕኔቤቹሃት፤ መሰንትሰ ሹመት ህከን አኢን መገኒሃ ካደንታእራን።
- 7 ቴሱ ጉዕማንከ መኒሃ እኡ ሀሰሰኖሃ አዕዬ፤ ግብር ባቱ ሀሰሰኖህኒሃ ግብረ ባቹ፤ ቀረጠ ባቱ ሀሰሰኖህኒሃ ቀረጠ ሙሬ፤ ዋጅ ሀሰሰኖህኒሃ ዋጅዬ፤ ኬዕምኙ ሀሰሰኖሰህኒሃ ኬዕምኙ አሰዬ።

መት-መትን አተቀምተኒሃ

- 8 ገገዉክዕኔ አተቀሜ ቤሉ አይ ሊቆሁ አሉክዕኔ ሄኡንከ፤ መሰንትሰ ኦሌቹሰ አተኖሁ አይሁ ሕጉ የኖሃ እእኖ።
- 9 «ዘነተ አቶት፤ ሽቶት፤ ሞግቶት፤ ዎሎ መንርቹ ሄዕላቶት» የኖ ትዛዙሁ ዎሎ ትዛዙ ጉዕሙንኩ «ኦሌቹክ ገይክገ ኢት» ይታ ላጋን ዊሞኡ።
- 10 አተት ሄኡ ጎሬ ዎሎ መን አሉን ሂሊርቹ እእኖበእ፤ ህከን እኮቤቹሃ ኢታን ሕጉ ዊመ አሀኖ።
- 11 ቴሱ ግሰኛች ኬኤንጎተ ወክቱ እለገ ደጌ፤ መሰንትሰ አመዕንኖም ወክቱች ጡምኖም ወክቱ ቴሱ ኒቤቹ ሆንጠኩኡ።
- 12 ሀንከዕርት ህጎተ አኬኮኡ፤ በሩሰ ሆንጠኮኡ፤ ህከን እኮቤቹሃ ቱንሰኝን አዕናም ሆጉተ ገኝ አዕኖ፤ ኑር ኦል ኦድኑተ ኦደዕኖ።
- 13 ህከን እኮቤቹሃ በሩን እንካምሀን ሀሰሰኖግ ሄዕኖ ቤሉ ሄዕናሚሁ ቦለቹን፥ ሰከራን፥ ዝነተ አኢን፥ ጅሰመ ሆጎዳን፥ ኦዳንለከ ምቀቻማን አሁንከ።
- 14 ጠዉ እኮጎሬ ቀርቹ መሲህ ኢሰ ኦደዕዬ ቤሉ ሄዕላተኖርቹ ዊንሾተ ማልሃክዕኔ ሰውይቶኖቹ።

14

መን አሉን ፈረዱ ገበእባሃ አሁሰ

- 1 አመዕነቲን ሆጎ መንቹ ኢታን ቶጌሰ ቤሉ ሰውትሰ ህንቆኖቹ።
- 2 ጉዕመርቹንከ እቱ ሀሰሰኖሰገ አመዕነኖሁ ዮኡ፤ እኮጎሬ አመዕነቲን ሆጎሁ ጠለዕል አታክልተ * አተኖ።
- 3 ህከን እኮቤቹሃ እኮሰርቹ አተኖ መንቹ እትበ መንቹ ህንቁንከ፤ ህትን እትበ መንቹ አተኖህን አሉን ፈረዱንከ፤ መሰንትሰ መገኑ እሱ ቶጎሰ።

* 12:16 ቡጥቻኖን ሜጡብ ሄዕዬ፡- የኖሁ ህንቁመ ሆጉተ እኢሃ እኮጎሬ ይዩ የሃን። 12:16 ምሳ. 3፣7። 12:19 ዘዳ. 32፣35።
 12:20 ምሳ. 25፣21-22። 13:7 ማቴ. 22፣21፤ ማር. 12፣17፤ ሉቃ. 20፣25። 13:9 ፋል. 20፣13-15፤ 17፤ ዘዳ. 5፣17-19፤
 21፤ ሉቃ. 19፣18። * 14:2 አታክልተ፡- ሀሚሉ፥ ድንቹ፥ ካርተለከ ቀይሰርገ ዮአራን።

4 ሆሎ መንቻ ካዲም አሌን ፈረደተ እት አዬት? እስ ኡራጎሬ ህከረንገ ኡቦጎሬ ቀርቸሃሲት፤ እሱ ቀርቸ ኡርሶስተ አታለኖቤቸሃ ኡረሮ።

5 ህትን መቱ መንቹ መቱ በር ዋለኢቶ ቆህኖገ ሰውኖ፤ ህትን ሆሎ በሩ ጉዕሙንኩ ቅጡወ ይ ሰውኖ፤ ህካንን ጉዕሙንኩ ገግስ ቀልቢን አጥራመቻ ደጉ ሀሰሰኖ።

6 ህትን በር ከበጀኖ መንቹ ቀርቸ ኢስ ከበጀተ ይ ከበጀኖ፤ እተኖንኩ መገኑ ገለትጨኖሲቤቸሃ ቀርቸ ኢስ ከበጀተ ይ እተኖ፤ እትበ መንቹ ቀርቸ ኢስ ከበጀተ ይ እተኖበ፤ እስን መገኑ ገለትጨኖ።

7 ኒቻ ገይሀሰ ሄኦኖላከ ገይሀሰ ሬሆኖ መንቹ ኖበአ።

8 ህካን እኮቤቸሃ ፎሊን ሄዕኖም ጎሬ ቀርቸ ኢሲሃ ሄዕኖም፤ ሬኖምጎሬ ቀርቸ ኢሲሃ ሬኖም፤ ህካን እኮቤቸሃ ሬኖምጎሬላከ ሄዕኖም ጎሬ ነኡ ኢሰራን።

9 መሰንትሰ መሲህ ሬቶሀኑኑተላከ ፎሊን ኖሀኑኑተ ቀርቸ እሆተ ሬይ ሬሆቻ ኬዕኖኡ።

10 እመክ ቤት አሌን ፈረደንቲሁ ሚሃት? ህከረንገ አመክቤቱ ህንቃንቲሁ ሚሃት? ነኡ ጉዕሙንኩኔን መገን ፍርድ ቦርጭመ ብሬን ኡርኖም።

11 «ቀርቸ መገኑ እን ሄኦሚሃ እኮምቤቸሃ

መኑ ጉዕሙንኩ ኢሳሃ ሰገደኖ፤

አረቤንከሰ እን መገኑ እሁአ መሰከረኖ» የመም ከተበሞኡ።

12 ህካን እኮቤቸሃ መት-መቱንኩኔ ገይኔተኔሃ መገኒሃ መሰለ አሰኖም።

መኒሃ ጉፍቹ እሂቻ አገዕሩ

13 ህካን እኮቤቸሃ መት-መትኔ አሌን ፈረንዲንከ፤ ህከን ወጥ አዪሁ አመሰ ቤቲሃ ጉፍቹ እህበገ ህከረንገ አመሰቤቱ ሉሲሰኖበአገ አገዕሩን።

14 እን ቀርቸ ኢሲሃ እኮምቤቸሃ እቸት ገይንተሴ ኒጀሰ እሁ ሆጉስ አጥራመቻ ደጎም፤ እኮጎሬ መቱርቸሃ «ጎጀሰየ» የኖ መንቹሃ ሁኩን ጎጀሰ እህኖሰ።

15 እት አታንት እቻን አመክቤቱ ቫዘኖ እኮቻ ኢታን ፈንቀላንቶንትበአ፤ ህካን እኮቤቸሃ መሲህ እስተኔሃ ሬኖ መንቹ አታንት እቸ መሳን በአኖገ አቶት።

16 ህትን ክዕኔሃ ኖ ጡመ ጠወ ህንቁኖገ አቶኖቹ።

17 መሰንትሰ መገን ምምነቱ ጠሊሊ አያኒን እኮ ፈይመተ፤ ወገሬትየላከ ሙንዲኑተ ቤሉ እቴኖሃለከ እጊኖሃ ጠወበአ።

18 ከን ሃሌን መሲህ ካደመኖ መንቹ መገኑ ሙንዲሲሰኖ፤ ሁኩ መንቹ መንሀኔን ማሰአሞአሃን።

19 ቴሱ ወገሬቱ ደገመኖሁላከ ገገዔኔ ጠረኝጨቀማም ምቃሃ አሞኑን።

20 እቴኖርቸሃ ይቴን መገን ሆጉተ ቤንሱንከ፤ እቸት ጉዕሙንኩ ነጠሃን፤ ጠዉ እኮጎሬ ሆሎ መነ ሉሲሳ እቸተ እቱ ሉጨንቫን።

21 ህካን እኮቤቸሃ ማለ አቱ ግቡ ህከረንገ ወይን ጠጀ አጉ ግቡ ህከረንገ መነ ሉሲሰኖርቸ መቱርቸሃ እኡ ሆጉ ጡመሃን።

22 ህትን ኬሳሃ ኖሄ አመዕነቱ መገንላከ ኪ በላን እሁን፤ ጡመ ይ እአኖ ጠሞን ቀልቡስ ቀንጠኖ ጠዉ ኖሰበአሁ ማሰአሞአሃን።

23 ጠዉ እኮጎሬ ሸከኖ መንቹ እቸጎሬ አመዕነቲን እኮበአቤቸሃ እስ አሌን ፈረደሞኡ፤ መሰንትሰ አመዕነቲን እህበርቸ ጉዕሙንኩ ጨብሃን።

15

ሆሎ መነ ሙንዲሲሱ ሀሰሰኖሃ እሁሰ

1 ነኡ አመዕነቲን ጠረኛኑተ እኮጎምሩ ላፍ አጀንተ እጁ ሀሰሰኖኔ ቤሉ ገዔኔ ጠለዕለ ሙንዲሲንሳምረ እሁ ሀሰሰኖኔበአ።

2 መት-መቱንኩኔ አመዕነቲን ጠረኝኖተ ደግላለኖስ ጠወ እኢን ሆሎ መነ ሙንዲሲንሱ።

3 መሰንትሰ «ኬሳሃ ቦርሬመ ቦርሩ ኢ አሌን እኮኡ» የመም ከተበሞገን እኮሰ ቤሉ መሲህ ገዔሰ ሙንዲሲሸበአ።

4 ጠሊሊ መጻፋቻ ደንጋም አታዕለንላከ ሰበሪን ኔሳሃ ተብሶህ ሄኑኔተ ከኒቻ ብርተ ከተበንቶሩ ጉዕሙንኩ ተማርሰቶኔተ ከተበንቶኡ።

5 አታዕልላከ ሰብር ቀርቸ ገገውንኩክዕኔ መሲህ ኢስ ምሳልተ አሞንቲን ሚጡብ ሄኦኖ ሰውት እሱንክዕኔ።

6 ህትን ቀርቸ መሲህ ኢስ እኑ መገኑ መቶ ቀልቢንላከ መቶ ላጋን ኬዕምሴንተገ እኡንክዕኔ።

እንጁል ላገት አመዕንገ መኒሃ ዲዲብሰሙሰ

7 ህትን መገኑ ኬዕምኝ ደኑተ መሲህ ገይሲሃ አዕይ ቶጎኒገን ገገዔክዕኔ ቶቃቀሚ።

8 ህካንን ጠወእን መገኑ ወዕኔ እናካተ አሴ ተብሶሁ እሆተለከ መገኑ ሀንቅ እሁሰ ደኅኖተ መሲህ አይሁድ ካዲንቸ እኮ* ዩሃን።

9 መሲህ አይሁድ ካዲንቸንኩ እኮንኩ እኮ ዎልት መሰት አይሁድ እክበሩ መገኑ መረርሲጭሰተኔሃ ገለትጭቶታት፤ ሁኩንን።

«ኡመት በላን ገለትጫንኬ፤ ሱዕምሃክ መዘመራን ገለት ሆንጠህሳም»

የመም ከተበሞጋት።

10 ህትን።

«አዕኑ አይሁድ እኬንቡሩ መገኑ መጠር ኡመቲን ሜጡብ ተሽ ዩንክዕኔ» የመም ከተበሞኡ።

11 ህትን

«አዕኑ አይሁድ እኬንቡሩ ቀርቼ መገኑ ገለትጭዬ፤ ህትን ኡመቱ ጉዕሙንኩ ገለትጨን» የመም ከተበሞኡ።

12 ህትን እሰያሰ

«እሴዬ ዘሬኝ ከለቀመኖሁ አሜተኖ፤ አይሁድ እህብ ኡመት ገሸኖ ዋና እህኖ፤ እሰን ተብሳሰ እሰ አሌን አታእ» የመምኡ።

13 ተብሶክኔ ጠሊሊ አያን ዎልቃን ነጸን መሮታ ተብሴ መገኑ እሶን አመዕኒንከክዕኔ ሙንዲኑተለከ ወገሬት ዊንሸ አሱንክዕኔ።

ጳውሎስ መለል ከተቦ መሰተ

14 አመኤ ኦሶ! አዕኑ ጡምማን ዊንቲንታኒረ እኬንተጋ፣ ደረን ዊንቲንተረ እኬንተገለከ መቱ መቱክዕኔ ተማርሱ አታልቲንነት ገጥራመኝ ደጎም።

15 ጠወ እኮጎሬ መት-መቶ ጠውተኔሃ ቃግሶህዕኔተ ይ መገኑ አሴኤ አሰቶን መለልን ከተቦንክዕኔ።

16 ሁኩ አሰቱት አሰንቶኤሁ መገን ተሸት ላገተ አይሁድ እህቡ መኒሃ ዱዱብሲን ቁሰች ገ እክ መሲህ አሰ ካደሞታት፤ ህካን እኮቤቺሃ አይሁድ እህቡ መኔ ጠሊሊ አያኒን ማሰክንቶተለከ መገኑ ሙንዲሲሰኖ ክትመ እክ ሆንጠኩንተ ካደማሚት።

17 ህከን መሳን መሲህ ኢሲን መገኑ ካደሞተ አታዕሊንከኤ ቦናም።

18 አይሁድ እክበሩ እዘዘንታ ገ እኢሃ መሲህ ኢ ላጋንለከ ሆኅ መሳን አዕዮ ጠው ቤሉ መቱርቹሃ ጠወኢሃ መለላምበኢ።

19 ህትን ሎርሎረ አጀብቶንለከ ገረምሲጨኖ ሆኅን ጠሊሊ አያን ወልቃን ዩሩሳሌሚችለከ አዘጋገቻ ጀመር አልዋሪቆን ዩኖ ባዱ ኢሊ መሲህ እንጂሊ ሹል ተማርሰኖም።

20 ህትን ጉዕመ ወክት ሃሸአቱኤ ዎሉ መኔ ቀበቦ ቀበብ አሌን እጅሩ እሁዕን መሲህ ሱዕም ሞጮጨምበአቤቸን ተሸት ላገተ ዱዱብሱሃን።

21 ሁኩንን።

«ከኒች ብርተ እሰተኔሃ መቱርቹሁ ኩለሞሰበኢ መኔ ለእኔ፤ እሰተኔሃ ሞጮጭትበሩ አጥራመታኢ»

የመም ከተበሞጋት።

ጳውሎስ ሮም ከተመ መሮተ ያዱሰ

22 ልገለ ወክት ክዕኔቤቹ አሜቶተ አታሉ ሆኅሚሁ ዎሰን ሄጭ ጠወዕዮም መሳኒት።

23 ጠወ እኮጎሬ ቱሱ ከን ኦሎን ዮ ባዶን አኣም ቤቹ ዮበአቤቸሃ፤ ህትን አበ ዘመኒች ኪሽ ክዕኔተ ለአህዕኔተ እቡ ሃሸአቱት ዮኤቤቸሃ

24 እሰፔን ባዱ መራም ዎቄ አዲን ለኑህዕኔተ ያጀም። ቀዎ ጌሲሃ ክዕኔኤን ሜጡብ ተሽ ይሃዕኔ አገሮሚች ኤተርን ዎቃኤ ጀመርተ አታልሲሰኖኤርቹ ሀዕልቲንተኤ ገ ተብሳ አጸም።

25 ቱሱ እኮጎሬ አመዕናኖተ ደግለለኖርቹ ኣእ ዩሩሳሌመ መራም።

26 መሰንትሰ መቄዶንለከ አካይ ባድ አመዕናኑት ዩሩሳሌም አመዕናኖ በላን ዮ ቡጥቻኖተ ሀዕልቶተ ሀሰቤቸሃት።

27 እሰ ህካን አቶተ ሀሰኢሁ እኡ ሀሰሰኖሰቤቸሃት፤ መሰንትሰ አይሁድ እህቡ መኔ አይሁድ መኒሃ መገኑ አሴ አያን በረከተ ቤቀማኑተ እኮች አይሁድ እህቡ ዮሰርቹን አይሁድ ሀዕሉ ሀሰሰኖሰ።

28 ህካን እኮቤቸሃ ተ ሆጉተ ሹሎሚችለከ ጭምዬኢ ብረ አሴንሳች ኤተርን እሰፔን ባዱ መራም ዎቃን ክዕኔተ ለዕይ ህጋም።

* 15:8 መሲህ አይሁድ ካዲንቸ እኮ፡- የኖህ ግርኩ ጡርከም ካዲንቸ የኖ። 15:9 2 ሳሙ. 22፡50፤ መዝ. 18፡49። 15:10 ዘዱ. 32፡43። 15:11 መዝ. 117፡1። 15:12 ኢሳ. 11፡10። 15:21 ኢሳ. 52፡15። 15:22 ሮጫ 1፡13። 15:26 1 ቆር. 16፡1-4። 15:27 1 ቆር. 9፡11።

29 ህዳን እኩቤቼሃ ክዕኔቤቼ እሚታም ወክት መሲህ በረከተ ዊምማን እኛ እሚታምገ ደጋም።

30 እመኤ ኦሶ! ኢን ሜጡብ እኩን ኢተኔሃ መገኑ ጠረገገ ዱኢ እኖተ ቀርቸሃ መሲህ ኢሲንለከ ጠሊል እያን ኢታን ኡጫንክዕኔ።

31-32 መገኑ ዩ ገሬ መንዲኖን ክዕኔቤቼ እሚቸ ክዕኔን ሜጡብ ፎሎጮተ አይሁድ ባዶን ዮ እመዕንበ መን እንጋቸ ፊሶኤተለክ ዩሩሳሌም ከተማን እአም ሆጉተ እመዕናኑተ መንዲሰሳኢታ እኩተ መገኑ ኡጫዩ።

33 ወገሬት መገኑ ጉዕሚንከክዕኔ ሜጡብ እሁን፤ እሚዕን።

16

ጳውሎስ ወገሬት ሶሁስ

1 ፊቤን ክንክሪያ ከተማን ዮ እመዕናኖ ዱኢ ምናን ካደንታ እመዕንንቶ አመኔ ቤቱተ እሁሴ እን መስከራም።

2 እሲን ልግብ መንለከ ኤሳሃ ሀዕልቶአተ እኩቤቼሃ ጠሊላኖተ ሀሰሰኖ ዋቄን እሴተ ቀርቸ ሱዕሚን ቶገን ሀሰሰኖሴርቸን ጉዕሚንን ሀዕልዬሴ።

3 መሲህ ኢሰ ሆጎን ኢንን ሜጡብ አተ ጳርሰቅለለከ እቁለሁ «ወገሬቲ» ይዬሰ።

4 እሰ ኢተኔሃ ፎልሰ ህግስ ኣቶአራን፤ ህዳን እኩቤቼሃ እን ጠለዕለ እሁዕን አይሁደ እህበ መኒቸ መገኑ አመዕኔ መኑ ጉዕሚንኩ ገለትጭታሳት።

5 ህትን እሰ ምኔን ጭምይታ እመዕናኑተ «ወገሬት» ይዬ፤

ህትን እሰይ ባዶን ወዕና መሲህ እመዕንቶለክ እኒሁ አበ ኢታንስ ኤጼኔጦሴ «ወገሬቲ» ይዬሰ።

6 ክዕኔ በላን ጠረኝት አቶ መርየመ «ወገሬቲ» ይዬሴ።

7 ህትን አሳበ በላን ደገንቶአረለክ ኢችን ዎዕነ መሲህ እመዕንቶአረ ህትን ኢንን ሜጡብ ኡሱረንቶ እሉኤ እንድርኒቆኔለክ ዩንያሴ * «ወገሬቲ» ይዬሰ።

8 ህትን ቀርቸ ኢሲን ኢታንስ እንጽልያጦሴ «ወገሬቲ» ይዬሰ።

9 ህትን መሲህ ሆጎን ኒንን ሜጡብ እአኖ ኡርባኖሴለክ እን አበ ኢታንስ እሰጣቆሴሁ «ወገሬቲ» ይዬሰ።

10 ህትን መሲህ እሁስ ፊተንም መስከረሞስ እጼሊሴ «ወገሬቲ» ይዬሰ፤ ህትን አርሰጦቡሎሴ ምኒ መን «ወገሬቲ» ይዬሰ።

11 ህትን እሉኤ ሄርድዮን «ወገሬቲ» ይዬሰ፤ ህትን ነርክሲስ ምኒ መኒቸ ቀርቸን እመዕንቶአረ «ወገሬቲ» ይዬሰ።

12 ህትን ቀርቸ ኢሲን አታ ካዲመተ ቱሩፋይናለክ ትርፎሴሁ «ወገሬቲ» ይዬሰ፤ ህትን ቀርቸ ኢሰ ሆጉተ ጠረኝት አታአረለክ መሲህ ኢታን አበ ኢታንሴ ጸርሲዳ «ወገሬቲ» ይዬሴ።

13 ህትን ቀርቸን መጠረሞ ሩሬሴሃ «ወገሬቲ» ይዬሰ፤ ኤሳሁ አለሰገ ኢትታኤ አማተሰ ወገሬት ይዬሰ።

14 ህትን አሰክርጦሴሁ፥ ፍሊንኔለክ ሄርሚሴሁ እሳንን ሜጡብ ዮ አመ ኦሶታ «ወገሬቲ» ይዬሰ።

15 ህትን ፊሎሎጎሴ፥ ዩልዮሁ፥ ኔርሴሁ፥ ኔርሴ አመቤቱተ፥ ኦሎምፓሴ እሳንን ሜጡብ ዮ አመዕናኑተ ጉዕሚንክ «ወገሬቲ» ይዬሰ።

16 ህትን ጡመ ሰንቃቀሚን ወገሬትጤቀሚ፤ መገን እመዕናኖ ጭምት ዱኢ ምናተ ጉዕሚንክ ወገሬት ሶኮሀዕኔ።

ጎፍሚ ሸከነተ

17 እመኤ ኦሶ! አዕኑ ተማርቲንተ ትምርቲን ኦደንታአረለክ በላንክክዕኔ አደደመተለክ ጉፍቹ እሀርቸቹ ኤባ መኒቸ እገዕርቶናተ ኡጫንክዕኔ፤ እሳቸ ሆኚ።

18 ህትኔ መኑ ገጧሰ ቤሉ ቀርቹኔ መሲህ ካደንትበራን፤ እሰን እመሰልት ጡመ ጠወእን ጎደበ ላፈ መን ቀልብ ሉሲሳኣ።

19 አዕኑ እንጂል ላጋተ እዘዘንቴንተረ እኩንተገ መኑ ጉዕሚንኩ ሞጮጤ፤ቤቼሃ ክዕኔተኔሃ እን አበ መንደዕኖም፤ ጠጧ ኢኮጎሬ ጡመ ጠዋሃ ሀይቻኑተለክ ሂለ ጠዋሃ ገዋኑተ እኩኖተ ሀሳም።

20 ቲሁ ወገሬት መገኑ ደዕል ሸይጣንቹ ሎካቸክዕኔ ዎርን ደዕል ቀጠቀጠና፤

ቀርቹሃኔ ኢሰ አሰቱት ክዕኔን ሜጡብ እኩን።

21 ኢን ሜጡብ እአኖ ጥማቶስ ወገሬት ሶኮሀዕኔ፤ ህትን እሉኤ እኮህኡተ ሉቅዮሰለክ ኢያሶን ሶሲጳጥሮስ ወገሬት ሶኮሀዕኔ።

22 ህትን እን ከን ደብዳቤ ከተባንቹ ጤርጦስ ቀርቸ ኢሰ ሱዕሚን «ወገሬት ዮንተንንዶ?» ያንክዕኔ።

16:3 ሶቀ. 18፥2። * 16:7 ዩኒያሴ፡- የኖሁ መት-መቱ ለህ ክታበት «ዩሊያ» ይታሉ። 16:13 ማር. 15፥21። 16:21 ሶቀ. 16፥1።

23 ኤሳላክ አመዕናኑት ጉዕመንክ ኮህቹ ቶገኖ ጋይዮስ ወገሬት ሶኮህዕኔ፤ ከተምስ ብረ አፈኖ ኤርሰጦስለክ አመኔቤቱ ቋርጦስ ወገሬት ሶኮህዕኔ፤ [

24 ቀርቆሃኔ መሲህ ኢስ አስቱት ጉዕሚንከክዕኔ ሜጡበ እኩን፤ አሚዕን።]

ገለት ዱእ

25 መሲህ ኢስተኔሃ እን ዱዱብሳም እንጂል ሶህኖን መገኑ ክዕኔተ ነጠ አኮህዕኔተ አታለኖ፤ ኩ እንጂሉንኩ አበ ዘማኒሃ ማጠም ሄዕዮ ምስጥር ለሊሰኖሃን።

26 ዘማኒሃ ጉዕሚ መገኑ አዘገገን ምስጥሩ ቴሱ ነብያኖ መጻፈ መሳን ለልዮኡ፤ ኩ ጉዕሙንኩ ኡመቱ እንጂሊ ደገተለክ አመዕነት አደ አዘዘንት አሚቶታት።

27 ህካን እኮቤቹሃ እስ ሜጥቹስ መገኑለክ ሀይቹ እኮ መገኒሃ መሲህ ኢስ መሳን ዘላላሚሃ ኬዕምኙ አሁንስ፤ አሚዕን።

ሶቀማንቸ ጳውሎሴ ዎኔ ሶህኑተ ቆርንቶስ መኒሃ ኣጉሰ

ጳውሎስ ቆርንቶስ መኒሃ ከተቦ ዎኔ ሶህኑተ ከተበንቶኢሁ ቆርንቶሳን ዱእ ምኒ ኣዜን አመዕነት ሂእ አሌን ኬዕዮ ኦርቫተ ሂሪኖ ዎቃሃ ደግሲሰሃ ሰውዪኒት። ህከ ወክት ቆርንቶስ ከተሙ ግሪክ ሀዕኑረ ከተመ እህቶስ እብ አካይያ ዬኖ ሮሞ ባዲሃ ወኔሃ ከተመ እቅ። ህኩ ከተሙ ሎሩ ገግዲ፣ አደዱ ሴሩ አልባሰሊቤቹሃ ሂላ ኮፍአእኖ ጠዉ፣ አደደ ሀይማኖቲን ደገሞሃ ቤቹ እቅ።

ሶቀማንቸ በትሽ መገኑ ኡጨኖ ዱእ ምኒ ኣዜን ሂኦ አደደመተኔሃ፣ ሂላ ኮፍአእኖ ጠውተኔሃ፣ ዝነተ አዕለከ ገደሃ እህተኔሃ፣ አመዕናኖ ሴርተኔሃ፣ ጠሊላ አያን ኣሰቶተኔሃለከ ሬሆቶ ከኢተኔሃት እቅ፤ ህትን ሶቀማንቸ ተሸት ላገተ ከን ጠዕሞቶ አሊን አዕይ አገዕሪን ሆንጠህሰኖ።

«አተቀመ» መገኑ መን አላተ ኣሴ ኣሰቶቶ በተአኖሃ እሁሰ ኩለኖሁ ቶን ሰቅ ፎሎጩ ከን መጻፍ ኣዚቶ በትሽ ደገሞአሃን።

መጻፉሰ አሮሃ

ኣጉሰ (1፡1-9)

ዱእ ምን በላን ኬኦ አደደመተኔሃ (1፡10—4፡21)

ኮፍአእኖ ሀልለከ እበርሰ ሂኡ (5፡1—7፡40)

አመዕናኖለከ አመዕንበ መንተኔሃ (8፡1—11፡1)

አመዕነቱለከ መገኑ ኡጨኖ ሴር (11፡2—14፡40)

መሲህ ኢሰለከ አመዕናኖ ሬሆቶ ኬአተኔሃ (15፡1-58)

ይሁድ ባደን ሂኦ ኦርጨቀንቶ አመዕናኑተ ሀዕሉ (16፡1-4)

መጨረሻሰ (16፡5-24)

1 መሲህ ኢሰ ሶቀማንቸ እሆተ መገን ሰውቲሃ ገእሞሞ ኣን ጳውሎሶችለከ አመኔቤቲቶ ሶሰቴኔሴቶ

2 መሲህ ኢሰ ጠሊላ አዕዮህኩኡተለከ ጠሊላኑተ አኩተ መገኑ ገኤሰ ቆርንቶስ ከተማን መገን አመዕናኖ ጭምት ዱእ ምኒሃ፣ አሰለከ ኒ ቀርቶ አኩ ቀርቶኔሃ መሲህ ኢሰ ሱዕመሰ ጉዕመ ቤቸን ገእንቶህኩኡተ ጉዕሚንከ ሶኮምተ ሶህኑ።

3 ኣንቶኔ መገኒችለከ ቀርቶኔሃ መሲህ ኢሲቶ ኣሰቱትለከ ወገሬቱ ክዕኔሃ እህን።

ጳውሎስ መገኑ ገለትጨገ

4 መሲህ ኢሰ አዲን ኣሰሞሀዕኔ መገን ኣሰቶተኔሃ ክዕኔ መሳን ኣን ጉዕመ ወክትንከ መገኑኤ ገለትጨገም።

5 መሰንትሰ አዕኑ ጠወኤነንተ ጠዋን፣ ኤንኬዕኒን ጉዕማንን መሲህ ኢሰን ጉዕመ አዲንን ቀባጣመተ እኬንታኡ።

6 ህትን ነኡ መሲህ ኢሰተኔሃ ኩልኖንክዕኔ ጠወ ክዕኔ በላን ጠረኝዮኡ።

7 ህከኒቶ ኤተሮን ቀርቶኔ መሲህ ኢሰ አሜቱ አገርቲኔን መገን ኣሰቶቶ መቱርቹህ ሆፈአኖህዕኔበኡ።

8 አሰን ቀርቶኔ መሲህ ኢሰ ፈንቀል አሜተኖ በር ህንቁኖህዕኔርቹ ኖህዕኔበኡረ አኩኖተ መጨርሻ ኢላ ጠረኝቲኔ ሂኡነንተገ አሰኖህዕኔ።

9 መሰንትሰ ቤትንከሰ ቀርቶኔሃ መሲህ ኢሲን ሚጡቡ እሁ ሂኦህዕኔተ ገኤህዕኔ መገኑ አመዕነሞአሃን።

አመዕናኖ በላን አደደመት ሂኡ ሀሰሰኖበኢሃ እሁሰ

10 አመኤ ኦሶ! መቱ ጠወ ጠወኦኖተ፣ መቱ ቀልቡለከ መቱ ሰውቱ ሂኡክዕኔ ቤሉ በላንከክዕኔ አደደመት ሂኦበእገ ቀርቶኔሃ መሲህ ኢሰ ሱዕሚን ኡጫንክዕኔ።

11 መሰንትሰ አመኤ ኦሶ! በላንከክዕኔ ብተት ሂኡሰ ቀሎኤ ምኒ መኑ ኩሎኤ።

12 ህካን ዩ መት-መቱክዕኔ «አን ጳውሎሴሃ» ህከረንገ «አን አጽሎሴሃ» ህከረንገ «አን ጴጥሮሴሃ» ህከረንገ «አን መሲህሪ» ይቲኔንታት።

13 መሲህ ቤህሞአንደ? ህትን ጳውሎስ ክዕኔተኔሃ ሰቀለሞአንደ? ህከረንገ ጠመቀንቲንታሁ ጳውሎሴ ሱዕሚንትንደ?

14 አን ቀርሰጳሴለከ ገዮሴ ቤሉ ክዕኔተ መቱክዕኔ ጠመቆምበኢቤቹሃ መገኑ ገለትጨገም።

15 ህካን እኮቤቹሃ እዪሁ ክዕኔተ «ጳውሎሴ ሱዕሚን ጠመቀንቲንታህረ» ኖተ አታለኖበኡ።

16 ህትን አሰጥፋኖሴ ምኒ መን ጠመቆም፤ ህከን ቤሉ ዎሉ መን ጠመቆምኅር ደጎሞበኡ

17 መሰንትሰ መሲህ ሶኮኤሁ ተሸት ላገተ ዱዱ-ብሶታት ቤሉ ጠመቆታትበእ፤ ዱዱ-ብሳሚንኩ መሲህ መስቀሉ ተሰ እህናበእገ መን ሀይማን ደገንቶ ላጋኒበእ።

መሲህ መገን ሀይመተለክ ወልቀተ እሁሰ

18 መስቀልተኔሃ ኩሌኖ ጠዉ በእ መኒሃ ገዊመተ እኩጎሬ ኔሳሃ ጡምናም መኒሃ መገንተ ዋልቀ።
19 መሰንትሰ «ሀይቾ መን ሀይመንተ ቤሳም፤

እንኪዕናም መን እንኪዕኑ ከማም» የመም ከተበሞእ።

20 ህካን እኮቤቼሃ ሀይቾ መንቹ እዬት? ሕግ እስተማርቹ እዬት? ከን ኣዲንያ አሌን አጥራመቹ ደገናሁ እዬት? መገኑ ከን ኣዲንያ አል ሀይመተ ገዊመተ እህናገ አዕዮበእንደ?

21 መሰንትሰ መገኑ ሀይማንከሰ ከን ኣዲንያ አል መኑ ገይሰ ሀይማን መገኑ ደጋበእገ ሀይማን አዕዮበ፤ ጠዉ እኩጎሬ ገዊመገ ዋለእመኖ ነኡ ተማርሰናም እንጂሉ አመዕንታአረ ጡምሶተ መገን አምሩ እኮኤ።

22 አይሁድ መኑ መላተ ለኡ አትታእ፤ ህትን ግሪክ መኑ ሀይመተ ሃሸእአ።

23 ጠዉ እኩጎሬ ነኡ አይሁዲሃ ጉፍቹ እኮሃ አይሁድ እህበ መኒሃ ገዊመተ እኮ ሰቀለም ሬዮ መሲህ ዱዱ-ብሰናም።

24 ህትን ገእሞ መኒሃ አይሁዲሃ እካን ግሪክ አፎን ጠወአኖ መኒሃ መሲህ መገንተ ዋልቀተለክ መገንተ ሀይመ።

25 መሰንትሰ መገን ገዊመት መን ሀይማኛ በተአእ፤ ህትን መገን ላፍመት መን ዋልቃኛ በተአእ።

26 እመኤ ኦሶ! ክዕኔት መገኑ ገእህዕኔ ወክት ሀትኔ መን እኪንታጎሬ ሰውይዬ፤ መን ሰውቲን በላንከክዕኔ እኡ ሀይመተ ህከረንገ ልግቡ ጠረኛ ህከረንገ ልግቡ ሎርሎሩ መኑ ዮበእ።

27 ጠዉ እኩጎሬ ሀይመተ ሙልሶተ መገኑ ከን ኣዲንያ አል ገወ መን መጠር፤ ህትን ዋልቃመተ ሙልሶተ መገኑ ከን ኣዲንያ አል ላፈ መን መጠር።

28 ከን ኣዲንያ አል ሎረ ጠወ ሆፍሶተ መገኑ ከን ኣዲንያ አል ቀዉ ጠዋሃ፣ ህንቀሞ ጠወለክ ተሰ እኮ ጠወሃ መጠር።

29 ህካን አዕዮንኩ ማለ ኦደዕዮሁ ጉዕሙንኩ መገን ብሬን ቦናበእጋት።

30 እኩጎሬ ክዕኔት መገኑ መሲህ ኢሲን ሚጡቡ ሚጡመት ሄኣህዕኔገ አዕዮ፤ ህካን እኮቤቼሃ መገኑ መሲህ ኢሲ ሀይመኔ፣ ፈይመኔ፣ ጠሊልመኔለክ ወክኑኔ እህናገ አዕዮሰ።

31 ጠሊሊ ሀይማኛን ከተበሞገን «ድከአኖሁ ቀርቾን ድከአን።»

2

ሰቀለሞ ኢስተኔሃ ዱዱ-ብሰሞገ

1 እመኤ ኦሶ! እን ክዕኔቤቼ አሜኛም ወክት መገንተኔሃ መስከሩ * እን ጠወ ደጋምህንገለክ ጡመገ አዕይ ጠወአሚሃ እሁኤ ለሊሶህዕኔተ አሜኛምበእ።

2 መሰንትሰ እን ክዕኔን ሄዕዮም ወክት ሰቀለሞ መሲህ ኢሲ ቤሉ ዋሉ መቲርቹሃ ደጋምበእገ ሙርሲጭዮም።

3 ህካን እኮቤቼሃ ክዕኔን ሚጡቡ ሄዕዮም ወክት ላፈ እክ ዋጀን እበ ሁጠኛ አሌን ሄዕዮም እቅ።

4 ጠወኤለክ ትምርቱኤ መን ሀይመተለክ ጠወ መክሲን እሁዕ፤ መገን እያንለክ ዋልቀተ ለልሲሃት እቅ።

5 ህካን አዕዮሚሁ አመዕነቱክዕኔ መን ሀይመ አሌን ኡሬኢሃ እሁዕ፤ መገን ዋልቃን ድከዕዮሃ እሆታት።

መገን ሀይመተ

6 ጠዉ እኩጎሬ አመዕነቲን ጠረኝቶህኑኡተ ሀይመ ላጋን ጠወዕናም፤ እሁን ቤሉ ጠወዕናሚሁ ከን ኣዲንያ አል ሀይመተ ህከረንገ መጨረሽ በኡ እህና ከን ኣዲንያ አል ገሸኖ ሀይመተበእ።

7 ነኡ ጠወዕናሚሁ እኩጎሬ መገኑ ሄጭ ጉዕመ ዘማኒኛ ብርተ ኬዕም ኚሃኔ ቅጥ አዕዮለክ ማጠሞ እቅ መገን ምሰጥር ሀይመታት።

8 ከን ኣዲንያ አል ገሻኖ በላን ከ ሀይመተ አጥራመቹሁ አዪሁ ዮበእ፤ ደጎአቃኔተ ኬዕምኝ ቀርቹ ሰቀልታሰበእ እቅ።

9 እሁን ቤሉ ጠሊሊ መጻፋን ከተበሞገን

«መገን አልት ለኦበኢሃ፣
መን መጨት ሞጮጭቶበኢሃ፣
መን ቀልቡ ሰውይዮበኢሃ፣

1:19 እሲ. 29፣14። 1:20 እዪ. 17፣17፤ እሲ. 19፣12፤ 33፣18፤ 44፣25። 1:31 ኤር. 9፣24። * 2:1 መገንተኔሃ መስከሩ- የኖሁ መት-መቱ ሉህ ክታበት «መገን ምሰጥር ተማርሱ» ይታእ።

መገኑ ኢትታህነኡተ ቅጥ አዕዮኡ» ዮና።

10 ኔሳሃ እኮጎሬ መገን እያን መሳጎ ምስጥርስ ለሊሾኔ፤ መገን እያኑ ጥዕላሸ እኩ መገን ሰውቱ ፈቆዕናን ጉዕመ ጠወንከ መረመረና።

11 መጎተኔሃ እኮአቀ ገይሰ እያን ቤሉ እሶን ሄዕዮ ሰውት ደገኖህ አይቶ? ህትን መገን እያን ቤሉ መገን ሰውት ደገኖህ አይሁ ዮበእ።

12 መገኒች አሰሞኔርቹ ደንጎተ መገን እያን ቶንጎም ቤሉ ከን ኣዲንያ አል እያን ቶንጎምበእ።

13 ህካን እኮቤቹሃ ነኡ አመዕነት ጠው አመዕነት መኒሃ ተማርስናሚሁ መኒች ደገመኖ ሀይማን እሁዕን መገን እያንች ደገመኖ ሀይማኒት።

14 አመዕነቱ ዮሰበእ መንቹ መገን እያንች ቶጎተ አታለኖበእ፤ መሰንትሰ ህትኔ ጠው እሲሃ ገውመተ፤ እያንን እክ መረመረመኖሃ እኮቤቹሃ ደጎተ አታለኖበእ።

15 መገን እያኑ ዮሲሁ እኮጎሬ ጉዕመ ጠወንከ መረመሮተ አታለኖ፤ እሰ ገዉሰ አይኒ መረመረመኖበእ።

16 ሁኩንን።

«ቀርቻ ሰውት አይ ደገኖ? ሸዘሰተ አታለኖህ አይቶ?» የመም ከተበሞጋት። ነኡ እኮጎሬ መሲህ ቀልቡ ዮኔ።

3

ቆርንቶስ አመዕናኖ ኣዘን ኬኦ ብተተኔሃ

1 አመኤ ኦሶ! እን ከን ኣዲንያ አል ሰውቱ ዮህዕኔገለከ መሲሂን ጨለገ አዕዪት ቤሉ መገን እያንን ዮ መገን አዕይ ጠውኦተ አታሎምበእ።

2 ጠረገ አቸተ እት አታልትቡ ጨለገ እኩንተቤቹሃ እን ኢትሾንክዕኔሁ እኩታት ቤሉ ጠረጎተ አቸበእ፤ ቲሁ እኮጎሬ ጠረጎ አቸተ አቶኖተ አታልቲንተበእ።

3 እዕት ቲሁ ከን ኣዲንያ አል መን ሰውቱ ዮህዕኔ፤ ገገዉንኩዕኔ መት-መቲንከክዕኔ ሞቀኝቴንተቤቹሃለከ ኦደንቴንተቤቹሃ ከን ኣዲንያ አል ሰውትገ እሆንከክዕኔበእንደ? ህት እሁከዕኔ ከን ኣዲንያ አል መን ሰውትገ እሆንከክዕኔበእንደ?

4 ህትን መቲክዕኔ «እን ጳዉሎሲሃ» ዋሉዕኔንገ «እን አጵሎሲሃ» ዮናሃ እኮች አመዕንበ መገን እሆንከክዕኔበእንደ?

5 አጵሎሰ መርቻሃን? ህትን ጳዉሎሰ መሃን? እሰ እዕት አመዕንቶኖተ አቶህዕኔተ ካዲመ፤ መት-መቲንኩሰ ካደንጎት ቀርቹ መት-መቲሃሰ መደቦሰ ሆንኒት፤

6 እን ካሾም፤ እጵሎሰ ሞሃ ኦገሾ፤ ነሴኢሁ እኮጎሬ መገኑሃን።

7 ህካን እኮቤቹሃ ሆንተሰ ቡዕላ እኮሁ ነሴ መገኑሃ ቤሉ ካሾሁ እኮ ሞሃ ኦገሾሁ መርቹሃሰበእሁ።

8 ካሾሁ እኮ ሞሃ ኦገሾሁ ለመንኩ ቅጣሃን፤ መት-መቲሰ ሆንሰ ወጥ ግገ ቶገኖ።

9 ነኡ መገኒን ሜጡሰ አዕናምረ ካዲመ፤ እዕኑሁ መገንተ አቡረላከ መገንገ ዮሚ።

10 መገኑ ኣሴኤ እስቶ ጌሲን ኤንኪዕናመ፤ መንቹ ሞኒ እጃረኖህንገ ቀበበ መክሾም፤ ዋሉንገ እን መክሾም ቀበብ አሌን እጃረኖ፤ ጠው እኮጎሬ ገገዉንኩሰ ከን ቀበብ አሌን ህት አዕይ እጃረኖጎሬ አገዕሩ ሀሰሰኖሰ።

11 ሜጠረ መኬ ቀበብ ቤሉ አይሁ ዋሉ ቀበበ መክሶተ አታለኖበእ፤ ሁኩ ቀበብንኩ መሲህ ኢሳት።

12 ከን ቀበብ አሌን ዋርቄን፤ ብሪን፤ ቡመ ክኒን፤ ህከረንገ ሀቄን፤ ህጤንለከ ገለቢን ግንበ እጃረኖሁ ሄዕዮጎር

13 መት-መቶ መንች ሆንት ለልታ ፍርድ ቡሩ አሜተኖ፤ ህከ በር ጉዕምሰ ሆንት መሃጎር ጌራን ፊተነም ለለኖ።

14 መቲ ግንበ እጃረኖ መንቹ ቀበብሰ አሌን አዕዮ ሆንት ጌራን ፊተነም ሞርተኡዕን ጠረኝ ኡሬጎር ግንበ እጃረኖሁ ዋገሰ ደአኖ።

15 ሆንሰ ጌራን ቡብ በኦጎር ግንበ እጃረኖህን ሞጉ ፈቀኖ፤ እሁን ቤሉ እሰ ገዉሰ ጌረ ኣዘን ህግ ቡቡዕን ፈቆ መንችገ ጡመኖ።

16 መገን ጠሊሊ ሞኒ እሁክዕኔለከ መገን እያኑ ኣዘንከክዕኔ ሄኡሰ ደጌንጎተበእንደ?

17 ህካን እኮቤቹሃ አይሁ ዲእ ሞኒ ድጃጎር መገኑ ገዉንከሰ ድጃኖ፤ መገን ፎሎጨኖ ሞኑ ጠሊላሃን፤ ሁኩ መገን ሞኑ አዕናት።

18 አይሁ ገዉሰ ጣንሰንከ፤ ከን ኣዲንያ አሌን አይሁ ክዕኔ በሊች ሀይቹ እኮሃ አጉጅሰ ጎሬ ሀይቹ እሆተ ገዉሰ ገወ አዕይ ዋለኡን።

19 ከን ኣዲንያ አል ሀይመት መገን ብሬን ገባመተ፤ መሰንትሰ «መገኑ ተንኮንተሰን አፈኖሰ» የመም ከተበሞጋት።

- 20 ሁትን «ቀርቼ ሀይቻኖ ሰውቱ ተሰ እሁሰ ደገኛ» የመሞ ከተበሞኡ።
- 21 ሀካን እኮቤቺሃ ጉዕሙርቹንኩ ክዕኔሃ እኮቤቺሃ አደሁ መናን ድከኤንከ።
- 22 ሁትን ጳውሎሴሃ እኮ አጽሎሰ። ጴጥርሴሃ እኮ እቃ፣ ኣዲንያ አል እኮ እቃ፣ ሄኤ እኮ እቃ፣ ሬሁተ እኮ እቃ፣ ቴሱ የኤሃ እኮ እቃ፣ ኤተሮን አሜተናሃ እኮ እቃ ጉዕሙንኩ ክዕኔሃን።
- 23 እዕኑ እኮጎሬ መሲህተ አለ፤ መሲሁንገ መገንየን።

4

መሲህ አሳበተኔሃ

- 1 ቴሱ መኑ ጉዕሙንኩ ኔሳሃ መሲህ አሳበተ እሁኔለከ መገን ማጠሞ ጠወ ለሊሰ ኤገት አሰንቶኔ መገን አዕይ ሞለኤ ሀሰሰኛ።
- 2 ኤገተ ቶሳ መኑ አመዕነንቶአረ እክ ደገሙ ሀሰሰኛ።
- 3 ኢተኔሃ እኮጎሬ አዕኑሁ ፈረዴንተጎሬ ህከረንገ ሞሉ መኑሁ መኑ ፈረደኖገ ፈረጅአጎሬ ኦርሸት የኤበአ፤ ሀንቅንከ እን ገይኤ አሊን ፈረደተ አታላምበአ።
- 4 እን ደጋምገን እኮጎር ሂላርቹ ኢን መቱርቹሁ የበአ፤ ሀካን የኤ እን «ነጠ እሁኤ ለሊሰኛ» የሃበአ፤ ጠወ እኮጎሬ ኤ አሊን ፈረደኖሁ ጠለዕል ቀርቹሃን።
- 5 ሀካን እኮቤቺሃ ወክቱሰ ኢሉዕነ ቀርቹ አሜቲዕናን ሄጭቲን አዬ አሊን ፈረደኖቹ፤ እሰ አሜተኖ ወክት ቱንሰቾን ማጠሞ ጠወ ፉሽ ለሊሰኛ፤ መን ቀልቤን ማጠሞ ሰውት ለሊሰኛ፤ ህከ ወክት ገገወንኩሰ መገንኒች ሀሰሰኛ ገለት ቶገኛ።
- 6 እመኤ ኦሶ! ክዕኔተ ደግለሎተ ይ ከን ጠሞን ኤሳላከ አጽሎሴ ሞሳልተ አዕይ ጠወዕኖም፤ ሀካንን አዕኖሚሁ «ከተበሞህኒች ህጎት» ይታ ሸዘነ ፍሳረሰ ኒች ተማርቶኖተ ይደቅ፤ ሀካን እኮቤቺሃ መቱ መንቹ መቶ መንቹች በትሴን ህከን መንቹን ድከኤኖቹ።
- 7 መሰንትሰ እት ሚን በተአን? ሁትን ኣአቶንትበአርቹ ሞ የኤ? ህከረ ኣአቶንቲሁ እኮጎሬ ኣአበ መንገ ሚሃ ገሞንከ ድከኣን?
- 8 ቴሱ ሀሰሰኛ ሀዕኔርቹ ጉዕሙንከ ደኢቲንታኤ፤ ቴንገ ቀባጣመተ እኪንታኤ፤ ኒች አደ እኪን ነገሴንታኤ፤ ሀንቅንከ ነገሴንታ ኣቃን ነኤ ክዕኔን ሚጠቡ ነገንሳምቤቺሃ ነገሱክዕኔ ጡመ እቅ፤
- 9 ኣዲንያ አል ጉዕሚንከ መላይካንተ መኒንከ ሙሃሌኖኔሃ እንኮም፤ መሰንትሰ መገኑ ኔሳሃ አሳበሰ ሬሁተ ፈረዴመሰ መንገ መኒች ጉዕሚችን ሞሮን አዕኖኔሃ እኮደኖኤ።
- 10 ነኤ መሲህሃ ይን ገሞኑተ እንኮም፤ አዕኑ እኮጎሬ መሲህ ሀይቻኑተ እኪንታኤ፤ ሁትን ነኤ ሆሳ መን እንኮም፤ አዕኑ እኮጎሬ ጠረጅኑተ እኪንታኤ፤ አዕኑ ኬዕምኛመተ እኪንታኤ፤ ነኤ እኮጎሬ ሆፍኛመተ እንኮም።
- 11 ቴሁ እኮጎሬ ከ ሰአት ኢላ ጎራይኖም፤ ሰገሞባም፣ ከልኖም፣ ኦለማም፣ ሞኒ ሆንግ ኦርጨቀማም።
- 12 ነኤ ገይኔ እንጋን አዕነን ቆንደድኖም፤ ቦርሮኔ መን ማሰዕናም፤ ሸርታኔ ወክት አታዕልኖም።
- 13 ሁትን ቦርሬመኔለከ ሱዕመኔ ቤሴመ ወክት ገወኔ ሆፍናንሰ ፈንቀሸኖም፤ ቴሱ ኢላ ከን ኣዲንያ አል ሁረ እንኮም።
- 14 እን ከ ጠወ ከተባንክዕኔሁ ኢታም እሊኤገ አዕይ ሸዞህዕኔታት ቤሉ ሙልሶህዕኔተ ይደብአ።
- 15 መሃ እኮጎሬ መሲሂን ነሰታህዕኔ፣ ሄኤህዕኔጎሬ ልገቡ እን እሁኖህዕኔሁ የበአ፤ መሰንትሰ እን መሲህ አሰ ኣዲን ኣንጂል ላጋን አሎንክዕኔ።
- 16 ሀካን እኮቤቺሃ ኤሳሃ እኮዴን እምንቶኤተ ኡጫንክዕኔ።
- 17 ህከን መሳን ኢተሞለከ አመዕነም ቀርቹን ቤቲኤ እኮ ጥማቶሴ ክዕኔቤቹ ሱኮም፤ ቤቾን ጉዕማንን አመዕናተ ተማርሴምሀንገ እሰ እን መሲሂን ደኤም ሃዕሮ ሄኤ ሸዘነተ ኩላኖሰ።
- 18 ጠወ እኮጎሬ ክዕኔቹ መት-መቱሰ እን ክዕኔተ ለኦተ አሜታምበኣሃ ኣኮጅንሰ ቦንታኢት።
- 19 እሁን ቤሉ ቀርቹ ዩጎሬ ግደኖ በሬን ክዕኔቤቹ አሜታም፤ ህከ ወክት ጠለዕል ህከን ቦንታ መን ጠወሰ እሁዕነ ሞልቀሳ ደጎተ ሀሳም።
- 20 መሰንትሰ መገን ሞምንቱ ጠለዕል ጠሞን እሁዕነ መገን ሞልቀኒት።
- 21 አዕኑ ሀሴንገታሁ መርቾሃን? ቅጣት በርተ አፍ ክዕኔቤቹ አሜቶተ ሀሴንንደ? ህከረንገ ኢታንለከ ገወ ሆፍሰ አያኒን አሜቶተ ሀሴንን?

5

አመዕናኖ በላን እኮ ሂላ ጠወ

1 ክዕኔ በላን ሙልሳ ዝነት ሄኤሰ ሞጭጭኖም፤ ሁትኔ ዝነት አይሁደ እህበ መኑሁ አእበሃን፤ ሁኩንን አንሰ ጫተ ገይሰ ሞኒ አመገ አዕይ ሄኣኖሁ የኤ የመሞኡ።

- 2 ህዛን እክ ህትኔ ሙልሲሲኖ ጠዉ በላንከክዕኔ ሂእን ሚሃት ቦንቴንገታሁ? ባሰንከ ከን ጠዋን ሻዙ ሀሰሰኖ ህዕኔበእንደ? ህትኔ ሆጉተ አዕኖ ሙንቸ በሊችክዕኔ ከሜ።
- 3 እን ሙሃ እኮ እቃን ሜጡብ ሂእበ ጎሬ ሰውቴን ክዕኔን ሜጡብ ኖም፤ ሜጡብ ሄዕኖምህን እክ ህትኔ ሆጉተ አዕኖ ሙንቸ አሊን ቀርቸሃ አሲ ሱዕሚን ፈረጅኖ፤
- 4 ጭምይቴንገተ ወክት አኒሁ ቀርቸሃኔ አሲ ዎልቃን በላንከክዕኔ ሰውቴን ሄአምቤቸሃ
- 5 መሲህ ለምቅ አሜቶን ከን መንቸ ነብሲሁ ጡሞተ ህትናሞ መንቸ ማል ሰውቴ በኦተ ሸይጣኒሃ ህግሽ እሱ ሀሰሰኖ ደ ፈረጅኖ።
- 6 ህዛን እኮቤቸሃ ቦንክዕኔ ጡመሃበእ፤ ቀቅቼ ራጭቴ አበ ቡኩተ አቦከኖገ ደገኒንተበእንደ?
- 7 ቴሱ እኬንተህንገ ራጭቴ ኖበእ ሃዕር ቡኮገ እኮኖተ ዲንኬ ራጭተ ክዕኔች ቁርሰዬ፤ መሰንትሰ ሻሽግ ሆልቼ እኮ መሲህ አሲ ጎረጠሞኤ፤
- 8 ህዛን እኮቤቸሃ ተንኩተለከ ሂሉ ጠዉሁ ዊሞ ዲንኬ ራጭቴን እሁዕነ ራጭቴ ኖበእ ነጠለከ ህንቁ ዊሞ ጦርሽ ከበጅኔ ከበጅኖ።
- 9 ከኒች ብርተ ከተቦንክዕኔ ሶህኖን ዝነተ አታ መኒን ሜጡ እኮኖቼ ይኖንክዕኔ እቅ።
- 10 ህዛን ዩእ ጉዕመ ከን አዲንያ አሊን ሄአ ዝነተ አታ ህከረንገ ጎራይታ መኒች ህከረንገ ሞጋኖች ህከረንገ ሸርከተ አታ መኒን ሜጡ እኮኖቼ ዩሃአበእ፤ ህዛን እኮጎሬ አዲንያ አሊች ፋሉ ሀሰሰኖኔ ዩሃን።
- 11 እን እኮጎሬ ከተቦንክዕኔህ አመዕናተ እክ ዝነተ አታህኩኤን፤ ህከረንገ ጎራይታህኩኤን፤ ህከረንገ ሸርከተ አታህኩኤን፤ ህከረንገ መን ሱዕመ ቤሳህኩኤን፤ ህከረንገ ሰከርታህኩኤን፤ ህከረንገ ሞግታህኩኤን ሜጡ እኮኖቼ ይይታ። ህትኔ መኒን ሜጡብ አቶኖቼ።
- 12 መገኑ አመዕኔ ጭምቲች አብሊን ኖ መን አሊን እን ፈረደተ ሞ አግሾኤ? መገኑ አመዕኔ ጭምት አዜን ኖ መን አሊን አዕኔ ፈረደንገተበእንደ?
- 13 አመዕንትበ መን አሊን ፈረደኖሁ መገኑሃን፤ ህትን መጻፉን «ሂለ መንቸ በሊችክዕኔ ፋሽቴን ከሜ» ዩገን አዕዬ።

6

አመዕናኖ በሊች ብተተ ከሙ

- 1 ክዕኔች ሙቱ አመዕናንቸ እኮ አመሰ ቤቴን ብተሞ ጎር ጠዕሰ አመዕናኑት ለእን አእኖ ወሞ መገኑ አመዕንቶበእ ዳኛኖበ መርተ ህት መለሊኖ?
- 2 መገኑ አመዕንቶ ሙኑ ከን አዲንያ አሊን ሄአ መን አሊን ፈረደገ ደገኒንተበእንደ? ህከረ አዲንያ አሊን ፈረደንገታሃ እህን ከን ቀዎ ጠው አሊን ፈረደዱ ቁለኖህዕኔንደ?
- 3 ህትን ነኔ መላይክ አሊን ፈረንዳምገ ደገኒንተበእንደ? ህከረ ባሰንከሰ ከን አዲንያ አል ጠዋን ፈረደዱ ህት አታልኖምበእ?
- 4 ቴሱ ገገዉክዕኔ ብተንቴንተጎር አመዕንቶበእለክ ህንቀንቶ መን ብርተ ጠወክዕኔ ህት ሆንጠህሲንን?
- 5 ካን ያሚሁ ሙልቶኖተ ይይት፤ ህት አመዕናኖ በላን ሀራርሶህዕኔተ አታለኖ ባልቀ ኖበእንደ?
- 6 ህከረ ሙቱ አመዕኔ መንቸ ሞሉ አመዕኔ መንቸ ኦደተ አመዕንትበ ዳኛኖበ መረኖንደ?
- 7 ህትን ገገዉክዕኔ ከሰጩንቴን ኦደሙ ክዕኔሃ ቢልኝየ፤ ባሰንከሰ አዕኔ ምርተኡክዕኔ ህከረንገ ጣንሰሙክዕኔ ቆህኖበእንደ?
- 8 እኮጎሬ አዕኔ አመዕንቶ አመዕክዕኔ ኦሱተ ምርቴንገታትለክ ጣንሰቴንገታት።
- 9 ሸኩ ሙኑ መገን ምምንቱ ዎረሰበእገ ደገኒንተበእንደ? ከን ጠዋን ጣንሰንቶኖቼ፤ ፎኩተ አታእሩ፤ ህከረንገ ሸርከተ ሰገዳእሩ፤ ህከረንገ ዝነተ አታእሩ፤ ህከረንገ ጎኑ ጎኒን ዝነተ አታእሩ።
- 10 ህከረንገ ሞግታእሩ፤ ህከረንገ ጎራይታእሩ፤ ህከረንገ ሰከርታእሩ፤ ህከረንገ መን ሱዕመ ቤሳእሩ፤ ህከረንገ ዘረፋእሩ መገን ምምንቱ አጋበእ።
- 11 ክዕኔች ሙት-ሙቱክዕኔ ህትናሙተ እቅ፤ ቴሁ እኮጎሬ ቀርቸ መሲህ አሲ ሱዕሚንለከ ኒ መገን አያኒን ጩቤች ነጠ እኬንታኤ፤ መገኒሃ አደ እኮ ጠሊሊ ኡመትለክ ፈየ እኬንታኤ።

ጅሰሙን መገን ኬዕምኒሃ እኡ ሀሰሰኖሃ እሁሰ

- 12 «ጉዕሙርቸንኩ ፈቀደሞኤ» እኮጎሬ ጉዕሙርቸንኩ ደግለለኖኤ ዩሃበእ፤ ጉዕሙርቸንኩ ፈቀደሞኤ፤ እሁን ቤሉ እኮሰ ጠዋሃ ርሰ እክ ጠገማምበእ።
- 13 ህትን «እቸት ጎዳቤሃ፤ ጎደቡንኩ አቻታት» እኮጎሬ መገኑ ለሙንከሰ ቤሰኖ፤ ጠወ እኮጎሬ ጅሰሙኔ ቀርቸ አሲሃ፤ ቀርቸ አሲን ጅሰሚሃኔ እኮቤቸሃ ጅሰሙኔ ዝናተ ህግገሰ እሱ ሀሰሰኖኔበእ።
- 14 መገኑ ቀርቸ አሲ ሪሆች ኬሾሰ፤ ኔሳሁ ዎልቃንከሰ ሪሆች ኬሰኖ።
- 15 ጅሰሙክዕኔ መሲህ ጅሰሙ እሁሰ ደገኒንተበእንደ? ህከረ እን መሲህ ጅሰሙ መሰ ዝነተ አታ መንቸ ጅሰሙ እኡ ሀሰሰኖንደ? ሆር ሀሰሰኖበእ!

16 ዝነተ ኣታ መንቻን ደቀመና መንቻ እሲን ሜጡ ጅሰመ እሁሰ ደገነንተበእንደ? «ለሙንኩሰ መቱ ጅሰመ እካእ» የመም ከተበምእ።

17 ቀርቺን ሜጡበ ገውስ መቱ ኣእኖ መንቻ እሲን ሜጡበ ኣያኒን መቱ እሀኖ።

18 ሀካን እኩቤቺሃ ዝነተ ኣቶኖቹ፤ መቱ ኣእኖ ሞሉ ጨቡ ጅሰሚቶስ ኣብሊን እሀኖሃን፤ ጠዉ እኩጎሬ ዝነተ ኣእኖ መንቻ ገይሰ ጅሰም ኣሌን ጨብ ኣእኖ፤

19 ጅሰሙክዕን መገኒቶ ቶገንታኣለከ ኣዜንከክዕን ሄኣኖ ጠሊሉ ኣያኑ ፎሎጨኖ ቤቹ እሁሰ ደገነንተበእንደ? ቱሱ ኣዕን መገንገረ ቤሉ ገይክዕኒረበእ።

20 እሰ ዋጊን ሀዕርኖሀዕኔ፤ ሀካን እኩቤቺሃ ጅሰምንክክዕን መገኑ ኬዕምሹ።

7

ጎጆሃ እህተኔሃ ኣሰንቶ ሸዘነተ

1 ኣዕኑ ከተበንተኤ ጠዊተኔሃ እኩጎር መቱ ሚንቱ ኤቡዕን ፈቆእቃ ጡመሃን።

2 ጠዉ እኩጎሬ ዝነተ ኣእቶ ኣገዕርተኔሃ መቱ-መትሀስ ገይሰ ጫት ሄኡንሰ፤ ህትን ገዬተሴ ገይሴ ጨዉ ሄኡንሴ።

3 ምንሴ እኑ ገይሰ ጫን ሜጡበ ኦሰኣኖ ሀንቅሴ ከሙንከ፤ ህትን ጫንት ጨይንከሴ ሜጡበ ኦሰኣ ሀንቅሰ ከንቱንከ።

4 ጫት ገይሴ ጅሰም ኣሌን ሹምነቱ ኖሴበእ፤ እሴ ጅሰም ኣሌን ሹምነቱ ኖሴሁ ጨዊሃሴት፤ ህትን ጨዉ ጅሰምስ ኣሌን ሹምነቱ ኖሴበእ፤ እሰ ጅሰም ኣሌን ሹምነቱ ኖሴሁ ጫታት።

5 ህትን ዱኣ ኣቶኖተ ኢተቀንቲን ቀዎ ወክቲሃ ኣገሩ እህባቶ ገገዉክዕን ከዕመቀንቶኖቹ፤ ህትን ገዉ ኣገዕሩ ሆግን ሹይጣኑ ሉሲሰኖ ሀዕኔበእገ ፈንቀልቲን ሜጡበ እኩ።

6 ጠዉ እኩጎሬ እን ካን ያንክዕኔሁ ሸዘነገ ያንክዕኔ ቤሉ ኣዘዘገበእ።

7 መቱ ጉዕሙንኩ ኣገ እኩ ኣቃን ኢታም ኣቅ፤ ጠዉ እኩጎሬ መገኑ መት-መትሀስ ኣደደ ኣሰቱተ ኣሴእ፤ ሀካን እኩቤቺሃ መትሀስ መቱ ኣሰቱተ ሄኣሰ፤ ህትን ዎልሀስ ዎልት ኣሰቱተ ኖሴ።

8 ምንሂ እኩበኣሩለከ ህትን ምንሰ እኑ ሬኖ ሜንቱሁ ኤቡዕሳለከ ገልቱዕን ኣገ እክ ሄኑ ኣቃን ጡመ ኣቅ።

9 ጠዉ እኩጎሬ ሄዕሳቲንከ ቡቢቶ ጎጆሃ እህ ቆሀኖቤቺሃ ገዉሰ ኣታዕሉ ሆገ ወክት ጎጆሃ እኩን።

10 ጎጆሃ እኩሁኤተ ኣሳም ትዛዙ ከኒት፤ ሁኩ ትዛዙንኩ ቀርቺሃ ቤሉ ኣሃበእ፤ ገልቶ ጫት ምንሴ ኣኒቶ መለዕላንቱንከ።

11 መለዕላንቶጎሬ ሜጥሃሴ ሄኡን ህከረንገ ጨይንከሴ ሀራዕረንት ሄኡን፤ ህትን ምንሴ እኑ ጫሰ ገፈሩንከ።

12 ዎልሀስ ቀርቹ እሰ እሁዕን እን ያሚሁ መቶ ኣመዕኔ መንቺሃ ኣመዕንቶበእ መንቹት ኖሰጎሬ ኣሴን ምንሴ ኣኒን ሜጡበ ሄኡተ ሀሰ ጎሬ ገፈሩንከ።

13 ህትን ኣመዕንቶበእ ምኒ እኑ ኖሴ መንቹት ምንሴ እኑ ኣሴን ሜጡበ ሄኡተ ሀሾ ጎሬ ገፈርቱንከ።

14 መሰንትሰ ኣመዕንቶ-ምኒ እኑ ኣመዕንቶ መንቻ መሰን መገኒሃ ኣደ እኩሃ እሀኖ፤ ህትን ኣመዕንቶበእ መንቹት ኣመዕንቶ ምንሴ መንቻ መሰን መገኒሃ ኣደ እኩሃ እካእ፤ ሀካን እህባቶ ኣለክዕኔ መገኒሃ ኣደ እኩተ ኣታልታበእ፤ ጠዉ እኩጎሬ ከን ሃሊን ሄኡንተ ጎር ኦሱክዕኔ መገኒሃ ኣደ እኩሃ እካእ።

15 ኣመዕናንቹ እኩበእ ኣዱ ኣደ እሆተ ሀሾ ጎር ኣደ እሆን፤ ጠዉ እኩጎሬ ከን ወክቲን ኣመዕናንቹ እኩሀ ምኒ እኩ እኩ ምኒ ኣመተ መቶርቻን ግዳጅሴኖሰበእ፤ መገኑ ገኤይሁ መገሬቲን ሄዕኖታት።

16 እት ኣመዕንቶንት ጫት ኣመዕንቶ ምንክ እን ጡምሳንትጎር ሚን ደገን? ህትን ኣመዕንቶንት ምኒ ኣኑ! ምንክ ኣመተ ኣይደጎ ጡምሶተ ኣታልታ ጎሬ ሚን ደገን?

መገኑ ገእኖ ወክት ኖመ ሃሊን ተሬገጡ ሀሲሰኖ

17 መት-መቱሰ መገኑ ሄኣ ዬሰ ሃሊንለከ መገኑ ገኤሰ ሃሊን ሄኡን፤ መገኑ ኣመዕኔ መን ጭምቲሃ ጉዕሚንከ ኣሴ ትዛዙ ከኒት።

18 ህትን ጡርከመምቶ ኤተርን ኣመዕኔ መንቹ እዪሁ ሄዕኖ ጎሬ ጡርከመምበእህንገ እሆተ ሰውጭንከ፤ ህትን ጡርከሙዕናን ሄጭ ኣመኔኢሁ ጡርከሚሃ ሀሴንከ።

19 መሰንትሰ መገን ትዛዝ ኣገሩሃ ቤሉ ጡርከመሙ ህከረንገ ጡርከመሙ ሆጉ መቱርቺሃ ደግለላኖበእ።

20 ሀካን እኩቤቺሃ ገገዉንኩሰ መገኖን ኣመዕኔ ወክት ኖ ሃሊን ሄኡን።

21 ህትን እት መገኑ ኣመዕንቶንት ወክት ርሰቹሃ እቅንደ? እኩንት ኣቃ ሆር ሰዉ ይቶት፤ እኩጎሬ ሰዎልድማን ፋልቶተ መኩተ ደኣቶንት ጎር ሆር ኣኩርቶት።

22 መሰንትሰ ሰዎልድማን ሄዕኖግ ቀርቹ ኣመዕኔ መንቹ ቀርቹን ሰዎልድቹሃን፤ ህትን ኣመዕናን ወክት ሰዎልድቹ እኩ መንቹ መሲህየ ርሰቹ።

23 እዕኑ መሰህ ኢሰ ዋግን ህዕራኔቤቼን መኒሃ ርሰ እኩኖቼ።

24 ህካን እኩቤቼን አመኤ ኦሶ! ጉዕሙንኩ ሙኑ ገአሞ ወክት ዮ ሀለቲን እክ መገኒን ሚጡብ ሄኤን።

ጎጆሃ እኩባእ መኒሃለክ ምንሰ እኑ ሬዮ ሚንቲሃ ሆንጠኩ ጠዕምቱተ

25 ቴሱ ጎጆሃ እኩባእ መንተኔሃ ቀርቾ ኢሲቾ ቶጎሞ ትዛዙ ዮኤብእ፤ ጠዉ እኩጎሬ አመዕነሞሚሃ ለሆተ መገኒቾ ማርቱተ ደኤም እኩቤቼን ገይኤ ሰዉት ኣጎንክዕኔ።

26 ከን ዘማን ኦርሸተኔሃ ሙኑ ዮ ሃሊን ሄኤኖረ ጡሙ አኑደናኤት።

27 ህካን እኩቤቼን ጎጆሃ እኩንትጎር ሸርቶተ ሀሰት፤ ጎጆሃ እኩዕነ ዮጎት ጎር ኤቦተ ሀሰት።

28 ጠዉ እኩጎሬ አት ጎጆሃ እኩንትጎር ጨብ እሀኖ ዩሃበእ፤ ህትን መት ህፍቱት ጎጆሃ እኩ እቃን ጨብ እሀኖሴ ዩሃበእ፤ እሁን ቤሉ ጎጆሃ እካ ሙኑ ከን ኣዲንያ አሊን አብ ኦርጨቀንታኦ፤ እዕኑ ከኒቻ ፈቁንታ እቃን ኢታም እቅ።

29 አመኤ ኦሶ! ዘማኑ ገበንቹ እኩቤቼን ከን ወክቲቻ ጀመር ምኒ አመት ዮሲሁ ምኒ አመት ዮሰበእሀንገ እክ ሄኤን፤ ምኒ ኣማኑት ዮሰሩ ዮሰበእሀንገ እክ ሄኤን።

30 ህትን ሻዛሩ ሻዛበእገ እክ ሄኤን፤ ሙንደኣእሩ ሙንደኣበእገ እክ ሄኤን፤ ኦዳተ ህዕርታሩ ኦዳተ ዮሰበእሀንገ እክ ሄኤን።

31 ህትን ከን ኣዲንያ አሊን ዮኢሃ ገይሳሃ አታሩ ጉዕሙንኩ ደግለሸቀንታበእገ እክ ሄኤን፤ መሰንትሰ ከን ኣዲንያ አሊን ዮኢሁ ጉዕሙንኩ ህገኖሃን።

32 እዕኑ ሻዞኑዕናን ህከኒሃ ሄኤኖተ ኢታም፤ ጎጆሃ እኩባእ መንቹ ቀርቾ ሙንዲሲሰኖ ጠዉ ሀሰኖቤቼን ቀርቾ ጠዉተኔሃ ሰዉ ዩኖ።

33 ጠዉ እኩጎሬ ጎጆሃ እኩ መንቹ ምንሰ አመተ ሙንዲሲሰኖ ጠዉ ሀሰኖቤቼን ከን ኣዲንያ አል ጠዉተኔሃ ሰውዩኖ።

34 ህከን መንቻ ቀልቡንኩ ለሙ አደ እኩእሃን፤ ህትን ጎጆሃ እኩባእ መንቹት ህከረንገ ሀፍቱት ማሉሲለክ ሩሁሴ ጠሊሊ እክ ቀርቼሃ እኩተ ሰዉ ይታቤቼን ሰውቱሴ ጉዕሙንኩ ቀርቾ ሆን አሊኒት፤ ጎጆሃ እኩ መንቹት ጫሴ ሙንዲሲሰተ ሀጎቤቼን ከን ኣዲንያ አል ጠዉተኔሃ ሰዉ ይታኦ።

35 ኦን ህት ዩንክዕኔሁ ዋሻዲን አፎህዕኔተ እሁዕነ ክዕኔሃ ደግለለኖ ይዩት፤ ህትን ሀሰሰኖ ሃሊን ሄኤኖታለክ ሰዉቹዕኔሁ ብንዩዕናን ዌመ ቀልቢን ቀርቾ ኢጎን ጠረኝቲን ሄኤኖታት።

36 መቱ መንቹ ኢተቀሞ ጨልተ መዕሲሰንታ ጌሰ እኩ ወክት ገዉሰ አታዕሉ ሆገን ኣኣተ ሆሾ ጎሬ ከመኖሰ ጠዉ ዮበእ፤ እሲንተ ኣኤን፤ ሁኩን ጨብያበእ።

37 ጠዉ እኩጎሬ አዩሁ ኢተቀሞ ጨልተ ኣኣተ ግዳጅሰኖሰ ጠዉ ዮሰበእጎሬ ኣኤሁን ዲንኩተ አታሎጎሬ ጠሰሰ ቀልቤንከሰ ሙርሲጨኤቻ ሁኩ መንቹ ጡሙ አዕዮኡ።

38 ህካን እኩቤቼን ጠዕሚ ጨልተ ኣኤሰ ጡሙ አዕዮኡ፤ ጠዉ እኩጎሬ አኤን ፈቆሁ ቆሀኖሃ አዕዮኡ።

39 መት መንቹት ጨዉሴ ፎሊን ዮ ጌሳን ንክን ኡሱረንቶአተ፤ እኩጎሬ ምንሰ እኑ ሬዮ ወክት ገልታ መንቹ አመዕናንቹ እሁን ቤሉ ሀሰሀኒን ገልቶተ አታልታኦ።

40 ጠዉ እኩጎሬ ኣን ሰውያም ሃሊን ህት ጫት ገልቱዕናን ሄኤ እቃን አብ ሙንዲኖን ሄኤ እቅ፤ ህትን ኤሳሃ መገን እያኑ ዮኤሃ አኑደናኤት።

8

ሸርኬተ ክትመሞ ማልተኔሃ

1 ሸርኬተ ክትመሞ ማልተኔሃ ጉዕሚንከኔ ኤንኬዕኑ ዮኔ፤ ኤንኬዕኑ ቦንሲሰኖ፤ እኩጎሬ ኢተት ጠረኝጎእ።

2 መቱ መንቹ «ኤንኬዕኑ ዮኤ» ይ ሰዉ ዩጎሬ ሁኩ መንቹ ደጉ ሀሰሰኖሰ ጌሰ ሆሮ ደጎበእ።

3 ጠዉ እኩጎሬ መቱ መንቹ መገኑ አቲሰጎሬ ሁኩ መንቹ መገን ቤቾን ኤንኬዕነሞሃን።

4 ህካን እኩቤቼን ሸርኬተ ክትመሞ ማል አትተኔሃ እኩጎሬ ሸርክተ ጉዕሙንኩ ከን ኣዲንያ አሊን ሄኤሳሃ እሁሰለክ መቶ መገን ቤሉ ዎሉ መገኑ ሄኤሳሃ እሁሰ ደንጋም።

5 መሰንትሰ ልግቡ ሸርክትለክ ልግቡ ቀርቾ እኩኣሩ ዮኡ፤ ጠዉ እኩጎሬ ሄንከ ሰማንላክ ኡላን «መጎ» ዩኖሰሩ ሄኤ ጎሬ

6 ጠዉ እኩጎሬ ኒ መገኑ ጉዕመርቹንከ ከለቆለክ ነኤሁ እሲሃ እንኩምሩ መቱ መገኑ እነ እኩኔሁ ዮኔ፤ ህትን ጉዕሙርቹንኩ እሰ አዲን ከለቆሞለክ ነኤሁ እሲን ሄዕናም መቱ ቀርቾ መሲህ ኢሰ ጠለዕል ዮኔ።

7 ጠዉ እኩጎሬ ካን ጉዕሙ ሙኑ ደገኖበእ፤ መት-መቱ ከበሬ አለ ሸርኬን ርሰቀንቶቤቼን ማል አታኢሁ ሸርኬተ ክትሚመሀኒን አት ሰዉ ይታቤቼሃት፤ ህካን እኩቤቼን ቀልቡሰ ላፈ እኩቤቼን ንጅጎእ።

8 ኔጎሃ መገን ኣደ ሆንጠሀሰኖኔሁ እቸተበእ፤ እንትበጎሬ ጤዕዮኔርቹ ዮበእ፤ እንቶምእቃ በርገመኖኔርቹ ዮበእ።

9 ጠዉ እኩጎሬ ሁኩ ሰዎልድሙኔ አመዕነቲን ጠረኝቶበእ መኒሃ ሉሰሰኖሃ እሀኖሰበእገ አገዕርዩ።

10 መሰንታሰ አዲሱ እት ኢንኬዕት ዮኤ ይታገቲሁ ሸርኬ ምኒን ማዳን አፋዕልት እተን አመዕነቲን ጠረኛቡ መንቹ ለዕዮሂገሬ ሸርኬሃ ክትሚመ ማለ እቶተ መለላሮገ አታገትበእንደ? «ኢንኬዕት ዮኤ» ይት ሸርኬተ ክትመዎ ማለ እተኖገ ሀንበለንሰሩሰበእንደ?

11 ሀካን እኮቤቹሃ መሲህ አሰተነሃ ሬዮ ሁኩ አመዕነቲን ላፋ መንቹ ኪ ኢንኬዕነን በእኖ ዩሃን።

12 ከን ሃለን አመዕናኖ አሌን ጩብ አቴነንተለክ ላፈሰ ሰወት ጡላይሴንገተ ወክት መሲህ አሌን ጩብ አቴነንታት ዩሃን።

13 ሀካን እኮቤቹሃ እቶት አመዕናንቹ አመኤ ቤቲሃ ጉፍቹ እሀኖሃ እኮች አመኤቤቱ ሉሰሳሞሀኒች ማለ ሆሮ አታሞበእ።

9

አሳበት እኡ ሀሰሰኖ ጠውተኔሃ

1 እን ሰዎልድቹሃበእንደ? ህትን እን አሳቤቹሃበእንደ? እን ቀርቹኔ ኢሰ ለእዮንሰበእንደ? አዕትንገ ቀርቹሃ ኢሰን አዕዮሞ ሆጎልዮ ላልቹበእንደ?

2 ቀርቹሃ ኢሰን አዕት ኤሳሃ አሳቤቹ እህለ መላተ እኬንተቤቹሃ ሞሎ መኒሃ ሶቀማንቹ እህበሳሬ እን ክዕኔሃ ሀንቅንክ አሳቤቹሃን።

3 ሱዕመኤ ቤሳ መኒሃ ፈንቀሻሞ መሰሉ ከኒት።

4 ኔሳሃ እቲሃለክ አገሃ ሀንቅ ዮኔበእንደ?

5 ሞሎ አሳበገለክ ቀርቹሃ ኢሰ አመ ኦሶገ ህትን ጴጥሮሲገ መገኑ አመዕንቶ ምኒኔ አማኑተ አሞንሰን ሚጡብ ሃሞተ ሀንቅ ዮኔበእንደ?

6 ህከረገገ ሆጎን አጸመን ሄኡ ሀሰሰኖኔህ ጠለዕል እንለክ በርናሳሰቲንደ?

7 ገይሰ ብሪን ሞታደርቹ እክ እእኖ መንቹ ሄኡንደ? ህትን ሞይን ሀቀ ካሽ ላልቹሰ እትባህ አይት? ህትን ለሉ ጠቅ ለልሰ እዙተ አገናበእህ አይት?

8 እን ከ ጠወ ጠወአሚሁ መኑ ሰውየኖ ሃለንትንደ? ሕጉህ ህት የኖበእንደ?

9 መሰንታሰ «ዉጠተ ሞቀሬኖ ቦር እፎሰ ኡሱርቶት» የመሞ ሙሲ ሕጋን ከተበሞኤ፤ መገኑ ሀካን ዩኢሁ ቦረተኔሃ ሰውየኖቤቹሃትንደ?

10 መገኑ ሀካን ዩኢሁ ኒተኔሃበእንደ? ለመንኩ ዉጣች ወጥሰ ደእቶተ አቡረኖህ ተብሴን አቡረኖቤቹሃ፤ ዉጠተ ሞቀረኖንኩ ተብሴን ሞቀረኖቤቹሃ ሁኩ ጠወ ከተበሞህ ሀንቅንክ ኒተኔሃት።

11 ነኡ ክዕኔ በላን መገን ጠወ ዉንጣሞረ እንኮሚች ኔሳሃ ማላሃ ደግለላሮቹ እኣኖሞ ጎሬ ሁኩን ሉረ ጠወንደ?

12 ሞሎ መኑ ክዕኔች ሀሰሰኖሳሃ እኣቶተ አታልታኢሃ እኮች ነኡ በትንሰ እኡ ሀሰሰኖኔበእንደ? ጠወ እኮጎሬ መሲህ ተሸት ላገት አልባዕልታቤቹ ከማሞበእገ ይን ጉዕመ ጠወንክ አታዕልኖሞ ቤሉ ኔሳሃ ሀሰሰኖኔርቹሃ እኣኖተ ሀንሳሞበእ።

13 መገን ምኒን አታ መኑ አታኢሃ መገን ሞኒች ደአታገለክ መገኒሃ ክትሞ ሆንጠሀሴኖ ጠረጴዚች መኑ ክትሚሃ ሆንጠሀሴመርቹች ቤቀንት አታኢሃ ደኔነንተበእንደ?

14 ሀካንገገን ተሸት ላገተ ዱዱብሰታ መኑ ተሸት ላገ ሆጎች ርሰቀሰ ደአታገ ቀርቹ እዘገጥኤ።

15 እኮጎሬ እን ከን ጉዕማንክ ሀንቁች መቶንከሰ ደግለሸቐሞሞበእ፤ ቴሱ ከተባሚሁ ህትኔ ጠወ እሆኤተ ሀሸበእ፤ መሰንታሰ እን ድክአሞ ጠወ አዲሁ ተሰ እኣኖሀኒች ሬሁ ቆሀኖኤ።

16 ህትን ተሸት ላገተ ዱዱብሱ ኤሳሃ ግደ እኮቤቹሃ ተሸት ላገተ ዱዱብሲንከኤ ቦናምርቹ ዮኤበእ፤ ሀካን እኮቤቹሃ ተሸት ላገተ ዱዱብሰበጎሬ ኤሳሃ አዩ!

17 መሰንታሰ እን ገዉእ እት እንጂለ ዱዱብሳሚሃ እኮምጎሬ ሞጉ ዮኤ፤ ጠወ እኮጎሬ ግዲን እኣሚሃ እኮምጎሬ ኤገት እሰንቶኤቤቹሃ እኣሚት ዩሃን።

18 ህከረ ሆጎኤ ሞጉ መርቹሃን? ቴሱ ሆጎኤ ሞጉ ተሸት ላገተ ተማርሴምቤቹሃ ዮኤ ሀንቅ ደግለሸቐሙዕናን እንጂለ ተማርሳሞ ሆጉኤን ደሞዝ ቤሉ ተማርሱሃን።

19 መኒች ጉዕሚችን ሰዎልድቹ እኮምጎሬሁ ልግብ መነ ፈይሶተ ይ መኒሃ ጉዕሚንክ ገጉኤ ርሰቹ አዕዮሞ።

20 ህትን አይሁድ መነ ጡምሶተ ይ አይሁዲሃ አይሁድገን እኮም፤ ህትን ሕግ ኣዜን ሄዕባጎሬሁ ሕግ ኣዜን ሄኦእረ ጡምሶተ ይ ሕግ ኣዜን ዮ መንገ እኮም።

21 ህትን ሕጉ ዮበእ መነ ጡምሶተ ይ መንገ ሕጉ ዮኤሃለክ መሲህ ሕግ ኣዜን ሄዕዮሚሃ እኮምገን ሕጉ ዮበእ አይሁድ እኮበእ መኒሃ ሕጉ ዮበእ መንገን እኮም።

22 ህትን አመዕነቲን ላፈ መነ ጡምሶተ ይ ላፈ መኒሃ ላፈ መንገን እኮም፤ አታልሲሾኤ ጌሲን ቀዉ መነ ጡምሶተ ይ ጠዋን ጉዕማንን መኒሃ አሰገን እኮም።

23 እን ተሸት ላገ ማሰተ ቤቀማንቹ እሆተ ይ ተሸት ላገተኔሃ ህከ ጉዕመንክ ጠወ አዕዮሞ።

24 ሃጫቀሚናቤቾን ደጉደናሁ ጉዕሙንኩ ሃጫቀመኖገለከ ጠለዕል ሚጥቼስ ሸልማት ኣኣናገ ደገነንተበእንደ? ህትን ሸልማት ደኣቶኖተ ሃጫቀሚ።

25 ሃጫቀመኖሁ ጉዕሙንኩ ጉዕመርቾንን ጅስመስ ጠረኝሽ ቅጥኣኣና፤ እሰን ህት ሆጋኢሁ በኣናሃለከ ወክቲሃስ እሆኖ ሸልማት ደኣሃት፤ እኩጎሪ ነኡ ሆንጋሚሁ በኣናበኣሃለከ ዘላላሚሃ እሆኖ ሸልማት ደኣሃት።

26 ህካን እኩቤቼሃ ኣን ሰውቱ ኖብእ መንገ ደጉዳምበእ፤ ህትን ቦብረ ጠንጠን ዎቀረኖ መንቾገ ጠለዕል ኣኣምበእ።

27 ጠወ እኩጎሪ ዎሎ መኒሃ ዱዱብሴሚቾ ኤተሮን ገጉኣ ኡቦሚሃ እሃምበእገ ኣልኤ ቀጠኣን ኣዘዘመኖኤገ ኣኣም።

10

ሸርኬተ ሰገዱ ገበእባሃ እሁስ

1 እመኤ ኦሶ! ኣናከኔ ጉዕሙንኩ ጎመት ኣለጎ እክ ኣዎንሰተንሰ ጉዕሙንኩ ባረ ቶልቶገ ደጎናተ ሀሳም።

2 እሰን ጉዕሙንኩስ ሙሲን ሚጡ እኩተ ይት ጎማንለከ ባራን ጠመቀንቶኤ።

3 ህትን ጉዕሙንኩስ መቱ ደነ ሰሚ እቾተ እቶኤ።

4 ህትን ጉዕሙንኩስ መቱ ደነ ሰሚ እጌኖሃ ኣጎኤ፤ ኣጎኣንኩ ኣዎንሰ ሃዕኖ ሰሚ ክኒቾ ቡቆኢሃ እቆ፤ ህኩ ክኑንኩ መሲህት እቆ።

5 እኩጎሪ እስ ኡለ ኡዱማን ጎፎቤቼሃ መገኑ እሳቾ ልገብንከሰ ሙንደዕኖበኤ።

6 እስ ሂለርቼ ሃዕላቶገን ነኡ ሂለርቼ ሃዕላንታምበእገ ኩ ጠወ ጉዕሙንኩ ኣገዕርናምገ ምሳልተ እኩኔ።

7 መጻፋን «መኑ እቶተለከ ኣጎተ ኣፋዕልቶኤ፤ ቦሎቾ ከዲሃ ኬኣኡ»* የመም ከተበሞገን እሳቾ መት-መቱስ ሸርኬተ ሰገዳእረ እኩገን ኣዕኑሁ ሸርኬተ ሰገዳነንተረ እኩኖቼ።

8 እሳቾ መት-መቱስ ዝነተ እት መቶ በሬን ለምድምኔ ሰሶ ኩሚ መኑ ሬቶገን ነኡሁ ዝነተ ኣዕኑንከ።

9 ህትን እሳቾን መት-መቱስ ቀርቾ ተፈተንቶገለከ ዎሪቾ ከር ሺሰገን ነኡሁ ቀርቾ ፊተንከ።

10 ህትን እሳቾ መት-መቱስ ቁንቁቶገለከ ቤሳንቾ መላይኪቼ ቤሾሰገን ኣዕኑሁ ቁንቁቶኖቼ።

11 ኩ ጉዕሙንኩ ጠወ እስ ኣሉን ኣሁስ መጨረሻ ዘማኔን ሃዕናም ነኡ ኣገዕርናተ ትምርተ እክ ከተበሞኔ።

12 ህካን እኩቤቼሃ ጠረኝ ኡሬኢሃ ኣጉደናሲሁ ኣዪሁ ኡብኖበእገ ገውስ ኣገዕሩን።

13 መናን ኢለኖሀኒቾ ኣደ እኩ ኦርሸት ክዕኔ ኣለን ኢልቶህዕኔበኤ፤ መሰንትሰ ዎልቃቾክዕኔ ሎረ እኩ ዎቄን ኦርጨቀንቶኖተ ሰውየኖ መገኑ ኣመዕነሞኣሃን፤ እሰን ኦርሸሰ ኣታዕል ኣታልቶኖተ ኦርሻንከሰ ሚጡብ ኦርሻቾስ ፍልቴነንተ ዎቃሃ ቅጥ ኣዕኖኡ።

14 ቴሱ ኢ ጃላ! ሸርኬተ ሰገዱቾ ኣገዕርቼ።

15 ህካንን ያሚሁ ዘህጭቴነንተረ ኣኬንተቤቼሃት፤ ህካን እኩቤቼሃ ጠወዕኖም ጠውተኔሃ ኣዕኑ ገዛክዕኔ ፈረጃ።

16 ነኡ መገኑ ገለትጭን ኣንጋም ማሰእሞ ጠበቲህ መሲህ ቄገን መቱሃበእንደ? ህትን ሚጡብ ኣንታም ዳቡት መሲህ ጅስሚን መቱሃበእንደ?

17 መሰንትሰ ዳቡስ ሚጥተ ኣኩቤቼሃለከ ህከን መቱ ዳቦቾ ቤቀማምቤቼሃ መሃ ልግብ መነ ኣንኩምጎሪሁ ነኡ መቶሃ ጅስመ።

18 ህንዴ እስራኤል ኡመትተኔሃ ሰውይዬ፤ ክትሚኖርቼ ኣታ መኑ መገኒሃ ክትም ሆንጠህሴኖ ጠረጴዚን ሚጡብ ኖረበእንደ?

19 ህከረ ህካን ያም ወክት ሸርኬተ ክትሚመ ማሉ ቆሀናርቼ የሃሰንደ? ህከረ ሸርክት ቆኣኣ የሃኣንደ?

20 ህትጎተበኤ፤ ህንቄ መገኑ ደግቡ መኑ ክትም ሆንጠህሳኢሁ ሩሃንይሃት ቤሉ መገኒሃበኤ፤ ህካን እኩቤቼሃ ኣዕኑ ሩሃንይን ሚጡ እኩኖተ ሀሳምበኤ።

21 ህትን ኣዕኑ ቀርቾ ጠበቲቾ ኣኒን ሩሃንይ ጠበቲቾ ኣጎናተ ኣታልቴነንተበኤ፤ ህትን ቀርቾ ማዲቾለከ ሩሃንይ ማዲቾ ቤቀንቶኖተ ኣታልቴነንተበኤ።

22 ቴሱ ነኡ መገኑ ኡሙርሲንሱንደ? ነኡ ኣሲቾ ኣበ ጠረኝናምንደ?

10:1 ፋል. 13፣21-22፤ 14፣22-29። 10:3 ፋል. 16፣35። 10:4 ፋል. 17፣6፤ ዘኹ. 25፣1-18። 10:5 ዘኹ. 14፣29-30። 10:6 ዘኹ. 11፣4። * 10:7 ዳንስ ደነሲሃ፡- የ ግርክ መጻፋን ኣለቫተ የኖ፤ ህካን የ ሸርኬተ ሰገዳሰለከ ዝነተ ኣኡስ ላሊሲኖ። 10:7 ፋል. 32፣6። 10:8 ዘኹ. 25፣1-18። † 10:9 ቀርቾ፡- የኖሁ ግርክ መጻፋ ሙሲህ። የኖ። 10:9 ዘኹ. 21፣5-6። 10:10 ዘኹ. 16፣41-49። 10:16 ማቶ. 26፣26-28፤ ማር. 14፣22-24፤ ሉቃ. 22፣19-20። 10:18 ሉዌ 7፣6። 10:20 ዘዱ. 32፣17። 10:22 ዘዱ. 32፣21።

23 ጉዕሙርቹንኩ ፈቀደምኤ፤ እኩገሪ ጉዕሙርቹንኩ ደግለለናበእ፤ ህትን ጉዕሙ ጠወ እኢሃ አታሌና፤ እኩገሪ ጉዕሙርቹንኩ ጠረኝሰናበእ።

24 አይሁ ገይሰ መኩተ ጠለዕል እሁዕን ሆሎ መን መኩተ ሀሱን።

25 ቀልቢችክዕኔ ኬአ ሸክተ ከንቴን እኩስ ጌባን ህሪና ማላ ለሞሱዕናን እቼ።

26 መሰንትሰ ዱንያ አሌንለከ ኣዚሴዮርቼ ጉዕሙንኩ ቀርቻሃን።

27 መገኑ አመዕንዮበእ መንኛ መቱ እቴናሃ ቅጥ አዕይ ገኤጎሪ አዕኑ መርቶናተ ሀሴንተ ጎሪ ኣሲመኔህ ጉዕመንከ ቀልቤንከክዕኔ ለሞሱዕናን እቼ።

28 ጠወ እኩገሪ አይሁ «ኩ ማሎ ሸርኬተ ክትመሞኢሃን» ይህዕኔጎሪ ህከ ኩሎህዕኔ መንኛ መሰንለከ ቀልብ ዋቀሽ ሰውትተኔሃ እቶናቼ።

29 ህካን ይሚሁ መንኛ ቀልብ ሰውትተኔሃት ቤሉ ኪ ቀልብ ሰውትተኔሃትበእ፤

መሰንትሰ ሆሎ መን ቀልብ ሰውትተኔሃ ኢ ሰዎልድማን ፈረዳናህ ሚሃት?

30 ህትን እን መገኑ ገለትጨን እቸምጎሪ ህከ መገኔ ገለት ኣሳም ጠዋን ዋቀሽተ እኤናኤሁ ሚሃት?

31 ቴሱ እቴንተጎሪ እገነተጎሪ መሃ እቴንተጎሪ ጉዕመንከ መገን ኬዕምኚሃ አዕይ።

32 አይሁደ እኮ፣ አይሁደ እኮበእ እኮ፣ አመናና ጭምት ምኒ እኮ፣ አይሁ ቆዕለላግ እቶናቼ።

33 እን ጉዕሙንኩስ ጠጥቶተ ሆሎ መን ጥቅም ቤሉ ገይኤ ጥቅም ሀሱዕን መን ጉዕመንከ አኣም ጠዋን ጉዕማንን ሙንዲሲሳምገን አዕኑሁ ህትን አዕይ።

11

1 እን መሲህ አጉዳምገን አዕኑሁ ኤሳሃ አጉጁ።

ዱአ እኤና ወክት እኡ ሀሰሰና ጠዋተኔህ

2 ጉዕሙ ወክት ቃጌንተኤቤቺሃለከ ክዕኔሃ ኣሲም ትምርተ ጠረኝቴን አፊንተቤቺሃ ገለትጭንክዕኔ።

3 ጠወ እኩጎሪ ጎንኛ ቡዕሉ መሲህ እሁሲ፣ መንኛ ቡዕሉ ምንሴ እን እሁሰለከ መሲህ ቡዕሉ መገኑ እሁስ አጥራመቱን ደጎናተ ኢታም።

4 ህትን ጉንጉዕል ዱአ እኤናሁ ህከረንገ ራገ ጠወአናሁ ጎንቹ አይሁ ገይሰ ቡዕላ እኮ መሲህ ሙልሰና።

5 ህትን ሻሽ ጣጡዕናን ዱአ አታኢሁ ህከረንገ ራገ ጠወአ መንኛት ሀቴንሴ ገይሴ ቡዕላ እኮ ምንሴ መንኛ ሙልሳእ፤ ሁኩንን ሙምሴ ሜዲግ ያለአመና።

6 መንኛት ሻሽ ጣጥባቶ መምሴ ሙርሲሱን፤ ጠወ እኩጎሪ ሙምሴ ሙርሲሱ ህከረንገ ሜዲ ሙልሰናሴሃ እኩጎሪ ሻሽ ጣጡን።

7 ህትን ጎኑ መገን ደጎለከ መገን ኬዕምኛ እኮቤቺሃ ጉንጉዕሉ ሀሰሰናበእ፤ ጠወ እኩጎሪ ሚንቴ ጎኒሃ ኬዕምኛሃን።

8 መሰንትሰ ሚንቴ ጎኒኛ ደገንቶ ቤሉ ጎኑ ሚንቴኛ ደገምበእ።

9 ህትን ሚንቴ ጎኒሃ ከለቀንቶ ቤሉ ጎኑ ሚንቴሃ ከለቀምበእ።

10 ህከን መሰንለከ መገን መላይከት ለኣሲቤቺሃ መንኛት ምንሴ እን ሹምንት ኣዚን እሁሴ ለሊሶተ ቡዕላሴ ጣጡን።

11 ጠወ እኩጎሪ ቀርቻቤኝን ሚንቴ ጎኑ ዮበኢሃለከ ጎኑ ሚንቴ ዮበኢሃ ሄኡተ አታላናበእ።

12 መሰንትሰ ሚንቴ ጎኒኛ ከለቀንቶገን ጎኑ አለመናሁ ሚንቴኛት፤ ህትን ጉዕሙርቹንኩ ደገመናሁ መገኒኛት።

13 ህንዴ ገወክዕኔ ፈረጁ፤ መት መንኛት ሻሽ ጣጡዕን ዱአ እኡ ጡመሃንዶ?

14 ጎኑ ሙምሰ ቅርሱ ጎሲጎሪ ሁኩን እሲሃ ሙልሰናሃ እሁስ ክልቀቴኛ ተማርቴንተበእንደ?

15 ጠወ እኩጎሪ ሙሙ አሰምሴሁ ቡዕላሴ ጣጦተ እኮቤቺሃ ሙምሴ ጎሰቶገር እሲሃ ኬዕምኛያን።

16 ህካን እኮቤቺሃ አይሁ ሄደምተ ሆሽ ጎሪ ኔሳሃ እኮ መገኑ አመዕኔ መኒሃ ከኒኛ አደ እኮ ጠወ ዮኔበእ።

መጨረሻ ጠላሊ ሀርባት ሴረ

(ማቶ. 26፥26-29፤ ማር. 14፥22-25፤ ሉቃ. 22፥14-20)

17 አዕኑ ጭምይቴንተ ወክት ምዕረናህዕኔ ቤሉ ደግለለናህዕኔርቹ እቴንተበእቤቺሃ ከኒኛ ዎሮን ዮ ትዛዝ ኣሳንክዕኔ ወክት እን ክዕኔተ ገለትጭህበእ።

18 መሰንትሰ ጉዕመርቹኝን ሄጭ መገኑ አመዕኔ መንቤኝን ጭምይቴንተ ወክት በላንከክዕኔ አደደመት ሄኡስ ሞጮጭዮም፤ ህከን ጠዋቶ ደሩስ ህንቅ እሁስ አመዕናም።

19 ህካን እኮቤቺሃ ህንቅ መኑ አይኤታጎሪ መለዕለንት ለልቶተ በላንከክዕኔ አደደመት ሄኡስ ግደሃን።

20 እዕኑ ሜጡብ ጭምይቲነንተ ወክት እቲነንታሁ ጠሊሊ ቀርቺ ሁርባትሃበእ።

21 መሰንትሰ እቲነንተ ወክት መቱ-መቱሰ እገሩዕነ ሄጫቀንሺን ገይሰ ሁርባት እተኖቤቺሃ መቱሰ ጎራዬገን ፈቀኖ፤ ህትን ምሉሰ ሰከረኖ።

22 እተኖተለክ እጎኖተ ምኑ ዮህዕዕበእንደ? ህከረገገ መገኑ አመዕኔ ጭምት ዱእ ምኒ ህንቁንነንደ? ህትን መቱርቺህ ዮሰበእ መነ ሙልሴነንደ? ቲሱ እን ክዕኔተ መ ዩ! ከን ጠውተኔሃ ገለትጮህዕኔንደ? ሆሮ ገለትጫንክዕኔበእ።

23 ቀርቺቻ ቶጎሚሁለክ ክዕኔነክ ኣሴም ትምርቱ ከኒቻ ዎርን ዮእሃን፤ ህግሴን ኣሴመ ህንከዕርተ ቀርቺ ኢሰ ዱሰተ ኪሸ

24 መገኑ ገለትጭ ቤጭ «[ህዕዬ እቺ] ኩን ክዕኔተኔሃ ኣሰሞ ጅሰማኤ፤ ካን ኤሳሃ ቃጎኖተ አዕዬ» ዩእ።

25 ህትን ሁርባቲቻ ኤተሮን ጠበቲሃ ኬሸ «ኩ ጠበቲሁ ቁገንከኤ እሆኖ ሃዕርሃ ወእድ፤ ህካን እኒነንተ ወክት ጉዕመንክ ካን ኤሳሃ ቃጎኖተ አዕዬ» ዩሰ።

26 መሰንትሰ ከ ዱሰተ እቲነንተ ወክትሃ ከ ጠበቲሃ እኒነንተ ወክት ጉዕመንክ ቀርቺ ኢሰ ፈንቀል አሜቶተ ኢሊ ሬሁሰ ዱዱብሰቲነንተ።

27 አዪሁ ኣኩዕናንሰ ቀርቺ ሁርባቲሃ ኬዕምኝ ኣሱዕነ እቸጎራለክ ቀርቺ ጠበቲሃ እጎጎሬ ቀርቺ ጅሰሚሃለክ ቁገሃ ኤዳመ እሆኖ።

28 ህካን እኮቤቺሃ መቱ መንቹ ህከን ዳቦቻ እቶተ ብርተለክ ህከን ጠበቲሃ እጎተ ብርተ ገጧሰ መረመሩን።

29 ህኩ መንቹሁ ቀርቺ ጅሰመ መሃጎሬ አደ አዕይ ደጉዕነ እተኖሁለክ ቀርቺ ጠበቲሃ እጎኖሁ ጉዕመንኩ ፍርደ ገይሰ አሊን ኤበኖ።

30 ክዕኔ በሊቻ ልግቡ ሆጎአሁለክ ጥዞአሁ ህከኒሃት፤ ህትን ልግቡሰ ሬቶአሁ ህከን መሳኒት።

31 ገይነተኔሃ አጥራመንት ደንጎም እቃን አሊንከኔ ፈረደመኖበእ እቃ።

32 ጠዉ እኮጎሬ ከን ኣዱንያ አል መኒን ሜጡብ ኒ አሊን ፈረደመኖበእ ቀርቺ ኒ አሊን ፈረደኖኔሁ ኔሳሃ ተማርሶኔታት።

33 ህካን እኮቤቺሃ አመኤ ኦሶ! ቀርቺ ጠሊሊ ሁርባት እቶኖተ ጭምይቲነተ ወክት ገገጧክዕኔ እገዕራቀሜ።

34 ጭምይቲነንታሁ ፍርዲሃ እሆኖበእ ጎራዬአሁ ዮ ጎሬ ምኔንከሰ እቲን፤ ፈቆ ጠውተኔሃ እኡ ሀሰሰኖህዕኔሃ አሜቸም ወክት ኩላንክዕኔ።

12

ጠሊሊ አያን ኣሰቲተ

1 አመኤ ኦሶ! ጠሊሊ አያን ኣሰቲተኔሃ ደጎኖተ ሀሳም።

2 ሀንቁ መገኑ ደጎኑዕኒ ሄኤንተ ወክት ደጎንቡ ጠወ አዎንቲን ጠወእሃ አታልትብ ሸርኬቤቺ መርቲነተገ ደጎንነተ።

3 ህካን እኮቤቺሃ ቲሱ አዪሁ መገን አያን ምልቃን ጠወእን «አሰ ቦርረሞእሃን» ዮኖሁ ሆሮን ዮበእገለክ ጠሊሊ አያን ምልቃን እሀባቻ «አሰ ቀርቺሃን!» ዮተ ሜጡሁ አታልበገ አጥራመቲን ደጎኖተ ሀሳም።

4 አደዱ ጠሊሊ አያን ኣሰቲት ዮኤ፤ እኮጎሬ ጠሊሊ አያኑ ሜጥቹሃን።

5 ህትን አደዱ ክድመት ዮኤ፤ እኮጎሬ ቀርቺ ሜጥቹሃን።

6 ህትን ሆጉተ አኤኖ አደዱ ምቆሁ ዮኤ፤ ጠዉ እኮጎሬ ህካን ጉዕመንክ ጉዕመ መን አዲን አአኖሁ መቱሃ መገኑ።

7 መት-መቲሃሰ ጠሊሊ አያኑ መቱርቺ ለሊሰኖሁ ጉዕመንክ ደግለለኖ ጠዉሃት።

8 ጠሊሊ አያኑ መቶ መንቹሃ ህይማን ጠወእኖ ላገተ ኣሰኖ፤ ሁኩ ጠሊሊ አያኑንኩ ምሊህሰ ኤንኬዕኒን ጠወኡ ኣሰኖሰ።

9 ህትን ሁኩ ጠሊሊ አያኑ መቲህሰ አመዕነቱ ምሊህሰንገ ጥዞኖሙ ፈይሱ አታለኖ ኣሰቲተ ኣሰኖ፤

10 ህትን መቲህሰ አጅብሰሰኖ ጠወ እኡ ምሊህሰንገ ራግ ላገተ ጠወኡ ህትን መቲሃ ህንቁለክ ክዞብ አያን አደ እኤን ደጎኖ ኤንኬዕኑ ምሊህሰንገ ርሰሞበእ አፈን ጠወኡ ህትን መቲህሰንገ አደደ አፈን ጠወኤማህ ፈሰሬኖ ኣሰቲተ ኣሰኖሰ።

11 ጠዉ እኮጎሬ ህከ ጉዕመ ጠወንክ ሁኩ ሜጡ ጠሊሊ አያኑ ሃሸዕዮን አኒንከሰ ቤክ ኣሰኖ።

መቶ መንቹ ጅሰማን ልግቡ ብሊቲ ሄኤሰ

12 ሜጥቻ ጅሰማን ልግቡ ብሊቲ ሄኤሰህንገን መሃ ልግብ እኮጎሬ ጉዕመንኩ ብሊቲ መቱ ጅሰመ እኮህንገን መሰህ ህትኒነት።

13 መሰንትሰ አይሁድ እንኩምጎሬሁ ግሪክ እሮን ጠወዕናም መነ እንኩምጎሬሁ ሮስ እንኩምጎሬሁ ሰዋልድ እንኩምጎሬሁ ነኑ ጉዕሙንኩኔ ሜጡ ጅሰማ እንኩተ መቶ ጠሊሊ አያሊን ጠመቀም፤ ህትን ጉዕሙንኩኔ ህከን መቶ ጠሊሊ አያሊች እንጎም።

14 ጅሰሙ መኬኢሁ ልግቤ ብሊቲቸት ቤሉ መቶሃ ብሊቲቸበእ።

15 ህከን እኩቤቸሃ ሎከት «እን እንገተ አህበቤቸሃ ጅሰሚሃ ብሊትሃበእ» ይቶጎሪ ህከን ይንከሴ ጅሰሚቶ መቱ ብሊት አሁ ፈቃእንድ?

16 መጨት «እን እልተ አህበቤቸሃ ጅሰሚሃ ብሊትሃበእ» ይቶጎሪ ህከን ይንከሴ ጅሰሚቶ መቱ ብሊት አሁ ፈቃእንድ?

17 ህከን እኩቤቸሃ ጅሰሙ ጉዕሙንኩ ጠለዕል እልተ እኩ እቃን ሞጮጩ ህከኔ ሄእኖ እቅ? ህትን ጅሰሙ ጉዕሙንኩ መጨተ እኩ እቃን ሀንሱሱ ህከኔ ሄእኖ እቅ?

18 ጠዉ እኩጎሬ መገኑ ኢቱ ሃሊን ብሊት ጉዕሙንከ ጅሰማን ሀሲሰኖ ቤቸን ሄእኖገ አዕዮ።

19 ህትን ጉዕሙንኩሱ ጠለዕል መቱ ብሊት እኩ እቃን ጅሰሙ ህከኔ ሄእኖ እቅ?

20 ቱሱ ልግቡ ብሊቱ ሄዕዮ ጎሬሁ ጅሰሙ ሜጠሃን።

21 ህከን እኩቤቸሃ እልተ እንገተ «ሀሳንኬበእ» ይቶተ አታልታበእ፤ ቡዕሉንኩ ሎከተ «ሀሳንኬበእ» ዮተ አታለኖበእ።

22 ጠዉ እኩጎሬ ጅሰማን ላፈ አጉደኖ ብሊቱ አበ ሀሰሰኖሃን።

23 ህትን አሌንከኔ ኬዕምቶስ ቀቅቼ አጉደኖኔ ብሊቲሃ ሎረ ኬዕምኝ አሰናንሰ፤ ህትን ለኤንበገ መልናም ብሊቲሃ ሎረ ኬዕምቸን አገርናንሰ፤

24 ብሬን እክ ለለኖ ጅሰሚሃ ጉዕሚንከ ኩን ጉዕሙንኩ ሀሲሰኖስበእ፤ እኩጎሬ መገኑ ለኢሃ ሙልሰኖ አጉጅ ለለኖ ጅሰም ብሊተ ሎረ ኬዕምቸን አፌኖሰገ አዕይ ጅሰሙ ጉዕሙንከ ሜጡ አዕይ አቋንሴሰ።

25 ካን አዕዮሁ ጅሰሙ ጉዕሙንከ በላንከሰ አደደመት ሄእበእገ ገገዉንኩሰ መቱ መቲንከሰ አቋንክታጋት።

26 ህከን እኩቤቸሃ ብሊቲቶ መቱስ ኦርጨመኖ ወክት ጉዕሙንኩ ብሊቱ ሜጡበ ኦርጨቀመኖ፤ ህትን መቱ ብሊቱ ኬዕምቸሙ አሀኖ ወክት ጉዕሙንኩ ብሊቱ ሜጡበ ሙንደአኖ።

27 ቱሱ አዕኑ መሲህሃ ጅሰሙ፤ መት-መቱክዕኔ ህከን ጅሰምሃ ብሊቲ።

28 ህከን እኩቤቸሃ መገኑ መት-መቱ መነ መገኑ አመዕኔ መን ጭምት ዲእ ምናን አደደ ሆጎን ሄእገ አዕዮ፤ ከን ሃሊን ዋዕናሃ አሳበተ ለንከሃ ነብያት ተሰቂሃ አሰተማረተ ህከኒቶ ኤተሮን አጀብሲሰኖ ጠወ አታ መነ ህከኒቶ ኤተሮን ጥዘናመተ ፈይሳ መነ ህከኒቶ ኤተሮን መኒሃ ደግለልታ መነ ህከኒቶ ኤተሮን ገኻኑተ ህከኒቶ ኤተሮን ሮስሞበእ አፌን ጠወአ መነ አመዕናኖ አዘን ኦርቸኤ።

29 እሰ ጉዕሙንኩሰ አሳበተንድ? ህትን ጉዕሙንኩሰ ነብያቸተንድ? ህትን ጉዕሙንኩሰ አሰተማረተንድ? ህትን ጉዕሙንኩሰ አጀብሲሰኖ ጠወ አታአረንድ?

30 ህትን ጉዕሚንከሰ ጥዘናመተ ፈይሳ አሰቲት ዮሰረንድ? ህትን ጉዕሙንኩሰ ሮስሞበእ አፌን ጠወአረንድ? አደደ አፌን ጠወአማሃ ጉዕሙንኩሰ ፈሰርቶተ አታልታአረንድ?

31 ጠወ፤ እኩጎሬ አዕኑ ጉዕሚቶን በተአ አሰቲተ ደአቶተ ጠረኝቲን አጸሜ።

ህትን እን ጉዕሚቶን ቆሀኖ ዋቃሃ ለሊሳንክዕኔ።

13

ሀንቅ አተተኔሃ

1 መንለከ መላይክ አፌን ጠወዕዮም እቃ አተት ሄእበእቶ ወደኖ ብረትገለክ ዶልገ እኩም።

2 ህከን እኩቤቸሃ ራገ ጠወአም ዋልቀት ሄእኤ እቃ፣ ምሰጥር ጉዕሙንከ ደጎም እቃን፣ ኤንኬዕኑ ጉዕሙንኩ ሄዕዮኤ እቃ፣ ቆተት ቤቸቶሴ ኬእ ዋሉቤቼ መርታገ አእም አመዕነቱ ሄዕዮኤ እቃ አተት ሄእበእቶ እን ተሰሃን።

3 ህትን ዮኤሃ ጉዕሙንከ ቡጥቻኖተ ቤኩም እቃ፣ ጅሰመኤ ገራን ቡሶተ * ህገሽ አሰዮም እቃ አተት ሄእበእቶ መቱርቸሃ ደግለለኖኤበእ።

4 አተት አታዕልሲሳአተ፤ አተት ጡሙ ጠወ አታእ፤ አተት ምቀኝታበእ፤ አተት ዮሴሀኔን ድክአበእ፤ አተት ቦንሲሳበእ።

5 አተት አለ ቅልበ እካበእ፤ አተት ጠለዕል ገይሀሴ ይታበእ፤ አተት ኡሙዕሪታበእ፤ አተት ዮሰ መንቹ በደለሞ እቃን ብድልገ ዋለአበእ።

6 አተት ሀንቅ ጠዋን ሙንደአ ቤሉ ሃላ ጠዋን ሙንደአበእ።

7 አተት ጉዕሙ ጠወ አታዕልታእ፤ አተት ጉዕመርቸንከ አመዕንታእ፤ አተት ጉዕመርቸንከ ተብሴን አገርታእ፤ አተት ጉዕሙ ጠዋን ጠረኝቲ ሄእእ።

12:28 ኤ.ፌ. 4:11። 13:2 ማቶ. 17:20፤ 21:21፤ ማር. 11:23። * 13:3 ገራን ቡሶተ- የኖሁ መት-መቱ ለሀ ክታበት «ቦኒሃ» ይታእ።

8 እቲት ሆሮ በአበእ፤ ራጉ እኮ እቃ ህገኖ፤ ርሰሞበእ ኦሮን ጠወኡ እኮ እቃ ፈቀኖ፤ ኤንኬዕኑ እኮ እቃ ህገኖ።

9 መሰንትሰ ነኡ ደንጋሚሁ ዊመ ዊሚንትበእ፤ ራገ ጠወዕናሚንኩ ዊመ ዊሚንትበእ።

10 ጠወ እኮጎሬ ዊመ እኮ ጠወ ኦሚኛ ወክት ደሩ እኮ ጠወ ህገኖ።

11 ጨል እክ ሄዕዮም ወክት ጨለገን ጠወኣም፤ ሰውያምለክ ኦጥራመታም እቅ፤ ቴሱ ኦሰመኤ ሹሎም ወክት ጨል እክ ሄዕዮም ወክት ኣኣም ጠወ ጉዕመንክ ኣኩሮም።

12 መሰንትሰ ቴሱ ለእቃንቺን ለኤኖህገን ቀቅቹንክ ለዕናም፤ ጠወ እኮጎሬ ህከ ወክት ዊመ ዊሚን ለዕናም፤ ቴሱ ኣን ደጋሚሁ ደሩሲት፤ ጠወ እኮጎሬ ህከ ወክት መገኑ ኤሳሃ ደጎኤ ጌሰንክ ዊሙ ኤንኬዕኑ ሄኣኖኤ።

13 ህካን እኮቤቺሃ ኣመዕነቱ፤ ኣቲትለክ ተብሶሁ ኩ ሰሱንኩ ጠረኝት ሄኣኤ፤ ጠወ እኮጎሬ ኣቲት ህከኡኝ በተኣኣ።

14

ርሰሞበእ ኦሬን ጠወኣ ኣሰቱተ

1 ቴሱ ኣቲተ ኣወኝ፤ ህትን ጠሊሊ ኦያን ኣሰቱተ ጡመገ ሀሺ፤ በትሴን ራገ ጠወኤሃ ኣታሌኖ ኣሰቱተ ሀሺ።

2 መሰንትሰ ርሰሞበእ ኦሬን ጠወኣኖ መንቹ መገኒሃት ቤሉ መኒሃ ጠወኣኖበእ፤ ኣሰን ጠሊሊ ኦያንን ማጠሞ ጠወ ጠወኣኖቤቺሃ ጠወኣኖሰርቹ ደገኖሁ ኣዪሁ ዮበእ።

3 ጠወ እኮጎሬ ራገ ጠወኣኖ መንቹ ዎሉ መን ጠረኝሲሃ፤ ሸዚሃለክ ሰብር ኣኣኖገ መኒሃ ጠወኣኖ።

4 ህካን እኮቤቺሃ ርሰሞበእ ኦሬን ጠወኣኖ መንቹ ገወሰ ጠረኝሰኖ፤ ጠወ እኮጎሬ ራገኖ መንቹ ዱኣ ሞነተ ጠረኝሰኖ።

5 ህትን ጉዕመንኩክዕኔ ርሰሞበእ ኦሬን ጠወኤንታ ኣቃን ኣታም እቅ፤ እኮጎሬ በትሸ ሀሳሚሁ ራጎኖታት፤ መሰንትሰ ዱኣ ሞነት ደግለሸቀንቶተ ጠወዕዮሃ ሃር ኩለኖሁ ዮበእ ጎሬ ርሰሞበእ ኦሬን ጠወኣኖህኒቻ ራገኖሁ በተኣኖ።

6 ቴሱ ኣመኤ ኦሶ! ክዕኔቤቺኦ ኦሚኛም ወክት ርሰሞበእ ኦሬን ጠወኣን ኦሚኛም ጎር ክዕኔሃ መ ደገለለኖ? ህከን ወጥ ደግለለኖህዕኔ መገን ሞሰጥር ለሊሱ፤ ኤንኬዕኑ፤ ራገ ጠወኡለክ ትምርት ኣኖ ኦሚኛሚሁ ቆሆ።

7 ዎሉ ፈቅ ሁሉሊገ ክራርጋ ሩሁ ዮሰበእ ኦዳታ እኮ እቃ ላገሰ ኣደ እክ ለልትባቻ ሁሉሊ ላገተ ኣሁሰለክ ክራር ላገተ ኣሁሰ ማን ደገኖ?

8 ህትን ሞጭጨንቶበእ ላጋን ደገሞበእ ሃለን ጡሩምበ ቡሴመጎሬ መርቺሃ ቡሴመገ መኑ ህት ኣዕይ ደጎተ ኣታለኖ።

9 ህከንገን ርሰሞበእ ኦሬን መኒሃ ኣገበገ ጠወኤንተጎሬ ቦብሪሃ ጠወኤንተህንገ እኬንነተ ቤሉ ጠወኤንነተርቹ ኣይ ኣጥራመቻ ደጎተ ኣታለኖ?

10 ከን ኣዲንያ ኦሊን ኣደዱ ልግቡ ኣይሁ ዮኤ፤ ጠወ እኮጎሬ ፍሳረት ዮበእ ኣይሁ ዮበእ።

11 ቴሱ መቱ መንቹ ጠወኣኖ ኣሬ ፍሳረተ ደግባቻ ኣን ጠወኣኖህኒሃ ኮህቹ ኣሃም፤ ኣሰን ኤሳሃ ኮህቹ ኣሆኖ።

12 ህካን እኮቤቺሃ ጠሊሊ ኦያን ኣሰቱተ ሀሴንነተረ እኬንተጎሬ መገኑ ኣመዕኔ መን ጠረኝሲሃ ኣታልቲንነተ ኣሰቱተ በትሴን ሀሺ።

13 ህካን እኮቤቺሃ ርሰሞበእ ኦሬን ጠወኣኖ መንቹ ጠወኣኖሰርቹ ፈሰርተ ኣታለኖ ዎልቀተ ደይተ ዱኣ እኤን።

14 መሰንትሰ ርሰሞበእ ኦሬን ዱኣ ለዕዮ ጎሬ ኣያንን ዱኣ ኣኣኖ፤ ጠወ እኮጎሬ ቡዕሉኤ መቱርቺሃ ሆጉተ ኣዕዮበእ።

15 ቴሱ እኡ ሀሰሰኖኤርቹ መርቺሃን? ኣያንነከኤ ዱኣ ኣኣን ሰውቲንከኤ ዱኣ ኣኣም፤ ህትን ቀልቢንከኤ ዘመረገ ሰውቲንከኤ ዘመራም።

16 ህካን ኣህባቻ ኣት ኣያንነከክ ርሰሞበእ ኦሬን መገኑ ገለትጭቶንትጎሬ መቱ ኮህቹ መንቹ ይቶንትርቹ ደግበቤቺሃ ኣት መገኑ ገለትጭቶንትህኒሃ ህት እክ «ኣሚዕን» ዮኖ?

17 መሰንትሰ ኣት መገኑ ገለትጭቶንትን ጡመሃ እቅ፤ እኮጎሬ ሁኩን ዎሉ መንቹ ጠረኝሰኖበእ።

18 ጉዕሚቻክዕኔን ሎረ ርሰሞበእ ኦሬን ጠወኣኖቤቺሃ መገኑ ገለትጭም።

19 ጠወ እኮጎሬ ርሰሞበእ ኦሬን ቶኑ ኩሜ ላገተ ጠወኤኝ ዎሉ መን ተማርሲሃ ርሰሞ ኦሬን መገኑ ኣመዕኔ ጭምት ዱኣ ሞርን ኦንት ላገተ ደገኖ ላጋን ጠወኡ ኣታም።

20 ኣመኤ ኦሶ! ሂለ ጠዊሃ ጨለተ እኬ ቤሉ ሰውቲንክክዕኔ ጨለተ ኣኩኖቹ፤ ጠወ እኮጎሬ ሰውቲንክክዕኔ ኣንቺ ኣኩሰምቴንታኣረ እኬ።

21 ሕጋን፡-

« ርሰሞበእ ኦሬን ጠወኣ መኒሃለክ

ዎሎ ባድ መን አፎን ከን መኒሃ ጠወአንሰ፤

ጠወዕዮምጎሬሁ ሞጮጭታኤበአ። ይዮኤ ቀርቼ መገኙ»

የመዎ ከተብሞኤ።

22 ቴሱ ርሰሞበእ አፎን ጠወኡ መላተ እህሮሁ አመዕንበ መኒሃት ቤሉ አመዕኔ መኒሃበእ፤ ጠወ እኩጎሬ ራገ ጠወኡ አመዕናናታት ቤሉ አመዕንቡ መኒሃትበእ።

23 አመዕናናት ጉዕሙንኩ ጭምይታ ወክት ጉዕሙንኩ ርሰሞበእ አፎን ጠወአን ደግቡ ህከረንገ አመዕንቡ መኔ ኣጎጎሬ «ኩ መኔ በርገጎኤ» የኖበእንደ?

24 ጠወ እኩጎሬ ጉዕሙንኩሰ ራገ ጠወአን ደግቡ ህከረንገ አመዕንቡ መንቹ ኣጎጎሬ ሞጮጭ ላገት ሆርገት ዎቀሳሰ፤ ህትን ሞጮጭ ላገት ሆርገትሰ ፈረዳሰ።

25 ቀልቤንከሰ ቴላሞ ጠወ ለለኖ፤ ህካን እኩቤቹሃ ሁኩ መንቹ ኡላን ኡብ «ህንቅንከ መገኑ ክዕኔ በላን ዮኤ» የን መገኒሃ ሰገደኖ።

ዱእ አኤኖ ወክት ሄኤ ሀሰሰኖ ሲርተኒሃ

26 አመኤ ኦሶ! ቴሱ መ ይደም? አዕኑ ጭምይቲነንተ ወክት መት-መቲሃሰ መዝሙሩ ዮሲሁ ዮኤ፤ ዎሉሰ ተማርሰኖ፤ መቲሰ ማጠሞርቹ ለሊሽ ኩሉኖ፤ መቲሰ ርሰሞበእ አፎን ጠወአኖ፤ መቲሰ ርሰሞበእ አፎን ጠወኤማሃ ፈሰረኖሁ ዮኤ፤ እኩጎሬ ሁኩ ጉዕሙንኩ አመዕናናት ጠረኝሲሃ እሁን።

27 ህትን ርሰሞበእ አፎን ጠወአኖሁ ሄዕዮ ጎሬ ለሙ ህከረንገ በተዕዮ ጎሬ ሰሱ እክ ተሪን ተሪን ጠወኤን፤ እሰ ጠወአእንከ ዎሉ መኔ ፈሰሩን።

28 ጠወ እኩጎሬ ፈሰሩ ኣታለኖ መንቹ ሄኣባኛ መገኑ አመዕኔ ጭምት ምናን ርሰሞበእ አፎን ጠወኤንከ፤ ህከን ወጥ ገይሃሰለከ መገኒሃ ጠወኤን።

29 ራገ ጠወአእሩ ለሙ ህከረንገ ሰሱ እክ ጠወኤን፤ ዎሉ መኔ ጠወአሞሰ ጠወ ኣጥራመት አደ ኣት ደገን።

30 ጠወ እኩጎሬ ኣፋዕሌ መኒኛ መቲሀሰ ሃሽኣቱት ለልቶሰጎሬ ዎዕናሃ ጠወአኖሁ ጨለዩን።

31 መኔ ጉዕሙንኩ ተማርተለከ ጠረኞተ ጉዕሙንኩክዕኔ ተሪን ተሪን ራገ ጠወአኖተ ኣታልቲነንተ።

32 ህትን ነብያካ ኣያኑ ነብያካተ ኣዘዘመኖ።

33 መሰንትሰ መገኑ ወገሬትዮ መገኑ ቤሉ ጨንጨንሃ መገኑበእ።

34 ማንቱ መገኑ አመዕኔ መን ዱእ ምኒ ኣዘኩ ጠወኤንከ፤ መሰንትሰ ሕጉ የኖገን እሰ ኣዘዘንቶታት ቤሉ ጠወኤሃ ፈቀደሞሰበእ።

35 ህካን እኩቤቹሃ መት መንቹት መገኑ አመዕኔ መን ዱእ ምናን ጠወኡ ሙልሰኖሃ እኩቤቹሃ ማንቱ ደጎተ ሀሳ ጠወ ሄዕዮ ጎሬ ምንሰ እን ምኔሰ ጠዕሞቱን።

36 ህትን መገን ላገት ኣሜቶኤሁ ክዕኔቹትንደ? ህከረንገ መገን ላገት ኣልቶኤሁ ጠለዕል ክዕኔቤቹሃትንደ?

37 ኣዪሁ «አን ነብይቹሃን» የኖሁ ህከረንገ «ኤሳሃ ጠሊላ ኣያን ኣሰቱት ዮኤሃን» የኖሁ ሄዕዮ ጎሬ ኩ ከተሶንክዕኔሁ ቀርኛት ትዛዝ ኣሁሰ ደገን።

38 ጠወ እኩጎሬ ካን ሞጮጭምበእ የኖ መንቹ ዮ ጎሬ እሰ ጠወአኖሁ ሞጮጭሙንከ።

39 ህካን እኩቤቹሃ አመኤ ኦሶ! ራገ ጠወኤሃ ጠረኝቲን ህሺ፤ ህትን ርሰሞበእ አፎን ጠወኤሃ ከንቶኖቹ።

40 ጠወ እኩጎሬ ጉዕሙንኩ ጠወ ጡመ ሃሊንለከ ሴሪን እሁን።

15

መሲህ ሬሆኛ ኬአተኔሃ

1 አመኤ ኦሶ! አዕኑ ኣን ተማርሲየንክዕኔ ኣኣቲን ጠረኝቲን ኡርቲንተ ተሸት ላገተ ቃጎሶሀዕኔተ ሀሳም።

2 ህከ ተሸት ላገንተ ጠረኝሴን ኣፊንተጎሬ ህከን ላገ ኡዲን ፈቁንተ፤ ህካን እህባኛ አመዕነቱክዕኔ ተሰሃን።

3 ጉዕመርቹኛን በትሽ ሀሰሰኖ ጠወ ኣንን ቶጎሚሃ ክዕኔኤ ህገሽ ኣሲም፤ ሁኩንን ጠሊላ መጻፋን የመዎገን መሲህ ጨብኔተኔሃ ሬዮኤ።

4 ሞገሞ፤ ጠሊላ መጻፋን ከተብሞገን ሰቅ በር ሬሆኛ ኬዕዮ የኖሃን።

5 ኣሰን ጸጥርሴሃ ለሌእ፤ ህከኒኛ ኤተሮን ቶና ለሞንከ ኣሳባተ ለሌእ፤

6 ህትን ኣንቲ ጥቤኛ በተላ አመዕናናተ መቱ ወክት ለሌእ፤ ኣሳኛን መቱ-መቱሰ ሬቶጎሬ ልገቡሰ ቴሁ ኣለ ፎሊን ዮኤ።

7 ህትን ኣሰ ያቁቢሃ ለሌእ፤ ህከኒኛ ኤተሮን ጉዕማንከ ኣሳባተ ለሌእ።

8 መጨረሻን ጉዕሚችን ሆፈአም ኤሳሃ ለሌለ።

9 መሰንትሰ መገን ዱእ ሞነተ ሸረን ኦሪሳሚሃ እኮምቤቸሃ እን አሳባች ጉዕሚችን ሆፈአሚሁለከ ሰቀማንቹ የመም ገእሙ ገበአበኤሃን።

10 በጣ እኮሳሪ እን ቲሱ ሄአም ሀለት ደኤሚሁ መገን አሰቶቸት፤ ህትን ሁኩ አሰንቶኤ አሰቱት ላልቹ ዮበኤሃ እኮበኤ፤ እንን ዎሎ መኒች ጉዕሚችን በትሸ በጠረኝ አዕዮም፤ በጣ እኮሳሪ አዕዮሁ እን ሄአናሃ መገንተ አሰቱ ቤሉ እኔበኤ።

11 እኒ እኮሞ አቃ አሳሁ ተማርሰናሚሁ ከኒት፤ አዕኑሁ አመዕንቴንታሁ ከኒት።

ሬዮ ሙኔ ሪሆች ኬአናሃ እሁሰ

12 ቲሱ መሰህ ሪሆች ኬሉሰ ተማርሰናሚሃ እኮች ህት ክዕኔች መቲ-መቱ «ሬቶ ሙኔ ሪሆች ኬአበኤ» ይታኢት?

13 ሬቶ ሙኔ ሪሆች ኬአሳሃ እኮች መሰህ ሪሆች ኬዕዮበኤ የሃን።

14 ህትን መሰህ ሪሆች ኬአባች ኒ ትምርቱለከ ክዕኔ አመዕንቱህ ተሰሃን።

15 ህከኒችን በትሸ «መገኑ መሰህ ሪሆች ኬሾሰ» ይን አሰተኔሃ መሰከርናምቤቸሃ መገኒሃ ክክብ ሞሰክር እንኮም የሃን፤ ሬቶ ሙኔ ሪሆች ኬአባች መገኑ መሰህ ሪሆች ኬሾሰበኤ የሃን።

16 መሰንትሰ ሬቶ ሙኔ ሪሆች ኬአሳሃ እኮች መሰህ ሪሆች ኬዕዮበኤ የሃን።

17 ህትን መሰህ ሪሆች ኬአባች አመዕንቱክዕኔ ተሰሃን፤ አዕኑሁ ከበሬ ኢላ ጩቢንከክዕኔ ዮንተ የሃን።

18 መሰሃን አመዕንት ሬቶአሩ በኦኤ የሃን።

19 ነኤሁ መሰህ ተብሳሃ አዕናሚሁ ከን ዱንያ አሌን ሄዕናም ሄኤሃ ጠለዕል እኮሳሪ መኒች ጉዕሚችን በትሰን ሻዘንሳምረ እንኮም የሃን።

20 በጣ እኮሳሪ መሰህ ሬቶህኩተ ዎዕኔሃ እክ ህንቅንከ ሪሆች ኬዕዮኡ።

21 መሰንትሰ ሬሁት መቶሃ መንች አዲን አሚቶገን ሬቶአሩ ሪሆች ኬሉሁ መቶ መንች አዲኒት።

22 ሙኔ ጉዕሙንኩ ኣዲም መሳን ለደሞህንገን መሰህ መሳን ሙኔ ጉዕሙንኩ ሄኤ ደአና።

23 በጣ እኮሳሪ መቲ-መቱንኩ ገገይሰ ተሪን አሜተኖ፤ መሰህ ሪሆች ኬእን ዎኔሃን፤ ህትን ኤተርን መሰህ አሚች ወክት እሲሃ እኮአረ ሪሆች ኬሰኖ።

24 መሰህ ገሹ ጉዕሙንኩ፣ ደኝነቱ ጉዕሙንከለከ ዎልቀተ ጉዕሙንከ ቢሾች ኤተርን ዎምንቱ እን መገኒሃ ህግሽ አሰኖ ወክት ዘማን ጎፋ አሆኖ።

25 መገኑ ዲኒሰ ሎከሰ ጫዕማች ዎርን አኦተ ኢላ መሰህ ዎመ እሁ ሀሰሰኖሰ።

26 መጨረሻን ቁለም በአኖሁ ዲኑ ራሁታን።

27 «መገኑ ጉዕሙ በጣንከ ሹምነቱችሰ ዎርን አዕዮኡ» የኖሁ ከተበምኤ፤ በጣ እኮሳሪ «ጉዕሙ ጠዉንኩ ሹምነትችሰ ዎርን እኮኡ» የኖ ወክት ጉዕሙ ጠዉንኩ ሹምነቱች ዎርን አዕዮ እን መገኑ በርገኖበኤ።

28 ጉዕሙርቹንኩ መሰህ ሹምነቱ ኣዘን እኮች ኤተርን አኑ መገኑ ጉዕሙርቹንኩ ጠገመኖሃ እሆተ ህከ ወክት ቤቱ ገዉንኩሰ ጠቀኖገ አዕዮ መገኒሃ ጠገመኖሰ።

29 ህካን እህባች ሬቶ ሙኔ ወጥ ጠመቀመኖሁ ሚሃት? ህትን ሬቶ ሙኔ ሆርን ሪሆች ኬአሳሃ እኮሳሪ ሙኔ እሰ ወጥ ጠመቀመኖሁ ሚሃት?

30 ነኤ ገዉንኩኔ ጉዕሙ ወክት አደገሃ ገውኔ ኣሰንን ሄዕናሚሁ ሚሃት?

31 አመኤ ኦሶ! ኤሳሃ በሬን በሬን ሬሁት ገንበ ይታኤት፤ እንን ህካን ያሚሁ ቀርቹሃኔ መሰህ ኢሰ አዲን ክዕኔኤን ዮኤ አመዕንቱንት።

32 ህትን እን ኤፌሶን ከተማን አብል ቡሳዊን ኤቺቀሚኖህንገን ኤቺቀሚኖሁ መን ሰውቲን እኮሳሪ መ ደግለላኖኤ? ህትን ሬቶ ሙኔ ሪሆች ኬአሳሃ እኮች «ጋቲተ ሬናምቤቸሃ አሜ እንቶለከ እንገ» ይታገ እሁሃሰ።

33 አዕኑ ሉጨንቶኖቹ፤ «ሂሉ ጃሉ ጡመ አመል ቤሰኖ» የመሞኤ።

34 ቲሱ ቀልብ አዕዩ፤ ጩብ እኤ አጉሬ፤ መገኑ ደግቡ ሙኔ በሳንከክዕኔ ዮኤ፤ እን ህካን ያሚሁ ሙልሶህዕኔተ ይዱት።

ሪሆች ኬዕዮ መንች ጅሰሙ መ አጉደኖ?

35 መቱ መንቹ «ሬቶ ሙኔ ኬአኢሁ ህት እከት? ሪሆች ኬአ ወክት ጅሰሙሰ መ አጉደኖ?» ይ ጠዕመኖ መንቹ ሄኦተ አታላኖ።

36 እት ኩ ገዉ መንቹ! እት ዉጣንት ዉጠት ሸንትባች ሙታበኤ።

37 እት ዉጣንት አለሰ ህከረንገ ዎሎርች ዜሬተህበሌ ኤተርን ሙች ነጻኤሃበኤ።

38 በጣ እኮሳሪ መገኑ ኢተኖ ሃሊን ገይሰ ደን አሰኖሰ፤ ህትን መቲ-መቲሃሰ ዘሬትሰ ገይሰ ደንከን አሰኖሰ።

39 መሰንገስ ማሉ ጉዕሙንኩ ሜጣሃ ደነበአ፤ እኩጎሬ መን ማሉ ሜጣሃ ደነ፤ ግዝ ማሉሁ ዋሉሃ ደነ፤ ህትን ጭኦ ማሉ አደደ ደነ፤ ቀርጨ፡ሜ ማሉ ዋሉሃ ደነ።

40 ህትን ሰሜ ጅሰሙ ዮኡ፤ ኡላ አል ጅሰሙሁ ዮኡ፤ እኩጎሬ ሰሜ ጅሰም ኬዕምኙ መቶሃ ደነ፤ ህትን አዲንያ አል ጅሰም ኬዕምኙ ዋሉሃ ደነ።

41 ህትን አር ኬዕምኙ መቶሃ ደነ፤ አገንኙ ኬዕምኙንገ ዋሉሃ ደነ፤ ቤዜ ኬዕምኙሁ ዋሉሃ ደነ፤ መሰንገስ መቶሃ ቤዜ ኬዕምኙ ዋሉኝ ሰ አደደ።

42 ሬዮ መኑ ሬሆኙ ኬአናሁ ህትዪት፤ ዉጠዋ ጅሰሙ በአናሃን፤ ሬሆኙ ኬዕዮ ጅሰሙ በአበሃን።

43 ሁከንን ሆኖኚን ዉጠዋ ኬዕምኚን ኬአና፤ ህትን ላፈ እክ ዉጠዋ ጠረኘ እክ ኬአና።

44 ህትን ማል ጅሰሚን ዉጠዋ ጠሊሉ አያኑ ሄኡ አሴ ጅሰመ እክ ኬአና፤ ማል ጅሰሙ ሄኡኙ ጠሊሉ አያኑ ሄኡ አሴ ጅሰሙ ዮኡ።

45 ህካን እኮቤቺሃ «ዎኔ መንቸ አደም ሄአኖ ክልቀት እኮ» የመዋ ከተበዋኡ፤ ኤተር አደም ሄኡ አሰኖ አያን እኮ።

46 ጠዉ እኩጎሬ ዋዕናሃ አሜቸሁ ጠሊሊ አያኒን ሄኡ አሰምሲሁ አሁዕነ ማል ጅሰሙ አሜቸ፤ ጠሊሊ አያኒን ሄኡ አሰምሰ ማል ጅሰሚኙ ኤተርን አሜቸ።

47 ዎሴ መንቸ ከለቀዋሁ ኡላ ትቢኝ እኮቤቺሃ ኡላሃን፤ ለንክ መንቸ አሜቸሁ ሰሜቸ።

48 ኡላኙ እኮአሩ ኡላኙ እኮሃ አጉዳእ፤ ሰሜኙ እኮአሩ ሰሜኙ እኮአሊሃ አጉዳእ።

49 ነኡ ኡላ ትቢኝ ከለቀዋ መንቸ ደነ እኮንደምገን መቱ በር ሰሜኙ አሜቸ መንቸ ደነ አጉንዳም።

50 አመኤ ኦሶ! መቱርቸ ኩላክዕኔ፤ ማሉለክ ቄጉ መገን ዋምነቱ ዋረሶተ አጋልጋበአ፤ ህትን በአኖ ጅሰሙ በአቡ ጅሰመ ዋረሶተ አጋላኖበአ።

51 ቲሱ መቱ ማጠዋ ጠወ ኩላክዕኔ፤ ነኡ ጉዕሙንኩኔ ሬናምበአ፤ ጠዉ እኩጎሬ ጉዕሙንኩኔ ደረማም።

52 ደረማሚንኩ መጨረሽ ጡሩምበ ቡሴኖ ወክት እሌ ገለብትገ መቶ ወክቲኒት፤ ጡሩምቡ ቡሰመኖ፤ ሬቶ መኑ በአበ መነ እክ ኬአአ፤ ነኡሁ ደረማም።

53 መሰንገስ ኩ ሸመኖ ማሉ ሸምባሃ ኦደኡ ህትን ኩ ሬሆኖ ማሉ ሬሆባሃ ኦደኡ ሀሰሰኖስ።

54 ኩ በአኖ በአባሃ ኦደዕዮ ወክት ህትን ኩ ሬሆኖ ሬሆባሃ ኦደአኖ ወክት «ሬሁት ቄለንት በኦኡ» የመዋ ከተበዋሁ ዋመኖ።

55 ህትን «ሬሆ! ቄሉክ ሀከበ ዮኡ?» «ሬሆ! መነ ምዕርጋንት ዋልቀክ ሀከበ ዮኡ?» የመዋኡ።

56 ሬሆ ቄል ዋልቀት ጨብሃን፤ ጨብ ዋልቀት ሕገሃን።

57 ጠዉ እኩጎሬ ቀርቸሃኔ መሲህ ኢሰ አዲን ቄሉ አሰኖኔ መገኒሃ ገለቱ አሁንስ!

58 ህካን እኮቤቺሃ ኢተንቲንተ አመኤ ኦሶ! ጠረኝቲን ኡርዬ፤ ቀርቸ ኢሲሃ አቲንተ ሆጉት ጠለዕላ አክበገ ደገነንተቤቺሃ ለንቄቅቶኑዕናን ቀርቸ ኢሰ ሆጉት ጉዕመንክ ወክት አዕዬ።

16

ዬሩሳሌማን ሄኣ አመዕናኖተ ሀዕሌኖ ብረ ጭም አኤመገ

1 አመዕናኑተ ሀዕላቀሜኖ ብረ ጭምአአተኔሃ ገለትይ ባደን ሄኣ አመዕናኖተ ኩሎምገን አዕኑሁ ህት አዕዬ።

2 ሁኩ ብረ ጭምአኤኖሁ አን አሜታዎ ወክት አህኖበአገ መት-መቱክዕኔ ደአቲንተህኒኝ ዋልቀክዕኔ ጌሰ ጉዕመንክ ወክት ሳምንት ዎኔ በር አደ አቲን አፋሸዬ።

3 አን አሜቸዎ ወክት አዕኑ አመዕንቲንተ መኑ ህክ ጭም አቲንተ ብረ ዬሩሳሌመ መሰቶተ ደብደቤተ ከተብ ሜጡቡ አዕይ ሶሃንስ።

4 ኢ መሩ ሀሰሾ ጎሬ አሰ አን ሜጡቡ መርጋኦ።

ጳዉሎሴ ያደተ

5 መቄዶን ባደ አዲን ህጎተ ሰውዬምቤቺሃ ሀከኒን ህገን ክዕኔተ ለኦተ አሜታዎ።

6 አን ሀከቤቺሃ መርም ጎር ዋቄሃአ አካ ሸንቅተ ኣቶናኤተ ክዕኔቤቸን ቀዉ ጌሰ አፋዕላሚሃ አህኖ፤ ህትን ከርም ክዕኔቤቸን አፋዕላሚሃ አህኖ።

7 ህካን እኮቤቺሃ ህግኤ ዎቃን ለኦህዕኔተ ሀሳምበአ፤ መገኑ ዬጎር ክዕኔን ሜጡቡ መቱ ጌሰ ዲንኩተ ተብላሃ አኣም።

8 ጠዉ እኩጎሬ ጳንጠቆስጤ * ከበጀት ኢላ ኤሬሶን ከተማን ዲንካም።

15:45 ክል. 2ኛ። 15:52 1ተሰ. 4፣15-17። 15:54 ኢላ. 25፣8። 15:55 ሆሴ. 13፣14። 16:1 ሮሜ 15፣25-26። 16:5 ሶቀ. 19፣21። * 16:8 ጳንጠቆስጤ- ዩ አይሁዳውያኑ አዝመረሰ ጭምአቶቹ ኤተርን ኦንጋይቅ በሬን ከበጃኖሃ ከበጀት። 16:8 ለዊ 23፣15-21፤ ዘዳ. 16፣9-11።

9 መሰገንትሰ ልግቡ ሆጉት ሄኑ አልባሰሉት ኡሩት ፈንተኦኤ፤ እኩጎሪ ኤሳሃ ግባኤ መኑ ልግብሃን።

10 ጥምቶስ አሜኛ ወክት ዋጁ ዕናን በላንከክዕኔ አፋሰላናገ አዕዬሰ፤ መሰገንትሰ እሲሁ ኢገን ቀርኝ ሆጉት አአናሃን።

11 ህካን እኩባቸሃ አዪሁ ህንቁንከሰ፤ እኩጎሪ አመዕናኖን ሜጡብ አገራምቤቸሃ ኢቤቹ ወገሬቲን ፈንቀሎት ዋቁሀሰ እካ ሸንቅተ ኣቴን ህርሲሼሰ።

12 አመኔቤቹ አጽሎሰ ዋሎ አመኦሰን ሜጡብ ክዕኔቤቹ መሮተ አብ ኡጭኖንስ እቅ፤ እኩጎሪ እስ ቴሱ ክዕኔቤቹ አሜቶተ ሀሾበአ፤ መከኖሰ ወክት ክዕኔቤቹ አሜተኖ።

ጎፍሜ ሸዘነተለከ ወገሬትሱ

13 በቅይዬ፤ አመዕነቶንከክዕኔ ጠረኝቴን ኡርዬ፤ አጻሜ፤ ጠረኝዬ።

14 ህትን አቴንገታሃ ጉዕመንከ ኢታን አዕዬ።

15 አመኤ ኦሶ! አካይ ባዶን ሄጭት መገኑ አመዕንቶአሩ እስጥፋናሴ አበሮስ እሁሰለከ እስ አመዕናኑተ ሀዕልቶተ ገዉሰ ህግሰ አቶገ ደጌነጎተ።

16 እሰገ ኖ መኒሃለከ እሳንን ሜጡብ አተን ሆጋ መኒሃ ጉዕሚንከ አዘዘንቴንጎተገ ጥሻ አዕይ ቃግሳንክዕኔ።

17 እስጥፋናሰ፥ ፈርዶናጢሰለከ አካይቆስ ኢቤቹ አሜቶቤቸሃ ተሽ ይኖኤ፤ አዕኑ ኢን ሜጡብ ደገንቴንበቤቸሃ እስ ክዕኔቤቸን ሆፈዕኖኤርቹ ዊንሸቶኤ።

18 እስ ኢላ ክዕኔ ቀልብ ፎሎሲሶአረ፤ ህካን እኩቤቸሃ ህትኔ መነ ደጉ ሀሰሰኖሀዕኔ።

19 እስይ ባዶን ሄኦ አመዕናኑት «ወገሬት ኖንተንዶ?» ይታሀዕኔት፤ ህትን አቁልለከ ጽርሰቅል ምኔንከሰ ጭምይታ አመዕናኖን ሜጡብ ቀርኝ ሱዕሚን «ጠረኝገ ወገሬት ኖንተንዶ?» ይታሀዕኔት።

20 ህትን አመዕናኑት ጉዕመንከ «ወገሬት ኖንተንዶ?» ይቶሀዕኔ፤ ገገዉንኩክዕኔ አመዕናኖተ ሀሰሰኖ ነጠ እኩ ወገሬትጨቀሚን ዘያዕረቀሜ።

21 እን ጸዉሎስ ከ ወገሬት ገይእ አንጋን ከተሶንክዕኔ።

22 ቀርቹ መሲህ ኢስ ኢትባሁ ሄዕኖ ጎሪ ቦረረሞኢሃ እሁን፤ ኒ ቀርኝ አም!†

23 ቀርኝሃ ኢስ አሰቱት ክዕኔን ሜጡብ እኩን።

24 ኢ ኢተት መሲህ ኢስ አዲን ጉዕሚንከክዕኔን ሜጡብ እኩን! አሚዕን።

16:9 ሰቀ. 19፥8-10። 16:10 1 ቆር. 4፥17። 16:15 1 ቆር. 1፥16። 16:19 ሰቀ. 18፥2። † 16:22 ኒ ቀርኝ አም፡- የኖሁ ግሪክ ኢፎን «ማራናታ» የኖ።

ሶቀማንቾ ጳውሎሴ ለንክ ሶህኑተ ቆሮንቶስ መኒሃ ኣጉሰ

ጳውሎስ ቆሮንቶስ መኒሃ ከተቦ ለንክ ሶህኑት ከተባዎሁ ቆሮንቶሳን ሄኔ መገኑ አመዕኔ መን ጭምት ምናን ሄዕናሰ ሜጡ እሁ አበ ሂላ እኮ ወክቲንት እቅ። መት-መቱ አመዕናኑት ጳውሎሴ አሊን መት-መቱ ሂላ ጠወ ጠወኦስ ጎሬ ጳውሎስ ሀራሩተ ከለቆተ አበ ሀቾ፤ ሁኩንን እኮ ወክት አኩ መንጻዲኑት ሞጭጨንቶስን ኩለኛ።

ሶህናሰ ሞኔ ክፍላን ጳውሎስ ቆሮንቶሳን ዮ መገኑ አመዕኔ መን ጭምት ዲእ ምናን ዮስ ጠውተኔሃ ኩል አመዕናኖ ኣዜን ኬዕዮ ጠዋሃ ጠረኘ መስለ ሚሃ ኣሰጎሬ ሂረ ኩለኛ። ህከኔን ሜጡ አዕይ ኩ እስ ጠረኛ መስሉ ቶበት ሀራዕረንቶተ አዕዮሳሃ እኮቤቹሃ ሞጭጨምስ መንጻዲኑተ ኩለኛ። ህከኒቹ ኤተርን ይሁዳን ሄኔ አመዕናኑተ ሀዕሎኖተ ኒያቻስ ኬስ ኣቶተ ኩለኛ። መጨረሽ ፎሎጮን ጳውሎስ አሳበ አሊን ኬዕዮ ክሲሃ መከላክያ ኣሰኛ። ቆሮንቶሳን መገኑ አመዕንቶ መን ዲእ ሞኒ መት-መቱስ ገውሰ ሀንቅ አሳበተ አት ጳውሎሴ ክከብ ሶቀማንቾ ይት ከሰሳሲት እቅ።

መጻፉስ አኖሃ

ኣጉሰ (1፡1-11)

ጳውሎሴለክ ቆሮንቶስ አመዕናኑተ (1፡12—7፡16)

ይሁዳን ሄኔ አመዕናኖተ ሀዕሌመስገ (8፡1—9፡15)

ጳውሎስ ሶቀምስ ደኣንቲሃስ ሆንጠህሾ ጠወ (10፡1—13፡10)

መጨረሽስ (13፡11-14)

- 1 መገን ሰውቲን መሲህ ኢስ አሳበቹ እኮም እን ጳውሎሴ አመኔቤቲቹ ጠማቶሴቻ፡ ቆሮንቶሳን ዮ መገን አመዕናኖ ጭምት ዲእ ምናቻለክ ህትን ዋመ አካይያን ዮ አመዕናኖተ ጉዕማንከ
- 2 እንቻኔ መገንቹ፡ ቀርቹሃኔ መሲህ ኢስ አሰቱትለክ ወገሬቱ ክዕኔሃ እሁን።

ጳውሎስ መገኒሃ ሆንጠህሾ ገለት

3 ማርቶ እን እኮሃ ጠረኝመተ ጉዕመንከ ኣሰኖ ህትን ቀርቹሃኔ መሲህ ኢስ እን መገኒሃ ገለቱ ኢሉስ።

4 ነኡን መገኒቻ ኣእኖም ጠረኝማን ኦርሽ ኣዜን ዮአረ ጉዕመንከ ጠረኝሱ ኣታልኖተ መገኑ ኔሳሃ ኦርሻን ጉዕማንን ጠረኝሰኛ።

5 መስንትስ መሲህ ኦርሽተ በትኝሰ ቤቀምምገን ጠረኝመታ መሲህ አዲን በትንሰ ደእኖም።

6 ህትን ነኡ ኦርሽተ ቶንጋሚሁ አዕኔ ጠረኝቶሮተለክ ጡምቶኖታት፤ ህትን ነኡ ጠረኝኖምጎሬ አዕኔሁ ነኡ ቶንጋሚ ደኒን ኦርሽተ ኣታዕሰን ቶጌን ጠረኝቲኒንተ፤

7 ህከኒሃ ኒ ኦርሽተ ቤቀንቲኒንተህንገን መንጻዲኑኔ ቤቀንቲኒንተገ ደንጋምቤቹሃ ክዕኔ አሊን ዮኔ ተብሶሁ ጠረኘሃን።

8 እመኤ ኦሶ! እስይ ባዶን ኢልቶኔ ኦርሽተ ደጎኖተ ሀንሳም፤ ሁኩንን ኢልቶኔ ኦርሽተ ኣታዕልኖም ገሲቻ በትኣን ፎሊን ሄዕናኖም ተብሳሃ ሙርኖም እቅ።

9 ህትን ሬሁተ ፈረዳመአንገን አዕን ቀልቤኔ ሰውይኖም እቅ፤ እኮጎሬ ሁኩ ጉዕመንኩ ጠወ አሊኔ ኢሊኢሁ ሬቶ መን ሬሆቻ ኬሰኖ መገኖን ድክዕንት ቤሉ ገይኔ ምልቃን ድክዕንበጋት።

10 መገኑ ሬሆቻ ጡምሾኔ፤ ቲሁ ጡምሰኖኔ፤ ህትን ከ ኤተሩሃ ፊሰኖኔገ መገኖን ተብሳሃ አዕናኖም።

11 አዕኔሁ ኔሳሃ ዲኣ ኦርሽን ሀዕሉ ሰውሰኖህዕኔ፤ ህትን አበ ዱኢን ነኡ መገን ሀዕላሽ ደእኖም ወክት ልገቡ መኔ ኒ መሳን መገኑ ገለትጨኛ።

ጳውሎስ ምቃ ሃመኖ ያደተ ደሩስ

12 ነኡ ድክዕናምርቹ ከኒት፤ ከን ዲንዮ አሊን በትሽን ክዕኔን ሜጡቦ ዮኔ ደቀንሹ መገኒቻ ደዕኖም አመዕንገሺን ሄዕናምገ ቀልቡኔ መሰከረኛ፤ ሁኩንን መን ሀይማን እሁዕን መገን አሰቶኒት።

13-14 መስንትስ አዕኔ እነበቢሃለክ አሳራመቲሃ ኣታልቲኒንተህን ቤሉ ሞሉ መቲርቹሃ ከተባንክዕኔበእ፤ ህካን እኮቤቹሃ ቀርቹኔ ኢስ አሜተኖ በር ነኡ ክዕኔን ድክዕኖተለክ አዕኔ ኒን ድክኣኖተ ከኒቻ ብርተ ኒተኔሃ ቀወንክ አሳራመቲኒንታሁ ኤተርገሽ ሹልቲኒ አሳራመቲኒንተገ ተብሳሃ አዕናኖም።

15 ከን ጠዋን ሀንቀኝ እኮምቤቹሃ አዕኔ ኢን ለሙ ወክት ደግለሸቀንቶኖተ ይ ጉዕመርቹቹን ሄጭ ክዕኔቤቹ አሜቶተ ሀሾም።

- 16 እንን መቄዶን ባዱ መረንለክ ህክንቤቶች አሜተን ክዕኔቤቹ አሜቶተ ሰውይዮም እቅ፤ ህትን ክዕኔቤቶች ይሁድ ባዱ መራም ወክት ዋቄሃኤ ሸንቅተ ኣቴን ህርሲሲንጎተኤን ሰውይዮም እቅ።
- 17 ህትን እን ያጀም ወክት ሸኪምንዶ? ህትን እን ሰውያሚሁ መን ሰውትገ መቲቶር «እሁን» ይ ፈንቀሸንገ «እሁን» የንትንዶ?
- 18 መገኑ ሀንቅንክ አመነሞኤሃ እኩገን ነኤሁ ኩልናንክዕኔ ላገት «እሁን» ይን «እሁን» ይኖታበኤ።
- 19 እን ስላስለክ * ጠየቆስተ ተማርሰኖህዕኔህ መገን ቤቱ መሲህ ኢስ ጉዕመ ወክት «ኤ ሀንቅንክ» መቶረ «እሁን» መቶረ «እሁንክ የሃበኤ።»
- 20 መገኑ እሴኔ ተብሶህ ጉዕመንኩ «እሁን» እኩህ መሲህት፤ ነኤ መሲህን መገን ኬዕምኚሃ «እሚዕን» ይኖሚህ ከኒሃት።
- 21 ኔሳሃ ክዕኔን ሚጡበ መሲህን ጠረኝናምገ አዕዮኔህ መገኑሃን፤ ቡርኔህ እሶት።
- 22 እስረ እሁኔ ለሊሰኖ ገይሰ ማተመ ኒ አሌን አዕዮሁለክ ጠሊሊ አያነሰ ሩብት አሆተ ቀልቤንከኔ አፋሽኢሁ እሶት።
- 23 እን ቆርንቶስ ከተመ ፈንቀል አሜቶዕስ ፈቆሚህ ኡሙዕር ሻዝካንክዕኔበእገ ይደት፤ ህከኒሃ መገኑ ሞሰክርሃኤ።
- 24 አዕኑ አመዕነቶንከክዕኔ ጠረኝቴን ኡርቴንጎተረ እከንተቤቹሃ አዕኑ ሙንደኦናተ ክዕኔን ሚጡበ አዕናምህን ቤሉ አመዕነትክዕኔ አሌን ቀርቻኑተ እንካምበኤ።

2

- 1 ቴሱ ሻዝሶህዕኔተ ሀሳምበእቤቹሃ ለንከሃ ክዕኔቤቹ አሜታምበእገ ሙርሰጭዮም።
- 2 እን ክዕኔተ ሻዝሾንክዕኔጎሬ ሻዝሾንክዕኔ ክዕኔ ቤሉ ኤሳሃ ሙንደሲሰኖ አይ ዮኤ?
- 3 እን ህት ከተቦንክዕኔህ ክዕኔቤቹ አሜቶም ወክት ኤሳሃ ሙንደሲሰኖ ሀሳ ሙኑ ሻዝበእገ ይደት፤ መሰንትሰ ኢ ሙንደኤት ጉዕሚክዕኔ ሙንደኤት አሁስ አመዕናም።
- 4 መሰንትሰ እን ልግቤ ኦርሻን፤ ቀልብ ጭንቃንለክ አበ እንጂጃን ከተቦንክዕኔ ክዕኔተ አበ ኢታንክዕኔገ ደገናታት ቤሉ ሻዝሶህዕኔታበኤ።
- መን ቤሱ «ፈቁን» ይተኔሃ
- 5 መን ሻዝሾ መንቹ አደሁ ሃዕዮጎሬ ሻዥሾህ ጠለዕል ኤሳሃ እሁዕን ቤሱሰ በትሱ እሁንከኤ ቤሉ ጉዕመንከኔ እህበረ ልግብንከኔ ሻዝሾኤ።
- 6 ህትኔ መንቹ ክዕኔች ልግቡኔ ቀጠኤንተሰ ቅጣት ጌሱ አህናስ።
- 7 ህካን እኮቤቹሃ ሁኩ መንቹ አበ ሻዥቤቹሃ ተብሳሃ ሙረኖበዕገ አዕኑ እሱሃ ማርንስ የለክ ጠረኝሱ ሀሰሰኖህዕኔ።
- 8 ህትን እሶን ዮህዕኔ ኢተተ ፈንቀሸቴን ጠረኝሰኖተ ኡጫንክዕኔ።
- 9 እንን ህካን ከተቦንክዕኔህ ፈተንጎቴን ጉዕመ ጠዋንን አዘዘንጎቴንተረ እሁክዕኔ ደጎተ ይደት።
- 10 አዕኑ ማርንስ ይቴንጎተሰ መንቹ አደሁ እኮጎሬ አኒሁ ማርንስ፤ ሁኩ መንቹ ቤሾርቹ ሃዕዮ ጎሬ እን መሲህ ብሬን «ማርም» ያንሲህ ክዕኔተኔሃት።
- 11 እን ህካን አላሚሁ ሸይጣን ሂላ ጠወ ደንጋምቤቹሃ ኔሳሃ ጣንሰኖበእገ ይደት።

ጢርኣይ ዩኖቤቶን ጳውሎስ ጨነቀሙስ

- 12 ህከኒች ኤተርን መሲህ ተሸት ላገተ ተማርሶተ ጥርኣድ ከተመ መርም ወክት ቀርች ሆጎ ኡሩት ፈንተኦኤ እቅ።
- 13 እኮጎሬ አመኤ ቤቲን ቲቶን ደቀሙ ሆጎምቤቹሃ ቀልቡኤ ሻዥ እቅ፤ ህካን እኮቤቹሃ «ወገሬቲን ሃዕዮ» ይ እሳች አይ እክ መቄዶን ባዱ ኦርዕዮም።

እንጂሉ ቁለኖሃን

- 14 ጠወ እኮጎሬ መሲሃን ጉዕመ ወክት ድለ አዕናምረ አዕይ አምንሰኖኔለክ ኤንኬዕንስ እንጀኖ ፎገል ኒ መሳን ጉዕመ ቤቶን ለሊሰኖ መገኒሃ ገለቱ አሁንሰ።
- 15 መሰንትሰ ጡምታሁኦተለክ በኣሁኦ በላን መገኒሃ መሲሃን ጡሙ ፎገሉ ዮሰ እንጀንተ እንኩም።
- 16 ህካን እኮቤቹሃ ነኤ በእኖ መኒሃ ሬሆተ እንጀን፤ እኮጎሬ ፈቀኖ መኒሃ ሃዕተ እንጀን፤ ህከን ጠዋሃ በቀእኖ መንቹ አደት?
- 17 መሰንትሰ ነኤ መገን ላገተ ነገዳ ልግቤ መንጋበኤ፤ ጠወ እኮጎሬ ነኤ መገኒች ሶህሞ መንገ መሲህ አዲን መገን ብሬን አመዕነምምረ እንክ ጠወዕናም።

1:16 ሶቀ. 19፥21። * 1:19 ስላሴ ያሉ ሱዕሙስ- ስልዋኖሴት 1:19 ሶቀ. 18፥5። 2:13 ሶቀ. 20፥1።

3

ሃዕሮ ወኣድ ካዲመተኔሃ

- 1 ገዢ ፈንቀሽን ገለትጭናምትንደ? ህከረንገ መት-መቱ መኑ አታሀንገን ክዕኔሃ ህከረንገ ክዕኔኛ ገይኔ ጡምመተ ለሊሳ ደብዳቤተ ሀሰሳኔንደ?
- 2 እዕኑ መኑ ጉዕሙንኩ ደገናህዕኔህለክ እነበበኖህዕኔህ ቀልብኔ ኣዜን ከተበንጥጥተ ደብዳቤተኔ።
- 3 እዕኑ ኒ ክድማን አሜቴንታሁ መሲህ ሶህኑተ አሁክዕኔ ለሊዮአሃን፤ ኩ ሶህኑት ከተበንቶአሁ ሄኣና መገን አያኒንት ቤሉ ቀለማንበእ፤ ህትን ከተበሞንኩ መን ቀልቤን ቤሉ ክኒ አሌንበእ።
- 4 ካን ይናም መሰንት መሲህ መሳን መገን አሌን አመዕነቱ ዮኔቤቹሃት።
- 5 ክድመ ሆጉተ እዕናተ አታልናሚሁ ዎልቀተ እሰኖኔ መገንገንት ቤሉ ነኡ ጠረጽኑተ እንክበእ።
- 6 ሃዕሮ ወኣድ ላገ ካዲመተ እንኮተ ዎልቀተ ኣሲኔህ አሶት፤ ሁኩንገ ከተቤመ ሕገን አሁዕነ መገን አያን ወልቃኒት፤ ከተቤመ ሕጉ ሬሁተ ኤበና፤ መገን አያኑ እኮኅሬ ሄኡ እሰና።
- 7 ክኒ አሌን ከተበሞ ሕጉ አሜቶህ ኬዕምኚንት፤ ሁኩን መሰሚኔ አሌን ለላን ሃዕዮ ኬዕምኙ ሆረኣን ኦርዕዮ ጎሬሁ ሚንሰ አበ በለቃኢሃ እኮቤቹሃ እሰራኤላውያኑት ሚንሰ ቱክ ይት ለኦተ አታልቶበእ፤ ቴሱ ኩን ሬሆቤቹ አሞንሰኖ ሕጉ ህትኔ ሎረ ኬዕምኚን አሜቶህ እኮቶ
- 8 ጠሊሊ መገን አያን መሳን ደገመኖ ክድመት በተአኖ ኬዕምኙ ሄኣናሰበእንደ?
- 9 መሰንትሰ መን አሌን ፍርደ ኤሶ ሆጎተ ከንኩ ኬዕምኙ ሃዕዮኙ መኒ ፈይመተ ኤሶ ሆጎተ በተአኖ ኬዕምኙ ህት ሄኣናሰበእ?
- 10 ወዕና ሃዕዮ ኬዕምኙ ኤተሮን አሜቶ ኬዕምኚን ሚጡብ ለኤኖ ወክት መቱርቹሁ ኬዕምኙ ዮሰበእሃ አሁሰ ለዕናም።
- 11 ሁኩ በእን ኦርኣን ሃዕዮሁ ከንኩ ኬዕምኙ ሃዕዮሲኙ ዘላለሚሃ ጠረኝ ሄኣናሁ ህት በተዕዮ ኬዕምኙ ሄኣናሰበእ።
- 12 ቴሱ ህትኔ ተብሶሁ ሃዕዮኔኙ ነኡ መለልን ጠወዕናም።
- 13 እሰራኤላውያኑት ሚኔሰ ኑሩ በእን ኦርኣኖሃ መጨረሽሰ ለኣበእገ ሚንሰ ሻሽን ድሶ መሰጋበእ።
- 14 እሰ ቀልቡ ዲጆኤ፤ ከበሬ አሊ ኑኅቹ ወኣድ መጻፈ እነበበኖረ ቀልቡሰ ህከን ሻሽን እፍሰምጋንት፤ መሰንትሰ ሁኩ አፍሰሞሁ ከአኖሁ ጠለዕል መሲሂን እኮቤቹሃት።
- 15 ኤ ከበሬ አሊ ሕግ መጻፈተ እነበበንታ ወክት ጉዕመንከ ሁኩ ሻሹ ቀልቤንከሰ ሄኣና።
- 16 ጠዉ እኮጎሬ መኑ ቀርቾ አሲብ ፈንቀሎ ወክት ሁኩ ሻሹ ሸቀና።
- 17 ህትን ቀርቹ አያን እኮቤቹሃ ቀርቾ አያኑ ዮቤቹን ጉዕማንን ሰዎልድመት ዮኡ።
- 18 ነኡ ጉዕሙንኩኔ ጌረደሞበእ ሚኔን እንክ ለአቃንቹን ለአናምሀንገ ቀርቾ ኬዕምኙ ለዕናም፤ ነኡ ኬዕምኚኙ ኬዕምኚን እሱ እጉዲሃ ደረማሚት፤ ሁኩን እኮሁ አያን እኮ ቀርቹኙት።

4

ሀንቅ ክድመተ

- 1 መገን ማርቶን ኩ ሆጉት ዮኔቤቹሃ ተብሳሃ ሙርናምበእ።
- 2 ጠዉ እኮጎሬ ማጠሞለክ ሙልሲሰኖ ጠወ ኤጅናም፤ ተንኩተ እዕናምበእ፤ መገን ላገተ ክክቢን ልቀለንቃምበእ፤ ህከን ወጢ ሀንቅ በንቻን ለሊንሳም፤ ሀንቅ ለልሲን እኮጎሬ መገን ብሬን ጡመ እዕናሚሃ አሁኔ መኒሃ ጉዕሚንከ ለሊንሳም።
- 3 ነኡ ተማርሰናም እንጂል ላገት አይደጎ ማጠሞሃ እኮጎሬ ማጠሞሁ በአኖሁ መኒሃት።
- 4 ህትን መገን ማዕልተ እኮ መሲህ ሎርመተኔሃ ኩለሞ ተሸት እንጂል ላገ ኑር ለኣበእገ ከን ኣዲንያ አል ሸይጣኑ መገኑ አመዕንቶብእ መን ቀልብ ቆቅሾኤ።
- 5 ነኡን መሲህ አሲ ቀርቹ አሁሰለክ ነኡ ገዢ ኢሰተኔሃ ክዕኔ ካዲመተ እንኮም ቤሉ ገይኔተኔሃ ተማርሰናምበእ።
- 6 መሰንትሰ «ቱንሰኙ ኣዚኙ ኑሩ ፋሎን» ይ ጠወዕዮ መገኑ መሲህ ብሬን ለሊሰኖ መገን ኬዕምኙ ደንገም ኑር ኣሶኔተ ኑሩሰ ቀልብኔ ኣዜን ለሊሰኖገ እዕዮ።
- 7 ጠዉ እኮጎሬ ኩ ሎሩ ዎልቀት መገኒሃ አሁንሰ ቤሉ ኒሃ አሁ ሆጉሰ ለልሲሃ ኩ ሎሩ ጠዉ ትብ ኦዳገ እንኮም ኒ ኣዜን ዮኡ።
- 8 ኔሳሃ ጉዕመ አዲንን ኦርሸት አልታኔ፤ ጠዉ እኮጎሬ ቄለማምበእ፤ ልግብ ወክት ጉረተ ኣገኖኔ ቤሉ ተብሳሃ ሙርናምበእ።
- 9 ህትን ሸሬኖኔ ቤሉ ሜጢሃኔ እንክ ፈንቃምበእ፤ ዎቀረም ኡንባም፤ እኮጎሬ ሬናምበእ።
- 10 አሲ ሄኡ አሌኔ ለሎተ ጉዕመ ወክት ጅሰምኔ አሌን አሲ ሬሁተ እጅን ዘህናም።
- 11 መሰንትሰ አሲ ሄኡ ሬሆኖ ጅሰማንከኔ ለሎተ ኔሳሃ ቴሱ ፎሊን ዮምረ አሲተኔሃ ጉዕመ ወክት ሬሆተ ሀግሴን ኣሲኖኔ።

12 ህዳን እኩቤቸሃ ረሀት ኒ አሌን ሆጉተ አታእ። እኩሳሬ ሄኡክዕኔ አሌን ሆጉተ አእኖት።

13 እሁን ቤሉ «እመዕንዮም፤ ህዳን እኩቤቸሃ ጠወዕዮም» የመዎ ከተበሞቤቸሃ ሁኩ እመዕነት ቀልቡ ዮኔቤቸሃ ነኡ እመዕንናም፤ ህዳን እኩቤቸሃ ጠወዕናም።

14 ቀርቹ እስ ሬሆቹ ኬሾ መገኑ ኔሳሃ ኢሲን ሜጡቡ ኬሰኖኔገለክ ክዕኔንን ሜጡቡ እስ ብርተ ሆንጠሀሰኖኔገ ደንጋም።

15 ሁኩን ጉዕሙንኩ እኩሀ ክዕኔተ ደግለልሃት። እስቱት ልግቤ መኒሃ ኢልቶኢሀ መገኒሃ ኬዕምኝ እሆኖ ገለቱ በተኦታት።

እመዕነቲን ሄኡ

16 አብልን ለኤኖ ጅሰሙኔ በእን መር ጎሬ ኣክኔ ጅሰሙ በሬን በሬን ሃዕርሃ እኩቤቸሃ ተብሳሃ መርናምበእ።

17 ከን ቀዎ ወክቲሃ ኦርጨማም ኬዕምትበ ወክትስ ኦርሸት ሎረለክ ዘላላሚሃ ሄኤኖ ኬዕምኚሃ ቅጥ አታኔት።

18 መሰንትስ ነኡ ኦሎንሰን ዮሚሀ ለልባሃት ቤሉ ለለኖሃበክ፤ ለለኖርቹ ቀወ ወክቲሃት፤ እኩሳሬ ለልበርቹ ዘላላሚሃ ሄኤኖሃን።

5

1 ኩ ዱካንገ ዮ ኣዱንያ አል ሞኦኔ ድጀሞቻ መን አንጋን እሁዕነ መገኑ እጃር ዘላላሚሃ ሄኤኖ ሞኦ ሰማን ዮኔሃ እሁሰ ደንጋም።

2 ሀንቅክን ነኡ ሰሜ ምኒኔ ኦደዕኖተ አበ አዛንባሚት።

3 መሰንትስ ህዳን ኦደዕኖሚቻ ኤተርን ከልን እንካምበእ።

4 ህትን ከን ዱካኖን ዮም ጌሳን ኬዕሜሃኔ አዛንባም፤ ነኡ ኦርጨቀማሚሀ ሬሆኖ ማሉኔ ሄኤን ደረሞተ ሰማን ዮ ምኒኔ ኣንጎተ ሀንሲት ቤሉ ከን ኣዱንያ አል ጠዋቻ አደ አሃሃ ሀንሰበእ።

5 ከን ጠዋሃ ቅጥ አዕዮኤሀለክ ጠሊላ አያን ኔሳሃ ሩብት አሆተ ኣሴኔሀ መገኑሃን።

6 ነኡ ማለን ከን ኣዱንያ አሌን ዮም ጌሳን ቀርቹን ሜጡቡ ሄኡ ሆጉኔ ደንጎምጎሬ ጉዕመ ወክት እሱ እመዕንን ሄዕናም።

7 መሰንትስ ነኡ ሄዕናሚሀ ኣመዕነትን ቤሉ ለእንበእ።

8 ህትን ከን ማሊቻ አደ እንክ ቀርቹሃ ኢሲን ሜጡቡ ሄዕኖተ ሄዕላንታምቤቸሃ ኣመዕነንሺን ሄዕናም።

9 ህዳን እኩቤቸሃ ማለንከኔ ሄዕናም ጎሬ ሀክረንገ ማሊቻኔ አደ እንኩምጎሬ ሰሙቱኔ መገኑ መንዲሲሱሃን።

10 መሰንትስ መት-መቱስ ማለንከስ አዕዮ ጡመ ጠዋሃ እኩ ሂላ ጠዋሃ ሆጎስ ዋገ ሀሰሰኖሰርቹ ቶገሃ ጉዕሙንኩኔ መሲህ ፍርድ ቦርጭመ ብርተ ሆንጠሀ ሀሰሰኖኔ።

11 ቀርቹ ዋጂ ዩ መ ዩሃ ጎሬ ደንጋምቤቸሃ መኡሀ ደገኖገ አዕናም፤ እኩሳሬ ነኡ ሀትናሞሃ መነ ጎሬ መገኑ ደገኖ፤ ክተሬ ቀልቡሀ ህዳን ደገኖሃ እሁሰ ተብሳሃ አዕናም።

12 ቀልብ ኣዜን ዮ ጠዋን እሁዕነ ለለኖ ጠዋን ድከኣ መኒሃ ፈንቀሽቲነንተ መሰሉ ሄኤሀዕኔተ ኒን ድከኤንንተ ዎቃሃ ደኣቲነንተገ አዕኖሀዕኔታት ቤሉ ቲሱ ገዉኔ ክዕኔ ብሬን ገለትጭኖታበእ።

13 ነኡ በርገገሽ እንኩምጎሬሀ መገኒሃ ይኒት፤ ህትን ኢንኬዕናመተ እንኩምጎሬ ክዕኔኤሃ ይኒት።

14 መቱ ወክት መሲህ መኒሃ ጉዕሚንከ ሬሁሰለክ መኡ ጉዕሙንኩ እስ ሬሆተ ቤቃማኦተ እሁሰ ደንጎምቤቸሃ መሲህ አተቲ ሆጎተ ግዳጅሳኔ።

15 ህትን ፎለን ዮ መኡ ጉዕሙንኩ እሳሃ ይ ሬዮለክ ሬሆቻ ኬዕዮ መሲህሃ ሄኡታት ቤሉ ከ ኤተሩ ገይሀስ ይት ሄኣበእገ መሲህ ጉዕሚንከ ሬዮ።

16 ቲሱ ከ ኤተሩ መሲህ መኒሃ ለእኖ ሃለን ለዕናምበክ፤ ነኡ መሲህ ከኒቻ ብርተ ህት ለእኖም ጎሬ ከኒቻ ኤተርን እኩሳሬ ህት ለዕናምበእ።

17 ህዳን እኩቤቸሃ እዪሀ መሲሂን እኩሳሬ ሃዕርሃ ክልቀት፤ ኦባቹ ክልቀቱ ህጎኡ፤ እሲንን ሃዕር ክልቀቱ አሚቶኡ።

18 ሁኩ ጉዕሙንኩ ጠዉ እኩሀ ኔሳሃ ገይንከስ መሲህ አዲን ሀራርሴኔለክ ሀራር ሆጉተ ኣሴኔ መገኒቻት።

19 መገኑንኩ መን ጨብ ዋለኡዕነ መሲህ አዲን ከን ኣዱንያ አል መነ ገይንከስ ሀራርሴ ዩሃን፤ መነ ቀርቹን ሀራርስ ላገተ ኔሳሃ ኣሴኔ።

20 መገኑ ኒ አዲን መነ ገእኖቤቸሃ ነኡ መሲህሃ ወከለሞምራን፤ ህዳን እኩቤቸሃ ነኡን «መገኒን ሀራዕሪሜ» ይን መሲህ ሱዕሚን ኡጭኖንክዕኔ።

21 ነኡ መሲህ አዲን መገኒሃ ልዩ እንክ ዋለአሞተ ጨቡ ዮበእ መሲሂ መገኑ ኒተኔሃ ጨብኝን አዕይ ዋለዕዮሰ።

6

1 ነኢ መገንገን ሜጡብ አዕናምረ እነኩምቤቸሃ መገንገኙ ቶጌንተ አሰቱተ ተሰ እቴጌንተበእገ ኡጭናንክዕኔ።

2 መሰንትሰ መገኑ

«እን ኢታም ወክቲን ሞጮጩንስ!

ጡም በርንከ ሀዕሊንኬ» የኖቤቸሃ

«እሰ ኢተኛ ወክቲ ቴሶት፤ ጡሜኖ በሩ ቴሶት።»

3 ኒ ሆጉት ሀንቀንታበእገ ይን መ ጠዋን አይሁ ጉፋቹ እንካምበእ።

4 አሁን ቤሉ አዕናም ጠዋን ጉዕማንን ገውኔ መገን ካዲመገ ሆንጠሀንሳም፤ ሁኩንን አበ ኦርሻን፤ ሻዞን፤ ጭንቃን፤

5 ገረፈሚን፤ ኡሱረሚን፤ ረብሻን፤ ሆጎ በትኚን፤ ግሰኛተ ሆንገለከ ጎራንት።

6 ሀትን ነጠማን፤ ኢንኬዕኒን፤ አደቢን፤ ጎደቦ ላፍማን፤ ጠሊሊ አያኒን፤ ሀንቅ ኢታን፤

7 ሀንቅ ጠወ ጠወእንለከ መገን ዎልቃን ሄዕናም፤ ፈይመ በገዝ ኦዳተ ጉረለከ መኬ እንጋን አፊኒት።

8 ኬዕምንገለከ ሆፍኚን፤ ገለትጨሚንለከ ቦርረሚን ሄዕናም፤ ሀንቀኛኑተ እንከን ክዘበኛኖገ ዎለአም፤

9 ደገማምረ እንከን ደገምበረ እንኩም፤ ሬቶ ዬንን ፎሊን የምረ እንክ ደገማም፤ ኦሊመኔጎሪሁ ሬኖምበእ፤

10 ሻዞት ኢልቶኔጎሪ ጉዕመ ወክትንከ ሙንደዕናም፤ ቡጥቻኑተ እንኩምጎሪሁ ልገብ መነ ቀጣጣመተ አዕናም፤ መቱርቹሁ የኔበእረ እንኩምጎሪሁ ጉዕመርቹንኩ ኒሃን።

11 ቆርንቶስ ከተማን የንተ መኑ! ነኢ መቱርቹሃ ፊንሱዕነ ኩልኖንክዕኔ፤ ቀልብኔ አልባሽን ፈኖንክዕኔ።

12 አዕኑ ኢተክዕኔ ኔሳሃ ከንቴንታኔ ቤሉ ነኢ ኢተኔ ክዕኔሃ ከሞምበእ።

13 ጠዉ እኩጎሪ አዕኑ አለኤ እኬንተቤቸሃ ያንክዕኔ፤ ነኢ ቀልብኔ ጠወ ማንጡዕነ ኩልኖንክዕኔንገ አዕኑሁ ቀልብክዕኔ ጠወ ማጦኑዕነ ኩሌኔ።

አመዕንበ መኒን ሜጡ እሁ ገበእባሃ እሁሰ

14 አመዕንበ መኒን ገበእበ ዎቄን ጠመደንቶኖቹ፤ መሰንትሰ ፈይመትለከ ጨቡ ሀት እክ ደቀንቶተ አታልታኦ? ሀትን ኦሩለከ ቱንሰቹ ሀት እክ ሜጡብ ሄኑተ አታልታኦ?

15 ሀትን መሰሃሃለከ አልብሲሃ * ሞ ደቀንሹ የሱ? ሀትን አመዕኔአሁለከ አመዕንቡሁ ሚን ደቀንታኦ?

16 መገን ምኑ ሸርኬን ሞ ደቀንሹ የኡ? መሰንትሰ መገኑ

«አን አሳን ሜጡብ ሄኦም፤

በላንከሰ ፈንቀላማም፤

መገኑሰን እሃም፤

እሰን ኡመተኤ እካእ»

ይ ጠወዕኖገን ነኢ ጉዕመንከ አታለኖ መገንያ ምኒ።

17 ሀካን እኩቤቸሃ ቀርቹ

«እሰ አዚኛ ፋልቲን አደ እኬ፤

ንጆሾሃ መርቹሃ ኡልቶኖቹ፤

እንን ኢረ አዕይ ቶጋንክዕኔ፤

18 ሀትን እን እንክዕኔ እሃም፤

አዕኑ ኤሳሃ ጎለከ ሜኦ አለተ እኬንተ

የኖ ጉዕመንከ አታለኖ ቀርቹ» ዬእ።

7

1 ቴሱ ኢ ጆላ! ኩ ጉዕመንኩ ተብሶሁ አሰሞሁ ኔሳሃ እኩቤቸሃ ማለለከ አያን ንጆሰሰኖ ሀከን ጠዊኛ ገወኔ አገዕርኖ፤ መገኑ ዎጆን ዊመ ዊሚን ጠሊልማን ሄዕና።

ጳውሎሴ ሙንዲኑተ

2 ቀልቢን ቶጌኔ፤ ነኢ ሜጡ መንቹሃ በደልኖምበእ፤ መቱ መንቹሃ ሞርኖምበእ፤ መቱ መንቹሃ ደገላሸቀማምሃ አዕናምበእ።

6:2 ኢሳ. 49:8። 6:5 ሶቀ. 16:23። * 6:15 አልቤሱ፡- ግሪክ ኢፎን «ቤልያል» ህከረገን «ቤልያር» ዕብራይስጥ ኢፎን «ቤልዕል» ዬኖሰ። ፍሳረንትስ «ከልበ ኦኮሃ» ህከረገን «ሕጉ የሰበአሃ» ዩ እህን ሻይጣሃ ኢሰሞሰ የ ሱዕመ። 6:16 ሊዌ 26፤12፤ ሕዝ. 37፤27፤ 1 ቆር. 3፤16፤ 6፤19። 6:17 ኢሳ. 52፤11። 6:18 2 ሳሙ. 7፤14፤ 1 ዱዱ. 17፤13፤ ኢሳ. 43፤6፤ ኤር. 31፤9።

3 ካን ይኖረው ክዕነ አሊን ፈረንደታበአ። ከኒች ብርተ ኩሎንክዕነገን እዕኑ ቀልብኔ ኣዜኒት፤ ህካን እኩቢቸሃ ሄኑን እኩ ሪሆን ጉዕመ ወክት ክዕነች መለዕለማምበአ።

4 ክዕኔ አሊን ዮኤ አመዕነቱ አበሃን፤ ክዕኔን አበ ቦናም፤ ክዕኔን ጠረኛመተ ደኣም፤ ኦርሻንተኔ ጉዕማኒን ሙንዲኔኔ ዳንጉ ዮሰበአ።

5 ነኡ መቅደን ባዱ አሜንቶም ወክት ጉዕመ አዲን ኦርሸት አሊንከኔ አልቶኔ ቤሉ ጀሰሙኔ ፎሎጭዮበአ፤ አብሊን ብተተ ሄኔ እቅ፤ ኣዚን ዋጂ ሄዕዮኔ እቅ።

6 ጠው እኩጎሪ ሻኩ መን ጠረኛሰና መገኑ ቲቶ አሜቲን ጠረኛመተ ኣሲኔ።

7 ጠረኛኖሚሁ ትቶ አሜቲን ጠለዕል አሁዕነ እዕኑ እሱ ጠረኛሴንተገ ሞጮጭኒት፤ ህትን እዕኑ ኤሳሃ ለኦኖተ ሰንቴንተገ፤ ኤሳሃ ጨነቀንቴንተገለክ እኩ ጠዋን ሰጩሰ ሞጮጭኖም ወክት አበ ተሽ ዩኤ።

8 ከኒች ብርተ ከተቦንክዕኔ ደብዳቤት ሻከሳህዕኔጎሪ ሚሃ ከተቦም ይ ሰጫምበአ፤ ሰጩም ጎሪ ሰጩም ሰህናንከኔ ቀዎ ወክቲሃ ሻከሰህዕኔቤቸሃት።

9 ቲሱ እኩጎሪ ተሽ ዩዮኤ፤ መሰንትሰ ኤሳሃ ተሽ ዩኤሁ ክዕኔተ ሻከሾንክዕኔቤቸሃ አሁዕነ ሻከነክዕኔ መሳን ቶበቲን ፈንቀልቴንተቤቸሃት፤ ቲህ ሻከነክዕኔ መገኑ ዩገ እኩቤቸሃ ነኡ መቲርቸሃ በደልኖንክዕኔበአ ዩሃን።

10 መገን አዲን እኩ ሻከነት ጡም አደ አዋንሰኖ ቶበቲን ደገመኖ ደረጎሽ ደግሲሰናቤቸሃ ሰጫቲንት ዮሰበአ፤ እኩጎሪ ኣዲንያ አል ሻከነት ሪሁተ ኤባአ።

11 ኩ መገን አዲን እኩ ሻከነት ሀትኔ ጠረኛመተ፤ ሀትኔ መሰለ ኣሱ፤ ሀትኔ ጡመ ኤሙዕርተ፤ ሀትኔ ከበጅ ዋጅ፤ ሀትኔ ሱኑ፤ ሀትኔ ጡመ ሃሸኤ፤ ሀትኔ ሀንቅ ፍርድ አህን ለኤኖ ሄዕላቸተ ደግሲሾህዕኔገ ጡመገ ቀልቢን ለዕዩ። እዕኑ ከን ጠዋን ነጣኑተ አሁክዕኔ ጉዕመ አዲንን መሰከርሲሲንታአ።

12 እን ከተቦንክዕኔሁ ይሳሃ ዮህዕኔሁ ጡሙ ሰጫቲ መገንህኔን ክዕኔሃ ጡመገ ለሉን ይዩት ቤሉ ቤሾ መንችተኔሃ ህከረገገ ምዕርተዕዮ መንችተኔሃበአ።

13 ህካን እኩቤቸሃት ነኡ ጠረኛመተ ደኣኖሚሁ ህከን መሳኒት፤ ኒ ጠረኛማች አበ እዕኑ ጉዕመንኩክዕኔ ቲቶ ቀልብ ፎሎሰሴንን ቲቶ ሙንደዕዮቤቸሃ ነኡ አበ ሙንደዕናም።

14 እን ክዕኔን ድከአምገ ቲቶሃ ኩሎም እቅ፤ እዕኑሁ ሙልሴንታኤበአ፤ ነኡ ጉዕመገከ ወክት ሀንቅ ኩልኖንክዕኔ፤ ህከንገን ክዕኔን ድከዕናምገ ቲቶሃ ኩልኖም ሀንቅ አሁሰ ተራገጠምኤ።

15 ህካን እኩቤቸሃ ቲቶ ዋጅቴንገለክ ሁጤንገን ጉዕመንኩክዕኔ አዘዘንቴን ቶንገተሰጎ ሰጫ ዩኖ ወክት ክዕኔሃ ዮሰ ኢተት አበሃን።

16 እን ክዕኔን አመዕነሙ አታሎምቤቸሃ አበ ተሽ ዩዮኤ።

8

ኦርጨንቶ አመዕናተ ኣሴመ ሀዕላቀንሽ

- 1 አመኤ ኦሶ! መገኑ መቀደን ባደን ዮ መገን መኒሃ ኣሴ ኣሰቶተኔሃ ደጎኖተ ሀንሳም።
- 2 እሰ አሉንን እኩ ኦርሸት እካን ፊተነንቶኤ፤ አሁን ቤሉ ሙንዲኔኔ አበ እኩቤቸሃ አሰ መሃ ቡጥቻኑተ እኩጎሪ ሙንዲኖን አበርቸ አቶኤ።
- 3 እሰን አታልቶ ጌሰ አሁዕነ አታልታህኒች አበ ኢትት ኣቶ ኣሰቶገ መሰከራም።
- 4 ቲሁ እሰ «መገን መኒሃ ሀዕላኖ ብረ ነኡ ጭም አዕናም» ይት ጠረኛሰ ኡጭቶኔ።
- 5 ህትን እሰ ነኡ አገርኖምሀኒች አበሃት ኣቶአሁ፤ ወዕናሃ ገውሰ ቀርቸሃን መሰህ ኢሲሃ ህግሰ ኣቶኤ፤ ህከኒች ኤተርን መገን ሰውትገ ገውሰ ይሳሃ ህግሰ ኣቶኤ።
- 6 ከ ሆጉተ ወዕናንከ ጀመርሁ ቲቶ እኩቤቸሃ ቲሁ እሰ ገውንኩሰን ህከ ጡመ ሆጉተ ሹል አኦተ ኡጭኖንሰ።
- 7 እዕኑ ጉዕመርቸንን እሰን አመዕነቲ፤ ጠውኤንተ ጠዋቲ፤ ኤንኬዕኒን፤ ጡመ ሆጎን ጠረኒን፤ ኒን ዮህኒ ኢታን በተኤን ደገንቴንተገን ከን መኒሃ አኤኖ ጡመ ሆጎን በተዕዩ።
- 8 እን ህት ያንክዕኔሁ ክዕኔተ አዘዘታበአ፤ ጠው እኩጎሪ ዎሉሰ ሀዕልቶተ አበ አጸንታቤቸሃ ክዕኔ ኢተተ ሀንቅ አሁሰ አጥራመቶተ ይዩት።
- 9 እዕኑ ቀርቸሃን መሰህ ኢሰ ኣሰቲተ ደጌነንተ፤ እሰ መሃ ቀባጣሙ እኩጎሪ እሰ ቡጥማን እዕኑ ቀባጣመተ እኩኖተ ክዕኔተኔሃ ቡጥቸ አኩኤ።
- 10 ከን ጠዋቲኔሃ ደግለለኖህዕኔ ጠው ሸካንክዕኔ፤ ኑራ ዘማንች ጀመርቲን ጠለዕል ኣሲሃ አሁዕናን ከ ጠው አቶኖተ ሰጫ ይቴንተራ ብረፊ አዕኖተ እቅ።
- 11 ህካን እኩች ዮህዕኔ ጌሲች ኣቶኖተ ሰው ይቴንተ ሰዊቲክዕኔ ዊሞተ ቲሁ ህከ ሆጉተ ሹልቴን ለዕዩ።
- 12 መቲ መንቸ ዮሰበአ ጌሰን አሁዕነ ዮሰ ጌሰን ኢት ኣሰኖሃ እኩች ህከን ኣሴርቸን መገኑ ሙንደኣኖ።

13 እን ካን ያሚሁ ጉዕሙንኩክዕኔ ቅጡ እኩኖታት ቤሉ እዕኑ ኣቴን ኦርጨቀንቴን ሞሉሰንገ ፎሎጭቴን ይኖሞበእ።

14 እዕኑ ኦርጨቀንቴንን ወክት እሰ ዲንያት ክዕኔ ኦርሸተ ሀዕልቶተ ቴሱ ክዕኔሃ የሀዕኔርቼ እሰ ኦርሸተ ሀዕሉን፤ ከን ሃሊን በላንከክዕኔ ሚጦመት ሂእእ።

15 ሁኩንን፡- «ልግብ ጭምእዕየሀኒሀ ተረፎሰበእ፤ ቀዉ ጭም እዕየሀኒሃ ሆፈዕየሰበእ።» የመም ከተበሞጋት።

ቲቶልክ ጃሊስ

16 እን ክዕኔሃ ሰውያም ጌሰ ቲቱ ክዕኔእሃ ቀልበንከሰ ሰውየተ እዕየ መገኑ ገለትጨሙን።

17 ቲቱ ክዕኔቤቼ አሜተኖሁ ገውሰ ሃሸዕይ ሙንዲኖን ኬዕይት ቤሉ ነኑ ጠለዕል ኡጭኖሰቤቹሃበእ።

18 ህትን እንጃሊ ተማርሰን አመዕናናቤቾን ገለትጨሞ አመዕናንቼ እሲን ሚጡብ ሶንካሞ።

19 ህከኒቾ አበ ሀዕላቀንሸሰ ቶንጋሞ ወክት ሚጡብ መሮተ አመዕናን መጠረሞኤ፤ ሀዕላቀንሸሰ ቶንጋሚሁ ቀርቼ ገውሰ ኬዕምሰናሃለክ ሞሉሰ ሀዕሊሃ የኔ ጡመ ሃሸኢቾ ኬዕየሀኒንት።

20 ከን መኒሃ ኢልንሶተ ኣሰሞኔ ብርተኔሃ እጹሁ ሞቀሰኖኔበእገ ኣገዕርናም።

21 አላመኔ ቀርቾ ብሬን ጠለዕል እሁዕነ መን ብሬንን ጡመ እኮ ጠወ እኢሃን።

22 ልግብ ወክት ነኑ አበ ወቀን ፊተንሞ ጠረኘ እክ ደገሞ አመኔቤቱ ቲቶንን ሚጡብ ሶንካሚሁ ህከን መሳኒት፤ እሰ ክዕኔ አሊን የሰ አመዕነቱ አበ እኮቤቹሃ ከን ሆንን ሀዕሎተ የሰ ጠረኝመት መ ወክቲቾ አበሃን።

23 ቲቶተኔሃ ደገሃ ሀሴንተ ጎሬ ክዕኔተ ሀዕሎተ ኢን ሚጡብ እኢኑሃ ጃላኤ፤ እሲን ሚጡብ አሜታሁኑኦተ ሞሎ አመኔ ኦሶተ እኮጎሬ እሰ አመዕናና ጭምት ወክለንቶረለክ መሲህ ኬዕምኚሃ ኡርቶእረ።

24 ህካን እኮቤቹሃ ኢተክዕኔ ለሊሾሰ፤ ከን ሃሊን ኢተኔለክ ክዕኔ አሊን ህትን ድክኡ ተሰ እሁ ሆጉሰ አመዕናናተ ጉዕሚንከ ለሊሴንንተ።

9

አመዕናናተ ሀዕሊሃ ጭም እኢመ ብረ

1 ይሁዲን የ አመዕናናተ ደግለሊሃ ጭም እኢመ ብርተኔሃ ክዕኔሃ ከተቡ ሰሰሰናበእ።

2 መሰንትስ እዕኑ ደግለልቶናተ ቅጥ ይቴንታረ እከንተገ ደንጎምቤቹሃ «አካይ ባድ መኑ ህጎ ዘሚኒቾ ኬሰ ደግለልቶተ ቅጥ ይቶእረን» ይ መቅደን ባድ መኒሃ ክዕኔተኔሃ አመዕን ጠወዕየሚሁ ጠረኝመክዕኔ ደጋምቤቹሃት፤ መን ደግለልቶናተ የሀዕኔ ጡሙ ሰውቱ እሳቾ ልግብሰ ኬሰንሰኖኡ።

3 ጠው እኮጎሬ ከን ጠዋን ክዕኔተኔሃ ሰናም ሶኑኔ ህትን ተሰ እህበገ ከ አመኔሱተ ሶሃም፤ እዕኑ እን ከኒቾ ብርተ ዩምገን ተቃጠቤን ኣገረ።

4 መቅደን ባድ መኑ ኢን ሚጡብ ክዕኔቤቼ አሜት ቅጥ ይቶኑዕነ ደጎሀዕኔ ጎሬ ክዕኔን ድክኤኔ ሙልሰኖኔ፤ እዕኑሁ ሃሊ ብከ ሙልቴንንተ።

5 ህካን እኮቤቹሃ ኣቶናተ ላገተ ኣገንተርቼ ሃጭቴን ቅጥ አቴንተገ ቃግሶሀዕኔተ ይ ከ አመኔሱት ሃጭት ክዕኔቤቼ መርታገ እኡ ሰውዬም፤ ህትን ግዳጂን እሁዕነ ኢታን ኣቴንንታሁ ቅጥ ዩኢሃ እሀና።

6 «ቀው ውጮ መንቹ ቀውንከ ሞደና፤ ህትን ልግብ ውጮ መንቹ ልግብንከ ሞደና» ህካን ሰውይዬ።

7 ሙንደእን ኣሰናሃ ጉዕመንከ መገኑ ኢተናሃ እኮቤቹሃ ጉዕሙንኩ ቀልቤንከሰ ሰውዬገ ኣሱን ቤሉ ሻዘን ሀከረንገ ግዲን ኣሱንከ።

8 ጉዕመ ወክት ጉዕመ ጠዋን ገውክዕኔ አታልቴን ጡመ ሆጉተ ጉዕመንከ እኢሃ መገኑ አበ በረከሰ ኣሶሀዕኔተ አታለና።

9 ሁኩንን፡-

«ቡጥቻናተ ህትን በትሽ ኣሴእ፤

ፈይመሰ ዘላለሚሃ ሂእእ»

የመም ከተበሞጋት።

10 ዜሬተ ዉጠኖሀኒሃ ዜሬተ ህትን እተናሀኒሃ እቸተ ኣሰና መገኑ ዉጤንንተ ዜሬት በረከሰ ኣሰናሀዕኔ፤ ህትን ፈይመክዕኔ ላልቹ በትሰናሀዕኔ።

11 እዕኑ ኣቴንተርቼ ኒ ኢዲን ቶገና መኑ ጉዕሙንኩ መገኑ ገለትጮተ ጉዕመ ወክት ኣቶናተ ጉዕሚንከ ኢዲን ቀባጣመተ እከኒንተ።

12 ኩ እዕኑ ኣቴንንታሁ አመዕናና ኦርሸተ ፋሹ ጠለዕል እሁዕነ መኑ መገኑ አበ ገለትጨኖገ እኢና።

13 ኩ እዕኑ ኣቴንንታሁ መሲህ ተሸተ ላገተ አመዕናንጭም ይቴን እዘዘመክዕኔ ኣሳሃለከ ሞሎ መኒሃ ኣቴንንተረ እሁክዕኔ ለሊሰናሃ እኮቤቹሃ መኑ መገኑ ገለትጭታእ።

14 እሱን መገኑ ክዕኔሃ ኣሴህዕኔ ኣበ ኣሰቶተኔሃ መገኑ ኡጭታህዕኔ ወክት እልክዕኔ ለኦተ ሱንታህዕኔ።
 15 መን ላጋን ጠወኦኖተ ኦታሊንበ ሸልማትሰተኔሃ መገኒሃ ገለቱ ኢሉሰ።

10

ጳውሎስ ክድመሰተኔሃ ኣሴ መሰለ

1 እን ጳውሎስ ክዕኔ ብረን ዮሞ ወክት ሙላሚሃ የመሞም፤ ጠዉ እኩጎሪ ክዕኔች ቄዕሪሞ ወክት መለላጎቹ የመሞም፤ መሰህ ጎደበ ላኖማንለከ ጡምማን ኡጫንክዕኔ።
 2 ኡጫንክዕኔንኩ እን ክዕኔቤቹ ኣሚቶም ወክት መለል ጠወኣምጎ ኣቶኖኤበእታት፤ ማል ሰውትገ እንክ ሄዕናምጎ ኣቶኣሩ መት መቶ መን ብረን እኩጎሪ መለል ጠወኦተ ሀሳም።
 3 መሰንትሰ ነኡ መሃ እኩጎሪ ከን ኣዲንያ ኣሌን ሄዕናም ጎሪ ከን ኣዲንያ ኣል መንገ ኣለማምበእ።
 4 ኦሊንሸኔ ኦዳት ሻንቀ ድጂሃ ኣታልሲሰኖ መገን ወልቀት ዮሰ ቤሉ ከን ኣዲንያ ኣል መሳርገ ዮኣሃበእ። ክዝብ ኦደተ ድጅናም።
 5 ሀኪን እኩቤቹሃ መን ሰውት መገን ኤንኬዕን ኣሌን ኬኣኖ ቦን ኦደተ ጉዕመንከ ድጅናም፤ ህትን መን ሰውት ጉዕመንከ ኣንግ መሰህሃ ኣዘዘመኖገ ኣዕናም።
 6 ኣዘዘመክዕኔ ሹልቴንተ ወክት ኣዘዘንታበእ መን ገዲተ ፋልኖተ ተቃጠንቦም።
 7 ኣዕኑ ለኤንንታሁ ኣብልን ለለኖ ጠወዪት፤ ሀኩ መንቹሁ «እን መሰህሃን» ይ ኣመዕኔኢች ለንኪሃ ሰዉ ዩን፤ ነኡ ኣሰገን መሰህሪ ኣሁኔ ደን።
 8 ቀርቹ ኣሴኔ ሹምነቴን ኣበ ድክዕዮም ጎሪ ሙላሞበእ፤ ከ ሹምነቴ ቶንጎሚሁ ክዕኔተ ጠረኝንሶህዕኔታቤሉ ድጅኖህዕኔታበእ።
 9 እን ክዕኔሃ ከተቦንክዕኔ ደብዳቤን ዋጅሲሳሚሃ ኣጉዲንከህዕኔ።
 10 መሰንትሰ መት-መቱ መኑ «ጳውሎስ ከተቦ ሶህት ኣበ ኬዕምታእረ፤ እኩጎሪ ኣሰ ገውሰ ለኤኖሪ ኣበ ላፈሃን፤ ጠወኣኖ ጠውንኩ ህንቀሞኣሃን» ይታኢት ኣቀ።
 11 ሁኩ መንጎኩ ነኡ ቀዕራሻን ዮም ወክት ደብዳቤተ ከተቦሚሁለክ ገደኖን ክዕኔን ሜጡብ ሄዕዮም ወክት ኣዕናሚሁ ሚጡ ኣሁሰ ደን።
 12 ነኡ እኩጎሪ መት መቶ ገውሰ ገለትጭታ መንጎ ሚጡብ ገውኔ ኣመሰልኖተ ህከረንገ ገውኔ ለልንሶተ መለልናምበእ፤ ኣሰ እኩጎሪሁ ገወሰ መት-መትንክሰ ለኣ ወክት ገውሰ ገገይንክሰ ኣመሰለንሰት ለኣ ወክት ኤንኬዕኑ ዮሰበእረን።
 13 ጠዉ እኩጎሪ ነኡ ክዕኔተ ኢሉተ ኢሉ መገኑ ኣሴኔ ሆንኔ ወጠን ድክዕናም ቤሉ ድክኡ ሀሰሰኖኔህኒች ኣበ ድክዕናምበእ።
 14 ኣዕኑ ዮንታሁ ክድመኔ ሆን ኣዜን እኩቤቹሃ መሰህ እንጂሉ ተማርሰኖተ ኣሚንቶም ወክት ኣሰሞኔ ሆንኔ ወጠች ህንጎምበእ።
 15 ዋሉ መኑ ቆንዶዴ ሆንን ጌሲች ኣበ ድክኣን የመሞኔ ሆንኔ ወጠች ህንጎምበእ፤ ኣመዕነቴክዕኔ ነጸን መኖጌሳን ክዕኔቤቹን መደበንቶኔ ሆንኔ ኣልባዕልተን መርታገ ተብሳሃ ኣዕናም።
 16 ቴሁ ከኒች ብርተ ዋሉ መኑ ኣታ ሆንቤቹን ኣንግ ቦኑዕ ክዕኔች ካጵ ኣዲን ዮ ባደኒሁ ተሸት ላገተ ተማርሰኖተ ተብሳሃ ኣዕናም።
 17 ጠዉ እኩጎሪ «ድክኣኖሁ ቀርቶን ድክኡን።»
 18 መንቹ ገዉንኩሰ ገለትጨምተ በቀኣሲሁ ቀርቹ ገለትጨኖሰራት ቤሉ ገወሰ ገይንክሰ ገለትጨንበእ።

11

ጳውሎሴለክ ክዝብ ኣሳበተኔሃ

1 ኣዕኑ ኢ ገውመኤ ቀውንከ ኣታልቴንታኤ ኣቃን ጡመሃን ኣቀ፤ ኣዕኑ ህንቅንከ ኣጀቅቴንታኤ።
 2 ኣንን መገኑ ጡመርቹ ሰውዮግ ጡመርቹ ሃሸዕዮንኬ፤ መሰንትሰ ክዕኔተ ጡመ ህፍቶገ መቶ ጎኒሃ ሁኩንን መሰህሃ ሆንጠህሶህዕኔተ ጠዕምዮንክዕኔ።
 3 ጠወኣኩጎሪ ዋሪቹ ህዋ ሸክማንተሰ ሉሲሾሴገን ህትን ክዕኔ ሰውቱ በዕያን መሰህ ዮህዕኔ ጡመ ሰውቲችለክ ነጠማች ፋልቴን መርቶኖታትንጎዶ ዋጅዮም።
 4 መሰንትሰ መቱ መንቹ ክዕኔቤቹ ኣሚቶ ነኡ ተማርሰኖንክዕኔ ኢሲች ዋሉ ኢሲ ተማርሰጎሪ ህከረንገ ቶንጎተ ኣዳኒች ኣደ እኩ ኣያን ቶንጎተጎሪ ህከረንገ ቶንጎተ እንጂሉች ኣደ እኩ እንጂሉ ቶንጎተጎሪ ጠወሰ ጨሉ ይቴን ኣኣቴንጎተ ዮሃን።
 5 ጠወ እኩጎሪ እን ከን ሎርሎራፊ ኣሳባች መ ጠዋን ሆፈኣሚሃ ኣጉጂኤበእ።
 6 እኩጎሪ እን ጡመገ ጠወኣም መንቹ ኣህበጎሪ ኤንኬዕኑ ሆፈኣኖኤበእ፤ ህከኒሃ ልግብ ወክት ልግቤ ዋቄን ለሊንሰ ኩልኖንክዕኔ።

7 እን መገን ተሸት ላገተ ደሞዞ ዮበኢሃ ክዕኔሃ ተማርሲሃለክ ህትን ክዕኔነተ ጎት እኢሃ ገውኤ ሙግ አዕዮሚህ ጨብሃንዶ?

8 ክዕኔተ ካደሞተ ዎሎ አመዕናኖች ሀዕለንሽ ቶጎንከኤ እለተ ዘረሮም።

9 ክዕኔግ ማጡብ ሃዕዮም ወክት ኦርሸተ ኢሊቶኤ ወክት መቅደኒች አሚቶ አመዕናኑት ሀሰሰናኤርቹ ጉዕመ ጠዋን ሀዕልተን ሄኦቤቹሃ ኦቤ ኦሊን እጅነተ ኦኮምበእ፤ ቴሱ ኦሊ ክዕኔ ኦሊን መ ጠዋን እጅነተ ኦኮምበእ፤ ከኒች ኤተርኒ እጅነተ አሃምበእ።

10 መሲህ ህንቁ ኣዘንከኤ ዮቤቹሃ ከን ጠዋን ቦኑ ከመናኤሁ አካሪ ባደን አይሁ ዮበእ።

11 ህከን መስተ መርቹሃን? ኢታን ክዕኔበእቤቹሃትንዶ? ኢታን ክዕኔገ መገኑ ደገኖ።

12 ሁኩ ዎልት አሳበት «ነኡን እሰገ አዕናም» ይተን ቦንታ መስተ ከሞተ ቴሱ አኣሚሃ ከ ኤተሩሃ አኣም።

13 መሰገትሰ ህትኔ መኑ መሲህ አሳበተ አኑደተ ገዉሰ ደርታ ክዘበኛኑተ ሶቀማኑተለክ ሉሲሰ ሆጉተ አታእራን።

14 ሁኩን እጅብሲሰናሃ ጠወበእ፤ መሰገትሰ ሸይጣኑ ገዉሰ ኑር መላይኪቹ አኑደተ ገዉሰ ደረኖ።

15 ህካን አኮቤቹሃ ሸይጣን ካዲመት ፍይማ ካዲመተ አኑደተ ገዉሰ ደርቶጎሬ እጅብሲሰናበእ፤ ኤተርን ሆጎሰ ዋገ ደአታእ።

ጳውሎሴሃ ክድመሰ መሳን ኢልቶስ ኦርሸተ

16 «እይሁ እን ገወ አኮሚሃ አኑዲንከሰ» ይ ቱዉ ጠወአም። ገወ አኑጅን ክዕኔጎሬሁ ቀቅቹ ቦናተ ገወ መንችገ አቴን ዎለዕዬኤ።

17 ህትን አመዕን ቦኒን ጠወአሚሁ ቀርች ሰውትገ እሁዕን ገወ መንቹ እክት።

18 ልግቡ መኑ ከን አዲንያ አል ጠዋን ቦንታቤቹሃ እኒሁ ቦናም።

19 መሰገትሰ አዕኑ ኤንኬዕናመተ አከንተቤቹሃ ገዎኑተ ሙንዲኖን አታዕልቴንተሳት።

20 ህትን አይሁ ርሰገ ጠቁሀዕኔጎሬ ህከረንገ ዘረሮሀዕኔጎሬ ህከረንገ ደግለሸቀምሀዕኔጎሬ ህከረንገ ህንቆሀዕጎሬ ህከረንገ መጫለክዕኔ ዎቀርጎሬ አታዕልቴንተ።

21 እኮጎሬ ነኡ ህከኒሃ አበ ላፋኑተ አሁኔ ሙለን ጠወአም፤

ጠዉ እኮጎሬ አይሁ ቦናተ መለሎጎሬ እኒሁ አሰገን መለል ቦናም፤ ካን ያሚሁ ገወ መንችገ እክት።

22 እሰ አብራዌየ መንንዶ? አንን አብራውቹሃን፤ ህትን እሰ አሰራኤልየ መንንዶ? እን አሰራኤላውቹሃን፤ እሰ አብራሂምተ ዘርንዶ? እን አብራሂምተ ዘር።

23 እሰ መሲህተ ካዲመንዶ? አን አሳች ባሽ መሲህየ ካዲንቹ፤ ካን ዩን በርገጋሽጋት ጠወአሚሁ፤ አሳች በትሽ ልግብ ወክት ሆጎን ቆንዶድዮም፤ አሳች በትሽ ልግብ ወክት ኤሱራሞም፤ በትሽ ልግብ ወክት ገረፈሞም፤ ልግብ ወክት ሬሆተ ኢልዮም፤

24 አይሁዱ ኦንቱ ወክት ሰጅኔ ሆንሶረ ጅራፊን ገረሮኤ።

25 ህትን ሰሱ ወክት በርቲን ዎቀራምም፤ መቱ ወክት ከኒን ቀሰሞም፤ ሰሱ ወክት መርከቡኤ ባር አሌን ቢጠሞኤ፤ ህትን መት ህንከዕርተለክ በራሃ በሃር አሌን ዲንክዮም፤

26 እን ልግብ ወክት ዎቁ አሌን ሄኦን ድርሲን፤ ሸፍጠን፤ አይሁዲን፤ አይሁድ እህበ መኒን፤ ከተማንለክ ኡላ ኡድማን፤ በሃር አሌን ምዕረት አልቶኤ፤ ህትን ክዘብ አመዕናኖን ምዕርተዕዮም።

27 ህትን ልግቤ ሆጎን ሆጎም እቅ፤ ልግብ ወክት ግሰኛተ ሆጊንለክ ጎራን፤ ሰገቤንለክ እቶተ ሆግ ኦርጨቀምም፤ ህትን ቂዚንለክ ኦድኑተ ሆጊን ኦርጨቀምም።

28 ህካን ጉዕመንከ ጠወ ዎለኡዕን በራን በራን ጨነቀማሚሁ አመዕናኖ ጭሚተሃት እቅ።

29 መቱ መንቹ ሆገኖ ወክት እን እሲን ሚጡብ ሆገምሃበእንዶ? መቱ መንቹ ጨብ አዕዮ ጎሬ እን ኡሙዕራምሃበእንዶ?

30 ድክኤ ሀሰሸኤጎሬ እን ድክአሚሁ ላፈ እሁኤ ለሊሰና ጠውኒት።

31 ዘለለሚሃ ማሰአም ቀርቾሃ ኢሰ አኑ መገኑ ክዘባምበእገ ደገኖ።

32 እን ደማሰቆ ከተማን ሃዕዮም ወክት ዎመ አርሰጠሴች ዎርን ሃዕዮ ገሻንቹ አፎኤተ ሀሽ ደማሰቆ ከተም ኡራከተ አገርሲሾ እቅ።

33 ጠዉ እኮጎሬ ኤሳሃ ቀርጫታን ዎራን ከተምሰ ኦታን ሃዕዮ መስኮቲን ድራሴናን ህከን መንች አንጋች ፋሽኤም።

12

ጳውሎሴሃ ለልቶስ ሃሸአቴተ

1 ቦኑ ደግለለኖሃ እህበጎሬ ቦኑ ሀሰሸ ጎሬ ቀርቾሃ ኢሲች ኣሰሞኤ መናማንለክ መገኑ ለልሾኤ ጠዋን ቦናም።

2 መሲህህ ለኩ መቱ መንቹ ደጋም፤ ኩ መንቹ ቶነ ሾሎ ዘመነች ብርተ ሰቅ ሰማሃ ኢሊ መሰሞ፤ መሰሞንኩ ማልንከሰ እሁን እሁ ሆንን ደጋንበእ፤ መገኑ ደገኖ።

3 ጠው እኩጎሬ መንቹ መገን ጃንቲ መሩሰ ደጋም፤ ጠው እኩጎሬ ማልንከሰ እሁን እሁ ሆንን ደጋምበእ፤ መገኑ ደገኖ፤

4 እሰን ህከኔ ኩሎኖተ አታሌንበለክ መኑ ጠውኦተ አታልቡርቹ ሞጮጩኦ።

5 አኒሁ ህትኔ መኒን ድክአም፤ ገዪኤተኔሃ እኩጎሬ ሆንጌአ ቤሉ ድክአም ጠው ዮኤበእ።

6 ህከኒሃ እን ሀንቅ ጠውአምቤቸሃ ድከሰዮሚች ገወ አሃምበእ፤ ጠው እኩጎሬ አዪሁ ኢ አሌን ለአኖርቹሃ ኢች ሞጮጩኖሀኒች ኤሰሃ ሎረ አት ለአበእገ ይ ድከኢች አገሰራም።

7 ከ ኑር እክ ለሌኤ እበ ጠቂች ኪዕዮሀንን ሰናምበእገ ማለኤ ኡትገ ቀሳኤ ኦርሸት ኣሰንቶኤ፤ ህት ኦርሸት ሰቀማንቹ ሸይጣገገ እህን ኦርጨመን ሰናምበእገ አእናኤ።

8 ሁኩ ኦርሰኖኤርቹ ኢ አሊች ሸቆተ ቀርቹኤ ሰሱ ወክት ኡጩም።

9 ጠው እኩጎሬ እሰ «ኢ ወልቀተ ሎረ እክ ለልታኢሁ ኪ ሆንገን እኮቤቹሃ ኣሰቱኤ እካሃ» ዬኤ፤ ህካን እኮቤቹሃ መሰህ ወልቀተ ኢ አሌን እኮተ መክቲቹ በትሸ ሆንገንተኤ ተሸ የዕኔ ድክአሰተ ኢታም።

10 ወልቀተ ደኣሚሁ ሆንም ወክት እኮቤቹሃ መሰህተኔሃ ሰርረሙኤ፤ ኦርጨቀሙኤለክ ሆቸሙኤ ተሸ የናኤ።

አሳቤቹ ጸወሎሰ ቆርንቶስ መኒሃ ሰው የሰ

11 እን ገወ መንቹን ጠወዕዮም፤ እኩጎሬ ገወ አሃምገ አቴንተኤሁ አዕናንት፤ አዕኑ እተኔሃ ጡመ ጠወ ጠወኤ ገበእኖህዕኔሁ አዕናት እቅ፤ መሰንትሰ እን መ ቀዉ መንቹሃ እኮም እቃ ህከን ሎርሎራኖ አሳሳቶ መቶርቹን ሆፈአምበእ።

12 እን ሀንቅ አሳቤቹ አሁኤ ለሊሰኖ ጠዉ እን በላንከክዕኔ ሄኣን አደቢን አዕዮምተ ሆን፤ ህት መላንት አጅበተለክ ገረምሲሳኦታን።

13 እን ክዕኔተ ብረ ጠዕመ ሆገንከኤ አሌንከክዕኔ እጅንተ አሁዕን ፈቆም ቤሉ ዎሎ አመዕናኖ ዱእ ሞኒች ሆፍሸንክዕኔሁ ማኒት? ሁኩን ቤሱ እኩጎር ማሬእ።

14 እን ክዕኔበ አሜቲህእ ሰቅያ ወክት፤ እን ክዕኔተ ገዉክዕኔት ቤሉ ክዕኔርቹ ሀሳምበእቤቹሃ ክዕኔ አሌን እጅተ አሆተ ሀሳምበእ፤ ቴሁ አናኑት ኦሉተሰ ብረ ጭምእት አፋሹ ሀሰሰኖሰ ቤሉ ኦሉት አናኖተ ብረ ጭም አታበእ።

15 እን ክዕኔተኔሃ ብሩኤ ፈቅያን ፎልኤ ህገሽ ኣሰዮም እቃ አበ ሙንደኣም፤ ህከረ እን ከካከ በትሸ ኢታንክዕኔሃ እኮች አዕኑ ኤሳሃ ኢቱ ሀሰሰኖህዕኔሁ ቀዉሃትንደ?

16 አሁን ቤሉ እን ክዕኔ አሌን እጅንተ እኮምበእ፤ ጠዉ እኩጎሬ አዕኑ ይቴንተገን ጣንሰ ተንኮን አፎንክዕኔሃ አጉደኖ።

17 ክዕኔቤቹ ሶኮም መኒች መትሰ አዲኒ እኮዕቃ ክዕኔች ጣንሰ ኣኣዮክዕኔደ?

18 ቲቱ ክዕኔ አደ መሮተ ኡጭዮንገሰ፤ ኒ አመ ቤቱንከ እሰን ሚጡብ ሶኮም፤ ቲቱ ጣንሰ እኣዮህኣኔደ? እንለክ እሰ አዕናሚሁ መቶ ቀልብንበእንደ? ህትን ለምኔ ቀልቡንኩ መቱሃበእንደ?

19 አዕኑ ቴሱ ኢሊ ነኡ ክዕኔ መደን ገዉኔ ከዕመቀማሚሃ አቴን ሰውይቴንታት? ነኡ መሲህን እንክ ጠወዕናሚሁ መገን ብሬኒት፤ ኒ ጆላ! ጠወዕናሚሃ ጉዕመንከ ጠወዕናሚሁ ክዕኔተ ጠረኝንሳም ይኒት።

20 እን ክዕኔቤቹ አሚታም ወክት አይደጎ እኮኖተ ሀሳምገ እኮኑዕናን አኒሁ አዕኑ አሆተ ሀሴንንተገ እሁዕናን ደቀምምጎር ይ ዋጃም፤ ህትን ክዕኔ በላን ብተት፤ አቆሽት፤ አሙዕርት፤ ገኑ እቱ፤ መን ሱዕመ ቤሱ፤ ሄምት፤ ቦኑ፤ ጨንጨንት ሄኣ ይ ዋጃም።

21 ህትን እን ለንኪሃ ክዕኔበ አሜቸም ወክት ኢ መገኑ ክዕኔ መደን ሙልሰኖኤ ጎሬ ይ ዋጃም፤ ህትን ከኒች ብርተ ጩብ እት ህከን አቶ ሂሊ ገጃሲን፤ ዝነተ አአተኔሃ፤ ህትን አለ ቅልቢን ቶበቱ ሆን መን ሻዞ አሌን ኡባም ይ አበ ዋጃም።

13

ጎፍሚ ሸዘነተለክ ወገራትሱ

1 እን ክዕኔበ አሜቶተ ኩን ሰቅያ ወክት፤ ጠዉ ጉዕሙንኩ ኡረኖሁ ለሞ ህከረንገ ሰሶ ምሰክር ላጋኒት።

2 ለንክ ወክት ክዕኔቤቹ ለኦህዕኔተ መርም ወክት ጠረኝሽ ጠወዕዮም እቅ፤ ቴሁ ህትን ቁዕራሻን እክ ከኒች ብርተ ጩብ አቶሁኑተለክ ወሊሃሰ ጠረኝሽ ጠውአም፤ ቴሱ ክዕኔቤቹ ፈንቀል አሚታም ወክት ሚጢሃ አሙዛምበእ፤

3 አዕኑ እን ሄዕይ ጠወአኖሁ መሲህ እሁሰ አጥራመቶናተ ሀሴንንታት፤ ክዕኔቤቹን ለሌኖንኩ እሰተ ወልቀ ቤሉ ሆንጌተሰበእ።

4 መሰንትሰ እስ ሰቀለም ሬዮሁ ሆንጌን እኮጎሬሁ ቱሱ መገን ወልቃን ፎሊን ሄለኖ፤ ህትን ነኡ እሲን ሜጡብ ላፋኑተ እንኮም፤ እኮጎሬ ነኡ ክዕኔሃ ዮኔ ደቀሺን እኮጎሬ እሲን መገን ወልቃን ሜጡብ ሃዕናም።

5 አመዕነትንከክዕኔ ሄኡክዕኔ ደጊሃ ገዉክዕኔ አጥራመቲን ለዕዬ፤ ህትን ገዉክዕኔ ፊተኝ፤ መሲህ እሲ አዜንከክዕኔ ሄኡሰ አጥራመቲንታበእንደ? ህካን እህባች ህንቅንከ ፊተናን ኡቤንታ ዩሃን።

6 ነኡ ፊተናን ኡቡ ሆጉኔ ደጌነንተገ ተብሳሃ አዕናም።

7 አዕኑ ሂለርቹ አቲነንተበእገ መገን ቤቹ ዱእ አዕናም፤ እሲን ነኡ መቱርቹሃ ፊተናተ በቀንዕበረ እንኮም ጎሬ አዕኑ ጉዕመንከ ወክት ጡመ ጠወ አቶናታት ቤሉ ነኡ ፊተናንተሰ ህንጋም ጠረኛኑተ እሁኔ ለሊንሶታበእ።

8 መሰንትሰ ነኡ ህንቅ ቤሉ ህንቅ አሉን መቱርቹሃ አዕናተ አታልናምበእ።

9 ነኡ ላፋኑተ እንካን አዕኑ ጠረኛኑተ እኩንተ ወክት አበ ሙንደዕናም፤ ኒ ዱኡ አዕኑ አመዕነትንከክዕኔ ጠረኛኑተ እኮናታት።

10 እን ከ ሶህኑተ ክዕኔች ቁዕር ዮም ወክት ከተቦንክዕኔሁ ክዕኔቤቹ አሜቾም ወክት ቀርቹንኩ አሴኤ ሹሚነቲን ጨነቃንክዕኔበእጋት፤ መሰንትሰ ቀርቹ አሴኤ ሹምነት ወልቀት ክዕኔተ ጠረኛሲሃት ቤሉ ሆግሲሃበእ።

11 በትሸን አመኤ ኦሶ! ወገሬቲን ሃዕዬ፤ አመዕነትንከክዕኔ ሆፈአኖህዕኔርቹ ዮህዕኔበእረ እኩ፤ ሸዘነእ አጥራመቹ፤ ገገይንከክዕኔ አተቀሜ፤ ወገሬቲን ሃዕዬ፤ አተለከ ወገሬት መገኑ ክዕኔን ሜጡብ አሀኖ።

12 አመዕናኖተ ሀሰሰኖ ሱንቃቀንሺን ሱንቃቀሜ።

13 አመዕናኑት ጉዕሙንኩ «ወገሬት ዮንተንደ?» ይቶህዕኔ።

14 ቀርቹ መሲህ እሲ አሰቱቲ፣ መገን ኢተቲ፣ ጠሊሊ እያን ሜጡ እሁ ጉዕሚንከክዕኔ አሁን።

ጳውሎስ ገላትይ መሪሃ ከተሶ ሶህተ ኣጉስ

ኢስ ጡምሰተነሃ ጠወእኖ እንጂል ላገት ጉዕመ ቤቶን ዱዱብሰንተን አይሁደ እህቡ ሙኑ ቶገንስ መርቶ ገሰ «አመዕናኑተ አኮተ ሙስ ሕገ አኣ ሀስሰኖንዶ ሀስሰኖበአ?» ይታ ጠዕምቱት ኬኦኦ፤ ቀቀቾ እስያን ርም ገሾን እገኣ ገላቲያን ሄኣ አመዕናኖ በላን «ሙኑ መገን ብሬን ፈየ አሂን ጠለዕል ኢሳን አመዕነት እሁዕነ ሙሲ አዶን አሰም ሕገ አኣ ሀስሰኖ» ይተን ጳውሎሴ ግባ ሙኑ ሄኦ አቅ።

ጳውሎስ ካን ገላትያ መሪሃ ከተሶሁ ከን ትምርቲን ጉረተ ኣገሰ መን ጌጥጭ አመዕነት ዎዎሃ አዎንሲሃት፤ ጳውሎስ መሲህ ኢስ አሳቤቹ እሁስ ተሬገጭ ጀመረኖ፤ አሳቤቹ እሆተ ገኤሲሁ መገን ቤሉ መን እሁ ሆጉስለከ እስ ሶቀሙ አይሁደ እህበ መሪሃ እሁስ ሂር ኩለኖ፤ መጨረሻ ፎሎጭ ኣዜን አመዕነት ዎቆሁ ኢሳን አመዕነን ደገመኖ ኢታች ቡቀኖሃ እሁስ ኩለኖ።

መጻፍሱ አፎሃ

- ኣጉስ (1፡1-10)
- ጳውሎሴ አሳቤቹ እህስ ሹምነቱ (1፡11—2፡21)
- መገን ኣስቶ እንጂሊ (3፡1—4፡31)
- አመዕነቲን ነጠ ፋሉለከ ሹምነቱ (5፡1—6፡10)
- መጨረሻስ (6፡11-18)

1-2 እን አሳቤቹ ጳውሎስለከ ኢን ሜጡቡ ዮ አመዕናኑተ ጉዕመንከ አመኦሎት ገላትይ ባዶን ዮ አመዕናኑተ ሶንኮምሃን፤ እን አሳቤቹ እኮም መሪች ህከረንገ መን አዶን እሁዕነ መሲህ ኢሲንለከ ኢስ ሪሆች ኬሾ አን መገንነት።

- 3 አናኔ መገን አዶችለከ ቀርቾ መሲህ ኢሲች ኣስቱትለከ ወገሬቱህ ክዕነሃ እሁን።
- 4 ኢሰን ከን ሂለ ዘማሊች ፊሶኔተ አናኔ መገን ሰውቲን ጨብህኔ ገዉሰ ህግሽ ኣሴእ።
- 5 ዘላለሚሃ መገንሂ ኬዕምኾ እሁንስ! ኣሚዕን።

ህንቅ እንጂሉ ሜጡ እሁስ

6 መሲህ ኣስቶን ገኤህዕኔ መገን አዶች ደዕልቲን አደ እኪን ዎሎ ተሸት ላገቤቹ ፈንቀሉክዕኔ አጀብሲሰኖኤ።

7 ህካን ያሚሁ ጉረተ ኣገሶተለከ መሲህ እንጂል ላገተ ሾክሶተ ሀሳ መት-መቱ ሙኑ ዮቤቹሃት ቤሉ ዎሎ እንጂል ላገት ዮቤቹሃት።

8 ጠዉ እኮጎሬ ዎዕነ ዱዱብሰኖንክዕኔ እንጂል ላገን ቶቀምባሃ ዎሎ ነኡ እንኮምዕቃ ሰሚ መላይከት እኮ እቃ ዱዱብሰቶህዕኔጎሬ ቦርረንቶኢሃ እኮን።

9 ወዕናሃ ይኖንክዕኔጎ እኒሁ ቱሁ ያንክዕኔ፤ አዪሁ አዕኑ ቶገንተ እንጂል ላገ ቤሉ ዎሎ ቶቀምባ እንጂል ላገተ ዱዱብሰህዕኔጎሬ ቦርረንቶኢሃ እሁን።

10 ህከረ እን ሀሳሚሁ ሙኑ ገለትጮኤታትንዶ? ህከረንገ መገኑ ገለትጮኤታት? ህከረንገ እን መን ሙንዲሲሶተ ሀሳሚት? ቱሶ ኢላ መን ሙንዲሲሶተ ሀሾም እቃን መሲህ ካዶንቹ እሆተ አታላምበአ አቅ።

ጳውሎስ ገእምሁ መገን አዶች እሁስ

- 11 አመኤ ኦሶ! እን ዱዱብሰኖንክዕኔ እንጂል ላገት መሪች እሁ ሆጉሴ ደጎኖተ ሀሳም።
- 12 መሰንትሰ ህካን ኤሳሃ ደግሰሾኤሁ መሲህ ኢሳት ቤሉ እን ቶሳሚሁ መሪችበእ፤ ህከረንገ ሙኑ ተማርስዮኤበእ።
- 13 ወዕና አይሁድ አመዕነቶን ዮም ወክት ሀት ዮም ጎሬ ሞጮጭቴንታኣ፤ አመዕናኑተ ሸረን ቤሶተ አጳማሚት አቅ።
- 14 አይሁድ አመዕነቱ አገሪን ዘሬኤ በለች ኢ ደረቦች ጉዕሚቶን በተኣምየ አቅ፤ ህትን አናከኤ ሴረ በእኖበእገ ጠረኝሽ ሀሳም አቅ።
- 15 ጠዉ እኮጎሬ አለሙዕነ ሄጭ መገኑ መጠሮኤ፤ ኣስቶንከስ ገኤኤ።
- 16 አይሁድ እህበ መሪሃ ቤትሰተነሃ ተሸት ላገተ ዱዱብሶተ መገኑ ቤቱሰ ለሊሶኤተ ኤቱ ወክት እን አዪኒ እማዕላሞምበእ።
- 17 ህትን ኢችብርተ ኣሳብተ እኮሁኤቤቹ ደቀሞተ ዬሩሳሌም ከተመ መርምበእ፤ ጠዉ እኮጎሬ ሄጭ አረብ ባዶ መርም፤ ህከኒች ኤተሮን ደማሰቆ ከተመ ፈንቀሎም።

- 18 ሰፊ ዘማኒች ኤተሮን ኬፋ ዬኖ ጴጥሮሴ ለአተ ዬሩሳሌም እርዕይ እሲን ሜጡቡ ቶነ ኦንቱ በር ዱንኪም።
- 19 ጠዉ እኮጎሬ ቀርቾች ኢሰ አመቤቲ ያቁብ ቤሉ አሳባች ዎሉ መቱሃ ለዕዮምበእ።
- 20 ኩ ከተቦንክዕኔህ ዝክብ እሁ ሆጉሰ መገን ብሬን ተሬገጭ ኩላንክዕኔ።
- 21 ህኪኒች ኤተሮን ሶርይለክ ክልቅይ ባዱ ኦርዕዮም።
- 22 ይሁድ ባድን ዮ አመዕናኑት ሚንተ ሚኒን ለአቀንት ከሰበእ።
- 23 ጠዉ እኮጎሬ እሰ «ወዕና ኔሳሃ ኦርሰናኔ መንቾ ወዕና ቤሶተ አጸመን ሄዕዮ አመዕነቱ ገዉንኩሰ ዱዱብሰናት» ዬኖሃ ሞጮጭቶ እቅ።
- 24 ኢ መሳን መገኑ ገለትጭታኢት እቅ።

2

ጳውሎስ አሳቢቹ እሁሰ ዎሉ አሳበቢቹን ደገሙሰ

- 1 ቶነ ሾሎ ዘማኒች ኤተሮን በርናባሴን ሜጡቡ ዬሩሳሌም ፈንቀል ኦርዕዮም፤ ቲቶ ኢን ሜጡቡ አእ መሮም እቅ።
- 2 ህከ ቤቹ መሮሚንኩ መገኑ ለልሾኤ አዲንት፤ እን ከኒች ብርተ አዕዮም ሆጉትለክ ቲሁ አአሚሁ ህትን ተሰ እሁናበእገ ይ አይሁደ እህበ መን በላን ዱዱብሰም እንጂል ላገተ ሎርሎረ አዎንሳናተ አደ አዕይ ኩሎንሰ።
- 3 ኢን ሜጡቡ ሄዕዮ ቲቱ ግገክ ባድ መንቾ እኮጎሬሁ ጡርከመሞተ ግድሴማሰበእ።
- 4 ጠዉ እኮጎሬ በላንከኔ ሉኩት ማጠንት ኣጎ መት-መቱ ክክብ አመዕናኑት ቲቱ ጡርከመሞተ ሀሶ እቅ፤ ሁኩ መናከት ዳንድቶተ ኣከኔ ማጠንት ኣጎኢሁ መሲህ ኢሲን ደዕናም ሰዎልድመተ ወልቅሰ ሮሶማን ፈንቀሽቶተ ሰውይቲት።
- 5 እኮጎሬ ነኔ ተሸት ላገ ህንቅ ክዕኔቤቾን ጠረኝት ሄኦተ ቀዎ ጌሲሃ ህከኑኤሃ ቄለሞምበእ።
- 6 መገኑ መን ሚንተ ለዕይ ሀዕላናበእቤቹሃ ሁኩ አዎንሳኑተ እኮአረ መ መነሃ እኮጎሬ ኤሳሃ ግዱ ዮኤበእ፤ እሰ እን ዱዱብሰም ተሸት ላገ አሌን መቱ ሃዕርርቹሃ በርግቶበእ።
- 7 ጠዉ እኮጎሬ ህከን ወጥ ጴጥሮስ ተሸት ላገተ አይሁዱሃ ዱዱብሶተ ኤገት ኣሰሞሰ ሃሌን ኤሳሃ አይሁደ እህበ መኒሃ ተሸት ላገተ ዱዱብሶተ ኤገት ኣሰንቶኤገ አጥራመቶኤ።
- 8 መሰንትሰ ጴጥሮሴ አይሁድ መኒሃ አሳቢቹ አዕዮ መገኑ ኤሳህ አይሁደ እህበ መኒሃ አሳቢቹ አዕዮኤ።
- 9 ቱቅገ እክ ለልታ ኣሳበት ያቁብ፤ ጴጥሮስለክ ያህይ መገኑ አዕዮኤ ኣሰቱተ ደጎ ወክት ነኔ አይሁደ እኮበእ መንቤቹ መርናተ እሰ አይሁዱቤቹ መርቶተ አማዕለንት ኤሳላከ በርናባሴ ሜጡቡ እህኔ መላተ እሆተ መኪ አንጋን ዚያርቶኤ።
- 10 መቱ ጠወ አዕናተ ሀሰ ጠረኝሶኔ ጠዉ በለሰ ዮ ቡጥቻኑተ ሰውይናተ ኤገተ ኣቶኔ፤ ሁኩንን እን አኦተ ኢትዮምየ ጠወ።

ጳውሎስ እንጾካን ጴጥሮሴ ግቡሰ

- 11 ጴጥሮስ ሶርያን ዮ እንጾክ ከተመ አሜቾ ወክት ቤሾቤቹሃ ብሬሰ አቶንቲሁ ህንቅያበእ ይዮንሰ።
- 12 ያቁብ ሶሶሰ መት-መቱ መኑ እንጾክ ከተመ አሜቶተ ብርተ አይሁደ እህበ መኒን ሜጡቡ አተናት እቅ፤ እሰ አሜቶች ኤተሮን «አይሁደ እህቡ መን አዲች አመዕንቶሩሩ ጡርከመሙ ሀሰሰናሰ» ይታ አይሁድ አመዕናኑተ ዋጅት ኤተሩ ዋልት አይሁደ እህበ መኒች አደ እኮ።
- 13 አይሁድ አዲች እኮ አመዕናኑት ጴጥሮሴ ለሰተ አዎንቶኤ፤ ሁኩን ዎሉ ፈቃን በርናባሴሃ ጣንሰዮ እቅ።
- 14 ጠዉ እኮጎሬ እሰገ ተሸት ላገ ህንቁን ሄኤ ሆጉሰ ለዕዮም ወክት ጉዕማንከ መን ብሬን ጴጥሮሴ «አት አይሁዳውቹ እከን አይሁድ ሴሪን እሁዕነ አይሁደ እህበ መን ሴሪን ሄኣንቲት፤ ህከረ አይሁደ እህቡ መኑ አይሁድ ሴሪን ሄኦተ ሀት ግዳጅሳንትሳት?» ይዮንሰ።

አይሁደ እኮሁለክ እህቡ መኑ ጡመሮሁ አመዕነቲን እሁሰ

- 15 ነኔ አለንቹኔ አይሁዳ ቤሉ ጨበኛ አይሁደ እህቡሃ መነበእ።
- 16 ጠዉ እኮጎሬ መኑ ፈየ እህናሁ መሲህ ኢሳን አመዕነት ቤሉ ሕገ አገሪን እሁ ሆጉሰ ደንጋም፤ ነኔ ሕገ አገሪን እሁዕነ መሲሁ አመዕነት ፈየ እንኮተ መሲህ ኢሳን አመዕንናም፤ አዪሁ ተዉራት ሕገ አገሪን ፈየ እህናበእ።
- 17 መሲሂን አመዕነት ፈየ እንኮተ ሀሱኔ ነኔ ገዉንኩኔ ጨበኛኑተ እህኔ ለሊሰና፤ ህከረ ጨብ አዕናተ አአናኔሁ መሲሁት ዩሃንደ? ሆሮን ህትጎተበእ።

18 እን ገወንኩኤ ድጃም ሕገ ፈንቀሽ መክሳሚሃ እኮሞጎሬ እን ገወንኩኤ ሕገ አገርባሃ እሁኤ ተራገጥሲሳሚት ዩሃን።

19 እን መሲህን ሜጡብ ሰቀለሞሞገ ሞለአሞሞቤቸሃ መገኒሃ ሄኑተ ይ ሕግ ሬሆን መለዕለም ጌሰ ሕገች አደ እኮሞ።

20 ከኒች ኤተሮን መሲሁ ኢ ኣዘን ሄአኖ ቤሉ እን ገዪሁኤ ሄአምያበእ፤ ቴሁ ጅሰሚን ሄአሚሁ ኢቴኤለክ አተኔሃ ገወሰ ህግሽ እሲ መገን ቤቶን አመዕኒን ደገመኖ ሄአኒት።

21 ህካን እኮቤቸሃ መገን አሰቱተ ተሰ ቤሳሞበእ፤ ሙኑ ፈየ አህናሁ ሕገ አገሪን እኮች መሲሁ ከልበንከ ሬዮኤ ዩሃን።

3

ሙኑ ፈየ አህናሁ መሲህን አመዕኒን እሁሰ

1 አዕኑ ኩ ገሞኑት ገላትይ ባድ ሙኑ! አዪት ሲረ አዕይ ሉሰሾህዕዕይ? መሲህ ኢሰ መሰቀል አሉን ሰቀለም ብራንከክዕኔ ዮህንገ ኩለሞህዕኔ እቅ።

2 ክዕኔች ደጎተ ሀሳሚሁ ጠለዕል ሙቱ ጠወዪት፤ ጠሊሊ እያን ቶጌንታሁ ሕገ አገርኒትንዶ ህከረንገ ተሸት ላገተ ሞጮጭቴን አመዕንኒት?

3 አዕኑ መገን እያኒን ጀመርቴን ቴሱ ገይክዕኔ ሞልቃን ሹልቶኖተ ሀሲንጎታት፤ አደ ከንከ ኢሊ ገሞኖተ!

4 እንጂል መሳን ቶጌንተ ኦርሸት ጉዕሙንኩ ተሰ እክ ፈቆ ዩሃን? ህካን አቴንተጎሬ ህንቅንከ ተሰ እክ ፈቆኤ።

5 መገኑ ጠሊሊ እያን ኣሰኖህዕኔሁለክ በሳንከክዕኔ ኣጀብሲሰኖ ጠወ አአኖሁ ሕገ አገርቴንተቤቸሃትንዶ? ህከረንገ ተሸት ላገተ ሞጮጭቴን አመዕንቴንተቤቸሃት?

6 «አብራሂም መገኖን አመዕኔእ፤ ህከ አመዕነትሰ መሳን መገኑ ፈየ አዕይ ሞለዕዮሰ» የመም ከተበሞጋት።

7 ህካን እኮች አመዕንታእሩ አብራሂም አለተ እሁሰ ደጌ።

8 መገኑ አይሁደ እኮበእ መን አመዕነቱን ፈያኑተ አአኖገ ጠሊሉ መጻፉ ወዕናንከ «ኤመቱ ጉዕሙንኩ ከን ማሰአመኖ» ይ ሄጭ አብራሂሚሃ ተሸት ላገተ ኩሎሰ።

9 ህካን እኮቤቸሃ አመዕንታሩ ጉዕሙንኩ አመዕኔ አብራሂሚሃ ማሰአንቶአራን።

10 «ሙሰ ሕግ መጻፉን ከተበሞ ትዛዝ ጉዕሙንከ ጠረኝ አገርባሁለክ ሄአባሁ ጉዕሙንኩ ቦሮረሞአሃን» የመም ከተበሞቤቸሃ «ሕገ አገሪን ፈያኑተ እንካም» ይታእሩ ጉዕሙንኩ ቦሮረንቶአራን።

11 «ፈዩ መንቹ አመዕነቱን ሄኡ ደአኖ» የመም ከተበሞቤቸሃ አዪሁ ሕገ አገሪን መገን ብሬን ፈየ አህናበኢሃ እሁሰ ለልዮአሃን።

12 ሕጉ አመዕነት ኣሉን ኡርዮአሃበእ፤ መሰንትሰ «መንቹ ሕጋን ሄኑተ አታለኖሁ ሕግ ትዛዝ ጉዕሙንከ አገረኖራት» የመም ከተበሞኤ።

13 «ሀቅ አሊን ሰቀለም ሬሆኖሁ ጉዕሙንኩ ቦሮረሞአሃን» የመም ከተበሞቤቸሃ መሲህ ኒተኔሃ ቦሮረሞ መንቹ እክ ሕገን አሚተኖ ቦሮሪች ሞኾኔ።

14 ሁኩን እኮሁ መገኑ አብራሂሚሃ ኣሴ በረከተ መሲህ ኢሰ አዲን አይሁደ እህቡ መኒሃ ኢሎተለክ ነኤን መገኑ ኣሳንክዕኔ ዩ ጠሊሊ እያን አመዕነቱን ቶንጎታት።

ሕጉ ተብሴ ላገተ ሻርባሃ እሁሰ

15 አመኤ ኦሶ! ህንዴ ከ ጠወ መንቤቸን ሮሰሞ ጠወን ሚጡብ ለዕዩ፤ ሙቱ መንቹ ኣጎ ወኣድ ላገተ ቶጌማች ኤተሮን አዪሁ ቤሶተ ህከረንገ በርጎተ አታለኖበእ።

16 መገኑ አብራሂሚሃለክ እሰ ዘሬተ ልግብ ተብሴ ላገተ ኣሴኢሁ ከን ሃሊንት፤ ተብሴ ላገተ ልግብ እኮገ አዕይ «ዘሬተክዕኔ» የኖበእ፤ ጠወ እኮጎሬ መቲሃ እኮገ አዕይ «ዘሬተክ» የኖ፤ ሁኩን «ዘርክ» የመሞሁ መሲህት።

17 እን ያሚሁ ከኒት፤ ተብሶሁ አብራሂሚሃ ኣሰሞች ሾል ጥብተ ሰጅ ዘመኒች ኤተሮን ኣሰሞ ሕጉ ሞዕናሃ መገኑ ተራገጭ ኣሴ ወኣድ ላገተ ሻር ተብሴ ላገተ ቤሶተ አታለኖበእ።

18 መቱርቹ ረገኤኖሁ ሕግ መሳን እኮ እቃ ተብሴ ላጋን እሁሰ ፈቀኖ እቅ፤ ጠወ እኮጎሬ መገኑ ረግተ አብራሂሚሃ ኣሴኢሁ ተብሴ ላጋንት።

19 ህከረ ሕጉ ኣሰሞሁ ሚሃት? ሕጉ በርገሞሁ አብራሂሚሃ ተብሴን ኣሰሞ መት ዘርት አሚቶተ ኢሊ ኒ ጩቤች ኩዕይት፤ ሴሩንኩ መላይከ አዲን መንለክ መገን በላን ሃዕዮ መንቹሃ ኣሰሞ።

20 እሁን ቤሉ በላን እክ ሀራርሰኖ መንቹ ለሞ አዲንካት ቤሉ ጠለዕል መቶ አዲሃበእ፤ እኮጎሬ መገኑ ሚጥቹሃን።

ሕጉ ሚሃ ኣሰሞ

21 ህከረ ሕጉ መገን ተብሴ ላገተ ግበኖንዶ? ሆሮ ግበኖበእ! ሄኡ ደገመኖ ሕጉ ኣሰሞ ኣቃኔተ ፈየ ለሁ ሕግ ኣዲን ደገመኖ ኣቅ።

22 ጠዉ እኮጎሪ መሲህ ኢሲን እመዕኒን ደገመኖ ተብሴ ላገተ እመዕንታህኡተ ኣሰንቶተ ጠሊሉ መጻፉ ዮኖ ሃሊን ኣዲንያ እሉ ጉዕመ-ንኩ ጨቢሃ ጠገንት ጨብ ኡሱረጎን እኮኡ።

23 እመዕነቱ እሚቱዕናን ብርተ ሕጉ ጠቅዮኔ እቅ፤ ሁኩንን እመዕነቱ ለሎተ ኢሊ ሕጉ ጡፍ ኣፎኔ ኣቅ።

24 ከን ሃሊን እመዕነቲን ፈየ እንኮተ መሲህ እሚቶተ ኢሊ ሕጉ ኣገራንቹኔ እኮ እቅ።

25 እኮጎሪ ቴሱ እመዕነቱ እሚቶቤቹሃ ሕጉ ኣገራንቹኔ እሁሰ ፈቆኡ።

26 መሲህ ኢሲን እመዕኒን ጉዕመ-ንኩክዕኔ መገንተ ኣለ፤

27 ጠመቀንቲን መሲሂን ሚጡብ እኬንተሩ ጉዕመ-ንኩ መሲህ ኦድኖገ ኦደኤንታኡ።

28 ጉዕመ-ንኩክዕኔ መሲህ ኢሲን ሚጡ እኬንተቤቹሃ እይሁድቶለከ ግርክቹ፣ ርሰቶለከ ሰዎልድቹ፣ ጎንሊከ ሚንት በላን እደደመት ዮበእ።

29 እዕኑ መሲህረ እኬንታቶ እብራሂምተ ዘር፤ ተብሴሰ ላገ መሳን ረገኣንታን።

4

መገን ኦሱተ እህኔተኔሃ

1 ቴሁ ያሚሁ ከኒት፤ ረገእኖሁ ቀዉ ጨል እህኖ ወክት ዲንያተሰ ጉዕሚንከ ቀርቹ እኮ እቃ መቶርቹንከሰ ርሰቶቹ ኣይ እህኖበእ።

2 ጠዉ እኮጎሪ ኣኩሰ ቀደር ወክቱ ኢሎተ ኢሊ ኣገርታህኡለከ ኤገተ ኣሴመ መን እንጋን ኣገረኖ።

3 ህትን ነኡ እያን ጠዋሃ ጨለገ ዮሞ ወክት ከን ኣዲንያ ኣሊን ዮ ሴሪሃ ጠገም ርሰ እንኮም እቅ።

4 ጠዉ እኮጎሪ ቀደር ዘማኑ ኢሊ ወክት መገኑ ቤቱሰ ሶኮ፤ እሰ ሕጊቶ ዋርን እክ መንቾቶ አለሞ፤

5 ህካን አዕዮሁ ሕግ ኣዜን ዮእረ ዎዞተለከ ነኡን መገን ኣለተ እንካምገ አኣታት።

6 መገን ኣለተ እኬንተቤቹሃ መገኑ «አበ» ዮን ገእኖ ቤትሰ እያን ቀልቢሃኔ ሶኮ።

7 ህካን እኮቤቹሃ ከኒቶ ኤተሮን ቤቱሃን ቤሉ ርሰሃበእ፤ ቤቱሰ እኮንቲቶ መገኑ ረገኣንቶ አዕዮሄ።

ጳዉሎሰ ገላትዮ ባድ መኒሃ ዮሰ ጭንቀተ

8 ከኒቶ ብርተ መገኑ ደጉ ሆግክዕኔ መሳን ክልቀቲንከሰ መገኑ እኮበእህኡተ ርሰ እኬን ጠገንቲንታ ኣቅ።

9 እኮጎሪ ቴሱ መገኑ ደገንታኡ፤ በትሽን መገኑ ክዕኔተ ደገኖህዕኔ፤ ህከረ ሀት ላፋለከ ሃሊ ኣዲንያ አል ሴርቤቹ ፈንቀልቲን? ሀት ለንኪሃ እሰ ርሰ እኮኖተ ሀሴንንታት?

10 እዕኑ በሪሃ፣ ኣገኒሃ፣ ወክቲሃለከ ዘማኒሃ ጠረኝሴን አበ ኪዕምኝ ኣቲንንታት።

11 ክዕኔ በላን ሆንን ሆግሚሁ ጉዕመ-ንኩ ተሰ እክ ፈቀኖ ይ ዋጀም።

12 እመኡ ኦሶ! ኣን ክዕኔገ እኮምቤቹሃ እዕኑሁ ኣገ እኬ ይ ኡጫንክዕኔ፤ እዕኑ መቱ ብድልሃ አልሰንታኡበእ።

13 ዎሶኔ ወክት ተሽት ላገተ ክዕኔሃ ዲዲብሶተ እድል ደኤሚሁ ጥዘን መሳን እሁሰ ደገኒንተ።

14 ሄንከ ጥዘነኡ ፊተነተ እኮህዕኔጎሪ ህንቁንታኤበእ ህከረንገ ሽግግ ይቲንታኤበእ፤ በትሽን መገን መላይኹቹ ቶጌንተሀገገ ኣቲን ቶጌንታኡ፤ ህትን መሲህ ኢሰ ቶጌንተሀገገ ኣቲን ቶጌንተኡ።

15 ከኒቶ ዎሶኖ ሄኒህዕኔ መግዲት፣ ሀከቤቹ መርትኡ? አታልሸህዕኔ እቃ አልክዕኔ ፋሽቲን ኣቲንተኣገ ኣን ገዉንኩአ መሰከራም።

16 ህከረ ቴሱ ህንቁ ኩሎንክዕኔቤቹሃ ዲንክዕኔ እኮምንዶ?

17 ዎሉ መኑ ክዕኔተኔሃ ጨነቀንት ሰውይታኢት፤ እሁን ቤሉ ህካን አታኢሁ ጡመ ጠዋሃበእ፤ እሰ ሃሽኣት፣ እዕኑ ኒቶ ኣይ እሰፎታትለከ እሰተኔሃ አበ ሰውይቶኖታት።

18 ሰውቲሰ ጡመ እኮቶ ጠረኙ ጉዕመ ወክት ጡመሃን፤ ጠዉ እኮጎሪ ኩ ጠረኝክዕኔ ኣን ክዕኔን ሚጡብ ሄኣም ወክት ጠለዕል አሁንከ።

19 ኢ ኦሶ! መሲህ ክዕኔ ኣዜን ለሎተ ኢሊ ቴሁ ክዕኔተኔሃ ኒጠን አበ ጨነቀማሚት።

20 ክዕኔሃ መ እኡ ሲሰፎኤጎሪ ደጉ ሆንከኤ ጉረተ ኣጋዕኔ አበ ጨነቀሞም፤ ቴሱ በላንከክዕኔ ደገም እደደ ኣፎን ጠወዕዮም እቃ ሄንከ ኢታም እቅ።

እጋርለከ ሣራ ሞሳልተ

21 እዕኑ ሕገሃ ጠገንቲን ሄኢሃ ሀሴንንተሩ ህንዴ ኩሌኤ፤ ሕጉ ዮኖሃ ሞጮጭቲንተበእንደ?

22 ጠሊሊ መጻፉን «እብራሂሚሃ ለም ኣለት ሄኦሰ እቅ፤ መቲሰ አለሞሁ ርሰቶ መንቾቶ አሁን ዎሉሰንገ ሰዎልድቶ መንቾቶት» ዮመም ከተበሞኡ።

23 ርሰኛ መንኞ ቤቱ አለሞሁ ማል ሄዕላቸገ እህን ሰዎልድኛ መንኞ ቤቱ አለሞሁ አሰንቶ ተብሴ ላጋኒት።

24 ኩለሙ ማንቱ ለሞ ወኣድ ላገተ ለሊሰኖቤቸሃ ኩን ሞሳሳገ ለለኖሃን፤ መትሴ ወኣድ ላገተ ሲና ዬኖ ቆታኝ እከን ርሶማተ እካ አለተ አልታኦታን፤ እሴን አጋራት፤

25 አጋር አረብ ባዶን ዮ ሲና ቆተተ ሞሳልተ እቅ፤ ህካን እኮቤቸሃ ቴሱ ዮ ዬሩሳሌሚን አጉጠንታኦ፤ እሴን አላንተሴን ርሶማን ሄኣኦታን።

26 አሊኛ ሰሜኝ እኮኣ ዬሩሳሌሙ ሰዎልድኛታን፤ እሴን አመተኔ።

27 «አት ገደቡ ዮሄበኢት ተሸ የንኬ! እት አልቶተ ኒጥ ከሲባት አልል!» ይ፤ ሞኒ እኑ ዮሴ መንኞች በትሸ

ሞንሴ እኑ አጉራንሴ ዮ መንኞተ ልግብ አለት ዮሴ። የመሞ ከተበሞኤ።

28 አመኤ ኦሶ! አዕነ ቴሱ አሳቅገ ተብሴ ላገተ አለ።

29 ጠዉ እኮጎሬ ህከ ወክት ማላን አለሞሁ ጠሊሊ አያንን አለሞሃ ሸረገን ከበሪሁ ህትዩንት።

30 ጠዉ እኮጎሬ ጠሊሊ መጻፉ የኖሁ መርኞሃን? ጠሊሊ መጻፉ «ርሰኞት መንኞት አልቶ ጩሉ ሰዎልድኞት አልቶህን ሜጡብ ረገኸኖበኣቤቸሃ ርሰኞት ጩሉንከሴን ሜጡብ ሸር» የኖ።

31 ህካን እኮቤቸሃ አመኤ ኦሶ! ነኤ ሰዎልድኞተ አለ ቤሉ ርሰኞተ አለበኤ።

5

መሲህን ደገንታ ሰዎልድሙተ

1 መሲህ ሰዎልድማን ፋሺኔሁ ሰዎልድማን ሄዕኖታት። ህካን እኮቤቸሃ ጠረኝቴን ኡርዬ ቤሉ ለንኪሃ ፈንቀልቴን ርሰ እኬን ጠገንቶኖቼ።

2 ቴሱ እን ጸዉሎሰ ያንክዕኔህ ጡርከመንቴንተ ጎሬ መሲህ መቱርቸሃ ደግለለኖህዕኔበኤ፤

3 ጡርከመመኖሁ ጉዕሙንኩ «ሕገ ጉዕመንከ አኦተ ግዳጁ ዮሰ» ይ ለንኪሃ ጠረኝሳም።

4 አዕነ ሕገ አገርቴንን ፈይቶኖተ ሀሴንተሩ ጉዕሙንኩ መሲህኝ አደ እኬንታኤ፤ መገን አሰቶኝሰ ፋልቴንታኤ።

5 ጠዉ እኮጎሬ ነኤ መገን አያንን ፈይመ ተብሳሃ አመዕነቴን አገዕሪኖም።

6 መሲህ ኢሲን ሄኤማኝ ጡርከመሙ ህከረንገ ጡርከመሙ ሆኑ ደግለለኖበኤ፤ ደግለለኖሁ ኢታን ለለኖሃ አመዕነቴ።

7 አመዕነቴን ጡመገ ሃንቴንታት እቅ፤ ቴሱ ሀንቂሃ እዘዘንቴንበገ ከሞህዕኔሁ አዬት?

8 ህትኔ ሸዘነት ገኤህዕኔ መገኒኝ አሜቶበእተ።

9 ቀቅቼ ራጭቱ ቡኩተ ጉዕመንከ አቦከኖ።

10 ጠዉ እኮጎሬ ከኒኝ አደ እኮ ዎሉ ሰውቱ ሄኣኖህዕኔበኤገ ተሬገጭ ቀርኞን አመዕኖም፤ ጉረተ ኣግሰኖህዕኔሁ አዪሁ ፍርደሰ አኣኖ።

11 አመኤ ኦሶ! እን ቴሱ ኢሊ ዱዱብሰን «ጡሚሃ ጡርከመሙ ሀሰሰኖ» ይዮም እቃ ቴሱ ኢሊ ሚሃ ሸርታኤ እቅ? ህካን እኮኣቀ መሲህ መሰቀሉ መኒሃ ጉፉተ አህኖበ እቅ።

12 ህካን እኮቤቸሃ ኩ ጉረተ ኣግሳህዕኔ መናከት ሀሶ ጎሬ ጡርከመሙ ጠለዕላ አሁዕነ ገዉንኩሰ ፎልሰ ኡለተ ቃርቶ እቃ ኢታም እቅ።

13 አመኤ ኦሶ! አዕነ ሰዎልድማሃ ገእንቴንታኤ፤ ጠዉ እኮጎሬ መት-መቱሰ ኢታን ካደሙን ቤሉ ኩ ሰዎልድመክዕኔ ማል ሃሸኣቱተ ኦቴንገተ መሰተ አሁንከ።

14 ሕጉ ጉዕሙንኩ «ዎሉ መነ ገይክገ አት ኢት» የኖ መቴ ላጋን ጎሬኤ።

15 ጠዉ እኮጎሬ ገገዉክዕኔ ገዕመቀንቴንገለከ እተቀንቴንን በኤንተበኤገ አገዕርዬ።

ጠሊሊ አያንለከ ማል ሰውት ሄኤ

16 ቴሱ ጠሊሊ አያን አዎንቴን ሄኤንተ ጎሬ ማል ሃሸኣቱተ ኦቴንገተበኤ ያም።

17 ማል ሃሸኣቱት ጠሊሊ አያን ሃሸኣቱን ቶቃቀንታበኤ፤ ህትን ጠሊሊ አያን ሃሸኣቱት ማል ሃሸኣቶን ቶቃቀንታበኤ፤ ጠሊሊ አያን ሃሸኣቱትለከ ማል ሃሸኣቱት ገገዬሀሰ ባላጋረተ። ህካን እኮቤቸሃ አዕኑ ሀሴንተርቸ አቶኖተ አታልቴንተበኤ።

18 ጠሊሊ አያን አዎንቴንጎሬ ሕገሃ ጠገንቴንገተበኤ።

19 ማል ሃሸኣቱት ደገንቶአራን፤ እሰን ዝነተ። ሂላ ጎጃሰ እኤ። ገዉ አገዕሩ ሆኑ

20 ሸርክተ አኤ። ኪሉ። ዲኖመተ። ኦደተ። አቁሸተ። ኡሙዕርተ። ገዉ ኢቱ። አደደመተ። አድመ እኤ።

21 ሞቀኞመተ። ሰከሩ። መጠረቁ ዮበኢ ሙንዲኑተ አጉዳእራን፤ ከኒኝ ዎዕናንከ ጠረኝሸ ኩሎምገን ቴሁ በርግ ጠረኝሸ ኩላክክዕኔ፤ ህትኔ ጠዉ አታ መናከት መገን ዎምነቱ አጋበኤ።

- 22 ጠዉ እኩጎሬ ጠሊሊ ኢያን ላልቹ ኢተተ፥ ሙንዲኑተ፥ ወገሬት፥ አደብ፥ ጡምመተ፥ ጡመ ጠወ እኡ፥ አመዕነሙ
- 23 ጎደብ ላፋላክ ገዉ አገዕሩሃን፤ ህትኔ ጠወ ግብኖ ሕጉ ዮብእ፤
- 24 መሲህ ኢሰረ እኩእሩ ማለሰ ሄዕላቻንተሰለክ ሃሽኡቶንከሰን መሰቀላን ሰቀልቶኡ።
- 25 ጠሊሊ ኢያንን ሄዕናሚሃ እንኮሚኛ ጠሊሊ ኢያን አዎኛ።
- 26 መቱ ዎሉ ሂለ ጠዊሃ ኬሰንሰን ገገዉንኩኔ ምቀኝንን ተሳን ቦኑንከ።

6

ገገዉክዕኔ ሀዕላቀሙ

- 1 እመኤ ኦሶ! መቱ መንቹ ጨብ አዕይ ደገሞጎሬ አመዕነቲን ጠረኛኑተ እኬንተሩ ህትኔ መንቹ ጎደብ ላፍማን ብዝ አዕዬሰ፤ ጠዉ እኩጎሬ ኢቲሁ ህትኔ ፊተናን አጋንትበእገ አገዕር።
- 2 ክዕኔኛ መት-መቱክዕኔ ዎልሰ ኬዕምታ አጅነተ አጂን፤ ከን ሃሊን መሲህ ሕገ ዊንሸቱነንተ። *
- 3 እዪሁ ዎሎ መኒኛ ቆህኖርቹ ዮሰበእንከ «አን ዎሎ መኒኛ በተኣም» ይ ሰውዬጎሬ ገዉሰ ጣንሰኖት።
- 4 ጠዉ እኩጎሬ ገገዉንኩሰ ገይሰ ሆጉተ መረመር ለኦን፤ ሀከኒኛ ኤተሮን ገዉሰ ዎሎ መኒን ሚዛኝ አሁሰን ጠለዕል ገይሃሰ ድከአኖርቹ ደአኖ።
- 5 መሰንትሰ ገገዉንኩሰ ገይሰ አጅነተ አጂ ሀሰሰኖ።
- 6 ላገሰ ተማሪኖ መንቹ አሰተማርቹንከሰን ሚጡብ ጡመርቹ ጉዕመንከ ቤቀሙን።
- 7 ገዉክዕኔ ሉሰሶኖቹ፤ መኑ ምደኖሁ ዉጮሃት፤ እዪሁ መገኖን ቀለደተ አታለኖበእ፤
- 8 ማለ ሙንዲሲሶተ ዉጠኖሁ ማለኛሰ ሬሁተ ምደኖ፤ ጠሊሊ ኢያን ሙንዲሲሶተ ዉጠኖሁ ጠሊሊ አያኒኛ ዘላለም ሄኡ ምደኖ።
- 9 ተብሳ መርንባኛ ወክቱ ኢሌሃን ዉጠተ ጭምአዕናምቤቺሃ ጡመ ሆጉተ አኡ አጉርኑንከ።
- 10 ቱሱ ጡመ ወክቱ ዮኔቤቺሃ መኒሃ ጉዕሚንከ በትንሰ አመዕንቶ መኒሃ ጡመ ጠወ አዕኖ።

ጎፍሚ ሸከነተለክ ወገሬት

- 11 ህትኔ ሎርሎረ ፍደሊን ገይኤ አንጋን ከተቦንክዕኔገ ለዕዬ!
- 12 ጡርከመንቶኖተ ግደጅሳእሩ አብሊን ጡመ አጉድ ለሊሃ ሀሳእተ መናከ፤ ህካን አታኢሁ መሲህ መሰቀል መሳን ሸረንታበእገ ሰውይተት።
- 13 እሰ ጡርከመንቶኖተ ሀሳኢሁ ጡርከመምንክክዕኔ ቦንቶታት ቤሉ ጡርከመንቶሩ ገዉንኩሰ ሕገ አገርቶበእ።
- 14 ቀርቹሃኔ መሲህ ኢሰ መሰቀል ቤሉ ዎሎርቻን ድክኡ ኢኛ ቁዕሩን፤ ከን መሰቀል መሳን ኣዲንያ አሉ አደ እኮኡ፤ አኒሁ ኣዲንያ አለኛ አደ እኮም።
- 15 ህካን እኮቤቺሃ ጡርከመሙ እኮ ጡርከመሙ ሆጉ መቱርቹሃ ደግለለኖበእ፤ ደግለለኖሁ ሃዕሮ ክልቀት አሆሃን።
- 16 ከ ትዛዝ አዎንሆሂሃ ጉዕሚንከለከ መገን ዎገን እኮ ሀንቅ እሰራኤሊሃ ወገሬቱለከ ማርቱት አኩን።
- 17 ጅሰምኤ አሌን ዮ ገረፌመኤ መላት ኢሰ ካዲንቹ እሁኤ ለሊሰናቤቺሃ ከኒኛ ኤተሮን አዪሁ ኦርሱንከኤ።
- 18 አመኤ ኦሶ! ቀርቹኔ መሲህ ኢሰ ኣሰቱት ክዕኔን ሚጡብ እኩን! ኣሚዕን።

* 6:2 ዊንሸቱነንተ- መት-መቱ እንክለመ ክታበት «አዕዬ» ይታኡ።

ጳውሎስ ኤፌሶን መረጃ ከተሰሩ ሰህተት አጉሰ

ጳውሎስ ኤፌሶን መረጃ ከተሰሩ ሰህተት ጉዕሚቶችን ሄጭ ለለጭ «መገኑ ያጀሁ አሆተ ሰማንለክ ኡለን የ ክልቁ ጉዕሙንኩ ጭምይ ሚጥኞ መሰህ ኢሰ ዳኝነት አዜን አሁኖ ወክቱ ኢሉአቸት» (1፥10) የኖ ሰውት አሉኒት። ዋሉንገ መሰህ ኢሰን ሚጡብ አሁ መጠሮ መኑ ጉዕሙንኩ ሚጡብ አኩተ ይት ከ አበ ያደተ ሆኅ አሉን ሆሰሶተ መገን ኡመት ቃግሰኖሃን።

ኤፌሶን ዋዕኔ ሰህተት ከተሰሩ ሚጠመተኔሃ ዋኔሰ አጉ አልባሸተኔሃት፤ አኑ መገኑ ኡመትሰ ሀት መጠሮጎሬ፣ ቤትንከሰ መሰህ ኢሰን ጨብሀሰ ፈቁን ዩ ደአት ሀት ነጠ አሁሰለክ መገን ሎረ ተብሲ ላገት ጠሊላ አያኒን ሀት አጥራመቱሰ ኩለኖ፤ ለንክ ክፍላን ሀትን ከተሰሩሀ አነበባአሩ ሚጡብ ሄኔንከሰ መሰህ ኢሰን የሰ ሚጡ አሁ ሀንቅ አሆተ ሀት ሄኡ ሀሰሰኖሰ ጎሬ ኩለኖ።

መኑ መሰህ ኢሰን የሰ ሚጡ አሁ ሀት ሄኔሰሰ ጎሬ ዋሎ አደደ ሞሳልት የ ጠዋን ኩለኖ፤ መገን አመሰናኖ ዱአ ሞኒ ጅሰመ አከን መሰህ ኢሰ ጅሰሚሃ ቡዕላሃን፤ አመሰናኖ ዱአ ሞኑ ግንብ አሁን መሰህ ኢሰ ሙረበሰዩ ክኑ፤ አመሰናኖ ዱአ ሞኑ ሞኒ አመገ አሁን መሰህ ኢሰ ሞኒ አንጋት፤ ከተሰሩሀ መሰህ ኢሰ አዲን ለሌ መገን አሰቱተ አበ ገለትጨን ጠወአኖ ወክት ጠወአኖሁ አበ ጥዕላሻ እኩ ጠዋንት፤ ጉዕሙ ጠወንኩ ለለኖሁ መሰህ ኢሰ ኢጋን፣ ገግሰ ሀግሽ አሲን፣ ፈቁን ዩኒ፣ አሰቶንለክ መገሬት አዲኒት።

መጻፍት አጭሃ

- አጉሰ (1፥1-2)
- መሰህ ኢሰለክ አመሰናኖት (1፥3—3፥21)
- መሰህ ኢሰን ሃዕሮ ሄኡ (4፥1—6፥20)
- መጨረሻሰ (6፥21-24)

- 1 መገን ሰውቲን መሰህ ኢሰ አሳቤቹ እኩ ጳውሎሴችለክ መሰህ ኢሰን አመሰናኖትሁኑ፣ ኤፌሶናን ሄኡ ጠሊላኖ አመሰናኖት፣
- 2 አኔ መገኒችለክ ቀርቾሃ መሰህ ኢሰች አሰቱትለክ መገሬቱሁ ክዕኔሃ አሁን።

መሰህን ደገንታ በረከተ

- 3 ሰሚ ቤቾን ጠሊላ አያኒን ደገንታ በረከተን ጉዕሚንገ መሰህ አዲን ማሰዕዮኔ ቀርቾኔ መሰህ ኢሰን አኑኔ መገኑ ማሰአሙን።
- 4 ጠሊላትለክ ኩሌኖርቹ የበአረ አንክ ብሬሰ ደገሞተ አዲንያት ከለቀንቱዕነ ሄጭ መሰህን መጠሮኔ።
- 5 መገኑ ሀሰኖ ሃሊን መሰህ ኢሰ መሳን አለሰ አንኩተ ሄጭ ኢጋንከሰ መጠሮኔ።
- 6 መገኑ ሀካንን አዕዮሁ ኢጋሞ ቤትሰ መሳን ኔሳሃ ነጣን አሲኔ ከዕምኝ አሰቶተ እሱ ገለትጭኖታት።
- 7 መገን አሰቶ ዊምማች ኬሽ ቤትሰ ቁገን ዋዝኑተ ደአን ጨብሃኔ ማርቱተ ደዕኖም።
- 8 አሰቱሰ በትሾኔ። ሀይማንለክ እንከዕኒን
- 9 መገኑ ጎደብ ላፍማንከሰ መሰህ መሳን ሄጭ ያጀገ ሞሰጥር ደንጋምገ አዕዮኔ።
- 10 ወክቱሰ ኢላኖ ወክት መገኑ ሆኅን ሆሰሰኖ ኩ ያደሰ ሰማንለክ ኡላን የ ክልቀቱ ጉዕሙንኩ ሚጡብ መቶ መሰህ ሹምነት አዜን አካጋት።

- 11 ጉዕሙ ጠወንከ ገይሰ ሰውቲን አአኖ መገኑ ሄጭ ያጀ ሃሊን መሰህ መሳን አሰ ወገን እንኩተ መጠሮኔ።
- 12 ሁኩንን እኩሁ መሰህ ተብሳሃ አኢን ዋኔሃ እንኩምሩ መገን ከዕምኝ ገለቲን ለሊንሶታት።
- 13 አዕኑ ሀትን ሀንቅ ላገተ ኩንን ጡምቱንተ እንጂ ለ ሞጭጭቱንተ ወክት መሰህን በርገንቱንታኢ፤ አመሰንቱን አሰን አሁን ተብሳሃ አክ አሰሞ ጠሊላ አያኒ ማተቢን ዋቀረንቱንታኢ።
- 14 ሁኩ ጠሊላ አያኑ መገኑ ገይሰረ እኩረ ጉዕሙንከ ዋዞተ ኢላ ርሰቲሀኔ ሩብት አሁኖሃ ቀብደ፤ ሁኩንን ክዕምኚሀሰ ገለትሃን።

ጳውሎስ ኤፌሶን መረጃ ዱአ አዕዮገ

- 15 ሀካን እኩቤቹሃ ቀርቾ ኢሳን የሀዕኔ አመሰንትለክ አመሰናኖተ ጉዕሚንከ የሀዕኔ እኩተ ሞጭጭም ወክቱች ኬሽ
- 16 ክዕኑተ ዱኢን ቃገን ክዕኔ መሳን መገኒሃ ገለት ሆንጠሀሱኤ እጉራምበኢ።

- 17 ኬዕምኙ ሀሰሰሰሰ ቀርኙህኔ መሰህ ኢሰ እነ መገኑ በትሴን ደገኖተ ሀይመ እያን ኣሶህዕኔተለከ ገውሰ ለሊሶህዕኔተ ዱኣ እኣም።
- 18 ሀትኔ ተብሴህ ገእንቴንታጎሬ ጠሊላኑት ረገኣ ኬዕምኝ ርሰቱ ሄንከ ልግብዩ ጎሬ ደገኖተ ቀልብክዕኔ አልት ፈንተተ ዱኣ እኣም።
- 19 ዋለእንትበ ሎረ ዋልቀሰ ኔሳሃ እመዕንናምሀኑኡተ ሄንከ ሎረሃ ጎሬ ደገኖተ ዱኣ እኣም፤
- 20 ህከ ሎረ ዋልቀሰ ሆንን ለሊሾሁ ሬሆኙ ኬሸ ሰማን መኪንከሰ ኣፋሼ መሰህ እዳንት።
- 21 እኑ መገኑ መሰህ ሰማን መኪንከሰ ኣፋሼኢሁ ጉዕመ ዳኝነቲኛለከ ዋልቃኛ ቀርቻኛኛ ሎረ ህትን ከን ኣዳንያ ኣሊን ጠለዕል እሁዕነ እማተና ኣዳንያ ኣሊን ሱዕሚኛ ጉዕሚኛን ሎረ እኩ ኬዕምኝ ሱዕመ ኣሲንት።
- 22 ጉዕመ ጠውንከ ዳኝነትሰ ኣዜን አዕይ ጠገመናገ አዕዮስ፤ መገን እመዕናና ዱኣ ምኒ ጉዕመርኛንን ቡዕላ አዕዮስ።
- 23 መገን እመዕናና ዱኣ ምኑ መሰህሃ ጅሰመሃን፤ መገን እመዕናና ዱኣ ምኑ ጉዕመ ጠዋን ዊመ አእኖሴ እሲን ዊመ እኮአተ።

2

ሬሆኙ ሄእቤቹ ቶላ

- 1 አዕኑ ቤሲክዕኔለከ ጩብክዕኔ መሳን ሬቲንታእረ እቅ፤
- 2 ህከ ወክት ከን ኣዳንያ አል ሂላ ዋቃሃ ኣዋንቴነንተ እቅ፤ ህትን ቡርብ ኣሊን ሄኣ ሂላ እያን ቀርቻኖተ ጠገንቴነንተ እቅ፤ እሰን መገኒሃ ኣዘዘንታበእ መን ኣሊን ኣእኖሃ ሂላ እያን።
- 3 ንኡ ጉዕሙንኩኔ ከኒኛ ብርተ እሰ በላን ማልኔ ያደተለከ ቀልብኔ ሰውት ኣዋንን ማልኔ ሄዕላቻን ሄዕናምረ እቅ፤ ዋሎ ኣዘዘንትበ መንገን ክልቀትንከኔ መገን ኡሙዕሬ ኣዜን ሄዕናምረ እቅ።
- 4 ጠዉ እኮጎሬ መገን ማርቲት አበ እህንከሰለከ ኔሳሃ ዮሰ አተት ሎረ እህንከሰ
- 5 ቤሰንከኔ ሬኖምረ ኣንኮም ኣቃ መገኑ መሲሂን ፎሊን ሄዕናተ አዕዮኔ፤ አዕኑሁ ጡሚቴንታሁ ኣሰቶንከሲት።
- 6 መገኑ መሰህ ኢሰ ኣዳን እሲንን ሬሆኙ ኬሸ ሰማን እሲን ሚጡበ ኣፋሼኔ።
- 7 ህኣንን አዕዮሁ መሰህ ኢሲን ኔሳሃ ለልሾ ማርቲሰለከ ዋሊንሹ ዮበእ ኣሰቶ ቀባጡተ እማተና ዘማን ለሊሶኔተ ይይት።
- 8 መሰንትሰ አዕኑ ጡምቴንታሁ እመዕነት መሳን ኣሰቶንከሲት፤ ሁኩንን መገንተ ኣሰቲ ቤሎ ክዕኔ ሆንን ደገሞበእሃን።
- 9 ኣዪሁ ድከኣናበእገ ጡሙ ደገመናሁ ሆንኒበእ፤
- 10 ንኡ መገኑ ሄጭ ቅጥአዕዮ ጡመ ሆኑተ አዕናተ መሰህ ኢሰ ኣዳን ለንኪሃ ከለቀምሃሃ መገኒሃ ክልቀት።

መሰህ ኢሲን ደገንታ ሚጠመተ

- 11 ህኣን እኮቤቹሃ አዕኑ ዋዕናሃ ክልቀቲንክክዕኔ አይሁደ እኪንበሩ፥ አይሁድ መኑ መን ኣንጋን ጡርከመንት ሄኣገን ክዕኔተ ጡርከመንቴንታበእሩ ይተን ቦርርተንክዕኔ ሄኣገ ቃጌ።
- 12 አዕኑ አሰራኤል መነ እኪንበሩ ተብሴ ላገ ወኣዲሃ ኮህቹ እኪንተሩ፥ ከን ኣዳንያ ኣሊኒ መቲ ተብሶሁ ዮሀህዕኔበእሩ፥ መገኒኛ አደ ሄኣነንተሩለከ መሰህኛ አደ እኪንተሩ እሁክኔ ቃጌ።
- 13 ቲሱ እኮጎሬ አዕኑ ከኒኛ ብርተ ቆዕርቲን ሄኣነንተሩ መሰህ ኢሲረ እኪን እሰ ቁጊን ሆንጠኪንታኦ።
- 14 መሰንትሰ አደ አዕዮኔ ብተ ግድግድ ድጂኢሁ፥ አይሁደለከ አይሁደ አክበረ ሚጡ አዕዮ ወገሬቲኔ መሰህ።
- 15 ለምንከ ኡመቲኛ እሲን ሚጡ እኩ መቲ ሃዕር ኡመት ከለቆተ አይሁድ ሕገ ትዛዘለከ ሴራ ማሊንከሰ ሻር ወገሬት አዕዮ።
- 16 እሰን መሰቀል ኣሊን ሬሆንከሰ ድኖመተ ቤሾ፤ ለመንከሰ ሚጡ ጅሰመ አዕይ መገን፤ ሀራርሴሰ።
- 17 እሚኛ ክዕኔሃ ቆዕርቲን ሄኣነንተሁኑተለከ ሆንጠክ ሄኣ አይሁዲሃ ወገሬት ተማርሴኦ።
- 18 እሰ ኣዳን ጉዕሙንኩኔ መቶሃ እያኒን ኣዋን መገን ቤቹ ሆንጠንካም።
- 19 ህኣን እኮቤቹሃ አዕኑ መገኒሃ አደ እኮሁኡን መቶሃ ባድሃ መነለከ መገን፤ ሀራርሴሰ ከኒኛ ኡተርን ኮህቻኑተለከ ዋሎ ቤቹኛ ኣሚቴንታኦበእ።
- 20 አሳበለከ ነቢያና ቀብብ ኣሊን እጃረንቴንታኦራን፤ ሙረበ ቡዕል ክኑ መሰህ ኢሳት።
- 21 ግንቡሰ ጉዕሙንኩ ኣሲን መክ ቀርኛ ጠሊላ ምኒ እሆተ ነጻ።
- 22 መገኑ እያኒንከሰ ገለኖ ግንበ እኮኖተ አዕኑሁ በርገንቴን መሰህን መክቴነንተ።

3

ጳውሎስ እይሁድ እኩባእ መንቤቾን አዕዮ ሆጉተ

1 ህዳን እኩቤቼሃ እን ጳውሎስ ክዕኔሃ እይሁድ እኩባእ ለህይወት ይ መሲህ ኢስ ካዲንቼ እህንከኤ ኡሱረገሃን።

2 ክዕኔሃ ደግለለኛገ እኦተ መገኑ እስቶንከስ ካደሞስተ እድል ኢሴኤገ ሀንቀንከ ሞጭጭቴንታኦ።

3 እን ሄጭ ገበንቼ አዕይ ከተቦክዕኔገን መገኑ ማጠሞርቼ ለልሹኤ።

4 ህዳን እኩቤቼሃ ካን እነበቤንንተ ወክት መሲህ ማጠሞርቼ ማ ጌስ ኣጎኤ ጎር ደጎኖተ ኦታልቴንንተ።

5 ኩ ማጠሞርቼ መገን እያንገን ጠለላኖ ኣሳባተሰለከ ነብያኖተሰ ቴሱ ለሌ ሃለጎ ህገ ዘማኔን ሄኦ መኒሃ ለልዮበኦ።

6 ኩን ለሊሰኖሁ እይሁድ እህቡ ሙኑ እይሁዲን ሜጡቡ ርስተ ረገእአረለከ መቶ ጅስሞ ብሊተ እከ መገኑ ኣሴ ተብሳሃ እንጂል ኦዲን መሲህ ኢስ ቤቀማኑተ እሁሳት።

7 መገኑ ዋልቃንከስ ኣሴኤ ኣስቶን ኣኒሁ ከን እንጂል ካዲንቼ እኩቦ።

8 እን ጠለላኖች ጉዕሚችን ሆረኣሚሃ እኩምጎሪሁ ዲንጉ ዮበእ መሲህ ቀባጦ እንጂል እይሁድ እህቡ መኒሃ ዲድብሶተ መገን ኣስቶን ኩ ዕድሉ ኣሰሞኤ።

9 ህትን ህገ ዘማኔን ጉዕመንከ ከለቆ መገኒን ማጠሞ ሄዕዮ ምስጥር መገን ያደት መሃጎር ጉዕሚንከ ለሊሶተ ኣሰቱት ኣሰንቶኤ።

10 ሁኩንን እኩሁ ከን ዘማኔን እመዕናኖ ዲእ ምኒ ኦዲን ሰማን ሄኦ ሹመትለከ ሀለቀት መገን ኤንኬዕኑ አደደ ደኒን ደገገት።

11 መገኑ ቀርቹሃኔ መሲህ ኢሲን ካን አዕዮሁ አበ ዘማኒች ብርተ ያጀ ሃሊኒት።

12 መሲህረ እህንከኤለከ እሲን አመዕኒንከኤ መገን ብሬን መለልን አመዕነትን ሆንጠሁ ኦታልኖም።

13 እን ክዕኔተኔሃ ቶጋም ኦርሸት ኬዕምኣክዕኔ እኩቤቼሃ ኦርሸኤ መሳን ተብሳሃ ሙርቶኖቼ ይ ኡጫንክዕኔ።

መሲህ ኢተተ

14 ቲሁ እን መገን ብሬን ጉሉቤንከኤ ጉሉጵ ዲእ አእሚሁ ከን መሳኒት።

15 ሰማንለከ ኡላን ዮ ጉዕሙንኩ አበርሱ ሱዕመስ ደአኖሁ መገኒችት።

16 መገኑ ኣዛ ጅስመክዕኔ ጠረኣሰኖ ዋልቀተ እያንሰ መሳን ኬዕምኣሰ ሎርመተ ኣሶሀዕኔተ ዲእ አእም።

17 ህትን መሲህ እመዕነተን ቀልቤንከክዕኔ ሄኦተለከ አዕኑሁ ጠጸ አቴን ኢታን ጠረኣቴንተረ እኩኖተ ዲእ አእም።

18 ቲሁ መሲህ ኢተተ አልባዕልመሰለከ ቁዕራሽመሰ፡ ጎቴመሰለከ ጥዕላሽመሰ ሄንከ ጎሪ ጠለላኖን ማጡቡ ሰውዩ ኦታልቶኖተለከ

19 መን ኤንኬዕኒች ብተኦ መሲህ ኢተተ ደጎኖተ መገን ዊሞማን ዊመ እኩኖተ ዲእ አእም።

20 ህዳን እኩቤቼሃ ኒ ኣዜን ኦታ ዋልቀስ መሳን ኡጭናምለከ ሰውይናምሀኒች በትሽ ደፈፍሽ ኣሶተ ኦታልመኖሰ መገኒሃ

21 እሲሃ እመዕናኖ ዲእ ምኒ መሲህ ኢስ ኦዲን ዘማኔን ጉዕማን ዘላለሚች ዘላለሚሃ ኬዕምኙ እሲሃ እሁን፤ ኣሚዕን።

4

መሲሃን ዮ ማጠመተ

1 ቀርቹ ካደሞንከኤ ኡሱረጅ እኩም እን ገእንቴንተ ገእሚሃክዕኔ ሀስሰኖ ሄኦ ሄኦኖተ ኡጫንክዕኔ።

2 ኢታንለከ ገገዊንከክዕኔ ኦታዕለጎ ጉዕመ ወክት ገዉ ሆፍሲንለከ ጎደብ ላፍማን መት-መቱ ኦታዕለቀሚን ሄዕዬ።

3 ወገረቴን ማጡ እኩን መገን እያንገን ደገመኖ ማጠመተ ጠረኣሴን አገሬ።

4 አዕኑ መቶ ተብሳሃ ገእንቴንተሀንገን መቱ ጅስሙለከ መቱ እያኑ ዮኤ።

5 ህትን መቱ ቀርቹ፡ መቱ አመዕነቱለከ መቱ ጠመቀሙ ዮኤ።

6 ጉዕሚችን ሎረ እኩሁ፡ ጉዕማንን አእኖሁ፡ ጉዕማንን ሄኦኖሁ፡ ጉዕሚንከ እን እኩሁ መቱ መገኑ ዮኤ።

7 ጠዉ እኩጎሪ መሲህ ኣሶተ ሀሽ ጌሲን መት-መትሃኔ መገን ኣሰቱት ኣሰንቶኤ።

8 ሁኩንን

«አሌ ፋሎ ወክት ልግብ አገንቶአረ አእ ኦርዕዮ፤

መኒሃ ሸልማት ኣሴኤ» የመሞጋት።

9 ህከረ ሁኩ «አሌ ፋሎ» ይታ ላገት ሄጭ ኡላችን አበ ጥዕላሽ ቤቹ ድሩ እህባች ዋሉ መ እሆተ ኦታልኖ?

10 ኩን ጥዕላሽ ቤቼ ድሬአሁ ህትን ጉዕመንከ ዊመ አኦተ ሰሚኝ ጉዕሚኝን አሌ ዋል ፋሎሁ አሶት።
 11 እሰን መት-መቱሰ አሳበተ፣ መት-መቱሰንገ ነብያኑተ፣ መት-መቱሰ እንጂሊ ዱዱብሰታኦረ፣ መት-መቱሰንገ አመዕናዮ ዜማኑተ፣ መት-መቱሰንገ አሰተማረተ አካገ ሸልማት አሴሰ።
 12 ካን አዕዮንኩ መሲህ ጅሰመ እኮአ አመዕናዮ ዱአ ምኒ ነሲሃ አመዕናኑተ አመዕነት ክድማተ ቅጥ አላሃት።
 13 ህትን መገን ቤቱ ደገን አመዕነቲን ደገመና ሚጦመተ ኢልን መሲህ ዊመ እኮገን ነኡሁ ዊመ መን እንክ ነጵኖታት።
 14 ከኒቻ ኤተሮን መን ተንኮ ክዝቢንላከ ጣንሲን ቅጠሞ ክዝብ ትምርቲን ቦብሩላከ ዊ ሁሉ ከበሃ ካጸ ህንበለንት መርታ ጨለገ እንካምበእ።
 15 በትሸን ህንቅ ኢታን ጠወዕነን ጉዕመ ጅሰሚሃ ቡዕላ እኮ መሲህበ ጉዕመርቲን ነጵኖም።
 16 እደዱ መኖመ ጅሰሙ መቱ አሀኖሁ መሲሃንት፤ ጅሰሙ ጉዕሙንኩ ሚጡ እኮሁ መኖመት ደቀንታ ቤቻኒት፤ ህካን እኮቤቹሃ መት-መቱ ጅሰም ብሊቱ አሰሞሰ ሆጉተ ብዝ አዕይ አለኖ ወክት ጅሰሙ ጉዕመንኩ ነጵኖ፤ ገውሰ ኢታን ነሰና።

መሲሃን ደገመና ሃዕር ሄኡ

17 ከኒቻ ኤተሮን ሰውቱሰ ተሰ እኮ አይሁደ እክበ መንገ ሄኦኖቹ ይ ቀርኝ ሱዕሚን ጠረኝሸ ኩላንክዕኔ፤
 18 እሰ ቀልቡ ቱንሰዮኡ፤ ህትን ቀልብ ዱድማኝ ኬዕዮህኒንላከ ኤንኬዕኑ ሆግሰ መሳን መገኑ አሰና ሄኡኝ አደ እኮኡ።
 19 ሙልት ሰውቱሰ በዕዮቤቹሃ ንጆሰ እኮ ጠወ ጉዕመንከ አላሃ ገወሰ ሙልሰና ማልሰ ሄዕላቻተ ህግሰ ኣቶኡ።
 20 አዕኑ እኮጎሬ መሲህ ደገንታሁ ህትናም ዋቄንበእ።
 21 ህንቅንከ አሰተኔሃ ሞጮጭቴንታኦ፤ ህትን አሲሃ እኬንተቤቹሃ ህንቅንኩ ኢሳን ሄኡሰ ተማርቲንታኦ።
 22 ህካን እኮቤቹሃ ጣንሰ ጨብቤቹ አዎንሰና ሄዕላቻን በዕዮ ዎዕናሃ ሄኤንንተ ኑግጹ ሃለት ከሜ።
 23 ቀልብክዕኔ ሰውቱ ሃዕር እሁን።
 24 ህንቅ ፈይማንላከ ጠሊልማን መገን ሞሳሌን ከለቀሞ ሃዕር ክልቀት ኦደዕዕ።
 25 ህካን እኮቤቹሃ ክዝብ ጠወኦኖቹ፤ ጉዕሙንኩኔ መቱ ጅሰመ እንኮምቤቹሃ ገገወንኩኔ ህንቅ ጠወዕና።
 26 ኡሙዕርዬ፤ ኡሙዕርቲንተጎሬሁ ጨብ ኦቶኖቹ፤ ህትን ኡሙዕርቲንተገን አሩ ኣጉንከ።
 27 ህትን አልብሲሃ ሆሮን ቤቹ ኣቶኖቹ።
 28 ህትን ሞገኖሁ ከ ኤተሩ ሞጉንከ፤ ጠወ እኮጎሬ ህከን ወጥ ኦርጨቀሞህኒሃ ኣሶተ ገይሰ እንገን ጡመርቹ አኡን።
 29 ሆሮ አፊቹክዕኔ ሂላ ላገት ፋልቲንከ፤ ጠው እኮጎሬ ሞጮጨኖህኒሃ ተሸየላከ ጠረኝሲሃ ደግላለኖ ጠወ ጠወዕዬ።
 30 ህትን ዎዘንቴንተ በሬተ ዊመ እሆህዕኔተ አሌክዕኔ መተብገ ዎቀረሞ ጠሊላ መገን አያን ሻዝሰኖቹ።
 31 ህትን ቀራርሰጩ፣ ንዴት፣ ኡሙዕርት፣ ጨንጨነተ፣ ያርት፣ ቦርዕረንሹለከ ሂላ ጠወ ጉዕሙንኩ ክዕኔኝ ካጸ ሸቁን።
 32 ህትን መት-መቲሃክዕኔ ጡማኑተለከ አሙዜንተረ፣ ጎደበ ላፋኑተለከ መረርሲጫኑተ እኬ፤ መገኑ መሲሃን ኡጉሮህዕኔንገ ገገዊንክክዕኔ አጉዕራቀሜ።

5

ኑር እዚን ሄኡተኔሃ

1 ኢቴኖ ኦሶገ አዕኑሁ መገኑ አዎንቴንተረ እኬ።
 2 መሲህ ኢቴኔገን መገኑ ተሸ አለኖ ጡሙ ሸቱት ዮሰ ክትም አዕይ ገውሰ ኒተኔሃ ህግሸ ኣሴገን አዕኑሁ እሰ ኢታን ሄዕዬ።
 3 ህትኔ ጠወ መገን ኡመቲሃ ሀሲሰናበእቤቹሃ ዝነት ህከረንገ ዎሉ ንጆሰ እኮ ጠወ እኡ ህከረንገ ጎራሚቹ እሁ ፈቅ ሞጮጨሁ ሀሲሰናበእ።
 4 ህከን ወጥ መገኒሃ ሹኩሪ ሆንጠህሺ ቤሉ ሂላለከ ገወ ጠወ ህከረንገ ሂላ ቀልድ ጠወ ጠወኡ ሀሲሰናህዕኔበእ፤ ህትኔ ጠወ ክዕኔሃ መከኖበእ።
 5 ዝነተ ህከረንገ ጉዕመ ንጆሰ እኡ ህከረንገ ሸርኬሃ ሰገድገ ዮ ጎራምመተ መሲሃንላከ መገን ዎምነቲን ቤቹ ደአናበእገ ደገ።

4:16 ቆላ. 2፣19። 4:22 ቆላ. 3፣9። 4:24 ክል. 1፣26፤ ቆላ. 3፣10። 4:25 ዘካ. 8፣16። 4:26 መዝ. 4፣4።
 4:32 ቆላ. 3፣13።

6 ከን ጠው መሳን አዘዘንታበእ መን አሌን መገን ኡሙዕርት አሚታቤቸሃ አዪሁ ተሰ ጠዌን ጣንሱንከሀዕኔ።

7 ህካን እኮቤቸሃ ከን አዘዘንታበእ መን ሚጡ እኮኖቹ፤

8 ዋዕናሃ አዕኑ ቱንሰቸሃን እቅ፤ እኮጎሬ ቴሱ ቀርቶረ እኩንተቤቸሃ ኑርሃን፤ ህካን እኮቤቸሃ ኑር አዜን ሃላኖ መንገ ሃዕኔ።

9 መሰንትሰ ጡሙ ጠዉ ጉዕሙንኩ ፈይመለክ ሀንቅ ላልቹ ደገመኖሁ ኑርቸት።

10 ህካን እኮቤቸሃ ቀርቸሃ ተሽ አእኖሰ ጠዉ መሃጎሬ መረመርቲን ደኑ።

11 አዕኑ ህከ ላልቹ ኖበእ ቱንሰቸ ሆጉተ ፉሽቲን ለሊሼ ቤሉ ህከን ሆጎን ሀዕላቀንቶኖቹ።

12 ቱንሰቸን ሃእ መኑ ማጥ አታ ጠዉ ጠዉኡ ሙልሲሰኖ።

13 ጉዕሙርቸንኩ ኑርቤቹ ፉላኖረ በራ እክ ለለኖ።

14 በራ እክ ለለኖ ጠዉ ጉዕሙንኩ ኑርሃን፤ ህካን እኮቤቸሃ

«እት ኩ ግሳንቲሁ በቅይ! ሬሆች አደ እክ ኬእ!

መሲህ ኑር ለሊሰኖሄ» የመሞኤ።

15 ቴሱ ሀት እኩን ሃኤንተጎሬ አጥራመቲን ሰውይዬ፤ ሀይቸ መንጋት ቤሉ ገዋኖገ ሃላኖቹ።

16 ኩ ዘማኑ ሃለ እኮቤቸሃ ወክትክዕኔ ከልግን ቤሰኖቹ።

17 ህካን እኮቤቸሃ ቀርቸ ያደት መሃጎር ሰውይዬ ቤሉ ገዋኑተ እኮኖቹ።

18 ህትን ጠሊላ እያንገ ዋሜ ቤሉ ሃለ ዋቃሃ መሰኖሀዕኔቤቸሃ ወይን ጠጁን ስከርቶኖቹ።

19 ህትን መዝሙራን ገለቲን አመዕናኑት ዘመርታ ሃሊን ገጣዊንከክዕኔ ጠወዕዬ፤ ገለቲንለክ መዝሙርን ዋሚ ቀልበንከክዕኔ ቀርቸ ገለትጭዬ፤

20 ቀርቸሃኔ መሲህ ኢሰ ሱዕሚን ጉዕመ ጠዌንከ እነ መገኑ ጉዕመ ወክት ገለትጭዬ።

ምኒ እንለክ ምኒ አመተኔሃ

21 መሲህ ከበጁሃ ኖሀዕኔ ዋጁቶች ኬዕኖሀኒን ገጣዊንኩክዕኔ መት-መትክዕኔ ትዛዝ ቶጌ።

22 ምኒ አማኖ! ቀርቸሃ ኢሲሃ አዘዘንቲንተሀንገን ምኒክዕኔ አኖተ አዘዘሚ፤

23 መሲህ አመዕናኖ ዱእ ምኒሃ ቡዕለ እኮገን ምኒ እኑሁ ምንሰ አማተ ቡዕለሃን፤ ህትን መሲህ ጅሰመ እኮ መገን አመዕናኖ ዱእ ምኒሃ ጡሞሳንቸሃን።

24 አመዕናኖ ዱእ ምኒንኩ መሲህሃ አዘዘንታገን ህትን ምኒ አማኑት ምኒ አኖተሰ ጉዕመ ጠዌንን አዘዘንቲን።

25 ምኒ አኖኖ! መሲህ አመዕናኖ ዱእ ምኒ ኢቲገለክ ገዉሰ ህግሽ ኣሲገን አዕኑሁ ምኒክዕኔ አማኑተ ኢትዬ፤

26 መሲህ ህካን አዕኖሁ አመዕናኖ ዱእ ምኒ ጠሊሊተ እኑተ ሀሽት፤ ነጠ አዕኖሴንኩ ላገሰ መሳን ዋን ኣገሽንት።

27 ከን ሃሊን ጡሩ ህከረገን ሚንተ ኡሱሩ ህከረገን ካን አኑደኖ ደገሙዕነ ጠሊሊተ፣ ኩሌኖርቹ ኖበኢተለክ ምልካምተ አዕይ ገይሰቤቹ ሆንጠሀሰኖ።

28 ህትን ምኒ አኖክት ገይሰ ጅሰመ ኢትታህንገ ምንሰ አማኑተ ኢቲ ሀሰሰኖሰ፤ ምንሰ አመተ ኢተኖሁ ገዉሰ ኢተኖ።

29 ገይሰ ጅሰመ ግበኖሁ አዪሁ ኖበኣ፤ ህከን ወጥ መሲህ መገን አመዕናኖ ዱእ ምኒ አኣኖ ሃሊን ገዉሰ እትሰኖ፤ አገረኖሁ።

30 ነኡ መሲህ ጅሰምሃ ብልት፤

31 «ከን መሳን መኑ እነሰለክ አመሰ አጉር ምንሰ አማን ሚጡ አሀኖ፤ ለሙንኩሰ መቱ ጅሰመ እካኣ» የመሞኤ።

32 ኩ ሞሰጥሩ ሎረሃን፤ ካን ያሚሁ መሲህተኔሃለክ መገኑ አመዕንቶ ዱእ ምኒ ሞሳልተ አዕዪት።

33 ጠዉ እኮጎሬ ኩ ጠዉ ክዕኔንተ ለአኖ፤ ህካን እኮቤቸሃ ምኒ እኑ ምንሰ አማተ ገይሰገ አዕይ ኢቲን፤ ምኒ አመት ምንሰ እነ ኬዕምሱን።

6

አኖክተ፣ አማኖተለክ እሱተኔሃ

1 ኦሶ! ሀሰሰኖ ጠዉ እኮቤቸሃ ቀርቸን አኖተክዕኔለክ አማኖተክዕኔ አዘዘሚ።

2 «ህትን እነክለክ አመክ ኬዕምሰ» የኖ ትዛዙ ተብሲ ላገት ኖሰ ዋኔሃ ትዛዝ፤

3 ካን አቶንትጎሬ «ጉዕሙ ጠዉንኩ ጡመ አሀኖሄ፤ ከን ኣዲንያ አሌኒ ኡሙሩክ ዱንከኖ።» ይታኣታን።

4 እዕኑ እናከትለክ እማኑት! ቀርቾ ኢሲን ጡመ ዎቃሃ ተማርሰቴነን፣ ሸዜነንለክ ሻቄነን ነሰዬሰ ቤሉ አለክዕኔ ኡሙርሲሶኖቹ።

ቀርቻኖተለክ ርሰተነሃ

5 እዕኑ ርሰት! ዱንየ አል ቀርቻኑተ እኮህዕኔሁኑኤተ ዎጂንለክ ሁጢን እዘዘሜ፤ መሲህ ካደንቴነንተ ሃሊን ጡመ ቀልቢን እዘዘሜሰ።

6 እዘዘንቴነንታሁ መገን ሰውት ቀልቢች አታ መሲህ አሳባገ እኩኒት ቤሉ መነ ሙንደእስሲሃ ይቴን ለልጪሃ እሁንከ።

7 መነ እሁዕነ ቀርቹ ካደንቴነንተገ አቴን ጡመ ቀልቢን ካደሜ።

8 ርሰ እኮ ሰዎልድቹ ገገጫስ አቶ ጡመ ሆጎን ቀርቹች ዋጋ ቶጋኢሃ እሁሰ ደገነንተ።

9 ህትን ቀርቻኑት! መን ሚንተ ለዕይ ጎልቦ ክዕኔለክ እሰ ቀርቹ ሰማን ሄኡሰ ሰውይቴን ዎጅሲሰክዕኔ አጉርቴን ርሳተክዕኔ ጡመ አዕዬ።

መገኑ ኣሰኖኔ በገዝ ኦዳተ

10 ቀርቻንለክ እሰ ሎረ ዎልቃን ጠረኝዬ፤

11 ሻይጣን ሂለ ሆጉተ ግቦኖተ አታልቴነንተ መገኑ ኣሰኖህዕኔ በገዝ ኦዳተ ጉዕመንከ ኦደዕዬ።

12 ኒ ኦሉ መነን እሁዕነ ከን ኣዱንያ አሉን አታ ገሻኖኒ፣ ሹማን፣ ከን ኣዱንያ አል ዎልቃንለክ ኡላች አሉን ሄኣ ሂለ እያኒ ዎታደርኒት።

13 ህካን እኮቤቹሃ ሂለ በር ባለጋር ዎልቀተ ፈንቀሽቶኖተ አታልቴነንተለክ ጉዕመንከሰ ሹልቴን ጠረኝቴን ኡሪሃ አታልቶኖተ መገን በገዝ ኦዳተ ጉዕመንከ ቆዕርዬ!

14 ቴሱ ሀንቅ ዝናርገ ረመዞንከክዕኔ ቆዕርቴን ወዘናን ኦደኤኖ በገዝ ኦድኖገ ፈይመ በገዝ ኦዳተ ኦደኤን።

15 ወገሬት እንጂሊ ዱዱብሲሃ ተቃጠቡክዕኔ ጫዕመገ ሎካንከክዕኔ ዎዕርቴን ኡርዬ።

16 ከኒች ጉዕሚችን አቦ ገረ ለበገን ቡቡኖ አልብሰ በገዙ ጉዕመንከ አሊችክዕኔ ከዕሙ አታልቴነንተ አመዕነቱ ጌሬንጌርገ አፈ።

17 ጡሙክዕኔ ብረት ቆሜገ ቡዕላንከክዕኔ ወዕርዬ፤ ህትን ጠሊሊ እያኒች ደገመኖ ሲፈ ሁኩንን መገን ላገተ አፈ።

18 ጉዕመ ወክት ጠሊሊ እያን አዎንቴነን ዱኣ አዕዬ፤ ከን ሃሊን መገኑ መጠርሰ መኒሃ በቅ ይቴንለክ ጠረኝቴን ዱኣ አዕዬ።

19 እንጂል ምሰጥር መለል ኩሎተ ጠወኣም ወክት ሀሰሳ ላገት ኣሰንታኤገ ኤሳሃ ዱኣ አዕዬ።

20 ቴሁ ሰንሰላቴን ኡሱረም ከን እንጂሊሃ አሳቤቹሃን፤ ህካን እኮቤቹሃ ሀሰሰኖገ መለል ጠወኡተ ዱኣ አዕዬ።

መጨረሻ ወገሬት

21 ኢተሞ አመኔቤቱለክ ቀርቻ ሆጎን አመዕነሞ ካድንቹ ቲኪቆስ አን ህት ዮም ጎሬ መ ኣኣም ጎሬ ጉዕመርቻንከ ኩለኖህዕኔ።

22 ህካን እኮቤቹሃ ነኡ ህት እነኮምጎር ደጎኖተለክ ክዕኔተ ጠረኝሶህዕኔተ ይ እሱ ክዕኔቤቹ ሶኮም።

23 እነ መገንለክ ቀርቻሃ መሲህ ኢሲን ወገሬቱለክ ኢተት አመዕነቴን ሚጡቡ አመ ኦሶተ እሁን።

24 ሙርተአቦ ኢታን ቀርቹኔ መሲህ ኢሲ ኢትታሁኑኤተ ጉዕሚንከ ኣሰቱት እኩንሰ።

ጳውሎስ ፍልጽሰዩስ መረጃ ከተሮ ሶህኑት ኣጉሰ

ጳውሎስ ከ ሶህኑት ከተሮህ መቄዶንያ ዬና ሮሞ መንግሥት ገሽ ኣዘን ኮ ፍልጽሰዩሳን ሄኣ መገን ኣመዕናና ዱኣ ምሒሃት፤ ሁኩ ዱኣ ምኑ፤ ጳውሎስ ኣውሮፕ ባዶን ሞዕናሃ ኡርሽኣታን፤ ሶህኑስ ከተበንቶኣሁ ጳውሎስ ኡሱር ምኔን ሄዕኖ ወክት ሞሎ ኣመዕናናን ግበሙ ኢሊስ ወክትለከ ፍልጽሰዩስ መገን ኣመዕናና ዱኣ ምኑ በላን ኪዕኖ ክዘብ ትምርት መሳን ቀልቡሰ ኣበ ሻዦ ወክትዩት። ኣሁን ቤሉ ጳውሎስ መሰህ ኢሳን ኮሲ ኣመዕነቱ ኣበ ኣኮቤቺሃ ከን ሶህኖን በትሽ ለለኖህ ሙንዲኖተለክ ዊመ ኣመዕነቱ።

ጳውሎስ ከ ሶህኑት ከተሮ ሞኔ መስት ኦርሽስ ወክት ሽልማት ሶሶሲሃ ኣኮቤቺሃ ፍልጽሰዩስ ኣመዕናናት ገለትጮታት፤ ኣሰለክ ኣሰ ኣሊን ኣደዱ ኦርሽት ኢልቶሳሃ ኣኮጎሬ መለሉለክ ዊሙ ኣመዕነቱ ሄኣሰተ ከን ገንባቲን ጠረኝሰናሰ። ሶኑ ኣኩርት መሰህ ኢሰ ገገ ወ ሆፍሳረ ኣኮተ ኣበ ቃግሰናሰ፤ መሰህ ኢሰ ኣያንጎ ሜጡበ ኣሂን ደኣቶ ሄኑ መገን ኣሰቶች ኣሜቺኣሃለክ ኣመዕነቲን ደኣቶኣሃ ቤሉ ሕገ ኣገሪን ደገሞኣሃበኣ ዩን ቃግሰናሰ፤ መሰህ ኢሰን ሜጡበ ኣክ ሄኣህኑኡ ጉዕሚንከ መገኑ ኣሰናሰ ወገሬትለከ ሙንዲኑት ከተበናሰ።

ኩ ሶህኑት ደገንታኣሁ ሙንዲኑት፣ ኣመዕነሙ፣ ሜጡበ ኣሁለክ ኣመዕነት ሄኣን ጠረኛ በትሽ ለሊሶንከሲት፤ በርግን ኣሳቤቹ ጳውሎስ ፍልጽሰዩስ መገን ኣመዕናና ዱኣ ምሒሃ ኮሲ ኣበ ኣኮተ ለሊሰና።

መጻፉስ ኣፎሃ

- ኣጉሰ (1:1-11)
- ጳውሎሴሃ ሀለኻሰ ሀለት (1:12-26)
- ኣመዕነት ሄኣ ሞሳልተ (1:27—2:18)
- ጢሞት ሞሴለክ ኤጳፍሮዲቲሲሃ ሃደተ (2:19-30)
- ኣመዕነቱ ግባህኩኣሃ ኩለሞሰ ጠረኛ ጠወ (3:1—4:9)
- ጳውሎስ ፍልጽሰዩስ ኣመዕናናተ ሆንጠህሾ ገለትለክ ሸክነተ (4:10-20)
- መጨረሻስ (4:21-23)

1 ኩ ሶህኑት መሰህ ኢሰ ካዲመተ ኣኮ ጳውሎሴችለክ ጥማቶሴች ሶህንቶኣተ ሶህኑ፤ ሶሃሞንኩ «ፍልጽሰዩስ» ዬና ከተማን ሄኣ ኣመዕናና ጭምት ኣምንሳኖሃ፣ ድያቆናከተለክ * መሰህ ኢሳን ኣመዕነት ጠለላኑት ኣኮሆኑኣሃ ጉዕሚንካት።

2 ኣናፎ መገረቺ ቀርቼሃኔ መሰህ ኢሲች ኣሰቱትለክ ወገሬቱ ክዕኔሃ ኣሁን።

ጳውሎሴ ገለት ዱኣ

- 3 ኣን ክዕኔተ ቃጋሞ ወክት ጉዕመንከ መገኑኤ ገለትጫሚት።
- 4 ኣን ክዕኔተኔሃ ዱኣ ኣኣም ወክት ጉዕመንከ ሙንዲኖን ዱኣ ኣኣሚት።
- 5 ወዕኔ በሬች ጀመር ክበሬ ኢሊ ተሸት ላገተ ኣን ሜጡበ ኣከን ኣቴንተቤቺሃ መገኑ ገለትጫም።
- 6 ከ ጡመ ሆኑት ክዕኔን ኣኣተ ጀመር መገኑ መሰህ ኢሰ ኣሚተኖ በር ሹሎተ ኢሊ ኣገረኖግ ኣመዕናም።
- 7 ቴሱ ኡሱር ምኔን ኮሞ ወክትለክ ኡሱረምችኤ ብርተ ኣንጂል ሀንቂሃ ከዕመቀሞተለክ ኣሱንከ ጠረኝሲሃ ኣኣም ወክት መገኑ ኣሰቶንከሰ ኣሴኤ ዕድሊን ጉዕሙንኩክዕኔ ቤቀማኑት ኣከንተቤቺሃ ኣዕኑ ጉዕመ ወክት ቀልቤንከኤ ኮንተ። ህካን ኣኮቤቺሃ ክዕኔተኔሃ ሞጮጨመኖኤሁ ሀንቅሃን።
- 8 መሰህ ኢሰ ኢታን ጉዕመንከክዕኔ ሄንከ ሱናሚት ጎሬ መገኑ ደገኖ።
- 9 ኣኮተክዕኔ ኤንኬዕኑለክ ሀይመተ ሰውዌ ዊሞህ ኣክ ነጸን መረኖግ ዱኣ ኣኣም።
- 10 ኣሰን ጡመ ጠወ ኣኖራመቲን ደገኖተለክ መሰህ ፈንቀል ኣሚተኖ በር ነጣኑተለክ ሙልሲሰና ጠወ ኮህዕኔበኣረ ኣከን ደገንቶኖታት።
- 11 ህትን መሰህ ኢሰን ደገመኖ ፈይመ ላልቺን ዊንቲን መገሒ ኬዕምኣለክ ገለት ደግሲሴንነታሃ ኣከንነተ።

ጳውሎሴ ኡሱረሙ ኣንጂሉ ኣልባዕሎተ መስተ ኣሁስ

12 ኣመኤ ኦሶ! ኢ ኣሊን ኢሊ ጠወ ጉዕሙንኩ ኣንጂሉ ኣበ ኣልባዕላኖግ ኣኡስ ደገኖተ ሀሳም።

* 1:1 ድያቆን ሆንት። ምሒ ኣኮ ሬኖ ማገቱ ካደሙሃን። 1:1 ሰቀ. 16፣12።

13 ህዳን እኩቤቸሃ እን ኡሱረሞሚሁ መሰህተኔሃ እሁሰ ሮም ዎም ምኒ ዘበኛኑትለክ ዎሉ ህክኔ ዮ መኑ ጉዕሙንኩ ደጋኑ።

14 ቀርቾን እመዕንቶ እመአሶች ልግቡሰ ኢ ኡሱረሞተኔሃ ቀርቾን እመዕንት መገን ላገተ ዎዕኔች በትሰ ዎጅቱዕነ መለልት ዱዱብሰታኢት።

15 እኩሳሬ መት-መቱ መኑ መሰህተኔሃ ዱዱብሰታኢሁ አቁሻንትለክ ዎሉሰ ጠቁኒት፤ ጠዉ እኩሳሬ ዎሉሰ መኑ መሰህተኔሃ ጡሙ ቀልቢን ዱዱብሰታኢት።

16 እሰ ተሸት ላገተ ፈዮ ቀልቢን ዱዱብሰታኢሁ ኢታች ኪዕዮህህንት፤ መሰንትሰ እን ኡሱረሞሚሁ ተሸት ላገተ ህንቁን ሰበኩተ እጸማምገ ደጋቤቸሃት።

17 ጠዉ እኩሳሬ አቁሻንለክ ጠቁን መሰህ ዱዱብሰታኢሁ ህንቁን እሁዕነ ገዉሰ ኢቲንለክ ኡሱረሞኤ አሌን ዎልት ኦርሸተ በርግታኢሃ እኩጅሰቤቸሃት።

18 መሃ እኩሳሬ ህዳንሰ እኩሳሬ ጉዕማንከ ዎቁን አመሰለን እኩ ህንቁን እኩ አቃ መሰህተኔሃ ዱዱብሰመኖቤቸሃ መንደአም።

19 ከኒች ኤተሪሃ መንደአም፤ መሰንትሰ ክዕኔ ዱኢንለክ መሰህ ኢሰ ጠሊሊ አያኒ ሀዕለንሺን ዮኤ ኦርሻች ፋላምገ ደጎምቤቸሃት።

20 ህዳን እኩቤቸሃ መ ጠቁኒ መላምበአገ ዊሙ ሃሽኦቲትለክ ተብሶሁ ዮኤ፤ ጠዉ እኩሳሬ ጉዕመ ወክት አአምህንገን ቴሁ ሃዕዮምጎሬ ህከረንገ ሬዮምጎሬ መሰህ ዊሙ ጅሰምኤ አሌን ሎረ አህናገ ዊሙ መለሉ ዮኤ።

21 ህዳን እኩቤቸሃ ኢ ሄኤ መሰህን ሄኤሃን፤ ሬሁተ እኩሳሬ ኤሳሃ ደግለለኖኤሃን።

22 ጠዉ እኩሳሬ ፎሊን ሃዕዮምጎሬ ላልቹ ዮሰ ሆተ ቀርቸሃ እኩት አታላም፤ እኩሳሬ ሬሆቻለክ ሄኤች ህዳንሰ መጠራም ጎር ደጎምበኤ።

23 ከን ለም ጠዎን ቀልቡኤ ለሙ ቤቹ እኩኤ፤ እሰን መቶ አዲን ከን ሄኤች አደ አክ መሰህን አሆተ ሀሳም፤ መሰንትሰ ሁኩን ጉዕመርቸችን በተአናሃ እኩቤቸሃት።

24 ጠዉ እኩሳሬ እን ሬሁዕነ ፎሊን ሃዕዮምጎሬ ክዕኔሃ በትሸ ጡሙሃን።

25 እን ከ ጠዉ አመዕንዮም፤ ሁኩንን መንደኡክዕኔለክ አመዕነቱክዕኔ ነጻኖገ ሬሁዕነ ፎሊን ሄኤምገ ደጎም።

26 ህዳን እኩቤቸሃ እን ክዕኔእን ለንኪሃ ደቀምምጎር ኢ መሳን መሰህ ኢሳን ዮህዕኔ ቦኑ አበ አህኖ።

27 ጉዕሚችን በትሰን መሰህ እንጅሊሃ ሀሰሰኖገ ሃዕዮ፤ አሜች ለዕዮንክዕኔጎሬ ህከረንገ ክዕኔች ቁር ክዕኔትኔሃ ሞጭጭምጎሬ መቶ ቀልቢን እንጅል አመዕነትትኔሃ ሜጡብ እኩን አጸንቲንገተገ ደጋም።

28 ክዕኔተ ግባህዕኔረ መ ጠቁኒ ዎጅቶናቸ፤ ኩንን እሳሃ በእሰተ መላ፤ ጠዉ እኩሳሬ ክዕኔሃ ጡምተ መላ፤ ሁኩንን መገን አዲቸት።

29 መሰንትሰ መሰህን እመዕንቶተ ጠለዕል እሁዕነ እሰተኔሃ ኦርሸተ ቶሳኖተ ኩን አሰምሀዕኔ።

30 ህዳን እኩቤቸሃ አዕኑ ከኒች ብርተ አጸንሸኤ ለኤንታኤ፤ ቴሁ ኢ አጸንሸ ለኤንታት፤ አዕኑሁ ህትናሙ አጸንሸ አጸንቲንገተ።

2

መሰህ ገዉሰ ሆፍሾገ

1 መሰህን እኩንተቤቸሃ መት-መቱክዕኔ ሸዜንን ጠረኝቴንታኤ፤ ህትን እሰ ኢታን ጠረኝጨቀንቲንገተ፤ ህትን ጠሊሊ አያኒን ሜጡ እኩንታኤ፤ ህትን መት-መቲሃክዕኔ ጡምመትለክ ጎደብ ላፍመተ ለሊሴንታች።

2 ህዳን ሰውቲን፤ ኢታንለክ ቀልብን ሙርሰጭቲን ሜጡ እኩን መንደሲሸኤ።

3 ገዉ ኢቲን ህከረንገ ቦኒን መቱርቸ አቶናቸ፤ ጠዉ እኩሳሬ ዎሉ መኑ ክዕኔች ቆህኖገ ገዉ ሆፍሲን ዎለዕዮ፤

4 ህትን ገገዉክዕኔ ዎሎ መን መኩተ ሀሺ ቤሉ ገይክዕኔ መኩተ ጠለዕል ሀሶኖቹ።

5 ህትን ኩ መሰህ ኢሳን ዮ ሰውቱ ክዕኔ በላን ሄኤን።

6 እሰ መገኑ እኩሳሬ መገኒን ቅጡ አአኖ ሀል አፍ አገሮተ ሀሾበኤ

7 ጠዉ እኩሳሬ ሮሰ ደነ አፎ መን እኩ ገዉሰ ኦነ አዕዮ።

8 ገዉሰ ሆፍሾ

ሬሆተ ኢሊ መሰቀል አሌን ሰቀለም ሬሆተ ኢሊ

እዘዘሞ።

- 9 ህዳን እኮቤቺሃ መገኑ ጉዕሚኛን አለ ዋሽ ኬዕምኛ ቤኛን አዕዮሰ፤ ጉዕመ ሱዕሚኛን ሎረ ሱዕመ ኣሴሰ።
- 10 ህዳን እኮቤቺሃ እሰ ሱዕም ኬዕምኛተይ ኡላን፣ ሰማንገለክ ኡለ ኣዜን ዮሩ ጉዕመንኩ ጉሉቤንከሰ ጉሉጽታኦ።
- 11 ህትን አረቤንከሰን «መሲህ ኢሰ ቀርቺሃን» ይት መሰከርት እነ መገኒሃ ኬዕምኛ ኣታኦ።

ዲንያ አል መኒሃ ኑር እህተኔሃ

- 12 ህዳን እኮቤቺሃ ኢ ጆላ! ጉዕመ ወክት እዘዘንቴንተኤገን ክዕኔቤኛን ሃዕዮም ወክት ጠለዕል እሁዕን በትሽን ቴሱ ክዕኔኛ ቁዕሬም ወክትሃ ጡሙክዕኔ ለለሰ ሆጉት ዋጅንለከ ሁጠን አዕዬ።
- 13 መሰንትሰ እሰ ጡሙ ሰውት ሀሶኖተለክ አቶኖተ ክዕኔ ኣዜን አእኖሁ መገኑሃን።
- 14 ጉዕመንከ ሆጉት አቴነንተ ወክት ቀንቀቶኖቹ፤ ህትን ኦዶኖቹ።
- 15 ህዳን እኮቤቺሃ አዕኑ ከን ሂለ ክልቀት በላን ሆኖኛለክ ህንቁኖህዕኔርቹ ዮህዕኔበኢሃ ነጣኑተ መገን ኦሱተ እከን ዲንያ አል መኒሃ ኑር እከን ለለሲነንተ።
- 16 ኩን እህኖንኩ ሄኡ ደገመኖ ላገተ ሙርቶኑዕናን ጠረኛሴን አፊኒት፤ ከን ሃለን ደጉዲኤ እኮ ሆጉኤ ተሰ እክ ፈቃበአቤቺሃ መሲህ ፈንቀል አሜተኖ ወክት ድከኣም ሄኦኤ ዩሃን።
- 17 አዕኑ መገኒሃ አመዕነተን ሆንጠህሲንተ ክትምለክ ክድመ አሌን አኒሁ ዲንተአኖ ክትምገ ሆንጠኩምጎረ ክዕኔን ጉዕሚንክክዕኔ ሜጡብ ተሽ ዮኤ።
- 18 ህትን አዕኑሁ ኢንን ሜጡብ ሙንደኤነንተ።

ጢሞቴዎሴለክ ኤጳፍርዲቱሴ ክድመተ

- 19 ቀርቹ ኢሰ ዩጎረ ክዕኔተኔሃ ሞጭጭ ሙንደኦተ ጢሞትዎሴ ደዕል ክዕኔቤቹ ሶሆተ ተብሳሃ እኣም።
- 20 ክዕኔተኔሃ ጡሙ ቀልቢን ሰውየን ሻዘኖሁ ጢሞትዎሴን ዮኢሁ አዩሁ ዮብኦ።
- 21 ዎሉ ጉዕመንኩ ገይሰ ጠው ቤሉ መሲህ ኢሰ ሆንተ ሰውይቶበኦ።
- 22 ጠዉ እኮጎረ ጢሞትዎሴ ቤቱ እነሰ ካደመኖህንገን ኢን ሜጡብ እክ እንጂሊ ካደሚንክሰለክ አመዕነንሽሰ መሰከርሲሱሰ አዕኑሁ ደኒነንተ።
- 23 ኢ ጠዉ መ ደረጀተ ኢሊኖ ጎረ ለዕዮሚኛ ኤተሮን ጢሞትዎሴ ደዕል ክዕኔቤቹ ሶሆተ ተብሳሃ እኣም።
- 24 ህትን አን ገወንኩኦ ደዕል ክዕኔቤቹ አሜቶተ አታላምገ ቀርቹ ሀዕለኖኤገ አመዕናም።
- 25 ህትን ኤሳሃ ሀሲሰኖኤርቹን ጉዕሚን ሀዕሎኤተ ሶከንተ አመኤቤቱ ኤጳፍርዲቱሴ ክዕኔቤቹ ሶሁ ሀሲሰኖሃ እክ ደጎም፤ እሰ ኢን ሜጡብ ኡሬ ዎታደርቹለክ ሆንኤ ጆላ እክ አኒን ዲንክዮሃን።
- 26 እሱ ክዕኔቤቹ ሶሃሚሁ ጉዕመንክክዕኔ ለኦተ ሱኞገለክ እሰ ጣዙሰ ሞጭጭቴንተቤቺሃ አበ ጨነቀሞኡ።
- 27 ህንቅንክ እሰ አበ ጥቶ ሬሆተ ሆንጠኩ እቅ፤ ጠዉ እኮጎረ መገኑ መረርሰጭ ፈይሾሰ፤ ጠለዕል እሰ እሁዕን ኤሳሃ መረርሰጩቤቺሃ ሻዙተ ሻዘ ኢሌን በርገመኖኤበአገ አዕዮ።
- 28 ህዳን እኮቤቺሃ አዕኑ እሱ ለንኪሃ ለኤን ሙንደኦኖተለክ ኢ ጨነቀሙ ሰሎተ አን እሱ ክዕኔቤቹ ደዕል ሶሆተ አበ ሀሾም።
- 29 ቴሱ ቀርቹ ሱዕሚን አመዕናንቹ እኮቤቺሃ አበ ሙንዲኖን ቶገሰ፤ ህትን እሰገ ዮ መን ጉዕመንክ ከበጅዬሰ።
- 30 መሰንትሰ አዕኑ ግደኖን ሄኤን አቶኖኤተ አታልቴንበ ሀዕለንሽ እሰ ደግለሎኤተ መሲህ ሆንተ ነብሳሰ ህግሽ ኣሲን ሬሆተ ኢሊ አጸሞኡ።

3

ሀንቅ ፈይመተ

1 አመኤ ኦሰ! ቀርቾን ሙንደዕዬ፤ እን ከኒኛ ብርተ ከተቦንክዕኔሃ ፈንቀሽ ከተቦንክዕኔ ጎረሁ ሀፈትሰኖኤበኦ፤ ሁኩንን ክዕኔተ አደገኛ ጉዕሚኛን አገሮህዕኔተ አታላኖ።

2 ወሸገ* ንጃሰሳህኑኤችለከ ሂለ ጠወ አታሁኑኤች አገዕርዬ፤ ህትን ህለተ ሆጉተ አታሁኑኤችለከ ክዝብ ጡርከመሚች አገዕርዬ።

3 ነኤ መገን ጠሊሊ አያኒን ሰገንዳምረለከ መሲህ ኢሲን ድከዕናምረ እንኮምቤቸሃ ሀንቂን ጡርከመምረ፤ ጠወ እኩጎሬ አሰ ህትናመተበእ።

4 ህትን እን ማሊን እኮ እቃ ድከአሚሁ ዮኤ፤ እዪሁ ማሊን ድከአላሁ ዮሲሃ እጉጃሰእቃ እን ድከአም ልግቡ ዋቆ ዮኤ።

5 እን አለሞም ሀዜትቅ በር ጡርከመምዋዩ፤ ቢንያሜ ደቦች እኮም እስራኤላውቸሃን፤ ከኒች ከዕዮሀኒን ነጠ እኮም ዕብራውቸሃን፤ አይሁድ ሕገ አገዕርን እኮ እቃ ፈርሳውቸሃን።

6 ሀይማኖትሃኤ ይ መሲህ ኢሳን አመዕንቶረ ሸራምሃ እቅ፤ ህትን ሙሰ ሕገ አገዕርን ፈይተሃ እኮ እቃ ኩሌኖኤርቸዮ ዮኤበእ።

7 ጠወ እኩጎሬ ከኒች ብርተ ኤሳሃ ደግለለኖኤ ዬሚሃ ጉዕመንከ መሲህተሃይ ይ ተሰ ጠውገ አዕይ ዋለአንሰ።

8 ጠለዕል ሀካን አሁዕን ቀርቼኤ መሲህ ኢሰ ደጉ ዋሎርቸች ጉዕሚችን በተአላሃ እኮቤቸሃ ሁኩን ጉዕሙንኩ ክሳርገ ዋለአንሰ፤ እሰተሃይ ጉዕመርቸንከ እጉርም፤ መሲሁ ደኦተ ጉዕመርቸንከ ቶሬመ ሁርገ ዋለአም።

9 እን ሕገ አገርን ደአም ገይኤሃ እኮ ፈዩት ዮኤበእ፤ መሲህ አመዕኒንለከ እሲን ሜጡብ አሂን ደገንታ ፈዩት መገን ቤቸች አሚታ ፈዩት ቴሱ ዮኤ።

10 እን መሲህ ደጎተለከ ሬሆች ኬእሰ ዋልቀተ ደጎተ ሀሳም፤ እን እሰ ኦርሸተ ቤቀምተለከ ሬሆንከሰ እሱ እጉደተ ሄዕሳታም።

11 ህትን ሬሆች ኬአምገ ተብሳሃ አአም።

ኢሉ ሀሰሰኖቤቹ ኢሊሃ ደጉዱ

12 ህካን ጉዕመንከ ደአዮምበእ፤ ህከረንገ መገኑ ሀሰሰኖሃሊን ሆሮ እን ዋሚበእ፤ ጠወ እኩጎሬ መሲህ ኢሰ ኤሳሃ ገይሲሃ አዕዮኤቤቸሃ ሸልማት ደኦተ ብርተ ዋሽ ደጉዱ እጉራምበእ።

13 አመኤ ኦሶ! እን ህካን ገይኤሃ አዕዮምህንገ ዋለአምበእ፤ ጠወ እኩጎሬ መቼ ጠወ አአም፤ ሁኩንን ኤተርንከኤ ዮኤሃ ሀበን ብረንከኤ ዮኤሃ እፎተ ደጉዳም።

14 መገኑ መሲህ ኢሰ ኦዳን ገኤኤሁ ሰሜች ደአም ዋገ ዘማን ጉዕሚንከ ሄኤ ደኦተ ኢሉ ሀሰሰኖኤቤቹ ኢሎተ ደጉዳም።

15 ቴሱ አመዕነተን ጠረኝኖምሩ ጉዕመንኩ ካን አጉደኖ ሰውቱ ሄኦተ ሀሰሰኖ፤ አዕኑ አደ እኮ ሃሊን ሰውይቲንተ ጎሬ መገኑ በራሃ አዕይ ለሊሰኖህዕ።

16 ህካን እኮቤቸሃ ቴሱ ኢሊ ደዕኖም ህንቅ ጠረኝንሰ አንፎ።

17 አመኤ ኦሶ! ኤሳሃ እጉዳንንተረ እኬ፤ ነኤ ዋልሀሰ ሞሳልተ እንኮምገን ህካን አጉደን ሄኦረ አጥራመቲን ለዕዬ።

18 መሰንትሰ ከኒች ብርተ ልግብ ወክት ኩሎምገን ቴሁ ኦኢን ኩላንክዕኔ፤ ልግቡ መኑ ሄኦንከሰ መሲህ መሰቀሊሃ ዲን እክ ሂልገ አአኖሰ።

19 እሳሃ ጎደቡሰ መገኑዋሰ፤ ሙልሲሰኖርቸ እሳሃ ኬዕምኝዮሰ፤ ሰውቱሰ ዱንዮ አልዮ ጠወ፤ እሰ ኤተሩሰ በኤሃ።

20 ጠወ እኩጎሬ ኒ ባዱ ሰማሃን፤ ህክንቤቸች አሚተኖ ጡምሳንቸ ቀርቼኔ መሲህ ኢሰ አገርናሚት።

21 እኒ ኒ ህከ ህንቀም ጅሰመኔ ዶር እሰ ኬዕምኝ ጅሰመ እጉደኖገ አአኖ፤ ህካን አአላሁ ጉዕመንኩሰ ገይሃሰ ጠገመኖገ አአኖ ዋልቃንተሲት።

4

መጨረሻ ሸዘነ ላገተ

1 አመኤ ኦሶ! ኢታንክዕኔሁለከ ሱኖንክዕኔሩ ሙንዲኑኤ እኬንተሩ ሆጎተኤ አክሊሊ እኬንተሩ ቴሱ ቀርቸን ጠረኝቲን ኡርዬ።

2 ኤዋድያለከ ሲንጢኪ ቀርቸን ሜጡ እኬን ሄኦተ ኤጫንክዕኔ።

3 እት አመዕንቶንት ሆጎኤ ጃለ! ከ ሜንቱ ሀዕልቶተ ኤጫንኬ፤ መሰንትሰ ኩ ሜንቱ ቀሊምንጦሴንለከ ሱዕሙሰ ሄኦ መጻፋን ከተበሞ ሆጎ ጃላን ሜጡብ እንጂል ላገተ ኢልሰተ ደግለልቶኤረ።

4 ጉዕመንከ ወክት ቀርቸን ተሸ ዩንክዕኔ፤ ቴሁ ያንክዕኔ ተሸ ዩንክዕኔ።

5 ጡምመክዕኔ ጉዕመንከ መንቤቸን ለልቶኢተ እኩን፤ ቀርቸንኩ አሜቶተ ሆንጠኩኤ።

* 3:2 ወሸተ- የኖሁ አይሁድ መኑ መገኑ አመዕንበ መን «ወሸተ» ይታቢቸሃን፤ ጠወ እኩጎሬ ከንቢቸን ጳውሎስ «ወሸተ የን ጠወአላሁ «ነኤን አመዕናተ» ይተን ሃዕሮ አመዕንቶ መን «ጡርከሙ ሀሰሰኖህዕኔ» ይተን ግዳጅሳ አይሁድተሃይት። 3:5 ሶቀ. 23፣6፤ 26፣5፤ ሮሜ 11፣1። 3:17 1 ቆሮ. 4፣16፤ 11፣1።

6 ሀሰሰኖህዕይርቺሃ ጉዕሚንከ ሹኩሩ ዊሞ ዱኢን መገኘ ኑጭዬ ቤሉ መቶርቺን ሻዞኖቺ።

7 መን ኢንከዕይቺ ጉዕሚቺ ሎረ እኮ መገን ወገሬቱ መሲህ ኢሳን ዮንተቤቺሃ ቀልብክዕይለከ ሰውትክዕይ ክገረኖህዕይ።

8 መጨረሻንን አመኤ ኦሶ! ቀልብክዕይ ከኒቺ ጉዕሚቺን በተአኖሃለከ ገለትጭሲሰኖ ጡመ ጠዊን ዊንቴንታረ እኩ፤ ሀንቅ እኮ ጠወ ጉዕመንከ፣ ኬዕምኙ ዮ ጠወ ጉዕመንከ፣ ሀቀቀተ እኮ ጠወ ጉዕመንከ፣ ነጠ እኮ ጠወ ጉዕመንከ፣ ኢቴኖ ጠውተኔሃ ጉዕሚንከለከ ሙንዲሲሰኖ ጠውተኔሃ ሰው-ይዬ፤

9 ኢቺ ተማርቴንታሃለከ ቶገንታሃ፣ ሞጮጭቴንታሃለከ ለኤንታሃ ጉዕመንከ አዕዬ፤ ወገሬት መገኘንኩ ክዕይን ሚጡብ እሀኖ።

ጳውሎስ ሶሃመስ ሽልማትተኔሃ ገለትጨፍገ

10 ጠዉ እኮጎሬ ልግብ ወክቴቺ ኤተርን ኦርሽኤተኔሃ ሰውዩ ጀመርቴንተቤቺሃ ቀርቺን አበ ሙንዲአም፤ ወክት ደኡቴንታበአ ቤሉ ኢተኔሃ ሰውዩ አጉርቴንታበአ።

11 ህት ያም ወክት ሆጳዕዮኤርቺሃ ሻቸቦለ፤ መሰንትሰ «ዮኤ ጌሱ ኤሳሃ እሀኖኤ» ዩ ተማርምቤቺሃ ዮኤሀኒን ሙንዲአምሃን።

12 ህካን እኮቤቺሃ ደኤለከ ደኤ ሆጉ ደጋም፤ ጉዕመንከ ጠዊን ጉዕመ ወክት ዱቢን እኮ ጎሪን ደእን እኮ ደኤ ሆግን «ዮኤሀ እሀኖኤ» ዩ ሮሾም።

13 ዎልቀተ ኣሰኖኤ መሲሂን ጉዕመንከ አኦተ አታላም።

14 እኮጎሬ አዕኑ ኦርሽኤ ቤቀማኑተ እኬን ጡመ ጠወ አቴንታኤ።

15 ፍልጽሱሳን ዮንተ መኑ! ወኔቺን ኬሽ እንጂል ላገተ ተማርሰን መቀደን ባዲቺ ፉሎም ወክት ክዕይ ቤሉ ዎሉ አመዕናኑት ኣሲንገለከ ቶገን ኤሳሃ ሀዕሉ ሆጉሰ አዕኑ ገዉክዕይ ደጌንጎተ።

16 ህትን ተሰሎንቄ ከተማን ሃዕዮም ወክት ሀሰሰኖኤርቺ ሶኬን ልግብ ወክት ሀዕልቴንታኤ።

17 እን ለኤ ሀሳሚህ ከኒቺ ብርተ አቴንተሀኒቺ አበ ጡመ ሆጉት በርገንቶታት።

18 ኤሳሃ ሀሰሰኖላከ ሀሰሰኖሀኒቺ በትሽ እኮ ሽልማትክዕይ ኤጻፍርድቱ አንጋቺ ቶጎም፤ ሁኩ ክዕይ ሽልማቱ ጡመ እንጀጎተ ዊሞ ክትምገ መገኑ ሙንዲሲሰኖሃለከ መገኑ ቶጎኖሃን።

19 ህካን እኮቤቺሃ ኢ መገኑ ዳንጉ ዮበአ ቀባጦቻሰ መሲህ ኢሰ አዲን ሀሰሰኖህዕይ ጠወ ጉዕመንከ በትሽ ኣሶህዕይ።

20 እናኔ መገኒሃ ዘላለሚሃ ኬዕምኙ እሁንሰ፤ ኣሚዕን።

መጨረሻ ወገሬት

21 መሲህ ኢሳን አመዕንቶ መኒሃ ጉዕሚንከ ወገሬት ኢልሺ፤ ኢን ሚጡብ ዮ አመኤ ኦሶት «ወገሬቱ» ይታህዕይት።

22 ዎሉ አመዕናኑት ጉዕመንኩ እደንከ ሮም ዎም ምኔን ካደንታ አመዕናኑት «ወገሬቱ» ይታህዕይት።

23 ቀርቺ መሲህ ኢሰ ኣሰቴት ጉዕሚንክክዕይ ሚጡብ እኩን፤ ኣሚዕን።

ጳውሎስ ቆላሰያስ መኒሃ ከተሶ ሶህኑተ ኢኑስ

ኩ ሶህኑት ከተበንቶኢሁ ቀወ እሰያ ዬና ኤፌሶን ከተማን ሸርቂን ቆላሰያስ ከተማን ሃኔ መገን አመዕናና ዱእ ምኒሃት፤ ኩ መገን አመዕናና ዱእ ምንት ኡርቶኢሁ ጳውሎሲን አህበገሬሁ ሮም ግዛት እኮ እሰያ ሀዕኑረ ከተማ እኮ ኤፌሶኒች እንጂሊ ተማርሰታኦረ ሶኮሃ እኮቤቹሃ ቆላሰያስ መኒሃ ሹምነቱ ዮስ እቅ፤ ቆላሰያስ መገን አመዕናና ዱእ መን ኣዜን «መገኑ ደጎተለክ ዊመ ጡሙ ደእቶተ ጉዕሙንኩ መኑ ጠሊልመ እያን ዋልቀተለክ ሹምነቱሃ ሰገዱ ሀሰሰና» ይታ ክዘብ አሰተማረት ሄኡስ ጳውሎስ ሞጮጭዮ እቅ፤ ሁኩ አሰተማረት ይታ ዋሉ ጠወ «ጉዕሙንኩ መኑ ጡርከም ሴሪሃ ጠገመለክ እቶታ ዋሉ ሴሪሃ እገሩ ሀሰሰናና» ዮናሃን።

ጳውሎስ ከ ሶህኑተ ከተሶሁ ሀንቅ አመዕነቲ ሶህኑተ ሆንጠሀሲን እሰ ክዘብ ትምርት ቶጉ ግብሃት፤ ሆንጠሀሮ መሰሊች ቡዕሉሰ «መሲህ ኢሰ ዊመ ጡሙ ኣሰና፤ ሁኩ ዋሉ አመዕነቱለክ አኤናርቹ እኩጎሬ እሰች ቁርሰታኦ» ዮናሃን፤ መገኑ መሲህ ኢሰን ኣዱንያ አል ከለቆ፤ እሰ ኣዱንን ገይሰቤቹ ፈንቀሽ ኤብናሰ፤ ኣዱንያ አሉ ጡም ተብሶሁ ሃኦናሲሁ መሲህ ኢሰ ቀልበን አመዕነት፤ ከን ሃለን ጳውሎስ ኩ ሎሩ ትምርቱ አመዕናና ሃኦን ሀት ኣት ሆጎን ሆሰሰጎሬ ኩለና።

ከ ሶህኑተ ጳውሎስች ቶግ ቆላሰያስ ኢልሶተ ሶህሞ ቲቶን ሜጡብ ሃዕዮ አናሲሞሴ እኮገ ለኡ ሀሰሰና፤ ሀካን እኮቤቹሃ ጳውሎስ አናሲሞሴ ዬና ርሰችተኔሃ ፊልሞኒሃ ዋልት ሶህኑተ ከተሶኡ፤

መጻፍሰ አሮሃ

- ኢኑስ (1፡1-8)
- መሲህ ኢሰ ሀለትለክ ሆጉተ (1፡9—2፡19)
- መሲህ ኢሰን ሃዕር ሄኡ (2፡20—4፡6)
- መጨረሻሰ (4፡7-18)

1 መገን ሀሰሻን መሲህ ኢሲ አሳቤቹ እኮም ጳውሎሴችለክ አመኔቤቲች ጢሞትዎሴች ሶህንቶአተ ሶህኑ።

2 ቁላሰያሳን ሃኣሁኡ መሲሃን ጠሊልቶ አመዕነንቶ አመዕናተ መገኒች ኣኒችኔ ኣሰቲትለክ ወገሬቱ እሁንክዕኔ።

ጳውሎስ መገኑ ገለትጨሰ

- 3 ክዕኔሃ ዱእ አዕናም ወክት ቀርቻኔ መሲህ ኢሰ እነ መገኑ ጉዕመ ወክት ገለትጭናንሰ።
- 4 መሲህ ኢሰን ዮህዕሴ አመዕነቱለክ አመዕናተ ጉዕሚንክ ዮህዕሴ እተተ ሞጮጭናም።
- 5 ሀንቅ ላገተ እኮ እንጂሊ ሃጭ ክዕኔቤቹ ኢሊ ወክት እሰን ዮ ተብሳሃ ሞጮጭቱንታኦ፤ ሀካን እኮቤቹሃ አመዕነቱክዕኔለክ ኢተክዕኔ እጃረንቶኢሁ ሰማን ተቃጠብ እገረና ሀከን ተብሴ አለኒት።
- 6 አዕኑ እንጂሊ ሞጮጭቱንታችለክ መገን ኣሰቶ ሀንቅ ደገነት ባር ጀመር ኩ እንጂሊ ክዕኔ ባላን እኮሀንገን ኣዱንያ አሉን ጉዕማንን ኣቶት አለንትለክ ነጽ አለኒት።

7 ሀካንን ክዕኔተኔሃ መሲህ አመዕነሞ ካዲንቹ እኮሃለክ ኒን * ሜጡብ ኣአኖ ኢተሞ ኤጽፋራ ኩሎህዕኔ።

- 8 ህትን እሰ መገን ኣያኒን ገገወክዕኔ እተቀመጥክዕኔ ኩሎኔ።
- 9 ሀካን እኮቤቹሃ ከ ጠወ ሞጮጭናም ባሬች ጀመር አዕኑ ሀይመተለክ ሰውት ጉዕመንክ መገን ሰውት ደገነንተ ዊሙ ደኑ ሃኡህዕኔተ ክዕኔሃ ዱእ እኡለክ መገኑ ኡጩ ኡጉርናምበኦ።

- 10 ህትን ቀርቹሃ ሀሰሰናገ ሃኡንገለክ ጉዕማንክ ጠዋን እሰ ሙንዱሲሲንገን ጡሙ ሆጎን ኣቶተ ኣቶቲን መገኑ ደገን ነጽቶናተ ዱእ አዕናም።
- 11 አታሰላን ጉዕመንክ ጠወ አታሊሃ ተቃጠቤንተረ እኮናተ ቀርቹ ሎረ ዋልቃን ጠረኝመሰ ጉዕመንክ ኣሱንክዕኔ።

- 12 ህትን ኑር ዋምነት ኣዜን ጠሊላኖን ሜጡብ ርሰተ ቤቀንቲንተገ እበቀዕዮህዕኔ መገኑ እነ ሙንዱኖን ገለትጭዬሰ።
- 13 እሰ ቱንሰች ዋልቃች ጡምሽኔ ኢተሞ ቤትሰ ዋምነቲን ኣንጋምገ አዕዮኔ።
- 14 እሲን ዋዘም ጩብኔ ማርቲተ ደእናም።

መሲህ ሆጎተኔሃ

15 ቤቱሰ ለልበ መገን ሀንቅተ ሞሳል፤ እሰን ክልቀቲች ጉዕሚችን ሀንገረሃን።

* 1:7 ኒን፡- ዮናሃ መት.ሙቱ ሉሀ ክታበት «ክዕኔን» ይታኦ። 1:7 ቆላ. 4፡12፤ ፍልግ. 23። 1:14 ኤፌ. 1፡7።

16 መሰንገትሰ ሰማንለክ ኡላን የአረ ጉዕሙንኩ ለለኖሁለክ ለለኖበአሁ ዋልቃመትለክ ገሽታእሩ ሀለቀትለክ ሹመት ጉዕሙንኩ ከለቀንቶአሁ እሰ አዲንት፤ ጉዕሙርቹንኩ እሰ አዲን እሰንከ ከለቀሞኤ።

17 እሰን ጉዕሙርቹች ብርገተ ሃዕዮ፤ ጉዕሙርቹንኩ አጻቀሞ ኡራአሁ እሰንት።

18 እሰን ገይሰ ጅሰመ እኮ መገን አመዕናኖ ዱአ ሞኒሃ ቡዕላሃን፤ እሰ ጉዕሙ ጠዌሃ ብራተ፤ ጉዕሙ ጠዌሃን ሞኒሃ እሆተ ሬሆች ኪኢንከሰ ዎኔሃን።

19 እኮ መገኑ ቤትሰ አዜን መገኑ ዊመ ዊሚን ሃኢኖገ ኢትዮኤ።

20 መሰቀል አሌን ዱንተዕዮ ቄጊንከሰ ወገሬት አኢን ኡላን እኮ ሰማን ዮ ጠወ ጉዕሙንከ እሰ አዲን እሰን ሀራርሴኤ።

21 ሰውተንከክዕኔለክ ሂላ ሆንንተክዕኔ ባለጋረ እከን መገኒች ቄዕርቲን ሃኢነንተ እቅ።

22 ቴሱ እኮገሬ ሆፍኻለክ ቀነጤኖሀዕኔርቹ ዮሀዕኔበአረ ጠለላኑተ እዕይ እሰ ብራን ሆንጠሀሰህዕኔተ መሰህ ጅሰሞሰ ሬሆ አዲን ሀራርሴህዕኔ።

23 አመዕተንከክዕኔ እጃረንቴን ጠጻ ገቴን ኡራን ሞጮጭቴንተ እንጅሎተ ተብሴች ሌንቄቅቶትዕናን ጠረኝቴን ሃዕዮ። እዕኑ ሞጮጭቴንታሁለክ ሰሜች ዎርን ዮ ክልቀቴሃ ጉዕሚንከ ዱዱብሰሞ እንጂሉ ከኒት፤ እን ጳዉሎሰ ከ እንጂሊሃ ካዲንቹ እኮሞ።

ጳዉሎሴ ሰቀሞ ሆጉተ

24 ቴሁ ክዕኔተኔሃ ቶጎሞ ኦርሻን ሙንደኣም፤ መሰህ ጅሰመሰ እኮ መገን አመዕናኖ ዱአ ሞኒሃ ኣኤ ኦርሻች ሆፈአኖሃ ማለንከኤ ዊንሻሞ።

25 መገን ላጋች መቲርቹሃ ፊሱዕናን ክዕኔሃ ኩሎተ መገኒች ኣሰሞኤ ኤጋን መገን አመዕናኖ ዱአ ሞኒሃ ካዲንቹ እኮሞ።

26 ኩ ላገት ልገቤ ዘመኒሃ ክልቀቴሃ ጉዕሚንከ ለሉዕናን ሞሰጥር እክ ሃዕዮ እቅ፤ ቴሁ እኮገሬ መገኑ አመዕንታ መኒሃ ጉዕሚንከ ለልሾኤ።

27 መገኑ ከ ሞሰጥር አሳሃ ለሊሾሰ፤ ሁኩንን አይሁደ አህበ መን በላን አበተ ቀባጡ፤ ካን ዩ መሰህ ክዕኔ ኣዜን ሃኢሃሰ እሰን ኪዕሞኚሃ፤ ተብሳሃ።

28 ኒኤ መሰህ አዎጅኖም፤ መኑ ጉዕሙንኩ ጉዕሙንከ መን መሲሂን አመዕነቴንከሰ ጠረኝ አዕን ሆንጠሀንሶተ ሀይመት ጉዕሙንከ ተማርሰንን ሸንዛም።

29 እሰ ሎረ ዋልቃን ኣዜንከኤ አኢኖቤቹሃ ህከን ዋልቃን አጸመን ቆንደዳም።

2

1 ክዕኔተኔሃ ሎደቅ ከተማን ዮ መንተኔሃለክ ህትን አልኤ ለእ ደጋበእ መንተኔሃ ጉዕሚንከ ሃንከ አጸማምጎር ደጎኖተ ሀሳም።

2 አጸማሚሁ ቀልቡሰ ጠረኝሃን ኢታን ሜጡብ እክ ዊመ ቀልብ ደእት መገን ሞሰጥር እኮ መሰህ ደጋገት።

3 ሀይመለክ ኤንኪዕን ቀባጡት ማጠንት ዮኢሁ መሰህ ቤኻንት።

4 ካን ያሚሁ አዪሁ ጡመ ላጋን ጠወእን ጣንሰኖሀዕኔበእገ ይዪት።

5 ማለን ክዕኔች ቄዕርዮም አቃ ሰውተን ክዕኔን ሜጡብ ዮምቤቹሃ ጡመ ሴራን ሃኢንከክዕኔለክ መሰህን ዮሀዕኔ አመዕነት ጠረኝመተ ለዕይ ተሸ ይዮኤ።

መሲሂን ደገመኖ ዊመ ሄኤ

6 ቴሱ ቀርቾ መሰህ ኢሳን አመዕንቴንተገን እሰን ሜጡ እከን ሃዕዮ።

7 እሰን ጠጻ ኣቴንለክ እጃረንቴን ተማርቲንተ ሃሊን አመዕነቶንከክዕኔ ጠረኝቴን ሃዕዮ፤ ዊም ደፈፎ ገለት ሆንጠሀሽ።

8 መሰህ አሌን አሁዕን መን ርሲንለክ ከን ኣዱንያ አሌን እጃረሞ ሴራንለክ ተሰ ጣንሲን አዪሁ ኦገ መሰኖሀዕኔበእገ አገዕርዮ።

9 መገን ጉዕሙ ዊምመት ጅሰማን ለልት ሃኢኢሁ መሲሂንት።

10 ህትን አዕኑ ዊመ ሄኤ ደዕቴንታሁ ክልቀት ጉዕሞ አሊን ገሸለክ ሹምነት ጉዕሞ አሌን ሎረ ገሻንቹ እኮ መሰህ አዲኒት።

11 እሰን ሜጡ አህንከክዕኔ ጡርከመንቴንታኤ፤ ሁኩ ጡርከሙንኩ ጨበኘ ጅሰመ ከሞተ መሲሂን እኮሃ ጡርከሙ ቤሉ መን ኣገጋን እኮበእሃን።

12 ጠመቀንቴንተ ወክት መሲሂን ሜጡብ ሞገንቴን ጠመቀሚንከክዕኔ መሰህን ሬሆች ኪኢንታኤ፤ ሁኩንን መሰህ ሬሆች ኪሾ መገን ዋልቃን አመዕንቴንተቤቹሃት።

13 አዕኑ ጨብ አኢንከክዕኔለክ ጨብክዕኔ ጅሰመ ጡርከሙ ሆገንተክዕኔ ሬቴንታእረ እቅ፤ ቴሱ እኮገሬ መገኑ ጨብክዕኔ ጉዕሙንከ «ፈቁን» ይ መሲሂን ሜጡብ ሃኢነንተገ አዕዮሀዕኔ።

14 እሰ ህከ ከሰሰኔለከ ግብኔ ሃዕዮ ኤዴ ቤሱኔ ለልሶተ ከተባሞ ሕገ ሽንሹእ፤ ህካንን መሲህ ኢሰ መሰቀል አሌን ሰቀል ኒ አልች ከሞ።

15 ህትን ምልቃመተለከ ዳኛኑተ መሰቀል ምልቃን ቄል በነቻን ዘህሰን መኑ ጉዕሙንኩ ለአናሰገ አዕዮሰ።

16 ቴሱ አቸተኔሃ እኮ እቃ፣ አግተኔሃ እኮ እቃ፣ በዓል በራተኔሃ እኮ እቃ፣ አገኑ አገና በርተኔሃ እኮ እቃ፣ አበ በራተኔሃ እዩሁ አሌንከክዕኔ ፈረዱንከ።

17 ሁኩን ጉዕሙንኩ አሚቶተ ዮ ጠዌሃ ሀላሃን፤ እኩገሬ ሀንቁሰ ደገመናሁ መሲሂንት።

18 ክዘቢን ገው ሆፍሲንለከ መላይካተ ሰገዲን ድከአና መቱ መንቹሁ ሞግቤሉ ፊሰናህኔበአገ አገርዕዬ፤ ህትኔ መንቹ ለአና መናማን ጌሲች አበ ገውሰ ቦነን ጨብሰ ሰውቲን ተሳን ቦነና።

19 ቡዕላ እኮ መሲህን ህትናሞ መንቹን መቱርቹህ ደቀንሹ ዮሰበአ፤ ጅሰሙ ጉዕሙንኩ ንገንለከ በንቹን ሜጡብ እከ መገኑ ነሰና ሃሊን ነጽቶተ አቸተ ደአታኢሁ ቡዕል አዲኒት።

ክዘብ ትምርቲች አገር።

20 መሲህን ሜጡብ ሬቲን ከን አዲንያ አል ሞጊች ሹልቲን አደ እኩነታች ቴሱ አዲንያ አልች አደ አህበ መንገ ሚሃት ህትኔ ትዛዝሃ ጠገንቲነንታት።

21 ትዛዘንኩ አፎት፣ ቀመሶትለከ አልቶት የኖሃን።

22 ከ ጉዕመንከ ጠው ጠውአኢሁ ጥቀሞ አቶች ኤተሮን በአና ጠውጋት፤ እሰን መኑ ፋሺሃ ትምርትሃለከ ትዛዝሃ ጠለዕላ።

23 ኩ ትዛዘንኩ ገግሰ ሰሰሻች ሰገደን፣ ገው ሆፍሲንለከ ገይ ጅሰመ ሚዕሪን ህካን አኦተ አጸሚንከሰ ሀይመት ዮሰሃ ኦኑደና፤ ጠው እኩገሬ ሁኩን ጅሰሞ ሂላ ጠው አገርሃ መቱርቹሃ ደግለላናበአ።

3

መሲሂን ሃዕር ሂኤ ደአተኔሃ

1 ቴሱ መሲሂን ሜጡብ ሬሆች ኬኤንተቤቹሃ አሌ ሰማን መሲህ መገን መኬ አዲን አፋዕል ዮቤቾን ዮ ጠው ሀሺ።

2 አሌ ሰማን ዮ ጠውተኔሃ ሰውይዬ ቤሉ አዲንያ አሌን ዮ ጠውተኔሃ ሰውይቶናቹ።

3 መሰንትሰ አዕኑ ሬቲንተቤቹሃ ህትን ሂኤክዕኔ መሲሂን መገን አዜን ማጠሞአ።

4 ሂኤክዕኔ እኮ መሲህ አሜተና በር አዕኑ አሲን ሜጡብ ኬዕምኚን ለልቲነተ።

ኑባቹለከ ሃዕር ሂኤ

5 ቴሱ ከን አዲንያ አሌች እኮ ማልክዕኔ ሃዕላቸተ ጉዕመንከ ሸዬ፤ ሁኩንን ዝነተ፣ አዝ ንጅሰመተ፣ ማል ሂላ ሃዕላቸተለከ ሸርኬተ ሰገዲ እኮ ሃዕላቸታን።

6 ከን ጠው መሳን አዘዘምበ መን አሌን መገን ኡሙዕርት አሚታኦ።

7 አዕኑ ገውክዕኔ ከኒች ብርተ ህከ ጠው አቲነን ሂኤነንተረ አቅ።

8 ቴሁ እኩገሬ ኡሙዕርተ፣ ንዳቱ፣ ሃልመተ፣ ቦርዕሪንሸ ክዕኔች ከሜ፤ አፌች ፋሉና ሙልሰና ጠውሁ አፌችክዕኔ ፋሉንከ።

9 መሰንትሰ ኑባጸ ማንቹ ሆጎንተሰ ፋሽቲን ኤጅቲንታች መት-መትሃክዕኔ ክዘብ ጠውኦናቹ።

10 ካልቅ ደነ አጉዲሃ ኤንኬዕኒን ሃዕር እኮ መንቹ ኦደዕዬ።

11 ህከን ግርክለከ አይሁድ በላን ህከረንገ ጡርከመሞለከ ጡርከመሞበ መን በላን ህከረንገ ኤንኬዕናሙለከ ገው በላን ህከረንገ ሰምልድቹ ህከረንገ ርሰች በላን አደደመት ዮበአ፤ ጠው እኩገሬ መሲህ ጉዕመ ጉዕሚኒት።

12 መገን መጠሪንቲነተ ጠለላኑተ ኢተንቲንታኦረ እኩንተቤቹሃ መረርሲጩ፣ ኅደበ ላፍመተ፣ ጡምመተ፣ ገው ሙግ አኤ፣ አታዕሉ ኦድናገ ኦደዕዬ።

13 መት-መትክዕኔ ጠው አታሌ፤ መቱክዕኔ መትክዕኔ አሌን ኅደበ አፊንተ ገዴት ዮህዕኔንገ ሬቁን የቀሚ፤ ቀርቹ «ፈቁን» ዬገን አዕኑሁ «ፈቁን» ዩ ሀሰሰናህዕኔ።

14 ከን ጠውቾን አበ ጉዕመንከ ጠው ጭምአዕይ አፈና ዊመ ሚጦመተ ደግሲሳ ኢተተ ኦደዕዬ።

15 መቱ ጅሰመ እኩን ገአንቲንታሁ ወገሬቲሃ እኮቤቹሃ መሲህ ወገሬቱ ቀልብክዕኔ ሀላዕሉን፤ ህትን ገለትጭቲንተረ አኬ።

16 መሲህ ላገት ኢዜንከክዕኔ ዊንት ሂኤን፤ መት-መቱክዕኔ ሀይማን መት-መቱክዕኔ ተማርሰዬ ህትን ሸጫቀሚ፤ መዝሙራን፣ ዝክሪን፣ ጉዕመ መዝሙራን መገኑ ቀልቢንከክዕኔ መዝሙራን ገለትጭዬ።

17 እነ መገኑ አሲን ገለትጭቲን ላጋን እኮ እቃ ሆጎን አቲነንተ ጠው ጉዕመንከ ቀርቾ ኢሰ ሱዕሚን አዕዬ።

2:16 ሮሜ 14፡1-6። 2:19 ኤፌ. 4፡16። 3:1 መዝ. 110፡1። 3:9 ኤፌ. 4፡22። 3:10 ክል. 1፡26፤ ኤፌ. 4፡24። 3:12 ኤፌ. 4፡2። 3:13 ኤፌ. 4፡32። 3:17 ኤፌ. 5፡19-20።

አመዕናኖ ገልቴ ሴረ

18 ምኒ አማኖ! ቀርቾ እሲሃ ሀሰሰኖሃ እኮቤቹሃ ምኒክዕኔ እኒሃ አዘዘሜ።

19 ምኒ አናከ! ምኒክዕኔ አማኑተ ኢትዬ፤ ጎደበ ጠረኝቶኖቼ።

20 ኦሱ! ኩን ቀርቼ ሙንዲሲሰኖ እኮቤቹሃ ጉዕመርቻንን እናካተክዕኔለክ አማኖተክዕኔ አዘዘሜ።

21 አናከትለክ አማኑት! ተብሳ ሙርታበእገ ኦሱክዕኔ አሙዕርት ገዝ ገዝ ይታገ አቶኖቼሰ።

22 ሮሶመ ሴራን ዮንተሩ! መን ሙንዲሲሃለክ ለሊሃ እሁዕን ጡመ ቀልቢን ቀርቼ ዋጅቴንን ኣዲንዩ አል ቀርቻኖተ ጉዕመርቻንን አዘዘሜ።

23 አቴነተርቼ ጉዕመንከ መኒሃ እሁዕን መገኒሃ አቴነተህንገ አቴን ዊመ ቀልቢንከክዕኔ አዕዬ።

24 መገን ቤቼች ሊቁገ እአቴነተር ርሰቱ ዮገ ደገኒንተ፤ ካደንቴነታንኩ ቀርቼ መሲሂት።

25 ሂለ አዕዮ መንቹ ሆጎሰ ወጥ ደአኖ፤ መገን እኔን ጎልትት ዮበእ።

4

1 ቀርቻኖ! ክዕኔሃ ሰማን ቀርቼ ዮህዕኔገ ደገኒንተቤቼሃ ካደንታህዕኔረ ጡምማንለክ ቅጡ አቴን ገሸዬሰ።

ሸዘነተ

2 ገለትጭቴንን ጉዕመንከ ወክት ጠረኝቴን ዲእ አዕዬ።

3 እን ኡሱረኘን እኮሚሁ መሲሃ ምሰጥር አዋጀተ መገኑ ላገሰ ኡሩተ ፈኖኔተ ኔሳሃ ዲእ አዕዬ።

4 ህትን ጠወኡ ሀሰሰኖኤገ ላገሰ መኒሃ ኣጋገ ጠወኡተ ዲእ አዕዬኤ።

5 አብሊ ዮ መኒን ሜጡብ ዮህዕኔ ደቀንሺን ሀይማን ሃዕዬ፤ ደገሞ ገንባቴን ጉዕማን ደግለሸቀሜ።

6 መት-መቶ መኒሃ ህት አቴን መሰለ ኣሱ ሀሰሰኖህዕኔገ ደንሩተ ጠወኡክዕኔ መጥኔገ ጤአኖሃለክ ጉዕመ ወክት ኣሰቶን ዊሞሃ እሁን።

መጨረሻ ወገሬትተኔሃ

7 አተሞ አመ ቤቱለክ አመዕነሞ ካደንቹ እን ሜጡብ ቀርቻ ሆጉተ እአኖ ቲቂቆሰ ኢ ጠወ ጉዕመንከ ኩለኖህዕኔ።

8 እሱሃ ክዕኔቤቼ ሶኮሚሁ ነኡ ሃዕናም ሀል ክዕኔሃ ኩሎተለክ ቀልብክዕኔ ጠረኝሶታት።

9 እሲንን ሜጡብ ክዕኔ ኣዲሃ እኮ አመዕነሞለክ ኢተሞ አመኔቤቱ አናሲሞሰ አሜተኖ፤ እሰ ከኔ እኮ ጠወ ጉዕመንከ ኩልታህዕኔ።

10 እን ሜጡብ ኡሱረሞ አርሰጥሮኩሰለክ ባርናባሴ ለንካመ ቤቱ ማርቆስ ወገሬቱ ዮህዕኔት፤ ማርቆስተኔንከ ቃገሾንክዕኔ ሶህኑት ኢልቶህዕኔ፤ ቴሱ ክዕኔቤቼ አሜቾ ወክት ቶጌሰ።

11 «ኢዮሰጦሴ» ዬን ገሌኖ ኢያሱ «ወገሬቱ» ዮህዕኔት፤ መገን ዎምነትተኔሃ እን ሜጡብ አታ መን በላን አይሁደ እኮአሩ ጠለዕል እሳት፤ ኤሳንከ ጠረኝሶኤ።

12 ክዕኔ ኣዲች እኮ መሲህ ኢሰ ካደንቹ ኤጳፍራ ወገሬቱ ዮህዕኔት፤ እሰን ሆሮ ጠረኝቴን ዊመ ዊሚን ረጀ ይቴን መገን ሀሰሻን ጉዕማን ጠረኝቴን ኡርቶኖተ ጉዕመ ወክት ክዕኔትኔሃ ዲእን አጳመኖት።

13 ለንኪሃ እሰ ክዕኔትኔሃ፣ ሎደቅለክ ሃራገሊሰ ከተማን ዮ መኒሃ ጠረኝ እአኖገ ገዉእ መሰከራም።

14 ኢተሞ ሀኪንቹ ሉቃሰለክ ህትን ዳማሲ «ወገሬቱ» ይታህዕኔት።

15 ሎደቃን ዮ አመኔ ኡሱተለክ ቴሁ ንምፋነለክ ምንክሴ ዮ * መገን አመዕናኖ ዲእ ምናተ «ወገሬቱ» ይዬ።

16 ተ ደብዳቤተ አዕኑ አነበቤንታች ኤተሮን ሎደቃን ዮ መገን አመዕናኖ ዲእ ምን በላን አነበበመኖገ አዕዬ፤ አዕኑ ሎደቂች ሶህንታህዕኔ ደብዳቤተ አነበቤ።

17 አርኪጳሴንከ «ቀርቹች ቶንንት ክድመተ መጨረሻሰ ኢለ ሹል» ይቴን ኩሊ።

18 ከ ወገሬት ገይኤ አገንገ ከተሰሚሁ እን ጳዉሎሴት፤ ኡሱር ሞኔን ዮምገ ሰውይዬ፤

መገን አሰቱት ክዕኔኤን እኩን።

3:18 ኤፌ. 5+22፤ 1 ጴጥ. 3+1። 3:19 ኤፌ. 5+25፤ 1 ጴጥ. 3+7። 3:20 ኤፌ. 6+1። 3:21 ኤፌ. 6+4። 3:22 ኤፌ. 6+5-8። 3:25 ዘዳ. 10+17፤ ኤፌ. 6+9። 4:1 ኤፌ. 6+9። 4:5 ኤፌ. 5+16። 4:7 ሶቀ. 20+4፤ 2 ጠዋ. 4+12። 4:8 ኤፌ. 6+21-22። 4:9 ፍልሞ. 10-12። 4:10 ሶቀ. 19+29፤ 27+2፤ ፍልሞ. 24፤ ሶቀ. 12+12፤ 25፤ 13+13፤ 15+37-39። 4:12 ቆላ. 1+7፤ ፍልሞ. 23። 4:14 2 ጠዋ. 4+10-11፤ ፍልሞ. 24። * 4:15 ንምፋነለክ ምንክሴ ዮተኔሃ- ዮሁ መት-መቶ ክታበት «ኒምፋሰለክ ምንክሴ ዮተኔሃ» ይታእ። 4:17 ፍልሞ. 2።

ጳውሎስ ተሰሎንቄ መረጃ ከተሰሎንቄ ስጦታ

ተሰሎንቄ መቄዶን ዬድ ርም ባዲሃ ሎረ ከተመ አቅ፤ ጳውሎስ ተሰሎንቄን መገን አመዕናድ ዲአ ምኒ ኡርቮሁ ፍልጽሰዩሰ ባዲ አገር ኦርዕዮች ኤተሮንት፤ እሁን ቤሉ አይሁድ ሃይማኖት ቶሳተ ሆንጠኮ መገኑ ደግቡ ኡመት ጳውሎስ ሆንጠህሰና አመዕናድ ሶህናን ተሽ ይቶአሃ አኮቤቺሃ አይሁድ መኑ ጠቅሰ ጳውሎስ አሉን ኬኦ አቅ፤ ህካን አኮቤቺሃ ጳውሎስ ተሰሎንቄተ አገር ቤርሃ ዬድቤቹ መርተ ገደ አኮሰ፤ ዲንክ ቆሮንቶስ ኢሊገን ሆንጠክ ሀዕለንሰ ሄዕዮ ጠምቲም ተሰሎንቄተ መር ፈንቀሎገን አመዕናድ በላን ኬዕዮርቹ ሂር ኩሎሰ።

ጳውሎስ ምኒሰ ሶህተ ተሰሎንቄ አመዕናድ ከተሰሁ አመዕናድተ ጠረኝሲሃት አቅ፤ አመዕነትሰለከ ኢተሰ ጡመ ዲዱዱ ሞጮጭ መገኑ ገለትጨዳ፤ ጳውሎስን በለሰ ደገሞ ወክት ሀትኔ ሄኡ ሄዕዮኅር ቃግሰኖሳት፤ ህከኒች በርግ መሰህ ኢሰ ፈንቀል አሜተኖ ዬድ ጠው አሉን ኬኦ ጠዕምቶተ መሰለ አሰኖ፤ ሀተን ጠዕምቶች መት-መቲሰ።

«መሰህ ኢሰ ፈንቀሎተ ብርተ ሬቶ አመዕናድተ መሰህ ኢሰ ፈንቀላንከሰ ደግሲሰና ዘላለም ሄላ ቤቀንታኦረ አካክንድ? መሰህ ኢሰ ፈንቀል አሜተኖሁ መ ወክትዱት?» ይታኦታን፤ ጳውሎስን ሀከን ሃሉን «መሰህ ኢሰ ፈንቀል አሜትሰ ትምርት ተብሴን አገርቲን ጨለ ይቲን ሆኑክዕኔ አዕዬ» ዩን ሸኾሰ።

መጻፍት አድሃ

- አኩሰ (1፥1)
- ጳውሎስ መንዲትተለከ ገለትጨዳ (1፥2—3፥13)
- አመዕነቲን ሀት ሄኡኖ ኅር ኩለመኖ ትምርት (4፥1-12)
- መሰህ ኢሰ ፈንቀል አሜቲሰ ኩለኖ ትምርት (4፥13—5፥11)
- ኅፍሜ ሸክነተ (5፥12-22)
- መጨረሻሰ (5፥23-28)

1 አነ መገንለከ ቀርቾሃ መሰህ ኢሰረ አኮሀኑኡተ ተሰሎንቄን ዮ መገን አመዕናድ ዲአ ምኒ መረጃ ጳውሎሴች፤ ሲላሴችለከ ጠምቶሴች ሶህንቶአተ ሶህኑ፤ አሰቲትለከ መገራቱ ክዕኔሃ አሁን።

ተሰሎንቄ አመዕናድ ሄኡለከ አመዕነቲሰ

- 2 ነኡ ዲአ አዕናም ወክት ጉዕመንከ ክዕኔተ ቃንገን ክዕኔተኔሃ መገኑ ገለትጭናም።
- 3 አናኔ መገን ብረን አመዕነቲን አቲንተ ሆኑተ ኢታን ጠረኝቲን አኡክዕኔለከ ቀርቾሃኔ መሰህ ኢሳን ዮሀዕኔ ተብሴክዕኔ ጠረኝመተ ጉዕመ ወክት ቃንገም።
- 4 መገኒን አተንቲንተ አመኦሶ! መገኑ ዶዕሪሀዕኔገ ደንገም።
- 5 ነኡ አንጂላ ክዕኔቤቹ ኤንሶሚሁ ጠለዕል ላገን አሁሰን ወልቃንለከ ጠሊላ አያን አንጂላ ሀንቅ አመዕነት፤ ሀትን ክዕኔን ሜጡብ ሄዕናም ወክት ክዕኔተ ሀዕልናተ ሀት አንክ ሄዕናም ኅር አዕኑ ገውንኩክዕኔ ደኒነንተ።
- 6 ልግሰ ኦርሸት አልቶሀዕኔ ኅሪሁ ጠሊላ አያኒን ደገንቶ ሙንዲኖን ላገሰ ቶንታኦኔ፤ ኔሳለከ ቀርቾ አኩዳንታኦ።
- 7 ህካን አኮቤቺሃ አዕኑ መቄዶናንለከ አካይ ባደን ዮ አመዕናድተ ጉዕሚንከ ጡመ ሞሳልተ አከንተሰ።
- 8 ቀርቾ ላገት ክዕኔች ፋልት ሞጮጨንቶአሁ መቄዶንለከ አካይ ባደን ጠለዕል አሁሰን መገናን ዮሀዕኔ አመዕነቲ ጉዕመ ቤቾን ሞጮጨሞቤቺሃ ከን ጠዋሃ ነኡ መቲርቾሃ ጠውኡ ሀሰሰኖኔበአ።
- 9 ክዕኔቤቹ አሜንቶም ወክት ጡመገ ቶንኒንተገለከ አዕኑ ሸርክክዕኔ ገኝአቲን ሀንቅለከ ሄላና መገኑ ካደሚሃ ሀት አከኒ ፈንቀልቲንተ ኅር አሰ ገውንኩሰ ኩልታኦ።
- 10 ሀትን መገኑ ሬሆች ኬሸሲሃ፤ አሜታ መገን ኡመዕራጅ ጡምሰኖሃ፤ ቤቱሰ ኢሰ ሰሚቶ አሜተኖገ ሀት አከን አገርቲንተ ኅሪ ኩልታኦ።

2

ጳውሎስ ተሰሎንቄን አዕዮ ሆኑተ

1 አመኦ ኦሶ! ነኡ ክዕኔቤቹ አሜቲኔ ተሰ አሁ ሆኑሰ አዕኑ ገወክዕኔ ደኒነንተ።

2 አዕኑ ደገነነተገን ከኒች ብርተ ፍልጽሱስ ከተማን የም ወክት ኦርሸትለክ ቦርዕሪንሹ ኢሌይገ አዕኑ ገውንኩክዕኔ ደገነነተ፤ ጠዉ እኮጎሬ አበ ሀንበዕለንሺን መገን እንጂል ላገተ ክዕኔሃ ጠወዕናተ መገኑኔ ጠረኝመተ አሳዮኔ።

3 ነኡ ክዕኔተ ሸንዘንክዕኔሁ ሉጨንሺን ህከረንገ ሃለ ያዳን ህከረንገ ጣንሰናሀዕኔተ ሀንሰበአ።

4 ጠዉ እኮጎሬ መገኑ እንጂል ኢገተ ኔሳሃ አመዕን ኣሴኔቤቺሃ ቀልብኔ አጥራመቻ ደገና መገኑ ሙንዲሲስ ቤሉ መነ ሙንዲሲንሶተ ጠወዕናምበአ።

5 መቼ ወክትሃ ክዘበን ናንዳን ህከረንገ ብር ጎራምመት ሃኣኔ ሆር አሜቱ ሆጉኔ አዕኑ ገወንኩክዕኔ ደገነነተ፤ መገኑ ምሰክርሃኔ።

6 ነኡ ክዕኔች እኩ ህከረንገ ዎሎ መኒች አይቻሁ ኪዕምኝ ሀንሰምበአ።

7 ነኡ መሲህ አሳበተ እነኩምገን ሀሰሰናሃ ክዕኔች ጠዕምናተ አታልናም እቅ፤ ጠዉ እኮጎሬ አመት አለሴ አገርታህንገን ክዕኔ በላን ጎደበ ላፍማን ሃዕናም።

8 ህትን አበ ኢትናንክዕኔቤቺሃ መገን እንጂል ክዕኔኤሃ ኩሉ ጠለለ እሁዕነ ነብሳኔ ሀገንሰ ኣሰናተ ተቃጠንሶም እቅ፤ አዕኑ ኔሳሃ ቤዕንሻመተኔ።

9 አመኤ ኦሶ! ሆኑይለክ ሆንግኔ ደገነነተ፤ ክዕኔሃ መገን እንጂል ጠወዕናንክዕኔ ወክት ክዕኔተ ኦርንሶህዕኔበአተ ሀንከዕርተለክ በራሃ አዕናም።

10 ክዕኔ አመዕና ስላን ሃዕናም ወክት ነኡ ሀትኔ ጠሊልማን፣ ፈያነተለክ ቀነጤናቸቹ የቦአረ እነክ ሃኣሃኔ አዕኑለክ መገኑ ምሰክርሃን።

11 አኑ አላተሰ አእናህንገን ነኡሁ ክዕኔሃ መት-መቲሃክዕኔ እኡኔ ደገነነተ።

12 ጉዕመ ወክት ሸንዘንለክ ጠረኝንሰን ጃነትሰለክ ኪዕምኝሰ ቤቀንቶናተ ገኤሀዕኔ መገኑ ተሸ የኖ ሃላን ሃኦናተ ኤገተ ይናንክዕኔገ ደገነነተ።

13 ኒች መገን ላገተ ጥጭጭቲንተ ወክት መን ላገገ እሁዕነ መገን ላገገ አቲን ቶገነተቤቺሃ መገኑ ጉዕመ ወክት ገለትጭናም፤ ሁኩ ላገንት ሀንቅንከ መገንተ ላገ እቅ፤ እሲን አመዕንቲንተ ክዕኔ አዜን ቲሁ አታአት።

14 አመኤ ኦሶ! አዕኑሁ መሲህ ኢሰ አዲን መገኑ አመዕኔ መን ጭምት ይሁድ ባደን የአረ አኑዳነነተረ እኩንታኦ፤ መሰንትሰ አሰ አይሁድ መኒች ኦርሸተ ቶጎገን አዕኑሁ ገይክዕኔ አድ መኒች ኦርሸተ ቶገንታኦ።

15 አይሁድ መኑ ቀርቹ አሰለክ ነብያከተ ሸቶአራን፤ ኔሳህ ሸርቶአራን፤ ህትን አሰ መገኑ ሻዘሳአረለክ መነ ጉዕመንከ ግቦአረ።

16 ህትን አይሁድ እህቡ መኑ ጡምቶተ መገን ላገተ ኩልናምበአገ ከንታኔ፤ ከኒን ጨቤ ጨብ አሉን በርግተን መርታአረ እኮቤቺሃ ኤተር ገዳን መገን ኡሙዕርት አሰ አሉን አሜቶኦ።

ጳውሎስ ተሰሎንቄ መነ ለንኪሃ ለኦተ ሃዕዮሰ ሃዕላቸተ

17 አመኤ ኦሶ! ሰውቲን እሁዕነ ማለን አደ እንክ አልተ አሉን ለአቀሙዕነ ቀዉ ጌሰ አገርናምቤቺሃ ለዕናህኔተ አበ ሃዕላንቶም።

18 ክዕኔቤቹ አሜንቶተ አበ ሀንሳም እቅ፤ አበንከ እን ጳውሎስ ክዕኔቤቹ አሜቶተ ልግብ ወክት ሀሾም እቅ፤ ጠዉ እኮጎሬ ሺይጣኑ ከሞኔ።

19 ቲሱ ተብሶኔለክ ሙንዲኑኔ ህከረንገ ቀርቹኔ ኢሰ አሜቻ ወክት ብሬሰ ቦናም ድሉኔ አይት? አዕናትበእንደ?

20 ኤ ሀንቅያን፤ ኪዕምኙኔለክ ሙንዲኑኔ አዕናት።

3

1 ከኒች ኤተርን አታዕሉ ሀንሳምቤቺሃ ነኡ ጠለዕል አቲን ከተማን ፈቀ ጡመ አጉጅ ለሌኔ።

2 ኒንን ሜጡብ መሲህ ኢሰ ተሸት ላገተ ኩላኖ መገን ካዲንቹ አመኔቤቱ ጥማቶሰ ክዕኔተ ጠረኝሶህዕኔተለክ አመዕነቶንክክዕኔ ጠረኝቶናተ ሸዘሀዕኔተ ሶንኩም።

3 ሁኩንን ኢልቶሀዕኔ ኦርሻን ጠረኝቲን ኡርቲንተገ አሰናሀዕኔ፤ መሰንትሰ ት ኦሪሸት ኔሳሃ መገኒች እኩሃ እሁስ አዕኑ ገወንኩክዕኔ ደገነነተ።

4 ክዕኔን ሜጡብ ሃዕናም ወክት ኦሪሸት ኢልታገሪ ሃጭን ኩልናንክዕኔገን ቲሁ ሁኩ ኦሪሸት ኢልቶኔ፤ ሀካንን አዕኑ ደገንታኦ።

5 ህካን እኮቤቺሃ አታዕሉ ሀንሳምቤቺሃ አይደገ ሻይጣንቹ ፊተነንክዕኔ ቆንዶዲኔ ተሰ በዕናንዶ ይ ዋጅ አመዕነቲክዕኔ ደጎተ ጥማቶሴ ክዕኔቤቹ ሶኩም።

6 ጠዉ እኮጎሬ ቲሱ ጥማቶሰ ክዕኔቤቹ ፈንቀል አመዕነትክዕኔተሃለክ ኢተክዕኔተሃ ነኡ ክዕኔተ ለዕናተ ሃዕላንቶምገን አዕኑሁ ኔሳሃ ለኦናተ ሃዕላቲንተገለክ ጡመ ጠወ ሰውይቲንተገ ክዕኔተኔሃ ተሸ የኖ ዲዲቡ ኩሎኔ።

2:2 ሶቀ. 16፣19-24፤ 17፣1-9። 2:14 ሶቀ. 17፣5። 2:15 ሶቀ. 9፣23፣29፤ 13፣45፤ 14፣2፤ 5፤ 19፤ 17፣5፤ 13፤ 18፣12። 3:1 ሶቀ. 17፣15። 3:6 ሶቀ. 18፣5።

- 7 እመኤ ኦሶ! አበ ኦርሸለክ ሸረም ኣዚን ሃዕናምጎሬሁ አመዕነትክዕኔ መሳን ክዕኔን ጠረኝናም።
- 8 መሰንትሰ አዕኑ ቀርኞ ኢሳን ጠረኝቲን ኡሩክዕኔ ኔሳሃ ጡመ ሃኢን ሃዕናምገ አአና።
- 9 ክዕኔ መሳን መገን ብሬን መንደዕናም መንደኖሃ መገኑ ሃንክ ገለትጭናም።
- 10 ክዕኔተ ለዕናህዕኔተለክ አመዕነትንክክዕኔ ሆፊዕኖሃ ዊንሸኖተ ሀንከዕርተለክ በራሃ ጠረኝንሰ ዱኢ አዕናም።
- 11 እነኔ እኮ መገኑኔለክ ቀርኹኔ ኢሰ ክዕኔቢቹ አሜንቶተ ዎቃኔ ብዘ ኢአን።
- 12 ነኡ ክዕኔተ ኢትቶናምገን ገገውክዕኔ ኮህዕኔ ኢተትለክ ሞሎ መኒሃ ኮህዕኔ ኢታን ቀርኹ በትሶህዕኔ ነሶህዕኔ።
- 13 ቀርኹኔ ኢሰ ጠሊላኖን ጉዕሚን ሜጡብ አሜተኖ ወክት መገንኔለክ እነኔ ብሬን ኩሉኖርኹ ኮበኢሃለክ ጠሊላኑተ እኩን ደገንቶኖተ ቀልብክዕኔ ጠረኝሱን።

4

መገኑ መንደሲሰኖ ሃኢ

- 1 መጨረሻን እመኤ ኦሶ! መገኑ መንደሲሰሊህ ሀት እኩን ሃኡ ሀሰሰኖህዕኔነሬ ኒች ተማርቲንታኢ፤ ቴሁ ሀትን ሃኤነንታት፤ ቀርኞ ኢሰ ሱዕሚን ኡጭናንክዕኔሁለክ ሸንዛንክዕኔሁ ከኒች ብርተ አቴንተሀኒች በትሱን አቶናታት።
- 2 ቀርኞ ኢሰ ሱዕሚን ሀትኔ ትዛዝ ኢሰናንክዕኔገ ደገኒንተ።
- 3 መገኑ ሀሰኖሁ አዕኑ ጠሊላኑተ እኮናታትለክ ዝናች ቄዕርቶናታት።
- 4 ክዕኔች ጉዕመንኩ ጎኑ ምንሰ አማን ጠሊልማንለክ ኬዕምኝን ሃኤ ደጉን።
- 5 መገኑ ደግቦ ኡመትገ ማል ሃዕላቶች ጠቀቲንከህዕኔ።
- 6 ከን ጠዋን እዪሁ አመሰ ቤት አሊን ሃላ ጠወ እኢንከ ህከረንገ ጣንሱንከ፤ ከኒች ብርተ ጠረኝንሰ ኩልኖንክዕኔገለክ ሸንዛንክዕኔገን ሀት አታ መነ ቀርኹ ቀጠአናሰ።
- 7 መሰንትሰ መገኑ ገኤኔሁ ጠሊልማን ሃዕናታት ቤሉ ንጅሰ እኮ ጠወ አዕኔን ሃዕናታበኢ።
- 8 ህካን እኮቤቹሃ ከ ሸዘነተ ግበኖሁ አዪሁ መነ አሁዕነ ጠሊላ አያን እሴኔ መገኑ ግበኖሃን።
- 9 ገገዉክዕኔ አተቀንቶናተ አዕኑ ገውክዕኔ መገኒች ተማርቲንታኢቹሃ አመዕና ኢተተኔሃ አዪሁ ክዕኔኤሃ ከተሶህዕኔተ ሀሰሰኖበኢ።
- 10 መቄደን ባደን ሃኢ አመዕናኑተ ሀንቅንከ ኢትቲንታት፤ እኮጎሬ አመኤ ኦሶ! ቴሱ ሸዛንክዕኔሁ ዎሶኔች በትሱን ኢትቶናታት።
- 11 ከኒች ብርተ ኩልኖንክዕኔሁ አደቢን ሃኡናታቲ፣ ገይክዕኔ ጠወ አገርቶናታትለክ አንጋንተክዕኔ አቴን ገልቶናታት።
- 12 ሀት አቴንተጎሬ አመዕንቡ መኑ ኬዕምሰኖህዕኔረለክ ቡዕለክዕኔ አታልቲን ገልቲንተረ እኩነንተ።

ቀርኹ ፈንቀል አሜተኖሃ አሁሰ

- 13 እመኤ ኦሶ! ተብሶሁ ኮበኢ መንገ ሻዜነንተበኢገ ሀሳም፤ መሰንትሰ ሬኖ መንተኔሃ ሀንቅሰ ደሳኖተ ሀንሳም።
- 14 ኢሰ ሬኖገለክ ሬሆች ኬዕኖገ አመዕንናም፤ ህካን እኮቤቹሃ ኢሳን አመዕንት ሬቶ መነ መገኑ ኢሲን ሜጡብ ኤበኖሰገ አመዕንናም።
- 15 ቀርኹች ቶንጎም ላጋን ኩልኖንክዕኔ ቀርኹ አሜቶተ ኢላ ፎሊን ሃዕናም ነኡ ሬቶ መነ ሃጭናምበኢ።
- 16 ቀርኹ ገዉንኩሰ ትዛዝ ሎረ ላጋን፣ መላይከ ሀለቅ ላጋንለክ መገኑ ጡሩምብ ላጋን ሰሜች አሜተኖ፤ መሰህ አመዕንት ሬቶአሩ ሃጭት ሬሆች ኬኢአ።
- 17 ህከኒች ኤተሮን ነኡ ፎሊን ሃዕናምሩ አሳንን ሜጡብ ጎመ አሊን ጭምይን ቀርኞ ኢሲን ቡብር አሊን ደቀሞተ ኬዕናም፤ ሀትን ጉዕመንከ ወክት ቀርኹን ሜጡብ ሃዕናም።
- 18 ህካን እኮቤቹሃ ገገዉክዕኔ ህከን ላጋን ጠረኝጨቀሜ።

5

ቀርኹ ፈንቀል አሜተኖቤቹሃ ጠረኝቲን አገሬ

- 1 እመኤ ኦሶ! ኩ ጠወ እሆኖ ዘማንለክ ወክትተኔሃ መቲርኹሁ ከተበሞተ ሀሰሰኖበኢ።
- 2 መሰንትሰ ቀርኹ በሩ አሜተኖሁ ሞጋንቹ ሀንከዕርተ ድንገቲን አሜተኖህንገ አሜተኖሃ አሁሰ አዕኑ ገዉንኩክዕኔ አሞራመቲን ደገኒንተ።
- 3 መኑ «ጉዕመርኹንኩ ወገሬትሃለክ አደጉ ኮበኢ» ይተንን ኒጠናት ላፈ ሜንቱ አፋህንገን ህከ ወክት በኡ ድንገቲን አሜች አፈናሰ፤ ፋሽእኒከ አታልታበኢ።
- 4 አኮጎሬ አመኤ ኦሶ! በሩሰ ሞጋንቶን እክ ድንገቲን ኢላኖህዕኔበኢገ አዕኑ ቱንሰቸንበኢ።
- 5 ጉዕመንኩክዕኔ ኑርለክ በሬተ ኦሶ፤ ነኡ ሀንከዕሬ ህከረንገ ቱንሰቸንበኢ።

6 ህዳን እኮቤቹሃ ነኡ በቅይን ገጫ አገዕሪን ሄዕና ቤሉ ዎሎ መንገ ግንሱንከ።

7 ግሳእሩ ሀንከዕሪን ግሳእ፤ ሰከርታእሩ ሀንከዕርተ ሰከርታእ።

8 ነኡ እኮጎሪ ኑር ኦሱተ እንኮምቤቹሃ እመዕነቱለከ ኢተተ ወዘናን ኦደኤኖ ብረት ኦድኖገ ኦደዕን ጠም ተብሳ ቡዕላን ዎዕሪኖ ቆሚገ ዎዕርን ገኡ አገዕሪን ሄዕና።

9 መገኑ ገኤኔሁ ኡሙዕሪ እሁዕናን ቀርቹሃን መሲህ ኢሰ አዲን ጡሙ ደእናታት።

10 ፎሊን ሄዕኖም ጎሪ ሪኖምጎሪ እሰን ሚጡብ ሄዕኖተ መሲህ ኒተኔሃ ሬኖ።

11 ህዳን እኮቤቹሃ ወዕና አቲነጎተገን መት-መቱክዕኔ ጠረኝጨቀንቴን ገገጫክዕኔ ሀዕላቀሚ።

ጎፍሚ ሸዘነተለከ ወገሬት

12 እመኦሶ! ክዕኔ በላን ቀርቹን እክ ሆጎን ቆንዶድታሪ ሀለቀክዕኔለከ ሸዘህዕኔሪ ከበጅቶኖተ ኡጭናንክዕኔ።

13 ሆጎሰተኔ ከበጅኖሰ፥ ኢትዬሰ፤ ህትን ገገዊንከክዕኔ ወገሬቲን ሄዕዬ።

14 እመኤ ኦሶ፥ «ሆጉተ ኢትትበረ ሻቄ፤ ዘፋራኑተ መለልታገ እዕዬ፤ ላፋኑተ ሀዕልዬ፤ መነ ጉዕመንከ እታዕልዬ» ይን ሸንዛንክዕኔ።

15 እዪሁ ሂለ እዕዮሀኒሃ ሂለ እዕይ ፈንቀሸበገ አገዕሩን፤ ህከን ወጥ ጉዕመ ወክትንከ መት-መቲሃክዕኔ ጡመ ጠወ አቶኖተ ጠረኝዬ፤ ህትን ጉዕመንከ መኒሃ ጡመ እዕዬ።

16 ጉዕመ ወክትንከ ሙጎደዕዬ።

17 ኡርሱኑዕናን ዱእ እዕዬ።

18 ጉዕመ ጠዋንን መገኑ ገለትጭዬ፤ መሰንትሰ መሲህ ኢሰ አዲን ኖህዕኔ ሄኢን መገኑ ክዕኔኝ ሀሰኖሁ ካኒት።

19 ጠሊሊ እያን ገረተ ጠእሶኖቹ።

20 ራገ ህንቆኖቹ።

21 ጠወ እኮጎሪ ጉዕመ ጠወ ፌተንቴን ደጌን ጡመ ጠወሰ አፌ።

22 ሂለ ጠዋኝ ጉዕሚኝን ሆኝ።

23 ወገሬት መገኑ ጉዕመ ጠዋንን ጠሊሊ እኡክዕኔ፤ እያኑክዕኔ፥ ፎሉክዕኔለከ ጀሰሙክዕኔ ቀርቹኔ መሲህ ኢሰ ፈንቀል አሚተኖ በሬተ ቀነጤኖርቹ ኖበኢሃ አገረም ሄኡን።

24 ገኤኔሁ እመዕነሞሃ እኮቤቹሃ ካን አእኖ።

25 እመኤ ኦሶ! ኔሳሃ ዱእ እዕዬ።

26 እመዕናኑተ ጉዕመንከ እመዕናኖተ አጉደኖ ተሸ የኖ ሃሊን ዝያዕሪሚ።

27 ኩ ሶህት እመዕናኖተ ጉዕሚንከ እነበበንቶተ ቀርኝ ሱዕሚን ኤገተ ያንክዕኔ።

28 ቀርቹሃን መሲህ ኢሰ ኣሰቱት ክዕኔን ሚጡብ እኩን።

ጳውሎስ ተሰሎንቄ መረጃ ከተሰሎንቄ ኣጉስ

መሲህ ፈንቀል አሜቲስ አሊን ኬኦ ጠዕምቲት ብተተ ኬስን መርቤቺሃ ተሰሎንቄ አመዕናኖ በላን ኬኦ ኦርቮት ባስን መርቶኤ፤ ጳውሎስ ተሰሎንቄ መረጃ ከተሰሎንቄ ለምቅ ሶህነት «ቀርቼ ፈንቀል አሜተና በሩ ሆንጠኮኤ» የኖ ጠዋን ሰመቻሃ እቅ፤ ጳውሎስ መሲህ ፈንቀል አሜቲስ ሄጭ «ሾከ መንቼ» ዬኖ መሲህ ግበናሁ አዎንሰን ኣዲንያ አሊን ሂሎሊክ ሾኩ ጠዉ በተአን መረና የን እስ አመዕነቱ መክሶተ ዋብ የና።

ሶቀማንቹስ አነበባእሩ ኦርቮት በተኦ ጎሬሁ አመዕነቶንከሰ ጠረኝቶተ እሰለክ ዋሎ ሆንተ ሀዕልታሰሩ አታ ደንን ሄኢሀሰ ደግለለኖርቹ ደአቶተ ጠረኝት አቶተ ህትን ጡመ ሆንተ አቶተ ጠረኝሽ ሸዘናሰ።

መጻፍሰ አፍሃ

ኣጉስ (1፡1-2)

መሲህ ፈንቀል አሜቶንከሰ አህኖ ፍርደ (1፡3-12)

መሲህ ፈንቀል አሜቲስ ኩለኖ ትምርት (2፡1-17)

አመዕነቲን ሀት ሄኤኖ ጎር ኩልታ ሸዘነተ (3፡1-15)

መጨረሻስ (3፡16-18)

1 ጳውሎስ፣ ሰላሰ፣ ጥማቶስ እናኔ መገንለክ ቀርቾሃ መሲህ ኢሰረ እኮ ተሰሎንቄ ከተማን የንተ መገን አመዕናኖ ዲአ ምናተ ሶንኮምተ ሶህነ።

2 እና መገንኢትለክ ቀርቾሃ መሲህ ኢሲኝ ኣስቲትለክ ወገሬቱ ክዕኔሃ አህነ።

መሲህ አሜቶን አህኖ ፍርደ

3 አመኤ ኦሶ! አመዕነቱክዕኔ ዋዕኔኝ በትሽ ነጸን አሜቶቤቺሃ መት-መቱክዕኔ አተቀንቲነንተ አተት በርግተን መርታቤቺሃ መገኑ ገለትጩ፤ ሀሰሰኖቤቺሃ ክዕኔ መሳን መገኑ ጉዕመ ወክትንከ ገለትጭናም።

4 ኢልቶህዕኔ ኦርቮተለክ ሸረሙ አታዕሊን አመዕነቲንከክዕኔ ጠረኝቲን ኡርቲንተቤቺሃ ክዕኔተኔሃ መገን አመዕናኖ ጭምት ዲአ ምናን ጉዕማን ጠወኤሃ ሙልናምበኤ።

5 ኩ ጉዕሙንኩ ጠዉ ለሊሰናሁ መገን ፍርዱ ሀንቅ አሁሰለክ አዕኑ ኦርቮተ ቶገንተሲሁ መገን ጁነትኦኔሃ አበቀአኖህዕኔሃ እኮቤቺሃት።

6 መገኑ ሀንቅ ፍርደ ፈረደኖቤቺሃ ኦሪሸተ ኤባህዕኔህኤ አሊን ፈንቀሽ ኦሪሸተ ኤበና።

7 ቀርቼ ኢሰ ሎረ ወልቀት የሰ መላይካን ሜጡብ ሰሜኝ ገረ ለበናን አሜተና ወክት ቴሱ ኦሪሸተ ቶገንተ ክዕኔሃ ኒንን ሜጡብ ፎሎጩ አሰናህዕኔ።

8 መገኑ ደግበረለክ ቀርቾሃኔ ኢሰ ተሸት ላጋተ አዘዘንትበረ ገረ ለበናን ቀጠአኖሰ።

9 እስ ቀርኝ ብሬኝለክ ኬዕምኝሰ ዋልቃኝ አደ እካን ዘላለሚሃ ቤሲን ቀጠአኖሰ።

10 እሰ ህከ ወክት ኬዕምኝንከሰ ፈንቀላኖ ወክት ኬዕምኝላክ ገለት ጉዕማንከ ጠለላኖ ኤመቲኝለክ አመዕነቶህኤኝ ጉዕሚኝ ቶገና፣ አዕኑሁ እሰን ሜጡብ እኬነንተ፤ መሰንትሰ ምስክርነቲኔ አመዕነቲን ቶገነታኤ።

11 ካን ሰሙ ይነን ክዕኔተኔሃ ሙርኑዕነ ዲአ አዕናሚሁ መገኑኔ ገኤኔህሃ በቀዕናምረ አኦህዕኔተ ጡመ እኤሃ የህዕኔ ሀሰሸተለክ አመዕነት ሆንክዕኔ ጉዕመንከ ወልቃንተሰ እኦህዕኔታት።

12 ህትን ቀርኝኔ ኢሰ ሱዕሙ ክዕኔን ከበጀሞተለክ አዕኑሁ መገንኔለክ ቀርቾሃኔ መሲህ ኢሰ አሰቶን እሶን ከበጀንቶተ ዲአ አዕናም።

2

ሾከ መን

1 አመኤ ኦሶ ቀርቾሃኔ መሲህ ኢሰ አሜትተኔሃለክ ነኤሁ እሰን ሜጡብ አንክ ጭምደናምቤቺሃ ዲአ አዕናሚሁ ህካኒት።

2 ራጊን ህከረንገ ላጋን ጠወአምሀንገ ህከረንገ ኒኝ ሶህነተ እክ ከተበምሀንገ አቲን «ቀርኝ በሩ አሜቶኤ» ዪን ደዕልቲን ቀልብክዕኔ ሆርጥቶኖቼ፤ ጨነቀንቶኖቼ።

3 እዪሁ ሀከን አዲን ሉሲሱንከህዕኔ፤ መሰንትሰ ሄጭ ለግት አሜቲዕነ አዛብ ገረት በቀኣ፤ እሰን ኤተር ለገኣንቹ አሜቶተ ኢላ ህከረንገ ሾኩ መንቹ እሰን በኦተ የኢሁ ለሎተ ኢላ ሁኩ በሩ አሜተናበኤ።

- 4 ሁኩ ሾኩ መንቸ ሸርክተ ዬን ሰገዳናሰሀኑኤች ጉዕሚች አሌን ገውሰ ሎረ አኦና፤ ህትን «አን መገኘትን» የንን መገን ጠሊሊ ሞኔን ፈቁዕን አፋዕሎተ መለለና።
- 5 ክዕኔን ሚጠብ ሃዕዮሞ ወክት ከ ጠወ ኩሎንክዕኔን ሰውይቲንተበእንደ።
- 6 እሰን ወክተሰ ኢልያን ለለናሃ አሊ ቴሱ ለሊ ከመኖሪሁ መሃንር አዕኔ ደገነንተ።
- 7 መሰንትሰ ሂሊ ሆጉተ ማጥ አጋኢት፤ ሁኩንን ቴሱ ከሚሃ ዮ ሂሊ ሞሰጥር ዋልቀት ቴሱ ሆን አሊኒት፤ ሁኩንን እሀናሁ ዋቄች ሸቆተ አሊት።
- 8 ሀከኒች ኤተርን ሁኩ ሂሊ መንቸ ለለና፤ እሱንከ ቀርቼ ኢሰ አፊችሰ ፋለና ፎገሊንለከ አሚትሰ ከዕምኚን ሸና።
- 9 ሁኩ ሂሊ መንቸ አሚተናሁ ሻይጣን ዋልቃን ሉሲሰና አጀብሲሰና ጠወለከ መላተ ገረሞሲጩኖርቹ ጉዕመንከ እኢኒት።
- 10 ህትን በእ መን ጣንሰጋኢሁ እኩሰ ሂሊርቹ አኢኒት፤ ሁኩ ሙኑ በእኢሁ ጡምቶተ አበቀአናሰ ሀንቅ አተተ ቶጉ ግባቤቹሃት።
- 11 ህካን እኩቤቹሃ ክዝቢን አመዕንቶተ መገኑ ሎረ ሉሲሳ ወልቀተ ሶሀናሰ።
- 12 ሁኩንን እሀናሁ ሀንቁን አመዕኑ ግብ ጩብ አሌን ሙንደእሀኑኤ አሌን ፈረደምታት።

ጡሚሃ ደዕሬሰ መን

- 13 ቀርቹን አተንቲንተ አመኤ ኦሶ! እኩገሬ ነኤ ክዕኔ መሳን መገኑ ጉዕመ ወክት ገለት አሱ ሀሰሰና፤ ገለት አሰናሚሁ ክዕኔተ ጠሊሊ አያኒን ጠሊልቲንተቤቹሃ ሀንቅ አመዕናንክክዕኔ ጡምቶናተ መገኑ ሃጭ ደዕረሀዕኔቤቹሃት።
- 14 ነኤ ኩልናንክዕኔ ተሸት ላገ አዲን ቀርቹሃኔ መሲህ ኢሰ ከዕምኖ ደእቶናተ መገኑ ገኤሀዕኔሁ ከኒሃት።
- 15 አመኤ ኦሶ! ህካን እኩቤቹሃ ቴሱ ጠረኝቲን ኡርዬ፤ አፊችኔ ፋልቶ ላጋን ህከረንገ ሶሀናን ተማርሰናንክዕኔ ሀንቅ ትምርት ሀሰናቹ።
- 16 ቀርቹኔ መሲህ ኢሰ ገውሰለከ መገኑ እኑኔ አቴኔሁ አሰቶንከሰ ዘላለሚሃ እካ ጠረኝመተለከ ጡመ ተብሳሃ አሲኔ
- 17 ጡመ እኩ ጠወ ጉዕመንከ አቶናተለከ ጠወኦናተ ቀልብክዕኔ ሰበርሶህዕኔ፤ ጡመ ጠወ ጉዕመንከ አቶናተለከ ጠወኦናተ ጠረኝሶህዕኔ።

3

ዱእ እኤ ጉዕመርቹንከ ጡመ አሁሰ

- 1 አመኤ ኦሶ! ክዕኔቤቹን እኩሀንገን ቀርቹ ላገት ደዕልት አልባዕልቶተለከ ከዕምኚን ቶገመደ እቶተ ኒተኔሃ ዱእ አዕዬ።
- 2 ህትን መናን ጉዕማንን አመዕነቱ ሂእበቤቹሃ ሾከለከ ሂሊ መኒች ጡምቶተ ዱእ አዕዬ።
- 3 ጠወ እኩገሬ ጠረኝሰናህዕኔለከ ሸይጣኒች አገረናህዕኔ ቀርቹ አመዕነሞእሃን።
- 4 አዘንዛንክዕኔ ጠወ ቴሁ እኩ ከ ኤተሩ አቴንተገ ቀርቹን አመዕናንክዕኔ።
- 5 ቀርቹ ቀልብክዕኔ መገን አተተ ደጎናተለከ መሲህ አጋሶላ ደጎናተ አዎንሱንክዕኔ።

ሆጉተ እኤ ሀሰሰናሃ አሁሰ

- 6 አመኤ ኦሶ! ኒች ተማርቲንተ ትምርቲን አሁዕን ሆጉተ ኢትበ አመዕናንቹች አይቹሁ አደ እኩናተ ቀርቹሃ መሲህ ኢሰ ሱዕሚን አዘንዛንክዕኔ።
- 7 ነኤ ክዕኔቤቹን ሃዕናሞ ወክት ዋንክዕላመተ አሁ ሆጉኔ እዕኑሁ ደገነንተቤቹሃ ኔሳሃ አጉዳን ሃኤ ሀሰሰናህዕኔን ደገነንተ።
- 8 አይ አሊኒ እጅንተ እንካምበእገ ሀንከዕርተለከ በራሃ አጸመን ሆጉተ እዕኑን ሃዕናሞ ቤሉ አይቹ ጣብተ ጠለዕላ አንቶምበእ።
- 9 ሁኩንን እዕኑ ኒ ሞሳልተ አዎንቶናተ ይኒት ቤሉ ሁኩንን ኔሳሃ ሀዕለንሸ ደእናተ መብትት ሃኤዕናኔ ፈንቅትበእ።
- 10 መሰንትሰ ነኤ ክዕኔቤቹን ዮም ወክት «ሆጉተ አሲሃ ኢትቡ መንቸ እቲንከ» ይን ከ ትዛዝ አሰናንክዕኔ እቅ።
- 11 መሰንትሰ መት.መቱ ሆጉተ አሲሃ ኢትቡ ሙኑ በላንከክዕኔ ሃኤሰ ሞጮጭናሞ፤ እሰን ኣግሰበሰ ጠዋን ኣገን መቱርቹሃ አቲዕን ሃኤአራን።
- 12 ህትኔ መን ረጀይት ሆጉተ አተን ገይሰ እቸተ እቶተ ቀርቹሃኔ መሲህ ኢሰ ሱዕሚን አዘንዛንክዕኔ ሸንዛንሰ።
- 13 አመኤ ኦሶ! አዕኑ እኩገሬ ጡመ ሆጉተ አቶናተ «ቆንደድናሞ» ይቶናቹ።

14 ተን ዳብዳቤን ክዕኔኤሃ ኩልኖም ሸዘነተ ሞጮጮቡ መጎቹ ሄዕዮ ጎሬ ህትናሙ መጎቹ አጥራመቱን ደጌ፤ እሰን ሙሎተ እሰን ደቀንቶኖቹ።

15 ጠው እኮጎሬ አመቤትገ ኡሙዕርዬሰ ቤሉ ዲንገ አቴን ለኦኖቹሰ።

መጨረሻ ወገራት

16 ወገራት ቀርቹ ገውንኩሰ ጉዕመ ወክት ጉዕመ ጠዋንን ወገራት ኣሱንክዕኔ፤ ቀርቹ ጉዕሚንከክዕኔ ሚጡብ እሁን።

17 ከ ወገራት ገይኤ እንገን ከተቦንክዕኔሁ ኣኔት ጳዉሎሴት፤ እን ሶኮም ዳብዳቤን ጉዕማንን ደገንታ መላት ተኒት፤ ከተባሚንኩ ህትጎታን።

18 ቀርቹሃኔ መሲህ ኢሰ ኣሰቱት ክዕኔን ጉዕሚንከክዕኔ ሚጡብ እኩን።

ጳውሎስ ጥሞትዎሴሃ ከተሶ ሶህኑተ ኣጉስ

ጠሞትዎሴ ዩኖ አመዕናቹ ዎደልቹ ከለቀንሹስ ቀውሃ እስይ ባዲኛ እህን አመስ ኣዲን ኣይሁድቹለከ እንስ ኣዲን ግርክቹሃ እቅ፤ ጳውሎሴ ሆጎ ጃላለክ እንጃል ሆጎ ሶህኖን ሀዕለኖሲሃ እቅ፤ ጳውሎስ ጠሞትዎሴ ከተሶ ዎኔ ሶህኑተ ሰሶ ቡዕል እኮ ጠዋን እኮእሃን።

ጉዕሚኛን ሄጭ ሶህኑስ አመዕናኖ ኣዜን ኬዕኖ ክዝብ ትምህርተ ኣገዕርታገ ኣእኖ እቅ፤ ክዝብ ትምህርቱ ደሩስ ኣይሁዲሃለከ ደሩስንገ ዎሎ መን ጠወ ኣደሃ እህን «ኩ ኣዲንያ ኣሉ ጨቢን በዕደሃ እኮቤቹሃ ጡሙ ደገሞተ ኣታለኖ እደ እኮ ሞሰጥር ኤንኬዕሪን መት-መቲ እቻቹለከ ቦላቹኛ ኣገዕርጎት» ኖኖ ጠዋን ኤርኖእሃን እቅ። ቲህንገ ሶህኑስ ዲኣ ምኒ ገሹሃ፣ መገኑ ኤጨኖ ሴር ትምርተሃ፣ ህትን ዲኣ ምኒ ኣዎንሳኑትለክ ሀዕልታሰሩ ሄኑስተ ሀሰሰኖ ጠወ ኣደእሃን። መጨረሻን ጠሞትዎሴ መሲህ ኢስ ጡመ ካድንቹ ህት ኣክ እሆተ ኣታለኖ ጎር ኣደደ ኣመዕናኖ ኣዜን ሆጎ ወጥሃ ጳውሎስ ኣሴ ሸዘነተ ደንጋም።

መጻፉስ ኣደሃ

ኣጉስ (1፣1-2)

ዲኣ ምንተኔሃለከ ክድመተኔሃ ኣሰሞ ትምርት (1፣3—3፣16)

ጠሞትዎሴ ክድመተኔሃ ኣሰሞስ ትምህርተ (4፣1—6፣21)

1 ፈሳንቹኔ እኮ መገንለከ ተበሳሃ እኮ መሲህ ኢስ ትዛዘን መሲህ ኢስ ኣሳቤቹ እኮም ጳውሎሴኛ።

2 አመዕነቲን ህንቅ ቤቱእ እኮ ጠሞትዎሴ ሶሃንቶእተ ሶህኑ፤

ኣኖኔ መገኒቹለከ ቀርቹሃ፣ መሲህ ኢሲኛ ኣሰቱቲ፣ ማርቱትለከ ወገሬቱሁ ኪን እሆን።

ክዝብ ትምርቲኛ ኣገዕርተኔሃ

3 ኣን መቄደን ባዲ መርም ወክት መቱ-መቱ መኑ ክዝብ ትምህርት ተማርሲታበእገ፤

4 ማቀተለከ ዎሌኤን ጎፍብ ኣለንሽ ዎሊንሽበ ፈንቀልታበእገ ኣዘዘን ኤፌሶን ከተማን ኣፋዕልቶተ ኣገተክ ያንኬ፤ ህትናሙ ጠወንኩ ኦደተ ኤበኖ ቤሉ መገን አመዕነቲን ነጻኖተ ደግለለኖኔበእ።

5 ከን ትዛዘኛ መሰስ ጠለሊ ቀልብቹ፣ ጡመ ሰውቲቹለከ ህንቅ አመዕነቲኛ ደገንታእተ ኢተ።

6 መት-መቱ መኑንኩ ህትናሞ ጠዋኛ እደ እክ ደግለለቶበእ ኦደበ ፈንቀልቶኡ።

7 እስን ሕገ ርስሳእኔ እኮተ ሀሰን ኖኖሰርቹ ደጋበእ፤ ህከረንገ «ደጊን ጠወዕናሚት» ይተን ጠወኣእንክ ኣጥራመታበእ።

8 መኑ ሕገ ጡመ ኣሁስ ደግለሸቀሞ ጎሬ ጡመ ኣሁስ ደንጋም።

9 ህትን ሕጉ ኣሰሞሁ ሕገ ድጅታህኡተለከ ኣዘዘንትበ መኒሃ፣ መገኑ ኖሰበእህኡተለከ ጨበኛኖተ፣ ጠለልመት ኖሰበእህኡተለከ አመዕነት ጠወ ግባህኡተ፣ ኣኖኖተለከ ኣማኖተ፣ ሸታህኡታትለከ ነቢሳሃ ቤሳህኡተ

10 ዝነተ ኣታህኡተለከ ለቦሆ ለቤን ዝነተ ኣታህኡተ፣ መን ነገዳህኡተለከ ክዘባህኡተ፣ ክዘቢን ጤሌዕሊታህኡተለከ ህንቅ ትምህርቲን ህንበዕለመኖ ጠወ ጉዕመንክ ኣታህኡታት፤ ጡመ ሴሪን ኦደንታ መኒሃት ቤሉ ጡመ መኒሃበእ።

11 ኩንን ህንቅ ትምህርቱ ደገመኖሁ ገለትጨሞ መገን ኣዲኛ ዱዱብሰኖ ከበጀሞ እንጃሊቲ፣ ኩ እንጃሉ ኤሳሃ ኤገተ ኣሰሞኤሃን።

ጳውሎስ መገኑ ገለትጨስ

12 ኤሳሃ ሆሃሃሃ ካዲንቹ መጠር አመዕነሞሚሃ ኣዕይ ዎለዕኖኤሁለከ ዎልቀተ ኣሴኤ ቀርቹኔ መሲህ ኢስ ገለትጫም።

13 ኣንን ከኒኛ ብርተ ሸራሚሃ፣ መሲህ ኢስ ቦርሮሚሃለከ ሆፍሸሚሃ እኮምጎሬሁ ህካን ጉዕመንክ ኣዕኖሚሁ ደጉ ሆጊንለከ አመዕኑ ሆጊን እኮቤቹሃ ማርቱተ ደኤም።

14 ህትን መሲህ ኢስን ደገመኖ አመዕነቲንለከ ኢታን ሜጡብ ቀርቹኔ ኣሰቱት በተእ ኣሰንቶኤ።

15 «ጨበኛኑት ፊሶተ መሰስ ኢስ ከ ኣዲንያ ኣል ኣሚኛ» ይታ ላገተ ህንቅያለከ መኑ ጉዕመንኩ ኣኡ ሀሰሰኖሃን፤ ኣንን ጨበኛኖኛ ጉዕሚኛን ዎዕኔሰሃን።

16 ጠወ እኮጎሬ መገኒኛ ማርቱተ ደኤም፤ ማርቱተ ደኤሚሁ መሲህ ኢስ ዳንጉ ኖበኣሃ ኣታዕሉስ ጉዕሚኛን ባሾሞ ጨበኛ እኮም ኢ ኣሌን ለሊሽ ኣሲን አመዕነታህኡተ ዘላለሚሃ ሄኡ ደኣታህኡተ ሞሳልተ እሆታት።

17 ህካን እኮቤቹሃ ዘላለሚሃ ዎመ እክ ሬህናበእለክ ለለኖበእ ማጣሃ መገኒሃ ሎርመትለክ ከበጁ ዘላለሚሃ እሁንሰ፤ እሚዕን!

18 እ. ቤቶ ጠዋቲዎሴ! ዎዕናንከ ኪትኔሃ ኩለሞ ሬግገን ጡመ ኦለንሸ ኦለንቶተ።

19 እመዕነቲሁ ጡመ ቀለቡሁ ሄኑሂተ ከትዛዝ ኢገተ ኣሳንኬት፤ መሰንትሰ መት-መቱ መኑ መርከበ ሸረኖሁ ዮበእ ጎሬ በእኖህገንን ቀልብ ሆጊን እመዕነቲሰ ቤሶኡ።

20 እሰ በላንን ሄሚኖሰለክ እስክንድር ደገንታእ፤ እሰን መገን አሌን ቦርር ላገተ ጠወኢቻ ተማርቶተ ሹይጣኒሃ እን ህግሽ ኣሰኖንሰረ።

2

መገን ምኔን ዱእ አአተኔሃለክ ሴርተኔሃ

1 መኑ ጉዕመ-ንኩ መገን እደ ኡጭቱተ፤ ዱእሃ፡ ዎሎ መኒሃ ዱእ አኡለክ ገለትጨሁ መኑ ጉዕመ-ንኩ አኦተ ሸዛሞ።

2 መገኑ ዎጀን ጡመ ሃሊን አዎነን ወገሬቲንለክ ጨለዪን ሄዕኖተ በትሸን ዎማተለክ እበ ሆጎ አሌን ዮሁኑኦተ ዱእ አዕዬ።

3 ሁኩንን ሬሳንቹሃኔ መገን ብሬን ጡማለክ ተሸ የኖሃ ጠው።

4 መገን ሃሸኣቱት መኑ ጉዕመ-ንኩ ጡሞተለክ ህንቅ ደጋጋት።

5 መገኑ ማጥቹሃን፤ ህትን መገንለክ መን በላን እኮ መቱ መንቹ ዮኡ፤ እሰን መንቹ እኮ መሰህ አሳት።

6 እሰን መን ጉዕመንከ ዎዙተ ገወሰ ዎዝኑተ አዕይ ኣሴእ፤ ሁኩንን መገኑ መን ጡምሶተ ሀሸገ ሀሰሰኖ ወክቲን ሀሴማእሃ ምሰክር።

7 እን አይሁደ እህበ መኒሃ እመዕነቲለክ ህንቅ ተማርሶተ ዱዱብሳንቹለክ አሳቤቹ እክ ሾመሞም፤ ህካን ያም ወክት ህንቅ ጠወአሚት ቤሉ ክዝቦምበእ።

8 ቱሱ ጎኑ ቤቾን ጉዕማንን ኡሙዕርተለክ ብተት ዮበእሃ ጠሊሊተ አንገተ አሌ ኬሰ ዱእ አቶተ ሀሳም።

9 ህትን ማንቱ ሙምሰ ደደን ህከረገን ወርቁን፡ ናሲን ህከረገን ጤኦተ እኮ ኦድኑተ ሹልምሰን አሁሶን ማሌን ጡምማን ሀሰሰኖጊን ጡመተ ኦድኑተ ኦደኡን፤

10 መገኒሃ ሰገንዳሚት ይታ ማንቱ እኡ ሀሰሰኖሰገ ጡመ ሆጉተ አቱን።

11 ህትን መንቹት ጉዕመ ጠዋን አዘዘሚን ሎድቲ ተማርቱን።

12 ህትን መንቹት ጨለ ይቱን ቤሉ ተማርሰቶተ ህትን ጎን አሌን ሹመ እኩን ያምበእ።

13 መሰንትሰ ሄጭ ከለቀሞሁ ኣደማት፤ ህከኒቶ ኤተሮን ሐዎ ከለቀንቶኡ።

14 ህትን ጣንሰንት መገን ሕገ ድጅቶኢት ሐዎት ቤሉ ኣደም ጣንሰሞበእ።

15 ጠው እኮጎሬ መንቹት እመዕነቲኒ፤ ኢታኒ፡ ጠሊልማንለክ ገው አገዕርን ሄኑ ጎሬ አለተ አሌን ጡምታእ።

3

እመዕናና አዎንሳኖተኔሃ

1 «እዪሁ እመዕናና አዎንሳንቹ እሆተ ሀሽ ጎር ሎረ ሆጉተ ሃሸአኖት» ይታ ላገት ህንቅሃን።

2 እመዕናና አዎንሳንቹንኩ ኩሎኖሰ ጠወ ዮሰበእሃ፡ መቱ መንቹተ ምኒ እን እኮሃ፡ ጌሲን ሄኣኖሃ፡ ገወሰ አገዕረኖሃ፡ ኬዕምኻሰ አገዕረኖሃ፡ ኮሀ ቶገኖሃ፡ ተማርሲሃ አታለኖሃ።

3 ሰከሪባሃ፡ ኡሙዕሪባሃ፡ ጎደበ ላፈ፡ ብተምባሃ፡ ብረ ኢትባሃ፡

4 ገይሰ ምኒ አበርሱ ጡመገ ገሾተ አታለኖሃ፡ አለሰ አዘዘንታሲሃ፡ ጉዕመንከ አዲን ኬዕምሳሲሃ አሁ ሀሰሰኖሰ።

5 መሰንትሰ መቱ መንቹ ምንሰ ገሾተ አታልባቾ መገኑ እመዕኔ መን ገሾተ ህት አታለኖ?

6 ህትን አልቢሰ አሌን ፈረደምገን ቦኻያን አሌሰ ፈረደመኖበእገ ሃዕር እመዕኔ መንቹ አዎንሳንቹ አሁንከ።

7 ህትን ሆፍኚንለክ ሻይጣን ዎሻድን ኣገኖበእገ እመዕንበ መንቤቾን ገለትጨሞኢሃ እሁ ሀሰሰኖሰ።

ድያቆናከተኔሃ

8 ህትን ድያቆናከተ * ኬዕምኙ ሀሰሰኖሰረ፡ ለሙ ጠወኣበእረ፡ ዎይን ጠጂን ሰከርታበእረ፡ ብሪሃ ጎሬ-ይትበረ እሁ ሀሰሰኖሰ።

9 ህትን እመዕነቲን ለሌ ህንቅ ነጠ ቀልቢን ጠረኻሰ አፋ ሀሰሰኖሰ።

2:7 2 ጠዋ. 1+11። 2:9 1 ጰጥ. 3+3። 2:13 ክል. 2+7፤ 21+22። 2:14 ክል. 3+1-6። 3:7 ቲቶ 1+6-9።
* 3:8 ድያቆናከ ሆጉት- እመዕናተ አዎንሰታ ባልቀተ ሀዕልታእረን።

10 እስንተ ሄጩን ፊተኔን ለኡ ሀሰሰኛ፤ ህከኒች ኤተሮን ኩሌኖስ ጠወ ዮበአራ ኦኮኢች ዲያቆን እኩተ አታልታእ።

11 ህትን ምንስ አማኑት ኬዕምሴኖሰረ፤ ሄዕምታበአረ፤ ገወሰ አገዕርታአረለክ ጉዕመርቸንን አመዕንፋአራ እህ ሀሰሰኖስ።

12 ህትን ዲያቆንት መቼ መንቸ ምኒ እነ እኩረ፤ ኦሱሰለክ አበሮሱስ ጡመገ ገሽታአረ እህ ሀሰሰኖስ።

13 መሰንትሰ ዲያቆንት ጡመገ ሆጉተ አታአሩ ገይሀሰ አበ ኬዕምኛ ደአታእ፤ ህትን መሲህ ኢሲን ዮሰ አመዕነትቴ ልግብ መለሉ ደአታእ።

ማጠጥ ሎረ ምስጥርተኔህ

14-15 ፎሊን ሄአኖ ዲአ ምኒ በላን መቼ መንቸ ህት እክ ሄኤ ሀሰሰኖስ ጎሬ ህት እክ ፈንቀላመኖ ጎር ደጋገ ከተሰንኬ፤ ሁኩ መገን ምኑንኩ ሀንቅ ቱቃለክ ቀበበ።

16 አመዕነትኔ ማጠጥ ጠወ ሸክሲሰበ ሎረሃን፤ እሰን

- መንቸ እክ ለልዮአሃ፤
- ሀንቅ እሁስ ጠሊሊ አያኒን አዋጀሞአሃ፤
- መላይካተ ለልዮአሃ፤
- መኒሃ ጉዕሚንከ ዲዲብሰሞአሃ፤
- ከን ኣዲንያ አል መኑ አመዕንዮሰሃ፤
- ኬዕምኚን ሰማሃ ኦርዕዮአሃ።

4

ክዘብ አሰተማረተ

1 ጠሊሉ እያኑ ለሊሽ «ኤተር ዘማኔን መት-መቱ መኑ ሉሲሰኖ ሂለ አያነለክ ሩሃንይ ትምርት አዎንተን አመዕነቲች አደ እክ ቄዕርታእ» ዮኖ።

2 ሁኩ ትምርቱ አሜተኖህ አታኢህ ሀንቅ እሁሰለክ ሀንቅ እህ ሆጉስ ደገንን አመሰልታ ክዘበኛኖችት።

3 እሰን ኤበቀንሽ ከንታእ፤ አመዕንታለክ ሀንቅ ደጋ መኑ እሱ ገለትጭተን አታገ መገኑ ከለቆስ አቸተ «አቶኖቼ» ይት ከንታእ።

4 ጠወ እኩጎሬ መገን ክልቀቱ ጉዕሙንኩ ጡመ እኩቤቺሃ ገለትጩን ቶጌመጎሬ ኡጄኖህ መቱሁ ዮበእ።

5 መሰንትሰ ሁኩን መገን ላጋንለክ ዲአ አእን ጠሊሊ እሆኖ።

መሲህ ኢስ ጡመ ካድንቸ እህተኔህ

6 ከ ትምህርት አመዕኖኖተ ኣቶንትጎር አመዕነት ላገተለክ አዎንቶንት ጡመ ትምርተሃ እት ነጵቶንት ጡመ መሲህ ኢስ ካድንቸ አካንት።

7 ህካን ከን ኣዲንያ አሊች ደግለለበ ጠወቻለክ ዲንዮ አል ማቁተ አጉደኖ ጠወቻ ሀን፤ ገወክ መገን ጠወሃ ሮሰሰ።

8 መሰንትሰ ገወ ጠረኝሰኖ ጠወ ሮሰሱ ቀዉ ደግለለኖ፤ እኩጎሬ ገወ መገን ጠወ ሮሰሱ ከን ሄኢሃለክ አሜተኖ ሄኢሃ ተቢሱህ ዮሰቤቺሃ ጉዕመ ጠወንክ ደግለለኖ።

9 ህካን ዩ መኑ ጉዕሙንኩ ሹል ቶጉ ሀሰሰኖስ አመዕነሞሃ ጠወ።

10 ነኢን መነ ጉዕመንክ አደንክ አመዕንታህኡተ ጡምሰኖለክ ሄኢኖ መገናን ተቢሳሃ አዕናምቤቺሃ ሆሳን ሆንጋሚሁለክ አጸማሚሁ * ከ ጠወ ደኢሃት።

11 አት ከ ጠወ እዘዘለክ ተማርሰ።

12 ህትን ጠወኣንት ጠወን፤ ሃሊን፤ ኢታን፤ አመዕነቲንለክ ሙጨርማን አመዕናኖተ ምሳልተ እህ ቤሉ እጸሁ ኦሰመክ ህንቆንከ።

13 ህትን እን አሜቶተ አለሬተ ጠልል መጻፈ መኒሃ እነበቡ፤ ዲዲብሱለክ ተማርሱ ጠረኝ።

14 ህትን ባልቀት አሌንከክ አንገሰ አታን ራጉ ጠወአሞሄ ወክት ኣሰሞሄ ኪን ዮ ኣሰቱት ህንቆት።

15 ነጵክ መኑ ጉዕሙንኩ ደኅተ ወክትክ ጉዕመንክ ከን ጠወሃ እእ፤ ከ ጠወ ሆሳን አሌን ሆሲሰ ገወክ እሲሃ ኣሰ።

16 ገይሃክለክ ተማርሰታንት ትምርተክ አገዕር፤ ከ ጠወ አተን ጠረኝ፤ ህካን ኦቶንትጎር ገወክለክ ኪች ሞጮጨኖ መነሃ ጡምሳንት።

5

መኒሃ ኣሰንቶ ሸዘነተ

* 4:10 አጸማሚ- ዮኖህ መት-መቱ ከታበት ቦሮረማሚት ይታእ።

- 1 ባለቆ መንቹ እንከገ ሆንጠሀ ቤሉ ሻቆት፤ ህትን ዎደልቹ አመክ ኦሱተ ጠውሲሳንትገ ጠውሲሳ
- 2 ባለቆ ሚንቱ አማኖገ ሀርድ ሚንቱ አመክ ኦሶገ አት ዊመ ሙጨርማን ለእ።
- 3 ሀንቅንከ ምንሰ እኑ ሬዮ ሚንቱ ሀዕልተን ከበጅሰ።
- 4 ጠዉ እኩጎሬ ምንሰ እኑ ሬዮ መንቹ እለት ህከረንገ እለ እለት ዮሴጎር ሁኩ እለት ሃጭት ምንሰ መን ደግለሊጊ ኤዳሰ ፈንቀሸቱን፤ ህከን አመዕነቲን ሆጉተ ተማርቱን፤ መሰንትሰ ሁኩን መገኑ ሙንዲሲሰኖሃ ጠው።
- 5 ምንሴ እኑ ሬዮ ሀንቅ ህዩሸት ሚጠሃሴ ሄእ መንቹት መገኖን ተቢሳሃ አታቤቹሃ ሀንከዕርተለከ በራሃ መገኑ ጠዕሚንለከ ዱእ አተን ጠረኝት ሄኣእ።
- 6 ጠለዕል ከን ዱንያ አል መኩተ ሀሳ ምንሴ እኑ ሬዮ መንቹት ነቢሲን ሄኦ ጎሬ ሬቶአታን።
- 7 እሰን ቀነጤኖሰርቹ ዮበእረ እኩተ ከ ትምርተ ኣሰ።
- 8 ህካን እኩቤቹሃ እለሃሰ አደደንከ ምንሰ መኒሃ ሰውዮበእ መንቹ አዪሁ አመዕነቱሰ ካጀአሃን፤ ህትን ሁኩ መንቹ አመዕነቱበእ መንቹቹ ባሰ ሂላን።
- 9 ዎዕነሃ መቶ መንቹን ገልት አለንቶች ሌሃዉ ዘማን ዊምበሴ ምንሴ እኑ ሬዮ መንቹት ምንሰ እኑ ሬዮሁኑ። መዝገባን ከተበንቱንከ።
- 10 ህትን እለተ ነሲን፤ ኮሀ ቶገን፤ አመዕናኖ ሎከተ ኣንሸን፤ ኦርጨዎ መነ ሀዕለን፤ ጡመ ሆጉተ ጉዕመንተ አእን ጡመ ሆንከሲ ገለትጨንቶአት እሁ ሀሰሰኖሴ።
- 11 ጠዉ እኩጎሬ ምንሰ እኑ ሬዮ ሀርድ ሚንቱ ምንሰ እኑ ሬዮ ሚንት መዝገባን ከተቦት፤ መሰንትሰ እሰ ማል ሄዕላቶች ቁልትዮንሰ መሲህ ኢሳን ዮሰ ኢተት በእን ጎናን ገልቶተ ሀሳኢት።
- 12 ኩ ሚንቱ ዎዕነሃ ይቶ ላገተ ድጅቶቤቹሃ አሌንከሰ ፍርደ ኤባእ።
- 13 ህከኒቶን አበንከ ሆጉተ ገፈሩለከ ምኒቶ ምኒ ዘሁ ርሳእ፤ ህትን ሆጉተ ገፈሩ እሁዕናን ሃዕምታአረለከ መን ጠዋን ኣገን ጠወኡ ገበእበሳሃ ጠወኣራ እካእ።
- 14 ህካን እኩቤቹሃ እን ምንሰ እኑ ሬዮ ሀርድ ሚንቱ ገልቶተ፤ እለተ አልቶተ፤ ምንሰ ጡመገ ገሸቶተ ሸዛም፤ ህት እንን ዲኑኔ ቦርረኖ ጠወ ሆገኖ።
- 15 መሰንትሰ ከኒቶ ዎዕነሃ ምንሰ እኑ ሬዮ መት-መቱ ሚንቱ ሻይጣነ አምንተን አመዕነት ዎቄች ፉልቶእ።
- 16 መቱ አመዕናንቹ መንቹ ምንሰ እኑ ሬዮ ሚንቱ ሄኦጎር አመዕናኖ ማበሪሃ ኬዕመኖበእ እሴ ሀዕልቱንሰ፤ ከን ሃሊን አመዕናኖ ማበሩንኩ ሀዕለኖሳሁ ዮበእ ምንሰ እኑ ሬዮ ሚንቱሃ ሀዕለኖ።
- 17 አመዕናኖ ማበረ ጡመገ ገሸታ ባለቀት ዱዱ-ብሲንለከ ተማርሲን ጠረኝት አታሁኑተ ለሙ አፎሁ ኬዕምቹ ሀሰሰኖሴ።
- 18 መሰንትሰ ጠሊሉ መጻፉ «ውጠተ ዎቀርተን ቦር አፎ ኡሱርቶት» ህትን «ሆጉተ አእኖሀኒሃ ደዋዞ ሀሰሰኖሴ» የመሞእ።
- 19 ለሙ ህከረንገ ሰሱ መንቹ መሰከርትባች አመዕናኖ ማበር ባለቅ አሌን ሆንጠሀሴኖ ኦደተ ቶሳት።

- 20 ህትን ዎሉ መኑ ዎጅታገ ጨብ አታ መነ ጉዕመንከ መን ብሬን ኡሙዕር።
- 21 ህትን መነ አደ እኑ ዮበእሃ መቱ-መቲቶ በትሱዕናን ከ ኩሌመሄ ጠወ አገርቶተ መገን ብሬንለከ መሲህ ኢሰ ብሬን መጠረንቶ መላይከ ብሬን ኤገተክ ያንኩ።
- 22 ህትን እንገክ አዬ አሌኒ ደዕልት አቶት፤ ዎሎ መን ጨብ ቤቀንቶት፤ ገዉክ ሙጨሩ አት አገዕር።
- 23 ልገብ ወክት ጎደበከ ጥዘኖሄቤቹሃለከ ጥዘነት ዮሄቤቹሃ ቀዉንከ ወይን ጠጀ አገ ቤሉ ከ ኤተሩ ጠለዕል ዋሃ አጎት።
- 24 መት-መቶ መን ጨቡ እገንቹ እክ ለለኖ፤ ሁኩንን ፍርድበ ኢልሰኖ፤ ህትን ዎሎ መን ጨቡ ዱንክ ለለኖ።
- 25 ህትን ጡመት ሆጉት ኑሪ እክ ለልታእ፤ ኑሪ እክ ለልትበጎሬ ማጠንቶገ ሄኣበእ።

6

ሮሳተ ኣሰንቶ ሸዘነተ

- 1 መገን ሱዕሙለከ ትምርቱ ቦርረመኖበእ ሮሶመ ኣዜን ሄኦሩ ጉዕመንኩ ቀርቻኖተሰ ዊሙ ኬዕምቹ ሀሰሰኖሰገ ደጉን።
- 2 ህትን አመዕናኖ ቀርቻኑት ዮሰ ሮሰት ቀርቻ መሲህ ኢሲን አመኡሱተ እኩቤቹሃ ቀርቻኑሰ ኬዕምሰበረ እሁ ሀሰሰኖሰበእ፤ ህከን ወጢ ጡመ ሆንከሲ ሀዕልታአረ አመዕናኑተለከ ኢተንቶአረ እኩቤቹሃ ዎዕኔቶ አበ እኑ ሀሰሰኖሰ፤ ከ ጠወንከ ተማርሰተን ሸዘ።

ክዝብ ትምርተለከ ሀንቅ ቀባጠተነሃ

3 እዪሁ ቀርቼሃኔ መሲህ ኢሰ ላጋንላከ መገኑ አጉዲን ትምርታን ሀንበሰለመን ዎሉ ትምርተ ተማርሱጎሬ

4 ሁኩ መንቹ ቦኒን ቡሰሞሃ ቤሉ መቱርቹሃ ደግበሃን፤ ጠወ እኩጎሬ ወገሬቱ ዮበእ ሄዕላቸት አፎሰ፤ ሁኩንን ኤበኖሁ ምቀኝመተ፡ ብተተ፡ ቦርዕረንሸለከ ሂላ ሸክተ

5 ቀልቡሰ በዕዮላከ ሀንቀቾ ፋልቶ መን በላን እኩ ተንቅታበእ ኑደተ ኤበኖሃን፤ እሳንከ መገኑ አመዕኑ ዱንያተ ደኤኖ ዎቃሃ አጉጅሰረን።

6 ጠወ እኩጎሬ «ዮኤሁ አሀኖ»። ዮኖ መንቹሃ መገኑ አጉጅ ሂኤ ትርፈ ደግሲሰኖ፤ አመዕነቶን ሀንቅንከ ልግቡ ትርፋ ዮሰሃን።

7 መሰንትሰ ነኤ ከን ኣዲንያ አል አሚንቶሚሁ መቱርቹሃ አንፋዕናንት፤ ህትን ከን ኣዲንያ አሊቻ መቱርቹሃ አንፍ መርኖተ አታልኖምበእ።

8 ጠወ እኩጎሬ አንታሚሁለከ ኑደዕናሚሁ ሄዕዮኔቻ ሁኩን አሀኖ።

9 ህትን ቀባጣሙ አሀሃ ሀሳ መኑ ፊተናን፣ ዎሻደንላከ መኒ በኤ ኤበኖ ገውሰኖለከ ምዕረኖ ልግቤ ሄዕላቶን ኡባእ።

10 መሰንትሰ ብረ ኢቱ ልግቤ ሂልማተ ጉዕሚንከ ጠጸን፤ መት-መቱ መኑንኩ ብረ ደኤሃ አበ ሄዕላቶቤቹሃ አመዕነቲቻ ኡቦኤ፤ ልግቤ ሻዞን ቀልቡሰ ቢጠመኖገ አቶኤ።

ጳውሎስ ጥማቶሴሃ ኣሴ ሸዘንተለከ ትዛዝተኔሃ

11 ጠወ እኩጎሬ አት መገን መንቹ! ከን ጉዕማንከ ጠዋቻ ሁን፤ ፈይመተ፣ መገን ጠወሃ፣ አመዕነቱሃ፣ ኢተታ፣ አታዕሉለከ ጎደበ ላፍመተ አኤሃን።

12 ጡመ አመዕነት ኦለንሸ ኦለም፤ ዘማን ጉዕሚንከ ሂኤ እፍ፤ ህከ ዘላለም ጉዕሚንከ ሂኤሃ ገእንት ልግብያ ምስክር ብሬን ጡመ ምስክርነቱ መስከርቶንት።

13 ህትን ጉዕመርቹንከ ሂኤ ኣሰኖ መገንላከ ጸንጤናዌቻሃ ጽላጦሴ ብሬን ጡመ ምስክር መስከር መሲህ ኢሰ ብሬን

14 ቀርቹኔ መሲህ ኢሰ ፈንቀል አሜቶተ እለ ከ ትዛዝ ሉጨንሹለከ ህንቄኖሰ ጠወ ዮበእገ እከ አገርቶተ አዘዘንኬ።

15 መሲህ ኢሰ አሜቱ ማስአሞለከ ሜጥሃሰ ገሻንቹ እኩ ዎመ ዎሙለከ ቀርቻኖ ቀርቹ መገኑ ለልሾ በሬን አሀኖ።

16 ህትን ጠለዕሉ እሰ ሬሆናበእሃን፤ እዪሁ ሆንጠሆተ አታለኖበእ ኑሬን ሂኤሃን፤ እሱንከ እዪሁ ለዕይ ከሰበእ፤ ህትን እዪሁ ለእሰተ አታለኖበእ፤ አሲንከ ኬዕምኹለከ ዎልቀት ዘላለሚሃ እኩንሰ፤ ኣሚዕን!

17 ነኤ ሙንደዕኖተ ጉዕመንከ በትሽ ኣሰኖ መገን ቤሉ ከን ኣዲንያ አሌን ዮ ቀባጣመት ቦንታበእገ ህከረንገ አመንሰሾበእ ቀባጣን ተቢሳሃ አታበእገ አዘዘሰ።

18 ህትን ጡመተ ሆጉተ አቶተ፣ ጡመ ሆንን ቀባጣመተ እኩተ፣ መኒሃ ሀዕሊሃ ዮሳሃ ቤኮተ ተቃጠባገ አዘዘሰ።

19 ህትንን ሀንቅ ሂኤ ደኢቶተ ቀበቡሰ ጠረኘን እኩ ቀባጡተ አሜተኖ ዘማኒሃ ገይሃሰ ጭምአታእ።

20 ጥማቶሴ! ኣሰንቶሂ ኤገተ አገር፤ ህትን ገገይንከሰ ሀንበእላንሸን ኤንኬዕኒን አሁዕነ መኑ ክዘብን «ኤንኬዕነኑሃን»። ይት ገእታ ኤንኬዕኒቶለከ ደግለለኖበእ ኣዲንያ አል ጠዋቻ ሁን።

21 መት-መቱ መኑ «ህትኔ ኤንኬዕኑ ዮኔ»። ይተን አመዕነት ዎቃሃ ሉሶኤ፤ መገን ኣሰቲት ክዕኔን እኩን!

ጳውሎስ ጠዋትዎሴሃ ከተሶ ሶህኑተ ኣኑሰ

ጳውሎስ ጥምቶሴሃ ከተሶሁ ኩን ለንክተ ሶህኑ፤ ጳውሎሴሃ ሆጎሰ ጆላ እኩ ዎደልቺሃ ጠዋትሶ ሸዚመሰ ሸዘነተ ኣፎእሃን፤ ጠረኛሽ ሸኾሶሁ ኣታዕሊን ሄኑታት፤ ጠዋትሶ ሸዘነለክ ጠረኛሳ ሳገተ ደኤኢሁ መሲህ ኢሰተኔሃ ኣመዕነሽን ዱዱብሶተ፤ ተሸት ሳገተለክ ኑባቾ ወኣድ ትምህተ ጠረኛሽ ኣፎተለክ ኦርሸት በተኦሰጎሬ ተማርሶንለክ እንጅላ ዱዱብሶና ሆጎንተሰ ኣጸምታት እቅ።

ጠዋትሶ በተሸ ኣሰርተ ኣሰምሲሁ ገዊማን ኣእና ጠለዕላን ኦደሚቶ ቁዕርታት እቅ፤ ህት ኣኩ ጠወ ሞጮጭቶኣሃ ቤስ ቤሉ ዎሉ ደግለለኖርቼ ዮሰባኣ።

ከን ጉዕማንን ጠዋትዮሰ ሰዉ ዩ ሀሰሰናሲሁ ጳውሎሴ ሄኡለክ ሄእሰ ኣለማተ በትሽ ኣመዕነቱሰ፤ ኣድብሰ፤ ኣተሰ፤ ጠረኛመሰለክ ቶቶሚን ለልቶሰ ኦርሸተ ሞሳሊን ኣምኖታት።

መጻፍሰ ኣፎሃ

ኣኑሰ (1፡1-2)

ጠዋትሶ ኣሰንቶ ሸዘነተ (1፡3—2፡13)

ኣመዕነሚን ሄኡ (2፡14—4፡5)

ወክትሰ ሄዕዮ ሃለትለክ ሀሲሰኖ መመረ (4፡6-18)

መጨረሻሰ (4፡19-22)

1 መሲህ ኢሰን ደገሞ ሄኣ ተብሴ መሳን መገን ሰውቲን መሲህ ኢሰሃ ኣሳቤቼ እኩም ጳውሎሴቶ ሰሃምኣሃን፤

2 ጠረኛሽ ኢታም ቤተሃኤ ጠዋትሶሃ ሶሃማእተ ሶህኑ፤ ኣኔ መገን ኣዲቶ ቀርቼሃን መሲህ ኢሲቶ ኣሰቱት፤ ማርቱትለክ ወገሬቱሁ ኬሳሃ እሁን።

3 ጥምቶሴ ኣሰንቶ ሸዘነተ

4 ጉዕመ ወክት ሀንከዕርተለክ በራሃ ኬሳሃ ዱኢን ሰዉ ያም ወክት ኣናኑኤ ኣቶገን ኣን ነጠ ቀልቢን ካደማም መገኑኤ ገለትጫም።

5 ህትን ኢንጅጅክ ሰውዮን ኬሳሃ ለዕይ ኣበ ሙንደኦተ ሃሸኣም።

6 ህትን ከን ዮ ሀንቅ ኣመዕነቱ ሰውያሚት፤ ሁኩ ኣመዕነቱንኩ ሄጮ ኣበመክ ሎይድኒለክ ኣመክ ኤዉንቁኒ ዮሃ እቅ፤ ከን ሁኩ ኣመዕነቱ ዮገ ደጎም።

7 ህካን እኩቤቺሃ እንገኣ ኣሉክ ኣዕዮም ወክት ኪ ኣዜን ዮ ኣሰምሄ መገን ኣሰቱተ ቱሁ ኬሰንሰቶተ ቃግሳንኪት።

8 መሰንትሰ መገኑ ወልቀተ፤ ኢቱለክ ገዉ ኣገዕር ኣያን ቤሉ ዎጃኖ ኣያን ኣሰዮኔበኣ።

9 ቱሱ ቀርቶሃን ዱዱብሶ ሙልቶት፤ ኣሰተኔሃ ኡሱረሞም ኢን ሙልቶት፤ ጠወ ኣኩጎሬ መገኑ ኣሰኖ ወልቃን እንጅልተኔሃ ኢን ሚጡባ ኦርሸተ ቶግ።

10 ህትን ነኡ ኣዕናም ጡመ ሆጎገ እሁዕነ ገይሰ ሃሸኣቶንለክ ኣሰቶ ጠሊልማን ገኣ ፌሾኔ፤ ጠሊልማንተ ገኤኔ፤ ከ ኣሰቱንተ ዘመኒቶ ብርተ መሲህ ኢሰ መሳን ኣሴኔ።

11 ሁኩ ኣሰቱንት ፊሳንቹኔ መሲህ ኢሲ ኣሚቲንከሰ ቱሱ ለሊኣ፤ ኣሰን ራሁተ ቤሸ ኣንጅል ሳገ ኡዲን ራሁ ዮበኣሃ ዘላለማሃ ጉዕሚንከ ሄዕናም ሄኡ ለሊሾኔ።

12 ኣን ህከን እንጅል ሳገ ዱዱብሳንቹ፤ ኣሳቤቹለክ ኣሰተማርቼ ኣክ ሾመምም።

13 ከ ኦርሸተ ቶግሚሁ ከኒሃት፤ ጠወ ኣኩጎሬ ኣዩ ኣመዕኔም ጎሬ ደጋምቤቺሃ ሙላምበኣ፤ ህትን ኣን ኣሲሃ ኣሲም ኤገተ ሁኩ በሩ ኢሎተ ኢላ ኣገሩ ኣታለኖገ ኣመዕናም።

14 ኣት መሲህ ኢሳን ዮ ኣመዕነቲንለክ ኢታን ኢቶ ሞጮጭቶንት ኣመዕነቶ ሳገተ ሞሳልተ ኣት ኣገር።

15 ህትን ኒ በላን ዮ ጠሊላ ኣያኒን ኣሰንቶሄ ኤገተ ኣገር።

16 ኣሰይ ባዶን ዮ ኣመዕናኑት ጉዕሙንኩ ግብ መርቶኤገ ኣት ደጋንት፤ ኣሰ በላን ፊጌሎሰለክ ሄርሞጌኔሰ ደገንታኣ።

17 ኡሱረሚንከኤ ሙሉዕናን ኦናሰፎሮሰ ልግብ ወክት ፎሎሲሾኤቤቺሃ ቀርቼ ኢሰ ኦናሰፎሮሰ ኣበርሲ ኣሙዙንሰ።

18 ህትን ርም ከተመ ኣሚቶም ወክት ኣበ ሀሽ ኢን ደቀም።

19 ህካን እኩቤቺሃ ቀርቼ ኢሰ ህከ በር መገኒቶ ማርቱተ ደኣኖገ ኣኡንሰ፤ ህትን ኤፌሶን ከተማን ዮም ወክት ሄንከ ሀዕሌኤ ጎር ኣት ጡመግ ኣት ደጋንት።

2

መሲህ ኢሳን አመዕነሚን ኦርሸተ ቶጉ

1 ኢ ቤቶ! እት መሲህ ኢሳን ዮ ኣሰቶን ጠረኝ።

2 ህትን ልግቤ ምስክር ብሬን ኢኛ ሞጭጭቶንቲሃ ምሉ መነ ተማርሰቶተ ኣታልታ አመዕነሞ መኒሃ ኤገተ ኣሰ።

3 እት ገወክ መሲህ ኢሲሃ ጠረኝ ምታደረ እክ ኦርሸተ ቶግ።

4 ህትን በገዝ እነ መንገደአሲሶተ ሀሾ ወታደሩ አዪሁ ወታደር ሆጉተ እኮበእ ሆንን ሆሰኖበእ።

5 ህትን ደጉደን ሃጫቀሞተ ሀሾ መኑ ሴርሰ ሃሌን ሃጫቀሞሰንር ቄል ሸልማት ደኣኖበእ።

6 ጠረኝ አቡረኖ ገበረቼ ወጣኛ ወዕኔሰ ላልቹ ደኡ ሀሰሰኖሰ።

7 ቀርቹ ኢሰ ጉዕመንከ ጠዋን ደጉ ኣሰኖሃቤቹሃ እን ያንኬ ጠወ ሰውይ።

8 ሬሆኛ ኬዕዮ ደወዴ ዘሬኛ እኮ መሲህ ኢሰ አጥራመት፤ እን ዱዱ-በሳም እንጂል ላገት ተነት።

9 ሂላ ሆጉተ አዕዮ መንኻገ ከን እንጂል ላገ መሳን ሰንሰላቲን ኡሰረሞተ ኢላ ኦርሸተ ቶጋሚት፤ ጠወ እኮጎሬ መገን ላገት ኡሰረንታበእ።

10 ህካን እኮቤቹሃ እሰ መሲህ ኢሰ መሳን ደገመኖ ጡሙለክ ዘላላም ኬዕምኝ ደዕቶተ መገኑ መጠር መንተኔሃ ይኬዕይ ጉዕመ ጠወንክ ኣታዕላም።

11 ህትን

«እሲን ሜጡበ ሬኖም ጎር
እሲን ሜጡበ ፎሊን ሄዕኖም።

12 ኣታዕሊን ጠረኝን ሄዕኖም ጎር
እሲን ሜጡበ ምመ እንካም
ነኡ አሱ ለገዕኖምጎር እሰን ኔሳሃ ለገአኖ።

13 ህትን ነኡ አመዕነሞባ ጎሬሁ
እሰ ገወሰ ለገኡተ ኣታላኖበእቤቹሃ አመዕነሞሃ እክ ሄአኖ» ይታ ላገት ህንቅሃን።

ጠረኝ ሆን መንቹ

14 ከን ጠውተኔሃ ቃጋገ እእሰ፤ ህትን ሞጭጨኖ መነ ቤሰ ቤሉ መቱርቹሃ ደግለልባሃ እኮቤቹሃ ላጋተሰ ኦደንትበገ መገን ብሬን ጠረኝሰ ኩልሰ።

15 ህትን ህንቅ ላገተ ጌባ አዕይ ተማርሰኖ ሙልሰበ ጠረኝ ሆን መንቹ እክ መለልት ገወክ መገን ብሬን ሆንጠህሶተ ጠረኝ።

16 ህትን ከን ኣዲንያ አሌን መገኑ ዮበእ ጠውኛለክ ገውመተ ጠወኢኛ ሁን፤ መሰንትሰ ህትኔ ሆጉት መኑ መገኒኛ ቁዕረኖገ ኣታእተ።

17 እሰ ጠወኣ ጠወ ጠረኝ ጡሉገለክ ሆሰን ገለን እተን አልባዕላን መረኖሃን፤ ህካን እኮቤቹሃ መን በላን ሃሚኖሰለክ ፊሊጦስ ሄአእ።

18 ሁኩ መኑንኩ «ሬዮ መን ኬኤ ከኒኛ ብርንተ እኮኤ» ይተን ህንቅ ምቄኛ ፋልቶእረን፤ እሰን መት-መቶ መን አመዕነቱ ሌንቁቅሳእት።

19 ጠው እኮጎሬ «መገኑ ገይሰ መነ ደገኖ፤ እን ቀርኛዮ የኖሁ ጉዕመንኩ ሂላ ሆንኛ ሁኑን» የኖ ማተሙ ዮ ሌንቁቅበ መገን ህንቁ ምኒ ቀበብገ ጠረኝ ሄአኖ።

20 መቶ ቀባጣሞ መንኛ ምኔን ጠለዕል ምርቅለክ ብር ኦደተ እሁዕናን ሀቅለክ ትብ ኦደት ዮኡ፤ እሳኛን መት-መቱሰ ኬዕምኝሃ ምሉሰንገ ኬዕምኛ ዮበእ ክድማተ እካእ።

21 ቴሁ አዪሁ ከን ሂላ ጠዋቹ ገወሰ ነጠ አዕዮ ጎሬ ቀርቹሃሰ ደግለልታ ጡመ ሆጎተ ጉዕሚንክ ቅባይቶ ኬዕምኝ ኦደተ እሆኖ።

22 ህካን እኮቤቹሃ ሂላ ምደልመ ሂዕላቻኛ ሁን፤ ነጠ ቀልበን ቀርኛሃ ኢሰ ሱዕመ ገእታሁኑኡን ህንቅ እኮ ጠወ እተን አመዕነቱ፤ ኢተተለክ ወገሬት ጠረኝት እምን።

23 ጠወ እኮጎሬ ብተተ ኤበኖሃ እሁሰ ደጋንትቤቹሃ ገውመለክ ደግለልትበ ኦዳኛ ሁን።

24 ቀርኛ ኢሰ ካድንቹ መኒሃ ጉዕሚንክ ጎደበ ላፈ፣ ተማርሰተ ኣታላኖሃለክ አጀቀኖሃ እሁ ሀሰሰኖሰ ቤሉ ብተመኖሃ እሁ ሀሰሰኖሰበእ።

25 ህንበዕሊንታ መነ ጎደበ ላፍማን ሸኸ ሀሰሰኖ፤ እይደጎ መገኑ ቶበት ህንቅ ደግ ህንቅቤቹ አሚቶተ ሳመ ኣሰኖሳሃ እሆተ ኣታላኖ።

26 ከን ሃሌን አልቤሰ ሰውት ዊንሸቶተ ኡሰረንት ሄኦ እቅ ሼይጣን ምሻዲኛ ገፈርሲጭቶተ ቀልቡሰ ፈንቀለኖሃ እሆኖ።

3

መጨረሻ በሬን እህኖ ሂላ ጠዋተኔሃ

- 1 መጨረሻ ዘማኔን ኦርሽ ወክቱ አሜተኖገ ካን ደግ።
- 2 መሰንትሰ መኑ ገውሰ ኢትታአረ፣ ብረ ኢትታአረ፣ ለዕዬ፤ ለዕዬ፤ ይታአረ፣ ቦንታአረ፣ ቦሮሪንታአረ፣ አኒሀለክ አማተ አዘዘንትብረ፣ ዉለቱ ዮሰበአረ፣ ጠሊልመት ዮሰበአረ፣
- 3 ኢትት ዮሰበአረ፣ መ ጠዋሪ መነን ኢተቀንትብረ፣ መን ሱዕመ ቤሳአረ፣ ገውሰ አገዕርትብረ፣ ጎደበ ጠረኛኑተ፣ ጡመርቹ ግገአረ፣
- 4 ለገአሰንቻኑተ፣ ደዕለንሰታአረ፣ ቦኒን ቡሰንታአረ፣ መገኑ ኢቲች በትሰ ተሰቄነጡ ኢትታአረ እካአ።
- 5 ህትን እሰን ሀይማኖቱ ዮሰሪ አጉዳአ፤ እኮጎሬ አመዕነትሰ ዎልቀተ ካዳአ፤ ህትናም መኒች ገበጭ ይት ሁን።
- 6 ህትን እሰን ምነተ ደጉደን ኣግ ሰውቲን ላፈ እኮ አደደ ጨቢን ዊንቶረለክ ልግቤ ሄዕላቻን ቀልቡሰ በዕዮ ማንቱ አፋአ።
- 7 ህትኔ ማንቱ ጉዕመ ወክት ተማርታአ፤ ጠዉ እኮጎሬ ሀንቅ ደጋ ቤቹ አሜቶተ አታልታበአ።
- 8 ህትን ኢያኔሲለክ ኢያንበሬሰ ሙሲን ኦደንቶሀንገን ኩ መኑሁ ሀንቅ ግገአ፤ እሰን ቀልቡሰ በዕያን አመዕነቲችሰ ኡሳአ።
- 9 ጠው እኮጎሬ ኢያኔሲለክ ኢያንበሬሴ ገውመት ለልቶሀንገን ከን መን ገውመት ጉዕመ መን ብሬን ለልታቤቹሃ መከኖሰበአ።

ጎፍሜ ሸዘነተ

- 10 ጠው እኮጎሬ አት ትምርትኤ፣ አን ሄዕዮምገ፣ ሰውትኤ፣ አመዕነቱኤ፣ አታዕሉኤ፣ ኢተኤ፣ ጠረኝመኤ፣ ሸረመኤሊክ ኦርሸኤ አዎንቶንት።
- 11 ህትን እንጠከሃ፣ እቆንዮነሃ፣ ልሰጥሪሃ ዬኖ ከተማን አሌንከኤ ኢሌኤ ጠወለክ አታዕሌም ቶቸው ደጋንት፤ ጠው እኮጎሬ ጉዕመርቹን ቀርቹ ኢሰ ጡምሾኤ።
- 12 ሀንቅንክ መሲህ ኢሲን መገኑ አጉደን ሄኔተ ሀሳ መኑ ጉዕመንኩ ሸረንታአ።
- 13 ጠው እኮጎሬ ሂላለክ አመዕነትቡ መኑ ሉሰሰን፣ ሉሰን ሂልመ ኢሊን ሂልመተ በርግተን መርታአ።
- 14 እኮጎሬ አት እዬች ተማርቶንት ጎሬ ደጋንትቤቹሃ ተማርቶንትለክ አመዕነቶንት ጠዋን ጠረኝት ኦር።
- 15 አትን ኦሰማችክ ኪሰ መሲህ ኢሳን አመዕኒን ጡም አደ አዎንሰቶተ አታልታ ጠሊላኑተ መጻፈተ ደጎንት።
- 16-17 ጠሊላኑት መጻፈት ጉዕመንኩ መገን እያኑ አዎንሰን ከተበንቶአረን፤ እሰን መገን መንቹ ቀንጢኖርቹ ዮበኢሃ፣ ጡመ ሆጎተ ጉዕሚንክ ቅጠሞሃ እሆተ ተማርሲሃ፣ ዎቀሻተ፣ ሉጨንሺች ፈንቀሺሃ፣ ነጥማን ርሰሲሃ ደግለልታአረ።

4

- 1 መገን ብሬን ፈንቀል አሜተኖለክ ዎመ እህኖ ወክት ፎሊን ዮ መን አሌንለክ ሬዮ መን አሌን ፈረደኖ መሲህ ኢሰ ብሬን ኤገተ ያንኩ።
- 2 መገን ላገነተ ዱዱብሰ፤ ወክቱንለክ አለወክቱን ጠረኝ፤ አታዕሊን ተማርሰተን ሆጉዕናን ኩልተንለክ ኡመዕርተን ሸዘ።
- 3 መሰንትሰ መኑ ጡመ ትምርት ሞጮጭቶተ ሀሰቡ ወክቱ አሜተኖ፤ ጠው እኮጎሬ መጫተሰ ተሸ ዮኖ ጠው ኩልታሰቤቹሃ ገይሰ ሃሸአቶገ ተሸ ዮሰሰ ጠው ኩልታሰ አሰተማረተ ጭምአታአ።
- 4 እሰ ሀንቅ ሞጮጭታሀኒች መጨሰ ማቀተ ሞጮጭቶተ ፈንቀሽታአ።
- 5 ጠው እኮጎሬ አት ጉዕመ ጠዋንን አጥራመቶንቲሃ እህ፤ ኦርሸንተ አታዕል፤ እንጂሊ ዱዱብሰሱ ሆጉክ እአ፤ ሆጉክን ዊንሸት እአ።
- 6 አን ክትም እሃም ወክቱ ሆንጠኮኤ፤ ህትን ከን ኣዱንያ አሊች መለዕላም ኦርኣም ወክቱ ኢልዮኤ።
- 7 ጡመ አጳንሽ አጸምም፤ ሄጫቀመኖ መንቹ ሄጫቀሙሰ ሹሎሀንገን ክድመኤ ሹሎም፤ አመዕነቱኤ አገርም።
- 8 ቱሱ ከኒች ኢተሮን ፈዮ ሸልማቱ ቅጥይ አገረኖኤ፤ ኩ ሸልማቱ መገኑ እሰ ሃሸአቶገ ሄዕዮምቤቹሃ ኣሰኖኤሃ ሸልማት፤ ህካን እኮቤቹሃ ጡመ ፍርደ ፈረደኖ ቀርቹ ኢሰ ህክ በር ኣሰኖሀዕኔ፤ ህካንን ጠላዕል ኤሳሃ እሁዕነ እሰ አሜተኖገ ኢተኖ መኒሃ ጉዕሚንክ ኣሰኖሰ።

ጳዉሎሴ መጨረሻ ሸዘነተ

- 9 ደዕልት ኢቤቹ አሜቶተ አታልሰሾሄሃ ጉዕመንክ እአ።

10 መሰንትሰ ዳማሰ ከን ኣዲንያ አል ጠወ ኢት ኢቻ መለዕለም ተሰሎንቄ ከተመ ኦርዕዮኡ፤ ቁርቁሰ ገለትይ ባዱ ኦርዕዮኡ፤ ህትን ቲቶሰ ድልማጥ ባዱ ኦርዕዮኡ።

11 ጠለዕል ሉቃስ ኢን ሜጡብ ዮኡ፤ ማርቆስ ሆጎተ አበ ሀዕለኖኤቤቹሃ እሱ ኣኣት አም።

12 ጠወ እኮጎሬ ትልቆሴ ኤፌሶን ከተመ ሶኮም።

13 ህትን አሜታንት ወክት ጢሮአድ ከተማን ካርፑሰ ቤቾን ዮ ኮርቦተለክ አደደ ጎጊቻ መክሲመሀንን ከተበንቶ መጸፈተ ኣኣት አም።

14 ናሰ መክሰኖ አለክሰንደር ኢ አሌን ሂለ አበ ጠወ አዕዮኡ፤ እሲንከ ቀርቹ ሆጎሰገ ባተኖሰ።

15 ንኡ ጠወዕናም ጠዋን አሰ አበ ሀንበዕለመኖቤቹሃ አት ገወክ እሲቻ አገዕር።

16 ከሰሰሞም ጠዋሃ ወዕና መሰለ ፈንቀሺም ወክት ጉዕሙንኩ ኢቻ አደ እኮ ቤሉ ሀዕሌኤሁ አዪሁ ዮበእ፤ ህካን መገኑ እሰ አሌን ጩብ አዕይ ወለኡንከ።

17 ጠወ እኮጎሬ ኢ አዲን መገን ሳገት ጉዕሙንኩ ዱዱብሰንቶተለክ አይሁደ እህቡ መኑ ሞጮጮተ ቀርቹ ኢሰ ኢ መዳን ኡር ጠረኻሾኤ፤ ዘቤ አፌቻ ፌሾኤ። *

18 ቀርቹ ኢሰን ሂለ ጠዋቻ ጉዕሚቻን አገረኖኤ፤ ሰሜ ጄንቲንከ ኢልሰኖኤ፤ እሲንከ ዘላለሚሃ ኬዕምኙ እሁን፤ ኣሚዕን!

መጨረሻ ወገሬት

19 ጵርሰቁልለክ እቁላ ኦኔሰፎርም አበሮስ ሞኒ መነሃ «ወገሬቲ» ይ።

20 ኤራሰጦስ ቆርንቶስ ከተማን ፈቆ፤ ህትን ጥርፊሞስ ጥዦቤቹሃ ሚሊጠን ከተማን አጉሮም።

21 አት ከርሙ ኣጉዕነ አታልሰሾሃ ጌሳን ሃጭት ኢቤቹ አም፤ ኤዉብሎሰ፤ ጵዳሰ፤ ሊኖሰ፤ ቅላዉድየለክ አመዕናት ጉዕሙንኩ «ወገሬት ዮንትንደ» ይታሂት።

22 ቀርቹ መሲህ ኢሰ ኪን ሜጡብ እሁን፤ መገን ኣሰቲት ክዕኔን ሜጡብ እኩን።

4:10 ቆላ. 4፡14፤ ፍልሞ. 24፤ 2 ቆር. 8፡23፤ ገላ. 2፡3፤ ቲቶ 1፡4። 4:12 ሶቀ. 20፡4፤ ኤፌ. 6፡12-22፤ ቆላ. 4፡7-8። 4:13 ሶቀ. 20፡6። 4:14 1 ጠሞ. 1፡20፤ መዝ. 62፡12፤ ሮሜ 2፡6። * 4:17 ዘቤ አፌቻ ፌሾኤ፡- ፍርዲቻ ፈቆም የሃን። 4:19 ሶቀ. 18፡2፤ 2 ጠሞ. 1፡16-17። 4:20 ሶቀ. 19፡2፤ ሮሜ 16፡23፤ ሶቀ. 20፡4፤ 21፡29።

ጳውሎስ ቲቶን ከተሮ ሶህኑት ኣጉሰ

ቲቶ ህንቅ መገኑ አመዕንዮብኣ ኤመቲቶ አመዕነት አደ ፈንቀሎሃ እህን ጳውሎሴሃ እንጂል ሆነን መደሰ እክ ሀዕለኖስ ሆነሰያ ጆሊ እቅ፤ ጳውሎስ ከ ሶህኑት ከተሮሁ ኡምሪን ቀው እኮ ሆነሰ ጆሊሃ ቲቶሃ እኮቤቹሃ ቲቶ ህከ ወክት ዱኣ ምኒ ሆጉተ አገረን ቀርጤሳን ሃኔኖ እቅ። ሶህኑስ ለልሳኢሁ ሰሱ ቡዕለ እኮ ጠውኒት፡-

1. ጳውሎስ ቀርጤስ ባድ መን ሂለ ሃል ደገናቤቹሃ ህከን ባዶን አመዕናኖ ጭምት አምንሳኑት ሀትናም እህ ሀሰሰኖ ጎሬ ቲቶሃ ጠረኝሽ ሸከነት ኣሴሰ።
2. አመዕናኖ ጭምት ኣዚን ባልቆ ጎነለከ ማንቱ ህትን ወደልቆ ጎነለከ ማንቱ ካዲመተ ህት ተማርሱ ሀሰሰኖ ጎሬ ቲቶሃ ሸከነት ኣሰዮኡ።
3. መጨረሻን አመዕናኑት ህት ሃኡ ሀሰሰኖሰ ጎሬ ወገሬቲንለከ ኢታን ሃኣን አመዕናኖ ጭምት በሊቶ ብተተ፡ ኦደተለከ መለዕለሻሽ ቤሶት ጳውሎስ ቲቶ ሸኮሰ።

መጻፍሰ አርሃ

- ኣጉሰ (1፡1-4)
- ዱኣ ምኒ አምንሳኑት (1፡5-16)
- መገን ምኒን ካድመ አደደ ሆነ ወጥ (2፡1-15)
- ሸከነተለከ ኤገተ (3፡1-11)
- መጨረሻሰ (3፡12-15)

1 መገን ካዲንቹለከ መሲህ ኢሰ ኣሳቤቹ እኮም ጳውሎስ መገኑ መጠሮስ መን አመዕነትቤቹ ገኢሃለከ መገኑ አጉድ ህት እክ ሃኡ ሀሰሰኖሰ ጎሬ ለሊሰኖ ህንቅ ደጎተ ተማርሶተ ሹመ እኮም ጳውሎሴቶ ሰህምእሃ፡-

- 2 ሁኩ ህንቁ ዘላለሚሃ ሃኡ ተሬገጥሲሽ ኣሰኖ፤ ህካንን ዘላለሚሃ ሃኡ ኣሰኖኔገ ዘመኒቶ ብርተ ሃጭ ጠወዕዮሁ ክዘብበሃ መገኑ።
- 3 ዘማኑስ ኢሊ ወክት ፌሳንቹሃኔ መገን ትዛዚን እን ዱዱብሶተ ኣሰምኤ ዱዱብሰ ኤገ መሳን መገኑ ሶህኑስ ለልሾ።
- 4 ማጡብ አመዕንናም አመዕነቲን ህንቅ ቤቱኤ እኮ ቲቶ እን እኮ መገኒቶለከ ፌሳንቹ መሲህ ኢሲቶ ኣሰቲቶለከ ወገሬቱ ኬሳሃ እሁን።

ቲቶ ቀርጤሳን ኣዕዮ ሆጉተ

- 5 ኬሳሃ ቀርጤሳን ኣጉሮም መስት መክበርቹ መክሶተለከ እን አዘኮንኪገን ከተማን ጉዕማንን አመዕናኖ ባልቀተ ሸንቶታት።
- 6 አመዕናኖ ባልቀንኩ ቀነጤኖሰርቹ ዮበኢሃ፡ መቱ መንቹ ምኒ እን እኮኢሃ፡ ማለተ አኢንለከ አዘዛሙ ሆገን ምሳንትቡ መገኑ አመዕንቶ አለት ዮሲሃ እሁ ሀሰሰኖሰ።
- 7 መሰንትሰ አመዕናኖ ዱኣ ምኒ አምንሳንቹ መገን ሆነ ኤገተ ቶሳሃ እኮቤቹሃ ቀነጤኖሰርቹ ዮበኢሃ እሁ ሀሰሰኖሰ፤ እሰን ቦንባሃ፡ ኡሙዕርባሃ፡ ሰከርባሃ፡ ብተምሃሃለከ ብሪሃ ጎሬደባሃ እሁ ሀሰሰኖሰ።
- 8 ጠወ እኮጎሬ ኮሃ ቶገኖሃ፡ ጡመ ጠወ ኢተኖሃ፡ ገወሰ አገዕረኖሃ፡ ህንቅ ኢተኖሃ፡ መገን ሆጎተ አደ እኮሃለከ ዮሰ ጌሲን ሃኣኖ እሁ ሀሰሰኖሰ።
- 9 እሰን ምሉ መን ህንቅ ትምህርት ተማርከን ሸከተለከ ህከ ላገተ ኦደ መኒሃ መሰለ ኣሶተ ከኒቶ ብርተ ተማር ትምርት ሃለን አመዕነንቶ ላጋን ጠረኝን።
- 10 ልግቡ መኑ በትሸን ኣይሁድ አድረ እኮአሩ ጡርከሜኖ ሴረ አምንታሩ፡ አዘዘንትበረለከ ተሰ እኮ ጠወ ጠወእን ሉሲሳኣሩ ዮኡ።
- 11 ከ መናከተ ሰዕም ይታገ አኡ ሀሰሰኖ፤ እሰን ገበአበ ትርፈ ደኣቶተ ገበአበ ጠወ ተማርሰተን አበርሱ ጉዕመንከ ኩማዳኢ።
- 12 እሳቶ መቱሰ ገይሰ ራጋንቹ «ቀርጤስ መኑ ጉዕመ ወክት ክዘበኛኑተ፡ ሂለ ቡሳወ እኮአራ፡ ሆጉተ ኢትቲበለከ ጎራሜቻኖታን» ዩኢ።
- 13 ኩ መስከረም ጠወእኩ ህንቅሃን፤ ህካን እኮቤቹሃ ዊሙ አመዕነቱ ሃኡሰተ ከ መን ጠረኝሰ ኡሙዕር።
- 14 ኣይሁድ መን ማቀተ አምንትበገለከ ህንቅ ግብ ኦዳ መን ትዛዝ ሞጭጭትበገ ጠረኝሰ ኡሙዕር።

15 ነጠ መሪሃ ጉዕሙርቹንኩ ነጠሃን፤ ጠው እኮጎሪ ንጃሶሀኑኑተለክ ኦመዕንትበሀኑኑተ መቱርቹሁ ነጣበእ፤ ህትን ቀልቡሰለክ ሰው ይታርቹ ንጃሾእሃን።
 16 እሰን «መገኑ ደንጋም» ይተን ሆንንተሰ እሱ ለገእአረ፤ ህትን ኮፍ ይታአረ፤ እዘዘንትበረለክ ጡመ ሆጉተ እኡ አታልትበረ።

2

ሀንቅ ትምርትተኔሃ

1 እት እኮጎሪ ሀንቅ ትምህርት ተማርሰ።
 2 ኡሙሪን ባልቆ ጎኑ ወልቀሰ ጌሲን ሄእአራን፤ ኬዕምኛሰ አገርታአረ፤ ገውሰ አገርታአረ፤ ኦመዕነቲንለክ ኢታን አታዕለኒን ሂልመት ዮሰበአረ እካገ ሸዘሰ።
 3 ህትን ኡሙሪን ባሊቆ ሚንቱ እመዕነቱሰ አገርት ሄእአረ ሄዕምትበረለክ ሰከርትበረ ጡመ ጠው ተማርሰታአረ እካገ ሸዘሰ።
 4 ህትን ባሊቆ ሚንቱ ሀርድ ሚንቱ ምንሰ እናኑተለክ እለሰ እትታአረ፤
 5 ገውሰ አገርታአረ፤ ነጣኑተ፤ ጉዕመርቹንን ምንሰ አገርታአረለክ ምንሰ እናኑተ ኬዕምሳአረ እካገ ተማርሰቱንሰ፤ ህካንን አታአሁ መገን ላገት ህንቀንታበአጋት።
 6 ህትን ዎደልቹ ገውሰ አገርባ ሄእኖገ ሸዘ።
 7 እት ጡመ ጠው እተን ጉዕመ ጠዋንን ምሳልተ እህ፤ ትምርቲንከክ ሀንቅ መንቹ እሁክለክ ደግለለኖ ጠዉ ዮሄ መንቹ እሁክ ለለሰ።
 8 ህንቁናበእ ጡመ ጠው ለለሰሰ፤ ከን ሃሌን ኒሳሃ ግባኔሩ ኒ እሌን ጠውአ ሃላ ጠው ሆጋረ ሙልታአ።
 9 ካዲመት ቀርቻኖተሰ እዘዘንታገ፤ ጉዕመርቹንን ቀርቻኑሰ ሙንዲሲሳገ፤ ሃላ መሰለ ፈንቀሽት ጠውእበእገ።
 10 ሞግትበገ ሸዘሰ፤ በትሸን ፊሳንቹሃኔ መገን ትምርቱ ጉዕመ ጠዋንን አተሞሃ እሆተ ጉዕመ ወክት ዊመ ደገንቶአረ እኩን።
 11 መገኑ መን ጡምሰኖ እሰቱሰ ጉዕሚንከ ለሊሾኡ።
 12 ሀኩ እሰቱንት ለግተለክ ኣዲንያ አል ሄዕላቸተ እኩሬን ገዉ አገርባ፤ ጌጥዬለክ መገኑ እኩዲን ከን ዘማኔን ሄዕኖተ ተማርሰኖኔ።
 13 ከን ሃሊን ማሰአም ተብሳኔ ሁኩንን ሎሩ መገኑኔለክ ጡምሳንቹኔ መሲህ እሰ ኬዕምኒን እማቱሰ አገርባኖ።
 14 መሲህ እሰ ሸክማች ጉዕሚችን ጡምሰኔተለክ ጡመ ሆጉተ እዕኖተ ጠረኛኑተለክ እሲሃ እደ እንኮም ነጠ ኡመት እንኮተ ነጠ እኡኔተ ኒተኔሃ ገዉሰ ህግሽ ኣሴኡ።
 15 ቴሱ ከ ጉዕመንከ ጠው ዊመ ሹምነቲን ተማርሰ፤ ሸዘ፤ ኡሙዕር፤ እደሁ ህንቁንከሃ።

3

እመዕናኖ ሄአተኔሃ

1 መኑ ጉዕሙንኩ ገሸታሰሀኑኑተለክ ዲኖኖተ ገዉሰ ሆኖሰ እዘዘንቶተ ጡመ ሆጉተ ጉዕመንከ እቶተ ተቃጠረ እኮተ
 2 ሀከን መንቹ አሊኒ ሃላ ጠው ጠውእበእገ ሰው ይታገ እእሰ፤ በትሸን መኒን ብተንትበረለክ ጎደበ ላፋኑተ፤ ገዉ ሙግ እኡን ሄኡ መኒሃ ጉዕሚንከ ለሊሳአረ እኩን።
 3 ነኡን ከኒች ብርተ ገዋኑተ፤ ትዛዘ ቶንግበረ፤ ጡመ ዎቃሃ ሉንሶምረ፤ እደደ ሃላ ሄዕላቸተለክ ማል ተሸቲሃ ጠገሞምረ፤ ተንኮንለክ ሞቀቆማን ሄዕናምረ፤ ግበሞምረለክ መት-መቲንከኔ እትቀምበረ እቆ።
 4 ጠው እኮጎሪ ጩብችኔ ጡምሾኔ መገንኔ ጎደብ ለፍመትለክ ኢትት ዊንቶ እሙዙ ለሊ ወክት
 5 ነኡ እዕኖም ደፂ ሆንንተኔ እሁዕናን ገዉንኩሰ ማርቶንከሰ ጡምሾኔ፤ ጡምሾኔንኩ ሃዕር አለሚን አዕረንለክ ጠሊሊ እያኒን ደገሞ ሃዕርሃ ሄኡ።
 6 መገኑ እሰቶንከሰ ጡምሳንቹሃኔ መሲህ እሰ ኣዲን ኣያነሰ ኒ እሌን በትሸ ደፈፍሾኔ።
 7 ህካንን እዕኖሁ እሰቶንከሰ ፈያኑተ እንክ ተብሲን አገርናም ዘላለሚሃ ሄኡ ሄኡ ረገዕኖታት።
 8 ኩን እመዕነሞእሃ ጠው፤ መገኖን እመዕነቶ መናክት ጡመ ሆንተ ጠረኛቶተ ከ ጠው ጉዕመንከ ጠረኛሰ ቃግሶተ ሀሳም፤ ኩ ጠውንኩ ጡመለክ ጉዕመ መኒንከ ደግለለኖሃን።
 9 ጠው እኮጎሪ ተሰ እኮ ኦዲች፤ ደቦ ዎልንሺች፤ ብታች፤ ሕግ መሳን ከኤኦ ጠዊች ቁዕር፤ ህትኔ ጠውንኩ ደግለልባሃለክ ተሰሃን።
 10 እደደመተ ኤበኖ መንቹ መቶረ ህከረንገ ለሞረ ሸዘንትሲች ኤተርን እሲች አደ እህ።

11 ህትኔ መንቹ ሂላለክ ጨበኛሃን፤ እሰ ገይሰ አሌን ፈረጆ እሁሰ ደግ።

መጨረሻ ሸዘነተ

12 አርጤማሴ ህከረንገ ትኪቆሴ ኪቤቹ ሰሃም ወክት እን የም ቤቹ ኒቆጵልዮን ደዕልት እም፤ እን ከርም ህከኔ ዲንኮተ ሙዕርዮም።

13 ሕገ ደገኖ ዜናሰለክ እጵሎሰ ዎቃሰ ሃንቶተ ደግለላኖሰርቹ ጉዕመንከ ሀዕልሰ።

14 ኒ መኑንኩ አቶቱ የበኢሃ ፈቃበአገለክ ደግለሸቀም ኦርሻች ጡምቶተ ጡመ ሆጉተ እኤ ተማርቱን።

15 እን ሜጡበ ዮኢሩ ጉዕመንኩ «ዎገሬቴ ዮንተንድ?» ይቶህዕኔ ይሰ፤ አመዕነቲን ኒን ሜጡበ እኮ ጃላተኔ ጉዕሚንከ ወገሬት ኢልሰ።

መገን አሰቱት ጉዕሚንከክዕኔ ሜጡበ እኩን።

ጳውሎስ ፍልሞኒሃ ከተሶ ሶህኑተ ኣጉሱ

ፊልሞን ኤንኬዕነሞሃ እመዕናንቹ እቅ፤ ቆላስያሲ ዱእ ሞኒ መንቹ እሁስ መሊኖስ፤ ፍልሞን ኦኒሲሞሴ ዩኖ ርስቹ ሄዕዮስ እቅ፤ ሁኩ ርስቹንኩ ቀርቹስ ለገዕይ ኦርዕዮ ወክት ኡሱር ሞኒን ሄዕዮ ጳውሎስን ደቀሞ፤ ጳውሎሴ መሳን ኦኒሲሞስ እመዕናንቹ እኩ፤ ጳውሎስ ሶኮ ሶህኑት ፍልሞን እስቤቹ እሜተን ሄዕዮ ርስቹንከስ ሀራዕሪሞተ ቃግሳሳተ፤ ጳውሎስ ኦኒሲሞሴ ፍልሞኒን ሀራርሶተ ፈንቀሽ ሶሆተ ፍልሞን ርስቹገ ኣዕይ ቶጎተ እሁዕን መሲህ ኢስ ሱዕሚን እመስቤቲገ ኣዕይ ቶጎተ ሶኮ። ት ሶኮ ሶህኑት እመዕኔ መኑ ኢጋንላከ ኣጉራን ሄኑተ ጡመተ ሞሳል።

መጻፉስ ኣፎሃ

ኣጉሱ (1-3)

ጳውሎስ ፍልሞን ገለትጩስ (4-7)

ጳውሎስ ኦኒሲሞሴ ቶጎተ ፍልሞኒሃ ሆንጠህሾ ኡጭቱተ (8-22)

መጨረሻስ (23-25)

1 መሲህ ኢስተኔሃ ኡሱረኛ እኮም ኢኛ ጳውሎሴችለከ እመኔቤቲች ጠግቶሴች ኢተሞ እመኔቤቱለከ ሆንኔ ጆለ እኮ ፍልሞኒሃ

2 እመኔቤቶተ ኣፍብያሃ፣ ኒን ሜጡብ መሲህ ኢስ ሞታደሪ እኮ ኣርክጳሴለከ ህትን ምኔክ ጭምይቶ እመዕናኖተ፤ *

3 ኣንኝኔ መገኛለከ ቀርኞ መሲህ ኢሲኝ ኣስቱትለከ ወገሬቱ ክዕኔሃ እሁን።

ፍልሞኔ ኢተተለከ እመዕነቱ

4 ዱእ እኣም ወክት ኬሳሃ ሰውዮን መገኙኤ ጉዕመ ወክት ገለትጫሚት።

5 ቀርኞ ኣሳን ዮሄ እመዕነቱለከ ኢተተ ህትን እመዕናኖተ ዩሄ ኢተክ ሞጮጭዮም።

6 ኔሳሃ ሚጡ ኣዕዮኔ እመዕነቱ መሲህ ኢሲን ዮኔ ጡመ ጠወ ጉዕመንከ ብዝ ኣት ኣጥራመታንጉገ ኣኣሂተ ኣን ኬሳሃ ዱእ ኣኣም።

7 ኢ እመቤቶ! ኪ መሳን እመዕናኖ ቀልብ ብዝ ኣዕይ ጠረኝሾቤቹሃ ኢተክ ኣበ ሙንዲኑተለከ ጠረኝመተ ኣቶኤ።

ጳውሎስ ኣናሰሞሴተኔሃ ሆንጠህሾ ዱእ

8 ህገን እኮቤቹሃ ኣኡ ሀሰሰኖኤሃ ኣእ ይ ኬሳሃ ኣዘዘተ መሲህ ኢሲን መለል ጠወኑተ ኣታላም እቅ።

9 እኮጎሬ ካን ኣኣምሀኒኝ መሲህ ኢስተኔሃ ኡሱረኛ እኮም ኣን ባለቆም ጳውሎስ ኢጋን ኡጩ መጠርም።

10 ኣን ኡሱር ሞኒን ሄኣን ቤቱእ እኮ ኦናሲሞሴተኔሃ ኬሳሃ ኡጫንኬ።

11 ኣናሰሞስ ከኒኝ ብርተ ደግለሎሄበ እቅ፤ ቴሱ እኮጎር ኬሳሃ እኮ ኤሳሃ ደግለለኖኤ።

12 ህትን ኣሱንከ ኪቤቹ ፈንቀሽ ሶኮም፤ እሱ ኪቤቹ ፈንቀሽ ሶሃም ወክት ገወኤ ኣዕይ ኢጋምሀንገ ኣዕይ ወላኣም።

13 ተሸት ላገ መሳን ከኔ ኡሱረሞምሀኒን ኪቤቹን እከ ሀዕሎኤተ እሰ ኣን ሚጡብ እኮ እቅ ተሸ ዮኖኤ እቅ።

14 ጠወ እኮጎሬ ኣት ኣጋንት ጡመ ሆጉተ ግዳጂን እሁዕን ኢጋን እሆተ ኬሳሃ ጠዕሙዕነ መቱርቹሃ ኣተ ሀሾምበኤ።

15 ኣናሰሞስ ቀዎ ወክቲሃ ኪኛ ኣደ እኮጎሬሁ ከ ኤተሩ ልግብ ወክት ኪን ሚጡብ ሄኑተ ኣታለኖ።

16 ከኒኝ ኤተርን ኪን ሚጡብ ሄኣኖሁ ርስቹገ እሁዕን ርስቹች በተዕዮሃ እከ ኢተሞ እመቤትጋት፤ እስ ኤሳሃ ኢጋም ኣመኤሃ ቤቱ፤ ጠወ እኮጎሬ እስ ኤሳሃ ኢጋም ኣመኤቤቱ እኮች በትሸን ኬሳሃ ደግለሸቀሜኖ ሄኡንላከ ቀርቹን ሀት ኢተሞ ኣመክቤቱ እሆኖበኤ።

17 ቴሱ ኤሳሃ ኣመክቤትገ ኣት ዎለኦንቴኤች ኢገ ኣት ቶጎስ።

18 ኢልሾሄ ብድሉ ዮ ጎሬ ህከረንገ ኤዶ ዮሰጎሬ ኢ ኣሉን ዎለኤ።

19 ኣን ጳውሎስ «ኤዳስ ባታም» ይ ገዴ ኣንጋን ከተሶም፤ እኮጎሬ ኪ ሄኡተኔሃ ኣት ገወከ እኮንት እቃ ኢ ኤዶሁ ዮሄሃ እሁክ ቃግሱ ሀሰሰኖበኤ።

20 ቴሱ ኢ እመቤቶ! ቀርኞ ሱዕሚን ከ ጡመርቹ ኣቶኤተ ኡጫንኬ፤ ሀዕይ ቀልብኤ መሲህ ኢሲን ፎሎጩኖገ ኣኤኤ።

* 1:2 ምኔንከክ ጭምይታ እመዕናኖተ፡- ዮሁግርክ ኣፎን «ምኔንከክ ጭምይታ መንተኔሃ» ዮኖ። 1:2 ቆላ. 4፡17። 1:10 ቆላ. 4፡9።

21 ካን እን ከተቦንኬሃ አታንትገ አመዕናም፤ ሆሮን እን ጠዕሜምሀኒቶ በትሰ አታንትገ ደጋም።

22 ህትን መገኑ ዱአክዕኔ ሞጮጭ ክዕኔቤቹ አሜታምገ አአኖኤገ ተብሳሃ አአምቤቺሃ ኤሳሃ ፎሎጫም ቤቹ ቅጥ አኤኤ።

ጎፍሜ ወገሬትተኔሃ

23 እን ሜጡቦ መሰሀ ኢሰተኔሃ ኡሱረሞ ኤጳፍረ «ወገሬት ዮንተንደ?» ዮኖሄት።

24 ህትን ሆጎአ ጃለተ ማርቆስ፣ አርሰጥሮኮስ፣ ዳማሰለከ ሉቃስ «ወገሬት ዮንተንደ?» ይታሄት።

25 ቀርቾ መሰሀ ኢሰ ኣሰቱት ክዕኔን ሜጡቦ እኩን።

አብራውያን መረጃ ከተበሞ ሶህኑተ አጉሱ

ት ሶህኑት ከተበንቶአሁ አቡ ኦደንሹ አሌሰቤቹሃ አመዕነቱሰ አጉርቶተ ሆንጠንኮ አመዕናታት እቅ፤ ከተቦሲሁ አብራውያኖ አመዕናቶተ ተፈገጥሲሳንክዕኔሁ መሲህ ኢሰ ሀንቀንላከ መጨረሻ መገን ለሉ እሁሰ ለሊሲት። ሁኩ አመዕናኑት አመዕነቲንከሰ ጠረኝታገ እኣናሰ፤ ሀካን እኣኖ ወክት ሰሱ ሀንቅ እኮ ጠወ ጌጥ አዕይ ለሊሲኖ፡-

1. ቶን ኦርሻን አረሃሰ መገረጃ ሀንቅንከ እዘዘሞ ኢሰ ጉዕመ ዘማንከ መገንዮ ቤቱ፤ መገን ቤቱ እሆንከሰ ኑባሻ ወኣድ ላገ ነብያኖች፡ ሙሲችላከ መላይካች ሎረሃን።
2. ኢሰ ኑባሻ ወኣድ ላገ ቁሳች በትሽ ጉዕመ ዘማን ቁሳቹ እሁሰ መገኑ ገውንኩሰ ጠወዕዮኡ።
3. ኢሰ አዲን አመዕናኑት ጨብቹ፡ ዋጅችላከ ፊሆች ጡምታእ፤ ኢሰ ሎረ ቁሳቹ እሆንከሰ አብራውያኖ ኣፎ ጠወኣ አመዕናኖ ሴሪንላከ ግዝ ክትመ ሆንጠህሱ ሀሊገ ለላኖ ጡሙ ሀንቅ እሆንገ አዕዮኡ።

ከተቦሁ እሰረኤል ሄሶን ሱዕመንቶ መናከተ አመዕነቱሰ ምሳልተ አዕይ (ፎሎ. 11) እነበባእሩ አመዕነቶንከሰ ጠረኝቶተ ቃግሰናሰ፤ ህትን ፎሎ. 12 እነበባእሩ አልሰ ኢሰ አሊን ቱክ ይት አመዕነቶንከሰ ጠረኝቶተላከ እኮሰ ኦርሸቲ አልቶሰጎሪ አደጽቶተ ሸዘናሰ፤ መጨረሻን ሸዘነተላከ እጎር ላገተ ኣሲ ጡፈኖ።

መጻፉሰ ኣፎሃ

- መሲህ መገኑ ኑር አዕይ ለሊሲኖሃ እሁሰ (1፡1-3)
- መሲህ መላይካች ሎረ እሁሰ (1፡4—2፡18)
- መሲህ ሙሲችላከ ኢያሶች ሎረ እሁሰ (3፡1—4፡13)
- መሲህ ቁሳች በተኡሰ (4፡14—7፡28)
- መሲህ ወኣድ ላገት ሎረ እሁሰ (8፡1—9፡22)
- መሲህ ክትመ ሆንጠህሲች በተኣኖሃ እሁሰ (9፡23—10፡39)
- አመዕነት ሎርመተ (11፡1—12፡29)
- መገኑ ሙንዲሲሱ (13፡1-19)
- መጨረሻ ዱኣ (13፡20-21)
- መጨረሻሰ (13፡22-25)

መገኑ ቤትሰ አዲን ጠወዕዮገ

- 1 ብሪ ዘማንከ መገኑ ልግብ አደድ እኮ ዎቃን አበናናተኔ ነብያኖ አዲን ልግብ ወክት ጠወዕዮ እቅ።
- 2 እኮጎሪ ከን መጨረሻ ዘማንከ ጉዕመንከ ረገኣኖ አዕዮሰ ቤትሰ አዲን ኔሳሃ ጠወዕዮኡ። ህትን ጉዕመንከ ከለቆሁ እሰ አዲንት።
- 3 ቤቱሰ መገን ኬዕምኝ ለሊሲኖሃን፤ እሰን ዊመ ዊሚን መገኑ አኑደኖሃን፤ ወልቀት ዮ ላጋንከሰ ጉዕመንከ ድክሽ አፎኡ፤ ህትን መን ጨቢች ነጠ አዕዮች ኤተርን ሎረ መገን መኬ አዲን ሰማን አፋዕልዮኡ።

ኢሰ መላይካች ሎረ እሁሰ

- 4 መገን ቤቱ መላይከ ሱዕሚች ሎሩ ሱዕሙ ኣሰሞሰ ሃሊን ኣሳች በትሽ በተዕዮሃ እኮ።
- 5 መሰንትሰ መገኑ መላይካችሰ መቲሀሲ
«አት ቤቱሃኤ፤ አን አናክ»
ሀከረንገ
«አን እነ አሃንሰ፤ እሲሁ ቤቱእ እሆኖ»
ዬኢሁ አዬህት?
- 6 ህትን ሀንገፈ ቤቱሰ ኣዲንያ አል ኤቦ ወክት
«መገን መላይክት ጉዕሙንኩ እሲሃ ሰገደሰተ» ሀሰሰኖ።
- 7 እኮጎሪ መላይከተኔሃ ጠወኣን
«መላይክሰ ቦብረ፣ ካዲመተ ጊረ ለበነተ ኣኣኖ» ዮኖ።
- 8 ጠው እኮጎሪ ቤትሰተኔሃ፤
«መገኖ! ዳቺመክ ቦርጭመት ዘላለሚሃ ሃኣኣ።

- ዎምነቶንከክ ጡመገ እት ገሸታንት፤
 9 እት ፈጽተ እትት ሂላ ጠው ግጦንት፤
 ሀከን መሳን መገኑ መጠሮሂ፤
 ሙንዲኑት አሰኖ ዘይተ ቡር ጆላኹክ በትሽ ኢቴሄ» ዮና።
 10 ቴሁ ቤትሰተኔሃ ህት ዮና፤
 «ቀርቾ! እት ሄጭት ኡለተ ከለቆንት፤
 ሰምንኩ አንገክተ ሆጉ።
 11 እሰ ጉዕሙንኩሰ በእኔ፤
 እኩግሬ እት ሂአንት፤
 እሰ ጉዕሙንኩሰ ኦድኖገ ኑባጽታኦ።
 12 ቡሉኩገን ጣጣንትሰ፤
 እሰ ኦድኖገን ደረንታኦ።
 2 እት ጉዕሙ ወክትንከ ኦቴት፤
 ዘማኑክ ሆሮ ጎፊኖበኦ» ዮና።
 13 ጠው እኩግሬ መገኑ መላይከ በሊኹ፤
 «ባለጋሪክ ሎካኹክ ዎሮን እአተ ኢላ
 መኬእ አዲን አፋዕል» ዬሊሁ አዬት?
 14 ህከረ መላይከት ጉዕሙንኩ ጡሙ ደእታ መነ ካደንቶተ ሶህንቶ እያናከተበእንደ?

2

ቀርቾን እመዕኔን ጡምተኔሃ

- 1 እይደጎ ነኤ ሞጮጭኖም ጠዌኹ ኤተሩ ዋልን ኡምባምበእገ እገሪ። ሀሰሰኔ።
 2 መላይከ አዲን ኩለንቶ ላገት ሀንቂተ እኩግሬ ህተ ላገተ ቶጉ ግበኖ መንቹ ሀሰሰኖ ሃሊን ቀጠእመኖሃ
 እኩግሬ
 3 ነኤ ሀከ ሎረ ጡሙ ሀምባምግሬ ህት እንክ ፋሽእኖተ አታልናም? ከ ጡሙኔ ወዕና ኩሎኔሁ ቀርቹ
 ገዋሰ፤ ህካን ጠረኝሰ ኩልቶኔሩ እሰኹ ሞጮጭቶአሃ መነ።
 4 ህትን መገኑሁ ሀከን ጡምተኔሃ መላተ። አበ አጀብሲሰኖ ሆንን። አደደ ገረምሲጩኖ ጠዌን። እሰ
 ሀሾ ሃሊን ኣሴ ጠሊላ አያን ኣሰቶን መስከሮኡ።

መን ዘሪተ ጡምሳንቹ ኢሰ እሁሰ

- 5 ነኤ «ከ ኤተሩ አሚታኦ» ይን ጠወዕናም አዲንያ አል መገኑ መላይከሰ ጠቅቶተ ኣሰኖበኦ።
 6 መጻፍ ኣዜን መቶ ቤኹን መቼ መንቹ
 «እት እሱ ሰው ይቶተ መኑ መርቾሃን?
 ህትን ጨነቀንቶሰተ መን እላት መርቾሃን?
 7 እሱንከ መላይካኹ ቀዎ ወክተሃ ሆፍሶንትሰ፤
 ኬዕምኣለከ ገለት ዘዉደሃ ዎርቶንትሰ፤
 እንገክ ሆጎ አሊንን መክሶንትሰ፤ *

8 መገኑ ጉዕመርቹንከ ሹምነተኹሰ ዎሮን አቶንት» ህት ይ መስከሮኡ።
 ጉዕመርቹንከ ደኛመሰ ኣዜን አእኖረ፤ ዳኛማሰ ኣዜን አኡዕነ ፊሾርቹ መቱርቹሁ ኖበኦ። እኩግሬ ቴሱ
 ጉዕሙርቹንኩ እሰ ሹምነት ኣዜን እሁሰ ለዕናምበኦ።

9 ጠው እኩግሬ መገን ኣሰቶን ጉዕማንከ መንተኔ ሬሁተ ለዕናተ ቀዎ ወክቱን መላይካኹ ዎሮ አዲን
 እክ ለሌ ኢሰ ሬሆ ኦርሸተ ቶሳቤቹሃ ኬዕምኣለከ ገለት ዘውደ ዎሮሃ ለዕናም። እሰ መገን ኣሰቶን
 ጉዕምኔተኔሃ ሬኖኡ።

10 መገኑ ጉዕመርቹንከ ከለቆ፤ ጉዕመርቹንኩ ህትን ሂኔተ አዕኖ፤ ኢሰ ኦርሸ ኣዜን ህግሲን
 ጉዕመርቹን በቀዕኖሃ እሁኖገ እኡ እሲሃ ገበአኑሃን፤ መነ ጡምቤቹ አምንሰኖሁለከ ልግብ ሱሱተ መገን
 ኬዕምኣ ቤቀንታገ አእኖሁ ኢሳት።

11 መነ ጠሊላኑተ አእኖሳሁለከ እሶን ጠሊላኑተ እኩ መኑ መቶ አንተ ኦሱ፤ ሀከን መሳን ኢሰ እሰንተ
 «አመኤ ኦሶ» ይ ገኑተ ሙለኖበኦ።

12 ህካን እኩቤቹሃ እን መገኒሃ
 «ሱዕመክ አመኤ ኦሶተ ኩላም፤
 አመዕናኖ ጭምት በላን ኬሳሃ ገለትጫንኬ» ዮና።

13 ህትን «አመዕነቱኤ እሰ አሊን አኣም»

1:9 መዝ. 45፥6-7። 1:12 መዝ. 102፥25-27። 1:13 መዝ. 110፥1። * 2:7 መት-መቱ ፍሳረት «እንገክ ሆንን ዳኛ አቶንት» ዮናሃ በርግታኦ። 2:8 መዝ. 8፥4-6። 2:13 ኢሳ. 8፥17-18።

ህትን «አንለከ መገኑ ኣሴኤ ኦሱት ሁኩዕኑን» የኖ።

14 ኦሱት ማሉለክ ቁጉ ዮአረ እኮገን ኢሰህ አሰገን መንቹ እኮ፤ ሁኩንን ሬሆንከሰ ሬሆ አሉን ወልቀት ዮስ እልቢሲ ቤሶታት።

15 ህትን ሄኦኖ ዘማኔን ጉዕማንን ሬሆገ ዋጄኖ ርሰመ ኣዜን ጠገንቶረ ጉዕመንከ ዋዞሃት።

16 ሆንቅ አሆኖረ ኢሰ ሆሾ መላይከተ ሀዕሎተ አሁዕነ አብሬሂም ዘርተ ሀዕሎታት።

17 ህካን እኮቤቹሃ ማርቱተ አእኖለክ አመዕነሞ ሎረ ቁሰቹ እክ መገኒሃ አተለክ መን ጨብ አኑሮተ መ ጠዋኒ አመሰ ኦሱት አኑዱ ገበዕዮስ።

18 እሰ ገወንኩሰ ፊተነሞ ኦርሸተ ቶጎቤቹሃለክ ፊተነሞቤቹሃ ፊተናን ኣጋአረ ሀዕሎተ አታለኖ።

3

ኢሰ ሙሲቾ ሎረ አሁሰ

1 ህካን እኮቤቹሃ ሰሜ ጃኑትሃ ገአንቲን ቤቀማኑተ እኪንተ ጠላላኑት አመኤ ኦሱ፤ ጠወዕናሞ አመዕነት ሎረ ቁሰቹ አሆተ መገኒን ሶሀሞ ኢሰ ሰላ ይዩ።

2 ሙሰ ዱእ ምኒ ሆንን ጉዕማን አመዕነሞአሃ እኮገን ኢሲሁ አሱ ሾሞሰ መገኒሃ አመዕነሞአሃ እቅ።

3 ምኒ እጃረኖሁ ምኒቾ ሎረ ኪዕምኙ ሄኦኖሰህንገን ኢሲሃ ሙሰ ኪዕምኚቾ በተኦኖ ኪዕምኙ ሀሰሰኖሰ።

4 መሰንትሰ ምኒሃ ጉዕሚንከ መቱ እጃረኖሁ ሄኦኖ፤ ጠወ እኮጎሬ ጉዕመርቹንከ እጃረሁ መገኑሃን።

5 ሙሰ ከ ኤተሩ ኩለመኖ ጠዋሃ ሞስክር አሆተ መገን ሞኔን ጉዕማን ካሩንቾገ እክ አመዕነሞአሃ እቅ።

6 መሲህ መገን ሞኔን ጉዕማን ሹሞነቱ ኣሰሞሰ ቤትገ አመዕነሞሃ እቅ፤ ነኡን አመዕነናሞለክ ድከዕናሞ ተብሳሃ ኤተሩ ኢላ ጠረኝንሰ እንፎምጎሬ እሰ ምኒ እንካም።

መገን ኡመቲሃ ኣሰሞ አገዕርተኔሃ

7 ህካን እኮቤቹሃ ጠሊሉ አያኑ

«ከበር ላገሰ ሞጮጭቲንን

8 እዕኑ ኡለ ኡድማን ፊተንቲንተኤ ወክት አበናኑክዕኔ ሾክቶኤገን

ቀልብክዕኔ ዱድሶናቹ።

9 ህክኔን አበናኑክዕኔ ፊተንቶኤሁ፥ አሙዕርሲሶኤሁ፤

እዕዮምርቹንከ ሸይሉ ዘማን ለእኤ» የኖ መገኑ።

10 «ህካን እኮቤቹሃ እን ህክን ዘማን መናን ኡሙዕሬም፤

ጉዕመ ወክት ቀልቡሰ ሉጨሞአሃ፤

ዋቃንከኤ ደግበረሁ ዩም።»

11 እንን አሙዕሬን

«እሰ ኢ ፎሎጭቤቹ ሆሮ ኣጋባኤ ይ

ጤሌዕሊም።»

12 ኢ ጃላ፤ ዘላላሚሃ ሄኦኖ መገኑ ለገአሲሰኖ ሂሉ አመዕንቡ ቀልቡ ክዕኔኤቾ አዩሃ ሄኦኖበአገ አገዕርዩ።

13 እኮጎሬ ክዕኔኤቾ አዩሁ ጨቢን ጣንሰም ቀልብሰ ዱድሶኑ «ከበር» የመሞ በሩ ጎፋዕነ ጉዕመ ወክት ገገወክዕኔ አማዕላሚ።

14 ወዕና ሂዕዮኔ አመዕነቱ መጨረሻ ኢላ ጠረኝንሰ እንፎምጎሬ መሲህን ሜጡብ ቤቀማሞረ እንካም።

15 ከኒቾ ብርተ

«ከበር ላገሰ ሞጮጭቲንን

ህክ ወክት አበናኑክዕኔ ሾክማን አቶገን ቀልብክዕኔ ዱድሶናቹ»

የመሞ ከተበሞጋት።

16 ላገሰ ሞጮጭት ሾክቶአሩ አዩኤታን? ሙሰ አዎንሰ ግብጽ ባዲቾ ፋሾሰሩ ጉዕማንከሰበአንድ?

17 ሸይሉ ዘማን ዊመ መገኑ አሙዕርሰሶሩ አዩኤታን? ጨብ አቶቤቹሃ ጀናዘሰ ኡለ ኡድማን ፈቆአረበአንድ?

18 ህካን እኮቤቹሃ አዘዘንቶብ መን ቤሉ «ፎሎጭኤ ቤቹ ኣኔንተበእ» ይ መገኑ ጠሊዕሊሰሩ አዩኤታን?

19 ቲሁ እሰ አመዕኑ ሆጎ መሳን ፎሎጭቤቹ ኣጎተ አታሉ ሆጉሰ ደንጋም።

4

1 ህዳን እኮቤቹን አሰኛኔ ፎሎጭቤቹ አገሃ ላገተ አጎኔሁ ጠረኘ እኮቤቹን ክዕኔች አዪሁ ህክ ፎሎጭቤቹ አገሮ ሳመ ደሐሳን ፈቀቀበአገ ጉዕሙንኩኔ አገዕርና።

2 አሳሃ እንጂል ላገት ኩለንቶገን ኔሳሃ ኩለንቶኔ፤ ጠዉ እኮጎሬ እሰ ሞጮጭቶ ላገተ አመዕነቲን ቶጉሆጎቤቹን ደግለሎሰበአ።

3 ነኡ አመዕንኖም መኑ ህክ መገኑ አሰኛኔ ፎሎጭቤቹ አንጋም፤ እሰን « አሰ ፎሎጭቤቹ ሆሮ ኣጋበኡ» ይ ኡመዕሬን ጤሌዕሌም» ይህንገን ት ሆጉት ኣዲንያት ከለቀንቶች ኬሸ እክ ጎፎኡ።

4 ቱሁ ጠለለ መጻፍ ኣዘን መቶ ቤቾን ለመልቀ በርተኔሃ «መገኑ ለመልቀ በር ሆጎችሰ ጉዕሚቶን ፎሎጭቤቹ» የመም ከተበሞኡ።

5 ህትን ወዕና የመሞገን ለንኪሃ «ፎሎጭኤቤቹኤ ሆሮ ኣጋበኡ» የኖ።

6 ሁኩ ዋዕነ እንጂል ላገት ዱዱ ብሰንጉጎሰ አዘዘሙ ግቦአሩ ፎሎጭኤ ቤቹ ኣጎበአ፤ ጠዉ እኮጎሬ ህክ ቤቹ ኣጋ መት-መቱ መኑ ሄኡሰ ህንቅሃን።

7 ሁኩን ሄጭ የመሞገን «ከበር ላገሰ ሞጮጭቲንጎ ቀልብክዕኔ ዱድሶኖቹ»

ይ መገኑ አበ ዘማኒች ኤተሮን ደዉዴን ጠወዕዮ ላገት «ከበር» ዬኖ መቱ በር ወሰኞኡ።

8 እያሱ ፎሎጭሾሰ እቃን መገኑ ለንኪሃ ዋሎ በርተኔ ጠወአናበአ እቅ።

9 መገን ኡመተሃ አበ በሬ ፎሎጭ እኩደኖ ፎሎጭ ከ ኤተሩ አሆኖ።

10 ህትን መገን ፎሎጭቤቹ አገኖሁ አዪሁ መገኑ ሆጎችሰ ፎሎጭገን እሰሁ ሆጎችሰ ፎሎጭኖ።

11 ህዳን እኮቤቹን ነኡ ብሬ ዘማን መኒሃ አዘዘሙ ግብ ሞሳልተ አሞኒን ኡምሳምበአገ ህከን ፎሎጭን ኣንጎተ ጠረኛኖ።

12 መገን ላገት ፎሰን ሄኣኢተለከ ሆጉተ አጎአጎጎ፤ ለሞ ኣዲን መረኖ ብሲች አበ እጳሸጎጎ፤ ነቢሳለከ እያን መላይመተለከ ህምቡተ አደ እኩተ ኢለ ሙረንሰታአጎጎ፤ ቀልብ ኣዘን ማጠሞ ሰውተለከ ሂዕላቶተ አደ እት ደጋአጎጎ።

13 ከለቀሞርቹ ጉዕሙንኩ መገን ብሬች ማጠመናበአ፤ እሰ ብሬን ጉዕሙርቹንኩ ግልጠለከ ከል አክ ለለኖሃን፤ ነኡን መሰለ አሰናሚሁ እሰ ብሬኒት።

እሰ ሎረ ቂሰ ህለቀ አሁሰ

14 መገኑ ዮ ቤቹ ሰማሃ ኦርዕዮ ሎሩ ቂሰቹ መገን ቤቱ እሰ ዮኔቤቹን አመዕነቱኔ ጠረኝንሰ አንፎ።

15 መሰንትሰ ኔሳሃ ዮ ሎሩ ቂሰቹ ሆንጎምረ መረርሲጨኖኔሃን፤ ጉዕሙ ጠሞንን ኒገ ፊተንሞኢሃን፤ እኮጎሬ ጨብ አዕኖበአሃን።

16 መገኒች ማርቱተ ቶንጎተለከ ሀዕሊንሹ ሀሰሰኛኔ ወክት ኣሰቱተ ኣእኖተ ማረኖ መገን ብርተ አመዕነቲን ሆንጠንኮ።

5

1 ጉዕሙንኩ ሎሩ ቂሰት መን በለች መጠረንታአ፤ ጨብ አቶ መን ወጥ መገኒሃ ክትምለክ ሰደቀ ሆንጠህሲሃ መገኒን መጠረንቶአረ።

2 ሁኩ ቂሰቹንኩ ሆንሃ እኮቤቹን ገሞተለከ ሉሳአረ መረርሰጮተ አጎላኖ።

3 እሰ ገውንኩሰ ሆንሃ እኮቤቹን ኡመት ጨቢሃ ጠለዕል አሁዕናን ገይሰ ጨቢሃለከ መን ጨቢሃ ክትመ ሆንጠህሲሁ ሀሰሰኛሰ።

4 ሀሩንገ መገኒን ገአምሳች ሎረ ቂሰ እህ ኬዕምኝ አዪሁ ደኣተ አጎላኖበአ።

5 ህትን መሰህ ሎረ ቂሰቹ አሆተ ገዉሰ ሎሪሰኖበአ፤ ጠዉ እኮጎሬ ህክ ሎረመተ ደኤኢሁ «አት ኢሃ ቤቱ፤ እንን ከበር እሎንኬ» ዬ መገኒችት።

6 ህትን መገኑ ዋሎ ቤቾን «አት መልኩ-ዴዳቱገ ቂሰሙ ሹምንትገ ዘላለሚሃ ቂሰሃን» የኖ።

7 እሰን መገቹ እክ ዱንያ እሰን ሂዕዮ ዘማኔን ሬሆች ፊሶሰተ አጎላኖ መገን ቤቹ አበ ያረናንለከ እንጂጂን አበ ዱኣ አዕኖ፤ እሰን መገኑ ዋረኖሃ እኮቤቹን ዱኡሰ ሞጮጫም።

8 እሰን መገን ቤቱ እክ ኦርሸ ኣዘን ህጎጎሬሁ ህክ ቶጎ ኦርሻች አዘዘሙ ተማር።

4:3 መዝ. 95፣11። 4:4 ክል. 2፣2። 4:5 መዝ. 95፣11። 4:7 መዝ. 95፣7-8። 4:8 ዘዳ. 31፣7፤ ኢያ. 22፣4። 4:10 ክል. 2፣2። 5:3 ለዌ 9፣7። 5:4 ፋል. 28፣1። 5:5 መዝ. 2፣7። 5:6 መዝ. 110፣4። 5:7 ማቶ. 26፣36-46፤ ማር. 14፣32-42፤ ሉቃ. 22፣39-46።

- 9 እሰን ኩሌኖስርቺ ዮበኢሃ እክ አዘዘንታሰሀኑኡተ ጉዕሚንከ ዘላለም ጡሚሃ መሰተ አኩሰ።
- 10 መገኙ ኢሰ መልክ-ጼዴቄ ቂሶማ ሹምነትገ ሎረ ቂሶቹ አዕዮሰ።

መኑ አመዕነቱሰ አጉርታበእገ ኣሰንቶ ሸዘነተ

- 11 ከን ጠውተኔሃ ልግቡ ጠወዕናም ጠዉ ዮኔ፤ ጠዉ እኩጎሬ ቴሱ ገበንቺን ተማሩ ሆንገተቤቺሃ ሃረን ክዕኔሃ ኩሉ ኦርሸተ።
- 12 ከ ወክት ኢላ አሰተማረተ እኩንታ እቅ፤ እኩጎሬ መቱ መንቹ መገን ላገ ዎኔ ትምርቲሃ ክዕኔሃ ለንኪሃ ተማርሱ ሀሰስሮ፤ ህትን አሰገን ጠረኘን አቸተ አሁዕነ አዙተ ሀሰሳህዕኔ።
- 13 መሰንትሰ እዙተ አዎንሱ ጉዕሚንኩ ኦሶተ እኩቤቺሃ ጡመርቺ ሃረርቺቹ አደ አዕይ ደገናበእ።
- 14 ጠረኘት አቸት ሀሲሳኢሁ ጡመለከ ሃላ አደ አዕይ ደገኖ ሎርሎረ መኒሃት።

6

- 1 መሲህተኔሃ ዎዕና ኩለም ትምርተ አጉርን ጠረኘን ትምህርትበ ህንጎ፤ ሃላ ሆጉተ አጉርን ቶበንት መገኖን አመዕን ቀበበ ለንኪሃ እጃርኩንከ።
- 2 ህትን ጠመቀምተኔሃ፤ መን አሌን አንገተ እኡን ዱአ አለተኔሃ፤ ሬዮ መን ከአለተኔሃለከ ጉዕመ ዘማንከ አህኖ ፍርድተኔሃ ኩለም ትምህተ ለንኪሃ እጃርኩንከ።
- 3 ህካን አጉርን መገኙ ዩጎሬ ብርተ ዋልን መርኖ።
- 4 አመዕነቱሰ ካደ መኑ ቶበት ህት እክ ፈንቀልቶተ አታልታአ? ኩ መኑ ከኒች ብርተ ኑሩ ለልዮሰ እቅ፤ ሰሜ ሸልማት ቀመሶ እቅ፤ ጠሊላ አያኒን ሜጡበ ቤቀማኑተ እኩ እቅ።
- 5 መገን ጡመ ላገተለከ አሜተኖ ኣዱንያ አል ዋልቀተ ቀመሶ እቅ፤
- 6 ፈንቀልት ካደ ጎሬ ጨብ አጉርታቤቹ አሰተ ፈንቀሹ አታልሲሰበሃን፤ መሰንትሰ አሰ ገውንኩሰ ገይሰ ቤሲሃ መገን ቤቱ ለንኪሃ ሰቀልቶአረለከ ሆፍሶአረ።
- 7 ልግብ ወክት መቱ መንቹ ኡለሰ አሌን ኡቦ ጤነ አጋን አቡረኖሴ መንቺሃ ውጠተ ኣታ ኡለት መገኒች ማሰተ ደአታ ኡለተ አጉዳእ።
- 8 እኩጎሬ ህት ኡለት ኡተለከ ሸርፍቱተ ነሰቶጎሬ ሀሴንባተ እካኣ፤ ደዕልተ ቦርሪሃ እካኣ፤ መጨረሹሰ ግራን ቡባእ።
- 9 አጉንቴንተ አመኤ ኦሶ! መሃ ክዕኔተኔሃ ህትን ጠወዕናምጎሬ ጡሚሃ ሀዕለኖሁ ቆህኖ ጠው ዮሀዕኔገ ደንጋም።
- 10 መገን ሱዕምተኔሃ ይቴን ጠሊላኑተ ሀዕሎተ ዎዕነሃ እኩ ቴሁ አቴንተ ሆጉተለከ ለሊሴንተ ኢተተ ሀቦተ መገኙ ሸካበእ።
- 11 አዕኑ ጉዕሚንኩክዕኔ ተብሲን አገዕርቲንተረ አፎኖተ ኢላ ጠረኝመክዕኔ መጨረሽ ኢላ ለሊሴኖተ ሃዕሳንታም።
- 12 ነኡ ሃዕሳንታሚንኩ አመዕነቲንለከ አታዕለን ተብሳሃ ኣሰምሰ ጠወ ረገአ መነ አጉደኖታት ቤሉ ዋንክዕላሙ መነ እኩኖታበእ።

መገን ተብሶሁ ሀንቂሃ እኩገ

- 13 መገኙ አብራሃሚሃ ተብሳሃ ኣሴ ወክት ገዩቹሰ ሎሩ ጤሌዕለኖርቺ ዮሰበአቤቺሃ አሰ ገዎንከሰ ጤሌዕለን
- 14 «ሀንቅንከ እን ማሰኣንኬ፤ ዘርክን በትሳንኬ» ዩሰ።
- 15 አብራሃሚሃ አታዕል አበ ዘማን አገርቤቺሃ ተብሳሃ ኣሰምሰርቺ ደኤእ።
- 16 መኑ ጤሌዕለን ገይቶሰ በተአኖርቾን ጤሌዕለኖ፤ ህዕመሰ ቦርርን ኡርሰ በለሰ ዮ ኦደተ ጉዕመንከ በሊቾሰ ከንታእ።
- 17 ህትን መገኙ አሰ አላመት እኩዕነ ፈቅባሃ አሁሰ ለሊሶተ ሀሾቤቺሃ ተብሳሰ ቶጋ መኒሃ ቦርርን ጠረኝሾ።
- 18 አሰ ደረንትበለከ ክዘቤንበ ለሙ ጠወ ኣሰዮኔ፤ አሰን ተብሳላከ ጤሌዕሉሃን፤ ከን ለም ጠዋ መሳን ብረኝከኔ ዮ ተብሳሃ ጠረኝን ከፉ አታልኖተ ሆቀንሸ ደአኖተ እሰቤቺህ ሁኖምሩ ነኡ አበ ጠረኝመተ ደአኖም።
- 19 ኩ ተብሶሁ ዌደሩ ኒ አሌን ኡሱሬን ዎሎ ዌደር ስኑት መጋረጀ ህግ መገኙ ደገመኖ ኣዘ ጠሊላ ቤቹ ኣገኖ።
- 20 ሁኩ መልክ-ጼዴቄ ቂሶ ሹምነትገ ዘላለሚሃ ሎረ ቂሶቹ እኩ ኢሰ ኒተኔሃ ዎዕኔሃ እክ ኣጎአሃን።

7

ቂስቼ መልክ-ዴዴቄ

- 1 ኩ «ሳለመ» ዩኖ ባዶ ዳንገላክ ጉዕሚኝን ሎረ ቂስቼ እኮ መልክ-ዴዴቄ አብራሂም ምወተ ቄል ፈንቀሎ ወክት እሲን ምቃን ደቀም ማሰዕዮሰ።
- 2 አብራሂምን እሲን ኣግ አፎርቹኝ ጉዕሚቹን ቶሪኝ ሙቱሰ ኣሴሰ፤ መልክ ዴዴቄ ሱዕምሰ ፍሳረት ወዕሩን «ፈየ ምመ» ዩሃን፤ ህትን ምሉሰ «ሳሌም ምመ» ህከረንገ «ወገራት ምመ» ዩሃን።
- 3 መልክ-ዴዴቄሃ እኩለክ አመት የሰበአ፤ እላንሽ ዘርት የሰበአ፤ ዘማንሀሰ ብርት ሄእሀሰ ኤተሩ የሰበአ፤ ጠዉ እኮጎሪ መገን ቤት ምሳልተ እክ ዘላላሚሃ ቂስቼ እክ ሄአና።
- 4 ወዕኔ እኮ አብራሂም ኣግ ኤቦሀኒቶ ቶሪኝ ሙቱሰ ኣሴሰ ኩ መንቹ ሃንከ ሎረ ጎር ለዕዩ!
- 5 ሊዌ ዘራኛ ቂስ እኮእሩ ኤመቲኝሰ አብራሂም ዘርተ እኮ አመሰ ኦሶኛ ቶሪኝ ሙቱ ኣእታገ ትዛዙ ሕገን እዘዘሞሰ።
- 6 ሀኩ መልክ-ዴዴቄ ሊዌውያን ዘርተ እህበጎሪ አብራሂሚኝ ቶሪኝ ሙቱ ኣኤእ፤ ተብሴ ላገተ ኣሰሞሰ አብራሂም ማሰዕዮሰ።
- 7 ህካን እኮቤቹሃ ማዕኑ ሀንገሬኛ ማሰተ ኣአናገ ሸክት የሰበአ።
- 8 መቶ ኣዲን ቶሪኝ ሙቱ ቶጋዕሪ ሬታኣሃ መን፤ ህትን ምሉ ኣዲን ቶሪኝ ሙቱ ቶገናህ ህትን ሄአናሃ እክ መሰከረሞሰህ ጠሊሊ መጻፋን ከተበሞገን መልክ ዴዴቄት።
- 9 ቲህ ቶሪኝ ሙቱ ጭምእኣና ሊዌ ገውንኩሰ አብራሂም ኣዲን ቶሪኝ ሙቱሰ ባቸ ዩሃን።
- 10 መሰንትሰ መልክ-ዴዴቄ አብራሂምን ምቄ ኣሌን ደቀም ወክት ሊዌ አብራሂሚኝ ከለቀሞበአ እቅ።
- 11 ቲህ ሕኩ እሰረኤል ኤመቲሃ ኣሰሞህ ሊዌ ቂሶመ ኣዲኒት፤ ህትን ቂሶማን ጉዕሙርቹንኩ ዊመ እክ ደገሞ እቃን ሀሩንገ እህዕነ መልክ-ዴዴቄገ የኣ ምሉ ቂስቼ ሚ ሀሰሰና እቅ?
- 12 መሰንትሰ ቂሶመት ደረንቶኝ ህትን ቂሶመ ሕኩ ደረሙ ሀሰሰና።
- 13 ኩ ጠው አሰተኔ ኩለሞ ቂስቼ ምሉ ደቦቹት፤ ህከን ደቦኝን እዩህ መገኒሃ ክትም ሆንጠህሴኖ ጠረጴዘበ ሆንጠክ ካደሞህ የሰበአ።
- 14 መሰንትሰ ቀርቹ አለሞህ ኣይሁድ ደቦኝ እህሰ ለልዮእሃ ጠው፤ ሙሰን ኣይሁድ ዘሬ ቂስተኔሃ መቱርቹሃ ኩሎበአ።

መሲህ መልክ-ዴዴቄገ የ ቂስቼ እህሰ

- 15 መልክ-ዴዴቄገ የ ምሉ ቂስቼ ኣሚኝ ወክት ኩ ጠው ኑር እክ ለለና።
- 16 እሰ ቂሶመ ሹምንቱ መን ዘራኝሰ ኣሚኝ ሴሪን ኣሚቶአተ እኩዕናን ህገበ ሄእ ወልቃን ኣሚቶአታን።
- 17 መሰንትሰ «እት መልክ-ዴዴቄ ቂሶመገ ጉዕመ ዘማንከ ቂስቹን» የመም ጠሊሊ መጻፋን መሰከረሞሰ።
- 18 ህካን እኮቤቹሃ ወዕኔ ዘማን ሕኩ ላፈላክ ደግለልባሃ እኮቤቹሃ ድኞሞኡ።
- 19 እኮጎሪ ነኡ መገን ቤቹ ሆንጠንካም ቆህኖ ተብሶህ ኣሚኝኡ፤ መሰንትሰ ሙሰ ሕግ ኣዲን ሀኩ መንቹህ መገን ብሪን ነጠ እሆተ ኣታሎበአ።
- 20 ኩ ቂሶመት ኣሚቶአህ መገን ወኣድ ቤሉ እኮበአ፤ እኮጎሪ ምሉሰ ቂስ እኮእህ ወኣድ ቤሉሃት።
- 21 እኮጎሪ እሰ ቂሶመት ወኣዲን እኮእታን፤ መሰንትሰ
«መገኑ ሕት ዘላላሚሃ ቂስቹሃን» ይ ወኣድ ኣጎቤቹሃ ሰጩናበአ
የመም አሰተኔ ጠውእሞኡ።
- 22 ህከን ወኣድ መሳን ኬዕዮሀኒን ኢሰ ቆህኖ ወኣዲሃ ሩበታሰንቹ እኮኡ።
- 23 ምኔ ዘማን ቂስት ሆኑሰ ኣኑርቱዕናን ኣታበአገ ራሁት ከንቶቤቹሃ እሰ ወላንሹ ልግብያ እቅ።
- 24 እኮጎሪ ኢሰ ዘላላሚሃ ሄአናሃ እኮቤቹሃ ደረንትበ ቂሶመት የሰ።
- 25 ኢሰ አሰተኔሃ መገኑ ኤጮሰተ ጉዕመ ወክትንከ ሄአናሃ እኮቤቹሃ እሰ ኣዲን መገንበ ሆንጠካረ ዘላላሚሃ ጡምሰሰተ ኣታለና።
- 26 ኔሳሃ ህትናሙ ጠሊሉ፣ ኩሌናሰርቹ የሰበአሁ፣ ነጠ፣ ጨበኛኖኝ ኣደ እኮሃ፣ ሰሚኝ ኣሌ ሞል ጎት ዩኤህ ሎሩ ቂስ ሀለቄ ሀሰሰና።
- 27 እሰን ምሉ ሎረ ቂስገ ሃጭ ገይሰ ጨብተኔሃ ኤተሮን ኤመት ጨብተኔሃ በሪን በሪን ክትም ሆንጠህሱ ሀሰሰናሰበአ፤ ገውሰ ክትም ኣዕይ ሆንጠህሹ ወክት ለንኪሃ በርጌናበአገ ሚጥቶረን ሹል ቅጥ ኣዕዮኡ።
- 28 ሙሰ ሕኩ ላፈ መን ሎረ ቂስ ኣምንሳኑተ ኣዕይ ሹመኖሰ፤ እኮጎሪ ሕገኝ ኤተሮን ኣሚኝህ ወኣድ ላጋን እኮጎሪ ዘላላሚሃ ኩሌናሰርቹ የበአሃ መገን ቤቱ ሹመ ኣዕዮሰ።

8

እሲ ሃዕሮ ወኣድ ላገ ሎረ ቂስ ሀለቀ እሁስ

1 ቴሁ ጠወዕዮም ጠዊኛ ቡዕሎስ ከኒት፤ ሁኩንን ጉዕሚኛ ሎረ እኮ መገን ምወ ቦርጭመ መኪ ኣዲን ሰማን አፋዕሌ ህትናሙ ሎረ ቂስ ሀለቀ ኮኔ።

2 እሲ ሀንቅ ዲካነ እኮ ዱእ ምኒ ኣዜን ቂስ ሀለቀ እክ ካደመኖሃን፤ ዲካኑስ መን አንጋን እሁዕነ ቀርኛ አንጋን ካሰምእሃን።

3 ሎሩ ቂስ ሀለቀት ጉዕሙንኩ ሾመንታህሁ መገኒሃ ሰደቀለክ ክትመ ሆንጠህሲሃት፤ ህካን እኮቤቲሃ ከን ቂስቲሃ ክትሚ ሆንጠህሲኖ መቲርቲሃ ሄኤ ሀሰሰኖ።

4 እሲ ኣዲንያ አሌን ሄዕኖአቃን ቂስቲ እሁኖበእ እቅ፤ ሁኩንን ሕግገን መገኒሃ እኤኖርቲ ሆንጠህሳ ሞሉ ቂስት ሄኮቤቲሃት።

5 እሲ አቶኢሁ ሰማን ኖኢሃ ምሳልተለክ ሀላሃ እኮህን ኣዜኒት እቅ፤ ሁኩን እኮሁሙስ ዲካነ መክሶተ ቅጥዬ ወክት መገኑ «ቆተ አሌን ለሌሄ ሃለን ጉዕመርቲንክ አገርት አእ» ይ አዘኖሰጋት።

6 ቴሱ እኮጎሬ ኢሰ በል መንቲ እኮ ወኣድ ላገተ ኑባኛ ወኣድ ላጋኛ ሎረ እኮቤቲሃለክ ቆህሆ ወኣድ ላጋን ጀመረሞሃ እኮቤቲሃ እሲሃ ኣሰንቶ ሆጉት ሎረጋን።

7 ሞዕኔ ወኣዲን ሉጨንሹ ኖበእቃን ለንክ ወኣድ ላገት ሀሲሳሰበእ እቅ።

8 መሰንትሰ ቀርቲ መገኑ እሳን ሉጨንሹ ደግ

«ቴሱ እን እሰራኤልለክ አይሁድ ባድ መኒን

ሃዕሮ ወኣድ ላገተ ኣጋም ወክቲ አሚተኖ» የኖ ቀርቲ።

9 ኩ ወኣድ ላገተ እን ግብጽ ባዲኛ ፉሾሰተ አንገሰ አፎም በር አበኖኖንከሰ ኣጎም ወኣድ ላጋ ደነበእ፤ መሰንትሰ እሰ ኢ ወኣድ ላገተ ጠረኝት ሄኤ ሆሳቤቲሃ አጉሮገን።

10 «ሀከን ዘማኒኛ ኤተሮን እሰረኤል መኒሃ

ኣጋም ወኣድ ላገት ተኔት ይ ጠወዕኖ ቀርቲ፤

ኢ ሕገንክ ቀልቤንከሰ ኣኣም፤

ወዘኖንከሰን ከተባም፤

እነሰ መገኑ እሃም፤

እሰን ኢ ኤመት እካኢ።

11 እሳኛን አዪሁ ሞሉ መነሃ

እመሰቤቲ «መገኑ ደግ» ይ ተማርሰኖሰበእ፤

መሰንትሰ ቀርቲ ኬሽ ሎረ ኢሉ ጉዕሙንኩ

ኤሳሃ ደጋኤ።

12 እን እሰ ሂልመተ አጉረንሰ፤

ጨብሰን ለንኪሃ ሰውያምበእ» የኖ ቀርቲ።

13 ቴሱ «ሃዕሮ ወኣድ ላገተ» የኖ ወክት ወዕኔ ወኣድ ላገተ ኑባኛ አዕኖኤ ዩሃን፤ ህካን እኮቤቲሃ ኑባጴኢሁ በአኖ ወክቲ ኢልኖኤ ዩሃን።

9

ኣዲንያ አሌን ዱእ እኤኖ ምኒ ክድመተኔሃ

1 ሞዕኔ ወኣድ ላገ ሰገዴኖ ሴሩለክ መን አንጋን አጀረሞ መገኒሃ ሰገዴኖ ምኑ ኖሰሃ እቅ።

2 ለሙ ክፍሉ ኖሰ ዲካኑ ቅጥይኖ እቅ፤ ወዕኔ አብል ክፍሉ ኩራክ አፋሼኖሁለክ ጠረጴዙ፤ ክትም ዳቡቲ ሄኤ ሞዕኔ ክፍሉ «ጠሊለተ» የመንታ እቅ።

3 ለንክ መጋረጂኛ ኤተር ኣዲን ደገመኖሁ ኣዝ ክፍሉ «ጠሊልኛ ጠሊሊ» ዩኖቤቲሃ ሄዕኖ እቅ።

4 ሀከን ክፍል ኣዜን ምርቂን መክሴመ ህጣን አጪሴኖ ጠረጴዬለክ ጉዕመንከሰ ቤቲ ምርቅ ቡራን መክሴመ ወኣድ ላገ ሳጥኑ ሄዕኖ እቅ፤ ሀከን ሳጥን ኣዜን «መና» ዩኖ እቲት ሄኤ ምርቅ መሰቡ፤ ለቶ ሀሩን በርትቲትለክ ቶኑ ትዛዙ ከተበም ክኑ ሄዕኖ እቅ።

5 ታቦት አሌን ኖ ጨቡ አጉረመኖ ቤቲ ቴላኖ መዲንከሰ ጌረዳ ጎንት ኖሰ መገን ኬዕምኝ ለሊሳ ክልቀቲ ሄኤ እቅ፤ ጠወ እኮጎሬ ከን ጠውተኔሃ ጉዕሚንክ ቴሱ መቲርቲሃ ጠወዕኖተ አታልኖምበእ።

6 ጉዕሙርቲንኩ ህት ቅጥ ዩኛ ኤተሮን ቂስት ሆጉስ አቶተ ዲካን ሞኔ ክፍል ኣዝ ጉዕመ ወክት ኣጋ እቅ።

7 ጠወ እኮጎሬ ሞዕኔ ኣዝ ክፍል ጠለዕል ሎሩ ቂስቲ ዘማኔን መቲ ወክት ኣገኖ፤ እሰን ገይሰለክ መኑ ደጉዕነ አቶ ጨብሃ ቂኑ አፋዕነ ህከ ቤቲ ኣገኖበእ።

8:1 መዝ. 110:1። 8:8 ኤር. 31:31-34። 9:2 ፋል. 26:1-30፤ 25:31-40። 9:3 ፋል. 26:31-33። 9:4 ፋል. 30:1-6፤ 25:10-16፤ 16:33፤ ዘኁ. 17:8-10፤ ፋል. 25:16፤ ዘዳ. 10:3-5። 9:5 ፋል. 25:18-22። 9:6 ዘኁ. 18:2-6። 9:7 ለዊ 16:2-34።

8 ዎሪ ዲካኑ ሄከን ቤቸን ኡር ሄእንን ጠሊልች ጠሊሊ ቤቹ መሰና ዎቆህ ፈንተኑ ሆጉሰ ጠሊሊ እያኑ ኩለና።

9 ኩ ጠው ከን ዘማኒሃ ሞሳልተ እህና፤ ኩንን ለሊሰናህ ሰደቀተለክ ክትመ ሆንጠህሰናሰ መንቻ ቀልብ መገን ብሪን ነጠ እኦሰተ አታለናበእ።

10 ጉዕሙንኩ ጠወ መገኑ ጉዕመርቹንከ ሃዕር እኦተ ኢሊ ጠለዕል ሆን አሌን ዲንክታ እትለክ አግ ህትን ዊን አዕሊን ነጠ እሄና ሴሪን እኮአራን።

11 ጠው እኮጎሬ መሲህ ቴሱ እህና ጡመ ጠዊሃ ሎረ ቀሰቹ እክ እሚቸኡ፤ እሰ አጎ መገን ዲካኑ ሎረለክ ዊመ ዊሚን እክ መክዮእሃን፤ ሁኩ ዲካኑ መን አንጋን መክዮበኢሃለክ ከን ኣዲንያ አሌን ዮበእሃ።

12 ጠሊልች ጠሊሊ ቤቹ ሚጦረን ገይሰ ቁገን ኣጎ ቤሉ ፊላእለክ ዎርጀመ ቁጉ እፍ ኣጎበእ፤ ህትን ዘማን ጉዕመንከ ሄእ ዎክት ኣሴኔ።

13 ፊዕላእለክ ዎርጀመ ቁጉ፤ ህትን ክትሚሃ ቡሴመ ሱሉም ጠበሩ ንጀሶ መን አሌን ብን እኤናረ ማል ንጃሲች ነጠ አዕይ ጠሊሊ አሰናሳሃ እኮች።

14 ጉዕመ ዘማኒሃ ሄእና ጠሊሊ እያን አዲን ገውሰ ህንቁርቹ ዮበእ ክትም አዕይ መገኒሃ ሆንጠህፕ መሲህ ቁጉ ሄእና መገኒሃ ካደሞተ ቀልብኔ ሄንከ ሬሁተ ኤበና ሂሊ ሆንች ነጠ እኦና?

15 መገኑ ገኤሰሩ እሰ ተብሰን ኣሴሰ ዘላላሚሃ ጎፍቤ ኡለተ ረገኑተ መሲህ ሃዕር ወእድ ላገ በል መንቻ እኮ፤ ሁኩንን መን ዎሪ ወእድ ላጋ ኣዜን ጠገም ሄዕዮ ወክት አዕዮ ጩቤች ገይሰ ሬሆን ጡምሶታት።

16 ሬሆና መንቻ ወሰያተ ኩዕሊርቹ ሄዕዮ ጎሬ መንቻሰ ሬሁተ አጥራመቴን ደጉ ሀሰሰና።

17 መሰንትሰ ሬሆና መንቻ ኩዕሊርቹ ዊመናሁ ሬዮች ኤተርንት፤ ጠው እኮጎሬ ኩዕሊሰ መንቻ ሬህባች ጠውሰ ዊሞተ አታለናበእ።

18 ህካን እኮቤቹሃ ዎሪሰ ወእድ ላጋ ቁጉ ዲንተኡዕነ ህትን ጠረኻዮበእ እቅ።

19 መሰን ሕግ ትዛዝ ኡመቴሃ ኩሎች ኤተርን ዎርጀምለክ ፊዕላእ ቁጉ ዊን ልቀለቅ ቢሸ ሆሊ ኦርዘንለክ «ሀሶጸ» ዬዮ ሀሚን ሕግ መጻፋንለክ ኡመት አሌን ኪፎ።

20 ህካን ኪፎንኩ «ኩን መገኑ አገርቶሮት እዘኩህዕይ ወእድ ላጋ ቁጉ ከኒት» ዬእ።

21 ህትን መሰን ዲካናንለክ ኣዜንከሰ ሄእ ጉዕማንከ ደግለሸቀሜና ኦዶ አሌን ቁጉ ኪፎ።

22 ሀንቅንከ መሰን ሕግ ሃሊን ቀዋርች ቤሉ ጉዕሙርቹንኩ ቁገን ነጠ እህና፤ ቁጉ ዲንተኡዕነ ጩቤ አገረመናበእ።

መሲህ ሬሁት ጩብ ቤሳእሃ እሁሰ

23 ቴሁ ኩ ሰማን ዮ ሞሳልተ እኮ ኦዳት ጉዕሙንኩ ከን ክትሚን ነጠ እካእ፤ እኮጎሬ ሰማን ዮ ሞሳልተ ከኒች በተእና ክትሚን ነጠ እሁ ሀሰሰናሰ።

24 መሲህ ሀንቅ ሞሳልተ እኮ መን አንጋን እጃረሞ ጠሊልች ጠሊሊ ቤቹ ኣጎበእ፤ ጠው እኮጎሬ ኒተኔሃ ይ መገን ብሪን ለሎተ እሰ ሰማሃ ኣጎ።

25 እይሁድ ሎረ ቀሰ ሀሊቁንኩ ዘማን ዘማኔን ገይሲሃ እህበ ቁጉ እፍ ጠሊልች ጠሊሊ ቤቹ ኣገናገን መሲህ ገዉሰ ልግብ ወክት ክትሚ አዕይ ሆንጠህሶተ ኣጎበእ።

26 ህት እኮች ኣዲንያት ከለቀንቶች ኪሸ ልግብ ወክት ኦርሸተ ቶጉ ሀሰሰናሰ እቅ፤ ቴሱ እኮጎሬ ዘማን መጩረሻን እሰ ገዉሰ ክትም አዕይ ሆንጠህሸ ጩብ ቤሶተ በረገምከ ሃሊን ለልዮኡ።

27 መኒሃ መቶረ ሬሁ ሀሰሰናሰ፤ ህትን ሬሆች ኤተርን ፍርዱ ዮኡ።

28 ህትን መሲህ ልግብ መን ጩብ ቤሶተ መቶረ ክትመዎኡ፤ ህትን ጩብ እጃሃ እሁዕነ እሱ አገርታእረ ጡምሶተ ለምቅ ወክት ለለና።

10

1 ቴሱ ሕጉ ከ ኤተሩ አሚተናሁ ጡመ ጠዊሃ ሀላሃ ቤሉ ህንቅ ደናሰበእ እቅ፤ ህካን እኮቤቹሃ ጉዕመ ወክትንከ ዘማን ዘማኔን ክትመንታ ክትመተ እፍ መገን ቤቹ ሆንጠካ መን ሆሮን ነጥኑተ አኦተ ሆሮ አታለናበእ።

2 አታሎሃ እኮ እቃን ሁኩ ክትም ሆንጠህህሰ መኑ መቶረ ጩብቻሰ ነጠ እኮች ኤተርን ነጠ እኮገ ቀልቡሰ ደገናቤቹሃ ክትምሰ ሆንጠህሱ እጉርታ እቅ።

3 ጠወ እኮጎሬ ሁኩ ክትመት ዘማን ዘማኔን ጩብ ቃግሳእራን።

4 መሰንትሰ ዎርጀመለክ ፊዕላእ ቁጉ ጩብ ቤሶተ አታለናበእ።

5 ህካን እኮቤቹሃ መሲህ ከ ኣዲንያ አል እሚቸ ወክት «ክትመለክ መገን ሞኒሃ ሆንጠህሴርቹ ሀሶንትበእ፤ ጠወ እኮጎሬ ጀሰመ ቅጥ አቶንቴኤ፤

6 ህትን ጉዕመንከሰ ቡሴኖ ክትምለከ
ጨብ ነጠ አእኖ ክትሜን
ሙንደእንትበእ።

7 ህከ ወክት መጻፋን፥
«ኢትኔሃ ከተበሞገን ሁኩዕኑን ኢ መገኖ!
እን ኪ ሙራድ ዊንሾተ ከቤቹ አሚቾም» ይእ።

8 ወዕናሃ «ክትመለከ ሰደቀተ፥ ቡሴኖ ክትመለከ ጨብተኔሃ ክትሜኖ ክትም ሀሶንትበእ፤ እሶን
ሙንደእንትበእ» ኩሩኡት ሕገገ ሆንጠካካረ ይእ።

9 ህከኒቕ ኤተሮን «ኢ መገኖ! እን ኪ ሙራድክ ዊንሾተ አሚቾም» ይእ፤ ህትን ዎኔሲሃ ክትመ ከም
ቤቾንከሰ ለምቐ ክትም ጠረኝሾ።

10 ህካን አኩቤቹሃ መሲህ ኢሰ መገን ሰውት አእን ሜጦረ ሹል ማለሰ ክትም አዕይ ሆንጠህሲንከሰ
ነኡ ጨብቻኔ ጠሊላትተ ነንኮም።

11 ሁኩ ሎሩ ቁሰት ጉዕሙንኩ ህከ ጨብ ቤሶተ ሆሮን አታልትቡ ህከ ክትማከተ ልግብ ወክት
ሆንጠህሰን በሬን በሬን ኡር ካደመኖ።

12 ጠዉ እኮነሬ መሲህ ዘላለሚሃ መቱ ክትመ ሆንጠህሰቾች ኤተሮን መገን መኬ አዲን አፋዕልዮኡ።

13 ከኒቕ ኤተሮን ዲነሰ ሎካቻሰ ዋሮን እኩተ ኢላ አገረኖት።

14 መሰንትሰ መገኒሃ አደ እኩሁ ሜጦረ ሆንጠህሰቾ ክትሚን ዘማኒሃ ጉዕሚሃ ሹል ነጣኑተ
አዕዮሰቤቹሃት።

15 ሄጭ ጠሊሉ አያኑ ከን ጠዋን መሰከረኖኔ፤

16 «ህከን ዘመኒቕ ኤተሮን
እሳን ኢጋም ወኢድ ላገት ተኒት የኖ ቀርቹ፤
ቀልቤንከሰ ኢ ሕገ አፋሻም፤

17 ህትን «ጨብሰለከ ሂላ ሆጉሰ
ሆሮ ሰውያምበእ» የኖ።

18 ህካን አኩቤቹሃ ጨቡ ጉዕሙንኩ አጉረሞች ኤተሮን ጨብተኔሃ ሆንጠህሰኖ ክትሙ ሆሮን
ሄእኖበእ።

መገን አደ ሆንጠሁ ሀሰሰኖሃ እሁሰ

19 አመኤ ኦሶ! ኢሰ ቂግ መሳን ጠሊልች ጠሊላ ቤቹ እንተተ አታልሲሰኖኔ መለልመተ ደእኖም።

20 አንጋሚንኩ መጋረጅ አዲን ሁኩንን ገይሰ ጅሰም አዲን ፈቼኔ ሃዕር ዘመኒሃ ጉዕሚንከ ሄእኖ
ዋቂት።

21 መገን ምኔን ሹምነቱ ዮሰ ሎሩ ቁሰቹ ዮኔ።

22 ህካን አኩቤቹሃ ሂላ ጠዋቾ ነጠ እንኮተ ቀልብኔ መሲህ ኢሰ ቂገን ነጠ አዕን ጅሰመኔ ነጠ ዊን
አዕልን ሀንቅ አመዕነተንለከ ነጠ ቀልቤን መገን ቤቹ ሆንጠንኩ።

23 ከ ወኢድ ላገተ አሴኔህ አመዕነሞኢሃ አኩቤቹሃ ከን አመዕንን መሰከርኖም ተብሳሃ ለሞንሱዕነ
ጠረኝንሰ አንፎ።

24 ኢታንለከ ጡመ ሆንን መት-መቱኔ ጠረኝጨቀሞ ቤሉ ሀበቀሙንከ።

25 ጉዕመ ወክትንከ ደቀመን መት-መቱኔ ጠረኝንሰ ቤሉ መት-መቱ መኑ ጭምደ ሮሶገን ጭምደ
አጉርኑንከ፤ ዋዕኔቻ ባሰንከሰ ቀርቻ አሜት በሩ ሆንጠኮገ ሰውይቲንከ ከ ጠወ አዕዮ።

26 ከኑ ሀንቅ ደእኖሚቻ ኤተሮን ኢትን ጨብ አዕኖምጎሬ ጨብነሃኔ እሆኖ ዋሉ ክትሙ ሄእኖበእ።

27 ጠዉ እኮነሬ ከ ኤተሩ አገረመኖሁ ዋጅሲሰኖ ፍርድ በሩለከ መገኑ ግባ መነ አታ ጠረኝት ገረት
ዮኡ።

28 ሙሲ ሕገ ህንቆ መንቻ ለሙ ህከረንገ ሰሱ ምሰክሩ አሌሰ መሰከሮች መረርሲጩ ዮበኢሃ ሬሆኖ።

29 ህከረ መገን ቤቱ ህንቆሁ፥ ገዉንከሰ ጠሊላ አዕዮሰ ወኢድ ላገ ቂጉ ንጀሰሾሁለከ መገን አሰቶ
አያን ቦሮሮሁ ሄንከ ጠረኝገ ቀጠእመኖሃ አጉደኖሀዕኔ?

30 መሰንትሰ «ገዲተ ፋላሚሁለከ ሀሰሰኖ ኤዳሃ ባታሚሁ አኔት» ህትን «መገኑንኩ ኡመትሰ አሌን
ፈረደኖ» ይእሁ አዩት ጎር ደንጋም።

31 ህካን አኩቤቹሃ ሄእኖ መገን አንጋን ኡቡ አበ ዋጅሲሰኖሃን።

32 መሲህ ኑር ቶገኑታች ኤተሮን ልግብ ኦርሸተ ኣእቲን ጠረኝ አጸንሺን እጅቴንተ ዎኔ ዘማን
ሰውይዮ።

10:11 ፋ.ል. 29፥38። 10:13 መ.ከ. 110፥11። 10:16 ኤ.ር. 31፥33። 10:17 ኤ.ር. 31፥34። 10:22 ሊዌ 8፥30፤
ሕ.ከ. 36፥25። 10:27 ኢ.ላ. 26፥11። 10:28 ዘዳ. 17፥6፤ 19፥15። 10:29 ፋ.ል. 24፥8። 10:30 ዘዳ. 32፥35-36።

33 መት-መቱ ወክት መን ብረን ቦሮሪማህዕኔ እቅ፤ ጀልጀል ይቴንታእ እቅ፤ መት-መቱ ወክት ህትሩም ኦርሸት ኢሌሰህኑኡን ሜጡብ አዕኑሁ መዲንከሰ እኩን ኦሪሸተ ቶጌንታኦ።

34 አዕኑ ኡሱረሞ መኒሃ አመዙክንታ፤ ቆሀኖለከ ጎሬብ ዲንያት ሰማን ዮሀሳይገ ደጌንተቤቹሃ ዲንያክዕኔን ዘረፈንቶ ጎሪ ፈረኩን ጠወሰ ሙንዲኖን ቶጌንታኦ።

35 ቴሱ ሎረ ሸልማት ደአቴንተገ አእኖ አመዕነሙክዕኔ ኡጅቶናቹ።

36 መገኑ ኢተኖርቹ እቴን ሹልቴንታች ኤተሮን መገኑ ኣሶህዕኔተ ወኣድ ኣጎርቹ ደአቶናተ ፈረኩን አገሩ ሀሰሰኖህዕኔ።

37 መሰንትሰ

«ሁኩ አሜተኖሁ ቀዎ ወክቲች ኤተሮን አሜተኖ፤

ዲንከኖበእ፤

38 ኢሀ እኮ ፈዩ መንቹ አመዕነትን ሄኡ ደአኖ፤

ጠዉ እኩጎሪ ኤተሩ ዋል ፈንቀሎ ጎሪ

እን እሲን ሙንደአምበእ» የመም ከተበሞኡ።

39 ነኡ እኩጎሪ አመዕነቲን ጡምታህኑኤኒት ቤሉ ኤተሩ ዋልት በአሀዕኑኒበእ።

11

አመዕነት-ትኒሃ

1 አመዕነቱ ዩ ተብሲን አገዕርናምረ ደአናምገለከ ለዕንበርቹ ሄኡስ አጥራውሙኑ ኩለኖኔሃን።

2 ዋዕኔ ዘማን መኑ መሰከረሞሳህ አመዕነትሰ መሳኒት።

3 ከለቀሞርቹ ጉዕሙንኩስ መገን ላጋን ከለቀሞገለከ ለዕናምርቹ ጉዕሙንኩ ለዕንበርቹች አሁሰ አመዕነቲን ደንጋም።

4 አቤል ቃኤሌ ክትሚች በተአኖ መገኑ ሙንዲሲሰኖ ክትም አመዕነቲን ሆንጠሀሾ፤ እሰ ሆንጠሀሾ ክትም መገኑ ኢት ቶጎ ወክት ኣቤል አመዕነትሰ መሳን ፈዩ እኮገ መገኑ መሰከሮሰ፤ ኣቤል ሬዮ ጎሪ አመዕነቲንከሰ አዕዮ ሆጎን ከበሪ ኢላ ጠወአመናት።

5 ሄኖክ ሬሁተ ለኡዕነ ሰማሃ ኦርዕዮሁ አመዕነቲኒት፤ እሰን መገኑ መሴሰቤቹሃ ደገሞበእ፤ ሄኖክን መገኑ መሴሰናንሰ ሄኖኑ መገኑ ሙንደአሲሾኑ መሰከረሞሳ።

6 ህትን አመዕነቱ ዮበኢሃ መገኑ ሙንዲሲሱ ኣታለመኖበእ፤ መሰንትሰ መገን ቤቹ ሆንጠሀኖሁ ጉዕሙንኩ መገን ሄኡሰለከ እሱ ሀሳህኡተ ሸልማት ኣሰኖ አሁስ አመዕኑ ሀሰሰኖሰ።

7 ኑህ እሊን ለእባንከ አሀኖሃ አሁሰ መገኑ ኩላንሰ መገኑ ዋጅ ምንሰ አበርሱ ጡምሶተ መርከብ መክሾሁ አመዕነቲኒት፤ ኑህ አመዕነት መሳን ኣዲንያ አሉ ጨበኘ እከ ደገሞቤቹሃ ፈረደሞሰ፤ ኑህ አመዕነቲን ደኤኖ ፈይመተ ደአቶ መን በሊች መቱሰ እኮ።

8 አብራሂም አርሰተ አዕድ አፈሰሮ መርተ ገአሞ ወክት መረኖሰቤቹ ሀከንቤቹጎር ደጉዕናን ትዛከ ቶጎ መርሁ አመዕነቲንት።

9 እሰገን ተብሲ ላገተ ረገኣኑተ እኮሁኑኡች ይሳቂንለከ ያቁበን ተቢሲን ኣሰሞ ባዶን ሆቀንሸ ኣጎ ዲካናን ሄዕዮሁ አመዕነቲንት።

10 መሰንትሰ አብራሂም መገኑ አቀጅሁለከ ጠረኝሽ እጃር ጠረኝ ቀበቡ ዮ ዘላለም ከተመ አገዕርሴቤቹሃት እቅ።

11 ህትን ሳራሃ ተቢሳ ኣሴ መገኑ አመዕነሞሃ እኮገ ደጎቤቹሃ ሄንከሃ ኑባቹተ እሆንከሴ እሉ ኣታልትባተ እኮጎሪ ላፈተ እኮተ ኣታልታ ወልቀተ ደአቶኢሁ አመዕነቲኒት።

12 ህካን እኮቤቹሃ ሬዮ መንገ ዋለአመኖ መቲች አብራሂሚች ሰሜ ቤዘገ በተዕዮለከ ባር ሸፋርገ ዋለእንቡ ዘርት ደገንቶኡ።

13 ሁኩ መኑ ጉዕሙንኩ ሬቶተ ኢላ አመዕነቱሰ አገርት ሄኡኡ፤ እሰን ኣሰሞሰ ተብሳሃ ደአቶበእ፤ ጠው እኮጎሪ ሀካንን ቁዕራሻን ለእ ሙንዲኖን ኣእቶኡ፤ እሰን ኣዲንያ እሊን ኮሃለከ ዋሎ ባዲች አሜቶረ አሁስ ጠወኡኡ።

14 ህት ጠወኣ መኑ ሀንቅ እኮ ገይሰ አሀኖ ባዲ አገርታገ ግልጠ እት ለሊሳኦ።

15 ህከ አጉርት ፋልቶ ባዲ ቃጎአቃኔተ ህከ ቤቹ ፈንቀልቶተ ኣታልታ እቅ።

16 ቴሱ እኮጎሪ በተአኖሲሃ ሰማን ዮ ባዲ ሱንታኦ፤ ህካን እኮቤቹሃ መገኑ ከተመ ቅጥ አዕዮሰቤቹሃ «መገኑኔ» ይት ገአቶጎሪ ሙልሰኖሰበእ።

17 አብራሂም ፊተነሞ ወክት አመዕነቲን ኣሳቀ ክትሚሃ ሆንጠሀሾ፤ ተቢሴ ላገተ ኣኤ አብራሂምን ሚጥቹሰ ቤቱ ክትሞተ ተቃጠር እቅ።

18 ሁኩንን መገኑ «ዘርከ ኣሳቂን ገአንታኦ» ይዮሰ እቅ።

10:38 ዕጎ. 2፡34-4፡ 11:4 ክል. 4፡3-10፡ 11:5 ክል. 5፡21-24፡ 11:7 ክል. 6፡13-22፡ 11:8 ክል. 12፡1-5፡
11:9 ክል. 35፡27፡ 11:13 ክል. 23፡4፤ 1 ዱዱ. 29፡15፤ መዝ. 39፡12፡ 11:17 ክል. 22፡1-14፡ 11:18 ክል.
21፡12፡

19 እብራሂምን መገኑ ሬሆኙ ኪሶተ አታለኖገ ደጎቤቸሃ ሬሆኙ ኪዕየህንገ ሞላዕይ ቤቱስ ኢሳቀ ደኤለ።

20 ኢሳቀን ብርተ ዋሽ እሜተኖ ጠወ ሰውይ ያቁበለክ ኤሳ ማሰዕየሳህ አመዕነቲንት።

21 ያቁብ ሬሆኖ ወክቱ ኢሊ ወክት ዩሱፍ አለተ መት-መቱሰ ማሰዕየሁለክ ሸካንከሰ ሸከዕይ መገኒሃ ሰገጀህ አመዕነቲንት።

22 ዩሱፍን ኢተርን ሬሆተ ሆንጠኮ ወክት እስራኤል ኦሱት ግብጽ ባዲኝ ፋልታገ ጠወዕየሁለክ ወቀሰ እጉርት መርታበእገ እዘዞሳህ አመዕነቲንት።

23 ሙሰ አለሞ ወክት እበ ተሽ የኖ ጨል እሁሰ ሙሰ አመሰለክ እኑስ ለኦቤቸሃ ዎም ትዛዝ ዋጅቱዕናን አመዕነቲን ሰሱ አገነ ገበጭ አቶሰ።

24 ሙሰን ነጻ ወክት «ፍራኦኔ ቤቶ ቤቱ» ዩን ገኤኖሰበእገ አመዕነቲን ግር።

25 መሰንትሰ ጨቤን ቀዎ ወክቲሃ ደኤኖ ሙንዲኖኝ እበ መገን ኡመቲን ሜጡብ እክ ኦርሸተ ቶጉ መጠርቢቸሃት።

26 ሙሰ ብርተ ዋሽ እገረኖሰ ሸልማት ደኤኖገ መገኑ ቱክ ይ ለዕይ አመዕኔቤቸሃ ግብጽ ባድ ቀባጦኝ በትሽ መሰህተኔሃ ህንቀሙ አበ እሁሰ ሰውዬለ።

27 እሰን ዎም ኡሙዕርተ ዋጅሰን ግብጽ ባዲኝ አመዕነቲን ፋሎ፤ እሊን ለኤንበ መገኑ ለዕየህንገ አዕይ እላማንተሰ ጠረኝ ኡረለ።

28 ሀንገፈ አለተ ቤሰና መላይኪቹ እስራኤል ሀንገፈ አለተ ኡለኖበእገ ሻሽግለክ ጡፋን ቄጉ ክፍ ሴረ አመዕነቲን አዕየ።

29 እስራኤል መኑ ዋልቶ ኡላን ቶልታህንገ እክ አመዕነቲን ኤርትር ባረ ቶልቶኤ፤ እኮሳሬ ግብጽ ባድ መኑ «እሰገን ቶልናም» ይት ኬኦ ወክት ባር ዋን ኣእንቶኤ።

30 ህትን ኢያሪኮ ከተም ግብኩ እስራኤል ኦሱት ለመለ በር አመዕነቲን ዘህቶኝ ኤተርን ድጀም ኡቦ።

31 ዝነተ አተ ረኣብ ኡለተ ዳንድታ መነ ወገሬቲን ቶሳቤቸሃ ህከ መገኒሃ እዘዘንቶበእ መኒን ሜጡብ በኡዕነ ሬሆኙ ጡምቶኢህ አመዕነቲንት።

32 ቱሱ ዋሎ መ ያም? መሰንትሰ ጌድዎኔተኔሃ፣ ባረቁተኔሃ፣ ሶምሶኔተኔሃ፣ ዩፍታሂተኔሃ፣ ደዉዴተኔሃ፣ ሳሙኤሉተኔሃለክ ነቢያከተኔሃ ኩላምበኢህ ወክቱ ሄዕበኤቤቸሃት።

33 እሰን አመዕነቲን ዎመተ ቁልቶኤ፤ ጡመ ሆጉተ አቶኤ፤ መገኑ ኣሴሰ ተብሴ ላገተ ደእቶኤ፤ ዘቤ ኢፎከከ ጡፎኤ።

34 ህትን ገረ ዎልቀተ ቤሶኤ፤ ገመጠሞ ሲፍኝን ፋሽእቶኤ፤ ላፍማኝ ጠረኝማን ህጎኤ፤ በገዞንገ ጠረኝቶኤ፤ አብል ዲን በገዞንገ ሸርቶኤ።

35 ሚንቱንኩ ሬቶ አሉሰ ሬሆኙ ኬኣን ደእቶኤ፤ ዎሉሰንገ ቆሆኖ ኬኡ ደእቶተ ሰውይት ሬቶተ ኢሊ ኦላንቶኤ፤ ኡሱርኝን ሂረሙ ግርኤ።

36 ህትን ዎሉሰንገ ህንቄን ኦሊመሰ፤ ህከኒኝን አበ ሰንሰለቲን ኡሱሬን ኡሱር ምኒ ኣግሴመሰ።

37 ህትን ክኒን ቀሰናንሰ ሬቶኤ፤ መጋዘን ለሙ ቤቹ ፊሊመሰ፤ ሲፍን ሸመ፤ ጉዕመርቸንገ ሆግ ሸረንተንለክ ጨነቀንተን ሆለ ጎገለክ ፊዕላኣ ጎገ ኦደእ ዘህቶኤ፤ ቡጥቻንተለክ ሸረመሰ መነ እክ ኦርጨቀንተን ሄኦኤ።

38 ኣሳንከ ኩ ኣዲንያ አሉ ገበእበሰቤቸሃ ኡለ ኡድማን፣ ቆታን፣ ሻንቃንለክ ክን ረባን ዘህተን ሄኦኤ።

39 ኩ ጉዕሙንኩ መኑ አመዕነትሰተኔሃ መሰከረሞሰጎሬ ኣሰሞሰ ተቢሳሃ ደእቶበእ።

40 መገኑ ኔሳሃ ጉዕመ ቆሆናርቹ ቅጥእዕየቤቸሃ ሁኩ መኑ ነኡ ሄዕንባሃ ዊመ እየተ አታልቶበእ።

12

መገኑ እነኔ እሁሰ

1 ህካን እኮቤቸሃ ጎመገ አደንከኔ ረብ ዮ ሁኩ ጉዕሙንኩ ምሰክሩ ዮኔቤቸሃ እጅንገ ኬዕመኖርቹ ጉዕመንከለክ ኡሱር አፎኔ ጨብ አሊኝኔ ከም ብሪንከኔ ዮ ሄጫቀንሽ ጠረኝን ደጉን።

2 ደጉንዳሚንኩ አመዕነቲኔ ቡዕለለክ ዊንሸኖሃ እኮ ኢሰ ለዕኒት፤ እሰን ብሪንከሰ ዮ ሙንዲኖተኔሃ ይ መሰቀል አሊን ሬሆኖ ሬሆ ሆኖኝ መቱርቹሃ ዎሉኡዕነ አታዕል መገን ዳኝነት ቦርጭማን መኬ አዲን አፋዕልዮኤ።

3 ህትን አዕኑ ሀፈቶኑዕናንለክ ተቢሳሃ ሙርቶኑዕናን ጨበኛኖ ኦደተ አታሎ ኢሰ ሰውይዬ።

11:20 ክል. 27፣27-29፤ 39-40። 11:21 ክል. 47፣31—48፣20። 11:22 ክል. 50፣24-25፤ ፋል. 13፣19። 11:23 ፋል. 2፣2፤ 1፣22። 11:24 ፋል. 2፣10-12። 11:27 ፋል. 2፣15። 11:28 ፋል. 12፣21-30። 11:29 ፋል. 14፣21-31። 11:30 እ.ኤ.አ. 6፣12-21። 11:31 እ.ኤ.አ. 2፣1-21፤ 6፣22-25። 11:32 መላ. 6፣11—8፣32፤ 4፣6—5፣31፤ 13፣2—16፣31፤ 11፣1—12፣7፤ 1 ሳሙ. 16፣1፤ 1 ሃገ. 2፣11፤ 1 ሳሙ. 1፣1—2፣1። 11:33 ዳገ. 6፣1-27። 11:34 ዳገ. 3፣1-30። 11:35 1 ሃገ. 17፣17-24፤ 2 ሃገ. 4፣25-37። 11:36 1 ሃገ. 22፣26-27፤ 2 ዲ.ዲ. 18፣25-26፤ ኤር. 20፣2፤ 37፣15፤ 38፣6። 11:37 2 ዲ.ዲ. 24፣21።

- 4 እዕኑ ጨቢን አጸንቴንን ቁጉክዕኔ ዲንተኦተ አለ ግቢንታበእ።
- 5 መገኑ ክዕኔተ ገይሰ አለለ
- «ኢ ቤቶ! ቀርኝ ሸዘነተ ህንቆት፤
 ቀጠአኖሄ ወክትንከ ተቢሳሃ ሙርቶት።»
- 6 መሰንትሰ ቀርቼ ኢተኖሲሃ ሻቀኖሰ፤
 ቤትሰገ አዕይ ለአኖሃ ጉዕመንከ ቀጠአኖ» ዬ ሸዘነተ ሀቢንንዶ?
- 7 እኑ ሻቅ ሸዘበሰ ቤቱ አይት? መገኑ ክዕኔተ አለሰገ አዕይ ለአኖህዕይቤቼሃ ሻቅ ሸዘኖህዕይጎሬ አታዕልዬ።
- 8 ህትን አለሰ አኮአሩ ጉዕመንኩ ቀጠአንተ ቅጣቲሃ እዕኑ ቀጠአንቶኑዕናን ፈቁንተጎሬ ህንጨረባሃ ቤሉ አለተሰበእ።
- 9 ማረን አልቶህዕይ አናኑት ቀጠአህዕይ እቅ፤ አኮጎሬ ነኡ አሰተ ኬዕምንጎሳንሰ እቅ፤ ህካን አኮኝ ሄኢሃ ጉዕመንከ እነ እኮ መገኒሃ ሄንከ በትንሰ ጠገመላከ ሄኡ ሀሰሰኖ።?
- 10 አናከክዕኔ ቀዎ ወክቲሃ ቡመ አኑጅ ለሌሰገ ቀጠኦኔ እቅ፤ አኮጎሬ አሰ ጠሊሊ አኮገን ጠሊላኑተ አንኮተ ኒ መኮተ ይ ቀጠአኖ።።
- 11 ቅጣቱ ጉዕመንኩ ወክቲሃሰ ሻዘሰኖ ቤሉ ሙንዲሲሰበሃን፤ ኤተሮንገ ሮሶ መኒሃ ወገሬትለከ ፈይመ ላልቼ ላልታገ አአኖ።

ሸዘነተኔሃ

- 12 ህካን አኮቤቼሃ ናሮ አንገክዕኔለከ ሆሳ ጉበክዕኔ ጠረኝሺ።
- 13 እዕኑ ድኑ እኮ ሎከክዕኔ ፈይቶታት ቤሉ ባሰንከ ቡቱክንታበእገ ሎካተክዕኔ ጡመ ዎቃሃ መክሺ።

- 14 መኒን ጉዕመንን ወገሬቲን ሄኢሃለከ ጠሊልማን ሄኢሃ ጠረኝዬ፤ መሰንትሰ ጠሊልመት ኖበኢሃ አይሁ ቀርቼ ለኦተ አታለኖበእ።
- 15 ክዕኔኡኝ አይሁ መገን አሰቱት ሆፈአሰበእገለከ ልግብ መን ንጅሲሰኖ ቀራረኖ ጠጹ በላንከክዕኔ መቶ ኦርሰኖህዕይበእገ አገዕርዬ።
- 16 ህትን ህንገሮመሰ መቶ ወክት እቻተ ይ ህሮ ኤሰገ መገኑ ዋጅበለከ ዘነተ አአኖ መንቹ ደገመኖበእገ አገዕርዬ።
- 17 ኤሰ አንሰ ማሰተ ደኦተ ኤተሮን መሃ ኦዕይ ደኦተ አታሉ ሆጎገ ደጌንነተ። * ቶቦቶተ ዕድል ደእኖበእ።
- 18 እዕኑ አንጋን አፊሃ አታሌኖ ሲኖ ቆተቦ ኢልቲንታበእ፤ ህት ቆተት ቡባኢት እቅ፤ ህከንቤኝንን ጭልመ ቱንሰቹለከ አንጉሉሎ ቡብሩሁ።
- 19 ጡሩምቡለ ሞጮጪሃ ዋጅሲሳ ላገቲ ሄኡ እቅ፤ ህተ ላገተ ሞጮጭቶ እሰራኤል መኑ ዎልት ላገት በርገንት ኩለንታሰበእገ ኡጭቶኡ።
- 20 መሰንትሰ «ዎሉ ፈቅ ግዙ ህከ ቆተተ ኡሎጎር ክኒን ቀሲኖን ሪሁን»
 ኖኖ ትዛዝ አጅቶተ ኬዕመሰቤቼሃ አታልቶበእ።
- 21 ለሌኢሁ አሰ ዋጅሲሰኖሃ እኮቤቼሃ ሙሰ
 «አን አሰ ዋጅም፤ ሁጮሚሁ» ዬአ።
- 22 እዕኑ አኮጎሬ ጽኑን ቆተተ፤ ሄኢ መገን ከተመ ሰማን ኖ ዬሩሳሌመለከ ሙንዲኖን ጭምይቶ ዎሊንቹ ኖበኢ መገን መላይከሰ ሆንጠከንታአ።
- 23 ሱዕሙሰ ሰማን ከተበንቶ መገን ሀንገሬ ኦሱተ እኮ አመዕናኖ ጭምትበለከ ዊመ ዊሚን ፈየ እኮ መን ነብሴበ ሆንጠከንታአ።
- 24 ሃዕሮ ወኣድ በል መንቹ እኮ ኢሲበ፣ ኣቤሌ ቁጊኝ ቆህሽ ጠወአኖለከ ጨቢኝ ነጠ አኑኑተ ኪፈዎ ቁግቤቹ ሆንጠከንታአ።
- 25 ከ ጠወ ኩለኖሃ ግቢንተበእገ አገዕርዬ፤ መሰንትሰ መገኑ ሙሰ አዲን አዲንፖ አሌን ኩለንሰ ሞጮጭኖምበእ ደቶሩ ሁንት ፉሸአትባኝ ህከረ ሰማን አክ ጠወአኖሀኒኝ ገበጭ ይኖም ነኡ ህት አንክ ፉሸአኖተ አታልኖም?
- 26 ህከ ወክት ላገሰ ኡለተ ሌንቁቅሶኡ፤ አኮጎሬ ቴሱ እሰ «ህትን መቶረ ጠለዕል ኡለተ አሁዕን ሰማሃ ሌንቁቅሳም» ይ ላገተ ኣጎኡ።

12:6 እያ. 5፣17፤ ሞሳ. 3፣11-12። 12:12 እሳ. 35፣3። 12:13 ሞሳ. 4፣26። 12:15 ዘዳ. 29፣18። 12:16 ክል. 25፣29-34። * 12:17 ደኦተ አታሉ ሆጎገ ደጌንነተ- ቶቦቶተ ወክት ደእኖበእ ጭን 12:17 ክል. 27፣30-40። 12:19 ፋል. 19፣16-22፤ 20፣18-21፤ ዘዳ. 4፣11-12፤ 5፣22-27። 12:20 ፋል. 19፣12-13። 12:21 ዘዳ. 9፣19። 12:24 ክል. 4፣10። 12:25 ፋል. 20፣22። 12:26 ሐጌ 2፣6።

27 ጠው እኮሳሬ ኩ «መቼ ወክት በርግ» ይታላገት ሌንቄቅትበ ጠውንኩ ጠረኝ ሄኦናገለክ ሌንቄቄና ሀክረንገ ከለቀሞ ጠዉ በእኛ።
 28 ህካን እኮቤቹሃ ነኡ ሌንቄቄናበእ ሞምነቱ ረገዕናምቤቹሃ መገኑ ገለትጭና፤ እሰ ሙንደዕዮገን ዋጅንገለክ ከበጅንገ መገኒሃ ሰገንደ።
 29 መሰንትሰ ኒ መገኑ ቡሰታ ገረጋት።

13

መገኑ ሙንደሲሳ ገደመተ

1 አመኦሶ ኢተት ጉዕመ ወክትንከ በላንከክዕኔ ሄኦን።
 2 ኮሀ ቶንገ ካደሙ ሀቦሮቹ፤ ካን አኦንከሰ መት-መቱ መኑ ደጉዕን መገን መላይከተ ኮህነቱ ቶንኡ።

3 ኡሱረንቶሀኑኡገን አሳንን ሜጡብ ኡሱረንቴንተሀንገን ሞለኤን ሰውይዬሰ፤ እዕኑሀ እሰገን ማለንከሰ ኦርሸተ ቶንነንተ ጌሰ እኩን ኦርሸተ ቶንኦረ ሰውይዬ።
 4 ቤተተ ኤቡ ጉዕመንከ መንቤቶን ኬዕምቶ ዮሲሃ እሀን፤ ምኒ ኦኑ ሞንሰ እማተ ህትን ሞንሰ እመንት ሞንሴ እኒሃ እመዕነቀንቶረ እኩን፤ መሰንትሰ ገይሰ ምኒ እኒቶ ህከረንገ ሞንሰ እመ ቤሉ ዋሎ መንገን ዝነተ አታሀኑኡ አላን መገኑ ፈረደደ።

5 ብረ አቲቶ ገዉክዕኔ አገዕርቹ፤ ዮሀዕኔሀ እሀንክዕኔ፤ መሰንትሰ መገኑ ገዉንኩሰ «እን ሆሮ ኡጃንኬበእ፤ አኑራንኬበእ» ይዮኡ።

6 ህካን እኮቤቹሃ ነኡ መለልን

«ቀርቼ ሀዕላናኤ፤
 እን ዋጅምበእ፤ መኑ መ አእኖኤ?» ይናም።

7 መገን ላገተ ኩልቶሀዕኔ አዎንሳኑክዕኔ ሰውይዬሰ፤ እሰ ሀት እክ ሄኦገለክ ሬቶገ ለኤንገ እሰ አመዕነትገ ዮ አመዕነቱ አዎኜ።

8 መሲሀ ኢሰ ቤሬተለክ ከበር ዘላላሚሃ ሄአኖሃን፤ ሆሮ ደረመኖበእ።

9 አደደ እኮ ሂለ ትምርቲን እገንቶኖቹ፤ ቀልቡክዕኔ መገን አሰቶን ጠረኙን ቤሉ ደግለለኖበእ እቶ ሴረ አገራን እሀንከ፤ እቶ ሴረ አዎንቶ መኑ መቱርቹሃ ደኦቶበእ።

10 ኔሳሃ መገኒሃ ክትም ሆንጠሀሴኖ ጠረጴዙ ዮኔ፤ እኮሳሬ መገኑ ደገመኖ ደካን እዜን ሆጉተ አታ ቁሳክት መገኒሃ ክትም ሆንጠሀሴኖ ጠረጴዚቶ አእት እቱ ፈቀዳኖሰበእ እቶ።

11 መሰንትሰ ሎሩ አይሁድ ቁሰ ሀለቁ ጩብተኔሃ ክትመዋ ግዝ ቁጉ ጠለልቶ ጠለሊ ቤቹ ሆንጠሀሴኖ፤ እኮሳሬ ግዝሰ ማለ ቀኤቶ ገበለ ፋሺን ቡሴኖ እቶ።

12 ህትን ኢሰ ገይሰ ቁገን ኡመት ጠለላኑተ አእተ ከተሚቶ ኡሮ ገበላን ኦርሸተ ቶግ ሬዮ።

13 ህካን እኮቤቹሃ ነኡ ከተሚቶ ገበለ ፋጅን እሰን ሜጡብ ህንቀም።

14 መሰንትሰ ኔሳሃ ከን አዲንያ አሌን ዘላላሚሃ ሄኦኖ ከተሙ ዮኔበእ፤ ጠዉ እኮሳሬ ከ ኤተሩ አሜተኖ ከተመ አገዕርናም።

15 ህትን ነኡ ሆሮን ሙረሞበእ ገለት ክትመ ኢሰ አዲን መገኒሃ ሆንጠሀሴኖ፤ ሁኩንን ሱዕሚሀሰ መሰከርታ አፊሃ ላልቹ።

16 ጡመ ጠዉ እኡለክ ዮሀዕኔርቹ ዋሎ መንገን ቤቀሙ ሀቦሮቹ፤ መሰንትሰ ህትኔ ክትሙ መገኑ ሙንደሲሳሰኖሃን።

17 እዕኑ አዎንሰታሀዕኔሀኑኡተ አዘዘሚ፤ ሹምነትሃሰ ጠገሚ፤ መሰንትሰ እሰ ፎልክዕኔተኔሃ መሰለ ኢታአራ እኮቤቹሃ ጠረኝት ክዕኔተ አገርታሀዕኔ፤ አዘዘንቴንተሰገር ሆጉሰ ሙንደሲሳን አታአ፤ አዘዘንቴንገባቶ ሆጉሰ ሙንደሲሳን አታበእ፤ ሁኩንን ክዕኔሃ ጡመሃበእ።

18 እዕኑ ኔሳሃ ዱኦ አዕዩኔ፤ ነኡ ነጠ ቀልቢን ሄኡኔ አጥራሙንት ደገጋም፤ ህትን ጉዕመ ጠዋንን ጡመገ ሄኢሃ ሄዕላንታም።

19 ክዕኔቤቹ ደዕል ፈንቀሎተ በትሴን ዱኦ አቶኖተ ጠረኝሸ ኩላንክዕኔ።

መጨረሻ ዱኦለክ ወገሬት

20 ዘላላሚሃ አሆኖ ወኦድ ላገ ቁገን ሆላተሰ ሎረ ዜማንቹ እኮ ቀርቹ ኢሰ ሬሆቶ ኬሾ ወገሬት መገኑ
 21 ጠውተሰ ዊንሸቴንተረ እኮኖተ ጡመ ጠዋሃ ጉዕሚንከ ቅጥአኦንክዕኔ፤ እሱ ሙንደሲሳሰኖርቹ መሲሀ ኢሰ አዲን ክዕኔኦን አኦን፤ መሲሀ ኢሲንከ ዘላላሚቶ ዘላላሚ ኢሰ ኬዕምቶ እሀን፤ አሚዕን።

መጨረሻ

22 አመኤ ኦሶ! ኩ ከተቦንክዕኔ ሶህኑት ገበንቹ እኮቤቹሃ ሸዘነአ ላገተ አታዕላን ቶንኖተ ኡጫንክዕኔ።

23 አመኔቤቱ ጥማቶስ ኡሱርቾ ገፈረሙስ ደጎኖተ ሀሳም፤ እሱን ደዕል ኢቤቹ አሜቾጎር አኒሁ እሱንን ሚጡብ ክዕኔተ ለኦተ አሜታም።

24 አዎንስታህዕኔሀኑኡተለክ አመዕናኖተ ጉዕሚንከ ወገሬትኤ ኩሌስ፤ ጣሊያን ባዲቾ አሜቶ አመዕናኑት ወገሬትሰ ሰኮህዕኔ።

25 መገን ኣሰቱት ጉዕሚንከክዕኔ እኩን፤ ኣሚዕን!

ያቁብ ከተቦ ሶህኑት አጉሰ

ኩ ያቁብ ሶህኑት በሬተ በሬተ ደግለለኛ ትዛዝ አፎሃ እህን ከተበሞንኩ ኣዲንያ አሌን ጉዕማንን ብንይቶ ቶን ለሞንከ ዘሬተ ጉዕማንካት። ከተቦሰ መንቹ ሀይመሰ ሆን አሌን ሆሰሶተለክ አመዕናናተ ሀሰሰኛ ሃሊንን ሄኡ ሀሰሰኛሃ እሁሰ ለሊሽ ከተቦኡ፤ ህትን ቀባጦለክ ቡጥመተኔሃ፤ ፊተነለክ አመዕናናተ ሀሰሰኛ ጡመ ሄአተኔሃ፤ ምቀቆመተ፤ አመዕነትለክ ጡመ ሆንተኔሃ፤ አረቤ ጡምመለክ ሂልመተኔሃ፤ ደግተኔሃ፤ መት-መቲን ብተምተኔሃ፤ ለዕዬኤ ለዕዬኤ ይተኔሃለክ ገው ሆፍሰተኔሃ፤ ዎሎ መን አሌን ፈረድተኔሃ፤ ገዎን ድከአተኔሃ፤ አይብተኔሃለክ ዱአተኔሃ አመዕናናተ እሁ ሀሰሰኛሃ ግዳጀ መቲን መቲን ከተቦኡ።

ሶህኑስ አመዕናና ሄኡን አመዕነቱ ሆንን ለሊሴኖሃ እሁስ ኩልታአተ።

መጻፍሱ አፎሃ

- አጉሰ (1፡1)
- አመዕነቱለክ ሀይመተ (1፡2-8)
- ቡጥመተለክ ቀባጡተ (1፡9-11)
- ፊተነተ (1፡12-18)
- መገን ላገተ ሞጮጩለክ ሆንን ሆሰሶ (1፡19-27)
- አደደመተ ከለቁ ሀሰሰኛበአገ ኣሴመ ሸዘነተ (2፡1-13)
- አመዕነቱለክ ሆጉተ (2፡14-26)
- አመዕናንቹለክ አረቤስተኔሃ (3፡1-18)
- አመዕናንቹለክ ኣዲንያ አል (4፡1—5፡6)
- አደደ ጠውሃ ኣሰንቶ ሸዘነተ (5፡7-20)

1 መገንለክ ቀርቻ መሰሀ ኢስ ካድንቹ እኮም ያቁቢች ኣዲንያ አሌን ጉዕማንን ብንይቶ ቶን ለሞሃንከ አሰራኤል ዘሬተ ሶህንቶአተ ሶህኑ፤

ወገሬቱ ክዕኔሃ እሁን።

አመዕነቱለክ ሀይመተ

- 2 አመኤ ኦሶ! አደዱ ኦርሸት ኢልቶህዕኔ ወክት ሙንደዕዬ።
- 3 አመዕነቶንከክዕኔ ኢልታ ኦርሸ መሳን ፈረኪነንተገ ደገነነተ።
- 4 አታዕለን ኡሩክዕኔ መቱርቹሁ ጤዕይዩዕናን ኩሌኖህዕኔርቹ ኖህዕኔበአሩለክ ዊመ እኮኖተ አበቀኢኖህዕኔሃ እሁን።
- 5 ክዕኔኢች አይሃ ሀይመት ሆፈኦሰጎር ህንቁዕን መረርሲጭ ጉዕማንከ ኣሰኖ መገኑ ኡጩን፤ እሰንከ ኣሰመኖሰ።
- 6 ጠዉ እኮጎሬ መኑ ሸኩዕናን አመዕነቲን ዱእ አኡን፤ ቀልቤንከስ ሸከኖ መንቹ ቦብሪን ህምበለሞ ለንቁቁኖ ዊሁለ አጉደኖ።
- 7 ህትኔ መንቹ ቀርቻች መቱርቹሃ ደአኖሃ አጉዳንከስ።
- 8 መሰንትሰ ሸከኖ መንቹ ዎቃንከሰ ከበሃ ካጳ እህኖቤቹሃት።

ቡጥቻለክ ቀባጣሞ መንቻ ሙንዲኦተ

- 9 ኖሰርቻን ህንቀሞ መንቹ መገኑ ሎርሰኖሰቤቹሃ ሙንደኡን።
- 10 ቀባጣሙ እክ ገውስ ሆፍሾ መንቹ ገውስ ሆፍሲንከስ ተሽ ዩንስ፤ መሰንትሰ እስ ገውንኩሰ ባዳ ቦብሎጎ ግግሉ ፈቀኖበኢ።
- 11 አሩ አበ ቡሰን ፉላኖ ወክት ህከ ባዳ ቦብሎተ ሞሸኛ፤ ቦብሎንትሰ ግግልታኡ፤ ህትን ቦብሎሰ ደኡንኩ በአኖ፤ ህትን ቀባጡተ ደጎተ ይ ከበለክ ካጽ እህን ሬሆ።

መን አሌን ኢልታ ፊተነተኔሃ

- 12 ኦርሸት ኢልቶስ ወክት ጠረኝ ኡረኖ መንቹ ማሰአሞእሃ፤ መሰንትሰ ኦርሻን ጠረኝ ኡረቤቹሃ መገኑ ኢትታስህኡተ ኣሶተ ተቢሳሃ አዕኖ ሄኢ እክሊልገ አዕይ ቶገኖ።
- 13 አይሁ ፊተነመኖ ወክት «መገኑ ፊተኞኤ» ሆሮ ዩንከ፤ መሰንትሰ መገኑ ሂላ ጠዊን ፊተነመኖበኢ፤ ህትን ገውንኩሰ አዩኒ ፊተነኖበኢ።
- 14 ጠዉ እኮጎሬ አይሁ ፊተነመኖሁ ገይሰ ሂላ ሄዕላቻን መሰገሚትለክ ጣንሰምት።

- 15 ህክኒች ኤተሮን ሂሉ ሄዕላቸት ላፈ እክ ጨብ እልታኢ፤ ህትን ጨቡንኩ ነጽ ሬሁተ ኤብና።
- 16 ኢተንቴንተ አመኤ ኦሶ! ሉሶናቸ።
- 17 ጡሙ ኣሰቱትለክ ፈቀ ዮበእ በረከት ጉዕሙንኩ አሜተኖሁ ሰሜቸት፤ ሁኩን አሜተኖሁ ኑር እነ አኮለክ ዶረምቦ ህክረንገ ሀለገ ዘህቦ መገን አዲች ድርታኢ።
- 18 ክልቀቲችሱ ሀንገሬ እንኮተ መገኑ ገይሰ ሃሽኣቶገለክ ሀንቅሰ ላጋን አሎኔ።

ሞጮጭ ሆሳ አሌን ሆሰሱ

- 19 ኢተንቴንተ አመኤ ኦሶ! ካን ደገ፤ ሙኑ ጉዕሙንኩ ሞጮጭ ሰዕላኖሃ እሁን፤ ጠዉ እኮሳሬ ጠዉኢሃለክ ኡሙዕርሃ ደዕላኖሃ እሁንከ።
- 20 መሰንትሰ መን ኡሙዕርት መገን ፈይመተ ኤባበኢ።
- 21 ህካን እኮቤቺሃ ንጃሰለክ ሂልመተ ጉዕመንከ ኡጅቴን ቀልቤንክክዕኔ ካሰሞ ነቢሳክዕኔ ፈሲሃ አታልታ ላገተ ገዉ ሆፍሲን ቶጌ።
- 22 መገን ላገተ ዊንሸቴንተረ እኩ ቤሉ ገዉክዕኔ ሉሲሲንገ ጠለዕል ሞጮጭቴንተረ እኮናቸ።
- 23 ላገሰ ሞጮጭ ሆሳን ሆሰሰባሁ ለአቃንቸን ገዉሰ ለእኖ መንቸ አጉደኖ።
- 24 መሰንትሰ ሁኩ መንቸ ገዉሰ ለአቀንቸን ለዕይ አብል ፉሎገን መ አጉደኖገር ደዕልን ሀበኖ።
- 25 ጠዉ እኮሳሬ ነጠ ፉሽኖ መገን ሕገ ለዕይ ህክኔን ጠረኘኖሁለክ እሱንከ ሞጮጭ ሀቡዕን ሆሳ አሌን ሆሰሰኖሁ ሆሳንከሰ ጉዕማንን ማሰአሞሃ እሆኖ።
- 26 አረብሰ አገዕሩዕናን «መገኑ አመዕንኖም» የኖሁ ጉዕሙንኩ ገዉሰ ሉሰሰኖ፤ ህትን አመዕንቴንኩሰ ተሰሃን።
- 27 እነ መገን ብረን ነጠለክ ንጀሱ ዮበእ አመዕነቱ ከኔት፤ ሁኩንን ህዌሽ ኦሱተለክ ሞንሰ እኑ ሬኖ ማንቴ ኦርጨንቶ ወክት ሀዕሉሃለክ ህትን ከን ኡዱንያ አል ንጃሲች አገዕሩሃን።

2

ቡጥቹ ህንቁ ሀሰሰኖበኢ

- 1 ኬዕምኛ ቀርቸ አኮ ቀርቸሃኔ መሲህ ኢሳን አመዕንቴንተ አመኤ ኦሶ! አዕኑ መን በላን ሆሮን አደደመተ አቶኖቸ።
- 2 ሞሳሊተሰ ለሙሙ ሙኑ ጭምድቴንተቤቹ አሚታኢ፤ መቱሰ አንጋንከሰ ወርቅ ጨምባረ አዕይ ጡሙ ኦድኑተ ኦደዕኖሃን፤ ሞሉሰንገ ጡርቶ ኦድኑተ ኦደዕኖ ቡጥቹሃን።
- 3 ህከ ወክት ጡሙ ኦድኑተ ኦደዕኖ መንቸ ኬዕምኚን «ከን ጡሙ ቤቸን አፋዕል» ይቴንተሰ። ጠዉ እኮሳሬ ቡጥቹሰንገ «አት ህከጼ ኡር» ህከረንገ «ሎከኤ አዲን ኡሉ አፋዕል» ይቴንተሰ።
- 4 ህካን እኮች ከን በላንከክዕኔ አደደመተ ከለቁሃለክ አልተ ለኤን ፈረደሃበእንደ?
- 5 ኢተንቴንተ አመኤ ኦሶ! ሞጮጭዬ፤ አመዕነቲን ቀባጣመተ እኮናተለክ እሱ ኢትታሁኑኡተ ኣሲ ሰሚ ሞምነቱ ረገኑተ ከን ኡዱንያ አል ቡጥቻኑተ መጠርሰ።
- 6 ጠዉ እኮሳሬ አዕኑ ቡጥቻኑተ ህንቁንተ፤ ጭንፍታህዕኔሩለክ ፍርድ ሞኒ ገሾሽታህዕኔሩ ቀባጣመተበእንደ?
- 7 አዕኑ ገእንቴንተ ከበጀሞ መሲህ ሱዕመ ቦርርታሩ ህከን ቀባጣመተበእንደ?
- 8 «ገዉክዕኔ ኢትቴንተገን ሞሉ መነሃ ኢትዬ» የመሞ ከተበሞ መገን ሞምነት ሕገ ዊንሸቴንተር ጡመ አቴንገታት።
- 9 ጠዉ እኮሳሬ መን አልተ ለኤን አደደመተ አቴንገታሃ እኮር ጨብ አቴንገታት፤ መገን ሕገ ቤሳንክዕኔ ሞቀሰንቴንተ።
- 10 ሙኑ መገን ትዛዚች መቱሰ ድጅ ፈቆሲሃ ጉዕመንክ ዊንሼገር ጉዕመንክ ድጅህንገ ሞለአመኖ።
- 11 መሰንትሰ «ዝነተ አቶት» ዩ መገኑ ህትን «ሸቶት» ዩቤቺሃ ዝነተ አትበገሬ ሸቶንትአቀ መገን ሕገ ድጅቶንት።
- 12 ጠዉኤን እኮ አቴንገ ነጥነቱ ኣሰኖ ሕጉ ፈረደመኖሰ መገን እኩ።
- 13 መገን ፍርድ ማርቦ መንቸሃ ማርቱተ አእኖበኢ፤ እኮሳሬ ማርቱት ፍርድ ቁልታኢ።

አመዕነቱለክ ሆጉተ

- 14 አመኤ ኦሶ! ሙቱ መንቸ «አመዕነቱ ዮኤ» የን አመዕነቱሰ ጡሙ ሆሳን ለሊሰባገሬ መ ደግለለኖሰ? ህትን ሁኩ አመዕነቱ ፈሶሰተ አታለኖንደ?
- 15 ሞሳሊተሰ ኦደኢኢሁለክ አታኢሁ ዮሰበኢ አመኡሱት ሂኦገር
- 16 ክዕኔኤች መቱ ሀሰሰኖሳሃ ኣሱዕናንሰን «ኢቡንክዕኔ፤ ዱቤ፤ ወገሬቲን ኦርዕዬ» ዳር ሁኩን መ ደግለለኖሰ?
- 17 ህካን እኮቤቺሃ ሆጉት ዮበእ አመዕነቱ ገዉንኩሰ ሬኖሃን።

18 መቼ መንቹ «ኩ መንቹ አመዕነቱ ዮሰ፤ እኩጎሬ ሁኩንን ሆጉት ዮሰ» ይዮ እቃ እን ከን መንቹሃ ያንሲሁ ህንጫ አት አመዕነቱክ ሆጎ ቤሉ ለሊሰ፤ እን እኩጎሬ አመዕነቱኤ ሆጎን ለሊሳንኪ ያንሰ።

19 አት መንገጡ ሜጡ እሁሰ አመዕነታንት፤ ሁኩን ጡመሃን፤ ጠዉ እኩጎሬ አመዕነቱሃ ሩሃንዩሁ ሁጠን አመዕነቱ።

20 አት ገዉ መንቹ! ሆጎች አደደ እኮ አመዕነቱ ላሊቹ ዮበኢሃ * እሁሰ ደጋንትበእንደ።

21 እኩኔ አብራሂም ቤቱሰ እሳቀ መገኒሃ ክትም ሆንጠህሴኖ ጠረጴዛን ክትም አዕይ ሆንጠህሆ ወክት ፈዮ እኮሁ ሆጎንበእንደ።

22 ህጎን እኮቤቹሃ አመዕነቱ ሆጎን ሜጡብ ሄዕዮገለክ አመዕነቱሰ እሰ አዕዮ ሆጎን ዊመ እሁሰ ለእንትበእንደ።

23 ጠሊሊ መጻፋን «አብራሂም መንገጥ አመዕነቱ፤ አመዕነቱንኩሰ ፈዮ እክ ዋለአሞሰ» የመንቶ ላገት ዋንቶኤ፤ አብራሂምን «መገን ኢተተ» የመንቶ ገአሞኤ።

24 ህጎን እኮቤቹሃ መኑ ፈዮ እሆሁ ጠለዕል አመዕነቱን እሁሰን ሆጎን ሜጡብ እሁሰ ለእንት።

25 ህትን ዝነተ ኦታ ረኣብ እሰራኤል ሰቀማኑተ ሞኔንከሴ ቶግ ዋሎ ዋቄን መርታጎ አቶ ወክት ሆጎንከሴ ፈዮተ እኮበእንደ።

26 ነሲሴች አደ እኮ ጅሰሙ ሬዮሃ እኮገን ሆጎች አደ እኮ አመዕነቱሁ ህትን ሬዮሃን።

3

አረብተ አገዕርተኔሃ

1 አመኤ ኦሶ! ክዕኔኤች ልግቡክዕኔ አሰተማረተ እኮኖቹ፤ መሰንትሰ አዕኑ ደገኒንተገን አሰተማረተ እንኮምሩ ዋሎ መኒች አበ ፍርደ ኣአናሞቤቸሃን።

2 ነኡ ጉዕመንኩኔ ልግብ ወክት ሉንሳም፤ ጠዉ እኩጎሬ ዮሃሃንን ጉዕማንን ሉሰባሁ እሰ ገዉሰ አገዕሩ አታለኖ ኩሉኖሰርቹ ዮሰበኢሃ መንቹ።

3 ፋሹ ኔሳሃ አዘዘመኖገ አፎንከሰ ብጣለ ዋርናም፤ ህከኒች ኤተርን ሎረ ፋሹ ቀዋ ብጣለን ህንሶም አደ ጉዕመንከ መረኖገ አዕኖተ አታልናም።

4 ህትን መርከብተኔሃ ሰውይዬ ህንጫ፤ መርከቡ ኬንከሃ ጠረኛ ቡብሩ ሀምበለን ሃመኖ ሎረ እኩጎሬ መርከብሰ ኦተኣንቹ ቀቅቾርቹን ሀሾበ መሰኖ።

5 ህትን አረብተ ጅሰሚች ጉዕሚችን ቀቅቹተ እኩጎሬ ቦን ጠወ ጠወእእ፤ ህትን ህንጫ ገረተ ለዕዬ፤ ቀቅቹት ገረት አበ ህቅ ቆጠ ቡሰታኦ።

6 አረብተ ገረጋት፤ እሰን ጅሰሚችኔ ጉዕሚችን ሂለተ፤ ጅሰመ ጉዕመንከ ነጃሰሳእ፤ ህትን አዛቢች ፋልታ ገረገ ኦሰሚች ኬሽ ሎረ እሆተ ኢሊ ዮ ክልቀት ፎል ቡሰታኦ።

7 ጉዕማንከ ደን ቡሳወ፤ ጨኡተ፡ ኡላን ሹርይተን ህንታኦ፤ ባር ኣዜን ሌንቁቅታ ክልቀት ጉዕመንከ መኑ ገረኦተ አታለኖ፤ ህትን ገረኣንቶኦ።

8 ጠዉ እኩጎሬ አረብተ ገረኢሃ አታለኖሁ አዪሁ ዮበእ፤ ሽኖ መርዙ ዊሞሴተ፤ ህትን ፎሎጩ ዮበእተ ሂለተ።

9 ህከን አረቢን ቀርቹለክ እነኔ መንገጥ ገለትጭናም፤ እሰንን መገን ደኒን ከለቀሞ መን ቦርርናም።

10 መቶ አፈች ገለቱለክ ቦርሩሁ ፋለኖት፤ አመኤ ኦሶ! ህት እሁ ሀሰሰኖበእ።

11 መቱ ቡቆች ጤኦኖ ዉሁለክ ቀራረኖ ዉሁ ቡቆተ አታለኖንደ።

12 አመኤ ኦሶ! አደ ዋርች ላሊቹ ላሎተ አታለኖንደ። ህትን ዋይን ላልቹ ኦድ ላሊቹ ላሎተ አታለኖንደ። ህትን መጥንት ዮ ዊች ኣጌኖ ጡመ ዋሃ ደኦኖተ አታለኖበእ።

ሰሜች አሜታ ሀይመተኔሃ

13 ክዕኔ በሊች ሀይቹለክ ደገኖ መንቹ እዬት? ሀይማንለክ ገዉ ሆኖሰን አዕዮ ጡመ ጠወ ሄኣንከሰ ለሊሱን።

14 ጠወ እኩጎሬ ሂሎ ምቀቛመትለክ ገዉ ኢቱሁ ቀልቤንከክዕኔ ሄዕዮ ጎሬ ህከኒን ቦንቶኖቹ፤ ህንቅ እኮ ጠዋን ክዝብ ጠወኦኖቹ።

15 መሰንትሰ ህትኔ ሀይመት ደገንታኢሁ ከን ኣዲንያ አሊች፡ ማለቹለክ ሾይጣንቹት ቤሎ መገን አዲችበእ።

16 ምቀቛመትለክ ገዉ ኢቱሁ ዮቤቹን ብተትለክ ሂለት ሆጉት ጉዕመንት ሄኣኦ።

17 ጠወ እኩጎሬ መገኒች ደገንታ ሀይመት ወዕናንከ ነጠሃን፤ ህከኒች ኤተርን ወገሬት ኢታንቹ፤ ጎደብ ላፈ፡ ገው ሆኖሱ፡ ዋለሃ መረርሲጨኖሃ፡ ጡሙ ላልቹ ዊሞሃ፡ መቱ አደ ጎልባሃለክ ለዕዬኤ ዮ ዮሰበኢሃን።

18 ወገርት ኢትታ መኑ ወገሬት ዉጥ መገን ሰውትጎ ሄኣ ላሊቹ ጭምኣታኦ።

* 2:20 ላሊቹ ዮበኢሃ፡- ዮሃሃ መት-መቱ ለሀ ሲታታት «ሬዮሃ» ይታኦ። 2:21 ክል. 22፡1-14። 2:23 ክል. 15፡6፤ 2 ዲዲ. 20፡7፤ ኢሳ. 41፡8። 2:25 ኢያ. 2፡1-21። 3:9 ክል. 1፡26።

4

አዲን ሃላፊ መተ ግቡ

1 ክሳራ በላን የ በገዙለክ ብተት ሀኪንቤቸኛ አሜቶታን? አዘንከክዕኔ ኦሎመኖ ማልክዕኔ ሃሽአቶችበእንደ?

2 እዕኑ መቸቸኛ ደኢሃ ሀሴነንተ፤ ጠዉ እኮጎሬ ደጌነንተበእ፤ ሽቴነንተ፥ አበ ሃዕላቴነንተ ጠዉ እኮጎሬ ደጌነንተበእ።

3 ዱኦ ኦቴነንተጎሬ ማልክዕኔ ሰውቴን ሆሰሶኖተ ሂላ ሰውቴን ዱኦ ኦቴነንተቤቸኛ ኡጭቴነንተሃ ደእቴነንተበእ።

4 እዕኑ አመዕነንቴንቡ ሙኑ! ከን አዲን ሃላፊ ጠዉ ኢትታ ሙኑ መገገሃ ዲነ አሁሰ ደጌነንተበእንደ? ከን አዲን ሃላፊ ጃለት ጉዕሙንኩ መገገሃ ዲነ እኮኦ።

5 ጠሊሊ መጻፉን «መገኑ አዘንከክዕኔ አፋሼ እያነ ጠለዕል አሲሃ አሆተ ሀሰኖ» ዩኢሁ ተሳጎንትንደ? ህትን መገኑ «ቦንታእራ ግበኖ፤ እኮጎሬ ገዉሰ ሆፍሳህኡት ኦሰቴት ኦሰኖ» የኖቤቸኝ መገን ኦሰቴት ጉዕሚችን በተእእ።

7 ህካን እኮቤቸኝ መገገሃ ጠገሚ፤ ጠዉ እኮጎሬ አልብሰ ግቤሰ፤ እሰን ክዕኔኤች ሁነኖ። መገን ቤቹ ሆንጠኬ፤ እሰን ክዕኔቤቹ ሆንጠሀኖ፤ እዕኑ ጨቤታኝት! አንገክዕኔ ነጠ አዕዬ፤ ህትን ከበሃ ካጸ እኪነንተሩ! ቀልብክዕኔ ነጠ አዕዬ።

9 ጨብክዕኔተኔሃ ሻዢ፤ ጨነቀሚ፤ ኦዕዬ፤ ኦሰሉክዕኔ አልፋቴን ሙንዲኑክዕኔ ሻዢ ደረንቴን።

10 ቀርች ብሬን ገዉክዕኔ ሆፍሼ፤ መገኑ አሌ ዋሽ ሎርሰኖሀዕኔ።

መን አሌን ፈረዱ ገበእባሃ አሁሰ

11 እመኤ ኦሶ! ሙቱ-ሙትክዕኔ አሌን ሃላርቹ ጠወኦኖቹ፤ ሙቱሃ አመሰ ቤት አሌን ሂላ ጠወ ጠወአኖሁ ህከረንገ አመሰ ቤት አሌን ፈረደኖሁ መገን ሕግ አሌን ሃላርቹ ጠወአኖሃንላክ ሕግ አሌን ፈረደኖሃን፤ መገን ሕግ አሌን ፈረደንትጎር አት ሕገ አገራንቹ እኩዕነ ፈረደንቸኝሃን።

12 ሕገ አሰኖሁለክ ፈረደኖሁ ጠለዕል ሙቱሃ መገኑ፤ ህትን ፊሲሃለክ ቤሲሃ አታላኖሁ ጠለዕል አሶት፤ ህከረ መን አሌን ፈረደንቲሁ አት አዬት?

መገኑ ዩጎሬ ይኑዕናን ጋቴተ ሰውይተኔሃ

13 እዕኑ «ከበር ህከረንገ ጋቴተ ዋሉ ባዱ መርን ሙቱ ዘማን ዲንክናም፤ ነገንድ ተረፍንሳም፤ ልግብ ብረ ጭም አዕናም» ይቴነንተሩ ሞጮጭዬ።

14 መሰንትሰ ጋቴተ ሞ አሀኖጎሬ ደጌነንተበእ፤ ነቢሶክዕኔ መርቸኝሃን? እዕኑ ቀዎ ወክት ለሊ በእ ጎመጋት።

15 ህከን ወጥ እዕኑ «ቀርቹ ዩጎሬለክ ሃዕናም ጎሬ ካን ህከረንገ ካጽ አዕናም» ዩ ሀሰሰኖሀዕኔ።

16 ጠዉ እኮጎሬ እዕኑ ህከን ወጥ ቦኖንተክዕኔ ድከኤነንታት፤ ህትኔ ቦኑ ጉዕሙንኩ ሂላሃን።

17 ጡመ ጠወ እኡ ሃዕኖሰገ ደገን አእበ መንቸኝሃ ጨብ አሀኖሰ።

5

ቀባጣማተ ኦሰንቶሰ ሸዘነተ

1 ቴሱ እዕኑ ቀባጣማተ ሞጮጭዬ፤ ጠረኘት ኦርሸት አሌንከክዕኔ አሜታቤቸኝ ያርቴነን ኦዕዬ።

2 ቀባጡክዕኔ ጉዕሙንኩ ሸንቶኤ፤ ኦድኑክዕኔ ብሉት አቶኤ።

3 ዋርቁክዕኔለክ ብሩክዕኔ ጭቻኤ፤ ሁኩ ዋርቁክዕኔለክ ብሩክዕኔ ጭቻሁ ክዕኔኤሃ ምስክር አሀኖ፤ ጅሰመክዕኔ ጊረገ እተኖ፤ ከን መጨረሽ በሬን ልግብ ቀባጡተ ጭምአቴነታኦ።

4 እዕኑ ምዳ መኒሃ ሆጎሰ ቀባ ባቴነታበእ፤ እሰን ያርታአት፤ ያርታእከከ ጉዕመንከ አታላኖ ቀርቹ ሞጮጭኖኡ።

5 እዕኑ አዲን ሃላፊ ናጃንላክ ሙንዲኒ ሄኤንታኦ፤ ጎርጥሀ አላሌመ ለልገ ምሴንታኦ።

6 ፈየ መንቸኝ አሌን ፈረደን ሸቴነንተሰ፤ ጠዉ እኮጎሬ እሰ ግሮሀዕኔበእ።

ቀርች አሜቱ አታዕሊን አገሩ

7 እመኤ ኦሶ! ቴሱ ቀርቹ አሜቶተ ኢሊ አታዕሊን አገዕርዬ፤ እቡራንቹ ዎኔሃለክ ኤተር ጤነ ደኦተ አሊ አታዕሊን ጡመ ኡሊ አቶተ አገዕረኖ።

8 እዕኑ ህትን አታዕሊዬ፤ ቀርቹ አሜተኖ በሩ ሆንጠኮቤቸኝ ጠረኝቴን አገዕርዬ።

9 እመኤ ኦሶ! ክዕኔ አሌን ፈረደምበገ ሙት-ሙትክዕኔ አሌን ጨቀጨቆኖቹ፤ ሁኩዕነ ፈረደኖሁ አሜተኖ ወክቱ ሆንጠኮኡ።

10 እመኤ ኦሶ! ቀርኝ ሱዕሚን ጠወኣ ነቢያኑት ኦርሸተ ኣእንለክ አታዕሊን ሞሳልተ እሁሰ ህንዴ ለዕዬ።

11 ህትን አታዕሊን ጠረኝቶአሩ «ማሰእንቶአራን» ይናንሰ፤ አዩብ አታዕሊን ሞጮጭቴንታኣ፤ ቀርቼንኩ ኤተሮን አዕዮሰ ጡመ ጠወ ጉዕመንክ ለኤንታኣ፤ መሰንትሰ ቀርቼ እበ መረርሲጨኖሃለክ ጎደበ ላፈሃን።

12 እመኤ ኦሶ! መ ጠዋኝ ሄጭቴን ሰማን ህክረንገ ኡላን ህክረንገ ዎሎ ጠዋን መቶቾኒ ጤሌዕልቶኖቹ፤ ጠወ እኮጎሬ ፍርዳን ኣጌነንተበእገ ጠወኤነንተ ጠወ ህንቅ እኮጎሬ «ህንቅያ ይዬ» ክከብ እኮኝ «ክከብያ» ይዬ።

13 ክዕኔ በላን እበ ኦርጨቀሞሁ ሄዕዮ ጎሬ ዱኣ አኡን፤ ህትን መንደዕዮሁ ሄዕዮ ጎሬ መገኑ ገለትጨን ዘመሩን።

14 ክዕኔ በላን አዩሁ ጥዦ መንቹ ሄዕዮ ጎሬ አመዕናኖ ዱኣ ሞኒኝ ባለቀተ ገኡን፤ እሰን ጥዘናሙሰ ቀርኝ ሱዕሚን ዘይተ ቡርት ዱኣ አቲን።

15 ህትኔ ዱኤ ጥዘናሙ ፈይሰኖ፤ ቀርቼንኩ ጥዘናኝ ኪሰናሰ፤ አዕዮ ጨቡ ሄዕዮ ጎሬ ማረመኖሰ።

16 ህካን እኮቤቹሃ አዕኑ ፈይቶኖተ ጨብሃክዕኔ ገገዉክዕኔ ቶብቹ፤ መት-መቲሃክዕኔ ዱኣ አዕዬ፤ ፈየ መንኝ ዱኤ ዎልቀት ዮሰቤቹሃ እበ ሆጉተ አአኖ።

17 ኢልያሰ ኒገን መንቹሃ እቅ፤ ጠወ እኮጎሬ ጤኑ ኡብኖበእገ ጠረኝሽ ዱኣ አዕዮ ወክት ሰሱ ዘማንለክ ሌሁ አገነ ኢላ ኡላ አሌን ጤኑ ሆሮ ኡቦበኣ።

18 ለንኪሃ ዱኣ አዕዮ ወክት ጤኑ ኡቦ፤ ኡለንት አቶተ አቶኣ።

19 እመኤ ኦሶ! ክዕኔኤ በሊኝ መቱ ህንቅ ዎቄኝ ሉጨሞጎር ዎሉሰ መንቹ ህንቅ አደ ፈንቀሺሰጎር

20 መቱ ጨብኝ መንቹ ጨብ ዎቄኝ ፈንቀሺኖ መንቹ ጨብኝ ነብሳሃ ሬሆኝ ጡምሰኖገለክ ልግቡ ጨቡሰ ፈቅን የመመኖሰገ ደጉን።

ጴጥርሴ ከተሶሃ ዎኔ ሶህኑተ ኣጉሰ

ዎኔ ሶቀማንኛ ጴጥርሴ ሶህኑት ከተበንቶኢሁ ሶህኖሰ ኣዜን «መገኑ መጠር ኡመተሃ» የመዎ ገእመኖላከ ቀዎ እሰይ ቅልብ ኣዲን ብንይቶ ኣመዕናናታት፤ ሶህኖሰ ቡዕላ እኮ ጠዉ ኣመዕነትሰ መዕን ሸርሙለከ ኦርሸት ኢልቶሰ ኣመዕናኑተ ጠረኝሲሃት፤ ከተሶሲሁ ህካን ኣዕዮሁ ሬሁሰ፤ ሬሆኛ ኬኡሰለከ ፈንቀል ኣሜትሰ ተብሳሃ ኩለኖ፤ መሲህ ኢሰ ተሸት ላገተ ኣነበባህኡተ ቃግሲሃት፤ መሲህ ኢሰ ሄዕዮ ሃል ምሳልተ ኣዕይ ኦርሸተ ኣታዕሊን ቶጉ ሀሰሰኖገ ቃግሰኖ፤ ህከኒንን በርገ ኦርሸት ኣመዕነትሰ ጠረኝመተ ፊተንታኢሃ ኣሁሰ «መሲህ ኢሰ ለለኖ በር» ሀሰሰኖ ወጥሰ ደኣታኢሃ ኣሁሰ ቃግሰኖሰ፤

ከተሶሲሁ ኦርሻን ኣታዕላቶተ ጠረኝሰኖህኒኛ በትሽ ኣነበባረር መሲህ ኣዎንታሰሩ ሄኡ ሀሰሰኖሰ ሃሊን ሄኡተ ቃግሰኖሰ።

መጻፍሰ ኣኖሃ

ኣጉሰ (1፡1-2)

መገኑ ጡምሳንኹ ኣሁሰ ቃግሰኖ ጠወ (1፡3-12)

ጠሊላ ሄኡ ሄኡኖተ ኣሰንቶ ሸዘነተ (1፡13—2፡10)

ኦርሸ ወክት ኣመዕናኑት ኣኡ ሀሰሰኖሰ ጠወ (2፡11—4፡19)

ኣመዕናኖ ገዉ ሆፍሱለከ ክድመተ (5፡1-11)

መጨረሻሰ (5፡12-14)

1-2 መሲህ ኢሰ ኣሳቤቹ ኣኮም ጴጥርሴኛ ኣኑ መገኑ ሄጭ ደግነከሰ መጠርህዕኔህኡተ፡ መሲህ ኢሲሃ ኣዘዘንቶተለከ ቁገንከሰ ሄበ መረጨ ኣኡኖን ነጠ ኣኮኖተ ጠሊላ ኣያንን ኣደ ኣከንተሁኡሃ ጳንጦሰያን፡ ገላትያን፡ ቀጳደቅያን፡ ኣሰይ ባደንላከ ቢታን ባደን ኮሀ ኣከን ብንይቲን ሄኡነንተሁኡተ ጉዕሚንከክዕኔ ሶህንቶኣተ ሶህኑ፤

ክዕኔንከ መገን ኣሳቲቲለከ መገራቲ በተኡንክዕኔ።

ሄኣኖ ተብሳሃ

3 መሲህ ኢሰ ሬሆኛ ኬእ መሳን ሄኣኖ ተብሳሃ ኣሴኔሁ ኣበ ኣሙዚን ለንክ ሃዕር ኣለንሽ ኣሴኔ ቀርቹሃኔ መሲህ ኢሰ ኣኑ መገኑ ገለትጨሙን።

4 ኣሰን በኣቡ፡ ሸምቡለከ ባልቅቡ ኣርሰተ ሰማን ቅጥኣዕዮህዕኔ።

5 ኣዕኑ ጎፍሚ በር ለለኖ ጡሚሃ ኣመዕነት መሳን መገን ዎልቃን ኣገረንጉንታኦ።

6 ህካን ኣኮቤቹሃ ቀዎ ወክቲሃ ኣደደ ፊተን ኣዜን ህጉክዕኔ ሻዘሰኖሃለከ ፈቅባሃ ኣኮጎሬሁ ጡምንከክዕኔ ተሽ ዩንክዕኔ።

7 ሁኩ ፊተነት ኢልታህዕኔህ ኣመዕነቲክዕኔ ህንቅ ኣሁሰ ኣጥርመትሃት፤ በኣኖ ወርቁ ገራን ፊተነመኖ፤ ህንቅ ኣመዕነቲክዕኔ በኣኖ ወርቁኛ በትሽ ዋጉ ዮሲሁ ህት ፊተነሙ ሀሰሰኖሰ፤ ሁኩ ህንቅ ኣመዕነቲክዕኔ መሲህ ኢሰ ፈንቀል ኣሜተኖ ወክት ገለት፡ ኬዕምኣለከ ናዱ ደግሲሰኖህዕኔ።

8 መሲህ ኢሰ ለኢንበጎሬሁ ኢትቴነንተሰ፤ ቲሁ መሃ ኣሉ ለኢንበጎሬሁ ኣሰን ኣመዕነቲንታኦ፤ ላጋን ኩሉን ኣታሊንበለከ ከበጀዎ ተሸቲን ተሸ የኖህዕኔ።

9 መሰንትሰ ኣመዕነትክዕኔ ጎፍሞሃ እኮ ነብሴክዕኔ ጡሙ ደዕቲንተቤቹሃት።

10 ህካን ኣኮቤቹሃ ጡምተኔሃ ክዕኔሃ ኣህኖ ኣሰቲተ ራጎ ነብያከት ኣበ መረመርቶኡ።

11 ኣሰን ኣዜንከሰ ሃዕዮ መሲህ ኣያኑ መሲሁ ኣሉን ኢልታ ኦርሸተለከ ኦርሸኛ ኤተሮን ኣሜተኖ ኬዕምኣተኔሃ ሄጭ ለልጽ ኣቅ፤ ኣሰን ሁኩን ጉዕሙንኩ መ ወክትለከ ህት ኣክ ኣህኖጎሬ መረመርቶ ኣቅ።

12 ከን ጠውተኔሃ ነብያከት ካደንታ ኣቂሁ ክዕኔታት ቤሉ ገዉሰ ኣሁ ሆጉሰ ለልዮሰ፤ ከ ጠወ ክዕኔሃ ዱዱብሰቶኢሁ ኣንጂላ ክዕኔሃ ኤቦ መናከት ሰሜኛ ሶህሞ ጠሊላ ኣያንንት።

ጠሊላ ኣሄን ሄዕተኔሃ

13 ህካን ኣኮቤቹሃ ቀልብክዕኔ ኬሴን ሆጎተ ቅጥ ይዩ፤ መሲህ ኢሰ ፈንቀል ኣሜተኖ ወክት ደኣቲነንተ መገን ኣሳቲተ ዋሙ ቀልበን ተብሳሃ ኣዕዩ።

14 ትዛዝ ቶጋ ኣለገ ኣከን ደጉ ሆጊን ዎዕነ ዮህዕኔ ሂላ ሄዕላቸተ ኣዎንቶኖቹ።

15 ጠዉ ኣኮጎሬ ገኤህዕኔ መገኑ ጠሊላ ኣኮገን ኣዕኑሁ ሄኡንከክዕኔ ጉዕማንን ጠሊላኑተ ኣኬ።

16 መሰንትሰ «እን ጠሊሊ እኮምቤቺን አዕኑሁ ጠሊላኑተ እኬ» የመም ከተበሞኡ።

17 አዬሃ ጎሎሶናን ጉዕሚንከሰ ሆጎሰገ ፈረደኖ መገኑ «ኒ እነ» ይጌጉ ገለጽገገጋሃ እኮች ከን ኣዲንያ እሊን ኮሀ እከን የንጉ ጌሳን መገኑ ዎቺቴን ሃዕዬ።

18 አዕኑ እናካችክዕኔ ረገኤንተ ተሰ ሄኢች ወዘንቴንጋሁ በአኖ ብሪን ሀከረንገ ዎርቂን እሁ ሆጉሰ ደጌነንተ።

19 አዕኑ ወዘንቴንጋሁ ጤዕየት ሀከረንገ ኩሌኖሰርቼ የበእ ነጠ ሆልቼ እኮ መሲህ ኬዕምኛ ቂጌኒት።

20 እሰ ለሌኢሁ ኣዲንያ አሉ ከለቀሙዕነ ብሪን አሀን ቴሱ ጎፍሚ ዘማኔን ክዕኔጌሃ ለልዮኡ።

21 አመዕነቱክዕኔለከ ተብሶክዕኔ መገኖን እክ መሲህ መሳን እሱ ሬሆች ኬሾሰለክ ኬዕምኛ እሴ መገኖን አመዕነንቴንገተ።

22 አመዕናተ አኑጣቀንሱ የበእ ኢተት ሄኑሀዕኔተ ሀንቂሃ እዘዘንቴን ነብሳክዕኔ ነጠ አቴንጋእ፤ ሀካን እኮቤቺሃ ዋሚ * ቀልቢንክክዕኔ መት-መተንክክዕኔ ጠረኝቴን ኢተቀሚ።

23 ለንኪሃ እለንቴንጋሁ ሄኣናለክ ዘላላሚሃ ኡር ሄኣኖ መገን ላጋን በእበ ዘራቺት ቤሉ በኣ ዘራቺበእ።

24 መሰንትሰ

«መኑ ጉዕሙንኩ ሀጤገ፤

ኬዕምኛሰ ጉዕሙንኩ ቦብሎጋት፤

ሀጥት ሞልጋእ፤ ቦብሎጋት ግገልጋእ፤

25 ጠዉ እኮጎሪ ቀርኝ ላገት
ዘላላሚሃ ጠረኝት ሄኣኤ»

ዱዱብሰንቶሀዕኔ ተሸት ላገት ተኒት።

2

ሄኣኖ ክኑለክ ጠሊሊ ኡመት

1 ቴሱ ሾክመተ ጉዕመንከ። ጣንሱ ጉዕመንከ። ተሰቂነጡ። አቄሽተለክ ሄምተ ጉዕመንክ ክዕኔች ቁርሰዬ።

2 ሃዕሮ እለንቶ ሰብያኑት አዙተ ሃዕላጋሀንገን አዕኑሁ ጡምቶኖተ ነጽቴን መርቴንገተ ነጠ ትምርት ሃዕላቺ።

3 መሰንትሰ ሃዕላቶኖተ ኦጋልቴንገንገኩ «ጠለዕል ቀርቼ ጎደበ ላፈ እሁሰ ደጌነንተራት።»

4 ሀካን እኮቤቺሃ ሄኣኖ ክኑ እኮ ቀርቻ ኢሰቤቼ ሆንጠኬ፤ ሁኩ ክኑ መኑ ሀንቅ አጉሮሰ ጠዉ እኮጎሪ መገንሀኒን ዶዕርዮሰሀለክ ከበጀሞ ዋጉ ዮሰሃን።

5 ቀርቻሃ ኢሰቤቼ ሆንጠኬንገጋሁ ሄኣኖ ክንገ እኬን መኪኒት፤ ከን ሃሌን መሲህ ኢሰ መሳን ተሸ የኖ ክትመ መገኒሃ ሆንጠሆሶኖተ ጠሊላኑተ ቂሰተ እኬነንተ።

6 ጠሊሊ መጻፋን

«ሁኩንገ ዶዕሪመሰለክ ከበጀሞ
መረበ ቡዕል ክኑ ጽዮናን አፋሻም፤
እሶን አመዕነኖሁ ሆሮን ሙላኖበእ»

ይጋ ላገት ከተበንት ደገንጋእ።

7 ቴሱ ክዕኔሃ አመዕነንቴንገተሁኑሁ ሁኩ ክኑ ኬዕምኛ ዮሰሃን፤ ጠዉ እኮጎሪ አመዕንትቡሁኑኣሃ
«ግንበኛኑት ሀንቅ ኡጅቶ ክኑ

እሰ መረበ ቡዕል ክኑ እኮ።» *

8 ህትን

«መኒሃ ጉፍቼ እሀኖ ክኑ
መኑ ቆዕል ኡበኖገ እአኖ ክኑ» የኖ።

እሰ ላገሰ አመዕኑ ሆጎቤቺሃ ቆዕልጋእ። ሄጭትን ከኒሃ መጠረንቶአራን።

9 ጠዉ እኮጎሪ አዕኑ ቴንሰቺኝ ኣጅብሰሰኖ ኑሪሀሰ ገኤሀዕኔ መገኒሃ ኣጅብሰሰሳ ሆጉተ አዋጅቶኖተ መጠረንቴንገተ ክልቀት። ዎሚ ቂሰተለክ መገኑ ገይሰሃ አዕዮ ጠሊሊ ኡመት።

10 አዕኑ ወዕና መገንገየ ኡመትበእ እቅ፤ እኮጎሪ ቴሱ መገንገየ ኡመት፤ ወዕና ማርቴተ ደአቴንበረ እቅ፤ ቴሱ ማርቴተ ደአቴንጋእ።

መገን ካዲመተ

1:16 ለዌ 11፡44-45፤ 19፡2። * 1:22 ዊሙ- የኖሁ መት-መቱ ሉሀ ክታበት «ነጠ» ይታእ። 1:25 ኢላ. 40፡6-8። 2:3 መዝ. 34፡8። 2:6 ኢላ. 28፡16። * 2:7 መረበ ቡዕል ክኑ- የኖሁ ምኒ እጃሪን ኡርሰኖ ቱቅጎ ምኒ እጃሪሃን። 2:7 መዝ. 118፡22። 2:8 ኢላ. 8፡14-15። 2:9 ፋል. 19፡5-6፤ ኢላ. 43፡20-21፤ ዘዳ. 4፡20፤ 7፡6፤ 14፡2፤ ቲቶ 2፡14፤ ኢላ. 9፡2። 2:10 ሆሴ. 2፡23።

11 ኢ ጃላ! እዕኑ ከን ኣዲንያ ኣሌን ኮሀለከ መን ባዲ ኣሜቴንታሃ እከንተቤቹሃ ነብሴንከክዕኔ ኣለመኖ ማል ሃዕላቻቻ ኣገዕርቶኖተ ኡጫንክዕኔ።

12 ሂለ ጠወ ኣቴነንተ ይት ሃዕምቶሀሀዕኔጎሬ መገኑ ኔሳሃ ዲንደተ ኣሚተኖ በር ኣመዕንትቡ መኑ ጡመ ሆጉክዕኔ ለእ መገኑ ገለትጭቶተ እሰ በላን ሃኢነን ጡሙ ሃሉ ሃኢንክዕኔ።

13 ቀርቻሃ ኢሰተኔሃ ይቴን ሹምነቱ ኖሰ መኒሃ ጉዕሚንከ ኣዘዘሚ፤ ጉዕመንከ መኒሃ ሀለቀተ እኮቤቹሃ ምወ ምሚሃ ኣዘዘሚ።

14 ባዲ ገሽታህኡተ ኣዘዘሚ፤ እሰ ሂለ ኣታ መነ ቀጠኦተለከ ጡመ ኣታረ ገለትጭቶተ ምወ ምሚቶ ሶሀንቶኣራን።

15 መሰንትሰ ጡመ ጠወ ኣቴነን ገዉ መኑ ጠወኣ ጠወ ጨለ ይታገ ኣቶኖተ መገንተ ሃሸኣቱ።

16 መገን ካድመገ እከን ሰዎልድማን ሃዕዬ ቤሉ ሰዎልድመክዕኔ ሂለ ጠወ ድቤነንታሃ ኣቶኖቹ።

17 መነ ጉዕመንከ ከበጅዬ፤ ኣመዕናኑተ ኢትዬ፤ መገኑ ዋጅዬ፤ ምወ ከበጅዬ።

መሲህ ኦርሽ ምሳሌተኔሃ

18 እዕኑ ካዲመት ቀርቻኖተክዕኔ ከበጃን ጠገሚ፤ ኣዘዘንቴነንታህ ጡማኖተለከ ጎደበ ላፋኖተ ጠለዕል ኣሳሃ እሁዕነ ሃላኖተ ኣዘዘሚ።

19 መንቹ ገለትጨመኖሁ ኢሬን ኦርሽተ ቶገኖረ መገንተኔሃ ይ ፈረሀራሬ።

20 ሂለ ጠወ ኣቴነ ህከን ጠውተኔሃ ቅጣት ቶገን ፈረኪንተጎሬ ም ገለቱ ኖሀሀዕኔ? ጠወ እኮጎሬ ጡመ ጠወ ኣቴነ ህከን ጠውተኔሃ ኦርሽተ ቶገን ፈረኪንተጎሬ መገኒቻ ገለት ደኣቴነንተ።

21 ገእነቴንታህ ከኒሃት፤ መሰንትሰ እሰ ምቃሃ ኣምንቶኖተ መሲህ ክዕኔተኔሃ ኦርሽተ ቶገን ምሳሌተ እኮሀዕኔ።

22 እሰ ሆር ጨብ ኣዕኖበኣ፤ ኣፎንከሰ ክዘብ ላገት ደገንቶበኣ።

23 ቦረሮመሰ ወክት ፈንቀሽ ቦሮርበኣ፤ ኦርሽተ ቶጎ ወክት ፈየ ፈረደኖ መገኒሃ ገዉሰ ህግሽ ኣሴ ቤሉ ፎከርበኣ።

24 ነኡ ሬሆን ኣደ እህ ጌሰ ጨቤቻ ኣደ እንክ ፈይማን ሃዕኖተ እሰ ገዉንኩሰ ጨብኔ ማለንከሰ መሰቀል ኣሉን ኣጃእ፤ እሰ ጡሉን ኣዕኑ ፈይቴንታህ።

25 እዕኑ በኦ ሆለገ ጀል ጀል ይቴነንታህ ኣቅ፤ እኮጎሬ ቴሴ ነብሳክዕኔ ኣገረኖ ዜማንቻ ኣደ ፈንቀልቴንታህ።

3

ምኒ ኣንለከ ምኒ ኣመተኔሃ

1 ህትን ምኒ ኣማኖ! ምኒ ኣኖኖተ ኣዘዘሚ፤ ከን ሃሌን መት-መቱ መገን ላጋን ኣመዕንትብረ እኮጎሬ ምንሰ ኣማኑት መቱርቹሃ ጠወኡዕናን ጠለዕል ምንሰ ኣማኖ ሃሌን ኣመዕንቶተ ኣታልታህ።

2 ክዕኔቤቹ ኣሚቶተ ኣታልታህሁ ሙጨሩ እኮለከ መነ ከበጃኖሃ እሁክዕኔ ለኣራ።

3 ክዕኔ ደኑክዕኔ ሹሩበ ደዲን፤ ምርቂን ሹልምሲንለከ ጤኣተ ሀዕሬን ኦደኤኖ ኦድኑተ ኦደኢን ኣብሉን ለኤኖ ሹልሚን እሁንከ።

4 ጠወ እኮጎሬ ደኑክዕኔ መገን ብሬን ሞጉሰ ኣበ ከበጀሞለከ በኣበ ሹልሚን ጎደበ ላፍማንለከ ገዉ ኣገዕሪን ቀልቤን ኬዕምሰሞለከ በኣቡ መክሲን ገዉ ሆፍሲንለከ ኣታዕላን ሰውቴን ኣዘ ጅሰሚን እሁን።

5 መሰንትሰ ብሬ ዘማን መገኑ ተብሳ ኣታ ጠሊላኑ ሚንጉቱ መክጨንቶኣሁ ህትዬት ኣቅ፤ እሰን ምንሰ ኣኖኖ ትዛዝ ቶጎ ኣቅ።

6 ኣዘዘንቶኣንኩ ጎሬ ኣብሬሃሚሃ «ኢ ቀርቻ» ይተን ኣዘዘንቶሰ ደኒንት፤ እዕኑ ጡመ ጠወ ኣቴነንተረለከ መቱ ዋጅሲሰኖ ጠወ ህልቅሰባሀዕኔጎሬ ኣሴተ ኣለ።

7 ህትን ምኒ ኣኖኖ! ምኒክዕኔ ኣማኖን ሚጡብ ኣጥሬመቴን ሃዕዬ፤ ክዕኔቻ በትሰ ላፈ ክልቀት እኮቤቹሃለከ ክዕኔን ሚጡብ ሃኢ ኣሰተተ ረገኣቤቹሃ ኬዕምሹሰ፤ ከን ሃሌን ዲኣሃክዕኔ ጉፍቹ ኣሀርቶቹ ሃኣኖበኣ።

ጡመ ኣኢን ኦርሽተ ቶጎ

8 ጉዕመንኩክዕኔ መት-መቱንከክዕኔ ኢታን ሃዕዬ፤ ሞሎ መን ኦርሽተ ገይክዕኔህገን ኣቴን ሰውይዬ፤ ኣመኡሶጎ እከን ኢተቀሚ፤ ጎደበ ላፋኑተለከ ገዉክዕኔ ሆፍሲንተረ ኣኢ።

9 ህትን ማሰዕዬ ቤሉ ሃረርቹ ሃረርቹንለከ ቦርሩ ቦርሪን ፈንቀሽትኖቹ፤ መሰንትሰ እዕኑ ገእነቴንታህ ህክን ኣቶኖታት፤ ህክን ኣኢንክዕኔ በረከተ ረገኢነንተ።

10 ጠሊሊ መጻፋን
«መንዲኖን ዊሞ ሃኡ ሃኡተ ኢተኖሁለከ ጡመ በር ለኦተ ሀሰኖሁ ኣረብሰ ሂለ ጠወ ጠወኢቻ

2:22 ኣላ. 53፡9። 2:23 ኣላ. 53፡7። 2:24 ኣላ. 53፡5። 2:25 ኣላ. 53፡6። 3:2 ኤፌ. 5፡22፤ ቆላ. 3፡18።
3:3 1ጢዋ. 2፡9። 3:6 ክል. 18፡12። 3:7 ኤፌ. 5፡25፤ ቆላ. 3፡19።

- እፎስ ሂላ ተንኩተ ጠወኢች ገወሰ አገዕሩን።
- 11 ህትን ሂላ ጠወ ኢኢች ገወሰ አገዕሩን፤ ጡመ ጠወ እኤን፤ ህትን ወገሬት ሀሰን፤ ወገሬትንከ እዎን፤
 - 12 መሰንትሰ ቀርቻ እልት፤ ጠሊላት ለኣኣ፤ መጨንትሰ ዱኣሰ ሞጮጭቶተ ፈንተኣኣታን፤ ጠወ እኩገሬ ሂላ ጠወ አታ መን ኣሉን ቀርቻ ኡሙዕሬ ማኒተ ለሊሰኖ» የሞዎኤ።
 - 13 ጡመርቻ አቶኖተ ሃሽኤንተገሬ ምዕረተ ኢልሰኖህዕኔህ ኣዬት?
 - 14 ጠወ እኩገሬ ጡመ ጠወ ኣቴን ኦርሸተ ቶንተተገሬ በረከተ ደኣቴንተ፤ መን ፎከረተ ዋጅቶኖቹ፤ ጨነቀንቶኖቹ።
 - 15 ቀርቻ መሲህ ቀልቤንከክዕኔ ከበጅዬስ፤ ሂኣክዕኔ ቀርቻ እዕዬስ፤ ክዕኔን ዮ ተብሴሃ ጠዕመኖህዕኔህን ጉዕሚንከ መሰለ ኣቶኖተ ጉዕመ ወክት ተቃጠቤ።
 - 16 ጠወ እኩገሬ መሰሉክዕኔ ጎደብ ላኖማንለከ ከበጂን እሁን፤ መሲህሃ ኣኤንተቤቼሃ ዮህዕኔ ጡመ ሃል ኣሉን ሂላርቻ ጠወኣ መኑ ሂላ ጠወኣከሰ ሙልቶተ ጡሙ ሰውቱ ሂኣከዕኔ።
 - 17 መገኑ ዩግሬ ኣዕኔ ሂላ ጠወ ኣቴን ኦርሸተ ቶንተተህኒች ጡመ ጠወ ኣቴን ኦርሸተ ቶን ቆህኖ።
 - 18 መሲህ ገወሰ መገን ቤቹ ሆንጠህሶህዕኔተ እሰ ፈየ እህን ፈየ እንኮምበኣ ሊ ጨብ መሳን መንተኔሃ ሜጠረን ሬዮኤ፤ እሰ ማለን ሬይ ኣያንን ሂኣኖሃ እኮ።
 - 19 ህከን ኣያንን ኡሱር ሞኔን ዮ ነፍሴቤቹ መር ተሸት ለገተ ዱዱብሴስ።
 - 20 ህኩ ኡሱር ሞኔን ዮ ነብሴቤቹ ሄጭ ኑህ ዘማን መርከቡ ቅጥየን መገኑ ኣደቢን አገራንሰ ሃዕዮገን ትዛዝ ቶጉ ግባኤራን፤ ህከ መርከብ ኣዝ ኣግ ዊ መሳን ጡምቶኣሩ ዋለንሸብ ህዜቱሃ መን ኣቅ።
 - 21 ህኩ ዉሁ ቴሱ ክዕኔተ ፊሰኖ ጥምቀትተ ምሳል፤ ኩ ጥምቀቱ ጅሰሚች ጡር ከሙ እሁዕን መጨፍፍ ቀልብ ደኣሃ መገን ቤቹ ሆንጠህሰኖሃ ዱኣ፤ ፊሰኖህዕኔንኩ መሲህ ኢሰ ከኣ መሳኒት።
 - 22 እሰ ሰማ ኦርዕይ መገን መኪን ዮኤ፤ እሲንከ መላይከት፣ ዳኛኑትለከ ዋልቀት ዮሰሩ ጉዕሙንኩ ጠገንቶስ።

4

ጠሊልማን ሂኤ

- 1 መሲህ ማለንከሰ ኦርሸተ ቶንሃ እኮቤቹሃ ኣዕኔ በገዝ ኦዳተ ቆዕሬ መንገ ከን ሰውቲን ጠረኝቲን ተቃጠቤ፤ ማለንከሰ ኦርሸተ ቶን መንቹ ጨብ ኣኤ ኣጉርኤ። *
- 2 ከኒች ኤተርን ፈቆ ኣዱንያ ኣሉን ሂኣከዕኔ ማል ሂላ ሃዕላቸተ ኣኢን እሁዕን መገን ሰውት ኣቴን ሃዕዬ።
- 3 ኣይሁደ እክበሩ ኣታህንገ መጠረቁ ዮበኣ፣ ሂላ ሃዕላቻን፣ ሰከርን፣ ጌሱ ዮበኣ ሙንዲኖን፣ ጌሱ ዮበኣሃ ኣንገን ቦሎቹ ከድቶለከ ኮፍዮኖ ሸርክተ ኣቴንን ሂኣከዕኔ ዘማኑ እህኖ።
- 4 እኩገሬ ቴሱ ከን ጠዋን እኮበኣኤስ እሳን ሜጡብ ፍጭርቅ ዩ ሆንተቤቹሃ ኖዳኣ፤ ህትን ቦርርታኣ።
- 5 ጠወ እኩገሬ ፎሊን ዮህኑኡንለከ ሬዮ መን ኣሉን ፈረዶተ ቅጥይዮ መሰለ እሲሃ ኣታኣ።
- 6 ከን ሃሉን ጉዕመ መንገን እሰን ማለንከሰ ሬቶተ ፈረደሞስ፤ ጠወ እኩገሬ ኣያንከሰ ዘላላሚሃ መገንገ ሂኣተ ኣንጂሉ ሬቶህኑኡተ ዱዱብሰሞኤ።
- መገን ኣሰቶን ጡመገ አታ መንተኔሃ
- 7 ጉዕማንከ ጠዋሃ ጎፍሞሰ ኢልዮኡ፤ ጠረኝቲን ዱኣ ኣኣሃ ኣታልቴንተ ተሬገጮ ቀልቡ ሂኣከዕኔ፤ ህትን ገዉ አገዕሪን ሃዕዬ።
- 8 ኣተት ልግብ ጨብ ማጦተ ኣታልታቤቹሃ ጉዕመርቻችን በትሽ ገገዉክዕኔ ጠረኝቲን ኣተቀሜ።
- 9 ህትን ቁንቁቶኑዕናን ገገዉክዕኔ ኮህ ቶቃቀሜ።
- 10 ኣደደ ኣኮ መገን ኣሰቶን ጡመ ሃሊን ገሽቶኖተ ክዕኔች መት-መቱስ ኣሰሞሰ ኣሰቶን ዋሉ ካደሙን።
- 11 ህካን እኮቤቹሃ ተማርሰኖህ ኣይሁ መገን ላገተ ተማርሰኖህንገ ተማርሰን፤ ህትን ካደመኖሁ ኣይሁ መገኑ ኣሴስ ዋልቃን ካደሙን፤ ከን ሃሉን መገኑ መሲህ ኢሰ ኣዲን ጉዕማንከ ጠዋን ሎዕረኖ፤ ኬዕምኛለከ ዋልቀተ ዘላላሚሃ እሲሃ እሁን፤ ኣሚዕን!

ኦርሸ ወክቲን ጠረኝተኔሃ

3:12 መዝ. 34፣12-16። 3:14 ማቶ. 5፣10፤ ኢሳ. 8፣12-13። 3:20 ክል. 6፣1—7፣24። * 4:1 ማለንከሰ ኦርሸተ ቶን ማንቹ ጨብ ኣኤ ኣጉርኤ- የኖህ ካን ዋሉ ፍሳረት «መሲህ ማለንከሰ ኦርሸተ ቶንቤቹሃ ጨቤሃ ዋልቀት ሂኣሰበኣን እዕዮኖ» የኖሃን። 4:8 ሞሳ. 10፣12።

12 ኢ ጃላ! ጊረገ ፊተንታህዕኔ ኦርሽ ኣዜን እኩንተ ወክት ርሰዎበእ ሃዕሮ ጠዉ ኣሌንከክዕኔ ኢሌህንገ ኣቲን እጅብሰጭቶሮቶ።

13 ጠዉ እኮጎሬ መሲህ ኬዕምኞ ለለኖ ወክት ኣበ ሙንደኦሮተ እሰ ኦርሸተ ቤቀንቴነንተረ እኩንተቤቺሃ ተሸ ዩንክዕኔ።

14 ህትን መሲህ ሱዕምተኔሃ ቦሮረንቴንተጎሬ ኬዕምኞ ኣያን እኮ መገን ኣያኑ ክዕኔ ኣሌን ፎሎጨኖቤቺሃ ማሰእንቴንታእረ።

15 ጠዉ እኮጎሬ ክዕኔቶ እዩሁ ኦርሸተ ቶገን ነብሳ ሸህንገ፣ ሞጋንቶገ፣ ተንኩተ ኣእኖ መንቶገለከ መን ጠዋን ገኡኦሮናንሰ ኣገኖ መንቶገ እሁንከ።

16 ኣመዕናንቶ እኮቤቺሃ ኦርሸተ ኢልታሲሁ ሄዕዮ ጎሬ ኣመዕናንቶ የመዎ ገአዋንከሰ መገኑ ገለትጩን ቤሉ ሙሉንከ።

17 መሰንትሰ ፍርዱ ጀመረኖ ወክቱ ሆንጠኩኡ፤ ጀመረኖንኩ መገን መን ኣሌኒት፤ ህከረ ፍርዱሰ ጀመረኖህ ኒ ኣሌን እህሮረ መገኒሃ እንጂሊሃ ኣዘዘንታበእ መኒቶ ኤተሩሰ መ እህሮ?

18 ጠሊሉ መጻፉ «ፈዩ መንቶ ጡመኖሁ ኣበ ጭንቃን እህሮሃ እኮቶ መገኒሃ ጠገንትብሩለከ ጩብኛኑት ህት ኣካእ?» የኖ።

19 ህካን እኮቤቺሃ መገን ሰውቴን ኦርሸተ ቶጋ መኑ ገዉሰ ኣመዕነዎ ካለቂሃ ኤገተ ኣቲን፤ ጡመ ጠወ ኣኡ ኣኩርቱንከ።

5

መገን ኡመት ገሺታ መኒሃ ኣሰንቶ ሸዘነተኔሃ

1 ቴሱ እን ኣሳንን ሜጡቡ መገን ኣመዕናኖ ዱእ ምናተ ባልቅ እኮሚሁ፣ መሲህ ኦርሸተኔሃ ምሰክር እኮሚሁ፣ ከ ኤተሩ ለለኖ ኬዕምኞ ቤቀማዎ እኮሚሁ በላንከክዕኔ ዮ መገን ኣመዕናኖ ዱእ ምን ባልቀተ ሸዘንሰ።

2 ኤገተ ኣሴ መሀዕኔ መገን ዜሞህ ኣገሬ፤ ዜሞሰ ኣገርቴነንታንኩ ዎልቃን እሁዕነ መገኑ ሀሰኖ ሃሊን ኢታን እሁን፤ ህትን ብረ ኢቲን እሁዕነ ሀዕልቶኖተ ዮህዕኔ ሃሸኣቶን እሁን።

3 ህትን ክዕኔ ሹምት ኣዜን ዮ መን ጭንፍቴን ጠቅቶኖተ እሁዕነ ዜሚሃሰ ጡመ ምሳልተ ለሊሲን እሁን።

4 ህካን ኣቲንተጎሬ ሀንገፋ ዜሚንቶ እሚተኖ ወክት በእቡ ኬዕምኞ ኣክሊለ ደኣቴነንተ።

5 ህትን እዕኑ ዎደለት ባልቂሃ ኣዘዘሚ፤ ጉዕሙንኩክዕኔ ገው ሙግ እኡ ኦድኖገ ኦደኤን መቱ ዎሉሰ ካደሙን፤

«መገኑ ቦነኖ መን ግበኖ፤ እኮጎሬ ገዉሰ ሙግ ኣታ መኒሃ ኣሰቱሰ ኣሰኖ» የመዎ ከተባጠኡ።

6 ቴሱ መገኑ ዬ ወክቱን ጎት ጎት እኡሀዕኔተ መገን ዎልቃሚ ኣንገቶ ዎሮን ገዉክዕኔ ሙግ ሙግ ኣዕዬ።

7 ህትን መገኑ ክዕኔተኔሃ ሰውየሮቤቺሃ ሻዘሰኖሀዕኔርቶ ጉዕመንከ እሰ ኣሌን ኡጅዬ።

8 ህትን ጌሲን ሄዕዬ፤ በቅይዬሁ፤ ዲኑክዕኔ ኣልቢሱ ኣኩዕመኖሃ ሀሰን ዎደኖ ዘቤገ ዘሀኖት።

9 ከን ኣዲንያ ኣሊን ጉዕማንን ዮ ኣመዕናኑት ኣመክዕኔ ኦሱት ህት ኦርሸተ ቶጋኢሃ እሁሰ ደኒን ኣመዕነቲን ጠረኝቴን ኣልቢሰ ግቤሰ።

10 ቀዎ ወክቲሃ ኦርሸተ ቶገንታቶ ኤተሮን መሲህ ኣዲን ዘላለሚሃ ኬዕምኞቤቶ ገኤሀዕኔ ጉዕመ ኣሰቶ መገኑ ገዉንኩሰ ዋሚተ ኣእኖሀዕኔ፤ ድክሰኖሀዕኔ፤ ጠረኝሰኖሀዕኔ፤ ኡርሰኖሀዕኔ።

11 ዘላለሚሃ ኢሉ ዎልቀት እሲሃ እኩን! ኣሚዕን።

ኤተር ወገሬት

12 ኣመዕነዎ ኣመኤቤቱ ይ ሰውያዎ ሰላሴ ኣዲን ከ ሶህት ገበንቶን ከተቦንክዕኔ፤ ከተቦንክዕኔንኩ ሸዘሀዕኔተለከ ኩን ህንቅ መገን ኣሰቱተ እሁሰ መሰከርሀዕኔተ ይዱት፤ ህካን እኮቤቺሃ ከን መገን ኣሰቶን ጠረኝቴን ኡዕይ።

13 ክዕኔገን መጠረንቶ ባብሎን ከተንቶን ሄኣ መገን ኣመዕናኖ ዱእ ምኒቶት ወገሬት ሆንጠባህዕኔት፤ ቤቱእ ማርቆሲሁ «ወገሬት ዮንተንደ?» የኖሀዕኔት።

14 ኣመዕናኖ ኢተ ሱንቃቀንሺን መት-መቱክዕኔ ዝያዕረሚ፤ መሲህረ እኩንተሀኡ ጉዕሚንከክዕኔ ወገሬቱ እሁን።

ጴጥሮስ ከተሮሃ ለንክ ሶህተ ኣጉሰ

ለምቅ ሶቀማንኛ ጴጥሮሴ ሶህነት ከተበንቶኢሁ አደደ ቤቸን ሃኣ ዎዕኔ ዘማን አመዕናናታት። ሶህናሰ ቡዕላ እኮ ሰውቶ ክዘብ አሰተማረ ሂላ ሆጉተለክ እሰ ትምርት መሳን ኬዕዮ ሂላ ሆጉሰ ግቡሃን። ኬኦ ኦርቫተ መላ አህናሁ ኢሰ አሌንከሰ ለኦአረላክ ተማርሰን መጫንከሰ ሞጭጭቶ መኑ ተማርሰቶ ትምርት መሳን መገንለክ ቀርቾ መሲህ ኢሰተነሃ ሀንቅ ኢንኬዕኑ ደኡሃን። ከተሶሲሁ በትሽ ጠረኝኛሁ «መሲሁ ፈንቀል አሜተናበአ» ዮና ክዘብ ትምርቲኛ ኣገዕርተኔሃት፤ ሀካንን ለሊሽ ጠወእን «መሲህ ፈንቀል አሜቱ ዲንከኖሁ መገኑ መኑ ጉዕመንኩ ጨቢኻሰ ፈንቀሎታት ቤላ አደሁ በኦተ ሀሰናበአቤቺሃት» ዮና።

መጻፉሰ አፎሃ

- ኣጉሰ (1፡1-2)
- አመዕናና ገአሙ (1፡3-21)
- ክዘብ አሰተማረተ (2፡1-22)
- መሲህ ፈንቀል አሜቱሰ (3፡1-18)

1 መሲህ ኢሰ ካዲንቶለክ አሳቤቹ እኮም ሰሞን ጴጥሮሴኛ መገኑኤለክ ጡምሳንኻሃኔ መሲህ ኢሲን ደገመኖ ደፈመ መሳን ነኡ ደአኖም አመዕነትገ ዮ ከበጀሞ አመዕነት ደአቴንተሀኡኡተ፤

2 መገኑለክ ቀርቹኔ ኢሰ ደገን ኣሰቱትለክ ወገሬቱሁ በተኡንክዕኔ።

መገኑ መን ገኡሰለክ መጠሩሰ

3 ኬዕምኻንለክ ጡምማን ገኡኔ እሱ ደንጎንሰቤቺሃ እሰ መገኑ እህሰ ዎልቃንተሰ ሂኢሃለክ ጡመ ሂኢን ሄዕናተ ሀሰሰናርቹ ጉዕመንክ ኣሰዮኔ።

4 ኬዕምኻንከሰለክ ጎደበ ላፍማን ከበጀሞ ዋጉ ዮሰለክ አበ ሎረ እኮ ተብሴ ላገተ ደአኖም፤ እሰ አዲን ሰዕኑ ከን ኣዲንያ አሊን ዮ ሂላ ሄዕላቻኛ ፋሽአቴን መገን እህ ሃል ቤቀማኑተ እኬንነተ።

5 ከን መሳን ከኒቶ ሞሮን ዮ ጠወ በርገሞሀዕኔተ ጠረኝዮ። አመዕነት ኣሊን ጡምመተ፥ ጡምመ አሊን ኢንኬዕኑ።

6 ኢንኬዕኑን ኣሊን ገው ኣገዕሩ፥ ገው ኣገዕር ኣሊን አታዕሉ፥ አታዕል ኣሊን ጡመ ሃሊን ሄኡ።

7 ጡመ ሃሊን ሂኢ ኣሊን አመኡሶ ኢተቀንሽ ኢተቀሙ፥ አመኡሶ ኢተቀንሽ ኣሊን ኢተተ በርግዬ፤

8 ሁኩሩ በተአ ሂኦሀዕኔገሬ ቀርቹኔ መሲህ ኢሰ ደጎናተ ደግለልቴንበረ አቶቱ ዮህኔበአረ እኬንነተበአገ ኣገርታህዕኔ።

9 እኮገሬሁ ሁኩሩ ዮሰበአሩ ቁዕራሻን ዮርቹ ለኦተ አታልግ ቆቀሃን፤ ዎኔሰ ጨቢኻ ነጠ እሁሰ ሀሶኡ።

10 ሀካን እኮቤቺሃ አመኤ ኦሶ! ገአሙክዕኔለክ መጠረሙክዕኔ አጥራሙተሃ በትሲን ሀሴንነተረ እኬ፤ ካን አቴንተጎር ሆሮ ቆዕልቴንተበአ።

11 ከን ሃሊን ዘላላሚሃ ሂኣኖ ቀርቹሃኔለክ ጡምሳንኻሃኔ መሲህ ኢሰ ዎምነቴን ኣኔንነተገ ዊመ ዎሚን ኣሰመኖሀዕኔ።

12 ከ ጠወ ደገንተጎሬ፥ አፈንተ ሀንቱን ጠረኝቲን ሂኢንተ ጎሬ እሰተ ክዕኔሃ ቃግሱ ኣጉራምበአ።

13 ዲካንገ ድጀመኖ ከን ጅሰሚንከኤ ፎሊን ዮም ጌሳን ክዕኔተ ጉዕመ ወክት ቃግሱ ሀንቅ ኣጉጅ ለልዮኡ።

14 ቀርቹኔ መሲህ ኢሰ ለሊሻኤ ሃሊንን ዲካንገ ድጀመኖ ጅሰሚኛኤ ደዕል ሬሆን አደ እሃም።

15 እን ቴሱ አጸማምቲሁ ሬሆን አደ እኮሚኛ ኤተሮን ከ ጠወ ጉዕመ ወክትንከ ቃግሱ አታልቴንተጋት።

መሲህ ኬዕምኝተነሃ ለኦ ምስክር

16 ቀርቹኔ መሲህ ኢሰ ዎልቀሰለክ ፈንቀል አሜትሰተነሃ ኩልኖክዕኔ ወክት ገወኔ ኬዕምኝሰ አሊንከኔ ለዕን መሰከርናርፍ ቤላ መን ተጎኩን ያዴመ ማቁተ አሞረበአ።

17 «አሲን ተሽ ዮና ኢታም ቤቱኤ ከኒት» ይታ ላገት ከበጀሞ መገኒኛ አሜቶሰ ወክት ኣና መገኒኛ ኬዕምኝለክ ሎርመተ ኣኢኦ።

18 እሲን ሜጡበ ጠሊላ ቆተ ኣሊን ሄዕኖም ወክት ሀካን ሰሜኛ አሜቶ ላገተ ነኡ ገወንኩኔ ዎጭጭኖም።

19 ኩን ጉዕሙንኩ ነብያኑት ጠወአኢሁ ሀንቅ እሁስ ተራገጥሲስ ኩልታኔ፤ ህካን እኮቤቹሃ ቱንሰቾን ኖ ሙብረቲሃ አገዕርቲንገተሀንገን ሱጵት አገተ ኢሉ ሶዝ ቡዕራትቹት ቀልቤንከክዕኔ ለልቶተ ኢሉ ነብያከት ጠወኑ ላገተ ጥሽ አቲን አገዕርቹ።

20 ጉዕሙርቹችን ሃጭቲን ሰውዮ ሀሰሰኖሀዕኔሁ ጠሊሊ መጻፋን ኖ ሀከ ራገሃ አጸሁ ገይሰ ሰውቲን ፈሰሮተ አታልባሃ እሁሲት። *

21 ሀኩ ራገሁ መን ሰውቲን ሆሮ አሜቾበእ፤ ጠወ እኩገራ ራጉ መገን እያኒን አዎንቶ መኑ መገኒች ቶግ ጠወኦእሃን።

2

ክዝብ አስተማረተኔሃ

1 ጠወ እኩገራ ከኒች ብርተ ክዝብ ራጋኑት ኡመት በላን ሄኑሀንገን ህትን ክዕኔ በላኒ ክዝብ አስተማረት ሄኦእ፤ እሰን ቤሱ ኤቦሮ ክዝብ ትምርት ሎድአት ኣግሳእ፤ እሰ ቤሱ ኤቦሮ ክዝብ ትምርት ማጥቶን አልባዕላሮገ አታኦ፤ ዎኸሰ ቀርቹንከ ለገኦ ደዕለገሰሰኖ በኡ አሊሰ ኤሳኦ።

2 ከን ሃላን ልግቡሰ አሰ ብልኝ ዎቃሃ አዎንታኦ፤ እሰ አቶ ሂሊ ሆጎች ኬዕዮሀኒን ሀንቅ ዎቆሁ ቦሮረመኖ።

3 ሁኩ ክዝብ አስተማረት ብሪሃ በትበት ዪች ኬዕዮሀኒን ገዉሰ ቅጥአቶ ሄሱተ ጠወኦን ቦጋሀዕኔ፤ አበ ዘማኒች ብርተ ጀመር ፍርዱ ቅጥይኖሰ፤ በኡ ሀንቁንከ አገረኖሰ!

4 መላይከት ባሽን ጨብ አቶ ወክት መገኑ መረርሲጨዕናገሰ ቱንሰቾን ጥዕላሽ በዌ ኣዜን ኡሱረንጎት ፍርድ በር ኢሉ አገርቶተ አዛብ አደ ዋሽ ኡጂሰ፤

5 ህትን ፈይመ ዲዲብሳጎንቹ እኮ ኑሃ ዎሎ ለመላ መኒን ሜጡብ ጡምሽ መገኒሃ ሰገድቡ መኑ ሄኦ ኣዲንያ አሊን ቤሰ ዋሃ ኤቦ ወክት ዎዕኔ ኣዲንያ አል አሙቸ። መረርሰጭኖበእ።

6 ህትን መገኒሃ ጠገንትበረ ጉዕመንከ ቀጠኤኖ ሞሳልተ እኮተ ሰደምለከ ጎሞር ከተመ ጠበሩ እካኢሃ ኢሉ ቡሰ በአገ ፈረጆሰ፤

7 ጠወ እኩገራ ሴረ አገርትቡሁኑኡ ቢልኝ ሆጎን ኦርጨቀመን ሄዕዮ ፈዮ ሉጡ ጡምሾሰ፤

8 ሁኩ ፈዩ መንቹ በለሰ ሄዕዮ ወክት በሬን በሬን ለአንለከ ሞጭጨን ሄዕዮ ቢልኝ ሆጎንከሰ ፈዩ ነብሰሰ ጨነቀመኖ እቅ።

9 ቴሱ ኩን ጉዕሙንኩ ህት እኮች ቀርቹ እሲሃ ጠገንተን ሄኦእረ ፊተናች ጡምሰናሰገ ጨበኛኑንተ ህት አዕይ ቀጠኦናገሬለከ ፍርድ በሬተ ህት አዕይ አገረኖሰገ ደገኖ ዩሃን።

10 በትሽን ከ ሂሊ ማል ሄዕላቸተ አዎንታአረለከ መገን ሹምነቱ ህንቃአረ ፍርዱ አገረኖሰ፤

11 ኩኩ ክዝብ አስተማረት መላልታአረለከ ቦንታአረ እኮቤቹሃ ሰሜ ሹምነቱ ኖሰረ ቦሮሩ ዎጅታበእ። ሀኩ መላይከት እሳች ዎልቃመተለከ ጠረኛኑት እኩገሬሁ ቀርቹ ብሬን እሰ አሊን ቦሮሪንገሺን ዊንቶ ላጋን ክሰ ሆንጠሀሳሰበእ።

12 እኩገራ ኩ ክዝብ አስተማረት አጥራመት ደግበርቹ ቦሮርታኦ፤ እሰ ዎሻዳን ኣግሃለከ ሬቶተ ከለቀንቶ ሃሊን ሄኦ ቡዕሎ ኖሰበእ ግዝጋት፤ ሁኩ ግዙ በእኖሀንገን አሳሁ ጡብንከ በእኦ።

13 ሹክመተ አቶቤቹሃ ዋገሰ ደአታኦ፤ እሰ ሙንዲኑት ቡሰኖ አሮን ሰከሩሃለከ ኒሱ ኖበእሃ ጨፈሩ፤ ህከን ኒሱ ኖበእ ጨፈሩን ክዕኔን ሜጡብ ድግሲሃ ገኤኖ ወክት ጣንሰኖ ማል ሆንጎተሰ ኮፍ ይታአረለከ ሙልሲሳእረ።

14 ጨብ አኢች አጉርትቡ ዝናን ዊንቶ አልት ኖሰ፤ ጨብ እት ሆሮን ሰገብሰ ሙዕርታበእ፤ አመዕነቶን ጠረኝት ኡርትበ መን ሉሲሳኦ፤ ዲንያተ በትበት ይታኦ፤ እሰን ቦሮረንቶአረ።

15 እሰ ሀንቅ ዎቃሃ አጉርት በኡኡ፤ ሂሊ ሆጉተ አኢን ደገመኖ ዲንየተ አተኖ ቢኦሬ ቤት በለዓሜ ዎቃሃ አዎንት ሉሶኦ።

16 ጠወ እኩገራ በለዓም ጨብሰተኔሃ ዎቀሰሞኡ፤ ጠወኡ አታልትቡ ሀሩቹት መን አፎን ጠወኦ በርገሽገ ኖ ነብዬች ሆጉተ ኡርሶኦ።

17 ሀኩ መኑ ዉሁ ኖበእ ቡቆገ ኖአረ፤ ህትን ኡንጉሎሎን ሀንበለንት መርታ ጉንጂገ ኖአረ፤ ጭልመ ቱንሰቹ አገረኖሰ።

18 ሉጨንሽ ኣዜን ሄኦ መን በሊች ፋሽአት አሜቶኢች ልግብ ዲንክትቡ መንተሰ እኮ ቦን ላገተ ጠወኦን ማል ሄዕላቻንለከ ዝነተ አኢን ጣንሰት ለንኪሃ ፈንቀሽት ጨብቤቹ አዎንሰታሰ።

19 «እሰ ገወንኩስ ሰዎልድማን ፋልቲንጎተ» ይተን ተብሳ አታሰ፤ መኑ ቁለመሪሮ ቁሎሀኒሃ ሮሰ እክ ጠገመኖቤቹሃ እሰ ገዉንኩሰ ጨብተ ሮሰ።

20 ቀርቹኔለከ ጡምሳንቹኔ መሲህ ኢሰ ደግ ከን ኣዲንያ አል ጎጂሲች ፋሽአቶች ኤተሮን ፈንቀልት ህከን ጎጂሲን አፈንት ቁለንታረ ዎዕኔች በትሽ ኤተር ሄኡሰ ባሰ ሂሊ አሁኖ።

* 1:20 ሀኩ መንቹሁ ገይሰ ሰውቲን ፈሰሮተ አታለኖበእ- ኖሮህ «ሁኩ ነብዬቹሁ ገይሰ ቀልቤን ጠወዕኖበእ» ኖሮ ሰውት እሳተ አታለኖ።
2:5 ክል. 6፡1—7፡24። 2:6 ክል. 19፡24። 2:7 ክል. 19፡1-16። 2:16 ክኑ. 22፡4-35።

21 ፈየ ዎቃሃ ደጎኢች ኤተሮን አሰሞሰ ጠሊሊ ትዛዚች ኤተሩ ፈንቀልታህኒች ፈየ ዎቃሃ ደጉዕና ፈቆ እቃን ቆሀኖሰ እቅ።
 22 «ወሰኞቹ ሆቅ እዕዮሲሃ እቶተ ሆቅትሰቤቹ ፈንቀለኛ» ህትን «ቦክት አዕልቶኢች ኤተሮን ፈንቀልት ጭቃን ብርቁቅታኦ» ይታ ምሳልት እስ አሌን ሀንቅ እኮኤ።

3

ቀርቆኛ ኢስ ፈንቀል አሜቱስ

1 ኢ ጀላ! ኩ ቴሱ ከተቦንክዕይሁ ለንክተ ሶህኑ፤ ለሙንከሰ ሶህኑተ ከተቦንክዕይሁ ከ ጡመ ሰውት ጡመገ ሰው ይቲንተገ ጠረኝሶህዕይታት።

2 ከኒች ብርተ ጠሊሊኑት ነብያከት ጠወኦ ላገትለክ ክዕይ አሳባ መሳን ደኦኑንተ ቀርቆኛይለክ ጡምሳንቻኔ ትዛዝ ቃጎኖተ ሀሳም።

3 ጉዕሚቻን ሃጭቴን ካን ሰውይዬ፤ ኤተር በሬን ቀለዳሩለክ ሃላ ሃዕላቸሰ እምንታሩ አሜታኦ፤

4 እሰን «ቀርቆኛ ኢስ አሜተኖ ዬኖ ተብሶሁ አሰሞአቅበአንዶ? ህከረ ሀከቤቹ ኖኦ? ዎዕይ ዘማን እናከኔ ሬቶ ወክቲቻ ኬሽ ጉዕሙንኩርቆኛ ክልቀቲቻ ብርንተ ሃዕዮጋት» ይታኦ።

5 ሁኩ መኑንኩ እሰ ዘማኒች ብርተ ሰሞሁ መገን ላጋን ከለቀሙሰ ኤለንት መክቶኢሁ ዊቶለክ ዊን እሁሰ ጦንባ እት ካዳኦ።

6 ህከ ወክት ኣዲንያ አሉ ዊን አጉዕመም በዕዮ።

7 እኮጎሬ ቴሱ ኖ ሰሞለክ ኡለት መገንኒሃ ጠገንትቡ መኑ በኣ ፍርድ በር ኢሊ ገራተ አገረንት አገዕርታኦ።

8 ኢ ጀላ! መገን ቤቾን መቱ በሩ ኩሜ ዘማንገ እሁሰለክ ኩሜ ዘማኑ መቶ በሬገ እሁሰ ከ መቱ ጠወ ሀቦኖቹ።

9 መት.መቶ መኒሃ አጉደኖሰገ ቀርቆኛ ጠወዕዮ ተብሴ ላገተ ዊንሾተ ዲንከኖበኦ፤ ጠወ እኮጎሬ መኑ ጉዕሙንኩ ጩብ ቶብቶተለክ አዪሁ በኦተ ሀሰባቤቹሃ ክዕይተኔሃ አታዕለኛ።

10 ጠወ እኮጎሬ ቀርቆኛ በሩ ሞጋንቻገ ድንገቱ አሜተኖ፤ ህከ በር ሰሞሁ ሎረ ላጋን ሀገኖ፤ ሰሜ ክልቀቱ ጉዕሙንኩ ገራን ቡብ በአኖ፤ ኡለትለክ አሊሴ አኢመርቆኛ ጉዕሙንኩ ቡብኖ። *

11 ቴሱ ኩ ጉዕሙርቆኛንኩ ከን ሃሌን በአኖሃ እኮች አዕኑ ጠሊልማን መገኑ አጉዲን ሃኡ ሀሰሰኔህዕይበአንዶ?

12 ቴሱ መገን በሩ አሜቱስ ሱንቲን አገርቲንተረላክ ደዕል አሜቶተ አቲንተረ እቅ፤ ህከ በር ሰሞሁ ገራን ቡብ በአኖ፤ ክልቀቲንኩ ገረ ፋራን ሺለኖ፤

13 ጠወ እኮጎሬ ነኡ እስ አሴ ተብሴ ሃሊን ፈይመ ሆጎተ ኡርታ ሃዕሮ ሰማለክ ሃዕሮ ኡለተ አገርኖም።

14 ህካን እኮቤቹሃ ኢ ጀላ! ኩ ጉዕሙንኩ ጠወ እህኖ በር አገዕር አሊን ኖንተረ እኬንተቤቹሃ ቀርቆኛ ቀንጤኖቹ ህከረንገ ኩሊኖርቆኛ ኖበኢሃ እኬን ወገሬቲን ደጎህዕይት ጠረኝቲን ሃዕይ።

15 ቀርቆኛ አታዕሉ አዕኑ ጡምቶኖተ እሁሰ ደገ፤ ኢተሞ አመኔቤቱ ጳወሎሰ አሰሞሰ ሀይማን ከተቦህዕይሁ ከኒት።

16 እሰ ከን ጠውተኔሃ ከተቦንቶ ሶህኖንከሰ ጉዕማንን ከን ሃሊን ከተቦኤ፤ ከተቦንቶ ሶህኖ አዜን መት.መቱ አጥራመቲሃ ኦርሰኖ ጠወ ኖኡ፤ ኤንኬዕኑ ሆፈዕዮሰሩለክ ወለ እኮአሩ ዎልተ ጠሊሊ መጻፈተ ሾክሳህንገን ህከ ጠወሃ ሾክሳኢት፤ ህካን አታኢሁ በኢሃት።

17 ቴሱ አዕኑ ኢ ጀላ! ከ ጠወ ዎዕናንከ ደኒንተቤቹሃ ሾከ መን ሉጨንሺን አገንቲን ጠረኝቲን ኡርቲንተቤቹቻ ኡቤንንተበአገ አገዕሪዬ።

18 ጠወ እኮጎሬ ቀርቆኛይለክ ጡምሳንቻሃኔ መሰህ ኢስ አሰቶንለክ እሱ ደገን ነጽዬ፤ እሰንከ ቴሁ ዘላላሚሃ ኬዕምቶ እሁን፤ አሚዕን!

2:22 ሞሳ. 26:11። 3:3 ይሁደ 18። 3:5 ክል. 1:6-9። 3:6 ክል. 7:11። 3:8 መዝ. 90:4። * 3:10 ኡለትለክ አሊሴ አኢመርቆኛ ጉዕሙንኩ ቡብኖ። የኖሁ መት መቶ ለህ ክታባን ኡለትለክ አሊሴ አኢመርቆኛ ጉዕሙንኩ ዋቅ ይ ኑር እከ ለለኛ» የኖ። 3:10 ማቶ. 24:43፤ ሉቃ. 12:39፤ 1 ተሰ. 5:2፤ መና. 16:15። 3:13 እሳ. 65:17፤ 66:22፤ መና. 21:1።

ያህይ ከተባሃ ዎኔ ሶህኑተ ኣጉሰ

ዎዕኔ ኣሳባቕኛ ያህይ ሶህኑት ለሙ ቡዕሊ ኣኮ ጠዉ ዮሰ። ሁኩንን ካን ኣነበባኣሩ መገንገለክ ቤቶሃሰ መሰህ ኢሰን ሚጦመት ሂኦሰተ ጠረኝሲሃለክ ከ ሚጦመተ ቤሶተ ኣታለኖ ክህብ ትምርቲኛ ኣገዕርቶታት። ህከ ወክት ኬዕዮ ክዘብ ትምርቲ ኣሚተኖህ ከን ኣዲንያ ጠዉኛ ኣኮቤቺሃ መገን ቤቱ ኢሰ ሆኖን መገቹ ኣሆተ ኣታለኖበኣ ዮኖሃን ኣቅ። ሁኩ ኣሰተማሪት «ጡሙ ዩ ኣዲንያ ጠዉሃ ጨነቀሙ ደክሩ ዩሃን» ይታ ኣቅ። ከኒንን በርግት «ጡመ ጠወ ኣኡለክ ዎሎ መኒሃ ኣተተ ለሊሱ ጡሞን ሚጡ ደቀንሹ ዮሰበኣ» ይታ ኣቅ።

ከተባህሁ ከ ትምርት ቶጉ ግብ መሰህ ኢሰ መነ ጡምሶተ ይ መንቹ ኣኮኡ፤ ኢሳን ኣመዕንታኣሩለክ መገኑ ኣትታኣሩ ጉዕሙንኩ ገገዉንኩሰ ኣተቀሙ ሀሰሰኖሰ ዮን ኩሎኡ።

መጻፍሰ ኣሮሃ

- ኣጉሰ (1፥1-4)
- ኑርለክ ቱንሰቹ (1፥5—2፥29)
- መገን ኦሱተለክ ኣልቢሰ ኦሱተ (3፥1-24)
- ሀንቅለክ ክዘብ (4፥1-6)
- ኢተት ግደ ኣሁሰ (4፥7-21)
- ኖሎ ዮሰ ኣመዕነቱ (5፥1-21)

ሂኣ ላገተ

- 1 ክልቀቲኛ ብርተ ዮ ሂኣ ላገተኔ ሞጮጭኖሚሃ፣ ኣሌንተኔ ለዕኖሚሃ፣ ኣጥራመንት ለዕኖሚሃለክ ኣገንገከኔ ኣንፎሚሃ ኩልኖንክዕኔ።
- 2 ኩ ሂኡ ለልዮኡ፤ ነኡን ለዕኖም፤ መሰከርኖም፤ ከኒኛ ብርተ ኣኖከኔ መገን ቤቹን ዮኢሃለክ ሕሳሃ ለሌኢሃ ዘላለሚሃ ሂኣኖ ሂኣተኔን ኩልኖንክዕኔ።
- 3 ኒን ሚጡብ ሚጦመት ሂኣህዕኔተ ለዕኖሚሃለክ ሞጮጭኖሚሃ ክዕኔንክ ኩልኖንክዕኔ፤ ኒ ሚጦመት ኣነ መገንገትለክ ቤትንከሰ መሰህ ኢሰን ሚጡባት።
- 4 መንጻኢኦ ወመ ኣኮተ ካን ከተንባንክዕኔ። *

መገኑ ኑር ኣሁሰ

- 5 ኢሲኛ ሞጮጭኖሚሁለክ ክዕኔን ኩልኖም ሶህኑት ተኒት «መገኑ ኑር ኣኮቤቺሃ ኣሰቤቹን ቱንሰቹ ሆኖን ዮበኣ» ይታኣተ።
- 6 ህካን ኣኮቤቺሃ «መገኒን ሚጦመት ዮኔ» ይነን ቱንሰኛ ኣዜን ሄዕኖም ጎሬ ክዘምባሚት ቤሎ ሀንቅን ሄዕኖምበኣ ዩሃን።
- 7 ጠዉ ኣኮጎሬ ኣሰ ኑሬን ሄዕዮገን ነኡ ኑሬን ሄዕኖም ጎሬ ገገዉንኩኔ ሚጦመት ሂኣኔ፤ ህትን ቤትሰ ኢሰ ቁጉ ጨብኛ ጉዕሚኛን ነጠ ኣኣኖኔ።
- 8 ህካን ኣኮቤቺሃ ነኡ «ጨቡ ዮኔበኣ» ይኖምጎሬ ገዉኔ ሉሰንሳሚት ቤሎ ሀንቁ ኒ ኣዜን ዮበኣ።
- 9 ህትን ጨብኔ መገኒሃ ኩልኖሚኛ መገኑ ኣመዕነሞሃለክ ፈዮ ኣኮቤቺሃ ጨብኔ ጉዕመገክ «ፈቁን» ዮኖ፤ ህትን ጨብኛኔ ጉዕሚኛን ነጠ ኣኣኖኔ።
- 10 ነኡን «ጨብ ኣዕኖምበኣ» ይኖሚሃ ኣንኩምጎሬ መገኑ ክዘበኛ ኣዕኖም፤ ህትን መገን ላገንት ኒ ኣዜን ዮበኣ።

2

መሰህ ጠበቀኔ ኣሁሰ

- 1 ኢ ኣሶ! ካን ከተባህንክዕኔሁ ጨብ ኣቱንገተበኣገዪህት፤ ጠዉ ኣኮጎሬ ህኩ መንቹሁ ጨብ ኣዕዮ ጎሬ ኣኖኔ መገን ቤቹን ጠበቁ ዮኔ፤ ኣሰን ፈዩ መሰህ ኢሳት።
- 2 ኒ ጨብተኔሃ ኦርሸተ ቶጎህ ኣሶት፤ ህትን ኒ ጨብ ጠለዕላ ኣሁዕነ ኣዲንያ ኣሌን ሂኣኖ መኒሃ ጉዕሚንካንት።
- 3 ኣዘገኖኔሃ ኣገርኖምጎሬ መገኑ ደንጋምገ ኣሲን ኣጥራመንታም።
- 4 «ኣን መገኑ ደጋም» ዮን ኣሰ ኣዘገኖሃ ኣገርቡ መንቹ ክዘበኛ ቤሎ ሀንቁ ኣሰ ኣዜን ዮበኣ።

1:1 ያህ. 1፥1። 1:2 ያህ. 1፥14። * 1:4 መንጻኢኦ- መት-መቱ ለህ ክታበት «መንጻኢኦክዕኔ» ይታኡ። 1:7 ያህ. 13፥34። 2:1 ያህ. 1፥12።

5 ጠወ እኮሳሬ መገን ላጋተ አዘዘመኖሁ ጉዕሙንኩ መገኒሃ ዮሰ ኢተት ዋሚሃን፤ ሀንቅንከ እሲን ሄኡኔ ደገመኖሁ ከኒንት።

6 አዪሁ «መገኒን ሜጡብ ሄአም» የኖሁ መሲህ ሄዕዮገ እክ ሄኡ ሀሰሰኖሰ።

ሃዕር ትዛዝ

7 ኢ ጃላ! ኩ ከተባንክዕኔ ትዛዙ ዋዕኔችን ኬሽ የአሃ ትዛዝ ቤሉ ሃዕርሃ ትዛዝበእ፤ ኩን ዋዕኔችን ጀመር ዮ ትዛዝ ሄጭቲን ሞጮጭቲንታአተ ላገ።

8 እሁን ቤሉ መሲሂንለክ ክዕኔ ሩሂን ሀንቅ እኮሃ ሃዕር ትዛዝ ከተባንክዕኔ፤ መሲንትሰ ቱንሰቺ ሀገኖት ቱሁ ሀንቅ ኑሩ ለሊሰኖሰ።

9 አዪሁ «ኑራን ሄአምት» የን አመሰሰቤቱ ግበኖሁ ቱሱ ኢሊ ቱንሰቺን ሄአኖት።

10 አመሰሰቤቱ ኢተኖሁ ኑር አዜን ሄአኖ፤ ሀካን እኮቤቺሃ እሲን መነ ቆል ሉሰሰኖርቺ የበእ።

11 ጠው እኮሳሬ አመሰሰቤቱ ግበኖሁ ቱንሰቺ አዜን ሄአኖ፤ ቱንሰቺ አዜንን ፈንቀለመኖ፤ ቱንሰቺንኩ አልሰ ቆቅሾቤቺሃ ኦርአኖቤቺሃ ደገኖበእ።

12 ኢ ኦሶ! ጨቡክዕኔ ኢሰ ሱዕሚን እኩረሞሀዕኔቤቺሃ ከተባንክዕኔ።

13 እናከ! ዋዕኔች ሄዕዮሃ ላገሰ ደገኒንተቤቺሃ ከተባንክዕኔ፤ ወደላ! ሺይጣነ ቁልቲንተቤቺሃ ከተባንክዕኔት፤

14 ኦሶ! መገኑ ደገኒንተቤቺሃ ከተባንክዕኔ፤ እናከ! ወዕናንከ ሄጭ የአሃ ላገሰ ደገኒንተቤቺሃ ከተባንክዕኔ፤ ወደላ! ጠረኝ እኩንተቤቺሃለከ መገን ላገት ቀልቤንከክዕኔ ሄአቤቺሃለከ ሺይጣነ ቁልቲንተቤቺሃ ከተባንክዕኔ።

15 አዲንያ አል ህከረንገ አዲንያ አሊን ዮ ሂላ ጠወ ኢትቶኖቺ፤ አዲንያ አል ኢተኖሁ አና መገኑ ኢተኖበእ።

16 አዲንያ አሊን የአሁ ጉዕሙንኩ ማል ሄዕላቸተ፤ አሉ ተሸት፤ ቀባጣን ድከኡ አዲንያ አልችቤሉ አና መገን አዲችበእ።

17 ዱንያ አሉለከ ሄዕላቸት ህጋእ፤ ጠው እኮሳሬ መገኑ የኖሃ አአኖሁ ጉዕመ ዘላለሚሃ ሄአኖ።

መሲህ ግባህኑኡች አገዕርዬ

18 ኢ ኦሶ! ኩን መጨረሽሃ ወክት፤ መጨረሽ ወክቲን «መሲህ ግበኖሁ አሜተኖ» ዬኖሃ ሞጮጭቲንንተገን ቱሁ ልግቡ መሲህ ግባሩ አሜቶኡ፤ ሁኩንን መጨረሽ ወክት እሁሰ ደንጋም።

19 እሰን ፋልቶአሁኒ በልቺት፤ ጠው እኮሳሬ እሰን ኒረበእ፤ እሰን ኒረ እኮ እቃኔተ ኒን ሜጡብ ጠረኝት ሄአ እቅ፤ ጠው እኮሳሬ እሰ ጉዕሙንኩሰ ኒረ እሁ ሆጉሰ ደገሞተ ኒ በሊች አደ እክ ፋልቶኡ።

20 መገን ጠሊላ እኮ መሲሁ ክዕኔተ ጠሊላ አያኒን ቡርሀዕኔ፤ ሀካን እኮቤቺሃ ጉዕሙንኩክዕኔ ሀንቅ ደገኒንተ።

21 እን ከተባንክዕኔሁ ሀንቅ ደገኒንተበእረ እኩንተቤቺሃ እሁዕናን ሀንቅ ደገኒንተረላከ ሀንቅ አዚች ክከቡ ፋላኖበእገ ደገኒንተቤቺሃት።

22 ኢሰ «መሲሂበእ» ይ ለገአኖሀን ቤሉ ክከበች አይ ዮኡ? ህትን እነ መገኑለከ ቤቱ ለገአኖሁ እሰ መሲህ ግበኖሃን።

23 ቤቱ ለገአኖሀን ጉዕሚንከ እኑ መገኑ ዮሰበእ፤ ህትን እን ቤቲንከሰ አመዕናም ይ መሰከረኖሀን እኑ መገኑ ዮሰ።

24 ሀካን እኮቤቺሃ እዕኑ ዋዕኔችን ሞጮጭቲንታሁ ክዕኔ አዜን ጠረኝ ሄአኒን፤ ዋዕነ ሞጮጭቲንታሁ ክዕኔ አዜን ጠረኝ ሄዕዮ ጎሬ እዕኑ እነ መገኒንለከ ቤቲን ሜጡብ እኩን ሄኡኒንተ።

25 ኩን እሰ አሴኔ ተብሳሃን፤ ሁኩንን ዘላለምዮ ሄኡ።

26 ካን እን ክዕኔተ ሉሰሳህዕኔ መንተኔሃ ከተባሚት።

27 ጠወ እኮሳሬ እሰች እእቲንተ ጠሊሉ አያኑ አዜንክክዕኔ ዮቤቺሃ ዋሉ እሰተማርቺ ሀሰሰኖሀዕኔበእ፤ እሰ ጉዕመርቺንከ ተማርሰኖሀዕኔ፤ እሰ ተማርሰኖሀዕኔሁ ሀንቅዮ ቤሉ ክከብሃበእ፤ ሀካን እኮቤቺሃ እሰ ተማርሰኖሀዕኔ ሃሉን መሲህን ጠረኝቲን ሄዕዬ።

28 ቱሁ ኢ ኦሶ! ኢሰ አሜተኖ በር ዋጅኖምበእገለከ ሙልናበእገ እሰን ሄዕዬ።

29 መሲህ ፈየ እሁሰ ደገኒንታች ፈይመተ አአኖሁ ጉዕሙንኩ መገኒች አለሞሃ እሁሰ ደገኒንተ።

3

መገን ኦሶተ

1 «መገን ኦሶተ» የመሞ ገአሞተ እኑ መገኑኔ አሴኔ ኢተት ሂንከ ጎሬ ለዕዬ፤ ህትን ሀንቅንከ ነኡ መገንተ አላ፤ ሀካን እኮቤቺሃ አዲንያ አል መኑ መገኑ ደገ ሆንቤቺሃ ኔሳሃ ደጋኔበእ።

2 ኢ ኢተት! ቲሉ ነኡ መገንተ ኦሶ፤ ኢተርንከሰ መ እንካም ጎሬ ደንጎምበእ፤ ጠው እኮሳሬ ኢሰ አሜቶ ወክት እሱ ገዉንከሰ ለዕናምቤቺሃ እሱ እኩንዳሞገ ደንጋም።

3 ኩን እሁሰ መሲህ ተብሳሃ አአኖሁ ጉዕሙንኩ መሲህ ነጠ እኩን እሰ ገውሰ ነጠ አአኖ።

- 4 ጨብ አኣኖሁ ጉዕሙንኩ መገን ሕገ ድጅኖ፤ መሰንትሰ ጨቡ ገውንኩሰ መገን ሕገ ድጅሃን።
- 5 መሰህ መን ጨብ ቤሶተ አሜቸገ ደገነንት፤ ህትን እሲን ጨቡ ዮበአ።
- 6 እሲን ጠረኝ ሄኣኖሁ ጉዕሙንኩ ጨብ እኣን ሄኣኖበአ፤ ጨብ አኣኖሁ ጉዕሙንኩ መሰህ ለዕዮበአ ህከረንገ ደገበአ።
- 7 ኢ ኦሶ! እደሁ ጣንሱንከህዕኔ፤ መሰህ ፈዮ እኩገን ፈይመ ሆጉተ አኣኖሁ ጉዕሙንኩ ፈዮሃን።
- 8 እብልሱ ዋዕኔቶን ኪሾ ጨብ አኣኖቤቺሃ ጨብ አኣኖሁ ጉዕሙንኩ እብልሰ አዲቺት፤ ህካን እኩቤቺሃ እብልሰ ሆጉተ ቤሶተ መገን ቤቱ አሜቸኡ።
- 9 መገን ኦሶተ እኩሬ ጉዕሙንኩ ጨብ አቶተ አታልታበአ፤ መሰንትሰ መገን ሃለቱ እሰ ኣዜን ሄኣኖቤቺሃትለከ መገንቲቶ ከለቀንቶቤቺሃት።
- 10 መገን ኦሶተለከ እብልሰ ኦሶት ከኒን አደ እክ ለልታእ፤ ፈይመ ሆጉተ አእባሁለከ አመሰቤቱ ኢትባሁ መገንያ ቤቱበአ።

ገገዉኔ ኢተቀምተኔሃ

- 11 ዋዕኔቶን ጀመርቱን ሞጮጭቱንተ ሶህኑት «ገገዉኔ ኢተቀም» ይታእታን።
- 12 ሸይመገን አድረ እንክ አመሰቤቱ ሺ ቃኤሌ እንኩንከ፤ እሰ አመሰቤቱ ሺኢሁ ሚሃት? ሆጉሰ ሂለ እኩቤቺሃ አመሰ ቤት ሆጉት ጡመ እኩቤቺሃበአንደ?
- 13 ህካን እኩቤቺሃ አመኤ ኦሶ! ኣዲንያ አሉ ግቦህኔጎሬ አጀብሲጭቶኖቺ።
- 14 ነኡ አመኔኦሶተ ኢትኖምቤቺሃ ሬሆች ሄኣን ህጉኔ ደንጋም፤ ጠው እኩጎሬ አመሰቤቱ ኢትባሁ ሬሆ ኣዜን ሄኣኖ።
- 15 ህትን አመሰቤቱ ግባኖሁ ጉዕሙንኩ ነብሳሃ ሸዮአሃን፤ ነብሳሃ ሸኖህኒሃ ጉዕሚንከ ዘላለሚሃ ሄኣኖ ሄኡ ዮሰበአገ ደገነንት።
- 16 ኢተት መሃጎር ደንጋሚሁ መሰህ ኢሰ ኔሳሃ ነብሳሰ ህግሽ ኣሴቤቺሃት፤ ህካን እኩቤቺሃ ነኡን አመኔ ኦሶተ ነብሳኔ ህግንሰ ኣሱ ሀሰሰኖ።
- 17 ጠዉ እኩጎሬ ከን ኣዲንያ አል ቀባጡት ዮሰ መንቹ ኦርሻሙ አመሰቤቱ ለዕይ አሙዝበሰ ጎሬ መገን ኢተት ዮኤ ዮተ ህት እክ አታለኖ።
- 18 ኢ ኦሶ! ሆጎንለከ ህንቂን ኢተቀሙን ቤሉ ጠለዕል አፎንለከ ላጋን ኢተቀሙንከ።

መገን ብረን ዮኔ አመዕነንሹ

- 19 ህካን እኩቤቺሃ ህንቅ መን እሁኔ መገን ብረን ዋጂ ዮበኢሃ መለልን ሆንጠንኩተ አታልናምገ ደንጋም።
- 20 ቀልቡኔ ሂለ ሆጎተኔ ዋቀሰኖሃ እኩች መገኑ ቀልቢችኔ ሎረ እኩቤቺሃ ጉዕመንከ ጠወ ደንግሮ ደንጋም።
- 21 ኢ ጃላ! ቀልቡኔ ዋቀሰበኔሃ እኩች መገን ብረን ሙልናምበአ።
- 22 ህትን ነኡ መገን ትዛዝ አገርናምቤቺሃለከ እሱ ሙንዲሲሲኖርቹ አዕናምቤቺሃ ኡጭናምርቹ ጉዕመንከ እሲች ደአናም።
- 23 መገን ትዛዙ ቤትንከሰ መሰህ ኢሰ ሱዕሚን አመዕነንናምገለከ መገኑ አዘኩኔገን ገገዉኔ ኢተቀምጋት።
- 24 ትዛዝሰ አገረኖሁ ጉዕሙንኩ መገን ሄኣኖ፤ ህትን መገኑሁ እሰ ኣዜን ሄኣኖ፤ ህካን እኩቤቺሃ መገኑ ኒ ኣዜን ሄኡሰ ደንጋሚሁ እሰ ኣሴኔ ኣያኒንት።

4

ህንቅ ኢያንተኔሃለከ ክዘብ ኢያንተኔሃ

- 1 ኢ ጃላ! ኢያኑ ጉዕሙንኩ መገን ሄኣኖ እሁሰለከ መገን ሄኣኖ ሆጉሲ አጥረመቼ ቤሉ ኢያን ጉዕመንከ አመዕነንቶኖቺ፤ መሰንትሰ ኣዲንያ አሉን ልግቡ ክዘብ ነብያኑት ኬኦኡ።
- 2 መገን ኢያን እሁሰ አደ አቲን ደገነንታሁ ከኒንት፤ «መሰህ ኢሰ መንቹ እክ አሜቸኡ» ይ አመዕን ኩለኖሁ ጉዕሙንኩ መገን ዮ ኢያን።
- 3 ጠው እኩጎሬ መሰህ ኢሰ ኒገን መንቹ እክ አሜቸበአ ዮ ኢያኑ ጉዕሙንኩ መገን ዮ ኢያንበአ፤ «ህትኖሙ ኢያኑ አሚተኖ» ይንን ሞጮጭቱንታሁ መሰህን ኢተቀምጣሃ ኢያን፤ እሰ ቲሁ ኣዲንያ አሉን ዮኡ።
- 4 ኢ ኦሶ! አዕኑ መገንረ፤ ክዕኔን ዮ መገኑ ከን ኣዲንያ አሉን ዮህኒች በተአኖቤቺሃ ክዘብ ነብያኩተ ቁልቲንታኡ።
- 5 እሰ ከን ኣዲንያ አል መን እኩቤቺሃ ከን ኣዲንያ አል ጠወ ጠለዕል ጠወኣኣ፤ ህካን እኩቤቺሃ ከን ኣዲንያ አሉን ሄኣኖ ሙኑ ሞጮጬኖሰ።

6 ነኡ መገንረ እንኮምቤቹሃ መገኑ ደገኖሁ ጉዕሙንኩ ሞጮጨጮኔ፤ እኩጎሬ መገኒች እህባሁ ሞጮጨጮኔበእ፤ ህካን እኮቤቹሃ ሀንቅ እያንለከ ክዝብ እያን ከኒን ደንጋም።

መገኑ ኢተታጎ

7 ኢ ጆለ! ኢተት መገኒች እኮቤቹሃ ገገጫኔ ኢተቀሞ፤ ኢተቀመኖሁ ጉዕሙንኩ መገኒች አለሞእሃን፤ ህትጎ መገኑሃ ደገኖ።

8 መገኑ ኢተት እኮቤቹሃ መነ ኢትባሁ ጉዕሙንኩ መገኑ ደገኖበእ።

9 ቤቲሰ ኦዲን ሄኡ ደእኖተ መገኑ ሜጡ ቤቲሰ ኦዲንያ አል ሶኮኡ፤ ህካን እኮቤቹሃ መገን ኢተት ሄንካጎሬ ለልዮኔ።

10 ኢተት ዩ ህትጎታን፤ ነኡ መገኑ ኢትናምቤቹሃ እሁዕናን መገኑ ኢቲኔቤቹሃትለከ ቅጣትኔ ኣኣተ ቤቲሰ ሶኮኔቤቹሃት።

11 ኢ ጆለ! መገኑ ህት ኢቲኔሃ እኮች ገገጫንኩኔ ኢተቀሞ። ሀሰሰኖኔ።

12 መገኑ ለእዮ መንቹ እዪሁ ዮበእ፤ ገገጫንኩኔ ኢተቀሞም ጎሬ መገኑ ኒ ኣዜን ሄእኖ፤ ህትን እሰ ኢተት ኒ ኣዜን ዊመ እክ ሄእኢ።

13 መገኑ እያንሰ ኔሳሃ እሴኔቤቹሃ እሰን ሄዕናምገ እሰን ኒን ሄእኖገ ህከኒን ደንጋም።

14 ኢት መገኑ ቤቲሰ ኦዲንያ አልሃ መነ ጡምሶተ ሶሁሰ ለዕናሚሃ መሰከርናም።

15 ኢሰ መገንዮ ቤቱ ይ መሰከረኖ መንቹን ጉዕማንጎ መገኑ ሄእኖ፤ ህትን እሰን መገኒን ሄእኖ።

16 ህከን እኮቤቹሃ መገኑ ኔሳሃ ኢቲሰ ደንጋም፤ አመዕንናም። መገኑንኩ ኢተታን፤ ኢታን ሄእኖሁ መገኖን ሄእኖ፤ ህትን መገኑንኩ እሰን ሄእኖ።

17 ከን ኦዲንያ አሊን መሰህ ሄዕዮገ ሄዕናም ጎሬ ኢተት ኒን ዊመ እካኣ፤ ህካን እኮቤቹሃ ፍርፍ በር ብርሰ ዋጅኑዕነ ሆንጠንኩተ አታልናም።

18 ሀንቅ ኢተት ዋጅ ፋቸት ኡጅታ ቤሉ ኢታን ዋጅ ዮበእ፤ ዋጅ ቅጣቲን ሜጡብ እክ ዮቤቹሃ ዋጅኖ መንቹ ኢተት ዊመተበእ።

19 መገኑ ኔሳሃ ሄጭ ኢቲኔቤቹሃ ነኡን ኢትናም።

20 እዪሁ «መገኑ ኢታም» ዮን አመሰቤቱ ግበኖሁ ክዝበኛን፤ ለዕዮ አመሰቤቱ ኢትባሁ ለእበ መገኑ ኢቶተ አታለኖበእ።

21 ህካን እኮቤቹሃ መሰህ ኣሴኔ ትዛዙ መገኑ ኢተኖሁ አመሰቤቱሃ ኢቱን ዮኖሃን።

5

ኦዲንያ አል ሂረሮቹ ቄሉ

1 ኢሰ መሰህ እሁሰ አመዕነኖሁ ጉዕሙንኩ መገኒች አለሞእሃን፤ እዪሁ እነ መገኑ ኢተኖሁ ጉዕሙንኩ ቤቲሰ ኢተኖ።

2 መገን ኦሱተ አቲኔ ደንጋሚሁ መገኑ ኢትናምጎሬትለከ ትዛዘሰ አገርናምጎሬት።

3 መገኑ ኢትናም ዩ ትዛዘሰ አገሩሃን፤ ህትን ትዛዘንኩሰ ኬዕምበሃን።

4 መሰንትሰ መገኒች እኮሁ ጉዕሙንኩ ኦዲንያ አል ቄሉኖ፤ ኦዲንያ አል ቄልናሚንኩ አመዕነቲንት።

5 ኢሰ መገን ቤቱ እሁሰ አመዕነኖህን ቤሉ ኦዲንያ አል ቄሉኖሁ እዩት?

መሰህተኔሃ መሰከረሞ ጠው

6 መሰህ ኢሰ አሜቾሁ ዊ [ጥምቀቲንትለከ መሰቀል ሬሆ ቄገንት]፤ እሰ አሜቾሁ ጠለዕል ዊን እሁዕነ ዊንለከ ቄገንት፤ ካን መሰከረኖሁ መገንዮ እያን፤ መገን እያን ሀንቅያን።

7 ሰሱ ምሰክሩ ዮኡ፤

8 እሰን ጠሊሊ እያን፤ ዋሃለከ ቄንሃን፤ ሰሰንኩ ምሰክሩ ኢተቀንታኡ።

9 ነኡ መን ምሰክር እእኖም ጎሬ መገን ምሰክሩ ጉዕሚቶን በተአኖሃን፤ ምሰክሩንኩሰ መገኑ ቤትሰተኔሃ መሰከረኖ ጠው።

10 መገን ቤቶን አመዕነኖህኒሃ ቀልብሰ ኣዜን ምሰክሩ ዮሰ፤ መገኖን አመዕንበ መንቹ መገኑ ቤትሰተኔ መሰከር ጠዋን አመዕነኖበእቤቹሃ ሁኩ መንቹ መገኑ ክዝበን አዕዮኡ።

11 ምሰክርነቱንኩሰ መገኑ ዘላለም ሄኡ ኣሰገለከ ሁኩ ሄኡንኩ ቤቲንከሰ ሄኡሰ መሰከረኖ።

12 መገን ቤቱ ዮሰ መንቹሃ ሄኡ ዮሰ፤ ጠው እኮጎሬ መገን ቤቱ ዮሰበእ መንቹሃ ሄኡ ዮሰበእ።

ዘላለም ሄኡ

13 እዕት መገን ቤት ሱዕሚን አመዕነቲንተሩ ጉዕሙንኩ ዘላለም ሄእኖ ሄኡ ዮህኔሃ እሁሰ ደጎኖተ ከተሰንክዕኔ።

14 መገን ብሬን ሆንጠንኩተ ዮኔ መለልመት ከኒት፤ መቱርቹሃ እሰ ሃሽእቶሰገ ኡጭኖም ጎሬ ሞጮጨጮኔ።

15 ነኡ ኡጭናምርቹ ጉዕመንከ መገኑ ሞጮጨኖኔገ ደንጎሚቶ እሲቶ ኡጭናምርቹ ጉዕመንከ አእኖምገ ደንጋም።

16 ሀኩ መንቹሁ አመሰቤቱ ሬሆተ ኢልሰበ ጨብ አአን ለዕዮሰጎሬ ዱአ አኡን፤ ጨቡሰ ሬሆተ አልሰባሃ እኩጎሬ መገኑ ፌሰኖሰ፤ ጠዉ እኩጎሬ ሬሆተ ኢልሰኖ ጨቡ ዮኡ፤ ህትናሞ ጨቢሃ «ዱአ አኦን» ያንሰበኦ።

17 ሂላ ሆጉት ጉዕመንኩ ጨብሃን፤ ጠዉ እኩጎሬ ሬሆተ አልሰቡ ጨቡ ዮኡ።

18 መገን ቤቱ መሲህ ኢሰ አገረኖቤቹሃ መገን አለተ እኮሩ ጉዕመንኩ ጨብ አጋበአገ ደንጋም፤ ሹይጣኑሁ ኡለኖሰበአገ ደንጋም፤*

19 ነኡ መገንረ አሁኔ ደንጋም፤ ጠዉ እኩጎሬ ከን ኣዱንያ አል ጉዕመንከ ሹይጣኑ ጠቅዮሰ።

20 መገን ቤቱ አሚቶገለከ ነኡ ሀንቅ እኩ መገኑ ደንጎተ ሰውዮኖ ቀልብ አሲኔገ ደንጋም፤ ነኡ ሀንቅ እኩ መገን ኣዘንለከ ቤቲንከሰን መሲህ ኢሰ አዲን እሲን ሀንቅ መገኒን ሚጦመት ዮኔ፤ እሰ ሀንቅያ መገኑለከ ዘላለሚሃ ሂአኖሃ ሂኡ።

21 ቴሱ ኦሶ! ሸርኬን ሰገዲቶ ገዉክዕኔ አገዕርዬ።

* 5:18 መት-መቱ ግርኪቶ እንክለንቶሩ ከኒቶ ዎርን ዮኡሃ በርግጋበኦ፤ ሁኩንን መገኒቶ አለሞሁ ጉዕመንኩ ገውሰ አገረኖቤቹሃ ጨብ አእኖበአገ ደንጋም፤ ሹይጣኑሁ ኡለኖሰበኦ።

ያህይ ከተላላ ለንክ ሶህኑተ ኣጉሰ

ያህይ ለምቅ ሶህኑተ ከተበንቶኢሁ «ባልቅቾ» አሳቤቾ ያህይን እህን ከተበሞንኩ መጠረንቶ መቼ መንቾታትለክ እላተሲት። ህከረንገ መቶ ዱእ ምናታትተለክ ዮሴ እመዕናኖተ እሁዕን ፈቀኖበእ፤ ት ገበንቾት ሶህኑት ከተበንቶኢሁ ገገዉንኩሰ ኢተቀንታገ ቃግሲሃለከ ክክብ አስተማራቾለክ ትምርቲቾሰ ገውሰ አገዕርታጋት።

መጻፉሰ አፎሃ

ኣጉሰ (1-3)

ኢተት ጉዕሚቾን በተኣእሃ እሁሰ (4-6)

ክክብ ትምርቲቾ ገው አገዕሩ (7-11)

መጨረሻሰ (12-13)

1 መጠረንቶ መንቾተለክ ኦሶተሴ፤ *

እቾ ባልቁቾቾ መጠረንቶ እማተለክ ኦሶተሴ ሶኮምተ ሶህኑ፤ እን ሀንቅ ኢታንክዕይገን ሀንቅ ደገኖ መኑ ጉዕመንኩ ኢተኖሀዕኔ።

2 መሰንታሰ ኩ በላንከኔ ዮ ሀንቁ ዘላለሚሃ ኒን ሚጡብ ሂእኖሃን።

3 እን መገንለክ እን መገን ቤቲ መሲህ ኢሰ አሰቱትለክ ማርቱት ወገሬቱሁ ሀንቁንለክ ኢታን ኒን ሚጡብ እሁን።

ኢተተኔሃለክ ሀንቅተኔሃ

4 እን እላቾክ መት-መቱ እኑ መገኑ እዘኸኔገን ሀንቅን ሄኣእረ ደሳምቤቼሃ አበ መንደዕዮም።

5 ኢተንቶንቲት! ኩን ከተባሚሁ ሃዕሮሃ ትዛዝበእ፤ እኩጎሬ ቲሱ ከተባንኬሁ «ገገዉኔ ኢተቀሙን» ይ ኡጫንኬ ዎኔቾን ኬሽ ዮእሃ ትዛዝ።

6 ሀንቅ ኢተተ ዩ መገን ትዛዝ አገሩሃን፤ ኩ ትዛዙ ዎዕን ሞጮጭቴንተገን «ኢተቀንቲን ሄዕዬ» ዮኖሃን።

7 መሲህ ኢሰ «ማለ ኦደዕይ አሚቾበእ» ይታ ልግቡ ሉሰሳ መኑ ባደን ጉዕማንን ኬኣኡ፤ ሀትኔ መኑ ሉሰሳእገረለክ መሲህ ግባእረ።

8 እዕኑ አቲንተ ዊመ ሆጉክዕኔ ቶገሃ ጠረኝዬ፤ አዕኖሚሃ ቤሴንገተበእገ አገዕርዬ።

9 መሲህ ተማርሴሀንቾ ቁዕረኖሁለክ መሲህ ተማርሴሀንን ጠረኝበ መንቾን መገኑ እሰን ሚጡብ ዮበእ። ጠዉ እኩጎሬ መሲህ ተማርሴሀንን ጠረኝኖ መንቾሃ እኑ መገኑለክ ቤቱ እሰን ሚጡብ ዮኡ።

10 አዩሁ መሲህ ኢሰ ተማርሰሳሃ አኖ ክዕኔቤቼ አሚቾ ጎሬ ምኔንከክዕኔ ቶጎኖቼ፤ ወገሬትሶኖቼ።

11 እሱ «ወገሬቱ» ዮኖ መንቾ እሰ ሂለ ሆጎ ቤቀማንቾ እሁኖ።

መጨረሻ ወክቲን አሰሞ ወገሬት

12 ከተሶህዕኔተ ሀሳም ልግቡ ጠዉ ሄዕዮኡጎሬ ወረቀቲንለክ ቀለማን ከተሶህዕኔተ ሀሳምበእ፤ ህከን ጠዉ ገዉንኩእ ክዕኔቤቼ አሚቾ ሀሳምተለክ ሚጡብ መንደዕኖተ ተቢሳ አኣም።

13 መጠረንቶ እመክ ቤቶ ኦሱት «ወገሬቱ» ይታሂት።

* 1:1 መንቾተለክ ኦሶተሴ፡- ዮኖሁ እመዕናኖተ ለሊሰኖ (ዋልንሽ 4ገለክ 5 አሌን ደገመኖ)። 1:5 ያህ. 13፣34፤ 15፣12፣17።

ያህይ ከተባሃ ሰቅ ሶህኑተ ኣጉሰ

ሰቅ ያህይ ሶህኑት ከተበንቶአሁ «ባልቆ አሳቤቶ ያህይን» እህን ከተበሞንኩ ጋዮሴ ዬኖ ዲእ ሞኒ አውንሳንቸሃት እቅ፤ ከተባንቸንኩ መቶ አዲን ሞሎ አመዕናኑተ ሀዕለን ጋዮሴ ገለትጨኖሰ፤ ሞሎ አዲን ዲዮትሬፊሰ ዬኖስ ሂላ መንቸቶ አገዕርታ ቃግሰኖሰ።

መጻፍሰ አርሃ

- ኣጉሰ (1-4)
- ጋዮሴ ገለትጨ (5-8)
- ዲዮትሬፊሰ ሞቀሰሙሰ (9-10)
- ድሚጥርሴ ገለትጨ (11-12)
- መጨረሻሰ (13-15)

1 ሀንቅን ኢታንኬ ጋዮሴ፤

ኢቶ ባልቁቸቶ ሶህንቶ ሶህኑተ፡-

2 ኢተንቶንት አመኤ ቤቶ! አያረን ፎሎክ ጡመ አሁሰ ደጎም፤ ህትን እን ጉዕሙርቸንኩ ብዝዮሃተለክ አፍያተ ደአቶተ ዲእ አእሚት።

3 ሀንቁሃ አመዕንቶንቲሃ አሁክለክ ፈንቀላንታንቲንኩ ሀንቁን እኩገ መት-መቱ አመዕናኑት ኩልታዕኔ አበ ተሽ ይዮኤ።

4 እን ኦሱኤ ሀንቅ አዎንታገ ሞጮጪቶ በተአኖ ሙንዲሲሰኖርቸኖ ዮበእ።

ጋዮሰ ገለትጨሙሰ

5 ኢተንቶንት አመኤ ቤቶ! ኬሳሃ ኮሃ እኩገሬሁ አመ ኦሶተ ኢታንትርቸን ጉዕሚንን አመዕንቶንትሃን።

6 እሰን ኢተክተኔሃ ዲእ ሞናን ኩልቶኤ፤ ቴሁ መገኑ ሙንዲሲሰኖ ሃለን ሞቁሰ ሽንቅተ ሀዕልቶንትጎሬ ጡመ ኢታንቲት።

7 ሱዕምሰተኔሃ ፋልቶአሁ አይሁደ እህበ መኒቶ ሚጡር ቶጉዕናንት።

8 ህካን እኩቤቸሃ ነኡ ሚጡሰ እሂን ሀንቅ ሆንተ አዕናተ ህትኔ ኮህነቱ ቶጉ ሀሰሰኖ።

ዲዮትሬፊሰ ሞቀሰሙሰለክ ድሚጥርሴ ገለትጨሙሰ

9 ከኒቶ ብርተ ዲእ ሞኒሃ ደብዳቤተ ከተቦም፤ ጠዉ እኩጎሬ ገውንኩሰ አዎንሳንቸ አሆተ ሀሰኖ ዲዮትሬፊሰ ጠዉእ ቶጎበእ።

10 ህካን እኩቤቸሃ እን ክዕኔቤቸ አሚታምረ እሰ ቦርረኔለክ ሙልሰኔ አዕዮ ሂላ ሆጎሰተኔሃ በንቻን ጠዉእም፤ ካን አዕዮሁ ሆፈዕያንሰ አመኡሱተ ኮህንተ ቶጎናበእ፤ ሞሎ ኮህንተ ቶጎበእክ ከመኖ፤ እሰንተ ዲእ ሞናቶ ፋሽኖሰ።

11 ኢተንቶንት አመኤ ቤቶ! ጡመ አጉድ ቤሎ ሂላ አጉደት፤ ጡመርቸኖ አእናሁ ጉዕሙንኩ መገንዮን፤ እኩጎሬ ጡመርቸኖ አእባሃ መገኑ ደገኖሰበእ።

12 ድሚጥርሰተኔሃ መኑ ጉዕሙንኩ ጡመርቸኖ መሰከረኖ፤ ህትን ሀንቁ ገዉንኩሰ መሰከረኖ፤ ነኡሁ መሰከርኖም፤ ኒ ሞሰክሩንኩ ሀንቅ እሁሰ አት ደጋንት።

መጨረሻ ወገሬትሱ

13 እን ከተባንክዕኔ ልግቡ ጠው ሄዕዮኤጎሬ ደብዳቤን ከተቦተ ሆሽምበእ።

14 እን ግደኖ በሬን ደቀሞሃተ ተብሳሃ አእም፤ ህክ ወክት ሚጡሰ እንክ ጉዕመርቸንክ ጠወዕናም።

15 ወገሬቱ ኬሳን እህን።

ኢተክ ጉዕሙንኩ «ወገሬቱ» ይታሄት። አቲሁ ኢታተኔ ጉዕሚንክ «ወገሬቲኤ» ኢልሰ።

ይሁዳ ከተሰሩ ሶህኑት ኣጉሰ

ይሁዳ ሶህኑት ከተበንቶኢሁ እመዕናኑተ እኩዕነ እመዕናኑተ እኩዕነ ክከብ ትምርት ተማርሲታ መኒኛ እመዕናኑት ገጠሰ እገዕርቶት ቃግሲሃት። ኣዜሰ ሀንቀፎ ጠዌን ለንክ ጴጥርሴ ሶህኑተ እኩዕና ከን ገብንኛ ሶህኖን ከተሰሩሁ «ለንኪሃ በርገምቦ ሃሌን መገኑ ኡመቲሃሰ ሜጡ ወክት ኣሴ እመዕናኑት ጠረኝት እጸንቶተ» እነባህሀዕኑኡተ ጠረኝሽ ኩሉኖ።

መጻፍሱ እድሃ

ኣጉሰ (1-2)

ክከብ እስተማሪ ትምርት ሃልለክ ኡቡሰ (3-16)

እመዕናኑ ኣገርቶት ኣሰንቶሰ ሸዘነተ (17-23)

ማሰተ (24-25)

1 መሰህ ኢሰ ካዲንቹለክ ያቁብ እመቤቱ እኮ ይሁዲኛ ገእንቴንተሀኑኡተ እኮ መገኑ ኢተኖህዕኔሀኑኡተለክ መሰህ ኢሰን እገረንቴንተሀኑኡተ ጉዕሚንከክዕኔ።

2 ማርቱት ወገሬቱለክ ኢተቀሙ በተኣህዕኔ።

ክከብ እስተማሪተ

3 ኢ ጆላ! ጉዕሙንኩኔ ሚጡቡ ጡምኔትኔሃ ከተሰህዕኔተ ኣበ ሀሾም እቅ፤ እኩጎሬ ቴሱ በርገምቦ ሃሊን መገኑ ኡመቲሀሰ ሚጥቻረን ኣሴ እመዕናኑት ጠረኝቱን እጸንቶኖት ሸዘህሀዕኔተ ከተቡ ግደ እኮኤ።

4 ፈረደመኖሳሃ እሁሰ ልግብዮ ወክቲኛ ብርተ ከተበሞሰ መት-መቱ መናከት ክዕኔ በለ ሉኩት ኣጎኤ፤ እሰን መገን ኣሰቱተ ኣለ ቅልቢን ዶርት መገኒሃ ጠገንቴዕናን ሃኣእረ፤ እሰ ሚጡሰ ገሻንቹኔለክ ቀርቹኔ እኮ መሰህ ኢሰ ለገኣኦ።

5 ካን ጉዕመንክ ሃጭቲን ሜጦሪ ደገንጎንሃ እኮ እቃ ቀርቹ ኡመትሰ ግብጽ ባዲኛ ፋሽ ጡምሾገለክ እመዕናኑትበረ ኤተርን ቤሾገ ቃግሶህዕኔተ ሀሳም።

6 ህትን ኣሰሞሰ ሹምነት ኣዜን እሁ ሆግ ቤቹሰ ኣጉርቶ መላይክተ ቃጌ፤ እስተ ሎሩ ፍርድ በሩ ኢሎተ ኢላ ዘላለሚሃ ኡሱርንገለክ ጭልመ ቱንሰኛ ኣዜን መገኑ ኣገርት ዲንክታ ስዕሶ።

7 ከን ሃላን ሶድሙለክ ጎሞሩ ኣዘገገንተሰ ኖ ከተመት ዝነተ ኣጎእረ እኮኤ፤ ኣቀርቶ ኡሪኛ ኦደ እኮ ሃሊን ዝነተ ኦቶኤ * ህካን እኮቤቹሃ እሰ ዘላለሚሃ ጠእትበ ገራን ቀጠእንተሀኑኡተ ሞሳልተ እኮኤ።

8 ህትን ኩ መኑ ሀቄሰ እምንተን ጅሰመሰ ንጅሰሳኣ፤ ሹማንተ ኣዘዘንታበኣ፤ ሰማን ኬዕምኙ ኖሰረ ቦርርታኦ።

9 መላይክ ሀለቁ ሞካኤል ሙሰ ጀናዘተኔሃ ኣብልሲን ኦጆ ወክት «ቀርቹ ሻቆሄ» ዴሰ ቤሉ ሆሮን ቦርር ላገተ ጠወዕኖበኣ።

10 ጠዉ እኩጎሬ ኩ መኑ ኣጥራመቲሃ ኣታልትበርቹ ጉዕመንክ ቦርዕሪንታ፤ ቀልቡ ኖበኣ ግዝገ ከለቀንሸሰ ሃልገን ደጋ ጠዉ ሃዕኖሰጎሬሁ ህከን ጠዌንን በኣኦ።

11 ቃኤሌ ዎቃሃ እምንቶቤቹሃ፤ ዲንያተኔሃ ይት ባለኣሜ ሉጨንሺን ኡቦቤቹሃ፤ «ቆሬ» ዴኖ መንቹ መገኑ ግብሀንገን መገኑ ግብ በኦቤቹሃ ለሳሃ ቆህኖሰ!

12 ኩ መኑ ማልት ኖበኣሃ ሹርተን ድግሰ ኣሌን ሚጡቡ ደገንታ ወክት ጉዕሬቹ እካህዕኔ፤ እሰ ሰውይታኢሁ ጠለዕል ገይሰተኔሃት፤ ቦብሪን ሀምባለመኖለክ ጤኑ ኖበኣ ጎመጋት፤ ኣቶት ኣገናን ኣቶቱ ሃለብሰህንገለክ ጠጸን ቡቱከም ሞሎ ሀቅጋት።

13 እሰ እመዕሬ ባር ሁልገ መገኑ ሞልሱ ለሳሃ ሆሰ ሁምብ ኩፍ ኣታእረ፤ ጭልመተ እኮ ቱንሰቹ ዘላለሚሃ ኣገረኖሰገለክ ጆል ጆል ይታ ቤዜገ ኖእረ።

14 ኣደሚኛ ኬሽ ለመልቅ ኣለንሽ እኮ ሃኖክ «ሁኩዕነን! ቀርቹ ልግቤ ኩሜ ጠለላኖ መላይካን ሚጡብ እክ ጉዕም ኣሌንን ፈረደተ ኣሚተኖ።

15 ስብርቹሃ ጠገንትቡ መን ኣቶ ሃላ ሆሰ መሳን ቀጠኣኖሰ፤ ቀርቹ ሀንቅንክ ከን ኣሲሃ ጠገንትቡ ጨበኛት እሰ ኣሌን ጠወኑ ሃላ ጠዌሃ ጉዕሚንክ ፈረደኖሰ» ይ ራገ ጠወዕኖኡ።

16 ሁኩ መናከት ጉዕመ ወክት ቀንቀታእረለክ መ ጠዋን ሙንደእበረ፤ ገይሰ ሃላ ሃዕላቸተ እምንታእረ፤ ኣድሰ ቦን ላጋን ወጥላሃ፤ ገይሀሰ ደግለሽቀንቶተ ሀሰን መኑ ቡልጥጭታኦ።

ጠረጎን ሸዘነተኔሃ

1:1 ማቶ. 13፣55፤ ማር. 6፣3። 1:5 ፋል. 12፣51፤ ዘኁ. 14፣29-30። * 1:7 ኣቀርቶ ሴሪኛ ኣደ እኮ ሃሊን ዝነተ ኣቶኡ፡- የኖሁ ግርክ እድን «ዎሎ ጅሰማን ዝነተ ኣቶኡ» የኖ። 1:7 ኣል. 19፣1-24። 1:9 ዳን. 10፣13፣21፤ 12፣1፤ መር. 12፣7፤ ዘዳ. 34፣6፤ ዘካ. 3፣2። 1:11 ኣል. 4፣3-8፤ ዘኁ. 22፣1-35፤ 16፣1-35። 1:14 ኣል. 5፣18፤ 21-24።

17 ጠዉ እኮጎሬ ኢ ጃለኤ! አዕኑ ቀርቹሃኔ መሲህ ኢሰ አሳበት ከኒች ብርተ ጠወኑ ላገተ ቃጌ።

18 እሰ «ኤተር ዘማኔን መገን ሰውቲች ቁዕርቶ ገይሰ ሂለ ሄዕላቸተ አዋንተን ቀለዳ መኑ አሚታኦ»
ይቶህዕኔ እቅ።

19 እሰን መነ አደ አታአረ፣ ማል ሄዕላቸተ አዋንታአረለከ ጠሊሎ አያኑ የሰበአራን።

20 ጠዉ እኮጎሬ ኢ ኢተኤ! አዕኑ ጉዕሚችን በተአኖ ጠሊሎ አመዕነቶንከክዕኔ ገዉክዕኔ ጠረኝሶኖተ
አጳሚ፤ ጠሊሊ አያን ወልቃን ዱአ አዕዬ።

21 ቀርቹኔ መሲህ ኢሰን ማርቶንከሰ ዘላላሚሃ ሄኡ ኢልሶህዕኔተ አገዕረቀንቴን ገጉክዕኔ መገን
ኢተ አዘኔን አገዕርዬ።

22 መት-መቶ ሸክታ መኒሃ መረርሲጭዬሰ፤

23 መት-መቶ መነ ገራች ፋሽቴን ጡምሼሰ፤ ዋሊህሰ ዋጂን መረርሲጭዬሰ፤ እኮጎሬ ጨቢን ንጃሾ
ጅሰመሰ ኡልቶ ኦድኑተ ሆሮ ፈቅዕነ ግቤ።

ገለት ዱአ

24 ኡቤነንተበአገ አገርህዕኔተለከ ሙልሰኖርቹ የበአረ አዕይ ሙንዲኖን ኬዕምኝሰ ብሬን
ሆንጠህሶህዕኔተ አታለኖህኒሃ።

25 ጠለዕል እሰ ዘቡኔ እኮ መገኒሃ ቀርቹሃኔ መሲህ ኢሰ አዲን ዎዕኔችን ጀመር ቴሁ ዘላላሚሃ
ኬዕምኝ፣ ሎርመት፣ ዎልቀትለከ ዳቾመት እሲሃ እኮጎሰ! አሚዕን!

ያህይ ለዕዮ መናገስ ኣጉሰ

ያህይ ለዕዮ መናገስ ከተበንቶኢሁ አመዕናኑት መሲህ ኢሰ ቀርቼሰ እሁሰ አመዕንሰ መሳን ቶቶሙለክ ኦርሸት ኢልቶሰ ወክትዩት። ከተሰሰህን ቡዕለ እኮ ጠዉ ኣነበባኣረ ተብሶሰ ዊመ አሆተ ጠረኝሲሃለክ ኢልቶሰ ኦሪሸ ኣዜን አመዕነቶንከሰ ጠረኝታገ አኢሃት።

መጻፍሰ ኣዜን በተአናሰ ኣዱ ልግብለክ አዎዕናኑት ዮአ መገኑ ለልሾሰ ሶህኑተ ኣፎኣሃን፤ መገኑ ለልሾሰ ሶህኑት ህከን ዘማኔን ሄኦ አመዕናኑት ኤንከዕንታኢሃ እክ ዋሎ መኒሃ እኮጎሬ ምሰጥር ምሰል ሃለን ሆንጠኮአራን። መዝሙረ ፈንቀላንሲን ዬኖህገን መጻፍሰ ቡዕለ እኮ ጠዉ ኣደደ መገኑ ለልሾሰ ሶህ መሳን ኣደደ ደኒን በርጋቀም ሆንጠኮኦ። መጻፈሰ ፈሰርተኔሃ ኣደ እኮ ሰውቱ ሄዕዮሰጎሬ ቡዕለ እኮ ጠዉ ለልዮአሃን፤ ሁኩንን መገኑ ቀርቾሃ መሲህ ኣዲን ለንኪሃ በርግበ ሃለን መቶረለክ ኤተሩ ኣዕይ ሸይጣኒን ሜጡብ ዲን ጉዕመንክ ቁለና፤ ዲን ቁሎች ኤተርን አመዕነንቶሰህኩተ ሃዕር ሰማለክ ኡለተ ረገአሲሰና።

መጻፍሰ ኣፎሃ

ኣጉሰ (1፡1-8)

መገኑ ለልሾሰ ሶህኑት ፈንተኡለክ ለመለ መገን አመዕናኖ ዱኢ ጭምት ምናች ሶህንቶ ሶህኑተ (1፡9—3፡22)

መጻፈሰለክ ለመለ ማተበ (4፡1—8፡1)

ለመለ ጡሩምበ (8፡2—11፡19)

ደህቹለክ ለሙግዘ (12፡1—13፡18)

ኣደደ መገኑ ለልሾሰ ሶህኑተ (14፡1—15፡8)

ለመለ መገን ኡሙዕሬ ጠበትተ (16፡1-21)

ባብሎን በኡ፡ ቡሳውች፡ ክዘበኘ ነብዬችለክ አልቢሰ ቄልተኦ (17፡1—20፡10)

ቂያም ፍርደ (20፡11-15)

ሃዕር ሰማሃ፡ ሃዕር ኡለተ፡ ሃዕር ዬሩሳሌመ (21፡1—22፡5)

መጨረሻሰ ሰውት (22፡6-21)

1 ኩ መገኑ ለልሾሰ ሶህኑት ግደኖ ወክቱን አህኖህ እሁሰ ካዲማተሰ ለሊሶተ መገኑ መሲህ ኢሲሃ ኣሰዮሰሃን፤ መሲህ ኢሲን መላይኪቹሰ ሶክ ካዲሚሰሰ ያህዪሃ ከ ሶህኑተ ለልሾሰ።

2 ያህይን መገን ላገተኔሃለክ መሲህ ኢሰ ምሰክር አህሰተኔሃ ህትን ለልሾሰ ጠወ ጉዕመንክ መሰከር።

3 ኩ ጠዉ ጉዕመንኩ አህኖ ወክቱ ግደኑ እኮቤቹሃ ከ ራግ ላገተ ኣነበበኖህ ማሰአሞአሃን፤ ህትን ከ ራግሰ ላገተ ሞጭጭታአራለክ ከን ራግ ላገ ኣዜን ከተበሞሃ አታአሩ ማሰአንቶኢራን።

ለመለንክ እስይ አመዕናኖ ዱኢ ምናች ሶህሞ ወገሬትተኔሃ

4-5 ያህዪች እስይ ባደን ለመለንክ መገን አመዕናኖ ዱኢ ጭምት ምናች ዮሀኒች፡ ሄዕዮሀኒችለክ አሜተኖ መገኒች፡ ጄንትሰ ቦርጭመ ብሬን ዮ ለመለ ኣያኒች፡ ህትን ሬሆች ኬኢን ሀንገሬ እኮ ኣዲንያ ኣል ዋመ ዳኛኑት ገሸኖሃ፡ አመዕነሞ ምሰክር እኮ፡ ኢተኖህዕኔሀኒችለክ ቂንከሰ ጨቢቹኔ ነጠ ፋሼኔ መሲህ ኢሲች ኣሰቱትለክ ወገሬቱ ክዕኔሃ አሁን።

6 መሲህ ኢሰ ኣና መገኑ ካደሞተ መንግስትሰ ኡመት ቂሰተ ኣዕዮኔ መሲህ ኢሲሃ ኬዕምኙለክ ወልቀት ዘማንሃ ጉዕሚንክ ኢለ አሁን! ኣሚዕን።

7 መኑ ጉዕመንኩ እሱ ቀሶሩ ፈቆሰናን ጎማን አሜተን ለኣኣ፤ ህትን ኣዲንያ ኣሉን ዮ ኡመቱ ጉዕመንኩ አሜትሰተኔሃ ኦኣኣ፤ ሁኩ ጠዉ ሀንቅሃን፤ ኣሚዕን።

8 ጉዕመንክ አታለኖ ዎሶናሃ፡ ቲሁ ዮኢሁለክ አሜተኖ ቀርቹ መገኑ «ዎዕኔሁለክ ኤተሪሁ ኣኔት!» ዮኖ። *

መሲህ ያህዪሃ ለሊገ

1:4-5 ፋል. 3፡14፤ መና. 4፡5። 1:4-5 ኢሰ. 55፡4፤ መዝ. 89፡27። 1:6 ፋል. 19፡6፤ መና. 5፡10። 1:7 ዳን. 7፡13፤ ማቶ. 24፡30፤ ማር. 13፡26፤ ሉቃ. 21፡27፤ 1 ተሰ. 4፡17፤ ዘካ. 12፡10፤ ያህ. 19፡34-37። * 1:8 «ዎዕኔሁለክ ኤተሪሁ ኣኔት!» ዮመሞህ አማርኛን ኣልፈለክ ኦሜገን ዮሁዳ አማርኛን «ወዕኔ ሁ. ፍደልገለክ ኤተር. ፕ.» ፍደልገት፤ ህትን ግሪክ ባድ ፍደሊን ዎዕኔለክ ኤተር ፍደሊ ዩን፤ ሁኩን ጉዕመንኩ መገን ዋልቀ ኣዜን ሄኦሰ ለሊሰና። 1:8 መና. 22፡13፤ ፋል. 3፡14።

9 እን እመክሳኔ ቤቱ ያህይ ኢስተኔሃ ኦሪሽተ ኣኡለክ ኣታዕላሃ መገን ጃነት ኣጉሃ ክዕኔንን ሜጡብ ወጡ ዮኣህንጎ፤ እንን መሲህ ኢስ ዱዱብሴ መገን ላገተ ጠወዕዮምቤቺሃ ዊን ረብንቶ «ፍጥሞ» ዬኖ ባደን ሃዕዮም እቅ።

10-11 ቀርቶ በሬን ጠሊሊ ኣያነን እክ ሃዕዮም ወክት ኤተርኤ ኦዲን «ከ ለኣንቲሃ መጻፋን ከተብ፤ መጻፈሰ ሕሰዩ ዬኖ ባደን ዮ ሌፌሶኒሃ፣ ሰምርኔሲሃ፣ ጴርጋሞኒሃ፣ ትያጥርኒሃ፣ ሰርዴሲሃ፣ ፊላደልፍየለክ ሎዶቅዩ ዬኖ ለመላንክ ከተማን ዮ እመዕናኖ ዱእ ምን ጭምቲሃ ሶህ» ይታ ጡሩምብገ ዮ እበ ላገተ ሞጮጩም።

12 ጠወዕዮኤ መንቺ ለኦተ ኤተር ኣደ ዘህ ለዕዮም ወክት ምርቂን መክሴመ ለመላ ኩራዝ ኣፋሺኖህንከሰን ለዕዮም፤

13 ህከን ኩረዝ ኣፋሺኖህን በላን ሎከሰ ኢሊ ቅራዕሩ ኦድኑተ ኦደዕይ ወዘነሰ ምርቅ ቀብቶን ቆዕራ መንቺ ቤቱ ኣጉደኖሃ ለዕዮም።

14 ኩዕሎስለክ ሙሙስ በረድገለክ ሱፍገ ወጃሃ እቅ፤ ህትን ኣልሰ ገረ ለበነተ ኣጉዳ እቅ።

15 ሎከሰ ምዳቶ ገረ ክፈሊን መክሴመ ናሰ ዬኖ ብረት ኣጉደኖሃ እቅ፤ ላገሰ ፋማን ዛዘኖ ዊ ላገገ ዮእሃ እቅ።

16 መኬሰ ኣንጋን ለመላ ቤዙተ ኣፎ እቅ፤ እሰ ኣፌች ለሞ ኦዲን ኣጻሹ ሲፋ ፋለኖ እቅ፤ ህትን ሚንሰ ዊመ ኑሪን ለሊሰኖ ኣረጋት እቅ።

17 እን እሱ ለዕዮንሰ ወክት ሬዮ መንገ እክ ሎከሰ ኣዜን ኡቦም፤ እኩገሬ ኣሰን መኬሰ ኣንገተ ኣሌኣ ኣዕይ «ዋጅቶት! ብሬሁለክ ኣተሪህ ኣኔት።

18 እን ሄኣምሃን፤ እን ሬዮም እቅ፤ ጠወ እኩገሬ ቲሁ ዘላላሚሃ ሄኣምሃን፤ ህትን እን ሬሁተለክ ኣዛብ ፈኖም ቁልፋ ዮኤ።

19 ቲሱ ለኣንቲሃ ዮኢህለክ ከኒች ኤተሮን ኣሜተኖሃ ለኣንቲሃ ከተብ።

20 ምርቂን መክሴመ ለመላንክ ኩራዝ ኣፋሺኖህንለክ መኬ ኣንጋን ኣፋን ለኣንት ለመላንክ ቤዜ ፍሳረት ከኒት፤ ለመላ ቤዜት ለመላንክ መገን ኣመዕናኖ ጭምት ዱእ ምነተ መላይክ፤ ህትን ለመላ ኩራዝ ኣፋሺኖሁ ለመላንክ መገን ኣመዕናኖ ጭምት ዱእተ ምነ» ዬኤ።

2

ኤፌሶን ባደን መገን ኣመዕናኖ ዱእ ምናተ

1 ኤፌሶን መገን ኣመዕናኖ ዱእ ምና መላይኪቺሃ «ለመል ቤዙተ መኬ ኣንጋን ኣፎሃለክ ለመላ ወርቅ ኩረዝ ኣፋሺኖህን በላን ፈንቀላመኖሁ፤

2 ሆጉክ፣ ኣጸንጉንትገለክ ኣታዕላክ ደጋም፤ ጠወ እኩገሬ ሃላኑተ ኣታሉ ሆጉክ ህትን ኣሳብኤ እኩዕናን ሕሳብጉ» ይታ መን ክዘበኛኑተ እኩገ ኣጥራመት ደጉክ ደገም።

3 ኣታዕላን ጠረኽክለክ ሱዕምኤተኔሃ ህፈቲዕናን ኦርሸተ ቶጉክ ደገም፤

4 ጠወ እኩገሬ መቱ ግባንኬ ጠወ ዮኢሁ ወዕና ዮሄ ኣተተ ኣጉርቶንት።

5 ህከኔ ኡቦንት ጎር ሰውይት ቶብት! ወዕና ኣተን ሄኦንት ሆጉክ ኣእ፤ ህከን ጉዕመንክ ኣትብገሬ ኪቤቺ ኣሜታም፣ ቶብትብገሬ ኩረዝ ኣፋሺኖሃ ቤቺችሰ ኬሽ ከማም።

6 ጠወ እኩገሬሁ ኣን ግቦምገን ንቆላወያኑት ኣታ ሆጉተ ግቡክ ጡመሃን።

7 «መገን ኣያኑ መገን ኣመዕናኖ ጭምት ዱእ ምናተ ዮኖሃ መጨት ዮሲሁ ሞጮጩን! «ድለ ኣዕዮህኒሃ መገን ቤቺን ፎሎጩኖ ቤቺን ነጹ ሄኣ ሀቁቺ ላልቺ ኣተኖገ ኣእም» ይት ከተብ።

ሰምርኔሰ መገን ኣምዕናኖ ዱእ ምናተ

8 «ሰምርኔሰ መገን ኣመዕናኖ ዱእ ምነ መላይኪቺሃ፡-

«ምኔሁለክ ኤተሪሃ እኩ፣ ሬዮህኒችለክ ፎሊን ዮህኒች ሶህንቶእ፤

9 ኦርሸክለክ ሱጥመክ ደጋም፤ እሁን ቤሉ ኣት ቀጣጣሙሃን፤ ኣይሁደ እኩዕናን ኣይሁድ ኣድረ ይታ ሺይጣን ምኒ እኩኣረ ሱዕመክ ክዘቢን ቤሳገ ደጋም።

10 ብርተ ሞሽት ኣልታሃ ኦርሸተ ሞጅቶት፤ ኣልቢሱ ኣመዕነቱክ ደገተ ቶኑ በር ኦርሸተ ቶጎኖተ ክዕኔች መት-መቱክዕኔ ኡሱር ምኒ ኣግሰኖ ህዕኔ፤ እን ሽልማት ኣሲኖህንገ ቁልቲነተ ወጥሃ ሄኡ ኣሳንክዕኔቤቺሃ ሬቶኖተ ኢሊ ኣመዕነንቱንተረ እኪ።

11 «መገን ኣያኑ መገን ኣመዕናኖ ጭምት ዱእ ምናተ ዮኖሃ መጨት ዮሲሁ ሞጮጩን! «ድለ ኣዕዮህኒሃ ለንክ ሬሆን ምርተኣኖበኣ ዮኖት» ይት ከተብ።

ጴርጋምን ከተም መገን ኣምዕናኖ ዱእ ምናተ

12 «ጴጆርጋምን መገን አመዕናኖ ዱእ ምነ መላይኬቺሃ

«ለምንከ አዲን መረኖ እጻሸ ሲፈ አፎ መንቸ

13 ኣት ሼይጣን ኬዕምኣ ሰርጭምት ዮቤቸን ሃኡክ ደጋም፤ እሁን ቤሉ ሱዕመኤ ጠረኝሰ አፎንት፤ ኢ አሊን ዮሂ አመዕነቱ ለገኡንትበእ፤ አመዕነም ኢ ምሰክር እኮ ኣንተጻሴ ሸይጣኑ ሃኡናቤቸን ክዕኔ ከተማን ሼመ ወክት ኢን አመዕኑ ሆሮ ኣጉርቶንትበእ።

14 ጠዉ እኩጎሪህ ግባንኪ መት-መቱ ጠዉ ዮሄ፤ ሁኩንን ባለአሜ ትምርት አምንጎ መት-መቱ መኑ በላንከክዕኔ ዮኡ፤ ኩ ለባአም አሰራኤል ኡመት ሸርኬተ ክትሚመ ማለ ኣቴንለከ ዘነተ ኣኢን ቆዕልጎታ ገባቁ ሸኩሃን።

15 ህትን ክዕኔ በላን ኒቆላውያኖ ትምርት ኣእት አምንጎ መት ዮኡ።

16 ህካን እኩቤቺሃ ቶበት፤ ህካን እህባች ኪቤቹ ደዕል አሜቶ ኣፌኤ ሲፊን ኦለማንሰ።

17 መገን እያኑ መገን አመዕናኖ ጭምት ዱእ ምናተ የኖሀ መጨት ዮሲሁ ሞጮጬን፤ ድለ አዕዮሀኒሃ ማጤመ መና ኣሳንሰ፤ ሃዕሮ ሱዕመ ከተብሞ ቀዉ ዋጂ ክኑ *ኣሳንሰ፤ ቶገና ኣን ቤሉ ካን አዪሁ ደገናበእ የኖት ይት ከተብ።»

ትያጥርን ከተም መገን አመዕናኖ ዱእ ምናተ

18 «ትያጥርን ከተም መገን አመዕናኖ ዱእ ምነ መላይኬቺ

«ገረ ለበነ ኣኩዳ አልትለከ ገራን ሸልሰን መክሲመ መዳበ ኣኩዳ ሎክቲ ዮ መገን ቤቲቶ

19 ኣን ሆንክ፣ ኣተክ፣ አመዕነቱክ፣ ክድመክለከ ኣጎሳሎክ» ደጋም፤ ህትን ወዕኔ ሆሳች ኤተርክ ሆንት ቆካኣ።

20 ጠዉ እኩጎሪ መቱ ግባንኪ ጠዉ ዮኢሁ ኣን ራጋንቸተ፣ ይጎ መንቸተ ኤልካቤል ኢ ካዲመት ዘነተ ኣቶተለከ ሸርኬተ ክትሚመ ክትም ማለ ኣቶተ ሎሲሰ ተማርሰተን ሰዕምት ኣጉርቶንት።

21 ኣን ዘነተ ኣኡሴ ቶበት ፈንቀልጎታ ወክት ኣሰዮንሴ ኣቅ፤ እኩጎሪ ዘነተ ኣጉራ ግባኡ።

22 ህካን እኩቤቺሃ ኣን ኣሲት ኣርሸ መዕነ አሉን ኡጃንሴ፤ ህትን ኣሲንን ዘነተ ኣጎ መኑ ኣሴ ኣጎ ሂለ ሆሳች ቶበት ፈንቀሎ ሆጋሪ ኣበ ኣርጨቀንጎታ ጎኣም።

23 ኦሱሴ ሪሆን ቀጠኣም፤ † ህካን እኩቤቺሃ መገን አመዕናኖ ጭምት ዱእ ምነት ጉዕሙንኩ መን ሰውትለከ ሃዕሳቸሰ መረመር ደጋሚህ ኤሳሃ እሁኤ ደጋኣ፤ ኣን መት-መቲሃክዕኔ ሆሳክዕኔ ጌሰ ኣሳም።

24 «ትያጥርን ዮንጎሁለከ ከ ሂለ ትምርት ቶጌንበሀኡተ ጉዕሚንከ ህትን መት-መቱ ሼይጣን ጥዕላሽ ምሰጥር፣ የኖሃ አምንቶኑዕናን ፈቁንተ ክዕኔሃ ምልት እጅንተ እጅሲሳንክዕኔበእ።

25 እኩጎሪ ኣን አሜቶተ ኢለ ዮሀዕኔሃ ጠረኝሴን አፌ።

26 መጨረሽ ኢለ ድለ አዕዮሀኒሃ ሆሳንተኣ ጠረንኖሀኒሃ ኡመት ገሸኖ ሹምነቱ ኣሳንሰ።

27 «ብረት በርቲን ጠቀኖሰ፤ ትብ ኦዳገ ቀጠቀጭ ቀመ ኣእኖሲ ኩ ሹምነቱ ኣን ኣኒቶኤ ቶሳምሀንጎት።

28 ኣን ኣሲሃ ሶከ ቤዜተ ኣሳንሰ።

29 «መገን እያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጬን የኖት» ይት ከተብ።

3

ሰርዴሰ መገን አመዕናኖ ዱእ ምናተ

1 «ሰርዴሰ መገን አመዕናኖ ዱእ ምነ መላይኬቺሃ

«ለመለ መገን እያንለከ ለመል ቤዜት አፎሀኒቶ ጠወአምዕሃን፤ ሆንክ ደጋም፤ ጠለዕል ሱዕሙ ዮሂ ቤሉ ኣት ራቶንት።

2 በቅይ፤ ሪሆተ ሆንጠኮሃለከ ፈቆሃ ቀዉ ወልቀክ ጠረኝሰ፤ መገን ብራን ሆንክ ዊመ ኣካን ደጎምበእ።

3 ህንዳ መ ተማርሲመሃጎር መ ሞጮጭቶንትጎር ሰውይ፤ ኣገርሰ፤ ቶበት፤ ጠዉ እኩጎሪ በቅ ይቱዕነ ድንገቲን ሞጋንቶን አሜታም፤ መ ወክት ኪቤቹ አሜታም ገ ደጋንትበእ።

4 ጠዉ እኩጎሪ ኦድኑስ ንጃሰሶበእ ቀዉ መኑ ኪን ሜጡብ ሰርዴሰ ከተማን ዮኡ፤ እሰ ዋጂተ ኦድኑተ ኦድኡ * ሀሰሰኖሳሃ እኩቤቺሃ ዋጂተ ኦድኑተ ኦድኣ ኢን ሜጡብ መርጎኣ።

5 ድለ አዕዮሀኒሃ እሰገን ዋጂተ ኦድኑተ ኦድሲኖ፤ ኣን ሱዕመሰ ኣንኤለከ መላይከ ብራን ሙንደዕይ ኩላም ቤሉ ሄኣ መጻፊቶ ሱዕመሰ ቤሳምበእ።

2:14 ዘኑ. 22:5፤ 7፤ 31:16፤ ዘዳ. 23:4፤ ዘኑ. 25:1-3። * 2:17 ቀዉ ዋጂ ክኑ፡- ግርክ ባዳን ብራ ዘማን ፍርድ ምኒ ዳኖት ኦጂ መንቸሃ ዋጂ ክኑ ኣለቶሰፊሪ መንቸሰ ኦዳቶ ነጠ እህኖ። 2:17 ፋል. 16:14-15፤ 16:33-34፤ ያህ. 6:48-50፤ ኣሲ. 62:2፤ 65:15። 2:20 1 ነገ. 16:3፤ 2 ነገ. 9:22:30። † 2:23 ኦሱሴ ሪሆን ቀጠኣም፡- የኖሀ ልገብ መኑ ህት ኣሉት ኣሲ. አልቀረበኣ፤ ኣሲ ትምርት ኣእት ኣሴ ኣካገ ኣከን ሃኣረፈ ይታኣ። 3:3 ማቶ. 24:43-44፤ ሉቃ. 12:39-40፤ መና. 16:15። * 3:4 ዋጂተ ኦድኑተ ኦድኡ፡- የኖሀ መኑ ኦድኣኖ ነጠ ኦድኑተ ኣሁዕነ ኣርሸተ ቁሉ መሃሂ ማገኑ ኣሰኖ መሲህ ኢሲሃ ወገራት። 3:5 ፋል. 32:32-33፤ መዘ. 69:28፤ መና. 20:12፤ ማቶ. 10:32፤ ሉቃ. 12:8።

6 «መገን እያኑ መገን አመዕናኖ ጭምት ዱእ ምናሂ የኖሃ መጨት ዮሲሁ ሞጮጩን» የኖት ይት ከተብ::

ፊሌዴልፍ መገን አመዕናኖ ዱእ ምናተ

7 ፊሌዴልፍ መገን አመዕናኖ ዱእ ምነ መላይኪቸሃ

«ጠሊለለክ ሀንቅ እኮሀሊቸት፤ ሀትን እሲንከ ደወዴ ቁልፋ ዮሲ እኮቤቸሃ እሲ ፈቛ ኡሩተ አዪሁ ጡፈኖበእ፤ ሀትን እሲ ጡፎ ኡሩተ አዪሁ ፈነኖበእ።

8 ሆጉክ ደጎም፤ አዪሁ ጡፎተ አታለኖበእ ኡሩተ ብሬክ አዕዮም፤ ዋልቀክ ቀወ እሁሲ ደጎም፤ እሁን ቤሉ ላጋኤ አገርቶንጌ፤ ሱዕመኤ ካዳንትበእ።

9 አይሁደ እኩዕናን አይሁድራን ይታእረ ሀከ ሺይጣን ምኒ እኮ ክዝበኛኑት አሜት ሎከክ አሌን ኡብ ሰገዳሂን አአም፤ እን ኢቱኤ ደጋገ አአም።

10 ፈረሀይ አዘኮንኬ ላጋኤ አገርቶንትቤቸሃ ኣዲንያ አሌን ሄአኖሃ ጉዕመንከ ፊተንቶተ አሜታ ኦርሽ ወክቲቻ አገራንኬ።

11 እን ደዕል አሜታም፤ ሀትን አዪሁ ኬሳሃ ዬመ ሽልማት አአኖህበእገ ዮሄሃ ጠረኝሲ አጵ።

12 ድለ አዕዮሀሂሃ ዱእ ምኒ ቱቃ አአም፤ እሲን ሀከኒቻ ሆር ፋለኖበእ፤ መገንጌ ሱዕመለክ መገን ከተም ሱዕመ እሲ አሌን ከተባም፤ ሁኩ ከተሙንኩ ሰሜቻ መገንጌ አዲቻ አሜታ ሃዕርሃ ዬሩሳሌመ፤ ሀትን ኢ ገይኤ ሃዕር ሱዕመ እሲ አሌን ከተባም።

13 ሀትን «መገን እያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጩን የኖት» ይት ከተብ::

ሎዶቅይ መገን አመዕናኖ ዱእ ምናተ

14 ሎዶቅይ መገን አመዕናኖ ዱእ ምኒ መላይኪቸሃ

«እሁን እኮሃ፡ አመዕነሞለክ ሀንቅ ምስክር እኮሀሊቻ ሀትን መገን ክልቀቲሃ ጉዕሚንከ ቡቁተ እኮሁ

15 እሲን እን ሆጉክ ደጋም፤ እት ቅዘንትያበእ ሀከረንገ እርንትያበእ፤ ሀካን እኮቤቸሃ ቂዘ ሀከረንገ አባቡ እኮንት እቃ ጡመ እቅ።

16 ቂዘ ሀከረንገ አባቡ እኮ፡ዕነ ልብጭ ይቶንትቤቸሃ አፈቻኤ ፋሽ ቱ ዮሂታት።

17 እት ልግቡ ብሩ ዮኤ፤ ቀባጣሙሃን፤ ሆፈዕዮኤሁ መቱርቸሁ ዮኤበእ። ይታንቲት፤ ጠዉ እኮኅሬ ኦርሻመ፤ ላፈ፤ ቡጥቸ፤ ቆቀለክ ከሉ እኮንትገ ደቅቶንትበእ።

18 እት ቀባጣሙ እኮተ ጊራን ሺል መኬ ዋርቀ ኢቻ ሀዕርቶተ፤ ክልመክ ለልትበገ ድቦተ ዋጂ ኦድኑተ ሀዕርቶተ ኦደኑተለክ ለኦተ አሊንከክ ቡዕርታንት አሌ ዘቡሃ ፊ ሀዕርት ቡዕርታንትገ ሸዛንኬ።

19 እን ኢታም መነ ጉዕመንከ ኤሙዕራም፤ ቀጠኣንሰ፤ ሀካን እኮቤቸሃ ሰጭትኬእ ቶበት።

20 እን ኡርን ኡር ጡፈ ቆጫም፤ አዪሁ ላገእ ሞጮጭ ፈቻጎሬ እሲቤቸ ኣግ እሲንን ሜጡብ ኢታም፤ ሀትን እሲን እን ሜጡብ እተኖ።

21 እን ድለ አዕዮሀሂሃ አኒንከኤ ጃንትሰ ቦርጭማን አፋዕሊምሀንገን ሀትን ቂሎሁ ጃንቴንኬኤ ቦርጭማን እን ሜጡብ አፋዕሊኖግ አአም።

22 «መገን እያኑ መገን አመዕናኖ ጭምት ዱእ ምናተ የኖሃ መጨት ዮሲሁ ሞጮጩን የኖት» ይት ከተብ::

4

ያህይ መገኑ ለዕዮገ

1 ሀከኒቻ ኤተሮን ለዕዮንሰ፤ ሰማን ፈንተኑ ኡሩተ ሄኦ እቅ፤ ወዕና ሞጮጩም ጡሩምብገ ዮ ላገት «አም ከበ ፋል፤ ከኒቻ ኤተሪሃ አሀኖ ጠወ ለሊሳንኬ» ዬእ።

2 ወክትንከሰ መገን እያኒን እክ ሰሜ ኪዕምኝ ቦርጭመ አሌን መቱ መንቸ አፋዕሊኤሃ ለዕዮም።

3 ኪዕምኝ ቦርጭማን አፋዕሊኤሁ ደኑስ ኢያሰጵደለክ ሰርዲኖን ዬኖ ጤአተ እኮ ክኑ አኑደኖ፤ ኪዕምኝ ቦርጭመተ ዘሀ መርግድ ጤአተ እኮ ክኑ አኑደኖ ሰመንዲቁቅ ሄኦ እቅ።

4 ሀትን ኪዕምኝ ቦርጭመ ገበላን ዘሀ ለሞይዲምኔ ሾልት ኪዕምኝ ቦርጭመት ሄኦ እቅ፤ ሀትን ኪዕምኝ ቦርጭማን ዋጂ ኦድኑተ ኦደእ ቡዕላንከሰ ዋርቅ አክለሊ ጣጦ ለሞይዲምኔ ሾልት ባልቀት አፋዕልቶ እቅ።

5 ኪዕምኝሰ ቦርጭማቻ በለቀለክ ላገት ጉገኛት ፋልታ እቅ፤ ጃንትሰ ቦርጭመ ብሬን ለመሉ ኩራዙ ለሊሰናት እቅ፤ ሁኩ ለመሉንኩ ኩራዙ መገንየ እያን እቅ።

3:7 እሲ. 22፣22፤ እዪ. 12፣14። 3:8 እሲ. 49፣23፤ 60፣14፤ 43፣4። 3:12 መና. 21፣2፤ እሲ. 62፣2፤ 65፣15። 3:14 መሳ. 8፣22። † 3:18 «እሊሀከ ደነ ቀጩ» የመም ፈሰረሞሁ ሀላብሳን «እሊ ዘቡ» የመምኑ፤ መሰንትሰ ግሪክ እሬን «እሊ ዘቡ» የኖሃ ቤሉ ደነ ቀሲሃ ቡዕራኖሃበእ። 3:19 ሞሳ. 3፣12፤ እብ. 12፣6። 4:3 ሕዝ. 1፣26-28፤ 10፣1። 4:5 ፋል. 19፣16፤ መና. 8፣5፤ 11፣19፤ 16፣18፤ ሕዝ. 1፣13፤ መና. 1፣4፤ ዘካ. 4፣2።

6 ህትን ጄንትሰ ጦርጭመ ብረን ለእቃንቸ አጉደኖ ባሩ ሃዕዮ እቅ፤ ለእቃንቸንኩ ነጠ እኮለሃ እቅ፤ ጄንትሰ ጦርጭመተ ዘህ ብረ አዲንለክ ኤተር አዲን ልግቡ አልት ዮ ሾሎ ፎላሙ። ክልቀቱ ሃዕዮ እቅ።

7 እሰን ዎዕኔ ክልቀቱ ዘቦሃ አጉደኖ እቅ፤ ለንክሁ ቦረ አጉደኖሃ እቅ፤ ሰቂሁ መን ሚንተ አጉዳ ሚንተ ሄኦሰ እቅ፤ ህትን ሾልቀሁ ብር የኖ የብሮ አጉደኖ እቅ።

8 ህከን ሾሎንከ ፎላሞ ክልቀቱሃ መት-መትሀሰ ሌህት ጎንት ዮሰ እቅ፤ ህከን ጎኔን ኣዝ አዲንለክ ገበላን ዘህ ልግቡ አልት ዮሰረ እቅ፤ እሰን

«ጠሊሎ! ጠሊሎ! ጠሊሎ!
ጉዕመንክ ኣታልታንት ቀርቾ መገኖ!
ዮኢሁ። ሃዕዮሁለክ አሚተኖሁ»
ይተን ሀንከዕርተለክ በራሃ ኡርሳበእ እቅ።

9 ክልቀቱንኩ ኬዕምኝ ጦርጭማን አፋዕሌሀሂሃ ዘላላሚሃ ሄኣኖሀሂሃ ሎርመት። ኬዕምኝለክ ሹኩር ሆንጠሀሳ ወክት

10 ለሞዲምኔ ሾሎንኩ ባልቀት ዘላላሚሃ ሄኣኖ ኬዕምኝ ጦርጭመ አሊን አፋዕሌ እን ብረን ምንክስ አብ ሰገዳኢ፤ ህትን ቡዕላንከሰ ዮ እክሊሊ ፋሽት ኬዕምኝ ጦርጭመ ብረን አፋሽት

11 «ኒ ቀርቾ መገኖ!
ጉዕመርቹንክ ከለቆንትቤቹሃ።
ጉዕመርቹንኩ ከለቀሞሁለክ
ፎል ደእኖሚሁ ኪ አምራን እኮቤቹሃ
ሎርመት። ኬዕምኝለክ ዎልቀት ኬሳሃ ሀሰሳሄ» ይታ እቅ።

5

መጻፈለክ ሆልቶተኔሃ

1 ጄንት ጦርጭማን አፋዕሌሀሂን መኬ ኣንገን ኣዝ አዲንለክ አብል አዲን ከተቤመ ለመላ ማተቢን እሽጌመ ጣጠሞ መጻፈ ለዕዮም።

2 መቱ ጠረኛ መላይኬቹ ሎረ ላጋን «ከ ማተቤ ፊሎተለክ ጣጠሞ መጻፈ ፈኖተ ሀሰሰኖሲሁ እዬት?» ዮን አሞጀኖሃ ለዕዮም።

3 ጠወ እኮጎሪ ሰማን፣ ኡላንለክ ኡላኛ ኣዚን ጣጠሞ መጻፈ ፈኖተ ህከረንገ ኣዝሰ ለኦተ ኣታሎሁ እዳሁ ደገሞበእ።

4 ኣንገ ጣጠሞ መጻፈ ፈኖተ ህከረንገ ኣዝሰ ለኦተ ኣታላኖሁ ደገመሆጎቤቹሃ አበ ኦዕዮም።

5 ህከ ወክት ባልቃኝ መቱ «እኦት! ይሁድ ዘሬኝ ደወዴ ደቦኝ እኮሁ ድለ አዕዮቤቹሃ ጣጠሞ መጻፈለክ ለመለንከ ማተቤ ፈኖተ ኣታላኖ» ዬኤ።

6 ህከኒኝ ኤተሮን ኬዕምኝ ጦርጭመ በላን ሾሎንከ ክልቀትለክ ለሞዲምኔ ሾሎንከ ባልቀ በላን ጎረጠሞሃ አጉደኖ ሆልቶ ኡራኢሃ ለዕዮም፤ ሁኩ ሆልቶ ለመላ ቡዲለክ ለመልት አልት ሄኦሰ እቅ፤ እሰን ኣዲንጎ አል ጉዕመንከ ሶሃንቶ መገንዮ አያን እቅ።

7 እሰን አሚኝ ኬዕምኝ ጦርጭማን አፋዕሌሀሂኝ መኬሰ ኣንጋኝ ጣጠሞ መጻፈ ኣኤእ።

8 ጣጠሞ መጻፈ ኣኤ ወክት ሾሎንኩ ክልቀቱለክ ለሞዲምኔ ሾሎንኩ ባልቀት ሆልቶ ብረን ሚኔንከሰ ጎሞብሰንቶኤ፤ ጉዕመንኩሰ ክራረ አፎ እቅ፤ ህትን ጠሊላኖ ዱኣ እኮ ሀጣን ዊሞ ወርቀ ኦደተ አፎ እቅ፤

9 እሰን ሃዕሮ መዝመረ
«ቄጊከክ ደቦኝ፣ አደደ አፎ ጠወኣ መኒኝ
ቦክኝለክ ኡመቲኝ

መን መገኒሃ ዎዚሃ
ኣት ጎረጠንቶንትቤቹሃ
ጣጠሞ መጻፈ ኣኢሃለክ
ማተቤ ፈኒሃ በቀኦንቲሃ ኣኮንት፤

10 መገኒሃኔ ቁሰተለክ ዎመ
እካገ ኣቶንትሰ፤
ኡለ አሊን ዎመ እካእ» ይተን ዘመርቶኤ።

11 ህከ ቤቹ ለዕዮም ወክት ኬዕምኝ ጦርጭመተ፣ ክልቀትለክ ለሞዲምኔ ሾሎንከ ባልቀት ዘህ ልግቤ መላይክ ላገተ ሞጮጮም፤ በትኝሰን ዎለኤን ኣታሊንበ ጌሰ እቅ።

12 ሎረ ላጋኒን

4:7 ሕዝ. 1፡22፤ 5፡10፤ 10፡14። 4:8 ሕዝ. 1፡8፤ 10፡12፤ ኢሳ. 6፡2-3። 5:1 ሕዝ. 2፡9-10፤ ኢሳ. 29፡11። 5:5 ክል. 49፡9፤ ኢሳ. 11፡1፤ 10። 5:6 ኢሳ. 53፡7፤ ዘካ. 4፡10። 5:8 መዝ. 141፡2። 5:9 መዝ. 33፡3፤ 98፡1፤ ኢሳ. 42፡10። 5:10 ፋል. 19፡6፤ መና. 1፡6። 5:11 ዳን. 7፡10።

«ጎረጠሞ ሆልቼሃ ወልቀት፥ ቀባጡት ሀይመተ፥ ጠረኝመተ፥ ሎርመተ፥ ኬዕምኝለክ ገለት ቶገሃ ሀሰሰኖሰ» ይቶኡ።

13 ህትን ቱሱ ሰማንለክ ኡላን፥ ኡለች ኣዘ ኡዲንለክ ባር ኣዚን ጉዕመ ቤቸንን ኖ ክልቀቱ ጉዕመንኩ «ኬዕምኝ ቦርጭማን ኣፋዕሌሀህላክ ሆልቼሃ

ገለቱ፥ ሎርመተ፥ ኬዕምኝለክ ዎልቀት ዘላላሚሃ እሲሃ እህን» ይተን ሞጮጬም።

14 ሾሎንክ ክልቀቱ «ኣሚዕን!» ይቶኡ፤ ህትን ለሞድምኔ ሾልት ባልቀት ሚኔንከሰ ጎምብሰንት ሰገድኡ።

6

ለመሎንኩ መጻፉ ፈንተኡስ

1 ህከኒች ኤተርን ሆልቼ ለመላንክ ማተቢች ምኔሲሃ ፈንን ለዕዮም፤ ህትን ሾሎንክ ክልቀቲች መቱሰ ጉገኛጎ ኖ ላጋን «አም!» ኖን ሞጮጬም።

2 ህትን ዋጁ 4ሹ ለዕዮም፤ 4ሹንከሰን ቆጶሁ በገዙ ኣፎ እቅ፤ ኣክሊሎንኩ ኣሰምሰ፤ እሰን ቄላንቹ ኣክ ድሊች ድለ ኣእን መር።

3 ህከኒች ኤተርን ሆልቼ ለንክ ማተቦ ፊል ፈቺ ወክት ለንክሰ ክልቀቱ «አም!» ኖን ሞጮጬም።

4 ህትን ዎሉ ዳሙ 4ሹ ፋሎ፤ ህከን 4ሹን ቆጶህህ ኣዲንያ ኣሊች ወገሬት ከማን መኮ ገገዪንከሰ ሸቀንታጎ ኣታ ዎልቀተለክ ሎሩ ሲፋንኩ ኣሰምሰ።

5 ህከኒች ኤተርን ሆልቼ ሰቅ ማተቦ ፊል ፈቺ ወክት ሰቅሰ ክልቀቱ «አም!» ኖን ሞጮጬም፤ ህከኔን ገሊ 4ሹን ቆጶ መንቹ ኣንጋንከሰ ሚዛነ ኣፎሃ ለዕዮም።

6 ሾሎንክ ክልቀት በሊች ኣሚታኢሃ ኣጉዳ ላገተ ሞጮጬም፤ ህት ላገንት «ኪሎ ደሬ ኣሊሱ መቶ በሬ ደሞዘ፤ መት ኪሉተ ደሬን እህና ሶኣ መቶ በሬ ደሞዘ እህን፤ ጠዉ ኣኮጎሬ ወይንለክ ዘይተ ቤሶት!» ኖን ሞጮጬም።

7 ህከኒች ኤተርን ሆልቼ ሾልቅ ማተቦ ፊል ፈቺ ወክት ሾልቅ ክልቀት ላገተ «አም!» ኖን ሞጮጬም።

8 ህከ ወክት ሺሬ 4ሹ ለዕዮም፤ እሰንን ቆጶህን ሱዕመሱ ሬሁተ የመመና እቅ፤ ኣዛቡ ኣዎንኖሲት እቅ፤ ሬሁትለክ ኣዛቡ እሰን ኣዲንያ ኣል መኒች ሾልቅ ኣፎሃ ኦሊን፥ ጎሪን፥ ልገቤ ጥዘናንለክ ኣብል ቡሳዊን ሽቶተ ሹምንቱ ኣሰምሰ።

9 ሆልቼ ኦንትቅ ማተቦ ፊል ፈቺ ወክት መገን ላገተለክ ኣቶ ምሰክርተኔሃ ሼመ መን ነብሳሃ መገኒሃ ክትም ሆንጠህሴና ጠረጴዚች ዋር ኣዲን ለዕዮም።

10 እሰን ሎሩ ላጋን «ጠሊለለክ ህንቅ ጉዕመንክ ኣታልታንቲ መገኖ! ኡላን ኖ መን ኣሌን ፈረዳንትበኣሁለክ ቄግኔተኔንክ ገድተ ፋልትባሁ መ በር ኣላት!» ይተን ያርቶኡ።

11 መት-መተሃሰ ዋጁ ቀምብሰ እሴመሰ፤ እሰንን ሬታኣ፥ ኣሰንን ካዲመተ እኮ ኣተሰለክ ኣመሰ ኦሶ ዎሊንሹ ዋሞተ ኣሊ ቀዉ ጌሰ ፎሎጭት ዲንክታጎ ኩለሞሰ።

12 ህከኒች ኤተርን ሆልቼ ለህቅ ማተቦ ፊል ፈቺን ለዕዮም ወክት ኡለት ኣበ ሌንቄቅቶኡ፤ ህትን ኣሪቹንት ጥጅ ኦድኖጎ ትልመ ገምብላ እኮኡ፤ ኣገንቹንኩ ቄግገ ጉዕመ ቤቹሰ ቢሸዕዮ።

13 ከርሚን ጠረኝ ቦብሩ ኦድ ሀቀቹተ ሌንቄቅሻን ላልቹ ግግላናህን ሰሚ ቤዜንት ኡለ ኣሌን ግግልቶኡ።

14 ሰምንኩ ጣጠሞ መጻፍገ ጣጠሞ በዕዮ፤ ህትን ቆተትለክ ዊ በላን ኖ ኡለት ጉዕመንኩ ቤቹችሰ ከኣ በኦኡ።

15 ህከኒች ኤተርን ኣዲንያ ኣል ዳኛኑት፥ ሎርሎራኑት፥ በገዝ ሀለቀት፥ ቀባጣመት፥ ዎልቃመት፥ ርስቹለክ ሰዎልድቹ ጉዕመንኩ ሻንቃንለክ ቆተ ኣሌን ኖ ክን ረበ ኣዜን ገዪህሰ ማጠንቶኡ።

16 እሰን ቆተተለ ክነተ «ኒ ኣሌን ኡቤ! ኬዕምኝ ቦርጭመ ኣሌን ኣፋዕሌሀህኒች ብርተ ሆልች ኡሙዕሬች ማጮኔ!»

17 እሰ ሎሩ ኡሙዕሬ በሩ ኣሚቶቤቹሃ ኣይ ኡርተ ኣታለኖ?» ይቶኡ።

7

መት ጥብተ ሸይልኔ ሾሌ ኩሚ ኣስራኤል መነ

1 ህከኒች ኤተርን ሾል መላይክት ሾሎንክ ኡለ መረረባን ኡርታን ለዕዮም፤ እሰ ኡለ ኣሌን እኮ ባራን ህከረንገ ሀቅ ኣሌን ቦብሩ ቦብርበገ ሾሎንክ ኣዲን ኣሚታ ኡለ ኣል ቦብረ ኣፎኡ።

6:2 ዘካ. 1:8፤ 6:3፤ 6:። 6:4 ዘካ. 1:8፤ 6:2። 6:5 ዘካ. 6:2፤ 6:። 6:8 ስከ. 14:21። 6:12 መና. 11:13፤ 16:18፤ እሳ. 13:10፤ እዪ. 2:1፤ 10፤ 31፤ 3:15፤ ማቶ. 24:29፤ ማር. 13:24-25፤ ሉቃ. 21:25። 6:13 እሳ. 34:4። 6:14 መና. 16:20። 6:15 እሳ. 2:19-21። 6:16 ሆሴ. 10:8፤ ሉቃ. 23:30። 6:17 እዪ. 2:11፤ ሚል. 3:2። 7:1 ኣር. 49:36፤ ዳገ. 7:2፤ ዘካ. 6:5።

2 ሄኔኖ መገን ማተብ አፎ ዋሉ መላይኬቹ ሸርቂቅ እሚትን ለዕዮም፤ እሰን ኡለተለከ ባረ ቤሶተ ዋልቀት አሰንቶሰ ሾሎንከ መላይከቤቹ ላገሰ ጎት አዕይ

3 «መገን ካዲመ ሚኔን ማተብ አዕናተ ኢላ ኡለተ እኩ ባረ ሀከረንገ ሀቀ ቤሶኖቹ» ይ ያር።

4 እሰራኤል ቶና ለምንከ ደቦች ጉዕሚችን ሚኔንከሰ መገን ማተብ ዋቀሬመ መን ዋሊንሹ ጥብታ ሸይልኔ ሾሎ ኩምተ እሁሰ ሞጭጭም።

5 ማተቡ ዋቀረሞሰሩ ይሁድ ደቦች ቶን ለም ኩምተ፣ ርቤሌ ደቦች ቶን ለም ኩምተ፣ ጋዴ ደቦች ቶን ለም ኩምተ።

6 እሴር ደቦች ቶን ለም ኩምተ፣ ንፍታሊም ደቦች ቶን ለም ኩምተ፣ ሞናሴ ደቦች ቶን ለም ኩምተ፣

7 ሰሞኔ ደቦች ቶን ለም ኩምተ፣ ሌዋ ደቦች ቶን ለም ኩምተ፣ ይሳከራ ደቦች ቶን ለም ኩምተ፣

8 ዛብሎኔ ደቦች ቶን ለም ኩምተ፣ ዩሱፍ ደቦች ቶን ለም ኩምተለከ ቢንያሜ ደቦች ቶን ለም ኩምተ እቅ።

ዋጁተ ኦድኑተ ኦደኦ ልግብ ኡመት

9 ሀከኒች ኤተርን አዪሁ ዋለኦተ አታልቡ ልግብ ኡመት ለዕዮም፤ እሰን ኡመተችለከ ደቦች፣ ዘሬችለከ አደደ አፎ ጠወአናሁኒች ጉዕሚችን መኒች፣ ዘሬች፣ ባዲች፣ አደደ አፎን ጠወአ መኒች ጉዕሚችን ጭምይት ዋጁተ ኦድኑተ ኦደኦ አንጋንከሰ ዘምባብ ሀበረ አፍ ዳኝነት ቦርጭመለከ ሆልች ብሪን ኡርቶ እቅ።

10 እሰን ሎረ ላጋን ጨንጭተን

«ጡምሱ ዳኝነቲ ቦርጭማን አፋዕሌ ኒ መገኒሃለከ ሆልችሃን» ይታኢት እቅ።

11 መላይከት ጉዕሚንኩ ኬዕምኝ ቦርጭማንለከ ሾሎንከ ክልቀትሃ፣ ባልቂሃ ዘህት ኡርት ኬዕምኝ ቦርጭመ ብሪን ሚኔንከሰ ሙግይት መገኒሃ ሰገዶኡ።

12 እሰን

«አሚዕን! ሎርሱ፣ ሎርመት፣ ሀይመት፣ ገለቱ፣ ኬዕምኝ፣ ዋልቀቲለከ ጠረኝመቲ መገኒሃኔ ዘላለሚሃ ኢላ እሲሃ እሁን! አሚዕን» ይቶኡ።

13 ሀከኒች ኤተርን ባልቂቅ መቱ ኢ አደ ልንቀል «ኩሩ ዋጁ ቀምብሰ ኦደኦ መኑ አዩኤታን? እሰን ሀከንቤቸች አሚቶአራን?» ዩኡ።

14 እንገ «ቀርቸ! አት ደጋጎት» ዩንሰን እሰን «ሀከን አበ ኦሪሻች ፋልት አሚቶአራን፤ እሰን ኦድኑሰ ሆልች ቁገን ሚጭት ዋጁ አቶአራን።

15 ሀካን አኩቤቸሃ መገን ኬዕምኝ ቦርጭመ ብሪን ሀንከዕርተለከ በራሃ መገን ምኔን ካደንታአ፤ ህትን ኬዕምኝ ቦርጭማን አፋዕሌአንኩ ሀላ እሁናሰ።

16 ከኒች ኤተሪሃ እሰ ጎራይታበአ፤ ሰገብት አፋሰበአ፤ አሩ ሀከረንገ ፋረት ኡልታሰበአ፤

17 ኬዕምኝ ቦርጭመ በላን ዮ ሆልቸ ዜማንቸሰ እሁና፤ ሄኔ ዊ ቡቆበ አዋንሰናሰ፤ መገኑ አሌችሰ እንጂጃተ ሽንሸኖ» ዩኡ።

8

ለመልቅ ማተቡ ልንተኤሰ

1 ሆልቸ ለመልቅ ማተብ ፊል ሸቆ ወክት ሰኣት ደሬ ብከ ሰምሁ ጨላ ዩኡ።

2 ሀከኒች ኤተርን መገን ብሪን ኡርቶ ለመላ መላይከተ ለዕዮም፤ አሳንከ ለመላ ጡሩምበ አሲመሰ።

3 ወርቅ ህጣን ኦዳተ አፎ ዋሉ መላይኬቹ አሚች ክትም ጠረጴዛ መዳን ኡሬአ፤ እሲንከ ኬዕምኝ ቦርጭመ ብሪን ዮ ዋርቂን መክሴመ ህጣን አጨሴኖ ጠረጴዛ አሌን ጠላላኖ ዶኤን ሜጡበ ሆንጠሀሰኖ ልግብ ሀጣን አሲመሰ።

4 ህጣን ሙሊልት ጠላላኖ ዳኤን ሚጡበ መላይኬች አንጋች መገን ብርተ ፋሎ።

5 ሀከኒች ኤተርን መላይኬቹ ህጣን ዋሪኖ ኦዳተ አፍ ክትም ጠረጴዛች ዕመ ዊንሽ ኡለተ ዋሽ ቶሬአ፤ በለቁ፣ ላገት፣ ጉገኛትለከ ኡላ ሌንቁቁሁ እኩ።

ጡሩምበ ቡሰተኒሃ

7:3 ሕዝ. 9:4፤ 6። 7:14 ዳን. 12:1፤ ማፍ. 24:21፤ ማር. 13:19። 7:16 እላ. 49:10። 7:17 መዝ. 23:1፤ ሕዝ. 34:23፤ መዝ. 23:2፤ እላ. 49:10፤ 25:8። 8:3 እሞ. 9:1፤ ፋል. 30:1-3። 8:5 ሌዊ 16:12፤ ሕዝ. 10:2፤ ፋል. 19:16፤ መና. 11:19፤ 16:18።

- 6 ለመላ ጡሩምበ አፎ ለመላንኩ መላይከት ጡሩምበሰ ቡሶተ ቅጥ ይቶኤ።
- 7 ወዕኔ መላይኪቹ ጡሩምበሰ ቡሾ ወክት በረደለከ ሰቅሜሹ ቄጉ ልቃልቀሞ ገረተ እኩ፤ ኤለተ ዋል ቶረሞ፤ ኤለ ሰቅሜሹ ቡሶ፤ ሀቅ ሰቅ አፎሁ ቡሶ፤ ለቶ ህጥት ጉዕሙንኩ ቡሶኤ።
- 8 ሀከኒች ኤተሮን ለንክ መላይኪቹ ጡሩምበሰ ቡሾ፤ ሎረ ቆተተ አጉደኖርቹ ቡብን ባር አዜን ኡሶ፤ ባር ሰቅሜሹ ቄጉ እኩ፤
- 9 ባር አዜሰ ሄኣ ነብሶሁ ዮሰ ክልቀቲች ሰቅሰ አፎሁ ሬዮ፤ ህትን ባር ዋ አሌን ዮ ሰፊናች ሰቅ አፎሁ በዕዮ።
- 10 ሰቅ መላይኪቹ ጡሩምበሰ ቡሾ፤ መብራትገ ለልሳ ሎረ ቤዜት ሰሜች ኤለተ ዋልት ኡሶኤ፤ ኤሶንኩ ዋ ሰቅ አፎንለከ ቡቆ አሌኒት።
- 11 ህከን ቤዜ ሱዕሙ «ቁዕረንዳ» ይኖሃን፤ መሰንትሰ ዋ ሰቅሜሹ ቀራረኖሃ እኩ፤ ሙስ ቀራርቤቼሃ ህከ ዋሃ እጎ ልግቡ ሙኑ ሬዮ።
- 12 ህከኒች ኤተሮን ሾልቅ መላይኪቹ ጡሩምበ ቡሾ፤ አሪ ሰቅ አፎሁ፤ አገንች ሰቅ አፎሁለከ ቤዜ ሰቅ አፎሁ ዋቀረሞ፤ ህካን እኩቤቼሃ እሰ ሰቅ አፎሁ ቱንሰቹ እኩ፤ ከን ሃሌን በሬ ሰቅሜሹለከ ህከከዕሬ ሰቅሜሹ ኑሩ ዮበአሃ እኩ።
- 13 ህከኒች ኤተሮን ለአምረ መቱ ዮብሮ ሰሜ በላን ብርዮን ሎረ ላጋን «ፈቆ ሰሱንኩ መላይከት ጡሩምበ ቡሶ ወክት አዲንያ አሌን ሄኣ መኒሃ ቆሆኖህዕኔ! ቆሆኖህዕኔ! ቆሆኖህዕኔ!» ይተን ያርተን ሞጮጩም።

9

- 1 እንትቅ መላይኪቹ ጡሩምበ ቡሾ፤ ሰሜች ኤላን ኡሶ መት ቤዜተ ለዕዮም፤ አሲንከ ሎረ ጥዕላሽ ኤሎ ፈኔኖ ቁልፈ አሲመሰ።
- 2 እሰ ሎረ ጥዕላሽ ኤሎ ፈኖ፤ ዉሊልት ሞዳቺች ፋልታህንገ እክ ጥዕላሽ ኤሎች ፋሎ፤ ኤሎች ፋልቶ ዉሊሊ መሳን አርቹትለከ ሰሞሁ ቱንሰቹ እኩ።
- 3 ህከኒች ኤተሮን ከንቸፈሩ ዉሊሊ አዚች ኡለ አሌን ፋሎ፤ እሳንከ ኡለ አሌን ዮ ግንጥ * ዋልቀገ ዮ ዋልቀተ አሲመሰ።
- 4 ኡለ አሌን ዮ ህጥተ እኩ እኩስ ለቸርቹ ጉዕመንከ ህከረንገ እኩስ ሀቀ ሞዕርታበእገ ኩለሞሰ፤ ጠዉ እኩጎሬ ሞዕሩ ሀሰሰናሰ ሚኒንከሰ መገን ማተቡ ዮሰበእ መንሃት አቅ።
- 5 እሰ መን ሸቱዕናን ኦንቱ አገን ኦሪሶታትቤሊ ሸቶተ ፍቃድ አሲማሰበእ፤ ከንቸፈሩንኩ ኤሊሰ ኦርሸት ገንጡ መን ከረኖ ወክት ሞጮጩመኖህኒጋት።
- 6 ህከ ወክት ሙኑ ሬሀ ሀሰና፤ ጠዉ እኩጎሬ ሬሀተ ደአናበእ፤ እሰን ሬሀት ሄዕላታእ፤ ጠዉ እኩጎሬ ሬሀት እሳች ህንታእ።
- 7 ሁኩ ከንቸፈሩ በገዚሃ ቅጥአኤመ ፋርሱተ አጉዳ እቅ፤ እሳንከ አክሊለ አጉደኖህ ቡዕለሰ ሄዕዮ እቅ፤ ህትን ሚንሰ መን ሚንተ አጉዳ እቅ።
- 8 እሳንከ ሚንት ሙም አጉደኖ ሙሙ ሄዕዮሰ፤ እንኩሰ ዘቤ እንኩተ አጉዳ እቅ።
- 9 ወዘናንከሰ ብረቲን መክሴመ ጌሬንጌሩ አጉደኖ ብረቱ ዮሰ እቅ፤ ህትን ጎኔሰ ላገት በገዚሃ ጅገን መርታ ልግቡ ፋርሱተለከ ኬዕምኣ ጋርተ ሞጮጭሳ ላገተ አጉደኖ እቅ።
- 10 እሳንከ ግንጥ ዱብገ ከረኖ ዱቡ ዮሰ፤ ህትን ዱቢንከሰ መን ከርተን ኦንቱ አገን ኤለ ሞርታ ወልቀተ ዮሰ።
- 11 ሞሙንኩ ዮሰ፤ እሰ ጥዕላሽ በውያ መላይኪቹ፤ ሱዕሙሰ ዕብራይሰጥ አፎን አባደን ተ ግርክ አፎን አጸልዮን ይኖ።
- 12 ዋኔ አዬ ይኖ ኦርሸት ህንኤ፤ ከኒች ኤተሪሃ ዋላ ለሙ አዬ ይኖ ኦርሸት አሜታእ።
- 13 ለህቅ መላይኪቹ ጡሩምበ ቡሾ፤ መገን ብሬን ህጣን አጨሲሃ ወርቄን መክሴመ ጠረጴዝ ሾሎ ቡዲች ፋልታ ላገተ ሞጮጩም።
- 14 ት ላገት ጡሩምበ አፎ ለህቅ መላይኪቹ «ሎረ ኤፍራጢሰ ዛዘኖ ዋን ኡሱረንቶ ሾሎንከ መላይከተ ገፈር!» ይሰ።
- 15 ህከን ሳኣቱንለከ ህከን በሬን፤ ህከን አገኒሃለከ ከን ዘማኒሃ ቅጥይቶ ሾሎንከ መላይከት መን ዘርተ ሰቅሜሽ ሸቶተ ገፈረንቶኤ።
- 16 ፋሻንች ጎጎት ሞላንሹ ለሚ ጥቤ ሞሎላን እሁሰ ሞጮጩም።

8:7 ፋል. 9:23-35፤ ሕዝ. 38:22። 8:10 እሰ. 14:12። 8:11 ኤር. 9:15። 8:12 እሰ. 13:10፤ ሕዝ. 32:7፤ እዪ. 2:10፤ 3:15። 9:2 ከል. 19:28። * 9:3 ግንጠ ዩ- ዱብንከሰ ከርኖ መርዛሙ ዘቡዕላተ ዩሃን። 9:3 ፋል. 10:12-15። 9:4 ሕዝ. 9:4። 9:6 እዪ. 3:2፤ ኤር. 8:3። 9:7 እዪ. 2:4። 9:8 እዪ. 1:16። 9:9 እዪ. 2:5። † 9:11 እባደን- ዩ ኡዲምሳንቹ ዩሃን 9:13 ፋል. 30:1-3።

17 ህትን ፋርሱተለክ ፋርሶ አሌን ቆጾ መን መናማን ለዕዮሚሁ ህትጎታን፤ ዋዘናንከሰ ኦደኑ ብረቲን መክሰመ ጌሬንጌሩ አጉደኖ ገረ ፊምገ ቢሸ። ገንብለ። ሰማሃ አጉደኖለክ ቡርቱካን አጉደኖ እቅ፤ ህትን ፋርሶስ ቡሱዳ ዞቤ ቡሱሳ አጉደኖ፤ ህትን አፊችሰ ፋልታ ገረት ዉሊልፊትለክ ዲን ቱ ፋለኖ እቅ።

18 አፊችሰ ፋልታ ገረጎ። ዉሊሊንለክ ዲኒን ህከን ሰሶንከ በላን መን ዘሪ ሰቅሚሹ ሬዮ።

19 መሰንትስ ፋርሶስ ዋልቀት ዮኢሁ ኤፎንከሰለክ ዱብንከሳት እቅ፤ ዱቡሰ ዋርቹ አጉደኖ ቡዕላሙ እኩቤቹሃ መን ምርታኢሁ እሲንት እቅ።

20 ህከን በላን ሬቱዕነ ፈቆ መን ዘርት አንገሰ ሆጎች ፈንቀልት ቶቦቶበእ፤ ሩሃንዪችለክ ወርቁች። ብራች። ሩሲች። ክኒችለክ ሀቂች መክሴመረ ለኡ ህከረጎን ምጮጩ ህከረጎን ኦሮኡ አታልታበእ ሸርኬተ ሰገዱ አጉርቶበእ።

21 ህትን መን ሹሃ። ኪሉሃ። ዝነተለክ ሞጉ ቶቦት ፈንቀሉ ግቦኤ።

10

መላይኪቹለክ ቀዉ ሉህን ጣጠሞ መጻፈ

1 ህከኒች ኤተሮን ጎመተ ኦደዕዮ ዋሉ ሎሩ ወልቀት ዮሰ መላይኪቹ ሰሜች ድረን ለዕዮም፤ ቡዕላንከሰ ሰሚንዲቁት ሄኦ እቅ፤ ህትን ሚንሰ አሩለክ ሎከሰ ገረ ቱቀ አጉዳ እቅ።

2 ፈንተኦ ቀዉ ጣጠሞ መጻፈ አንጋንከሰ ኤፎ እቅ፤ መኬሰ ሎከተ ባር አሌን። ጉረሰ ሎከተ ኦላ አሌን ለዕዮ፤

3 ቡርቆኖ ዘቤገ ላገሰ ጎት አዕይ ዋጀ፤ ዋጀ ወክት ለመሉንኩ ጉገኛት ላገሰ ሞጮጭሶኤ።

4 ለመሉንኩ ጉገኛት ላገሰ ሞጮጭሶ ወክት ኢን ከተቦተ እኩም፤ ጠዉ እኩጎሬ «ለመሉንኩ ጉገኛት ጠወኦኢሃ አሸግ ምስጥርን ማጥ ኦፍ ቤሉ ከተቦት» ይታ ላገተ ሰሜች ሞጮጭሞ።

5 ህከኒች ኤተሮን ባራንለክ ኦላ አሌን ኡሬኢሃ ለዕዮም መላይኪቹ መኬሰ አንገተ ሰማ ዋሽ ኪሸ

6 ዘማሂሃ ጉዕሚሃ ሄኦኖ ሰማለክ እሰ ኣዜን ዮ ኡለተለክ እሴ ኣዜን ዮ ባረለክ እሰ ኣዜን ዮኢሃ ከለቆ መገን ሱዕሚን ጤሌዕለን «ከኒች ኤተሪሃ ዲንከኖበእ!

7 ጠዉ እኩጎሬ ለመልቅ መላይኪቹ ጡሩምበሰ ቡሸ ሞጮጭሰኖ በር ካዲማተሰ ነብያኖተ ተሸት ላገተ ኩሎሰገን መገን ምስጥሩ ዊመኖ» ይኦ።

8 ህከኒች ኤተሮን ምዕናሃ ሰሜች ሞጮጭሞ ላገት «ባር አሌንለክ ኦላ አሌን ኡሬ መላይኪቹ አንጋች ዮኢሃለክ ፈንተዕዮ ጣጠሞ መጻፈ መርት ኣኦ» ይ ለንኪሃ ጠወዕዮኤ።

9 ህከን አኩቤቹሃ መላይኪቹ መር «ቀዉ ጣጠሞ መጻፈ ኣሴኤ» ይ ጠዕሚሞረ «ኣእት እት፤ ኤፎንከክ መላብገ ጤኦኖ፤ ጠዉ እኩጎሬ ጎደባንከክ ቀራረኖሃ እሀኖ» ይኦ።

10 ህከ ቀዉ ጣጠሞ መጻፈ መላይኪቹ አንጋች ኣኦ እቻን አፊኤ ኣዜን መላብገ ጤዕዮኤ፤ ጠዉ እኩጎሬ እቅ ኬዕዮሚች ኤተሮን ጎደቡኤ ቀራረኖሃ እኩ።

11 ህከኒች ኤተሮን «ልግብያ መንተኒሃ። ኡመትተኒሃ። አደደ ላገተ ጠወኣ መንተኒሃለክ ምመተኒሃ ለንኪሃ ራገ ጠወኡ ሀሰሰኖሄ» የመም ኩለምኤ።

11

ለሞ ሞስክርተኒሃ

1 ህከኒች ኤተሮን ኤሳሃ ብኪሃ ደግለለኖ በርትገ ዮ መቱ ብኪኖ ቶመ ኣሰማኤ፤ ኤሳሃ «ኬኦ ዱእ ሞረለክ ክትመ ክትሚኖ ጠረጺዘ ብክ፤ ህከን ቤቾን ሰገዳኒረ ወለኦ፤

2 ለህን ምኒች አብል ኤዲን ዮ ባዲተ ብክቶት፤ ሁኩ ቤቹ አይሁደ እኩበኦ መኒሃ ኣሰሞሃ እኩቤቹሃ ብክቶት፤ አይሁደ እሀቡ መኑ ጠሊልቹተ ከተመ ሸይልኔ ለሙ አንገ ፈንቀላንታሴ፤

3 ኢ ለሙንኩ ሞስክሩ ጥጅ ኦድኑተ ኦደኦ መቱ ኩምተ ለም ጥብታ ሌሃሁ በር ራገ ኩልታገ ወልቀተ ኣሳጎሰ» ይኦ።

4 እሰ ኡላ ቀርቶ ብረን ኡርታ ለሙንኩ ወርቻ ሀቃከትለክ ለሙንኩ ኩረዘ አፋሺኖሃን፤

5 እዪሁ እሰተ ምዕርተ ሀሾ ጎሬ ገረት አፊችሰ ፋልት ባለጋረሰ ቡሰታኦ፤ ህትን እሰተ ምሮተ ሀሰኖሁ ጉዕሙንኩ ሬሀኖሁ ከን ሀለቲኒት።

6 እሰ ራገ ጠወኣ ህከ በር ሰሜች ጤኑ ኡበኖበእገ ሰማሃ ጡፎተ ወልቀት ዮሰ፤ ህትን ሞሃ ቂጉ ኦት ዶርቶተለክ ሰሚ ወክት ጉዕመ እኩሰ ሃሌን በለት ኡለተ ምቀርቶተ ወልቀት ዮሰ።

7 ሞስክርተኒሃ ሹልቶች ኤተሮን አበ ጥዕላሸ በዊች ፋለኖ ቡሳውቹ እሳን ኦለም ቂል ሸኖሰ።

፳ 9:17 ዲን፡- ግርክ ኤፎን ዲን ክኦ እክ ቡርቱካን ደኑ ዮሰ፤ ስሰን እበ ቡቡናሃለክ ሄሉ ቡቡና ፎገሉ ዮሰሃን። 9:20 መዘ. 115፡4-7፤ 135፡15-17፤ ዳን. 5፡23። 10:7 ፋል. 20፡11፤ ዘዳ. 32፡40፤ ዳን. 12፡7፤ አሞጽ 3፡7። 10:10 ዕዘ. 2፡8-33። 11:1 ሕዝ. 40፡3፤ ዘካ. 2፡1-2። 11:2 ሉቃ. 21፡24። 11:4 ዘካ. 4፡3፤ 11—14። 11:6 1 ሃገ. 17፡1፤ ፋል. 7፡17-19፤ 1 ሳሙ. 4፡8። 11:7 ዳን. 7፡7፤ 2፤ 1፤ መና. 13፡5-7፤ 17፡8።

8 ሬሽሰ ሎረ ከተም ዋቄ በላን ኡጄኖ፤ ሁኩ ከተሙ ሰደመ ህከረንገ ግብጸ ዬን ገኤኖ ከተሚሃ ሞሳሊተ፤ ሁኩቤቹንኩ እስ ቀርቼ ሰቀለሞሃቤቹ።

9 ህከኒቹ ኤተሮን በገኒቹ፣ ደቦቹ፣ ዘሬቹ፣ አደደ አፎ፣ ጠወአኖ መኒቹ፣ ባደቹ ጉዕሚቹ ልግቡ ኡመቱ ሞገምባገ ከንት ሰሱ ማህ ሙቶ በሬ ደርተ ሬሽሰ ለአእ፤ ሬሽሰ ሞገመኖበአገ ከንታኦ።

10 ሁኩ ለሙንኩ ነብያኑት አዲንያ አል መነ ኦርሰቤቹሃ አዲንያ አሌን ሄአኖ ሙኑ ነብያኑት ሬቶቤቹሃ አበ ሙንደአእ፤ ህትን ሙንዲኖ ከበጅት ከበጅት ገገጣንኩስ አሰቱተ አሰቀንታኦ።

11 ጠዉ እኩጎሬ ሰሱ በር ደሬን ህጎች ኤተሮን ሄአ ሩሁ መገኒቹ አሜቶ ሬሻን አጎ፤ ሎካንከስ ኡሪቶኡ፤ ለኦ ሙኑ አበ ዋጅቶኡ።

12 ህከኒቹ ኤተሮን ለሙንኩ ነብያኑት አሌ ፋሌ ይታ ሎረ ላገተ ሰሚቶ ሞጮጭቶኡ፤ ባለጋሩስ ለአን ጎማን ሰማ ዋልት መርቶኡ።

13 ህከ ወክትንከ ኡላ አሌን አቡ ሌንቄቄ እኩ፤ ከተሚቶስ ቶንቅ አፎሁ ድጅሞ፤ ኡላ ሌንቄቅ መሳን ለመሉ ሺህ ሙኑ ሬዮ፤ ሬሆቹ ፈቆአሩ አበ ዋጅቶኡ፤ ሰሚ መገኒሃ ሰገደኡ።

14 ለንክ «አዬ» ዬኖ ኦርሸት ህጎኡ፤ ህትን ሰቅ «አዬ» ዬኖ ኦርሸት ደዕልት አሜታኦ።

ለመልቅ ጡሩምብተኒሃ

15 ለመልቅ መላይኪቹ ጡሩምብስ ቡሾ ወክት «አዲንያ አል ሞምነቱ ቀርቻሃህ መሲህሃ እኩኡ፤ እሰን ዘሚኒሃ ሞመ እክ ጠዕቅቶንትቤቹሃ ገለትጭናንኪ» ይታ ሎርሎረ ላገት ሞጮጪንቶኡ።

16 መገን ብሬን ኬዕምኣ ቦርጭማን አፋዕልቶ ለሞድምኔ ሾልንት ባልቀት ሚኒነተሰ ሙግይት መገኒሃ ሰገደኡ፤

17 «ዮንቲሁ፣ ሄአንቲሁ፤
ጉዕመንከ አታልታንት ቀርቾ መገኛ!
ሎረ ወልቀክ ገይኪሃ አቶንትቤቹሃለክ
ሞመ እክ ጠዕቅቶንትቤቹሃ ገለትጭናንኪ።

18 አይሁደ እኩበእ ሙኑ ኡሙዕርቶኡ፤
ጠዉ እኩጎሬ ኪ ኡሙዕርት አሜቶኡ፤
ህትን ሬቶ መን አሌን ፈረዳንት ወክቱ ኢልዮኡ፤

ካዲማተክ ነብያኖተለከ
ጠሊላኖተ ሱዕመክ ሎርሰታሁኡተ፣
ቀቀዋኖተለከ ሎርሎራኖተ፣
ሞገስ አታንትሰ ወክቱ ኢልዮኡ

አዲንያ አል ቤሪሪ ቤሳንት ወክቱ ኢልዮኡ» ይቶኡ።

19 ህከኒቹ ኤተሮን ሰማን ዮ መገን ሞኑ ፈንተዕያን ወአድ ሳጥኑ መገን ሞኔን ለሌአ፤ ህትን በለቁ፣ ላገቲ፣ ጉገኛት፣ ኡላ ሌንቄቁለከ አበ በረደሃ እኩ።

12

መንቸለክ ደህቹተኒሃ

1 ህከኒቹ ኤተሮን አበ አጀብሲሳ መላት ሰማን ለልቶኡ፤ ሁኩንን መት መንቸት አሩ ኦደኦኢት አገንቹ ሎካቻሴ ዋሮ አዲን ዮኢት ቶን ለሞ ቤዜ አክሊላ ቡዕላንከሴ አቶኢት ሄኦ እቅ።

2 እሰን ላፈተ እኩቤቹሃ ኒጠኛት አፋንሴ ጨነቀንት ያርታኢት እቅ።

3 ህትን ሞልት መላት ሰማን ለሊቶኡ፤ እሰን ለመሉ ቡዕሉለከ ቶኑ ቡዱ ቡዕላንከሰ ለመሉ አክሊላ ዮ ሎሩ ቢሾ ደህቹ ለሌኦ።

4 ደህቹስ ዱብንከሰ ቤዜ ሰቅሚሽ ሰሚቶ ሆጣው ኡላን ኡጄአ፤ እሰን ህት ኒጣ መንቸት አልቶ ወክት ጨልሴ አጉዕም ከሞተ አልቶተ እኩ መንቸ ብሬን ኡሬኦ።

5 እሴን ኡመት ጉዕመንከ ብሬት በርቲን አዘኻዮ ጠቀኖ ለባ ጨል አልቶኡ፤ እኩጎሬ ቤቱሴ መገን ቤቹ ሁኩን ሙንት ህትን ኬዕምኣ ቦርጭመ ቤቹ ቀቡል አኢን መሴመሰ።

6 ህት መንቸንት መቱ ኩምተ፣ ለሞ ጥብተለከ ለሃሳው በር ክድማተ መገኑ ቅጥ አዕዮሴቤቹ ኡላ ኡድመ ሁንቶኡ።

7 ህከኒቹ ኤተሮን ሰማን በገዙ ኬዕዮ፤ ሞካኤሊለከ እሰ መላይከት ደህቹን ኦላንቶኡ፤ ደህቹለከ መላይከት ፈንቀልት ሞካኤሊንለከ መላይካን ኦላንቶኡ።

8 ጠዉ እኩጎሬ ደህቹለከ እሰ መላይከት ቄለንቶኡ፤ ቄለንቶቹ ኤተሮን እሰ ሰማን ሄአበአገ ቤቹ ሆሮ ደገሞሰበኡ።

11:8 ኢሳ. 1:9-10። 11:11 ሕዝ. 37:10። 11:12 2 ነገ. 2:11። 11:13 መና. 6:12፤ 16:18። 11:15 ፋል. 15:18፤ ዳገ. 2:44፤ 7:14-27። 11:18 መዝ. 2:5፤ 110:5፤ 115:13። 11:19 መና. 8:5፤ 16:18፤ 21። 12:3 ዳገ. 7:7። 12:4 ዳገ. 8:10። 12:5 ኢሳ. 66:7፤ መዝ. 2:9። 12:7 ዳገ. 10:13-21፤ 12:1፤ ይሁደ 9።

9 ህክ ሎረ ደህቹ ዋሮ ዋሺን ቶሪመ፤ እስን መነ ጉዕመንከ ሉሲሰኖ አልቢሲ ህከረንገ ሺይጣነ ዬን ገኤኖ ወዕኔሃ ዋሮቹ፤ እሱ ኡለተ ዋሺን ቶሪመ፤ እስ መላይከንተ እሲን ሚጡቡ ቶሪመ።

10 ህከኒች ኤተሮን መቱ ሎረ ላገት ሰማን «ቱህ መገኑ ገይሰ ጡምሱሱ፤ ዋልቀሰለክ ዋምነቱሰ ለሊሾኡ፤ እስ መሲህ ሹምነቱሰ ለሊሾኡ፤ እመኔኡሱተ መገንጌ ብሬን ሀንከዕርተለክ በራሃ ብተንሰን ሃዕዮ አመኔኡሶ ከሳሹ ቶሪምኡ።

11 እስ ሆልቶ ቄገንለክ ጠወኑ ምሰክር ላገን እሱ ቄልቶኡ፤ ነብሴሃስ አሙዙዕስ ገዉስ ሬሆተ ህግሰ እቶኡ።

12 ህካን እኩቤቹሃ ሰሞለክ ሰሚ ኣዚን ሄኔነንተሩ ጉዕመንኩ ተሸ የንክዕኔ፤ ቀዉ ወክቱ ፈቆሰገ ደጎቤቹሃ አልቢሱ ሎረ ኡሙዕሬን ክዕኔቤቹ ድሬቤቹሃ ኡለትለክ ባሩ ቆህኖህዕኔ። ይተን ሞጭጭም።

13 ሁኩ ደህቹ ኡላን ኡጃመሰገ ለዕዮ ወክት ለገ ጩል አልቶ መንቹተ ሸሩ ጀመር።

14 መንቹት ኡላ ኡድማን ቅጥ አኤመሴቤቹ ብር ይት መርቶተ ሎረ ኖብር ጎንተ ኡኑደኖ ለምት ጎንት ኣሰንቶሴ፤ ህከኒን ዋሮች ብሬች ቄዕርት ስሱ ዘማን ደሬን * ጡመገ ኣኡን ካደሚን ኣገሬኖሴ እቅ።

15 ህት መንቹት ድርሱ መሰኖሰገ ዋሮቹ ኣበ ዛዘኖ ዊ ጌሰ ዋሃ ኣፈችሰ ኤተርንከሴ ቱሮ።

16 ጠዉ እኩጎሬ ኡለት መንቹተ ህዕልት ኣፎሴ ፈንት ደህቹ ኣፈችሰ ቱሮሃ ኣበ ዛዘኖ ዋሃ ኣጎኡ።

17 ህከኒች ኤተሮን ደህቹ መንቹን ኡሙዕር ፈቆ እሴ ዘሬን ኣለሞተ ኦርዕዮ፤ እስን መገን ትዛዘ አገርታሁኡንለክ ኢሲሃ ኣመዕነንት መሰክርታእረ።

18 ደህቹንኩ ባር ገበላን ሸፋር ኣሌን ኡሬኡ።

13

ለሞ ቡሳውተኔሃ

1 ህከኒች ኤተሮን መቱ ቡሳውቹ ባሪች ፋላን ለዕዮም፤ እሲንክ ቶኑ ቡዳሊክ ለመሉ ቡዕሉ ሃዕዮሰ እቅ፤ ቡዳንከሰ ቶኑ ኣክሊሉ ሃዕዮሰ እቅ፤ ቡዕላንከሰ መገኑ ቦርርታ ቦርር ሱዕሙ ሃዕዮ እቅ።

2 ለዕዮም ቡሳውቹ ሰማን ኣኑደኖ እቅ፤ ጠዉ እኩጎሬ ሎከሰ ድብ ዬኖ ቡሳውቹ ሎከተ ኣፎሰ ዘቤ ኣፎ ኣኑደኖ እቅ፤ ህትን ደህቹ ገይሰ ወልቀተለክ ገይሰ ኬዕምኝ ቦርጭመተ ሎረ ወልቀተ ህከን ቡሳዊቹሃ ኣሴሰ።

3 ቡሳውቹ ቡዕልቹ መቱሰ ሬሆታ ኢልሰኖ ጡሎ ሄኔሰ ለዕዮም፤ ጠዉ እኩጎሬ ሁኩ ሬሆተ ኣበቀኣኖሰ ጡሎ ፈይሃን ኣዳንያ ኣሌን ዮ መኑ ጉዕመንኩ ኣጀብሰጭ ቡሳውቹ ኣዎቹ።

4 ደህቹ ቡሳውቹሃ ዋልቀሰ ኣሴቤቹሃ መኑ ጉዕመንኩ ደህቹሃ ሰገጀ፤ ህትን «ቡሳውቹ ኣኑደኖሁ እዬት? ህትን እሲንን ኣለሞተ ኣታለኖ ኣዬት?» ይተን ቡሳውቹሃ ሰገደኡ።

5 መገን ኣሌን ቦንለክ ቦርረኖ ላገተ ጠወኣኖ ኣፎሃ ቡሳውቹሃ ኣሴመሰ፤ ሸይልኔ ለሙ ኣገነ ገዘእይ ጠቆተ ዋልቀተ ኣሴመሰ።

6 መገኑ፤ ሱዕመሰለክ ሰማን ሄኣእረ መገኑ እሰ ኣዚን ሄኣ መነ ቦርሩ ጀመር።

7 እስን ጠሊላኖን ኣለሞተለክ ድለ ኣዕይ ቁለኖገ ሹምነቱ ኣሰሞሰ፤ ህትን ወገኒን፤ ደቦን፤ እደደ እፎን ጠወኣእረለክ ኤመት ኣሌን ጉዕማንን ሹምነቱ ኣሰሞሰ።

8 ዳንዮ ኣሉ ክለቀሞች ጀመር ቡዕሙሰ ጎረጠሞ ሆልቶ ሄኣ መጻፋን ክተበምባሁ ዳንዮ ኣሌን ሄኣኖ መኑ ጉዕመንኩ ቡሳዊሃ ሰገደኡ።

9 መጨት ዮሴሁ ዮ ጎሬ ሞጭጭን!

10 «አዪሁ ኣገ መሰኖሁ ዮጎር ኣገሞ ኦርኣኖ፤ ኣዪሁ ሲፊን ሬሆተ መደበሞሁ ሲፊን ሬሆኖ» ህትን ጠሊላኖ ኣታዕሉለክ ኣመዕነቱ ለሊኖህ ህከ ወክትዪት።

11 ዋሉ ቡሳውቹ ኡላች ፋላን ለዕዮም፤ እሲንክ ሆለ ቡድገ ዮ ለሙ ቡዱ ዮሰ፤ ጠወኣኖሁ ደህቹጋት እቅ።

12 ወዕኔ ቡሳውቹ ቤቹን እሰ ሹምነቱን ኣኣኖ እቅ፤ ዳንዮ ኣሉለክ እሴ ኣሌን ሄኣእሩ ጉዕመንኩ ወዕኔ ቡሳውቹሃ ሰገደገ ኣዕዮ፤ ሁኩ ቡሳውቹ ወዕኔ ሬሆተ ኣበቀኣኖ ጡሎ ፈዬሰ ወዕኔሃ ቡሳውቹ።

13 ጠዉ እኩጎሬ ለምቅ ቡሰውቹ መን ብሬን ጌረተ ሰሚች ኡለተ ድርሰኖ ኢለ ሎርሎረ ኣጀብሲሰኖርቹ ኣኣኖ እቅ።

14 ዋዕኔ ቡሳውቹ ብሬን ኣኣተ ኣሰሞሰ ኣጀብሲሰኖርቹ መሳን ዳንዮ ኣሌን ሄኣ መነ ሉሲሰኖ እቅ፤ ሲፊን ጡላይ ፈዬ ቡሳውቹሃ ኬዕምኝ ምሰሊሃ መክሶተ ዳንዮ ኣሌን ሄኣኖ መኒሃ ለንክ ቡሳውቹ ኣዘዣሰ።

15 ለንክ ቡሳውቹ ወዕኔ ቡሳውቹሃ ምሰሊሃ ሄኣ ሩህ ኣሰተ ሹምነቱ ኣሰሞሰ፤ ሄኣ ሩህ ኣሰተ ሹምነቱ ኣሰሞሰንኩ ምሰሉ ጠወኑተ ኣታሎታትለክ ኣሲሃ ሰገድቡሩ ጉዕመንኩ ሬታገ ኣኣኖ እቅ።

12:9 ክል. 3፣1፤ ሉቃ. 10፣18። 12:10 እዩ. 1፣9-11፤ ዘካ. 3፣1። * 12:14 ዘማን ደሬን፣ ዮሴጉርካን ወክቱ፣ ወክትለክ ወክት ደርተ ዮኖ፤ ሁከንን ዳን. 7፣25፤ 12፣7 ከተበምኡ። 12:14 ዳን. 7፣25፤ 12፣7። 13:1 ዳን. 7፣3፤ መና. 17፣3፤ 7፣12። 13:2 ዳን. 7፣4-6። 13:6 ዳን. 7፣8፤ 25፤ 11፣36። 13:7 ዳን. 7፣21። 13:8 መዘ. 69፣28። 13:10 ኤር. 15፣2፤ 43፣11።

- 16 ለንክ ቡሳውቹ ቀቀዋኑተ እኮኤ ሎርሎራኑተ፣ ቀባጣመተ እኮኤ ቡጥቻኑተ፣ ርሰቹ እኮ ሰዋልድቹ፣ ጉዕመንኩ መኪሰ እንጋን ህከረንገ ሚኒሰ አሌን መላተ አቶተ ግድሾሰ።
- 17 ከን ሃሌን ቡሳውቹ ሱዕመ ለሊሰኖ መላት ህከረንገ ሱዕመ፣ ዋልንሹ ዮበአሁ ሀኩ መንቹሁ ሀዕርተለክ ሀርታ አታለኖበአ።
- 18 ቱሀ ሀይመት ዮኢሁ ከንቡቾንት፤ ቀልቡ ዮሲሁ ቡሳውቹ ዋልንሹ ዋሉኑ፤ ሀኩ ዋልንሹ መን ዋልንሹ ለሊሰኖ፤ ዋልንሹሰ ለህ ጥብታ ሌሃይኔ ለሁሃን።

14

ሆልቻለክ መት ጥብተ ሸይልኔ ሾሌ ኩሜ መንጉኔሃ

- 1 ህከኒቹ ኤተርን ሆልቹ ጸዮን ቆተ አሌን ኡራኢሃ ለዕዮም፤ እሲን ሜጡብ እሰ ሱዕመ-ለክ እንሰ ሱዕመ-ሚኒሰ አሌን ከተባዎ መት ጥብተ ሸይልኔ ሾሌ ኩሜ መኑ ሂኔ አቅ።
- 2 ሰሜቹ አበ ፋም ዊ ላገለለክ አበ ጉገኛ ላገገ ዮ አበ ላገተ ሞጮጩም፤ ሞጮጩም ላገት ክራረ ዋቀርታ ክራረ ላገተ አጉደኖሃ አቅ።
- 3 ኬዕምኛ ቦርጭማንለክ ሾሎንክ ክልቀት ባለቀ ብረን መት ጥብተ ሸይልኔ ሾሌ ኩሜ መኑ ሃዕር መዝመረ ዘመርቶኤ፤ ህከ መዝመረ ኡለ አሌን ዋዜመሰ መት ጥብተ ሸይልኔ ሾሌ ኩሜ መን ቤሉ አዪሁ ደጎተ አታለኖበአ።
- 4 እሲን አላንቶኢቹ ዝነተ አት አገኝትበረ እኮቤቹሃ ሜንቲን ዝነተ አኤ ሆግንከሰ ንጃሶበአ፤ ሆልቹ መርቤቹሃ ጉዕመንከ እዋንታኤ፤ እሰ መንገሃለክ ሆልቹሃ * መን በሊቹ ሀንገፈ አክ ዋዘንቶአረ።
- 5 እሰ ክዙብ ጠወኣበኤ፤ ሂሉ ኩሎኖሰርቹንኩ ዮሰበኤ።

መገን ፍርደ ኩልታ ሰሰ መላይክትኔሃ

- 6 ህከኒቹ ኤተርን ዋሉ መላይኬቹ ኣዲንያ አሌን ሂኣኖ ኡመቲሃ፣ ደቦተ፣ ባዲሃ፣ አደደ አፎ ጠወኣ መንገሃለክ ወገኒሃ ጉዕሚንከ ዱዱብሲሃ ዘላለሚሃ ሄኣ ተሸተ ላገተ ኩሎተ ሰሜ በላን ብርዮን ለዕዮም።
- 7 እሲን ሎረ ላጋን «መገኑ ዋጅዬ! ከበጅዬሰ! መሰንትሰ እሰ ፈረደኖ ወክቱ ኢሌቤቹሃ ሰማንለክ ኡለተ፣ ባረለክ ዊ ቡቁተ ከለቆ መገንገሃ ሰገጃ!» ዬአ።
- 8 ዋሉ ለምቅ መላይኬቹ «ሰከርሰኖ ዝነሴ ዋይን ጠጀ ኡመቲሃ ጉዕሚንከ አግሶ ህት ሎረት ባብሎንቹት ኡቦኤ! ኡቦኤ!» ዮን ወዕኔሰ መላይኬቹ አዋቻሰ።
- 9 ዋሉ ሰቅ መላይኬቹ ሎረ ላጋን «ቡሳውቹሃለክ ምሰሊሃ ሰገዳእሩ፣ መላሰ ሚኒንከሰ ህከረንገ እንጋንከሰ አታሩ ጉዕመንኩ»
- 10 መገን ኡመዕሬ ወይን ጠጀ አጋኤ፤ ሀኩ ወይን ጠጀ ልቃለቀመዕናን ኡመዕሬሰ ጠበቱን እንክለሞሃን፤ ህትን ጠሊላ መላይክ ብረንለክ ሆልቹ ብረን ገራንለክ ዲን ዬኖ ፍሚን ኦርጨቀንታኤ።
- 11 እሰተ ኦርጨቀንታገ አታ ገራቹ ፋልታ ዉሊልት ዘላለሚሃ አሌ ሰማ ዋልት ፋልታኤ፤ ህከን ቡሳውቹሃለክ እሰ ምሰሊሃ ሰገዳእሩ ሱዕምሰ መላተ አቶሩ ጉዕመንኩ ህንከዕርተለክ በራሃ ፎሎጩ ዮሰበኤ። ዮን አዋቻሰ።
- 12 መገን ትዛዝ አገርታህኡኣንለክ ኢሳን እመዕንት ጠረኝት ሄኣ ጠሊላኖ አታዕሉ ለለኖህ ከኒንት።
- 13 ሰሜቹን «ካን ከተብ፤ ከኒቹ ኤተርን ቀርቹ እመዕንት ሬታእሩ ማሰእንቶአረ» ይታ ላገተ ሞጮጩም፤ ህትን ጠሊሉ ኣያኑ «ሆጎሰ ሆንጌቹ ፎሎጭቶተ ሆጉሰ አዋንታሰቤቹሃ እሰ ህንቅንከ ማሰእንቶአረ» ዮኖ።

ቀርቹ ኡመዕርት ኣዲንያ አሌን

- 14 ህከኒቹ ኤተርን ዋጅተ ጎመተ ለዕዮም፤ ጎመሰ አሌን መንቹ ቤቱ አጉደኖህ አፋዕልዮኡ፤ ቡዕላንከሰ ወርቅ እክሊላ አዕዮኡ፤ እንጋንከሰ እጻሸተ ዘዘረተ አፎኤ።
- 15 ዋሉ መላይኬቹ መገን ምኒቹ እሚቹ ጎመ አሌን አፋዕሌኢሃ ሎረ ላጋን «ኡለ አሌን አዝመረ ጭም አኤኖለክ ምዴኖ ወክቱ ሆንጠኮኡ!» ዬአ።
- 16 ጎመ አሌን አፋዕሌኢህ ዘዘረሰ ኡለተ ሶካን ኡለንት ምደንቶኤ።
- 17 ዋሉ መላይኬቹ ሰማን ዮ መገን ምኒቹ ፋሎ፤ እሰን እጻሸተ ዘዘረተ አፎ አቅ።
- 18 ገረ አሌን ዋልቀት ዮሲሁ ዋሉ መላይኬቹ ክትመ ክትሚኖ ጠረጴዝ መዲቹ ፋል እጻሸተ ዘዘረተ አፎ መላይኬቹ «ወይኑ ላሎቤቹሃ እጻሸተ ዘዘረክ ሶክ ወይን ላልቹ ጉዕመንከ ኡለ አሊቹ ምድ ጭም አእ!» ይ ሎረ ላጋን ያር።

14:1 ሕዝ. 9፣4፤ መኖ. 7፣3። * 14:4 ሆልቹሃ- የኖሁ እሰ የሃን። 14:5 ሰ. 3፣13። 14:8 እሰ. 21፣9፤ ኤር. 51፣8፤ መኖ. 18፣2። 14:10 እሰ. 51፣17፤ ከል. 19፣24፤ ሕዝ. 38፣22። 14:11 እሰ. 34፣10። 14:14 ዲን. 7፣13። 14:15 ኢዪ. 3፣13።

19 መላይኬቹንገኑ ዘዘረሰ ኦሊ አል ሶክ ኦሊ አሌን ዮ ወይን ላልቸ ምጅ ዋይን ጨንሼኖ ሎረ ቤቸን ምር፤ ሁኩንን መገን ኡሙዕርያቤቹ።
 20 ከተሟች አብሌን ዮ ወይን ጨንሼኖቤቸን ጨንሸሞ፤ ጨንሼኖቤቸች ፋርሶ ብጣለ ኢሊኖ ጌሰ አሌ ዋል ሰሴ ጥቤ ኪሎ ሜትረ † ኢሊ ኢሊኖ ቄጉ ፋል ዲንተዕዮ።

15

መጨረሻ በለት አፎ መላይከተ

1 ዋሎ አጅብሲስኖ መላተ ሰማን ለዕዮም፤ ሁኩንን መገን ኡሙዕርት ጎፋ መጨረሻ ለመለ በለተ አፎ ለመለ መላይከተ ለዕዮም።
 2 ህከኒች ኤተሮን ጊራን ልቀለቀሞ ለአቃንች ባረ አኑደኖሃ ለዕዮም፤ ህትን ቡሳውችለክ ቡሳውች ምሰለ፤ ሱዕምሰ ዋሊንሽ መላተ ድለ አቶረ ለዕዮም፤ መገኑ ኣሴስ ክራረ አፎ ህከን ቡርጨቅ ባር መዳን ኡርቶአሃ ለዕዮም።
 3 እሰን መገን ካድንቸ ሙሰ መዝሙራለክ ሆልች መዝሙራ «ጉዕመንክ አታልታንት ቀርቸ መገና! ሆጉክ ሎረተለክ አጅብሲሳአታን፤ ጉዕማንክ ኡመት ዋመ! * ዋቆክ ጌጥዬሃለክ ሀንቅሃን።»
 4 ቀርቸ! ኪሳሃ ዋጅባሁለክ ሱዕመክ ከበጅባሁ አዬት? መሰንትሰ ጠሊሉ ጠለዕል አቴት፤ ሀንቅ ፍርዲክ ለሊቤቸሃ ኡመቱ ጉዕሙንኩ አሜች ብሬንከክ ሰገዳእ» ይተን ዘመርታ አቅ።
 5 ህከኒች ኤተሮን ምሰክር ዲካኑ ሁኩንን መገን ምኑ ሰማን ፈንተዕያን ለዕዮም።
 6 ህከ ለመለንከ በለተ አፎ ለመሉንኩ መላይከት መገን ምኒች ፋልቶኤ፤ ነጠተ በለቃ ዋጂተ ኦድኑተ ኦድኦ እቅ፤ ወዘነሰ ዋርቅ ቀበቶን ቆዕርቶ እቅ።
 7 ሾሎንከ ክልቀተች መቱ ለመለንከ መላይኬቸሃ ዘላላሚች ዘላላመ ኢላ ሃላኖ መገን ኡሙዕርት ዊንቶ ለመለ ዋርቅ ጠበትተ ኣሴሰ።
 8 መገን ኪዕምኒችለክ ዋልቃች ፋልታ ወሊልት ዲእ ምኒ ዊሞ፤ ሁኩ ለመሉንኩ መላይከት አፎ ለመሉንኩ በለት አሆተ ኢላ አዪሁ ዲእ ምኒ ኣጎተ አታሎበእ።

16

መገን ኡሙዕራተኔሃ

1 ህከኒች ኤተሮን ለመለንከ መላይከተ «መሬ! መገን ኡሙዕርተ ዊንቶ ለመለንከ ጠበቲሃ ኡላ አሌን ዲኔ» ይታ ሎረት ላገተ መገን ምኒች ፋልተን ሞጮጮም።
 2 ዋዕኔስ መላይኬቹ መር ጠበቲሃ ኡላ አሌን ዲኔ፤ ቡሳውች መላት ዮሰህኑኡንለክ ቡሳውች ምሰሊሃ ሰገዳ መን አሌን ሂሉለክ አበ ጥቸ ጨነቀኖ ጡሎ ፋሎ።
 3 ለንክ መላይኬቹ ጠበቲሃ ባር አሌን ዲኔ፤ ህከ ወክት ባሩንኩ ሬዮ መን ቄግገ እኩ፤ ህትን ባር አዘን ሃላኖ ፎሉ ዮሰርቸ ጉዕሙንኩ ሬዮ።
 4 ሰቅ መላይኬቹ ጠበቲሃ ዛዘኖ ዋንለክ ዊ ቡቆን ዲኛን እሰን ቄጉ እኩኡ።
 5 ዊ አሌን ዋልቀት ዮሰ መላይኬቹ «ዮንቲሁለክ ሃኦንት ጠሊሉ! ህት ፈረደንትቤቸሃ አት ፈየሃን።»
 6 መኑ ጠሊላኖለክ ነብያከ ቄጉ ዲንቶቤቸሃ አሳሃ ቄጉ አገሶንትሰ፤ ሁኩንን አሳሃ ሀሰሰኖሰ» ዮን ሞጮጮም።
 7 ህትን ህጣን ሀጨሴኖ ጠረጴክ «ኤ! ጉዕመንክ አታልታንት ቀርቸ መገና! ፍርዲክ ህንቅሃለክ ፈየሃን» ይታ ላገተ ሞጮጮም።
 8 ህከኒች ኤተሮን ሾልቅ መላይኬቹ ጠበቲሃ አር አሌን ዲኔ፤ አሪቸንት መን ፋራንተሴ ቡሰቶተ ዋልቀት ኣሰንቶሴ።
 9 መኑንኩ እበ ፋራን ቡቡኤ፤ ህከን በለ አሌን ሹምንቱ ዮሰ መገን ሱዕመ ቦርርቶኤ፤ ህትን ቶበቶበእ፤ አሰንከ ከበጅቶሰበእ።

† 14:20 ሰሴ ጥቤ ኪሎ ሜትረ- የሩህ መቱ መገንቹ ሌሁ በር ሃመኖ ዋቄ ጌሰ እሀኖሃን። 14:20 አሳ. 63፣3፤ ሻከ. 1፣15፤ ማር. 19፣15። * 15:3 ኢመት ዋሙ- መት.መቱ እንክለንቶፋ «ዘማናክ ዋሙ» ይታ። 15:3 ፋል. 15፣1። 15:4 ኤር. 10፣7፤ መዝ. 86፣9። 15:5 ፋል. 38፣21። 15:8 ፋል. 40፣34፤ 1 ሃገ. 8፣10-11፤ 2 ዲዲ. 5፣13-14፤ እሳ. 6፣4። 16:2 ፋል. 9፣10።

10 ኢንትቅ መላይኪቹ ጠበቅ፣ ሱሳውኛ ኪዕምኛ ቦርጭም አሌን ዲቶ፤ ቡሳውኛ ዎምነቲንኩ ቱንሰቹ እኮ፤ መንገኩ እበ ኦርጨቅንቶቤቹን እንኩሰ ኢጦኤ።

11 እሰን እበ ኦርጨቅንቶቤቹንላከ ጡላይቶቤቹን ሰሜ መገኑ ቦርርቶ ቤሉ ሂለ ሆንኛሰ ቶበት ፈንቀልቶበኤ።

12 ለሀቅ መላይኪቹ ጠበቅ፣ ሌፍራጤስ ዬኖ ሎረ ዛዘኖ ዋን ዲቶ፤ ዉሁ ሸርቂቶ አሚታ ዎማተ ወቃሃ መክሲሃ ዛዘኖ ውሁ ሞሎ።

13 ሀትን ደሀቶ አፊኛለከ ቡሳውኛ አፊኛ፣ ክዘበኛ ነብዬኛ አፊኛ ጎኛዕኜተ አኩዳ ሰሱ ሂሉ እያኑ ፉላን ለዕዮም።

14 እሰን ሩሃንይ እያን እኮቤቹን እጀብሲሰኖ ጠወ አተን ጉዕመንከ አታለኖ መገን ሎረ በሬን እሀኖ በገዚሃ ጭምአቶተ ጉዕማንከ ባድ ዎመቤቹ መርታኤ።

15 «እን ሞጋንኛገ ድንገቱ አሚታም፤ ሀካን እኮቤቹን ከል አካን መኑ ሻይደሰ ለዕበገ ኬዕይ ኦድኑሰ አገሪኖ መንቹ ማሰአሞእን።»

16 ሁኩ እያንገት ዎመተ አብራዌ መን አፎን አርማጌዶን ዬኖቤቻን ጭምአቶኤ።

17 ሀከኒኛ ኤተሮን ለመልቅ መላይኪቹ ጠበቅ፣ ቦብር አሌን ዲቶ፤ ሀከ ወክት ዲአ ሞኒ ኣዚን ዮ ዳኝነት ቦርጭማኛ «አበቀዕዮ» ይታ ሎረ ላገት ፋልቶኤ።

18 ሀትን በለቁ፣ ላገት፣ ጉገኛትለከ ኡለ ሌንቁቁሁ እኮ፤ ሀትኔ ሎሩ ኡለ ሌንቁቁ መኑ ኣዲንያ አሌን ከለቀሞሀኒኛ ኪሸ ሆሮ እክ አገኘኖበኤ።

19 ሀትን ሎረ ከተንቹት ሰሱ ቤቹ እክ ቤሀንቶኤ፤ ሀትን ኡመት ከተመንት ድጀንቶኤ፤ መገኑ ሎረ ባብሎን ቃጎ፤ ሎሩ አሙዕሪሰ ዎይን ጠጁ ዋሞ ጠበትተ አገገ አዕዮሴ።

20 ሀትን ዋን ረበንቶ ኡለት ጉዕመንት በኦኤ፤ ቆተንት ደገንቶበኤ።

21 ሀትን መት-መቱሰ በሽልኔ ኦንቴ ኪሎ ጌሰ ሀኖ በረዱ ሰሜኛ መን አሌን ኡቦ፤ በለሰ አበ ጨነቃቤቹን መኑ በረድ ብለ መሳን መገኑ ቦርርቶኤ።

17

ዝነተ አታ መንኛተኔሃ

1 ሀከኒኛ ኤተሮን ለመልንተ ጠበትተ አፎ ለመለ መላይካኛ መቱሰ ኢቤቹ አሚኛ «ከበ አም! ልግቤ ዋ አሌን አፋዕልቶ ሎረ ዝነተ አታ መንኛ አሌን ኢላኖ ፍርደ ለሊሳንኩ።

2 ኣዲንያ አል ዎመት ዝነተ አቶአሁ እሴኒት፤ ሀትን ኣዲንያ አሌን ሄአአሩ ዝነተ አእሴ ዎይን ጠጂን ሰከርቶኤ» ይ ኩሎኤ።

3 ሀከኒኛ ኤተሮን መላይኪቹ እያንን ኡለ ኡድመ መሴኤ፤ ዋሙ ጅሰንግከሰ ቦርር ሱዕሙ ዋሞ ቢሽ ቡሳውኛ አሌን ቆጶ መት መንኛተ ለዕዮም፤ እሴንከ ለመሉ ቡዕሉለከ ግን ቡዱ ዮሰዮ አቅ።

4 ሀት መንኛት ሰሙ አኩደኖ ብሽ ኦድኑተ ኦድኔ አቅ፤ ወርቁኛ፤ ጤኦተ እኮ ክነንለከ ዕንቁኤን መክጨንቶ አቅ፤ እንጋንከሴ ኮፍ ይታ ዝነተ አታ ንጆሱ ዋሞሰ ዎርቅ ጠበቅ፣ እንጋንከሴ አፎ አቅ።

5 ሚኔሴ አሌን ሞሰጥር ዮኖ ሱዕሙ «ዝነተ አታሁኡለከ ኡለተ ንጆሰሳሁኡ አመተ ሎረተ ባብሎንቹተ» የመም ከተበሞኤ።

6 ሀት መንኛት ጠለላኖ ቁገንለከ ኢሰተኔሃ ይት ሬቶ መን ቁገን ሰከርታን ለዕዮም ወክት አበ አጀብሲጩም።

7 ጠወ እኮጎሬ መላይኪቹ «ሚሃት እጀብሲጭታንተሁ? መንኛ ሞሰጠርለከ እሴ ቆጶ ለመሉ ቡዕሉለከ ቶኑ ቡዱ ዮሰ ቡሳውኛ ሞሰጥር ለሊሳንኩ።

8 ሁኩ አት ለኦንት ቡሳውኛ ከኒኛ ብርተ ሄዕዮ አቅ፤ ቴሱ ዮበክ፤ ኤተሮን ጥዕላሸ በው ኣዚኛ ፋለኖ፤ በአቤቹ መረኖ፤ ኣዲንያ አል ክልቀቲኛ ጀመር ሱዕሙሰ ሂኤ መጻፋን ከተበንትባሁ ኣዲንያ አሌን ሄአኖ መኑ ቡሳውኛሰ ከኒኛ ብርተ ሄዕዮሁ፣ ቴሱንገ ዮበኢሃለከ ኤተሮን አሚተኖሃ እሁሰ ለኦ ወክት አበ አጀብሲጭቶኤ።

9 «ሀይመት ዮ ቡዕላ ሀሴኖሁ ከንቤኛኒት፤ ለመሉንኩ ቡዕሉለከ መንኛት አፋዕልቶ ለመሊንተ ቆተ፤ እሰን ለመሊንተ ዎመ።

10 አሳኛን ኦንቱሰ ኡቦኤ፤ መቱሰ ቴሱ ዮኤ፤ ሀትን ዎሉሰ ቴሱ ኢላ አሚኛበኤ፤ እሰ አሚተኖ ወክት ቀዉ ጌሰ ዲንኩ ሀሰሰኖሰ።

11 ሁኩ ከኒኛ ብርተ ዮኢሁለከ ቴሱ ዮበክ ቡሳውኛ ሀዜትቅዮ ዎመ፤ እሰ ሀከን ለመሊኛን መቶሃሰ፤ እሰን በአቤቹ መረኖ።

16:15 ማቶ. 24:43-44፤ ሉቃ. 12:30-40፤ መና. 3:3። 16:16 2 ገገ. 23:29፤ ዘካ. 12:11። 16:18 መና. 8:5፤ 11:13፤ 19። 16:19 አላ. 51:17። 16:20 መና. 6:14። 16:21 ፋል. 9:23፤ መና. 11:19። 17:1 ኤር. 51:13። 17:2 አላ. 23:17፤ ኤር. 51:7። 17:3 መና. 13:1። 17:4 ኤር. 51:7። 17:8 ዳን. 7:7፤ መና. 11:7፤ መዘ. 69:28።

- 12 «ሁኩ ለዕዮንሰ ቶኑንኩ ቡዱ ዋመ እኩዕነ ዮአሩ ቶኔተ ዋመ፤ ጠዉ እኩጎሬ ቡሳውቸንን ሜጡብ መቶ ወክተሃ ዋመ እኩተ ዋልቀት አሰንታሰ።
- 13 ሁኩ ቶኖንኩ ዋመት መቱ ሰውቱ ዮሰራን፤ እሰን ዋልቀሰለክ ሹምነቱሰ ህከን ቡሳውቸሃ ኣታአ።
- 14 እሰን ሆልቶ አሌን በገዙ ኪሳእ፤ ጠዉ እኩጎሬ ሆልቶ ቀርቻኖ ቀርቼለክ ዋመ ዋመ እኩቤቺሃ ቁላኖሰ፤ ህትን እሲን ሜጡብ ዮአሩ ገእንቶአረ፤ መጠረንቶአረለክ አመዕነንቶአረ» ዬኤ።
- 15 ህትን መላይኪቹ «ህት ዝነተ አታኢት አፋዕልታን ለኣንት ልግቡ ዉሁ፥ ኡመቱ፥ መኑ፥ ወገኑለክ አደደ አፎሃ ጠዉአእረ።
- 16 ቡሳውቸለክ ለኣንት ቶኑ ቡደት ዝነተ አታኢት አልሴ ግባእ፤ በኣገ አታሴ፤ ከል አት ፊሳሴ፤ ማለሴ አት ገራን ቡሰታሴ።
- 17 ሃሽኣቱሰ ሹልቶተ ከ ሰውት ቀልቤሰ አዕዮሁ መገኑሃን፤ ህከን እኩቤቺሃ መገን ላገት እሆተ ኢለ አሰ መቶ ሰውትን ኣገቀንታበእ፤ ዋምነት ሹምነቱሰ ቡሳውቸሃ አታአ።
- 18 «ህት ለኣንት መንቹት ኡለ አል ዳኖኖ አሌን ዋመ እኩአተ ሎረተ ከተንቹ» ዬኤ።

18

ባብሎን ከተም ኡብተኔሃ

- 1 ህከኒቶ ኤተሮን ሎሩ ሹምነቱ ዮሰ መላይኪቹ ሰሜኛ ድረን ለዕዮም፤ ህከን መላይክ ኬዕምኒቶ ኬዕዮሀሪን ኡለት አበ ኑር እክ ለልቶኡ።
- 2 ሎረ ላጋን «ሎረት ባብሎንቹት ኡቡኤ! ኡቡኤ! እሴን ሩሃንዩ ሄአኖ ቤቹ እኩኤ፤ ሂላ እያኑ ጉዕሙንኩ ገለኖቤቹ እኩኤ፤ ኮፍይታለክ ግቤመሰ ጨኡትለክ ግዙ ጉዕሙንኩ ገለኖቤቹ እኩኤ።
- 3 መሰንትሰ ዝነተ አእሴ ዋይን ጠጀ ኡመቲሃ ጉዕሚንክ አግሶኤ፤ ህትን ኣዱንያ አል ዋመት እሴን ሜጡብ ዝነተ አቶኡ፤ ህትን ኣዱንያ አል ነጋድት እሴ ልግቤ ናጠቀንሺን ኬዕዮሀሪን ቀባጣመተ እኩኤ» ይ ያር።
- 4 ዋልት ላገንት ሰሜኛ
«ኢ ኡመቱ! እሴ ጨቤን በርገንቶኖቹ፤
እሴ አሌን አሜታ በላተ ቤቀማኑተ እኪንበገ፤
እሴ ኣዚቶ ፋሌ!
- 5 ጨብሴ በትኣት ሰማሃ ኢልቶቤቺሃ
መገኑ ብድልሴ ቃጎኡ።
- 6 እሴ ኣሰቶ ጌሰ ኣሰዬሴ፤
አቶ ሆጎተሴ ለሙ አፎ በርግቴን ባቹሴ፤
እሴ አደደ አጌኖሃ ልቀለቆ ጠበቲን
ለሙ አፎ ጠረኘ አቴን ልቀለቆ።
- 7 እሴ ገይሴ ኬዕምኣለክ ናጀተ ኣሰቶ ጌሰ
ኦርሸተለክ ሻዘነተ ኣሰዬሴ፤
እሴን ቀልቤንከሴ
አን ዋመተ እክ አፋዕልኖም፤
ህዬሸተበእ፤
ሻዘነት ሆር ኢልታኤበእ» ይተን ቦንታኢት።
- 8 ህከን እኩቤቺሃ በለት ጉዕሙንኩ መቶ በሬን ኢልታሴ፤
ሬሁት፥ ሻዘነትለክ ጎሩ ኢላኖሴ፤
ገራን ቡባእ፤
እሴ አሌን ፈረደኖሁ
ቀርቹ መገኑ ጠረኘሃን» ዮን ሞጮጩም።
- 9 እሴን ሜጡብ ዝነተ አቶአሩለክ ናጀን ሄኦ ኡለ ዋመት እሴ ቡብን ፋልታ ዉሊልተ ለኣ ወክት እሴተኔሃ ያርተን ኦኣእ።
- 10 እሴን ኦርሸሴ ዋጅት ቁዕራሻን ኡርት «አት ሎረ ከተንቹ! አት ጠረኘ ከተንቹ ባብሎን፤ ፍርዱክ መቶ ሳኣት ጌሳን አሜቶቤቺሃ ኪሳሃ ቆሀኖሄ! ቆሀኖሄ!» ይታአ።
- 11 ሆጎቡሰ ከኒቶ ኤተሮን ህዕረኖሁ ዮበእቤቺሃ ኡለ አል ነጋድንት እሴተኔሃ ኦኣእ፤ ሻዛሴ።
- 12 መርከባንከሰ ሆጎብሞ ዋርቀ፥ ብረ፥ ኬዕምኑ ዮሰ ክኑ፥ ዕንቁ፥ ጡሙ ኦድኑተ፥ ሰሜ ደኑለክ ብሸ ሊቀለቀሞ ኦድኑተ፥ ሃር ኦድኑተ፥ ብሸተ ኦድኑተለክ ጡሙ ፎገሉ ዮሰ ህቀ ጉዕመንክ፥ ዘኔ እንኩተ፥ አበ ጤአተ እኩ ሀቀሃ፥ ነሐሰ፥ ብረተንለክ እብን በረድ ክኒን መክሴሙ ኡዳታ ጉዕመንክ፥

17:12 እሳ. 7፡24። 18:2 እሳ. 13፡21፤ 21፡9፤ ኤር. 50፡39፤ 51፡8፤ ማር. 14፡8። 18:3 እሳ. 23፡17፤ ኤር. 51፡7።
 18:4 እሳ. 48፡20፤ ኤር. 50፡8፤ 51፡6፤ 45። 18:5 ክል. 18፡20-21፤ ኤር. 51፡9። 18:6 መዝ. 137፡8፤ ኤር. 50፡29።
 18:10 ሕዝ. 26፡16-17። 18:11 ሕዝ. 27፡31-36።

13 ቀረፋተ፡ እንጀነተ፡ ከርብተ ዬዮ ጡሙገ እንጀኖርቹ፡ ህጣነ፡ ወይን ጠጅ፡ ወርች ዘይተ፡ ሰልቀዎ ቀመ፡ አለሱ፡ ለሉ፡ ሆለተ፡ ፋርሱተ፡ ኪዕምኣ ጋርተ፡ ርሰተለክ ዎሎሃ መነ እቅ።

14 እሱን «አት ሃዕላቶንት ጡሙርቹ ጉዕመንኩ ኪች ቄዕር መሮኤ፤ ቀባጡክለክ ሹልሙክ ጉዕመንኩ በዕዮኤ፤ ከኒች ኤተሮን ህከረ ጉዕመንክ ሆሮ ደጋንትሰበአ» ይታሲ።

15 ህካን ጉዕመንክ ህዕርተን ቀባጣመተ እኮ ነጋድት ኦርሸሴ ዋጅት ቄዕራሻን ኡርታኤ፤ ኦእንለክ ሻዘን

16 «ጡሙ ኦድኑተለክ ሰመ አጉደኖ ብሽ ኦድኑተ ኦደኣአት፡ ዎርቁንለክ ጤአተ እኮ ኪን ዕንቁንን በለቃ እቅት ሎረ ከተንቸተ ኣዬ! ኣዬ!

17 ከንኩ ቀባጡት መቶ ሳኣት ጌሳን በዕዮ» ይታኦ።
መርከብ ሀላፊቹ ጉዕመንኩ፡ መርከቢን ሃንታ ሙኑ ጉዕመንኩ፡ መርከብ አሊን አታ ሙኑ ጉዕመንኩለክ ባር አሊን ነገዳ ሙኑ ጉዕመንኩ ቄዕራሻን ኡርታኤ፤

18 እሴ ቡበን ፋልታ ዉሊልተ ለአ ወክት «ተ ሎረ ከተንቸተ አጉደኖ ዎሉ ከተሙ ሃዕዮንዶ?» ይተን ያርቶኦ።

19 ህትን ቡዕልሰ አሊን ትበ አቶኤ፤ ኦእንለክ ሻዘን «ባር አሊን መርከቡ ዮሰሩ ጉዕመንኩ እሴ ቀባጣን ቀባጣመተ እኮአሩ ህት ሎረ ከተንቸተ መቶ ሳኣት ጌሳን በኦቤቺሃ ኣዬ! ኣዬ!» ይተን ያርታኦ።

20 ሰዎህ! እሴን ተሽ ዩንክ፤ መገኑ ክዕኔተኔሃ እሴ አሊን ፈረጅቤቺሃ አዕኑ ጠለላኑት፡ አሳበትለክ ነብያኑት ተሽ ዩንክዕይ!

21 ከኒች ኤተሮን መቱ ጠረኙ መላይኬቹ ሎረ ርትም ክን ጌሰ መቱ ክኑ ኬሸ «ሎረት ባብሎን ከተንቸተ ህት ዎልቃን ሀንበለንት ኡባኤ፤ እሴን ከኒች ኤተሮን ሆሮ ደገንታበአ።

22 ክራረ ዎቀርታህኡለክ ሙዘቀኛኖ ላገቱ፡ ሁሉሊተ ቡሳህኡለክ ጡራምበ ቡሳ ላገት ከኒች ኤተሮን ኪን ሞጮጨመናበኤ፤ እኮሰርቹ መክሰኖ ሀይመት ዮሰ መንቹ ከኒች ኤተሮን ኪን ደገመናበኤ፤ ህትን ርትም ላገቱ ከኒች ኤተሮን ኪቤቸን ሞጮጨንታበኤ።

23 ኩራዙክ ከኒች ኤተሮን ኪቤቸን ለሊሰናበኤ፤ እዜቸለክ እዜች ላገት ከኒች ኤተሮን ኪን ሞጮጨመናበኤ፤ ነጋድክ ኣዲንያ አል ሎርሎራኑ ሙኑ ሃኦኤ፤ ሲርኪክክ ኡመት ጉዕመንክ ሉሲሶንት» ዮን ባር አሊን ቶረኤ።

24 «ህትን ራጋኑት፡ ነብያኑት ኣዲንያ አሊን ሺመ መን ቁጉ ጉዕመንክ እሴ ኣዜን ደገዎኡ።» ዩሉ።

19

1 ህከኒች ኤተሮን ሰማን ልግቤ መን ላገተ አጉደኖ ሎረ ላገተ «መገኒሃ ገለቱ አሁሰ! ፌሱሁ፡ ኪዕምኦለክ ዎልቀት መገንሃን።

2 መሰንትሰ ፍርዲሰ ሀንቅሃለክ ጌጥዬሃን፤ ኣዲንያ አል ዝነተ እኒንከሴ ንጂሲሶ ሎረተ ዝነተ አታኢተ ፈረጅሴ፤ ህትን ካዲማሴ ቁግ ገዲተ እሴች ፋሎኡ» ይተን ሞጮጨም።

3 ቲሁ «መገኒሃ ገለቱ አሁሰ! እሴች ኬኣ ዉሊልተ ዘላላሚሃ ሰማ ዎልት ፋልታኦ» ይተን ያርቶኦ።

4 ህትን ለዎይዲምኔ ሾሉንኩ ባልቀትለክ ሾሉንኩ ክልቀቱ ጄንት ቦርጭመ አሊን አፋዕሊ መገኒሃ ኡብ «አማዕሳ! መገኒሃ ገለቱ አሁሰ!» ይተን ሰገድኡ።

ሆልች ቦሎች ድግሰ

5 ህከኒች ኤተሮን «እሴ ዎጅቴነንተ ካዲመት ጉዕመንኩ ቀቀዋኑንት ሎርሎራኑንት መገኑኔ ገለትጭዬ!» ይታ ላገት ኪዕምኣ ቦርጭማች ፋሎ።

6 ህከኒች ኤተሮን ልግብዩ መን ላገት፡ ዛዘኖ ዊ ላገት፡ ጠረኙ ጉገኛ ላገገ ዮ ላገት «መገኒሃ ገለቱ አሁሰ! ጉዕመንክ አታለኖ ቀርቹ መገኑኔ ዎመ እኮኤ!

7 ሆልች ቦሎቹ ኢሊቤቺሃለክ እዜቹንት ገይሴ ቅጥ አቶቤቺሃ ሙንደዕኑን! ሙንዲኖን እሱንከ ከበጅኖ።

8 እሴንከ በለቀኖ ነጠ ኦድኑተ ኦደኦተ ኣሴመሴ፤ ህት ኦድኑት ጠለላኖ ፈይመተ ሆጉ» ዮን ሞጮጨም።

9 ህከኒች ኤተሮን መላይኬቹ «ህከ ሆልች ቦሎች ድግሲሃ ገአንቶሩ ማሰእንቶአረ» ይት ከተብ ዩኤ፤ ቲሁ «ኩሩ መገን ሀንቅተ ላገ» ዩሉ።

18:13 ሕዝ. 27፡12፤ 13፤ 22። 18:15 ሕዝ. 27፡31፤ 36። 18:17 እሳ. 23፡14፤ ሕዝ. 27፡26-30። 18:18 ሕዝ. 27፡32። 18:19 ሕዝ. 27፡30-34። 18:20 ዘዳ. 32፡43፤ እር. 51፡48። 18:21 እር. 51፡63-64፤ ሕዝ. 26፡21። 18:22 ሕዝ. 26፡13፤ እሳ. 24፡8። 18:23 እር. 7፡34፤ 25፡10። 18:24 እር. 51፡49። 19:2 ዘዳ. 32፡43፤ 2 ሃ. 9፡7። 19:3 እሳ. 34፡10። 19:5 መዝ. 115፡13። 19:6 ሕዝ. 1፡24፤ መዝ. 93፡1፤ 97፡1፤ 99፡1። 19:8 ማቶ. 22፡2-3። 19:9 ማቶ. 22፡2-3።

10 እን መላይኪቸሃ ሰገዶተ ሚኒንተኤ ሎካችሶ ዋርን ጎምብሰሞም፤ ጠዉ እኩጎሬ እሰ «አጉር! ካን አቶቶ፤ እን ኪንላክ እሰ መሰከር ጠዉ እፎ ኪ አመኦሶን ሜጡብ ካድንቸሃን፤ እት መገኒሃ ሰገድ፤ መሰንትሰ ሀንቅ ሬጉ ጉዕሙንኩ ኢሰተኔሃ መሰከርታኤ» ዬኤ።

ኮምቦ ፋሾን ቆጶ ፋሻንቶተኔሃ

11 ሀከኒች ኤተርን ሰምሁ ፈንተዕያን ኮምቡ ፋሹ ለዕዮም፤ ፋሽ አሌን ቆጶንኩ አመዕነሞሃለክ ሀንቁሃ ዬናሃን፤ እሰን ሀንቁን ፈረደና፤ ኦላመና።

12 አልሰ ገረ ለበነተ አጉዳኢ፤ ቡዕልሰ አሌኒን ልግቡ አክሊሉ ዮኤ፤ እሰ ቤሉ አዩሁ ደጎተ አታለናበኢሁ እሰ አሌን ከተባሞ ሱዕሙ ሂዕዮ አቅ።

13 እሰ ቁገን ጨፎሬሙ ኦድኑተ ኦደዕዮ አቅ፤ ሱዕሙንኩሰ «መገን ላገተ» ዬናሃን።

14 ሀትን ዋጂ ነጠ እኮ ኦድኑተ ኦደኑ ኮምቦ ፋርሶን ቆጶ ሰሜ ጎንቱ አምንታሲት አቅ።

15 ኡሙቲንከ ዋቀራፍ ኢጳሹ ሲፉ አፌችሶ ፋላናት አቅ፤ ሀትን ብረት በርቲን ጠቀናሰ፤ እሰን ጉዕመንክ አታለና መገን ዋጅሲሰና ኡሙዕርሰ ለሊሰና ዋይን ጠጀ ጨንሹናቤቸን ዋይን ጨንሹና።

16 ኦድናሰለክ ጋልሰ አሌን «ዋማና ዋሙ፤ ቀርቻና ቀርቹ» ዮና ሱዕሙ ከተባሞኤ።

17 ሀከኒች ኤተርን አሪ አሌን ኡርዮኤሃ መቱ መላይኪቸ ለዕዮም፤ እሰን ሰሜ አሌን ብርይታ ጨኦተ «ሎሩ መገኑ ቅጥአዕዮሀዕኔ ድግሲሃ አሜ! ጭምይዬ!

18 ዋሙ ማለ፡ በገዝ ሀለቀ ማለ፡ ጠረኘ መን ማለ፡ ፋርሶ ማለ፡ ፋርሱተለክ ፋርሱተ ቆጶ መን ማለ፡ ቀርቻናለክ ርሰ ማለ፡ ቀቀቀናለክ ሎርሎራና ማለ አሜ አቸ» ሀት ዮን ሎረ ላጋን ያር።

19 ሀትን ቡሳውቹለክ ኡላ አል ዋሙት ዋታደሩንኩሰ ኮምቦ ፋሽ አሌን ቆጶሀንላክ ጎንቲንከሰ ሜጡብ ኦላንቶተ ጭምይታን ለዕዮም።

20 ጠዉ እኩጎሬ ቡሳውቹ አፈዋ፤ ሀትን እሰን ሜጡብ ብሬንከሰ ልግብ አጀብሲሰና ጠዉ እእን ሂዕዮ ክዝብ ራጋንቹ አፈዋ፤ እሰን ቡሳውቹ መላት ዮሰረላክ ቡሳውቹ ሞሰሊሃ ሰገድእረ አጀብቱተ አእን ሉሲሰናሰ አቅ፤ ኩሩ ለማንኩ ፎሊን ሂኑገን ዲን ዬና ቡባና ገረ ባር ኣዜን ኡጄመሰ።

21 ፈቆፋሩሁ ኮምቦ ፋሽ አሌን ቆጶሀን አፌቹ ፋፊታ ሴሬን ሬታን ጨኦት ጉዕሙንኩ ማለሰ እት ዱቦኤ።

20

ኩሜ ዘማን ዋምተኔሃ

1 ሀከኒች ኤተርን አበ ጥዕላሽ በወ ፈኔና ቁልፈለክ ሎረ ሰንሰለተ አንጋንከሰ አፎ መላይኪቸ ሰሜች ድረን ለዕዮም።

2 እሰን ደሀቹ አና ኩሜ ዘማን ኡሱር፤ ሁኩ ደሀቹ አልቢሱ ሀከረንገ ሻይጣኑ ወዕኔሃ ዋሪቹ አቅ።

3 ኩሜ ዘማን ጎፎተ ኢላ ኡሙት ሉሲሰናበእገ መላይኪቸ ደሀቹሰ ሎረ ጥዕላሽ በዋን ቶር አሌሰ ጡና ማተብ አዕይ አሸ፣ ሁኩ ኩሜ ዘማን ጎፎች ኤተርን ቀዋ ወክቲሃ ሂረሙ ሀሰሰናሰ።

4 ሀከኒች ኤተርን ኬዕምኝ ቦርጭመተ ለዕዮም፤ ሀከን ኬዕምኝ ቦርጭመ አሌን ፈረደተ ሹምንቱ አሰሞሰሩ አፋዕልቶኤሃ ለዕዮም፤ ኢሰተኔሃ መሰከርቶቤቸሃለክ መገን ላገተኔሃ ቡዕሉሰ ሙርተዕዮ መን ነብሳሃ ለዕዮም፤ እሰን ሀከን ቡሳዊሃለክ ሞሰሊሃ ሰገድበረ፡ መላሰ ሚኒንከሰ ሀከረንገ አንጋንከሰ አቶበአረ አቅ፤ እሰን ሬሆች ኪኤ መሲሂን ሜጡብ ኩሜ ዘማን ዋሙ እኮኤ።

5 ጠዉ እኩጎሬ ዋሉ ሬቶ ሙኑ ኩሜ ዘማን ጎፎተ ኢላ ሬሆች ኪኤበአ፤ ሁኩን ወዕኔሃ ሬሆች ኪኤሃን።

6 ዋዕኔ ሬሆች ኪኤ ወጥ ደአታሩ ማሰአንቶአረላክ ጠሊላናተ፤ መሰንትሰ ለገክ ሬሆት እሰ አሌን ሹምንቱ ዮሰበአ፤ እሰን መገንላክ መሲህ ቂሰተ እክ መሲህን ሜጡብ ኩሜ ዘማን ነገሳኤ።

ሻይጣኑ ቁለሙሰ

7 ሁኩ ኩሜ ዘማን ጎፎች ኤተርን ሻይጣንቹ ኡሱርች ሂረሙና።

8 እሰን ኣዲንያ አሌን ዮ ኡሙት ጉዕመንክ ጎገለክ ማጎገሃ ሉሲሶተለክ ኦሊሃ ቅጥ አኦተ ፋላና፤ እሰ ዋሊንሹንኩ ባር ገበላን ዮ ሸፋሪያ ጌሰ።

9 እሰን ኡላ አል ጉዕመንክ ሆርት ጠሊላና ቀኣተለክ ኢትንቶ ከተንቹተ ረቦኤ፤ ጠዉ እኩጎሬ ሰሜች ገረት ድርት ቡሰት ሹልቶሰ።

10 እሰተ ሉሲሹ አልቢሱ፡ ቡሳዊቹለክ ክዝባኝ ነብዬቹ ዮ ቤቹ ዲን ዬና ቡባና ባር ኣዜን ቶረንቶኤ፤ ሀከኒን ሀንከዕርተለክ በራሃ ዘላላሚች ዘላላመ ኢላ ኦርጨቀንታኤ።

መጨረሻ ፍርድተኔሃ

11 ሀከኒች ኤተርን ሎረ ዋጂ ኬዕምኝ ቦርጭመተለክ ቦርጭመሰ አሌን አፋዕልቶኤሃ ለዕዮም፤ ብሬችሰ ሰምሁለክ ኡለት ሀንቶኤ፤ ቤቸንኩ ደገሞሰበኤ።

12 ህትን ቀቀዉለከ ሎርሎሩ ሬቶአሩ ጉዕሙንኩ ኪዕምኝ ቦርጭመ ብሬን ኡርታን ለዕዮም፤ ህከንቢቾንን መጻፈንት ፈንተኦኡ፤ ህትን ምሉ መጻፋ ሁከንን ሂለ መጻፋ ፈንተዕዮ፤ ሁኩ ሬቶአሩ መጻፋን ከተበም ሆሳስ ሃሊን ፍርደ ቶጎኡ።

13 ባሩንኩ ኣዜሰ ዮ ሬቶአረ ኣሴእ፤ ህትን ሬሁትለከ ኣዛቡ እስ ኣዜን ሬቶአረ ኣቶኡ፤ መት-መቱንኩ ሆሳስ ሃሊን ፍርደ ኣእቶኡ።

14 ህከኒች ኤተሮን ሬሁትለከ ጃነሙ ገረ ባር ኣዝ ቶረንቶኡ፤ ሁኩ ገረ ባሩ ለምቅተ ሬሁ።

15 ሱዕሙስ ሂለ መጻፋን ከተበምባሁ ኣዪሁ ገረ ባር ኣዜን ቶረሞ።

21

ሃዕሮ ሰማለከ ሃዕሮ ኡለተ

1 ህከኒች ኤተሮን ሃዕሮ ሰማለከ ሃዕሮ ኡለተ ለዕዮም፤ መሰንትስ ዎዕኔ ሰሞለከ ኡለት ህጎኡ፤ ከኒች ኤተሮን ባሩንኩ ዮ ቦኡ።

2 ህትን ጠሊለት ከተንቹት ሃዕሮት ዩሩሳሌም ጨውሃሴ መክቶ ኣዜቾን ተቃጠብ ሰሜች መገን ኣዲቾ ድርተን ለዕዮም።

3 ህትን ሎረ ላገት ኪዕምኝ ቦርጭማች «መገን ገልትት መን በላን እኩኡ፤ እስን ኣሳን ሜጡብ ሂለና፤ እስን እስ ኡመት ኣካእ፤ መገኑ ገዉንኩስ መገኑስ እክ ኣሳን ሜጡብ እሆና።

4 ህትን ኣሊቶስ እንጂጃት ጉዕመንከ ሺንሸና፤ ህከኒች ኤተሮን ሬሁት ህከረንገ ሻዘነት ህከረንገ ኣልፋቴት ህከረንገ ኦሪሸት ኣካበኣ፤ መሰንትስ ከኒች ብሬ ጠዉ ጉዕሙንኩ ህጎኡ» ይተን ሞጮጩም።

5 ህከኒች ኤተሮን ኪዕምኝ ቦርጭመ ኣሊን ኣፋዕሊኢሁ «እን ጉዕመርቹንከ ሃዕሮ ኣለም» ዩኣ፤ ህትን እስን ኤሳሃ «ት ላገት ኣመዕነሞኢሃለከ ህንቅ እኩቤቹሃ ከተብ» ዩኡ።

6 ህከኒች ኤተሮን «እበቀዕዮ፤ ብሬሁለከ ኤተሪሁ ኣኔት፤ ሰገሰሰህኒሃ ሂለ ዊ ቡቁተ ጠለዕል ሞግቤሉ ህትን ኣሳም።

7 ድለ ኣዕዮሁ ካን ረገኣና፤ ኣንን መገኑስ እሃም፤ እስን ቤቱኤ እሆና፤

8 ጠዉ እኩባ ዊጅታእሩ፤ ኣመዕነቱ ዮሰበእሩ፤ ንጅሶእሩ፤ ነብሳ ሸታእሩ፤ ዘነተ ኣታእሩ፤ ኪላኑት፤ ሸርክተ ኣታእሩ፤ ክዘበኛኑት፤ ጉዕሙንኩ ወጡስ «ዲን» ዩዮ ቡባ ገረ ባር ኣዜን እሆና፤ ሁከንን ለምቅተ ሬሁ» ዩኡ።

ሃዕሮ ዩሩሳሌምተኔሃ

9 ህከኒች ኤተሮን ኤተር ለመሉንኩ መገን በለት ዊንቶ ለመላ ጠበትተ ኣፎ ለመላንከ መላይካች መቱ ኣሜች «እም! ሆልች ሞኒ እመተ እኩ ኣዜቹተ ለሊሳንኪ» ዮን ጠወዕዮ።

10 መገን ኣያንን መቶ ሎረ ቆተ ኣል ፋሸ ጠሊለተ ዩሩሳሌም ከተንቹት መገን ኣዲቾ ሰሜች ድርተን ለልሾኤ፤

11 እሴን መገን ኪዕምኝን ለሊሳኣት ኣቅ፤ ኑርሴ በለቁንኩ ኣበ ጤኣተ እኩ ክንገ ኣያሰጺድ ክንገ እክ ለኣቃንቻገ በለቀናሃ እቅ።

12 ህከን ከተንቹሃ እበ ቁራዕሩት ግንብ ኦተትለከ ቶን ለሙ ኡሩቲ ዮሴሃ እቅ፤ ህትን ቶን ለሞሃንከ ኡሮን ቶን ለሙ መላይክት ሂኦ እቅ፤ ህከን ኡሮ ኣሊንን ቶና ለሞሃንከ እሰራኤል ዘረ ሱዕሙ ከተበምኡ እቅ፤

13 ህትን ሸርቁን ሰስ ኡሩት ቅልቢን ሰስ ኡሩት ከኣጽን ሰስ ኡሩት ገርቢን ሰስ ኡሩት ሂኦ እቅ።

14 ህከን ከተም ግምብ ኣታተ ቶን ለሙ ቀበቡ ሂዕዮስ እቅ፤ ህከን ቀበብ ኣሊን ሆልች ቶን ለሞንከ ኣሳበ ሱዕሙ ከተበም እቅ።

15 ህከን ኤሳሃ ጠወዕዮ መላይኪቹ ከተመ፡ ከተምስ ኡሩተለከ ግንብ ኦተተ ብኪኖ ዎርቅ ቶሙ ሂዕዮስ እቅ።

16 ከተምቾስ ቅራዕርመሴለከ ኣልባዕልመሴ ቅጡ እክ ሾኣንኩ መረበሴ ቅጡሃን፤ መላይኪቹንኩ ከተመስ በርቲንከስ ብክሃን ቅራዕርመሴ ለም ኩምተ ሾል ጥቤ ኪሎ ሜትር * ጌሰ እኩ፤ ኣልባዕልመሴለከ ኡርሸሴ ህከን ጌሰ እኩ።

17 ህትን መላይኪቹ ከተምስ ግምብ ኣተተ ኡርሸሴ ብኪኣ፤ መላይኪቹ መን ኣንጋን ቅጡ እኩ ኣንገሰ ብክሃን መት ጥብታ ሸይልኔ ሾሎ ኣንገ ብኩተ እኩ፤

18 ግምብስ ኣተተ ኣተንቶኢሁ ኢያሰጺድ ክኒንት፤ ህት ከተንቹት ጡመ ለኣቃንቻገ ዮ ነጠ ዎርቁን ኣጃረንቶኣተ እቅ።

20:12 ዳገ. 7፡9-10 21:1 ኣሳ. 65፡17፤ 66፡22 2 ጴጥ. 3፡13። 21:2 ኣሳ. 52፡፤ 61፡10፤ ሞና. 3፡12። 21:3 ሕዝ. 37፡27፤ ለቄ 26፡11-12። 21:4 ኣሳ. 25፡8፤ 35፡10፤ 65፡19። 21:6 ኣሳ. 55፡1። 21:7 2 ሳሙ. 7፡14፤ መዝ. 89፡26-27። 21:10 ሕዝ. 40፡2። 21:13 ሕዝ. 48፡30-35። 21:15 ሕዝ. 40፡3። * 21:16 2,400 ኪሎ ሜትር ጌሰ እኩ- ዮሁ ግርክ መጻፋን 12,000 ኣስታድዮ ዮሳ፤ 1 ኣስታድዮን 185 ዮሁ ከተበምኡ። 21:18 ኣሳ. 54፡11-12።

19 ህክን ከተሞ ግምብ ኦተ ቀበቡ እደደ ጤአተ እኮ ክን ደንን መክዮሃ እቅ፤ ምኒ ቀበቡ ኢያሰጸድ ዩሮሃ ክኑ፤ ለምቂሁ ሰንጥር ዩሮሃ ክኑ፤ ሰቂሁ ከልቁዶን ዩሮ ክኑለክ ሾልቂሁ መርግድ የሮሃ ክኑ።

20 ኦንትቂሁ ሰርዶንክሰ ዩሮሃ ክኑ፤ ለሀብቁሁ «ሰርዶን» ዩሮሃ ክኑ፤ ለመልቂሁ «ክርሰቴሎቤ» ዩሮሃ ክኑ፤ ሀዜትቂሁ «ቢረሌ» ዩሮሃ ክኑ፤ ሆንሰቂሁ «ወራወሪ» ዩሮሃ ክኑ፤ ቶንቂሁ «ክርሰጽራሰሰ» ዩሮሃ ክኑ፤ ቶን መትቂሁ «ያክንት» ዩሮሃ ክኑ፤ ቶን ለምቂሁ «እሚቴሰጠረፍ» ዩሮሃ ክኑ እቅ።

21 ሁኩ ቶን ለሙንኩ ጡፋ ቶሩ ለም ደንን እጃረሞሃ እቅ፤ መት-መቱሰ ጡፋ መቱ ዕንቁን ስመክዮሃ እቅ፤ ከተምሰ ዎቆ እሉቃንችገ ለሊሰኖ ነጠ ዎርቂን እጃረሞሃን እቅ።

22 ጉዕመንክ ኦተላኖ ቀርቼ መገኑለክ ሆልቼ ህክን ከተማን መገን ምኒ እኩቤቼሃ ከተም ኦዜን ዎሉ መገን ምኒ ለዕዮምበእ።

23 ህክን ከተማን መገን ኬዕምኣ ኑሩ ለሊሰኖሰቤቼሃለክ ሆልቼ ገወንኩሰ ኑርሴ እኩቤቼሃ ኦሩ ህከረንገ አገንቼ ለልሶሴተ ሀሰሰኖሴበእ።

24 ኡመቱንኩ ኑሪንከሴ ፈንቀላንታኦ፤ ህትን ኡለ ኦል ዎመት ኬዕምኣሰ ከተም ኦዜ ኤባእ።

25 ህክን ከተማን ሀንከዕርት ኖበእቤቼሃ ኡራከሴ እኩሰበርሃ ጡፈንታበእ።

26 ኡመት ዎመ ሎርመተለክ ኬዕምኣ እሴቤቼ ኤባእ።

27 ጠዉ እኩጎሪ ኮኖየርቹ እኩ ጠዉ ሆሮ እሴቤቼ አገናበእ፤ ንጃሰ እእኖሁለክ ክክብ ጠወእኖ ሆሮ እሴቤቼ አገናበእ፤ እሴቤቼ ኦጋሩ ሱዕሙሰ ሆልቻ ሄእ መጻፋን ከተባንቶአራን።

22

1 ህከኒች ኤተሮን መላይኬቼ መገንለክ ሆልቻ ኬዕምኣ ቦርጭማች ፋለኖ ለአቃንችገ ለሊሰኖ ነጠ እኩ ሄእ ዉሀ ዛዘኖ ዋሃ ለልሾኤ።

2 ሁኩ ዛዘኖ ውሀ ህክን ከተም ዎቃሃ ለሙብ አዕይ ህገኖ እቅ፤ ህክን ዛዘኖ ዊ መኪ ኦዲንለክ ጉረ ኦዲን አገናን አገናን ላለን ዘማኒን ቶን ለሙ ወክት ላልቹ ላለኖ ሄእ ሀቁ ሄዕዮ እቅ፤ ህክን ሀቅች ኡመቱ ሀበረሰ ፈይመተ ደኦተ ደግለሸቀመኖ እቅ።

3 ከኒች ኤተሮን ቦርሩ ሆሮ ሄእኖበእ፤ ከተማንከሰ መገንለክ ሆልቻ ኬዕምኣ ቦርጭመት ከተምሰ ኦዜን አካእ፤ ካዲመሰን ሰገዳሰ።

4 እሰን ሚንሰ ለኦእ፤ ህትን ሚኒንከሰን እሰ ሱዕሙ ሄእኖ።

5 ከኒች ኤተሮን ሀንከዕርት ሆሮን ሄእበእ፤ ቀርቼ መገኑ ለሊሰኖሰቤቼሃ ኩራዝ ህከረንገ አሪ ኑሩ ሆሮን ሀሰሰኖሰበእ፤ እሰን ዘላላሚሃ ነገሳእ።

ኢሰ ፈንቀል እሚትሰተኔሃ

6 ህከኒች ኤተሮን መላይኬቼ «ኩ ላገት አመዕነንቶአተለክ ሀንቅታን፤ ነብያክተ ጠውሲሰኖ ቀርቼ ቀዎ ወክቲን እሆኖ ጠወ ካዲማተሰ ለሊሰተ መገኑ መላይኬቼሰ ሶኮኤ» ዩኤ።

7 ኢሰን «አን ደዕል እሚታም፤ ከን መጻፍ ራግ ላገተ አገረኖህ ማሰለሞአሃን» ዩኤ።

8 አን ያህይ ገወንኩለክ ህከረ ለዕዮሚሁለክ ሞጮጮ፤ ሀከ ጠወ ለዕዮምለክ ሞጮጮ፤ ዎወክት ህክን ለሊሾኤ መላይኬቼሃ ሰገደተ ሎከሰ ኦዲን ኡሮም።

9 ጠዉ እኩጎሪ መላይኬቼ «አጉር! ካን አቶት፤ እን ኪን፤ አመክ ኦሶንለክ ነብያካን ሚጡብ ከን መጻፍ ላገታ አገርታ ነብያካን ሚጡብ ካድንቹሃን፤ አት መገኒሃ ሰገድ» ዩኤ።

10 ህትን እሰን «ወክቱ ኢሊቤቼሃ ከን መጻፋን ኖ ራግ ላገተ ማተቢን ጡሮት።

11 ከኒች ኤተሮን ሄሉ ሀልማንተሰ ቀጠሉን፤ ንጃሾንኩ ንጃሰ እሁን፤ ነጠንኩ ነጠ እሁን፤ ጠሊሉንኩ ጠሊሊ እሁን» ዩኤ።

12 ህትን «አን ደዕል እሚታም! ጉዕሚንከሰ ሆሰሰ ጌሰ ኦጎም ዋገ አሮም፤

13 ብሪሁለክ ኤተሪሁ፤ ወዕኔሁለክ መጨረሻሁ አኔት» ዩኤ።

14 ሄእ ሀቅቾች ላልቹ እትሃለክ ኡሮንከሰን ከተመ ኦጎተ መብቱ ሄኦሰተ ኦድኑሰ ሚጭቶአሩ ማሰለንቶአራን።

15 ጠዉ እኩጎሪ ወሸገ ንጃሰሳሩ፤ ሲረ አታአሩ፤ ዘነተ አታአሩ፤ ነብሳ ሸታአሩ፤ ሸርክተ አታአሩ፤ ክክብ ኢትታአሩለክ ክክብ ዎቁን መርታሩ ጉዕሙንኩ ከተሚች አብል አካእ።

16 «አን ኢሰ ከ ሞሰክርነቱ ኦሶህዕኔተ መላይከኤ አመዕናኖ ጭምት ዱእ ሞናተ ሶኮም፤ እን ደዉዴ ጠጽሃለክ ዘሪሃን፤ ለሊሰ ሱጴ ቤዜት አኔት።»

† 21:21 ዕንቁ- ዩ ባር ኦዜን ኖ ቡዳሚ ኦዜን ጨለገ ዮላሃ እክ ኦዜንከሴ እደደርቹ ዩንኩ ሸፋርገኖርቹ ኦገ ቀሰኖሴቤቹሃ ቀሰኖሴህ ከዕምቶተ ይት አታላሃ ኮቦ። 21:23 እሳ. 60፣19-20። 21:24 እሳ. 60፣3። 21:26 እሳ. 60፣11። 21:27 እሳ. 52፣1፤ ስከ. 44፣9። 22:1 ስከ. 47፣1፤ ዘካ. 14፣8። 22:2 ከል. 2፣9፤ ስከ. 47፣12። 22:3 ዘካ. 14፣11። 22:5 እሳ. 60፣19፤ ዳን. 7፣18። 22:11 ዳን. 12፣10። 22:12 እሳ. 40፣10፤ 62፣11፤ መዝ. 28፣4፤ ኤር. 17፣10። 22:13 መና. 1፣8፤ 17፣ 2፣8፤ እሳ. 44፣6፤ 48፣12። 22:14 ከል. 2፣9፤ 3፣22። 22:16 እሳ. 11፣1፤ 10።

17 ጠሊሉ አያኑለከ እዜቸንት «አም!» ይታኣ፤ ህትን ሞጮጨኖንኩ «አም!» ዩን፤ ሰገባንኩ አሚቱን፤ ሀሾንኩ ሄእ ዋሃ ዋግቤሉ ህትን አኑን።

18 ከን መጻፍ ኣዜን ከተበንቶ ራግ ላገተ ሞጮጨኖህኒሃ ጉዕሚንከ ጠረኝሽ ኩላም፤ አዪሁ ከን ላገ አሊን መቱርቹ በርጌጎሬ መጻፋን ከተበንቶ በለተ መገኑ አሊሰ በርገኖሰ።

19 አዪሁ ከን ራግ መጻፋን ከተበንቶ ላጋቹ መቱርቹ ጤዕይሾጎር ከን መጻፋን ኩላም ሄእ ሀቅ ላልቹች ጠሊላ ከተንችች መገኑ ወጥሰ ጤዕይሰኖ።

20 ከን ጉዕመርቹንከ ሞሰክር አኮሁ «ሀንቅንከ ደዕል አሚታም» ዮኖ። አሚዕን! ቀርቾ ኢሰ አም።

21 ቀርቾ ኢሰ ኣሰቱት ጉዕሚንከክዕኔ * ሚጡበ እሁን፤ አሚዕን።

22:17 እሳ. 55፣1። 22:19 ዘዳ. 4፣2፤ 12፣32። * 22:21 ጉዕሚንከክዕኔ፡- የኖሁ መት-መቱ ሉሀ ኪታበት «ጉዕሚችን» ይተን ዋሉሰንገ «መገን ኡመቲች» ይታኣ፤ «መገን ኡመቲች ጉዕሚችን» ይታእሩ ዮኡ።